

S. AURELI AUGUSTINI

HIPPONENSIS EPISCOPI

AD MARCELLINUM

DE CIVITATE DEI CONTRA PAGANOS

Libri viginti duo ^(a).

LIBER PRIMUS.

Paganos reprehendit, qui orbis calamitates, maximeque Romanæ urbis recentem a Gothis vastationem christianæ religioni, qua deorum cultus prohibetur, tribuebant. Agit de commodis et incommodis, quæ tunc bonis et malis, ut solet, fuerunt communia. Illorum denique retundit procacitatem, qui christianarum feminarum violatum a militibus pudorem objectabant.

PRÆFATIO.

De suscepti operis consilio et argumento.

Gloriosissimam civitatem Dei, sive in hoc temporum cursu, cum inter impios peregrinatur ex fide vivens (*Habac. II, 4*), sive in illa stabilitate sedis æternæ, quam nunc exspectat per patientiam (*Rom. VIII, 25*), quoadusque iustitia convertatur in iudicium (*Psal. XCIII, 15*), deinceps adeptura per excellentiam victoria ultima et pace perfecta, hoc opere a te instituto¹, et mea promissione debito, defendere adversus eos qui Conditori ejus deos suos præferunt, filii charissime Marcelline, suscepti. Magnum opus et arduum: sed Deus adjutor noster est (*Psal. Lxi, 9*). Nam scio quibus viribus opus sit, ut persuadeatur superbis quanta sit virtus humilitatis, qua sit ut omnia terrena cacumina, temporali mobilitate nutantia, non humano usurpata fastu, sed divina gratia donata celsitudo transcendat. Rex enim et conditor civitatis hujus, de qua loqui instituimus, in Scriptura populis suis² sententiam divinæ legis aperuit, qua dictum est, *Deus superbis resistit, humilibus autem dat gratiam (Jacobi IV, 6; et I Petr. V, 5)*. Hoc vero quod Dei est, superbæ quoque animæ spiritus inflatus affectat, amatque sibi in laudibus dici,

Parcere subjectis, et debellare superbos
(*Virgil. Æneid. lib. 6, vers. 834.*)

Unde etiam de terrena civitate, quæ cum dominari

¹ Editiones Vind. Er. Lov. habent, *ad te instituto*. At Am., id est Amerbachiana editio et plures probæ notæ Mss., *a te instituto*. Propositum enim a Marcellino id opus fuerat ejus. Inter Augustinianas 136, n. 3, ipsique promissum ab Augustino Epistola 138, n. 20, sicuti nunc observavimus in voluminis hujus præfatione. Prosequuntur ex prædictis codicibus nonnulli, *et mea ad te promissione debito*.

² Sic Mss. Editi autem, *populi sui*. Sic etiam Corbeiensis 786 M.

(²) Iacobi circa annum 415, non absoluti ante annum 438.

appetit, etsi populi serviant, ipsa ei dominandi libido dominatur, non est prætereundum silentio quidquid dicere suscepti hujus operis ratio postulat, et facultas datur.

CAPUT PRIMUM. — *De adversarii nominis Christi, quibus in vastatione Urbis propter Christum Barbari pepercerunt*¹.

Ex hac namque existunt inimici, adversus quos defendenda est Dei civitas: quorum tamen multi, correcto impietatis errore, cives in ea sunt satis idonei; multi vero in eam tantis exardescunt ignibus odiorum, tamque manifestis beneficiis Redemptoris ejus ingrati sunt, ut hodie contra eam linguas non moverent, nisi ferrum hostile fugientes, in sacratis ejus locis vitam, de qua superbiunt, invenirent. Annon etiam illi Romani Christi nomini infesti sunt, quibus propter Christum Barbari pepercerunt? Testantur hoc martyrum loca et basilicæ Apostolorum, quæ in illa vastatione Urbis ad se confugientes suos alienosque receperunt (a). Hucusque cruentus sæviebat inimicus; ibi accipiebat litem trucidatoris furor: illo ducebantur a miserantibus hostibus quibus etiam extra ipsa loca pepercerant, ne in eos incurrerent, qui similem misericordiam non habebant (b). Qui lamen etiam ipsi alibi truces atque hostili more sævientes, posteaquam ad loca illa veniebant, ubi

¹ Editi addunt, *victis*. Quæ vox, abest a manuscriptis.

(a) Orosius, lib. 7, cap. 59, scribit Alaricum capta Urbe præceptum suis hoc dedisse, « ut si qui in sancta loca, præcipueque ad sanctorum apostolorum Petri et Pauli basilicas confugissent, hos imprimis inviolatos securosque esse sineant. »

(b) Hanc Barbarorum humanitatem expertæ sunt Marcella et filia ejus Principia, quas in sua domo repertas ad basilicam s. Pauli deduxerunt, teste Hieronymo in Epistola 154, ad Principiam. De alia femina ad s. Petri basilicam, ut ejus pudori parceretur, perducta a milite, narrat item Sozomenus, lib. 9, cap. 10.

fuerat interdictum, quod alibi jure belli licuisset, tota ferendi refrenabatur immanitas, et captivandi cupiditas frangebatur. Sic evaserunt multi, qui nunc christianis temporibus detrahunt, et mala quæ illa civitas pertulit, Christo imputant: bona vero quæ in eos, ut viverent, propter Christi honorem facta sunt, non imputant Christo nostro, sed fato suo: cum potius deberent, si quid recti saperent¹, illa, quæ ab hostibus aspera et dura perpessi sunt, illi divinæ providentiæ tribuere, quæ solet corruptos hominum mores bellis emendare atque conterere; itemque vitam mortalium justam atque laudabilem talibus afflictionibus exercere, probatamque vel in meliora transferre, vel in his adhuc terris propter usus alios detinere: illud vero, quod eis vel ubicumque, propter Christi nomen, vel in locis Christi nomini dedicatissimis² et amplissimis, ac pro largiore misericordia ad capacitatem multitudinis electis, præter bellorum morem truculenti Barbari pepercerunt, hoc tribuere temporibus christianis; hinc Deo gratias agere, hinc ad ejus nomen veraciter currere, ut effugiant pœnas ignis æterni; quod nomen multi eorum mendaciter usurparunt, ut effugerent pœnas præsentis exitii. Nam quos vides petulanter et procaciter insultare servis Christi, sunt in eis plurimi qui illum interitum clademque non evasissent, nisi servos Christi se esse finxissent. Et nunc ingrata superbia atque impiissima insania ejus nomini resistunt corde perverso, ut sempiternis tenebris puniantur, ad quod nomen ore vel subdolo confugerunt, ut temporali luce fruerentur.

CAPUT II. — *Quod nulla unquam bella ita gesta sunt, ut victores, propter deos eorum quos vicerant, parcerent victis.*

Tot bella gesta conscripta sunt, vel ante conditam Romam, vel ab ejus exortu et imperio: legant, et proferant sic ab alienigenis aliquam captam esse civitatem, ut hostes qui ceperant, parcerent eis, quos ad deorum suorum templa confugisse compererant; aut aliquem ducem Barbarorum præcepisse (a), ut irrupto oppido nullus feriretur, qui in illo vel illo templo fuisset inventus. Nonne vidit Æneas Priamum

per aras
Sanguine fœdantem quos ipse sacraverat ignes?
(Virgil. Æneid. lib. 2, vers. 301, 302.)

Nonne Diomedes et Ulysses,

cæcis summæ custodiibus arcis,
Corripuere sacram effigiem, manibusque cruentis
Virgineas ausi divæ confugere vittas?

Nec tamen quod sequitur verum est:

Ex illo fluere, ac retro sublapsa referri
Spes Danaûm. (Ibid. vers. 168-170).

¹ Editi, si quid recte saperent. At Mss., recti.

² Codd. 766, 2050, 2051, 2052, ferunt, dicatissimis. M.

(a) Augustinum præterierunt nonnulla hujus rei litteris græcis et latinis consignata exempla. Nam refert Arrianus, lib. 2 de Rebus gestis Alexandri (cap. 24) capta Tyro, iis qui in templum Herculis confugerant, Alexandrum pepercisse. De Agesilao etiam Xenophon in Agesilao (cap. 2) et lib. 4 de Rebus Græcorum (cap. 5), Plutarchus (cap. 19) et Emilius Probus in Agesilao (cap. 4) narrant ipsam, Atheniensibus et Bœotibus eorumque sociis in pugna ad Coronæam devictis, noluisse eos laedi qui in Minervæ templum se ceperant.

Postea quippe vicerunt, postea Trojam ferro ignibusque deleverunt, postea confugientem ad aras Priamum obtruncaverunt. Nec ideo Troja periit, quia Minervam perdidit. Quid enim prius ipsa Minerva perdiderat, ut periret? an forte custodes suos? Hoc sane verum est: illis quippe interemptis potuit auferri. Neque enim homines a simulacro, sed simulacrum ab hominibus servabatur. Quomodo ergo colebatur, ut patriam custodiret et cives, quæ suos non valuit custodire custodes?

CAPUT III. — *Quam imprudenter Romani deos penates, qui Trojam custodire non potuerant, sibi crediderunt profuturos.*

Ecce qualibus diis Urbem Romani servandam se commendasse¹ gaudebant. O nimium miserabilem errorem! Et nobis succensent, cum de diis eorum talia dicimus, nec succensent auctoribus suis, quos ut ediscerent, mercedem dederunt; doctoresque ipsos insuper et salario publico et honoribus dignissimos habuerunt. Nempe apud Virgilium, quem propterea parvuli legunt, ut videlicet poeta magnus omniumque præclarissimus atque optimus teneris ebibitus animis² non facile oblivione possit aboleri; secundum illud Horatii,

Quo semel est imbuta recens servabit odorem

Testa diu:

(Epist. lib. 1, Ep. 2, vers. 69, 70.)

apud hunc ergo Virgilium nempe Juno inducitur infesta Trojanis, Æolo ventorum regi adversus eos irritando dicere:

Gens inimica mihi Tyrrhenum navigat æquor,
Ilium in Italiam portans, victosque penates.

(Æneid. lib. 1, vers. 71, 72.)

Itane istis penatibus victis Romam, ne vinceretur, prudentes commendare debuerunt? Sed hæc Juno dicebat, velut irata mulier, quid loqueretur ignorans. Quid Æneas ipse pius toties appellatus? nonne ita narrat:

Panthus Othryades, arcis Phœbique sacerdos,
Sacra manu, victisque deos, parvumque nepotem
Ipse trahit, cursuque amens ad limina tendit?
(Æneid. lib. 2, vers. 319-321.)

Nonne deos ipsos, quos victos non dubitat dicere, sibi potius quam se illis perhibet commendatos, cum ei dicitur,

Sacra susque tibi commendat Troja penates?
(Ibid. vers. 283.)

Si igitur Virgilius tales deos et victos dicit, et, ut vel victi quoquo modo evaderent, homini commendatos; quæ dementia est existimare his tutoribus Romam sapienter fuisse commissam, et nisi eos amisisset, non potuisse vastari? Imo vero victos deos tanquam præsidēs ac defensores colere, quid est aliud quam tenere non numina bona, sed omnia mala³?

¹ Plures manuscripti, se commississe. — Huic lectioni adstipulatur n. 766. M.

² In B., teneris ebibitus animis. Saniores nostri Mss. omnes habent, animis. M.

³ Editi, sed demonia mala. — Melioris notæ Mss., sed omnia mala, id est præsagia exiti et cladis venturæ. — Codd. 766 legi, nomina mala. M.

Quanto enim sapientius creditur, non Romam ad istam cladem non fuisse venturam, nisi prius illi perissent; sed illos potius olim fuisse perituros, nisi eos, quantum potuisset, Roma servasset? Nam quis non, cum adverterit, videat, quanta sit vanitate præsumptum, non posse vinci sub defensoribus victis, et ideo perisse, quia custodes perdidit deos; cum vel sola potuerit esse causa pereundi, custodes habere voluisse perituros? Non itaque, cum de diis victis illa conscriberentur atque canerentur, poetas¹ libebat mentiri, sed cordatos homines cogebat veritatem confiteri. Verum ista opportunius alio loco diligenter copioseque tractanda sunt: nunc quod institueram de ingratis hominibus dicere, parumper explicem², ut possum: qui ea mala, quæ pro suorum morum perversitate merito patiuntur, blasphemantes Christo imputant; quod autem illis etiam talibus propter Christum parcitur, nec dignantur attendere, et eas linguas adversus ejus nomen dementia sacrilegæ protervitas³ exercent, quibus linguis usurpaverunt mendaciter ipsum nomen, ut viverent; vel quas linguas in locis ei sacratis metuendo presserunt, ut illic tuti atque muniti⁴, ubi propter eum illæsi ab hostibus fuerunt, inde in eum maledictis hostilibus prosilirent.

CAPUT IV. — *De asylo Junonis in Troja, quod neminem liberavit a Græcis, et basilicis Apostolorum, quæ omnes ad se confugientes a Barbaris defenderunt.*

Ipsa, ut dixi, Troja, mater populi Romani (a), sacratis in locis deorum suorum munire non potuit cives suos ab ignibus ferroque Græcorum, eosdem ipsos deos colentium: quin etiam,

Junonis asylo
Custodes lecti, Phoenix et dirus Ulysses
Prædam asservabant; huc undique Troia gaza
Incensis erepta adytis, mensæque deorum,
Crateresque auro solidi, captivæque vestis
Congeritur: pueri et pavida longo ordine matres
Stant circum.

(Virgil. Æneid lib. 2, vers. 761-767.)

Electus est videlicet locus tantæ deæ sacratus, non inde captivos non liceret educere, sed ubi captivos liberet includere. Compara nunc asyllum illud, non cujuslibet dei gregalis, vel de turba plebis, sed Jovis⁵ ipsius sororis et conjugis et reginæ omnium deorum, cum memoriis nostrorum Apostolorum. Illuc incensis templis et diis erepta spolia portabantur, non reddenda victis⁶, sed dividenda victoribus; huc au-

lov., poetas. Cæteri libri, poetas, accusandi casu, quem verbo, *libet*, adjungere amat Augustinus. sic in libro secundo retractationum, cap. 25: « in me potius dicens quidquid eum libuit. »

² Fr. et aliquot præbæ notæ manuscripti, *expediam*. — Sic etiam n. 766. M.

³ Vind. Am. et plerique manuscripti, *perversitatis*. — Sic etiam n. 766. M.

⁴ Lov., *atque muniti essent, et ubi propter eum, etc.*, addeutes, *essent et*, invitis omnibus libris editis et manuscriptis

⁵ In B., *sed de Jovis*: corrupte. M.

⁶ Plures Mss., *non donanda victis*.

(a) Sallustius, cap. 6 libri de Conjuracione Catilinæ: « Urbem Romam, sicuti ego accepi, condidere atque habuere initio Trojani, qui Ænea duce profugii incertis sedibus vagabantur.

tem, et quod alibi ad ea loca compertum est pertinere, cum honore et obsequio religiosissimo reportatum est (a). Ibi amissa, hic servata libertas; ibi claustra, hic interdicta captivitas; ibi possidendi a dominantibus hostibus premebantur, huc liberandi a miserantibus ducebantur¹: postremo illud Junonis templum sibi elegerat avaritia et superbia levium Græcorum (b); istas Christi basilicas misericordia et humilitas etiam immanium Barbarorum². Nisi forte Græci quidem in illa sua victoria templis deorum communium (c) pepercerunt, atque illo confugientes miseros victosque Trojanos ferire vel captivare non ausi sunt; sed Virgilius, poetarum more, illa mentitus est. Imo verò morem hostium civitates evertentium ille descripsit.

CAPUT V. — *De generali consuetudine hostium victas civitates evertentium, quid Cæsar senserit.*

Quem morem etiam Cæsar³ (sicut scribit Sallustius, nobilitatæ⁴ veritatis historicus) sententia sua, quam de conjuratis in senatu habuit, commemorare non prætermittit: « Rapi virgines, pueros; divelli liberos a parentum complexu, matres familiarum pati quæ victoribus collibuisse⁵, fana atque domos spoliari, cædem, incendia fieri; postremo arinis, cadaveribus, cruore atque luctu omnia repleri » (Sallust. de Conjuracione Catilinæ, cap. 51). Hic si fana tacuisset, deorum sedibus solere hostes parcere putarem. Et hæc non ab alienigenis hostibus, sed a Catilina et sociis ejus, nobilissimis senatoribus et Romanis civibus, Romana templa metuebant. Sed hi videlicet perditæ patriæ parricidæ.

CAPUT VI. — *Quod nec Romani quidem ita ulla cepert civitates, ut in templis earum parcerent victis.*

Quid ergo per multas gentes, quæ inter se bella gesserunt et nusquam victis in deorum suorum sedibus pepercerunt, noster sermo discurrat? Romanos ipsos videamus: ipsos, inquam, recolamus respicia-

¹ In B., *a miserantibus hostibus ducebantur*; verbum, *hostibus*, hic sustulimus ex auctoritate nostrorum Mss. M.

² Hic incipit caput 5 in Mss.

³ Vind. Er. et Mss. Gallicani ac Romani, *Cato*. Sed quia verba nunc laudata ab Augustino Cæsarum sunt apud Sallustium, non Catonis, ideo in Amerbachiana editione, quam hic secuti sunt Lovanienses, interpretibus hujus operis Valoisio et Trivelho emendare visum est, *Cæsar*: tametsi libri, ut ipsi observant, communiter haberent, *Cato*. Quid si in eo Augustinus, quod eruditus nonnunquam contingit, memoria lapsus est, aut Sallustio usus vario sive mendoso? — N. 766, *Cato*. M.

⁴ In B., *nobilitate*. Sic etiam codices nostri, corrupte. Plerique editi ferunt, *nobilitatæ*; quæ lectio certe vera est. M.

⁵ Lov., *collibuisse*: male et dissentientibus cæteris libris.

(a) Vasa pretiosa apud virginem Deo sacram, quæ custodienda illa receperat, detecta a milite, Maricum, mox ubi comperit ad basilicam Petri apostoli pertinere, jussisse eo reportari, scribit Orosius, lib. 7, cap. 39.

(b) Levitas propria Græcorum, ait Cicero in oratione pro Flacco, capp. 5, 7, et alibi. Hæc eorum erat apud Romanos nota, quos ideo Græculos dicebant.

(c) Nempe eosdem deos celebrant Græci et Trojani.

musque Romanos, de quorum præcipua laude dictum est,

Parcere subiectis, et debellare superbos.

et quod accepta injuria ignoscere, quam persequi malebant (*Sallust. de conjuratione Catilinæ, cap. 9 in fine*): quando tot tantasque urbes, ut late dominarentur, expugnatas captasque everterunt, legatur nobis quæ templa excipere solebant, ut ad ea quisquis confugisset, liberaretur. An illi faciebant, et scriptores earumdem rerum gestarum ista reticebant? Itane vero, qui ea quæ laudarent maxime requirebant, ista præclarissima secundum ipsos pietatis indicia præterirent? Egregius Romani nominis Marcus Marcellus, qui Syracusas (a), urbem ornatissimam, cepit, refertur eam prius flevisse ruituram, et ante ejus sanguinem suas illi lacrymas effudisse (b). Gessit et curam pudicitia, etiam in hoste servandæ. Nam priusquam oppidum victor jussisset invadi, constituit edicto, ne quis corpus liberum violaret (c). Eversa est tamen civitas more bellorum, nec uspiam legitur ab imperatore tam casto atque clementi fuisse præceptum, ut quisquis ad illud vel illud templum fugisset, abiret¹ illæsus. Quod utique nullo modo præteriretur, quando nec ejus fletus, nec quod edixerat pro pudicitia minime violanda, potuit taceri. Fabius, Tarentinæ urbis eversor, a simulacrorum deprædatione se abstinuisse laudatur. Nam cum ei scriba suggestisset quid de signis deorum, quæ multa capta fuerant, fieri juberet, continentiam suam etiam jocando condidit. Quæsit enim, cujusmodi essent: et cum ei non solum multa grandia, verum etiam renuntiarentur armata, *Relinquamus*, inquit, *Tarentinis deos iratos* (d). Cum igitur nec illius fletum, nec hujus ritum, nec illius castam misericordiam, nec hujus facetam continentiam, Romanarum rerum gestarum scriptores tacere potuerint; quando prætermitteretur, si aliquibus hominibus in honorem cujuspiam deorum suorum sic pepercissent, ut in quoquam templo cædem vel captivitatem fieri prohiberent?

CAPUT VII. — *Quod in eversione Urbis quæ aspere gesta sunt, de consuetudine acciderint belli; quæ vero clementer, de potentia provenerint nominis Christi.*

Quidquid ergo vastationis, trucidationis, deprædationis, concremationis, afflictionis, in ista recentissima Romana clade commissum est, fecit hoc consuetudo bellorum. Quod autem more novo factum est, quod inusitata rerum² facie immanitas barbara tam

¹ Codices nostri, *haberetur*. M.

² Vox, *rerum*, abest a vetere codice libro silvane-tensi.

(a) Syracusæ civitas est in Sicilia quam obsidens Marcellus, Archimedis Syracusani machinis sæpe repulsus, tertio tandem anno expugnavit. Quæ hic de Marcello Augustinus, leguntur in Livio, lib. 23, c. 24.

(b) Narrat Livius, lib. 23, cap. 24.

(c) Idem, *ibid.*, cap. 23.

(d) Tarentum, Calabriae urbem, quæ a Romanis ad Annibalem defecerat, Q. Fabius Maximus Verrucosus recuperavit, militibusque diripiendam tradidit. Hic Fabius est ille de quo Ennius,

Tanus homo nobis cunctando restituit rem.

Ejus de Tarentinorum simulacris responsum affert Livius, lib. 27, cap. 16.

mitus apparuit, ut amplissimæ basilicæ implendæ populo cui parceretur, eligerentur et decernerentur, ubi nemo feriretur, unde nemo raperetur, quo liberandi multi a miserantibus hostibus ducerentur, unde captivandi ulli¹ nec a crudelibus hostibus abducerentur; hoc Christi nomini, hoc christiano temporari tribuendum quisquis non videt, cæcus; quisquis videt, nec laudat, ingratus; quisquis laudanti reluctatur, insanus est. Absit ut prudens quisquam hoc feritati imputet Barbarorum. Truculentissimas et sævissimas mentes ille terruit, ille frenavit, ille mirabiliter temperavit, qui per prophetam tanto ante prædixit: *Visitabo in virga iniquitates eorum, et in flagellis peccata eorum; misericordiam autem meam non dispergam ab eis* (*Psal. LXXXVIII, 33, 34*).

CAPUT VIII. — *De commodis atque incommodis, quæ bonis ac malis plerumque communia sunt.*

1. Dicit aliquis: Cur ergo ista divina misericordia etiam ad impios ingratosque pervenit? Cur, putamus, nisi quia eam illi præbuit, qui quotidie *facit oriri solem suum super bonos et malos, et pluit super justos et injustos* (*Math. v, 45*)? Quamvis enim quidam eorum ista cogitantes, poenitendo ab impietate se corrigant; quidam vero, sicut Apostolus dicit, *divitias bonitatis et longanimitatis Dei contemnescentes, secundum duritiam cordis sui et cor impænitens thesaurizent sibi iram in die iræ et revelationis justi judicii Dei, qui reddet unicuique secundum opera ejus* (*Rom. ii, 4, 6*): tamen patientia Dei ad poenitentiam invitat malos, sicut flagellum Dei ad patientiam erudit bonos. Itemque misericordia Dei fovendos amplectitur bonos, sicut severitas Dei puniendos corripit malos. Placuit quippe divinæ providentiæ præparare in posterum bona justis, quibus non fruenter injusti; et mala impiis, quibus non excruciabuntur boni. Ista vero temporalia bona et mala utrisque voluit esse communia: ut nec bona cupidius appetantur, quæ mali quoque habere cernuntur; nec mala turpiter evitentur, quibus et boni plerumque afficiuntur.

2. Interest autem plurimum, qualis sit usus vel earum rerum quæ prosperæ, vel earum quæ dicuntur adversæ. Nam bonus temporalibus nec bonis extollitur, nec malis frangitur; malus autem ideo hujusmodi infelicitate punitur, quia felicitate corrumpitur. Ostendit tamen Deus sepe etiam in his distribuendis evidentius operationem suam. Nam si nunc omne peccatum manifesta plecteret poena², nihil ultimo judicio servari putaretur: rursus, si nullum peccatum nunc puniret aperte Divinitas, nulla esse providentia divina crederetur. Similiter in rebus secundis, si non eas Deus quibusdam petentibus evidentissima largitate concederet, non ad eum ista pertinere diceremus: itemque si omnibus eas petentibus daret, nonnisi propter talia præmia serviendum illi esse arbitraremur; nec pios nos faceret talis ser-

¹ Vind. Er. et Lov., *nulli*. Verius Am. et Mss., *ulli*. — Cor. 2050, *nulli*. M.

² Lov., *plecteretur poena*. Cæteri codices, *plecteret poena*: supple, *divinitas*.

vitus, sed potius cupides et avaros. Hæc cum ita sint, quicumque boni et mali pariter afflicti sunt, non ideo ipsi distincti non sunt, quia distinctum non est quod utriusque perpassi sunt. Manet enim dissimilitudo passorum etiam in similitudine passionum; et licet sub eodem tormento, non est idem virtus et vitium. Nam sicut sub uno igne aurum rutilat, palea fumat; et sub eadem tribula stipulæ comminuuntur, frumenta purgantur; nec ideo cum oleo amurca confunditur, quia eodem preli pondere exprimitur: ita una eademque vis irruens bonos probat, purificat, eliquat; malos damnat, vastat, exterminat. Unde in eadem afflictione mali Deum detestantur atque blasphemant; boni autem precantur et laudant. Tantum interest, non qualia, sed qualis quisque patiat. Nam pari motu exagitantur et exhalat horribilliter cornum, et suaviter fragrat unguentum.

CAPUT IX. — *De causis correptionum, propter quas et boni et mali pariter flagellantur.*

1. Quid igitur in illa rerum vastitate¹ Christiani passj sunt, quod non eis magis fideliter ista considerantibus ad profectum valeret? Primo, quod ipsa peccata, quibus Deus indignatus implevit tantis calamitatibus mundum, humiliter cogitantes, quamvis longe absint a facinorosis, flagitiosis atque impiis, tamen non usque adeo se a delictis deputant alienos, ut nec temporalia pro eis mala perpeti se iudicent dignos². Excepto enim quod nususquisque, quamlibet laudabiliter vivens, cedit in quibusdam carnali concupiscentiæ, etsi non ad facinorum immanitatem et gorgitem flagitiorum atque impietatis abominationem, ad aliqua tamen peccata vel rara vel tanto crebriora, quanto minora: hoc ergo excepto, quis tandem facile reperitur, qui eosdem ipsos, propter quorum horrendam superbiam, luxuriam et avaritiam, atque execrabilia iniquitates et impietates, Deus, sicut minando prædixit, conterit terras (*Isai. xxiv, et alibi*), sic habeat, ut habendi sunt? sic cum eis vivat, ut cum talibus est vivendum? Plerumque enim ab eis docendis, admonendis, aliquando etiam objurgandis et corripiendis male dissimulatur; vel cum laboris piget, vel cum eorum os coram³ verecundamur offendere; vel cum inimicitias devitamus, ne impediunt et noceant in istis temporalibus rebus, sive quas adipisci adhuc appetit nostra cupiditas, sive quas amittere formidat infirmitas: ita ut, quamvis bonis vita malorum displiceat, et ideo cum eis non incidant in illam damnationem, quæ post hanc vitam talibus præparatur; tamen quia propterea peccatis eorum damnabilibus parcunt, dum eos in suis licet levibus et venialibus metuunt, jure cum eis temporaliter flagellantur, quamvis in æternum minime puniantur. Jure istam vitam, quando divinitus affliguntur cum eis, amaram sentiunt, cujus amando dulcedinem peccantibus eis amari esse noluerunt.

¹ Plures Mss., *vastatione*. — Corbeiensis 768 cum aliis probationibus, *vastitate*. M.

² Lov., *indignos*: relicto sensu et cæteris libris.

³ Nonnulli codices omittunt, *coram*.

2. Nam si propterea quisque objurgandis et corripiendis male agentibus parcit, quia opportunius tempus inquirat, vel eisdem ipsis metuit, ne deteriores ex hoc efficiantur, vel ad bonam vitam et piam erudiendos impediunt alios infirmos, et premant atque avertant a fide; non videtur esse cupiditatis occasio, sed consilium charitatis. Illud est culpabile, quod hi, qui dissimiliter vivunt et a malorum factis abhorrent, parcunt tamen peccatis alienis, quæ dedocere aut objurgare deberent, dum eorum offensiones cavent, ne sibi noceant in his rebus, quibus licite boni atque innocentes utuntur, sed cupidius quam oportebat eos, qui in hoc mundo peregrinantur et spem supernæ patriæ præ se gerunt. Non solum quippe infirmiores, vitam ducentes conjugalem, filios habentes vel habere quærentes, domos ac familias possidentes (quos Apostolus in Ecclesiis alloquitur, docens et monens quemadmodum vivere debeant et uxores cum maritis, et mariti cum uxoribus, et filii cum parentibus, et parentes cum filiis, et servi cum dominis, et domini cum servis [*Coloss. iii, 18-22*]), multa temporalia, multa terrena libenter adipiscuntur et moleste amittunt, propter quæ non audent offendere homines, quorum sibi vita contaminatissima et conceleratissima displicet: verum etiam hi, qui superiorem vitæ gradum tenent, nec conjugalibus vinculis irretiti sunt, et victu parvo ac tegumento utuntur¹, plerumque suæ famæ ac salutis consulentes², dum insidias atque impetus malorum timent, ab eorum reprehensione sese abstinunt. Et quamvis non in tantum eos metuant, ut ad similia perpetranda quibuslibet eorum terroribus atque improbitatibus cedant; ea ipsa tamen, quæ cum eis non perpetrant, nolunt plerumque corripere, cum fortasse possint aliquos corripiendo corrigere; ne, si non potuerint, sua salus ac fama in periculum exitiumque perveniat: nec ea consideratione, qua suam famam ac salutem vident esse necessariam utilitati erudiendorum hominum; sed ea potius infirmitate, qua delectat lingua blandiens et humanus dies (*I Cor. iv, 3*), et reformidatur vulgi iudicium et carnis excruciatio vel peremptio; hoc est, propter quædam cupiditatis vincula, non propter officia charitatis.

3. Non mihi itaque videtur hæc parva esse causa, quare cum malis flagellantur et boni, quando Deo placeat perditos mores etiam temporalium pœnarum afflictione punire. Flagellantur enim simul, non quia simul agunt malam vitam, sed quia simul amant temporalem vitam; non quidem æqualiter, sed tamen simul: quam boni contemnere deberent, ut illi correpti atque correcti consequerentur æternam; ad quam consequendam si nollent esse socii, ferrentur et diligerentur inimici: quia, donec vivunt, semper incertum est utrum voluntatem sint in melius mutaturi. Qua in re non utique parem, sed longe graviolem ha-

¹ Vetustissimus codex Corbeiensis, *ac tegimento utuntur*.

² Verbum *consulentes*, abest ab Am. Fr. ac Mss. Potest illæso sensu deleri, ut quod proxime sequitur, *dum insidias atque impetus malorum timent*, referatur ad præcedentia verba, *famæ scilicet, ac salutis*.

bent causam, quibus per prophetam dicitur, *Ille quidem in suo peccato morietur, sanguinem autem ejus de manu speculatoris requiram* (Ezech. xxxiii, 6). Ad hoc enim speculatores (a), hoc est populorum præpositi, constituti sunt in Ecclesiis, ut non parcant oburgando peccata. Nec ideo tamen ab hujuscemodi culpa penitus alienus est, qui, licet præpositus non sit, in eis tamen quibus vitæ hujus necessitate conjungitur, multa monenda vel arguenda novit, et negligit, devitans eorum offensiones, propter illa quibus in hac vita non indebitis vititur, sed plus quam debuit delectatur. Deinde habent aliam causam boni, quare temporalibus affligantur malis; qualem habuit Job: ut sibi ipse humanus animus sit probatus et cognitus, quanta virtute pietatis gratis Deum diligat (b).

CAPUT X. — *Quod sanctis in amissione rerum temporalium nihil pereat.*

1. Quibus recte consideratis atque perspectis, attende utrum aliquid mali acciderit fidelibus et piis, quod eis non in bonum verteretur: nisi forte putandum est apostolicam illam vacare sententiam, ubi ait, *Scimus quia diligentibus Deum omnia cooperantur in bonum* (Rom. viii, 28).

[CAPUT X.] Amiserunt omnia quæ habebant. Numquid fidem? numquid pietatem? numquid interioris hominis bona, qui est ante Deum dives (I Petr. iii, 4)? Hæc sunt opes Christianorum, quibus opulenti dicebat Apostolus: *Est autem quæstus magnus pietas cum sufficientia. Nihil enim intulimus in hunc mundum, sed nec auferre aliquid possumus: habentes autem victum et tegumentum, his contenti simus. Nam qui volunt divites fieri, incidunt in tentationem et laqueum, et desideria multa stulta et noxia, quæ mergunt homines in interitum et perditionem. Radix est enim omnium malorum avaritia (c): quam quidam appetentes, a fide pererraverunt, et inseruerunt se doloribus multis* (I Tim. vi, 6-10).

2. Quibus ergo terrenæ divitiæ in illa vastatione perierunt, si eas sic habebant, quemadmodum ab isto foris paupere, intus divite audierant; id est, si mundo utebantur, tanquam non utentes (I Cor. vii, 31): potuerunt dicere, quod ille graviter tentatus et minime superatus: *Nudus exivi de utero matris meæ, nudus revertar in terram. Dominus dedit, Dominus abstulit; sicut Domino placuit, ita factum est: sit nomen Domini benedictum* (Job i, 21): ut bonus servus magnas facultates haberet ipsam sui Domini voluntatem, cui pedissequus mente ditesceret, nec constriretur eis rebus vivens relictus, quas cito fuerat moriens reli-

¹ Vetusissimus Corbelensis liber, *cooperatur*.

² Vind. Am. et Lov. omittunt, *in*.

³ Sic Mss. At editi, *relictis*: nimis integra illa antithesi, quæ Augustino placuit, horum verborum, *vivens relictus; et, moriens relicturus*. — Codd. 786 et 2051 ferunt, *relictus*, dum codd. inferioris notæ nn. 2052 et 2053 habent, *relictus*. M.

(a) *Speculatoris* vocabulo exacte translatus est græcum *episcopos*, quod pluribus probat L. Vives.

(b) S. Chrysostomus in Homil. 4 ad populum Antiochenum octo causas enumerat variæ et omnimodæ sanctorum afflictionis in hoc mundo, quas sigillatim ex Scripturis conarmat. COOPERUS.

(c) Apud Paulum, *philarguria*. Vulgata, *cupiditas*.

curus. Illi autem infirmiores, qui terrenis his bonis, quamvis ea non præponerent Christo, aliquantula tamen cupiditate cohærebant; quantum hæc amando peccaverint, perdendo senserunt. Tantum quippe doluerunt, quantum se doloribus inseruerant; sicut Apostolum dixisse supra commemoravi. Oportebat enim ut eis adderetur etiam experimentorum disciplina, a quibus fuerat tam diu neglecta verborum. Nam cum dixit Apostolus, *Qui volunt divites fieri, incidunt in tentationem*, et cætera; profecto in divitiis cupiditatem reprehendit, non facultatem: qui præcepit alibi, dicens, *Præcipe divitibus hujus mundi, non superbe sapere, neque sperare in incerto divitiarum; sed in Deo vivo, qui præstat nobis omnia abundanter ad fruendum; bene faciant, divites sint in operibus bonis, facile tribuant, communicent, thesaurisent sibi fundamentum bonum in futurum, ut apprehendant veram vitam* (I Tim. vi, 17-19). Hæc qui de suis faciebant divitiis, magnis sunt lucris levia damna solati; plusque lætati ex his, quæ facile tribuendo tutius servaverunt, quam contristati ex his, quæ timide retinendo facilius amiserunt. Hoc enim potuit in terra perire, quod piguit inde transferre. Nam qui receperunt consilium Domini sui, dicentis, *Nolite condere vobis thesauros in terra, ubi tinea et rubigo exterminant, et ubi fures effodiunt et furantur; sed thesaurizate vobis thesauros in celo, quo fur non accedit, neque tinea corrumpit: ubi enim est thesaurus tuus, ibi erit et cor tuum* (Math. vi, 19-21; tribulationis tempore probaverunt quam recte sapuerint, non contemnendo veracissimum præceptorem et thesauri sui fidelissimum invictissimumque custodem. Nam si multi sunt gavis, ibi se habuisse divitias suas, quo contigit ut hostis non accederet; quanto certius et securius gaudere potuerunt qui monitu Dei sui illuc migraverant, quo accedere omnino non posset? Unde Paulinus noster, Nolensis episcopus, ex opulentissimo divite voluntate pauperrimus et copiosissime sanctus, quando et ipsam Nolum Barbari vastaverunt (a), cum ab eis teneretur, sic in corde suo, ut ab eo postea cognovimus, precabatur: *Domine, non excrucier propter aurum et argentum; ubi enim sint omnia mea, tu scis*. Ibi enim habebat omnia sua, ubi cum condere et thesaurizare ille monstraverat, qui et hæc mala mundo ventura prædixerat. Ac per hoc qui Domino suo monenti obedierant, ubi et quomodo thesaurizare deberent, nec ipsas terrenas divitias Barbaris incursantibus amiserunt: quos autem non obedisse penituit, quid de talibus rebus faciendum esset, si non præcedente sapientia, certe consequente experientia didicerunt.

¹ Vind. Am. Er., *quam*. Sic etiam habent manuscripiti, excepto uno et altero, in quibus legitur, *de qua*. — Ms. 786, *quam*. M.

² In editis additur, *suarum*; quod abest a manuscriptorum.

³ Editi, *accedi*. At Mss., *accedere*.

⁴ Lov. et codices nostri, excepto 786, legunt, *monuerat*. Ms. 786 et plerique editi, *monstraverat*. M.

(a) Gothi nimirum sub Alarico post directam Urbem per Latium, Volscos, Campaniam, et alias Italiae provincias effusi, Nolum ipsam Campaniæ civitatem diruerunt.

3. At enim quidam boni etiam Christiani tormentis excruciatii sunt, ut bona sua hostibus proderent. Illi vero nec prodere, nec perdere poterunt bonum, quo et ipsi boni erant. Si autem torqueri, quam mammona iniquitatis prodere maluerunt; boni non erant. Admonendi autem fuerant, qui tanta patiebantur pro auro, quanta essent sustinenda pro Christo: ut eum potius diligere discerent, qui pro se passos æterna felicitate ditaret; non aurum et argentum, pro quo pati miserrimum fuit, seu mentiendo occultaretur, seu verum dicendo proderetur. Namque inter tormenta nemo Christum confitendo amisit: nemo aurum, nisi negando, servavit. Quocirca utiliora erant fortasse tormenta, quæ bonum incorruptibile amandum docebant, quam illa bona, quæ sine ullo utili fructu dominos sui amore torquebant. Sed quidam etiam non habentes quod proderent, dum non creduntur, torti sunt. Et hi forte habere cupiebant, nec sancta voluntate pauperes erant: quibus demonstrandum fuit, non facultates, sed ipsas cupiditates talibus esse dignas cruciatibus. Si vero melioris vitæ proposito reconditum aurum argentumque non habebant, nescio quidem utrum cuiquam talium acciderit, ut dum habere creditur, torqueretur: verumtamen etiamsi accidit, profecto qui inter illa tormenta paupertatem sanctam confitebatur, Christum confitebatur. Quapropter etsi non meruit ab hostibus credi, non potuit tamen sanctæ paupertatis confessor sine cælesti mercede torqueri.

4. [XI.] Multos, inquit, etiam Christianos fames diuturna vastavit. Hoc quoque in usus suos boni fideles pie tolerando verterunt. Quos enim fames necavit, malis vitæ hujus, sicut corporis morbus, eripuit: quos autem non necavit, docuit parcius vivere, docuit productius jejunare.

CAPUT XI. — *De fine temporalis vitæ, sive longioris, sive brevioris.*

Sed enim multi etiam Christiani interfecti sunt, multi multarum mortium foeda varietate consumpti. Hoc si ægre ferendum est, omnibus qui in hanc vitam procreati sunt, utique commune est. Hoc scio, neminem fuisse mortuum, qui non fuerat aliquando moriturus. Finis autem vitæ tam longam quam brevem vitam hoc idem facit. Neque enim aliud melius, et aliud deterius; aut aliud majus, et aliud brevius est, quod jam pariter non est. Quid autem interest, quo mortis genere vita ista finiatur, quando ille cui finitur, iterum mori non cogitur? Cum autem unicuique mortalium sub quotidianis vitæ hujus casibus innumerabiles mortes quodammodo comminentur, quamdiu incertum est, quenam earum ventura sit; quero utrum satius sit, unam perpeti moriendo, an omnes timere vivendo. Nec ignoro quam inertius¹ eligatur diu vivere sub timore tot mortium, quam semel moriendo nullam deinceps formidare. Sed aliud est quod carnis sensus infirmiter pavidus refugit, aliud quod mentis ratio diligenter enucleata convincit. Mala mors putanda non est, quam bona vita

præcesserit: neque enim facit malam mortem, nisi quod sequitur mortem. Non itaque multum curandum est eis, qui necessario morituri sunt, quid accidat ut moriantur; sed moriendo quo ire cogantur. Cum igitur Christiani noverint longe meliorem fuisse religiosi pauperis mortem inter lingentium canum linguas, quam impii divitis in purpura et bysso (*Luc. xvi, 19-31*); horrenda illa genera mortium quid mortuis obsuerunt, qui bene vixerunt.

CAPUT XII. — *De sepultura humanorum corporum, quæ Christianis etiamsi fuerit negata, nil admittit.*

1. At enim in tanta strage cadaverum nec sepeliri potuerunt. Neque istud pia fides nimium reformidat, tenens prædictum, nec absumentes bestias resurrecturis corporibus obfuturas, quorum capillus capitis non peribit (*Id. xxi, 18*). Nullo modo diceret Veritas, *Nolite timere eos qui corpus occidunt, animam autem non possunt occidere* (*Matth. x, 28*); si quidquam obesset futuræ vitæ, quidquid inimici de corporibus occisorum facere voluissent. Nisi forte quispiam sic absurdus est, ut contendat eos, qui corpus occidunt, non debere timeri ante mortem, ne corpus occidant, et timeri debere post mortem, ne corpus occisum sepeliri non sinant. Falsum est ergo quod ait Christus, *Qui corpus occidunt, et postea non habent quid faciant* (*Luc. xii, 4*); si habent tanta, quæ de cadaveribus faciant. Absit ut falsum sit quod Veritas dixit. Dictum est enim aliquid eos facere cum occidunt, quia in corpore sensus est occidendo; postea vero nihil habere quod faciant, quia nullus sensus est in corpore occiso. Multa itaque corpora Christianorum terra non texit: sed nullam eorum quisquam a cælo et terra separavit, quam totam implet præsentia sui, qui novit unde resuscitet quod creavit. Dicitur quidem in Psalmo, *Posuerunt mortalia servorum tuorum eccas volatilibus cæli, carnes sanctorum tuorum bestiis terræ: effuderunt sanguinem eorum, sicut aquam in circuitu Jerusalem, et non erat qui sepeliiret* (*Psal. lxxviii, 2, 3*): sed magis ad exaggerandam crudelitatem eorum qui ista fecerunt, non ad eorum infelicitatem qui ista perpassi sunt. Quamvis enim hæc in conspectu hominum dura et dira videantur; sed pretiosa in conspectu Domini mors sanctorum ejus (*Psal. cxv, 15*). Proinde omnia ista, id est, curatio funeris, conditio sepulturæ, pompa exsequiarum¹, magis sunt vivorum solatia, quam subsidia mortuorum. Si aliquid prodest impio sepultura pretiosa, oberit pio vilis aut nulla. Præclaras exsequias in conspectu hominum exhibuit purpurato illi diviti turba famulorum: sed multo clariores in conspectu Domini ulceroso illi pauperi ministerium præbuit Angelorum, qui eum non extulerunt in marmoreum tumulum, sed in Abrabæ gremium sustulerunt.

2. Rident hæc illi, contra quos defendendam suscepimus civitatem Dei. Verumtamen sepulturæ curam

¹ Callicani et Romanæ MSS., *citius*.

¹ Sola editio Lov., *pompæ exsequiarum*.

etiam eorum philosophi contempserunt (a) : et sæpe universi exercitus, dum pro terrena patria morerentur, ubi postea jacerent, vel quibus bestiis esca fierent, non curarunt : licuitque de hac re poetis plausibiliter dicere :

Cælo tegitur, qui non habet urnam (b).

Quanto minus debent de corporibus inseputis insultare Christianis, quibus et ipsius carnis et membrorum omnium reformatio non solum ex terra, verum etiam ex aliorum elementorum secretissimo sinu, quo dilapsa cadavera recesserunt, in temporis puncto reddenda et redintegrandâ promittitur (I Cor. xv, 52)?

CAPUT XIII. — *Quæ sit ratio sanctorum corpora sepeliendi.*

Nec ideo tamen contemnenda et abjicienda sunt corpora defunctorum, maximeque justorum atque fidelium, quibus tanquam organis et vasis ad omnia bona opera sanctus usus est Spiritus. ¹ Si enim paterna vestis et annulus, ac si quid hujusmodi, tanto charius est posteris, quanto erga parentes major affectus; nullo modo ipsa spernenda sunt corpora, quæ utique multo familiarius atque conjunctius, quam quælibet indumenta, gestamus. Hæc enim non ad ornamentum vel adiutorium, quod adhibetur extrinsecus, sed ad ipsam naturam hominis pertinent. Unde et antiquorum justorum funera officiosa pietate curata sunt, et exsequiæ celebratæ, et sepultura provisâ (Gen. xxv, 9; xxxv, 29; L, 2-13, etc.) : ipsique dum viverent, de sepeliendis, vel etiam transferendis suis corporibus filiis mandaverunt (Id. XLVII, 29, 30; L, 24) : et Tobias sepeliendo mortuos Deum promeruisse, teste angelo, commendatur (Tob. II, 9; XII, 12). Ipse quoque Dominus die tertio resurrecturus, religiosæ mulieris bonum opus prædicat, prædicandumque commendat, quod unguentum pretiosum super membra ejus effuderit, atque hoc ad eum sepeliendum fecerit (Matth. xxvi, 10-13). Et laudabiliter commemorantur in Evangelio qui corpus ejus de cruce acceptum diligenter atque honorifice tegendum, sepeliendumque curarunt (Joan. xix, 38-42). Verum istæ auctoritates non hoc admonent ², quod insit ullus cadaveribus sensus; sed ad Dei providentiam, cui placent etiam talia pietatis officia, corpora quoque mortuorum pertinere significant, propter fidem resurrectionis astruendam. Ubi et illud salubriter discitur, quanta possit esse remuneratio pro elemosynis, quas viventibus et sentientibus exhibemus, si neque hoc apud Deum perit, quod exanimis hominum membris officii diligentiaque persolvitur. Sunt

¹ Plerique et melioris notæ Mss., *sancte usus est spiritus* : id est, ipse justorum animus sancto corporum usu opera bona edidit.

² Veteres quidam libri probæ notæ, *non ad hoc admonent*. — Ms. 766, *non hoc admonent*, prætermissa vocula, ad. M.

(a) Ut Diogenes Cynicus, Anaxagoras, Theodorus Cyrenæus, et alii. Vide Senecam, lib. de Tranquillitate animi, cap. 14, et Epist. 92; Ciceronem in prima Tuscul. Quæst. lib. 1, cap. 42 et seqq.

(b) Lucanus, in lib. 7, v. 819, de occisis Pharsalica pugna loquens, quæ Cæsar comburi aut humari vetuit.

quæ et alia, quæ sancti Patriarchæ de corporibus suis vel condendis vel transferendis prophætico spiritu dicta intelligi voluerunt : non autem hic locus est, ut ea pertractemus, cum sufficiant ista quæ diximus. Sed si ea quæ sustentandis viventibus sunt necessaria, sicut victus et amictus, quamvis cum gravi afflictione desint, non frangunt in bonis perferendi tolerandique virtutem, nec eradicant ex animo pietatem, sed exercitatum faciunt fecundiorum : quanto magis, cum desunt ea quæ curandis funeribus condendisque corporibus defunctorum adhiberi solent, non efficiunt miseris in oculis piorum sedibus jam quietos? Ac per hoc, quando ista cadaveribus Christianorum in illa magnæ urbis, vel etiam aliorum oppidorum vastatione defuerunt; nec vivorum culpa est, qui non potuerunt ista præbere, nec poena mortuorum, qui non possunt ista sentire.

CAPUT XIV. — *De captivitate sanctorum, quibus nonquam divina solatia defuerunt.*

Sed multi, inquirunt, Christiani etiam captivi ducti sunt. Hoc sane miserrimum est, si aliquo duci potuerunt, ubi Deum suum non invenerunt. Sunt in Scripturis sanctis hujus etiam cladis magna solatia. Fuerunt in captivitate tres pueri, fuit Daniel, fuerunt alii prophetæ : nec Deus defuit consolator. Sic ergo non deseruit fideles suos sub dominatione gentis, licet barbaræ, tamen humanæ, qui prophetam non deseruit nec in visceribus belluæ (Jonæ II). Hæc quoque illi, cum quibus agimus, malunt irridere, quam credere : qui tamen in suis litteris credunt Arionem Methymnæum, nobilissimum citharistam, cum esset dejectus e navi, exceptum delphini dorso, et ad terras esse pervectum (a). Verum illud nostrum de Jona propheta incredibilis est. Plane incredibilis, quia mirabilis; et mirabilis, quia potentius.

CAPUT XV. — *De Regulo, in quo captivitatis, ob religionem etiam sponte tolerandæ, exstat exemplum : quod tamen illi deos colenti prodesse non potuit.*

1. Habent tamen isti de captivitate religionis causa etiam sponte toleranda et in suis præclaris viris nobilissimum exemplum. Marcus Attilius Regulus, imperator populi Romani, captivus apud Carthagenenses fuit (b). Qui cum sibi mallent a Romanis suos reddi, quam eorum tenere captivos, ad hoc impetrandum etiam istum præcipue Regulum cum legatis suis Romam miserunt, prius juratione constrictum, si quod volebant minime peregisset, rediturum esse Carthaginem. Perrexit ille, atque in senatu contraria persuasit, quoniam non arbitrabatur utile esse Ro-

(a) Arionis ex Methymna, Lesbi insulæ oppido, citharædi fabulam scripsit Herodotus libro Musarum primo, capp. 23, 24. Hinc Ovidius in Fastis, libro 2, vers. 80 et seqq. A. Gellius, lib. 16, cap. 19.

(b) Cognomen, *Attilius*, abest a Vind. et a Mss. Hanc Marci Reguli historiam, qui primo Punico bello consul cum L. Manlio Volsonæ creatus, exercitum in Africam Romanorum primus trajecit, et ab hostibus captus est, referunt A. Gellius, lib. 6, cap. 4; Appianus, de Bellis Punicis, cap. 4, Polybius lib. 1, cap. 29, et alii permulti.

nanae reipublicae mutare captivos. Nec post hanc persuasionem a suis ad hostes redire compulsus est; sed quod juraverat¹, id sponte complevit. At illi eum excogitatis atque horrendis cruciatibus necaverunt. Inclusum quippe angusto ligno, ubi stare cogeretur, clavisque acutissimis undique confixo, ut se in nullam ejus partem sine poenis atrocissimis inclinaret, etiam vigilando peremerunt². Merito certe laudant virtutem tam magna infelicitate majorem. Et per deos ille juraverat, quorum cultu³ prohibito, has generi humano clades isti opinantur infligi. Qui ergo propterea colebantur, ut istam vitam prosperam redderent, si verum juranti has irrogari poenas seu voluerunt, seu permiserunt, quid perjuro gravius irati facere potuerunt? Sed cur non ratiocinationem meam potius ad utrumque concludam? Deos certe sic ille coluit, ut propter jurisjurandi fidem nec remaneret in patria, nec inde quolibet ire, sed ad suos acerrimos inimicos redire minime dubitaret. Hoc si huic vitae utile existimabat, cujus tam horrendum exitum meruit, procul dubio falleretur. Suo quippe docuit exemplo, nihil deos ad istam temporalem felicitatem suis prodesse cultoribus: quandoquidem ille eorum deditus cultui, et victus et captivus abductus, et quia noluit aliter quam per eos juraverat facere, novo ac prius inaudito nimiumque horribili supplicii genere cruciatus exstinctus est. Si autem deorum cultus post hanc vitam velut mercedem reddidit felicitatem, cur calumniantur temporibus christianis, ideo dicentes Urbi accidisse illam calamitatem, quia deos suos colere destitit, cum potuerit etiam illos diligentissime colens tam infelix fieri, quam ille Regulus fuit? Nisi forte contra clarissimam veritatem tanta quisquam dementia mirae caecitatis obnititur, ut contendere audeat universam civitatem deos colentem infelicem esse non posse, unum vero hominem posse; quod videlicet potentia deorum suorum multos potius sit idonea conservare, quam singulos; cum multitudo constet ex singulis.

2. Si autem dicunt M. Regulum etiam in illa captivitate illisque cruciatibus corporis, animi virtute beatum esse potuisse; virtus potius vera quaeratur, qua beata possit esse et civitas. Neque enim aliunde beata civitas, aliunde homo: cum aliud civitas non sit, quam concursus⁴ hominum multitudo. Quamobrem nondum interim disputo, qualis in Regulo virtus fuerit: sufficit nunc, quod isto nobilissimo exemplo coguntur fateri, non propter corporis bona, vel earum rerum quae extrinsecus homini accidunt, colendos deos; quandoquidem ille carere his omnibus maluit, quam deos per quos juravit offendere. Sed quid facia-

mus hominibus qui gloriantur talem se habuisse civem, qualem timent habere civitatem? Quod si non timent, tale ergo aliquid, quale accidit Regulo, etiam civitati tam diligenter, quam ille, deos colenti accidere potuisse fateantur, et christianis temporibus non calumnientur. Verum quia de illis Christianis orta quaestio est, qui etiam captivi ducti sunt¹; hoc intueantur et taceant, qui saluberrimae religioni hinc impudenter atque imprudenter illudunt: quia si diis eorum probro non fuit, quod attentissimus cultor illorum, dum eis jurisjurandi fidem servaret, patria caruit, cum aliam non haberet, captivusque apud hostes per longam mortem supplicio² novae crudelitatis occisus est: multo minus nomen criminandum est christianum in captivitate sacratorum suorum, qui supernam patriam veraci fide expectantes, etiam in suis sedibus peregrinos se esse noverunt (I Petr. II, 11).

CAPUT XVI.—*An stupris, quae etiam sanctarum forte virginum est passa captivitas, contaminari potuerit virtus animi sine voluntatis assensu.*

Magnum sane crimen se putant obicere Christianis, cum eorum exaggerantes captivitatem, addunt etiam supra commissa, non solum in aliena matrimonia virginesque nupturas, sed etiam in quasdam sanctimonialia. Hic vero non fides, non pietas, non ipsa virtus quae castitas dicitur, sed nostra potius disputatio inter pudorem atque rationem quibusdam coarctatur angustiis (a). Nec tantum curamus hic alienis responsionem reddere, quantum ipsis nostris consolationem. Sit igitur in primis positum atque firmatum, virtutem qua recte vivitur, ab animi sede membrum corporis imperare, sanctumque corpus usu fieri sanctae voluntatis: qua inconcussa ac stabili permanente, quidquid aliud de corpore vel in corpore fecerit, quod sine peccato proprio non valeat evitari, praeter culpam esse patientis. Sed quia non solum quod ad dolorem, verum etiam quod ad libidinem pertinet, in corpore alieno perpetrari potest; quidquid tale factum fuerit, et si retentam constantissimo animo pudicitiam non excutit, pudorem tamen incutit; ne credatur factum cum mentis etiam voluntate, quod fieri fortasse sine carnis aliqua voluptate non potuit.

CAPUT XVII.—*De morte voluntaria ob metum poenae sive dedecoris.*

Ac per hoc et quae se occiderunt, ne quidquam hujusmodi paterentur, quis humanus affectus eis nolit ignosci? et quae se occidere noluerunt, ne suo facinore alienum flagitium devitarent, quisquis eis hoc crimini dederit, ipse crimine insipientiae non carebit³. [XVIII.] Nam utique si non licet privata potestate⁴

¹ Plures Mss., qui etiam captivati sunt. — Sic nostra Mss. M.

² Lov., longa morte et supplicio; dissentientibus editis aliis et manuscriptis.

³ Plerique Mss., ipse crimen: et ex iis perpauci loco, carebit, habent, carebit. — Corbeiensis quoque, ipse crimen insipientiae non cavebit: bene. M.

⁴ Lov., si non licet privata potestate alicui. Editi alii et Mss. omittunt, alicui.

(a) Nam pudor prohibet etiam corporis violationem non malam dii, ratio id jubet.

¹ Vind. Am. Er. et nostri omnes Mss., sed quia juraverat.

² Libri nonnulli, etiam jugulando peremerunt: sed male. Huc pertinet illud Ciceronis, Oratione in Pisonem, cap. 19: « Marcum Attilium Regulum Carthaginenses resectis palpebris iligatum in machina vigilando peremerunt. » Non multo aliter Valerius Maximus, lib. 9, cap. 2, ext. 1.

³ Vind. Am. et Lov., quorum pro cultu prohibito. Abest, pro, ab Er. et a plerisque manuscriptis.

⁴ Nonnulli codices, consors.

hominem occidere vel nocentem, cujus occidendi licentiam lex nulla concedit: profecto etiam qui se ipsam occidit, homicida est; et tanto sit nocentior, cum se occiderit, quanto innocentior in ea causa fuit, qua se occidendum putavit. Nam si Jude factum merito detestamur, eumque veritas judicat, cum se laqueo suspendit, scelerate illius traditionis auxisse potius quam expiasset commissum; quoniam Dei misericordiam desperando exitiabiliter poenitens, nullum sibi salubris poenitentiae locum reliquit (*Matth. xxvii, 3*): quanto magis a sua nece se abstinere debet qui tali supplicio quod in se puniat, non habet? Judas enim cum se occidit, sceleratum hominem occidit: et tamen non solum Christi, verum etiam suae mortis reus finivit hanc vitam; quia licet propter suum scelus, alio suo scelere occisus est. [XVIII.] Cur autem homo, qui mali nihil fecit, sibi male faciat, et se ipsum interficiendo hominem interficiat innocentem, ne alium patiatur nocentem; atque in se perpetret peccatum proprium, ne in eo perpetretur alienum?

CAPUT XVIII. — *De aliena violentiarum libidine, quam in oppresso corpore mens invita perpetitur.*

1. At enim, ne vel aliena polluat libido, metuitur. Non polluet, si aliena erit: si autem polluet, aliena non erit. Sed cum pudicitia virtus sit animi, comitemque habeat fortitudinem, qua potius quaelibet mala tolerare, quam malo consentire decernit; nullus autem magnanimus et pudicus in potestate habeat, quid de sua carne fiat, sed tantum quid annuat mente, vel renuat: quis eadem sana mente¹ putaverit se perdere pudicitiam, si forte in apprehensa et oppressa carne sua exerceatur et expleatur libido non sua? Si enim hoc modo pudicitia perit, profecto pudicitia virtus animi non erit; nec pertinebit ad ea bona, quibus bene vivitur, sed in bonis corporis numerabitur; qualia sunt, vires, pulchritudo, sana integraque² valetudo, ac si quid hujusmodi est: quae bona, etiam si minuuntur, bonam justamque vitam omnino non minuunt. Quod si tale aliquid est pudicitia, ut quid pro illa, ne amittatur, etiam cum periculo corporis laboratur? Si autem animi bonum est, etiam oppresso corpore non amittitur. Quin etiam sanctae continentiae bonum cum immunditiae carnalium concupiscentiarum non cedit, et ipsum corpus sanctificatur: et ideo cum eis non cedere inconcussa intentione persistit, nec de ipso corpore perit sanctitas³, quia eo sancte utendi perseverat voluntas, et quantum in ipso est, etiam facultas.

2. Neque enim eo corpus sanctum est, quod ejus membra sunt integra, aut eo, quod nullo contrectantur tactu; cum possint diversis etiam casibus vulnerata vim perpeti, et medici aliquando saluti opitulantes haec ibi faciant, quae horret aspectus. Obstetrix

¹ Sic Vind. Am. et Mss. Al Er. et Lov., *quis tandem sana mente.*

² Plures manuscripti, omittunt, *integraque*; et loco, *sana*, quidam ferunt, *sanitas*. — Sic etiam Ms. 766. M.

³ Ita Vind. et Mss. Al Am. Er. et Lov., *perit castitas.*

virginis cujusdam integritatem manu velut explorans, sive malevolentia, sive inscitia, sive casu, dum inspicit, perdidit: non opinor quemquam tam stulte sapere, ut huic periisse aliquid existimet etiam de ipsius corporis sanctitate, quamvis membri illius integritate jam perditam. Quocirca proposito animi permanente, per quod etiam corpus sanctificari meruit, nec ipsi corpori aufert sanctitatem violentia libidinis alienae, quam servat perseverantia continentiae suae. An vero si aliqua femina mente corrupta, violatoque proposito quod Deo voverat, pergat vitanda ad deceptorem suum; adhuc eam pergentem sanctam vel corpore dicimus, ea sanctitate animi, per quam corpus sanctificabatur, amissa atque destructa? Absit hic error: et hinc potius admoneamur, ita non amitti corporis sanctitatem, manente animi sanctitate, etiam corpore oppresso, sicut amittitur corporis sanctitas violata animi sanctitate, etiam corpore intacto. Quamobrem non habet⁴ quod in se morte spontanea puniat femina, sine ulla sua consensione violenter oppressa, et alieno compressa peccato: quanto minus ante quam hoc fiat; ne admittatur homicidium certum, cum ipsum flagitium, quamvis alienum, adhuc pendet incertum?

CAPUT XIX. — *De Lucretia, quae se ob illatum sibi stuprum peremit.*

1. An forte huic perspicuae rationi, qua dicimus corpore oppresso, nequaquam proposito castitatis ulla in malum consensione mutato, illius tantum esse flagitium qui opprimens concubuerit, non illius quae oppressa concumbenti nulla voluntate consenserit, contradicere audebunt hi, contra quos feminarum christianarum in captivitate oppressarum non tantum mentes, verum etiam corpora sancta defendimus? [XIX.] Lucretiam certe, matronam nobilem veteremque Romanam, pudicitiae magnis efferunt laudibus. Hujus corpore cum violenter oppresso Tarquinii regis filius libidinose potitus esset, illa scelus improbissimi juvenis marito Collatino⁵ et propinquo Bruto, viris clarissimis et fortissimis, indicavit, eosque ad vindictam constrinxit: deinde foedi in se commissi agra atque impatiens se peremit (a). Quid dicemus? adultera haec, an casta judicanda est? Quis in hac controversia laborandum putaverit? Egregie quidam ex hoc veraciter declamans, ait: «Mirabile dictu; duo fuerunt, et adulterium unus admisit.» Splendide atque verissime. Intuens enim in duorum corporum commixtione unius inquinatissimam cupiditatem, alterius castissimam voluntatem; et non quid conjunctione membrorum, sed quid animorum diversitate ageretur, attendens, «Duo,» inquit, «fuerunt, et adulterium unus admisit.»

2. Sed quid est hoc, quod in eam gravius vindicatur, quae adulterium non admisit? Nam ille patria

⁴ Lov., *Quamobrem quia non habet.* Abest, *quia*, ab editis alijs et a manuscriptis.

⁵ Veteres libri nonnulli, *Collatino*. Apud Livium tamen vocatur, *Collatinus*.

(a) Narrat Livius, lib. 4, capp. 57, 58.

cum patre pulsus est (a); hæc summo est mactata supplicio. Si non est illa impudicitia, qua invita opprimitur; non est hæc justitia, qua casta punitur. Vos appello, leges judicesque Romani. Nempe post perpetrata facinora nec quemquam scelestum indemnatum impune voluistis occidi. Si ergo ad vestrum iudicium quisquam deferret hoc crimen, vobisque probaretur, non solum indemnatum, verum etiam castam et innocentem interfectam esse mulierem; nonne eum qui id fecisset, severitate congrua plecteretur? Hoc fecit illa Lucretia; illa, illa sic prædicata Lucretia innocentem, castam, vim perpersam Lucretiam insuper interemit¹. Proferte sententiam. Quod si propterea non potestis, quia non astat quam punire possitis; cur interfectricem innocenti et castæ tanta prædicatione laudatis? Quam certe apud inferos iudices, etiam tales, quales poetarum vestrorum carminibus cantantur, nulla ratione defenditis, constitutam scilicet inter illos,

qui sibi letum
insontes peperere manu, lætanque perosi,
Projecere animas.

Cui ad superna redire cupienti

Fata obstant, tristisque palus innabilis unda²
Alligat
(Virgil. *Æneid.* lib. 6, vers. 434-439.)

An forte ideo ibi non est, quia non insontem, sed male sibi consciam se peremit? Quid si enim (quod ipsa tantummodo nosse poterat), quanvis juveni violenter irruenti, etiam sua libidine illecta consensit, idque in se puniens ita doluit, ut morte putaret expiandum? Quanquam nec sicquidem occidere se debuit, si fructuosam posset apud deos falsos agere pœnitentiam. Verumtamen si forte ita est, falsumque est illud, quod duo fuerunt, et adulterium unus admisit, sed potius ambo adulterium commiserunt, unus manifesta invasione, altera latente consensione: non se occidit insontem, et ideo potest a litteratis ejus defensoribus dici non esse apud inferos inter illos, « qui sibi letum insontes peperere manu. » Sed ita hæc causa ex utroque latere coarctatur, ut si extenuatur homicidium, adulterium confirmetur; si purgatur adulterium, homicidium cumuletur: nec omnino invenitur exitus, ubi dicitur, Si adulterata³, cur laudata? si pudica, cur occisa?

3. Nobis tamen in hoc tam nobili feminae hujus exemplo ad istos refutandos, qui christianis feminis in captivitate compressis alieni ab omni cogitatione sanctitatis insultant, sufficit quod in præclaris ejus laudibus dictum est: « Duo fuerunt, et adulterium unus admisit. » Talis enim ab eis Lucretia magis credita est, quæ se nullo adulterino potuerit macu-

lare consensu. Quod ergo se ipsam, quoniam adulterum¹ pertulit, etiam non adulterata occidit, non est pudicitiae charitas, sed pudoris infirmitas. Poduit enim eam turpitudinis alienæ in se commissæ, etiamsi non secum; et Romana mulier laudis avida nimium verita est, ne putaretur, quod violenter est passa cum viveret, libenter passa si viveret. Unde ad oculos hominum mentis suæ testem illam pœnam adhibendam putavit, quibus conscientiam demonstrare non potuit. Sociam quippe facti se credi erubuit, si, quod alius in ea fecerat turpiter, ferret ipsa patienter. Non hoc fecerunt feminae christianæ, quæ passæ similia vivunt. Tamen nec in se ultæ sunt crimen alienum, ne aliorum sceleribus adderent sua, si, quoniam hostes in eis concupiscendo supra comiserant, illæ in se ipsis homicidia erubescendo committerent. Habent quippe intus gloriam castitatis, testimonium conscientiae: habent autem coram oculis Dei sui, nec requirunt amplius, ubi, quid recte faciant, non amplius habent; ne deviant ab auctoritate legis divinæ, cum male devitant offensionem suspicionis humanæ.

CAPUT XX. — Nullam esse auctoritatem, quæ Christianis in qualibet causa jus voluntariæ necis tribuat.

Neque enim frustra in sanctis canonicis² Libris nusquam nobis divinitus præceptum permissumve reperiri potest, ut vel ipsius adipiscendæ immortalitatis, vel ultius carenti cavendive mali causa, nobismetipsis necem inferamus. Nam et prohibitos nos esse intelligendum est, ubi Lex ait, *Non occides*: præsertim quia non addidit, proximum tuum: sicut falsum testimonium cum velaret, *Falsum*, inquit, *testimonium non dices adversus proximum tuum* (*Exod.* xx, 13, 16). Nec ideo tamen si adversus se ipsum quisquam falsum testimonium dixerit, ab hoc crimine se putaverit alienum. Quoniam regulam diligendi proximum a semetipso dilector accepit; quandoquidem scriptum est, *Diliges proximum tuum tanquam te ipsum* (*Math.* xxii, 39). Porro si falsi testimonii non minus reus est qui de se ipso falsum fatetur, quam si adversus proximum hoc faceret; cum in eo præcepto, quo falsum testimonium prohibetur, adversus proximum prohibeatur, possitque non recte intelligentibus videri non esse prohibitum ut adversus se ipsum quisque falsus testis assistat: quanto magis intelligendum est, non licere homini se ipsum occidere, cum in eo, quod scriptum est, *Non occides*, nihilo deinde addito, nullus, nec ipse utique cui præcipitur, intelligatur exceptus? Unde quidam hoc præceptum etiam in bestias ac pecora conantur extendere, ut ex hoc nullum etiam illorum liceat occidere (a). Cur non ergo et herbas, et quidquid humo radicitus alitur ac figitur? nam et hoc genus rerum, quamvis non sentiat, dicitur vivere; ac per hoc potest et mori; proinde etiam, cum vis adhibetur, occidi. Unde et Apostolus, cum de hujusmodi seminibus

¹ Sola editio Lov., *vim perpersam Lucretiam Lucretia insuper interemit*.

² Scripti libri omnes prope, *Fas obstat*: et loco, *innabilis*, habent, *inamabilis*. Quidam etiam, *tristisque*, pro, *tristisque*: et, *undæ*, pro, *unda*. Nec pauciores ibi discrepantiæ repertæ sunt in Virgilianis veteribus libris. — Mss. nostri omnes habent, *fas*, pro, *fata*, et *inamabilis*, pro, *inabilis*. Cæd. 786 solus fert, *tristis*, pro, *tristi*. M.

³ Editi, *adultera*. At Mss., *adulterata*.

(a) De hoc infra, lib. 3, cap. 25.

¹ Sic Mss. At editi, *adulterium*.

² Editi, *canonicisque*. Particula, *que*, non est in manuscriptis.

(a) Ut Marcionitæ, teste Epiphano, Hæresi 42; et Manichæi, teste Augustino, lib. 6 contra Faustum, capp. 6, 8 (Coqzuzus.)

bus loqueretur, *Tu, inquit, quod seminas, non vivificatur, nisi moriatur* ¹ (1 Cor. xv, 36). Et in Psalmo scriptum est, *Occidit vites eorum, in grandine* (Psal. lxxvii, 47). Num igitur ob hoc, cum audimus, *Non occides*, virgultum vellere nefas ducimus, et Manichæorum errori insanissime acquiescimus? His igitur deliramentis remotis, cum legimus, *Non occides*, si propterea non accipimus hoc dictum esse de fructibus, quia nullus est eis sensus; nec de animalibus irrationalibus ², volatilibus, natatilibus, ambulatilibus, reptilibus, quia nulla nobis ratione sociantur, quam non eis datum est nobiscum habere communem; unde justissima ordinatione Creatoris et vita et mors eorum nostris usibus subditur: restat ut de homine intelligamus, quod dictum est, *Non occides*: nec alteram ergo, nec te ³. Neque enim qui se occidit, aliud quam hominem occidit.

CAPUT XXI. — *De interfectionibus hominum, quæ ab homicidii crimine excipiuntur.*

Quasdam vero exceptiones eadem ipsa divina fecit auctoritas, ut non liceat ⁴ hominem occidi. Sed his exceptis, quos Deus occidi jubet, sive data lege, sive ad personam pro tempore expressa jussione: non autem ipse occidit, qui ministerium debet jubenti, sicut adminiculum gladius utenti ⁵: et ideo nequaquam contra hoc præceptum fecerunt, quo dictum est, *Non occides*, qui Deo auctore bella gesserunt, aut personam gerentes publicæ potestatis secundum ejus leges, hoc est justissimæ rationis imperium, sceleratos morte punierunt. Et Abraham non solum non est culpatus crudelitatis crimine, verum etiam laudatus est nomine pietatis, quod voluit filium, nequaquam scelerate, sed obedienter occidere (Gen. xxii). Et merito quæritur, utrum pro jussu Dei sit habendum, quod Jephthæ filiam, quæ patri occurrit, occidit, cum se immolaturum Deo id vovisset, quod ei redeunti de prælio victori primitus occurrisset (Judic. xi). Nec Samson aliter excusatur, quod se ipsum cum hostibus ruina domus oppressit, nisi quia spiritus latenter hoc jusserat, qui per illum miracula faciebat (Id. xvi, 30). His igitur exceptis, quos vel lex justa generaliter, vel ipse fons justitiæ Deus specialiter occidi jubet; quisquis hominem vel se ipsum, vel quemlibet occiderit, homicidii crimine innectitur.

CAPUT XXII. — *Quod nunquam possit mors voluntaria ad magnitudinem animi pertinere.*

1. Et quicumque hoc in se ipsis perpetraverunt, animi magnitudine fortasse mirandi, non sapientiæ sanitate laudandi sunt. Quanquam si rationem diligentiùs consulas, ne ipsa quidem animi magnitudo

¹ Editi, nisi prius moriatur. Abest, prius, a manuscriptis et a græco textu Pauli.

² Mss., irrationalibus.

³ Sic Mss. At Lov., non alterum, ergo nec te.

⁴ Lov., ut liceat; ommissa negante particula, quæ inest in ceteris libris, et prorsus necessaria videtur ad Augustini propositum, qui illis exceptionibus ipsa Dei auctoritate factis legem non occidendi firmatam fuisse docet.

⁵ Editi, gladius est mens. At manuscripti non habent, est; cujus loco bene subauditur, debet.

recte nominatur, ubi quisque non valendo tolerare vel quæque aspera vel aliena peccata, se ipse interemerit. Magis enim mens infirma deprehenditur, quæ ferre non potest vel duram sui corporis servitutem, vel stultam vulgi opinionem; majorque animus merito dicendus est, qui vitam ærumnosam magis potest ferre, quam fugere; et humanum judicium, maximeque vulgare, quod plerumque caligine erroris involvitur, præ conscientia luce ac puritate contemnere. Quamobrem si magno animo fieri putandum est, cum sibi homo ingerit mortem, ille potius Cleombrotus ¹ in hac animi magnitudine reperitur; quem serunt lecto Platonis libro, ubi de immortalitate animæ disputavit, se præcipitem dedisse de muro, atque ita ex hac vita migrasse ad eam, quam credidit esse meliorem. Nihil enim urgebat aut calamitatis, aut criminis, seu verum, seu falsum, quod non valendo ferre se auferret; sed ad capessendam mortem, atque ad hujus vitæ suavia vincula rumpenda sola adfuit animi magnitudo. Quod tamen magne potius factum esse quam bene, testis ei potuit esse Plato ipse, quem legerat: qui profecto id præcipue potissimumque fecisset, vel etiam præcepisset; nisi ea mente, qua immortalitatem animæ vidit, nequaquam faciendum, quin etiam prohibendum esse judicasset.

2. [XXIII.] At enim multi se interemerunt, ne in manus hostium pervenirent. Non modo quarimus utrum sit factum, sed utrum fuerit faciendum. Sana quippe ratio etiam exemplis anteposita est, cui quidem et exempla concordant, sed illa quæ tanto digniora sunt imitatione, quanto excellentiora pietate. Non fecerunt Patriarchæ, non Prophetae, non Apostoli: quia et ipse Dominus Christus, quando eos, si persecutionem paterentur, fugere admonuit de civitate in civitatem (Matth. x, 23), potuit admonere ut sibi manus inferrent, ne in manus persecutorum pervenirent. Porro si hoc ille non jussit, aut monuit, ut eo modo sui ex hac vita migrarent, quibus migrantibus mansiones æternas se præparaturum esse promisit (Joan. xiv, 2); quælibet exempla opponant gentes quæ ignorant Deum, manifestum est hoc non licere colentibus unum verum Deum.

CAPUT XXIII. — *Quale exemplum sit Catonis, qui se, victoriam Cæsaris non ferens, interemit.*

Sed tamen etiam illi præter Lucretiam, de qua supra satis quod videbatur diximus, non facile reperiunt de cujus auctoritate præscribant, nisi illum Catonem, qui se Uticæ occidit (a): non quia solus id fecit, sed quia vir doctus et probus habebatur (b), ut merito putetur recte etiam fieri potuisse vel posse quod fecit.

¹ Vind. Am. et omnes prope Mss., Theobrotus. Cicero eum, Ambraciotam Cleombrotum, vocat.

(a) Fuit ille Cato minor Catonis majoris pronepos, Uticensis dictus, quia Uticæ, quæ civitas est in Africa, seipse occidit. De eo Livius lib. 114; Cicero, lib. 1 Offic., cap. 31, et Tusc. lib. 1, c. 30.

(b) Catonis utriusque et innocentia et sapientia etiam in proverbium abierunt. Unde est illud apud Juvenalem, lib. 1, sat. 2, vers. 40: « Tertius e caelo cecidit Cato. » Hujus probitatem impense laudant Velleius Paterculus, lib. 2, cap. 45; Seneca, lib. de Tranquillitate animi, can. 15; Sallustius in Catilin., cap. 54, et alii.

De cujus facto quid potissimum dicam; nisi quod amici ejus etiam docti quidam viri, qui hoc fieri prædentius dissuadebant, imbecillioris quam fortioris animi facinus esse censuerunt, quo demonstraretur non honestas turpia præcavens, sed infirmitas adversa non sustinens? Hoc et ipse Cato in suo charissimo filio indicavit. Nam si turpe erat sub victoria Cæsaris vivere, cur auctor hujus turpitudinis pater¹ filio fuit, quem de Cæsaris benignitate omnia sperare præcepit? cur non et illum secum coegit ad mortem? Nam si cum filium, qui contra imperium in hostem pugnaverit, etiam victorem laudabiliter Torquatus occidit (a); cur victus victo filio pepercit Cato, qui non pepercit sibi? an turpius erat contra imperium esse victorem, quam contra decus ferre victorem? Nullo modo igitur Cato turpe esse judicavit, sub victore Cæsare vivere; alioquin ab hac turpitudine paterno ferro² filium liberaret. Quid est ergo, nisi quod filium quantum amavit, cui parci a Cæsare et speravit et voluit; tantum gloriæ ipsius Cæsaris, ne ab illo etiam sibi parceretur, ut ipse Cæsar dixisse fertur, invidit (b); aut, ut aliquid nos mitius dicamus, erubuit?

CAPUT XXIV. — *Quod in ea virtute, qua Regulus Cato-
ne præstantior fuit, multo magis emineant Christiani.*

Nolunt autem isti, contra quos agimus, ut sanctum virum Job, qui tam horrenda mala in sua carne perpeti maluit, quam illata sibi morte omnibus carere crucialibus, vel alios sanctos ex nostris Litteris summa auctoritate celsissimis, fideque dignissimis, qui captivitatem dominationemque hostium ferre, quam sibi necem inferre maluerunt, Catoni præferamus: sed ex litteris eorum, eidem illi Marco Catoni Marcum Regulum præferamus. Cato enim nunquam Cæsarem vicerat, cui victus dedignatus est subijci, et ne subijceretur, a se ipso elegit occidi: Regulus autem Pœnos jam vicerat, imperioque Romano Romanus imperator non ex civibus dolendam, sed ex hostibus laudandam victoriam reportaverat; ab eis tamen postea victus, maluit eos ferre serviendo, quam eis se auferre moriendo. Proinde servavit et sub Carthaginensium dominatione patientiam, et in Romanorum dilectione constantiam, nec victum auferens corpus ab hostibus, nec invictum animum a civibus. Nec quod se occidere noluit, vitæ hujus amore fecit. Hoc probavit, cum causa promissi jurisque jurandi ad eosdem hostes, quos gravius in senatu verbis quam in bello armis offenderat, sine ulla dubitatione remeavit. Tantus itaque vitæ hujus contemptor, cum sævientibus hostibus per quaslibet pœnas eam finire, quam se ipse perimere maluit; magnum scelus esse, si se homo interimat, procul dubio judicavit. Inter omnes suos laudabiles et

virtutum¹ insignibus illustres viros non proferunt Romani meliorem; quem neque felicitas corruperit, nam in tanta victoria mansit pauperrimus (a); nec infelicitas fregerit, nam ad tanta exitia revertit intrepidus. Porro si fortissimi et præclarissimi viri terræ patriæ defensores, deorumque licet falsorum, non tamen fallaces cultores, sed veracissimi etiam juratores, qui hostes victos more ac jure belli ferire potuerunt, hi ab hostibus victi se ipsos ferire noluerunt; et cum mortem minime formidarent, victores tamen dominos ferre, quam eam sibi inferre maluerunt: quanto magis Christiani verum Deum colentes et supernæ patriæ suspirantes, ab hoc facinore temperabunt, si eos divina dispositio vel probandos vel emendandos ad tempus hostibus subjugaverit; quos in illa humilitate non deserit, qui propter eos tam humiliter venit, Altissimus; præsertim quos nullius militaris potestatis vel talis militiæ jura constringunt, ipsum hostem ferire superatum²? [XXV.] Quis ergo tam malus error obrepat, ut homo se occidat, vel quia in eum peccavit, vel ne in eum peccet inimicus; cum vel peccatorem vel peccatum ipsum occidere non audeat inimicum?

CAPUT XXV. — *Quod peccatum non per peccatum,
debeat declinari.*

At enim timendum est et cavendum, ne libidini hostili subditum corpus illecebrosissima voluptate animum alliciat consentire peccato. Proinde, inquirunt, non jam propter alienum, sed propter suum peccatum, antequam hoc quisque committat, se debet occidere. Nullo modo quidem hoc faciet animus, ut consentiat libidini carnis suæ aliena libidine concitata³, qui Deo potius ejusque sapientiæ, quam corporis concupiscentiæ subjectus est. Verumtamen si detestabile facinus et damnabile scelus est, etiam se ipsum hominem occidere, sicut veritas manifesta proclamat; quis ita desipiat, ut dicat, Jam nunc peccemus, ne postea forte peccemus; jam nunc perpetremus homicidium, ne forte postea incidamus in adulterium? Nonne si tantum dominatur iniquitas, ut non innocentia, sed potius peccata eligantur, satius est incertum de futuro adulterium, quam certum de præsentis homicidium? nonne satius est flagitium committere, quod penitendo sanetur, quam tale facinus ubi locus salubris penitentiae non relinquatur? Hæc dixi propter eos ve eas, quæ non alieni, sed proprii peccati devitandi causa, ne sub alterius libidine etiam excitatæ suæ forte consentiant, vim sibi, qua moriantur, inferendam putant. Cæterum absit a mente christiana, quæ Deo suo fedit⁴, in eoque spe posita ejus adjutorio nititur; absit, inquam, ut mens talis cujuslibet⁵ carnis voluptatibus ad consensum turpitudinis cedat. Quod

¹ Vox, *pater*, abest a manuscriptis.

² Aliquot libri, *paterno furore*.

(a) Manlii Torquati consulis, qui Manlium filium, quod contra edictum pugnaverit, tametsi prospere, securi feriri jussit, meminit Livius, lib. 8, cap. 7; A. Gellius, lib. 9, cap. 13; Valerius Max., lib. 2, cap. 7.

(b) Intellecta morte Catonis dixisse fertur, *O Caton, phihonô soi tou thanatou, kai gar emoi su tês sautou stêrias ephronêsas*. Plutarchus in Catone, cap. 72. Appianus, de Bellis civilibus lib. 2, cap. 99.

¹ Mss., *virtutis*.

² Viud. Am. Er. et plures Mss., *ferre superatum*: minus bene.

³ Aliquot Mss., *concitante*. Et paulo post plerique habent, *quam corpori concupiscentiæque subjectus est*. — Ms. 700, *quam corpori voluptatiæque subjectus est*. M.

⁴ Sola editio Lov., *quæ in Deo suo fedit*.

⁵ Sic Viud. Am. et Mss. At Er. et Lov., *quibuslibet*. — Sic etiam Ms. 700. M.

(a) Vide Liv. lib. 18 epitomæ et Valer. Maxim. lib. 4 c. 4.

si illa concupiscentiis inobediencia, quæ adhuc in membris moribundis habitat, præter nostræ voluntatis legem quasi lege sua movetur; quanto magis absque culpa est in corpore non consentientis, si absque culpa est in corpore dormientis?

CAPUT XXVI. — *De his quæ fieri non licent, cum a sanctis facta noscuntur, qua ratione facta credenda sint.*

Sed quædam, inquit, sanctæ feminæ tempore persecutionis, ut insectatores suæ pudicitia devitent, in rapturum atque necaturum se fluvium proiec-erunt; eoque modo defunctæ sunt, earumque martyria in catholica Ecclesia veneratione celeberrima frequentantur (a). De his nihil temere audeo judicare. Utrum enim Ecclesiæ aliquibus fide dignis testificationibus, ut earum memoriam sic honoret, divina persuaserit auctoritas, nescio: et fieri potest ut ita sit. Quid si enim hoc fecerunt, non humanitas deceptæ, sed divinitus jussæ; nec errantes, sed obedi-entes? sicut de Samsonè aliud nobis fas non est credere (b). Cum autem Deus jubet, sequè jubere sine ulla ambagibus intimat; quis obedientiam in crimen vocet? quis obsequium pietatis accuset? Sed non ideo sine scelere facit, quisquis Deo immolare filium decreverit, quia hoc Abraham etiam laudabiliter fecit. Nam et miles (c) cum obediens potestati, sub qua legitime constitutus est¹, hominem occidit, nulla civitatis suæ lege reus est homicidii; imo nisi fecerit, reus est imperii deserti atque contempti. Quod si sua sponte atque auctoritate fecisset, in crimen effusi humani sanguinis incidisset. Itaque unde punitur si fecerit injussus, inde punietur nisi fecerit jussus. Quod si ita est jubente imperatore, quanto magis jubente Creatore? Qui ergo audit, non licere se occidere, faciat, si jussit cujus non licet jussa contemnere: tantummodo videat, utrum divina jussio nullo nutet incerto. Nos per aurem conscientiam convenimus, oc-cultorum nobis iudicium non usurpamus. Nemo scit quid agatur in homine, nisi spiritus hominis, qui in ipso est (I Cor. II, 11). Hoc dicimus, hoc asserimus, hoc modis omnibus approbamus, neminem spontaneam mortem sibi inferre debere, velut fugiendo molestias temporales, ne incidat in perpetuas: nemi-

¹ Plures Mss., *sub qua legibus constitutus est.* — Ms. 768 fert, *legi: tunc*, pro, *legibus.* M.

(a) Hoc martyrii genere celeberrimè olim obtinere in Ecclesia, laudatæ ab Ambrosio, lib. 3 de Virginitate, et Epist. 7, ad simplicianum, Pelagia ejusque sorores et mater: non aliæ forsitan, ut Baronius ad annum 305 suspicatur, ab iis de quibus Eusebius, lib. 8 Hist. Eccl., cap. 24.

(b) Vide supra, cap. 21.

(c) Hoc loco miles pro carnifice et quæstionario damnatum hominem occidente si accipiatur, nihil opus erit cum Leonardo Coquæo distinguere de bello justo, vel cujus injustitia non certa sit militi. Quod enim quæstionarius etiam militis appellatione gauderet, ex aliis Augustini locis liquet. In serm. 303, n. 15: « Considerate, » ait, « in ipsis ordinibus potestatum destinatum supplicio et damnatum... » non licere feriri, nisi ab illo qui ad hoc militat. Militat quæstionarius, ab illo percutitur damnatus. » Explicandum videtur ex alio loco S. Augustini, de Libero Arbitrio lib. 4, n. 11, 12: « Nam miles quoque jubetur lege, ut hostem necet: a qua cæde si temperaverit, ab imperatore poenas luit. » M.

nom propter aliena peccata, ne hoc ipso¹ incipiat habere gravissimum proprium, quem non polluebat alienum: neminem propter sua peccata præterita, propter quæ magis hac vita opus est, ut possint poenitendo sanari: neminem velut desiderio vitæ melioris, quæ post mortem speratur; quia reos suæ mortis melior post mortem vita non suscipit.

CAPUT XXVII. — *An propter declinationem peccati mors spontanea appetenda sit.*

Restat una causa, de qua dicere cœperam, qua utile putatur, ut se quisque interficiat, scilicet ne in peccatum irruat, vel blandiente voluptate, vel dolore sæviante. Quam causam si voluerimus admittere, eo usque progressa perveniet, ut hortandi sint homines tunc se potius interimere, cum lavacro sanctæ regenerationis abluti, universorum remissionem acceperint peccatorum. Tunc enim tempus est cavendi omnia futura peccata, cum omnia sunt deleta præterita. Quod si morte spontanea recte sit, cur non tunc potissimum sit? cur baptizatus sibi quisque parci? cur liberatum caput tot rursus vitæ hujus periculis inserit, cum sit facillimæ potestatis illata sibi nece omnia devitare, scriptumque sit, *Qui amat periculum, incidit in illud* (Eccli. III, 27)? Cur ergo amantur tot et tanta pericula, vel certe, etiamsi non amantur, suscipiuntur, cum manet in hac vita cui abscedere licitum est? An vero tam insulsa perversitas cor evertit, et a consideratione veritatis avertit, ut, si se quisque interimere debet, ne unius captivantis dominatu corruat in peccatum, vivendum sibi existimet, ut ipsum perferat mundum per omnes horas tentationibus plenum, et talibus, quales sub uno domino formidantur², et innumerabilibus cæteris, sine quibus hæc vita non ducitur? Quid igitur causæ est, cur in eis exhortationibus tempora consumamus, quibus baptizatos alloquendo studemus accendere, sive ad virginalem integritatem, sive ad continentiam vidualem, sive ad ipsam tori conjugalis fidem; cum habeamus meliora et ab omnibus peccandi periculis remota compendia, ut, quibuscumque post remissionem recentissimam peccatorum arripiendam mortem sibi ingerebam persuadere potuerimus, eos ad Dominum saniores purioresque mittamus? Porro si quisquis hoc aggrediendum et suadendum putat, non dico desipit, sed insanit: qua tandem fronte homini dicit, *Interfice te*, ne parvis tuis peccatis adjicias gravius, dum vivis sub domino barbaris moribus impudico, qui non potest nisi sceleratissime dicere, *Interfice te*, peccatis tuis omnibus absolutis, ne rursus talia vel etiam peiora committas; dum vivis in mundo tot impuris voluptatibus illecebrosæ, tot nefandis crudelitibus furiosæ, tot erroribus et terroribus inimico? Hoc quia nefas est dicere, nefas est profecto se occidere. Nam si hoc sponte faciendi ulla causa justa esse posset, procul dubio justior quam ista non esset. Quia vero nec ista est, ergo nulla est.

¹ Er. Lov., *ipso.*

² Sic aliquot Mss. Alii vero, *qualibus sub uno domino formidatur.* Et quidam cum editis Vind. Am. Er. Lov., *qualis sub uno domino formidatur.*

CAPUT XXVIII. — *Quo iudicio Dei in corpora continentium libido hostilis peccare permessa sit.*

1. Non itaque vobis, o fideles Christi, sit tædio vita vestra, si ludibrio fuit hostibus castitas vestra. Habetis magnam veramque consolationem, si fidem conscientiam retinetis, non vos consensisse peccatis eorum, qui in vos peccare permisi sunt. [XXVIII.] Quod si forte, cur permisi sint queritis, alta quidem est providentia Creatoris mundi atque Rectoris, et inscrutabilia sunt iudicia ejus, et investigabiles viæ ejus (Rom. xi, 33). Verumtamen interrogate fideliter animas vestras, ne forte de isto integritatis et continentiae vel pudicitiae bono vos inflatus extulistis, et humanis laudibus delectatæ in hoc etiam aliquibus invidistis. Non accuso quod nescio, nec audio quod vobis interrogata corda vestra respondent. Tamen si ita esse responderint, nolite mirari hoc vos amisisse, unde hominibus placere gestiistis; illud vobis remansisse, quod ostendi hominibus non potest. Si peccantibus non consensistis, divinæ gratiæ, ne amitteretur, divinum accessit auxilium; humanæ gloriæ, ne amaretur, humanum successit opprobrium. In utroque consolamini, pusillanimes; illinc probatæ, hinc castigatæ; illinc justificatæ, hinc emendatæ. Quorum vero corda interrogata respondent, nunquam se de bono virginitatis vel viduitatis vel conjugalis pudicitiae superbiisse, sed humilibus consentiendo (Rom. xn, 16) de dono Dei cum tremore exultasse, nec invidisse cuiquam paris excellentiam sanctitatis et castitatis; sed humana laude postposita, quæ tanto major deferri solet, quanto est bonum rarius quod exigit laudem, optasse potius ut eorum amplior numerus esset, quam ut ipsæ in paucitate amplius eminerent: nec istæ, quæ tales sunt, si earum quoque aliquas barbarica libido compressit, permissum hoc esse causeatur; nec ideo credant Deum ista negligere, quia permittit quod bene impune committit. Quædam enim veluti pondera malarum cupiditatum, et per occultum præseus divinum iudicium relaxantur, et manifesto ultimo¹ reservantur. Fortassis autem istæ, quæ bene sibi sunt consciæ non se ex isto castitatis bono cor inflatum extulisse, et tamen vim hostilem in carne perpessæ sunt, habebant aliquid latentis infirmitatis, quæ posset in superbiæ fastum, si hanc humilitatem in vastatione illa evasissent, extolli. Sicut ergo quidam morte rapti sunt, ne malitia mutaret intellectum eorum (Sap. xv, 11); ita quiddam ab istis vi raptum est, ne prosperitas mutaret modestiam earum. Utrisque igitur, quæ de carne sua, quod turpem nullius esset perpessa² contactum, vel jam superbiebant, vel superbire, si nec hostium violentia contrectata esset, forsitan poterant; non ablata est castitas, sed humilitas persuasa: illarum tumori succursum est³ immanenti, istarum occursum est imminenti.

¹ Apud Lov. repetitur, *quædam*, hoc modo: *et quædam manifesto ultimo*, etc.; renitente sensu et cæteris libris.

² Sic probe notæ MSS. At editi, *essent perpessæ*: et infra, *contractatæ essent*.

³ Editi, *occursum est*: quo loco pauciores manuscripti, *succursum est*.

SANCT. AUGUST. VII:

2. Quanquam et illud non sit tacendum, quod quibusdam, quæ ista perpessæ sunt, potuit videri continentiae bonum in bonis corporalibus deputandum, et tunc manere, si nullius libidine corpus atrectaretur; non autem esse positum in solo adjuto divinitus robore voluntatis, ut sit sanctum et corpus et spiritus; nec tale bonum esse, quod invito animo non possit auferri: qui error eis fortasse sublatus est. Cum enim cogitant qua conscientia Deo servierint, et fide inconcussa non de illo sentiunt quod ita sibi servientes eumque ita invocantes deserere ullo modo potuerit¹; quantumque illi castitas placeat, prohibere non possunt: vident esse consequens, nequaquam illud fuisse permissurum ut hæc acciderent sanctis suis, si eo modo perire posset sanctitas, quam contulit eis et diligit in eis.

CAPUT XXIX. — *Quid familia Christi respondere debeat infidelibus, cum exprobrant quod eam a furore hostium non liberaverit Christus.*

Habet itaque omnis familia surgenti et veri Dei consolationem suam, non fallacem, nec in spe rerum uttantium vel labentium constitutam; vitamque etiam ipsam temporalem minime peccandam, in qua eruditur ad æternam, bonisque terrenis tanquam peregrina utitur, nec capitur, malis autem aut probatur; aut emendatur. Illi vero qui probationi² ejus insultant, eique dicunt, cum forte in aliqua temporalia mala devenerit, *Ubi est Deus tuus (Psal. xli, 4)?* ipsi dicant, ubi sint dii eorum, cum talia patiuntur, pro quibus evitandis eos vel colunt, vel colendos esse contendunt (a). Nam ista respondet: Deus meus ubique præsens est, ubique totus, nusquam inclusus, qui possit adesse secretus, abesse non motus: ille cum me adversis rebus exagitat, aut merita examinat, aut peccata castigat, mercedemque mihi æternam pro toleratis pie malis temporalibus servat: vos autem qui estis, cum quibus loqui dignum sit saltem de diis vestris, quanto minus de Deo meo, qui terribilis est super omnes deos; quoniam dii gentium dæmonia, Dominus autem cælos fecit (Psal. xcvi, 4, 5)?

CAPUT XXX. — *Quam pudendis prosperitatibus affluere velint qui de christianis temporibus conquærantur.*

Si Nasica ille Scipio vester quondam pontifex viveret, quem sub terrore belli Punici in suscipiendis Phrygiis sacris, cum vir optimus quæreretur, universus senatus elegit (b), cujus os fortasse non aude-

¹ Ms. 786, *nullo modo potuerit*. M.

² vind. Am. Er. ac plerique manuscripti, *probitati*.

(a) Quod reipublicæ temporibus fieri solitum esse satis constat. Sed Alaricus cum obsidione premeret Romanam, pestisque et fames Urbem affligeret, visum est senatoribus, ut in Capitolio templisque reliquis numinibus sacrificaretur. Narrat Sozomenus, lib. 9, cap. 6; Nicephorus Callistus, lib. 13, cap. 33; Zosimus, lib. 5, cap. 41.

COQUÆUS.

(b) Defessa Italia Punico bello secundo atque ab Annibale vexata, ascitum est ex Pessinaute civitate Phrygiæ simulcrum matris deum, quod videlicet sibyllinis versibus intellexerant collocandum Romæ, ut hostes expellerentur. Ad id rite excipiendum, cum vir optimus jussu Dei, hinc oraculi quæreretur, electus est Scipio Nasica. Ex Cicerone.

(Deut.)

retis aspicere, ipse vos ab hac impudentia cohereret. Cur enim afflictis rebus adversis de temporibus querimini christianis, nisi quia vestram luxuriam cupitis habere securam, et perditissimis moribus remota omni molestiarum asperitate diffluere? Neque enim propterea cupitis habere pacem et omni genere copiarum abundare, ut his bonis honeste utamini, hoc est modeste, sobrie, temperanter, pie; sed ut infinita varietas voluptatum insanis effusionibus exquiratur, secundisque rebus ea mala orientur in moribus, quæ sævientibus pejora sint hostibus. At ille Scipio pontifex maximus vester, ille iudicio totius senatus vir optimus, istam vobis metuens calamitatem, nolebat æmulam tunc imperii Romani Carthaginem dirui, et decerneret ut dirueretur, contradicebat Catoni (a), timens infirmis animis hostem, securitatem; et tanquam pupillis civibus idoneum tutorem, necessarium videns esse terrorem. Nec eum sententia fefellit: re ipsa probatum est, quam verum diceret. Deleta quippe Carthagine, magno scilicet terrore Romanæ reipublicæ depulso et extincto, tanta de rebus prosperis orta mala continuo subsecuta sunt, ut corrupta disruptaque concordia prius sævis cruentisque seditioibus (b), deinde mox malarum connexionem causarum, bellis etiam civilibus tantæ strages ederentur, tantus sanguis effunderetur, tanta cupiditate proscriptionum ac rapinarum ferveret immanitas, ut Romani illi qui vita integriore mala metuebant ab hostibus, perdita integritate vitæ crudeliora paterentur a civibus (c): eaque ipsa libido dominandi, quæ inter alia vitia generis humani meracior¹ inerat universo populo Romano, posteaquam in paucis potentioribus vicit, obritos fatigatosque cæteros etiam iugo servitutis oppressit.

CAPUT XXXI. — *Quibus vitiorum gradibus aucta sit in Romanis cupido regnandi.*

Nam quando illa quiesceret in superbissimis mentibus, donec continuatis honoribus ad potestatem regiam perveniret? Honorum porro continuandorum facultas non esset, nisi ambitio prævaleret. Minime autem prævaleret ambitio, nisi in populo avaritia luxuriaque corrupto. Avarus vero luxuriosusque po-

orat. de Aruspicum responsis, cap. 13; Livio, lib. 20, cap. 14, et aliis.

¹ Vind. Am. et Lov., *immoderator*. At Fr. et veteres Mss., *meracior*; excepto uno et altero, in quo est, *feracior*.

(a) Plutarchus, in Catone maiore; Livius, lib. 49 epitome, etc.

(b) Tiberii Gracchi, deinde Cati fratris, in quibus primum usque ad sanguinem civilem ventum est, quarum prior fuit decem annis post deletam Carthaginem. L. VI. VIVS.

(c) Nam ex seditione C. Gracchi ortus est tribunatus Livii Drusi, quem Patres Equitibus, qui ex lege Gracchi iudicabant, opposuerunt. Ex hoc bellum sociale, quod promissa a Livio Druso civitas non præstaretur. Ex hoc Mithridaticum, cum Mithridates rex Ponti confusus discordiæ Italiæ, multa civium millia, quæ in suo regno negotiabantur, iussit interfici. Ex hoc bella civilia Mariana, cum Marius provinciam et bellum Mithridaticum L. Syllæ vellet eripere. Ex huius seminibus Sertorianum, Lepidanum, conjuratio Catilinæ, postremo Pompeianum. Hinc Cæsaris regnum, quo occiso, bella civilia, Antonianum, Philippense Bruti et Cassii, sicutum Sexti Pompeii, Actiacum. Tandem res publica in monarchiam et tyrannidem versa est. L. VI. VIVS. — Calixtus in Bello Jugurthino, cap. 41 seqq. Velleius Paternus, in Actio lib. 2.

pulus secundis rebus effectus est, quas Naïca ille providentissime cavendas esse censebat, quando civitatem hostium maximam, fortissimam, opulentissimam nolebat auferri; ut timore libido premeretur, libido pressa¹ non luxuriaretur, luxuriaque cohibita nec avaritia grassaretur: quibus vitiis obseratis, civitati utilis virtus floreret et cresceret, eique virtuti libertas congrua permaneret. Hinc etiam erat, et ex hac providentissima patriæ charitate veniebat, quod idem ipse vester pontifex maximus, a senatu temporis illius (quod sæpe dicendum est) electus sine ulla sententiarum discrepantia vir optimus, caveam theatri (a) senatum construere molientem, ab hac dispositione et cupiditate compescuit; persuasitque oratione gravissima, ne Græcam luxuriam virilibus patriæ moribus paterentur obrepere, et ad virtutem labefactandam enervandamque Romanam peregrinæ consentire nequitia: tantumque auctoritate valuit, ut ejus verbis commota senatoria providentia, etiam subsellia, quibus ad horam congestis in ludorum spectaculo jam uti civitas coeperat, deinceps prohiberet apponi (b). Quanto studio iste ab urbe Roma ludos ipsos scenicos abstulisset, si auctoritati eorum, quos deos putabat, resistere auderet; quos esse noxios dæmones non intelligebat, aut si intelligebat, placandos etiam ipse potius quam contemnendos existimabat. Nondum enim fuerat declarata Gentibus superna doctrina, quæ fide cor mundans, ad cœlestia vel supercœlestia capessenda, humili pietate humanum mutaret affectum, et a dominatu superbiorum dæmonum liberaret.

CAPUT XXXII. — *De scenicarum institutione ludorum.*

Verumtamen scitote, qui ista nescitis; et qui vos scribere dissimulatis, advertite, qui adversus libertatem a talibus dominis murmuratis²: ludi scenici, spectacula turpitudinum et licentia vanitatum, non hominum vitiis, sed deorum vestrorum jussis Romæ instituti sunt. Tolerabilis divinos honores deferretis illi Scipioni, quam deos ejusmodi coleretis: neque enim erant illi dii suo pontifice meliores. Ecce attendite, si mens tamdiu potatis erroribus ebria, vos aliquid sanum considerare permittit. Dii propter sedandam corporum pestilentiam ludos sibi scenicos exhiberi jubebant (c); pontifex autem propter animorum cavendam pestilentiam, ipsam scenam construere prohibebat. Si aliqua luce mentis animum corpori praeponitis, eligite quem colatis. Neque enim et illa corporum pestilentia ideo conquievit, quia populo bellicoso et solis antea ludis circensibus assueti ludorum

¹ Nonnulli Mss., *libidine pressa*. — Sic etiam Cd. 766. M.

² Solus Er., *a talibus dominis liberati murmuratis*: minus bene.

(a) Locus theatri sic est appellatus, quod subsellis ad spectantium consensum apte instructus caveæ formam quandam referebat. Augustinus, lib. 1 de Consensu Evangelistarum, n. 51: « Cadunt, » inquit, « theatra, caveæ turpitudinum et publicæ professiones flagitiorum. »

(b) Narrant Livius libri 48 epitome; Valer. Max. lib. 2, cap. 4, § 2; Apulian. lib. 1 de Bellis civilibus, cap. 28.

(c) Livius lib. 7, cap. 2; Valer. Max. lib. 2, cap. 4, § 4.

scenicorum delicata subintravit insania : sed astutia spirituum nefandorum prævidens illam pestilentiam jam sine delicto cessaturam, aliam longe gravio-rem, qua plurimum gaudet, ex hac occasione non corporibus, sed moribus curavit immittere ; quæ animos miserorum tantis obcæcavit tenebris, tanta deformitate fœdavit, ut etiam modo (quod incredibile forsitan erit, si a nostris posteris audietur), Romana urbe vastata, quos pestilentia ista possedit, atque inde fugientes Carthaginem pervenire potuerunt, in theatris quotidie certalim pro histrionibus insanirent.

CAPUT XXXIII. — *De vitiis Romanorum, quos patrias non correxit eversio.*

O mentes amentes ! quis est hic tantus, non error, sed furor, ut exitium vestrum (sicut audivimus) plangentibus orientabilibus populis, et maximis civitatibus in remotissimis terris publicum luctum aceroremque ducentibus, vos theatra quæreretis, intraretis, im-pleretis, et multo insaniora, quam fuerant antea, faceretis ? Hanc animorum labem ac pestem hanc probitatis et honestatis eversionem vobis Scipio ille metuebat, quando construi theatra prohibebat, quando rebus prosperis vos facile corrumpi atque everti posse cernebat, quando vos ab hostili terrore securos esse nolebat. Neque enim censebat ille felicem esse rempublicam stantibus mœnibus, ruentibus moribus. Sed in vobis plus valuit quod dæmones impii seduxerunt, quam quod homines providi præcaverunt. Hinc est quod mala quæ facitis, vobis imputari non vultis ; mala vero quæ patimini, christianis temporibus imputatis. Neque enim in vestra securitate pacatam rempublicam, sed luxuriam quæritis impunitam, qui depravati rebus prosperis, nec corrigi potuistis adversis. Volebat vos ille Scipio terreri ab hoste, ne in luxuriam flueretis ; vos nec contriti ab hoste luxuriam repressistis : perdidistis utilitatem calamitatis, et miserrimi facti estis, et pessimi permansistis.

CAPUT XXXIV. — *De clementia Dei, quæ Urbis excidium temperavit.*

Et tamen quod vivitis, Dei est ; qui vobis parcendo admonet, ut corrigamini poenitendo ; qui vobis etiam ingratis præstitit, ut vel sub nomine servorum ejus, vel in locis martyrum ejus hostiles manus evaderetis, [XXXIV.] Romulus et Remus asylum constituisse perhibentur, quo quisquis confugeret, ab omni noxa liber esset, augere quærentes creandæ multitudinem civitatis. Mirandum in honorem Christi præcessit ¹ exemplum. Hoc constituerunt eversores Urbis, quod constituerant antea conditores. Quid autem inagnum, si hoc fecerunt illi, ut civium suorum numerus suppleretur, quod fecerunt isti, ut suorum hostium numerositas servaretur ?

CAPUT XXXV. — *De latentibus inter impios Ecclesie filiis, et de falsis intra Ecclesiam christianis.*

Hæc et talia, si qua uberius et commodius potue-

¹ Plerique Mss. cum Viad., *processit*. — Sic etiam nostri Mss. M.

rit, respondeat inimicis suis redempta familia Domini Christi, et peregrina civitas regis Christi. [XXXV.] Meminerit sane, in ipsis inimicis latere cives futuros, ne infructuosum vel apud ipsos putet quod, donec perveniat ad confessos (a), portat infensos sicut ex illorum numero etiam Dei civitas habet secum, quamdiu peregrinatur in mundo, connexos commanione Sacramentorum, nec secum futuros in æterna sorte sanctorum ; qui partim in occulto, partim in aperto sunt ; qui etiam cum ipsis inimicis adversus Deum, cujus sacramentum gerunt, murmurare non dubitant, modo cum illis theatra, modo ecclesias nobiscum replentes. De correctione autem quorundam etiam talium multo minus est desperandum, si apud apertissimos adversarios prædestinati amici latitant, adhuc ignoti etiam sibi. Perplexæ quippe sunt istæ duæ civitates in hoc sæculo, invicemque permixtæ, donec ultimo judicio dirimantur : de quarum exorta et procurso et debitis finibus, quod dicendum arbitror, quantum divinitus adjuvabor, expediam, propter gloriam civitatis Dei, quæ alienis ¹ a contrario comparatis clarius eminebit.

CAPUT XXXVI. — *De quibus causis sequenti disputatione sit disserendum.*

Sed adhuc quædam mihi dicenda sunt adversus eos, qui Romane reipublicæ clades in religionem nostram referunt, qua diis suis sacrificare prohibentur. Commemoranda enim sunt quæ et quanta occurrere potuerint, vel satis esse videbuntur, mala quæ illa civitas pertulit, vel ad ejus imperium pertinentes provinciæ, antequam eorum sacrificia prohibita fuissent : quæ omnia procul dubio nobis tribuerent, si jam vel illis clareret nostra religio, vel ita eos a sacris sacrilegis prohiberet. Deinde monstrandum est, quos eorum mores, et quam ob causam verus Deus ad angendum imperium adjuvare dignatus est, in cujus potestate sunt regna omnia ; quinque nihil eos adjuverint hi, quos deos putant, quin potius quantum decipiendo et fallendo nocuerint. Postremo adversus eos dicetur, qui manifestissimis documentis confutati atque convicti conantur asserere, non propter vitæ præsentis utilitatem, sed propter eam, quæ post mortem futura est, colendos deos. Quæ, nisi fallor, quæstio multo erit operosior, et sublimiore ² disputatione dignior ; ut et contra philosophos in ea disseratur, non quoslibet, sed qui apud illos excellentissima gloria clari sunt, et nobiscum multa sentiunt, scilicet de animæ immortalitate, et quod verus Deus mundum condiderit, et de providentia ejus, qua universum, quod con-

¹ Mss. non pauci, *alterius*.

² Viad. Am. et Mss. magno consensu, *subtiliore*. Er., *subtili*. — Juxta Cdd. nostros legendum est, *subtiliore*. M.

(a) Confessos, non declaratione ultima, cum aperta erunt conscientiæ in futura vita, ut Ludovicus vires interpretatur ; sed professione christianæ fidei, quæ ab his in vita præsentis fieri debet, ut ad Christi familiam admittantur.

didit, regit. Sed quoniam et ipsi in illis quæ contra nos sentiunt, refellendi sunt; deesse huic officio non debemus: ut refutatîs impiis contradictionibus pro viribus, quas Deus impertiet, asseramus civi-

tatem Dei, veramque pietatem, et Dei cultum, in quo uno veraciter sempiterna beatitudo promittitur. Hic itaque modus sit bujus voluminis, ut deinceps disposita ab alio sumamus exordio.

LIBER SECUNDUS.

In quo disputatione instituta de malis quæ ante Christum, vigente deorum falsorum cultu, perpassi sunt Romani, demonstratur primum eos morum malis et animi vitis, quæ mala vel sola vel maxima deputanda sunt, cum talibus procurantibus diis falsis, nedum liberatos fuisse.



CAPUT PRIMUM. — De modo, qui necessitati disputationis adhibendus est.

Si rationi perspicua veritatis infirmus humanæ consuetudinis sensus non auderet obstistere, sed doctrinæ salubri languorem suum tanquam medicinæ subderet, donec divino adjutorio fide pietatis impetrante sanaretur; non multo sermone opus esset ad convincendum quemlibet vanæ opinionis¹ errorem, his qui recte sentiunt, et sensa verbis sufficientibus explicant. Nunc vero quoniam ille est major et terribior² insipientium morbus animorum, quo irrationabiles motus suos, etiam post rationem plenæ redditam, quanta homini ab homine debetur, sive nimia cæcitate, qua nec aperta cernuntur, sive obstinatissima pervicacia, qua et ea quæ cernuntur, non feruntur, tanquam ipsam rationem veritatemque defendunt: sit necessitas copiosius dicendi plerumque res chras, velut eas non spectantibus intuendas, sed quodammodo tangendas palpantibus et coniventibus offeramus. Et tamen quis disceptandi finis erit et loquendi modus, si respondendum esse respondentibus semper existimemus? Nam qui vel non possunt intelligere quod dicitur, vel tam duri sunt adversitate mentis, ut, etiamsi intellexerint, non obediunt; respondent, ut scriptum est, et loquuntur iniquitatem (*Psal. xciii, 4*), atque infatigabiliter vani sunt. Quorum dicta contraria si toties velimus refellere, quoties obnixâ fronte statuerint non curare³ quid dicant, dum quocumque modo nostris disputationibus contradicant; quam sit infinitum, et ærumnosum, et infructuosum, vides. Quamobrem nec te ipsum, mi fili Marcelline, nec alios, quibus hic labor noster in Christi charitate utiliter ac liberaliter servit, tales meorum scriptorum velim iudices, qui responsionem semper desiderent, cum his quæ leguntur, audierint aliquid contradicere; ne fiant similes earum muliercularum, quas commemorat Apostolus, *semper discentes, et ad veritatis scientiam nunquam pervenientes* (II *Tim. iii, 7*).

CAPUT II. — De his quæ primo volumine expedita sunt.

Superiore itaque libro, cum de civitate Dei dicere

¹ Er. et nonnulli manuscripti, *opinionis*. — Sic etiam Ms. 766. M.

² Nonnulli Mss., *deterior*.

³ Veteres libri, *non cogitare*. — Sic etiam Ms. 766. M.

instituissem, unde hoc universum opus, illo adjuvante, in manus sumptum est; occurrit mihi respondendum¹ esse primitus eis qui hæc bella, quibus mundus iste conteritur, maximeque Romanæ urbis recentem a Barbaris vastationem christianæ religioni tribuunt, qua prohibentur nefandis sacrificiis servire dæmonibus: cum potius hoc deberent tribuere Christo, quod propter ejus nomen, contra institutum moremque bellorum, eis, quo confugerent, religiosa et amplissima loca Barbari libera præbuerunt; atque in multis famulatum deditum² Christo non solum verum, sed etiam timore confictum sic honoraverunt, ut quod in eos belli jure fieri licuisset, illicitum sibi esse judicarent. Inde incidit quæstio, cur hæc divina beneficia etiam ad impios ingratosque pervenerint; et cur illa itidem dura, quæ hostiliter facta sunt, pios cum impiis pariter afflixerint. Quam quæstionem per multa diffusam (in omnibus enim quotidianis vel Dei muneribus vel hominum cladibus, quorum utraque bene ac male viventibus permixte atque indiscrete sæpe accidunt, solet³ multos movere) ut pro suscepti operis necessitate dissolverem, aliquantum immoratus sum; maxime ad consolandas sanctas feminas et pie castas, in quibus ab hoste aliquid perpetratum est, quod intulit vereturdiæ dolorem, etsi non abstulit pudicitiae firmitatem; ne pœniteat eas vitæ, quas⁴ non est unde possit pœnitere nequitia. Deinde pauca dixi in eos qui Christianos adversis illis rebus affectos, et præcipue pudorem humiliatarum seminarum, quamvis castarum atque sanctarum, protervitate impudentissima exagitant, cum sint nequissimi et irreverentissimi, longe ab eis ipsis Romanis degeneres, quorum præclara multa laudantur et litterarum memoria celebrantur, imo illorum gloriæ vehementer adversi. Romani quippe partam⁵ veterum auctamque laboribus, frædiorem stantem fecerant quam ruentem: quandoquidem in ruina ejus lapides et ligna, in istorum autem

¹ In plerisque Mss., *resistendum*. — Sic etiam Ms. 766. M.

² Sic meliores manuscripti. At editi, *debitum*.

³ Er. et Lov., *solent*. Melius vind. Am. et aliquot Mss., *solet*: subaudi, *quæstio illa, quam, per multa diffusam, dicit*. — Mss. nostri, *solent*. M.

⁴ Er. et Lov., *apud quas*. Non opus erat addere hic, *apud*, quod a cæteris libris abest.

⁵ Lov., *cura partam*. Vind. Am. et Er., *cura structam*. Mss. constanter habent *partam* et carent voce, *cura*.

vita omnia, non murorum, sed morum munimenta atque ornamenta ceciderunt; cum funestioribus eorum corda cupiditatibus, quam ignibus tecta illius urbis arderent. Quibus dictis, primum terminavi librum. Deinceps itaque dicere institui, quæ mala civitas illa perpessa sit ab origine sua, sive apud se ipsam, sive in provinciis sibi jam subditis: quæ omnia christianæ religioni tribuerent, si jam tunc evangelii ea doctrina adversus falsos et fallaces eorum deos testificatione liberrima personaret.

CAPUT III. — *De assumenda historia, qua ostendatur quæ mala acciderint Romanis, cum deos colerent, antequam religio christiana obcresceret.*

Memento autem, me ista commemorantem, adhuc contra imperitos agere, ex quorum imperitia illud quoque ortum est vulgare proverbium: Pluvia defuit, causa Christiani (a). Sunt namque qui eorum studiis liberalibus instituti amant historiam, qua facillime ista noverunt: sed ut nobis incruditorum turbas infestissimas reddant, se nosse dissimulant; atque hoc apud vulgus confirmare nituntur, clades quibus per certa intervalla locorum et temporum genus humanum oportet affligi, causa accidere nominis christiani, quod contra deos suos ingenti fama et præclarissima celebritate per cuncta diffunditur (b). Recolant ergo nobiscum, antequam Christus venisset in carne, antequam ejus nomen ea, cui frustra invident, gloria populis innotesceret, quibus calamitibus res Romanæ multipliciter varieque contritæ sint; et in his defendant, si possunt, deos suos, si propterea coluntur, ne ista mala patiantur cultores eorum, quorum si quid nunc passi fuerint, nobis imputandum esse contendunt. Cur enim ea quæ dicturus sum, permiserunt accidere cultoribus suis, antequam eos declaratum Christi nomen offenderet, eorumque sacrificia prohiberet?

CAPUT IV. — *Quod cultores deorum nulla unquam a diis suis præcepta prohibitis acceperint, et in sacris eorum turpia quæque celebraverint.*

Primo ipsos mores ne pessimos haberent, quare dii eorum curare noluerunt? Deus enim verus eos, a quibus non colebatur, merito neglexit; dii autem illi, a quorum cultu se prohiberi homines ingratiissimi conqueruntur, cultores suos ad bene vivendum quare nullis legibus adjuverunt? Utique dignum erat ut quomodo isti illorum sacra, ita illi istorum facta

¹ Fditi, defecit; et ex iis tres, scilicet Vind. Am. Er. prosequuntur, *causa christiani nominis*. At veteres libri non addunt, *nominis*: et loco, *defecit*, habent omnes, *defit*. Plures quoque ex iisdem manuscriptis optimæ notæ verba consequentia nonnullis omissis particulis sic distinguunt: *causa Christiani sunt. Nam quæ eorum studiis liberalibus instituti amant historiam, facillime ista noverunt.* — Sic etiam nostri Codd. M.

(a) Istud in Christianis proverbium paulo aliis verbis commemoratum habes Enarr. in Psal. 80, n. 1.

(b) Inter eruditos illos dissimulatores accensendus est Aurelius Symmachus, ille Urbi præfectus, qui talia habet in Relatione oblata Valentiano, anno 384, quam connotavit S. Ambrosius. Vide num. 14 in editione Ambrosiana. Ad eam calumniam confutandam, rogatu Augustini, Historiarum opus scribere aggressus est Faustus Orosius. Vide ejus præloqueni ad Augustinum.

curarent. Sed respondetur, quod voluntate propria quisque malus est. Quis hoc negaverit? Verumtamen pertinebat ad consultores deos, vitæ bonæ præcepta non occultare populis cultoribus suis, sed clara prædicatione præbere; per vates etiam convenire, atque arguere peccantes; palam minari poenas male agentibus, præmia recte viventibus polliceri. Quid unquam tale in deorum illorum templis prompta et eminenti voce concepuit? Veniebamus etiam nos aliquando adolescentes ad spectacula ludibriaque sacrilegiorum (a); spectabamus arreptitios, audiebamus symphoniacos; ludis turpissimis, qui diis deabusque exhibebantur, oblectabamur, Cælesti virgini (b), et Bererynthiæ matri omnium: ante cujus lecticam diæ solemni lavationis ejus (c), talia per publicum cantabantur a nequissimis scenicis, qualia, non dico matrem deorum, sed matrem quorumcumque senatorum vel quorumlibet honestorum virorum, imo vero qualia nec matrem ipsorum scenicorum deceret audire. Habet enim quiddam erga parentes humana verecundia, quod nec ipsa nequitia possit auferre. Illam proinde turpitudinem obscenorum dictorum atque factorum, scenicos ipsos domi suæ proludendi causa coram matribus suis agere puderet, quam per publicum agebant, coram deum matre, spectante et audiente utriusque sexus frequentissima multitudine. Quæ si illecta curiositate adesse potuit circumfusa, saltem offensa castitate debuit abire confusa. Quæ sunt sacrilegia, si illa sunt sacra? aut quæ inquinatio, si illa lavatio? Et hæc Fercula appellabantur, quasi celebraretur convivium, quo velut suis epulis immunda dæmonia pascerentur. Quis enim non sentiat cujusmodi spiritus talibus obscenitatibus delectentur, nisi vel nesciens utrum omnino sint ulli immundi spiritus deorum nomine decipientes, vel talem agens vitam, in qua istos potius quam Deum verum et optet propitios, et formidet iratos?

CAPUT V. — *De obscenitatibus, quibus Mater deum a cultoribus suis honorabatur.*

Nequaquam istos, qui flagitiosissimæ consuetudinis vitis oblectari magis quam oblectari student, sed illum ipsum Nasicam Scipionem, qui vir optimus a senatu electus est, cujus manibus ejusdem dæmonis simulacrum susceptum est, in Urbemque pervectum,

(a) Invertit falsam appellationem, qua *ludi sacri* a paganis, aut *ludorum sacra* dicebantur.

(b) *Cælesti* huic *virgini* ræcipuus in Africa cultus tribuebatur, teste Tertulliano in Apologetico, cap. 24. De illa idem ipse in ejusdem libri capite 25, et multis locis Augustinus, ut Enarr. in Psal. 62, n. 7, et in Psal. 98, n. 14, et Sermon. 103, n. 12. Hanc Ludovicus Vives nulla coactus auctoritate aut ratione confandit hic loci cum deum matre Bererynthia; Augustinus contra manifeste distinguit, interposita copulante particula subjiciens, et *Bererynthiæ matri omnium*, id est, deorum et deorum: quod suppleendum relinquetur in manuscriptis. Nam in editis additum est, *deorum*.

(c) Prædie idus apriles mater deum magna pompa a suis sacerdotibus ad Almonem fluvium, qui non procul ab Urbe in Tiberim influit, producebatur, ibique ad confluentem duorum amnium abluetur veteri instituto. Nam quo primum die ex Asia illuc est advecta, a sacerdote lota est, isque mos postea sacer fuit et singulis annis repetitus. De quo more Ovidius, in Fast. lib. 4, vers. 557 seqq.; Lucanus, lib. 1, vers. 600; Prudentius, in Martyrio Romani.

habere de hac re iudicem vellem. Diceret nobis, utrum matrem suam tam optime de republica vellet mereri, ut ei divini honores decernerentur: sicut et Græcos et Romanos aliasque gentes constat quibusdam decrevisse mortalibus, quorum erga se beneficia magnipenderant, eosque immortales factos, atque in deorum numerum receptos esse crediderant (a). Profecto ille tantam felicitatem suæ matri, si fieri posset, optaret. Porro si ab illo deinde quereremus, utrum inter ejus divinos honores vellet illa turpia celebrari; nonne se malle clamaret, ut sua mater sine ullo sensu mortua jaceret, quam ad hoc dea viveret, ut illa libenter audiret? Absit ut senator populi Romani ea mente præditus, qua theatrum ædificari in urbe fortium virorum prohibuit, sic vellet coli matrem suam, ut talibus dea sacris propitiaretur, qualibus matrona verbis offenderetur. Nec illo modo crederet verecundiam laudabilis feminae ita in contrarium divinitate mutari, ut honoribus eam talibus advocearent cultores sui, qualibus conviviis in quempiam jaculatis, cum inter homines viveret, nisi aures clauderet seseque subtraheret, erubesceret pro illa et propinqui, et maritus, et liberi. Proinde talis mater deum, qualem habere matrem pateret quemlibet etiam pessimum virum, Romanas occupatura mentes quæsit optimum virum, non quem monendo et adjuvando faceret, sed quem fallendo deciperet, ei similis de qua scriptum est, *Mulier autem virorum pretiosas animas captat* (Prov. vi, 26): ut ille magnæ indolis animus hoc velut divino testimonio sublimatus¹, et vere se optimum existimans, veram pietatem religionemque non quæret, sine qua omne quamvis laudabile ingenium superbia vauescit et decidit. Quomodo igitur nisi insidiosè quæreret dea ista optimum virum, cum talia quærat in suis sacris, qualia viri optimi abhorrent suis adhiberi conviviis?

CAPUT VI. — *Deos Paganorum nunquam bene vendi sanxisse doctrinam.*

Hinc est quod de vita et moribus civitatum atque populorum, a quibus colebantur illa numina, non curarunt, ut tam horrendis² et detestabilibus malis, non in agro et vitibus, non in domo atque pecunia, non denique in ipso corpore, quod menti subditur, sed in ipsa mente, in ipso rectore carnis animo, eos impleri ac pessimos fieri sine ulla sua terribili prohibitione permitterent. Aut si prohibebant, hoc ostendatur potius, hoc probetur. Nec nobis nescio quos susurros paucissimorum auribus anhelatos et arcana velut religione traditos jactent, quibus vitæ prohibitas castitasque discatur: sed demonstrantur vel commoneantur loca talibus aliquando conventiculis consecrata; non ubi ludi agerentur obscenis vocibus et inotibus histrionum, nec ubi Fugalia (b) celebrarentur

¹ Iures Mss., *sublevatus*. — Sic Ms. 766. M.

² Sic Mss. addunt, *eos*; nec tamen omittunt infra ante verbum, *impleri*.

(a) Cicero, lib. 2 de Natura deorum, cap. 24: « Suscepit autem, » ait, « vita hominum et consuetudo communis, » ut beneficis excellentes viros in cœlum fama et voluntate tollerent. »

(b) *Fugalia*, festa fuerunt Romæ in memoriam expulso-

effusa omni licentia turpitudinum³ (et vere Fugalia, sed pudoris et honestatis); sed ubi populi audirent quid dii præciperent⁴ de cohibenda avaritia, ambitione frangenda, luxuria refrenanda; ubi discerent miseri, quod descendum Persius increpavit, dicens:

Disciteque, o miseri, et causas agnoscite⁵ rerum,
Quid sumus, aut quidnam victuri⁶ giguimur; ordo
Quis datus, aut metæ qua mollis⁷ flexus, et unde⁸,
Quis modus argenti, quid fas optare, quid asper
Utile nummus habet; patriæ charisque propinquis
Quam. um elargiri deceat; quem te Deus esse
Jussit, et humana qua parte locatus es in re.
(Satira 3, vers. 66-72.)

Dicatur in quibus locis hæc docentium deorum solebant præcepta recitari, et a cultoribus eorum populis frequenter audiri, sicut nos ostendimus ad hoc ecclesias institutas, quaquaversum religio christiana diffunditur.

CAPUT VII. — *Inutilia esse inventa philosophica sine auctoritate divina, ubi quemquam ad vitia prorum magis movet quod dii fecerint, quam quod homines disputarint.*

An forte nobis philosophorum scholas disputationesque memorabunt? Primo hæc non Romana, sed Græca sunt; aut si propterea jam Romana, quia et Græcia facta est Romana provincia; non deorum præcepta sunt, sed hominum inventa, qui utcumque conati sunt ingenii acutissimis præditi ratiocinando vestigare, quid in rerum natura latitaret, quid in moribus appetendum esset atque fugiendum, quid in ipsis ratiocinandi regulis certa connexionem traheretur, aut quid non esset consequens, vel etiam repugnaret. Et quidam eorum quædam magna, quantum divinitus adjuti sunt, invenerunt; quantum autem humanitas impediti sunt, erraverunt: maxime cum eorum superbiae juste providentia divina resisteret, ut viam pietatis ab humilitate in superna surgentem, etiam istorum comparatione monstraret: unde postea nobis erit in Dei veri⁷ Domini voluntate disquirendi ac disserendi locus. Verumtamen si philosophi aliquid invenerunt, quod agendæ bonæ vitæ beatæque adipiscendæ satis esse possit; quanto justius talibus divini honores decernerentur? Quanto melius et honestius in Platonis templo libri ejus legerentur, quam in templis dæmonum Galli absciderentur (a), molles consecrarentur, insani secarentur, et quidquid aliud vel crudele, vel turpe, vel turpiter crudele, vel crudeliter turpe in sacris talium deorum celebrari solet? Quanto satius erat, ad rum regum et liberatæ reipublicæ instituta, quæ mense februario celebrabantur post exacta Terminalia.

¹ vind. Am. Er. cum aliquot Mss., *effusa omnium licentia turpitudinum*.

² Mss. 766, 2030, 2032 et 2033, *præciperint*. M.

³ Mss. nostri, *discite*, ommissa vocula, *que*, quam requirit numerus poeticus. Cod. 766, *agnoscite*, ut PP. Benedictini; cæteri omnes, *cognoscite*. M.

⁴ Aliquot Mss., *quidnam venturi*. Et quidam, *quoniam venturi*.

⁵ In B., *quam mollis*. Sic etiam in Ms. 2030. Prætilimus lectionem Mss. 2031, 2032, 2035. M.

⁶ Nonnulli Mss., *vindar*, cum diphthongo in secunda syllaba. Nec malè, si forte alludit poeta ad metam in nomachia constitutam, ad quam subito navis esset convertenda, uti videre est in Æneid. 5.

⁷ Lov., *Dei veri et Domini*. Cæteri libri carent copulante particula, *et*; ut adjectivum, *veri*, cadat in substantivum, *Domini*.

(a) Sacerdotes matris deum Cybeles sive Berecynthiæ a Gallo fluvio Galli vocabantur, et exacti erant.

erudiendum justitiam juventutem¹, publice recitari leges deorum, quam laudari inaniter leges atque instituta majorum? Omnes enim cultores talium deorum, mox ut eos libido perpulerit, « ferventi » ut ait Persius, « tincta veneno, » (*Satira 3, vers. 37*) magis intuentur quid Jupiter fecerit, quam quid docuerit Plato, vel censuerit Cato. Hinc apud Terentium flagitiosus adolescens spectat

Tabulam quamdam pictam in pariete, ubi inerat pictura
hæc, Jovem
Quo pacto Danaæ misisse aiunt in gremium quondam im-
brem aurem:

atque ab hac tanta auctoritate adhibet atrocinum turpitudini suæ, cum in ea se jactat imitari deum.

At quem deum? (inquit) Qui templa cæli summo sonitu
concutit.

Ego homuncio hoc non facerem? Ego vero illud feci, ac
libens.

(*Terent. Eumach. act. 3, sc. 3, vers. 36, 37, et 42, 43.*)

CAPUT VIII. — *De ludis scenicis, in quibus dii non offenduntur editione² suarum turpitudinum, sed placantur.*

At enim non traduntur ista sacris deorum, sed fabulis poetarum. Nolo dicere illa mystica quam ista theatrica esse turpiora: hoc dico, quod negantes convineit historia, eosdem illos ludos, in quibus regnant figmenta poetarum, non per imperitum obsequium sacris deorum suorum intulisse Romanos; sed ipsos deos, ut sibi solemniter, ederentur et honori suo consecrarentur, acerbe imperando, et quodammodo extorquendo fecisse: quod in primo libro (*Cap. 32*) brevi commemoratione perstrinxi. Nam ingravescente pestilentia, ludi scenici auctoritate pontificum Romæ primitus instituti sunt. Quis igitur in agenda³ vita non ea sibi potius secunda arbitretur, quæ actitantur ludis auctoritate divina institutis, quam ea quæ scriptitantur legibus humano consilio promulgatis? Adulterum Jovem si poetæ fallaciter prodiderunt, dii utique casti, quia tantum nefas⁴ per humanos ludos confictum est, non quia neglectum, irasci ac vindicare debuerunt. Et hæc sunt scenicorum tolerabiliora ludorum, comœdiæ scilicet et tragœdiæ, hoc est fabulæ poetarum agendæ in spectaculis, multa rerum turpitudine, sed nulla saltem, sicut alia multa, verborum obscenitate compositæ: quas etiam inter studia, quæ honesta ac liberalia vocantur, pueri legere et discere coguntur a senibus.

CAPUT IX. — *Quid Romani veteres de cohibenda poetica licentia senserint, quam Græci deorum secuti judicium, liberam esse voluerunt.*

Quid autem hinc senserint Romani veteres, Cicero testatur in libris quos de Republica scripsit (a), ubi Scipio (b) disputans ait: « Nunquam comœdiæ, nisi

¹ Sic manuscripti. At editi, *ad erudiendam ad justitiam juventutem.*

² Sic Mss. At editi, *edictione.*

³ *Lov., agenda.* Melius editi alii et Mss., *agenda.*

⁴ *Lov., dii hi utique qua casti, quibus tantum nefas.* Refragantur editi alii et Mss.

(a) Non exstant hi Ciceronis libri, quorum fragmenta quædam, præter Augustinum, referunt Seneca, Nonius, A. Gellius, Lactantius, etc.

(b) Fuit ille Scipio Æmilianus, scilicet P. Æmilii qui Perseum Macedonia regem vicit filius, sed a Scipione Africano

« consuetudo vitæ pateretur, probare sua theatris flagitia potuissent. » Et Græci quidem⁵ antiquiores vitiosæ suæ opinionis quamdam convenientiam servaverunt, apud quos fuit etiam lege concessum, ut quod vellet comœdia, de quo vellet, nominatim diceret. Itaque, sicut in eisdem libris loquitur Africanus, « Quem illa non attingit? vel potius quem non vexavit? cui pepercit? Esto, populares homines improbos, in republica seditiosos, Cleonem, Cleophonem, Hyperbolum lesit (b). Patiamur, inquit, etsi ejusmodi cives a censore melius est quam a poeta notari: sed Periclem (c), cum jam suæ civitati maxima auctoritate plurimos annos domi et belli præfuisset, violari versibus; et eos agi in scena, non plus decuit, quam si Plautus (d), inquit, noster voluisset, aut Nævius (e) Publio et Cneo⁶ Scipioni aut Cæcilius (f) Marco Catoni (g) maledicere. » Deinde paulo post: « Nostræ, » inquit, « contra duodecim Tabulæ cum perpauca res capite sanxissent, in his hanc quoque sancendam putaverunt, si quis occentavisset⁷, sive carmen condidisset, quod infamiam faceret flagitiumve alteri. Præclare Judicis enim magistratum⁸, disceptationibus legitimis propositam vitam, non poetarum ingeniis habere debemus; nec probrum audire, nisi ea lege ut respondere liceat, et judicio defendere. » Hæc ex Ciceronis quarto de Republica libro ad verbum excerpta arbitratus sum, nonnullis, propter faciliorem intellectum, vel prætermisissis, vel paululum commutatis. Multum enim ad rem pertinent⁹, quam molior

⁵ *Vind. et Lov., quidam.*

⁶ *Vind. Er. et veteres Mss., Cneo.* Porro Publius et Cneus Scipio fratres fuerunt, et, si Servio credimus, gemini, de quibus Æneide 6 interpretatur, *duo fulmina belli Scipiadæ.* Eisdem Cicero in *Orat. pro Cornel. Balbo, duo fulmina imperii* appellat; et 1 paradoxo, *duo propugnacula belli.*

⁷ Editi, *actavisset.* Sed verius Mss., *occentavisset;* nam hoc verbum habent etiam quæ supersunt duodecim tabularum fragmenta. Ejus interpretatio ad oram Corbeiensis exemplaris pervertisti hæc adscripta est: « *Occentare, est infame carmen nominata persona edere. Occentare, contrarium canticum cantare.* » Eodem fere modo Festus exponit, de « *convicio facto clare et cum quodam canore.* »

⁸ Editi, *ac magistratum.* Particula, *ac,* abest a manuscriptis.

⁹ *Vind. Am. Er. et plures manuscripti, pertinet.* — Sic etiam *cod. 766. M.*

majoris filio adoptatus, Numantiæ atque Carthaginis everzor, qui et Africanus minor appellatus.

(b) De Cleone, Cleophonte et Hyperbolo, Plutarchus, in *Nicia*, capp. 7, 9. Vide præterea Thucyditem, lib. 4 *Belli Peloponnesiæ*; Ciceronem, in *Bruto*, cap. 62, et Aristophanem.

(c) Pericles, qui tam multos annos Athenis in administranda republica principatum tenuit, notus est ex Plutarcho historiæ ejus scriptore, itemque ex Thucydide, lib. 2, Cicerone, in lib. 3 de *Oratore*, in *Bruto* et in *Oratore* perfecto.

(d) Plautus a Scipione, qui eum nunquam viderat, hic *noster* appellatur, quia Latinus fuit: nam de græcis poetis comicis erat locutus antea.

(e) Nævius, Plauto fere æqualis, obiisse traditur Uticæ in Africa, quo pulsus fuerat factione nobilium, Metelli præcipue ac Scipionis Africani, quos suis versibus perstrinxerat. De ipso A. Gellius, lib. 3, cap. 3; lib. 6, cap. 8; et lib. 3, cap. 14.

(f) Cæcilius Staius, poeta comicus natione Gallus, Ennii contubernalis fuit. Ejus meminit Cicero ad *Attic.* lib. 7, *Epist.* 3; Velleius, lib. 1, cap. 17; A. Gellius lib. 5, cap. 16; lib. 2, cap. 23; et lib. 17, cap. 21. Nonnullis in libris hic et infra, cap. 12, scribitur, *Cælius*: sed male, ut constat ex *Horatii Epist.* lib. 2, ep. 1, vers. 57.

(g) Catoni videlicet seniori, qui ex familia Porcia primus gessit honores in republica, et cum Ennio ac Cæcilio vixit.

explicare, si potero. Dicit deinde alia, et sic concludit hunc locum, ut ostendat veteribus displicuisse Romanis, vel laudari quemquam in scena vivum hominem, vel vituperari. Sed, ut dixi, hoc Græci quanquam inverecundius, tamen convenientius licere voluerunt, cum viderent diis suis accepta et grata esse opprobria, non tantum hominum, verum et ipsorum deorum in scenicis fabulis; sive a poetis essent illa conficta, sive flagitia eorum vera commemorarentur et agerentur in theatris, atque ab eorum cultoribus utinam solo risu, ac non etiam imitatione digna viderentur. Nimis enim superbum fuit, famæ parcere principum civitatis et civium, ubi suæ famæ parci numina noluerunt.

CAPUT X. — *Qua nocendi arte daemones velint vel falsa de se crimina, vel vera narrari.*

Nam quod affertur pro defensione, non illa vera in deos dici, sed falsa atque conficta, id ipsum est sceleratius, si pietatem consulas religionis; si autem malitiam daemorum cogites, quid astutius ad decipiendum atque callidius? Cum enim probrum jacitur in principem patriæ bonum atque utilem, nonne tanto est indignius, quanto a veritate remotius, et a vita illius alienius? Quæ igitur supplicia sufficiant, cum Deo sit ista tam nefaria, tam insignis injuria? [X.] Sed maligni spiritus, quos isti deos putant, etiam flagitia quæ non admiserunt, de se dici volunt, dum tamen humanas mentes his opinionibus velut retibus inducant¹, et ad prædestinationum supplicium secum trahant: sive homines ista commiserint, quos deos haberi gaudent qui humanis erroribus gaudent, pro quibus se etiam colendos mille nocendi fallendique artibus interponunt; sive etiam non ullorum hominum illa crimina vera sint, quæ tamen de numinibus fingi libenter accipiunt fallacissimi spiritus, ut ad scelestæ ac turpia perpetranda, velut ab ipso cælo traduci in terras satis idonea videatur auctoritas. Cum igitur Græci talium numinum servos se esse sentirent, inter tot et tanta eorum theatrica opprobria parcendum sibi a poetis nullo modo putaverunt, vel diis suis etiam quæ consimilari appetentes, vel metuentes ne honestiorem famam ipsi requirendo, et eis se hoc modo præferendo, illos ad iracundiam provocarent.

CAPUT XI. — *De scenicis apud Græcos in reipublicæ administrationem receptis, eo quod placatores deorum injuste ab hominibus spernerentur.*

Ad hanc convenientiam pertinet, quod etiam scenicos actores earundem fabularum non parvo civitatis honore dignos existimarunt². Siquidem, quod in eoque de Republica libro commemoratur, et Æschines Atheniensis³, vir eloquentissimus, cum adolescens tragœdias actavisset, rempublicam capes-

sivit (a); et Aristodemum, tragicum item actorem, maximis de rebus pacis ac belli legatum ad Philippum Athenienses sæpe miserunt. Non enim consentaneum putabatur, cum easdem artes eisdemque scenicos ludos etiam diis suis acceptos viderent, illos, per quos agerentur, infamium loco ac numero deputare. [XI.] Hæc Græci turpiter quidem, sed sane diis suis omnino congruenter, qui nec vitam civium lacerandam linguis poetarum et histrionum subtrahere ausi sunt, a quibus cernebant deorum vitam eisdem ipsis diis volentibus et libentibus carpi; et ipsos homines, per quos ista in theatris agebantur, quæ numinibus, quibus subditi erant, grata esse cognoverant, non solum minime spernendos in civitate, verum etiam maxime honorandos putarunt. Quid enim causæ reperire possent, cur sacerdotes honorarent, quia per eos victimas diis acceptabiles offerebant; et scenicos probrosos haberent, per quos illam voluptatem sive honorem diis exhiberi, petentibus, et, nisi fieret, irascentibus, eorum admonitione didicerant? Cum præsertim Labeo (a), quem hujuscemodi rerum peritissimum prædicant, numina bonæ a numinibus malis ista etiam cultus diversitate distinguat, ut malos deos propitiari cædibus et tristibus supplicationibus asserat; bonos autem obsequiis lætis atque jucundis: qualia sunt, ut ipse ait, ludi, convivium, lectisternia (b). Quod totum quale sit, postea, si Deus juverit, diligentius dissereamus. Nunc ad rem præsentem quod attinet, sive omnibus omnia tanquam bonis permixte tribuantur (neque enim esse decet deos malos, cum potius isti, quia immundi sunt spiritus, omnes sint mali), sive certa discretionem, sicut Labeoni visum est, illis illa, istis ista distribuatur obsequia: competentissime Græci utrosque honore dignos ducunt⁴, et sacerdotes, per quos victimæ ministrantur, et scenicos, per quos ludi exhibentur; ne vel omnibus diis suis, si et ludi omnibus grati sunt, vel, quod est indignius, his quos bonos putant, si ludi ab eis solis amantur, facere convincantur injuriam.

CAPUT XII. — *Quod Romani auferendo libertatem poetis in homines, quam dederunt in deos, melius de æ, quam de diis suis senserint.*

At Romani, sicut in illa de republica disputatione Scipio gloriatur, probris et injuriis poetarum subjectam vitam famamque habere noluerunt, capite etiam plectendum sancientes⁵, tale carmen condere si quis auderet. Quod erga se quidem satis honeste constituerunt, sed erga deos suos superbe et irreligiose: quos cum seirent non solum patienter, verum etiam

¹ In Mss., *qui*. — Sic etiam Ms. 768. M.

² ss. alii, *honore ducunt*; alii, *honori ducunt*: ommissa voce, *dignos*. — Nostri manuscripti, *honori ducunt*. M.

³ Vind. Am. Er. et prope omnes Mss., *capite etiam sancientes*: absque verbo, *plectendum*; pro quo Lov., *puniri*. — Scriba Ms. 768 addidit inter lineas verbum, *plectendum*. M.

(a) Labeones existere tres, juris civilis scientia clari: sed unus omnium doctissimus Antistius Labeo, qui cum Cæsare Augusto vixit, non juris modo, sed totius antiquitatis peritissimus, de quo hic Augustinus. De eodem Suetonius in Augusto, cap. 54; A. Gellius, lib. 4, cap. 12, et lib. 13, capp. 10 et 12.

(b) infra, lib. 3, cap. 17.

¹ Vind. Am. Er., *inducant*.

² Idem editi, *civitatis suæ honore dignos existimarunt*.

³ In iisdem editis, *Æschines civis Atheniensis*.

(a) De Æschine id compertum etiam ex Plutarcho de decem Rhetoribus, in Vita Æschinis, pag. 840, 841, ubi Aristodemi quoque meminit. Vide Demosthenem, orat. de corona: A. Gellium, lib. 4, cap. 9.

libenter poetarum probris maledictisque lacerari; se potius quam illos hujuscemodi injuriis indignos esse duxerunt, seque ab eis etiam lege munierunt, illorum autem ista etiam sacris solemnitatibus miscuerunt. Itane tandem, Scipio, laudas hanc poetis Romanis negatam esse licentiam, ut cuiquam opprobrium infligerent Romanorum, cum videas eos nulli deorum pepercisse vestrorum? Itane plaris tibi habenda visa est existimatio curiæ vestræ quam Capitolii (a), imo Romæ unius quam cæli totius; ut linguam maledicam in cives tuos exercere¹ poeta etiam lege prohiberetur, et in deos tuos securi tanta convicia, nullo senatore, nullo censore, nullo principe, nullo pontifice prohibente, jacularentur? Indignum videlicet fuit, ut Plautus, aut Nævius Publio et Cneo Scipioni, aut Cæcilius M. Catoni malediceret; et dignum fuit, ut Terentius vester (b) flagitio Jovis optimi maximi adolescentium nequitiam concitaret?

CAPUT XIII. — *Debuisse intelligere Romanos, quod dii eorum, qui se turpibus ludis coli expetebant, indigni essent honore divino.*

Sed responderet mihi fortasse, si viveret: Quomodo nos ista impunita esse nollemus, quæ ipsi dii sacrasse voluerunt, cum ludos scenicos, ubi talia celebrantur, dictantur, actantur, et Romanis moribus invexerunt, et suis honoribus dicari exhiberique jussurunt? Cur ergo non hinc magis ipsi intellecti sunt non esse dii veri, nec omnino digni quibus divinos honores deferret illa respublica? Quos enim coli minime deceret, minimeque oporteret, si ludos expeterent agendos conviciis Romanorum; quomodo, quæso, colendi² patati sunt, quomodo non detestandi spiritus intellecti, qui cupiditate fallendi inter suos honores sua celebrari crimina poposcerunt? Itemque Romani, quamvis jam superstitione noxia premerentur, ut illos deos colerent, quos videbant sibi voluisse scenicas turpitudines consecrari, suæ tamen dignitatis memores ac pudoris, actores talium fabularum nequaquam honoraverunt more Græcorum, sed sicut apud Ciceronem idem Scipio loquitur, *Cum artem ludicram scenamque totum probro ducerent³, genus id hominum non modo honore civium reliquorum carere, sed etiam tribu moveri (c) notatione censoria voluerunt.* Præclara sane, et Romanis laudibus annumeranda prudentia: sed vellem se ipsa sequeretur, se imitaretur. Ecce enim recte, quisquis civium Romanorum esse scenicus elegisset, non solum ei nullus ad hono-

¹ Aliquot Mss., *exercere*.

² Lov., *quomodo, quæso, dii colendi*. A cæteris libris abest, *dii*.

³ Vind. Am. Er. et Mss., *in probro ducerent*.

(a) *Curia*, locus in quo senatus habebatur, hic pro senatoribus ponitur; *Capitolium*, quod templum Jovis erat, pro ipsis diis.

(b) *Terentius vester*, ait, qui nimirum gente quidem Afer, sed amillarissimus Scipioni fuit, sicut et Lælio, a quibus ferunt ad utum esse in scribendis fabulis.

(c) *Tribu moveri*, quæ poena erat hominum plebei seu tertii ordinis, idem visse atque ex una tribu nobiliore transferri in ignobiliorum, intelligitur ex Livio, lib. 15, cap. 15. Cui et Tertullianum, de Spectaculis cap. 22.

rem dabatur locus, verum etiam censoris nota tribum tenere propriam minime sinebatur. O animum civitatis laudis avidum, germaneque (a) Romanum! Sed respondeatur mihi, qua consentanea ratione homines scenici ab omni honore repelluntur, et ludi scenici deorum honoribus admiscentur? Illas theatricas artes diu virtus Romana non noverat (b): quæ si ad oblectamentum voluptatis humanæ quærecrentur, vitio morum irreperent humanorum. Dii eas sibi exhiberi petiverunt: quomodo ergo abjicitur scenicus, per quem colitur Deus? et theatricæ illius turpitudinis qua fronte nota ur actor, si adoratur exactor? In hac controversia Græci Romanique concertant. Græci putant recte se honorare homines scenicos, quia colunt ludorum scenicorum flagitatores deos: Romani vero hominibus scenicis nec plebeiam tribum, quanto minus senatoriam curiam dehonestari sinunt? In hac disceptatione hujuscemodi ratiocinatio summam questionis absolvit. Proponunt Græci: Si dii tales colendi sunt, profecto etiam tales homines honorandi. Assumunt Romani: Sed nullo modo tales homines honorandi sunt. Concludunt Christiani: Nullo modo igitur dii tales colendi sunt.

CAPUT XIV. — *Meliorem fuisse Platonem, qui poetis locum in bene morata urbe non dederit, quam hos deos, qui se ludis scenicis voluerint honorari.*

1. Deinde quærimus, ipsi poetæ, talium fabularum compositores, qui duodecim Tabularum lege prohibentur famam lædere civium, tam probrosa in deos convicia jaculantes, cur non ut scenici habeantur inhonesti. Qua ratione rectum est, ut poeticorum figmentorum et ignominiosorum deorum infametur actores, honorentur auctores? an forte Græco Platoni potius palma danda est, qui cum ratione formaret, qualis esse civitas debeat, tanquam adversarios veritatis¹, poetas censuit urbe pellendos? Iste vero et deorum injurias indigne tulit, et fucari corrumpique figmentis animos civium noluit. Confer nunc Platonis humanitatem a civibus decipiendis poetas urbe pellentem, cum deorum divinitate honori suo ludos scenicos expetente. Ille, ne talia vel scriberentur, etsi non persuasit disputando, tamen suasit levitati lasciviæque Græcorum: isti, ut talia etiam agerentur, jubendo extorserunt gravitati et modestiæ Romanorum. Nec tantum² hæc agi voluerunt, sed sibi dicari, sibi sacrari, sibi solemniter exhiberi. Cui tandem honestius divinos honores decerneret civitas? utrum Platonis hæc turpia et nefanda prohibenti; an dæmonibus hæc hominum deceptione gaudentibus, quibus ille vera persuadere non potuit?

2. Hunc Platonem Labeo inter semideos (c) com-

¹ sic magno consensu Mss. At editi, *adversarios civitatis*.

² Solæ editio Lov., *nec tamen*; minus bene.

(a) *Germaneque*, id est, vere, laudis aviditate, Romanum, quia Romana gens fuit laudis avidissima.

(b) Quadringentos fere per annos: nam introductos illos ludos anno Urbis 392, narrat Livius, lib. 7, cap. 2.

(c) Ordines deorum ex Varrone et aliis habentur tres. quosdam deos summos nominabant: medioximos alios, quæ et semidei, ex altero parente immortalis progeniti, ut Romulus, Hercules, etc. Alii tertii ordinis et ex utroque mortali parente nati, dicebantur heroes.

Memorandum putavit, sicut Herculem, sicut Romulam: semideos autem heroibus anteponit, sed utrosque inter numina collocat. Verumtamen istum, quem appellat semideum, non heroibus tantum, sed etiam diis ipsis præferendum esse non dubito. Propinquant autem Romanorum leges disputationibus Platonis, quando ille cuncta poetica signimenta condemnat, isti autem poetis adimunt saltem in homines maledicendi licentiam; ille poetas ab urbis ipsius habitatione¹, isti saltem actores poeticarum fabularum remouent a societate civitatis, et, si contra deos ludorum scenorum expetitores aliquid auderent, forte undique removerent. Nequaquam igitur leges ad instituendos bonos aut corrigendos malos mores, a diis suis possent accipere seu sperare Romani, quos legibus suis vincunt atque convincunt. Illi enim honori suo deposcunt ludos scenicos, isti ab honoribus omnibus repellunt homines scenicos: illi celebrari sibi iubent signamenti poeticis opprobria deorum, isti ab opprobriis hominum deterrent impudentiam poetarum. Semideus autem ille Plato et talium deorum libidini restitit, et ab indole Romanorum quid perficiendum esset, ostendit; qui poetas ipsos vel pro arbitrio mentientes, vel hominibus miseris quasi deorum facta pessima imitanda proponentes, omnino in civitate bene instituta vivere noluit. Nos quidem Platonem nec deum, nec semideum perhibemus; nec ulli sancto angelo summi Dei, nec veridico prophetæ, nec apostolo alicui, nec cuilibet Christi martyri, nec cuiquam christiano homini comparamus; cuius nostræ sententiæ ratio, Deo prosperante, suo loco explicabitur: sed eum tamen, quandoquidem ipsi volunt fuisse semideum, præferendum esse censemus, si non Romulo et Herculi (quamvis istum nec fratrem occidisse, nec aliquod perpetrasse flagitium quisquam historicorum vel poetarum dixit aut finxit [a]), certe vel Priapo, vel alicui Cynocephalo (b), postremo vel Febri (c), quæ Romani numina partim peregrina receperunt, partim sua propria sacraverunt. Quomodo igitur tanta animi et morum mala bonis præceptis et legibus vel imminuentia prohiberet, vel insita exstirpanda curarent dii tales, qui etiam seminanda et augenda flagitia curaverunt, talia vel sua vel quasi sua facta per theatricas celebritates populis innotescere cupientes, ut tanquam auctoritate divina, sua sponte nequissima libido accenderetur humana: frustra hoc exclamante Cicerone, qui cum de poetis ageret, *Ad quos cum accessit*², inquit, *clamor et approbatio populi, quasi ma-*

gni cuiusdam et sapientis magistri, quas illi obducunt tenebras! quos invehunt metus! quas inflammant cupiditates (a)!

CAPUT XV. — *Quod Romani quosdam sibi deos non ratione, sed adulatione instituerint.*

Quæ autem illic¹ eligendorum deorum etiam ipsorum falsorum ratio, ac non potius adulatio est? quando istum Platonem, quem semideum voluit, tantis disputationibus laborantem ne animi malis, quæ præcipue cavenda sunt, mores corrumpentur humani, nulla sacra ædícula dignum putarunt; et Romulum suum diis multis prætulērunt, quamvis et ipsum semideum potius quam deum vel secretior eorum doctrina commendet (b). Nam etiam flaminem illi instituerunt, quod sacerdotii genus adeo in Romanis sacris testante apice (c) excellit, ut tres solos flamines haberent tribus numinibus institutos, Dialem Jovi, Martialem Marti, Quirinalem Romulo. Nam benevolentia civium vel receptus in cælum, Quirinus (d) est postea nominatus. Ac per hoc et Neptuno et Plutoni, fratribus Jovis, et ipsi Saturno, patri eorum, isto Romulus honore prælatus est, ut pro magno sacerdotium, quod Jovi tribuerunt, hoc etiam huic tribuerent, et Marti tanquam patri ejus, fortisan propter ipsum.

CAPUT XVI. — *Quod si diis ulla esset cura justitiæ, ab eis Romani accipere debuerint præcepta vivendi potius, quam leges ab aliis hominibus mutuari.*

Si autem a diis suis Romani vivendi leges accipere potuissent, non aliquot annos post Romam conditam (e) ab Atheniensibus mutuarentur leges Solonis: quas tamen non ut acceperunt tenuerunt², sed meliores et emendatiores facere conati sunt. Quamvis Lycurgus Lacedæmoniis leges ex Apollinis auctoritate se instituisse continuerit: quod prudenter Romani credere noluerunt, propterea non inde acceperunt. Numma Pompilius, qui Romulo successit in regnum, quasdam leges, quæ quidem regendæ civitati nequaquam sufficerent, condidisse fertur; qui eis multas etiam sacra constituit: non tamen perhibetur easdem leges a numinibus accepisse. Mala igitur animi, mala vitæ, mala morum, quæ ita magna sunt, ut his doctissimi eorum viri etiam stantibus urbibus respublicas

¹ Vind. Er. et Lov., *illis*. At Am. et plerique manuscripti, *illic*.

² Verbum, *tenuerunt*, abest a Mss. — Abest etiam a nostris: in codicem A manu sæculi decimi quinti illatum est

(a) similia leguntur in Tusculan. 3.

(b) De hac secretiore doctrina, qua Genii tutelaris et ipsius Urbis nomen sacrum celabatur, confer Plinium, Hist. Nat. lib. 28, cap. 4; Plutarchum, Quæst. Rom. quæst. 62; Macrobius Saturn. lib. 3, cap. 9; præsertim Dionysium Halicarnass. Antiquitatibus Rom. lib. 4, cap. 62; Valerium Max. lib. 1, cap. 1, § 13. COOVSXS.

(c) De sanctitate apicis (id est, virgæ lanatæ in summo pileo flaminis) testatur historia apud Valerium Max. lib. 1, cap. 1, § 4: «sulpicio inter sacrificandum apex e capite prolapsus eidem sacerdotium abstulit.»

(d) Quirinus ex Sabinorum idiomate appellatus est, ex quo etiam Romani dicti sunt Quiritæ. Vid. Ovid. 2, Fast. Liv., lib. 2.

(e) Annos fere trecentos ab Urbe condita, teste Livio, lib. 3, capp. 33, 34.

¹ Editi, *ab urbis ipsius habitatione repellit*. Abest, *repellit*, a manuscriptis.

² Vind. Am. et Er., *qui cum de poetis agens ad eos accessisset*.

(a) Scilicet, *nec fratrem occidisse*, sicut de Romulo; *nec aliquod perpetrasse flagitium*, sicut de Hercule plura vel historici dixerunt, vel poetæ fluxerunt.

(b) Hinc ad Ægyptum Lucanus, lib. 8, vers. 851, 852:

*Nos in templa tuam Romana accepimus Isim,
Sensitantesque deos, et sistra moventia luctum.*

(c) Infinitus essem, si de Febre apud Romanos culta veterum loca proferrem. Adeantur Plinius Hist. Nat. lib. 2, cap. 7; Alian. Var. Hist. lib. 12, cap. 11; Cicero, de Natura deorum, lib. 3, cap. 25: «Febri fanum in Palatio... consecratum videmus» LARCIER.

perire confirmat (a), dii eorum, ne suis cultoribus acciderent, minime curarunt; imo vero ut augerentur, sicut supra disputatum est, omni modo curaverunt.

CAPUT XVII. — *De raptu Sabinarum, aliisque iniquitatibus, quæ in civitate Romana etiam laudatis videri temporibus.*

An forte populo Romano propterea leges non sunt a numinibus constitutæ, quia, sicut Sallustius ait, « jus bonumque apud eos non legibus magis quam natura valebat » (Sallust. de conjurat. Catilinæ, cap. 9)? Ex hoc jure ac bono credo raptas esse Sabinas. Quid enim justius et melius, quam filias alienas fraude spectaculi inductas, non a parentibus accipi, sed vi, ut quisque poterat, auferri? Nam si inique facerent Sabini negare postulat, quanto fuit iniquius rapere non datas? Justius autem bellum cum ea gente geri potuit, quæ filias suas ad matrimonium conregionalibus et consinalibus suis negasset petitas, quam cum ea quæ repetebat ablatas. Illud ergo potius fieret: ibi Mars¹ filium suum pugnantem juvaret, ut conjugiorum negatorum armis ulcisceretur injuriam, et eo modo ad feminas quas voluerat, perveniret. Aliquo enim fortasse jure belli, injuste negatas, juste victor auferret; nullo autem jure pacis non datas rapuit, et injustum bellum cum earum parentibus juste succensentibus gessit. Hoc (b) sane utilius felicisque successit, quod etsi ad memoriam fraudis illius circensium spectaculum mansit (c), facinoris tamen in illa civitate et imperio non placuit exemplum: faciliusque Romani in hoc erraverunt, ut post illam iniquitatem deum sibi Romulum consecrarent, quam ut in feminis rapiendis factum ejus imitandum lege ulla vel more permitterent. Ex hoc jure ac bono post expulsam cum liberis suis regem Tarquinium, cujus filius Lucretiam stupro violenter oppresserat, Junius Brutus consul Lucium Tarquinium Collatinum (d), maritum ejusdem Lucretiæ, collegam suum, bonum atque innocentem virum, propter nomen et propinquitatem Tarquiniorum coegit magistratu se abdicare, nec vivere in civitate permisit. Quod scelus favente vel patiente populo fecit, a quo populo consulatum idem Collatinus, sicut etiam ipse Brutus, acceperat. Ex hoc jure ac bono Marcus Camillus, illius tempo-

ris vir egregius, qui Vientes, gravissimos hostes populi romani, post decennale bellum, quo Romanus exercitus toties male pugnando graviter afflictus est, jam ipsa Roma de salute dubitante atque trepidante, facillime superavit, eorumque urbem opulentissimam cepit, invidia obrectatorum virtutis suæ et insolentia tribunorum plebis reus factus est, tamque ingrattam sensit¹ quam liberaverat civitatem, ut de sua damnatione certissimus in exilium sponte discederet, et decem millibus æris absens etiam damnaretur; mox iterum a Gallis vindex patriæ futurus ingrattæ (a). Multa commemorare jam piget fœda et injusta, quibus agitabatur illa civitas, cum potentes plebem sibi subdere conarentur, plebsque illis subdi recusaret; et utriusque partis defensores magis studiis agerent amore vincendi, quam æquam et bonum quidquam cogitarent.

CAPUT XVIII. — *Quæ de moribus Romanorum, aut metu compressis, aut securitate² resolutis, Sallustii prodatur historia.*

1. Itaque habeo modum, et ipsum Sallustium testem potius adhibebo, qui cum in laude Romanorum dixisset, unde nobis iste sermo ortus est, « Jus bonumque apud eos non legibus magis quam natura valebat; » prædicans illud tempus, quo expulsis regibus incredibiliter civitas brevi ætatis spatio plurimum crevit: idem tamen in primo Historiæ suæ libro atque ipso ejus exordio fatetur, etiam tunc, cum ad consules a regibus esset translata respublica, post parvum intervallum (b), injurias validiorum, et ob eas discessionem plebis a patribus, aliasque in Urbe dissensiones fuisse. Nam cum optimis moribus et maxima concordia populum Romanum inter secundum et postremum bellum (c) Carthaginense commemorasset egisse, causamque hujus boni, non amorem justitiæ, sed stante Carthagine metum pacis infidæ fuisse dixisset; unde et Nasicus ille ad reprimendam nequitiam, servandosque istos mores optimos, ut metu vitia cohiberentur, Carthaginem notebat everti: continuo subjecit idem Sallustius, et ait: « At discordia, et avaritia, atque ambitio, et cætera secundis rebus oriri sueta mala, post Carthaginis excidium maxime aucta sunt. » Ut intelligeremus etiam antea et oriri solere, et augeri. Unde subnectens cur hoc

¹ Editi, *illud ergo potius ibi fieret, ubi Mars*, etc. Castigatur locus ex manus scriptis.

(a) Vld. Plaut. in Persa.

(b) Interpretes hujus operis pronomen, *Hoc*, ad bellum ante memoratum referunt, quod initio cum Sabinis jam prope viacentibus lædere feliciter confectum prodit Livius, lib. 1, cap. 13. Nos tamen referendum arbitramur ad Romanorum, quos subinde laudat Augustinus, mores et æquitatem, quod apud ipsos Romuli dei sui facinus in rapiendis feminis imitari nulla unquam lege licuerit.

(c) Circenses ludos Neptuno equestri primus Romæ celebravit Romulus, ut feminas quas a vicinis populis nec poterat ad conjugium impetrare, potissimum Sabinas virginis spectaculi causa evocatas raperet. Dicti sunt a priscis Consualia, ex nomine, ut ferunt, Consi dei, Neptuni scilicet equestris, a quo opem Romulus consiliumque in conjugiorum difficultate quaesierat. De his Livius, lib. 1, cap. 9.

(d) Expulsa regia potestate, primi consules isti duo sunt creati, L. Junius Brutus et L. Tarquinius Collatinus. Hunc a collega suo coactum esse ob nomen et genus regium magistratu se abdicare, et, accepto patrimonio suo, Lavinium Romæ relicta migrare scribit Livius, lib. 1.

¹ Sic omnes Mss. — In B., *reus factus tam ingrattam sensit. M.*

² Editi, *severitate*, male et dissentientibus manuscriptis.

(a) Illic jurens patriæ alterque Urbis conditor ac Romulus appellatus est. Veios, Etruriæ urbem, cepit. Post, alio accusatus, vitandæ invidiæ gratia, Ardeam exulatum ivit, duobus annis ante Romam a Gallis captam. Quindecim millibus æris gravis mulctatum Camillum absentem dicit Livius, lib. 3, cap. 32; Plutarchus, quindecim millibus assium. Attamen hic loci manuscripti omnes habent, *decem millibus*.

(b) Post quindecim annos, ut ex Livio, lib. 2, cap. 31, intelligere est, Urbis conditiæ anno 238, qui annus Tarquinti mortis nuntio insignis fuit.

(c) Bella inter Romanos et Carthaginenses tria gesta sunt. Primum per 22 annos in Sicilia et post in Africa, coeptum anno ab Urbe condita 495, ex Plin. lib. 53. Alterum coeptum post 25 annos in Hispania, Sicilia, Italia et Africa gestum, ibique decimo septimo anno a Scipione Africano majore confectum victo Annibale. Tertium post 49 annos in Africa, et tertio anno a Scipione Africano minore terminatum eversa Carthagine.

dixerit, « Nam injuriæ, » inquit, « validiorum, et ob cas discessio plebis a patribus, aliæque dissensiones domi fuere jam inde a principio, neque amplius quam regibus exactis, dum metus a Tarquinio et bellum grave cum Etruria (a) positum est, æquo et modesto jure aglatum. » Vides quemadmodum illo etiam brevi tempore, ut regibus exactis, id est ejectis, aliquantum æquo et modesto jure ageretur, metum dixit fuisse causam; quoniam metuebatur bellum, quod rex Tarquinius regno atque Urbe pulsus, Etruscis sociatus, contra Romanos gerebat. Attende itaque quid deinde contexat: « Dein, » inquit, « servili imperio patres plebem exercere, de vita atque tergo¹ regio more consulere, agro pellere, et cæteris expertibus soli in imperio agere. Quibus sævitiis et maxime fenore² oppressa plebs cum assiduis bellis tributum et simul militiam toleraret, armata montem Sacrum atque Aventinum insedit (b): tumque tribunos plebis et alia sibi jura paravit. Discordiarum et certaminis utrimque finis fuit secundum bellum Punicum. » Cornis ex quo tempore, id est parvo intervallo post reges exactos, quales Romani fuerint, de quibus ait, « Jus bonumque apud eos non legibus magis quam natura valebat. »

2. Porro si illa tempora talia reperiuntur, quibus pulcherrima atque optima fuisse prædicatur Romana respublica; quid jam de consequenti ætate dicendum aut cogitandum arbitramur, « cum paulatim mutata » ut ejusdem historici verbis utar, « ex pulcherrima atque optima, pessima ac flagitiosissima facta est » (Sallust. de Conjuratone Catilinæ, cap. 5); post Carthaginis videlicet, ut commemoravit, excidium? Quæ tempora ipse Sallustius quemadmodum breviter recolat et describat, in ejus Historia legi potest, quantis malis morum, quæ secundis rebus exorta sunt, usque ad bella civilia (c) demonstrat esse perventum³. « Ex quo tempore, » ut ait, « majorum mores non paulatim, ut antea, sed torrentis modo præcipitati; adeo juvenus luxu atque avaritia corrupta, ut merito dicatur genitos esse qui neque ipsi habere possent res familiares, neque alios pati » (d). Dicit deinde plura Sallustius de Syllæ vitis cæteraque fœditate reipublicæ: et alii scriptores in hæc consentiunt, quamvis eloquio multum impari.

¹ Vind., ac quiete erga se. Verius cæteri libri, atque tergo; id est, verberibus supplicioque virgarum, quibus liberum corpus Romani civis cædi fuit vetitum.

² sola editio Lov., et maxime fenoris onere.

³ Ms. 766, provenitum. M.

(a) Cum Porsenna scilicet Etruscorum rege, qui Tarquinium restitui in regnum volebat, et gravi obsidione Romanos premebat. De hoc Livius, lib. 2, cap. 9 seqq.

(b) Anno decimo sexto post reges exactos facta est secessio illa plebis in montem Sacrum trans Anienem amnem; ibique primum tribuni creati qui plebi essent veluti tutores. Altera quadam secessione primum in montem Aventinum, qui est pars urbis. Deinde vero, quo major solitudo et exinde terror esset urbi, in Sacrum montem itum esse ferunt. Vide Cic. Oral. prior. pro Cornelio; Liv. lib. 4, etc.

(c) Bella inter Patres et Græchos, inter Marium et Syllam, inter Cæsarem et Pompeium.

(d) Qui nimirum luxu effunderent quæcumque rapere aliis possent.

3. Cernis tamen, ut opinor, et quisquis adverterit facillime perspicit colluvie¹ morum pessimorum quæ illa civitas prolapsa fuerit, ante nostri superni Regis adventum. Hæc enim gesta sunt non solum antequam Christus in carne præsens docere cœpisset, verum etiam antequam de Virgine natus esset. Cum igitur tot et tanta mala temporum illorum vel tolerabiliora superius, vel post eversam Carthaginem intoleranda et horrenda diis suis imputare non audeant, opiniones humanis mentibus, unde talia vitia silvescerent, maligna astutia inserentibus; cur mala præsentia Christo imputant, qui doctrina saluberrima et falsæ ac fallaces deos coli vetat, et istas hominum noxias flagitiosasque cupiditates divina auctoritate detestans atque condemnans, his malis tabescenti ac labenti mundo ubique familiam suam sensim subtrahit, qua condant æternam, et non plausu vanitatis, sed judicio veritatis gloriosissimam civitatem?

CAPUT XIX. — De corruptione Romanæ reipublicæ, priusquam cultum deorum Christus auferret.

Ecce Romana respublica (quod non ego prinus dico, sed auctores eorum, unde hæc mercede didicimus, tanto ante dixerunt ante Christi adventum) « paulatim mutata, ex pulcherrima atque optima, pessima ac flagitiosissima facta est. » Ecce ante Christi adventum, post deletam Carthaginem, « maiorum mores, non paulatim, ut antea, sed torrentis modo præcipitati; adeo juvenus luxu atque avaritia corrupta est. » Legant nobis contra luxum et avaritiam præcepta deorum suorum populo Romano data. Cui utinam tantum casta et modesta reticerent, ac non etiam ab illo probrosa et ignominiosa deposcerent, quibus per falsam divinitatem perniciosam conciliarent auctoritatem. Legant nostra, et per Prophetas, et per sanctum Evangelium, et per apostolicos Actus, et per Epistolas, tam multa contra avaritiam atque luxuriam, ubique populis ad hoc congregatis, quam excellenter, quam divine, non tanquam ex philosophorum concertationibus strepere, sed tanquam ex oraculis et Dei nubibus intonare. Et tamen luxu atque avaritia sævisque² ac turpibus moribus ante adventum Christi reipublicam pessimam ac flagitiosissimam factam, non imputant diis suis: afflictionem vero ejus, quamcumque isto tempore superbia deliciaeque eorum perpessæ fuerint, religioni increpitant christianæ. Cujus præcepta de justis probisque moribus, si simul audirent atque curarent reges terræ et omnes populi, principes et omnes judices terræ, juvenes et virgines, seniores cum junioribus (Psal. cxlviii, 11, 12), ætas omnis capax et uterque sexus, et quos Baptista Joannes alloquitur, exactores ipsi atque milites (Luc. iii, 12-14); et terras vitæ præsentis ornaret sua felicitate respublica. et vitæ æternæ culmen beatissime regnatura conscenderet. Sed quia iste audit, ille contemnit,

¹ Am. Fr. et Lov., colluviem. Erratum, quod emendant Vind. et manuscripti.

² Vind. Am. Er., scensique.

pluresque vitiis male blandientibus quam utili virtutum asperitati sunt amiciores (a) ; tolerare Christi famuli jubentur, sive sint reges, sive principes, sive iudices, sive milites, sive provinciales, sive divites, sive pauperes, sive liberi, sive servi utriuslibet sexus, pessimam etiam, si ita necesse est, flagitiosissimamque rempublicam ; et in illa Angelorum quadam sanctissima atque augustissima curia cœlestique republica, ubi Dei voluntas lex est., clarissimum sibi locum etiam ista tolerantia comparare.

CAPUT XX. — *Quali velint felicitate gaudere, et quibus moribus vivere, qui tempora christianæ religionis incursant.*

Verum tales cultores et dilectores deorum istorum, quorum etiam imitatores in sceleribus et flagitiis se esse lætantur, nullo modo curant pessimam ac flagitiosissimam non esse rempublicam. Tantum stet, inquit, tantum floreat copiis referta, victoriis gloriosa ; vel, quod est felicius, pace secura sit. Et quid ad nos ? imo id ad nos magis pertinet, si divitias quisque semper augeat, quæ quotidianis effusionibus suppetant, per quas sibi etiam infirmiores subdat quisque potentior. Obsequantur divitiis pauperes causa saturitatis ; atque ut eorum patrociniis quieti inertia perfruantur, divites pauperibus ad clientelas et ad ministerium sui fastus abutantur. Populi plaudant, non consulti utilitatem suarum, sed largitoribus voluptatum. Non jubeantur dura, non prohibeantur impura. Reges non curent quam bonis, sed quam subditis regnent. Provinciæ regibus non tanquam rectoribus morum, sed tanquam rerum dominatoribus et deliciarum suarum provisoribus serviant ; eosque non sinceriter honorent, sed nequiter ac serviliter timeant. Quid alienæ vitæ potius quam quid suæ vitæ quisque noceat, legibus advertatur. Nullus ducatur ad iudices, nisi qui alienæ rei, domui, salutis, vel cuiquam invito fuerit importunus, aut noxius : cæterum de suis, vel cum suis, vel cum quibusque volentibus faciat quisque quod libet. Abundent publica scorta, vel propter omnes quibus frui placuerit, vel propter eos maxime, qui privata habere non possunt. Extruantur amplissimæ atque ornatissimæ domus, opipara convivia frequententur ; ubi cuique libuerit et potnerit, die nocteque ludatur, bibatur, vomatur, diffuatur. Saltationes undique concrepent, theatra inhonestæ lætitiæ vocibus atque omni genere sive crudelissimæ sive turpissimæ voluptatis exæstuent. Ille sit publicus inimicus, cui hæc felicitas displicet ; quisquis eam mutare vel auferre tentaverit, eum libera multitudo avertat ab auribus, evertat a sedibus, auferat a viventibus. Illi habeantur dii veri, qui hanc adipiscendam populis procuraverint, adeptamque serva-

¹ Aliquot Mss., *viteæ*. Vind. Am. Er. Lov., *vineæ*. — Sic etiam nostri codd. M.

(a) Alludit ad duas illas virtutes et vitæ vias, quas Hesiodus fluxit in Operibus et Diebus, vers. 283 seqq. et Prodicus apud Xenochontem, lib. 2 Memorabilium, cap. 2. Unde Cicero, Officiorum lib. 1, cap. 32.

verint. Cofantur ut voluerint, ludos exposcant quales voluerint, quos cum suis vel de suis possint habere cultoribus : tantum officiant ut tæli felicitati nihil ab hoste, nihil a peste, nihil ab ulla clade timeatur. Quis hanc rempublicam sanus, non dicam Romano imperio, sed domui Sardanapali comparaverit ? qui quondam rex ita fuit voluptatibus deditus, ut in sepulchro suo scribi fecerit, ea sola se habere mortuum, quæ libido ejus etiam cum viveret, hauriendo, consumpserat (a). Quem regem isti si haberent sibi in talibus indulgentem, nec in eis cuiquam ulla severitate adversantem ; huic libentibus, quam Romani veteres Romulo, templum et flaminem consecrarent.

CAPUT XXI. — *Quæ sententia fuerit Ciceronis de Romana republica.*

1. Sed si contemnitur qui Romanam rempublicam pessimam ac flagitiosissimam dixit, nec curant isti quanta morum pessimorum ac flagitiosorum labe ac dedecore impleatur, sed tantummodo ut consistat et maneat ; audiant eam, non, ut Sallustius narrat, pessimam ac flagitiosissimam factam, sed, sicut Cicero disputat, jam tunc prorsus perisse, et nullam omnino remansisse rempublicam. Inducit enim Scipionem, eum ipsum qui Carthaginem exstinxerat, de republica disputantem, quando præsentiebatur ea corruptione, quam describit Sallustius, jam jamque peritura. Eo quippe tempore disputatur, quo jam unus Gracchorum occisus fuit, a quo scribit seditioes graves cœpisse Sallustius (b). Nam mortis ejus sit in eisdem libris commemoratio. Cum autem Scipio in secundi libri fine dixisset, *Ut in fidiis ac tibiis atque cantu ipso ac vocibus concertus est quidam tenendus ex distinctis sonis, quem immutatum aut discrepantem aures eruditæ ferre non possunt ; isque concertus ex dissimillarum vocum moderatione concors tamen efficitur et congruens : sic ex summis et infimis et mediis interjectis ordinibus, ut sonis, moderata ratione civitatem consensu dissimillimorum continere ; et quæ harmonia a musicis dicitur in cantu, eam esse in civitate concordiam, arctissimam atque optimum omnium in republica vinculum incolunitatis, eamque sine justitia nullo pacto esse posse* : ac deinde cum aliquanto latius et uberius disseruisset, quantum prodesset justitia civitati, quantumque obsesset, si abfuisset ; suscepit deinde Philus ², unus eorum qui disputationi aderant, et poposcit ut hæc ipsa quæstio diligentius tractaretur, ac de justitia plura dicerentur, propter illud, quod jam vulgo ferebatur, rempublicam regi ³ sine

¹ Vind. Am. Er. et aliquot Mss., *moderatam ratione*. Cæteri fere Mss., *moderatione*.

² Sic etiam Mss. nostri omnes. Forte legendum, *Philus*. M.

³ Plures libri hic et infra loco, *regi*, habent, *geri*. — Sic etiam codd. 786, 2051 et 2052. M.

(a) Sardanapalus rex fuit Assyriorum ultimus, cujus epitaphium affert Cicero in Tusculanis Quæst. lib. 3, cap. 33.

(b) Tiberium Gracchum intelligit, a Scipione Nasica, ejus qui optimus vir a senatu judicatus erat nepote, quod agrariam legem tulisset, et tribunatum sibi continuari vellet, occisum : Scipione Africano minore, de quo hic loquitur, bellum interim ad Numantiam gerente.

injuria non posse. Hanc proinde quæstionem discutendam et enodandam esse, assensus est Scipio, responditque nihil esse, quod adhuc de republica dictum putaret, et quo possent longius progredi, nisi esset confirmatum, non modo saluum esse illud, sine injuria non posse; sed hoc verissimum esse, sine summa justitia rempublicam regi¹ non posse (Libro 2, cap. 43). Cujus quæstionis explicatio cum in diem consequentem dilata esset, in tertio libro magna conflictatione² res acta est. Suscepit enim Philus ipse disputationem eorum qui sentirent sine injustitia regi³ non posse rempublicam purgans, præcipue, ne hoc ipse sentire crederetur. Egitque sedulo pro injustitia contra justitiam, ut hanc esse utilem reipublicæ, illam vero inutilem, verisimilibus rationibus et exemplis velut conaretur ostendere. Tum Lælius rogantibus omnibus, justitiam defendere aggressus est; asseruitque quantum potuit, nihil tam inimicum quam injuriam civitati, nec omnino nisi magna justitia geri aut stare posse rempublicam (a).

2. Qua quæstione, quantum satis visum est, pertractata, Scipio ad intermissa revertitur, recolligitque suam atque commendat brevem reipublicæ definitionem, qua dixerat eam esse rem populi (Libro 4, cap. 25). Populum autem non omnem cœtum multitudinis, sed cœtum juris consensu et utilitatis communione sociatum esse determinat. Docet deinde quanta sit in disputando definitionis utilitas: atque ex illis suis definitionibus colligit tunc esse rempublicam, id est rem populi, cum bene ac juste geritur, sive ab uno rege, sive a paucis optimatibus, sive ab universo populo. Cum vero injustus est rex, quem tyrannum, more græco, appellavit; aut injusti optimates, quorum consensum dixit esse factionem; aut injustus ipse populus, cui nomen usitatum non reperit, nisi ut etiam ipsum tyrannum vocaret: non jam vitiosam, sicut pridie fuerat disputatum; sed, sicut ratio ex illis definitionibus connexa docuisset, omnino nullam esse rempublicam: quoniam non esset res populi, cum tyrannus eam factione (b) capesseret; nec ipse populus jam populus esset, si esset injustus, quoniam non esset multitudo juris consensu et utilitatis communione sociata, sicut populus fuerat definitus.

3. Quando ergo respublica Romana talis erat, qualem illam describit Sallustius; non jam pessima ac flagitiosissima, sicut ipse ait, sed omnino nulla erat, secundum istam rationem, quam disputatio de republica inter magnos ejus tum principes (c) habita patefecit. Sicut etiam ipse Tullius, non Scipionis, nec cujusquam alterius, sed suo sermone loquens⁴, in

principio quinti libri, commemorato prius Ennii poetæ versu, quo dixerat,

Moribus antiquis res stat Romana virisque.

Quem quidem ille versum, inquit, vel brevitate vel veritate tanquam ex oraculo mihi quodam esse effatus videtur. Nam neque viri, nisi ita morata civitas fuisset, neque mores, nisi hi viri præfuissent, aut fundare, aut tam diu tenere potuissent tantam et tam juste lateque imperantem rempublicam. Itaque ante nostram memoriam et mos ipse patrius præstantes viros adhibebat, et veterem morem ac majorum instituta retinebant excellentes viri. Nostra vero ætas cum rempublicam sicut picturam accepisset egregiam, sed evanescentem vetustate, non modo eam coloribus iisdem, quibus fuerat, renovare neglexit; sed ne id quidem curavit, ut formam saltem ejus et extrema tanquam lineamenta servaret. Quid enim manet ex antiquis moribus, quibus ille dixit rem stare Romanam, quos ita oblivione obsoletos videmus, ut non modo non colantur, sed etiam ignorentur? Nam de viris quid dicam? Mores enim ipsi interierunt virorum penuria, cujus tanti mali non modo reddenda ratio nobis, sed etiam tanquam reis capitibus quodammodo dicenda causa est. Nostris enim vitiis, non casu aliquo, rempublicam verbo retinemus; reipsa vero jam pridem amisimus.

4. Hæc Cicero fatebatur longe quidem post mortem Africani (a) quem in suis libris fecit de republica disputare, adhuc tamen ante adventum Christi (b): quæ si diffamata et prævalescente religione christiana sentirentur atque dicerentur, quis non istorum ea Christianis imputanda esse censeret? Quamobrem cur non curarunt dii eorum, ne tunc periret atque amitteretur illa respublica, quam Cicero longe antequam Christus in carne venisset, tam lugubriter deplorat amissam? Viderint laudatores ejus, etiam illis antiquis viris et moribus qualis fuerit, utrum in ea viguerit vera justitia; an forte nec tunc fuerit viva moribus, sed picta coloribus. Quod et ipse Cicero nesciens, cum eam præferret, expressit. Sed alias, si Deus voluerit, hoc videbimus. Enitar enim suo loco, ut ostendam secundum definitiones ipsius Ciceronis, quibus quid sit respublica, et quid sit populus, loquente Scipione, breviter posuit (attestantibus etiam multis, sive ipsius, sive eorum, quos loqui fecit in eadem disputatione, sententiis), nunquam illam fuisse rempublicam, quia nunquam in ea fuit vera justitia (c). Secundum probabiliores autem definitiones, pro suo modo quodam⁵ respublica fuit: et melius ab antiquioribus Romanis, quam a posterioribus administrata est. Vera autem justitia non est,

¹ Sic etiam codd. 766, 2031 et 2053. Alii, *geri*. M.

² Mss., *conflictione*. — Ms. 2050, *conflictatione*. M.

³ Sic codd. 2051, 2052 et 2053; codd. 2050 et 766, *geri*. M.

⁴ Hic Vind. Am. Er. addunt, *testatur*; Lov., *demonstravit*. Quo loco in manuscriptis supplendum relinquiquit verbum, *patefecit*.

(a) Hujus concertationis meminit Cicero in Lælio, cap. 4.

(b) Sic Morel, Elementis. Critic. pag. 152. In B. et in codicibus nostris, *factione*. M.

(c) Quos in ea disputatione loquentes Cicero inducit, Scipionem Africanum minorem, C. Lælium et L. Furium Phylum.

⁵ Plures Mss., *sed jam* (vel, *sed et jam*). — Nostri codd., *sed jam*. M.

⁶ Sic potiores Mss. At Vind. et Er., *quodam*. Lov., *quoddam*.

(a) Annis post Africani mortem, quæ ad Urbis conditæ annum 624 refertur, circiter septuaginta.

(b) Anno scilicet sexagesimo ante Christum. Nam a Ciceronis consulatu, quo anno ipse libros de Republica edidit, ad annum trigesimum secundum imperii Augusti, quo natus est Christus, intercesserunt anni sexaginta.

(c) Vide infra, lib. 19, capp. 21, 24.

nisi in ea republica, cujus conditor rectorque Christus est; si et ipsam rempublicam placet dicere, quoniam eam rem populi esse negare non possumus. Si autem hoc nomen, quod alibi aliterque vulgatum est, ab usu nostræ locutionis est forte remotius; in ea certe civitate est vera iustitia, de qua Scriptura sancta dicit, *Gloriosa dicta sunt de te, civitas Dei* (*Psal. LXXXVI, 3*).

CAPUT XXII. — *Quod diis Romanorum nulla unquam cura fuerit, ne malis moribus respublica deperiret.*

1. Sed quod pertinet ad præsentem questionem, quamlibet laudabilem dicant istam fuisse vel esse rempublicam, secundum eorum auctores doctissimos jam longe ante Christi adventum pessima ac flagitiosissima facta erat: imo vero nulla erat, atque omnino perierat perditissimis moribus. Ut ergo non periret, dii custodes ejus populo cultori suo curam præcipuam vitæ ac morum præcepta debuerunt, a quo tot templis, tot sacerdotibus et sacrificiorum generibus, tam multiplicibus variisque sacris, tot festis solemnitatibus, tot tantorumque ludorum celebritatibus colebantur: ubi nihil demones nisi negotium suum egerunt, non curantes quemadmodum illi viverent, imo curantes ut etiam perditæ viverent, dum tamen honori suo illa omnia metu subditi ministrarent. Aut si dederunt, proferatur, ostendatur, legatur, quas deorum leges illi civitati datas contempserint Gracchi (a), ut seditionibus cuncta turbarent; quas Marius (b), et Cinna (c), et Carbo (d), ut in bella etiam progredierentur civilia, causis iniquissimis suscepta, et crudeliter gesta crudeliusque finita; quas denique Sylla ipse (e), cujus vitam, mores, facta, describente Sallustio aliisque historiis scriptoribus, quis non exhorreat? Quis illam rempublicam non tunc perisse fateatur?

2. An forte propter hujusmodi civium mores Virgilianam illam sententiam, sicut solent, pro defensione suorum deorum opponere audebunt,

Discessere omnes adytis arisque relictis
 Illi, quibus imperium hoc steterat?

(*Æneid. lib. 2, vers. 331, 332.*)

Primum si ita est, non habent cur querantur de religione christiana, quod hac offensi eos dii sui deseruerint: quoniam quidem majores eorum jam pridem moribus suis ab Urbis altaribus tam multos ac minutos deos, tanquam muscas abegerunt. Sed tamen hæc numinum turba ubi erat, cum longe antequam

(a) Tiberius Gracchus et Caius ejus frater. vide supra col. 43.

(b) Marius municeps Arpinas fuit, qui Romæ septies consul est creatus, ac Jugurtham, Cimbricos et Teutonos vicit. ad extremum autem modo cum Sylla bello civili, victus ipse est et in Africam fugit.

(c) Victo Mario, cum ad bellum Mithridaticum Sylla proficisceretur, Cornelium Cinnam et Cn. Octavium consules in Urbe reliquit. Cinna studio rerum novarum a collega discessit pulsusque est ab eo ex Urbe: quam injuriam ut vindicaret Cinna, revocato ex Africa Mario, bellum Urbi intulit in eamque tandem ingressus caedibus omnia complevit.

(d) Carbo, ut Cicero lib. 9, epist. ad Pætum 21 scribit, multi fuerunt ex Papyria gente: hic de quo Augustinus, Cneus Papyrius Carbo Marianus partes secutus et a Sylla victus, fugit in Siciliam ibique Lilybæi a Pompeio interfectus est.

(e) Qui, ut Cicero lib. 3 de Finibus dicit, *trium pestiferorum vitiorum, luxuriae, avaritiæ, crudelitatis magister fuit.*

mores corrumpere antiqui, a Gallis Roma capta et incensa est? an præsentibus forte dormiebant? Tunc enim tota Urbe in hostium potestatem redacta, solus collis Capitolinus remanserat; qui etiam ipse caperetur, nisi saltem anseres diis dormientibus vigilarent (a). Unde pene in superstitionem Ægyptiorum bestias avesque colentium Roma deciderat, cum auseri solemnia celebrabant. Verum de his adventitiis, et corporis potius quam animi malis, quæ vel ab hostibus vel alia clade accidunt, nondum interim disputo: nunc ago de labe morum, quibus primum paulatim decoloratis, deinde torrentis modo præcipitatis, tanta, quamvis integris tectis mœnibusque, facta est ruina reipublicæ, ut magni auctores eorum eam tunc amissam non dubitent dicere. Recte autem abscesserant, ut amitteretur, *omnes adytis arisque relictis dii*, si eorum de bona vita¹ atque iustitia civitas præcepta contempserat. Nunc vero quales, quæso, dii fuerunt, si noluerunt cum populo cultore suo vivere, quem male viventem non docuerant bene vivere?

CAPUT XXIII. — *Varietates rerum temporalium, non ex favore aut impugnatione daemonum, sed ex veri Dei pendere judicio.*

1. Quid, quod etiam videntur eorum adfuisse cupiditatibus implendis, et ostenduntur non præfuisse refrenandis? Qui enim Marius, novum hominem et ignobilem, cruentissimum auctorem bellorum civilium atque gestorem, ut septies consul fieret adjuverunt, atque ut in septimo suo consulatu moreretur senex, nec in manus Syllæ futuri mox victoris irueret²? Si enim ad hæc cum dii eorum non juverunt, non parum est quod fatentur etiam non propitiis diis suis posse accidere homini istam temporalem, quam nimis diligunt, tantam felicitatem; et posse homines, sicut fuit Marius, salute, viribus, opibus, honoribus, dignitate, longævitate cumulari et perfri, diis iratis: posse etiam homines, sicut fuit Regulus, captivitate, servitute, inopia, vigiliis, doloribus excrucitari et emori, diis amicis. Quod si ita esse concedunt, compendio, nihil eos prodesset, et coli superfluo, contentur. Nam si virtutibus animi et probitati vitæ, cujus præmia post mortem speranda sunt, magis contraria ut populus disceret institerunt; si nihil etiam in his transeuntibus et temporalibus bonis, vel eis quos oderunt nocent, vel eis quos diligunt prosunt: ut quid coluntur? ut quid tanto studio colendi requiruntur? Cur laboriosis tristibusque temporibus, tanquam offensi abscesserint, murmuratur; et propter eos christiana religio conviciis indignissimis læditur? Si autem habent in his rebus, vel beneficii, vel maleficii potestatem; cur in eis adfuerunt pessimo viro Mario, et optimo Regulo defuerunt? An ex hoc ipsi intelliguntur injustissimi et pessimi? Quod

¹ Lov., dii, quorum de bona vita. Dissentiunt ceteri libri.

² Hic editi addunt, *Cur non etiam juverunt, ut a iustorum se compeceret immanitate facinorum?* Sed hæc absunt ab omnibus Gallicanis et Romanis manuscriptis.

(a) Vide Livium, lib. 3, cap. 58 seqq. et capp. 47, 48, et Plutarch. in Camill.

si propterea magis timendi et colendi putantur, neque hoc putentur : neque enim minus eos invenitur Regulus coluisse, quam Marius. Nec ideo vita pessima eligenda videatur, quia magis Mario quam Regulo dii fuisse existimantur: Metellus enim, Romanorum laudatissimus, qui habuit quinque filios consulares (a), etiam rerum temporalium felix fuit; et Catilina pessimus, oppressus inopia et in bello sui sceleris prostratus infelix: et verissima atque certissima felicitate præpollent boni Deum colentes, a quo solo conferri potest.

2. Illa igitur respublica malis moribus cum periret, nihil dii eorum pro dirigendis vel pro corrigendis egerunt moribus, ne periret, imo depravandis et corrupendis addiderunt moribus, ut periret. Nec se bonos fingant, quod velut offensi civium iniquitate discesserint. Prorsus ibi erant; produntur, vincuntur: nec subvenire præcipiendo, nec latere tacendo potuerunt. Omitto quod Marius a miserantibus Minturnensibus Maricæ deæ in loco ejus commendatus est, ut ei omnia prosperaret (b); et ex summa desperatione reversus incolumis, in Urbem duxit crudelem crudelis exercitum: ubi quam cruenta, quam incivillis, hostilique immanior ejus victoria fuerit; eos qui scripserunt, legant qui volunt¹. Sed hoc, ut dixi, omitto: nec Maricæ nescio cui tribuo Marii sanguineam felicitatem, sed occultæ potius providentiæ Dei ad istorum ora claudenda, eosque ab errore liberandos qui non studis agunt, sed hæc prudenter advertunt. Quia et si aliquid in his rebus dæmones possunt, tantum possunt, quantum secreto Omnipotentis arbitrio permittuntur; ne magnipendimus terrenam felicitatem, quæ, sicut Mario, malis etiam plerumque conceditur; nec eam rursus quasi malam arbitremur, cum ea multos etiam pios et bonos unius Dei veri cultores, invitis dæmonibus præpolluisse videamus; nec eisdem immundissimos spiritus vel propter hæc ipsa bona malave terrena propitandos aut timendos existimemus. Quia sicut ipsi mali homines in terra, sic etiam illi non omnia quæ volunt facere possunt, nisi quantum illius ordinatione sinuntur², cõsus plene judicia nemo comprehendit, justè nemo reprehendit.

CAPUT XXIV. — *De Syllanis actibus, quorum se dæmones ostentaverunt adiutores.*

1. Sylla certe ipse, cujus tempora talia fuerunt, ut superiora, quorum vindex esse videbatur illorum comparatione quaerentur, cum primum ad Urbem

¹ Vind. Am. et Er., *legant qui scire volunt.*

² Omnes MSS., *sinitur.*

(a) Fuit ille Q. Metellus Numidicus, L. Metelli pontificis nepos, de quo Plinius, lib. 7, cap. 44; Cicero, de Finibus, lib. 5, cap. 27, 28; Tuscul. lib. 4, cap. 33; Valerius Max. lib. 7, cap. 1: qui omnes eum pro summæ felicitatis exemplo ponunt. Filios eum quatuor tantum habuisse, ex illis scri, toribus observant Vives et Coquæus. Hic tamen libri omnes quos inspicere licuit, *quinque filios consulares*, ferunt.

(b) Minturnas Campaniæ oppidum deductus Marius, cum ex prima pugna civili victus a Sylla fugeret, qua ratione a Minturnensibus exceptus sit, discies ex Plutarcho in ejus vita, Velleio lib. 2, Appiano de Bellis civilibus lib. 4, et aliis.

contra Marius castra movisset, adeo læta exta immolanti fuisse scribit Livius, ut custodiri se Postumius aruspex voluerit capitis supplicium subituros, nisi ea quæ in animo Sylla haberet, diis juvantibus implevisset. Ecce non discesserant adytis arisque relictis dii, quando de rerum eventu prædicebant, nihilque de ipsius Syllæ correctione curabant. Promittebant præsagiendo¹ felicitatem magnam, nec malam cupiditatem minando frangebant. Deinde cum esset in Asia bellum Mithridaticum gerens, per Lucium Titium ei mandatum est a Jove, quod esset Mithridatem superaturus: et factum est. Ac postea molienti redire in Urbem, et suas amicorumque injurias² civili sanguine ulcisci, iterum mandatum est ab eodem Jove per militem quemdam legionis sextæ, prius se de Mithridate prænuntiasse victoriam, et tunc promittere daturum se potestatem, qua recuperaret ab inimicis rempublicam non sine multo sanguine. Tunc percontatus Sylla, quæ forma militi visa fuerit; cum ille indicasset, eam recordatus est quam prius ab illo audierat, qui de Mithridatica victoria ab eodem mandata pertulerat. Quid hic responderi potest, quare dii curaverint velut felicia ista nuntiare, et nullus eorum curaverit Syllam monendo corrigere, mala tanta facturum scelestis armis civilibus, qualia non fecerant, sed auferrent omnino rempublicam? Nempe intelliguntur dæmones, sicut sæpe dixi, notumque nobis est in Litteris sacris, resque ipsæ satis indicant, negotium suum agere; ut pro diis habeantur et colantur, et ea illis exhibeantur, quibus illi qui exhibent sociati, unam pessimam causam cum eis habeant in iudicio Dei.

2. Deinde cum venisset Tarentum Sylla, atque illi sacrificasset, vidit in capite vitulini jecoris similitudinem coronæ aureæ. Tunc Postumius aruspex ille respondit, præclaram ei significare victoriam, jussitque ut extis illis solus vesceretur. Postea parvo intervallo servus cujusdam Lucii Pontii vaticinando clamavit: A Bellona nuntius venio; victoria tua est, Sylla. Deinde adjecit, arsurum esse Capitolium. Hæc cum dixisset, continuo egressus e castris, postera die concitator reversus est, et Capitolium arsisse clamavit. Arserat autem revera Capitolium. Quod quidem dæmoni et prævidere facile fuit, et celerrime nuntiare. Illud sane intende, quod ad causam maxime pertinet, sub qualibus diis esse cupiant qui blasphemant Salvatorem voluntates fidelium a dominatu dæmonum liberantem. Clamavit homo vaticinando, Victoria tua est, Sylla; atque ut id divino spiritu clamare crederetur, nuntiavit etiam aliquid et prope futurum et mox factum, unde longe aberat per quem ille spiritus loquebatur: non tamen clamavit, Ab sceleribus parce, Sylla; quæ illic victor tam horrenda commisit, cui corona aurea ipsius victoriæ illustrissimum signum in vitulino jecore apparuit. Qualia signa si dii justi

¹ Vind. Am. et manuscripti, *præsagando.* — Sic etiam Ms. 706. M.

² Lov., *subortas injuriis.* Adest, *subortas*, a Vind. Am. Er. et a plerisque manuscriptis.

dare solerent, ac non dæmones impij, profecto illis extis nefaria potius atque ipsi Syllæ graviter noxia mala futura monstrarent. Neque enim ejus dignitati tantum profuit illa victoria, quantum nocuit cupiditati; qua factum est ut immoderatis inhians, et secundis rebus elatus ac præcipitatus, magis ipse periret in moribus, quam inimicos in corporibus perderet. Hæc illi dii vere tristia vereque lugenda, non extis, non auguriis, non cujusquam somnio vel vaticinio prænuntiabant. Magis enim timebant ne corrigeretur, quam ne vinceretur. Imo satis agebant, ut victor civium gloriosus, victus atque captivus nefandis vitiis, et per hæc ipsis etiam dæmonibus multo obstrictius subderetur.

CAPUT XXV. — *Quantum maligni spiritus ad flagitia incitent homines, cum in committendis sceleribus quasi divinam exempli sui interponunt auctoritatem.*

1. Hinc vero quis non intelligat, quis non videat, nisi qui tales deos imitari magis elegit, quam divina gratia ab eorum societate separari, quantum moliantur maligni isti spiritus exemplo suo velut divinam auctoritatem præbere sceleribus, quod etiam in quadam Campaniæ lata planitie, ubi non multo post civiles acies nefario prælio conflixerunt, ipsi inter se prius pugnare visi sunt (a)? Namque ibi auditi sunt primum ingentes fragores: moxque multi se vidisse nuntiarunt per aliquot dies duas acies præliari. Quæ pugna ubi destitit, vestigia quoque velut hominum et equorum, quanta de illa conflictatione exprimi poterant, invenerunt. Si ergo veraciter inter se numina pugnaverunt, jam bella civilia excusantur humana¹; consideretur tamen quæ sit talium deorum vel malitia, vel miseria: si autem se pugnasse slexerunt, quid aliud egerunt, nisi ut sibi Romani bellando civiliter, tanquam deorum exemplo nullum nefas admittere viderentur? Jam enim cœperant bella civilia, et aliquot² nefandorum præliorum strages exsecranda præcesserat: jam multos moverat quod miles quidam, dum occiso spolia detraheret, fratrem nudato cadavere agnovit, ac detestatus bella civilia, se ipsum ibi perimens fraterno corpori adjunxit (b). Ut ergo tanti hujus mali minime læderet, sed armorum scelestorum magis magisque ardor cresceret, noxii dæmones³, quos illi deos putantes colendos et venerandos arbitrabantur, inter se pugnantes hominibus apparere voluerunt; ne imitari tales pugnas civica trepidaret affectio, sed potius humanum scelus divino excusaretur exemplo. Hæc astutia maligni spiritus etiam ludos, unde multa jam dixi, scenicos sibi dicari sacrarique jusserunt: ubi deorum tanta flagitia theatricis canticis atque fabularum actionibus celebrata, et quisquis eos talia fecisse crederet, et quisquis non

crederet, sed tamen illos libentissime sibi talia velle⁴ exhiberi cerneret, securus imitaretur. Ne quis itaque existimaret in deos convicia potius, quam eis dignam aliquid scriptitasse, ubicumque illos inter se pugnasse poetæ commemorarunt; ipsi ad decipiendos homines poetarum carmina firmaverunt, pugnas videlicet suas non solum per scenicos in theatro, verum etiam per se ipsos in campo humanis oculis exhibentes.

2. Hæc dicere compulsi sumus, quoniam pessimis moribus civium Romanam rempublicam jam antea perditam fuisse, nullamque remansisse ante adventum Domini nostri Jesu Christi, auctores eorum dicere et scribere minime dubitarunt. Quam perditionem diis suis non imputant, qui mala transitoria, quibus boni, seu vivant; seu moriantur, perire non possunt, Christo nostro imputant: cum Christus noster tanta frequentet⁵ pro moribus optimis præcepta contra perditos mores; dii vero ipsorum nullis talibus præceptis egerint aliquid cum suo cultore populo, pro illa republica, ne periret; imo eosdem mores velut suis exemplis auctoritate noxia corrumpendo, egerunt potius ut periret. Quam non ideo tunc perisse quisquam, ut arbitror, jam dicere audebit, quia

Discessere omnes adytis arisque relictis
D,

velut amici virtutibus, cum vitiis hominum offenderentur; quia tot signis extorum, auguriorum, vaticiniorum quibus se tanquam præciosos futurorum adjutoresque præliorum jactare et commendare gestiebant, convincuntur fuisse præsentis: qui si vere abscessissent, mitius Romani in bella civilia sui vere cupiditibus quam illorum instigationibus exarsissent.

CAPUT XXVI. — *De secretis dæmonum monitis, quæ pertinebant ad bonos mores, cum palam in sacris eorum omnis nequitia disceretur.*

1. Quæ cum ita sint, cum palam aperteque turpitudines crudelitibus mixtæ, opprobria numinum et crimina, sive prodita, sive conficta, ipsis exposcentibus, et nisi fieret irascentibus, etiam certis et statis solemnitatibus consecrata illis et dedicata claruerint, atque ad omnium oculos, ut imitanda proponerentur, spectanda processerint: quid est, quod iidem ipsi dæmones, qui se hujuscemodi voluptatibus immundos spiritus esse constituentur, qui suis flagitiis et facinoribus, sive indicatis, sive simulatis, eorumque sibi celebratione petita⁶ ab impudentibus, extorta a pudentibus, auctores se vitæ scelestæ immundæque testantur; perhibentur tamen in adytis suis secretisque penetralibus dare quædam bona præcepta de moribus, quibusdam velut electis sacratis suis (a)?

¹ Abest, *velle*, a Mss. — Sic etiam in Ms. 766, sed corrupte. M.

² Sic Mss. nostri excepto 766. In B., *frequenter*, mendose. M.

³ Sola editio Lov., *expetita*.

(a) Heraldus ad Arnobii librum 5 pro glossemate habet hæc verba, *quibusdam velut electis*. Sed insunt manuscriptis omnibus, factantque apprime ad propositum Augustini, in ipsis forte etiam alludentis ad Manichæorum Electos, quibus illius sectæ doctrina secretior servabatur. Nam quod subsequitur, *sacratissimis*, non ipsos mores, ut Heraldus putavit, spectat, quasi adjectivum; sed homines significat diis religione addictos, ut passim hoc in opere.

(Trois.)

¹ Vind. Am. Er. et libri Mss., *excusantur humana*. — In B., *excusentur humana*. Sic etiam Ms. 2032. M.

² Editi, *aliqua*. At Mss., *aliquot*. Refer ad, *præliorum*.

³ Editi, *mox hi dæmones*. Merique autem et melioris notæ Mss., *noxii dæmones*. Huic lectioni congruit illud in sequenti capite, u. 1, *spirituum noxiorum*.

(a) Julius Obsequens libr. de Prodigis.

(b) Ex Livii libro 79.

SANCT. AUGUST. VII.

Quod si ita est, hoc ipso callidior advertenda est et convincenda malitia spirituum noxiorum. Tanta enim vis est probitatis et castitatis, ut omnis vel pene omnis ejus laude moveatur humana natura, nec usque adeo sit turpitudine vitiosa, ut totum amittat sensum honestatis. Proinde malignitas dæmonum, nisi alicubi se, quemadmodum scriptum in nostris Litteris novimus, transfiguret in angelos lucis (II Cor. xi, 14), non implet negotium deceptionis. Foris itaque populis celeberrimo strepitu impietas impura circumsonat, et intus paucis castitas simulata vix sonat: præbentur propatula pudendis, et secreta laudandis: decus latet, et dedecus patet: quod malum geritur, omnes convocat spectatores; quod bonum dicitur, vix aliquos invenit auditores: tanquam honesta erubescenda sint, et inhonesta glorianda. Sed ubi hoc, nisi in dæmonum templis? ubi, nisi in fallaciæ diversoris? Illud enim sit, ut honestiores, qui pauci sunt, capiantur; hoc autem, ne plures, qui sunt turpissimi, corrigantur.

2. Ubi et quando sacri Coelestis (a) audiebant castitatis præcepta, nescimus: ante ipsum tamen delubrum, ubi simulacrum illud locatum conspiciamus, universi undique confluentes, et ubi quisque poterat stantes, ludos qui agebantur intentissimi spectabamus, intuentes alternante conspectu, hinc meretriciam pompam, illinc virginem deam; illam suppliciter adorari, ante illam turpia celebrari: non ibi pudibundos minos, nullam verecundio rem scenicam vidimus; cuncta obscenitatis implebantur officia. Sciebatur virginali numini quid placeret, et exhibebatur quod de templo domum matrona doctior reportaret. Nonnulla pudentiores avertent faciem ab impuris motibus scenicorum, et artem flagitii¹ furtiva intentione discebant. Homines namque verecundabantur, ne auderent impudicos gestus ore libero cerere; sed multo minus audebant sacra ejus, quam venerabantur, casto corde damnare. Hoc tamen palam discendum præbatur in templo, ad quod perpetrandum saltem secretum quærebatur in domo: mirante nimium (si ullus ibi erat) pudore mortalium, quod humana flagitia² non libere homines committerent, quæ apud deos etiam religiose discerent, iratos habituri, nisi etiam exhibere curarent. Quis enim alius spiritus occulto instinctu nequissimas agitans mentes, et instat faciendis adulteriis, et pascitur factis, nisi qui etiam sacris talibus oblectatur, constituens in templis simulacra dæmonum, amans in ludis simulacra vitiorum; susurrans in occulto verba justi-

tix ad decipiendos etiam paucos bonos, frequentans in aperto invitamenta nequitix ad possidendos innumerabiles malos?

CAPUT XXVII. — *Quanta eversione publicæ disciplinæ Romani diis suis placandis sacraverint obscena ludorum.*

Vir gravis et philosophaster Tullius¹ ædilis futurus, clamabat in auribus civitatis, inter cætera sui magistratus officia sibi Floram matrem ludorum celebritate placandam (a): qui ludi tanto devotius, quanto turpius celebrari solent. Dicit alio loco jam consul in extremis periculis civitatis, et ludos per decem dies factos, neque rem ullam quæ ad placandos deos pertineret, prætermissam (b): quasi non satius erat tales deos irritare temperantia, quam placare luxuria; et eos honestate etiam ad inimicitias provocare, quam tanta deformitate lenire. Neque enim gravior fuerant quamlibet crudelissima immanitate nocituri homines, propter quos placabantur, quam nocebant ipsi, cum vitiositate sceleratissima placarentur: quandoquidem ut averteretur quod metuebatur ab hoste in corporibus, eo modo dii conciliabantur, quo virtus debellaretur in mentibus; qui non opponerentur defensores oppugnantibus mœnium, nisi prius fierent expugnatores morum bonorum. Hanc talium numinum placationem petulantissimam, impurissimam, impudentissimam, nequissimam, immundissimam, cujus actores laudanda Romanæ virtutis indoles honore privavit, tribu movit, agnovit turpes, fecit infames; hanc, inquam, pudendam, veræque religionis aversandam et detestandam talium numinum placationem, has fabulas in deos illecebrosas atque crimonas, hæc ignominiosa deorum facta vel scelerate Jupiterque commissa², vel sceleratius turpiusque conficta, oculis et auribus publicis civitas tota discobat: hæc commissa numinibus placere cernebat; et ideo non solum illis exhibenda, sed sibi quoque imitanda credebat: non illud nescio quid velut bonum et honestum, quod tam paucis et tam occulte dicebatur (si tamen dicebatur), ut magis ne innotesceret, quam ne non fieret, timeretur.

CAPUT XXVIII. — *De Christianæ religionis salubritate.*

Ab istarum immundissimarum potestatum tartareo jugo et societate pœnali erui per Christi nomen homines, et in lucem saluberrimæ pietatis ab illa perniciosissimæ impietatis nocte transferri, queruntur et murmurant iniqui et ingrati, et illo nefario spiritu altius obstrictiusque possessi³, quia populi confluenti

¹ hic in excusis additum, *ridere erubescentes*, quod abest a manuscriptis.

² Editi, *Nirium nimum si ullus ibi erat pudor mortalium, quo humana*, etc. Emendantur a manuscriptis. — Cod. 706 legit ut PP. Bened. manuscripti. M.

(a) *Sacri Coelestis*, id est, cultores Coelestis deæ virginis, cujus erat apud Afros et Carthaginenses quam maxima celebritas: de ea jam supra, cap. 4, ubi vide notam (b). Frustra igitur operis hujus interpretes, qui hic nomen, *Coelestis*, accipere hactenus pro communi et adjectivo, observationes in subsequentia verba conscripserunt de Floræ deæ ludis, de ipsius ac Vestæ aliorumque deorum festis. Nam Coelestem Afrorum deam haud dubie respicit id totum.

³ Editi, *philosophus Tertullius*. Consentiant Mss. plerique posteriore tamen vocabulo in quibusdam bipartito, ut legitur, *philosophus ter Tullius*. Verior lectio videtur veteris libri Corbeiensis, *philosophaster Tullius*; quam conjectura assecutus erat Lud. Vives: ut videlicet Augustinus eo verbo notet inanem Tullii philosophiam, quæ a tam stultis et sacrilegis erroribus non eum liberavit.

⁴ sic in Mss. At in excusis hoc loco, *conficta*: et altero loco post, *turpiusque*, positum erat, *commissa*. — Cod. 706, *hæc ignominiosa deorum vel scelerate turpiterque facta, vel*, etc. M.

⁵ Editi, *oppressi*; dissentientibus manuscriptis.

(a) Act. 6 in Verrem.

(b) Act. 6 in Verrem, cap. 8.

ad ecclesias casta celebritate, honesta utriusque sexus discretionem: ubi audiant quam bene hic ad tempus vivere debeant, ut post hanc vitam beate semperque vivere mercantur; ubi sancta Scriptura iustitiaeque doctrina de superiore loco in conspectu omnium personante, et qui faciunt, audiant ad premium; et qui non faciunt, audiant ad iudicium. Quo etsi veniunt quidam talium praeceptorum irrisores, omnis eorum petulantia aut repentina immutatione deponitur, aut timore vel pudore comprimitur. Nihil enim eis turpe ac flagitiosum spectandum imitandumque proponitur, ubi veri Dei aut praecepta insinuantur, aut miracula narrantur, aut dona laudantur, aut beneficia postulantur.

CAPUT XXIX. — De abjiciendo cultu deorum cohortatio ad Romanos.

1. Hæc potius concupisce, o indoles Romana laudabilis, o progenies Regulorum, Scævolarum, Scipionum, Fabriciorum: hæc potius concupisce, hæc ab illa turpissima vanitate et fallacissima dæmonum malignitate discerne. Si quid in te laudabile naturaliter eminet, non nisi vera pietate purgatur atque perficitur; impietate autem disperditur¹ et punitur. Nunc jam elige quid sequaris, ut non in te, sed in Deo vero sine ullo errore lauderis. Tunc enim tibi gloria popularis adfuit, sed occulto iudicio divinæ providentiæ vera religio, quam eligeres, defuit. Expergiscere, dies est; sicut experrecta es in quibusdam, de quorum virtute perfecta, et pro fide vera etiam passionibus gloriamur, qui usquequaque adversus potestates inimicissimas confligentes, easque fortiter moriendo vincentes, sanguine nobis hanc patriam peperere suo. Ad quam patriam te invitamus, et exhortamur ut ejus adjiciaris numero civium, cujus quodammodo asylum est (a) vera remissio peccatorum. Non audias degeneres tuos Christo Christianisve detrahentes, et accusantes velut tempora mala, cum quærant tempora quibus non sit quieta vita, sed potius securi nequitia. Hæc tibi nunquam nec pro terrena patria placuerunt. Nunc jam cœlestem arripe, pro qua minimum laborabis, et in ea veraciter semperque regnabis. Illic enim tibi non Vestalis focus (b), non lapis Capitolinus (c), sed

¹ Sic Er. et Mss. At Vind. Am. et Lov., *dispergitur*.

(a) Ad Romuleum asylum alludit, de quo infra, lib. 3, cap. 17 in fine.

(b) ignis perpetuus vestæ dicitur, qui si casu exstingueretur, maximum malorum imminutum præsagium esse, scribit Liv. lib. 3, cap. 52, et lib. 28, cap. 11.

(c) Jovis simulacrum in Capitolio lapideum. Hinc nata illa Romanis sanctissima juratio, « Per Jovem lapidem! »

Deus unus et verus

Nec metas rerum, nec tempora ponet,
Imperium sine fine dabit.
(Æneid. lib. 1, vers. 278, 279.)

2. Noli deos falsos fallacesque requirere; abjice potius atque contemne, in veram emicans libertatem. Non sunt dii, maligni sunt spiritus, quibus æterna tua felicitas poena est. Non tam Juno Trojanis, a quibus carnalem originem ducis, arces videtur invidisse Romanas, quam isti dæmones, quos adhuc deos putas, omni generi hominum sedes invident sempiternas. Et tu ipsa non parva ex parte de talibus iudicasti, quando ludis eos placasti, et per quos homines eosdem ludos fecisti, infames esse voluisti. Patere asseri libertatem tuam adversus immundos spiritus, qui tuis cervicibus imposnerant sacrandam sibi et celebrandam ignominiam suam. Actores criminum divinorum removisti ab honoribus tuis: supplica Deo vero, ut a te removeat illos deos, qui delectantur criminibus suis, seu veris, quod ignominiosissimum est; seu falsis, quod malitiosissimum est. Bene, quod tua sponte histrionibus et scenicis societatem civitatis patere noluisti; evigila plenius: nullo modo his artibus placatur divina majestas, quibus humana dignitas inquinatur. Quo igitur pacto deos, qui talibus delectantur obsequiis, haberi putas in numero¹ sanctarum cœlestium potestatum; cum homines per quos eadem aguntur obsequia, non putasti habendos in numero qualiumcumque civium Romanorum? Incomparabiliter superna est civitas clarior, ubi victoria, veritas; ubi dignitas, sanctitas; ubi pax, felicitas; ubi vita, æternitas. Multo minus habet in sua societate tales deos, si tu in tua tales homines habere erubuisti. Proinde si ad beatam pervenire desideras civitatem, evita dæmonum societatem. Indigne ab honestis coluntur, qui per turpes placantur. Sic isti a tua pietate² removeantur purgatione christiana, quomodo illi a tua dignitate remoti sunt notatione censoria. De bonis autem carnalibus, quibus solis mali perfrui volunt, et de malis carnalibus, quæ sola perpeti nolunt, quod neque in his habeant, quam putantur habere isti dæmones, potestatem; quanquam si haberent, deberemus potius etiam ista contemnere, quam propter ista illos colere, et eos colendo ad illa, quæ nobis invident, pervenire non posse: tamen nec in istis eos hoc valere, quod hi putant, qui propter hæc eos coli oportere contendunt, deinceps videbimus, ut hic sit hujus voluminis modus.

¹ Lov., in omni numero. Alibi, omni, a cæteris libris.

² Sic Mss. Editi autem, societate.



LIBER TERTIUS.

Ut in superiori libro de malis morum et animi, sic in presenti de corporis externarumque rerum incommodis ostendit Augustinus, Romanos a condita Urbe his assidue vexatos fuisse, atque ad avertenda id genus mala deos falsos, cum autē Christi adventum libere colerentur, nihil prastitisse.



CAPUT PRIMUM. — *De adversitatibus quas soli mali metuumt, et quas semper passus est mundus, cum deos coleret.*

Jam satis dictum arbitror de morum malis et animorum, quæ præcipue cavenda sunt, nihil deos falsos populo cultori suo, quominus eorum malorum aggere premeretur, subvenire curasse; sed potius, ut maxime premeretur, egisse. Nunc de illis malis video dicendum, quæ sola isti perpeti volunt, qualia sunt famæ, morbus, bellum, exspoliatio, captivitas, trucidatio, et si qua similia jam in primo libro commemoravimus. Hæc enim sola mali deputant mala, quæ non faciunt malos, nec erubescunt inter bona quæ laudant, ipsi mali esse qui laudant; magisque stomachantur, si villam malam habeant, quam si vitam: quasi hoc sit hominis maximum bonum, habere bona omnia, præter se ipsum. Sed neque talia mala, quæ isti sola formidant, dii eorum, quando ab eis libere colebantur, ne illis acciderent, obstiterunt. Cum enim variis per diversa loca¹ temporibus ante adventum Redemptoris nostri innumerabilibus nonnullisque etiam incredibilibus cladibus genus contereretur humanum; quos alios quam istos deos mundus colebat, excepto uno populo Hebræo, et quibusdam extra ipsum populum, ubicumque gratia divina digni occultissimo atque justissimo Dei judicio fuerunt (a)? Verum ne nimium longum faciam, tacebo aliarum usquequaque gentium mala gravissima: quod ad Romam pertinet Romanumque imperium, tantum loquar; id est, ad ipsam proprie civitatem, et quæcumque illi terrarum vel societate conjunctæ, vel conditione subjectæ sunt, quæ sint perpeßæ ante adventum Christi, cum jam ad ejus quasi corpus reipublicæ pertinerent.

CAPUT II. — *An dii, qui et a Romanis et a Græcis similiter colebantur, causas habuerint quibus Ilium paterentur excindi.*

Primum ipsa Troja vel Ilium, unde origo est populi Romani (neque enim prætereundum aut dissimulandum est, quod et in primo libro attigi [Cap. 4], eosdem habens deos et colens, cur a Græcis victum, captam atque deletum est? Priamo, inquit, sunt reddita Laomedontea paterna perjuria (b). Ergo verum est, quod Apollo atque Neptunus eidem Laomedonti mercenariis operibus servierunt: illis quippe

¹ Abest, loca, a manuscriptis.

(a) Hoc ipsum Augustinus in Epistola ad Deogratias 102, n. 13, docet. « Sapius, » inquit, « religionis hujus... nulli unquam defuit, qui dignus fuit, » etc. Quam suam sententiam exponens libro de Prædestinatione Sanctorum, n. 19, ait: « si discutatur et queratur unde quisque sit dignus; non desunt qui dicant, voluntate humana: nos autem dicimus, gratia vel prædestinatione divina. »

(b) Hinc Virgilius, Georg. lib. 1, vers. 502: Laomedontæcæ huius perjuria Trojæ.

promisisse mercedem falsumque jurasse perhibetur. Miror, Apollinem, nominatum divinatorem, in tanto officio laborasse, nescientem quod Laomedon fuerat promissa negaturus. Quanquam nec ipsum Neptunum patruum ejus, fratrem Jovis, regem maris, decuit ignarum esse futurorum. Nam hunc Homerus de stirpe Æneæ, a cujus posteris condita¹ Roma est, cum ante illam urbem conditam idem poeta fuisse dicatur (a), inducit magnum aliquid divinantem (Iliad. I, vers. 302-305): quem etiam nube rapuit, ut dicit, ne ab Achille occideretur,

caperet cum vertere ab imo

(Quod apud Virgilium confitetur.)

structa suis manibus perjuræ mœnia Trojæ.

(Æneid. lib. 5, vers. 810, 811.)

Nescientes igitur tanti dii, Neptunus et Apollo, Laomedontem sibi negaturum esse mercedem, structores mœnium Trojanorum gratis, et ingratis fuerunt. Videant ne gravius sit tales deos credere, quam diis talibus pejerare. Hoc enim nec ipse Homerus facile credidit, qui Neptunum quidem contra Trojanos, Apollinem autem pro Trojanis pugnantem facit, cum illo perjurio ambos fabula narret offerasos. Si igitur fabulis credunt, erubescant talia colere numina; si fabulis non credunt, non obtendant Trojana perjuria, aut mirentur deos perjuria punisse Trojana, amasse Romana. Unde enim conjuratio Catilinæ in tanta tamque corrupta civitate habuit etiam eorum grandem copiam, quos manus atque lingua perjurio aut sanguine civili alebat (b)? Quid enim aliud toties senatores corrupti in judiciis, toties populus in suffragiis vel in quibusque causis, quæ apud eum concionibus agebantur, nisi etiam pejerando pecebant (c)? Namque corruptissimis moribus ad hoc mos jurandi servabatur antiquus, non ut ab sceleribus metu religionis prohiberentur, sed ut perjuria quoque sceleribus cæteris adderentur.

CAPUT III. — *Non potuisse offendi deos Paradisi adulterio, quod inter ipsos traditur frequentatum.*

Nulla itaque causa est, quare dii, quibus, ut dicunt, steterat illud imperium (Virgil. Æneid. lib. 2, vers. 352), cum a Græcis prævalentibus probentur victi,

¹ Vox, condita, abest ab Vind. Am. Er. et a Mss. — Non abest a 2053. M.

(a) Nec de tempore Urbis conditæ, nec de Homeri ætate satis inter scriptores convenit. Hunc elapsis post bellum Trojanum annis plus minus 160, et ante Christum annis circiter 1000, Salomone in Judæa regnante, vixisse probabilior opinio est. Quæcumque vero aliam opinionem sequi placeat, Homerus Roma erit antiquior: quod et Cicero testatur in Tusculanis, lib. 1, cap. 1; et A. Gellius, lib. 17, cap. 21.

(b) Sallust., de Conjuratone, Catilinæ cap. 14.

(c) Nempe iudices jurati judicabant, et populus in mitendis suffragiis jurejurando obstringebatur, ut ne pretio vel gratia adductus quidquam antiquius haberet salute reipublicæ.

Trojanis pejerantibus flagantur irati. Nec adulterio Paridis, ut rursus a quibusdam defenduntur, ut Trojam desererent, succensuerunt. Auctores enim doctoresque peccatorum esse assolent, non ultores. *Urbem Romam*, inquit Sallustius, *sicuti ego accepi, condidere atque habuere initio Trojani, qui Ænea duce profugi sedibus incertis vagabantur* (*De Catilinæ Conjurazione, cap. 6*). Si ergo adulterium Paridis vindicandum numina censuerunt, aut magis in Romanis¹, aut certe etiam in Romanis puniendum fuit; quia Æneæ mater (a) hoc fecit. Sed quomodo in illo illud flagitium oderant, qui in sua socia Venere non oderant (ut alia omittam) quod cum Anchise commiserat, ex quo Ænean pepererat? An quia illud factum est indignante Menelao, illud autem concedente Vulcano (b)? Dii enim, credo, non zelant conjuges suas, usque adeo ut eas etiam cum hominibus dignentur habere communes. Irridere fabulas fortassis existimor, nec graviter agere tanti ponderis causam. Non ergo credamus, si placet, Ænean esse Veneris filium: ecce concedo, si nec Romulum Martis (c). Si autem illud, cur non est illud? An deos fas est hominibus feminis, mares autem homines deabus misceri nefas? Dura, vel potius non credenda conditio, quod ex jure Veneris in concubitu Marti licuit, hoc in jure suo ipsi Veneri non licere. At utrumque firmatum est auctoritate Romana. Neque enim minus creditur recentior Cæsar aviam Venerem (d), quam patrem antiquior Romulus Martem.

CAPUT IV. — *De sententia Varronis, qua utile esse dicit ut se homines diis genitos mentiantur.*

Dixerit aliquis: Itane tu ista credis? Ego vero ista non credo. Nam et vir doctissimus eorum Varro falsa hæc esse, quamvis non audacter, neque fidenter, pene tamen fatetur. Sed utile esse civitatibus dicit, ut se viri fortes, etiamsi falsum sit, diis genitos esse credant: ut eo modo animus humanus velut divinæ stirpis fiduciam gerens, res magnas aggrediendas præsumat audacius, agat vehementius, et ob hoc impleat ipsa securitate felicius. Quæ Varronis sententia expressa, ut potui, meis verbis, cernis quam latum locum aperiat falsitati; ut ibi intelligamus plura jam sacra et quasi religiosa potuisse conungi, ubi putata sunt civibus etiam de ipsis diis prodesse mendacia.

CAPUT V. — *Non probari quod dii adulterium Paridis punierint, quod in Romuli matre non ulti sunt.*

Sed utrum potuerit Venus ex concubitu Anchisæ Ænean parere, vel Mars ex concubitu filia Numitoris Romulum gignere, in medio relinquamus. Nam pene talis quæstio etiam de Scripturis nostris oboritur, qua queritur utrum prævaricatores angeli cum filiabus hominum concubuerint; unde natis gigantibus, id est

¹ Editti, in *Trojanis*. Emendantur a manuscriptis.

(a) Venus.

(b) Veneris marito.

(c) Romulus Martis ex thia Sylvia vestali filius.

(d) Ille Romulo annis fere 700 posterior erat gentis Iuliae, que in Iulium Æneæ filium genus referebat, et per Iulium in Venerem. Ipsi Cæsar ea de re verba leguntur apud Suetonium.

nimum grandibus ac fortibus viris, tunc terra completa est (e) (*Gen. vi, 4*). [V.] Proinde ad utrumque interim modo nostra disputatio referatur. Si enim vera sunt, quæ apud illos de matre Æneæ et de patre Romuli lectitantur; quomodo possunt diis adulteria displicere hominum, quæ in se ipsis concorditer ferunt? Si autem falsa sunt; nec sic quidem possunt irasci veris adulteriis humanis, qui etiam falsis delectantur suis. Huc accedit, quoniam si illud de Marte non creditur, ut hoc quoque de Venere non credatur, nullo¹ divini concubitus obtentu matris Romuli causa defenditur. Fuit autem sacerdos Sylvia² vestalis, et ideo dii magis in Romanos sacrilegum illud flagitium, quam in Trojanos Paridis adulterium, vindicare debuerunt. Nam et ipsi Romani antiqui in stupro delectas Vestæ sacerdotes, vivas etiam defodiebant (b) adulteras autem feminas, quamvis aliqua damnatione, nulla tamen morte plectebant (c): usque adeo gravius quæ putabant adyta divina, quam humana cubilia vindicabant.

CAPUT VI. — *De parricidio Romuli, quod dii non vindicarunt.*

Aliud adjicio, quia si eo usque peccata hominum illis numinibus displicerent, ut offensi Paridis facto desertam Trojam ferro ignibusque donarent; magis eos contra Romanos moveret Romuli frater (d) occisus, quam contra Trojanos Græcus maritus (e) illulus; magis irritaret parricidium nascentis, quam regnantis adulterium civitatis. Nec ad causam, quam nunc agimus, interest, utrum hoc fieri Romulus juserit, aut Romulus fecerit, quod multi impudentia negant, multi pudore dubitant, multi dolore dissimulant. Nec nos itaque in ea re diligentius requirenda per multorum scriptorum perpensa testimonia demoremur: Romuli fratrem palam constat occisum, non ab hostibus, non ab alienis. Si aut perpetravit aut imperavit hoc Romulus; magis ipse fuit Romanorum, quam Paris Trojanorum caput (f): cur igitur Trojanis iram deorum provocavit ille alienæ conjugis raptor, et eorundem deorum tutelam Romanis invitavit iste sui fratris extinctor (g)? Si autem illud scelus a facto imperioque Romuli alienum est; quoniam debuit utique vindicari, tota hoc illa civitas fecit, quod tota contempsit³; et non jam fratrem, sed patrem, quod est pejus, occidit. Uterque enim fuit conditor, ubi alter scelere ablatum non permissus est esse re-

¹ Er. et Lov., *nullo igitur*. Abest, igitur, ab editis aliis et manuscriptis.

² Vind. Am. et plerique manuscripti loco, *Sybilis*, habent, *thia*. Utrumque nomen habuit filia Numitoris, Romuli et Remi mater, quæ et *Rhea* dicebatur. — Mss. nostri, *thia*. M.

³ Sic Am. Er. et Mss. At Vind. et Lov., *consensit*.

(a) Hanc quæstionem infra tractat, lib. 15, cap. 25.

(b) Liv. lib. 8 et 22.

(c) Vide Livium lib. 10, cap. 31.

(d) Remus.

(e) Menelaus Helenæ a Paride raptæ maritus.

(f) Paris quippe non rex erat, sed regis Trojanorum Priami filius.

(g) Trojanorum nempe dii Iavinium per Ænean, inde Alban per Ascanium translati, ac postremo Romam per Romulum asciti sunt.

gnator. Non est, ut arbitror, quod dicatur quid mali Troja meruerit, ut eam dii desererent, quo posset extinguī; et quid boni Roma, ut eam dii inhabitarent, quo posset augeri: nisi quod victi inde fugerunt, et se ad istos, quos pariter deciperent, contulerunt. Imo vero et illic manserunt, ad eos more suo decipiendos, qui rursus easdem terras habitarent; et hic easdem artes fallaciæ suæ magis etiam exercendo, majoribus honoribus gloriati sunt.

CAPUT VII. — *De eversione Ilii, quod dux Marii Fimbria cecidit.*

Certe enim civibus jam bellis scatentibus, quid miserum commiserat Ilium, ut a Fimbria, Marianarum partium homine pessimo, everteretur, multo ferocius atque crudelius, quam olim a Græcis (a)? Nam tunc et multi inde fugerunt, et multi captivati saltem in servitute vixerunt. Porro autem Fimbria prius editum proposuit, ne cui parceretur; atque urbem totam cunetosque in ea homines incendio concremavit. Hoc meruit Ilium, non a Græcis, quos sua irritaverat iniquitate, sed a Romanis, quos sua calamitate propagaverat; diis illis communibus ad hæc repellenda nihil juvantibus, seu, quod verum est, nihil valentibus. Numquid et tunc

abscesserunt omnes adytis arisque relictis

dii, quibus illud oppidum steterat, post antiquos Græcorum ignes ruinasque reparatum? Si autem abscesserant, causam requiro; et oppidanorum quidem quanto invenio meliorem, tanto deteriorem deorum. Illi enim contra Fimbriam portas cluserant, ut Syllæ servarent integram civitatem: hinc eos iratus incendit, vel potius penitus exstinxit. Adhuc autem meliorum partium civilium Sylla dux fuit (b), adhuc armis reipublicam recuperare moliebatur: horum honorum initiatorum nondum malos eventus habuit. Quid ergo melius cives illius urbis facere potuerunt? quid honestius? quid fidelius? quid Romana parentela dignius, quam meliori causæ Romanorum civitatem servare, et contra parricidam Romanæ reipublicæ portas claudere? At hoc eis in quantum exitium verterit, attendant defensores deorum. Deseruerint dii adulteros, Iliumque flammis Græcorum reliquerint, ut ex ejus cineribus Roma castior nasceretur: cur et postea deseruerunt eandem civitatem Romanis cognatam, non rebellantem adversus Romam nobilem filiam, sed justioribus ejus partibus fidem constantissimam piissimamque servantem; eamque delendam reliquerunt, non Græcorum viris fortibus, sed viro spurcissimo Romanorum? Aut ei displicebat diis causa partium Syllanarum, cui servantes urbem miseri portas cluserant; cur eidem Syllæ tanta bona promittebant et prænuntiabant? An et hinc agnoscuntur adulatorum felicitum potius quam infelicitum defensores? Non ergo Ilium etiam tunc, ab eis cum desereretur, eversum est. Nam dæmones ad decipiendum semper vigilantissimi, quod potuerunt, fecerunt. Eversis quippe et incensis omnibus cum

oppido simulacris, solum Minervæ sub tanta ruina templi illius, ut scribit Livius, integrum stetiisse perhibetur (a): non ut diceretur,

Di patri, quorum semper sub numine Troja est,
(Virgil. *Æneid.* lib. 1, vers. 702, 703.)

ad eorum laudem; sed ne diceretur,

Excessere omnes adytis arisque relictis

dii, ad eorum defensionem. Illud enim posse permissi sunt, non unde probarentur potentes, sed unde præsentem convincerentur.

CAPUT VIII. — *An debuerit diis Iliacis Roma committi.*

Diis itaque Iliacis, post Trojæ ipsius documentum, qua tandem prudentia Roma custodienda commissa est? Dixerit quispiam, jam eos Romæ habitare solitos, quando expugnante Fimbria cecidit Ilium. Unde ergo stetit Minervæ simulacrum? Deinde, si apud Romam erant, quando Fimbria delevit Ilium, fortasse apud Ilium erant, quando a Gallis ipsa Roma capta et incensa est: sed ut sunt auditu acutissimi motuque celerrimi, ad vocem anseris cito redierunt, ut saltem Capitolinum collem, qui remanserat, tuerentur: cæterum ad alia defendenda serius sunt redire commo-niti.

CAPUT IX. — *An illam pacem, quæ sub Numæ regno fuit, deos præstitisse credendum sit.*

Ili etiam Numam Pompiliam, successorem Romuli, adjuvisse creduntur, ut toto regni sui tempore pacem haberet, et Jani portas, quæ bellis patere assolent, clauderet (b): eo merito scilicet, quia Romanis multa sacra constituit. Illi vero homini pro tanto otio gratulandum fuit, si modo id rebus salubribus scisset impendere, et perniciosissima curiositate neglecta, Deum verum vera pietate perquirere. Nunc autem non ei dii contulerunt illud otium; sed cum minus fortasse decepissent, si otiosum minime reperissent. Quanto enim minus eum occupatum invenerunt, tanto magis ipsi occupaverunt. Nam quid ille molitus sit, et quibus artibus deos tales sibi, vel Ili civitati consociare potuerit, Varro prodit: quod si Domino placuerit, suo diligentius disseretur loco. Modo autem quia de beneficiis eorum quæstio est, magnum beneficium est pax: sed Dei veri beneficium est, plerumque etiam sicut sol, sicut pluvia vitæque alia subsidia, super ingratos et nequam. Sed si hoc tam magnum bonum dii illi Romæ vel Pompilio contulerunt, cur imperio Romano per ipsa tempora laudabiliora id nunquam postea præstiterunt? an utiliora erant sacra, cum instituerentur, quam cum instituta celebrarentur? Atqui tunc nondum erant, sed ut essent addebantur; postea vero jam erant, quæ ut prodessent custodiebantur. Quid ergo est quod illi quadraginta tres, vel, ut alii volunt, triginta et novem

¹ Vind. Am. Er. et fere omnes manuscripti, *laudabilia*. — Sic etiam Ms. 766. M.

(a) Livii lib. 85, in quo de Ilii excidio, non exstat.

(b) Jani portæ cur in bello aperte, in pace clausæ essent, dicit Macrobius, saturnalium lib. 1, cap. 9.

(a) De hoc Liv. l. 82 et 83; Appian. in Mithridatico.

(b) Cicero. Orat. pro Cælio; Sallust. in Catilin. cap. 51.

anni in tam longa pace transacti sunt regnante Numa (a), et postea sacris institutis, diisque ipsis, qui eisdem sacris fuerant invitati, jam praesidibus atque tutoribus, vix post tam multos annos ab Urbe condita usque ad Augustum, unus pro magno miraculo commemoratur annus post primum bellum Punicum, quo belli portas Romani claudere potuerunt?

CAPUT X. — *An optandum fuerit quod tanta bellorum rabie Romanorum augetur imperium, cum eo studio, quo sub Numa auctum est, et quietum esse potuisset et tutum.*

An respondetur quod nisi assiduus sibi quoque continuo succedentibus bellis Romanum imperium tam longe fateque non posset augeri, et tam grandi gloria diffamari? Idonea vero causa: ut magnum esset imperium, cur esse deberet inquietum? Nonne in corporibus hominum satius est modicam staturam cum sanitate habere, quam ad molem aliquam giganteam perpetuis afflictionibus pervenire, nec enim perveneris, requiescere, sed quanto grandioribus membris, tanto majoribus agitari malis? Quid autem mali esset, ac non potius plurimum boni, si ea tempora perdurarent, quæ perstrinxit Sallustius, ubi ait, « Igitur initio reges (nam in terris nomen imperii id primum fuit) diversi; pars ingenium, alii corpus exercebant: etiam tum vita hominum sine cupiditate agitabatur, sua cuique satis placebant » (*Sallust. in Conjuratone Catilinæ, cap. 2*)? An ut tam multum augetur imperium, debuit fieri quod Virgilius detestatur, dicens:

Deterior donec paulatim ac decolor ætas,
Et belli rabies, et amor successit habendi?

(*Æneid. lib. 8, vers. 336, 337*).

Sed plane pro tantis bellis susceptis et gestis justa defensio Romanorum est, quod irruentibus sibi importune inimicis resistere cogebat, non aviditas adipiscendæ laudis humanæ, sed necessitas tuendæ salutis et libertatis. Ita sit plane. Nam postquam res eorum, sicut scribit ipse Sallustius, *legibus¹, moribus, agris aucta, satis prospera, satisque pollens videbatur, sicuti pleraque mortalium habentur, invidia ex opulentia orta est. Igitur reges populique finitimi bello tentare, pauci ex amicis auxilio esse: nam ceteri metu perculti a periculis aberant². At Romani domi militiæque intenti festinare, parare, alius alium hortari, hostibus obviam ire; libertatem, patriam, parentesque armis tegere. Post ubi pericula virtute propulerant, sociis atque amicis auxilia portabant, magisque dandis quam accipiendis beneficiis amicitias parabant* (*Sallust. in Conjuratone Catilinæ, cap. 6*). Decenter his artibus Roma crevit. Sed regnante Numa, ut tam longa pax esset, utrum irruerant improbi belloque tentabant; an nihil eorum fiebat, ut posset pax illa persistere?

¹ Apud Sallustium, loco, *legibus, vst, civibus*.

² In B.. *longe a periculis aberant*. Editiones Sallustii notrique codd. omittunt, *longe*. M.

(a) Numam quadraginta tres annos, Livius, Plutarchus, etc., Frontinus vero, Eusebius, Cassiodorus annos tantum 44 regnasse tradunt. — Augustinus hæc sumpsit ex Ciccone De Rej publica lib. 3, cap. 14. M.

Si enim bellis etiam tum Roma lacescebatur, nec armis arma obvia ferebantur: quibus modis agebatur, ut nulla pugna superati, nullo martio impetu territi sedarentur inimici; his modis semper ageretur, et semper Roma clausis Jani portis pacata regnaret. Quod si in potestate non fuit, non ergo Roma pacem habuit quamdiu dii eorum, sed quamdiu homines finitimi circumquaque voluerunt, qui eam nullo bello provocaverunt: nisi forte dii tales etiam id homini vendere audebant, quod alius homo voluit sive noluit. Interest quidem jam vitio proprio, malas mentes quatenus sinatur isti dæmones vel terrere vel excitare: sed si semper hoc possent, nec aliud secretiore ac superiore potestate contra eorum conatum sæpe aliter ageretur, semper in potestate haberent paces¹ bellicasque victorias, quæ semper fere per humanorum animorum motus accidunt: quas tamen plerumque contra eorum fieri voluntatem, non solum fabulæ multa mentientes, et vix veri aliquid vel indicantes vel significantes, sed etiam ipsa Romana constiterat historia.

CAPUT XI. — *De simulacro Cumani Apollinis, cujus fletus creditus est cladem Græcorum, quibus opitulari non poterat, indicare.*

Neque enim aliunde Apollo ille Cumanus, cum adversus Achaos regenicum bellaretur, quadriduo flevisse nuntiatus est (a): quo prodigio aruspices territi, cum id simulacrum in mare putavissent esse projiciendum, Cumani senes intercesserunt, atque retulerunt tale prodigium et Antiochi et Persæ² bello in eodem apparuisse figmento: et quia Romanis feliciter provenisset, ex senatusconsulto eidem Apollini suo dona esse missa testati sunt. Tunc velut peritiores acciti aruspices responderunt, simulacri Apollinis fletum ideo prosperum esse Romanis, quoniam Cumana³ colonia Græca esset (b), suisque terris, unde accitus esset, id est ipsi Græciæ, luctum et cladem Apollinem significasse plorantem. Deinde mox regem Aristonicum victum et captum esse, nuntiatum est; quem vinci utique Apollo nolabat et dolebat, et hoc sui lapidis etiam lacrymis indicabat. Unde non usquequaque incongrue, quamvis fabulosis, tamen veritati similibus, mores dæmonum describuntur carminibus poetarum. Nam Camillam Diana doluit apud Virgilium, et Pallantem moriturum Hercules flevit (c). Hinc fortassis et Numa Pompilius pace abundans, sed quo donante nesciens, nec requirens; cum cogitaret otiosus, quibusnam diis tuendam Ru-

¹ Sic Vind. Am. et Mss. At Er. et Lov., *pacem*.

² Editi, *Persidis*. Manuscripti, *Persis*, pro quo Lud. Vives putat legendum, *Persæ*, filii Philippi Macedonum regis, quem L. Æmilius Paulus bello Macedonico secundo vicit. Vid. Plutarch. in Æmilio Paulo. — Ms. 706, *Persis*. Bello de quo hic agitur intererant Achaei, dum bello Aristonica interfuisset falso supra commemorantur. M.

³ Lov., *Cumæ*. Ceteri libri, *Cumana*.

(a) Per quadriduum lacrymavisse scribit Julius Obsequens lib. de Prodigis cap. 87; Livius vero lib. 43 per triduum et tres noctes. — In bello cum Aristonico Achaei ab aliis non memorantur. M.

(b) Strab., lib. 5, cap. 4.

(c) Æneid. lib. 11, vers. 856-849.

manam salutem regnumque committeret, nec verum illum atque omnipotentem summum Deum curare opinaretur ista terrena, atque recoleret Trojanos deos, quos Æneas advexerat, neque Trojanum, neque Lavinense ab ipso Ænea conditum regnum diu conservare potuisse, alios providendos existimavit, quos illis prioribus (sive qui cum Romulo jam Romam transierant, sive quandoque Alba eversa fuerant transituri) vel tanquam fugitivis custodes adhiberet, vel tanquam rivalibus adjuvatores.

CAPUT XII. — *Quantos sibi deos Romani præter constitutionem Numæ adjecerint, quorum eos numerositas nihil juverit.*

Nec his sacris tamen Roma dignata est esse contenta, quæ tam multa illic Pompilius constituerat: nam ipsius summum templum nondum habebat Jovis. (a) Rex quippe Tarquinius ibi Capitolium fabricavit. Æsculapius autem ab Epidaurro ambivit Romam¹, ut peritissimus medicus in urbe nobilissima artem gloriosius exerceret (b). Mater etiam deum nescio unde, a Pessinunte². Indignum enim erat, ut cum ejus filius jam colli Capitolino præsideret, adhuc ipsa in loco ignobili latitaret. Quæ tamen si omnium deorum mater est, non solum secuta est Romam quosdam filios suos, verum et alios præcessit etiam secuturos. Miror sane, si ipsa peperit Cynocephalum, qui longe postea venit ex Ægypto. Utrum etiam dea Febris ex illa nata sit, viderit Æsculapius pronepos ejus. sed undecunque nata sit, non (opinor) audebunt eam ignobilem dicere dii peregrini deam civem Romanam. Sub hoc tot deorum præsidio, quos numerare quis potest, indigenas et alienigenas, cœlites, terrestres, infernos, marinos, fontanos, fluviales³; et, ut Varro dicit, certos atque incertos, in omnibusque generibus deorum, sicut in animalibus, mares et feminas? sub hoc ergo tot deorum præsidio constituta Roma, non tam magnis et horrendis cladibus, quales ex multis paucas commemorabo, agitari affligique debuit. Nimis enim multos deos grandi fumo suo (c), tanquam signo dato, ad tuitionem congregaverat; quibus templa, altaria, sacrificia, sacerdotes instituendo atque præbendo, summum verum Deum, cui uni hæc rite gesta debentur, offenderet. Et felicior quidem cum paucioribus vixit: sed quanto major facta est, sicut navis nautas, tanto plures adhibendos putavit; credo, desperans pauciores illos, sub quibus in comparatione pejoris vitæ melius vixerat, non sufficere ad optulandum granditati suæ. Primo enim sub ipsis regibus,

¹ Editi, *ab-It Romam*. At veteres libri, *ambivit Romam*. — Cod. 766, 2050, 2051, 2052, *ambivit ad Romam*. Codex 2053, *venire ambivit ad Romam*. M.

² Vind. Am. Er.: *Mater autem deorum nescio unde nata prænestinum montem insedit*. Ludovicus Vives legendum existimat, *Palatinum montem insedit*; quia in Palatio, ait, locata est deum mater. Sed verior lectio Lov. et manuscritorum: *Mater etiam deum nescio unde, a Pessinunte*. Confer supra, lib. 1, cap. 50, col. 42, not. (b).

³ In multis Mss., *pluviales*.

(a) *Jovis*, dicitur nominativo casu, non genitivo.

(b) Æsculapium ex Epidaurro Achaicæ oppido in Urbem advectum memorat Livius, lib. 10, cap. 47.

(c) *Fumo*, inanitatem sacrificiorum aut superbæ vanitatem significat.

excepto Numæ Pompiliæ, de quo jam supra locutus sum, quantum malum discordiosi certaminis fuit, quod fratrem Romuli coegit occidi?

CAPUT XIII. — *Quo Jure, quo fudere Romani obtinuerint prima conjugia.*

Quomodo nec Juno, quæ cum Jove suo jam
fovebat
Romanos rerum dominos, gentemque togatam,
(Æneid. lib. 1, vers. 281, 282.)

nec Venus ipsa Æneidas suos potuit adjuvare, ut bono et æquo more conjugia mererentur, cladesque tanta irruit hujus inopie, ut ea dolo raperent, moxque compellerentur pugnare cum soceris; ut miseræ femine nondum ex injuria maritis conciliatæ, jam parentum sanguine dotarentur? At enim vicerunt in hac conflictione Romani vicinos suos. Quantis et quam multis utrinque vulneribus et funeribus tam propinquorum et confinium istæ victoriæ constiterunt? Propter unum Cæsarem socerum et unum generum ejus Pompeium, jam mortua Cæsaris filia, uxore Pompeii, quanto et quam justo doloris instinctu Lucanus exclamat,

Bella per Emathios plus quam civilia campos,
Jusque datum sceleris canibus!
(Lucan. lib. 1, vers. 1, 2.)

Vicerunt ergo Romani, ut strage socerorum manibus cruentis ab eorum filiabus amplexus miserabiles extorquerent; nec illæ auderent flere patres occisos, ne offenderent victores maritos; quæ adhuc illis pugnantes, pro quibus facerent vota nesciebant (a). Talibus nuptiis populam Romanam non Venus, sed Bellona donavit¹: aut fortassis Alecto illa infernalis furia², jam eis favente Junone, plus in illos habuit licentiæ, quam cum ejus precibus contra Æneam fuerat excitata (b). Andromacha feliciter captiva est, quam illa conjugia Romana nupserunt (c): licet serviles, tamen post ejus amplexus nullum Trojanorum Pyrrhus occidit. Romani autem soceros interficiebant in præliis, quorum jam filias amplexabantur in thalamis. Illa victori subdita, dolere tantum suorum mortem potuit, non timere: illæ sociatæ bellantibus, parentum suorum mortes precedentibus viris timebant, redeuntibus dolebant, nec timorem habentes liberum, nec dolorem. Nam propter interitum civium, propinquorum, fratrum, parentum, aut pie cruciabantur, aut crudeliter lætabantur victoriis maritorum. Iluc accedebat quod, ut sunt alterna bellorum, aliquæ parentum ferro amiserunt viros, aliquæ utrorumque ferro et parentes et viros: neque enim et apud Romanos parva fuerunt illa discrimina. Si quidem ad obsidionem quoque perventum est civitatis, clausisque portis se tuebantur: quibus dolo apertis, admissisque hostibus intra mœnia, in ipso foro scelerata et nimis atrox inter generos socerosque pugna

¹ Sic omnes prope Mss. — In B., *dotavit*. M.

² Vind. Am. Er. et Mss., *inferna furia*. — Sic etiam codex 766. M.

(a) Vide Ovid. 3 Fast. vers. 205 et seqq.

(b) Æneid. lib. 7, vers. 525 et seqq.

(c) Andromache Hectoris uxor a Pyrrho post eversam Trojam in Græciam ducta eique nupta.

commissa est (a). Et raptores illi etiam superabantur; et crebro fugientes intra domos suas, gravius fœdabant pristinas, quamvis et ipsas pudendas lugendasque victorias (b). Hic tamen Romulus de suorum jam virtute desperans, Jovem rogavit ut starent: atque ille hac occasione nomen Statoris invenit. Nec finis esset tanti mali, nisi raptæ illæ laceratis crinibus emicarent, et provolutæ parentibus, iram eorum justissimam, non armis victricibus, sed supplici pietate sedarent (c). Deinde Titum Tatium, regem Sabino- rum, socium regni Romulus ferre compulsus est, Germani consortis impatiens: sed quando et istum diu toleraret, qui fratrem geminumque non pertulit? Unde et ipso interfecto, ut major deus esset, regnum solus obtinuit (d). Quæ sunt ista jura nuptiarum, quæ irritamenta bellorum, quæ fœdera germanitatis, affinitatis, societatis, divinitatis? quæ postremo sub tot diis tutoribus vita civitatis? Vides quanta hinc dici et quam multa possent, nisi quæ supersunt nostra curaret intentio, et sermo in alia festinaret.

CAPUT XIV.—*De impietate belli quod Albanis Romanis intulerunt, et de victoria dominandi libidine adeptæ.*

1. Quid deinde post Numam sub aliis regibus? Quanto malo, non solum suo, sed etiam Romanorum, in bellum Albani provocati sunt! quia videlicet pax Numæ tara longa viluerat. Quam crebræ strages Romani Albanique exercitus fuerunt, et utriusque comminutio civitatis! Alba namque illa, quam filius Æneæ creavit Ascanius, Romæ mater propior ipsa quam Troja, a Tullo Hostilio rege provocata conflixit: conflagrans autem et afflicta est, et affixit, donec multorum tederet pari defectione certaminum. Tunc eventum belli de tergeminis hinc atque inde fratribus placuit experiri: a Romanis tres Horatii, ab Albanis autem tres Curiatii processerunt; a Curiatiis tribus Horatii duo, ab uno autem Horatio tres Curiatii superati et extincti sunt (e). Ita Roma exstitit victrix, ea clade etiam in certamine extremo, ut de sex vivis unus rediret domum. Cui damnum in utrisque? cui luctus, nisi Æneæ stirpi, nisi Ascanii posteris, nisi proli Veneris, nisi nepotibus Jovis? nam et hoc plus quam civile bellum fuit, quando filia civitas cum civitate matre pugnavit. Accessit aliud huic tergemino- rum pugne ultimæ atrox atque horrendum malum. Nam ut erant ambo populi prius amici (vicini quippe atque cognati), uni Curiatorum desponsata fuerat Horatorum soror: hæc posteaquam sponsi spolia² in victore fratre conspexit, ab eodem fratre, quoniam flevit, occisa est. Humanior hujus unius femine,

quam universi populi Romani, mihi fuisse videtur affectus. Illa quem virum jam fide media retinebat, aut forte etiam ipsum fratrem dolens qui eum occiderat cui sororem promiserat, puto quod non culpabiliter flevit. Unde enim apud Virgilium pius Æneas laudabiliter dolet hostem etiam sua peremptum manu (a)? unde Marcellus Syracusanam civitatem, recolens ejus paulo ante culmen et gloriam sub manus suas subito concidisse, communem cogitationem conditionem flendo miseratus est (b)? Quæso ab humano impetremus affectu, ut femina sponsum suum a fratre suo peremptum sine crimine flevit, si viri hostes a se victos etiam cum laude flevit. Ergo sponso a fratre illatam mortem quando femina illa flebat, tunc se contra matrem civitatem tanta strage bellasse, et tanta hinc et inde cognati cruoris effusione vicisse, Roma gaudebat.

2. Quid mihi obtenditur nomen laudis, nomenque victoriae? Remotis obstaculis insanæ opinionis facinora nuda cernantur, nuda pensentur, nuda judicentur. Causa dicatur Albæ, sicut Trojæ adulterium dicebatur. Nulla talis, nulla similis invenitur: tantum ut resides³ moveret

Tullus in arma viros, et jam desueta triumphis
Aguina

(Æneid. lib. 6, vers. 814, 815.)

Illo itaque vitio tantum scelus perpetratum est socialis belli atque cognati. Quod vitium Sallustius magnum transeunter attingit. Cum enim laudans breviter antiquiora⁴ commemorasset tempora, quando vita hominum sine cupiditate agitabatur, et sua cuique satis placebant: « Postea vero, » inquit, « quam in Asia Cyrus, in Græcia Lacedæmonii atque Athenienses cœpere urbes atque nationes subigere, libidinem dominaudi causam belli habere, maximam gloriam in maximo imperio putare » (Sallust. in *Catil. cap. 2*): et cætera quæ ipse instituerat dicere. Mihi hucusque satis sit ejus verba posuisse. Libido ista dominandi magnis malis agitatur et conterit humanum genus. Hæc libidine Roma tunc victa Albam se vicisse triumphabat, et sui sceleris laudem gloriam nominabat. *Quoniam laudatur*, inquit Scriptura nostra, *peccator in desideriis animæ suæ; et qui iniqua gerit, benedicitur* (Psal. x, 3). Fallacia igitur tegmina, et deceptorie dealbationes auferantur a rebus, ut sincero inspiciantur examine. Nemo mihi dicat, Magnus ille atque ille, quia cum illo et illo pugnavit, et vicit. Pugnant etiam gladiatores, vincunt et ipsi: habet præmia laudis et illa crudelitas. Sed puto esse satius cæcibus inertie pœnas luere, quam illorum armorum gloriam querere. Et tamen si in arenam procederent pugnaturo inter se gladiatores, quorum alter filius, alter pater esset, tale spectaculum quis ferret? quis non auferret? Quomodo ergo gloriosum alterius matris, alterius filie civitatis, inter se armorum po-

¹ Trojæ notæ Mss., *neptibus Jovis*. An forte referendum ad civitates filiam et matrem, de quibus continuo? — Sic etiam, cod. 706. M.

² Plures Mss., *sponsalia*.

(a) Liv. lib. 1, cap. 11-15.

(b) Non de Sabinis victorias, sed de Czéninensibus aliisque reportatas intelligit, de quibus Livius, lib. 1, cap. 10.

(c) Livius, lib. 1, capp. 12, 13.

(d) Tatium non Romulus, sed Laurentes interfecerunt, ex historicorum consensu; eam rem vero minus ægre quam dignum erat talisse Romulum ferunt. Livius, lib. 1, cap. 14.

(e) Vide Livium, lib. 1, cap. 23-30.

³ Sic cum Virgilio legendum et cum Mss., 706, 2030, 2051, 2053. In B., *desides*. M.

⁴ In plerisque Mss., *antiquorum*.

(a) Æneid. lib. 10, vers. 821 seqq.

(b) Supra, lib. 1, cap. 6.

tuit esse certamen? An ideo diversum fuit, quod arena illa non fuit, et latiores campi non duorum gladiatorum, sed in duobus populis multorum funeribus implebantur; nec amphitheatro cingebantur illa certamina, sed universo orbe, et tunc vivis, et posteris, quousque ista fama porrigitur, impium spectaculum praebebatur?

3. Vim tamen patiebantur studii sui dii illi praesides imperii Romani, et talium certaminum tanquam theatrici spectatores, donec Horationum soror propter Curiatios tres peremptos etiam ipsa tertia ex altera parte fraterno ferro duobus fratribus adderetur, ne minus haberet mortium etiam Roma quae vicerat. Deinde ad fructum victoriae Alba inversa est: ubi post Ilium, quod Graeci everterunt, et post Lavinium, ubi Aeneas regnum peregrinum atque fugitivum constituerat¹, tertio loco habitaverant numina illa Trojana. Sed more suo etiam inde jam fortasse migraverant; ideo deleta est. Discesserant videlicet « omnes adytis arisque relictis dii, quibus imperium illud steterat. » Discesserant sane ecce jam tertio, ut eis quarta Roma providentissime crederetur. Displicuerat enim et Alba, ubi Amulius expulso fratre (a), et Roma placuerat, ubi Romulus occiso fratre (b) regnaverat. Sed antequam Alba dirueretur, transfusus est, inquit, populus ejus in Romam, ut ex utraque una civitas fieret. Esto, ita factum sit: urbs tamen illa, Ascanii regnum et tertium domicilium Trojanorum deorum, ab urbe filia mater eversa est. Ut autem belli reliquiae e duobus populis unum facerent miserabile coagulum, multus ante fusus utriusque sanguis fuit. Quid jam singillatim dicam sub ceteris regibus toties eadem bella renovata, quae victoriae finita videbantur, et tantis stragibus iterum iterumque confecta, iterum iterumque post foedus et pacem inter generos et soceros et eorum stirpem posterisque repetita? Non parvum indicium calamitatis hujus fuit, quod portas belli nullus clausit illorum. Nullus ergo illorum sub tot diis praesidibus in pace regnavit.

CAPUT XV. — *Qualis Romauorum regum vita atque exitus fuerit.*

1. Ipsorum autem regum qui exitus fuerunt? De Romulo viderit adulatio fabulosa, qua perhibetur receptus in caelum: viderint quidam scriptores eorum, qui eum propter ferocitatem a senatu discerptum esse dixerunt, subornatumque nescio quem Julium Proculum, qui eum sibi apparuisse diceret, eumque per se populo mandasse Romano, ut inter numina coleretur; eoque modo populum, qui contra senatum intumescere coeperat, repressum atque sedatum (c). Acciderat enim et solis defectio, quam certatione sui cursus effectam imperita nesciens multitudine meritis Romuli tribuebat. Quasi vero si luctus

ille solis fuisset, non magis ideo credi deberet occisus, ipsumque scelus aversione etiam diurni luminis indicatum: sicut revera factum est, cum Dominus crucifixus est crudelitate atque impietate Judaeorum (Luc. xxii, 45). Quam solis obscurationem non ex canonico siderum cursu accidisse, satis ostendit, quod tunc erat pascha Judaeorum; nam plena luna solemniter agitur: regularis autem solis defectio non nisi lunae sine contingit. Satis et Cicero illam inter deos Romuli receptionem putatam magis significat esse, quam factam, quando et laudans eum in libris de Republica (L. 2, c. 10), Scipionisque sermone: « Tantum est, » inquit, « consecutus, ut cum subito sole obscurato non comparuisset, deorum in numero collocatus putaretur: quam opinionem nemo unquam mortalis assequi potuit sine eximia virtutis gloria. » Quod autem dicit, eum subito non comparuisse, profecto ibi intelligitur aut violentia tempestatis, aut caedis facinorisque secretum. Nam et alii scriptores eorum defectioni solis addunt etiam subitam tempestatem, quae profecto aut occasionem sceleri praebuit, aut Romulum ipsa consumpsit. De Tullo quippe etiam Hostilio, qui tertius a Romulo rex fuit, qui et ipse fulmine assumptus est, dicit in eisdem libris idem Cicero, propterea et istum non creditum in deos¹ receptum tali morte, quia fortasse quod erat in Romulo probatum (id est persuasum) Romani vulgare noluerunt, id est vile facere, si hoc et alteri facile tribueretur (a). Dicit etiam aperte in *Invectivis*, « Illum qui hanc urbem condidit, Romulum ad deos immortales benevolentia famaue sustulimus » (*Orat. 5 in Catilinam, cap. 1*): ut non vere factum sed propter merita virtutis ejus benevolentia jactatum diffamatumque monstraret. In *Hortensio* vero dialogo cum de solis canonicis defectionibus loqueretur, « Ut easdem, » inquit, « tenebras efficiat, quas effectit in interitu Romuli, qui obscuratione² solis est factus. » Certe hic minime timuit hominis interitum dicere, quia disputator magis quam laudator fuit.

2. Caeteri autem reges populi Romani, excepto Numa Pompilio et Anco Martio, qui morbo interierunt, quam horrendos exitus habuerunt? Tullus, ut dixi, Hostilius, victor et eversor Albae, cum tota domo sua fulmine concrematus est. Priscus Tarquinius per sui decessoris filios interemptus est. Servius Tullius generi sui Tarquini Superbi, qui ei successit in regnum, nefario scelere occisus est. Nec « discessere adytis arisque relictis dii, » tanto in optimum illius populi regem parricidio perpetrato, quos dicunt, ut hoc miseræ Trojae facerent, eamque Graecis diruendam exurendamque relinquerent, adulterio Paridis fuisse commotos. Sed insuper interfecto a se socio Tarquinius ipse successit. Hunc illi dii nefarium parricidam soceri interfecione regnantem, insuper

¹ Sic magno consensu Mss. At editi, ubi rex Iulius Aeneam regem peregrinum atque fugitivum constituerat.

(a) Numitore.

(b) Remo.

(c) Liv. lib. 1, cap. 10, et Dionysius, lib. 2 Antiquit.

¹ Sic omnes manuscripti. In B., *inter*. M.

² Sic Mss. in B., *in obscuratione*. M.

(a) De hoc et sequentibus vid. Liv. lib. 1, et Dionys. lib. 5.

multis bellis victoriisque gloriantem, et de manubiis ¹ Capitolium fabricantem, non abscedentes, sed presentes manentesque viderunt, et regem suum Jovem in illo altissimo templo, hoc est in opere paricidæ, sibi præsidere atque regnare perpessi sunt. Neque enim adhuc innocens Capitolium struxit, et postea malis meritis Urbe pulsus est: sed ad ipsum regnum, in quo Capitolium fabricaret, immanissimi sceleris perpetrations pervenit. Quod vero eum Romani regno postea depulerunt, ac secluserunt mœnibus civitatis, non ipsius de Lucretiæ stupro, sed filii peccatum fuit, illo non solum nesciente, sed etiam absente commissum. Ardeam civitatem tunc oppugnabat, et pro populo Romano bellum gerebat: nescimus quid faceret, si ad ejus notitiam flagitium filii deferretur. Et tamen inexplorato ejus judicio et inexperto, ei populus ademit imperium; et recepto exercitu, a quo deseri jussus est, clausis deinde portis non sivit intrare redeuntem (a). At ille post bella gravissima, quibus eosdem Romanos concitatis finitimis atrivit, posteaquam desertus ab eis quorum fidebat auxilio, regnum recipere non evaluit ², in oppido Tusculo Romæ vicino quatuordecim, ut fertur, annos privatam vitam quietus habuit, et cum uxore consenuit (b), optabilior fortassis exitu, quam socer ejus generi sui facinore, nec ignorante filia, sicut perhibetur, extinctus (c). Nec tamen istum Tarquinium Romani crudelem aut sceleratum, sed superbum appellaverunt, fortassis regios ejus fastus alia superbia non ferentes. Nam scelus occisi ab eo soceri optimi regis sui usque adeo contempserunt, ut eum regem suum facerent: ubi miror si non scelere graviore mercedem tantam tanto sceleri reddiderunt. Nec « discessere adytis arisque relictis dii. » Nisi forte quispiam sic defendat istos deos, ut dicat eos ideo mansisse Romæ, quo possent Romanos magis punire suppliciis, quam beneficiis adjuvare, sejucentes eos vanis victoriis et bellis gravissimis conerentes. Hæc fuit Romanorum vita sub regibus laudabili tempore illius reipublicæ usque ad expulsionem Tarquini Superbi per ducentos ferme et quadraginta et tres annos, cum illæ omnes victoriæ tam multo sanguine et tantis emptæ calamitatibus, vix illud imperium intra viginti ab Urbe millia ³ dilataverint: quantum spatium absit ut saltem alicujus Getulæ civitatis (d) nunc territorio compareretur!

¹ Editi, *de bellorum manubiis*. Abest, *bellorum*, a manuscriptis; nec opus erat addere; quando, *manubiis*, nihil aliud intelligitur quam præda bello parva, vel ex prædæ venditione collecta pecunia. vid. A. Gellium, lib. 13, c. 23; Florus de eodem Tarquinio lib. 1, c. 77 « De manubiis capitularum urbium templum erexit. »

² Sic omnes manuscripti. Vulgo legebatur, *valuit*.

³ Sic omnes Mss. — In B., *milliaria*. M.

(a) Livius, lib. 1, cap. 57 et seqq.

(b) Tarquinus revera Tusculi egit aliquot annos apud generum Octavium Mamilius; sed obiit Cumis apud Aristodemum tyrannum, teste Livio, lib. 2, capp. 15 et 21.

(c) Livius lib. 1; Valer. lib. 9, cap. 11.

(d) *Getulæ*, id est, in Getulia, quæ Africae pars est, sitæ.

CAPUT XVI. — *De primis apud Romanos consuliis, quorum alter alterum patria pepulit, moxque Romæ post atrocissima parricidia a vulnerato hoste vulneratus interiit.*

Huic tempori adjiciamus etiam tempus illud, quo usque dicit Sallustius (*Vide supra, lib. 2, cap. 18*) æquo et modesto jure agitalum, dum metus a Tarquinio et grave bellum cum Etruria positum est. Quamdiu enim Etrusci Tarquinio redire in regnum conanti opitulati sunt, gravi bello Roma concussa est. Ideo dicit æquo et modesto jure gestam rempublicam metu premente, non persuadente justitia. In quo brevissimo tempore quam funestus ille annus fuit, quo primi consules creati sunt, expulsa regia potestate? Annum quippe suum non compleverunt. Nam Junius Brutus exhonorum eiecit Urbe collegam Lucium Tarquinium Collatinum; deinde mox ipse in bello cecidit mutuis cum hoste vulneribus (a), occisis a se ipso primitus filiis suis et uxoris suæ fratribus, quod eos pro restituendo Tarquinio conjurasse cognoverat. Quod factum Virgilius posteaquam laudabiliter commemoravit, continuo clementer exhorruit. Cum enim dixisset,

Natosque pater nova bella moventes
Ad poenam pulchra pro libertate vocabit;

mox deinde exclamavit, et ait

Infelix! utcumque ferent ea facta minores.

Quomodolibet, inquit, ea facta posterius ferant, id est præferant et extollant; qui filios occidit, infelix est. Et tanquam ad consolandum infelicem, subjunxit:

Vincit amor patriæ, laudumque tamensa cupido.
(*Æneid. lib. 6, vers. 820-823.*)

Nonne in hoc Bruto, qui et filios occidit, et a se percusso hosti filio Tarquini mutuo percussus supervivere non potuit, eique potius ipse Tarquinus supervixit, Collatini collegæ videtur innocentia vindicata, qui brutus civis hoc Tarquinio pulso passus est quod tyrannus ipse Tarquinus? Nam et idem Brutus consanguineus Tarquini fuisse perhibetur. Sed Collatinum videlicet similitudo nominis pressit, quia etiam Tarquinus vocabatur. Mutare ergo nomen, non patriam cogeret: postremo in ejus nomine hoc vocabulum minus esset, L. Collatinus tantummodo vocaretur. Sed ideo non amisit quod sine ullo detrimento posset amittere, ut et honore primus consul et civitate bonus civis carere juberetur. Etiamne ista est gloria Junii Bruti detestanda iniquitas et nihilo utilis reipublicæ? Etiamne ad hanc perpetranda,

vicit amor patriæ, laudumque immensa cupido?

Jam expulso utique Tarquinio tyranno ², consul cum Bruto creatus est maritus Lucretiæ L. Tarquinus

¹ Vind. Am. et Er., *et in ejus nomine*. Apud Lov. autem non istic, sed infra, post, *minus esset*; additur, *si*: quæ particula neutro loco est in manuscriptis, nec minus integra, imo firmior absque illa procedit oratio.

² In quibusdam prohæ notæ manuscriptis abest, *tyranno*

(a) Cum Arunte regis Tarquini Superbi filio. Liv. lib. 2 cap. 28.

Collatinus. Quam juste populus mores in cive, non nomen attulit! quam injuste¹ Brutus collegam primæ ac novæ illius potestatis, quem posset, si hoc offerebatur, nomine tantum privare, et patria privavit et honore? Hæc mala facta sunt, hæc adversa acciderunt, quando in illa republica æquo et modesto jure agitatum est. Lucretius quoque, qui in locum Bruti fuerat subrogatus, morbo, antequam idem annus terminaretur, assumptus est. Ita P. Valerius, qui successerat Collatino, et M. Horatius, qui pro defuncto Lucretio suffectus fuerat, annum illum funereum atque tartareum, qui consules quinque habuit, compleverunt: quo anno consulatus ipsius novum honorem ac potestatem auspicata est Romana respublica.

CAPUT XVII.— *Post initia consularis imperii, quibus malis vexata fuerit Romana respublica, diis non optulantis quos colerat.*

1. Tunc jam diminuto paululum metu, non quia bella conquieverant, sed quia non tam gravi pondere urgebant, finito scilicet tempore quo æquo et modesto jure agitatum est, secuta sunt quæ idem Sallustius (*Histor. lib. 1*) brevis explicat: *Dein servili imperio patres plebem exercere, de vita atque tergo regio more consulere, agro pellere, et cæteris expertibus soli in imperio agere. Quibus sævitibus, et maxime senore oppressa plebes², cum assiduis bellis tributum et militiam simul toleraret, armata montem Sacrum atque Aventinum insedit: tumque tribunos plebis et alia sibi jura puravit. Discordiarum et certaminis utrimque finis fuit secundum bellum Punicum.* [XVII.] Quid itaque ego tantas moras vel scribens patiar, vel lecturis afferam? Quam misera fuerit illa respublica tam longa ætate per tot annos usque ad secundum bellum Punicum, bellis forinsecus inquietare non desistentibus et intus discordiis seditionibusque civilibus, a Sallustio breviter intimatum est. Proinde victoriæ illæ non solida beatorum gaudia fuerunt, sed inania solatia miserorum, et ad alia atque alia sterilia³ mala subeunda illecebrosa incitamenta minime quietorum. Nec nobis, quia hæc dicimus, boni Romani prudentesque succenseant: quanquam de hac re nec petendi sint, nec monendi, quando eos minime succensuros esse certissimum est. Neque enim gravius vel graviora dicimus auctoribus eorum, et stilo et otio multum impares: quibus tamen ediscendis et ipsi elaboraverunt, et filios suos elaborare compellunt. Qui autem succensent, quando me ferrent, si ego dicerem, quod Sallustius (*Ibid.*) ait? *Plurimæ turbæ, seditiones, et ad postremum bella civilia orta sunt, dum pauci potentes, quorum in gratiam plerique concesserant, sub honesto patrum aut plebis nomine dominationes affectabant; bonique et mali cives appellati, non ob merita in rempublicam, omnibus pariter corruptis, sed uti quisque locupletissimus et injuria validior, quia præsentia defendebat, pro bono ducebatur* Porro si illi scripto-

res historiæ ad honestam libertatem pertinere arbitrati sunt, mala civitatis propriæ non tacere, quam multis locis magno præconio laudare compulsi sunt, cum aliam veriorem, quo cives æterni legendi sunt, non haberent: quid nos facere convenit, quorum spes quanto in Deo melior et certior, tanto major debet esse libertas, cum mala præsentia Christo nostro imputant, ut infirmiores imperitioresque mentes alienentur ab ea civitate, in qua sola jugiter feliciterque vivendum est? Nec in deos eorum horribiliora nos dicimus, quam eorum identidem auctores, quos legunt et prædicant: quandoquidem et ex ipsis quæ diceremus accepimus, et nullo modo dicere vel talia, vel cuncta sufficimus.

2. Ubi erant ergo illi dii, qui propter exiguam fallacemque hujus mundi felicitatem colendi existimantur: cum Romani, quibus se colendos mendacissimè astutia venditabant, tantis calamitatibus vexarentur? Ubi erant, quando Valerius consul ab exsulis et servis incensum⁴ Capitolium cum defensaret, occisus est (a)? Faciliusque ipse prodesse potuit ædi Jovis, quam illi turba tot numinum cum suo maximo atque optimo rege, cujus templum liberaverat, subvenire Ubi erant, quando densissimis fatigata civitas seditionum malis, cum legatos Athenas missos ad leges mutuandas paululum quæta opperiretur, gravi fame pestilentiaque vastata est (b)? Ubi erant, quando rursus populus, cum fame laboraret, præfectum annonæ primum creavit; atque illa fame invalescente, Spurius Melius⁵, qui esurienti multitudini frumenta largitus est, regni affectati crimen incurrit, et ejusdem præfecti instantia per dictatorem L. Quintium ætate decrepitem, a Quinto Servilio magistro equitum cum maximo et periculosissimo tumultu civitatis occisus est (c)? Ubi erant, quando pestilentia maxima exorta, diis inutilibus sine remedio populus diu multumque fatigatus⁶ nova lectisternia, quod nunquam antea fecerat, exhibenda arbitratus est (d)? Lecti autem sternebantur in honorem deorum, unde hoc sacrum vel potius sacrilegium nomen accepit. Ubi erant, quando per decem continuos annos male pugando crebras et magnas clades apud Veios exercitus Romanus acceperat, nisi per Furium Camillum tandem subveniretur, quem postea civitas ingrata damnavit (e)? Ubi erant, quando Galli Romam ceperunt, spoliaverunt, incenderunt,

¹ Ludovicus Vives scribendum putat, *incensum*, ab incendo: non enim Capitolium incenderant servi. Nos legendum credimus, *inensum*, id est occupatum, ab insideo, quo verbo utitur Livius rem eam narrans, lib. 3. — Nostri Codd., *incensum*. M.

² Editi, *Amilius*. At Mss., *Melius*: sic et Livius, lib. 4, cap. 15-16.

³ Am. et aliquot Mss. in quibus est Corb. vetustissimus habent: *Diis inutilibus populus diu multumque fatigatus*: nec addunt, *sine remedio*, quod etiam omittit Viud. Regius autem codex, alter Corbeiensis et alii quidam manuscripti habent, *diis inutilibus inane remedium populus diu multumque fatigatus*. Non male quidem: attamen suspicamur verba, *inane remedium*, scripta primo ad oram libri, in textum postea migravisse; proque his legi demum cepisse, *sine remedio*.

(a) Livius, lib. 3, cap. 15-18.

(b) *Ibid.*, cap. 32.

(c) *Id.*, lib. 4, cap. 12-15.

(d) *Id.*, lib. 5, cap. 15.

(e) *Ibid.*, cap. 10-25, et cap. 32.

¹ Mss., *quam impiæ*. Forte legendum, *tam impiæ*.

² Sic Sallustius et Ms. 766. In B., *plebs*. M.

³ Sic Mss. Editi vero, *terribilia*.

caedibus impleverunt (a)? Ubi erant, cum illa insignis pestilentia tam ingentem stragem dedit, qua et ille *Furius Camillus* extinctus est, qui rempublicam ingrati et a Voientibus ante defendit, et de Gallis postea vindicavit (b)? In hac pestilentia scenicos ludos, aliam novam pestem, non corporibus Romanorum, sed, quod est multo perniciosius, moribus intulerunt (c). Ubi erant, quando alia pestilentia gravis de venenis matronarum exorta credita est, quarum supra fidem multarum atque nobilium mores deprehensi sunt omni pestilentia graviore (d)? Vel quando in *Caudinas furculas* ¹ a Samnitibus obsessi ambo cum exercitu consules fœdus cum eis fœdum facere coacti sunt; ita ut aequilibris Romanis sexcentis obsidibus datis, ceteri amissis armis aliisque spoliati privatique tegminibus, sub jugum hostium cum vestimentis singulis mitterentur (e)? Vel quando gravi pestilentia cæteris laborantibus multi etiam in exercitu icti fulmine perierunt (f)? Vel quando item alia intolerabili pestilentia *Æsculapium* ab *Epidauro* quasi medicum deum Roma advocare atque adhibere compulsus est (g)? quoniam regem omnium *Jovem*, qui jam diu in *Capitolio* sedebat, multa stupra, quibus adolescens vacaverat, non permisissent fortasse discere medicinam. Vel cum conspirantibus uno tempore hostibus, *Lucanis*, *Brutiis*, *Samnitibus*, *Etruscis* et *Senonibus Gallis*, primo ab eis legati perempti sunt, deinde cum prætore oppressus exercitus, septem tribus cum illo pereuntibus et militum tredecim millibus? Vel quando post graves et longas Romæ seditiones, quibus ad ultimum plebs in *Janiculum* hostili direptione ² secesserat, hujus mali tam dira calamitas erat, ut ejus rei causa, quod in extremis periculis fieri solebat, dictator crearetur *Hortensius*, qui, plebe revocata, in eodem magistratu expiravit, quod nulli dictatori ante contigerat, et quod illis diis jam præsentem *Æsculapio* gravius crimen fuit.

3. Tum vero tam multa bella ubique crebruerunt, ut inopia militum proletarii illi, qui eo quod proli gignendæ vacabant, oh egestatem militare non valentes, hoc nomen acceperant, militiæ conscriberentur. Accitus etiam a *Tarentinis* *Pyrrhus*, rex Græciæ, tunc ingenti gloria celebratus, Romanorum hostis effectus est. Cui sane de rerum futuro eventu consulenti, aitis urbane *Apollo* sic ambiguum oraculum edidit, ut e duobus quidquid accidisset, ipse divinus haberetur. Ait enim: Dico te, *Pyrrhe*, vincere posse Romanos. Atque ita sive *Pyrrhus* a Romanis, sive *Romani*

a *Pyrrho* vincerentur, securus fatidicus utrumlibet expectaret eventum. Quæ tunc et quam horrenda utriusque exercitus clades? In qua tamen superior *Pyrrhus* exstitit, ut jam posset *Apollinem* pro suo intellectu prædicare divinum; nisi proximo alio prælio *Romani* abecederent superiores. Atque in tanta strage bellorum etiam pestilentia gravis exorta est mulierum: nam priusquam maturos partus ederent, gravidæ moriebantur. Ubi se, credo, *Æsculapius* excusabat, quod *archiatrum* ¹, non obstetricem profitebatur. Pecudes quoque similiter interibant, ita ut jam defecturum genus animalium crederetur. Quid hiems illa memorabilis tam incredibili immanitate sæviens, ut nivibus horrenda altitudine etiam in foro pro die quadraginta nianentibus, *Tiberis* quoque glacie duraretur ², si nostris temporibus accidisset, quæ isti et quanta dixissent? Quid illa itidem ingens pestilentia, quamdiu sævivit, quam multos peremit? Quæ cum in annum alium multo gravius tenderetur, frustra præsentem *Æsculapio*, aditum est ad *libros Sibyllinos* (a). In quo genere oraculorum, sicut *Cicero* in libris de *Divinatione* commemorat, magis interpretibus, ut possunt seu volunt, dubia conjectantibus, credi solet (*Libro 2, cap. 54*). Tunc ergo dictum est eam esse causam pestilentia, quod plurimas ædes sacras multi occupatas privatim tenerent: sic interim a magno imperitia: vel desidia crimine *Æsculapius* liberatus est. Unde autem a multis ædes illæ fuerant occupatæ, nemine prohibente, nisi quia tantæ numinum turbæ diu frustra fuerat supplicatum; atque ita paulatim loca deseriebantur a cultoribus, ut tanquam vacua sine ullius offensione possent humanis saltem usibus vindicari? Nam quæ tunc velut ad sedandam pestilentiam diligenter repetita atque reparata, nisi postea eodem modo neglecta atque usurpata latitarent, non utique magnæ peritiæ *Varronis* tribueretur, quod scribes de adibus sacris tam multa ignorata commemorat. Sed tunc interim elegans, non pestilentia depulsio, sed deorum excusatio procurata est.

CAPUT XVIII. — *Quantas clades Romanos sub bellis Punicis triverint, frustra deorum præsidia expetitis.*

1. Jam vero *Punicis* bellis, cum inter utrumque imperium victoria diu anceps atque incerta penderet, populique duo prævalidi impetus in alterutrum fortissimos et opulentissimos agerent, quot minotiora regna contrita sunt? quæ urbes amplæ nobilesque deletæ? quot afflictæ, quot perditæ civitates? quam longe lateque tot regiones terræque vastatæ sunt? quoties victri hinc atque inde victores? quid hominum consumptum est, vel pugnantium militum, vel ab armis vacantium populorum? quanta vis navium marinis etiam præliis oppressa, et diversarum tempestatum varietate submersa est? Si enarrare vel commemorare conemur, nihil aliud quam scriptores etiam nos erimus historiarum. Tunc magno metu perturbata Romana civitas ad remedia vana et ridenda currebat. Instaurati sunt ex auctoritate librorum *Sibyllinorum* ludi sæculares,

¹ *Lov., Caudinas furcas.* Cæteri codices et *Livius*, lib. 9, *Caudinas furculas*. Angustia montium sunt in *Caudina* valle inter *Abellam* et *Beneventum*, juxta *Caudium* oppidum samnii non procul a *Benevento* et *Capua* situm.

² *Lov., direptione*, cæteri libri, *direptione*. De hac secessionem plebis in *Janiculum* montem, quod *Montorium* hodie vocant, egit *Livius* lib. 11.

(a) *Liv.*, lib. 5, cap. 37 seqq.

(b) *Ibid.*, cap. 46 seqq., et lib. 7, cap. 1.

(c) vide supra, lib. 1, cap. 52; et lib. 2, cap. 8.

(d) Duæ ex eis, *Cornelia* et *Sergia*, gentis fuerunt patriciæ, teste *Livio*, lib. 8, cap. 18, qui matronas ob id sceleris ad centum et septuaginta damnatas dicit.

(e) *Liv.*, lib. 9, cap. 2 seqq.

(f) *Id.*, lib. 10, cap. 31.

(g) *Id.*, *ibid.*, cap. 47, in fine.

¹ Editi, *archiatrum* se. Redundat, se, et abest a *Mss.*

² Nonnulli *Mss.* *moraretur*.

(a) *Orosius*, lib. 4, cap. 3.

quorum celebritas inter centum annos fuerat instituta, felicioribusque temporibus memoria negligente perierat. Renovarunt etiam pontifices ludos sacros inferis, et ipsos abolitos annis retrorsum melioribus. Nimirum enim quando renovati sunt, tanta copia morientium ditatos inferos etiam ludere delectabat: cum perfecto miseri homines ipsa rabida bella et cruentas animositates funereasque hinc atque inde victorias, magnos agerent ludos dæmonum et opimas epulas inferorum. Nihil sane miserabilius primo bello Punico accidit, quam quod ita Romani victi sunt, ut etiam Regulus ille caperetur, cujus in primo et in altero libro mentionem fecimus (*Lib. 1, capp. 15 et 24; et lib. 2, cap. 23*), vir plane magnus et victor antea dormitorque Pænorum: qui etiam ipsum primum bellum Punicum confecisset, nisi aviditate nimia laudis et gloriæ duriores conditiones, quam ferre possent, fessis Carthaginensibus imperasset. Illius viri et captivitas inopinatissima, et servitus indignissima, et juratio fidelissima, et mors crudelissima si deos illos non cogit erubescere, verum est quod ærei sunt, et non habent sanguinem.

2. Nec mala illo tempore gravissima intra mœnia defuerunt. Nam exundante nimis ultra morem fluvio Tiberino pene omnia urbis plana subversa sunt; aliis impetu quasi torrentis impulsis, aliis velut stagno diuturno madefactis atque sublapsis. Istam deinde pestem ignis perniciosior subsecutus est, qui correptis circa forum quibusque celsioribus, etiam templo Vestæ suo familiarissimo non pepercit, ubi ei veluti vitam perpetuam diligentissima substitutione lignorum, non tam honoratæ quam damnatæ virgines donare consueverant. Tunc vero illiç ignis, non tantum vivebat, sed etiam sæviebat. Cujus impetu exterritæ virgines, sacra illa fatalia, quæ jam tres, in quibus fuerant, presserant civitates (a), cum ab illo incendio liberare non possent, Metellus pontifex suæ quodam modo salutis oblitus irruens ea semiustulatus abripuit (b). Neque enim vel ipsam ignis agnovit aut vero erat ibi numen, quod non etiam, si fuisset, fugisset. Homo igitur potius sacris Vestæ, quam illa homini prodesse potuerunt. Si autem a se ipsis ignem non repellabant, civitatem, cujus salutem tueri putabantur, quid contra illas aquas flammisque poterant adjuvare? sicut etiam res ipsa nihil ea prorsus potuisse patefecit. Hæc istis nequaquam objicerentur a nobis, si illa sacra dicerent, non tuendis his bonis temporalibus instituta, sed significandis æternis; et ideo, cum ea quod corporalia visibiliaque essent, perire contingeret, nihil his rebus minui, propter quas fuerant instituta, et posse ad eosdem usus denuo reparari. Nunc vero cæcitate mirabili, eis sacris quæ perire possint, fieri potuisse existimant, ut salus terrena et temporalis felicitas civitatis perire non posset. Proinde cum illis etiam manentibus sacris, vel salutis contritio, vel infelicitas irruisse

¹ Sola editio Lov., *quanquam*.

² Sic Mss. At editi, *miserabili*.

(a) Illum intelligit, Lavinium et Albam.

(b) Livius, libro 19.

monstratur, mutare sententiam, quam defendere nequeunt, erubescant ¹.

CAPUT XIX. — *De afflictione belli Punico secundi, qua vires partis utriusque consumptæ sunt.*

Secundo autem bello Punico nimis longum est commemorare clades duorum populorum, tam longe secum lateque pugnantium; ita ut his quoque fatentibus, qui non tam narrare bella Romana, quam Romanum imperium laudare instituerunt, similior victo fuerit ille qui vicit (a). Annibale quippe ab Hispania surgente, et Pyrenæis montibus superatis, Gallia transcursa, Alpibusque disruptis, tam longo circuitu auctis viribus, cuncta vastando aut subigendo, torrentis modo Italiæ faucibus irruente, quam cruenta bella gesta sunt, quam multa prælia ²! Quoties Romani superati! quam multa ad hostem oppida defecerunt, quam multa capta et oppressa! quam diu pugnæ, et toties Annibali Romanæ clade gloriosæ? De Cannensi autem mirabiliter horrendo malo quid dicam, ubi Annibal cum esset crudelissimus, tamen tanta inimicorum atrocissimorum cæde satiatas, parci jussisse perhibetur (b)? Unde tres modios annulorum aureorum Carthaginem misit (c): quo intelligerent tantam in illo prælio dignitatem cecidisse Romanam, ut facilius eam caperet mensura quam numerus; atque hinc strages turbæ cæteræ, tanto utique numerosioris, quanto infirmioris ³, quæ sine annulis jacelat, conjicienda potius quam nuntianda putaretur. Denique tanta militum inopia secuta est, ut Romani reos facinorum proposita impunitate colligerent, servitia libertate donarent, atque ex illis pudendus ⁴ non tam suppleretur quam institueretur exercitus. Servis itaque, imo ne faciamus injuriam, jam libertis pro Romana republica pugnaturis arma defuerunt. Detracta sunt templis, tanquam Romani diis suis dicerent, Ponite quæ tam diu inaniter habuistis, ne forte aliquid utile inde facere possint nostra mancipia, unde vos, nostra numina, nihil facere potuistis. Tunc etiam stipendiis sufficiens cum defecisset ararium, in usus publicos opes venere privatæ, adeo unoquoque id quod habuit conferente, ut præter singulos annulos aureos singulasque bullas, miserabilia dignitatis insignia, nihil sibi auri senatus ipse, quanto magis cæteri ordines tribusque relinquerent (d)! Quis ferret istos, si nostris temporibus ad hanc inopiam cogerentur, cum eos modo vix feramus, quando pro superflua voluptate plura donantur histrionibus, quam

¹ Vetus codex S. Amandi, *quem defendere nequeunt, non erubescant*.

² Mss., *quam cruenta prælia gesta sunt? Quoties, etc.* — Sic etiam Ms. 766. M.

³ Editi, *infirmioris*. Melius vero Mss., *infimioris*, id est, ignobilioris turbæ, cui non erat usus annuli.

⁴ Am. et Er., *pudendus*.

(a) Liv. initio lib. 21, et Silius Ital. lib. 1.

(b) Cannensis clades Romani exercitus, quæ prope Cannas urbem seu vicum Apuliæ contigit, describitur a Livio, lib. 22, cap. 41 seqq.

(c) Liv. lib. 23, cap. 12.

(d) Id., lib. 22, cap. 57, et cap. 59-61.

tunc legionibus pro extrema salute collata sunt?

CAPUT XX. — *De exitio Saguntinorum, quibus propter Romanorum amicitiam pereuntibus dii Romani auxilium non tulerunt.*

Sed in his omnibus belli Punici secundi malis, nihil miserabilius ac miserabili querela dignius, quam exitium Saguntinorum fuit (a). Hæc quippe Hispaniæ civitas amicissima populi Romani, dum eidem populo fidem servat, eversa est. Hinc enim Annibal fractio fœdere Romanorum, causas quæsitit quibus eos irritaret ad bellum. Saguntum ergo ferociter obsidebat: quod ubi Romæ auditum est, missi legati ad Annibalem, ut ab ejus obsidione discederet. Contempti Carthaginem pergunt, querimoniamque deponunt fœderis rupti, infectoque negotio Romam redeunt. Dum hæc moræ aguntur, misera illa civitas opulentissima, suæ reipublicæ Romanæque charissima, octavo vel nono a Pœnis mense deleta est. Cujus interitum legete, quanto magis scribere, horrores est. Breviter tamen eum commemorabo: ad rem quippe quæ agitur, multum pertinet. Primo fame contabuit: nam etiam suorum cadaveribus a nonnullis pasta perhibetur. Deinde omnium fessa rerum, ne saltem captiva in manus Annibalis perveniret, ingentem rogam publice struxit, in quem ardentem ferro etiam trucidatos omnes se suosque miserunt. Hic aliquid agerent dii belluones¹ atque nebulones, sacrificiorum adipibus inhiantes, et fallacium divinationum caligine decipientes: hic aliquid agerent, civitati populi Romani amicissimæ subvenirent, fidei conservatione pereuntem perire non sinerent. Ipsi utique medii præfuerunt, cum Romanæ reipublicæ interjecto fœdere copulata est. Custodias itaque fideliter quod ipsis præsidibus placito junxerat, fide vinxerat, juratione constrinxerat, a perfido obsessa, oppressa, consumpta est. Si ipsi dii tempestate atque fatminibus Annibalem postea Romanis proximum mœnibus terruerant, longæque miserunt (b); tunc primum tale aliquid facerent. Audeo quippe dicere, honestius illos pro amicis Romanorum, ideo periclitantibus ne Romanis frangerent fidem, et nullam opem tunc habentibus, quam pro ipsis Romanis, qui pro se pugnabant, atque adversus Annibalem opulenti erant, potuisse tempestate sævire. Si ergo tutores essent Romanæ felicitatis et gloriæ, tam grave ab ea crimen Saguntinæ calamitatis averterent: nunc vero quam stulte creditur diis illis defensoribus Romanam victore Annibale non perisse, qui Saguntinæ urbi non potuerunt, ne pro ejus periret amicitia, subvenire? Si Saguntinorum christianus populus esset, et hujusmodi aliquid pro fide evangelica pateretur, quanquam se ipse nec ferro, nec ignibus corrupisset; sed tamen si pro fide evangelica excidium pateretur, ea spe pateretur qua in Christum crediderat, non mercede brevissimi temporis, sed æternitatis inter-

¹ Vind. et Am., *duelliones*.

(a) Saguntum, sive Saguntus urbs olim clarissima Hispaniæ Tarraconensis, non procul a loco ubi nunc Valentia. De illius per Annibalem eversione Livius, lib. 21, cap. 6-15.

(b) Livius, lib. 26, cap. 11.

minæ¹. Pro istis autem diis, qui propterea colendi pertinentur, qui propterea colendi requiruntur, ut harum labentium atque transeuntium rerum felicitas tuta sit, quid nobis defensores et excusatores eorum de Saguntinis pereuntibus respondebunt, nisi quod de illo Regulo extincto? Hoc quippe interest, quod ille unus homo, hæc tota civitas; utriusque tamen interitus causa conservatio fidei fuit. Propter hanc enim ad hostes et redire ille voluit, et noluit ista transire. Conservata ergo provocat deorum iram fides? an possunt et diis propitiis perire non solum quique homines, verum etiam integræ civitates? Utrum volunt, eligant. Si enim fidei servatæ irascuntur illi dii, quærant perfidos a quibus colantur: si autem etiam illis propitiis multis gravibusque cruciatibus afflicti, interire homines civitatesque possunt, nullo fructu felicitatis hujus coluntur. Desinant igitur succensere, qui sacris deorum suorum perditis se infelices esse factos putant. Possent enim illis non solum manentibus, verum etiam faventibus, non, sicut modo, de miseria murmurare, sed sicut tunc Regulus et Saguntini, excruciatii horribiliter etiam penitus interire.

CAPUT XXI. — *Quam ingrata fuerit Romana civitati Scipioni liberatori suo, et in quibus moribus egerit, quando eam Sallustius optimam fuisse describit.*

Porro inter secundum et postremum bellum Carthaginense, quando Sallustius optimis moribus et maxima concordia dixit egisse Romanos (multa enim prætereo, suscepti operis modum cogitans): eodem ergo ipso tempore morum optimorum maximæque concordiæ, Scipio ille Romæ Italiæque liberator (a), ejusdemque belli Punici secundi tam horrendi, tam exitiosi, tam periculosi præclarus mirabilisque confector, victor Annibalis domitorque Carthaginis, cujus ab adolescentia vita describitur diis dedita templisque nutrita (b), inimicorum accusationibus cessit, carensque patria, quam sua virtute salvam et liberam reddidit, in oppido Linternensi egit reliquam complevitque vitam, post insignem suum triumphum nullo illius urbis captus desiderio, ita ut jussisse perhibeat, ne saltem mortuo in ingrata patria funus fieret (c). Deinde tunc primum per Cneum Manlium² proconsulem de Gallogræcis triumphantem, Asiatica luxuria Romam omni hoste pejor irrepsit (d). Tunc enim primum lecti ærati, et pretiosa stragula visa perhibentur: tunc inductæ in convivia psaltriæ, et alia licentiosa nequitia. Sed nunc de his malis quæ intolerabiliter homines patiuntur, non de his quæ libenter faciunt, dicere institui. Unde illud magis quod de Scipione commemoravi, quod cedens inimicis ex-

¹ In solis editis. *sed æternitatis interminæ potiretur.* — Er., *interminatæ*. M.

² Vind. Er. et Mss., *Cneum Manlium*. Codices nostri, *Cneum Mallium*. Ipsum Livius 39 Cneum Manlium Vols. nemi vocat, et de Gallis qui Asiam (scilicet Minorem) incolant (qui Gallogræci et Galatæ dicti sunt) triumphasse memorat. M.

(a) Scipio Africanus major.

(b) Livius, lib. 23, cap. 19; et A. Cellius, lib. 7, cap. 1.

(c) Livius, lib. 33, cap. 59-66.

(d) M., lib. 39, cap. 6.

tra patriam, quam liberavit, mortuus est, ad praesentem pertinet disputationem, quod ei Romana numina a quorum templis avertit Annibalem, non redderant vicem, quæ propter istam tantummodo coluntur felicitatem. Sed quia Sallustius eo tempore ibi dixit mores optimos fuisse, propterea hoc de Asiana luxuria commemorandum putavi, ut intelligatur etiam illud a Sallustio in comparatione aliorum temporum dictum, quibus temporibus peiores utique in gravissimis discordiis mores fuerunt. Nam tunc, id est inter secundum et postremum bellum Carthaginense, lata est etiam illa lex Voconia, ne quis hæredem feminam faceret, nec unicum filium (a). Qua lege quid iniquius dici aut cogitari possit, ignoro. Verum tamen toto illo intervallo duorum bellorum Punicorum tolerabilior infelicitas fuit. Bellis tantummodo foris conterebatur exercitus, sed victoriis consolabatur: domi autem nullæ, sicut alias, discordiæ sæviebant. Sed ultimo bello Punico uno impetu alterius Scipionis, qui ob hoc etiam ipse Africani cognomen invenit (b), æmula imperii Romani ab stirpe deleta est (c): ac deinde tantis malorum aggeribus oppressa Romana respublica, ut prosperitate ac securitate rerum, unde nimium corruptis moribus mala illa congesta sunt, plus nocuisse monstratur tam cito eversa, quam prius nocuerat tam diu adversa Carthago. Hoc toto tempore usque ad Cæsarem Augustum, qui videtur non adhuc vel ipsorum opinione gloriosam, sed contentiosam et exitiosam et plane jam enervem ac languidam libertatem omni modo extorsisse Romanis, et ad regale arbitrium cuncta revocasse, et quasi morbida vetustate collapsam veluti instaurasse ac renovasse rempublicam: toto ergo isto tempore, omitto ex aliis atque aliis causis etiam atque etiam bellicas clades, et Numantinum fœdus (d) horrenda ignominia maculosum: volaverant enim pulli de cavea, et Mancino consuli, ut aiunt, augurium malum fecerant (e); quasi per tot annos, quibus illa exigua civitas Romanum circumsessa exercitum affligerat, ipsique Romanæ reipublicæ terrori esse jam cœperat, alii contra eam malo augurio processerint.

CAPUT XXII. — De Mithridatis edicto, quo omnes cives Romanos, qui intra Asiam invenirentur, jussit occidi.

Sed hæc, inquam, omitto, quamvis illud nequaquam tacuerim, quod Mithridates rex Asiæ ubique in Asia peregrinantes cives Romanos, atque innumerabili copia suis negotiis intentos, uno die occidi jussit (f): et factum est. Quam illa miserabilis rerum

facies erat, subito quemque, ubicumque fuisset inventus, in agro, in via, in oppido, in domo, in vico, in foro, in templo, in lecto, in convivio, inopinante atque impie fuisse trucidatum? Quis gemitus morientium, quæ lacrymæ spectantium, fortasse etiam ferientium fuerunt? Quam dura necessitas hospitem, non solum videndi nefarias illas cædes domi suæ, verum etiam perpetrandi; ab illa blabda comitate humanitatis repente mutatis vultibus ad hostile negotium in pace peragendum, mutuis dicam omnino vulneribus, cum percussus in corpore, et percussor in animo feriretur? Num et isti omnes auguria contemperant? Num deos et domesticos et publicos, cum de sedibus suis ad illam irremediabilem peregrinationem profecti sunt, quos consulerent, non habebant? Hoc si ita est, non habent cur isti in hac causa de nostris temporibus conquærantur. Olim Romani hæc vana contemnunt. Si autem consuluerunt, respondeatur quid ista profuerunt, quando per humanas duntaxat leges, nemine prohibente, licuerunt.

CAPUT XXIII. — De interioribus malis, quibus Romana respublica exagitata est, præcedente prodigio, quod in rabie omnium animalium, quæ hominibus serviunt, fuit.

Sed jam illa mala breviter, quantum possumus, commemoremus, quæ quanto interiora, tanto miseriora exstiterunt: discordiæ civiles, vel potius inciviles; nec jam seditiones, sed etiam ipsa bella urbana, ubi tantus sanguis effusus est, ubi partium studia, non concionum dissensionibus variisque vocibus in alterutrum, sed plane jam ferro armisque sæviebant: bella socialia, bella servilia, bella civilia quantum Romanum cruorem fuderunt, quantum Italianæ vastationem desertionemque fecerunt? Namque antequam se adversus Romam sociale Latium commoveret, cuncta animalia humanis usibus subdita, canes, equi, asini, boves, et quæque alia pecora sub hominum dominio fuerunt, subito efferata et domesticæ lenitatis oblita, relictis tectis libera vagabantur, et omnem non solum aliorum, verum etiam dominorum aversabantur accessum, non sine exitio vel periculo audentis, si quis de proximo urgeret (a). Quanti mali signum fuit, si hoc signum fuit quod tantum malum fuit, si etiam signum non fuit? Hoc si nostris temporibus accidisset, rabidiores istos quam illi sua animalia pateremur.

CAPUT XXIV. — De discordia civili, quam Græchiæ seditiones excitaverunt.

Initium autem civilium bellorum fuit, seditiones

¹ Editi, mutatis ut ita dicam. Abest, ut ita, a codicibus manuscriptis; sed ejus loco in pluribus legitur, repente.

² Editi, talia licuerunt. Manuscripti vero non habent, talia.

³ Editi, contentionum. Manuscripti vero, concionum.

⁴ Ita omnes Mss. At editi, Quod quanti mali signum fuit? Quod si hoc signum fuit, quod tantum malum fuit; quantum malum fuit illud, cuius hoc signum fuit?

⁵ Mss. habent, civitium malorum. — Sic etiam Cl. 766. M. (a) Julius Obsequens de Prodigis, cap. 114, et Ors. lib. 2, cap. 18.

¹ Codex 766, monstraretur. M.

² Mss., processerunt.

(a) Livius, lib. 41, cap. 34.

(b) Africanus minac.

(c) Livius, libro 51.

(d) Numantia urbs fuit Hispaniæ Tarraconensis gesto cum Romanis bello nobilitata et a Scipione Africano tandem deleta. De illo cum Numantinis facto per C. Hostilium Mancinum foedere, deque in fausto pullorum volatu de cavea Livius lib. 55.

(e) Livius, libro 53.

(f) Id., libro 78.

Gracchorum agrariis legibus excitatae. Volebant enim agros populo dividere, quos nobilitas perperam possidebat. Sed tam vetustam iniquitatem audere convellere, periculosissimum; imo vero, ut ipsa res docuit, perniciosissimum fuit. Quae funera facta sunt, cum prior Gracchus (a) occisus est? quae etiam, cum alius frater ejus non longo interposito tempore? Neque enim legibus et ordine potestatum, sed turbis armorumque conflictibus nobiles ignobilesque necabantur. Post Gracchi alterius (b) interfecionem, Lucius Opimius consul, qui adversus eum intra Urbem arma commoverat, eoque cum sociis oppresso et extincto ingentem civium stragem fecerat, cum quaestionem haberet jam judiciaria inquisitione ceteros persequens, tria millia hominum occidisse perhibetur. Ex quo intelligi potest, quantam multitudinem mortuum habere potuerit turbidus conflictus armorum, quande tantam habuit judiciorum velut examinata cognitio. Percussor Gracchi ipsius caput quantum grave erat, tanto auri pondere consuli vendidit: haec enim pectio caedem praecesserat. In qua etiam occisus est cum liberis Marcus Fulvius consularis.

CAPUT XXV. — *De aede Concordiae ex senatusconsulto in loco seditionum et caedum condita.*

Eleganti sane senatusconsulto eo ipso loco, ubi funereus tumultus ille commissus est, ubi tot cives ordinis cujusque ceciderunt, aedes Concordiae facta est, ut Gracchorum poenae testis concionantium oculos feriret, memoriamque compungeret. Sed hoc quid aliud fuit, quam irrisio deorum, illi deae templum construere, quae si esset in civitate, non tantis dissensionibus dilacerata corrueret? nisi forte sceleris hujus rea Concordia, quia deseruerat animos civium, meruit in illa aede tanquam in carcere includi. Cur enim, si rebus gestis congruere vulerunt, non ibi potius aedem Discordiae fabricaverunt? an ulla ratio redditur, cur Concordia dea sit, et Discordia dea non sit; ut secundum Labeonis distinctionem, bona sit ista, illa vero mala (c)? Nec ipse aliud secutus videtur, quam quod advertit Romae etiam Febri, sicut Salutis, templum constitutum. Eo igitur modo non tantum Concordiae, verum etiam Discordiae constitui debuit. Periculose itaque Romani tam mala dea irata vivere vulerunt, nec Trojanum excidium recoluerunt originem ab ejus offensione sumpsisse. Ipsa quippe quia inter deos non fuerat invitata, trium dearum (d) litem aurei mali suppositione commenta est: unde rixa numinum, et Venus victrix, et rapta Helena, et Troja deleta. Quapropter, si forte indignata quod inter deos in Urbe nullum templum habere meruit, ideo jam turbabat tantis tumultibus civitatem; quanto atrocius potuit irritari, cum in loco illius caedis,

hoc est in loco sui operis, adversariae suae constitutam aedem videret? Haec vana ridentibus nobis illi docti sapientesque stomachantur, et tamen numinum honorum malorumque cultores de hac quaestione Concordiae Discordiaeque non exeunt, sive praetermiserint harum dearum cultum, eisque Febrem Bellonamque praetulerint, quibus antiqua fana fecerunt; sive et istas coluerint, cum sic eos, discedente Concordia, Discordia saeviens usque ad civilia bella perduxerit.

CAPUT XXVI. — *De diversis generibus belli, quas post conditam aedem Concordiae sunt secuta.*

Præclarum vero seditionibus¹ obstaculum, aedem Concordiae testem caedis supplicique Gracchorum concionantibus opponendam putarunt. Quantum ex hoc profecerint, indicant secuta pejora. Laborarunt enim deinceps concionatores, non exemplum devitare Gracchorum, sed superare propositum, Lucius Satorninus tribunus plebis, et Caius Servilius praetor, et multo post (a) Marcus Drusus, quorum omnium seditionibus caedes primo jam tunc gravissimae, deinde socialia bella exarserunt (b): quibus Italia vehementer afflicta, et ad vastitatem mirabilem² desertionemque perducta est. Bellum deinde servile successit (c), et bella civilia: in quibus³ quae praelia commissa sunt, quid sanguinis fustum? ut omnes fere Italiae gentes, quibus Romanum maxime praepollebat imperium, tanquam saeva barbaries⁴ domarentur. Jam ex paucissimis, hoc est minus quam septuaginta, gladiatoribus quemadmodum bellum servile contractum sit, ad quantum numerum et quam acrem ferocemque pervenerit: quos ille numerus imperatores populi Romani superaverit: quas et quomodo civitates regionesque vastaverit, vix qui historiam conscripserunt, satis explicare potuerunt (d). Neque id solum

¹ Mss., *seditionis*.

² Editi, *miserabilem*. At manuscripti, *mirabilem*. Eutropius de bello sociali et civili agens lib. 5, numerat consumptos ultra centum quinquaginta millia hominum, viros consulares 24, praetores 7, senatores fere 300. Consentit, Oros. lib. 5, c. 22, sed multo plures extinctos tradit velicitus.

³ Haec voculae, *in quibus*, desunt in nostris omnibus manuscriptis. M.

⁴ Lov., *barbarie*. Caeteri editi et Mss., *barbaries*.

(a) In Mss., *Caius Servilius praetor*. Mox omnes libri, et multo post: ubi Lud. Vives opinatur legendum, et non multo post: quia septem annos tantum a Saturnino tribuno ad Marcum Livium Drusum reperit. De Druso socialis belli auctore scripsit Livius lib. 71; de Saturnino autem ac Servilio Glaucia praetore, lib. 69.

(b) *Socialia bella* quae in Romanos socii eorum et cognati susceperunt, Etrusci, Latini, Sabini, etc.

(c) Bellum servile aliud sociali bello prius fuit, quod ab Euno Syro quodam servo excitatum, et a Cleone servo altero postea junctis copiis roboratum scribit Livius lib. 58. Aliud autem posterius contractum ex gladiatoribus, quos idem ipse lib. 55, memorat quatuor et septuaginta Capuae ex Ludo Lentuli profugisse, ducesque Chrysum et Spartacum eorum exercitum praeviasse. Ducem insuper iidem habuerunt Oronaum, ex Floro lib. 3. De isto posteriore bello Augustinus hic et infra lib. 4, cap. 5.

(d) De gladiatorio bello, Liviana epitome 95; Appianus, de Bellis civilibus, lib. 1 in fine; Florus, lib. 3, cap. 20; Plutarchus in Vita M. Crassi, qui hoc bellum confecit; Oros. (d) Vide infra, hb. 4, cap. 5.

(Quatre.)

¹ Nonnulli codices, *mortuorum*. — Nostris Codd., *mortuum*. M.

² Sic Mss. Editi vero, *commentata est*.

(a) Tiberius Gracchus. Vide supra lib. 2, cap. 21.

(b) Caii Gracchi. Plutarch. in Gracchiis.

(c) Vide supra, lib. 2, cap. 11.

(d) Junonis, Palladis et Veneris.

SANCT. AUGUST. VII.

feit servile bellum; sed et Macedoniam provinciam prius servitiam depopulata sunt, et deinde Siciliam oramque maritimam. Quanta etiam et quam horrenda comiserint primo latrocinia, deinde valida bella piratarum, quis pro magnitudine rerum valeat eloqui (a)?

CAPUT XXVII. — *De bello civili Mariano atque Syllano.*

Com vero Marius civili sanguine jam cruentus, multis adversarum sibi partium peremptis, victus Urbe profugisset, vix paululum respirante civitate, ut verbis Tullianis utar, *superavit postea Cinna cum Mario. Tum vero clarissimis viris interfectis, lumina civitatis extincta sunt. Ulterius est hujus victoriae crudelitatem postea Sylla, ne dici quidem opus est quanta diminutione civium et quanta calamitate reipublicae (In Catilinam Orat. 3, cap. 10, § 24). De hac enim vindicta, quae perniciosior fuit, quam si scelera quae puniebantur, impunita relinquerentur, ait et Lucanus:*

*Excessit medicina modum; nimiumque secuta est,
Qua morbi duxere manum¹; periere nocentes.
Sed cum jam soli possent superare nocentes,
Tunc data libertas odiis, resolutaque legum
Frenis ira ruit².*

(*Pharsal. lib. 2, vers. 142-146.*)

Nullo bello Mariano atque Syllano, exceptis his qui foris in acie ceciderant, in ipsa quoque Urbe cadaveribus vici, plateae, fora, theatra, templa completa sunt; ut difficile judicaretur quando victores plures funerum ediderint, utrum prius ut vincerent, an postea quia vicissent: cum primam victoria Mariana, quando de exilio se ipse restituit, exceptis passim quaquaversum caedibus factis, caput Octavii consulis poneretur in rostris (b), Caesar et Fimbria in domibus trucidarentur suis³, duo Crassi, pater et filius, in conspectu mutuo mactarentur. Bebius et Numitorius vivo tracti sparsis visceribus interirent, Catulus hausto veneno se manibus inimicorum subtraheret, Merula, flamen Dialis, praecisis venis Jovi etiam suo sanguine litaret. In ipsius autem Marii oculis continuo feriebantur, quibus salutantibus dexteram porrigere noluisset.

CAPUT XXVIII. — *Qualis fuerit Syllana victoria vindex Mariana crudelitatis.*

Syllana vero victoria secuta, hujus videlicet vindex crudelitatis, post tantum sanguinem civium, quo fuso comparata fuerat, finito jam bello inimicitias viventibus, crudelius in pace grassata est. Jam etiam post Marii majoris pristinas ac recentissimas caedes addita fuerant aliae graviores a Mario juvene, atque Carbone earumdem partium Marianarum: qui Sylla imminente, non solum victoriam, verum etiam ipsam desperantes salutem, cuncta suis alienisque caedibus impleverunt. Nam praeter stragem late per diversa

¹ Sic nostri Mss. in B., *nimumque secuta est, qua morbi duxere, manus.* M.

² Codd. nostri omittunt verba: *Tunc data libertas odiis, resolutaque legum frenis ira ruit.* M.

³ Vind. Am. Er. et aliquot manuscripti, *trucidarentur a suis.*

(a) Livius, lib. 99.

(b) De hoc et sequentibus vide Liv. lib. 80; Appian. l. 1 de Bellis civil.; Plutarch. in Mario et Sylla, etc.

diffusam, obsesso etiam senatu (a), de ipsa curia, tanquam de carcere, producebantur ad gladium. Mucius Scaevola pontifex, quoniam nihil apud Romanos templo Vestae sanctius habebatur, aram ipsam amplexus, occisus est; ignemque illum, qui perpetua cura virginum semper ardebat, suo pene sanguine exstinxit. Urbem deinde Sylla victor intraivit, qui in villa publica, non jam bello, sed ipsa pace saeviente, septem millia deditorum¹ (unde utique² inermium) non pugnando, sed iubendo prostraverat (b). In Urbe autem tota quem vellet Syllanus quisque feriebat: unde tot funera numerari omnino non poterant, donec Syllae suggereretur, sinendos esse aliquos vivere, ut essent quibus possent imperare qui vicerant. Tunc jam cohibita, quae hac atque hac passim furibunda ferebatur licentia jugulandi, tabula illa cum magna gratulatione proposita est, quae hominum ex utroque ordine splendido, equestri scilicet atque senatorio, occidendorum ac proscribendorum duo millia continebat. Contristabat numerus, sed consolabatur modus; nec quia tot cadebant tantum erat mœroris, quantum lætitiæ, quia cæteri non timebant. Sed in quibusdam eorum, qui mori jussi erant, etiam ipsa licet crudelis cæterorum securitas, genera mortium exquisita congemit. Quemdam enim sine ferro laniantium manus diripuerunt, immani homines hominem vivum, quam bestiae solent discerpere cadaverem abjectum (c). Alius oculis effossis et particulim membris amputatis in tantis cruciatibus diu vivere, vel potius diu mori coactus est (d). Subhastatae sunt etiam (e), tanquam villæ, quaedam nobiles civitates. Una vero, velut unus reus duci juberetur, sic tota jussa est trucidari. Hæc facta sunt in pace post bellum, non ut acceleraretur obtinenda victoria, sed ne contemneretur obtenta. Pax cum bello de crudelitate certavit, et vicit. Illud enim prostravit armatos, ista nudatos. Bellum erat, ut qui feriebatur, si posset, feriret: pax autem, non ut qui evaserat, viveret, sed ut moriens non repugnaret.

CAPUT XXIX. — *De comparatione Gothicae irruptionis cum eis cladibus quas Romani vel a Gallis, vel a bellorum civilium auctoribus exceperunt.*

Quæ rabies exterarum gentium, quæ sævitia bar-

¹ Vind. Er. et Lov., *peditum.* At Am. et manuscripti, *deditorum.* Suffragatur Livius, l. 88, nisi quod non septem, sed octo millia deditorum¹ trucidata refert. Valerius, l. 9, c. 2: « quatuor legiones, inquit, contrariæ partis fidelem suam secutas, in villa publica, quæ in campo Martio erat... obruncari jussit. »

² Lov., *undecumque.* At Mss., *unde utique.*

(a) Liv., lib. 86.

(b) Seneca, libro de Clementia, cap. 12.

(c) Bebius hunc appellat Florus, lib. 3, cap. 21: *diversum intellige ab eo, qui inter Syllanarum partium sectatores occisus legitur supra, cap. 27.*

(d) Fuit hic Marius prætor, C. Marii propinquus. Valer. lib. 9, cap. 2; Flor. lib. 3, cap. 21.

(e) Vind. Am. et aliquot Mss., *subhastatae.* Verius alii libri, *subhastatae*, id est, sub hasta venales propositæ. Loco huic lucem affert Florus, lib. 3, cap. 21: « Municipia, » inquit, « Italiae splendidissima sub hasta venerunt, Spoletum, Interamnium, Praeneste, Fluentia. Nam Sulmonem... ut « obsides jure belli et modo morte damnati duci juberentur, « sic damnatam civitatem jussit Sylla deleri. » Non ergo de Praenestinis, ut Coquæ visum est, sed de Sulmonensibus intelligendum quod hic dicit Augustinus, unam civitatem totam jussam esse trucidari.

harorum huic de civibus victoriæ civium comparari potest? Quid Roma funestius, tetrius, amariusque vidit, utrum olim Gallorum et paulo ante Gothorum irruptionem, an Marii et Syllæ aliorumque in eorum partibus virorum clarissimorum tanquam suorum luminum in sua membra ferocitatem? Galli quidem trucidaverunt senatum, quidquid ejus in Urbe tota, præter arcem Capitolinam, quæ sola utcumque defensa est, reperire potuerunt; sed in illo colle constitutis auro vitam saltem vendiderunt, quam etsi ferro rapere non possent, possent tamen obsidione consumere: Gothi vero tam multis senatoribus pepercerunt, ut magis mirum sit quod aliquos peremerunt. At vero Sylla, vivo adhuc Mario, ipsum Capitolium, quod a Gallis tutum fuit, ad decernendas cædes victor inædit; et cum fugas Marius esset elapsus, ferocior eruentiorque rediturus, iste in Capitolio per senatus etiam consultum tam multos vita rebusque privavit. Marianis autem partibus, Sylla absente, quid sanctum cui parcerent fuit, quando Mucio civi, senatori, pontifici, aram ipsam, ubi erant, ut aiunt, fata Romana, miseris ambienti amplexibus non pepercerunt? Syllana porro tabula (a) illa postrema, ut omittamus alias innumerabiles mortes, plures jugulavit senatores, quam Gothi vel spoliare potuerunt.

CAPUT XXX. — *De connexione bellorum, quæ adventum Christi plurima et gravissima præcesserunt.*

Quæ igitur fronte, quo corde, qua impudentia, qua insipientia, vel potius amentia, illa diis suis non imputant, et hæc nostro imputant Christo? Crudelia bella civilia omnibus bellis hostilibus, auctoribus etiam eorum fatentibus, amariora, quibus illa respublica nec afflicta, sed perditâ omnino judicata est, longe ante adventum Christi exorta sunt, et sceleratarum concatenatione causarum a bello Mariano atque Syllano ad bella Sertorii et Catilinæ, quorum a Sylla fuerat ille proscriptus, ille nutritus (b): inde ad Lepidi et Catuli bellum, quorum alter gesta Syllana rescindere, alter defendere cupiebat (c): inde ad Pompeii et Cæsaris, quorum Pompeii sectator Syllæ fuerat, ejusque potentiam vel æquaverat, vel jam etiam superaverat; Cæsar autem Pompeii potentiam non ferebat, sed quia non habebat, quam tamen illo victo interfectoque transcendit. Hinc ad alium Cæsarem, qui post Augustus appellatus est, pervenerunt, quo imperante natus est Christus. Nam et ipse Augustus cum multis gessit bella civilia: et in eis etiam multi clarissimi viri perierunt, inter quos et Cicero, disertus ille artifex regendæ reipublicæ. Pompeii quippe victorem Caium Cæsarem (qui victoriam civilem clementer exercuit, suisque adversariis vitam dignitatemque donavit) tanquam regni appetitorem quorundam nobilium conjuratio senatorum velut

pro reipublicæ libertate in ipsa curia trucidavit. Hujus deinde potentiam, multum moribus dispar, vitia, que omnibus¹ inquinatus atque corruptus, affectare videbatur Antonius, cui vehementer pro eadem illa velut patriæ libertate Cicero resistebat. Tunc emergerat mirabilis indolis adolescens ille alius Cæsar, filius Gaii Cæsaris filius adoptivus: qui, ut dixi, postea appellatus est Augustus. Huic adolescenti Cæsari, ut ejus potentia contra Antonium nutriretur, Cicero favebat; sperans eum depulsa et oppressa Antonii dominatione instauraturum reipublicæ libertatem, usque adeo cæcus atque improvidus futurorum, ut ille ipse juvenis, cujus dignitatem ac potestatem fovebat, et eundem Ciceronem occidendum Antonio quadam quasi concordiæ pactione permetteret, et ipsam libertatem reipublicæ, pro qua multum ille clamaverat, ditioni propriæ subjugaret.

CAPUT XXXI. — *Quod impudenter præsentia incommoda Christo impudenti qui deos colere non sinuntur, cum tantæ cladis eo tempore, quo colebantur, exstiterint.*

Deos suos accusent de tantis malis, qui nostro Christo ingrati sunt de tantis bonis. Certe quando illa mala fiebant, calebant aræ numinum, Sabæo thure sertisque recentibus halabant, clarebant sacerdotia, fana renidebant; sacrificabatur, ludebatur, furebatur in templis, quando passim tantus civium sanguis a civibus, non modo in cæteris locis, verum inter ipsa quoque deorum altaria fundebatur. Non elegi templum, quo confugeret Tullius; quia frustra elegerat Mucius. Hi vero qui multo indignius insultant christianis temporibus, aut ad loca Christo dicatissima confugerunt, aut illuc eos ut viverent, etiam ipsi Barbari deduxerunt. Illud scio, et hoc mecum quisquis sine studio partium judicat, facillime agnoscit (ut omittam cætera quæ multa commemoravi, et alia multo plura quæ commemorare longum putavi), si humanum genus ante bella Punica christianam reciperet disciplinam, et consequeretur rerum tanta vastatio, quæ ta illis bellis Europam Africamque contrivit; nullus talium, quales nunc patimur, nisi christianæ religioni mala illa tribuisset. Multo autem minus eorum voces tolerarentur, quantum attinet ad Romanos, si christianæ religionis receptionem et diffamationem, vel irruptio illa Gallorum, vel Tiberini fluminis igniumque illa depopulatio, vel quod cuncta mala præcedit, bella illa civilia sequerentur. Mala etiam alia, quæ usque adeo incredibilia² acciderunt, ut inter prodigia numerarentur, si christianis temporibus accidissent, quibus ea, nisi christianis hominibus, tanquam crimina objicerent? Omitto quippe illa, quæ magis fuerunt mira quam noxia, boves locutos, infantes nondum natos de uteris matrum quædam verba clamasse, volasse serpentes, feminas et gallinas et homines in masculinum sexum fuisse conversas: et cætera hujusmodi; quæ in eorum libris, non

(a) Plutarchus in Sylla, ter eum intra paucos dies proscriptionum diversas tabulas proponisse scribit.

(b) Ille proscriptus, scilicet Q. Sertorius, Marianarum partium sectator, de quo Liv. lib. 90; ille nutritus, Catilina Syllæ adherens.

(c) Lepidus rescindere, Catulus defendere cupiebat. Liv. lib. 90

¹ sic nostri omnes codices. In B., vitis omnibus, omnesque; n inus bene. M.

² Nstri codices, incredibiliter. M.

fabulosæ, sed historicis, seu vera seu falsa sint, non inferunt hominibus perniciem, sed stuporem. Sed cum pluit terra, cum pluit creta, cum pluit lapidibus, non ut grandæ appellari solet hoc nomine, sed omnino lapidibus; hæc profecto etiam graviter lædere poterunt. Legimus apud eos Ætnæis ignibus ab ipso montis vertice usque ad littas proximum decurrentibus ita mare feruisse, ut rupes exurerentur, et pices navium solverentur. Hoc utique non leviter noxium fuit, quamvis incredibiliter mirum. Eodem rursus æstæ ignium tanta vi favillæ scripserunt oppletam esse Siciliam, ut Catinensis urbis tectæ obruta et oppressa dirueret¹: qua calamitate permocti, misericorditer ejusdem anni tributum ei relaxare Romani. Locustarum etiam in Africa multitudinem prodigii similem fuisse, cum jam esset populi Romani provincia, litteris mandaverunt: consumptis enim fructibus folisque lignorum, ingenti

¹ Vind. Am. et Lov., *diruerent*. Manuscripti vero, *dirue-
ret*. Er., *diruerit*.

atque inæstimabili nabe in mare dicunt esse dejectam: qua mortua redditaque littoribus, atque hinc aere corrupto, tantam ortam pestilentiam, ut in solo regno Masinissæ (a) octingenta hominum millia perisse referantur, et multo amplius in terris littoribus proximis. Tunc Uticæ ex triginta millibus juniorum¹; quæ ibi erant, decem remansisse confirmant. Talis itaque vanitas, qualem ferimus, eique respondere compellimur, quid horum non christianæ religioni tribueret, si temporibus christianis videret? Et tamen diis suis non ista tribuant: quorum ideo cultum requirunt, ne ista vel minora patiantur, cum ea majora pertulerint a quibus antea colebantur.

¹ Vind. Am. Er., *virorum*. Triginta millia erant militum, apud Uticam ad præsidium totius Africæ ordinata, teste Orosio, qui eosdem Augustino consentiens vocat juniores. Mox infra vetus Corbeiensis codex et alii quidam Mss. habent, *decem millia remansisse*.

(a) Masinissæ, tametsi jam oblerat, regnum dicitur, quod ipsi pro maximis meritis a populo Romano datum Micipsa filius ejus tum gubernabat.

LIBER QUARTUS (a).

in quo probatur amplitudinem Romani imperii ac diuturnitatem adscribendam esse, non Jovi diisve Paganorum, quibus singulis vix singulæ res et infima quæque committenda credebantur officia, sed uni vero Deo felicitatis auctori, cujus potestate ac judicio regna terrena constituuntur atque servantur.



CAPUT PRIMUM. — De his quæ primo volumine disputata sunt.

De civitate Dei dicere exorsus, prius respondendum putavi ejus inimicis, qui terrena gaudia consecrantes, rebusque fugacibus inhiantes, quidquid in eis triste, misericordia potius admonentis Dei, quam punientis severitate patiuntur, religioni increpitant christianæ, quæ una est salubris et vera religio. Et quoniam, cum sit in eis etiam vulgus indoctum, velut doctorum auctoritate in odium nostrum gravius irritantur, existimantibus imperitis ea, quæ suis temporibus insolite acciderunt, per alia retro tempora accidere non solere; eorumque opinionem, etiam iis qui eam falsam esse noverunt, ut adversum nos justa murmura habere videantur, suæ scientiæ dissimulatione firmanibus: de libris quos auctores eorum ad cognoscendam præteritorum temporum historiam memoriæ mandaverunt, longe aliter esse quam putant, demonstrandum fuit; et simul docendum, deos falsos, quos vel palam colebant, vel occulte adhuc colunt, eos esse immundissimos spiritus et malignissimos ac fallacissimos demones; usque adeo ut aut veris, aut fictis etiam, suis tamen criminibus delectentur, quæ sibi celebrari per sua festa voluerunt; ut a perpetrandis damnabilibus factis humana revocari non possit infirmitas, dum ad hæc imitanda velut divina præbetur auctoritas. Hæc non ex nostra conjectura probavimus, sed partim ex recenti memoria, quia et ipsi vidimus talia ac talibus numinibus exhiberi;

(a) Quarti hujus et quinti de Civitate Dei libri meminit Augustinus in Epistola 109, ad Evodium, sub finem anni 415 scripta, eodemque ipso anno Inchoatos et vertectos a se hos duos libros testatur, nn. 1 et 13

partim ex litteris eorum, qui non tanquam in contumeliam, sed tanquam in honorem deorum suorum ista conscripta posteris reliquerunt: ita ut vir doctissimus apud eos, Varro, et gravissimæ auctoritatis, cum rerum humanarum atque divinarum desperitissos faceret libros, alios humanis, alios divinis, pro sua cujusque rei dignitate distribuens, non saltem in rebus humanis, sed in rebus divinis ludos scenicos poneret: cum utique, si tantummodo boni et honesti homines in civitate essent, nec in rebus humanis ludi scenici esse debuissent. Quod profecto non auctoritate sua fecit, sed quoniam eos Romæ natus et educatus in divinis rebus invenit. Et quoniam in fine primi libri, quæ deinceps dicenda essent, breviter posuimus, et ex his quædam in duobus consequentibus diximus, expectationi legentium quæ restant reddenda cognoscimus.

CAPUT II. — De his quæ libro secundo et tertio continentur.

Promiseramus ergo quædam nos esse dicturos adversus eos, qui Romanæ reipublicæ clades in religionem nostram referunt, et commemoraturos quæcumque et quantumque occurrere potuissent, vel satis esse viderentur, mala, quæ illa civitas pertulit, vel ad ejus imperium provinciæ pertinentes, antequam eorum sacrificia prohibita fuissent: quæ omnia procul dubio nobis tribuerent, si jam vel illis claret nostra religio, vel ita eos a sacris sacrilegis¹ prohiberet. Hæc in secundo et tertio libro satis, quantum existimo, absolvimus: in secundo agentes de malis morum, quæ mala vel sola, vel maxima depu-

¹ Lov., *sacri legis*. Dissentiant cæteri libri.

tanda sunt; in tertio autem de his quæ stulti sola perpeti exhorrent, corporis videlicet externarumque rerum, quæ plerumque patiuntur et boni. Illa vero mala non dico patienter, sed libenter habent, quibus ipsi sunt mali. Et quam pauca dixi de sola ipsa civitate atque ejus imperio? nec inde omnia usque ad Cæsarem Augustum. Quid, si commemorare voluissem, et exaggerare illa mala, quæ non sibi invicem homines faciunt, sicut sunt vastationes eversionesque bellantium, sed ex ipsius mundi elementis terrenis accidunt rebus? quæ uno loco Apuleius breviter stringit in eo libro quem de Mundo scripsit (a), terrena omnia dicens mutationes, conversiones atque interitus habere. Namque immodicis tremoribus terrarum, ut verbis ejus utar, dissiluisse humum, et interceptas urbes cum populis dicit: abruptis etiam imbris prolutas totas esse regiones: illas etiam quæ prius fuerant continentes, hospitibus atque advenis fluctibus insulatas, aliasque desidia maris pedestri accessu pervias factas: ventis ac procellis eversas esse civitates: incendia de nubibus emicasse¹, quibus Orientis regiones conflagratæ perierunt; et in Occidentis plagis scaturigines quasdam ac proluiones easdem strages dedisse. Sic ex Ætnæ verticibus quondam effusis crateribus, divino incendio per declivia, torrentis vice flumarum flumina cucurrisse. Si hæc atque hujusmodi, quæ habet historia, unde possem, colligere voluissem, quando finissem quæ illis temporibus evenerunt, antequam Christi nomen illa istorum vana² et veræ salutis perniciosa comprimeret? Promiseram etiam me demonstraturum, quos eorum mores, et quam ob causam Deus verus ad augendum imperium adjuvare dignatus est, in cuius potestate sunt regna omnia; quamque nihil eos adjuverint hi quos deos putant, et potius quantum decipiendo et fallendo nocuerint: unde nunc mihi video esse dicendum, et magis de incrementis imperii Romani. Nam de noxia fallacia dæmonum, quos velut deos colebant, quantum malorum invexerit moribus eorum, in secundo maxime libro non pauca jam dicta sunt. Per omnes autem absolutos tres libros, ubi opportunum visum est, commendavimus³ etiam in ipsis bellicis malis quantum solatiorum Deus per Christi nomen, cui tantum honoris, Barbari detulerunt præter bellorum morem, bonis malisque contulerit, quomodo qui facit solem suum oriri super bonos et malos, et pluit super justos et injustos (*Matth. v, 45*).

CAPUT III. — *An latitudo imperii, quæ non nisi bellis acquiritur, in bonis sive sapientium habenda sit, sive felicitium,*

Jam itaque videamus quale sit, quod tantam latitudinem ac diuturnitatem imperii Romani illis diis audent tribuere: quos etiam per turpium ludorum

¹ Editi, *emicuisse*. Mss., *emcasse*.

² Codices Mss., *ulla istorum vana*. — Sic Mss. 766 et 2050; ceteri vero nostri, *nulla istorum vana*; male. M.

³ Sola editio Lov., *ubi opportunum visum est commemoravimus*.

(a) Hæc sententia in Apuleio reperitur; sequentia minime.

obsequia et per turpium hominum misteria se honeste coluisse contendunt¹. Quamquam prius vellem paululum inquirere, quæ sit ratio, quæ prudentia, cum hominum felicitatem non possis ostendere, semper in bellicis cladibus et in sanguine civili, vel hostili, tamen humano, cum tenebroso timore et cruenta cupiditate versantium, ut vitrea lætitia comparetur² fragiliter splendida, cui timeatur horribilius ne repente frangatur, de imperii magnitudine ac latitudine velle gloriari. Hoc ut facilius dijudicetur, non vane scamus inani ventositate jactati, atque obtundamus intentionis aciem altisonis vocabulis rerum, cum audimus populos, regna, provincias: sed duos constituamus homines (nam singulus quisque homo, ut in sermone una littera, ita quasi elementum est civitatis et regni, quantalibet terrarum occupatione latissimi), quorum duorum hominum, pauperem unum, vel potius mediocre; alium prædivitem cogitemus: sed divitem timoribus anxium, mœroribus tabescentem, cupiditate flagrantem, nunquam securum, semper inquietum, perpetuis inimicitarum contentionibus anhelantem, augentem sane his miseriis patrimonium suum in immensum modum, atque illis augmentis curas quoque amarissimas aggerantem; mediocre vero illum re familiari parva atque succincta sibi sufficientem, charissimum suis, cum cognatis³, vicinis, amicis dulcissima pace gaudentem, pietate religiosum, benignum mente, sanum corpore, vita parcum, moribus castum, conscientia scelerum. Nescio utrum quisquam ita desipiat, ut audeat dubitare quem præferat. Ut ergo in his duobus hominibus, ita in duobus familiis, ita in duobus populis, ita in duobus regnis regula sequitur æquitatis: qua vigilantèr adhibita, si nostra intentio corrigatur, facillime videbimus ubi habitet vanitas, et ubi felicitas. Quapropter si verus Deus colatur, eique sacris veracibus et bonis moribus serviat, utile est ut boni longe lateque diu regnent. Neque hoc tam ipsis, quam illis utile est, quibus regnant. Nam quantum ad ipsos pertinet, pietas et probitas eorum, quæ magna dona Dei sunt, sufficit eis ad veram felicitatem, qua et ista vita bene agatur, et postea percipiatur æterna. In hac ergo terra regnum bonorum non tam illis præstat, quam rebus humanis: malorum vero regnum magis regnantibus nocet, qui suos amicos vastant scelerum majore licentia; his autem qui eis serviendo subduntur, non nocet nisi iniquitas propria. Nam justis quicquid malorum ab iniquis dominis irrogatur, non est poena criminis, sed virtutis examen. Proinde bonus etiamsi serviat, liber est: malus autem etiamsi regnet, servus est; nec civis hominis, sed quod est gravius, tot dominorum, quot vitiorum. De quibus vitiiis cum ageret Scriptura divina, *A quo enim quis, inquit, devictus est, huic et servus addictus est* (*II. Petr. ii, 19*).

¹ Editi, *ut vitrea lætitia eorum comparetur*. At melior nota Mss. omisso, *eorum*, habent, *ut vitrea lætitia comparetur*, id est acquiratur.

² Editi, *charissimum suis cognatis*; omissa particula *cum*, quam habent manuscriptorum.

CAPUT IV.—*Quam similia sint latrocinis regna absque justitia.*

Reinota itaque justitia, quid sunt regna, nisi magna latrocinia? quia et ipsa ¹ latrocinia quid sunt, nisi parva regna? Manus et ipsa hominum est, imperio ² principis regitur, pacto societatis astringitur, placiti lege praeda dividitur. Hoc malum si in tantum perditorum hominum accessibus crescit, ut et loca teneat, sedes constituat, civitates occupet, populos subjuget, evidentius regni nomen assumit, quod ei jam in manifesto confert non adempta cupiditas, sed addita impunitas. Eleganter enim et veraciter Alexandro illi Magno quidam comprehensus pirata respondit. Nam cum idem rex hominem interrogasset, quid ei videretur, ut mare haberet infestum: ille libera contumacia, *Quod ³ tibi, inquit, ut orbem terrarum: sed quia id ego exiguo navigio facio, latro vocor, quia tu magna classe, imperator (a).*

CAPUT V. — *De fugitivis gladiatoribus, quorum potentia similis fuerit regiae dignitatis.*

Proinde omitto querere quales Romulus congregaverit, quoniam multum eis consultum est, ut ex illa vita, dato sibi consortio civitatis, poenas debitas cogitare desisterent, quarum metus eos in majora facinora propellebat; ut deinceps pacatores essent rebus humanis. Hoc dico, quod ipsum Romanum imperium, jam magnum multis gentibus subjugatis cæterisque terribile, acerbe sensit, graviter timuit, non parvo negotio devitandæ ingentis cladis oppressis ⁴; quando paucissimi gladiatores in Campania de ludo fugientes, exercitum magnum compararunt, tres duces habuerunt, Italiam latissime et crudelissime vastaverunt (b). Dicant quis istos deus adjuverit, ut ex parvo et contemptibili latrocinio pervenirent ad regnum, tantis jam Romanis viribus arcibusque metuendum. An quia non diu fuerunt (c), ideo divinitus negabuntur adjuti? Quasi vero ipsa cujuslibet hominis vita diuturna est. Isto ergo pacto neminem dii adjuvant ad regnandum, quoniam singuli quique cito moriuntur; nec beneficium deputandum est, quod exiguo tempore in unoquoque homine, ac per hoc singillatim utique in omnibus vice vaporis evanescit. Quid enim interest eorum qui sub Romulo deos coluerunt, et olim sunt mortui, quod post eorum mortem Romanum tantum crevit imperium? cum illi apud inferos causas suas agant: utrum bonas, an malas, ad rem presentem non pertinet. Hoc autem de omnibus intelligendum est, qui per ipsum imperium (quamvis decedentibus succedentibusque mortalibus in longa spatia protendatur) paucis diebus vitæ suæ cursum raptimque transierunt, actuum suorum sar-

cinas bajulantes. Sin vero etiam ipsa brevissimi temporis beneficia deorum adjutorio tribuenda sunt, non parum adjuti sunt illi gladiatores, qui servilis conditionis vincula ruperunt, fugerunt, evaserunt, exercitum magnum et fortissimum collegerunt, obediens regum suorum consiliis et jusis, multum Romanæ celsitudini metuendi, et aliquot Romanis imperatoribus insuperabiles multa ceperunt: potiti sunt victoriis plurimis, usi voluptatibus quibus voluerunt; quod suggestit libido, fecerunt: postremo donec vincerentur, quod difficillime est factum, sublimes regnantesque vixerunt. Sed ad majora veniamus.

CAPUT VI. — *De cupiditate Nini regis, qui, ut latius dominaretur, primus intulit bella finitimis.*

Justinus qui græcam, vel potius peregrinam, Trogum Pompeium secutus, non latine tantum, sicut ille, verum etiam breviter scripsit historiam, opus librorum suorum sic incipit: « Principio rerum gentium nationumque imperium penes reges erat, quos ad fastigium hujus majestatis non ambitio popularis, sed spectata inter bonos moderatio provehebat. Populi nullis legibus tenebantur: arbitria principum pro legibus erant ¹. Fines imperii tueri magis quam proferre mos erat: intra suam cuique Patriam regna finiebantur. Primum omnium Ninus, rex Assyriorum, veterem et quasi avitum gentibus morem nova imperii cupiditate mutavit. Hic primus intulit bella finitimis, et rudes adhuc ad resistendum populos ad terminos usque Libyæ perdomuit. » Et paulo post: « Ninus, inquit, magnitudinem quæsitæ dominationis continua possessione firmavit. Domitis igitur proximis, cum accessione virium fortior ad alios transiret, et proxima quæque victoria instrumentum sequentis esset, totius Orientis populos subegit. » Qualibet autem fide rerum, vel iste vel Trogus scripserit (nam quædam illos fuisse mentitos, aliæ fideliores litteræ ostendunt), constat tamen et inter alios scriptores, regnum Assyriorum a Nino rege fuisse longe lateque porrectum. Tam diu autem perseveravit, ut Romanum nondum sit ejus ætatis. Nam sicut scribunt qui chronicam historiam persecuti sunt (a), mille ducentos et quadraginta annos ab anno primo quo Ninus regnare cepit, permansit hoc regnum, donec transferretur ad Medos (b). Inferre

¹ Mss. omittunt, *arbitria principum pro legibus erant.*

(a) Eusebius.

(b) De imperio ab Assyriis ad Medos translato per Arbæ præfectum Medorum, qui Sardanapalum vicit, scripsere Justinus, Diodorus, Plutarchus, Eusebius, etc. Ad ipso anno quo apud Latinos Proca Amulli et Numitoris pater, Avius autem Rhææ Sylvie matris Romuli regnare cepit, contigisse dicit Orosius. Porro imperium penes Medos fuit annis trecentis quinquaginta, usque ad pegeni Astyagem. Tum vero per Cyrum Cambysis filium ad Persas translato est, statitque penes Persas annis ducentis triginta, usque ad Alexandrum Philippi filium. Hujus regnum brevissimum tempore dicit Augustinus, vel quia ille annos post eversum Persarum regnum paucos imperavit, vel quia Macedonicum seu Græcum imperium ab Alexandro conditum anno ante Christum 331 vix servavit successores ejus usque ad Seleucum et Antiochum fratres, id est, ad annum ante Christum fere 246, quo tempore, usurpato per Arsacem principatum, regnum Parthorum exortum est. Hoc autem mansit usque ad annum post Christum circiter 226, Alexandri severi Cæsaris quintum, quo Artaxerxes Persa, devictis Parthis, Persarum instauravit imperium, quod etiam ætate Augustini durabat.

¹ Vox, ipsa, abest ab omnibus nostris Codd. M.

² Sic Mss. At Lov., *Manus etenim ipsa hominum est, cum imperio, etc.*

³ Ediu, quid. At Mss., quod.

⁴ Edili, *oppressum*. At Mss., *oppressit*: ut sensus sit, *stud belli servilis monstrum fuisse a Romano imperio oppressum, non facili negotio.*

(a) Refert Nonius Marcell. ex Cicer. 3 de Republica.

(b) Liv. lib. 95; Plutarch. in Crasso; Oro. ius lib. 5, cap. 24, et Augustin. supra, lib. 3, cap. 26.

(c) Anno belli servilis tertio delati sunt a M. Licinio Crasso.

autem bella finitimis, et inde in cætera procedere, ac populos sibi non molestos sola regni cupiditate conterere et subdere, quid aliud quam grande latrocinium nominandum est?

CAPUT VII. — *An regna terrena inter profectus suos atque defectus deorum vel iuventur vel deserantur auxilio.*

Si nullo deorum adjutorio tam magnum hoc regnum et protixum fuit, quare diis Romanis tribuitur Romanum regnum locis amplum temporibusque diuturnum? Quæcumque enim causa est illa, eadem est etiam ista. Si autem et illud deorum adjutorio tribuendum esse contendat, quæro quorum. Non enim aliæ gentes, quas Ninus domuit et subegit, alios tunc colebant deos. Aut si proprios habuerunt Assyrii, quasi peritiores fabros imperii construendi atque servandi, numquidnam mortui sunt, quando et ipsi imperium perdididerunt, aut mercede non sibi reddita, vel alia promissa majore, ad Medos transire maluerunt, atque inde rursus ad Persas, Cyro invitante et aliquid commodius pollicente? Quæ gens non angustis Orientis finibus, post Alexandri Macedonis regnum magnum locis, sed brevissimum tempore, in suo regno adhuc usque perdurat. Hoc si ita est, aut infideles dii sunt, qui suos deserunt, et ad hostes transeunt; quod nec homo fecit Canillus, quando victor et expugnator adversissimæ civitatis, Romam, cui vicerat, sensit ingrati, quam tamen postea oblitus injuriæ, memor patriæ, a Gallis iterum liberavit: aut non ita fortes sunt, ut deos esse fortes deest, qui possunt humanis vel consiliis vel viribus vinci. Aut si, cum inter se belligerant, non dii ab hominibus, sed dii ab aliis diis forte vincuntur, qui sunt quarumque proprii civitatum; habent ergo et ipsi inter se inimicitias, quas pro sua quisque parte suscipiunt. Non itaque deos suos debuit colere civitas magis, quam alios, a quibus adjuvantur sui. Postremo, quoquo modo se habeat deorum iste vel transitus, vel fuga, vel migratio, vel in pugna defectio, nondum illis temporibus atque in illis terrarum partibus Christi nomen fuerat prædicatum, quando illa regna per ingentes bellicas clades amissa atque translata sunt. Nam si post mille ducentos et quod excurret annos, quando regnum Assyriis ablatum est, jam ibi christiana religio aliud regnum prædicaret æternum, et deorum falsorum cultus sacrilegos inhiberet; quid aliud gentis illius vani homines dicerent, nisi regnum, quod tam diu conservatum est, nulla alia causa nisi suis religionibus desertis et illa recepta perire potuisse? In qua voce vanitatis, quæ poterat esse, isti attendant speculum suum; et similia conqueri, si ullus in eis pudor est, erubescant. Quamquam Romanum imperium afflictum est potius, quam mutatum; quod et aliis ante Christi nomen temporibus ei contigit: et ab illa est afflictione re-creatum; quod nec istis temporibus desperandum est. Quis enim de hac re novit voluntatem Dei?

CAPUT VIII. — *Quorum deorum præsidio putent Romani imperium suum auctum atque servatum, cum singulis vix singularum rerum tuitionem committendam esse crediderint.*

Deinde quæramus, si placet, ex tanta deorum turba, quam Romani colebant, quem potissimum, vel quos deos credant illud imperium dilatasse atque servasse. Neque enim in hoc tam præclaro opere et tantæ plenissimo dignitatis audent aliquas partes deæ Cloacina¹ (a) tribuere; aut Volupia, quæ a voluptate appellata est; aut Lubentina, cui nomen est a libidine; aut Vaticano² qui infantum vagitibus præsidet; aut Cunina, quæ cunas eorum administrat. Quando autem possunt uno loco libri hujus commemorari omnia nomina deorum, aut deorum³, quæ illi grandibus voluminibus vix comprehendere potuerunt, singulis rebus propria dispertientes officia numinum? Nec agrorum munus uni alicui deo committendum arbitrati sunt; sed rura deæ Rusina, juga montium deo Jugatino (b); collibus deam Collatinam, vallibus Valloniam præfecerunt. Nec saltem potuerunt unam Segetiam talem invenire, cui semel segetes commenderent: sed sata frumenta quamdiu sub terra essent, præpositam voluerunt habere deam Sejam; cum vero jam essent super terram et segetem facerent, deam Segetiam; frumentis vero collectis atque reconditis, ut tuto servarentur, deam Tutilinam præposuerunt. Cui non sufficere videretur illa Segetia, quamdiu seges ab initiis herbidis usque ad aristas aridas perveniret? Non tamen satis fuit hominibus deorum multitudinem amantibus, ut anima misera dæmoniorum turbæ prostitueretur, unius Dei vericæstum dedignata complexum. Præfecerunt ergo Proserpinam frumentis germinantibus (c), geniculis nodisque culmorum deum Nodotum, involumentis folliculorum deam Volutinam; cum folliculi patescunt, ut spica exeat, deam Patelanam⁴; cum segetes novis aristis æquantur, quia veteres æquare hostire dixerunt, deam Hostilinam⁵; florentibus frumentis deam Floram, lactescentibus deam Lacturnum⁶, mature-scentibus deam Matutam⁷; cum runcantur, id est a terra auferuntur, deam Runcinam. Nec omnia commemoro, quia me piget quod illos non pudet. Hæc

¹ Lov. et probæ notæ manuscripti, *Cloacina*. Alii veteres libri cum Vind. Am. Er., *Cloacina*. Lactantius, l. 1 de falsa Relig., c. 20: « Cloacina simulacrum, inquit, in cloaca maxima reperit Tullius (is est qui regnavit cum Romulo) consecravit, et quia cujus esset effigies ignorabat, ex loco illi nomen imposuit. » Consentit Cyprianus de Idolorum vanitate, et ipse Augustinus, infra, c. 25. Fuit et Venus, *Cloacina dista a cluere*, quod est purgare, de qua Plin. lib. 15, c. 29.

² Vind. Am. Er. et aliquot Mss., *Vagitum*.

³ Omnes nostri Mss., et *deorum*.

⁴ Sic Mss. At editi, *Patelenam*.

⁵ Nostri omnes Mss. sic habent hunc locum, *ostire dixerunt, deam Ostitinam*. M.

⁶ Vind. Am. et Lov., *deam Lacturciam*. Sed veteribus libris, quos isthic sequimur, faveo Servius in Georg. 1, *Lactantem deum*, non deam, et Varrone appellans.

⁷ Vind. Am. et Er., *Maturam*. At meliores Mss. cum Lov., *Matucm*.

autem paucissima ideo dixi, ut intelligeretur nullo modo eos dicere audere ista numina imperium constituisse, auxisse, conservasse Romanum, quæ ita suis quæque adhibebantur officiis, ut nihil universum unum alicui crederetur. Quando ergo Segetia curaret imperium, cui curam gerere simul et segetibus et arboribus non licebat? Quando de armis Cunina cogitaret, cujus præpositura parvulorum cunas non permittebatur excedere? Quando Nodutus adjuvaret in bello, qui nec ad folliculum spicæ, sed tantum ad nodum geniculi pertinebat? Unum quisque domui suæ ponit ostiarium, et quia homo est, omnino sufficit: tres deos isti posuerunt, Forculum foribus, Cardeam¹ cardini, Limentinum limini (a). Ita non poterat Forculus simul et cardinem limenque servare.

CAPUT IX. — *An imperii Romani amplitudo et diurnitas Jovi fuerit adscribenda, quem summum deum cultores ipsius opinantur.*

Omissa igitur ista turba minorum deorum, vel aliquantum intermissa, officium majorum deorum debemus inquirere, quo Roma tam magna facta est, ut tamdiu tot gentibus imperaret. Nimirum ergo Jovis hoc opus est. Ipsum enim deorum omnium deorumque regem esse voluit²: hoc ejus indicat sceptrum, hoc in alto colle Capitolium. De isto deo, quamvis a poeta, dictum convenientissime prædicant,

Jovis omnia plena.
(Virgil. Eclog. 3, vers. 60.)

Hunc Varro credit etiam ab his coli, qui unum Deum solum sine simulacro colunt, sed alio nomine nuncupari. Quod si ita est, cur tam male tractatus est Romæ (sicut quidem et in cæteris gentibus), ut ei fieret simulacrum? Quod ipsi etiam Varroni ita displicet, ut cum tantæ civitatis perversa consuetudine premeretur, nequaquam tamen dicere et scribere dubitaret quod hi qui populis instituerunt simulacra, et metum dempserunt, et errorem addiderunt.

CAPUT X. — *Quas opiniones secuti sint, qui diversos deos diversis mundi partibus præfecerunt.*

Cur illi etiam Juno nxor adjungitur, quæ dicitur soror et conjux (Virgil., Æneid., lib. 1, vers. 47)? Quia Jovem, inquit, in æthere accipimus, in aere Junonem; et hæc duo elementa conjuncta sunt, alterum superius, alterum inferius. Non est ergo ille de quo dictum est,

Jovis omnia plena;

si aliquam partem implet et Juno. An uterque utrumque implet, et ambo isti conjuges et in duobus istis elementis, et in singulis simul sunt? Cur ergo æther datur Jovi, aer Junoni? Postremo ipsi duo³ satis essent: quid est quod mare Neptuno tribuitur, terra Plutoni? Et ne ipsi quoque sine conjugibus remane-

¹ Sic habent omnes libri. *Carnam* mallet Ludovicus Vives. Eadem ipsa, *Carna* et *Craue* vocatur ab Ovidio Fast. l. 6, v. 101, 102.

² Quædam exemplaria præbent, *regem completorem voluit*.

³ Editi, si ipsi duo. Abest, si, a Mss.

(a) *Cardeæ*. *Carna*, ab Ovidio, Fastorum lib. 6, vers. 101, 102.

rent, additur Neptuno Salacia, Plutoni Proserpina. Nam sicut inferiorem cœli partem, id est aerem, inquit, Juno tenet; ita inferiorem maris Salacia, et terræ inferiorem Proserpina. Quærunť quemadmodum sarciant fabulas, nec inveniunt. Si enim hæc ita essent, tria potius elementa mundi esse, non quatuor, eorum veteres proderent, ut singula deorum conjugia singulis dividerentur elementis. Nunc vero omni modo affirmaverunt, aliud esse ætherem, aliud aerem. Aqua vero sive superior, sive inferior, utique aqua est: puta quia dissimilis, numquid in tantum ut aqua non sit? Et inferior terra, quid aliud potest esse quam terra, quantalibet diversitate distincta? Deinde ecce jam totus in his quatuor vel tribus elementis corporeus completus est mundus: Minerva ubi erit? quid tenebit? quid implebit? Simul enim cum his in Capitolio constituta est, cum ista filia non sit amborum. Aut si ætheris partem superiorem Minervam tenere dicunt, et hac occasione fingere poetas quod de Jovis capite nata sit; cur non ergo ipsa potius deorum regina deputatur, quod sit Jove superior? an quia indignum erat præponere patri filiam? Cur non de Jove ipso erga Saturnum justitia ista servata est? an quia victus est? Ergo pugnarunt? Absit, inquit: fabularum est ista garrulitas. Ecce fabulis non credatur, et de diis sentiantur meliora: cur ergo non data est patri Jovis, etsi non sublimior, æqualis certe sedes honoris? Quia Saturnus, inquit, temporis longitudo est (a). Tempus igitur colunt, qui Saturnum colunt, et rex deorum Jupiter insinuator natus ex tempore. Quid enim indignum dicitur, cum Jupiter et Juno nati dicuntur ex tempore, si cœlum est ille et illa terra, cum facta sint utique cœlum et terra? Nam hoc quoque in libris suis habent eorum docti atque sapientes: neque de figmentis poeticis, sed de philosophorum libris a Virgilio dictum est,

Tum patet omnipotens fecundis imbribus æther,
Conjugis in lætæ gremium descendit,
(Virgil. Georg. lib. 2, vers. 325, 326.)

id est in gremium telluris aut terræ. Quia et hic aliquas differentias volunt esse, atque in ipsa terra aliud Terram, aliud Tellurem, aliud Tellumonem putant (b). Et hos omnes deos habent suis nominibus appellatos, suis officiis distinctos, suis aris sacrisque veneratos. Eandem Terram etiam matrem deorum vocant: ut jam poætæ tolerabiliora conſingant, si secundum istorum, non poeticos, sed sacrorum libros, non solum Juno soror et conjux, sed etiam mater est Jovis (c). Eandem terram Cererem, eandem etiam Vestam voluit: cum tamen sæpius Vestam non nisi ignem esse perhibeant (d), pertinentem ad focos, sine quibus civitas

(a) Cicero de Nat. deor., lib. 2, cap. 25.

(b) Terram ipsum elementum, Tellurem deam a vi passiva terræ inherente, quasi feminam, et Tellumonem deum a vi activa, quasi marem appellabant. Vide in ra, lib. 7, cap. 25.

(c) Hæc est argumentatio Augustini: Terra, si poëtis Gentilium credimus, vel etiam interpretationi eorum mysticæ, qua fabulæ ejusmodi involvunt, ipsa Juno est: at Terra mater est omnium deorum; ergo Juno est etiam mater Jovis. COGNEUS.

(d) Ovid. Fast. 6, v. 299; Cicero 2 de Leg.

esse non potest; et ideo illi virgines solere servire, quod sicut ex virgine, ita nihil ex igne nascatur. Quam totam aboleri vanitatem et extinguere utique ab illo oportuit, qui est natus ex Virgine. Quis enim ferat, quod cum tantum honoris et quasi castitatis igni tribuerint, aliquando Vestam non erubescunt etiam Venerem dicere, ut vanescat in ancillis ejus honorata virginitas? Si enim Vesta Venus est, quomodo ei rite virgines a venereis operibus abstinendo servierunt? An Veneres duæ sunt, una virgo, altera mulier? an potius tres, una virginum, quæ etiam Vesta est, alia conjugatarum, alia meretricum? Cui etiam Phœnices donum dabant de prostitutione filiarum, antequam jungerent eas viris (a). Quæ illarum est matrôna Vulcani? Non utique virgo, quoniam habet maritum. Absit autem ut meretrix, ne filio Junonis et cooperario Minervæ facere videamur injuriam (b). Ergo hæc ad conjugatas intelligitur pertinere: sed eam nolumus imitentur in eo quod fecit illa cum Marte. Rursus, inquit, ad fabulas redis. Quæ ista justitia est, nobis succensere, quod talia dicimus de diis eorum; et sibi non succensere, qui hæc in theatris libentissime spectant crimina deorum suorum? Et quod esset incredibile, nisi contestatissime probaretur, hæc ipsa theatra crimina deorum suorum in honorem instituta sunt¹ eorumdem deorum.

CAPUT XI. — *De multis diis, quos doctores Paganorum unum eundemque Jovem esse defendunt.*

Quotquot libet² igitur physicis rationibus et disputationibus asserant: modo sit Jupiter corporei hujus mundi animus, qui universam istam molem ex quatuor, vel quot eis placet, elementis constructam atque compactam implet et movet (c); modo inde suas partes sorori et fratribus cedat: modo sit æther, ut aerem Junonem subteriusam desuper amplectatur; modo totum simul cum aere sit ipse cælum, terram vero tanquam conjugem eandemque matrem (quia hoc in divinis turpe non est) fecundis imbribus et seminibus fetet; modo autem (ne sit necesse per cuncta discurre) deus unus, de quo multi a poeta nobilissimo dictum putant,

Deum namque ire per omnes
Terrasque, tractusque maris, cœlumque profundum:
(Virgil. Georg. lib. 4, vers. 221, 222.)

ipse in æthere sit Jupiter, ipse in aëre Juno, ipse in mari Neptunus, in inferioribus etiam maris ipse Salacia, in terra Pluto, in terra inferiore Proserpina, in focis domesticis Vesta, in fabricarum fornace Vulcanus, in sideribus sol et luna et stellæ, in divinantibus Apollo, in merce Mercurius, in Jano initiator³, in Termino terminator, Saturnus in tempore, Mars et

¹ Editi, *instituta esse*; dissidentibus manuscriptis.

² Manuscripti pauci, *quodlibet*. Plerique ferunt, *quodlibet*.

³ Observat Ludovicus Vives legi aliter in libris, *Janitor*. In omnibus tamen quos inspeximus est, *initiator*. Sic etiam nostri MSS. M.

(a) De Phœnicibus hoc tradunt Eusebius, de Præparatione evangelica, lib. 1, cap. 10, ex Sanchoniathone; Athanasius in Oratione contra Gentiles; de Armeniis, Cypriis, Lydis alii scriptores. Cœcilius.

(b) Vulcano Junonis ex Jove filio, Minervæ autem artium deæ cooperario, quia instrumentis artium cudendis præfecto. Vid. Platonem in Critia.

(c) Vide infra, lib. 7, cap. 6.

Bellona in bellis, Liber in vineis, Ceres in frumentis, Diana in silvis, Minerva in ingenii: ipse sit postrêmo etiam in illa turba quasi plebeiorum deorum: ipse præsit nomine Liberi virorum seminibus, et nomine Liberæ feminarum (a): ipse sit Diespiter, qui partum perducit ad diem; ipse sit dea Mena, quam præfecerunt menstruis feminarum; ipse Lucina, quæ a parturientibus invocetur: ipse opem ferat nascentibus, excipiendo eos sinu terræ, et vocetur Opis; ipse in vagitu os aperiat, et vocetur deus Vaticanus: ipse levet de terra, et vocetur dea Levana; ipse cunas tueatur, et vocetur dea Cunina: non sit alius, sed ipse in deabus illis, quæ fata nascentibus canunt, et vocantur Carmentes (b): præsit fortuitis, voceturque Fortuna: in diva Rumina mammam parvulo immulgeat, quia rumam dixerunt veteres mammam; in diva Potina potionem ministret; in diva Educa⁴ escam præbeat: de pavore infantum Paventia nunc cupetur (c); de spe quæ venit, Venilia; de voluptate Volupia; de actu Agenoria; de stimulis, quibus ad nimium actum homo impellitur, dea Stimula nominetur, Strenia⁵ dea sit, strenuum faciendo; Numeria, quæ numerare doceat; Camœna, quæ canere: ipse sit et deus Consus, præbendo consilia; et dea Sentia, sententias inspirando: ipse dea Juventas, quæ post prætextam (d) excipiat juvenilis ætatis exordia: ipse sit et Fortuna Barbata, quæ adultos barba induat; quos honorare noluerunt⁶, ut hoc qualecumque numen saltem masculinum deum, vel a barba Barbatum, sicut a nodis Noduum, vel certe non Fortunam, sed quia barbas habet, Fortunium nominarent: ipse in Jugatino deo conjuges jungat; et cum virgini uxori zona solvitur, ipse invocetur, et dea Virginiensis⁷ vocetur: ipse sit Mutanus vel Tutuanus⁸, qui est apud Græcos Priapus: si non pudet, hæc omnia quæ dixi, et quæcumque non dixi (non enim omnia dicenda arbitratus sum), hi omnes dii deæque sūt unus Jupiter: sive sint, ut quidam volunt, omnia ista partes ejus, sive virtutes ejus, sicut eis videtur, quibus eum placet esse mundi animum; quæ sententia velut magnorum multumque doctorum est. Hæc si ita sint (quod quale sit, nondum interim quæro), quid

¹ Mss. plures, *Diespater*; alii, *Dispater*, vel *Ditispater*.

² Vind. Am. et Er., *Educa*.

³ Ita in Mss. hic et infra, cap. 16. In editis vero, *Strenua*.

⁴ Editi, *voluerit*. Melius Mss., *noluerunt*: referendo ad eos qui adultis, *Barbatam* colendam deam, non deum instituerunt.

⁵ Sic Mss. At editi, *Virginensis*.

⁶ Vind. Am. Er. et nonnulli Mss., *Nolanus*. Lov. cum aliquot etiam Mss., *Mutinus*. Plerique vero veteres libri, *Mutinus*: quibus consentiunt Arnobius lib. 4, et Lactantius lib. 1 de falsa Relig., c. 20. Postea Am. et Er. subjiciunt, *vel Tutinus*. Vind., *vel Tutumus*, Pauci Mss., *vel Tuturius*. Omnes prope alii, *vel Tutianus*. Hoc tamen Lovanienses, Ludovici Vives conjecturam secuti, omiserunt. Arnol., lib. 4. adversus Gentes: « Et quia non suppli⁹ ces Mutuno procumbimus, atque Tutuno, » etc.

(a) De his infra, lib. 6, cap. 9.

(b) Carmentes apud A. Gellium, lib. 16, cap. 16, duæ, *Postueria* et *Prosa* nominatæ.

(c) *Paventina* apud Tertull., ad Nationes, lib. 2, cap. 11.

(d) *Vetus* codex Faurensis in interlineari spatio addit, *post xv annos*. Glossema non ineptum. *Prætextam* enim vocabant togam purpura circumtextam, qua non magistratus tantum, sed etiam pueri utebantur usque ad pubertatem, quo tempore togam virilem induebant.

perderent, si unum Deum colerent prudentiore compendio? Quid enim ejus contemneretur, cum ipse coleretur? Si autem metuendum fuit, ne prætermittæ sive neglectæ partes ejus irascerentur: non ergo et volunt, velut unius animantis hæc tota vita est, quæ omnes continet deos, quasi suas virtutes, vel membra, vel partes; sed suam quæque pars habet vitam a cæteris separatam, si præter alteram irasci altera potest, et alia placari, alia concitari. Si autem dicitur omnes simul, id est totum ipsum Jovem potuisse offendi, si partes ejus non etiam singillatim minutatimque colerentur, stulte dicitur. Nulla quippe earum præmitteretur, cum ipse unus qui habet omnia, coleretur. Nam ut alia omittam, quæ sunt innumerabilia, cum dicunt omnia sidera partes Jovis esse, et omnia vivere atque rationales animas habere, et ideo sine controversia deos esse, non vident quam multos non colant, quam multis ædes non construant, aras non statuunt, quas tamen¹ paucissimis siderum statuendas esse putaverunt, et singillatim sacrificandum. Si igitur, irascuntur qui non singillatim coluntur, non metuunt, paucis placatis, toto cælo irato vivere? Si autem stellas omnes ideo colunt, quia in Jove sunt quem colunt, isto compendio possent in illo uno omnibus supplicare. Sic enim nemo irasceretur, cum in illo uno² nemo contemneretur, potius quam, cultis quibusdam, justa irascendi causa illis, qui prætermitti essent, multo numerosioribus præberetur: præsertim cum eis de superna sede fulgentibus, turpi nuditate distentus præponeretur Priapus.

CAPUT XII. — *De opinionibus eorum qui Deum animam mundi, et mundum corpus Dei esse putaverunt.*

Quid illud, nonne debet movere acutos homines, vel qualescumque homines? Non enim ad hoc ingenii opus est excellentia, ut deposito studio contentionis attendant, si mundi animus Deus est, eique animo mundus ut corpus est, ut sit unum animal constans ex animo et corpore, atque iste Deus est sinu quodam³ naturæ in se ipso continens omnia, ut ex ipsius anima, qua vivificatur tota ista moles, vitæ atque animæ cunctorum viventium pro cuiusque nascentis⁴ sorte sumantur, nihil omnino remanere⁵, quod non sit pars Dei. Quod si ita est, quis non videat quanta impietas et irreligiositas consequatur, ut quod calcaverit quisque, partem Dei calcet, et in omni animante occidendo, pars Dei trucidetur? Nolo omnia dicere quæ possunt occurrere cogitantibus, dici autem sine verrecundia non possunt.

CAPUT XIII. — *De his qui sola rationalia animantia partes esse unius Dei asserunt.*

Si autem sola animalia rationalia, sicut sunt homines, partes Dei esse contendunt; non video quidem, si totus mundus est Deus, quomodo bestias ab ejus partibus separent. Sed oblitari quid opus est? De ipso rationali animante, id est homine, quid in-

¹ Forte, tam.

² Hic editi addunt, omnibus supplicaretur. Abest a manuscriptis.

³ Sic omnes Mss. Editi autem, sinu quâdam.

⁴ Veteres libri, nascendi. — Sic etiam nostri Mss. M.

⁵ Vind. Am. Er., remanere potest. Lov., remanere posse. Abest, posse, a Mss.

feliciter credi potest, quam Dei partem vapulare, cum puer vapulat? Jam vero partes Dei fieri lascivas, iniquas, impias, atque omnino damnabiles, quis ferre possit, nisi qui prorsus insanit? Postremo quid irascitur eis a quibus non colitur, cum a suis partibus non colatur? Restat ergo ut dicant, omnes deos suas habere vitas, sibi quemque vivere, nullum eorum esse partem ejusquam; sed omnes colendos, qui cognosci et coli possunt; quia tam multi sunt, ut omnes non possint. Quorum Jupiter, quia rex præsidet, ipsum credo ab eis putari regnum constituisse, vel auxisse Romanum. Nam si hoc ipse non fecit, quem alium deum opus tam magnum potuisse aggredi credant, cum omnes occupati sint officiis et operibus propriis, nec alter¹ irruat in alterius? A rege igitur deorum regnum hominum potuit propagari et augeri.

CAPUT XIV. — *Augmentum regnorum Jovi incongruenter adscribi: cum, si Victoria, ut volunt, dea est, ipsa huic negotio sola sufficeret.*

Hic primum quæro, cur non etiam ipsum regnum aliquis deus est? Cur enim non ita sit, si Victoria dea est? Aut quid ipso Jove in hac causa opus est, si Victoria favet sitque propitia, et semper eat ad illos, quos vult esse victores? Hac dea favente et propitia, etiam Jove vacante vel aliud agente, quæ gentes non subditæ remanent? quæ regna non cederent? An forte displicet² bonis, iniquissima improbitate pugnare, et finitimos quietos nullamque injuriam facientes ad dilatandum regnum bello spontaneo provocare? Plane si ita sentiunt, approbo et laudo.

CAPUT XV. — *An congruat bonis latius velle regnare.*

Videant ergo ne forte non pertineat ad viros bonos, gaudere de regni latitudine. Iniquitas enim eorum, cum quibus justa bella gesta sunt, regnum adjuvit ut cresceret: quod utique parvum esset, si quies et justitia finitimorum contra se bellum geri nulla provocaret injuria: ac sic felicioribus rebus humanis omnia regna parva essent concordii vicinitate lætantia; et ita essent in mundo regna plurima gentium, ut sunt in urbe domus plurimæ civium. Proinde belligerare et perdomitis gentibus dilatare regnum, malis videtur felicitas, bonis necessitas. Sed quia pejus esset, ut injuriosi justioribus dominarentur, ideo non incongrue dicitur etiam ista felicitas. Sed procul dubio felicitas major est, vicinum bonum habere concordem, quam vicinum malum subjugare bellantem. Mala vota sunt, optare habere quem oderis, vel quem timeas, ut possit esse quem vincas. Si ergo justa gerendo bella, non impia, non iniqua, Romani imperium tam magnum acquirere poterunt, namquid tanquam aliqua dea colenda est eis etiam iniquitas aliena? Multum enim ad istam latitudinem imperii eam cooperatam videmus, quæ faciebat injuriosos, ut essent cum quibus justa bella gererentur, et augetur imperium. Cur

¹ Lov., ne alter; dissentientibus editis aliis et manuscriptis.

² Vind. Am. Er., non displicet. Expuncta est negatio auctoritate manuscriptorum.

autem et iniquitas dea non sit, vel externarum gentium, si Pavor et Pallor et Febris dii Romani esse meruerunt? His igitur duabus, id est aliena iniquitate et dea Victoria, dum bellorum causas iniquitas excitat, Victoria eadem bella feliciter terminat, etiam feriato Jove crevit imperium. Quas enim hic partes Jupiter haberet, cum ea quæ possent beneficia ejus putari, dii habentur, dii vocantur, dii coluntur, ipsi pro suis partibus invocantur? Haberet autem hic etiam ille aliquam partem, si regnum etiam ipse appellaretur, sicut appellatur illa Victoria. Aut si regnum nuntus est Jovis, cur non et victoria manus ejus habeatur? Quod profecto haberetur, si non lapis in Capitolio (a), sed verus Rex regum et Dominus dominantium (*Apoc. xix, 16*) cognosceretur atque coleretur.

CAPUT XVI. — *Quid fuerit quod Romani omnibus rebus et omnibus motibus deos singulos deputantes, eodem Quietis extra portas esse voluerunt.*

Miror autem plurimum, quod cum deos singulos singulis rebus et pene singulis motibus attribuerent, vocaverunt deam Agenoriam, quæ ad agendum excitaret; deam Stimulam, quæ ad agendum ultra modum stimulare; deam Murciam, quæ præter modum non moveret, ac faceret hominem, ut ait Pomponius, murcidum, id est nimis desidiosum et inactuosum (b); deam Streniam, quæ faceret strenuum; his omnibus diis et deabus publica sacra facere susceperunt: Quietem vero appellantes, quæ faceret quietum, cum sedem haberet extra portam Collinam, publice illam suscipere noluerunt. Utrum indicium fuit animi inquieti, an potius ita significatum est, qui illam turbam colere perseveraret, non plane deorum, sed dæmoniorum, eum quietem habere non posse? ad quam vocat verus Medicus, dicens: *Dicite a me quia mitis sum et humilis corde, et invenietis requiem animabus vestris* (*Matth. xi, 29*).

CAPUT XVII. — *An, si Jovis summa potestas est, etiam Victoria dea debuerit æstimari.*

An forte dicunt, quod deam Victoriam Jupiter mittat, atque illa tanquam regi deorum obtemperans, ad quos jusserit veniat, et in eorum parte considat? Hoc vere dicitur, non de illo Jove, quem deorum regem pro sua opinione consingunt; sed de illo vero Rege sæculorum, quod mittat non Victoriam, quæ nulla substantia est, sed angelum suum, et faciat vincere quem voluerit; cujus consilium occultum esse potest, iniquum non potest¹. Nam si victoria dea est, cur non deus est et triumphus, et victoriæ jungitur vel maritus, vel frater, vel filius? Talia quippe isti de diis opinati sunt, qualia si poetæ fingerent, atque a nobis exagitantur; responderent isti, ridenda esse signimenta poetarum, non veris attribuenda numinibus: et

¹ Er. Lugd. Ven. Lov., *cujus consilium occultum esse potest, iniquum esse non potest.* M.

(a) vide supra, lib. 2, cap. 20, n. 1.

(b) Quis Pomponius sit, ignoratur: an Atticus, an L. Pomponius Atellanarum scriptor, an Cn. Pomponius orator, qui omnes vixerunt cum Cicerone; an qui post Ciceronem fuisse, Pomponius Mela, an Julius Pomponius, poeta tragicus, cujus Quintilianus meminit, an jurisconsultus. L. C. VIVES.

tamen se ipsi non ridebant cum talia deliramenta non apud poetas legebant, sed in templis colebant. Jovem igitur de omnibus rogarent, ei uni tantummodo supplicarent. Non enim, quo misisset Victoriam, si dea est et sub illo rege est, posset ei audere resistere, et suam potius facere voluntatem.

CAPUT XVIII. — *Felicitatem et Fortunam qui deus putant, qua ratione secernunt¹.*

Quid quod et Felicitas dea est? ædem accepit, aram meruit, sacra ei congrua persoluta sunt. Ipsa ergo sola coleretur: ubi enim ipsa esset, quid boni non esset? Sed quid sibi vult, quod et Fortuna dea putatur, et colitur? An aliud est felicitas, aliud fortuna? Quia fortuna potest esse et mala: felicitas autem si mala fuerit, felicitas non erit. Certe omnes deos utriusque sexus (si et sexum habent) non nisi bonos existimare debemus. Hoc Plato dicit (*De Republica, lib. 2*), hoc alii philosophi, hoc excellentes reipublicæ populorumque rectores. Quomodo ergo dea Fortuna aliquando bona est, aliquando mala? An forte quando mala est, dea non est, sed in malignum dæmonem repente convertitur? Quot sunt ergo deæ istæ? Profecto quotquot homines fortunati, hoc est bonæ fortunæ. Nam cum sint et alii plurimi simul, hoc est uno tempore, malæ fortunæ, numquid, si ipsa esset, simul et mala esset et bona; his aliud, illis aliud? An illa quæ dea est, semper bona est? Ipsa est ergo Felicitas: cur adhibentur duo nomina? Sed hoc ferendum est: solet enim et una res duobus nominibus appellari. Quid diversæ ædes, diversæ aræ, diversa sacra? Est causa, inquit: quia felicitas illa est, quam boni habent præcedentibus meritis; fortuna vero quæ dicitur bona, sine ullo examine meritorum fortuito accidit hominibus et bonis et malis, unde etiam fortuna nominatur. Quomodo ergo bona est, quæ sine ullo judicio venit et ad bonos et ad malos? Ut quid autem colitur, quæ ita cæca est, passim in quoslibet incurrens, ut suos cultores plerumque prætereat, et suis contemptoribus hæreat? Aut si aliquid proficiunt cultores ejus, ut ab illa videantur et amentur, jam merita sequitur, non fortuito venit. Ubi est ergo² definitio illa fortunæ? ubi est quod a fortuitis etiam nomen accepit? Nihil enim prodest eam colere, si fortuna est. Si autem suos cultores discernit, ut prosit, fortuna non est. An et ipsam, quo voluerit, Jupiter mittit? Colatur ergo ipse solus: non enim potest ei jubenti et eam quo voluerit mittenti Fortuna resistere. Aut certe istam mali colant, qui nolunt habere merita, quibus possit Dea Felicitas invitari.

CAPUT XIX. — *De Fortuna muliebri.*

Tantum sane huic, velat numini tribuunt, quam Fortunam vocant, ut simulacrum ejus, quod a matronis dedicatum est (et appellata est Fortuna muliebri [*Liv. l. 2*]), etiam locutum esse memoriam commendaverint (*Plutarch. in Coriolano et lib. de Fortuna Roman.*), atque dixisse non senel, sed iterum, quod eam rite matronæ dedicaverint. Quod quidem si

¹ Sic Mss. At editi, *secernunt*.

² Abest, ergo, ab omnibus nostris Mss. M.

verum sit, mirari nos non oportet. Non enim malignis dæmonibus etiam sic difficile est fallere, quorum artes atque versutias hinc potius isti advertere debuerunt, quod illa dea locuta est, quæ fortuito accidit, non quæ meritis venit. Fuit enim Fortuna loquax, et muta Felicitas; ut quid aliud¹, nisi ut homines recte vivere non curarent, conciliata sibi Fortuna, quæ illos sine ullis bonis meritis faceret fortunatos? Et certe si Fortuna loquitur, non saltem muliebris, sed virilis potius loqueretur, ut non ipsæ, quæ simulacrum dedicaverunt, putarentur tantum miraculum muliebri loquacitate finxisse.

CAPUT XX. — *De Virtute et Fide, quas Pagani tem-
plis et sacris honoraverunt, præmittentes alia bona,
quæ similiter colenda fuerunt, si recte aliis² divinitas
tribuebatur.*

Virtutem quoque deam fecerunt: quæ quidem si dea esset, multis fuerat præferenda. Et nunc quia dea non est, sed donum Dei est, ipsa ab illo impetretur, a quo solo dari potest: et omnis falsorum deorum turba vanescet. Sed cur et Fides, dea credita est, et accepit etiam ipsa templum et altare? Quam quisquis prudenter agnoscit, habitaculum illi se ipsum facit. Unde autem sciunt illi quid sit fides cujus primum et maximum officium est, ut in verum credatur Deum? Sed cur non suffecerat virtus? nonne ibi est et fides? Quando quidem virtutem in quatuor species distribuendam esse viderunt, prudentiam, justitiam, fortitudinem, temperantiam. Et quoniam istæ singulæ species suas habent, in partibus justitiæ fides est; maximumque locum apud nos habet, quicumque scimus quid sit, quod justus ex fide vivit (*Habac. 11, 4*). Sed illos miror appetitores multitudinis deorum, si fides dea est, quare aliis tam multis deabus injuriam fecerint præmittendo eas, quibus similiter ædes et aras dedicare potuerunt? Cur temperantia dea esse non meruit, cum ejus nomine nonnulli Romani principes non parvam gloriam compararint? Cur denique fortitudo dea non est, quæ adfuit Mucio (*a*), cum dexteram porrexit in flammam; quæ adfuit Curtio (*b*), cum se pro patria in abruptam terram præcipitem dedit; quæ adfuit Decio patri (*c*), et Decio filio (*d*), cum pro exercitu se voverunt? Si tamen his omnibus vera inerat fortitudo, unde modo non agitur. Quare prudentia, quare sapientia nulla numinum loca meruerunt? an quia in nomine generali ipsius virtutis omnes coluntur? Sic ergo posset et unus Deus coli, cujus partes cæteri dii putantur. Sed in illa una virtute et fides est, et pudicitia, quæ tamen extra in ædibus propriis altaria meruerunt.

CAPUT XXI. — *Quod dona non intelligentes Dei, Vir-
tute saltem³ et Felicitate debuissent esse contenti.*

Has deas non veritas, sed vanitas fecit: hæc enim

¹ In B., et ad quid. M.

² Forte, illis. M.

³ Editi: Quod unum non intelligentes Deum, virtute saltem.

(a) Mucius dictus scævola. Liv. lib. 2, cap. 12.

(b) Livius, lib. 7, cap. 6.

(c) Id., lib. 8, cap. 9.

(d) Id., lib. 10, cap. 28. De iisdem infra, lib. 5, cap. 18.

veri Dei munera sunt, non ipsæ sunt deæ. Verumtamen ubi est virtus et felicitas, quid aliud queritur? Quid ei sufficit, cui virtus felicitasque non sufficit? Omnia quippe agenda complectitur virtus; omnia optanda, felicitas. Si Jupiter, ut hæc daret, ideo colebatur; quia si bonum aliquid est latitudo regni atque diuturnitas, ad eandem pertinet felicitatem; cur non intellectum est dona Dei esse, non deas? Si autem putatæ sunt deæ, saltem alia tanta deorum turba non quereretur. Consideratis enim officiis deorum deorumque omnium, quæ sicut voluerunt pro sua opinione finxerunt, inveniunt, si possunt, aliquid quod ab aliquo deo præstari possit homini habenti virtutem, habenti felicitatem. Quid doctrinæ vel a Mercurio, vel a Minerva (*a*) petendum esset, cum virtus omnia secum haberet? Ars quippe ipsa bene recteque vivendi, virtus a veteribus definita est. Unde ab eo quod græce ἀρετή dicitur virtus, nomen artis Latinos traduxisse putaverunt (*b*). Sed si virtus non nisi ad ingeniosum posset venire, quid opus erat deo Catio patre, qui catos, id est acutos, faceret, cum hoc posset conferre felicitas? Ingeniosum quippe nasci, felicitatis est. Unde, etiamsi non potuit a nondum nato coli dea Felicitas, ut hoc ei conciliata donaret, conferret hoc parentibus ejus cultoribus suis, ut eis ingeniosi filii nascerentur. Quid opus erat parturientibus invocare Lucinam, cum, si adesset Felicitas, non solum bene parerent, sed etiam bonos? Quid necesse erat Opi deæ commendare nascentes, deo Vaticano vagientes, deæ Cuninæ jacentes, deæ Ruminæ sugentes, deo Stailino stantes, deæ Adeonæ adeuntes, Abeonæ abeuntes; deæ Menti, ut bonam haberent mentem; deo Volumno et deæ Volumnæ, ut bona vellent; diis nuptialibus¹, ut bene conjugarentur; diis agrestibus, ut fructus uberrimos caperent, et maxime ipsi divæ Fructesæ; Marti et Bellonæ, ut bene belligerant; deæ Victoriæ, ut vincerent; deo Honori², ut honorarentur; deæ Pecuniæ, ut pecuniosi essent; deo Æsculano³ et filio ejus Argentino, ut haberent æream argenteamque pecuniam? Nam ideo patrem Argentini Æsculanum posuerunt, quia prius ærea pecunia in usu esse cœpit, post argentea (*c*). Miror autem, quod Argentinus non genuit Aurinum, quia et aurea subsecuta est. Quem deum isti si haberent, sicut Saturno Jovem, ita et patri Argentino et avo Æsculano Aurinum præponerent. Quid ergo erat necesse propter hæc bona vel animi, vel corporis, vel externa, tantam deorum turbam colere et invocare; quos neque omnes commemoravi, nec ipsi potuerunt omnibus bonis humanis minutatim singillatimque digestis deos minutos et singulos providere; cum posset magno facilique compendio una dea Felicitas cuncta conferre; nec solum ad bona capienda quisquam alius, sed neque ad depellenda mala quereretur? Cur enim

¹ Vind. Am. et nonnulli manuscripti, diis conjugatibus.

² Er. et aliquot Mss., deo Honorino.

³ Nonnulli manuscripti hic et infra constanter, Escalano.

(a) Mercurius præerat eloquentiæ, Minerva artibus et ingenii.

(b) Donatus in Andriam Terentii, act. 1. scen. 1, vers. 4.

(c) Plin. lib. 33, cap. 13.

esset invocanda propter fessos diva Fessonia¹, propter hostes depellendos diva Pellonia, propter ægros medicus vel Apollo, vel Æsculapius, vel ambo simul quando esset grande periculum? Nec deus Spinien-sis², ut spinas ex agris eradicaret; nec dea Rubigo, ut non accederet, rogaretur: una Felicitate præsentē et tuente, vel nulla mala exorirentur, vel facillime pellerentur. Postremo quoniam de duabus istis deabus Virtute et Felicitate tractamus, si felicitas virtutis est præmium, non dea, sed Dei donum est: si autem dea est, cur non dicatur et virtutem ipsam conferre; quandoquidem etiam virtutem consequi felicitas magna est?

CAPUT XXII. — *De scientia colendorum deorum, quam a se Varro gloriatur collatam esse Romanis.*

Quid ergo est, quod pro ingenti beneficio Varro jactat præstare se civibus suis, quia non solum commemorat deos, quos coli oportet a Romanis, verum etiam dicit quid ad quemque pertineat? Quoniam nihil prodest³, inquit, hominis alicujus medici nomen formamque nosse, et quod sit medicus ignorare: ita dicit nihil prolesse scire, deum esse Æsculapium, si nescias eum valetudini opitulari, atque ita ignores cur ei debet supplicare. Hoc etiam alia similitudine affirmat, dicens, non modo bene vivere, sed vivere omnino nequidem posse, si ignoret quisnam sit faber, quis pistor⁴, quis tector, a quo quid utensile petere possit: quem adjutorem assumere, quem ducem, quem doctorem: eo modo nulli dubium esse asserens, ita esse utilem cognitionem deorum, si sciatur quam quisque deus vim et facultatem ac potestatem cujusque rei habeat. *Ea eo enim poterimus, inquit, scire quem cujusque causa⁵ deum advocare atque invocare debeamus: ne faciamus, ut mini solent, et optemus a Libero aquam, a Lymphis vinum.* Magna sane utilitas. Quis non huic gratias ageret, si vera monstraret; et si unum verum Deum, a quo essent omnia bona, hominibus colendum doceret?

CAPUT XXIII. — *De Felicitate, quam Romani, multorum veneratores deorum, diu non coluerunt honore divino, cum pro omnibus sola sufficeret.*

1. Sed unde nunc agitur, si libri et sacra eorum vera sunt, et Felicitas dea est, cur non ipsa una quæ coleretur constituta est, quæ posset universa conferre, et compendio facere felicem? Quis enim optat aliquid propter aliud quam ut felix fiat? Cur denique tam sero huic tantæ deæ post tot Romanos principes Lucullus ædem constituit (a)? Cur ipse Romulus felicem cupiens condere civitatem, non huic templum potissimum struxit? Nec propter aliquid diis cæteris supplicavit, quando nihil deesset, sic hæc adesset. Nam et ipse nec prius rex, nec, ut putant, postea deus

¹ veteres libri non pauci, *Fossona*.

² Vind. Er. et aliquot Mss., *Spinienstis*.

³ Sic nostri manuscripti. In B.: *Quomodo nihil prodest*. M.

⁴ Sic Mss. Editi autem, *pistor*.

⁵ Lov., *cujusque rei causa*. Abest, *rei*, ab aliis libris.

(a) Anno Urbis conditæ circiter 686: nam hunc in annos referunt consulatum Licinii Luculli, a quo ædes Felicitati, quod bellum ipse adversus Mithridatem et Tigranem reges feliciter gessisset, constituta fuit.

steret, si hanc deam propitiā non haberet. Ut quid ergo constituit Romanis deos, Janum, Jovem, Martem, Picum, Faunum, Tiberinum, Herculem, et si quos alios? ut quid Titus Tatius addidit Saturnum, Opem, Solem, Lunam, Vulcanum, Lucem, et quoscumque alios addidit, inter quos etiam deam Cloacina¹, Felicitate neglecta? ut quid Numa tot deos et tot deas sine ista? an eam forte in tanta turba videre non potuit? Hostilius certe rex deos et ipse novos Pavorem atque Pallorem propitiandos non introduceret, si deam istam nosset aut coleret. Præsentē quippe Felicitate omnis pavor et pallor, non propitiatus abscederet, sed pulsus auferret.

2. Deinde quid est hoc, quod jam Romanum imperium longe lateque crescebat, et adhuc nemo Felicitatem colebat? An ideo grandius imperium, quam felicitas fuit? Nam quomodo ibi esset veræ felicitas, ubi vera non erat pietas? Pietas enim est verax veri Dei cultus, non cultus falsorum tot deorum, quot dæmoniorum. Sed et postea jam in deorum numerum Felicitate suscepta, magna bellorum civilium infelicitas subsecuta est. An forte juste est indignata Felicitas, quod et tam sero, et non ad honorem, sed ad contumeliam potius invitata est, ut cum ea coleretur Priapus, et Cloacina, et Pavor, et Pallor, et Febris, et cætera non numina colendorum, sed crimina colentium?

3. Ad extremum, si cum turba indignissima tanta dea colenda visa est, cur non vel illustrius cæteris colebatur? Quis enim ferat, quod neque inter deos Consentes quos dicunt in consilium Jovis adhiberi, nec inter deos quos Selectos vocant, Felicitas constituta est¹? Templum aliquod ei fieret, quod et loci sublimitate et operis dignitate præmineret. Cur enim non aliquid melius, quam ipsi Jovi? Nam quæ etiam Jovi regnum nisi Felicitas dedit? si tamen cum regnaret, felix fuit. Et potior est felicitas regno. Nemo enim dubitat, facile inveniri hominem qui timeat se fieri regem: nullus autem invenitur qui se nolit esse felicem. Ipsi ergo dii, si per auguria vel quolibet modo eos possent consuli putant, de hac re consulerentur, utrum vellent Felicitati loco cedere: si forte aliorum ædibus vel altaribus jam fuisset locus occupatus, ubi ædes major atque sublimior Felicitati construeretur, etiam ipse Jupiter cederet, ut ipsum verticem collis Capitolini Felicitas potius obtineret. Non enim quispiam resisteret Felicitati, nisi, quod fieri non potest, qui esse vellet infelix. Nullo modo omnino si consuleretur, faceret Jupiter, quod ei fecerunt tres dii, Mars, Terminus, et Juventas, qui majori et regi suo nullo modo cedere loco voluerunt. Nam sicut habent eorum litteræ, cum rex Tarquinius Capitolium fabricare vellet, eumque locum qui ei dignior aptiorque videbatur, ab diis aliis² cerneret præoccupatum, non audens aliquid contra eorum facere arbitrium et credens eos tanto numini suoque principi volun-

¹ Editi, *Felicitas constituta, est ut templum*. Particula, *ut* abest a manuscriptis.

² Sola editio Lov., *a diis ahemus*.

tate cessuros; quia multi erant illic ubi Capitolium constitutum est, per augurium quæsiuit, utrum concedere locum vellent Jovi: atque ipsi inde cedere omnes voluerunt, præter illos quos commemoravi, Martem, Terminum (a), Juventatem: atque ideo Capitolium ita constructum est, ut etiam isti tres intus essent tam obscuris signis, ut hoc vix homines doctissimi scirent. Nullo modo igitur Felicitatem Jupiter ipse contemneret, sicut a Termino, Marte, Juventate contemptus est. Sed ipsi etiam qui non cessant Jovi, profecto cederent Felicitati, quæ illis regem fecerat Jovem. Aut si non cederent, non id contemptu ejus facerent, sed quod in domo Felicitatis obscuri esse mallent, quam sine illa in locis propriis eminere.

4. Ita dea Felicitate in loco amplissimo et celsissimo constituta, discerent cives unde omnis boni voti petendum esset auxilium. Ac sic ipsa suadente natura, aliorum deorum superflua multitudo derelicta, coleretur una Felicitas, uni supplicaretur, unius templum frequentaretur a civibus qui felices esse vellent, quorum esset nemo qui nollet: atque ita ipsa a se ipsa peteretur, quæ ab omnibus petebatur. Quis enim aliquid ab aliquo deo, nisi felicitatem, velit accipere, vel quod ad felicitatem existimat pertinere? Proinde si felicitas habet in potestate cum quo homine sit (habet autem, si dea est), quæ tandem stultitia est, ab aliquo eam deo petere, quam possis a se ipsa impetrare? Hanc ergo deam super deos cæteros honorare etiam loci dignitate debuerunt. Sicut enim apud ipsos legitur, Romani veteres nescio quem Summanum (b), cui nocturna fulmina tribuebant, coluerunt magis quam Jovem, ad quem diurna fulmina pertinerent. Sed postquam Jovi templum insigne ac sublime constructum est, propter ædis dignitatem sic ad eum multitudo confluit, ut vix inveniatur qui Summani nomen, quod audire jam non potest, se saltem legisse meminerit. Si autem felicitas dea non est, quoniam, quod verum est, munus est Dei; ille Deus quaeratur, qui eam dare possit, et deorum falsorum multitudo noxia relinquatur, quam stultorum hominum multitudo vana sectatur, dona Dei deos sibi faciens, et ipsum, cujus ea dona sunt, obstinatione superbe voluntatis offendens. Sic enim carere non potest infelicitate, qui tanquam deam felicitatem colit, et Deum datorem felicitatis relinquit: sicut carere non potest fame, qui panem pictum lingit, et ab homine qui verum habet, non petit.

CAPUT XXIV. — *Qua ratione defendant Pagani, quomodo inter deos colant ipsa dona divina.*

Libet autem eorum considerare rationes. Usque adeone, inquit, majores nostros insipientes fuisse credendum est, ut hæc nescirent munera divina esse, non deos? Sed quoniam sciebant nemini talia nisi aliquo deo largiente concedi, quorum deorum nomina non inveniebant, earum rerum nominibus appellabant

(a) Terminum solum memorat Livius lib. 4. Juventatem addit Florus lib. 4, alique historici, non Martem.
(b) Plin. lib. 2, cap. 53; Ovid. Fast. 6, vers. 731-732.

deos, quas ab eis sentiebant dari, aliqua vocabula inde flectentes, sicut a bello Bellonam nuncupaverunt, non bellum; sicut a cunis Cuninam, non cunam; sicut a segetibus Segetiam, non segetem; sicut a pomis Pomonam, non pomum; sicut a bubus Bubonam¹, non bovem: aut certe nulla vocabuli declinatione, sicut res ipsæ nominantur, ut Pecunia dicta est dea, quæ dat pecuniam, non omnino pecunia dea ipsa putata est: ita Virtus, quæ dat virtutem; Honor, qui honorem; Concordia, quæ concordiam; Victoria, quæ dat victoriam. Ita, inquit, cum Felicitas dea dicitur, non ipsa quæ datur, sed numen illud attenditur a quo felicitas datur.

CAPUT XXV. — *De uno tantum colendo Deo, qui, licet nomine ignoretur, tamen felicitatis dator esse sentitur.*

Ista nobis reddita ratione, multo facilius eis, quorum cor non nimis obduruit, persuadebimus fortasse quod volumus. Si enim jam humana infirmitas sensit, non nisi ab aliquo Deo dari posse felicitatem; et hoc senserunt homines qui tam multos colebant deos, in quibus et ipsum eorum regem Jovem; quia ejus nomen, a quo daretur felicitas, ignorabant, ideo² ipsius rei nomine, quam credebant ab illo dari, eum appellare voluerunt: satis ergo judicaverunt³, nec ab ipso Jove dari posse felicitatem, quem jam colebant; sed utique ab illo quem nomine ipsius felicitatis colendum esse censebant. Confirmo prorsus a quodam Deo, quem nesciebant, eos credidisse dari felicitatem: ipse ergo quaeratur, ipse colatur, et sufficit. Repudietur strepitus Innumerabilium demoniorum: illi non sufficiat hic Deus, cui non sufficit munus ejus. Illi, inquam, non sufficiat ad colendum Deus dator felicitatis, cui non sufficit ab accipiendum ipsa felicitas. Cui autem sufficit (non enim habet homo quid amplius optare debeat), serviat uni Deo datori felicitatis. Non est ipse quem nominant Jovem. Nam si eum datorem felicitatis agnoscerent, non utique alium, vel aliam, a qua daretur felicitas, nomine ipsius Felicitatis inquirerent; neque ipsum Jovem cum tantis injuriis colendum putarent. Iste alienarum dicitur adulter⁴ uxorum, iste pueri (a) pulchri impudicus amator et raptor.

CAPUT XXVI. — *De tuas scemcis, quos sibi dii celebrari a suis cultoribus exegerunt.*

Sed fingebat hæc Homerus, ait Tullius (b), et humana ad deos transferrebat: divina mallem ad nos. Merito displicuit viro gravi divinorum criminum poeta confictor. Cur ergo ludi scenici, ubi hæc dicitantur, cantantur, actantur, deorum honoribus exhibentur, inter res divinas a doctissimis conscribuntur? Hic exclamet Cicero, non contra figmenta poetarum, sed contra

¹ Er., sicut a bubus Bubonam. Lugd. Ven. et Lov., sicut a bubus Bubonam. M.

² Editi, et ideo. At manuscripti non habent. et.

³ Sic Mss. Editi vero, indicant.

⁴ Sic nostri omnes Mss. in B., adulterator. M.

(a) Ganymedis. Homer. Iliad. lib. 20.

(b) Tuscul. 4, cap. 26.

instituta majorum. Annon exclamarent¹ et illi, Quid nos fecimus? Ipsi dii ista suis honoribus exhibenda flagitaverunt, atrociter imperarunt, cladem nisi fieret prænunderunt; quia neglectum est aliquid, severissime vindicarunt; quia id quod neglectum fuerat factum est, placatos se esse monstrarunt. Inter eorum commemoratur virtutes et miranda facta quod dicam. Tito Latinio², rustico Romano patrifamilias, dictum est in somnis, in senatum nuntiaret, ut ludi Romani instaurarentur, quod primo eorum die in quodam scelerato, qui populo spectante ad supplicium duci jussus est, numinibus videlicet ex ludis hilaritatem quaerentibus, triste displicuisset imperium. Cum ergo ille, qui somnio commonitus erat, postero die jussa facere non ausus esset, secunda nocte hoc idem rursus severius imperatum est: amisit filium, quia non fecit. Tertia nocte dictum est homini, quod major ei poena, si non faceret, immineret. Cum etiam sic non auderet, in morbum incidit acrem et horribilem. Tum vero ex amicorum sententia ad magistratus rem dedit, atque in lectica allatus est in senatum: expositoque somnio, recepta continuo valetudine, pedibus suis sanus abscessit. Tanto stupefactus miraculo senatus quadruplicata pecunia ludos censuit instaurari (a). Quis non videat, qui sanum sapit, subditos homines malignis dæmonibus, a quorum dominatione non liberat nisi gratia Dei per Jesum Christum Dominum nostrum, vi compulsos esse exhibere talibus diis, quæ recto consilio poterant turpia judicari? In illis certe ludis poetica numinum crimina frequentantur, qui ludi coenitibus numinibus jussu senatus instaurabantur. In illis ludis corruptorem pudicitiae Jovem turpissimi histriones cantabant, agebant, placebant³. Si illud fingebatur, ille irasceretur: si autem suis criminibus etiam fictis⁴ delectabatur, quando coleretur, nisi idiabolo serviretur? Itane iste Romanum conderet, dilataret, conservaret imperium, quovis Romano, cui displicebant talia, homine abjectior? iste daret felicitatem, qui tam infeliciter colebatur; et nisi ita coleretur, infelicis irascebatur?

CAPUT XXVII. — *De tribus generibus deorum, de quibus Scævola pontifex disputavit.*

Relatum est in litteras, doctissimum pontificem Scævolum (b) disputasse tria genera tradita deorum: unum a poetis, alterum a philosophis, tertium a principibus civitatis. Primum genus nugatorium dicit esse, quod multa de diis fingantur indigna; secundum non congruere civitatibus, quod habeat aliqua supervacua, aliqua etiam quæ obsit populis nosse. De supervacuis non magna causa est: solet enim et a

jurisperitis dici¹, Superflua non nocent. Quæ sunt autem illa quæ prolata in multitudinem nocent? Hæc, inquit, non esse deos Herculem, Æsculapium, Castorem, Pollucem: proditur enim a doctis, quod homines fuerint, et humana conditione defecerint. Quid aliud²? Quod eorum qui sint dii non habeant civitates vera simulacra; quod verus Deus nec sexum habeat, nec ætatem, nec definita corporis membra. Hæc pontifex nosse populos non vult: nam falsa esse non putat³. Expedire igitur existimat, falli in religione civitates. Quod dicere etiam in libris Rerum divinarum ipse Varro non dedit. Præclara religio, quod confugiat liberandus infirmus, et cum veritatem qua liberetur inquirat, credatur ei expedire quod fallitur. Poeticum sane deorum genus cur Scævola respuat, eisdem litteris non tacetur: quia sic videlicet deos deformant, ut nec bonis hominibus comparentur, cum alium faciunt furari, alium adulterare; sic item aliquid aliter, turpiter, atque inepte dicere ac facere; tres inter se deas certasse de præmio pulchritudinis, victas duas a Venere Trojam evertisse; Jovem ipsum converti in bovem aut cynum, ut cum aliqua concumbat; deam homini nubere, Saturnum liberos devorare: nihil denique posse confingi miraculorum atque vitiorum, quod non ibi reperitur, atque ab deorum natura longe absit. O Scævola pontifex maxime, ludos tolle, si potes: præcipe populis, ne tales honores diis immortalibus deferant, ubi crimina deorum libeat mirari, et quæ fieri possunt placeat imitari. Si autem tibi responderit populus, Vos nobis importastis ista, pontifices: deos ipsos roga, quibus instigantibus ista jussistis, ne talia sibi jubeant exhiberi. Quæ si mala sunt, et propterea nullo modo de deorum majestate credenda, major est deorum injuria, de quibus impune finguntur. Sed non te audiunt, dæmones sunt, prava docent, turpibus gaudent: non solum non deputant injuriam, si de illis ista fingantur; sed eam potius injuriam ferre non possunt, si per eorum solemnia non agantur. Jam vero si adversus eos Jovem interpelles, maxime ob eam causam, quia ejus plura crimina ludis scenicis acutantur; nonne etiamsi Deum Jovem nuncupatis, a quo regitur totus atque administratur hic mundus, eo illi sit a vobis maxima injuria, quod eum cum istis colendum putatis, eorumque regem esse perhibetis?

CAPUT XXVIII. — *An ad obtinendum dilatandumque regnum profuerit Romanis cultus deorum.*

Nullo igitur modo dii tales, qui talibus placantur, vel potius accusantur honoribus, ut majus sit crimen quod eis falsis oblectantur, quam si de illis vera dicerentur, Romanum imperium augere et conservari potuissent. Hoc enim si possent, Græcis potius domum tam grande conferrent, qui eos in hujuscemodi

¹ Mss., *an exclamarent*; omisso, *non*.

² Editi, *Latinio*. Nonnulli Mss., *Latinio*.

³ Sic manuscripti cum Vlud. At Am. Er. et Lov., *placabant*.

⁴ vetus liber Faurensis, *factis*.

(a) His consentiunt Livius, lib. 2, c. 38, ac Valerius, lib. 1, cap. 7, et § 4, eum de plebe hominem dicunt; quod rustici Romani appellatione significare volebat Cicero, somnium hoc ipsum narrans in libro primo de Divinatione, cap. 26.

(b) Ipse ille est Scævola, qui a Cicerone, de Oratore, lib. 1, cap. 39, laudatur ut *jurisperitorum eloquentissimus, et eloquentium jurisperitissimus*.

¹ Sic Mss. Editi autem, *a viris peritis dici*.

² Editi: *Quid aliud, quam quod eorum*, etc. Expungendum, *quam*: nam abest ab omnibus manuscriptis et, si additur, verba subsequenda, quæ pontificis Scævola sunt, cum proxime præcedentibus male connectit.

³ Aliquot Mss., *esse non putant*. Et quidam a secunda manu, *esse computat*.

omnes divinis, hoc est ludis scenicis, honorabilis dignisque colerunt, quando et a moribus poetarum, quibus deos dilacerari videbant, se non subtraxerunt, dando eis licentiam male tractandi homines quos liberet, et ipsos scenicos non turpes judicaverint, sed dignos etiam præclaris honoribus habuerunt. Sicut autem potuerunt auream pecuniam habere Romani, quamvis deum Aurinum non colerent: sic et argenteam habere potuerunt, et æream, si nec Argentinum, nec ejus patrem colerent Æsculanum: et sic omnia, quæ relexere piget. Sic ergo et regnum invito quidem Deo vero nullo modo habere possent; diis vero istis falsis et multis ignoratis sive contemptis, atque illo uno cognito¹ et fide sincera ac moribus culto, et melius hic regnum haberent, quantumcumque haberent, et post hæc² acciperent sempiternum, sive hic haberent, sive non haberent.

CAPUT XXIX. — *De falsitate auspicii, quo Romani regi fortitudo et stabilitas visa est indicari.*

Nam illud quale est quod pulcherrimum auspiciū fuisse dixerunt, quod paulo ante commemoravi, Martem et Terminus et Juventatem nec Jovi regi deorum loco cedere voluisse? Sic enim, inquit, significatum est, Martiam gentem, id est Romanam, nemini locum quem teneret daturam; Romanos quoque terminos propter deum Terminus neminem commoturum; juventutem etiam Romanam propter deam Juventatem nemini esse cessuram. Videant ergo quomodo habeant³ istum regem deorum suorum et datorem regni sui, ut eum⁴ auspicia ista pro adversario ponerent, cui non cedere pulchrum esset. Quanquam hæc si vera sunt, non habent omnino quid timeant. Non enim confessuri sunt quod dii cesserint Christo, qui Jovi cedere noluerunt. Salvis quippe imperii finibus Christo cedere potuerunt, et de sedibus locorum et maxime de corde credentium. Sed antequam Christus veniret in carne, antequam denique ista scriberentur, quæ de libris eorum proferimus; sed tamen posteaquam factum est sub rege Tarquinio illud auspiciū, aliquoties Romanus exercitus fusus est, hoc est versus in fugam, falsumque ostendit auspiciū, quo Juvetas illa non cesserat Jovi; et gens Martia, superantibus atque irrumpentibus Gallis, in ipsa Urbe contrita est; et termini imperii, deficientibus multis ad Annibalem civitatibus, in angustum fuerant coarctati. Ita evacuata est pulchritudo auspiciorum, remansit contra Jovem contumacia, non deorum, sed dæmoniorum. Aliud est enim non cessisse; aliud unde cesseras redisse. Quanquam et postea in Orientalibus partibus Hadriani voluntate mutati sunt termini imperii Romani. Ille namque tres provincias nobiles, Armeniam, Mesopotamiam, Assyriam, Persarum concessit imperio (a): ut deus ille Terminus, qui Romanos termi-

nos secundum istos tæbatur, et per illud pulcherrimum auspiciū loco non cesserat Jovi, plus Hadrianum regem hominum, quam regem deorum timuisse videatur. Receptis quoque alio tempore provinciis memoratis, nostra pene memoria retrorsus Terminus cessit, quando Julianus (a), deorum illorum oraculis deditus, immoderato ausu naves jussit incendi, quibus alimonia portabatur: qua exercitus destitutus, mox etiam ipso hostili vulnere extincto, in tantam est redactus inopiam, ut inde nullus evaderet, undique hostibus incursantibus militem imperatoris morte turbatum¹, nisi placito pacis illic imperii fines constituerentur, ubi hodieque persistunt; non quidem tanto detrimento, quantum concesserat Hadrianus, sed media tamen compositione defixi. Vano igitur augurio deus Terminus non cessit Jovi, qui cessit Hadriani voluntati, cessit etiam Juliani temeritati, et Joviani (b) necessitati. Viderunt hæc intelligentiores gravioresque Romani; sed contra consuetudinem civitatis, quæ dæmoniacis² ritibus fuerat obligata, parum valebant: quia et ipsi etiam si illa vana esse sentiebant, naturæ tamen rerum sub unius veri Dei regimine atque imperio constitutæ, religiosum cultum, qui Deo debetur, exhibendum putabant: *servientes*, ut ait Apostolus, *creaturæ potius quam Creatori, qui est benedictus in sæcula* (Rom. 1, 25). Hujus Dei veri erat auxilium necessarium, a quo mitterentur sancti viri et veraciter pii, qui pro vera religione morerentur, ut falsæ a viventibus tollerentur³.

CAPUT XXX. — *Qualia de diis Gentium etiam cultores eorum se sentire fateantur.*

Cicero augur irridet auguria (c), et reprehendit homines corvi et corniculæ vocibus vitæ consilia moderantes (*De Divinatione, lib. 2, cap. 37*). Sed iste Academicus, qui omnia esse contendit incerta, indignus est qui habeat ullam in his rebus auctoritatem. Disputat apud eum Q. Lucilius Balbus in secundo de Deorum Natura libro, et cum ipse superstitiones ex natura rerum velut físicas et philosophicas iuserat, indignatur tamen institutioni simulacrorum et opinionibus fabulosis, ita loquens: *Videitane igitur, ut a physicis rebus bene atque utiliter inventis, ratio sit tracta ad commentitios et fictos deos? Quæ res genuit falsas opiniones, erroresque turbulentos, et superstitiones pene amiles. Et formæ enim nobis deorum, et ætates, et vestitus ornatusque noti sunt: genera præterea, conjugia, cognationes, omniaque traducta ad similitudinem imbecillitatis humanæ. Nam et perturbatis animis inducuntur: accepimus enim deorum cupiditates, ægritudines, iracundias. Nec vero (ut fabulæ ferunt) dii bellis præliisque caruerunt. Nec solum, ut apud Homerum, cum duos exercitus contrarios alii dii*

¹ Fr. Lugd. Ven. Lov., *undique hostibus incursantibus, milite imperatoris morte turbato.* M.

² Am. et Mss., *dæmoniacis.*

³ Editi, *ut falsa a viventibus tolleretur.* At Mss., *ut falsas a viventibus tollerentur.*

(a) Julianus apostata. Vid. infra, lib. 5, cap. 21.

(b) Successoris Juliani.

(c) Augurem se ipse proficitur fuisse in libro 2 de Legibus.

¹ Lov., *incognito*: refragantibus cæteris libris.

² Sic Mss. Editi autem, *post hoc.*

³ Lov., *quomodo habebant istum.* Editi alii et manuscripti, *habent.*

⁴ Editi, *ut ei.* Melius Mss., *ut eum.*

(a) Vide Eutropium, lib. 8, cap. 6.

ex alia parte defenderent (*Iliadis* Y, vers. 67 sqq.), sed etiam ut cum Titanis aut cum Gigantibus sua propria bella gesserunt. Hæc et dicuntur et creduntur stultissime, et plena sunt vanitatis summaque levitatis (Cap. 28). Ecce interim quæ confitentur qui defendunt deos Gentium. Deinde cum hæc ad superstitionem pertinere dicat, ad religionem vero, quæ ipse secundum Stoicos videtur docere: *Non enim philosophi solum*, inquit, *verum etiam majores nostri superstitionem a religione separaverunt*¹. *Nam qui totos dies precabantur*, inquit, *et immolabant, ut sibi sui liberi superstites essent, supersticiosi sunt appellati* (*Vide Lactantium, lib. 4, cap. 28*): quis non intelligat eum conari, dum consuetudinem civitatis timet, religionem laudare majorem, eamque a superstitione velle sejungere, sed quomodo id possit non invenire? Si enim a majoribus illi sunt appellati supersticiosi, qui totos dies precabantur et immolabant, numquid et isti², qui instituerunt (quod iste reprehendit) deorum simulacra diversa ætate et veste distincta, deorum genera, conjugia, cognationes? Hæc utique cum taquam superstitione culpantur, implicat ista culpa majores talium simulacrorum institutores atque cultores: implicat et ipsum, qui quantolibet eloquio se in libertatem nitatur evolvere, necesse habebat ista venerari; nec quod in hac disputatione disertus insonat, mutire auderet in populi concione. Agamus itaque Christiani Domino Deo nostro gratias, non Cælo et Terræ; sicut iste disputat, sed ei qui fecit cælum et terram; qui has superstitiones, quas iste Balbus velut balbutiens vix reprehendit, per altissimam Christi humilitatem, per Apostolorum prædicationem, per fidem martyrum pro veritate morientium et cum veritate viventium, non solum in cordibus religiosis, verum etiam in aedibus superstitionis libera suorum servitute subvertit.

CAPUT XXXI. — *De opinionibus Varronis, qui reprobata persuasione populari, licet ad notitiam veri Dei non pervenerit, unum tamen deum colendum esse censuerit.*

1. Quid ipse Varro, quem dolemus in rebus divinis iudos sceucicos, quamvis non iudicio proprio, posuisse, cum ad deos colendos multis locis velut religiosus hortetur, nonne ita constitetur, non se illa iudicio suo sequi, quæ civitatem Romanam instituisse commemorat, ut si eam civitatem novam constitueret, ex naturæ potius formula deos nominaque eorum se fuisse dedicaturum non dubitet confiteri? Sed jam quoniam in vetere populo esset, acceptam ab antiquis nominum et cognominum historiam tenere, ut tradita est, debere se dicit, et ad eum finem illa scribere ac perscrutari, ut potius eos magis colere, quam despiciere vulgus velit. Quibus verbis homo acutissimus satis indicat, non se aperire omnia, quæ non sibi tantum contempti essent, sed etiam ipsi vulgo despicienda viderentur, nisi tacerentur. Ego ista conjicere putari debui, nisi evidenter alio loco

¹ Ms. 706, *separaverant.* M.

² Sola editio Lov.: *Numquid non et isti.*

SANCT. AUGUST. VII.

ipse diceret de religionibus loquens, multa esse vera, quæ non modo vulgo scire non sit utile, sed etiam, tametsi falsa sunt, aliter existimare populum expediat, et ideo Græcos teletas ac mysteria taciturnitate parietibusque clausisse. Illic certe totum consilium prodidit velut sapientiam, per quos civitates et populi regerentur. Hac tamen fallacia miris modis maligni dæmones delectantur, qui et deceptores et deceptos pariter possident, a quorum dominatione non liberat nisi gratia Dei per Jesum Christum Dominum nostrum.

2. Dicit etiam idem auctor acutissimus atque doctissimus, quod hi soli ei videantur animadvertisse quid esset Deus, qui crediderunt eum esse animam motu ac ratione mundum gubernantem (a). Ac per hoc, etsi nondum tenebat quod veritas habet; Deus enim verus, non anima, sed animæ quoque est effector et conditor: tamen si contra præjudicia consuetudinibus liber esse posset, unum Deum colendum fieretur atque suaderet, motu ac ratione mundum gubernantem: ut ea cum illo de hac re quæstio remaneret, quod eum diceret esse animam, non potius et animæ¹ creatorem. Dicit etiam antiquos Romanos plus annos centum et septuaginta deos sine simulacro coluisse (b). « Quod si adhuc, » inquit, « mansisset, castius dii observarentur. » Cui sententiæ suæ testem adhibet inter cætera etiam gentem Judæam: nec dubitat eum locum ita concludere, ut dicat, qui primi simulacra deorum populis posuerunt, eos civitatibus suis et metum dempsisse, et errorem addidisse; prudenter existimans deos facile posse in simulacrorum stoliditate contemni. Quod vero non ait, Errorem tradiderunt; sed, addiderunt; jam utique fuisse etiam sine simulacris intelligi vult errorem. Quapropter cum solos dicit animadvertisse quid esset Deus, qui eum crederent animam mundum gubernantem, castiusque existimat sine simulacris observari religionem, quis non videat quantum propinquaverit veritati? Si enim aliquid contra vetustatem tanti posset erroris, profecto et unum Deum, a quo mundum crederet gubernari, et sine simulacro colendum esse censeret; atque in tam proximo inventus facile fortasse de animæ mutabilitate commoveretur, ut naturam potius incommutabilem, quæ ipsam quoque animam condidisset, Deum verum esse sentiret. Hæc cum ita sint, quæcumque tales viri in suis litteris multorum deorum ludibria posuerunt, confiteri ea potius occulta Dei voluntate compulsi sunt, quam persuadere conati. Si qua igitur a nobis inde testimonia proferuntur, ad eos redarguendos proferuntur, qui nolunt advertere de quanta et quam maligna dæmonum potestate nos liberet singulare sacrificium tam sancti sanguinis fusi et donum Spiritus impertiti.

¹ Er. et Lov., *non potius animæ.* Cæteris in libris, et *animæ.*

(a) De quibus Cicero, de Natura deorum, lib. 4, cap. 2.

(b) Plutarchus in historia Numæ, cap. 8, scribit ab his vetitum Romanis, ne existimarent imaginem Dei, aut hominis speciem aut animalis habere formam; atque in prioribus centum septuaginta annis templa quidem erecta, simulacra vero corporum ab his nulla dedicata. Confer Flin. lib. 34, cap. 4.

(Cinq.)

CAPUT XXXII. — *Ob quam speciem utilitatis principes Gentium apud subjectos sibi populos falsas religiones voluerunt permanere.*

Dicit etiam de generationibus deorum magis ad poetas, quam ad physicos fuisse populos inclinatos; et ideo et sexum et generationes deorum majores suos, id est veteres credidisse Romanos, et eorum constituisse conjugia. Quod utique non aliam ob causam factum videtur, nisi quia hominum vel prudentium et sapientium negotium fuit populum in religionibus fallere, et in eo ipso non solum colere, sed imitari etiam dæmones, quibus maxima est fallendi cupiditas. Sicut enim dæmones nisi eos quos fallendo deceiverint, possidere non possunt; sic et homines principes, non sane justis, sed dæmonum similes, ea, quæ vana esse noverant, religionis nomine populis tanquam vera suadebant, hoc modo eos civili societati velut arctius¹ alligantes, quo similiter subditos possiderent. Quis autem infirmus et indoctus evaderet simul fallaces et principes civitatis et dæmones?

CAPUT XXXIII. — *Quod judicio et potestate Dei veri omnium regum atque regnorum ordinata sint tempora.*

Deus igitur ille felicitatis auctor et dator, quia solus est verus Deus, ipse dat regna terrena et bonis et malis. Neque hoc temere et quasi fortuito, quia Deus est, non fortuna; sed pro rerum ordine ac temporum occulto nobis, notissimo sibi: cui tamen ordini temporum non subditus servit, sed cum ipso tanquam dominus regit, moderatorque disponit. Felicitatem vero non dat nisi bonis. Hanc enim possunt et non habere et habere servientes, possunt et non habere et habere regnantes. Quæ tamen plena in ea vita erit, ubi nemo jam serviet². Et ideo regna terrena et bonis ab illo dantur, et malis; ne ejus cultores adhuc in propectu animi parvuli hæc ab eo munera quasi magnum aliquid concupiscant. Et hoc est sacramentum veteris Testamenti, ubi occultum erat novum, quod illic promissa et dona ter-

¹ Plerique Mss. *aptus*.—Sic etiam Ms. 786. M.

² Subsequentis sententiæ, quam nulli non habent veteres ac scripti libri, isthæc editi vind. Am. Er. præmittunt verba: *Et ideo regna mundi hujus Deus bonis et malis communiter præstat, ne boni ea tanquam Dei magna munera concupiscant.* Tanque subiungunt rursus integram illam sententiam: *Et ideo regna terrena et bonis ab illo dantur, etc.* Non de hac sententiâ, ut nonnemo existimavit, sed de verbis et præmissis est observatio Ludovici Vives et Latinii, abesse illa a manuscriptis et e margine in textum irrepsisse. — Hæc verba omittunt etiam nostri Mss. M.

rena sunt: intelligentibus et tunc spiritualibus quamvis nondum in manifestatione prædicantibus, et quæ illis temporalibus rebus significaretur æternitas, et in quibus Dei donis esset vera felicitas.

CAPUT XXXIV. — *De regno Judæorum, quod ab uno et vero Deo institutum atque servatum est, donec in vera religione manserunt.*

Itaque ut cognoscerentur etiam illa terrena bona, quibus solis inhiant qui meliora cogitare non possunt, in ipsius unius Dei esse posita potestate, non in multorum falsorum, quos colendos Romani antea crediderunt, populum suum in Ægypto de paucissimis multiplicavit, et inde signis mirabilibus liberavit. Nec Luciam mulieres illæ invocaverunt, quando earum partus, ut miris modis multiplicarentur, et gens illa incredibiliter cresceret, ab Ægyptiorum persequentium et infantes omnes necare volentium manibus ipse liberavit, ipse servavit. Sine dea Rumina suxerunt; sine Cunina in cunis fuerunt; sine Educa et Potina escam potumque sumpserunt: sine tot diis puerilibus educati sunt; sine diis conjugalibus conjugati; sine cultu Priapi conjugibus mixti. Sine invocatione Neptuni mare transeuntibus divisum patuit, et sequentes eorum inimicos fluctibus in se redeuntibus obruit. Nec consecraverunt aliquam deam Manniam, quando de caelo manna sumpserunt; nec quando sitientibus aquam percussa petra profudit, Nymphas Lymphasque coluerunt. Sine insanis sacris Martis et Bellonæ bella gesserunt, et sine victoria quidem non vicerunt, non eam tamen deam, sed Dei sui munus habuerunt. Sine Segetia segetes, sine Bubona boves, mella sine Mellona, poma sine Pomona; et prorsus omnia, pro quibus tantæ falsorum deorum turbæ Romani supplicandum putaverunt, ab uno vero Deo multo felicius acceperunt. Et si non in eum peccassent impia curiositate, tanquam magicis artibus seducti, ad alienos deos et ad idola defluendo, et postremo Christum occidendo, in eodem regno, etsi non spatiosiore, tamen feliciore mansissent. Et nunc quod per omnes fere terras gentesque dispersi sunt, illius unius veri Dei providentiâ est: ut quod deorum falsorum usquequaque simulacra, aræ, luci, templa evertuntur, et sacrificia prohibentur, de codicibus eorum probetur quemadmodum hoc fuerit tanto ante prophetatum; ne forte, cum legeretur in nostris, a nobis putaretur esse confictum. Jam quod sequitur, in volumine sequenti videndum est, et hic dandus hujus prolixitatis modus.

LIBER QUINTUS ^(a).

Initio de tollenda fati opinione agit, ne denuum existant qui Romani imperii vires et incrementa, quæ non posse diis ascribi superiore libro monstravit, referre in fatum velint. Inde ad quæstionem de præscientiâ Dei delapsus, probat liberam nostræ voluntatis arbitrium per eam non auferri. Postea de moribus Romanorum antiquis dicit, et quo eorum merito, sive quo Dei judicio factum sit, ut illis ad augendum imperium Deus ipse verus, quem non colebant, adiutor fuerit. Decet postremo quæ vera ducenda sit felicitas Christianorum imperatorum.



PRÆFATIO.

Quoniam constat omnium rerum optandarum plenitudinem esse felicitatem, quæ non est dea, sed donum Dei, et ideo nullum deum colendum esse ab hominibus, nisi qui potest eos facere felices; unde

si illa dea esset, sola colenda merito diceretur : jam consequenter videamus, quæ causa Deus, qui potest et illa bona dare, quæ habere possunt etiam non boni, ac per hoc etiam non felices, Romanum imperium tam magnum tamque diturnum esse voluerit. Quia enim hoc deorum falsorum illa, quam colebant, multitudo non fecit, et multa jam diximus, et ubi visum fuerit opportunum esse, dicemus.

CAPUT PRIMUM. — *Causam Romani imperii omniumque regnorum nec fortuitam esse, nec in stellarum positione consistere.*

Causa ergo magnitudinis imperii Romani nec fortuita est, nec fatalis (a), secundum eorum sententiam sive opinionem, qui ea dicunt esse fortuita, quæ vel nullas causas habent, vel non ex aliquo rationabili ordine venientes; et ea fatalia, quæ præter Dei et hominum voluntatem cujusdam ordinis necessitate contingunt. Prorsus divina providentia regna constituuntur humana. Quæ si propterea quisquam fato tribuit, quia ipsam Dei voluntatem vel potestatem fati nomine appellat, sententiam teneat, linguam corrigat. Cur enim non hoc primum dicit, quod postea dicitur est, cum ab illo quisquam quæsierit quid dixerit fatum? Nam id homines quando audiunt, usitata loquendi consuetudine non intelligunt nisi vim positionis siderum, qualis est quando quis nascitur, sive concipitur : quod aliqui alienant a Dei voluntate, aliqui ex illa etiam hoc pendere confirmant. Sed illi, qui sine Dei voluntate decernere opinantur sidera quid agamus, vel quid honorum habeamus malorumve patiamur, ab auribus omnium repellendi sunt; non solum eorum qui veram religionem tenent, sed qui deorum qualiumcumque, licet falsorum, volunt esse cultores. Hæc enim opinio quid aliud agit, nisi ut nullus omnino colatur aut rogetur Deus? Contra quos modo nobis disputatio non est instituta, sed contra eos qui pro defensione eorum quos deos putant, christianæ religioni adversantur. Illi vero, qui positionem stellarum quodammodo decernentium qualis quisque sit, et quid ei proveniat boni quidve mali accidat, ex Dei voluntate suspendunt, si easdem stellas putant habere hanc potestatem traditam sibi a summa illius potestate, ut volentes ista decernant; magnam cælo faciunt injuriam, in cuius velut clarissimo senatu ac splendidissima curia opinantur scelera facienda decerni; qualia si aliqua terrena civitas decrevisset genere humano decernente fuerat evitanda. Quale deinde iudicium de hominum factis Deo relinquatur, quibus cælestis necessitas adhibetur, cum Dominus ille sit et siderum et hominum? Aut si non

(a) Non deerant qui ad fortuitam sive fatalem causam hic recurrendum putarent. Testis est Cicero in libro secundo de Divinatione, cap. 47 : « L. quidem Tarutius Firmanus, familiaris, » inquit, « noster, in primis Chaldaicis rationibus eruditus, urbis etiam nostræ natalem diem repetebat ab iis Parilibus, quibus eum a Romulo conditam accepimus, Romamque, in iugo cum esset luna, natam esse dicebat, nec ejus fata canere dubitabat. O vim maximam erroris! Etiamne urbis natalis dies ad vim stellarum et lunæ pertinebat? Fac in puero referre ex qua affectione cæli primum spiritum duxerit : num hoc in latere, aut in cæmento, ea quibus urbs effecta est, potuit valere? »

dicunt stellas, accepta quidem potestate a summo Deo, arbitrio suo ista decernere, sed in talibus necessitatibus ingerendis illius omnino jussa complere : itane de ipso Deo sentiendum est, quod indignissimum visum est de stellarum voluntate sentire? Quod si dicuntur stellæ significare potius ista quam facere; ut quasi locutio quædam sit illa positio, prædicans futura, non agens (non enim mediocriter doctorum hominum fuit ista sententia) : non quidem ita solent loqui mathematici, ut, verbi gratia, dicant, Mars ita positus homicidam significat; sed, homicidam facit¹ : verumtamen ut concedamus non eos ut debent loqui, et a philosophis accipere oportere sermonis regulam ad ea prænuntianda, quæ in siderum positione se reperire putant : qui sit², quod nihil unquam dicere potuerunt, cur in vita geminorum, in actionibus, in eventis, in professionibus, artibus, honoribus, cæterisque rebus ad humanam vitam pertinentibus, atque in ipsa morte sit plerumque tanta diversitas, ut similiores eis sint, quantum ad hæc attinet, multi extranei, quam ipsi inter se gemini, perexiguo temporis intervallo in nascendo separati, in conceptu autem per unum concubitum uno etiam momento seminati?

CAPUT II. — *De geminorum simili dissimilique valetudine.*

Cicero dicit, Hippocratem, nobilissimum medicum, scriptum reliquisse quosdam fratres, cum simul ægrotare cœpissent, et eorum morbus eodem tempore ingravesceret, eodem levaretur, geminos suspicatum (a). Quos Posidonius Stoicus, multum astrologiæ deditus, eadem constitutione astrorum natos eademque conceptos solebat asserere (b). ita quod medicus pertinere credebat ad simillimam temperiem valetudinis, hoc philosophus astrologus ad vim constitutionemque siderum, quæ fuerat quo tempore concepti nati que sunt. In hac causa multo est acceptabilior et de proximo credibilior conjectura medicinalis : quoniam parentes ut erant corpore affecti, dum concumberent, ita primordia conceptorum affici potuerunt, ut consecutis ex materno corpore prioribus incrementis pariter valetudinis nascerentur; deinde in una domo eisdem alimentis nutriti, ubi aerem et loci positionem et vim aquarum plurimum valere ad corpus vel bene vel male afficiendum³, medicina testatur; eisdem etiam exercitiis assuefacti tam similia corpora gererent, ut etiam ad ægrotandum uno tempore eisdem causis similiter moverentur. Constitutionem vero cæli ac siderum, quæ fuit quando concepti sive nati sunt, velle trahere ad istam ægrotandi parilitatem, cum tam multa diversissimi generis diversissimorum affectuum⁴ et even-

¹ Viud. Am. et Er.: *Homicidam non facit*. Abest, non, a cæteris libris.

² Sic nostri Mss. Nonnulli edunt, *qui sit*. M.

³ Ita Corbeiensis codex. Alii Mss. cum editis, *accipiendum*.

⁴ Mss. plerique, *effectuum*.

(a) Non invenitur in libris qui exstant Ciceronis et Hippocratis. Suspicio Ciceronem hoc dixisse in libello de Fato : quem qui attentius inspexerit, inveniet mutilum laceratumque, et plenum mendorum ad nostram ætatem pervenisse.

LUD. VIVES.

(b) Cicero. Tuscul. 2, de Divinat. 1, et de Offic. 3.

torum eodem tempore in unius regionis terra eidem cœlo subdita potuerint concipi et nasci, nescio cujus sit insolentia. Nos autem novimus habere geminos, non solum actus et peregrinationes habere diversas, verum etiam dispares ægritudines perpeti. De qua re facillimam, quantum mihi videtur, rationem redderet Hippocrates, diversis alimentis et exercitationibus, quæ non de corporis temperatione, sed de animi voluntate veniunt, dissimiles eis accidere potuisse valetudines. Porro autem Posidonius, vel quilibet fatalium siderum assertor, mirum si potest hic invenire quid dicat, si nollit imperitorum mentibus in eis, quas nesciunt, rebus illudere. Quod enim conantur efficere de intervallo exiguo temporis, quod inter se gemini, dum nascerentur, habuerunt, propter cœli particulam, ubi ponitur horæ notatio, quem horoscopum vocant; aut non tantum valet, quanta invenitur in geminorum voluntatibus, actibus, moribus, casibusque diversitas; aut plus etiam valet, quam est geminorum vel humilitas generis eadem, vel nobilitas, cujus maximam diversitatem non nisi in hora, qua quisque nascitur, ponunt. Ac per hoc, si tam celeriter alter post alterum nascitur, ut eadem pars horoscopi maneat, cuncta paria quæro, quæ in nullis possunt geminis inveniri: si autem sequentis tarditas horoscopum mutat, parentes diversos quæro, quos gemini habere non possunt.

CAPUT III. — *De argumento quod ex rota figuli Nigidius mathematicus assumpsit in questione geminorum.*

Frustra itaque affertur nobile illud commentum de figuli rota, quod respondisse ferunt Nigidium hac questione turbatum, unde et Figulus appellatus est (a). Dum enim rotam figuli vi quanta potuit intorsisset, currente illa bis numero de atramento tanquam uno ejus loco summa celeritate percussit; deinde inventa sunt signa, quæ fixerat, desistente motu, non parvo intervallo in rotæ illius extremitate distantia. Sic, inquit, in tanta rapacitate cœli, etiamsi alter post alterum tanta celeritate nascatur, quanta rotam bis ipse percussit, in cœli spatio plurimum est: hinc sunt, inquit, quæcumque dissimillima perhibentur in moribus casibusque geminorum. Hoc signum fragile est, quam vasa, quæ illa rotatione finguntur. Nam si tam multum in cœlo interest, quod constellationibus comprehendere non potest, ut alteri geminorum hæreditas obveniat, alteri non obveniat; cur audent cæteris, qui gemini non sunt, cum inspexerint eorum constellationes, talia pronuntiare, quæ ad illud secretum pertinent, quod nemo potest comprehendere, et momentis annotare nascentium? Si autem propterea talia dicunt in aliorum genituris, quia hæc ad productiora spatia temporum pertinent; momenta vero illa partium minutarum, quæ inter se gemini possunt habere nascentes, rebus minimis tribuuntur, de quibus mathematici non solent consuli: (quis enim consulat quando sedeat, quando deambulet, quando vel quid prandeat?) nunquid

(a) Nigidii meminit A. Gel., lib. 19, cap. 14, et Lucan., lib. 1, vers. 659 et seqq.

ista dicimus, quando in moribus, operibus, casibusque geminorum plurima plurimumque diversa monstramus?

CAPUT IV. — *De Esau et Jacob geminis, multum inter se morum et actionum qualitate disparibus.*

Nati sunt duo gemini antiqua patrum memoria (et de insignibus loquar) sic alter post alterum, ut posterior plantam prioris teneret. Tanta in eorum vita fuerunt moribusque diversa, tanta in actibus disparilitas, tanta in parentum amore dissimilitudo, ut etiam inimicos eos inter se faceret ipsa distantia (Gen. xxv, 24-34). Numquid hoc dicitur, quia uno ambulante alius sedebat, et alio dormiente alius vigilabat, alio loquente alius tacebat; quæ pertinent ad illas minutias, quæ non possunt ab eis comprehendi, qui constitutionem siderum, qua quisque nascitur, scribunt, unde mathematici consulantur? Unus duxit mercenariam servitutem, alius non servivit; unus a matre diligebatur, alius non diligebatur; unus honorem, qui magnus apud eos habebatur, amisit, alter indeptus est. Quid de uxoribus, quid de filiis, quid de rebus, quanta diversitas? [V.] Si ergo hæc ad illas pertinent minutias temporum, quæ inter se habent gemini, et constellationibus non adscribuntur; quare aliorum constellationibus inspectis ista dicuntur? Si autem ideo dicuntur, quia non ad minuta incomprehensibilia, sed ad temporum spatia pertinent, quæ observari notarique possunt; quid hic agit rota illa figuli, nisi ut homines luteum cor habentes in gyrum mittantur, ne mathematicorum vaniloquia convincantur?

CAPUT V. — *Quibus modis convincantur mathematici vanam scientiam profiteri.*

Quid iidem ipsi, quorum morbum, quod eodem tempore gravior leviorque apparebat amorum, medicinaliter inspiciens Hippocrates, geminos suspicatus est, nonne satis istos redarguant, qui volunt sideribus dare, quod de corporum simili temperatione veniebat? Cur enim similiter eodemque tempore, non alter prior, alter posterior ægrotabant, sicut nati fuerant, quia utique simul nasci ambo non poterant? Aut si nihil momenti attulit, ut diversis temporibus ægrotarent, quod diversis temporibus nati sunt; quare tempus in nascendo diversum ad aliarum rerum diversitates valere contendunt? Cur potuerunt diversis temporibus peregrinari, diversis temporibus ducere uxores, diversis temporibus filios procreare, et multa alia, propterea quia diversis temporibus nati sunt, et non potuerunt eadem causa diversis etiam temporibus ægrotare? Si enim dispar nascendi mora mutavit horoscopum, et disparilitatem intulit cæteris rebus; cur illud in ægritudinibus mansit, quod habebat in temporis æqualitate conceptus? Aut si fata valetudinis in conceptu sunt, aliarum vero rerum in ortu esse dicuntur, non deberent inspectis natalium constellationibus de valetudine aliquid dicere, quando eis inspicienda conceptionalis hora non datur. Si autem ideo prænuntiant ægritudines, non

inspecto conceptionis horoscopo, quia indicant eas momenta nascentium; quomodo dicerent cuilibet eorum geminorum ex nativitatis hora, quando ægrotaturus esset, cum et alter qui non habebat eandem horam nativitatis, necesse haberet pariter ægrotare? Deinde quero, si tanta distantia est temporis in nativitate geminorum, ut per hanc oporteat eis constellationes fieri diversas, propter diversum horoscopum, et ob hoc diversos omnes cardines (a), ubi tanta vis ponitur, ut hinc etiam diversa sint fata; unde hoc accidere potuit, cum eorum conceptus diversum tempus habere non possit? Aut si duorum uno momento temporis conceptionum potuerunt esse ad nascendum fata disparia, cur non et duorum uno momento temporis natorum possint esse ad vivendum atque moriendum fata disparia? Nam si unum momentum, quo ambo concepti sunt, non impedivit, ut alter prior, alter posterior nasceretur; cur, uno momento si duo nascuntur, impediatur aliquid, ut alter prior, alter posterior moriatur? Si conceptio momenti unius diversos casus in utero geminos habere permittit; cur nativitas momenti unius non etiam quoslibet duos in terra diversos casus habere permittat, ac sic omnia hujus artis vel potius vanitatis commenta tolerantur? Quid est hoc quod uno tempore, uno momento, sub una eademque cæli positione concepti diversa habent fata, quæ illos perducant ad diversarum horarum nativitatem, et uno momento temporis sub una eademque cæli positione de duabus matribus duo pariter nati, diversa fata habere non possunt, quæ illos perducant ad diversam vivendi vel moriendi necessitatem? An concepti nondum habent fata, quæ, nisi nascantur, habere non poterunt? Quid est ergo quod dicunt, si hora conceptionalis inveniatur, multa ab istis dici posse divinis? Unde etiam illud a nonnullis prædicatur, quod quidam sapiens horam elegit, qua cum uxore concumberet, unde filium mirabilem gigneret. Unde postremo et hoc est, quod de illis pariter ægrotantibus geminis Posidonius, magnus astrologus idemque philosophus, respondebat, ideo fieri, quod eodem tempore fuissent nati, eodemque concepti. Nam utique propter hoc addebat conceptionem, ne diceretur ei non ad liquidum eodem tempore potuisse nasci, quos constabat omnino eodem tempore fuisse conceptos; ut hoc, quod similiter simulque ægrotabant, non daret de proximo pari corporis temperamento, sed eandem quoque valetudinis paritatem sideris nexibus alligaret. Si igitur in conceptu tanta vis est ad æqualitatem factorum, non debuerunt nascendo eadem fata mutari. Aut si propterea mutantur fata geminorum, quia temporibus diversis nascuntur, cur non potius intelligamus jam fuisse mutata, ut diversis temporibus nascerentur? Itane non mutat fata nati-

vitatis voluntas viventium, cum mutet fata conceptionis ordo nascentium?

CAPUT VI. — *De geminis disparate sexus.*

Quamquam et in ipsis geminorum conceptibus, ubi certe amborum eadem momenta sunt temporum, unde fit ut sub eadem constellatione fatali alter concipiatur masculus, altera femina? Novimus geminos diversi sexus, ambo adhuc vivunt, ambo ætate vigent adhuc; quorum cum sint inter se similes corporum species, quantum in diverso sexu potest; instituto tamen et proposito vite ita sunt dispares, ut, præter actus, quos necesse est a virilibus distare, femineos, quod ille in officio Comitum militat et a sua domo pene semper peregrinatur, illa de solo patrio et de rure proprio non recedit: insuper (quod est incredibile, si astra fata credantur; non autem mirum, si voluntates hominum et Dei munera cogitentur), ille conjugatus, illa virgo sacra est; ille numerosam prolem genuit, illa nec nupsit. At enim plurimum vis horoscopi valet? Hoc quam nihil sit, jam satis disserui. Sed qualecumque sit, in ortu valere dicunt: numquid et in conceptu? ubi et unum concubitus esse manifestum est; et tanta naturæ vis est, ut cum conceperit femina, deinde alterum concipere omnino non possit (a): unde necesse est, eadem esse in geminis momenta conceptus. An forte, quia diverso horoscopo nati sunt, aut ille in masculum, dum nascerentur, aut illa in feminam commutata est? Cum igitur non usquequaque absurde dici posset, ad solas corporum differentias afflatus quosdam valere sidereos, sicut in solaribus accessibus et recessibus videmus etiam ipsius anni tempora variari, et lunaribus incrementis atque decrementis augeri et minui quædam genera rerum, sicut echinos, et conchas, et mirabiles æstus oceani; non autem et animi voluntates positionibus siderum subdi: nunc isti, cum etiam nostros actus inde religare conantur, admonent ut queramus, unde ne in ipsis quidem corporibus eis possit ratio ista constare. Quid enim tam ad corpus pertinens, quam corporis sexus? et tamen sub eadem positione siderum diversi sexus gemini concipi potuerunt. Unde quid insipientius dici aut credi potest, quam siderum positionem, quæ ad horam conceptionis eadem ambobus fuit, facere non potuisse, ut, cum quo habebat eandem constellationem, sexum diversum a fratre non haberet; et positionem siderum, quæ fuit ad horam nascentium, facere potuisse, ut ab eo tam multum virginali sanctitate distaret?

CAPUT VII. — *De electione diei quo uxor ducitur, quove in agro aliquid plantatur aut seritur.*

Jam illud quis ferat, quod in eligendis diebus nova quædam suis actibus fata moluntur? Non erat videlicet ille ita natus, ut haberet admirabilem filium; sed ita potius, ut contemptibilem gigneret: et ideo vir

Editi, *divinitus*. At Mss. alii, *divinius*; alii, quod magis placet, *divinia*, id est mathematicis diviniandi artem profitentibus. — Nostri Mss., *divinius*. M.

(a) De his astrologicis cardinibus Manilius lib. 2. vers. 903 et seqq.

(a) Fieri tamen posse ut superferat mulier, et factum esse nonnunquam ut concepto uno fetu alterum conceperit, docet Aristoteles, lib. 7 de historia animalium, cap. 4. Plinius, lib. 7, cap. 11; et Hippocrates, lib. de Superfuitatione

doctus elegit horam qua misceretur uxori. Fecit ergo fatum, quod non habebat, et ex ipsius facto cepit esse fatale, quod in ejus nativitate non fuerat. O stultitiam singularem! Eligitur dies ut ducatur uxor: credo, propterea quia potest in diem non bonum, nisi eligatur, incurri, et infeliciter duci. Ubi est ergo quod nascenti jam sidera deereverunt? an potest homo, quod ei jam constitutum est, diei electione mutare, et quod ipse in eligendo die constituerit, non poterit ab alia potestate mutari? Deinde si soli homines, non autem omnia quæ sub cælo sunt, constellationibus subjacent, cur alios eligunt dies accommodatos ponendis vitibus, vel arboribus, vel segetibus; alios dies pecoribus vel domandis, vel admittendis maribus, quibus equarum vel boum fetentur armenta, et cætera hujusmodi? Si autem propterea valent ad has res dies electi, quia terrenis omnibus corporibus, sive animantibus, sive non animantibus, secundum diversitates temporalium momentorum, siderum positio dominatur; considerent quam innumerabilia sub uno temporis puncto vel nascantur, vel oriantur, vel inchoentur, et tam diversos exitus habeant, ut istas observationes cuius pæro ridendas esse persuadeant. Quis enim est tam excors, ut audeat dicere, omnes arbores, omnes herbas, omnes bestias, serpentes, aves, pisces, vermiculos, momenta nascendi singillatim habere diversa? Solent tamen homines ad tentandam peritiam mathematicorum afferre ad eos constellationes mutuum animalium, quorum ortus propter hanc explorationem domi suæ diligenter observant, eosque mathematicos præferunt cæteris, qui constellationibus inspectis dicunt non esse hominem natum, sed pecus. Audent etiam dicere quale pecus, utrum aptum lanicio, an vocationi, an aratro, an custodiæ domus. Nam et ad canina fata tentantur, et cum magnis admirantium clamoribus ista respondent. Sic desipiunt homines, ut existiment, cum homo nascitur, cæteros rerum ortus ita inhiberi, ut cum illo sub eadem cæli plaga nec musca nascatur. Nam si hanc admiserint, procedit ratiocinatio, quæ gradatim accessibus modicis eos a muscis ad camelos elephantosque perducit. Nec illud volunt advertere, quod electo ad seminandum agrum die, tam multa grana in terram simul veniunt, simul germinant, exorta segete simul herbescunt, pubescunt, flavescunt; et tamen inde spicas cæteris cœvas, atque, ut ita dixerim, congerminales, alias rubigo interimit, alias aves depopulantur, alias homines avellunt. Quomodo istis alias constellationes fuisse dicturi sunt, quas tam diversos exitus habere conspiciunt? an eos pœnitebit his rebus dies eligere, easque ad cœleste negabunt pertinere decretum, et solos sideribus subdent homines, quibus solis in terra Deus dedit liberas voluptates? His omnibus consideratis, non immerito creditur, cum astrologi mirabiliter multa vera respondent, occulto instinctu fieri spirituum non donorum, quorum cura est has falsas et noxias opiniones de astralibus factis in-

¹ Editi, dissentientibus scriptis libri, *fata*.

² Mss., *cur aliter eligunt dies*.

³ Manuscripti non habent, *sive non animantibus*.

serere humanis mentibus atque firmare, non horoscopi notati et inspecti aliqua arte, quæ nulla est.

CAPUT VIII. — *De his qui non astrorum positionem, sed connexionem causarum ex Dei voluntate pendentem fati nomine appellant.*

Qui vero non astrorum constitutionem, sicuti est cum quidque concipitur, vel nascitur, vel inchoatur, sed omnium connexionem seriemque causarum, qua fit omne quod fit, fati nomine appellant; non multum cum eis de verbi controversia laborandum atque certandum est; quandoquidem ipsum causarum ordinem et quandam connexionem Dei summi tribuunt voluntati et potestati, qui optime et veracissime creditur et cuncta scire antequam fiant, et nihil inordinatum relinquere; a quo sunt omnes potestates, quamvis ab illo non sint omnium voluntates. Ipsam itaque præcipue Dei summi voluntatem, cujus potestas insuperabiliter per cuncta porrigitur, eos appellare fatum sic probatur. Annæi Senecæ sunt, nisi fallor, hi versus:

Duo, summe pater, aliquæ dominator poli,
Quocumque placuit, nulla parendi mora est.
Adsum impiger: fac molle, comitabor gemens,
Nihilque parat facere quod licuit bono.
Ducunt volentem fata, nolentem trahunt (a).

Nempe evidentissime hoc ultimo versu ea fata appellavit, quam supra dixerat summi patris voluntatem: cui se paratum obedire dicit, ut volens ducatur, ne nolens trahatur; quoniam scilicet

Ducunt volentem fata, nolentem trahunt.

Illi quoque versus Homericæ huic sententiæ suffragantur, quos Cicero in latinum vertit:

Tales sunt hominum mentes, quali pater ipse
Jupiter auctiheras lustravit lumine terras (b).

Nec in hac quæstione auctoritatem haberet poetica sententia: sed quoniam Stoicos dicit, vim fati asserentes, istos ex Homero versus solere usurpare, non de illius poetæ, sed de istorum philosophorum opinione tractatur, cum per istos versus, quos disputationi adhibent, quam de fato habent, quid sentiant esse fatum, apertissime declaratur, quoniam Jovem appellant, quem summum deum putant, a quo connexionem dicunt pendere fatorum.

CAPUT IX. — *De præscientia Dei et libera hominis voluntate, contra Ciceronis definitionem.*

1. Hos Cicero ita redarguere nititur, ut non existimet aliquid se adversus eos valere, nisi auferat divinationem (c). Quam sic conatur auferre, ut neget esse

¹ Corbeiensis male, *libuit*; et, *bono*, in rasura. M.

² Editi, *qualis*. At prænotæ Mss., *quali*. Et quidam, *quales*. In altero versu Colbertinus codex, loco, *auctiheras*; habet, *astrihero*, Neutra lectio respondet græco sic nunc habenti:

Τὸς γὰρ νοὸς ἐστὶν ἐπιχθονίων ἀνθρώπων,
Ὅταν ἐπ' ἔμῳ ἀγέῃ πατέρ' ἀνδρῶν τε θεῶν τε.

Id est,

Talis mens est terrestrium hominum,
Qualem diem adducat pater hominumque deorumque.

(a) Epist. 107 prope finem.

(b) Odysseæ 18, vers. 136, 137.

(c) Lib. 2 de Divinat.

scientiam futurorum, eaque omnibus viribus nullam esse omnino contendat, vel in Deo, vel in homine¹, nullamque rerum prædictionem. Ita et Dei præscientiam negat, et omnem prophetiam luce clariorem conatur evertere vanis argumentationibus, et opponendo sibi quædam oracula, quæ facile possunt refelli: quæ tamen nec ipsa vincit. In his autem mathematicorum conjecturis refutandis ejus regnat oratio; quia vere tales sunt, ut se ipsæ destruant et refellant. Multo sunt autem tolerabiliores qui vel siderea fata constituunt, quam iste, qui tollit præscientiam futurorum. Nam et confiteri esse Deum et negare præscium² futurorum, apertissima insaniam est. Quod et ipse cum videret, etiam illud tentavit asserere, quod scriptum est, *Dicit insipiens in corde suo, Non est Deus (Psal. xiii, 1)*: sed non ex sua persona. Vidit enim quam esset invidiosum et molestum: ideoque Cottam fecit disputantem de hac re adversum Stoicos in libris de deorum Natura (*Libro 3*), et pro Lucilio Balbo, cui Stoicorum partes defendendas dedit, maluit ferre sententiam, quam pro Cotta, qui nullam naturam divinam esse contendit. In libris vero de Divinatione ex se ipso apertissime oppugnat præscientiam futurorum. Hoc autem totum facere videtur, ne fatum esse consentiat, et perdat liberam voluntatem. Putat enim, concessa scientia futurorum, ita esse consequens fatum, ut negari omnino non possit. Sed quoquo modo se habeant tortuosissimæ concertationes et disputationes philosophorum, nos ut constemur summum et verum Deum, ita voluntatem summamque potestatem ac præscientiam ejus constemur. Nec timeamus ne ideo non voluntate faciamus, quod voluntate facimus, quia id nos facturos ille præscivit, cujus præscientia falli non potest. Quod Cicero timuit, ut oppugnaret præscientiam; et Stoici, ut non omnia necessitate fieri dicerent, quamvis omnia fato fieri contenderent.

2. Quid est ergo quod Cicero timuit in præscientia futurorum, ut eam labefactare disputatione detestabili niteretur? Videlicet quia si præscita sunt omnia futura, hoc ordine venient, quo ventura esse præscita sunt: et si hoc ordine venient, certus est ordo rerum præscienti Deo: et si certus est ordo rerum, certus est ordo causarum; non enim aliquid fieri potest, quod non aliqua efficiens causa præcesserit: si autem certus est ordo causarum, quo fit omne quod fit; *fato, inquit, fiunt omnia quæ fiunt*. Quod si ita est, nihil est in nostra potestate, nullumque est arbitrium voluntatis: *quod si concedimus, inquit, omnis humana vita subvertitur; frustra leges dantur; frustra objurgationes, laudes, vituperationes, exhortationes adhibentur; neque ulla justitia bonis præmia, et malis supplicia constituta sunt*. Hæc ergo ne consequantur indigna et absurda et perniciosa rebus humanis, non vult esse præscientiam futurorum: atque in has angustias coarctat animum religiosum, ut unum eligat e duobus, aut esse aliquid in nostra voluntate, aut esse

præscientiam futurorum: quoniam utrumque arbitratur esse non posse, sed si alterum confirmabitur, alterum tolli; si elegerimus præscientiam futurorum, tolli voluntatis arbitrium; si elegerimus voluntatis arbitrium, tolli præscientiam futurorum. Ipse itaque ut vir magnus et doctus, et vitæ humanæ plurimum ac peritissime consulens, ex his duobus elegit liberum voluntatis arbitrium: quod ut confirmaretur, negavit præscientiam futurorum: atque ita, dum vult facere liberos, fecit sacrilegos. Religiosus autem animus utrumque eligit, utrumque constituit, et fide pietatis utrumque confirmat. Quomodo, inquit? Nam si est præscientia futurorum, sequentur illa omnia, quæ connexa sunt, donec eo perveniatur, ut nihil sit in nostra voluntate. Porro si est aliquid in nostra voluntate, eisdem recursis gradibus eo pervenitur, ut non sit præscientia futurorum. Nam per illa omnia sic recurritur: Si est voluntatis arbitrium, non omnia fato fiunt: si non omnia fato fiunt, non est omnium certus ordo causarum: si certus causarum ordo non est, nec rerum certus est ordo præscienti Deo, quæ fieri non possunt, nisi præcedentibus et efficientibus causis: si rerum ordo præscienti Deo certus non est, non omnia sic veniunt, ut ea ventura præscivit: porro si non omnia sic veniunt, ut ab illo ventura præscita sunt, non est, inquit, in Deo præscientia omnium futurorum.

3. Nos adversus istos sacrilegos ausus atque impios, et Deum dicimus omnia scire antequam fiant, et voluntate nos facere, quidquid a nobis non nisi volentibus fieri sentimus et novimus. Omnia vero fato fieri non dicimus, imo nulla fieri fato dicimus: quoniam fati nomen ubi solet a loquentibus poni, id est in constitutione siderum cum quisque conceptus aut natus est (quoniam res ipsa inaniter asseritur), nihil valere monstramus. Ordinem autem causarum, ubi voluntas Dei plurimum potest, neque negamus, neque fati vocabulo nuncupamus, nisi forte ut fatum a fando dictum intelligamus, id est a loquendo (a): non enim abnuere possumus esse scriptum in Litteris sanctis, *Semel locutus est Deus, duo hæc audivi; quoniam potestas Dei est, et tibi, Domine, misericordia, quia tu reddes unicuique secundum opera ejus (Psal. lxi, 12, 13)*. Quod enim dictum est, *Semel locutus est*, intelligitur, immobiliter, hoc est incommutabiliter, est locutus, sicut novit incommutabiliter omnia quæ futura sunt, et quæ ipse facturus est. Hac itaque ratione possemus a fando fatum appellare, nisi hoc nomen jam in alia re solet intelligi, quo corda hominum nolumus inclinari. Non est autem consequens, ut, si Deo certus est omnium ordo causarum, ideo nihil sit in nostræ voluntatis arbitrio. Et ipsæ quippe nostræ voluntates in causarum ordine sunt, qui certus est Deo ejusque præscientia continetur; quoniam et humanæ voluntates humanorum operum causæ sunt. Atque ita qui omnes rerum causas præscivit, profecto

¹ Nostri omnes Mss., vel in homine, vel in deo. M.

² Manuscripti, præscientiam. — At Codd. 2030 et 2032, præscium. M.

(a) A fando fere omnes scriptores veteres derivant, sed variis modis. « Quod constituunt Paræ fando, » inquit Vatro, de Lingua Latina, lib. 6, § 32.

in eis causis etiam nostras voluntates ignorare non potuit, quas nostrorum operum causas esse præscivit.

4. Nam et illud quod idem Cicero concedit¹ nihil fieri si causa efficiens non præcedat (*Libro de Fato, cap. 10, et seqq.*), satis est ad eum in hac quæstione redarguendum. Quid enim eum adjuvat, quod dicit, nihil quidem fieri sine causa, sed non omnem causam esse fatalem; quia est causa fortuita, est naturalis, est voluntaria? Sufficit quia omne quod fit, non nisi causa præcedente fieri constitetur. Nos enim eas causas, quæ dicuntur fortuitæ, unde etiam fortuna nomen accepit, non esse dicimus nullas, sed latentes; easque tribuimus vel Dei veri, vel quorumlibet spirituum voluntati: ipsasque naturales nequaquam ab illius voluntate sejungimus, qui est auctor omnis conditorque naturæ. Jam vero causæ voluntariæ aut Dei sunt, aut Angelorum, aut hominum, aut quorumque animalium: si tamen appellandæ sunt voluntates animalium² rationis expertium motus illi, quibus aliqua faciunt secundum naturam suam, cum quid vel appetunt³, vel evitant. Angelorum autem voluntates dico, sive bonorum, quos Angelos Dei dicimus; sive malorum, quos angelos diaboli vel etiam dæmones appellamus: sic et hominum bonorum scilicet et malorum. Ac per hoc colligitur, non esse causas efficientes omnium quæ sunt, nisi voluntarias, illius naturæ scilicet quæ spiritus vitæ est. Nam et aer iste seu ventus, dicitur spiritus: sed quoniam corpus est, non est spiritus vitæ. Spiritus ergo vitæ, qui vivificat omnia, creatorque est omnis corporis et omnis creati spiritus, ipse est Deus, spiritus utique non creatus. In ejus voluntate summa potestas est, quæ⁴ creatorum spirituum voluntates bonas adjuvat, malas judicat, omnes ordinat; et quibusdam tribuit potestates⁵, quibusdam non tribuit. Sicut enim omnium naturarum creator est, ita omnium potestatum dator, non voluntatum. Malæ quippe voluntates ab illo non sunt; quoniam contra naturam sunt, quæ ab illo est. Corpora igitur magis subjacent voluntatibus; quædam nostris, id est omnium animantium mortalium, et magis hominum quam bestiarum; quædam vero angelorum: sed omnia maxime Dei voluntati subdita sunt; cui etiam voluntates omnes subjiciuntur, quia non habent potestatem nisi quam ille concedit. Causa itaque rerum quæ facit, nec fit, Deus est. Aliæ vero causæ et faciunt, et fiunt; sicut sunt omnes creati spiritus, maxime rationales. Corporales autem causæ, quæ magis fiunt, quam faciunt, non sunt inter causas efficientes annumerandæ; quoniam hoc possunt, quod ex ipsis faciunt spirituum voluntates. Quomodo igitur ordo causarum, qui præscienti certus est Deo, id efficit, ut nihil sit in nostra voluntate, cum in ipso causarum ordine magnum habeant locum nostræ voluntates? Contendat ergo Cicero cum eis, qui hunc cau-

sarum ordinem dicant esse fatalem, vel potius ipsum fati nomine appellant (*Libro de Fato, capp. 11, 12*); quod nos abhorremus, præcipue propter vocabulum, quod non in re vera consuevit intelligi. Quod vero negat ordinem omnium causarum esse certissimum et Dei præscientiæ notissimum, plus enim quam Stoici detestamur. Aut enim Deum esse negat, quod quidem inducta alterius persona in libris de Deorum Natura facere molitus est: aut si esse constitetur Deum, quem negat præscium futurorum, etiam sic dicit nihil aliud, quam quod ille dicit *insipiens in corde suo, Non est Deus (Psal. xiii, 1)*. Qui enim non est præscius omnium futurorum, non est utique Deus. Quapropter et voluntates nostræ tantum valent, quantum Deus eas valere voluit atque præscivit: et ideo quidquid valent, certissime valent; et quod facturæ sunt, ipsæ omnino facturæ sunt: quia valituras atque facturas ille præscivit, cujus præscientia falli non potest. Quapropter si mihi fati nomen alicui rei adhibendum placeret, magis dicerem fatum esse inferioris, potentioris voluntatem, qui eum habet in potestate, quam illo causarum ordine, quem non usitato, sed suo more Stoici fatum appellant, arbitrium nostræ voluntatis auferri.

CAPUT X. — *An voluntatibus hominum aliqua dominetur necessitas.*

1. Unde nec illa necessitas formidanda est, quam formidando Stoici laboraverunt causas rerum ita distinguere, ut quasdam subtraherent necessitati, quasdam subderent: atque in his quas esse sub necessitate noluerunt, posuerunt etiam nostras voluntates, ne videlicet non essent liberæ, si subderentur necessitati. Si enim necessitas nostra illa dicenda est, quam non est in nostra potestate, sed, etiamsi nolimus, efficit quod potest, sicut est necessitas mortis; manifestum est voluntates nostras, quibus recte vel perpetuam vivitur, sub tali necessitate non esse. Multa enim facimus, quæ, si nollemus, non utique faceremus. Quo primitus pertinet ipsum velle: nam, si volumus, est; si nolimus, non est: non enim vellemus, si nollemus. Si autem illa definitur esse necessitas, secundum quam dicimus necesse esse ut ita sit aliquid, vel ita fiat; nescio cur eam timeamus, ne nobis libertatem auferat voluntatis. Neque enim et vitam Dei et præscientiam Dei sub necessitate ponimus, si dicimus necesse esse Deum semper vivere, et cuncta præscire: sicut nec potestas ejus minuitur, cum dicitur mori fallique non posse. Sic enim hoc non potest, ut potius, si posset, minoris esset utique potestatis. Recte quippe omnipotens dicitur, qui tamen mori et falli non potest. Dicitur enim omnipotens faciendo quod vult, non patiendo quod non vult: quod ei si accideret, nequaquam esset omnipotens. Unde propterea quædam non potest, quia omnipotens est. Sic etiam, cum dicimus necesse esse ut, cum volumus, libero velimus arbitrio; et verum procul dubio dicimus, et non ideo ipsum liberum arbitrium necessitati subjicimus, quæ adimit libertatem. Sunt igitur

¹ Vind. Am. Er., *contendit*.

² Hoc loco Mss., *animarum*.

³ Sola editio Lov., *cum quid boni mativæ vel appetunt*.

⁴ Sic Vind. Er. et plures Mss. At Lov., *qui*. Nonnulli e Mss., *qua*.

⁵ Ita in Mss. In editis vero, *potestatem*.

nostræ voluntates, et ipsæ faciunt quidquid volendo facimus, quod non fieret, si nollemus. Quidquid autem aliorum hominum voluntate nolens quisque patitur, etiam sic voluntas valet; etsi non illius tamen hominis voluntas, sed potestas Dei¹. Nam si voluntas tantum esset, nec posset quod vellet, potentiore voluntate impediretur: nec sic tamen voluntas, nisi voluntas esset; nec alterius, sed ejus esset, qui vellet, etsi non posset implere quod vellet. Unde quidquid præter suam voluntatem patitur homo, non debet tribuere humanis vel angelicis vel cujusquam creati spiritus voluntatibus, sed ejus potius, qui dat potestatem volentibus.

2. Non ergo propterea nihil est in nostra voluntate, quia Deus præscivit quid futurum esset in nostra voluntate: non enim qui hoc præscivit, nihil præscivit. Porro si ille, qui præscivit quid futurum esset in nostra voluntate, non utique nihil, sed aliquid præscivit; profecto et illo præsciente est aliquid in nostra voluntate. Quocirca nullo modo cogimur, aut retenta præscientia Dei tollere voluntatis arbitrium, aut retento voluntatis arbitrio Deum (quod nefas est) negare præscium futurorum: sed utrumque amplectimur, utrumque fideliter et veraciter constitemur; illud, ut bene credamus; hoc, ut bene vivamus. Male autem vivitur, si de Deo non bene creditur. Unde absit a nobis ejus negare præscientiam, ut liberi esse velimus², quo adjuvante sumus liberi, vel erimus. Proinde non frustra sunt leges, objurgationes, exhortationes, laudes et vituperationes: quia et ipsas futuras esse præscivit, et valent plurimum, quantum eas valituras esse præscivit; et preces valent ad ea impetranda, quæ se precantibus concessurum esse præscivit: et juste præmia bonis factis, et peccatis supplicia constituta sunt. Neque enim ideo peccat homo³, quia Deus illum peccaturum esse præscivit: imo ideo non dabitur ipsum peccare, cum peccat, quia ille, cujus præscientia falli non potest, non fatum, non fortunam, non aliquid aliud, sed ipsum peccaturum esse præscivit. Qui si nolit, utique non peccat: sed si peccare noluerit, etiam hoc ille præscivit.

CAPUT XI. — *De universali providentia Dei, cujus legibus omnia continentur.*

Deus itaque summus et verus cum Verbo suo et Spiritu sancto, quæ tria unum sunt, Deus unus omnipotens, creator et factor omnis animæ atque omnis corporis: cujus sunt participatione felices, quicumque sunt veritate, non vanitate felices: qui fecit hominem rationale animal ex anima et corpore; qui eum peccantem nec impunitum esse permisit, nec sine misericordia dereliquit; qui bonis et malis essentiam etiam cum lapidibus, vitam seminalem etiam cum arboribus, vitam sensualem etiam cum pecoribus, vitam intellectualem cum solis Angelis dedit: a quo est omnis modus, omnis species, omnis ordo; a quo est mensura, numerus, pondus; a

¹ Lov., *Dei est. Verbo, est.* carent libri cæteri.

² Omnes prope Mss., *ut libere velimus.*

³ Plures probæ notæ Mss., *Faurensis, Corbeiensis, etc. Neque enim ideo non peccat homo. Gervasianus, Nec peccat homo.*

quo est quidquid naturaliter est, cujuscumque generis est, cujuslibet æstimationis est; a quo sunt semina formarum, formæ seminum, motus seminum atque formarum: qui dedit et carni originem, probritudinem, valetudinem, propagationis fecunditatem, membrorum dispositionem, salutem concordiæ: qui et animæ irrationali dedit memoriam, sensum, appetitum; rationali autem insuper mentem, intelligentiam, voluntatem: qui non solum cælum et terram, nec solum angelum et hominem; sed nec exigui et contemptibilis animantis viscera, nec avis penulam¹, nec herbæ flosculum, nec arboris folium sine suarum partium convenientia, et quadam veluti pace dereliquit: nullo modo est credendus regna hominum eorumque dominationes et servitutes a suæ providentiæ legibus alienas esse voluisse.

CAPUT XII. — *Quibus moribus antiqui Romani meruerint ut Deus verus, quamvis non eum colerent, eorum auget imperium.*

1. Proinde videamus quos Romanorum mores, et quam ob causam Deus verus ad augendum imperium adjuvare dignatus est, in cujus potestate sunt etiam regna terrena. Quod ut absolutius disserere possemus, ad hoc pertinentem et superiorem librum conscripsimus, quod in hac re potestas nulla sit eorum deorum, quos etiam rebus nugatoriis colendos putarunt; et præsentis voluminis partes superiores, quas huc usque perduximus, de fuit quæstione tollenda: ne quisquam, cui jam persuasum esset non illorum deorum cultu Romanum imperium propagatum atque servatum, nescio cui fato potius id tribueret, quam Dei summi potentissimæ voluntati. Veteres igitur primique Romani, quantum eorum docet et commendat historia, quamvis ut aliæ gentes, excepta una populi Hebræorum, deos falsos colerent, et non Deo victimas, sed dæmoniis immolarent, tamen *laudis avidi, pecuniæ liberales erant, gloriam ingentem, divitias honestas volebant* (*Sallust. in Catil., cap. 7*): hanc ardentissime dilexerunt, propter hanc vivere voluerunt, pro hac emori non dubitaverunt². Cæteras cupiditates hujus unius ingenti cupiditate presserunt. Ipsam denique patriam suam, quoniam servire videbatur ingloriorum, dominari vero atque imperare gloriosam, prius omni studio liberam, deinde dominam esse concupierunt. Hinc est quod regalem dominationem non ferentes, annua imperia binosque imperatores sibi fecerunt, qui consules appellati sunt a consulendo, non reges aut domini a regnando atque dominando: cum et reges utique a regendo dicti melius videantur, ut regnum a regibus, reges autem, ut dictum est, a regendo; sed fastus regius non disciplina putata est regentis, vel benevolentia consulentis, sed superbia dominantis. Expulso itaque rege Tarquinio, et consulibus institutis, secutum est quod idem auctor in Romanorum laudibus posuit, quod *idem civitas, incredibile memoratus est, adepta libertate quantum brevi creverit, tanta cupido gloriæ inces-*

¹ Nostri Mss., *pimulam.* M.

² Plures Mss., *vincere voluerunt.* — In B., *pro hac et*

serat (*Sallust. in Catil. cap. 7*). Ista ergo laudis aviditas et cupido gloriæ multa illa miranda fecit, laudabilia scilicet atque gloriosa secuudum hominum existimationem.

2. Laudat idem Sallustius temporibus suis magnos et præclaros viros, Marcum Catonem et Caium Cæsarem, dicens quod diu illa respublica non habuit quemquam virtute magnum, sed sua memoria fuisse illos duos ingenti virtute, diversis moribus. In laudibus autem Cæsaris posuit, quod sibi magnum imperium, exercitum, bellum novum exoptabat, ubi virtus enitescere posset (*Ibid., capp. 53, 54*). Ita fiebat¹ in votis virorum virtute magnorum, ut excitaret in bellum miseræ gentes, et flagello agigaret Bellona sanguineo, ut esset ubi virtus eorum enitesceret. Hoc illa profecto laudis aviditas et gloriæ cupido faciebat. Amore itaque primitus libertatis, post etiam dominationis, et cupiditate laudis et gloriæ, multa magna fecerunt. Reddit eis utriusque rei testimonium etiam poeta insignis illorum: inde quippe ait,

Nonne Tarquinium ejectum Porsenna jubebat,
Accipere, ingentique urbem obsidione premebat:
Æneadæ in ferrum pro libertate ruebat.
(*Virgil. Æneid. lib. 8, vers. 646-648.*)

Tunc itaque magnum illis fuit aut fortiter emori, aut liberos vivere. Sed cum esset adepta libertas, tanta cupido gloriæ incesserat, ut parum esset sola libertas, nisi et dominatio quæreretur, dum pro magno haberetur quod, velut loquente Jove, idem poeta dicit,

Quæ aspera Juno, metu cælumque fatigat,
Cousilia in melius referet, necumque forebit
Romanos rerum dominos gentemque togatam.
Sic placitum. Veniet lustris labentibus ætas,
Cum domus Assaraci Phthiam clarasque Mycenæ
Servitio premet, ac victis dominabitur Argis.
(*Æneid. lib. 1, vers. 279-283.*)

Quæ quidem Virgilius, Jovem inducens tanquam futura prædicentem, ipse jam facta recolebat, cernebatque præsentia: verum propterea commemorare illa volui, ut ostenderem dominationem post libertatem sic habuisse Romanos, ut in eorum magnis laudibus poneretur. Hinc est et illud ejusdem poetæ, quod, cum aliarum gentium artibus eas ipsas proprias Romanorum artes regnandi atque imperandi et subigendi ac debellandi populos anteponeret, ait,

Excudent alii spirantia mollis æra:
Credo equidem, vivos ducent de marmore vultus:
Orabunt causas melius; cœlique meatus
Describent radio, et surgentia² sidera dicent.
Tu regere imperio populos, Romane, memento.
Hæc tibi erunt artes, pacique³ imponere morem,
Parcere subjectis, et debellare superbos.
(*Æneid. lib. 6, vers. 847-853.*)

3. Has artes illi tanto peritius exercebant, quanto minus se voluptatibus dabant, et enervationi animi et corporis in concupiscendis et augendis divitiis, et mori non dubitaverunt. Sic etiam Cdd. 2051 et 2053; at Ms. 2052, propter hanc et mori non dubitaverunt. Cd. 2050, propter hanc vivere voluerunt, propter hanc vincere voluerunt, propter hanc emori non dubitaverunt. Lectionem Ms. 766 secuti sumus. M.

¹ Editi, fidebat. Castigantur auctoritate veterum manucriptorum.

² Ms. 766, fulgentia. M.

³ Lov., pacisque. Editi alii cum manuscriptis, pacique.

per illas moribus corrumpendis, rapiendo r. aseris civibus, largiendo scenicis turpibus. Unde qui tales jam morum labes¹ superabant atque abundabant, quando scribebat ista Sallustius, caneabatque Virgilius, non illis artibus ad honores et gloriam, sed dolis atque fallaciis ambiebant. Unde idem dicit: *Sed primo magis ambitio quam avaritia animos hominum exercebat, quod tamen vitium propius virtutem² erat. Nam gloriam, honorem, imperium bonus et ignavus æque sibi exoptant: sed ille, inquit, vera via nititur; huic quæ bonæ artes desunt, dolis atque fallaciis contendit* (*Sallust. in Catil., c. 11*). Hæ sunt illæ bonæ artes, per virtutem scilicet, non per fallacem ambitionem ad honorem et gloriam et imperium pervenire; quæ tamen bonus et ignavus æque sibi exoptant: sed ille, id est bonus, vera via nititur. Via virtus est, qua nititur tanquam ad possessionis finem, id est ad gloriam, honorem, imperium. Hoc insitum habuisse Romanos, etiam deorum apud illos ædes indicant, quas conjunctissimas constituerunt, Virtutis et Honoris (a), pro diis habentes quæ dantur a Deo. Unde intelligi potest quem finem volebant esse virtutis, et quo eam referebant, qui boni erant, ad honorem scilicet: nam mali nec habebant eam, quamvis honorem habere cuperent, quem malis artibus conabantur adipisci, id est dolis atque fallaciis.

4. Melius laudatus est Cato. De illo quippe ait, *Quo minus petebat gloriam, eo illum magis sequebatur* (b) (*Ibid., cap. 54*). Quandoquidem gloria est, cujus illi cupiditate flagrabant, judicium hominum bene de hominibus opinantium. Et ideo melior est virtus, quæ humano testimonio³ contenta non est, nisi conscientia suæ. Unde dicit Apostolus, *Nam gloria nostra hæc est, testimonium conscientia nostræ* (II Cor. 1, 12). Et alio loco, *Opus autem suum probet unusquisque, et tunc in semetipso tantum gloriam habebit, et non in altero* (*Galat. vi, 4*). Gloriam ergo et honorem et imperium, quæ sibi exoptabant, et quo bonis artibus pervenire nitebantur boni, non debet equi virtus, sed ipsa virtutem. Neque enim est vera virtus, nisi quæ ad eum finem tendit, ubi est bonum hominis. quo melius non est. Unde et honores quos petivit Cato, petere non debuit, sed eos civitas ob ejus virtutem non petenti dare (c).

5. Sed cum illa memoria duo Romani essent virtute magni, Cæsar et Cato, longe virtus Catonis veritati videtur propinquior fuisse, quam Cæsaris. Pro-

¹ Nonnulli Mss., *labe*: librariorum solemnium vitio omissa littera extrema, quia eadem est prima subsequentis vocabuli, in quo clarius sonabat pronuntiantem lectore. Paulo ante legendum forsitan, *quia tales*; aut certe, *labes morum* hic ipsi appellantur homines vitiosi; quomodo a Plauto in *Persa*, act. 3, scen. 3, vers. 4, dicitur homo, «labes populi»; et a Cicerone, *Orat., pro Sext. cap. 8*, «Habeo quod opponam tibi illi et cœno. — Nostri Mss., *labe*. Sic legit Morcl, Element. Critic., pag. 289: *Undique tales jam morum labes superabant atque abundabant, quando scribebat ista Sallustius, caneabatque Virgilius*. M.

² Editi, *propius virtuti*. At Mss., *propius virtutem*. Et sic in antiquis exemplaribus Sallustii.

³ Ms. 766, *judicio*. M.

(a) Liv., lib. 37, cap. 25.

(b) Apud Sallustium, *eo magis illam assequatur*.

(c) Id. Plutarch. in *Catone minore*.

inde qualis esset illo tempore civitas, et antea qualis fuisset, videamus in ipsa sententia Catonis: *Nolite, inquit, existimare, majores nostros armis rempublicam ex parva magnam fecisse. Si ita esset, multo pulcherrimam eam nos haberemus. Quippe sociorum atque civium, præterea armorum et equorum major copia nobis quam illis est. Sed alia fuere quæ illos magnos fecerunt, quæ nobis nulla sunt; domi industria, foris justum imperium, animus in consulendo liber, neque delicto neque libidini obnoxius. Pro his nos habemus luxuriam atque avaritiam, publice egestatem, privatim opulentiam: laudamus divitias, sequimur inertiam: inter bonos et malos discrimen nullum; omnia virtutis præmia ambitio possidet. Neque mirum: ubi vos separatim sibi quisque consilium capit, ubi domi voluptatibus, hic pecuniæ aut gratiæ servitis, eo fit ut impetus fiat in vacuam rempublicam* (Sallust. in *Catilin.*, c. 52).

6. Qui audit hæc Catonis verba sive Sallustii, putat quales laudantur Romani veteres, omnes eos tales tunc fuisse, vel plures. Non ita est: alioquin vera non essent quæ ipse item scribit, ea quæ commemoravi in secundo libro hujus operis (Cap. 18), ubi dicit, injurias validiorum, et ob eas discessionem plebis a patribus, aliasque dissensiones domi fuisse jam inde a principio, neque amplius æquo et modesto jure actum, quam expulsis regibus, quam diu metus a Tarquinio fuit, donec bellum grave, quod propter ipsum cum Etruria susceptum fuerat, finiretur: postea vero servili imperio patres exercuisse plebem, regio more verberasse, agro pepulisse, et, cæteris expertibus, solos egisse in imperio; quarum discordiarum, dum illi dominari vellent, illi servire nollent, finem fuisse bellum Punicum secundum¹: quia rursus gravis metus cœpit urgere, atque ab illis perturbationibus, alia majore cura cohibere animos inquietos, et ad concordiam revocare civilem. Sed per quosdam paucos, qui pro suo modo boni erant, magna administrabantur, atque, illis toleratis ac temperatis malis, paucorum bonorum providentia res illa crescebat, sicut idem historicus dicit, multa sibi legenti et audienti, quæ populus Romanus domi militiæque, mari atque terra præclara facinora fecerit, libuisse se attendere quæ res maxime tanta negotia sustinisset; quoniam sciebat sæpenumero parva manu cum magnis legionibus hostium contendisse Romanos, cognoverat parvis copiis bella gesta cum opulentis regibus; sibi que multa agitantem constare dixit, paucorum civium egregiam virtutem cuncta patravisse, eoque factum ut divitias paupertas, multitudinem paucitas superaret. *Sea postquam luxu atque desidia, inquit, civitas corrupta est, rursus respublica magnitudine sui imperatorum atque magistratuum vitia sustentabat.* Paucorum igitur virtus ad gloriam, honorem, imperium, vera via, id est virtute ipsa, nitentium, etiam a Catone laudata est. Hinc erat domi industria, quam commemoravit Cato, ut ærarium esset opulentum, tenues

¹ Mss. 766, 2050, 2052 et 2053, *finem fuisse bello punico secundo.* M.

res privatæ. Unde corruptis moribus vitium e contrario posuit, publice egestatem, privatim opulentiam.

CAPUT XIII. — *De amore laudis, qui cum sit vitium, ob hoc virtus putatur, quia per ipsum vitia majora cohibentur.*

Quamobrem cum diu fuissent regna Orientis illustria (a), voluit Deus et occidentale fieri, quod tempore esset posterius, sed imperii latitudine et magnitudine illustrius. Idque talibus potissimum concessit hominibus ad domanda gravia mala multarum gentium, qui causa honoris, laudis et gloriæ consuluerunt patriæ, in qua ipsam gloriam requirebant, salutemque ejus salutis præponere non dubitaverunt, pro isto uno vitio, id est amore laudis, pecuniæ cupiditatem et multa alia vitia comprimentes. [XIII.] Nam sanius videt, qui et amorem laudis vitium esse cognoscit: quod nec poetam fugit Horatium, qui ait:

Laudis amore tumes, sunt certa piacula quæ te
Ter pure lecto poterunt recreare libello.

(*Epistolarum lib. 1, epist. 4, vers. 36, 37.*)

Idemque in carmine lyrico, ad reprimendam dominandi libidinem ita cecinit:

Latius regnes avidum domando
Spiritus, quam si Libyam remotis
Gadibus jungas, et uterque Pæneus (b)
Serviat uni

(*Carmin. lib. 2, carm. 2, vers. 9-12.*)

Verumtamen qui libidines turpiores, fide pietatis impetrato Spiritu sancto, et amore intelligibilis pulchritudinis non refrenant, melius saltem cupiditate humanæ laudis et gloriæ, non quidem jam sancti, sed minus turpes sunt. Etiam Tullius hinc dissimulare non potuit², in eisdem libris quos de Republica scripsit, ubi loquitur de instituendo principe civitatis, quem dicit alendum esse gloria; et consequenter commemorat majores suos multa mira atque præclara gloriæ cupiditate fecisse. Huic ergo vitio non solum non resistebant, verum etiam id excitandum et accendendum esse censebant, putantes hoc utile esse reipublicæ. Quanquam nec in ipsis philosophiæ libris Tullius ab hac peste dissimulet, ubi eam luce clarius confitetur. Cum enim de studiis talibus loqueretur, quæ utique sectanda sunt sine veri boni, non ventositate laudis humanæ, hanc intulit universalem generalemque sententiam: *Honos alit artes omnesque accenduntur ad studia gloria, jacentque ea semper quæ apud quosque improbantur* (*Tuscul. Quæst. lib. 1, cap. 2*).

CAPUT XIV. — *De ressecando amore laudis humanæ, quoniam justorum gloria omnis in Deo sit.*

Huic igitur cupiditati melius resistitur sine dubitatione, quam ceditur. Tanto enim quisque est Deo similior, quanto est ab hac immunditia mundior.

¹ Mss., 766. *Latium regnes avidum dominando.* M.

² Vind. Am. Er.: *Etiam Tullius inde silere non potuit.* Non male.

(a) Assyriorum scilicet, Medorum, Persarum, etc., de quibus supra, lib. 4, cap. 7.

(b) Libycus et Gaditanus, interprete Porphyry.

Quæ in hac vita etsi non funditus eradicatur ex corde, quia etiam bene proficientes animos tentare non cessat; saltem cupiditas gloriæ superetur dilectione justitiæ¹: ut si alicubi jacent, quæ apud quosque improbantur, si bona, si recta sunt, etiam ipse amor humanæ laudis erubescat, et cedat amori veritatis. Tam enim est hoc vitium inimicum piæ fidei, si major in corde sit cupiditas gloriæ quam Dei timor vel amor, ut Dominus diceret, *Quomodo potestis credere, gloriam ab invicem expectantes, et gloriam quæ a solo Deo est non quærentes* (Joan. v, 44)? Item de quibusdam, qui in eum crediderant, et verebantur palam conlitteri, ait Evangelista: *Dilexerunt gloriam hominum magis quam Dei* (Id. xii, 43). Quod sancti Apostoli non fecerunt: qui cum in his locis prædicarent Christi nomen, ubi non solum improbatur (sicut ille ait, *Jacentque ea semper, quæ apud quosque improbantur*), verum etiam summæ detestationis habebatur; tenentes quod audierant a bono Magistro eodemque medico mentium, *Si quis me negaverit coram hominibus, negabo eum coram Patre meo, qui in cælis est, et coram² Angelis Dei* (Matth. x, 33; Luc. xii, 9); inter maledicta et opprobria, inter gravissimas persecutiones crudelesque poenas non sunt deterriti a prædicatione salutis humanæ tanto fremitu offensionis humanæ. Et quod eos divina facientes atque dicentes divineque viventes, debellatis quodammodo cordibus duris, atque introducta pace justitiæ, ingens in Ecclesia Christi gloria consecuta est; non in ea tanquam in suæ virtutis sine quieverunt: sed eam quoque ipsam ad Dei gloriam referentes, cujus gratia tales erant, isto quoque fomite eos, quibus consulebant, ad amorem illius, a quo et ipsi tales fierent, accendebant. Namque ne propter humanam gloriam boni essent, docuerat eos Magister illorum, dicens: *Cavete facere justitiam vestram coram hominibus, ut videamini ab eis; alioquin mercedem non habebitis apud Patrem vestrum, qui in cælis est* (Matth. vi, 1). Sed rursus ne hoc perverse intelligentes hominibus placere metuerent, minusque prodesse latendo quod boni sunt, demonstrans quo fine innotescere deberent, *Luceant, inquit, opera vestra coram hominibus, ut videant bona facta vestra, et glorificent Patrem vestrum, qui in cælis est* (Id. v, 16). Non ergo, *ut videamini ab eis*, id est hac intentione ut eos ad vos converti velitis, quia non per vos aliquid estis: sed *ut glorificent Patrem vestrum, qui in cælis est*, ad quem conversi fiant quod estis³. Hos secuti sunt martyres, qui Scævolas, et Curtios, et Decios, non sibi inferendo poenas, sed illatas ferendo, et virtute vera, quoniam vera pietate, et innumerabili multitudine superarunt. Sed cum illi essent in civitate terrena, quibus propositus erat omnium pro illa officiorum finis, incolumitas ejus, et regnum non in cælo, sed in terra; non in vita æterna; sed in decessione morientium et successione moriturorum: quid aliud amarent quam gloriam,

¹ Nonnulli manuscripti, *superetur delectatione justitiæ*.

² Nostri manuscripti, *vel coram*. M.

³ Editi: *Hoc*. At Mss.: *Hos*; id est, Aristotels, de quibus ante.

quæ volebant etiam post mortem tanquam vivere in ore laudantium?

CAPUT XV. — *De mercede temporali, quam Deus reddidit bonis moribus Romanorum.*

Quibus ergo non erat Deus daturus vitam æternam cum sanctis Angelis suis in civitate sua cælesti, ad cujus societatem pietas vera perducit, quæ non exhibet servitutem religionis, quam *λατρείαν* Græci vocant, nisi uni vero Deo; si neque hanc eis terrenam gloriam excellentissimi imperii concederet, non redderetur merces bonis artibus eorum, id est virtutibus, quibus ad tantam gloriam pervenire nitentur. De talibus enim, qui propter hoc boni aliquid facere videntur, ut glorificentur ab hominibus, etiam Dominus ait, *Amen dico vobis, perceperunt mercedem suam* (Matth. vi, 2). Sic et isti privatas res suas pro re communi, hoc est republica, et pro ejus ærario contempserunt, avaritiæ resisterunt, consuluerunt patriæ consilio libero; neque delictio secundum suas leges, neque libidini obnoxii: his omnibus artibus tanquam vera via nisi sunt ad honores, imperium, gloriam: honorati sunt in omnibus fere gentibus; imperii sui leges imposuerunt multis gentibus; hodieque litteris et historia gloriosi sunt pene in omnibus gentibus. Non est quod de summi et veri Dei justitia conquerantur: *perceperunt mercedem suam*.

CAPUT XVI. — *De mercede sanctorum civium civitatis æternæ, quibus utilia sunt Romanorum exempla virtutum.*

Merces autem sanctorum longe alia est etiam hic opprobria sustinentium pro civitate¹ Dei, quæ mundi hujus dilectoribus odiosa est. Illa civitas sempiterna est: ibi nullus oritur, quia nullus moritur: ibi est vera et plena felicitas, non dea, sed donum Dei: inde fidei pignus accepimus, quamdiu peregrinantes ejus pulchritudini suspiramus: ibi non oritur sol super bonos et malos (Matth. v, 45), sed sol justitiæ solos protegit bonos: ibi non erit magna industria, ditare ærarium publicum privatis rebus angustis, ubi thesaurus communis est veritatis. Proinde non solum ut talis merces talibus hominibus redderetur, Romanum imperium ad humanam gloriam dilatatum est; verum etiam ut cives æternæ illius civitatis, quamdiu hic peregrinantur (II Cor. v, 6.), diligenter et sobrie illa intueantur exempla, et videant quanta dilectio debeat supernæ patriæ propter vitam æternam, si tantum a suis civibus terrena dilecta est propter hominum gloriam.

CAPUT XVII. — *Quo fructu Romani bella gesserint, et quantum his quos vicere, contulerint.*

1. Quantum enim pertinet ad hanc vitam mortalium, quæ paucis diebus ducitur et finitur, quid interest sub cujus imperio vivat homo moriturus, si illi qui imperant, ad impia et iniqua non cogant? Aut vero aliquid nocuerunt Romani gentibus, quibus subjugatis

¹ Mss. magno consensu, *pro veritate*.

imposuerunt leges suas, nisi quia id factum est ingenti strage bellorum? Quod si concorditer fieret, idipsum fieret meliore successu: sed nulla esset gloria triumphantium. Neque enim et Romani non vivebant sub legibus suis, quas cæteris imponebant. Hoc si fieret sine Marte et Bellona¹, ut nec victoria locum haberet, nemine vincente ubi nemo pugnaverit, nonne Romanis et cæteris gentibus una esset eademque conditio? præsertim si mox fieret, quod postea gratissime atque humanissime factum est, ut omnes ad Romanum imperium pertinentes societatem acciperent civitatis et Romani cives essent; ac sic esset omnium, quod erat ante pancorum: tantum, quod plebs illa, quæ suos agros non haberet, de publico viveret: qui pastus ejus per bonos administratores reipublicæ gratius a concordibus præstaretur, quam victis extorqueretur.

2. (a) Nam quid intersit ad incolunitatem bonosque mores, ipsas² certe hominum dignitates, quod alii vicerunt, alii victi sunt, omnino non video, præter illum gloriæ humanæ inanissimum fastum, in quo perceperunt mercedem suam, qui ejus ingenti cupidine arserunt, et ardentia bella gesserunt. Numquid enim illorum agri tributa non solvunt? numquid eis licet discere, quod aliis non licet? numquid non multi senatores sunt in aliis terris, qui Romam ne facie quidem norunt (b)? Tolle jactantiam, et omnes homines quid sunt nisi homines? Quod si perversitas sæculi admitteret, ut honoratior essent quique meliores; nec sic pro magno haberi debuit honor humanus, quia nullus est ponderis fumus. Sed utamur etiam in his rebus beneficio Domini Dei nostri: consideremus quanta contempserint, quæ pertulerint, quas cupiditates subegerint pro humana gloria, qui eam tanquam mercedem talium virtutum accipere meruerunt: et valeat nobis etiam hoc ad opprimendam superbiam; ut cum illa civitas, in qua nobis regnare promissum est, tantum ab hac distet, quantum distat cælum a terra, a temporali lætitia vita æterna, ab inanibus laudibus solida gloria, a societate mortalium societas Angelorum, a lumine solis et lunæ lumen ejus qui fecit solem et lunam, nihil sibi magnum fecisse videantur tantæ patriæ cives, si pro illa adipiscenda fecerint boni operis aliquid, vel mala aliqua sustinerint; cum illi pro hac terrena jam adepta tanta fecerint, tanta perpessi sint. Præsertim quia remissio peccatorum, quæ cives ad æternam colligit patriam, habet aliquid, cui per umbram quamdam simile fuit asyllum illud Romuleum, quo multitudinem, qua illa civitas conderetur, quorumlibet delictorum congregavit impunitas.

¹ Sic verius Lov. et Mss. At Vind. Am. Er.: *Hoc sufficeret reipublicæ, nisi quia Marti et Bellonæ displicebat.*

² Editi, et ipsas. Expungendum, et, quod abest a manuscriptis: ut sensus sit, bonos mores esse ipsas hominum dignitates.

(a) Hic incipit caput 17 in Mss.

(b) Donatis civitate multis gentibus, etiam in senatum ex illis plures sunt adscripti, fueruntque senatores, tametsi Romani nunquam venissent, ut cives alii, qui Romam nunquam viderunt. Lcd. Vives.

CAPUT XVIII. — *Quam alieni a jactantia esse debeant Christiani, si aliquid fecerint pro dilectione æternæ patriæ, cum tanta Romani gesserint pro humana gloria et civitate terrena.*

1. Quid ergo magnum est pro illa æterna cœlestique patriæ, cuncta sæculi hujus quamlibet jucunda blandimenta contemnere, si pro hac temporali atque terrena filios Brutus potuit et occidere (a), quod illa facere neminem cogit? Sed certe difficilium est filios interimere, quam quod pro ista faciendum est, ea quæ filiis congreganda videbantur atque servanda, vel donare pauperibus, vel, si existat tentatio quæ id pro fide atque justitia fieri compellat, amittere. Felices enim vel nos vel filios nostros non divitiæ terrenæ faciunt, aut nobis viventibus amittendæ, aut, nobis mortuis, a quibus nescimus, vel forte a quibus nolumus, possidendæ: sed Deus felices facit, qui est mentium vera opulentia. Bruto autem, quia filios occidit, infelicitatis perhibet testimonium etiam poeta laudator. Ait enim:

Natosque pater nova bella moventes
Ad pœnam pulchra pro libertate vocabit,
Infelix, utcumque ferent ea facta minores

Sed versu sequenti consolatus est infelicem

Vincit amor patriæ laudumque impensa cupido.
(Æneid. lib. 6, vers. 820-823.)

Hæc sunt duo illa, libertas et cupiditas laudis humanæ, quæ ad facta compulere¹ miranda Romanos. Si ergo pro libertate moriturorum et cupiditate laudum, quæ a mortalibus expetuntur, occidi filii a patre potuerunt; quid magnum est, si pro vera libertate, quæ nos ab iniquitatis et mortis et diaboli dominatu liberos facit, nec cupiditate humanarum laudum, sed charitate liberandorum hominum, non a Tarquinio rege, sed a dæmonibus et dæmonum principe, non filii occiduntur, sed Christi pauperes inter filios computantur?

2. Si alius etiam Romanus princeps, cognomine Torquatus, filium, non quia contra patriam, sed etiam pro patria, tamen quia contra imperium suum, id est contra quod imperaverat pater imperator, ab hoste provocatus juvenili ardore pugnaverit, licet vicisset, occidit; ne plus mali esset in exemplo imperii contempti, quam boni in gloria hostis occisi (b): ut quid se jactent, qui pro immortalis patriæ legibus omnia, quæ multo minus quam filii diliguntur, bona terrena contemnunt? Si Furius Camillus etiam ingrattam patriam, a cujus cervicibus acerrimorum hostium Veientium jugum depulerat, damnatusque ab æmulis fuerat, a Gallis iterum liberavit, quia non habebat potiore ubi posset vivere gloriosus² (c): cur extollatur velut grande aliquid fecerit, qui forte in Ecclesia ab inimicis carnalibus gravissimam exhonorationis passus injuriam, non se ad ejus hostes hæreticos

¹ Gallicani omnes Mss., *compulsi*.

² Sola editio Lov., *gloriosus*.

(a) Narrat Livius, lib. 2, cap. 5.

(b) Confer supra ad lib. 1, cap. 23.

(c) Vide supra, lib. 2, cap. 47; et lib. 4, cap. 7.

transtulit, aut aliquam contra illam ipse hæresim condidit, sed eam potius quantum valuit ab hæreticorum perniciosissima pravitate ¹ defendit; cum alia non sit, non ubi vivatur in hominum gloria, sed ubi vita acquiratur æterna? Si Mucius (a), ut cum Porsenna rege pax fieret, qui gravissimo bello Romanos premebat, quia Porsennam ipsum occidere non potuit, et pro eo alterum deceptus occidit, in ardentem aram ante oculos ejus dexteram extendit, dicens multos tales, qualem illum videret, in ejus exitium conjurasse; cujus ille fortitudinem et conjurationem talium perhorrescens, sine ulla dilatione ² se ab illo bello facta pace compescuit: quis regno cælorum impaturus est merita sua, si pro illo non unam manum, neque hoc sibi ultro faciens, sed persequente aliquo patiens, totum flammis corpus impenderit? Si Curtius armatus equo concito in abruptum hiatus terræ se præcipitem dedit, deorum suorum oraculis serviens, quoniam jusserant ut illuc id, quod Romani haberent optimum, mitteretur, nec aliud intelligere potuerunt, quam viris armisque se excellere, unde videlicet oportebat ut deorum jussis in illum interitum vir præcipitaretur armatus (b): quid se magnum pro æterna patria fecisse dicitur est, qui aliquem fidei suæ passus inimicum, non se ultro in talem mortem mittens, sed ab illo missus obierit; quandoquidem a Domino suo eodemque rege patriæ suæ certius oraculum accepit, *Nolite timere eos qui corpus occidunt, animam autem non possunt occidere (Matth. x, 28)*? Si se occidendos certis verbis quodammodo consecrantes Decii devoverunt, ut illis cadentibus et iram deorum sanguine suo placantibus Romanus liberaretur exercitus (c); nullo modo superbient ³ sancti martyres tanquam dignum aliquid pro illius patriæ participatione ⁴ fecerint, ubi æterna est et vera felicitas, si usque ad sui sanguinis effusionem, non solum suos fratres pro quibus fundebatur (d), verum et ipsos inimicos, a quibus fundebatur, sicut eis præceptum est, diligentes, charitatis fide et fidei charitate certarunt? Si Marcus Pulvillus dedicans ædem Jovis, Junonis, Minervæ, falso sibi ab invidis morte filii nuntiata, ut illo nuntio perturbatus abscederet, atque ita dedicationis gloriam collega ejus consequeretur, ita contempsit, ut eum etiam projici insepultum juberet (e); et sic in ejus corde orbitatis dolorem gloriæ cupiditas vicerat: quid magnum se pro Evangelii sancti prædicatione, quæ civis supernæ patriæ de diversis liberantur et colliguntur erroribus, fecisse dicitur est, cui Dominus de sepultura patris sui sollicito ait, *Se-*

¹ Aliquot Mss., *vanitate*.—Mss. 766 et 2053, *pravitate*. M.

² In Mss., *dubitatione*.

³ Editi, *superbiant*. At manuscripti, *superbient*.

⁴ Gervasianus codex, *perceptione*.

(a) Mucius qui Scevola dicitur a clade dextræ manus. Liv., lib. 2, cap. 12, 13, et Plutarch. in Publicola.

(b) Curtius. Vide Livium, l. 7, c. 6. Valer. Maxim. l. 5, c. 5.

(c) Liv. lib. 8 et 10.

(d) Pro quibus fundebatur; non quidem ad redemptionem, ut fusus est Christi sanguis, sed ad exemplum fortitudinis. *De fortitudine fidelium*, inquit Leo, epist. alias 83, nuuc 97, *exempla nata sunt patientiæ, non dona justitiæ.*

LEONARD COQUENOS.

(e) Sic Plutarchus: at Livius cadaver efferri jussisse scribit.

quere me, et sine mortuos sepelire mortuos suos (Id. viii, 22)? Si M. Regulus, ne crudelissimos nostes jurando falleret, ad eos ab ipsa Roma reversus est, quoniam, sicut Romanis eum tenere volentibus respondisse fertur, posteaquam Afris servierat, dignitatem illic honesti civis habere non posset; cumque Carthaginenses, quoniam contra eos in Romano senatu egerat, gravissimis suppliciis necaverunt (a): qui cruciatus non sunt pro fide illius patriæ contemnendi, ad cujus beatitudinem fides ipsa perducit? aut quid retribuatur Domino pro omnibus quæ retribuit (*Psal. cxv, 12*), si pro fide quæ illi debetur talia fuerit homo passus, qualia pro fide quam perniciosissimis inimicis debebat passus est Regulus? Quomodo autem ¹ se audebit extollere de voluntaria paupertate christianus, ut in hujus vitæ peregrinatione expeditior ambulet viam, quæ perducit ad patriam, ubi veræ divitiæ ipse Deus est, cum audiat vel legat L. Valerium, qui in suo defunctus est consulatu, usque adeo fuisse pauperem, ut nummis a populo collatis ejus sepultura curaretur (b)? audiat vel legat Quintium Cincinnatum, cum quatuor jugera possideret, et ea suis manibus coleret, ab aratro esse abductum ², ut dictator fieret, major utique honore quam consul; victisque hostibus ingentem gloriam consecutum in eadem paupertate mansisse (c)? Aut quid se magnum fecisse prædicabit, quod nullo præmio mundi hujus fuerit ab æternæ illius patriæ societate seductus, cum Fabricium didicerit tantis muneribus Pyrrhi, regis Epirotarum, promissa etiam quarta parte regni, a Romana civitate non potuisse divelli, ibique in sua paupertate privatum manere maluisse? Nam illud quod rempublicam, id est rem populi, rem patriæ, rem communem, cum haberent opulentissimam atque ditissimam, sic ipsi in suis domibus pauperes erant, ut quidam eorum, qui jam bis consul fuisset, ex illo senatu pauperum hominum pelleretur notatione censoria, quod decem pondo argenti in vasis habere compertus est (d); ita ³ iidem ipsi pauperes erant, quorum triumphis publicum ditabatur ærarium: nonne omnes Christiani, qui excellentiore proposito divitias suas communes faciunt, secundum id quod scriptum est in Actibus Apostolorum, ut distribuatur unicuique, sicut cuique opus est; et nemo dicat aliquid proprium, sed sint illis omnia communia (*Act. ii, 45; et iv, 32*); intelligunt se nulla ob hoc ventilari oportere jactantia, id faciendum obtinenda societate Angelorum, cum pene tale aliquid illi fecerint pro conservanda gloria Romanorum?

¹ Vox, *autem*, abest a nostris codicibus. M.

² In B., *adductum*. M.

³ Lov., *si ita*. Abest, si a cæteris libris.

(a) Supra, lib. 1, cap. 13, 24.

(b) Erratum est in prænomine simi 1 et in obitæ anno; dicebatur enim, non Lucius sed Publius, Valerius Publicola; et non in suo quarto, consulatu obiit, sed anno post, Verginio et Cassio consulibus, sexto anno post expulsos reges, Livius, lib. 2, cap. 10, Dionysius lib. 5.

(c) Livius, lib. 5, cap. 26; Valer. Maxim., lib. 4, cap. 4, § 7.

(d) Cornelium Ruffinum intelligit de quo Valer. Maxim. lib. 2, cap. 9; A. Gel., lib. 4, cap. 8; Livius, lib. 14.

3. Hæc et alia, si qua hujusmodi reperiuntur in litteris eorum, quando sic innotescerent, quando tanta fama prædicarentur, nisi Romanum imperium longe lateque porrectum, magnificis successibus augetur? Proinde per illud imperium tam latum tanque diuturnum, virorumque tantorum virtutibus præclarum atque gloriosum, et illorum intentioni merces quam quærebant est reddita, et nobis proposita necessariæ commouitionis exempla: ut si virtutes, quarum istæ utcumque sunt similes, quas isti pro civitatis terrenæ gloria tenuerunt, pro Dei gloriosissima civitate non tenuerimus, pudore pungamur; si tenuerimus, superbia non extollamur: quoniam, sicut dicit Apostolus, *indignæ sunt passionis hujus temporis ad futuram gloriam, quæ revelabitur in nobis* (Rom. viii, 18). Ad humanam vero gloriam præsentisque temporis satis digna vita æstimabatur illorum. Unde etiam Judæi, qui Christum occiderunt, revelante Testamento Novo, quod in Vetere velatum fuit, ut non pro terrenis et temporalibus beneficiis, quæ divina providentiâ permixte bonis malisque concedit, sed pro æterna vita muneribusque perpetuis et ipsius supernæ civitatis societate colatur Deus unus et verus, rectissime istorum gloriæ donati sunt; ut hi qui qualibuscumque virtutibus terrenam gloriam quæsierunt et acquisiverunt, vincerent eos qui magnis vitis datorem veræ gloriæ et civitatis æternæ occiderunt atque respuerunt.

CAPUT XIX. — Quo inter se differant cupiditas gloriæ, et cupiditas dominationis.

Interest sane inter cupiditatem humanæ gloriæ, et cupiditatem dominationis. Nam licet proclive sit, ut qui humana gloria inivium delectatur, etiam dominari ardentem affectet; tamen qui veram licet humanarum laudum gloriam concupiscunt, dant operam bene judicantibus non displicere. Sunt enim multa in moribus bona, de quibus multi bene judicant, quamvis ea multi non habeant: per ea¹ bona morum nituntur ad gloriam et imperium vel dominationem, de quibus ait Sallustius, *Sed ille vera via nititur*. Quisquis autem sine cupiditate gloriæ, qua veretur homo bene judicantibus displicere, dominari atque imperare desiderat, etiam per apertissima scelera quærit plerumque obtinere quod diligit. Proinde qui gloriam concupiscit, aut vera via nititur, aut certe dolis atque fallaciis contendit, volens bonus videri esse², quod non est (Sallust. in *Catil.*). Et ideo virtutes habenti magna virtus est contemnere gloriam; quia contemptus ejus in conspectu Dei est, iudicio autem non aperitur humano. Quidquid enim fecerit ad oculos hominum, quo gloriæ contemptor appareat, ad majorem laudem, hoc est ad majorem gloriam, facere si credatur, non est unde se suspicantium sensibus aliter esse, quam suspicantur, ostendat. Sed qui contemnit iudicia laudantium, contemnit etiam suspicantium temeritatem: quorum tamen, si vere bonus est, non contemnit salutem; quoniam tantæ justitiæ est qui de Spiritu Dei

virtutes habet, ut etiam ipsos diligat inimicos; et ita diligat, ut suos osores¹ vel detractores velit correctos habere consortes; non in terrena patria, sed superna: in laudatoribus autem suis quamvis parvipendat quod eum laudant, non tamen parvipendit quod amant; nec eos vult fallere laudantes, ne decipiat diligentes: ideoque instat ardentem, ut potius ille laudetur, a quo habet homo quidquid in eo jure laudatur. Qui autem contemptor gloriæ, dominationis est avidus, bestias superat sive crudelitatis vitis, sive luxuriæ. Tales quidam Romani fuerunt: non enim, cura existimationis amissa, dominationis cupiditate caruerunt. Multos tales fuisse, prodit historia: sed hujus vitis summitatem et quasi arcem quandam Nero Cæsar primus obtinuit; cujus fuit tanta luxuriæ, ut nihil ab eo putaretur virile metuendum; tanta crudelitas, ut nihil molle habere crederetur, si nesciretur. Etiam talibus tamen dominandi potestas non datur nisi summi Dei providentiâ, quando res humanas judicat talibus dominis dignas. Aperta de hæc re vox divina est, loquente Dei sapientiâ: *Per me reges regnant, et tyranni per me tenent terram* (Prov. viii, 15). Sed ne tyranni non pessimi atque improbi reges, sed vere nomine fortes dicti existimentur, unde ait Virgilius,

Pars mihi pacis erit, dextram tetigisse tyranni:
(*Eneid. lib. 7, vers. 286.*)

apertissime alio loco de Deo dictum est, *Qui regnare facit hominem hypocritam propter perversitatem populi* (Job xxxiv, 30). Quamobrem, quamvis, ut potui, satis exposuerim qua causa Deus unus verus et justus Romanos secundum quandam formam terrenæ civitatis bonos adjuverit ad tanti imperii gloriam consequendam: potest tamen et alia causa esse latentior, propter diversa merita generis humani, Deo magis nota quam nobis; dum illud constet inter omnes veraciter pios, neminem sine vera pietate, id est veri Dei vero cultu, veram posse habere virtutem (a); nec eam veram esse, quando gloriæ servit humanæ. Eos tamen qui cives non sint civitatis æternæ, quæ in sacris Litteris nostris dicitur civitas Dei (*Psal. xlv, 5; et xlvii, 3 et 9, etc.*), utiliores esse terrenæ civitati, quando habent virtutem vel ipsam, quam si nec ipsam. Illi autem qui vera pietate præditi bene vivunt, si habent scientiam regendi populos, nihil est felicius rebus humanis, quam si Deo miserante habeant potestatem. Tales autem homines virtutes suas, quantascumque in hac vita possunt habere, non tribuunt nisi gratiæ Dei, quod eas volentibus, credentibus, petentibus dederit; simulque intelligunt, quantum sibi desit ad perfectionem justitiæ, qualis est in illorum sanctorum Angelorum societate, cui se nituntur aptare. Quantumlibet autem laudetur atque prædicetur virtus, quæ sine vera pietate servit hominum gloriæ, nequaquam sanctorum exiguis initiis comparanda est, quorum spes posita est in gratia et misericordia veri Dei.

¹ Editi, et per ea. Abest, et, a manuscriptis.

² Editi, videri quod non est; omisso, esse, quod habent a manuscriptis.

¹ Sic Vind. Am. Er. et plerique Mss. At Lov., ut suscipiunt.

(a) Vide infra, lib. 19, cap. 25.

CAPUT XX. — *Tam turpiter servire virtutes humanæ gloriæ, quam corporis voluptati.*

Solent philosophi, qui finem boni humani in ipsa virtute constituunt, ad ingerendum pudorem quibusdam philosophis, qui virtutes quidem probant, sed eas voluptatis corporalis sine metiuntur, et illam per se ipsam putant appetendam, istas propter ipsam, tabulam quamdam verbis pingere, ubi voluptas in sella regali quasi delicata quædam regina considat; eique virtutes famulæ subjiçiantur, observantes ejus nutum, ut faciant quod illa imperaverit: quæ prudentiæ jubeat, ut vigilanter inquirat, quomodo voluptas regnet, et salva sit; justitiæ jubeat, ut præstet beneficia quæ potest ad comparandas amicitias corporalibet commodis necessarias; nulli faciat injuriam, ne offensis legibus voluptas vivere secunda non possit; fortitudini jubeat, ut, si dolor corpori acciderit, qui non compellat in mortem, teneat dominam suam, id est voluptatem, fortiter in animi cogitatione, ut per pristinarum deliciarum suarum recordationem mitiget præsentis doloris aculeos; temperantiæ jubeat, ut tantum capiat alimentorum, et, si qua delectant, ne per immoderationem noxium aliquid valetudinem turbet, et voluptas, quam etiam in corporis sanitate Epicurei maximam ponunt, graviter offendatur. Ita virtutes cum tota suæ gloriæ dignitate¹ tanquam imperiosæ cuidam et inhonestæ mulierculæ servient voluptati. Nihil hac pictura dicunt esse ignominiosius et deformius, et quod minus ferre bonorum possit aspectus: et verum dicunt. Sed non existimo satis debiti decoris esse picturam, si etiam talis fingatur, ubi virtutes humanæ gloriæ serviant. Licet enim ista gloria delicata mulier non sit, inflata tamen est, et multum inanitatis habet. Unde non ei digne servit soliditas quædam firmitasque virtutum, ut nihil provideat prudentia, nihil distribuatur justitia, nihil toleret fortitudo, nihil temperantia moderetur, nisi unde placeatur hominibus et ventosæ gloriæ serviatur. Nec illi se ab ista seditate defenderint, qui, cum aliena spernant judicia velut gloriæ contemptores, sibi sapientes videntur et sibi placent. Nam eorum virtus, si tamen ulla est, alio modo quodam humanæ subditur laudi: neque enim ipse qui sibi placet, homo non est. Qui autem vera pietate in Deum, quem diligit, credit et sperat, plus intendit in ea, in quibus sibi displicet, quam in ea, si qua in illo sunt, quæ non tam ipsi quam veritati placent: neque id tribuit, unde jam potest placere, nisi ejus misericordiæ, cui metuit displicere; de his sanatis gratias agens, de illis sanandis preces fundens.

CAPUT XXI. — *Romanum regnum a Deo vero esse dispositum, a quo est omnis potestas, et cujus providentia reguntur universa.*

Quæ cura ita sint, non tribuamus dandi regni atque imperii potestatem, nisi Deo vero, qui dat felicitatem in regno cælorum solis piis; regnum vero terrenum et piis et impiis, sicut ei placet, cui nihil injuste placet. Quamvis enim aliquid dixerimus, quod apertam

¹ Aliquot probæ notæ Mss., cum tota suæ gloriæ dignitate. — Sic Ms. 766. At Ms. 2055, cum tota sua gloriæ dignitate. M.

nobis esse voluit; tamen multum est ad nos, et valde superat vires nostras, hominum occulta discutere, et liquido examine merita dijudicare regnorum. Hic igitur unus verus Deus, qui nec judicio, nec adjutorio deserit genus humanum, quando voluit, et quantum voluit, Romanis regnum dedit: qui dedit Assyriis, vel etiam Persis, a quibus soles duos deos coli, unum bonum, alterum malum continent litteræ istorum: ut taceam de populo Hebræo, de quo jam dixi, quantum satis visum est, qui præter unum Deum non coluit et quando regnavit. Qui ergo Persis dedit segetes sine cultu deæ Segetiæ, qui alia dona terrarum sine cultu tot deorum, quos isti rebus singulis singulos, vel etiam rebus singulis plures præposuerunt; ipse etiam regnum dedit sine cultu eorum, per quorum cultum se isti regnasse crediderunt. Sic etiam hominibus; qui Mario, ipse Gaio Cæsari; qui Augusto, ipse et Neroni (a); qui Vespasianis, vel patri vel filio, suavissimis imperatoribus, ipse et Domitiano crudelissimo: et ne per singulos ire necesse sit, qui Constantino christiano, ipse apostatæ Juliano: cujus egregiam indolem decepit amore dominandi sacrilega et detestanda curiositas, cujus vanis deditus oraculis erat, quando fretus securitate victoriæ, naves, quibus victus necessarius portabatur, incendit; deinde servide instans immodicis ausibus, et mox merito temeritatis occisus, in locis hostilibus egenum reliquit exercitum, ut aliter inde non posset evadi, nisi contra illud auspiciam dei Termini, de quo superiore libro diximus (Cap. 29), Romani imperii termini moverentur. Cessit enim Terminus deus necessitati, qui non cessaret Jovi. Hæc plane Deus unus et verus regit et gubernat ut placet: et si occultis causis, numquid injustis?

CAPUT XXII. — *Tempora exitusque bellorum ex Dei pendere judicio.*

Sic etiam tempora ipsa bellorum, sicut in ejus arbitrio est justoque judicio et misericordia, vel atere, vel consolari genus humanum, ut alia citius, alia tardius finiantur. Bellum Piratarum a Pompeio (b), bellum Punicum tertium a Scipione incredibili celeritate et temporis brevitate (c) confecta sunt. Bellum quoque fugitivorum gladiatorum, quamvis multis Romanis ducibus et duobus consulibus victis, Italiaque horribiliter contrita atque vastata, tertio tamen anno post multa consumpta consumptum est¹. Picentes, Marsi et Peligni, gentes non exteræ, sed Italicæ, post diuturnam et devotissimam sub Romano jugo servitutem, in libertatem caput erigere tentaverunt, jam multis nationibus Romano imperio subjugatis, deletaque Carthagine (d): in quo bello Italico Romanis sæpissime victis, ubi et duo consules perierunt, et alii nobilissimi senatores: non diuturno ta-

¹ Sic Vind. Am. et Mss. At Er. et Lov., consummatum est.

(a) Binus conjungit, alterum bonum, alterum malum: crudelis Marius, clementissimus C. Cæsar; optimos priuocps Augustus, pessimus Nero.

(b) quadagesimo die postquam Brundisio solvit Pompeius, terminatum est. Florus, l. 5; Cicero pro lege Man.ia.

(c) intra quintum annum quam erat ceptum, consummatum octavo est, ait Livius l. 49. At Florus l. 2; Quadragesimo patratum scribit.

(d) Conf. Livium, libb. 72-76, et 95, 96.

men tempore tractum est hoc malum; nam quintus ei annus finem dedit. Sed bellum Punicum secundum cum maximis detrimentis et calamitate reipublice per annos decem et octo (a) Romanas vires extenuavit, et pene consumpsit: duobus praeliis (b) ferme septuaginta Romanorum millia ceciderunt. Bellum Punicum primum per viginti et tres annos peractum (c) est: bellum Mithridaticum quadraginta annis (d). Ac ne quisquam arbitretur rudimenta Romanorum fuisse fortiora ad bella citius peragenda, superioribus temporibus, multum in omni virtute laudatis, bellum Samniticum annis tractum est ferme quinquaginta (e): in quo bello ita Romani victi sunt, ut sub jugum etiam mitterentur. Sed quia non diligebant gloriam propter justitiam, sed justitiam propter gloriam diligere videbantur, pacem factam sœdusque ruperunt (f). Hæc ideo commemoro, quoniam multi præteritarum rerum ignari, quidam etiam dissimulatores suæ scientiæ, si temporibus christianis aliquod bellum paulo diutius trahi vident, illico in nostram religionem protrivissime insiliunt, exclamantes, quod, si ipsa non esset, et vetere ritu numina colerentur, jam Romana illa virtute, quæ adjuvante Marte et Bellona tanta celeriter bella confecit, id quoque celerrime finiretur. Recolant igitur qui legerunt quam diuturna bella, quam variis eventis¹, quam luctuosis cladibus a veteribus sint gesta Romanis, sicut solet orbis terrarum velut procellosissimum pelagus varia talium malorum tempestate jactari: et, quod nolunt, aliquando fateantur, nec insanis adversus Deum linguis se interimant, et decipiant imperitos.

CAPUT XXIII. — *De bello in quo Rhadagaisus rex Gothorum, dæmonum cultor, uno die cum ingentibus copiis suis victus est.*

Quod tamen nostra memoria recentissimo tempore Deus mirabiliter et misericorditer fecit, non cum gratiarum actione commemorant; sed quantum in ipsis est, omnium, si fieri potest, hominum oblivione sepelire conantur: quod a nobis si tacebitur, similiter erimus ingrati. Cum Rhadagaisus rex Gothorum agmine ingenti et immuni jam in Urbis vicinia constitutus, Romanis cervicibus immineret, uno die tanta celeritate sic victus est, ut ne uno quidem, non dicam extincto, sed² vulnerato Romanorum, multo amplius quam centum millium prosterneretur ejus exercitus, atque ipse cum filiis³ mox captus pœna

¹ Sic Mss.; at editi, *eventibus*.

² Er. et Lov., *sed nec*. Abest particula, *nec*, ab aliis libris. — Abest etiam a nostris Mss. M.

³ Ex Romanis et Gallicanis Mss., plures probæ notæ non habent, *cum filiis*. — Nec nostri. M.

(a) Suffragator Livius lib. 30, et Florus l. 2; at Polybius l. 3, et Orosius l. 4, c. 20, notant hujus belli annos tantum septemdecim.

(b) Altero prælio ad Thrasymenum lacum, ad Cannas commisso. Livius l. 23; Florus l. 2.

(c) Augustino consentit Orosius. At Polybius l. 4, per viginti et quatuor annos peractum scribit: quia videlicet annos ipse ab occasione movendi belli numerat, alii vero ab ejus susceptione.

(d) Florus, lib. 3, cap. 5.

(e) Eutropius et Orosius annos quadraginta novem in hoc bello numerant. Florus quinquaginta: nec plures sunt, si ad Fabium Gurgetem consulem finitur. Attamen Appianus octoginta computat, ipsique Samnites in Livii lib. 23 dicunt se per centum prope annos cum populo Romano bellum gessisse.

(f) Vide Livium, lib. 9.

SANCT. AUGUST. VII.

debita necaretur (a). Nam si ille tam impius eum tantis et tam impiis copiis Romam fessisset ingressus, cui pepercisset? quibus honorem locis martyrum detulisset? in qua persona Deum timeret? cujus non sanguinem fustum, cuius pudicitiam vellet intactam? Quas autem isti pro diis suis voces haberent, quanta insultatione jactarent, quod ille ideo vicisset, ideo tanta potuisset, quia quotidianis sacrificiis placabat atque invitabat deos, quod Romanos facere christiana religio non sinebat? Nam propinquante jam illo his locis, ubi notu summæ majestatis oppressus est, cum ejus fama ubique crebresceret, nobis apud Carthaginem dicebatur, hoc credere, spargere, jactare Paganos, quod ille diis amicis protegentibus et opitalantibus, quibus immolare quotidie ferebatur, vinci omnino non posset ab eis, qui talia diis Romanis sacra non facerent, nec fieri a quoquam permetterent. Et non agunt miseri gratias tantæ misericordiæ Dei, qui, cum stauisset irruptione barbarica graviora pati dignos¹ mores hominum castigare, indignationem suam tanta mansuetudine temperavit, ut illum primo faceret mirabiliter vinci, ne ad infirmorum animos evertendos gloria daretur dæmonibus, quibus eum supplicare constabat; deinde² ab his Barbaris Roma caperetur, qui contra omnem consuetudinem bellorum ante gestorum ad loca sancta confugientes christianæ religionis reverentia tuerentur, ipsisque dæmonibus atque impiorum sacrificiorum ritibus, de quibus ille præsumpserat, sic adversarentur pro³ nomine christiano, ut longe atrocius bellum cum eis quam cum hominibus gerere viderentur: ita verus Dominus gubernatorque rerum et Romanos cum misericordia flagellavit, et tam incredibiliter victis supplicatoribus dæmonum, nec saluti rerum præsentium necessaria esse sacrificia illa monstravit; ut ab his, qui non pervaciter contendunt, sed prudenter attendunt, nec propter præsentis necessitates religio vera deseratur, et magis æternæ vitæ fidelissima expectatione teneatur.

CAPUT XXIV. — *Quæ sit christianorum imperatorum, et quam vera felicitas.*

Neque enim nos christianos quosdam imperatores ideo felices dicimus, quia vel diutius imperarunt, vel imperantes filios morte placida reliquerunt, vel hostes reipublicæ domuerunt, vel inimicos cives adversus se insurgentes et cavere et opprimere potuerunt. Hæc et alia vitæ hujus ærumnosæ vel نومرا, vel solatia, quidam etiam cultores dæmonum accipere meruerunt, qui non pertinent ad regnum Dei, quo pertineat isti: et hoc ipsius misericordia factum est, ne ab illo ista, qui in eum crederent, velut summa bona desiderarent. Sed felices eos dicimus, si juste imperant, si inter linguas sublimiter honorantium et obsequia nimis humiliter salutantium non extolluntur, sed se homi-

¹ Sic plures Mss. Alii quidam, *graviora dignos*; omisso, *pati*. At editi, *graviores dignos*.

² Editi, *deinde cum*. Abest *cum*, a manuscriptis.

³ Mss. omittunt *pro*. — Omittunt etiam nostri omnes. M.

(a) Plus quam ducenta millia Gothorum fuisse ferunt Paulus Æmilii, libro 1 Historiæ Francorum; Orosius, lib. 7, cap. 37, et alii. Hæc Rhadagaisi clades sub Honorio contigit, anno Christi 406. Vide Augustini Sermonem 103, cap. 10.

(Sic.)

nes esse meminerunt; si suam potestatem ad Dei cultum maxime dilatandum majestati ejus famulam faciunt; si Deum timent, diligunt, colunt; si plus amant illud regnum, ubi non timent habere consortes; si tardius vindicant, facile ignoscunt; si eandem vindictam pro necessitate regendæ tuendæque reipublicæ, non pro saturandis inimicitiarum odiis exerunt¹; si eandem veniam non ad impunitatem iniquitatis, sed ad spem correctionis indulgent; si, quod aspere coguntur plerumque decernere, misericordix lenitate et beneficiorum largitate compensant; si luxuria tanto eis est castigatior, quanto posset esse liberior; si malunt cupiditatibus pravis, quam quibuslibet gentibus imperare: et si hæc omnia faciunt, non propter ardorem inanis gloriæ, sed propter charitatem felicitatis æternæ: si pro suis peccatis, humilitatis et miserationis et orationis sacrificium Deo suo vero immolant non negligunt. Tales christianos imperatores dicimus esse felices interim spe, postea re ipsa futuros, cum id, quod exspectamus, advenit.

CAPUT XXV. — *De prosperitatibus, quas Constantino imperatori christiano Deus contulit.*

Nam bonus Deus, ne homines, qui eum crederent propter æternam vitam colendum, has sublimitates et regna terrena existimarent posse neminem consequi, nisi dæmonibus supplicet, quod hi spiritus in talibus multum valerent, Constantinum imperatorem non supplicentem dæmonibus, sed ipsum verum Deum colentem, tantis terrenis implevit muneribus, quanta optare nullus auderet: cui etiam condere civitatem (a) Romano imperio sociam, velut ipsius Romæ filiam, sed sine aliquo dæmonum templo simulacroque concessit. Diu imperavit (b), universum orbem Romanum unus Augustus tenuit et defendit; in administrandis et gerendis bellis victoriosissimus fuit; in tyrannicis opprimendis (c) per omnia prosperatus est; grandævus ægritudine et senectute defunctus est; filios imperantes reliquit (d). Sed rursus ne imperator quisquam ideo christianus esset, ut felicitatem Constantini mereretur, cum propter vitam æternam quisque debeat esse christianus; Jovianum² multo citius quam Julianum abstulit; Gratianum ferro tyrannico permisit interim (e); longe quidem mitius, quam Magnum Pompeium, colentem velut³ Romanos deos (f). Nam ille vindicari a Catone non potuit, quem civilis belli quodammodo hæredem reliquerat: iste autem, quamvis piæ animæ solatia talia non requirant, a Theodo-

¹ Aliquot Mss., *exercent*.—Mss. 766, 2051 et 2053, *exerant*. M.

² Pauciores manuscripti cum editis, *Jovinianum*.—Sic etiam nostri omnes. M.

³ Editi, *videlicet*. At omnes Mss., *velut*.

(a) Constantinopolim.

(b) Annos triginta et unum imperasse prodit Orosius, lib. 7, cap. 26.

(c) Maxentio uimirum et Licinio.

(d) Constantium, Constantinum et Constantem.

(e) Cæsarum videlicet ab Andragathio Maximi tyranni præfecto.

(f) Qui, ut scribit Florus, lib. 4, cap. 3, « in Pelusiaco e litore, imperio viliissimi regis (id est Ptolemæi pupilli), e consiliis apadonum, et ne quid mali desit, septimii desertoris sui gladio trucidatus, sub oculis uxoris suæ liberorumque moritur. » Vide Liv. lib. 412.

sio viadicatus est (a), quem regni participem fecerat, cum parvulum haberet fratrem (b); avidior fidæ societatis⁴, quam nimix potestatis.

CAPUT XXVI.— *De fide et pietate Theodosii Augusti.*

1. Unde et ille non solum vivo servavit quam debebat fidem, verum etiam post ejus mortem pulsus ab ejus interfecitore Maximo Valentinianum, ejus parvulum fratrem, in sui partes imperii tanquam christianus excepit pupillum, paterno custodivit affectu, quem destitutum omnibus opibus nullo negotio posset auferre, si latius regnandi cupiditate magis quam bene faciendi charitate flagraret: unde potius eum, servata ejus imperatoria dignitate susceptum, ipsa humanitate et gratia consolatus est. Deinde cum Maximum terribilem faceret ille successus, hic in angustiis curarum suarum non est lapsus ad curiositates sacrilegas atque illicitas, sed ad Joannem in Ægypti eremo constitutum, quem Dei servum prophetandi spiritu præditum fama crebrescente didicerat, misit; atque ab eo nuntium victoriæ certissimum accepit. Mox tyranni Maximi extinctor Valentinianum puerum imperii sui partibus, unde fugatus fuerat, cum misericordissima veneratione restituit: eoque sive per insidias, sive quo alio pacto vel casu proxime extincto, alium tyrannum Eugenium, qui in illius imperatoris locum non legitime fuerat subrogatus, accepto rursus prophetico responso, fide certus oppressit, contra cujus robustissimum exercitum magis orando, quam feriendo pugnavit. Milites nobis, qui aderant, retulerunt, extorta sibi esse de manibus quæcumque jaculabantur, cum a Theodosii partibus in adversarios vehementer ventus irret, et non solum, quæcumque in eos jaciuntur, concitatissime raperet, verum etiam ipsorum tela in eorum corpora retorqueret. Unde et poeta Claudianus, quamvis a Christi nomine alienus, in ejus tamen laudibus dixit:

O nimium dilecte Deo, cui fundit ab antris
Æolus armatas hiemes⁵; cui militat æther,
Et conjurati veniunt ad classica venti!

(In *Panegyrico de tertio Honorii consulatu*, vers. 96-98.)

Victor autem, sicut crediderat et prædixerat, Jovis simulacra, quæ adversus eum fuerant nescio quibus ritibus velut consecrata, et in Alpibus constituta, deposuit: eorumque fulmina, quod aurea fuissent, jocantibus (quod illa lætitia permittebat) Cursoribus, et se ab eis fulminari velle dicentibus, hilariter benigneque donavit. Inimicorum suorum filios, quos non ipsius jussus, sed belli abstulerat impetus⁶, etiam nondum christianos ad ecclesiam confugientes, christianos hac occasione fieri voluit, et christiana charitate dilexit;

⁴ In excusis legebatur, *haberet et fratrem, avidior fidæ societatis*. Sed particula, *et*, non est in melioris notæ manuscriptis, quorum etiam auctoritate emendamus, *fide*.

⁵ Mss. nostri omittunt, *cui fundit ab antris Æolus armatas hiemes*. M.

⁶ Plerique Mss., *quos non ipsius jussu; et quidam prosequuntur, sed belli abstulerat impetus; omisso, sed*. Forte legendum, *quos non ipsius, sed belli abstulerat impetus*.—Mss. 766, 2052 et 2055, *quos non ipsius jussu, belli abstulerat impetus*. M.

(g) Qui Theodosius Maximum Aquileis agentem cepit et interemit.

(h) Valentinianum scilicet juniorem, Valentiniani senioris ex Justina filium.

nec potuissent rebus, et¹ auxit honoribus. In neminem post victoriam privatas inimicitias valere permisit. Bella civilia, non sicut Cinna et Marius et Sylla et alii tales nec finita finire voluerunt, sed magis doluit exorta quam cuiquam nocere voluit terminata. Inter hæc omnia ex ipso initio imperii sui non quievit justissimis et misericordissimis legibus adversus impios laboranti Ecclesiæ subvenire, quam Valens hæreticus Valens Arianis vehementer afflixerat: ejus Ecclesiæ se membrum esse magis quam in terris regnare gaudebat. Simulacra Gentilium ubique evertenda præcepit, satis intelligens nec terrena munera in dæmoniorum, sed in Dei veri esse posita potestate. Quid autem fuit ejus religiosa humilitate mirabilius, quando in Thessalonicensium gravissimum scelus, cui jam, episcopis intercedentibus, promiserat indulgentiam, tumultu quorundam, qui ei cohærebant, vindicare compulsus est, et ecclesiastica coercitus disciplina, sic egit penitentiam, ut imperatoriam celsitudinem pro illo populus orans magis fieret videndo prostratam, quam peccando timeret iratam? Hæc ille secum, et si qua similia, quæ commemorare longum est, bona opera tulit, ex isto temporali vapore cujuslibet culminis et sublimitatis humanæ; quorum operum merces est æterna felicitas, cujus dator est Deus solis² veraciter piis. Cætera vero vitæ hujus vel fastigia vel subsidia, sicut ipsum mundum, lucem, auras, terras, aquas, fructus, ipsiusque hominis animam, corpus, sensus, mentem, vitam, bonis malisque largitur: in quibus est etiam quælibet imperii magnitudo, quam pro temporum gubernatione dispensat³.

2. — [XXXVII.] Proinde jam etiam illis respon-

¹ Sic Mss. At editi, *sed*.

² Nonnulli Mss., *solus*.

³ Sic apud Am. Er. et Lov. factum est caput vigesimum septimum et titulus iste additus: *Contra invidios invectione Augustini, qui scripserunt contra editos jam libros*. Sed id tentatum sine auctoritate manuscriptorum, et refragante antiquiore editione Vindeliniana.

dendum esse video, qui manifestissimis documentis, quibus ostenditur quod ad ista temporalia, quæ sola stulti habere concupiscunt, nihil deorum falsorum numerositas prosit, confutati atque convicti conantur asserere, non propter vitæ præsentis utilitatem, sed propter eam quæ post mortem futura est, colendos deos. Nam istis qui propter amicitias mundi hujus volunt vana colere, et non se permitti puerilibus sensibus conqueruntur, his quinque libris satis arbitrator esse responsum. Quorum tres priores cum edidisset, et in multorum manibus esse cœpissent, auctori quosdam nescio quam adversus eos responsionem scribendo præparare. Deinde ad me perlatum est, quod jam scripserint, sed tempus quærant, quo sine periculo possint edere. Quos admoneo, non optent quod eis non expedit. Facile est enim cuiquam videri respondisse, qui tacere noluerit. Aut quid est loquacius vanitate? quæ non ideo potest quod veritas, quia, si voluerit, etiam plus potest clamare quam veritas. Sed considerent omnia diligenter: et si forte, sine studio partium judicantes, talia esse perspexerint, quæ potius exagitari quam convelli possint garrulitate impudentissima et quasi satirica vel mimica levitate, cohibeant suas nugæ; et potius a prudentibus emendari, quam laudari ab imprudentibus eligant. Nam si non ad libertatem vera dicendi, sed ad licentiam maledicendi tempus expectant, absit ut eis eveniat quod ait Tullius de quodam, qui peccandi licentia felix appellabatur: O miserum, cui peccare licebat (a)! Unde quisquis est, qui maledicendi licentia felicem se putat, multo erit felicior, si hoc illi omnino non liceat: cum possit deposita inanitate jactantiæ etiam isto tempore, tanquam studio consulendi, quidquid voluerit, contradicere; et quantum possunt¹, ab eis, quos consulit amica disputatione, honeste, graviter, libere quod oportet audire.

¹ Editi, *possit*. Verius Mss., *possunt*: eos intellige qui consuluntur amica disputatione.

(a) simile quiddam de Cinna in Tusc. Quæst. lib. 3, cap. 19.

LIBER SEXTUS.

Enactus contra eos qui propter hanc temporalem vitam colendos deos putant: nunc autem adversus eos qui cultum ipsi credunt propter vitam æternam exhibendum: quos Augustinus libris quinque sequentibus confutaturus, ostendit hic in primis opinionem de diis quam abjectam habuerit ipsemet Varro theologiæ gentilis scriptor commendatissimus. Affert theologiæ istius genera secundum eundem tria, fabulosum, naturale et civile: ac mox de fabuloso et de civili demonstrat, nihil hæc genera ad futuræ vitæ felicitatem conferre.



PRÆFATIO.

Quinque superioribus libris satis mihi adversus eos videor disputasse, qui multos deos et falsos, quos esse inutilia simulacra, vel immundos spiritus et perniciose dæmonia, vel certe creaturas, non Creatorem, veritas christiana convincit, propter vitæ hujus mortalis rerumque terrenarum utilitatem, eo ritu ac servitate, quæ græcè *λατρεία* dicitur, et uni vero Deo debetur, venerandos et colendos putant. Et nimis quidem stultitiæ vel pertinaciæ, nec istos quinque, nec ullos alios quantumque numeri libros satis esse posse, quis nesciat? quando ea putatur gloria vanitatis, nullis cedere viribus veritatis; in perniciem utique ejus, cui vitium tam immane dominatur. Nam et

contra omnem curantis industriam, non malo medici, sed ægroti insanabilis, morbus invictus est. Hi vero qui ea quæ legunt, vel sine ulla, vel non cum magna ac nimia veteris erroris obstinatione, intellecta et considerata perpendunt, facilius nos isto numero terminatorum quinque voluminum plus, quam quæstionis ipsius necessitas postulabat, satisfecisse, quam minus disservisse judicabunt; totamque invidiam, quam christianæ religioni de hujus vitæ cladibus terrenarumque contritione ac mutatione rerum imperiti facere conantur, non solum dissimulantibus, sed contra suam conscientiam faventibus etiam doctis, quos impietas vesana possedit, omnino esse inanem rectæ cogitationis atque rationis, plenamque lo-

visissimæ temeritatis et perniciosissimæ animositatis, dubitare non poterunt.

CAPUT PRIMUM. — *De his qui dicunt deos a se non propter presentem vitam coli, sed propter æternam.*

1. Nunc ergo quoniam deinceps, ut promissus ordo expetit, etiam hi refellendi et docendi sunt, qui non propter istam vitam, sed propter illam quæ post mortem futura est, deos Gentium, quos christiana religio destruit, colendos esse contendunt; placet a veridico oraculo sancti Psalmi sumere exordium disputationis meæ: *Beatus cujus est Dominus Deus spes ipsius, et non respexit in vanitates et insanias mendaces (Psal. xxxix, 5).* Verumtamen in omnibus vanitatibus insanisque mendacibus longe tolerabilibus philosophi audiendi sunt, quibus displicuerunt istæ opiniones erroresque populorum: qui populi constituerunt simulacra numinibus, multaque de eis, quos deos immortales vocant, falsa atque indigna sive finxerunt, sive ficta crediderunt, et credita eorum cultui sacrorumque ritibus miscuerunt. Cum his hominibus, qui, etsi non libere prædicando, saltem utcumque in disputationibus mussitando, talia se improbare testati sunt, non usque adeo inconvenienter quæstio ista tractatur: utrum non unum Deum, qui fecit omnem spiritualem corporalemque creaturam, propter vitam quæ post mortem futura est, coli oporteat; sed multos deos, quos ab illo uno factos et sublimiter collocatos quidam eorumdem philosophorum cæteris excellentiores nobilioresque senserunt (a).

2. Cæterum quis ferat dici atque contendere, deos illos, quorum in quarto libro quosdam commemoravi (Capp. 11 et 21), quibus rerum exiguarum singulis singula distribuuntur officia, vitam æternam cuiquam præstare? An vero illi peritissimi et acutissimi viri, qui se pro magno beneficio conscripta docuisse gloriantur, ut sciretur quare cuique deo supplicandum esset, quid a quoque esset petendum, ne absurditate turpissima, qualis joculariter in mimo fieri solet, peteretur a Libero aqua, a Lymphis (b) vinum (c); auctores erunt cuiquam hominum diis immortalibus supplicanti, ut cum a Lymphis petierit vinum, eique responderint, Nos aquam habemus, hoc a Libero pete; possit recte dicere, Si vinum non habetis, saltem date mihi vitam æternam? Quid hac absurditate monstruosius? Nonne illæ cachinnantes (solent enim esse ad risum faciles [d]) si non affectent fallere ut dæmones, supplici respondebunt, O homo, putasne in potestate nos habere vitam, quas audis non habere vel vitem? Impudentissimæ igitur stultitiæ est, vitam æternam a talibus diis petere vel sperare, qui vitæ hujus ærumnosissimæ atque brevissimæ, et si qua ad eam pertinent adminiculandam at-

¹ Vind. Am. Er. et plerique Mss., *monstruosius*.

(a) Plato in *Timeo*.

(b) Editi, *Nymphis*; at Mss. constanter, *Lymphis*. Mutata olim est a Latinis littera a Græco nomine, *Nymphæ*, quo veteres aquas vel aquarum deas appellabant.

(c) Vide supra, lib. 4, cap. 22.

(d) Alludit ad illud Virgiliti, *Ecl. 3, vers. 9*: « Sed facies Nymphæ risere. » Tametsi eo loci faciles dictæ intelligantur, non ad rideendum, sed ad exaudiendum.

que fulciendam, ita singulas particulas tueri asseruntur, ut si id quod sub alterius tutela ac potestate est, petatur ab altero, tam sit inconveniens et absurdum, ut mimicæ scurrilitati videatur esse simillimum. Quod cum sit a scientibus mimis, digne ridentur in theatro; cum vero a nescientibus stultis, dignius iridentur in mundo. Cui ergo deo vel deæ, propter quid supplicaretur, quantum ad illos deos attinet, quos instituerunt civitates, a doctis solerter Inventum memoriæque mandatum est; quid a Libero, verbi gratia, quid a Lymphis, quid a Vulcano, ac sic a cæteris, quos partim commemoravi in quarto libro, partim prætereundos putavi. Porro si a Cerere vinum, a Libero panem, a Vulcano aquam, a Lymphis ignem petere erroris est; quanto majoris deliramenti esse intelligi debet, si cuiquam istorum pro vita supplicetur æterna?

3. Quamobrem, si, cum de regno terreno quæreremus, quosnam illud deos vel deas hominibus credendum esset posse conferre, discussis omnibus longe alienum a veritate monstratum est, a quoquam istorum multorum numinum atque falsorum saltem regna terrena existimare constitui: nonne insanissimæ impietatis est, si æterna vita, quæ terrenis omnibus rebus sine ulla dubitatione vel comparatione præferenda est, ab istorum quoquam dari cuiquam posse credatur? Neque enim propterea dii tales vel terrenum regnum dare non posse visi sunt, quia illi magni et excelsi sunt, hoc quiddam parvum et abjectum, quod non dignarentur in tanta sublimitate curare. Sed quantumlibet¹ consideratione fragilitatis humanæ caducos apices terreni regni merito quisque contemnat; illi dii tales apparuerunt, ut indignissimi viderentur, quibus danda atque servanda deberent vel ista committi. Ac per hoc, si (ut superiora proximis duobus libris pertractata docuerunt) nullus deus ex illa turba, vel quasi plebeiorum, vel quasi procerum deorum, idoneus est regna mortalia mortalibus dare, quanto minus potest immortales ex mortalibus facere?

4. Huc accedit quia, si jam cum illis agimus, qui non propter istam, sed propter vitam quæ post mortem futura est, existimant colendos deos; jam nec propter illa saltem, quæ deorum talium potestati tanquam dispartita² et propria, non ratione veritatis, sed vanitatis opinione tribuuntur, omnino colendi sunt; sicut credunt hi qui cultum eorum vitæ hujus mortalitatis utilitatibus necessariam esse contendunt: contra quos jam quinque præcedentibus voluminibus satis, quantum potui, disputavi. Quæ cum ita sint, si eorum qui colerent deam Juventatem, ætas ipsa floret insignis; contemptores autem ejus, vel intra annos occumberent juventutis, vel in ea tanquam senili torpore³ frigescerent: si malas cultorum suorum speciosius et festivius Fortuna barbata vestiret; a quibus autem sperneretur, glabros aut male barbatos vidcremus: etiam sic rectissime diceremus, huc usque istas deas singulas posse, suis officiis quodam-

¹ Sic Mss. Editi vero, *quantalibet*.

² Ms. 766, *dispartita*. M.

³ Sic Mss. At editi, *corpore*.

modo limitatas¹; ac per hoc nec a Juventate oportere peti vitam æternam, quæ non daret barbam; nec a Fortuna barbata boni aliquid post hanc vitam esse sperandum, cujus in hac vita potestas nulla esset, ut eandem saltem ætatem, quæ barba induitur, ipsa præstaret. Nunc vero, cum earum cultus nec propter ista ipsa, quæ putant eis subdita, sit necessarius; quia et multi colentes Juventatem deam minime in illa ætate viguerunt, et multi non eam colentes gaudent robore juventutis; itemque multi Fortunæ barbatae supplices ad nullam vel deformem barbam pervenire potuerunt, et si qui eam pro barba impetranda venerantur, a barbatis ejus contemptoribus irridentur: itane desipit cor humanum, ut, quorum deorum cultum propter ista ipsa temporalia et cito prætereuntia munera, quibus singulis singuli præesse perhibentur, inanem Indibriosumque cognoscit, propter vitam æternam credat esse fructuosum? Hauc dare illos posse nec hi dicere ausi sunt, qui eis, ut ab insipientibus populis colerentur, ista opera temporalia, quoniam nimis multos putaverunt, ne quisquam eorum sederet otiosus, minutatim divisa tribuerunt.

CAPUT II. — *Quid Varronem de diis Gentium sensisse credendum sit, quorum talia et genera et sacra detexit, ut reverentius cum eis ageret, si de illis omnino reticeret.*

Quis Marco Varrone curiosius ista quæsit? quis invenit doctius? quis consideravit attentius? quis distinxit acutius? quis diligentius pleniusque² conscripsit? Qui tametsi minus est suavis eloquio, doctrina tamen atque sententiis ita referentis est, ut in omni eruditione, quam nos sæcularem, illi autem liberalem vocant, studiosum rerum tantum iste doceat, quantum studiosum verborum Cicero delectat. Denique et ipse Tullius huic tale testimonium perhibet, ut in libris Academicis (a) dicat eam, quæ ibi versatur, disputationem, se habuisse cum Marco Varrone, *homine inquit, omnium facile acutissimo, et sine ulla dubitatione doctissimo.* Non ait, Eloquentissimo, vel, facundissimo; quoniam revera in hac facultate multum impar est: sed, *omnium, inquit, facile acutissimo.* Et in eis libris, id est Academicis, ubi cuncta dubitanda esse contendit, addidit, *sine ulla dubitatione doctissimo.* Profecto de hac re sic erat certus, ut auferret dubitationem, quam solet in omnibus adhibere, tanquam de hoc uno etiam pro Academicorum dubitatione disputaturus, se Academicum fuisset oblitus. In primo autem libro cum ejusdem Varronis litteraria opera prædicaret, *Nos, inquit, in nostra urbe peregrinantes errantesque, tanquam hospites, tui libri quasi domum reducerunt, ut possemus aliquando qui et ubi essemus agnoscere. Tu ætatem patriæ, tu descriptiones temporum, tu sacrorum jura, tu sacerdotum, tu domesticam, tu publicam³ disciplinam, tu sedem⁴ regionum,*

¹ Editi, *posse suis officiis quodam modo limitari.* Legendum cum mss., *limitatas*: et verbum, *posse*, accipiendum ibi, pro eo quod est vim habere.

² Mss. 2050, 2051 et 2052, *pliniusque.* M.

³ Apud Ciceronem, *bellicum.*

⁴ Editi, *sedem.* At mss. plerique et apud Ciceronem, *sedem.* (a) Desideratur in libris qui supersunt de Quæst. Acad.

locorum, tu omnium divinarum humanarumque rerum nomina, genera, officia, causas aperuisti (Cicero lib. 1, c. 3, de Quæst. Acad.). Iste igitur vir tam insignis excellentisque peritiæ, et quod de illo etiam Terentianus elegantissimo versiculo breviter ait,

Vir doctissimus undecumque Varro;

(*De metris, in sectione de versibus phalæctis.*)

qui tam multa legit, ut aliquid ei scribere vacasse miremur; tam multa scripsit, quam multa vix quemquam legere potuisse credamus: iste, inquam, vir tantus ingenio, tantusque doctrina, si rerum velut divinarum, de quibus scribit, oppugnator esset atque destructor, easque non ad religionem, sed ad superstitionem diceret pertinere, nescio utrum tam multa in eis ridenda, contemnenda, detestanda conscriberet. Cum vero Deos eosdem ita coluerit, colendosque censuerit, ut in eo ipso opere litterarum suarum dicat se timere ne pereant, non incursum hostili, sed civium negligentia, de qua illos velut ruina liberari a se dicit, et in memoria bonorum per hujusmodi libros recondi atque servari utiliore cura, quam Metellus de incendio sacra Vestalia, et Æneas de Trojano excidio penates liberasse prædicantur; et tamen ea legenda sæculis prodit, quæ a sapientibus et insipientibus merito abjicienda, et veritati religionis inimicissima judicentur: quid existimare debemus, nisi hominem acerrimum ac peritissimum, non tamen sancto Spiritu liberum, oppressum fuisse suæ civitatis consuetudine ac legibus; et tamen ea, quibus movebatur, sub specie commendandæ religionis tacere noluisse?

CAPUT III. — *Quæ sit partitio Varronis librorum suorum, quos de Antiquitatibus rerum humanarum divinarumque composuit.*

Quadragesima et unum libros scripsit Antiquitatum: hos in res humanas divinasque divisit, rebus humanis viginti quinque, divinis sedecim tribuit: istam secutus in ea partitione rationem, ut rerum humanarum libros senos quatuor partibus daret. Intendit enim qui agant, ubi agant, quando agant, quid agant. In sex itaque primis de hominibus scripsit, in secundis sex de locis, sex tertios de temporibus, sex quartos eosdemque postremos de rebus absolvit. Quater autem seni, viginti et quatuor fiunt. Sed unum singularem, qui communiter prius de omnibus loqueretur, in capite posuit. In divinis identidem rebus eadem ab illo divisionis forma servata est, quantum attinet ad ea quæ diis exhibenda sunt: exhibentur enim ab hominibus in locis et temporibus sacra. Itaque quatuor, quæ dixi, libris complexus est ternis: nempe tres priores de hominibus scripsit, sequentes de locis, tertios de temporibus, quartos de sacris; etiam hic qui exhibeant, ubi exhibeant, quando exhibeant, quid exhibeant, subtilissima distinctione commendans. Sed quia oportebat dicere, et maxime id expectabatur, quibus exhibeant, de ipsis quoque diis tres conscripsit extremos, ut quinquies terni quindecim fierent. Sunt autem omnes, ut diximus, sedecim: quia et istorum exordio unum singularem, qui prius de omni-

bus loqueretur, apposuit : quo absoluto, consequenter ex illa quinquepartita distributione tres præcedentes, qui ad homines pertinent, ita subdivisit, ut primus sit de pontificibus, secundus de auguribus, tertius de quindecimviris sacrorum (a). Secundos tres ad loca pertinentes ; ita ut in uno eorum de sacellis, altero de sacris ædibus diceret, tertio de locis religiosis. Tres porro qui istos sequuntur, et ad tempora pertinent, id est ad dies festos ; ita ut unum eorum faceret de feriis, alterum de ludis circensibus, de scenicis tertium. Quattorum trium ad sacra pertinentium uni dedit consecrationes, alteri sacra privata, ultimo publica. Hanc velut pompam obsequiorum in tribus, qui restant, dii ipsi sequuntur extremi, quibus iste universus cultus impensus est : in primo dii certi, in secundo incerti, in tertio cunctorum novissimo dii præcipui atque selecti.

CAPUT IV. — *Quod ex disputatione Varronis apud cultores deorum antiquiores res humanæ quam divinæ reperiuntur.*

1. In hac tota serie pulcherrimæ ac subtilissimæ distributionis et distinctionis vitam æternam frustra quæri et sperari impudentissime vel optari, ex his quæ jam diximus, et quæ deinceps dicenda sunt, cuiusvis hominum, qui corde obstinato sibi non fuerit inimicus, facillime apparet. Vel hominum enim sunt ista instituta, vel dæmonum : non quales vocant illi dæmones bonos ; sed, ut loquar apertius, immundorum spirituum et sine controversia malignorum, qui noxias opiniones, quibus anima humana magis magisque vanescat, et incommutabili æternæque veritati coaptari atque inhærere non possit, invidentiâ mirabili et occulte inserunt cogitationibus impiorum, et aperte aliquando ingerunt sensibus, et qua possunt fallaci attestatione confirmant. Iste ipse Varro propterea se prius de rebus humanis, de divinis autem postea scripsisse testatur, quod prius exstiterint civitates, deinde ab eis hæc instituta sint. Vera autem religio non a terrena aliqua civitate instituta est ; sed plane cœlestem ipsa instituit civitatem : eam vero inspirat et docet verus Deus, dator vitæ æternæ, veris cultoribus suis.

2. [IV.] Varronis igitur, contentis ideo se prius de rebus humanis scripsisse, postea de divinis, quia divinæ istæ ab hominibus institutæ sunt, hæc ratio est : *Sicut prior est, inquit, pictor quam tabula picta, prior faber quam ædificium ; ita priores sunt civitates, quam ea quæ a civitatibus sunt instituta.* Dicit autem se prius scripturam fuisse de diis, postea de hominibus, si de omni natura deorum scriberet. Quasi hic de aliqua scribat, et non de omni ; aut vero etiam aliqua, licet non omnis, deorum natura non prior debeat esse, quam hominum ? Quid quod in illis tribus novissimis libris, deos certos et incertos et selectos dili-

(a) Duumviri sacrorum a Tarquinio Superbo instituti fuerant, ut scribit Dionysius Hal. Antiq. lib. 4, cap. 62, qui sacris libris legendis carminibusque Sibyllæ et falsis Romani populi interpretandis præessent. cum plebs deinde ex suis creari instaret, aucto numero facti sunt decem. His demum additi quinque, qui numerus postea mansit.

genter explicans, nullam deorum naturam prætermittere videtur ? Quid est ergo quod ait, Si de omni natura deorum et hominum scriberemus, prius divina absolvissemus, quam humana attingissemus ? Aut enim de omni natura deorum scribit, aut de aliqua, aut omnino de nulla. Si de omni, præponenda est utique rebus humanis : si de aliqua, cur non etiam ipsa res præcedat humanas ? an indigna est præferri etiam universæ naturæ hominum pars aliqua deorum ? Quod si multum est ut aliqua pars divina præponatur universis rebus humanis, saltem digna est vel Romanis : rerum quippe humanarum libros, non quantum ad orbem terrarum, sed quantum ad solam Romam pertinet, scripsit. Quos tamen rerum divinarum libris se dixit scribendi ordine merito prætulisse, sicut pictorem tabulæ pictæ, sicut fabrum ædificio ; apertissime constans quod etiam istæ res divinæ, sicut pictura, sicut structura, ab hominibus institutæ sint. Restat ut de nulla deorum natura scripsisse intelligatur ; neque hoc aperte dicere voluisse, sed intelligentibus reliquisse. Ubi enim dicitur, Non omnis, usitate quidem intelligitur aliqua : sed potest intelligi et nulla ; quoniam quæ nulla est, nec omnis, nec aliqua est. Nam, ut ipse dicit, si omnis esset natura deorum de qua scriberet, scribendi ordine rebus humanis præponenda esset : ut autem et ipso tacente veritas clamat, præponenda esset certe rebus Romanis, etiam si non omnis, sed saltem aliqua esset : recte autem postponitur ; ergo nulla est. Non itaque rebus divinis anteferre voluit res humanas, sed rebus veris noluit anteferre res falsas. In his enim, quæ scripsit de rebus humanis, secutus est historiam rerum gestarum : quæ autem de his, quas divinas vocat, quid nisi opiniones rerum vanarum ? Hoc est nimirum, quod voluit subtili significatione monstrare ; non solum scribens de his posteriori quam de illis, sed etiam rationem reddens cur id fecerit. Quam si tacuisset, aliter hoc factum ejus ab aliis fortasse defenderetur. In ea vero ipsa ratione, quam reddidit, nec aliis quidquam reliquit pro arbitrio suspicari, et satis probavit homines se præposuisse institutis hominum, non naturam hominum naturæ deorum. Ita se libros rerum divinarum, non de veritate quæ pertinet ad naturam, sed de falsitate quæ pertinet ad errorem, scripsisse confessus est. Quod apertius alibi posuit, sicut in quarto libro commemoravi (Cap. 31, n. 4), ex naturæ formula se scripturam fuisse, si novam ipse conderet civitatem ; quia vero jam veterem invenerat, non se potuisse nisi ejus consuetudinem sequi.

CAPUT V. — *De tribus generibus theologiæ secundum Varronem, scilicet uno fabuloso, altero naturali, tertioque civili.*

1. Deinde illud quale est, quod tria genera theologiæ dicit esse, id est rationis quæ de diis explicatur, eorumque unum mythicon appellari¹, alterum phisicon, tertium civile ? Latine si usus admitteret, genus quod primum posuit, fabulare appellarem ; sed fabulosum dicamus : a fabulis enim mythicon dictum

¹ Ms. 766 omittit, appellari. M.

est: quoniam $\mu\theta\delta\sigma$; græcè fabula dicitur. Secundum autem ut naturale dicatur, jam et consuetudo locutionis admittit. Tertium etiam ipse latine enuntiavit, quod civile appellatur. Deinde ait: *Mythicon appellant, quo maxime utuntur poetæ; physicon, quo philosophi; civile, quo populi. Primum, inquit, quod dixi, in eo sunt multa contra dignitatem et naturam immortalium facta. In hoc enim est, ut deus alius ex capite, alius ex femore sit, alius ex guttis sanguinis natus: in hoc, ut dii furati sint, ut adulteraverint, ut servierint homini: demique in hoc omnia diis¹ attribuuntur, quæ non modo in hominem, sed etiam quæ in contemptissimum hominem cadere possunt.* Hic certe ubi potuit, ubi ausus est, ubi impunitum putavit, quanta mendacissimis fabulis naturæ deorum fieret injuria, sine caligine ullius ambiguitatis expressit. Loquebatur enim, non de naturali theologia, non de civili, sed de fabulosa, quam libere a se putavit esse culpandam.

2. Videamus quid de altera dicat. *Secundum genus est, inquit, quod demonstravi, de quo multos libros philosophi reliquerunt: in quibus est, dii qui sint, ubi, quod genus, quale; a quodam tempore, an a sempiterno fuerint dii; ex igne sint², ut credit Heraclitus; an ex numeris, ut Pythagoras; an ex atomis, ut ait Epicurus. Sic alia, quæ facilius intra parietes in schola, quam extra in foro ferre possunt aures. Nihil in hoc genere culpavit, quod physicon vocant, et ad philosophos pertinet: tantum quod eorum inter se controversias commemoravit, per quos facta est dissidentium multitudo sectarum. Removit tamen hoc genus a foro, id est a populis; scholis vero et parietibus clausit: illud autem primum mendacissimum atque turpissimum a civitatibus non removet. O religiosas aures populares, atque in his etiam Romanas! Quod de diis immortalibus philosophi disputant, ferre non possunt: quod vero poetæ canunt, et histriones agunt, quia contra dignitatem ac naturam immortalium facta sunt, quia non modo in hominem, sed etiam in contemptissimum hominem cadere possunt, non solum ferunt, sed etiam libenter audiunt. Neque id tantum, sed diis quoque ipsis hæc placere, et per hæc eos placandos esse decernunt.*

3. Dixerit aliquis, Hæc duo genera, mythicon et physicon, id est fabulosum atque naturale, discernamus ab hoc civili, de quo nunc agitur; unde illa et ipse discrevit: jamque ipsum civile videamus qualiter explicet. Video quidem, cur debeat discerni fabulosum: quia falsum, quia turpe, quia indignum est. Naturale autem a civili velle discernere, quid est aliud, quam etiam ipsum civile fateri esse mendosum? Si enim illud naturale est, quid habet reprehensionis, ut excludatur? si autem hoc quod civile dicitur, naturale non est, quid habet meriti, ut admittatur? Hæc nempe illa causa est, quare prius scripserit de rebus humanis, posterius de divinis; quoniam in divinis rebus non naturam³, sed hominum instituta secutus est.

¹ Ms. 768 omittit verba, in hoc, et, diis. M.

² Sic nostri manuscripti. In B., a quoniam tempore, an a sempiterno fuerint, an ex igne sint. M.

³ Er. et Lov., non naturam deorum. Abest, deorum, ab editis aliis et a manuscriptis.

Intueamur sane et civilem theologiam. *Tertium genus est, inquit, quod in urbibus cives, maxime sacerdotes, nosse atque administrare debent. In quo est, quos deos publice colere, [quæ] sacra ac sacrificia facere quemque par sit⁴.* Adhuc quod sequitur attendamus. *Prima, inquit, theologia maxime accommodata est ad theatrum, secunda ad mundum, tertia ad urbem.* Quis non vident, cui palmam dederit? Utique secundæ, quam supra dixit esse philosophorum. Hanc enim pertinere testatur ad mundum, quo isti nihil esse excellentius opinantur in rebus. Duas vero illas theologias, primam et tertiam, theatri scilicet atque urbis, distinxit, an junxit⁵? Videmus enim non continuo quod est urbis, pertinere posse et ad mundum; quamvis urbes esse videamus in mundo: fieri enim potest ut in urbe, secundum falsas opiniones, ea colantur et ea credantur, quorum in mundo vel extra mundum natura sit nusquam: theatrum vero ubi est, nisi in urbe? quis theatrum instituit, nisi civitas? propter quid instituit, nisi propter ludos scenicos? ubi sunt ludi scenici, nisi in rebus divinis, de quibus hi libri tanta solertia conscribuntur?

CAPUT VI. — De theologia mythica, id est fabulosa, et de civili, contra Varronem.

1. O Marce Varro, cum sis homo omnium acutissimus et sine ulla dubitatione doctissimus, sed tamen homo, non Deus, nec Spiritu Dei ad videnda et annuntianda divina in veritatem libertatemque subvectus, cernis quidem quam sint res divinæ ab humanis angis atque mendaciis dirimendæ: sed vitiosissimas populorum opiniones et consuetudines in superstitionibus publicis vereris offendere, quas a deorum natura abhorreere, vel talium, quales in hujus mundi elementis humani animi suspicatur infirmitas, et sentis ipse, cum eas usquequaque consideras, et omnis vestra litteratura circumsonat. Quid hic agit humanum quamvis excellentissimum ingenium? quid tibi humana licet multiplex ingensque doctrina in his angustiis suffragatur? Naturales deos colere cupis, civiles cogis: invenisti alios fabulosos, in quos liberius quod sentis evomas (a), unde et istos civiles velis nolisse perfundas. Dicis quippe fabulosos accommodatos esse ad theatrum, naturales ad mundum, civiles ad urbem: cum mundus opus sit divinum, urbes vero et theatra opera sint hominum; nec alii dii rideantur in theatris, quam qui adorantur in templis; nec aliis ludos exhibeatis, quam quibus victimas immolatis. Quanto liberius subtiliusque ista divideres, dicens alios esse deos naturales, alios ab hominibus institu-

⁴ Omnes Gallicani Mss. cum aliquot Romanis, habent sic: in quo est quos deos publice sacra ac sacrificia colere et facere quemque par sit.

⁵ Lov., ac sejuncti. Verius Er. et melioris notæ Mss., an junxit? Nempe quas distributione ipsa distinxit theologias, primam et tertiam, fabulosam et civilem, easdem junxisse Varro videtur, alteram ad urbem, alteram ad theatrum, quod ipsius urbis est, pertinere docens. — Cd. 2050, distinxit et adjunxit. M.

(a) Quare Tertullianus in Apologetico, cap. 14, Varronem vocat Cynicum Romanum. COGROS.

tos : sed de institutis aliud habere litteras poetarum, aliud sacerdotum ; utraque tamen ita esse inter se amicas consortio falsitatis, ut gratæ sint utraque dæmonibus, quibus inimica est doctrina veritatis ?

2. Sequestrata igitur paululum theologia, quam naturalem vocant, de qua postea disserendum est, placetne tandem vitam æternam peti aut sperari a diis poeticis, theatricis, ludicris, scenicis ? Absit : imo a veritatē Deus verus tam Immanem sacrilegamque demerentiam. Quid, ab eis diis¹, quibus hæc placent, et quos hæc placent, cum eorum illic crimina frequententur, vita æterna poscenda est ? Nemo, ut arbitror, usque ad tantum præcipitium furiosissima impietatis insanit. Nec fabulosa igitur, nec civili theologia sempiternam quisquam adipiscitur vitam. Illa enim de diis turpia fingendo seminat, hæc favendo metit : illa mendacia spargit, hæc colligit : illa res divinas falsis criminibus insectatur, hæc eorum criminum ludos in divinis rebus amplectitur : illa de diis nefanda signamenta hominum carminibus personat, hæc ea deorum ipsorum festivitibus consecrat : facinora et flagitia numinum illa cantat, hæc amat : illa prodit, aut fingit ; hæc autem aut attestatur veris, aut oblectatur et falsis. Ambæ turpes, ambæque damnabiles : sed illa, quæ theatrica est, publicam turpitudinem proficitur ; ista, quæ urbana est, illius turpitudine ornatur. Hincine vita æterna sperabitur, unde ista brevis temporalisque polluitur ? an vero vitam polluit consortium nefariorum hominum, si se inserant affectionibus et assensionibus nostris, et vitam non polluit societas dæmonum, qui coluntur criminibus suis ? Si veris, quam mali ? si falsis, quam malè ?

5. Hæc cum dicimus, videri fortasse cuiquam nimis harum rerum ignaro potest ea sola de diis talibus majestati indigna divinæ, et ridicula, detestabilia celebrari, quæ poeticis cantantur carminibus, et ludis scenicis actantur ; sacra vero illa, quæ non histrionæ, sed sacerdotes agunt, ab omni esse dedecore purgata et aliena. Hoc si ita esset, nunquam theatricas turpitudines in eorum honorem quisquam celebrandas esse censeret, nunquam eas ipsi dii præciperent sibi exhiberi. Sed ideo nihil pudet ad obsequium deorum talia gerere in theatris, quia similia geruntur in templis. Denique cum memoratus auctor civilem theologiam a fabulosa et naturali, tertiam quamdam sui generis, distinguere conaretur, eam magis ex utraque temperatam, quam ab utraque separatam intelligi voluit. Ait enim, ea quæ scribunt poætæ, minus esse quam ut populi sequi debeant ; quæ autem philosophi, plus quam ut ea vulgum scrutari expediat. *Quæ sic abhorrent, inquit, ut tamen ex utroque genere ad civiles rationes assumpta sint non pauca. Quare quæ sunt communia cum poætis², una cum civilibus scribemus : e quibus major societas debet esse nobis cum philosophia, quam cum poætis.* Non ergo nulla cum poætis. Et tamen alio loco dicit de generationibus deorum : magis ad poætæ quam ad physicos fuisse populos inclinatos. Hic

¹ Sic Mss. At editi : *Numquid ab eis diis.*

² Vind. Am. Fr. et Mss., *cum propriis.* — Sic etiam nostri omnes. M.

enim dixit quid fieri debeat ; ibi, quid fiat. Physicus dixit utilitatis causa scripsiisse ; poætæ, delectationis. Ac per hoc ea quæ a poætis conscripta populi sequi non debent, crimina sunt deorum : quæ tamen delectant et populos et deos. Delectationis enim causa, sicut dicit, scribunt poætæ, non utilitatis : ea tamen scribunt, quæ dii expetant, populi exhibeant.

CAPUT VII. — *De fabulosa et civili theologia similitudine atque concordia.*

1. Revocatur igitur ad theologiam civilem theologia fabulosa, theatrica, scenica, indignitatis et turpitudinis plena : et hæc tota, quæ merito culpanda et respuenda judicatur, pars hujus est, quæ colenda et observanda censeatur ; non sane pars incongrua, sicut ostendere iustitui, et quæ ab universo corpore aliena importune illi connexa atque suspensa sit, sed omnino consona, et tanquam ejusdem corporis membrum convenientissime copulata. Quid enim aliud ostendunt illa simulacra, formæ, ætates, sexus, habitus deorum ? numquid barbatum Jovem, imberbem Mercurium poætæ habent, pontifices non habent ? numquid Priapo mimi, non etiam sacerdotes enormia pudenda fecerunt ? an aliter stat adorandus in locis sacris, quam procedit ridendus in theatris ? num Saturnus senex, Apollo ephēbus, ita personæ sunt histrionum, ut non sint statuæ delubrorum ? cur Forculus, qui Foribus præest, et Limentinus, qui limini, dii sunt masculi, atque inter hos Cardea femina est, quæ cardinem servat ? Nonne ista in rerum divinarum libris reperiuntur, quæ graves poætæ suis carminibus indigna duxerunt ? numquid Diana theatrica portat arma, et urbana simpliciter virgo est ? numquid scenicus Apollo citharista est, et ab hac arte Delphicus vacat ? Sed hæc honestiora sunt in comparatione turpiorum. Quid de ipso Jove senserunt, qui ejus nutricem in Capitolio posuerunt ? Nonne attestati sunt Euhemero, qui omnes tales deos non fabulosa garrulitate, sed historica diligentia homines fuisse mortalesque conscripsit ? Epulones etiam deos, parasitos Jovis, ad ejus mensam qui constituerunt, quid aliud quam mimica sacra esse voluerunt ? Nam parasitos Jovis ad ejus convivium adhibitos si mimus dixisset, risum utique quæsisse videretur. Varro dixit ; non cum irrideret deos, sed cum commendaret, hoc dixit : divinarum, non humanarum rerum libri, hoc eum scripsisse testantur ; nec ubi ludos scenicos exponebat, sed ubi Capitolina jura pandebat. Denique a talibus vincitur, et fatetur, sicut forma humana deos fecerunt, ita eos delectari humanis voluptatibus credidisse.

2. Non enim et maligni spiritus suo negotio defuerunt, ut has noxias opiniones humanarum mentium iudificatione firmarent. Unde etiam illud est, quod Hercules ædituus otiosus atque feriatuus lusit tesseras secum, utraque manu alternante, in una constituens Herculem, in altera se ipsum ; sub ea conditione, ut, si ipse vicisset, de stipe templi sibi cœnam pararet, amicamque conduceret ; si autem victoria Hercules fieret, hoc idem de pecunia sua voluptati Hercules exhiberet : deinde cum a se ipso tanquam ab Hercule

victus esset, debitam cenam et nobilissimam meretricem Laurentinam ¹ deo Herculi dedit. At illa cum dormivisset in templo, vidit in somnis Herculem sibi esse commixtum, sibi que dixisse, quod inde discedens cui primum juveni obvia fieret, apud illum esset inventura mercedem, quam sibi credere deberet ab Hercule persolentam. Ac sic abeunsi cum primus juvenis ditissimus Tarutius occurrisset, eamque dilectam secum ditius habuisset, illa hærede relicta ² defunctus est. Quæ amplissimam adeptæ pecuniam, ne divinæ mercedi videretur ingrata, quod acceptissimum putavit esse numinibus, populum Romanum etiam ipsa scripsit hæredem; atque illa non comparente, inventum est testamentum: quibus meritis eam ferunt etiam honores meruisse divinos.

3. Hæc si poetæ fingerent, si mimi agerent, ad fabulosam theologiam dicerentur procul dubio pertinere, et a civili theologiæ dignitate separanda judicarentur. Cum vero hæc dedecora, non poetarum, sed populorum; non mimorum, sed sacrorum; non theatrorum, sed templorum; id est non fabulosæ, sed civili theologiæ, a tanto auctore ³ produntur; non frustra histriones ludicris artibus lingunt deorum, quæ tanta est, turpitudinem, sed plane frustra sacerdotes vel sacris ritibus conantur flagere deorum, quæ nulla est, honestatem. Sacra sunt Junonis, et hæc in ejus dilecta insula Samo celebrantur ⁴, ubi nuptum data est Jovi. Sacra sunt Cereris, ubi a Plutone rapta Proserpina quæritur. Sacra sunt Veneris, ubi amatus ejus Adonis aprino deute extinctus juvenis formosissimus plangitur. Sacra sunt Matris deûm, ubi Atya pulcher adolescens ab ea dilectus et muliebri zelo abscisus, etiam hominum abscisorum, quos Gallos vocant, infelicitate deploratur. Hæc cum deformiora sint omni scenica sceditate, quid est quod fabulosa de diis ficta poetae ad theatrum videlicet pertinentia velut discernere nituntur a civili theologia, quam pertinere ad urbem voluat, quasi ab honestis et dignis indigna et turpia? Itaque potius est unde gratiæ debeantur histrionibus, qui oculis hominum pepercerunt, nec omnia spectaculis nudaverunt, quæ sacrarum ædium parietibus occultantur. Quid de sacris eorum boni sentiendum est, quæ tenebris operiantur, cum tam sint detestabilia, quæ proferuntur in lucem? Et certe quid in occulto agant per abscisos et molles, ipsi viderint: eosdem tamen homines infeliciter ac turpiter enervatos atque corruptos minime occultare potuerunt. Persuadeant cui possunt, se aliquid sanctum per tales agere homines; quos inter sua sancta ⁵ numerari atque versari negare non possunt. Nescimus quid agant, sed scimus per quales agant. Novimus enim quæ agantur in scena, quo nunquam, vel in choro meretricum, abscisus aut mollis intravit: et

¹ Editi, *Laurentinam*. At potiores manuscripti, *Laurentinam*. Hæc Lactant., Instit. lib. 1, cap 20, «Flora est, cujus festa Floralia.»

² vox, *relicta*, abest a manuscriptis.

³ Ms. 766, *doctore*. M.

⁴ Mss. 766, 2050 et 2053, *celebrabantur*. M.

⁵ Aliquot Mss., *sua sacra*. Paulo post editi, *quæ nunquam vel in choro meretricum, quo nemo abscisus, etc.* Emendantur ex manuscriptis.

tamen etiam ipsa turpes et infames agant; neque enim ab honestis agi debuerunt. Quæ sunt ergo illa sacra, quibus agendis tales elegit sanctitas, quales nec thymelica in se admittit obscenitas?

CAPUT VIII. — *De interpretationibus naturalium rationum, quas doctores pagani pro diis suis conantur ostendere.*

1. At enim habent ista physiologicas quasdam, sicut aiunt, id est naturalium rationum, interpretationes. Quasi vero nos in hac disputatione physiologiam quæramus, et non theologiam; id est rationem, non naturæ, sed Dei. Quamvis enim qui verus Deus est, non opinione, sed natura sit Deus: non tamen omnis natura deus est; quia et hominis, et pecoris, et arboris, et lapidis utique natura est, quorum nihil est Deus. Si autem interpretationis hujus, quando agitur de sacris Matris deûm, caput est certe quod mater deûm terra est, quid ultra quærimus, quid cætera perscrutamur? Quid evidentius suffragatur eis, qui dicunt, omnes istos deos homines fuisse? Sicut enim sunt terrogenæ, sic ¹ eis mater est terra. In vera autem theologia opus Dei est terra, non mater. Verumtamen quoquo modo sacra ejus interpretentur, et referant ad rerum naturam; viros muliebria pati, non est secundum naturam, sed contra naturam. Hic morbus, hoc crimen, hoc dedecus habet inter illa sacra professionem, quod in vitiosis hominum moribus vix habet inter tormenta confessionem. Deinde si ista sacra, quæ scenicis turpitudinibus convincuntur esse scædiora, hinc excusantur atque purgantur, quod habent interpretationes suas, quibus ostendantur rerum significare naturam; cur non etiam poetica similiter excusentur atque purgentur? Multi enim et ipsa ² ad eundem modum interpretati sunt: usque adeo ut quod ab eis immanissimum et infandissimum dicitur, Saturnum suos filios devorasse, ita nonnulli interpretentur, quod longinquitas temporis, quæ Saturni nomine significatur, quidquid gignit ipsa consumat: vel, sicut idem opinatur Varro, quod pertineat Saturnus ad semina, quæ in terram, de qua oriuntur, iterum recidunt. Itemque alii alio modo, et similiter cætera.

2. Et tamen theologia fabulosa dicitur, et cum omnibus hujusmodi interpretationibus suis reprehenditur, abjicitur, improbat; nec solum a naturali, quæ philosophorum est, verum etiam ab ista civili, de qua agimus, quæ ad urbes populosque pertinere asseritur, eo quod de diis indigna confluerit, merito repudianda discernitur: eo nimirum consilio, ut quoniam acutissimi homines atque doctissimi, a quibus ista conscripta sunt, ambas improbandas intelligebant, et illam scilicet fabulosam et istam civilem, illam vero audebant improbare, hanc non audebant; illam culpandam proposuerunt, hanc ejus similem comparandam exposuerunt; non ut hæc præ illa tenenda eligeretur, sed ut cum illa respuenda intelligeretur; atque ita sine periculo eorum qui civilem theo-

¹ Omnes Mss., *Sic enim sunt terrogenæ, sic eis mater est terra.*

² Sic Mss. Editi vero *Mul'a enim et ipsa.*

legiam reprehendere metuebant, utraque contempta, ea quam naturalem vocant, apud meliores animos inveniret locum. Nam et civilis et fabulosa ambæ fabulosæ sunt ambæque civiles: ambas inveniet fabulosas qui vanitates et obscenitates ambarum prudenter inspexerit; ambas civiles qui scenicos ludos pertinentes ad fabulosam in deorum civilium festivitibus et in urbium divinis rebus adverterit. Quomodo igitur vitæ æternæ dandæ potestas cuiquam deorum istorum tribuitur, quos sua simulacra et sacra convincunt, diis fabulosis apertissime reprobatis esse simillimos formis, ætatibus, sexu, habitu, conjugii, generationibus, ritibus, in quibus omnibus aut homines fuisse intelliguntur, et pro uniuscujusque vita vel morte sacra eis et solemnia constituta, hunc errorem insinuantibus firmantibusque dæmonibus, aut certe ex qualibet occasione immundissimi spiritus fallendis humanis mentibus irrepissæ?

CAPUT IX. — *De officiis singulorum deorum.*

1. Quid ipsa numinum officia tam viliter minutatimque concisa, propter quod eis dicunt pro uniuscujusque proprio munere supplicari oportere, unde non quidem omnia, sed multa jam diximus, nonne scurrilitati mimicæ, quam¹ divinæ consonant diguitati? Si duas quisquam nutrices adhiberet infanti, quarum una nihil nisi escam, altera nihil nisi potum daret, sicut isti ad hoc duas adhibuerunt deas, Educam et Potinam; nempe desipere, et aliquid mimo simile in sua domo agere videretur. Liberum a liberamento appellatum volunt, quod mares in coeundo per ejus beneficium emissis seminibus liberentur: hoc idem in feminis agere Liberam, quam etiam Venerem putant, quod et ipsas² perhibeant semina emittere; et ob hoc Libero eandem virilem corporis partem in templo poni, femineam Liberæ. Ad hæc addunt mulieres attributas Libero, et vinum propter libidinem concitandam. Sic Bacchanalia summa celebrabantur³ insania. Ubi Varro ipse confitetur a Bacchantibus talia fieri non potuisse, nisi mente commota. Hæc tamen postea displicuerunt senatui saniori, et ea jussit auferri. Saltem hic tandem forsitan senserunt quid immundi spiritus, dum pro diis habentur, in hominum possint mentibus. Hæc certe non fierent in theatris. Ludunt quippe ibi, non furunt: quamvis deos habere, qui etiam ludis talibus delectentur, simile sit furoris.

2. Quale autem illud est, quod cum religiosum a superstitioso ea distinctione discernat, ut a superstitioso dicat timeri deos, a religioso autem tantum vereri ut parentes, non ut hostes timeri; atque omnes ita honos dicat, ut facilius sit eos nocentibus parcere, quam lædere quemquam innocentem: tamen mulieri fetæ post partum tres deos custodes commemorat adhiberi, ne Silvanus deus per noctem ingrediatur et vexet; eorumque custodum significandorum causa

tres homines noctu circumire limina domus, et primo limen securi ferire, postea pilo, tertio devertere scopis, ut his datis culturæ signis, deus Silvanus prohibeatur intrare; quod neque arbores caduntur ac putantur sine ferro, neque far conficitur sine pijo, neque fruges coacervantur sine scopis; ab his autem tribus rebus tres nuncupatos deos, Intercidonam a securis intercisione, Pilumnus a pilo, Deverram a scopis, quibus diis custodibus contra vim dei Silvani feta conservaretur? Ita contra dei nocentis sævitiam non valeret custodia bonorum, nisi plures essent adversus unum, eique aspero, horrendo, inculto, utpote silvestri, signis culturæ tanquam contrariis repugnarent. Itane ista est innocentia deorum, ista concordia? hæccine sunt numina salubria urbium, magis ridenda quam ludibria theatrorum⁴?

3. Cum mas et femina conjunguntur, adhibetur deus Jugatinus: sit hoc ferendum. Sed domum est ducenda quæ nubit, adhibetur et deus Domiducus; ut in domo sit, adhibetur deus Domitius; ut maneat cum viro, additur dea Manturna. Quid ultra quaeritur? Parcatur humanæ verecundiæ: peragat cætera concupiscentia carnis et sanguinis, procurato secreto pudoris. Quid impletur cubiculum turba numinum, quando et paranympsi inde discedunt? Et ad hoc impletur, non ut eorum præsentia cogitata major sit cura pudicitiae, sed ut feminæ, sexu infirmæ, novitate pavidæ, illis cooperantibus sine ulla difficultate virginitas auferatur: adest enim dea Virginiensis, et deus pater Subigus, et dea mater Prema, et dea Pertunda⁵, et Venus, et Priapus (a). Quid est hoc? Si omnino laborantem in illo opere virum ab diis adjuvari oportebat, non sufficeret aliquis unus, aut aliqua una? Numquid Venus sola parum esset, quæ ob hoc etiam dicitur nuncupata, quod sine ejus vi⁶ femina virgo esse non desinat? Si ulla est frons in hominibus, quæ non est in numinibus, nonne cum credunt conjugati tot deos utriusque sexus esse præsentem, et huic operi instantes, ita pudore afficiuntur, ut et ille minus moveatur, et illa plus reluctetur? Et certe si adest Virginiensis dea, ut virgini zona solvatur; si adest deus Subigus, ut viro subigatur; si adest dea Prema, ut subacta, ne se commoveat, comprimatur; dea Pertunda ibi quid facit? Erubescat, eat foras: agat aliquid et maritus. Valde inhonestum est, ut quod vocatur illa, impleat quisquam nisi ille. Sed forte ideo toleratur, quia dea dicitur esse, non deus. Nam si masculus crederetur, et Pertundus vocaretur, magis⁷ contra eum pro uxoris pudicitia posceret maritus auxilium, quam feta contra Silvanum. Sed quid hoc dicam, cum ibi sit et Priapus nimius masculus⁸, super cujus immanissimum et turpissimum fascinum sedere nova nupta jubebatur, more honestis-

¹ Sola editio Lov., quam ludibria poetarum et theatrorum.

² Sic Am. et Mss. At Vind. Er. Lov., Partunda: et infra, Partundus; loco, Pertundus.

³ Nostri manuscripti, quod sine vi, ommissa voce, ejus. M.

⁴ Lov. et aliquot Mss., majus. — Sic nostri. M.

⁵ Sola editio Lov., nimis masculus.

(a) Vide Arnob. lib. 4 et Laëtant. lib. 1, cap. 20.

¹ Editi, magis quam. At manuscripti carent particula, magis; quæ quidem aliis similibus locis omittitur sepe ab Augustino.

² Sic Vind. Am. et Mss. At Er. Lov., ipsam.

³ Sic nostri manuscripti. In B., celebrantur. M.

simo et religiosissimo matronarum ?

4. Eant adhuc, et civilem theologiam a theologia fabulosa, urbes a theatris, templa a scenis, sacra pontificum a carminibus poetarum, velut res honestas a turpibus, veraces a fallacibus, graves a levibus, serias a ludicris, appetendas a respiciendis, qua possunt quasi conentur subtilitate discernere. Intelligimus quid agant : illam theatricam et fabulosam theologiam ab ista civili pendere noverunt, et ei de carminibus poetarum tanquam de speculo resultare ; et ideo ista exposita, quam damnare non audent, illam ejus imaginem liberius arguunt et reprehendunt, ut qui agnoscunt quid velint, et hanc ipsam faciem, cujus illa imago est, detestentur ; quam tamen dii ipsi tanquam in eodem speculo se intuentes ita diligunt, ut qui qualesque sint in utraque melius videantur. Unde etiam cultores suos terribilibus imperiis compulerunt, ut immunditiam theologiæ fabulosæ sibi dicarent, in suis solemnitatibus poverent, in rebus divinis haberent ; atque ita et se ipsos immundissimos spiritus manifestius esse docuerunt, et hujus urbanæ theologiæ velut electæ et probatæ illam theatricam, abjectam atque reprobam, membrum partemque fecerunt ; ut cum sit universa turpis et fallax, atque in se contineat commentitios deos, una pars ejus sit in litteris sacerdotum, altera in carminibus poetarum. Utrum habeat et alias partes, alia quæstio est : nunc propter divisionem Varronis, et urbanam et theatricam theologiam ad unam civilem pertinere, satis, ut opinor, ostendi. Unde, quia sunt ambæ similis turpitudinis, absurditatis, indignitatis, falsitatis, absit a viris religiosus¹ ut sive ab hac, sive ab illa vita speretur æterna.

5. Denique et ipse Varro commemorare et enumerare deos cœpit a conceptione hominis, quorum numerum² exorsus est a Jano ; eamque seriem perduxit usque ad decrepiti hominis mortem, et deos ad ipsum hominem pertinentes clausit ad Næniam deam, quæ in funeribus senum cantatur : deinde cœpit deos alios ostendere, qui pertinerent, non ad ipsum hominem, sed ad ea quæ sunt hominis, sicuti est victus, vestitus, et quæcumque alia huic vitæ sunt necessaria ; ostendens in omnibus quod sit cujusque munus ; et propter quid cuique debeat supplicari : in qua universa diligentia nullos demonstravit vel nominavit deos, a quibus vita æterna poscenda sit, propter quam unam proprie nos christiani sumus. Quis ergo usque adeo tardus sit, ut non intelligat istum hominem civilem theologiam tam diligenter exponendo et aperiendo, eamque illi fabulosæ, indignæ atque probrosæ similem demonstrando, atque ipsam fabulosam partem esse hujus satis evidenter docendo, nonnisi illi naturali, quam dicit ad philoso-

phos pertinere, in animis hominum moliri locum, ea subtilitate, ut fabulosam reprehendat, civilem vero reprehendere quidem non audeat, sed prodendo reprehensibilem ostendat, atque ita utraque judicio recte intelligentium reprobata, sola naturalis remaneat eligenda ? De qua suo loco in adjutorio Dei veri diligentius disserendum est.

CAPUT X.—*De libertate Senecæ, qui vehementius civilem theologiam reprehendit, quam Varro fabulosam.*

1. Libertas sane, quæ huic defuit, ne istam urbanam theologiam, theatricæ simillimam, aperte sicut illam reprehendere auderet, Annæo Senecæ, quem nonnullis indiciis invenimus Apostolorum nostrorum claruisse temporibus, non quidem ex toto, verum ex aliqua parte non defuit. Aduit enim scribenti, viventis defuit. Nam in eo libro quem contra superstitiones condidit (a), multo copiosius atque vehementius reprehendit ipse civilem istam et urbanam theologiam, quam Varro theatricam atque fabulosam. Cum enim de simulacris ageret, *Sacros, inquit, immortales, inviolabiles¹ in materia vilissima atque immobili dedicant, habitus illis hominum ferarumque et piscium, quidam vero mixto sexu diversis corporibus induunt² : numina vocant, quæ si spiritu accepto subito occurrerent, monstra haberentur.* Deinde aliquanto post, cum theologiam naturalem prædicans, quorundam philosophorum sententias digessisset, opposuit sibi quæstionem, et ait : *Hoc loco dicit aliquis, Credam ego cælum et terram deos esse, et supra lunam alios, infra alios ? Ego feram aut Platonem, aut Peripateticum Stratonem (b), quorum alter fecit deum sine corpore, alter sine animo ? Et ad hoc respondens, Quid ergo tandem, inquit, ventura tibi videntur T. Tati, aut Romuli, aut Tullii Hostilii somnia ? Cloacinum Tatius dedicavit deam, Picum Tiberinumque Romulus, Hostilium Pavorem atque Pallorem terribios hominum affectus, quorum alter mentis terribis motus est, alter corporis, nec morbus quidem, sed color. Hæc numina potius credes, et cælo recipies ? De ipsis vero ritibus crudeliter turpibus quam libere scripsit ? Ille, inquit, viriles sibi partes amputat, ille lacertos secat (c). Ubi iratos deos timent, qui sic propitios merentur ? Dii autem nullo debent coli genere, si et hoc volunt. Tantus est perturbatæ mentis et s. dibus suis pulsæ furor, ut sic dii placentur, quemadmodum ne homines quidem sæviant terribi et in fabulas traditæ³ crudelitatis. Tyranni laceraverunt aliquorum membra, neminem sua lacerare jusserunt. In regis libidinis voluptatem castrati sunt quidam : sed nemo sibi, ne vir esset, jubente domino, manus intulit. Se ipsi in templis contrucidant, vulneribus suis ac sanguine supplicat. Si cui intueri vacet, quæ faciunt,*

¹ Sic Mss. Editi vero, *inviolabilesque deos.*

² Joannes Meursius legendum putat, *in materia vilissima atque ignobili dedicant, habitus illis hominum ferarumque et piscium, quidam vero mixtos sexus diversis corporibus induunt.*

³ Editi, *traditi.* Sed melius manuscripti, *traditæ.*

(a) Hic ipse liber a Tertulliano citatur in Apologetico, cap. 12 ; sed jam non exstat.

(b) Vid. Diog. Laert., lib. 5, § 58 et seqq.

(c) Lactant., lib. 1 instit., cap. 21.

¹ Sic Mss. 766, 2050 et 2052 ; at in B., *sedere nova nupta jubeatur, more honestissimo et religiosissimo matronarum.* Sic etiam Mss. 2051 et 2053. Morel legit, *sedere nova nupta jubeatur, ore honestissimo et religiosissimo matronarum.* Vide Elem. Crit., pag. 136. M.

² Plures Mss., *a veris religiosis.*

³ Vind. Am. et Lov., *numeros.* Er. et aliquot Mss., *numerosum.*

quæque patiuntur, inveniet tam indecora honestis, tam indigna liberis, tam dissimilia sanis, ut nemo fuerit dubitaturus furere eos, si cum paucioribus furerent: nunc sanitatis patrocinium insanientium turba est.

2. Jam illa quæ in ipso Capitolio fieri solere commemorat, et intrepide omnino coarguit, quis credat nisi ab irridentibus aut forentibus fieri? Nam cum in sacris Ægyptiis Osirim lugeri perditum, mox autem inventum magno esse gaudio derisisset¹, cum perditio ejus inventioque fingatur, dolor tamen ille atque lætitia ab eis, qui nihil perdidit nihilque invenerunt, veraciter exprimitur, « Huic tamen, » inquit « furori certum tempus est. Tolerabile est, semel in anno insanire. In Capitolium perveni, pudebit publicæ dementiæ, quod sibi vanus furor attribuit officii. Alius nomina² deo subjicit, alius horas Jovi nuntiat; alius lictor est, alius unctor, qui vano motu brachiorum imitatur ungentem. Sunt quæ Junoni ac Minervæ capillos disponant, longe a templo, non tantum a simulacro stantes, digitos movent ornantim modo. Sunt quæ speculum teneant: sunt quæ ad vadimonia sua deos advocent: sunt qui libellos offerant, et illos causam suam doceant. Doctus archimimus, senex jam decrepitu, quotidie in Capitolio mimum agebat, quasi dii libenter spectarent³, quem illi homines desierant⁴. Omne illic artificum genus operatum⁵ diis immortalibus desidet. » Et paulo post: « Hi tamen, » inquit, « etiamsi supervacuum usum, non turpem nec infamem deo promittunt. Sedent quædam in Capitolio, quæ se a Jove amari putant: ne Junonis quidem, si credere poetis velis, iracundissimæ, respectu terrentur. »

3. Hanc libertatem Varro non habuit: tantummodo poeticam theologiam reprehendere ausus est; civilem non ausus est, quam iste concidit. Sed si verum attendamus, deteriora sunt templa ubi hæc aguntur, quam theatra ubi finguntur. Unde in his sacris civilis theologię has partes potius elegit Seneca sapienti, ut eas in animi religione non habeat, sed in actibus fingat. Ait enim: « Quæ omnia sapiens servabit tanquam legibus jussa, non tanquam diis grata. » Et paulo post: « Quid quod et matrimonia, » inquit, « deorum jungimus, et ne pie quidem, fratrum ac sororum? Bellonam Marti collocamus, Vulcano Venerem, Neptuno Salaciam. Quosdam tamen cælibes relinquimus, quasi conditio defecerit; præsertim cum quædam viduæ sint, ut Populonia, vel Fulgora, et diva Rumina⁶: quibus non miror petitionem defuisse. Omnem istam ignobilem deorum turbam, quam longo ævo longa superstitio congesta, sic, » inquit, « adorabimus, ut meminerimus

cultum ejus magis ad morem, quam ad rem pertinere. » Nec leges ergo illæ, nec mos in civili theologia id instituerunt, quod diis gratum esset, vel ad rem pertineret. Sed iste, quem philosophia quasi liberum fecerat⁷, tamen quia illustris populi Romani senator erat, colebat quod reprehendebat, agebat quod arguebat, quod culpabat adorabat: quia videlicet magnum aliquid cum philosophia docuerat, ne supersticiosus esset in mundo, sed propter leges civium moresque hominum, non quidem ageret fingentem scenicum in teatro, sed imitaretur in templo: eo damnabilius, quo illa, quæ mendaciter agebat, sic ageret, ut eum populus veraciter agere existimaret; scenicus autem ludendo potius delectaret, quam fallendo deciperet.

CAPUT XI. — *Quid de Judæis Seneca senserit.*

Hic inter alias civilis theologię superstitiones reprehendit etiam sacramenta Judæorum, et maxime sabbata; inutiliter eos facere affirmans, quod per illos singulos septem interpositos dies, septimam fere partem ætatis suæ perdant vacando, et multa in tempore urgentia non agendo lædantur. Christianos tamen jam tunc Judæis inimicissimos, in neutram partem commemorare ausus est, ne vel laudaret contra suæ patriæ veterem consuetudinem, vel reprehenderet contra propriam forsitan voluntatem. De illis sane Judæis cum loqueretur, ait: « Cum interim usque eo sceleratissimæ gentis consuetudo convalluit, ut per omnes jam terras recepta sit: victi victoribus leges dederunt. » Mirabatur hæc dicens, et quid divinitus ageretur ignorans, subjecit plene sententiam, qua significaret quid de illorum sacramentorum ratione sentiret. Ait enim: « Illi tamen causas ritus sui noverunt; major pars populi facit, quod cur faciat ignorat. » Sed de sacramentis Judæorum, vel cur, vel quatenus instituta sint auctoritate divina, ac postmodum a populo Dei, cui vitæ æternæ mysterium revelatum est, tempore quo oportuit eadem auctoritate sublata sint, et alias diximus, maxime cum adversus Manichæos ageremus (a), et in hoc opere loco opportuniore dicendum est.

CAPUT XII. — *Quod Gentilium deorum vanitate detecta, nequeat dubitari æternam eos vitam nemini posse præstare, qui nec ipsam adjuvent temporalem.*

Nunc propter tres theologias, quas Græci dicunt mythicam, physicam, politicam, latine autem dici possunt, fabulosa, naturalis, civilis; quod neque de fabulosa, quam et ipsi multorum falsorumque deorum cultores liberrime reprehenderunt, neque de civili, cujus illa pars esse convincitur, ejusque et ista simillima vel etiam deterior invenitur, speranda est æterna vita; si cui satis non sunt quæ in hoc volumine dicta sunt, adjungat etiam illa quæ in superioribus libris, et maxime quarto de felicitatis datore Deo plurima disputata sunt. Nam cui nisi uni felicitatem

¹ Editi, mox autem de invento magnum fuisse gaudium derisisset. At Mss., mox autem inventum magno esse gaudio derisisset.

² In B., nomina. Codices 706, 2051 et 2053 secuti sumus. M.

³ Vind. Am. et Mss., exspectarent.

⁴ Sic nostri omnes Mss. In B., quem homines desierant, omisso, illi. M.

⁵ In B., operantium. Juxta Mss. 706 et 2053 correximus. M.

⁶ Probæ notæ Mss., Dicarona.

⁷ Sic aliquot Mss. At editi, philosophi quasi liberum fecerunt.

(a) vid. lib. triginta tres cont. Faust, Manich., tom. 8.

tati propter æternam vitam consecrandi homines essent, si dea felicitas esset? Quia vero non dea, sed munus est Dei; cui Deo nisi datori felicitatis consecrandi sumus, qui æternam vitam, ubi vera est et plena felicitas, pia charitate diligimus? Non autem datorem esse felicitatis quemquam istorum deorum, qui tanta turpitudine coluntur, et nisi ita colantur, multo turpius irascuntur, atque ob hoc se spiritus immundissimos confitentur, puto ex his quæ dicta sunt, neminem dubitare oportere. Porro qui non dat felicitatem, vitam quomodo possit dare æternam? eam quippe vitam æternam dicimus, ubi est sine fine felicitas. Nam si anima in pœnis vivit æternis, quibus et ipsi spiritus cruciabuntur immundi, mors est illa potius æterna, quam vita. Nulla quippe major et peior est mors, quam ubi non moritur mors. Sed

quod animæ natura, per id quod immortalis creata est, sine qualicumque vita esse non potest, summa mors ejus est alienatio a vita Dei in æternitate supplicii. Vitam igitur æternam, id est sine ullo fine felicem, solus ille dat, qui dat veram felicitatem. Quam quoniam illi, quos colit theologia ista civilis, dare non posse convicti sunt; non solum propter ista temporalia atque terrena, quod superioribus quinque libris ostendimus, sed multo magis propter vitam æternam, quæ post mortem futura est, quod isto uno etiam illis cooperantibus egimus, colendi non sunt. Sed quoniam veteranosæ consuetudinis vis nimis in alto radices habet, si cui de-ista civili theologia responsuenda atque vitanda parum videor disputasse, n aliud volumen, quod huic, opitulante Deo, conjungendum est, animum intendat.

LIBER SEPTIMUS.

De diis selectis civilis theologiæ, Jano, Jove, Saturno, et cæteris, quod nec eorum cultu perveniatur ad æternæ vitæ felicitatem.

PRÆFATIO.

Diligentius me pravas et veteres opiniones, veritati pietatis inimicas, quas tenebrosis animis altius et tenacius diuturnus humani generis error infixit, evellere atque extirpare conantem, et illius gratiæ, qui hoc ut verus Deus potest, pro meo modulo in ejus adjutorio cooperantem, ingenia celeriora atque meliora, quibus ad hanc rem superiores libri satis superque sufficiunt, patienter et æquanimiter ferre debebunt; et propter alios non putare superfluum, quod jam sibi sentiri non necessarium. Multum magna res agit, cum vera et vere sancta divinitas, quamvis ab ea nobis etiam huic, quam nunc gerimus, fragilitati necessaria subsidia præbeantur, non tamen propter mortalis vitæ transitorium vaporem, sed propter vitam beatam, quæ nonnisi æterna est, querenda et colenda prædicatur.

CAPUT PRIMUM. — An, cum in theologia civili deitatem non esse constiterit, in selectis diis eam inveniri posse credendum sit.

Hanc divinitatem, vel, ut sic dixerim, deitatem; nam et hoc verbo uti jam nostros non piget, ut de græco expressius transferant id quod illi θεότητα appellant: hanc ergo divinitatem sive deitatem non esse in ea theologia, quam civilem vocant, quæ a Marco Varrone sedecim voluminibus explicata est, id est, non perveniri ad æternæ vitæ felicitatem talium deorum cultu, quales a civitatibus qualiterque colendi instituti sunt, cui nondum persuasit sextus liber, quem proxime absolvimus, cum istum forsitan legerit, quid de hac quæstione expedienda ulterius desideret, non habebit. Fieri enim potest ut saltem deos selectos atque præcipuos, quos Varro volumine complexus est ultimo, de quibus parum diximus, quisquam colendos propter vitam beatam, quæ nonnisi æterna est, opinetur. Qua in re non dico quod facilius ait Tertullianus fortasse

quam verius: *Si dii seliguntur ut bulbi, utique cæteri reprobi judicantur* (a). Non hoc dico: video enim etiam ex selectis seligi aliquos ad aliquid majus atque præstantius; sicut in militia, cum tirones electi fuerint, ex his quoque eliguntur ad opus aliquod majus armorum. Et cum eliguntur in Ecclesia qui sunt præpositi, non utique cæteri reprobantur, cum omnes boni fideles electi merito nuncupentur. Eliguntur in ædificio lapides angulares, non reprobatis cæteris, qui structuræ partibus aliis deputantur. Eliguntur vinee ad vescendum, nec reprobantur aliæ, quas relinquimus ad bibendum. Non opus est multa percurrere, cum res in aperto sit. Quamobrem non ex hoc, quod dii ex multis quidam selecti sunt, vel is qui scripsit, vel eorum cultores, vel dii ipsi vituperandi sunt: sed advertendum potius quia isti sint, et ad quam rem selecti videantur.

CAPUT II. — Qui sint dii selecti, et an ab officiis viliorum deorum habeantur excepti.

Hos certe deos selectos Varro unius libri contextione commendat, Janum, Jovem, Saturnum, Genium, Mercurium, Apollinem, Martem, Vulcanum, Neptunum, Solem, Orcum, Liberum patrem, Tellurem, Cererem, Junonem, Lunam, Dianam, Minervam, Venerem, Vestam: in quibus omnibus ferme viginti, duodecim mares, octo sunt femine. Hæc numina utrum propter majores in mundo administrationes selecta dicuntur, an quod populis magis innotuerunt, majorque est eis cultus exhibitus? Si propterea, quia opera majora ad his administrantur in mundo, non eos invenire debuimus inter illam quasi plebeiam numerum multitudinem minutis opusculis deputatam. Nam ipse primus Janus, cum puerperiam concipitur, unde cuncta opera illa sumunt exordium, minutatim minutis distributa numinibus; aditum aperit recipiendo semini: ibi est et Saturnus propter ipsum

^a Vind. et Fr., non tantum.

(a) Simile quidpiam in Apologetico, cap. 13.

semen : ibi Liber (a), qui marem effuso semine liberat : ibi Libera , quam et Venerem volunt , quæ hoc idem beneficium conferat feminæ , ut etiam ipsa emisso semine liberetur. Omnes hi ex illis sunt , qui selecti appellantur. Sed ibi est et dea Mena , quæ menstruis fluoribus præest , quamvis Jovis filia , tamen ignobilis. Et hanc provinciam¹ fluorum menstruorum in libro selectorum deorum ipsi Junoni idem auctor assignat , quæ in diis selectis etiam regina est : et hic tanquam Juno Lucina cum eadem Mena , privigna sua , eidem cruori præsidet. Ibi sunt et duo , nescio qui obscurissimi , Vitumnus et Sentinus ; quorum alter vitam , alter sensus puerperio largiuntur. Et nimirum multo plus præstant , cum sint ignobilissimi , quam tot illi proceres et selecti. Nam profecto sine vita et sensu , quid est illud totum , quod muliebri utero geritur , nisi nescio quid abjectissimum limo ac pulveri comparandum ?

CAPUT III. — *Quam nulla sit ratio , quæ de selectione quorundam deorum possit ostendi , cum multis inferioribus excellentior administratio deputetur.*

1. Quæ igitur causa tot selectos deos ad hæc opera minima compulsi , ubi a Vitumno et Sentino , quos fama obscura recondit , in hujus munificentia partitione superentur ? Conferat enim selectus Janus aditum et quasi januam semini ; conferat selectus Saturnus semen ipsum ; conferat selectus Liber ejusdem seminis emissionem viris ; conferat hoc idem Libera , quæ Ceres seu Venus est feminis ; conferat selecta Juno , et hæc non sola , sed cum Mena , filia Jovis , flores menstruos ad ejus , quod conceptum est , incrementum : et conferat Vitumnus obscurus et ignobilis vitam ; conferat Sentinus obscurus et ignobilis sensum : quæ duo tanto illis rebus præstantiora sunt , quanto et ipsa intellectu ac ratione vincuntur. Sicut enim quæ ratiocinantur et intelligunt , profecto potiora sunt his quæ sine intellectu atque ratione , ut pecora , vivunt et sentiunt : ita et illa quæ vita sensuque sunt prædita , his quæ nec vivunt nec sentiunt , merito præferuntur. Inter selectos itaque deos Vitumnus vivificator et Sentinus sensificator magis haberi debuerunt , quam Janus seminis admissor et Saturnus seminis dator vel sator , et Liber et Libera seminum commotores vel emissores ; quæ semina indignum est cogitare , nisi ad vitam sensumque pervenerint. Quæ munera selecta non dantur a diis selectis , sed a quibusdam incognitis et præ istorum dignitate neglectis. Quod si respondetur , omnium initiorum potestatem habere Janum , et ideo illi etiam quod aperitur conceptui² , non immerito attribui ; et omnium seminum Saturnum , et ideo seminationem quoque hominis non posse ab ejus operatione sejungi ; omnium seminum emittendorum Liberum et Liberam , et ideo his etiam præesse , quæ ad substituendos homines pertinent ; omnium purgandorum et pariendorum Junonem , et ideo eam non deesse purgationibus femina-

rum et partibus hominum : querant quid respondeant de Vitumno et Sentino , utrum et ipsos velint habere omnium quæ vivunt et sentiunt potestatem. Quod si concedunt , attendant quam eos sublimius locatori sint. Nam seminibus nasci , in terra et ex terra est ; vivere autem atque sentire etiam deos sidereos opinantur. Si autem dicunt Vitumno atque Sentino hæc sola attributa , quæ in carne vivescunt et sensibus adminiculantur ; cur non deus ille , qui facit omnia vivere atque sentire , etiam carni vitam præbet et sensum , universali opere hoc munus etiam partibus tribuens ? Et quid opus est Vitumno atque Sentino ? Quod si ab illo qui vitæ et sensibus universaliter præsidet , his quasi famulis ista carnalia velut extrema et ima commissa sunt ; itane sunt illi selecti destituti familia , ut non invenirent quibus etiam ipsi ista committerent , sed cum tota sua nobilitate , qua visi sunt seligendi , opus facere cum ignobilibus cogentur ? Juno selecta et regina Jovisque soror et conjux , hæc tamen Iterduca est pueris , et opus facit cum deabus ignobilissimis Abeona et Adeona. Ibi posuerunt et Mentem deam , quæ faciat pueris bonam mentem , et inter selectos ista non ponitur , quasi quidquam majus præstari homini possit : ponitur autem Juno , quia Iterduca est et Domiduca , quasi quidquam prosit iter carpere et domum duci , si mens non est bona : cujus muneris deam selectores isti inter selecta numina minime posuerunt. Quæ profecto et Minervæ fuerat præferenda , cui per ista minuta opera puerorum memoriam tribuerunt. Quis enim debitor multo esse melius habere bonam mentem , quam memoriam quantumlibet ingentem ? Nemo enim malus est , qui bonam habet mentem : quidam vero pessimi memoria sunt mirabili , tanto pejores quanto minus possunt , quod male cogitant , oblivisci. Et tamen Minerva est inter selectos deos ; Mentem autem deam turba vilis operuit. Quid de Virtute dicam ? quid de Felicitate ? de quibus in quarto libro plura jam diximus (a) : quas cum deas haberent , nullum eis locum inter selectos deos dare voluerunt , ubi dederunt Marti et Orco , uni effectori mortium , alteri receptori.

2. Cum igitur in his minutis operibus , quæ minutatim diis pluribus distributa sunt , etiam ipsos selectos videamus tanquam senatum cum plebe pariter operari ; et inveniamus a quibusdam diis , qui nequaquam seligendi putati sunt , multo majora atque meliora administrari , quam ab illis qui selecti vocantur : restat arbitrari , non propter præstantiores in mundo administrationes , sed quia provenit eis ut populis magis innotescerent , selectos eos et præcipuos nuncupatos. Unde dicit etiam ipse Varro , quod diis quibusdam patribus et deabus matribus , sicut hominibus , ignobilitas accidisset. Si ergo Felicitas ideo fortasse inter selectos deos esse non debuit , quod ad istam nobilitatem non merito , sed fortuito pervenerunt ; saltem inter illos , vel potius præ illis Fortuna poneretur , quam dicunt deam non rationa-

¹ Editi, *providentiam*. Emendantur ex manuscriptis.

² Vind. Am. et Er., *quod aperit conceptum*.

(a) Hunc Liberum Cicero , de Nat. Deor. lib. 2 , docet hunc esse a Libero Baccho Jovis et Semelis filio.

(c) Nempè capp. 21, 23.

biti¹ dispositione, sed, ut temere acciderit, sua cuique dona conferre. Hæc in diis selectis tenere apicem debuit, in quibus maxime quid posset ostendit: quando eos videmus non præcipua virtute, non rationabili felicitate, sed temeraria, sicut eorum cultores de illa sentiunt, Fortunæ potestate selectos. Nam et vir disertissimus Sallustius etiam ipsos deos fortassis attendit, cum diceret: « Sed profecto Fortuna in omni re dominatur; ea res cunctas ex libidine magis quam ex vero celebrat obscuratque (a). » Non enim possunt invenire causam cur celebrata sit Venus, et obscurata sit Virtus; cum ambarum ab istis consecrata sint numina, nec comparanda sint merita. Aut si hoc nobilitari meruit, quod plures appetunt; plures enim Venerem quam Virtutem (b); cur celebrata est dea Minerva, et obscurata est dea Pecunia? cum in genere humano plures alliciat avaritia quam peritia; et in eis ipsis qui sunt artificiosi, raro invenias hominem, qui non habeat artem suam pecuniaria mercede venalem; plurisque pendatur semper propter quod aliquid sit, quam id quod propter aliud sit. Si ergo insipientis iudicio multitudinis facta est deorum ista selectio, cur dea Pecunia Minervæ prælata non est, cum propter pecuniam sint artifices multi? Si autem paucorum sapientium est ista distinctio, cur non prælata est Veneri Virtus, cum eam longe ratio præferat? Saltem certe, ut dixi, ipsa Fortuna, quæ, sicut putant qui ei plurimum tribuunt, in omni re dominatur, et res cunctas ex libidine magis quam ex vero celebrat obscuratque; si tantum et in deis valuit, ut temerario iudicio suo quos vellet celebraret, obscuraretque quos vellet, præcipuum locum haberet in selectis, quæ in ipsos quoque deos tam præcipuæ est potestatis. An ut illic esse non posset, nihil aliud etiam ipsa Fortuna, nisi adversam putanda est habuisse fortunam? Sibi ergo adversata est, quæ alios nobiles faciens nobilitata non est.

CAPUT IV. — *Melius actum cum diis inferioribus, qui nullis infamantur opprobriis, quam cum selectis, quorum tantæ turpitudines celebrentur.*

Gratularetur autem diis istis selectis quisquam nobilitatis et claritudinis appetitor, et eos diceret fortunatos, si non eos magis ad injurias quam ad honores selectos videret. Nam illam infamam turbam ipsa ignobilitas texit, ne obrueretur opprobriis. Ridemus quidem, cum eos videmus figmentis humanarum opinionum partitis inter se operibus distributos, tanquam minuscularios² vectigalium conductores, vel tanquam opifices in vico argentario (c), ubi unum vasculum ut perfectum exeat, per multos artifices transit, cum ab uno perfecto perfici posset. Sed aliter

¹ Lov., non irrationabili. Melius editi alii, non rationabili: suffragantibus manuscriptis, qui paulo post loco, acciderit; habeant, accederet.

² Lov., minuscularios. Vind. Am. Fr. et aliquot Mss., minuscularios. Alii veteres libri, hic et infra, cap. 11, minuscularios.

(a) in Bello Catilinæ, cap. 8.

(b) subaudi, appetunt.

(c) Designatur hic vicus urbis quem incolabant fabri argentarii. M.

non putatum est operantium multitudini consulendum, nisi ut singulas artis partes cito ac facile discerent singuli, ut omnes in arte una tarde ac difficile cogerentur esse perfecti. Verumtamen vix quisquam reperitur deorum non selectorum, qui aliquo crimine famam traxit infamem; vix autem selectorum quisquam, qui non in se notam contumeliæ insignis acceperit. Illi ad istorum humilia opera descenderunt, isti in illorum sublimia crimina non venerunt. De Jano quidem non mihi facile quidquam occurrit, quod ad probum pertineat: et fortasse talis fuerit, innocentius vixerit et a facinoribus flagitiisque remotius. Saturnum fugientem benignos excepit: cum hospite partitus est regnum, ut etiam civitates singulas conderent (a); iste Janiculum, ille Saturniam. Sed isti in cultu deorum omnis dedecoris appetitores, cujus vitam minus turpem invenerunt, cum simulacri monstrosa deformitate turparunt; nunc eum bifrontem, nunc etiam quadrifrontem, tanquam geminum, facientes. An forte voluerunt, ut, quoniam plurimi dii selecti erubescenda perpetrando amiserant frontem, quanto iste innocentior esset, tanto frontosior appareret?

CAPUT V. — *De Paganorum secretiore doctrina phisicisque rationibus.*

Sed ipsorum potius interpretationes phisicas audiamus, quibus turpitudinem miserri moris, velut altioris doctrinæ specie, colorare conantur. Primum eas interpretationes sic Varro commendat, ut dicat antiquos simulacra deorum et insignia ornatusque finxisse; quæ cum oculis animadvertissent hi qui adissent doctrinæ mysteria, possent animam mundi ac partes ejus, id est deos veros, animo videre: quorum qui simulacra specie hominis fecerunt, hoc videri secutos quod mortalium animus qui est in corpore humano, simillimus est immortalis animi (b): tanquam si vasa ponerentur causa notandarum deorum, et in Liberi æde ænophorum sisteret, quod significaret vinum, per id quod continet id quod continetur: ita per simulacrum quod formam haberet humanam, significari animam rationalem, quod eo velut vase natura ista soleat contineri, cujus naturæ deum volunt esse, vel deos. Hæc sunt mysteria doctrinæ, quæ iste vir doctissimus penetraverat, unde in lucem ista proferret. Sed, o homo acutissime, num in istis doctrinæ mysteriis illam prudentiam perdidisti, qua tibi sobrie visum est, quod hi qui primi populis simulacra constituerunt, et metum demperunt civibus suis, et errorem addiderunt, castiusque deos sine simulacris veteres observasse Romanos? hi enim tibi fuerunt auctores, ut hæc contra posteriores Romanos dicere auderes. Nam si et illi antiquissimi simulacra coluissent, fortassis totum istum sensum de simulacris non constituendis, interim verum³, timoris silentio premeres, et in hu-

³ Editi, veri. Corriguntur ex manuscriptis.

(a) virgil., lib. 8 Æneid., vers. 357, 358.

(b) vld. Cicer., Tuscul. Quæst. lib. 3, cap. 13.

Juscemodi perniciosis vanisque signentis mysteria ista doctrinæ loquacius et elatius prædicares. Anima tamen tua tam docta et ingeniosa (ubi te multum dolemus) per hæc mysteria doctrinæ ad Deum suam¹, id est a quo facta est, non cum quo facta est; nec cuius portio, sed cuius conditio est; nec qui est omnium anima, sed qui fecit omnem animam, quo solo illustrante fit anima beata, si ejus gratiæ non sit ingrata, nullo modo potuit pervenire. Verum ista mysteria doctrinæ qualia sint, quantique pendenda, quæ sequuntur ostendent. Fatetur interim vir iste doctissimus, animam mundi ac partes ejus esse veros deos: unde intelligitur totam ejus theologiam, eam ipsam scilicet naturalem, cui plurimum tribuit, usque ad animæ rationalis naturam se extendere potuisse. De naturali enim paucissima præloquitur in hoc libro: in quo videbimus utrum per interpretationes physiologicas ad hanc naturalem possit referre civilem, quam de diis selectis ultimam scripsit. Quod si poterit, tota naturalis erit: et quid opus erat ab ea civilem tanta cura distinctionis adjungere? Si autem recto discrimine separata est; quando nec ista vera est quæ illi naturalis placet; pervenit enim usque ad animam, non usque ad verum Deum qui fecit et animam: quanto est abjectior et falsior ista civilis, quæ maxime circa corporum est occupata naturam; sicut ipsæ interpretationes ejus, ex quibus quædam necessario² commemorare me oportet, tanta ab ipsis exquisitæ et enucleatæ diligentia demonstrabunt?

CAPUT VI. — *De opinione Varronis, qua arbitratus est Deum animam esse mundi, qui tamen in partibus suis habeat animas multas, quarum divina natura sit.*

Dicit ergo idem Varro adhuc de naturali theologia præloquens, deum se arbitrari esse animam mundi, quæm Græci vocant *κόσμος*, et hunc ipsum mundum esse deum: sed sicut hominem sapientem, cum sit ex corpore et animo, tamen ab animo dici sapientem; ita mundum deum dici ab animo, cum sit ex animo et corpore. Illic videtur quoque modo constiteri unum Deum; sed ut plures etiam introducat, adjungit mundum dividi in duas partes, cælum et terram; et cælum bifariam, in æthera et aera; terram vero in aquam et humum: o quibus summum esse æthera, secundam aera, tertiam aquam, infimam terram: quas omnes partes quatuor animarum esse plenas, in æthere et aere immortalium, in aqua et terra mortalium; ab summo autem circuitu cœli ad circulum lunæ æthereas animas esse astra ac stellas, eos³ cœlestes deos non modo intelligi esse, sed etiam videri: inter lunæ vero gyrum et nimbosum ac ventorum cacumina aereas esse animas, sed eas animo, non oculis videri; et vocari heroas, et lares, et genios. Hæc est videlicet breviter in ista prælocutione proposita theologia naturalis, quæ non huic tantum, sed multis philosophis placuit: de qua tunc diligen-

tius disserendum est, cum de civili, quantum ad deos selectos attinet, opitulante Deo vero, quod restat implevero.

CAPUT VII. — *An rationabile fuerit, Janum et Terminum in duo numina separari.*

Janus igitur, a quo sumpsit exordium, quæro quisnam sit? Respondetur, Mundus est. Brevis hæc plane est atque aperta responsio. Cur ergo ad eum dicuntur rerum initia pertinere, fines vero ad alterum, quem Terminum vocant? Nam propter initia et fines duobus istis diis duos menses perhibent dedicatos (a), præter illos decem quibus usque ad Decembrem caput est Martius; Januarius Jano, Februarius Termino. Ideo Terminalia eodem mense Februario celebrari dicunt, cum sit sacrum purgatorium, quod vocant Februum¹; unde mensis nomen accepit (b). Numquid ergo ad mundum, qui Janus est, initia rerum pertinent, et fines non pertinent, ut alter illis deus præficeretur? Nonne omnia quæ in hoc mundo fieri dicunt, in hoc etiam mundo terminari fatentur? Quæ est ista vanitas, in opere illi dare potestatem dimidiam, in simulacro faciem duplicem? Nonne istum bifrontem multo elegantius interpretarentur, si eundem et Janum et Terminum dicerent; atque initiis unam faciem, finibus alteram darent? quoniam qui operatur, utrumque debet intendere. In omni enim motu actionis suæ qui non respicit initium, non prospicit finem. Unde necesse est a memoria respiciente prospiciens² connectatur intentio. Nam cui exciderit quod cœperit, quomodo finiat non inveniet. Quod si vitam beatam in hoc mundo inchoari putarent, extra mundum perfici, et ideo Jano, id est mundo, solam initiorum tribuerent potestatem; profecto ei præponerent Terminum, eumque a diis selectis non alienarent. Quanquam etiam nunc cum in istis duobus diis initia rerum temporalium finesque tractantur, Terminum dari debuit plus honoris. Major enim lætitia est, cum res quæque perficitur: sollicitudinis autem plena sunt cœpta, donec perducantur ad finem, quem qui aliquid incipit, maxime appetit, intendit, exspectat, exoptat; nec de re inchoata, nisi terminetur, exsultat.

CAPUT VIII. — *Ob quam causam cultores Jani bifrontem imaginem ipsius finxerint, quam tamen etiam quadrifrontem videri volunt.*

Sed jam bifrontis simulacri interpretatio proferatur. Duas eum facies ante et retro habere dicunt, quod hiatus noster, cum os aperimus, mundo similis videatur: unde et palatum Græci *σῦρατος* appellant; et nonnulli, inquit, poetæ Latini cælum vocaverunt palatum: a quo hiatu oris, et foras esse aditum ad den-

¹ Plures et optimæ notæ manuscripti cum Vind. Am. et Er., *Februm*. Non male fortassis, tametsi apud Varronem, lib. 5 de latina Lingua legatur: *Februum Sabinis purgamentum, et in Sacris nostris verbum*.

² Sic omnes manuscripti, quorum unus tamen loco, *prospiciens*, habet, *prospicientis*. At editi, *necesse est ut memoriæ respicienti prospiciens, etc.*

(a) Plutarch. in Numa.

(b) Plutarch. *ibid.*

¹ Sic Vind. Am. et Mss. At Er. et Lov., *ad Deum suam*.

² Vind. Am. Er. et Mss., *necessaria*.

³ Editi, *easque*. At plerique Mss., *eos*.

tes versus, et introrsus ad fauces (a). Ecce quo perductus est mundus propter palati nostri vocabulum, vel græcum, vel poeticum. Quid autem hoc ad animam, quid ad vitam æternam? Propter solas salivas colatur hic deus, quibus partim glutendis, partim expuendis, sub cœlo palati utraque panditur janua. Quid est porro absurdius, quam in ipso mundo non invenire duas januas ex adverso sitas, per quas vel admittat ad se aliquid intro, vel emittat a se foras; et de nostro ore et gutture, quorum similitudinem mundus non habet, velle mundi simulacrum componere in Jano, propter solum palatum, cujus similitudinem Janus non habet? Cum vero eum faciunt quadrifrontem et Janum geminum appellant, ad quatuor mundi partes hoc interpretantur, quasi aliquid spectet mundus foras, sicut per omnes facies Janus. Deinde, si Janus est mundus, et mundus quatuor partibus constat, falsum est simulacrum Jani bifrontis¹: aut si propterea verum est, quia etiam nomine Orientis et Occidentis totus solet mundus intelligi, numquid cum duas partes alias nominamus Septemtrionis et Austri, sicut illum quadrifrontem dicunt geminum Janum, ita quisquam geminum dicturus est mundum? Non habent omnino unde quatuor januas, quæ intrantibus et exeuntibus pateant, interpretentur ad mundi similitudinem; sicut de bifronte quod dicerent saltem in ore hominis invenerunt; nisi Neptunus forte subveniat et porrigat piscem, cui præter hiatus oris et gutturis etiam dextra et sinistra fauces patent. Et tamen hanc vanitatem per tot januas nulla effugit anima, nisi quæ audit Veritatem dicentem, *Ego sum janua*¹. (Joan. x, 9).

CAPUT IX. — *De Jovis potestate, atque ejusdem cum Jano comparatione.*

1. Jovem autem, qui etiam Jupiter dicitur (b), quem velint intelligi, exponant. Deus est, inquit, habens potestatem causarum, quibus aliquid fit in mundo. Hoc quam magnum sit, nobilissimus Virgilius versus ille testatur:

Felix qui potuit rerum cognoscere causas.
(Georg. lib. 2, vers. 490.)

Sed cur ei præponitur Janus, hoc nobis vir ille acutissimus doctissimusque respondeat. *Quoniam penes Janum, inquit, sunt prima, penes Jovem summa. Merito ergo rex omnium Jupiter habetur. Prima enim vincuntur a summis: quia licet prima præcedant tempore, summa superant dignitate.* Sed recte hoc diceretur, si factorum prima discernentur et summa: sicut initium facti est proficisci, summum pervenire; initium facti inceptio discendi, summum perceptio doctrinæ: ac sic in omnibus prima sunt initia, summique sunt² fines. Sed jam hoc negotium inter Janum Terminumque discussum est. Causæ autem quæ dantur Jovi, efficientia sunt, non effecta: neque ullo

¹ Editi post, *Jani bifrontis*, addunt, *quæ Janus etiam quadrifrons legitur, nunquam tamen quadrifrons invenitur; quod a manuscriptis abest.*

² Sic Mss. Editi vero, *summaque sunt.*

(a) Vid. Ennium apud Ciceronem, lib. 3 de Nat. deor.

(b) *Jovis et Jupiter* perinde in recto dicebatur: sed usus demum obtinuit, ut in obliquo *Jovis*, in recto *Jupiter* diceretur.

modo fieri potest, ut vel tempore præveniantur a factis initiisve factorum. Semper enim prior est res quæ facit, quam illa quæ fit. Quapropter si ad Janum pertinent initia factorum, non ideo priora sunt efficientibus causis, quas Jovi tribuunt. Sicut enim nihil fit, ita nihil inchoatur ut fiat, quod non faciens causa præcesserit. Hunc sane deum, penes quem sunt omnes causæ factarum omnium naturarum naturaliumque rerum, si Jovem populi appellant, et tantis contumeliis tamque scelestis criminationibus colunt, tetriore sacrilegio sese obstringunt, quam si prorsus nullum putarent deum. Unde satius esset eis alium aliquem Jovis nomine nuncupare, dignum turpibus et flagitiosis honoribus, supposito vano figmento quod potius blasphemarent (sicut Saturno dicitur suppositus lapis, quem pro filio devoraret), quam istum deum dicere et tonantem et adulterantem, et totum mundum regentem et per tot stupra diffluentem, et naturarum omnium naturaliumque rerum causas summas habentem et suas causas bonas non habentem.

2. Deinde quæro, quem jam locum inter deos huic Jovi tribuant, si Janus est mundus. Deos enim veros animam mundi ac partes ejus iste definiit: ac per hoc quidquid hoc non est, non est utique secundum istos verus deus. Num igitur ita dicturi sunt Jovem animam mundi, ut Janus sit corpus ejus, id est iste visibilis mundus? Hoc si dicunt, non erit quemadmodum Janum deum dicant; quoniam mundi corpus non est deus vel secundum ipsos, sed anima mundi ac partes ejus. Unde apertissime idem dicit, deum se arbitrari esse animam mundi, et hunc ipsum mundum esse deum: sed sicut hominem sapientem, cum sit ex animo et corpore, tamen ex animo dici sapientem; ita mundum deum dici ab animo, cum sit ex animo et corpore. Solum itaque mundi corpus non est deus: sed aut sola anima ejus, aut simul corpus et animus; ita tamen ut non sit a corpore, sed ab animo deus. Si ergo Janus est mundus, et deus est Janus, numquid Jovem ut deus esse possit, aliquam partem Jani esse dicturi sunt? Magis enim Jovi universum solent tribuere: unde est,

Jovis omnia plena (a).

Ergo et Jovem, ut deus sit, et maxime rex deorum, non alium possunt existimare quam mundum; ut diis cæteris secundum istos suis partibus regnet. In hanc sententiam etiam quosdam versus Valerii Sorani (b) exponit idem Varro, in eo libro quem seorsum ab istis de cultu deorum scripsit; qui versus hi sunt:

*Juppiter omnipotens, regum rerumque deumque¹
Progenitor, genitrixque deum, deus unus, et omnes.*

Exponuntur autem in eodem libro, ita ut eum marem existimarent, qui semen emitteret, feminam quæ acciperet; Jovemque esse mundum, et eum omnia semina ex se emittere, et in se recipere: *Qua causa,*

¹ vind. Am. et Er., *regum rex ipse deusque*

(a) Hunc versum Virgilius in Ecloga 3, vers 60, ex principio Phænomenorum Arati transtulit. Dixit vero Aratus *Jovis omnia plena* esse, ex Stoicorum mente, qui intelligebant animam mundi universum hoc permeare. LARCHER.

(b) Vid. Cicer., lib. 3 de Orat., cap. 11; Plin., lib. 3 Hist. nat., cap. 5, al. 9.

inquit, scripsit Soranus, Jupiter progenitor genitrixque: nec minus cum causa unum et omnia idem esse; mundus enim unus, et in eo uno omnia sunt.

CAPUT X. — An Jani et Jovis recta discretio sit.

Cum ergo et Janus mundus sit, et Jupiter mundus sit, unusque sit mundus, quare duo dii sunt, Janus et Jupiter? quare seorsus habent templa, seorsus aras, diversa sacra, dissimilia simulacra? Si propterea quod alia vis est primordiorum, alia causarum, et illa Jani, illa Jovis nomen accepit; numquid si unus homo in diversis rebus duas habeat potestates aut duas artes, quia singularum diversa vis est, ideo duo iudices aut duo dicuntur artifices? Sic ergo et unus Deus, cum ipse habeat potestatem primordiorum, ipse causarum, num propterea illum duos deos esse necesse est putari, quia primordia causæque res duæ sunt? Quod si hoc justum putant, etiam ipsam Jovem tot deos esse dicant, quotquot ei cognomina propter multas potestates dederunt: quoniam res omnes, ex quibus illa cognomina sunt adhibita, multæ atque diversæ sunt; ex quibus pauca commemoro.

CAPUT XI. — De cognominibus Jovis, quæ non ad multos deos, sed ad unum eundemque referuntur.

Dixerunt eum Victorem, Invictum, Opitulium, Impulsorem, Staturem, Centumpedam, Supinalem, Tigillum, Almam, ¹, Ruminum, et alia quæ persequi longum est (a). Hæc autem cognomina imposuerunt uni deo propter causas potestatesque diversas, non tamen propter tot res etiam tot deos eum esse coegerunt: quod omnia vinceret, quod a nemine vinceretur, quod opem indigentibus ferret, quod haberet impellendi, statuendi, stabiliendi, resupinandi potestatem, quod tanquam tigillum mundum contineret ac sustineret, quod aleret omnia, quod ruma, id est mamma, aleret animalia. In his, ut advertimus, quædam magna sunt, quædam exigua; et tamen unus utraque facere perhibetur. Puto inter se propinquiora esse causas rerum atque primordia, propter quas res unum mundum duos deos esse voluerunt, Jovem atque Janum, quam continere mundum ² et mammam dare animalibus: nec tamen propter hæc duo opera tam longe inter se vi et dignitate diversa, duo dii esse compulsi sunt; sed unus Jupiter, propter illud Tigillum, propter illud Ruminus appellatus est. Nolo dicere, quod animalibus mammam præbere sugentibus magis Junonem potuit decere, quam Jovem: præsertim cum esset etiam diva Rumina, quæ in hoc opus adiutorium illi famulatumve præberet. Cogito enim posse responderi, et ipsam Junonem nihil aliud esse quam Jovem, secandum illos Valerii Sorani versus, ubi dictum est:

Jupiter omnipotens, regum rerumque deumque
Progenitor, genitrixque deum.

¹ Am. et Er., *Almon*.

² Sola editio Lov., *quem continere dicunt mundum*.

(a) Vid. Aristot., de Mundo, cap. 7. Hæc et plurima alia enumerat Lud. Vives.

Quare ergo dictus est et Ruminus, cum diligentius fortasse quærentibus ipse inveniat esse etiam illa diva Rumina. Si enim majestate deorum recte videbatur indignum, ut in una spica alter ad curam geniculi, altera ¹ ad folliculi pertineret; quanto est indignius unam rem infimam, id est ut mammis alantur animalia, duorum deorum potestate curari, quorum sit unus Jupiter, rex ipse cunctorum; et hoc agat non saltem cum conjuge sua, sed cum ignobili nescio qua Rumina, nisi quia ipse est etiam ipsa Rumina ²; Ruminus fortasse pro sugentibus maribus, Rumina pro feminis? Dicerem quippe noluisse illos Jovi femininum nomen imponere, nisi et in illis versibus *Progenitor genitrixque* diceretur; et inter alia ejus cognomina legerem, quod etiam Pecunia vocaretur, quam deam inter illos minuscularios invenimus, et in quarto libro commemoravimus (cap. 21). Sed cum et mares et feminae habeant pecuniam, cur non et Pecunia et Pecunius appellatus sit, sicut Rumina et Ruminus, ipsi viderint.

CAPUT XII. — Quod Jupiter etiam Pecunia nuncupetur.

Quam vero eleganter rationem hujus nominis reddiderunt! Et Pecunia, inquit, vocatur, quod ejus sunt omnia (a). O magnam rationem divini nominis! Imo vero ille, cujus sunt omnia, vilissime et contumeliosissime Pecunia nuncupatur. Ad omnia enim, quæ cælo et terra continentur, quid est pecunia in omnibus omnino rebus, quæ ab hominibus nomine pecuniæ possidentur? Sed nimirum hoc avaritia Jovi nomen imposuit, ut quisquis amat pecuniam, non quemlibet deum, sed ipsum regem omnium sibi amare videatur. Longe autem aliud esset, si divitiæ vocaretur: aliud namque sunt divitiæ, aliud pecunia. Nam dicimus divites, sapientes, justos, bonos, quibus pecunia vel nulla, vel parva est; magis enim sunt virtutibus divites, per quas eis etiam in ipsis corporalium rerum necessitatibus sat est quod adest: pauperes vero avaros, semper inliantes et egentes; quamlibet enim magnas pecunias habere possunt, sed in earum quantacumque abundantia non egere non possunt. Et Deum ipsum verum recte dicimus divitem, non tamen pecuniam, sed omnipotentiam. Dicuntur itaque et divites pecuniosi; sed interius egeni, si cupidi. Item dicuntur pauperes pecunia carentes; sed interius divites, si sapientes. Qualis ergo ista theologia debet esse sapienti, ubi rex deorum ejus rei nomen accepit, *quam nemo sapiens concupivit* (b)? Quanto enim facilius, si aliquid hac doctrina quod ad vitam pertineret æternam salubriter disceretur, deus mundi rector non ab eis pecunia, sed sapientia vocaretur, cujus amor purgat a sordibus avaritiæ, hoc est ab amore pecuniæ?

¹ Edidit hoc etiam loco, *alter*. At Mss., *altera*; scilicet, *Volubina*. Vide supra, lib. 4, cap. 8.

² Hic in editis additur, *ipse Ruminus*; quod a manuscriptoris abest.

(a) De verbo, *pecunia*, vid. August., de Discipl. Christ., 2, 8.

(b) *Sallust. in Catil., c. p. 11.*

CAPUT XIII. — *Quod dum exponitur quid Saturnus, quidve sit Genius, uterque unus Jupiter esse doceatur.*

Sed quid de hoc Jove plura, ad quem fortasse cæteri referendi sunt, ut inanis remaneat deorum opinio plurimorum, cum hic ipse sit omnes¹; sive quando partes ejus vel potestates existimantur, sive cum vis animæ, quam putant per cuncta diffusam, ex partibus molis hujus, in quas visibilis mundus iste consurgit, et multiplici administratione naturæ, quasi plurium deorum nomina accepit? Quid est enim et Saturnus? *Unus*, inquit, *de principibus deus, penes quem rationum omnium dominatus est.* Nonne expositio versuum illorum Valerii Sorani sic se habet, Jovem esse mundum, et eum omnia semina ex se emittere, et in se recipere? Ipse est igitur penes quem rationum omnium dominatus est. Quid est Genius? *Deus*, inquit, *qui præpositus est ac vim habet omnium rerum gignendarum.* Quem alium hanc vim habere credunt, quam mundum, cui dictum est, *Jupiter progenitor genitrixque?* Et cum alio loco Genium dicit esse uniuscujusque animum rationalem, et ideo esse singulos singulorum, talem autem mundi animum deum esse; ad hoc idem utique revocat, ut tanquam universalis genius ipse mundi animum esse credatur. Hic est igitur quem appellant Jovem. Nam si omnis genius deus, et omnis viri animus genius, sequitur ut sit omnis viri animus deus: quod si et ipsos abhorrere absurditas ipsa compellit, restat ut eum singulariter et excellenter dicant deum genium, quem dicunt mundi animum, ac per hoc Jovem.

CAPUT XIV. — *De Mercurii et Martis officiis.*

Mercurium vero et Martem quomodo referrent ad aliquas partes mundi et opera Dei, quæ sunt in elementis, non invenerunt; et ideo eos saltem operibus hominum præposuerunt, sermocinandi et belligerandi administratos². Quorum Mercurius si sermonis etiam deorum potestatem gerit, ipsi quoque regi deorum dominatur, si secundum ejus arbitrium Jupiter loquitur, aut loquendi ab illo accepit facultatem: quod utique absurdum est. Si autem illi humani tantum sermonis potestas tributa perhibetur, non est credibile ad lactandos mamma, non solum pueros, sed etiam pecora, unde Ruminus cognominatus est, Jovem descendere voluisse, et curam nostri sermonis, quo pecoribus antecellimus, ad se pertinere noluisse: ac per hoc idem ipse est Jovis atque Mercurius. Quod si sermo ipse dicitur esse Mercurius, sicut ea quæ de illo interpretantur, ostendunt: (nam ideo Mercurius, quasi medius currens dicitur appellatus, quod sermo currat inter homines medius (α); ideo Ἐρμῆς græce, quod sermo vel interpretatio, quæ utique ad sermonem pertinet, ἑρμηνεία dicitur; ideo et mercibus præesse, quia inter vendentes et ementes sermo sit medius; alas ejus in capite et pedibus significare³ volucrem ferri per aera

sermonem; nuntium dictum, quoniam per sermonem omnia cogitata enuntiantur): si ergo Mercurium ipse sermo est, etiam ipsis confidentibus, deus non est. Sed cum sibi deos faciunt eos, qui nec⁴ dæmones sunt, immundis supplicando spiritibus, possidentur ab eis qui non dii, sed dæmones sunt. Item quia nec Marti aliquod elementum vel partem mundi invenire potuerunt, ubi ageret opera qualiacumque naturæ, deum belli esse dixerunt, quod opus est hominum, et optabile eis non est. Si ergo pacem perpetuam Felicitas daret, Mars quid ageret non haberet. Si autem ipsum bellum est Mars, sicut sermo Mercurius; utinam quam manifestum est quod non sit deus, tam non sit et bellum quod vel falso vocetur deus.

CAPUT XV. — *De stellis quibusdam, quas Pagani deorum suorum nominibus nuncuparunt.*

Nisi forte illæ stellæ sunt hi dii, quas eorum appellare nominibus: nam stellam quamdam vocant Mercurium, quamdam iidem Martem. Sed ibi est et illa quam vocant Jovem; et tamen eis mundus est Jovis: ibi quam vocant Saturnum; et tamen ei præterea⁵ dant non parvam substantiam, omnium videlicet seminum: ibi est et illa omnium clarissima, quæ ab eis appellatur Venus; et tamen eandem Venerem esse etiam Lunam volunt: quamvis de illo fulgentissimo sidere apud eos tanquam de malo aureo Juno Venusque contendant. Luciferum enim quidam Veneris, quidam dicunt esse Junonis: sed, ut solet, Venus vincit. Nam multo plures eam stellam Veneri tribuunt, ita ut vix eorum quisquam reperitur, qui aliud opinetur. Quis autem non rideat, cum regem omnium Jovem dicant, quod⁶ stella ejus ab stella Veneris tanta vincitur claritate? tanto enim esse debuit cæteris illa fulgentior, quanto est ipse potentior. Respondent ideo sic videri, quia illa quæ putatur obscurior, superior est atque a terris longe remotior. Si ergo superiorem locum major dignitas meruit, quare Saturnus ibi est Jove superior? an vanitas fabulæ, quæ regem Jovem facit, non potuit usque ad sidera pervenire; et quod non valeat Saturnus in regno suo, neque in Capitolio (α), saltem est permixtus obtinere in cælo? Quare autem Janus non accepit aliquam stellam? Si propterea quia mundus est, et omnes in illo sunt; et Jovis mundus est, et habet tamen. An iste causam suam composuit ut potuit, et pro una stella quam non habet inter sidera, tot facies accepit in terra? Deinde si propter solas stellas Mercurium et Martem partes mundi putant, ut eos deos habere possint, quia utique sermo et bellum non sunt partes mundi, sed actus hominum; cur Arieti et Tauro et Cancro et Scorpionibus cæterisque hujusmodi, quæ cælestia signa numerant, et stellis non singulis, sed singula pluribus constant,

¹ Particula, *nec*, ab Er. et Lov. omisa hic fuit: restituitur ex Vind. Am. et Mss.

² Sic Mss. Editi vero, *præter eam*.

³ Sola editio Lov. pro, *quod*, habet, *cum*.

(α) *Non valuit Saturnus in regno suo*, qui videlicet e Creta pulsus a filio Jove dicitur: *neque in Capitolio*, quia cum incoluisset collem Capitolinum, ubi Saturnia condita erat, postea collis ille sacer fuit Jovi.

⁴ Plures Mss., *ipsi sint omnes*.

⁵ Sic Mss. Al. editi, *ministratos*.

⁶ Sic Mss. Al. editi: *ideo alas ei in capite et pedibus ponunt, volentes significare*.

(α) Apud Arnob. contra Gent. lib. 3, *quas medicuræ*

superiusque istis¹ in summo cœlo perhibent collocata, ubi constantior motus inerrabilem meatum sideribus præbet, nullas aras, nulla sacra, nulla templa fecerunt; nec deos, non dico inter hos selectos, sed ne inter illos quidem quasi plebeios habuerunt?

CAPUT XVI. — *De Apolline et Diana cæterisque selectis diis, quos partes mundi esse voluerunt.*

Apollinem quamvis divinatorem et medicum velint, tamen ut in aliqua parte mundi statuerent, ipsum etiam solem esse dixerunt; Dianamque germanam ejus similiter lunam et viarum præsidem. Unde et virginem volunt, quod via nihil pariat²: et ideo ambos sagittas habere, quod ipsa duo sidera de cœlo radios terras usque pertendant. Vulcanum volunt ignem mundi, Neptunum aquas mundi, Ditem patrem, hoc est Orcum, terrenam et infamam partem mundi. Liberum et Cererem præponunt seminibus, vel illum masculinis, illam femininis; vel illum liquori, illam vero ariditati seminum (a). Et hoc utique totum refertur ad mundum, id est ad Jovem, qui propterea dictus est *Progenitor genitrixque*, quod omnia semina ex se emitteret, et in se reciperet. Quandoquidem etiam Matrem magnam eandem Cererem volunt, quam nihil aliud dicunt esse quam terram, eamque perhibent et Junonem. Et ideo ei secundas causas rerum tribuunt: cum tamen Jovi sit dictum, *Progenitor genitrixque deum*: quia secundum eos totus mundus est Jovis. Minervam etiam, quia eam humanis artibus³ præposuerunt, nec invenerunt vel stellam ubi eam ponerent, eandem vel summum æthera vel etiam lunam esse dixerunt (b). Vestam quoque ipsam propterea dearum maximam putaverunt, quod ipsa sit terra; quamvis ignem mundi leviolem qui pertinet ad usus hominum faciles, non violentiorem qualis Vulcani est, ei deputandum esse crediderunt (c). Ac per hoc omnes istos selectos deos huic esse mundum volunt, in quibusdam universum, in quibusdam partes ejus: universum sicut Jovem; partes ejus, ut Genium, ut Matrem magnam, ut Solem et Lunam, vel potius⁴ Apollinem et Dianam. Et aliquando unum deum res plures, aliquando unam rem deos plures faciunt. Nam unus deus res plures sunt, sicut ipse Jupiter: et mundus enim totus Jupiter, et solum cœlum Jupiter, et sola stella Jupiter habetur et dicitur. Itemque Juno secundarum causarum domina, et Juno aer, et Juno terra, et si Venerem vinceret⁵, Juno stella. Similiter Minerva summus æther, et Minerva itidem luna, quam esse in ætheris infimo limite existimant. Unam vero rem deos plures ita

¹ Lov., *ista*: dissentientibus editis aliis et manuscriptis.

² In sola editione Lov., *quia nihil pariat*: omisso verbo, *via*.

³ Ms. 2080, *mentibus*. M.

⁴ Mss., *ut Solem vel Lunam; ut potius, etc.*

⁵ *Vinceret*, puta in contentione de Lucifero sidere, quod, ut capite superiore observat, quidam dicunt esse Junonis.

(a) Vid. Varronem, de Ling. lat. lib. 5, §§ 66, 59.

(b) Conf. Eusebium, Præpar. Evang. lib. 3, cap. 11, gallice a nobis translatum, *Démonstrations évangéliques*, tom. 1. M.

(c) Vid. Lactant., lib. 1 Instit., cap. 12.

faciunt. Et Janus est mundus, et Jupiter: sic et Juno est terra, et Mater magna, et Ceres.

CAPUT XVII. — *Quod etiam ipse Varro opiniones suas de diis pronuntiavit ambiguas.*

Et sicut hæc, quæ exempli gratia commemoravi, ita cætera non explicant, sed potius implicant; sicut impetus errabundæ opinionis impulerit, ita huc atque illuc, hinc atque illinc insiliunt et resiliunt: ut ipse Varro de omnibus dubitare, quam aliquid affirmare maluerit. Nam trium extremorum primum cum de diis certis absolvisset librum, in altero de diis incertis dicere ingressus, ait: *Cum in hoc libello dubias de diis opiniones posuero, reprehendi non debeo. Qui enim putabit judicari oportere et posse, cum audierit, faciet ipse: ego citius perducere possum, ut in primo libro quæ dici in dubitationem revocem, quam in hoc quæ perscribam omnia ut ad aliquam dirigam summam*¹. Ita non solum istum de diis incertis, sed etiam illum de certis fecit incertum. In tertio porro isto de diis selectis, posteaquam prælocutus est quod ex naturali theologia præloquendum putavit, ingressurus hujus civilis theologiæ vanitates et insanias mendaces (a), ubi eum non solum non ducebat rerum veritas, sed etiam majorum premebat auctoritas: *De diis*, inquit, *populi Romani publicis, quibus ædes dedicaverunt, eosque pluribus signis ornatos notaverunt, in hoc libro scribam; sed, ut Xenophanes Colophonius scribit, quid putem, non quid contendam, ponam. Homini est enim hæc opinari, Dei scire*. Rerum igitur non comprehensarum, nec firmissime creditarum, sed opinatarum et dubitandarum sermonem trepidus pollicetur, dicturus ea quæ ab hominibus instituta sunt. Neque enim, sicut sciebat esse mundum, esse cœlum et terram, cœlum sideribus fulgidum, terram seminibus fertilem, atque hujusmodi cætera, sicut hanc totam molem atque naturam vi quadam invisibili ac præpotenti regi atque administrari certa animi stabilitate credebat; ita poterat affirmare de Jano, quod mundus ipse esset; aut de Saturno invenire, quomodo et Jovis pater esset et Jovi regnanti² subditus factus esset, et cætera talia.

CAPUT XVIII. — *Quæ credibilior causa sit, qua error Paganitatis inoleverit.*

De quibus credibilior redditur ratio, cum perhibentur homines fuisse, et unicuique eorum ab his qui eos adulando deos esse voluerunt, ex ejus³ ingenio, moribus, actibus, casibus, sacra et solemnia constituta, atque hæc paulatim per animas hominum dæmonibus similes et ludicrarum rerum avidas irrepando, longe lateque vulgata⁴, ornantibus ea mendacis poetarum, et ad ea fallacibus spiritibus seducitibus. Facilius enim fieri potuit, ut juvenis im-

¹ Mss., *præscribam omnia, ut aliquam dirigam summam*, omisso, *ad*.

² Sic nostri Codd. In B., *et regnanti*; omissa voce, *Jovi*. M.

³ Er. et Lov., *ex eorum*. At Mss. *ex ejus*, quod refertur ad, *unicuique*.

⁴ Editi. *vulgarum*. Emendantur a Mss.

(a) Alludit ad Psal. xxxix, v. 5.

pius vel ab impio patre interfici metuens et avidus regni patrem pelleret regno, quam id, quod iste interpretatur, ideo Saturnum patrem a Jove filio superatum, quod ante est causa quæ pertinet ad Jovem, quam semen quod pertinet ad Saturnum. Si enim hoc ita esset, nunquam Saturnus prior fuisset, nec pater Jovis esset. Semper enim semen causa præcedit, nec unquam generatur ex semine. Sed cum conantur vanissimas fabulas sive hominum res gestas velut naturalibus interpretationibus honorare, etiam homines acutissimi tantas patiuntur angustias, ut eorum quoque vanitatem dolere cogamur.

CAPUT XIX. — *De interpretationibus, quibus colendi Saturni ratio concinnatur*¹.

Saturnum, inquit, dixerunt, quæ nata ex eo essent, solitum devorare; quod eo semina, unde nascerentur, redirent. Et quod illi pro Jove gleba objecta est devoranda, significat, inquit, manibus humanis obrui cœptas serendo fruges, antequam utilitas arandi esset inventa. Saturnus ergo dici debuit ipsa terra, non semina: ipsa enim quodammodo devorat quæ genuerit, cum ex ea nata semina in eam rursus recipienda redierint. Et quod pro Jove accepisse dicitur glebam, quid hoc ad id valet, quod manibus hominum semen gleba coopertum est? Numquid ideo non est, ut cætera, devoratum, quod gleba coopertum est? Ita enim hoc dictum est, quasi qui glebam opposuit, semen abstulerit, sicut Saturno perhibent oblata gleba ablatur Jovem; ac non potius gleba semen operiendo fecerit illud diligentius devorari. Deinde isto modo semen est Jupiter, non seminis causa, quod paulo ante dicebatur. Sed quid faciant homines, qui cum res stultas interpretantur, non inveniunt quid sapienter dicatur? Falcem habet, inquit, propter agriculturam. Certe illo regnante nondum erat agricultura, et ideo priora ejus tempora perhibentur, sicut idem ipse fabellas interpretatur, quia primi homines ex his vivebant seminibus, quæ terra sponte gignebat. An falcem sceptro perditto accepit, ut, qui primis temporibus rex fuerat otiosus, filio regnante fieret operarius laboriosus? Deinde ideo dicit a quibusdam pueros ei solitos immolari, sicut a Pœnis (a), et a quibusdam etiam majores, sicut a Gallis, quia omnium seminum optimum est genus humanum. De hac crudelissima vanitate quid opus est plura dicere? Hoc potius advertamus atque teneamus, has interpretationes non referri ad verum Deum, vivam, incorpoream, incommutabilemque naturam, a quo vita in æternum beata poscenda est; sed earum esse fines in rebus corporalibus, temporalibus, mutabilibus atque mortalibus. Quod Cælum, inquit, patrem Saturnus castrasse in fabulis dicitur, hoc significat penes Saturnum, non penes Cælum, semen esse divinum. Hoc propterea, quantum intelligi datur, quia nihil in cœlo de seminibus nascitur. Sed ecce, Saturnus si Cœli est filius, Jovis est filius.

¹ In editis: *Saturni causam ratiocinantur*: corrupte.

(a) Conf. Euseb. Præpar. evang. lib. 4, cap. 16, *Démonstrations évangéliques*, tom. 1. — M.

Cælum enim esse Jovem, innumerabiliter¹ et diligenter affirmant (a). Ita ista, quæ a veritate non veniunt, plerumque et nullo impellente se ipsa subvertunt. *Κρόνον* appellatum dicit, quod græco vocabulo significat temporis spatium: sine quo semen, inquit, non potest esse fecundum. Hæc et alia de Saturno multa dicuntur, et ad semen omnia referuntur. Sed saltem Saturnus seminibus cum tanta ista potestate sufficeret: quid ad hæc dii alii requiruntur, maxime Liber et Libera, id est Ceres? De quibus rursus, quod ad semen attinet, tanta dicit, quasi de Saturno nihil dixerit.

CAPUT XX. — *De sacris Cereris Eleusinae.*

In Cereris autem sacris prædicantur illa Eleusinia², quæ apud Athenienses nobilissima fuerunt. De quibus iste nihil interpretatur, nisi quod attinet ad frumentum, quod Ceres invenit, et ad Proserpinam, quam rapiente Orco perdidit. Et hanc ipsam dicit significare fecunditatem seminum: quæ cum defuisset quodam tempore, eademque sterilitate terra mœreret, exortam esse opinionem, quod filiam Cereris, id est ipsam fecunditatem, quæ a proserpendo Proserpina dicta esset, Orcus abstulerat, et apud inferos detinuerat: quæ res cum fuisset luctu publico celebrata, quia rursus eadem fecunditas rediit, Proserpina reddita exortam esse lætitiã, et ex hoc solemnia constituta. Dicit deinde multa in mysteriis ejus tradi, quæ nisi ad frugum inventionem non pertineant.

CAPUT XXI. — *De turpitudine sacrorum, quæ Libero celebrantur.*

Jam vero Liberi sacra, quem liquidis seminibus, ac per hoc non solum liquoribus fructuum, quorum quodammodo primatum vinum tenet, verum etiam seminibus animalium præfecerunt, ad quantam turpitudinem pervenerint, piget quidem dicere, propter sermonis longitudinem; sed propter superbam istorum bebetudinem non piget. Inter cætera quæ prætermittere, quoniam multa sunt, cogor; in Italiæ comitis quædam dicit sacra Liberi celebrata cum tanta licentia turpitudinis, ut in ejus honorem pudenda virilia colerentur; non saltem aliquantum verecundiore secreto, sed in propatulo exultante nequitia. Nam hoc turpe membrum per Liberi dies festos cum honore magno postillis impositum, prius rure in comitis, et usque in urbem postea vectabatur. In oppido autem Lavinio³ uni Libero totus mensis tribuebatur, cujus diebus omnes verbis flagitiosissimis uterentur, donec illud membrum per forum transvectum esset, atque in loco suo quiesceret. Cui membro in-

¹ Lov., *immutabiliter*; dissentientibus editis aliis et manuscriptis.

² Sic Er. et Mss. At Vind. Am. et Lov., *Eleusina*.

³ Aliquot Mss., *Lavino*. sed longe plures probæ notæ, *Lavinio*. An forte pro, *Lanuvino*. Nam agro *Lanuvino* legere est in Horatii Carminum libro 3, ode 27, vers. 3. De Lanuvii et Lavinii oppidi differentia dicit Sigonius in Livium, lib. 8, cap. 14.

(a) vid. Euseb., loc. cit., lib. 3, capp. 3, 10. M.

honesto matremfamilias honestissimam palam coronam necesse erat imponere. Sic videlicet Liber deus placandus fuerat proventibus seminum¹: sic ab agris fascinatio repellenda, ut matrona facere cogeretur in publico, quod nec meretrix, si matronæ spectarent, permitti debuit in theatro. Propter hæc Saturnus solus creditus non est sufficere posse seminibus, ut occasiones multiplicandorum deorum immunda anima reperiret, et ab uno vero Deo merito immunditiæ dedituta, ac per multos falsos aviditate majoris immunditiæ prostituta, ista sacrilegia sacra nominaret, seseque spurcorum dæmonum turbis conviolandam poluendamque præberet.

CAPUT XXII. — *De Neptuno, et Salacia, ac Venilia.*

Jam utique habebat Salaciam Neptunus uxorem, quam inferiorem aquam maris esse dixerunt; utquid illi adjuncta est et Venilia, nisi ut sine ulla causa necessariorum sacrarum, sola libidine animæ prostituta, multiplicaretur invitatio dæmoniorum? Sed proferatur interpretatio præclaræ theologiæ, quæ nos ab ista reprehensione reddita ratione pescat. Venilia, inquit, unda est, quæ ad litus venit; Salacia, quæ in salum redit (a). Cur ergo dæx fluit dæx, cum sit una unda quæ venit et redit? Nempe ipsa est exæstuanis in multa numina libido vesana. Quamvis enim aqua non geminetur quæ it et redit; hujus tamen occasione vanitatis, duobus dæmoniis invitatis, amplius anima commaculatur, quæ it, et non redit. Quæso te, Varro, vel vos, qui tam doctorum hominum talia scripta legistis, et aliquid magnum vos didicisse jactatis, interpretamini hoc, nolo dicere secundum illam æternam incommutabilemque naturam, qui solus est Deus; sed saltem secundum animam mundi, et partes ejus, quos deos veros esse existimatis. Partem animæ mundi, quæ in mare permeat, deum vobis fecisse Neptunum, utcumque tolerabilioris est erroris. Itane unda ad litus veniens et in salum rediens, dæx sunt partes mundi, aut dæx partes animæ mundi? Quis vestrum ita desipiat, ut hoc sapiat? Cur ergo vobis duas deas fecerunt, nisi quia provisum est a sapientibus majoribus vestris, non ut dii plures vos regerent, sed ut ea quæ istis vanitatibus et falsitatibus gaudent, plura vos dæmonia possiderent? Cur autem illa Salacia per hanc interpretationem inferiorem maris partem, qua viro erat subdita, perdidit? namque illam modo, cum refluente fluctum esse perhibetis, in superficie posuistis. An quia Veniliam pellicem accepit, irata suum marium de supernis maris exclusit?

CAPUT XXIII. — *De Terra, quam Varro deam esse confirmat, eo quod ille animus mundi, quem opinatur deum, etiam hanc corporis sui infimam partem permeat, eique vim divinam impertiat.*

1. Nempe una est terra, quam quidem plenam videmus animalibus suis; verumtamen ipsam magnum corpus in elementis mundique infimam partem, cur eam volunt deam? An quia fecunda est? Cur ergo non

¹ Vind. Am. Er. et quidam Mss., pro *eventibus seminum*.
(a) Alludit ad Psal. lxxvii, 30.

magis homines dii sunt, qui eam fecundiores faciunt excolendo; sed cum arant, non cum adorant? Sed pars animæ mundi, inquit, quæ per illam permeat, deam facit. Quasi non evidentior sit in hominibus anima, quæ utrum sit, nulla fit quæstio; et tamen homines dii non habentur: et quod est graviter dolendum, his, qui dii non sunt, et quibus ipsi meliores sunt, colendis et adorandis mirabili et miserabili errore subduntur. Et certe idem Varro in eodem de diis selectis libro, tres esse affirmat animæ gradus in omni universaque natura: unum, qui omnes partes corporis quæ vivunt, transit, et non habet sensum, sed tantum ad vivendum valetudinem: hanc vim in nostro corpore permanere dicit in ossa, ungues, capillos: sicut in mundo arbores sine sensu aluntur et crescunt, et modo quodam suo vivunt. Secundum gradum animæ, in quo sensus est: hanc vim pervenire in oculos, aures, nares, os, tactum. Tertium gradum animæ esse summum, quod vocatur animus¹, in quo intelligentia præminet: hoc præter hominem omnes carere mortales²: hanc partem animæ mundi dicit deum, in nobis autem Genium vocari. Esse autem in mundo lapides ac terram, quam videmus, quo non permanat sensus, ut ossa, ut ungues dei: solem vero, lunam, stellas, quæ sentimus, quibusque ipse sentit, sensus esse ejus. Æthera porro animum ejus: ex cuius vi, quæ pervenit in astra, ipsam quoque facere deos; et per ea quod in terram permeat, deam Tellurem; quod autem inde permeat in mare atque oceanum, deum esse Neptunum³.

2. Redeat ergo ab hac, quam theologiam naturalem putat, quo velut requiescendi causa ab his ambagibus atque anfractibus fatigatus egressus est. Redeat, inquam, redeat ad civilem: hic eum adhuc teneo, tantisper de hac ago. Nondum dico, si terra et lapides nostris sunt ossibus et unguibus similes, similiter eos intelligentiam non habere, sicut sensu carent; aut si idcirco habere dicuntur ossa et ungues nostri intelligentiam, quia in homine sunt qui habet intelligentiam, tam stultum esse qui hos deos in mundo dicit, quam stultus est qui in nobis ossa et ungues homines dicit. Sed hæc cum philosophis fortassis agenda sunt: nunc autem istum adhuc politicum⁴ volo. Fieri enim potest, ut, licet in illam naturalis theologiæ veluti libertatem caput erigere paululum voluisse videatur, adhuc tamen hunc librum versans, et se in illo versari cogitans, eum etiam inde respexerit; et hoc propterea dixerit, ne majores ejus, sive aliæ civitates,

¹ Ita nostri Mss. In B., qui vocatur animus. M.

² Hic editi addunt, in qua quoniam homines Deo videntur esse similes; quod abest a Mss.

³ In ante editis post, genium vocari, ita legebatur: Sic ergo et in anima mundi tres gradus insititans, unam partem ejus lapides esse dicit ac ligna; et hanc terram quam videmus, quo non permanat sensus: aliam vero quam sensum vocat ejus, ut æthera: tertiam porro, quam et animam ejus nuncupat, quæ scilicet pervenit in astra; eam quoque asserit facere deos, et per eam, quando in terram permanat, deam Tellurem; quod autem inde permeat in mare atque oceanum, deum esse Neptunum. Lectio alia, quam nos prætulimus, omnium est aut melioris notæ manuscriptorum.

⁴ Hic editi addunt, id editi civilem. Glossena quod abest a manuscriptis.

Tellurem atque Neptunum inaniter coluisse credatur. Sed hoc dico, pars animi mundani quæ per terram permeat, sicut una est terra, cur non etiam unam fecit deam, quam dicit esse Tellurem? Quod si ita fecit, ubi erit Orcus, frater Jovis atque Neptuni, quem Ditem patrem vocant (a)? ubi ejus conjux Proserpina, quæ secundum aliam in eisdem libris positam opinionem, non terræ fecunditas, sed pars inferior perhibetur (b)? Quod si dicunt, animi mundani partem, cum permeat terræ partem superiorem, Ditem patrem facere deum; cura vero inferiorem, Proserpinam deam; Tellus illa quid erit? Ita enim totum, quod ipsa erat, in duas istas partes deosque divisum est, ut ipsa tertia quæ sit, aut ubi sit, inveniri non possit: nisi quis dicat simul istos deos Orcum atque Proserpinam, unam deam esse Tellurem; et non esse jam tres, sed aut unam, aut duos: et tamen tres dicuntur, tres habentur, tres coluntur aris suis, delubris suis, sacris, simulacris, sacerdotibus suis, et per hæc etiam fallacibus prostitutam animam constuprantibus dæmonibus suis. Adhuc respondeatur, quam partem terræ permeat pars mundani animi, ut deum faciat Tellumonem. Non, inquit, sed una eademque terra habet geminam vim, et masculinam, quod semina producat; et femininam, quod recipiat atque enutriat: inde a vi feminina dictam esse Tellurem, a masculina Tellumonem. Cur ergo pontifices, ut ipse indicat, additis quoque aliis duobus, quatuor diis faciunt rem divinam, Telluri, Tellumoni, Altori, Rusori? De Tellure et Tellumone jam dictum est: Altori quare? Quod ex terra, inquit, aluntur omnia quæ nata sunt. Rusori quare? Quod rursus, inquit, cuncta eodem revolvuntur.

CAPUT XXIV. — *De Telluris cognominibus eorumque significationibus, quæ etiamsi erant multarum rerum indices, non debuerunt multorum deorum firmare opinioniones.*

1. Debit ergo una terra propter istam quadriginam vim¹ quatuor habere cognomina, non quatuor facere deos: sicut tot cognominibus unus Jupiter, et tot cognominibus una Juno; in quibus omnibus vis multiplex esse dicitur ad unum deum vel unam deam pertinens, non multitudo cognominum, deorum etiam multitudinem faciens. Sed profecto sicut aliquando etiam ipsas villissimas feminas earum, quas libidine quæsierunt, tædet poenitetque turbarum: sic animam vilem factam et immundis spiritibus prostitutam deos sibi multiplicare, quibus contaminanda prosterneretur, sicut plurimum libuit, sic aliquando et piguit. Nam et ipse Varro quasi de ipsa turba verecundatus, unam deam vult esse Tellurem. *Eandem*, inquit, *dicunt Matrem magnam, quod tympanum habeat, significari esse orbem terræ: quod turres in capite, oppida: quod sedes fringantur circa eam, cum omnia moveantur, ipsam non moveri. Quod Gallos huic deæ ut servirent fecerunt, significat qui semine indigeant, terram sequi oportere;*

*terre; in ea quippe omnia reperiri. Quod et apud eam jactant, præcipitur, inquit, qui terram colunt, ne sedent; semper enim esse quod agant. Cymbalorum sonitus, ferramentorum jactandorum¹ ac manuum, et ejus rei crepitus, in colendo agro qui fit, significant: ideo are, quod eam antiqui coebant are, antequam ferrum esset inventum. Leonem, inquit, adjungunt solum ac mansuetum, ut ostendant esse nullum genus terræ tam remotum ac vehementer ferum, quod non subigi colique conveniat. Deinde adjungit et dicit, Tellurem matrem et nominibus pluribus et cognominibus quod nominant, deos existimatos esse complures. Tellurem, inquit, putant esse Opem, quod opere fiat melior; Matrem, quod plurima pariat; Magnam, quod cibum pariat; Proserpinam, quod ea proserpant fruges; Vestam quod vestiatur herbis. Sic alias deas, inquit, non absurde ad hanc revocant. Si ergo una dea est, quæ quidem consulta veritate nec ipsa est, interim quid itur in multas? Unius sint ista multa nomina, non tam deæ multæ quam nomina. Sed errantium majorum auctoritas deprimit, et eundem Varronem post hanc sententiam trepidare compellit. Adjungit enim et dicit: *Cum quibus opinio majorum de his deabus, quod plures eas putarunt esse, non pugnat. Quomodo non pugnat, cum valde aliud sit, unam deam nomina habere multa, aliud, esse deas multas? Sed potest, inquit, fieri ut eadem res et una sit, et in ea quædam res sint plures. Concedo in uno homine esse res plures, numquid ideo et homines plures? sic in una dea esse res plures, numquid ideo et deas plures? Verum sicut volunt, dividant, conflent, multiplicent, replacent, implicent.**

2. Hæc sunt Telluris et Matris magnæ præclara mysteria, unde omnia referuntur ad mortalia semina et ad exercendam agriculturam. Itane ad hæc relata et hunc finem habentia tympanum, turres, Galli, jactatio insana membrorum, crepitus cymbalorum, confictio leonum, vitam cuiquam pollicentur æternam? itane propterea Galli abscisi huic Magnæ deæ serviunt, ut significant qui semine indigeant, terram sequi oportere; quasi non eos ipsa potius servitus semine faciat indigere? Utrum enim sequendo hæc deam, cum indigeant, semen acquirunt; an potius sequendo hanc deam, cum habeant, semen amittunt? Hoc interpretari est, an detestari? Nec attenditur, quantum maligni dæmones prævaluerint, qui nec aliqua magna his sacris polliceri ausi sunt, et tam crudelia exigere potuerunt. Si dea terra non esset, manus ei homines operando inferrent, ut semina consequerentur per illam; non etiam sibi sæviendo, ut semina perderent propter illam. Si dea non-esset, ita fecunda fieret manibus alienis, ut non cogeret hominem sterilem fieri manibus suis. Jam quod in Liberi sacris honesta matrona pudenda virilia coronabat, spectante multitudine, ubi rubens et sudans, si est

¹ Plerique et potiores Mss. Vind. et Am., *quatergeminam vim.*

(a) Supra, cap. 16.

(b) *Ibid.* Vid. Varronem, lib. 5 de Ling. lat., § 68.

¹ Vind., *ferramentorum ritus jactandorum.* Am. et Fr., *ferramentorum ictus jactandorum.* Sex Mss., *ferramentorum jactorum.*

² Paulo post plerique Mss., *qui fit, significant.* Locus perplexus et vitiosus.

ulla fross in hominibus, astabat forsitan et maritus; et quod in celebratione nuptiarum, super Priapi scappam nova nupta sedere iubebatur: longe contemptibiliora atque leviora sunt¹ prae ista turpitudine crudelissima vel crudelitate turpissima, ubi dæmoniis artibus² sic uterque sexus illuditur, ut neuter suo vulnere perimatur. Ibi fascinatio timetur agrorum, hic membrorum amputatio non timetur: ibi sic debonestatur novæ nuptæ verecundia, ut non solum fecunditas, sed nec virginitas adimatur; hic ita amputatur virilitas, ut nec convertatur in feminam, nec vir relinquatur.

CAPUT XXV. — *Quam interpretationem de abscisione Atidis³ Græcorum sapientium doctrina repererit.*

Et Atys⁴ ille non est commemoratus, nec ejus ab isto interpretatio requisita est, in cujus dilectionis memoriam Gallus absciditur (a). Sed docti Græci atque sapientes nequaquam rationem tam sanctam præclaramque tacuerunt. Propter vernalem quippe faciem terræ, quæ cæteris temporibus est pulchrior, Porphyrius, philosophus nobilis, Atyn flores significare perhibuit; et ideo abscisum, quia flos decedit ante fructum (*In libro de Ratione naturali deorum*). Non ergo ipsum hominem, vel quasi hominem, qui vocatus est Atys, sed virilia ejus flori comparaverunt. Ipsa quippe illo vivente deciderunt: imo vero non deciderunt, neque decerpta, sed plane discerpta sunt; nec illo flore amisso quisquam postea fructus, sed potius sterilitas consecuta est. Quid ergo ipse reliquus? et quidquid remansit absciso, quid eo significari dicitur? quo refertur? quæ interpretatio inde profertur? an hæc frustra moliendo nihilque inveniendo persuadent illud potius esse credendum, quod de homine castrato fama jactavit, litterisque mandatum est? Merito hinc aversatus est⁵ Varro noster, neque hoc dicere voluit: non enim hominem doctissimum latuit.

CAPUT XXVI. — *De turpitudine sacrorum Matris magnæ.*

Itemque de mollibus eidem Matri magnæ contra omnem virorum mulierumque verecundiam consecratis, qui usque in besternam diem madidis capillis, facie dealbata, fluentibus membris, incesso femineo per plateas viscosque Carthaginis, etiam a populis unde turpiter viverent exigebant (b), nihil Varro di-

¹ Vind. Am. et Er. *atque confusibilia sunt*. Minus apte.

² Plures Mss., *ritibus*. Et quidam, *retibus*.

³ Sic legendum ex Mss. [*Atys*.]

⁴ In veteribus libris plerisque cum duplici scribitur, *Atis*. De hujus historia sive fabula servius in *Æneid.* lib. 9; Arnobius, lib. 5, etc.

⁵ Editi, *huic aversatus est*. Emendantur a manuscriptis.

(a) Vide supra, lib. 2, cap. 7; et infra, lib. 6, cap. 7, n. 3.

(b) Gallis Matris deam licebat stipem a populo poscere lege a Metello lata, cuius meminit Ovidius, *Fastorum* lib. 4, vers. 350 seqq. Cicero, de *Legibus*, lib. 2, cap. 9: *Præter Idæam Matris, ait, famulos, eosque justis diebus, ne quis stipem cogito*. Additque, cap. 16: *Stipem sustulimus, nisi eam quam ad paucos dies propriam Idæam Matris excepimus: implet enim superstitione animos et exhaurit domos*. Vide Terullianum in *Apologetico*, cap. 15.

cere voluit, nec uspiam me legisse commemorari. Defecit interpretatio, erubuit ratio, contuitur oratio. Vicit Materis magnæ omnes deos filios, non numinis magnitudo, sed criminis. Huic monstro nec Jani monstrositas comparatur. Ille in simulacris habebat solam deformitatem, ista in sacris deformem crudelitatem; illi membra in lapidibus addita, hæc in hominibus perdita. Hoc dedecus tot Jovis ipsius et tanta stupra non vincunt: ille inter femineas corruptelas uno Ganymede cælum infamavit; ista tot mollibus professis et publicis et inquinavit terram, et cælo fecit injuriam. Saturnum fortasse possemus huic in isto genere turpissimæ crudelitatis sive conferre, sive præferre, qui patrem castrasse perhibetur: sed in Saturni sacris homines alienis manibus potius occidi, quam suis abscidi potuerunt. Devoravit ille filios, ut poetæ ferunt, et physici ex hoc interpretantur quod volunt; ut autem historia prodit, necavit: sed quod ei Pœni suos filios sacrificaverunt, non recepere Romani. At vero ista magna deorum Mater etiam Romanis templis castratos intulit, atque istam sævitiam moremque servavit; credita vires adjuvare Romanorum, exsecando virilia virorum. Quid sunt ad hoc malum Mercurii furta, Veneris lascivia, stupra ac turpitudines cæterorum, quæ proferremus de libris, nisi quotidie cantarentur et saltarentur in theatris? sed hæc quid sunt ad tantum malum, cujus magnitudo magnæ Matri tantummodo competeat? præsertim quod illa dicuntur a poetis esse conflictata: quasi poetæ id etiam finxerint, quod ea sint diis grata et accepta. Ut ergo canerentur vel scriberentur, audacia sit vel petulantia poetarum: ut vero divinis rebus et honoribus eisdem imperantibus et extorquentibus numinibus adderentur, quid est nisi erimen deorum; imo vero confessio dæmoniorum, et deceptio miserorum? Verum illud quod de abscisorum consecratione Mater deorum coli meruit, non poetæ confinxerunt, sed horrere magis quam canere maluerunt. Hisne diis selectis quisquam consecrandus est, ut post mortem vivat beate, quibus consecratus ante mortem honeste non potest vivere, tam fœdis superstitionibus subditus et immundis dæmonibus obligatus? Sed hæc omnia, inquit, referuntur ad mundum. Videat ne potius ad immundum. Quid autem non potest referri ad mundum, quod esse demonstratur in mundo? Nos autem animum quærimus, qui vera religione confusus, non tanquam deum suum adoret mundum, sed tanquam opus Dei propter Deum laudet mundum; et mundanis sordibus expiatus, mundus perveniat ad Deum, qui condidit mundum.

⁶ Editi Vind. Am. et Er. carent hac sententia: *Quid autem non potest referri ad mundum quod esse demonstratur in mundo; ejusque loco habent: Cui enim hic mundus est deus, nec animo religiosus existit; nec honestus vivet ille, nec mundus. Nos autem animum quærimus*. Lectio hæc, tametsi Ludovico Vives visa sit melior, venit profecto ex glossemate non bono ad illud quod præcedit, *Videat ne potius ad immundum*; ubi nihil subintelligere oportebat aliud nisi, *spiritum*, id est dæmonem.

CAPUT XXVII. — *De figmentis physiologorum, qui nec veram divinitatem colunt, nec eo cultu quo colenda est vera divinitas.*

1. Istos vero deos selectos videmus quidem clarius innotuisse quam ceteros; non tamen ut eorum illustrarentur merita, sed ne occultarentur opprobria: unde magis eos homines fuisse credibile est; sicut non solum poeticae litterae, verum etiam historicae tradiderunt. Nam quod Virgilius ait,

Primus ab aethereo venit Saturnus Olympo,
Arma Jovis fugiens, et regnis exsul adeptis:
(*Aeneid.* lib. 8, vers. 319, 320).

et quae ad hanc rem pertinentia consequuntur, totam de hoc Euhemerus¹ pandit historiam, quam Ennius in latinum vertit eloquium: unde quia plurima posuerunt, qui contra hujusmodi errores ante nos vel graeco sermone vel latino scripserunt, non in eo mihi placuit immorari.

2. [XXVII.] Ipsas physiologias cum considero, quibus docti et acuti homines has res humanas conantur vertere in res divinas, nihil video nisi ad temporalia terrenaque opera naturamque corpoream, vel etiamsi invisibilem, tamen mutabilem potuisse revocari: quod nullo modo est verus Deus. Hoc autem si saltem religiositati congruis significationibus ageatur, esset quidem dolendum, non his verum Deum annuntiare atque praedicari; tamen aliquo modo ferendum tam foeda et turpia non fieri nec juberi: at nunc cum pro Deo vero, quo solo anima se inhabitante sit felix, nefas sit colere aut corpus aut animam; quanto magis nefarium est ista sic colere, ut nec salutem, nec decus humanum corpus aut anima colentis obtineat? Quamobrem si templo, sacerdote, sacrificio, quod vero Deo debetur, colatur aliquod elementum mundi, vel creatus aliquis spiritus, etiamsi non immundus et malus; non ideo malum est, quia illa mala sunt quibus colitur; sed quia illa sunt talia, quibus solus ille colendus sit, cui talis cultus servitusque debetur. Si autem stoliditate vel monstrositate simulacrorum, sacrificiis homicidiorum, coronatione virilium pudendorum, mercede stuprorum, sectione membrorum, abscissione genitalium, consecratione mollium, festis impurorum obscenorumque ludorum, unum verum Deum, id est omnium animae corporisque creatorem, colere se quisque contendat; non ideo peccat, quia non est colendus quem colit; sed quia colendum, non ut colendus est, colit. Qui vero et rebus talibus, id est turpibus et sceleratis, et non Deum verum, id est animae corporisque factorem, sed creaturam quamvis non vitiosam colit, sive illa sit anima, sive corpus, sive anima simul et corpus, his peccat in Deum, quod et pro ipso colit, quod non est ipse; et talibus rebus colit, qualibus nec ipse colendus est, nec non ipse. Sed hi quoniam modo, id est quam turpiter nefarieque, coluerint, in promptu est. Quid autem vel quos coluerint, esset obscurum, nisi eorum testaretur historia, ea ipsa

¹ Vind. Am. et aliquot Mss., *Homerus*. Sed verius ceteri libri, *Euhemerus*. Hic enim scripsit sacram historiam. Vide supra, lib. 6, cap. 7, n. 1.

quae foeda et turpia constentur nominibus terribiliter exigentibus reddita. Unde remotis constat ambagibus, nefarios daemones atque immundissimos spiritus hac omni civili theologia in visendis stolidis imaginibus, et per eas possidendis etiam stultis cordibus, invitatos (a).

CAPUT XXVIII. — *Quod doctrina Varronis de theologia in nulla sibi parte concordet.*

Quid igitur valet, quod vir doctissimus et acutissimus Varro velut subtili disputatione hos omnes deos in caelum et in terram redigere ac referre conatur? Non potest¹: fluunt de manibus, resiliunt, labuntur et decidunt. Dicturus enim de feminis, hoc est deabus: « Quoniam, » inquit, « ut in primo libro dixi de locis, duo sunt principia deorum animadversa de caelo et terra, a quo dii partim dicuntur caelestes, partim terrestres: ut in superioribus initium fecimus caelo, cum diximus de Jano, quem alii caelum, alii dixerunt esse mundum; sic de feminis initium scribendi facimus a Tellure. » Sentio quantam molestiam tale ac tantum patiatur ingenium. Ducitur enim quadam ratione verisimili, caelum esse quod faciat, terram quae patiatur; et ideo illi masculinam vim tribuit, huic femininam: et non attendit eum potius esse qui haec facit, qui utrumque fecit. Hinc etiam Samothracum nobilia mysteria in superiori libro sic interpretatur, eaque se quae nec suis nota sunt scribendo expositurum etisque missurum quasi religiosissime pollicetur (b). Dicit enim se ibi multis indicibus collegisse in simulacris aliud significare caelum, aliud terram, aliud exempla rerum, quas Plato appellat ideas: caelum Jovem, terram Junonem, ideas Minervam vult intelligi: caelum a quo fiat aliquid, terram de qua fiat, exemplum secundum quod fiat. Qua in re omitto dicere, quod Plato illas ideas tantam vim habere dicit (c), ut secundum eas non caelum aliquid fecerit, sed etiam caelum factum sit. Hoc dico, istum in hoc libro selectorum deorum, rationem illam trium deorum, quibus quasi cuncta complexus est, perdidisse. Caelo enim tribuit masculos deos, feminas terrae: inter quas posuit Minervam, quam supra ipsum caelum ante posuerat. Deinde masculus deus Neptunus in mari est, quod ad terram potius quam ad caelum pertinet. Dispater² postremo, qui graece Πλοῦτος dicitur, etiam ipse masculus frater amborum, terrenus deus esse perhibetur; superiorem terram tenens, in inferiore habens Proserpinam conjugem. Quomodo ergo deos ad caelum, deas ad terram referre conatur? Quid solidum, quid constans, quid sobrium,

¹ Ita in Mss. At in editis prava hic fuit interpunctio, atque addita particula copulativa sic, ac referre conatur et non potest? Fluunt, etc.

² Plures manuscripti, *Ditis pater*. Alii, *Diispater*. — Ms. 766, *Diispater*. Mss. 2050, 2052 et 2053, *Dispater*. M.

³ Editti vind. et Am.: *Quomodo ergo deos in caelo, deas in terra esse perhibent, qui rursus deos ad terram, deas ad caelum referre conatur?*

(a) Conf. Epist. 102, n. 20.

(b) Vid. lib. 3 de Ling. lat., § 58.

(c) In Timaeo et Parmenide.

quid definitum habet hæc disputatio? Illa autem est Tellus initium earum, Mater scilicet magna, apud quam mollium et abscisorum seseque secantium atque jactantium insana perstreptit terpitudo: quid est ergo quod dicitur caput deorum Janus, caput earum Tellus? Nec ibi facit unum caput error, nec hic sanum furor (a). Cur hæc frustra referre nituntur ad mundum? Quod etsi possent, pro Deo vero mundum nemo pius colit: et tamen eos nec hoc posse, veritas aperta convincit. Referant hæc potius ad homines mortuos, et ad dæmones pessimos, et nulla quæstio remanebit.

CAPUT XXIX. — *Quod omnia quæ physiologi ad mundum partesque ipsius retulerunt, ad unum verum Deum referre debuerint.*

Namque omnia quæ ab eis ex istorum deorum theologia velut physicis rationibus referuntur ad mundum, quam sine ullo scrupulo sacrilegæ opinionis Deo potius vero, qui fecit mundum, omnis animæ et omnis corporis conditori tribuantur, advertamus hoc modo: Nos Deum colimus, non cælum et terram, quibus duabus partibus mundus hic constat: nec animam vel animas per viventia quæcumque diffusas; sed Deum qui fecit cælum et terram et omnia quæ in eis sunt: qui fecit omnem animam, sive quocumque modo viventem et sensus ac rationis expertem, sive etiam sentientem, sive etiam intelligentem.

CAPUT XXX. — *Qua pietate discernatur a creaturis Creator, ne pro uno tot dii colantur, quot sunt opera auctoris.*

Et jam ut incipiam illa unius et veri Dei opera percurrere, propter quæ isti sibi dum quasi honeste conantur sacramenta turpissima et scelestissima interpretari, deos multos falsosque fecerunt: illum Deum colimus, qui naturis a se creatis et subsistendi et movendi initia finesque constituit; qui rerum causas habet, novit atque disponit; qui vim seminum condidit; qui rationalem animam, quod dicitur animus, quibus voluit viventibus indidit; qui sermonis facultatem usumque donavit; qui munus futura dicendi, quibus placuit spiritibus impertivit, et per quos placet ipse futura prædicat, et per quos placet malas valetudines pellit; qui bellorum quoque ipsorum, cum sic emendandum et castigandum est genus humanum, exordiis, progressibus, finibusque moderatur; qui hujus mundi ignem vehementissimum et violentissimum pro immensæ naturæ temperamento et creavit et regit; qui universarum aquarum creator et gubernator est; qui solem fecit corporali clarissimum luminum, eique vim congruam et motum dedit; qui ipsis etiam inferis dominationem suam potestatemque non subtrahit; qui se-

¹ Sic Mss. At editi, quasi possit pro vero Deo mundus vel opus pro-factore coli.

² Sic Vind. Er. et Mss. — Sic etiam nostri Mss. In B., quæ dicitur animus. M.

(a) Error scilicet in Jano bicipite, furor autem in sacerdotibus insanis Matris magnæ.

mina et alimenta mortalium, sive arida sive liquida, naturis competentibus attributa substituit; qui terram fundat¹ atque fecundat; qui fructus ejus animalibus hominibusque largitur; qui causas non solum principales, sed etiam subsequentes novit atque ordinat; qui lunæ statuit motum suum²; qui vias cœlestes atque terrestres locorum mutationibus præbet; qui humanis ingenis, quæ creavit, etiam scientias artium variarum ad adjuvandam vitam naturamque concessit; qui conjunctionem maris et feminæ ad adiutorium propagandæ proles instituit; qui hominum cœtibus, quem focus et luminibus adhiberent, ad facillimos usus munus terreni ignis indulsit. Ista sunt certe, quæ diis selectis, per nescio quas physicas interpretationes vir acutissimus atque doctissimus Varro, sive quæ aliunde accepit, sive quæ ipse conjecit, distribuere laboravit. [XXX.] Hæc autem facit atque agit unus verus Deus; sed sicut Deus, id est ubique totus³, nullis inclusus locis, nullis viuculis alligatus, in nullas partes sectilis, ex nulla parte mutabilis, implens cælum et terram præsentem potentia, non indigente⁴ natura. Sic itaque administrat omnia quæ creavit, ut etiam ipsa proprios exercere⁵ et agere motus sinat (a). Quamvis enim nihil esse possint sine ipso, non sunt quod ipse⁶. Agit autem multa etiam per Angelos: sed non nisi ex se ipso beatificat Angelos. Ita quamvis propter aliquas causas hominibus Angelos mittat: non tamen ex Angelis homines, sed ex se ipso, sicut Angelos, beatificat. Ab hoc uno et vero Deo vitam speramus æternam.

CAPUT XXXI. — *Quibus proprie beneficiis Dei, excepta generali largitate, sectatores veritatis utantur.*

Habemus enim ab illo, præter hujuscemodi beneficia, quæ ex hac, de qua nonnulla diximus, administratione naturæ bonis malisque largitur, magnum et bonorum proprium magnæ dilectionis indicium. Quanquam enim, quod sumus, quod vivimus, quod cælum terramque conspiciamus, quod habemus mentem atque rationem, qua enim ipsum, qui hæc omnia condidit, inquiramus, nequaquam valeamus actioni sufficere gratiarum: tamen quod nos oneratos obrutosque peccatis, et a contemplatione suæ lucis aversos, ac tenebrarum, id est iniquitatis, dilectione cæcatos, non omnino deseruit, misitque nobis Verbum suum, qui est ejus unicus Filius, quo pro nobis assumpta carne nato atque passo, quanti Deus hominem penderet nosceremus, atque illo sacrificio singulari a peccatis omnibus mundaremur, ejusque Spiritu in cordibus nostris dilectione diffusa, omnibus difficultatibus superatis in æternam requiem et con-

¹ Am. Er. et Lov., fundavit. Vind. et Mss., fundat.

² Vind. Am. et præbe notæ manuscripti, modum summi. — Sic etiam codices 766, 2052 et 2053. In Ms. 2051 abest hoc phraseos membrum. M.

³ Editi: Sed sicut idem Deus, ubique totus. Corrigitur a manuscriptis.

⁴ Editi, non absente. At omnes manuscripti, non indigente.

⁵ Plerique Mss., exserere. — Sic etiam nostri Mss. M.

⁶ Sic Mss. At editi, nihil esse possit sine ipso, non tamen sumi ulla quod ipse.

(a) Conf. lib. 5 cont. Julian., n. 51

temptationis ejus ineffabilem dulcedinem veniremus, quæ corda, quot linguæ ad agendas ei gratias satis esse contenderint?

CAPUT XXXII. — *Quod sacramentum redemptionis Christi nullis retro temporibus defuerit, semperque sit diversis significationibus prædicatum.*

Hoc mysterium vitæ æternæ jam inde ab exordio generis humani per quædam signa et sacramenta temporibus congrua, quibus oportuit, per Angelos prædicatum est (a). Deinde populus Hebræus in unam quamdam rempublicam, quæ hoc sacramentum ageret, congregatus est; ubi per quosdam scientes, per quosdam nescientes, id quod ex adventu Christi usque nunc et deinceps agitur, prænunderetur esse venturum: sparsa etiam postea eadem gente¹ per gentes propter testimonium Scripturarum, quibus æterna salus in Christo futura prædicta est. Omnes enim non solum prophetiæ, quæ in verbis sunt; nec tantum præcepta vitæ, quæ mores pietatemque conformant², atque illis litteris continentur; verum etiam sacra, sacerdotia, tabernaculum, sive templum, altaria, sacrificia, cerimonie, dies festi, et quidquid aliud ad eam servitatem pertinet, quæ Deo debetur, et græce proprie *λατρεία* dicitur, ea significaverunt et prænunderunt³ quæ, propter æternam vitam fidelium in Christo et impleta credimus, et impleri cernimus, et implenda confidimus (b).

CAPUT XXXIII. — *Quod per solam christianam religionem manifestari potuerit fallacia spirituum malignorum, de hominum errore gaudentium.*

Per hanc ergo religionem unam et veram potuit aperiri, deos Gentium esse immundissimos dæmones, sub defunctarum occasionibus animarum vel creaturarum specie mundanarum deos se putari cupientes, et quasi divinis honoribus eisdemque scelestis ac turpibus rebus superba impuritate lætantes, atque ad verum Deum conversionem humanis animis invidentes. Ex quorum immanissimo et impiissimo dominatu homo liberatur, cum credit in eum qui præbuit ad exurgendum tantæ humilitatis exemplum, quanta illi superbia ceciderunt. Hinc sunt non solum illi, de quibus multa jam diximus, et alii atque alii similes cæterarum gentium atque terrarum; sed etiam hi, de quibus nunc agimus, tanquam in senatum deorum selecti; sed plane selecti nobilitate criminum, non dignitate virtutum. Quorum sacra Varro dum quasi ad naturales rationes referre conatur, quærens honestare res turpes, quomodo his quadret et consonet, non potest invenire: quoniam non sunt ipsæ illorum sacrorum causæ quas putat, vel potius vult putari. Nam si non

¹ Sic nostri recte Mss. in B., *post eadem gente.* M.

² Aliquot Mss., *confirmant.* — Sic etiam Ms. 766. M.

³ In antiquioribus editionibus Vind. Am. Er. legitur, *ea significata et prænunderata sunt.* Sic etiam in omnibus manuscriptorum. Lovanienses tamen correxerunt requirente, ut alunt, sensu, *ea significarunt et prænunderarunt.*

(a) Conf. lib. 9 de Gen. ad litt., n. 34-36.

(b) De his plura habet August. passim infra, a lib. 17. Confer etiam lib. 4 contra Faustum, cap. 2, et lib. 22, cap. 24.

solum ipsæ, verum etiam quælibet aliæ hujus generis essent, quamvis nihil ad Deum verum vitamque æternam, quæ in religione quærenda est, pertinerent; tamen qualicumque de rerum natura reddita ratione, aliquantulum mitigarent offensionem, quam non intellecta in sacris aliqua vel turpitudine aut absurditas fecerat; sicut in quibusdam theatrorum fabulis vel delubrorum mysteriis facere conatus est: ubi non theatra delubrorum similitudine absolvit, sed theatrorum potius similitudine delubra damnavit; tamen utcumque conatus est, ut sensum horribilibus rebus offensum velut naturalium causarum ratione reddita deliniret¹.

CAPUT XXXIV. — *De libris Numæ Pompilii, quos senatus, ne sacrorum causas, quales in eis habebantur, innotescerent, jussit incendi.*

Sed contra invenimus, sicut ipse vir doctissimus prodidit, de Numæ Pompilii libris redditas sacrorum causas nullo modo potuisse tolerari, nec dignas habitas, quæ non solum lectæ innotescerent religiosis, sed saltem scriptæ recondentur in tenebris. Jam enim dicam, quod in tertio hujus operis libro me suo loco dicturum esse promiseram (Cap. ix). Nam, sicut apud eundem Varronem legitur in libro de Cultu deorum, « Terentius quidam cum haberet² ad Janiculum fundum, et bubulcus ejus juxta sepulcrum Numæ Pompilii trajiciens aratrum eruisset ex terra libros ejus, ubi sacrorum institutorum scriptæ erant causæ, in Urbem pertulit ad prætorem. Ad ille cum insperasset principia, rem tantam detulit ad senatum. Ubi cum primores quasdam causas legissent, cur quidque in sacris fuerit institutum, Numæ mortuo senatus assensus est, eosque libros tanquam religiosi patres conscripti, prætor ut combureret, censuerunt » (a). Credat quisque quod putat: imo vero dicat quod dicendum suggesserit vesana contentio, quilibet tantæ impietatis defensor egregius. Me admonere sufficiat, sacrorum causas a rege Pompilio, Romanorum sacrorum institutore, conscriptas, nec populo, nec senatui, nec saltem ipsis sacerdotibus innotescere debuisse, ipsumque Numam Pompilium curiositate illicita ad ea dæmonum pervenisse secreta, quæ ipse quidem scriberet, ut haberet unde legendo commoneretur: sed ea tamen, cum rex esset, qui minime quemquam metueret, nec docere aliquem, nec delendo vel quoquo modo consumendo perdere auderet; ita quod scire neminem voluit, ne homines nefaria doceret, violare autem timuit, ne dæmones iratos haberet, obruit ubi tutum putavit, sepulcro suo propinquare aratrum posse non credens. Senatus autem cum religiones formidaret damnare majorum, et ideo Numæ assentiri cogebatur; illos tamen libros tam perniciosos esse judicavit, ut nec obrui rursus juberet, ne humana curiositas multo vehementius rem jam proditam quæreret, sed flammis aboleri ne-

¹ Mss., *ratio reddita deliniret.*

² Quidam Mss., *araret.* — Nostri codices, *haberet.* M.

(a) Vid. Liv. lib. 40, cap. 29; Valer. lib. 1, cap. 1; Plin. lib. 13, cap. 13, al. 27; Fest. et Plutarch. in *Numa*; Lact. lib. 1 Instit., cap. 22.

fauda monumenta : ut , quia jam necesse esse existimabant sacra illa facere, tolerabilius erraretur causis eorum ignoratis , quam cognitis civitas turbaretur.

CAPUT XXXV. — *De hydromantia, per quam Numa, visis quibusdam dæmonum imaginibus, ludificabatur.*

Nam et ipse Numa, ad quem nullus Dei propheta, nullus sanctus angelus mittebatur, hydromantiam facere compulsus est, ut in aqua videret imagines deorum, vel potius ludificationes dæmonum, a quibus audiret quid in sacris constituere atque observare deberet. Quod genus divinationis idem Varro a Persis dicit allatum, quo ¹ et ipsum Numam, et postea Pythagoram philosophum usum fuisse commemorat : ubi adhibito sanguine etiam inferos perhibet sciscitari ² ; et νεκρομαντεία græcè dicit vocari : quæ sive hydromantia, sive necromantia dicatur, idipsum est, ubi videntur mortui divinare. Quibus hæc artibus fiant, ipsi viderint. Nolo enim dicere has artes etiam ante nostri Salvatoris adventum in ipsis civitatibus Gentium legibus solere prohiberi, et pœna severissima vindicari. Nolo, inquam, hoc dicere : fortassis enim talia tunc licebant. His tamen artibus dicit sacra illa Pompilius, quorum sacrorum facta prodidit, causas obruit ; ita timuit et ipse quod didicit : quarum causarum proditos libros senatus incendit. Quid mihi ergo Varro illorum sacrorum alias nescio quas causas velut físicas interpretatur ; quales si libri illi habuissent, non utique arsissent ; aut et istos Varronis ad Cæsarem pontificem scriptos (a) atque editos patres conscripti similiter incendissent ? Quod ergo aquam egresserit, id est exportaverit, Numa Pompilius, unde hydromantiam faceret, ideo nympham Egeriam conjugem dicitur habuisse, quemadmodum in supradicto libro Varronis exponitur (b). Ita enim solent res gestæ aspersione mendaciorum in fabulas verti. In

¹ Ms. 766, qua. M.

² Am. Er. et aliquot Mss, suscitari : moxque nonnulli codices, et necromanteian.

³ In nostris Mss., excepto 2030, absunt voces, sive hydromantia. Ms. 2031 fert, necromantia. M.

(a) Vid. Lactant. lib. 1 Insit., cap. 6.

(b) Livius, lib. 1, cap. 49 ; Ovidius, lib. 3 Fast., vers. 273, 276.

illa igitur hydromantia curiosissimus ille rex Romanus et sacra didicit, quæ in libris suis pontifices haberent ; et eorum causas, quas præter se neminem scire voluit. Itaque eas seorsum scriptas secum quodammodo mori fecit, quando ita subtrahendas hominum notitiæ sepeliendasque curavit. Aut ergo dæmonum illic tam sordidæ et noxiæ cupiditates erant conscriptæ, ut ex his tota illa theologia civilis etiam apud tales homines execrabilis appareret, qui tam multa in ipsis sacris erubescenda susceperant aut illi omnes nihil aliud quam homines mortui prodebantur, quos tam prolixæ ¹ temporis vetustate fere omnes populi Gentium deos immortales esse crediderant : cum et talibus sacris iidem illi dæmones oblectarentur, qui se colendos pro ipsis mortuis, quos deos putari fecerant quibusdam fallacium miraculorum attestationibus, supponebant. Sed occulta Dei veri providentia factum est, ut et Pompilio amico suo illis conciliati artibus, quibus hydromantia fieri potuit, cuncta illa confiteri permitterentur ; et amen ut mortuus incenderet ea potius, quam obrueret, admonere non permitterentur : qui ne innotescerent, nec aratro, quo sunt eruta, obsistere potuerunt, nec stilo Varronis, quo ea quæ de hac re gesta sunt, in nostram memoriam pervenerunt. Non enim possunt quod non sinuntur efficere : sinuntur autem alto Dei summi iustoque iudicio pro meritis eorum, quos ab eis vel affligi tantum, vel etiam subijci ac decipi justum est. Quam vero perniciosæ vel a cultu veræ divinitatis alienæ illæ literæ iudicatæ sint, hinc intelligi potest, quod eas maluit senatus incendere, quas Pompilius occultavit, quam timere quod timuit qui hoc ² audere non potuit. Qui ergo vitam nec modo habere vult piam, talibus sacris quærat æternam ³. Qui autem cum malignis dæmonibus non vult habere societatem, non superstitionem, qua coluntur, noxiam pertimescat : sed veram religionem, qua produntur, et vincuntur, agnoscat.

¹ Am. et Mss., tam proluxa. — Sic etiam nostri Mss.

² Ms. 766, hæc. M.

³ Sic omnes Mss. At editi : Qui ergo nec felicem in futuro vitam, nec modo habere vult piam, talibus sacris mortem quærat æternam.

LIBER OCTAVUS.

Venit ad tertium genus theologiæ, quæ dicitur naturalis, deque diis eo pertinentibus questionem, an istorum videlicet deorum cultus prosit ad consequendam vitam beatam, quæ post mortem futura est, discutendam suscipit cum Platonis, qui cæterorum philosophorum sunt facile principes et ad fidei christianæ veritatem propius accedentes. Atque hic primum refellit Apuleium et quicumque alii cultum dæmonibus tanquam internuntiis et interpretibus inter deos et homines impendi volunt ; ostendens ipsos dæmones quos vitis obnoxios esse, et quæ prohi prudentesque homines aversantur et damnant, id est, sacrilega poetarum figmenta, ludibria theatra, magicarum artium maleficia et scelera importasse, iisque omnino favere et delectari compertum est, nulla posse ratione diis bonis homines conciliare.

o o o o o o o o o o

CAPUT PRIMUM. — *De quæstione naturalis theologiæ cum philosophis excellentioris scientiæ discutienda.*

Nunc intentiore nobis opus est animo multo quam erat in superiorum solutione questionum et explicatione librorum. De theologia quippe, quam naturalem vocant, non cum quibuslibet hominibus (non enim fabulosa est vel civilis, hoc est vel theatra vel urbana ;

quarum altera jactat deorum crimina, altera indicat deorum desideria criminiosiora, ac per hoc malignorum potius dæmonum quam deorum) ; sed cum philosophis est habenda collatio : quorum ipsum nomen si latine interpretemur, amorem sapientiæ proficitur (a). Porro si sapientia Deus est, per quem

(a) Vid. Cicero. lib. 2 de Offic., cap. 2.

facta sunt omnia, sicut divina auctoritas veritasque monstravit (*Sap. vii, 24-27; et Hebr. i, 2, 3*), verus philosophus est amator Dei. Sed quia res ipsa, cujus hoc nomen est, non est in omnibus qui hoc nomine gloriantur (neque enim continuo veræ sapientiæ sunt amatores, quicumque appellantur philosophi) (a): profecto ex omnibus, quorum sententias et litteris nosse potuimus, eligendi sunt cum quibus non indignæ quæstio ista tractetur. Neque enim hoc opere omnes omnium philosophorum vanas opiniones refutare suscepi, sed eas tantum quæ ad theologiam pertinent, quo verbo græco significari intelligimus de divinitate rationem sive sermonem: nec eas omnium, sed eorum tantum, qui cum et esse divinitatem et humana curare consentiant, non tamen sufficere unius incommutabilis Dei cultum ad vitam adipiscendam, etiam post mortem, beatam, sed multos, ab illo sane uno conditos atque institutos, ob eam causam colendos putant. Hi jam etiam Varronis opinionem veritatis propinquitate transcendunt: siquidem ille totam theologiam naturalem usque ad mundum istum vel ejus animam extendere potuit: isti vero supra omnem animæ naturam confitentur Deum, qui non solum mundum istum visibilem, qui sæpe cœli et terræ nomine nuncupatur, sed etiam omnem omnino animam fecerit; et qui rationalem et intellectualem, cujus generis anima humana est, participatione sui luminis incommutabilis et incorporei beatam facit. Hos philosophos Platonicos appellatos, a Platone doctore vocabulo derivato, nullius qui hæc vel tenuiter audivit, ignorat. De hoc igitur Platone, quæ necessaria præsentis quæstioni existimo, breviter attingam, prius illos commemorans, qui eum in eodem genere litterarum tempore præcesserunt.

CAPUT II. — *De duobus philosophorum generibus, id est, Italico et Ionico, eorumque auctoribus.*

Quantum enim attinet ad litteras græcas, quæ lingua inter cæteras gentium clarior habetur (b), duo philosophorum genera traduntur; unum Italicum, ex ea parte Italiae, quæ quondam magna Græcia nuncupata est; alterum Ionicum, in eis terris, ubi et nunc Græcia nominatur. Italicum genus auctorem habuit Pythagoram Samium, a quo etiam ferunt ipsum philosophiæ nomen exortum. Nam cum antea Sapientes appellarentur, qui modo quodam laudabilis vitæ aliis præstare videbantur; iste interrogatus, quid profiteretur, Philosophum se esse respondit, id est studiosum vel amatorem sapientiæ: quoniam sapientem profiteri, arrogantissimum videbatur (c). Ionici vero generis princeps fuit Thales Milesius, unus illorum septem qui appellati sunt Sapientes (d). Sed illi sex vitæ genere distinguebantur, et quibusdam præceptis ad bene vivendum accommodatis: iste autem Thales, ut

(a) Lactant. lib. 3.

(b) Vid. quæst. 37 in Judic., tom. 3.

(c) Cicero, lib. 5 Tuscul. Quæst., cap. 3.

(d) Hic Romulo regnante vixisse dicitur infra, lib. 18, cap. 24. Equales ipsius sex alii Sapientes sunt CINO Lacedæmonius, Pittacus Mitylæus, Bias Priæus, Cleobulus Lindius, Periander Corinthius, et Solon Atheniensis.

successores etiam propagaret, rerum naturam scrutatus suasque disputationes litteris mandans eminuit; maximeque admirabilis existit, quod astrologiæ numeris comprehensis, defectos solis et lunæ etiam prædicere potuit (a). Aquam tamen putavit rerum esse principium, et hinc omnia elementa mundi ipsumque mundum, et quæ in eo gignuntur, existere. Nihil autem huic operi, quod mundo considerato tam admirabile aspicimus, ex divina mente præposuit. Huic successit Anaximander, ejus auditor, mutavitque de rerum natura opinionem. Non enim ex una re, sicut Thales ex humore, sed ex suis propriis principiis quasque res nasci putavit. Quæ rerum principia singularum esse credidit infinita, et innumerabiles mundos gignere, et quæcumque in eis oriuntur; eosque mundos modo dissolvi, modo iterum gigni existimavit, quanta quisque ætate sua manere potuerit; nec ipse aliquid divinæ menti in his rerum operibus tribuens. Iste Anaximenem¹ discipulum et successorem reliquit: qui omnes rerum causas Infinito aeri dedit: nec deos negavit, aut tacuit; non tamen ab ipsis aerem factum, sed ipsos ex aere ortos credidit. Anaxagoras vero, ejus auditor, harum rerum omnium, quas videmus, effectorem divinum animum sensit; et dixit ex infinita materia, quæ constaret similibus² inter se particulis, rerum omnium genera pro modulis et speciebus propriis singula fieri³, sed animo faciente divino. Diogenes quoque (b), Anaximenis alter auditor, aerem quidem dixit rerum esse materiam, de qua omnia fierent; sed cum esse compotem divinæ rationis, sine qua nihil ex eo fieri posset. Anaxagoræ successit auditor ejus Archelaus: etiam ipse de particulis inter se similibus, quibus singula quæque fierent, ita putavit constare omnia, ut inesse etiam mentem diceret, quæ corpora æterna⁴, id est illas particulas, conjungendo et dissipando ageret omnia. Socrates hujus discipulus fuisse perhibetur, magister Platonis, propter quem breviter cuncta ista recolui.

CAPUT III. — *De Socratica disciplina.*

Socrates ergo primus universam philosophiam ad corrigendos componendosque mores flexisse memoratur; cum ante illum omnes magis physicis, id est, naturalibus, rebus perscrutandis operam maximam impenderent (c). Non mihi autem videtur posse ad liquidum colligi, utrum Socrates, ut hoc faceret, lædio rerum obscurarum et incertarum ad aliquid apertum et certum reperiendum animum intenderit, quod esset beatæ vitæ necessarium; propter quam unam omnium philosophorum invigilasse ac laborasse vide-

¹ Vind. Am. Er., *dissimilibus*. Sic rursus infra loco, *similibus*.

² Omnes prope Mss., *rerum omnium quibus suis et propriis singula fieri*. Cygiranensis Ms., *rerum omnium quibusque suis et propriis singula fieri*.—Mss. nostri legunt, *fierent*, pro, *fieri*, et cætera sicut plerique PP. Benedictinorum codices. M.

³ Vind. Am. et Er., *dissimilia*.

(a) Vide Ciceronem, de Divinatione, lib. 1, cap. 49.

(b) Diogenes ille, non Cynicus, sed Apolloniates, de quo Cicero, lib. 1 de Natura deorum, cap. 12.

(c) Cicero, lib. 1 Academ. Quæst., cap. 4; Tuscul. Quæst. lib. 5, cap. 4.

tur industria : an vero, sicut de illo quidam benevolentius suspicantur¹, nolebat immundos terrenis cupiditatibus animos se extendere in divina conari². Quandoquidem ab eis causas rerum videbat inquiri, quas primas atque summās non nisi in unius ac summi Dei³ voluntate esse credebat : unde non eas putabat nisi mandata mente posse comprehendere ; et ideo purgandæ bonis moribus vitæ censebat instandum, ut deprimentibus libidinibus exoneratus animus naturali vigore in æterna se attolleret, naturamque incorporei et incommutabilis luminis, ubi causæ omnium facturarum naturarum stabiliter vivunt, intelligentiæ puritate conspiceret (a). Constat eum tamen imperitorum stultitiam scire se aliquid opinantium, etiam in ipsis moralibus quæstionibus, quo totum animum intendisse videbatur, vel confessa ignorantia sua, vel dissimulata scientia, lepore mirabili disserendi et acutissima urbanitate agitasse atque versasse. Unde et concitatis inimicitiiis calumniosa criminatione damnatus, morte mulctatus est. Sed eum postea illa ipsa, quæ publice damnaverat, Atheniensium civitas publice luxit, in duos accusatores ejus (b) usque adeo populi indignatione conversa, ut unus eorum oppressus vi multitudinis interiret, exilio autem voluntario atque perpetuo pœnam similem alter evaderet. Tam præclara igitur vitæ mortisque fama Socrates reliquit plurimos suæ philosophiæ sectatores, quorum certatim studium fuit in quæstionum moralium disceptatione versari, ubi agitur de summo bono, quo fieri homo beatus potest⁴. Quod in Socratis disputationibus, dum omnia movet, asserit, destruit, quoniam non evidenter apparuit ; quod cuique placuit, inde sumpserunt, et ubi cuique visum est, constituerunt finem boni. Finis autem boni appellatur, quo quisque cum pervenerit, beatus est. Sic autem diversas inter se Socratici de isto fine sententias habuerunt, ut (quod vix credibile est, unius magistri potuisse facere sectatores) quidam summum bonum esse dicerent voluptatem, sicut Aristippus ; quidam virtutem, sicut Antisthenes. Sic alii atque alii aliud atque aliud opinati sunt : quos commemorare longum est (c).

CAPUT IV. — De præcipuo inter Socratis discipulos Platone, qui omnem philosophiam tritici partitione distinxit.

Sed inter discipulos Socratis, non quidem immerito, excellentissima gloria claruit, qui⁵ omnino cæteros obscuraret, Plato. Qui cum esset Atheniensis, honesto apud suos loco natus, et ingenio mirabili longe suos condiscipulos anteiret ; parum tamen putans perficiendæ philosophiæ sufficere se ipsum ac Socra-

¹ Ms. 766, *suspiciatur*. M.

² Unus et alter Ms., *et conari*.

³ Editi, *unius veri ac summi Dei*. Abest, *veri*, a manuscriptis.

⁴ Er. et Lov., *sine quo fieri homo beatus non potest*. Editi alii, et manuscripti omittunt, *sine* ; et, *non*.

⁵ Manuscripti, *quæ*. Ex nostris Mss. 766 et 2053, *quæ* ; 2050 et 2052, *quæ*. M.

(a) Apud Platonem, in Phædone.

(b) Melitum et Anytum intelligit, quorum ille multatus morte, Anytus vero exulare coactus est. Plato in Apologia Socratis, et Laert. in Socrate.

(c) Vide Ciceronem, lib. 2 de Finibus.

ticam disciplinam, quam longe lateque potuit peregrinatus est, quaquaversum eum alicujus nobilitate scientiæ percipiendæ fama rapiebat. Itaque et in Ægypto didicit quæcumque illic magna habebantur atque docebantur, et inde in eas Italiæ partes veniens ubi Pythagoræorum fama celebrabatur, quidquid Italiæ philosophiæ tunc florebat, auditis eminentioribus in ea doctoribus facillime comprehendit. Et quia magistrum Socratem singulariter diligebat, eum loquentem fere in omnibus sermonibus suis faciens, etiam illa quæ vel ab aliis didicerat, vel ipse quanta potuerat intelligentia viderat, cum illius lepore et moralibus disputationibus temperavit. Itaque cum studium sapientiæ in actione et contemplatione versetur, unde una pars ejus activa, altera contemplativa dici potest ; quarum activa ad agendam vitam, id est, ad mores instituendos, pertinet, contemplativa autem ad conspiciendas naturæ causas et sincerissimam veritatem : Socrates in activa excelluisse memoratur ; Pythagoras vero magis contemplativæ, quibus potuit intelligentiæ viribus, instituisse (a). Proinde Plato utrumque jungendo philosophiam perfecisse laudatur, quam in tres partes distribuit : unam moralem, quæ maxime in actione versatur ; alteram naturalem, quæ contemplationi deputata est ; tertiam rationalem, qua verum determinatur a falso : quæ licet utrique, id est actioni et contemplationi, sit necessaria, maxime tamen contemplatio perspectionem sibi vindicat veritatem. Ideo hæc tripartitio non est contraria illi distinctioni, qua intelligitur omne studium sapientiæ in actione et contemplatione consistere. Quid autem in his vel de his singulis partibus Plato senserit, id est, ubi finem omnium actionum, ubi causam omnium naturarum, ubi lumen omnium rationum esse cognoverit vel crediderit, disserendo explicare et longum esse arbitrator, et temere affirmandum esse non arbitrator. Cum enim magistri sui Socratis, quem facit in suis voluminibus disputantem, notissimum morem dissimulandæ scientiæ vel opinionis suæ servare affectat, quia et illi ipse mos placuit, factum est ut etiam ipsius Platonis de rebus magnis sententiæ non facile perspicere possint. Ex his tamen quæ apud eum leguntur, sive quæ dixit¹, sive quæ ab aliis dicta esse narravit atque conscripsit, quæ sibi placita viderentur, quædam commemorari et huic operi inseri oportet a nobis, vel ubi suffragatur religioni veræ, quam fides nostra suscipit ac defendit, vel ubi ei videtur esse contrarius, quantum ad istam de uno Deo et pluribus pertinet quæstionem, propter vitam, quæ post mortem futura est, veraciter beatam². Fortassis enim qui Platonem cæteris philosophis gentium longe recteque prælatum acutius atque veracius intellexisse atque secuti esse fama celebrare laudantur, aliquid tale de Deo sentiunt, ut in illo inveniantur et causa subsistendi, et ratio intelligendi, et ordo vi-

¹ In B. ommissa verba, *sive quæ dixit*. M.

² Sic veteres libri. At impressi, *quantum ad istam de uno Deo et pluribus pertinet quæstionem, quem propter vitam, quæ post mortem futura est, veraciter beatam*. col. n. in un esse catholici religionis asserit disciplina. Fortassis, etc.

(a) Conf. lib. 1 de Cons. Evang. n. 12.

vendi : quorum trium, unam ad naturalem, alterum ad rationalem, tertium ad moralem partem intelligitur pertinere. Si enim homo ita creatus est, ut per id quod in eo præcellit, attingat illud, quod cuncta præcellit, id est, unum verum optimum Deum, sine quo nulla natura subsistit, nulla doctrina instruit, nullus usus expedit : ipse quærat, ubi nobis secunda sunt omnia ; ipse cernatur, ubi nobis certa sunt omnia ; ipse diligatur, ubi nobis recta sunt omnia.

CAPUT V. — *Quod de theologia cum Platonici potissimum disceptandum sit, quorum opinionum omnium philosophorum postponenda sint dogmata.*

Si ergo Plato Dei hujus imitorem, cognitorem, amatorem dixit esse sapientem, cujus participatione sit beatus, quid opus est excutere cæteros? Nulli nobis, quam isti, propius accesserunt (a). Cedat eis igitur non solum theologia illa fabulosa deorum criminibus oblectans animos impiorum; nec solum etiam illa civilis, ubi impuri dæmones terrestribus gaudiis deditos populos deorum nomine seducentes, humanos errores tanquam suos divinos honores habere voluerunt, ad spectandos suorum criminum ludos cultores suos tanquam ad suum cultum studiis immundissimis excitantes¹, et sibi delectabiliores ludos de ipsis spectatoribus exhibentes : ubi si qua velut honesta geruntur in templis, conjuncta sibi theatrorum obscenitate turpantur; et quæcumque turpia geruntur in theatris, comparata sibi templorum fœditate laudantur. Et ea quæ Varro ex his sacris, quasi ad cælum et terram rerumque mortalium semina et actus interpretatus est; quia nec ipsa illis ritibus significantur, quæ ipse insinuare conatur; et ideo veritas conantem non sequitur. et si ipsa essent, tamen animæ rationali ea, quæ infra illam naturali ordine constituta sunt, pro deo suo colenda non essent; nec sibi præferre debuit, tanquam deos, eas res, quibus ipsam prætulit verus Deus. Et ea, quæ Numa Pompilius revera ad sacra ejusmodi pertinentia secum sepeliendo curavit abscondi, et aratro eruta senatus jussit incendi. In eo genere sunt etiam illa, ut aliquid de Numa mitius suspicemur, quæ Alexander Macedo scribit ad matrem, sibi a magno antistite sacrorum Ægyptiorum quodam Leone patefacta (b) : ubi non Picus et Faunus et Æneas et Romulus, vel etiam Hercules et Æsculapius et Liber Semela² natus, et Tyndaridæ fratres, et si quos alios ex mortalibus pro diis habent, sed ipsi etiam majorum³ gentium dii, quos Cicero in Tusculanis tacitis nomi-

¹ Loco, *secura*, quidam Mss. habent, *diserta*. Colbertinus, *inserta*. Alii plerique, *certa* : quod verbum altero nihilominus locorepetunt post, *ipse cernatur*. Nullibi vero invenimus lectionem, quam veterum manuscriptorum esse dicit Ludovicus vives, scilicet : *ipse quærat, ubi nobis certa sunt omnia ; ipse cernatur, ubi nobis vera sunt omnia, etc.*

² Editi, *habere voluerunt ; ubi ad spectandos suorum criminum ludos, cultores suos tanquam suæ vanitatis administratores habuerunt : ubi per eos ad suum cultum studiis immundissimis alios excitantes, etc.* Castigantur ex veteribus libris.

³ Vind. Am. et Er., *maiores*. Melius Lov. et Mss., *majorum*. Nam ita Cicero in citato loco, lib. 4 Acad. Quæst.

(a) De Vera Relig., n. 7.

(b) Vid. infra, in fine hujus libri, et lib. 12, cap. 10, n. 2; item Cypriani, de Idolorum Vanitate.

nibus videtur attingere (*Lib. 1, cap. 13*), Jupiter, Juno, Saturnus, Vulcanus, Vesta, et alii plurimi, quos Varro conatur ad mundi partes sive elementa transferre, homines fuisse produntur. Timens enim et ille quasi revelata mysteria, petens admonet Alexandrum, ut cum ea matri conscripta insinuaverit, flammis jubet concremari. Non solum ergo ista, quæ duæ theologiæ, fabulosa continet et civilis, Platonici philosophis cedant, qui verum Deum, et rerum auctorem, et veritatis illustratorem, et beatitudinis largitorem esse dixerunt : sed alii quoque philosophi, qui corporalia naturæ principia corpori deditis mentibus opinati sunt, cedant his tantis et tanti Dei cognitioribus viris¹, ut Thales in humore, Anaximenes in aere, Stoici in igne, Epicurus in atomis, hoc est minutissimis corpusculis, quæ nec dividi nec sentiri queunt, et quicumque alii, quorum enumerationi immorari non est necesse, sive simplicia, sive conjuncta corpora, sive vita carentia, sive viventia, sed tamen corpora, causam principiumque rerum esse dixerunt. Nam quidam eorum a rebus non vivis res vivas fieri posse crediderunt, sicut Epicurei : quidam vero a vivente quidem et viventia et non viventia, sed tamen a corpore corpora. Nam Stoici ignem, id est corpus unum ex his quatuor elementis, quibus visibilis mundus hic constat, et viventem, et sapientem, et ipsius mundi fabricatorem atque omnium quæ in eo sunt, eumque omnino ignem deum esse putaverunt. Hi et cæteri similes eorum id solum cogitare potuerunt, quod cum eis corda eorum obstricta carnis sensibus fabulata sunt. In se quippe habebant quod non videbant, et apud se imaginabantur quod foris viderant, etiam quando non videbant, sed tantummodo cogitabant. Hoc autem in conspectu talis cogitationis jam non est corpus, sed similitudo corporis. Illud autem unde videtur in animo hæc similitudo corporis, nec corpus est, nec similitudo corporis; et unde videtur, atque utrum pulchra an deformis sit judicatur, profecto est melius quam ipsa quæ judicatur. Hæc mens hominis et² rationalis animæ natura est, quæ utique corpus non est; si jam illa corporis similitudo, cum in animo cogitantis aspicitur atque judicatur, nec ipsa corpus est. Non est ergo nec terra, nec aqua, nec aer, nec ignis : quibus quatuor corporibus, quæ dicuntur quatuor elementa, mundum corporeum videmus esse compactum. Porro si noster animus corpus non est, quomodo Deus creator animi corpus est? Cedant ergo et isti, ut dictum est Platonici : cedant et illi, quos quidem puduit dicere Deum corpus esse, verumtamen ejusdem naturæ, cujus ille est, animos nostros esse putaverunt. Ita non eos movit tanta mutabilitas animæ, quam Dei naturæ tribuere nefas est. Sed dicunt, Corpore mutatur animæ natura; nam per se ipsam incommutabilis est. Poterant isti dicere, Corpore aliquo vulneratur caro; nam per se ipsam invulnerabilis est. Prorsus quod mutari non potest, nulla re potest : ac per hoc quod corpore

¹ Vind. Am. et Er., *veris*.

² Editi, *et ipsa*. Abest, *ipsa*, a Mss.

mutari potest, aliqua re potest, et ideo incommutabile recte dici non potest.

CAPUT VI. — *De Platoniorum sensu in ea parte philosophiæ, quæ physica nominatur.*

Viderunt ergo isti philosophi, quos cæteris non immerito fama atque gloria prælatos videmus, nullum corpus esse Deum : et ideo cuncta corpora transcendunt quærentes Deum. Viderunt quidquid mutabile est, non esse summum Deum : et ideo omnem animam mutabilesque omnes spiritus transcendunt, quærentes summum Deum. Deinde viderunt omnem speciem in re quacumque mutabili, qua est quidquid illud est, quoquo modo et qualiscumque natura est, non esse posse nisi ab illo qui vere est, quia incommutabiliter est. Ac per hoc sive universi mundi corpus, figuras, qualitates, ordinatumque motum, et elementa disposita a cælo usque ad terram, et quæcumque corpora in eis sunt; sive omnem vitam, vel quæ nutrit et continet, qualis est in arboribus; vel quæ et hoc habet et sentit, qualis est in pecoribus; vel quæ et hæc habet et intelligit, qualis est in hominibus; vel quæ nutritorio subsidio non indiget, sed tantum continet, sentit, intelligit, qualis est in Angelis, nisi ab illo esse non posse qui simpliciter est : quia non aliud illi est esse, aliud vivere, quasi possit esse non vivens; nec aliud illi est vivere, aliud intelligere, quasi possit vivere non intelligens; nec aliud illi est intelligere, aliud beatum esse, quasi possit intelligere et non beatus esse; sed quod est illi vivere, intelligere, beatum esse, hoc est illi esse. Propter hanc incommutabilitatem et simplicitatem intellexerunt eam et omnia ista fecisse, et ipsum a nullo fieri potuisse. Consideraverunt enim, quidquid est, vel corpus esse, vel vitam; meliusque aliquid vitam esse, quam corpus; speciemque corporis esse sensibilem, intelligibilem vitæ. Proinde intelligibilem speciem sensibili prætulere. Sensibilia dicimus, quæ visâ tactuque corporis sentiri queunt: intelligibilia, quæ conspectu mentis intelligi possunt¹. Nulla est enim pulchritudo corporalis, sive in statu corporis, sicut est figura, sive in motu, sicut est cantilena, de qua non animus iudicet. Quod profecto non posset, nisi melior in illo esset hæc species, sine tumore molis, sine strepitu vocis, sine spatio vel loci vel temporis. Sed ibi quoque nisi mutabilis esset, non aliis alio melius de specie sensibili iudicaret: melius ingeniosior quam tardior, melius peritior quam imperitor, melius exercitior quam minus exercitatus, et idem ipse unus cum proficit, melius utique posteaquam prius. Quod autem recipit magis² et minus, sine dubitatione mutabile est. Unde ingeniosi et docti et in his exercitati homines facile collegerunt, non esse in eis rebus primam speciem, ubi mutabilis esse convincitur. Cum igitur in eorum conspectu et corpus et animus magis minusque speciosa essent, et si omni specie carere possent, omnino nulla essent, viderunt esse aliquid ubi prima esset et incommutabi-

lis (a), et ideo nec comparabilis: atque ibi esse rerum principium rectissime crediderunt, quod factum non esset, et ex quo facta cuncta essent. Ita quod notum est Dei, ipse manifestavit eis, cum ab eis invisibilia ejus, per ea quæ facta sunt intellecta conspecta sunt; sempiterna quoque virtus ejus et divinitas (*Rom.* 1, 19, 20): a quo etiam visibilia et temporalia cuncta creata sunt³. Hæc de illa parte quam physicam, id est naturalem, nuncupant, dicta sint.

CAPUT VII. — *Quanto excellentiores cæteris in logica, id est rationali philosophia, Platonici sint habendi.*

Quod autem attinet ad doctrinam, ubi altera pars versatur, quæ ab eis logica, id est rationalis, vocatur; absit ut his comparandi videantur, qui posuerunt iudicium veritatis in sensibus corporis, eorumque infidis et fallacibus regulis omnia quæ discuntur metienda esse censuerunt, ut Epicurei, et quicumque alii tales; ut etiam ipsi Stoici, qui cum vehementer amaverint solertiam disputandi, quam dialecticam nominant, a corporis sensibus eam ducendam putarunt; hinc asseverantes animum concipere notiones, quas appellant *θρόλας*, earum rerum scilicet quas definiendo explicant; hinc propagari atque connecti totam discendi docendique rationem. Ubi ego multum mirari soleo, cum pulchros dicant non esse nisi sapientes, quibus sensibus corporis istam pulchritudinem viderint, qualibus oculis carnis formam sapientiæ decusque conspexerint. Hi vero, quos merito cæteris anteponimus, discreverunt ea quæ mente conspiciuntur, ab iis quæ sensibus attinguntur; nec sensibus adimentes quod possunt, nec eis dantes ultra quam possunt. Lumen autem mentium esse dixerunt ad discenda omnia, eundem ipsum Deum a quo facta sunt omnia.

CAPUT VIII. — *Quod etiam in morali philosophia Platonici obtineant principatum.*

Reliqua est pars moralis, quam græco vocabulo dicunt *ἠθικόν*, ubi quæritur de summo bono, quo referentes omnia quæ agimus, et quod non propter aliud, sed propter se ipsum appetentes, idque adipiscentes, nihil quo beati simus, ulterius requiramus. Ideo quippe et finis est dictus, quia propter hunc cætera volumus, ipsum autem non nisi propter ipsum. Hoc ergo beatificum bonum alii a corpore, alii ab animo, alii ab utroque in homine esse dixerunt⁴. Videbant quippe ipsum hominem constare ex animo et corpore, et ideo ab alterutro istorum dūm, aut ab utroque bene sibi esse posse credebant, finali quodam bono, quo beati essent, quo cuncta quæ agebant referrent, atque id⁵ quo referendum esset non ultra quærerent. Unde illi qui dicuntur addidisse tertium genus honorum, quod appellatur extrinsecus, sicuti est honor,

¹ Manuscripti plures loco, *visibilia*, habent, *invisibilia*. Quidam vero utrumque sic: *a quo etiam invisibilia et visibilia cuncta creata sunt.* — Ms. 788, *invisibilia*. M.

² Codices 786, 2050, 2051 et 2055, *alibi ab utroque homini esse dixerunt.* M.

³ Sic in solis editis additum est, *cum forent adepti.*

(a) Supple, *species*.

¹ Nostri Mss., excepto 2052, omittunt verbum, *possunt*. M.

² Sic Mss. At editi, *magis*.

gloria, pecunia, et si quid hujusmodi, non sic addiderunt, ut finale esset, id est propter se ipsum appetendum, sed propter aliud; bonumque esset hoc genus bonis¹, malum autem malis. Ita bonum hominis, qui vel ab animo, vel a corpore, vel ab utroque expetiverunt, nihil aliud quam ab homine expetendum esse putaverunt. Sed qui id appetiverunt a corpore, a parte hominis deteriore; qui vero ab animo, a parte meliore; qui autem ab utroque, a toto homine. Sive ergo a parte qualibet, sive a toto, non nisi ab homine. Nec istæ differentiæ, quoniam tres sunt, ideo tres, sed multas dissensiones philosophorum sectasque fecerunt: quia et de bono corporis, et de bono animi, et de bono utriusque diversi diversa opinati sunt (a). Cedant igitur hi omnes illis philosophis, qui non dixerunt beatum esse hominem fruentem corpore, vel fruentem animo, sed fruentem Deo: non sicut corpore vel se ipso animus, aut sicut amico amicus, sed sicut luce oculus; si aliquid ab his ad illa similitudinis afferendum est², quod quale sit, si Deus ipse adjuverit, alio loco, quantum per nos fieri poterit, apparebit. [IX.] Nunc satis sit commemorare, Platonem determinasse finem boni esse, secundum virtutem vivere, et ei soli evenire posse, qui notitiam Dei habeat et imitationem; nec esse aliam ob causam beatum. Ideoque non dubitat hoc esse philosophari, amare Deum; cujus natura sit incorporalis. Unde utique colligitur, tunc fore beatum studiosum sapientiæ (id enim est philosophus), cum Deo frui cœperit. Quamvis enim non continuo beatus sit, qui eo fruitur quod amat; multi enim amando ea quæ amanda non sunt, miserii sunt, et miseriora eum fruuntur: nemo tamen beatus est, qui eo quod amat non fruitur. Nam et ipsi qui res non amandas amant, non se beatos amando putant, sed fruendo. Quisquis ergo fruatur eo quod amat, verumque et summum bonum amat, quis eum beatum nisi miserrimus negat? ipsum autem verum ac summum bonum Plato dicit Deum, unde vult esse philosophum amatorem Dei, ut, quoniam philosophia ad beatam vitam tendit fruens Deo sit beatus qui Deum amaverit.

CAPUT IX.—*De ea philosophia quæ ad veritatem fidei christianæ propius accessit.*

Quicumque igitur philosophi de Deo summo et vero ista senserunt, quod et rerum creaturarum sit effector, et lumen cognoscendarum, et bonum agendarum; quod ab illo nobis sit et principium naturæ, et veritas doctrinæ; et felicitas vitæ; sive Platonici accommodatus nuncupentur, sive quodlibet aliud sectæ suæ nomen imponant; sive tantummodo Ionici generis, qui in eis præcipui fuerunt, ista senserint, sicut idera Plato, et qui eum bene intellexerunt; sive etiam Italici, propter Pythagoram et Pythagoræos, et si qui forte alii ejusdem sententiæ identidem fuerunt; sive aliarum quoque gentium, qui sapientes vel philo-

¹ Sic Mss. At editi, *Sed propter aliud bonum, quo esset hoc genus bonum bonis, etc.*

² Editi, *ad illas similitudines afferendum est. Emendantur ex manuscriptis.*

(a) Vide in ra, lib. 19, cap. 2.

SANCT. AUGUST. VII.

sophi habiti sunt, Atlantici Libyci¹ Ægyptii, Indi, Persæ, Chaldæi, Scythæ, Galli, Hispani alique reperiuntur, qui hoc viderint ac docuerint, eos omnes cæteris anteponimus, eosque nobis propinquiores fatemur.

CAPUT X.—*Quæ sit inter philosophicas artes religiosi excellentia christiani.*

1. Quamvis enim homo christianus litteris tantum ecclesiasticis eruditus, Platoniorum forte nomen ignoret, nec utrum duo genera philosophorum exstiterint in græca lingua, Ionicorum et Italicorum, sciat; non tamen ita surdus est in rebus humanis, ut nesciat philosophos vel studium sapientiæ, vel ipsam sapientiam profiteri. Cavet eos tamen, qui secundum elementa hujus mundi philosophantur, non secundum Deum, a quo ipse factus est mundus. Admonetur enim præcepto apostolico, fideliterque audit quod dictum est: *Cavete ne quis vos decipiat per philosophiam et inanem seductionem, secundum elementa mundi (Coloss. ii, 8).* Deinde ne omnes tales esse arbitretur, audit ab eodem apostolo dici de quibusdam, *Quia quod notum est Dei, manifestum est in illis: Deus enim illis manifestavit. Invisibilia enim ejus, a constitutione mundi, per ea quæ facta sunt, intellecta conspiciuntur; sempiterna quoque virtus ejus et divinitas (Rom. i, 19, 20).* Et ubi Atheniensibus loquens, cum rem magnam de Deo dixisset, et quæ a paucis possit intelligi, quod in illo vivimus, movemur et sumus; adjecit et ait, *Sicut et vestri quidam dixerunt (Act. xvii, 28).* Novit sane etiam ipsos, in quibus errant, cavere. Ubi enim dictum est quod per ea quæ facta sunt, Deus illis manifestavit intellectu conspicienda invisibilia sua; ibi etiam dictum est, non illos ipsum Deum recte coluisse, quia et aliis rebus, quibus non oportebat, divinos honores illi uni tantum debitos detulerunt: *Quoniam cognoscentes Deum, non sicut Deum glorificaverunt, aut gratias egerunt; sed evanuerunt in cogitationibus suis, et obscuratum est insipiens cor eorum. Dicentes enim se esse sapientes stulti facti sunt, et immutaverunt gloriam incorruptibilis Dei in similitudinem imaginis corruptibilis hominis et volucrum, et quadrupedum, et serpentium (Rom. i, 21-23).* Ubi et Romanos, et Græcos, et Ægyptios, qui de sapientiæ nomine gloriati sunt, fecit intelligi. Sed de hoc cum istis postmodum disputabimus. In quo autem nobis consentiunt de uno Deo hujus universitatis auctore, qui non solum super omnia corpora est incorporeus, verum etiam super omnes animas incorruptibilis, principium nostrum, lumen nostrum, bonum nostrum, in hoc eos cæteris anteponimus.

2. [X.] Nec, si litteras eorum christianus ignorans, verbis quæ non didicit in disputatione non utitur, ut vel naturalem latine, vel physicam græce

¹ Plerique manuscripti, *Libyæ*. Pauci cum editis, *Libyci*. Hos Leonardum Coquæum secuti minime distinguimus ab Atlanticis, quos ille observat dictos Lybicos, quod, ut Laertius tradit, Lybicus fuisse Atlas rex ille Mauritanie, qui cursum solis, lunæ ac siderum primus investigasse dicitur.

(Huit.)

appellet eam partem in qua de inquisitione naturæ tractatur, et rationalem sive logicam, in qua quaeritur quonam modo veritas percipi possit, et moralem vel ethicam, in qua de moribus agitur bonorumque finibus appetendis malorumque vitandis, ideo nescit ab uno vero Deo atque optimo, et naturam nobis esse, qua facti ad ejus imaginem sumus, et doctrinam, qua eum nosque noverimus, et gratiam, qua illi cohærendo beati simus. Hæc itaque causa est cur istos cæteris præferamus; quia cum alii philosophi ingenia sua studiaque contriverint inquirendis rerum causis, et quinam esset modus discendi atque vivendi; isti Deo cognito reppererunt ubi esset causa constitutæ universitatis, et lux percipiendæ veritatis, et fons bibendæ felicitatis. Sive ergo isti Platonici, sive quicumque alii quarumlibet gentium philosophi de Deo ista sentiunt, nobiscum sentiunt. Sed ideo cum Platonici magis placuit hanc causam agere, quia eorum sunt litteræ notiores. Nam et Græci, quorum lingua in gentibus præeminet, eas magna prædicatione celebrarunt; et Latini per moti earum vel excellentia, vel gloria¹, ipsas libentius didicerunt, atque in nostrum eloquium transferendo nobiliores clarioresque fecerunt.

CAPUT XI. — *Unde Plato eam intelligentiam potuerit acquirere, qua christianæ scientiæ propinquavit.*

Mirantur autem quidam nobis in Christi gratia sociati, cum audiunt vel legunt Platonem de Deo ista sensisse, quæ multum congruere veritati nostræ religionis agnoscunt. Unde nonnulli putaverunt eum, quando perrexit in Ægyptum, Jeremiam audisse prophetam, vel Scripturas propheticas in eadem peregrinatione legisse: quorum quidem opinionem in quibusdam libris meis posui (a). Sed diligenter supputata temporum ratio, quæ chronica historia continetur, Platonem indicat a tempore quo prophetavit Jeremias, centum ferme annos postea natum fuisse (b): qui cum octoginta et unum vixisset, ab anno mortis ejus usque ad id tempus, quo Ptolemæus rex Ægypti Scripturas propheticas gentis Hebræorum de Judæa poposcit, et per septuaginta viros Hebræos, qui etiam græcam linguam noverant, interpretandas habendasque curavit, anni ferme reperiuntur sexaginta (c). Quapropter in illa peregrinatione sua Plato nec Jeremiam videre potuit tanto ante defunctum, nec easdem Scripturas legere, quæ nondum fuerant in græcam linguam translatae, qua ille pollebat: nisi forte, quia fuit acerrimi studii, sicut Ægyptias, ita et istas per interpretem didicit, non ut scribendo transferret, quod Ptolemæus pro ingenti beneficio, qui regia potestate etiam timeri poterat, meruisse per-

¹ Tres editiones, Vind. Am. Er. addunt, *vel gratia*.

(a) Libro scilicet de Doctrina Christiana secundo, n. 43. Vide lib. 2 Retract., cap. 4, n. 2.

(b) Eusebius in Chronico vaticinium Jeremiæ ad Olympiadem 37 et 38 refert: Platonis autem ortum ad Olympiadis 83 annum quartum. Est igitur ille elapsis a Jeremiæ vaticinio plus centum et septuaginta annis natus.

(c) Obiit Plato anno primo Olympiadis 109. Ptolemæus autem Philadelphus sacras Litteras ex hebræo in Græcum vertendas curavit Olympiade 124.

hibetur, sed ut colloquendo, quid continerent, quantum capere posset, addisceret (a). Hoc ut existimetur, illa suadere videntur indicia, quod liber Geneseos sic incipit: *In principio fecit Deus cælum et terram. Terra autem erat invisibilis et incomposita, et tenebræ erant super abyssum, et Spiritus Dei superferebatur super aquam* (Gen. 1, 1, 2). In Timæo autem Plato, quem librum de mundi constitutione conscripsit, Deum dicit in illo opere terram primo ignemque junxisse (Cap. 5 transl. Cicer.): manifestum est autem quod igni tribuat cæli locum¹: habet ergo hæc sententia quamdam illius similitudinem, qua dictum est, *In principio fecit Deus cælum et terram*. Deinde illa duo media, quibus interpositis sibimet hæc extrema coparentur, aquam dicit et aerem (*Ibidem*): unde putatur sic intellexisse quod scriptum est, *Spiritus Dei superferebatur super aquam*. Parum quippe attendens quo more soleat illa Scriptura appellare Spiritum Dei, quoniam et aer spiritus dicitur, quatuor opinatus elementa loco illo commemorata videri potest. Deinde quod Plato dicit amatorem Dei esse philosophum, nihil sic in illis sacris Litteris flagrat: et maxime illud, quod et me plurimum adducit, ut pene assentiar Platonem illorum Librorum expertem non fuisse, quod cum ad sanctum Moysen ita verba Dei per angelum perferantur, ut quaerenti quod sit nomen ejus, qui eum pergere præcipiebat ad populum Hebræum ex Ægypto liberandum, respondeatur, *Ego sum qui sum; et dices filiis Israel, Qui est, misit me ad vos* (Exod. III, 14); tanquam in ejus comparatione qui vere est quia incommutabilis est, ea quæ mutabilia facta sunt non sint: vehementer hoc Plato tenuit, et diligentissime commendavit (b). Et nescio utrum hoc uspiam reperiat in libris eorum qui ante Platonem fuerunt, nisi ubi dictum est, *Ego sum qui sum; et dices eis, Qui est, misit me ad vos*.

CAPUT XII. — *Quod etiam Platonici, licet de uno vero Deo bene senserint, multis tamen diis sacra facienda censuerint.*

Sed undecumque ille ista didicerit, sive præcedentibus eum veterum libris, sive potius quomodo dicit Apostolus, *quia quod notum est Dei, manifestum est in illis; Deus enim illis manifestavit: invisibilia enim ejus, a constitutione mundi, per ea quæ facta sunt, intellecta conspiciuntur; sempiterna quoque ejus virtus et divinitas* (Rom. 1, 19, 20): nunc non immerito me Platonicos philosophos elegisse eum quibus agam, quod in ista quæstione, quam modo suscepimus, agitur de naturali theologia, utrum propter felicitatem, quæ post

¹ Hic apud Lov. additur, *terræ vero ipsam terram*; quod abest a cæteris editis et Mss.

(a) Platonem ex sacris Hebræorum libris hausisse et transcripsisse quam plurima, affirmant Justinus martyr. in Orat. parænetica ad Gentes; Origen., contra Celsum, lib. 6; Clemens Alexand. lib. 4 Stromatum, cap. 22, § 150, et Oratione exhortatoria ad Gentes, lib. 2, cap. 1; Eusebius, lib. 11 de Præparatione evangelica, cap. 9; Ambrosius, serm. 18 in Psal. 118. At contra Lactantius, lib. 4 de vera Sapientia, cap. 2, ipsum dicit indagandæ veritatis amore peregrinantem ad Judæos non accessisse.

(b) Præsertim in Parmenid. et Sophist. dialog.

mortem futura est, uni Deo, an pluribus sacra facere oporteat ¹, satis, ut existimo, exposui. [XII.] Ideo quippe hos potissimum elegi, quoniam de uno Deo, qui fecit cælum et terram, quanto melius senserunt, tanto cæteris gloriosiores et illustriores habentur: in tantum aliis prælati iudicio posteroræ, ut cum Aristoteles, Platonis discipulus, vir excellentis ingenii, et eloquio Platoni quidem impar, sed multos facile superans, sectam Peripateticam condidisset, quod deambulans disputare consueverat, plurimosque discipulos præclara fama excellens, vivo adhuc præceptore in suam hæresim congregasset, post mortem vero Platonis Speusippus ², sororis ejus filius, et Xenocrates, dilectus ejus discipulus, in scholam ejus, quæ Academia vocabatur, eidem successissent, atque ob hoc et ipsi et eorum successores Academici appellarentur; recentiores tamen philosophi nobilissimi, quibus Plato sectandus placuit, noluerint se dici Peripateticos, aut Academicos, sed Platonicos (a). Ex quibus sunt valde nobilitati Græci, Plotinus, Iamblichus, Porphyrius: in utraque autem lingua, id est et græca et latina, Apuleius Afer existit Platonicus nobilis. Sed hi omnes, et cæteri ejusmodi, et ipse Plato, diis plurimis esse sacra faciendâ putaverunt.

CAPUT XIII. — *De sententia Platonis, qua definiit deos non esse nisi bonos amicosque virtutum.*

Quamquam ergo a nobis et in aliis multis rebus magnisque dissentiant, in hoc tamen modo posui, quia neque parva res est, et inde nunc quæstio est, primum ab eis quæro, quibus diis istum cultum exhibendum arbitrentur, utrum bonis, an malis, an et bonis et malis. Sed habemus sententiam Platonis, dicentis omnes deos bonos esse, nec esse omnino ullum deorum malum (*Lib. 10 de Legibus, et de Republica, lib. 2*). Consequens est igitur, ut bonis hæc exhibenda intelligantur: tunc enim diis exhibentur; quoniam nec dii erunt, si boni non erunt. Hoc si ita est, (nam de diis quid aliud decet credere?) illa profecto vacuatur opinio, qua nonnulli putant deos malos sacris placandos esse, ne lædant; bonos autem, ut adjuvent, invocandos (b). Mali enim nulli sunt dii: bonis porro debitus, ut dicunt, honor sacrorum est deferendus. Qui sunt ergo illi qui ludos scenicos amant, eosque divinis rebus adjungi et suis honoribus flagitant exhiberi? quorum vis non eos indicat nullos, sed iste affectus nimirum indicat malos. Quid enim de ludis scenicis Plato senserit, notum est; cum poetas ipsos, quod tam indigna deorum majestate atque bonitate ³ carmina composuerint, censet civitate pellendus (c). Qui sunt igitur istii dii, qui de scenicis ludis cum ipso Platone contendunt? Ille quippe non pa-

titur deos falsis criminibus infamari: isti eisdem criminibus suos honores celebrari jubent. Denique isti cum eosdem ludos instaurari præciperent, poscentes turpia, etiam maligna gesserunt, Tito Latinio auferentes filium, et immittentes morbum, quod eorum abnuisset imperium, eumque morbum retrahentes, cum jussa complisset (a): iste autem illos nec tam malos timendos putat, sed suæ sententiæ robur constantissime retinens, omnes poetarum sacrilegas nugas, quibus illi immunditiæ societate ⁴ oblectantur, a populo bene instituto remove non dubitat. Ilunc autem Platonem, quod jam in secundo libro commemoravi (*Cap. 14*), inter semideos Labeo ponit. Qui Labeo numina mala victimis cruentis atque hujusmodi supplicationibus placari existimat, bona vero ludis, et talibus quasi ad lætitiâ pertinentibus rebus. Quid est ergo quod semideus Plato non semideis, sed deis, et hoc bonis, illa oblectamenta, quia judicat turpia, tam constanter audent auferre? Qui sane dii refellunt sententiam Labeonis: nam se in Latinio non lascivos tantum atque ludibundos, sed etiam sævos terribilesque monstrarunt. Exponant ergo nobis ista Platonici ⁵, qui omnes deos secundum auctoris sui sententiam bonos et honestos et virtutibus sapientium esse socios arbitrantur, aliterque de ullo deorum sentiri nefas habent. Exponimus, inquit. Attente igitur audiamus.

CAPUT XIV. — *De opinione eorum qui rationales animas trium generum esse dixerunt, id est, in diis cælestibus, in dæmonibus aeris, et in hominibus terrenis.*

1. Omnium inquit, animalium, in quibus est anima rationalis, tripartita divisio est, in deos, homines, dæmones. Dii excelsissimum locum tenent, homines infimum, dæmones medium. Nam deorum sedes in cælo est, hominum in terra, in aere dæmonum. Sicut eis diversa dignitas est locorum, ita etiam naturarum. Proinde dii sunt hominibus dæmonibusque potiores; homines vero infra deos et dæmones constituti sunt, ut elementorum ordine, sic differentia meritorum. Dæmones igitur medii, quemadmodum diis, quibus inferius habitant, postponendi, ita hominibus, quibus superius, præferendi sunt. Habent enim cum diis communem immortalitatem corporum, animorum autem cum hominibus passiones (b). Quapropter non est mirum, inquit, si etiam ludorum obscenitatibus et poetarum figmentis delectantur; quandoquidem humanis capiunt affectibus, a quibus dii longe absunt et modis omnibus alieni sunt. Ex quo colligitur, Platonem poetica detestando et prohibendo figmenta, non deos, qui omnes boni et excelsi sunt, privasse ludorum scenicorum voluptate, sed dæmones.

2. Hæc si ita sunt, quæ licet apud alios quoque reperiantur, Apuleius tamen Platonicus Madaurensis

¹ In editis post verbum, *oporteat*, inserta hæc fuerunt: *nam utrum unus Deus, an plures propter hujus vitæ sint bona colendi*. Sed his verbis carent veteres libri.

² Plures et probæ notæ manuscripti, *Xeusippus*.

³ Aliquot Mss., *atque benignitate*.

(a) Conf. Euseb. lib. 14 præpar. evang., capp. 4, 5.

(b) Porphyrii. lib. 2 de Abstinentiâ animatorum, capp. 30, 40.

(c) Supra, lib. 2, cap. 14.

⁴ Sic Mss. At editi, *per immunditiæ societatem*.

⁵ Sic nostri Mss. in B., *Exponunt ista nobis Platonici*. M.

(a) Supra, lib. 4, cap. 26.

(b) Plato in Epinomide.

de hac re sola unum scripsit librum, cujus titulum esse voluit, De deo Socratis : ubi disserit et exponit, ex quo genere numinum Socrates¹ habebat adjunctum et amicitia quadam conciliatum, a quo perhibetur solitus admoneri, ut desisteret ab agendo, quando id quod agere volebat, non prospere fuerat eventurum. Dicit enim apertissime, et copiosissime asserit, non illum Deum fuisse, sed dæmonem, diligenti disputatione pertractans istam Platonis de deorum sublimitate et hominum humilitate et dæmonum medietate sententiam. Hæc ergo si ita sunt, quoniam modo ausus est Plato, etiamsi non diis, quos ab omni humana contagione semovit, certe ipsis dæmonibus, poetas urbe pellendo, auferre theatricas voluptates, nisi quia hoc pacto admonuit animum humanum, quamvis adhuc in his moribundis membris positum, pro splendore honestatis impura dæmonum jussa contemnere, eorumque immunditiam detestari? nam si Plato hæc honestissime arguit et prohibuit, profecto dæmones turpissime poposcerunt atque jusserunt. Aut ergo fallitur Apuleius, et non ex isto genere numinum habuit amicum Socrates; aut contraria inter se sentit Plato, modo dæmones honorando, modo eorum delicias a civitate bene morata removendo; aut non est Socrati amicitia dæmonis gratulanda, de qua usque adeo et ipse Apuleius erubuit, ut De deo Socratis prænotaret librum, quem secundum suam disputationem, qua deos a dæmonibus tam diligenter copioseque discernit, non appellare De deo, sed De dæmone Socratis debuit. Maluit autem hoc in ipsa disputatione, quam in titulo libri ponere. Ita enim per sanam doctrinam, quæ humanis rebus illuxit, omnes vel pene omnes dæmonum nomen exhorrent, ut quisquis ante disputationem Apuleii, qua dæmonum dignitas commendatur, titulum libri, De dæmone Socratis legeret, nequaquam illum hominem sanum fuisse sentiret. Quid autem etiam ipse Apuleius, quod in dæmonibus laudaret, invenit, præter subtilitatem et firmitatem corporum, et habitationis alio-rem locum? nam de moribus eorum, cum de omnibus generaliter loqueretur, non solum nihil boni dixit, sed etiam plurimum mali. Denique lecto illo libro prorsus nemo miratur eos etiam scenicam turpitudinem in rebus divinis habere voluisse, et, cum deos se putari velint, deorum criminibus oblectari potuisse, et quidquid in eorum sacris obscena solemnitate seu turpi crudelitate vel ridetur, vel horretur, eorum affectibus convenire.

CAPUT XV. — *Quod neque propter aëria corpora, neque propter superiora habitacula dæmones hominibus antecellant.*

1. Quamobrem absit ut ista considerans animus veraciter religiosus et vero Deo subditus, ideo arbitretur dæmones se ipso esse meliores, quod habeant corpora meliora (a). Alioquin multas sibi et bestias

¹ Editi, ex quo genere numinum num. n sibi Socrates. Absit, munus sibi, a Mss.

(a) Corpora dæmonibus concedit Origenes, lib. 2 Periarchon, cap. 8; Tertullianus, lib. de Carne Christi, alique veterum plures: nec denegat hic Augustinus, qui eosdem

prælaturus est, quæ nos et acrimonia sensuum, et motu facilissimo atque celerrimo, et valentia virium, et annosissima firmitate corporum vincunt. Quis hominum videndo æquabitur aquilis et vulturibus? quis odorando canibus? quis velocitate leporibus, cervis, avibus omnibus? quis multum valendo leonibus et elephantis? quis diu vivendo serpentibus, qui etiam deposita tunica senectutem deponere, atque in juventam redire perhibentur? Sed sicut his omnibus ratio- cinando et intelligendo meliores sumus, ita etiam dæmonibus bene atque honeste vivendo meliores esse debemus. Ob hoc enim et providentia divina eis, quibus nos constat esse potiores, data sunt quædam potiora corporum munera, ut illud quo eis præponitur, etiam isto modo nobis commendaretur multo majore cura excolendum esse, quam corpus; ipsamque excellentiam corporalem, quam dæmones habere nossemus, præ bonitate vitæ, qua illis anteponitur, contemnere disceremus, habituri et nos immortalitatem corporum, non quam suppliciorum æternitas torqueat, sed quam puritas præcedat animorum.

2. Jam vero de loci altitudine, quod dæmones in aëre, nos autem habitamus in terra, ita permoveri, ut hinc eos nobis esse præponendos existimemus, omnino ridiculum est. Hoc enim pacto nobis et omnia volatilia præponimus. At enim volatilia, cum volando fatigantur, vel reficiendum alimentis corpus habent, terram repetunt, vel ad requiem, vel ad pastum; quod dæmones, inquit, non faciunt (a). Numquid ergo placet eis, ut volatilia nobis, dæmones autem etiam volatilibus antecellant? Quod si dementsimum est opinari, nihil est quod de habitatione superioris elementi dignos esse dæmones existimemus, quibus nos religionis affectu subdere debeamus. Sicut enim fieri potuit ut aeriæ volucres terrestribus nobis non solum non præferantur, verum etiam subjiciantur propter rationalis animæ, quæ in nobis est, dignitatem; ita fieri potuit ut dæmones, quamvis magis aërii sint, terrestribus nobis non ideo meliores sint, quia est aer quam terra superior; sed ideo eis homines præferendi sint, quoniam spei piorum hominum nequaquam illorum despectio comparanda est. Nam et illa ratio Platonis, qua elementa quatuor proportionem contexit atque ordinat, ita duobus extremis, igni mobilissimo et terræ immobili, media duo, aërem et aquam, interserens, ut quanto aer est aquis et aëre ignis, tanto et aquæ superiores sint terris; satis nos admonet animalium merita non pro elementorum gradibus ætimare. Et ipse quippe Apuleius cum cæteris terrestris animalium hominem dicit (*De deo Socratis*) qui tamen longe præponitur animalibus aquatilibus, cum ipsas aquas terris præponat Plato: ut intelligamus¹ non eundem ordinem tenendum, cum agitur de meritis animarum, qui videtur esse ordo in gradibus corpo-

¹ Nostri Mss., ut intelligant. M.

animalia aëria et ætheria vocat, lib. 1 contra Academicos, n. 20; epist. 9, n. 5; et lib. 3 de Genesi ad Litt., cap. 10, nn. 14, 15, quoniam, uti postremo loco dicit, corporum aëriorum natura vigent.

(a) Apuleii hæc est exceptio in libro De deo Socratis.

rum; sed fieri posse ut inferius corpus anima melior inhabitet, deteriorque superius.

CAPUT XVI. — *Quid de moribus atque actionibus dæmonum Apuleius Platonius senserit.*

De moribus ergo dæmonum cum idem Platonius loqueretur, dixit eos eisdem quibus homines animi perturbationibus agitari, irritari injuriis, obsequiis donisque placari, gaudere honoribus, diversis sacrorum ritibus oblectari, et in eis si quid neglectum fuerit, commoveri (*De deo Socratis*). Inter cætera etiam dicit, ad eos pertinere divinationes augurum, aruspicum, vatium, atque somniorum: ab his quoque esse miracula magorum (*Ibid.*). Breviter autem eos definiens ait, dæmones esse genere animalia, animo passiva, mente rationalia, corpore acria, tempore æterna: horum vero quinque tria priora illis esse (a) quæ nobis, quartum proprium, quintum eos cum diis habere commune (*Ibid.*). Sed video trium superiorum quæ nobiscum habent, duo etiam cum diis habere. Animalia quippe esse dicit et deos, qui¹ sua cuique elementa distribuens, in terrestribus animalibus nos posuit cum cæteris quæ in terra vivunt et sentiunt, in aquatilibus pisces et alia natantia, in acris dæmones, in ætheriis deos (*Ibid.*). Ac per hoc, quod dæmones genere sunt animalia, non solum eis cum hominibus, verum etiam cum diis pecoribusque commune est: quod mente rationalia, cum diis et hominibus; quod tempore æterna, cum diis solis; quod animo passiva, cum hominibus solis; quod corpore acria, ipsi sunt soli. Proinde quod genere sunt animalia, non est magnum; quia hoc sunt et pecora: quod mente rationalia, non est supra nos; quia sumus et nos: quod tempore æterna, quid boni est, si non beata? Melior est enim temporalis felicitas, quam misera æternitas. Quod animo passiva, quomodo supra nos est; quando et nos hoc sumus, nec ita esset, nisi miseri essemus? Quod corpore acria, quanti æstimandum est, cum omni corpori præferatur animæ qualiscumque natura²; et ideo religionis cultus, qui debetur ex animo, nequaquam debeatur ei rei, quæ inferior est animo? Porro si inter illa, quæ dæmonum esse dicit, annumeraret virtutem, sapientiam, felicitatem, et hæc eos diceret habere cum diis æterna atque communia, profecto aliquid diceret exoptandum magnique pendendum: nec sic eos tamen propter hæc tanquam Deum colere deberemus, sed potius ipsum, a quo hæc illos accepisse nossemus. Quanto minus nunc honore divino acria digna sunt animalia, ad hoc rationalia, ut misera esse possint, ad hoc passiva, ut misera sint, ad hoc æterna, ut miseriam finire non possint?

CAPUT XVII. — *An dignum sit eos spiritus ab homine coli, a quorum vitiiis eum oporteat liberari.*

1. Quapropter, ut omittam cætera, et hoc solum

¹ Sic Er. et aliquot Mss. Alii quidam cum Vind. et Am. omittunt, qui. Cujus loci nonnulli, quæ: et postea pro, elementa, habent, elemento: quam lectionem immerito prætulerunt Lovanienses.

² Sola editio Er., omni corpori præferatur animæ qualiscumque natura. — Cod. 2050, omni acri præferatur animæ qualiscumque natura. M.

(a) Supple, eudem.

pertractem, quod nobiscum dæmones dixit habere commune, id est animi passiones, si omnia quatuor elementa suis animalibus plena sunt, immortalibus ignis et aer, mortalibus aqua et terra; quæro cur animi dæmonum passionum turbellis et tempestatibus agitentur? Perturbatio est enim, quæ græce πάθος dicitur: unde illa voluit vocare animo passiva; quia verbum, de verbo πάθος, passio diceretur¹ motus animi contra rationem (a). Cur ergo sunt ista in animis dæmonum, quæ in pecoribus non sunt? Quoniam, si quid in pecore simile apparet, non est perturbatio; quia non est contra rationem, qua pecora carent. In hominibus autem ut sint istæ perturbationes, facit hoc stultitia, vel miseria. Nondum enim sumus in illa perfectione sapientiæ beati, quæ nobis ab hac mortalitate liberatis in fine promittitur. Deos vero ideo dicunt istas perturbationes non perpeti, quia non solum æterni, verum etiam beati sunt. Easdem quippe animas rationales etiam ipsos habere perhibent, sed ab omni labe ac peste purissimas. Quamobrem si propterea dii non perturbantur, quod animalia sunt beata, non misera; et propterea pecora non perturbantur, quod animalia sunt, quæ nec beata possunt esse, nec misera: restat ut dæmones sicut homines ideo perturbentur, quod animalia sunt non beata, sed misera.

2. [XVII.] Qua igitur insipientia, vel potius amentia per aliquam religionem dæmonibus subdimur, cum per veram religionem ab ea vitiositate, qua illis sumus similes, liberemur? Cum enim dæmones, quod et iste Apuleius, quamvis eis plurimum parcat, et divinis honoribus dignos censeat, tamen cogitur confiteri, ira instigentur; nobis vera religio præcipit, ne ira instigemur, sed ei potius resistamus. Cum dæmones donis invitentur, nobis vera religio præcipit, ne cuiquam donorum acceptione faveamus. Cum dæmones honoribus mulceantur, nobis vera religio præcipit, ut talibus nullo modo moveamur. Cum dæmones quorundam hominum osiores, quorundam amatores sint, non prudenti tranquilloque judicio, sed animo, ut appellat ipse, passivo; nobis vera religio præcipit, ut inimicos nostros etiam diligamus (*Mauth. v. 44*). Postremo omnem motum cordis et salum mentis, omnesque turbellas et tempestates animi, quibus dæmones æstuarè atque fluctuarè asserit, nos vera religio deponere jubet. Quæ igitur causa est, nisi stultitia errorque miserabilis², ut ei te facias venerando humilem, cui te cupias vivendò dissimilem; et religione colas, quem imitari nolis, cum religionis summa sit imitari quem colis?

CAPUT XVIII. — *Qualis religio sit, in qua docetur quod homines, ut commendentur diis bonis, dæmonibus uti debeant advocatis.*

Frustra igitur eis Apuleus, et quicumque ita sen-

¹ Codex 2050 sic legit hunc locum: quia verbum de verbo pathos passio dicitur, sed melius perturbatio dicitur, etc. M.

² Plures Mss., mirabilis.

(a) Cicero in lib. 4 Tuscul. Quæst., cap. 6: Est, ait, 7onnis hæc definitio, ut perturbatio sit, quod pathos ille dicit, aversa a recta ratione contra naturam animi commotio.

tiunt, hunc detulit honorem, sic eos in aere medios, inter aetherium caelum terramque constituens, ut, quoniam nullus deus miscetur homini (*Verba Apuleii*), quod Platonem dixisse perhibent, isti ad deos perferant preces hominum, et inde ad homines impetrata quæ poscunt. Indignum enim putaverunt qui ista crediderunt, misceri homines diis et deos hominibus: dignum autem misceri dæmones et diis et hominibus, hinc petita qui allegent; inde concessa qui apportent: ut videlicet homo castus, et ab artium magicarum sceleribus alienus, eos patronos adhibeat, per quos illum dii exaudiant, qui hæc amant, quæ ille non amando sit dignior quem facilius et libentius exaudire debeant. Amant quippe illi scenicas turpitudines, quas non amat pudicitia: amant in maleficiis magorum mille nocendi artes (*Virgil., Æneid. lib. 7, vers. 358*), quas non amat innocentia. Ergo et pudicitia et innocentia, si quid ab diis impetrare voluerit, non poterit suis meritis, nisi suis intervenientibus inimicis. Non est quod iste poetica figmenta, et theatrica ludibria justificare conetur. Habemus contra ista magistrum eorum et tantæ apud eos auctoritatis Platonem: si pudor humanus ita de se male meretur, ut non solum diligat turpia, verum etiam divinitati existimet grata.

CAPUT XIX. — *De impietate artis magicæ, quæ patrociniis mittitur spirituum malignorum.*

Porto adversus magicas artes, de quibus quosdam nimis infelices et nimis impios etiam gloriari libet, nonne ipsam publicam lucem¹ testem citabo? Cur enim tam graviter ista plectuntur severitate legum, si opera sunt numinum colendorum? An forte istas leges Christiani instituerunt, quibus artes magicæ puniuntur? Secundum quem alium sensum, nisi quod hæc maleficia generi humano perniciosâ esse non dubium est, ait poeta clarissimus,

Testor, chara, deos, et te, germana, tumque
Dulce caput, magicas invitam accingier artes?
(*Virgil., Æneid. lib. 4, vers. 492, 493.*)

Illud etiam, quod alio loco de his artibus dicit,

Atque satas alio vidi traducere messes;
(*Eclog. 8, vers. 99.*)

eo quod hac pestifera scelerataque doctrina fructus alieni in alias terras transferri perhibentur: nonne in duodecim Tabulis, id est Romanorum antiquissimis legibus, Cicero commemorat esse conscriptum, ei qui hoc fecerit supplicium constitutum (a)? Postremo ipse Apuleius numquid apud iudices christianos de magicis artibus accusatus est (b)? Quas utique sibi objectas, si divinas et piâs esse noverat; et divinarum potestatum operibus congruas, non solum eas confiteri debuit, sed etiam profiteri, leges cul-

¹ Sic mss. At editi, *gloriari libet in nomine demonum, ipsam publicam lucem, etc.*

(a) In duodecim Tabularum fragmentis est, *Qui fruges excantavit. Qui malum carmen incantavit... neu alienam segetem pelexerit*. Has leges memorat Plinius, lib. 28. Historiæ naturalis, cap. 2; Seneca, lib. 4 Quæstionum naturalium, cap. 7; Apuleius in Apologia, et alii.

(b) De magia postulatus fuit Apuleius apud Claudium Africæ præfectum minime christianum. Vid. Epist. Marc. l. lmi et August. 136, n. 1, et 138, nn. 18, 19.

pans potius, quibus hæc prohiberentur et damnanda putarentur, quæ haberi miranda et veneranda oporteret. Ita enim vel sententiam suam persuaderet iudicibus, vel, si illi secundum iniquas leges saperent, eumque talia prædicantem atque laudantem morte mulctarent, digna animæ illius dæmones dona rependerent, pro quorum divinis operibus prædicandis humanam vitam sibi adimi non timeret. Sicut martyres nostri, cum eis pro crimine objiceretur christiana religio, qua noverant se fieri salvos et gloriosissimos in æternum, non eam negando temporales pœnas evadere delegerunt; sed potius confitendo, profitendo, prædicando, et pro hac omnia fideliter fortiterque tolerando, et cum pia securitate moriendo, leges quibus prohibebatur, erubescere compulerunt, mutarique fecerunt. Hujus autem philosophi Platonicæ copiosissima et disertissima exstat oratio, qua crimen artium magicarum a se alienum esse defendit, seque aliter non vult innocentem videri, nisi ea negando quæ non possunt ab innocente committi. At omnia miracula magorum, quos recte sentit esse damnandos, doctrinis fiunt et operibus dæmonum; quos viderit cur censeat honorandos, necessarios eos asserens perferendis ad deos nostris precibus, quorum debemus opera devitare, si ad Deum verum preces nostras volumus pervenire. Deinde quæro, quales preces hominum diis bonis per dæmones allegari putat, magicas, an licitas? Si magicas, nolunt tales: si licitas, nolunt per tales. Si autem peccator pœnitens preces fundit, maxime si aliquid magicum admisit; itane tandem illis intercedentibus accipit veniam, quibus impellentibus aut faventibus se cecidisse plangit in culpam? An et ipsi dæmones ut possint pœnitentibus mereri indulgentiam, priores agunt; quod eos deceperint, pœnitentiam¹? Hoc nemo unquam de dæmonibus dixit: quia si ita esset, nequaquam sibi auderent divinos honores expetere, qui pœnitendo desiderarent ad gratiam veniæ pervenire². Ibi enim est detestanda superbia, hic humilitas miseranda.

CAPUT XX. — *An credendum sit quod dii boni libentius dæmonibus quam hominibus misceantur.*

At enim urgens causa et arctissima cogit dæmones medios inter deos et homines agere, ut ab hominibus offerant desiderata, et a diis referant impetrata. Quænam tandem causa est ista, et quanta necessitas? Quia nullus, inquit, Deus miscetur homini. Præclara igitur sanctitas Dei, qui non miscetur homini supplicanti, et miscetur dæmoni arroganti; non miscetur homini pœnitenti, et miscetur dæmoni decipienti; non miscetur homini confugienti ad divinitatem, et miscetur dæmoni fingenti divinitatem; non miscetur homini petenti indulgentiam, et miscetur dæmoni suadenti nequitiam; non miscetur homini per philosophicos libros poetas de bene instituta civitate pellenti, et miscetur dæmoni a principibus et

¹ Hic apud Lov. additur, *ut et ipsi postea accipiant indulgentiam*: quod ab editis aliis et a manu scriptis abest.

² Nostri Mss., *pertere*. M.

pontificibus civitatis per scenicos ludos poetarum ludibria requirenti; non miscetur homini deorum crimina fingere prohibenti, et miscetur dæmoni se falsis deorum criminibus oblectanti; non miscetur homini magorum scelera justis legibus punienti, et miscetur dæmoni magicas artes docenti et implenti; non miscetur homini imitationem dæmonis fugienti, et miscetur dæmoni deceptionem hominis aucupanti!

CAPUT XXI. — *An dæmonibus nuntiis et interpretibus dii utantur, fallique se ab eis aut ignorent, aut velint.*

1. Sed nimirum tantæ hujus absurditatis et indignitatis est magna necessitas, quod scilicet deos ætherios humana curantes quid terrestres homines agerent utique lateret, nisi dæmones aërii nuntiarent; quoniam æther longe a terra est atque suspensus, aer vero ætheri terræque contiguus. O mirabilem sapientiam! Quid aliud de diis isti sentiunt, quos omnes optimos volunt, nisi eos et humana curare, ne cultu videantur indigni, et propter elementorum distantiam humana nescire, ut credantur dæmones necessarii, et ob hoc etiam ipsi putentur colendi, per quos dii possint et quid in rebus humanis agatur addiscere et ubi oportet hominibus subvenire? Hoc si ita est, diis istis bonis magis notus est dæmon per corpus vicinum, quam homo per animum bonum. O multum doctenda necessitas, an potius irridenda vel detestanda vanitas, ne sit vana divinitas! Si enim animo ab obstaculo corporis libero animum nostrum videre dii possunt, non ad hoc dæmonibus indigent nuntiis: si autem animorum indicia corporalia, qualia sunt vulsus, locutio, motus, per corpus suum ætherii dii sentiunt, et inde colligunt quid etiam dæmones nuntient, possunt et mendaciis dæmonum decipi. Porro si deorum divinitas a dæmonibus non potest falli, ab eadem divinitate, quod agimus, non potest ignorari.

2. Vellem autem mihi isti dicerent, utrum diis dæmones nuntiaverint de criminibus deorum poetica Platoni displicere signenta, et sibi ea placere celaverint; an utrumque occultaverint, deosque esse maluerint totius rei hujus ignaros; an utrumque indicaverint, et religiosam erga deos Platonis prudentiam, et in deos injuriosam libidinem suam; an sententiam quidem Platonis, qua noluit deos per impiam licentiam poetarum falsis criminibus infamari, ignotam diis esse voluerint, suam vero nequitiam, qua ludos scenicos amant, quibus illa deorum dedecora celebrantur, prodere non erubuerint vel timuerint. Horum quatuor, quæ interrogando proposui, quodlibet eligant, et in quolibet eorum quantum mali de diis bonis opinentur, attendant. Si enim primum elegerint, confessuri sunt non licuisse diis bonis habitare cum bono Platone, quando eorum injurias prohibebat, et habitasse cum dæmonibus malis, quando eorum injuriis exsultabant; cum dii boni hominem bonum longe a se positum non nisi per malos dæmones nossent,

quos vicinos¹ nosse non possent. Si autem secundum elegerint, et utrumque occultatum a dæmonibus dixerint, ut dii omnino nescirent et Platonis religiosissimam legem et dæmonum sacrilegam delectationem; quid in rebus humanis per internuntios dæmones dii nosse utiliter possunt, quando illa nesciunt, quæ in honorem deorum bonorum religione bonorum hominum contra libidinem malorum dæmonum decernuntur? Si vero tertium elegerint, et non solum sententiam Platonis deorum injurias prohibentem, sed etiam dæmonum nequitiam deorum injuriis exsultantem, per eosdem dæmones nuntios diis innotuisse responderint; hoc nuntiare est, an insultare? Et dii utrumque sic audiunt, sic utrumque cognoscunt, ut non solum malignos dæmones deorum dignitati et Platonis religioni contraria cupientes atque facientes a suo accessu non arceant, verum etiam per illos malos propinquos Platoni bono longinquo dona transmittant. Sic enim eos elementorum quasi catenata series colligavit, ut illis a quibus criminantur, conjungi possint; huic a quo defenduntur, non possint: utrumque scientes, sed aeris et terræ pondera transmutare non valentes. Jam quod reliquum est, si quartum elegerint, pejus est cæteris. Quis enim ferat, si poetarum de diis immortalibus criminosa signenta et theatrorum indigna ludibria, suamque in his omnibus ardentissimam cupiditatem et suavissimam voluptatem diis dæmones nuntiaverunt, et, quod Plato philosophica gravitate de optima republica hæc omnia censuit removenda, tacuerunt; ut jam dii boni per tales nuntios nosse cogantur mala pessimorum, nec aliena, sed eorundem nuntiorum, atque his contraria non sinantur nosse bona philosophorum, cum illa sint in injuriam, ista in honorem ipsorum deorum?

CAPUT XXII. — *De abjiciendo cultu dæmonum, contra Apuleium.*

Quia igitur nihil istorum quatuor eligendum est, ne in quolibet eorum de diis tam male sentiat; restat ut nullo modo credendum sit, quod Apuleius persuadere nititur, et quicumque alii sunt ejusdem sententiæ philosophi, ita esse malos dæmones inter deos et homines tanquam internuntios et interpretes, qui hinc ferant petitiones nostras, inde referant deorum supplicia: sed esse spiritus nocendi cupidissimos, a justitia penitus alienos, superbia tumidos, invidentia lividos, fallacia callidos: qui in hoc quidem aere habitant, quia de cœli superioris sublimitate dejecti, merito irregressibilis transgressionis in hoc sibi congruo velut carcere prædamnati sunt; nec tamen quia supra terras et aquas aëri² locus est, ideo et ipsi sunt meritis superiores hominibus, qui eos non terreno corpore, sed electo in auxilium Deo vero, pia mente facillime superant (a). Sed multis plane participatione

¹ Editi, *sibi vicinos*. Abest, *sibi*, a Mss. Forte legendum, *quos, etsi vicinos, nosse non possent*.

² sola editio Lov., *aereus*.

(a) De loco dæmonum plura passim in hisce libris habet Augustinus. Confer etiam lib. de Nat. Boni contra Manich. a. 33, et de Agone Christiano, n. 3.

¹ Abest, *ab*, in omnibus nostris Mss. M.

² hic incipit caput 21 in Mss.

veræ religionis indignis, tanquam captis subditisque dominantur: quorum maximæ parti mirabilibus et fallacibus signis sive factorum, sive prædictorum, deos se esse persuaserunt. Quibusdam vero vilia eorum alique attentius et diligentius intuentibus, non potuerunt persuadere quod dii sint, atque inter deos et homines internuntios ac beneficiorum impetratores se esse lixerunt: si tamen non istum saltem honorem homines eis deferendum putarunt, qui illos nec deos esse credebant, quia malos videbant; deos autem omnes bonos volebant, nec audebant tamen omnino indignos dicere honore divino; maxime ne offenderent populos, a quibus eis cernebant inveterata superstitione per tot sacra et templa serviri.

CAPUT XXIII.—*Quid Hermes Trismegistus de idololatria senserit, et unde scire potuerit superstitiones Ægyptias auferendas.*

1. Nam diversa de illis Hermes Ægyptius, quem Trismegistum vocant, sensit et scripsit (a). Apuleius enim deos quidem illos negat: sed cum dicit ita inter homines deosque quadam medietate versari, ut hominibus apud ipsos deos necessarii videantur, cultum eorum a superiorum deorum religione non separat. Ille autem Ægyptius alios deos esse dicit a summo Deo factos, alios ab hominibus. Hoc qui audit, sicut a me positum est, putat dici de simulacris, quia opera sunt manu hominum: at ille visibilia et contractabilia simulacra, velut corpora deorum esse asserit; inesse autem his quosdam spiritus invitatos, qui valeant aliquid, sive ad nocendum, sive ad desideria eorum nonnulla complenda, a quibus eis divini honores et cultus obsequia deferuntur. Hos ergo spiritus invisibiles per artem quamdam visibilibus rebus corporalis materiæ copulare, ut sint quasi animata corpora, illis spiritibus dicata et subdita simulacra, hoc esse dicit deos facere, eamque magnam et mirabilem deos faciendi accepisse homines potestatem. Hujus Ægyptii verba, sicut in nostram linguam interpretata sunt, ponam (b). *Et quoniam de cognatione, inquit, et consortio hominum deorumque nobis indicitur sermo, potestatem hominis, o Asclepi, vimque cognosce. Dominus, inquit, et Pater, vel quod est summum, Deus, ut effector est deorum cælestium, ita homo fictor est deorum qui in templis sunt humana proximitate contenti.* Et paulo post: *Ita humanitas, inquit, semper memor naturæ et originis suæ in illa divinitatis imitatione perseverat; ut sicuti Pater ac Dominus, ut sui*

¹ Lov., quæ: dissentientibus editis aliis et manuscriptis.

² Ms. 2050, copulari. M.

³ In dialogo Mercurii Asclepio, conjuncti.

⁴ In Asclepio, semper vicina naturæ et originis suæ. Apud Lov., semper memor humanæ naturæ et originis suæ. Abest, humanæ, a cæteris editis et a manuscriptis.

(a) Vid. Lact. lib. 1 Instit., cap. 6, et Cyrill. cont. Julian. lib. 1.

(b) Quæ intra affert Augustinus, sunt ex dialogo Hermetis Asclepio, qui ab Apuleio Madaurensi in latinum conversus prænotatur: sed Apulei latinitas ibi desideratur ab eruditibus — « Oratio plane sicca et exsanguis, » inquit Archer, « nihilque simile habens Apuleianæ ubertati, Wouverium, scriberium aliosque multos eruditos impulit, ut ex ejus scriptis ejicerent. » M.

similes essent, deos fecit æternos, ita humanitas deos suos ex sui vultus similitudine figuraret. Hic cum Asclepius, ad quem maxime loquebatur, ei respondisset atque dixisset, Statuas dicis, o Trismegiste: tum ille, Statuas, inquit, o Asclepi, videane quatenus tu ipse diffidas? statuas animatas sensu et spiritu plenas, tantaque facientes et talia; statuas futurorum præcias, eaque sorte, vate, somniis, multisque aliis rebus prædicentes; imbecillitates hominibus facientes, easque curantes, tristitiam lætitiâque pro meritis. An ignoras, o Asclepi, quod Ægyptus imago sit cæli; aut, quod est verius, translatio aut descensio omnium quæ gubernantur atque exercentur in cælo; ac si dicendum est, verius terra nostra mundi totius est templum? Et tamen, quoniam præscire cuncta prudentem decet, istud vos ignorare fas non est: Futurum tempus est, quo appareat Ægyptios incassum pia mente divinitatem sedula religione servasse et omnis eorum sancta veneratio in irritum castura frustrabitur.

2. Deinde multis verbis Hermes hunc locum exsequitur, in quo videtur hoc tempus prædicere, quæ christiana religio, quanto est veracior atque sanctior, tanto vehementius et liberius cuncta fallacia figmenta subvertit; ut gratia verissimi Salvatoris liberet hominem ab eis diis quos facit homo, et ei Deo subdat a quo factus est homo. Sed Hermes, cum ista prædicat, velut amicus eisdem ludificationibus dæmonum loquitur, nec christianum nomen evidenter exprimit; sed tanquam ea tollerentur atque delerentur, quorum observatione cælestis similitudo custodiretur in Ægypto, ita hæc futura deplorans, luctuosa quodammodo prædicatione testatur. Erat enim de his, de quibus dicit Apostolus, quod cognoscentes Deum, non sicut Deum glorificaverunt, aut gratias egerunt; sed evanuerunt in cogitationibus suis, et obscuratum est insipiens cor eorum: dicentes enim se esse sapientes, stulti facti sunt; et immutaverunt gloriam incorrupti Dei in similitudinem imaginis corruptibilis hominis (Rom. 1, 21-23): et cætera, quæ commemorare longum est. Multa quippe talia dicit de uno vero Deo fabricatore mundi, qualia veritas habet: et nescio quomodo illa obscuratio cordis ad ista delabitur, ut diis quos constetur ab hominibus fieri, semper velit homines subdi, et hæc futuro tempore plangat auferri. Quasi quidquam sit infelicis homine, cui sua figmenta dominantur: cum sit facilius, ut tanquam deos colendo, quos fecit, nec ipse sit homo.

¹ Mss., vides, absque particula, ne; quæ in excusis est et in Asclepio.

² Sic plures et melioris notæ Mss. At editi, ea quæ forte vales omnis ignoret, in multis et variis rebus prædicentes. Asclepius vero, easque forte vales omnes somniis, multisque aliis rebus prædicentes. Sed nostrorum manuscriptorum lectioni favet alius iste Asclepii locus, quædam sortibus et divinationibus prædicentes.

³ Vox, lætitiâ, in Asclepio desideratur. — Noster A, lætitiâque afferentes.

⁴ Sic plerique manuscripti, quibus Asclepius consentit. At editi, divinitati sedulam religionem servasse. Forte legendum, divinitati sedula religione servisse. — Mss. 766 et 2053, divinitate. M.

⁵ Verba, et omnis eorum sancta veneratio in irritum castura frustrabitur, Mercurii sunt in Asclepio, sed hic non habentur in Mss.

⁶ Editi, cum sit facilius, fieri deos colendo quos fecit, non ipse sit homo. Emendantur ad veteres libros.

quam ut per ejus cultum dii possint esse, quos locit homo. Citius enim fit ut homo in honore positus peccatoribus non intelligens comparetur (*Psal.* XLVIII, 13), quam ut operi Dei ad ejus imaginem facto, id est ipsi homini, opus hominis præferatur. Quapropter merito homo deficit ab illo, qui eum fecit, cum sibi præficit ipse quod fecit.

3. Hæc vana, deceptoría, pernicioza, sacrilega¹ Hermes Ægyptius, quia tempus quo auferrentur venturum sciebat, dolebat: sed tam impudenter dolebat, quam imprudenter sciebat. Non enim hæc ei revelaverat Spiritus sanctus, sicut Prophetis sanctis, qui hæc prævidentes cum exultatione dicebant: *Si faciet homo deos, et ecce ipsi non sunt dii* (*Jerem.* XVI, 20). Et alio loco: *Erit in illo die, dicit Dominus, exterminabo nomina simulacrorum a terra, et non jam erit eorum memoria* (*Zach.* XIII, 2). Proprie vero de Ægypto, quod ad hanc rem attinet, ita sanctus Isaias prophetat: *Et movebuntur manufacta Ægypti a facie ejus, et cor eorum vincetur² in eis* (*Isai.* XIX, 1): et cætera hujusmodi. Ex quo genere et illi erant, qui venturum quod sciebant, venisse gaudebant: qualis Simeon, qualis Anna, qui mox natum Jesum; qualis Elisabeth, quæ etiam conceptum in Spiritu agnovit (*Luc.* II, 25-38; I, 41-45): qualis Petrus, revelante Patre dicens, *Tu es Christus Filius Dei vivi* (*Matth.* XVI, 16). Illic autem Ægyptio illi spiritus indicaverant futura tempora perditionis suæ, qui etiam præsentem in carne Domino trementes dixerunt, *Quid venisti ante tempus perdere nos* (*Id.* VIII, 29)? sive quia subtiliter illis fuit, quod futurum quidem, sed tardius opinabantur; sive quia perditionem suam hanc ipsam dicebant, qua flebat ut cogniti spernerentur. Et hoc erat *ante tempus*, id est ante tempus judicii, quo æterna damnatione puniendi sunt cum omnibus etiam hominibus, qui eorum societate detinentur: sicut religio loquitur, quæ nec fallit, nec fallitur; non sicut iste quasi³ omni vento doctrinæ hinc atque inde perflatus (*Ephes.* IV, 14), et falsis vera permiscens, dolet quasi perituram religionem quam postea confitetur, errorem.

CAPUT XXIV. — *Quomodo Hermes patenter⁴ parentum suorum sit confessus errorem, quem tamen doluerit destruendum.*

1. Post multa enim ad hoc ipsam redit, ut iterum dicat de diis quos homines fecerunt, ita loquens: *Sed jam de talibus sint satis dicta talia. Iterum, inquit, ad hominem rationemque redeamus, ex quo divino dono homo animal dictum est rationale. Minus enim miranda, etsi miranda sunt quæ de homine dicta sunt. Omnium enim mirabilium vicit admirationem, quod homo divinam potuit invenire naturam, eamque efficere. Quoniam ergo proavi nostri multum errabant circa deorum rationem increduli, et non animadvertentes ad cultum religionemque divinam, invenerunt artem qua efficerent*

deos. Cui inventæ adjunxerunt virtutem de mundi natura convenientem; eamque miscentes, quoniam¹ animas facere non poterant, evocantes animas læmonum vel angelorum, eas indiderunt imaginibus sanctis divinisque mysteriis, per quas idola et bene faciendi, et male, vires habere potuissent (*Pag.* 99). Nescio utrum sic confiterentur ipsi dæmones adjurati, quomodo iste confessus est. *Quoniam, inquit, proavi nostri multum errabant circa deorum rationem increduli, et non animadvertentes ad cultum religionemque divinam, invenerunt artem qua efficerent deos.* Numquidnam saltem mediocriter eos dixit errasse, ut hanc artem invenirent faciendi deos; aut contentus fuit dicere, Errabant, nisi adderet et diceret, *Multum errabant?* Iste ergo multus error et incredulitas non animadvertentium ad cultum religionemque divinam, invenit artem qua efficeret deos. Et tamen quod multus error et incredulitas et a cultu ac religione divina aversio animi invenit, ut homo arte faceret deos, hoc dolet vir sapiens tanquam religionem divinam venturo certo tempore auferri. Videt si non et vi divina majorum suorum errorem præteritum prodere, et vi diabolica² pœnam dæmonum futuram dolere compellitur. Si enim proavi eorum multum errando circa deorum rationem incredulitate et aversione animi a cultu ac religione divina invenerunt artem qua deos efficerent; quid mirum, si hæc ars detestanda quidquid fecit aversa a religione divina, auferatur religione divina, cum veritas emendat errorem, fides redarguit incredulitatem, conversio corrigit aversionem³?

2. Si enim tacitis causis dixisset, proavos suos invenisse artem qua deos facerent; nostrum fuit utique, si quid rectum piisque saperemus, attendere et videre nequaquam illos ad hanc artem perventuros fuisse, qua homo deos facit, si a veritate non aberrarent, si ea quæ Deo digna sunt crederent, si animum adverterent ad cultum religionemque divinam. Et tamen si causas artis hujus nos diceremus multum errorem hominum et incredulitatem et animi errantis atque infidelis a divina religione aversionem, utcumque ferenda esset impudentia resistentium veritati: cum vero idem ipse, qui potestatem hujus artis super omnia cætera miratur in homine, qua illi deos facere concessum est, et dolet venturum esse tempus, quo hæc omnia deorum signa ab hominibus instituta, etiam legibus jubeantur auferri; confitetur tamen atque exprimit causas, quare ad ista perventum sit, dicens proavos suos multo errore et incredulitate, et animum non advertendo ad cultum religionemque divinam invenisse hanc artem qua facerent deos: nos quid oportet dicere vel potius quid agere, nisi quantum possumus gratias Domino Deo nostro, qui hæc contrariis causis, quam instituta sunt, abstulit? Nam quod instituit multitudo erroris, abstulit via veritatis; quod instituit incredulitas, abstulit fides; quod insti-

¹ Aliquot Mss., *sacrilegia*.

² Editi, *vincetur*. Al Mss., *vincetur*. Isaias in Græco habet, *ἐπιστήσεται*.

³ Lov., *qui*. Editi autem alii et manuscripti, *quasi*. — Ms. 2050, *qui quasi*. M.

⁴ Sic Vind. Am. Er. et omnes Mss. — In B., *quam*. M.

⁵ Manuscripti non habent, *patenter*.

¹ In Asclepio, *et quoniam*.

² Sic Er. et Mss. Al Lov., *et invidia diabolica*.

³ Editi, *cum veritas emendet errorem, fides redarguat incredulitatem, conversio corrigit aversionem*. Al Mss., *emendat, redarguit, corrigit*.

tuit a cultu divinæ¹ religionis aversio, abstulit ad unum verum Deum sanctumque conversio: nec in sola Ægypto, quam solam in isto plangit dæmonum spiritus, sed in omni terra quæ cantat Domino canticum novum; sicut vere sacræ et vere propheticæ Litteræ prænuntiarunt, ubi scriptum est, *Cantate Domino canticum novum; cantate Domino, omnis terra* (Psal. xcvi, 1). Titulus quippe psalmi hujus est, *Quando domus ædificabatur post captivitatem. Ædificatur enim domus Domino civitas Dei, quæ est sancta Ecclesia, in omni terra, post eam captivitatem, qua illos homines, de quibus credentibus in Deum tanquam lapidibus vivis domus ædificatur* (I Petr. ii, 5), captos dæmonia possidebant. Neque enim quia homo deos faciebat, ideo non ab eis possidebatur ipse qui fecerat, quando in eorum societatem colendo traducebatur: societatem dico, non idolorum stolidorum, sed versutorum dæmoniorum. Nam quid sunt idola, nisi quod eadem Scriptura dicit, *Oculos habent, et non vident*² (Psal. cxiii, 5): et quidquid tale de materiis licet affabre effigialis, tamen vita sensuque carentibus, dicendum fuit(a)? Sed immundi spiritus eisdem simulacris arte illa nefaria colligati, cultorum suorum animas in suam societatem redigendo miserabiliter captivaverant. Unde dicit Apostolus: *Scimus quia nihil est idolum; sed quæ immolant Gentes, dæmonibus immolant, et non Deo: nolo vos socios fieri dæmoniorum* (I Cor. x, 20): Post hanc ergo captivitatem, qua homines a malignis dæmonibus tenebantur, Dei domus ædificatur in omni terra: unde titulus ille psalmus accepit, ubi dicitur, *Cantate Domino canticum novum; cantate Domino, omnis terra. Cantate Domino, et benedicite nomen ejus; bene nuntiate diem ex die salutare ejus. Annuntiate in gentibus gloriam ejus, in omnibus populis mirabilia ejus. Quoniam magnus Dominus, et laudabilis nimis, terribilis est super omnes deos. Quia omnes dii Gentium dæmonia, Dominus autem cæles fecit* (Psal. xcv. 1-5).

3. Qui ergo doluit venturum fuisse tempus, quo auferretur cultus idolorum, et in eos qui colerent dominatio dæmoniorum, malo spiritu instigatus semper volebat istam captivitatem manere, qua transacta Psalmus canit ædificari domum in omni terra. Prænuntiabat illa Hermes dolendo; prænuntiabat hæc Propheta gaudente. Et quia Spiritus victor est, qui hæc per sanctos Prophetas canebat; etiam Hermes ipse ea quæ nolebat et dolebat auferri, non a prudentibus et fidelibus et religiosis, sed ab errantibus et incredulis et a cultu divinæ religionis aversis esse instituta, miris modis coactus est confiteri. Qui quamvis eos appellet deos, tamen cum dicit a talibus hominibus factos, quales esse utique non debemus, velit nolit, ostendit colendos non esse ab eis qui tales non sunt, quales fuerunt a quibus facti sunt; hoc est a prudentibus, fidelibus, religiosis: simul etiam demonstrans, ipsos homines, qui eos fecerunt, sibi importasse, ut eos haberent deos qui dii non erant.

¹ Sic sola editio Lov., *divino*.

² Vind. Er. et plures Mss., *videbunt*. — Sic etiam Ms. 766.

M.

(a) Vid. epist. 102, nn. 18, 19.

Verum est quippe illud propheticum, *Si faciet homo deos, et ecce ipsi non sunt dii* (Jerem. xvi, 20). Deos ergo tales, talium deos, arte factos a talibus, cum appellasset Hermes; id est, idolis dæmones, per artem nescio quam, cupiditatum suarum vinculis illigatos, cum appellaret factos ab hominibus deos, non tamen eis dedit, quod Platonius Apuleius (unde satis jam diximus, et quam sit inconveniens absurdumque monstravimus), ut ipsi essent interpretes et intercessores inter deos quos fecit Deus, et homines quos idem fecit Deus; hinc afferentes vota, inde munera referentes. Nimis enim stultum est credere, deos quos fecerunt homines, plus valere apud deos quos fecit Deus, quam valent ipsi homines, quos idem ipse fecit Deus. Dæmon quippe simulacro arte impia colligatus ab homine, factus est Deus; sed tall homini, non omni homini. Qualis est ergo iste deus, quem non faceret homo nisi errans et incredulus et aversus a vero Deo? Porro si dæmones qui coluntur in templis, per artem nescio quam imaginibus inditi, hoc est visibilibus simulacris, ab eis hominibus qui hæc arte fecerunt deos, cum aberrarent aversique essent a cultu et religione divina, non sunt internuntii nec interpretes inter homines et deos, et propter suos pessimos ac turpissimos mores, et quod homines¹, quamvis errantes et increduli et aversi a cultu ac religione divina, tamen eis sine dubio meliores sunt, quos deos ipsi arte fecerunt: restat ut quod possunt, tanquam dæmones possint, vel quasi beneficia præstando magis nocentes, quia magis decipientes; vel aperte malefaciendo. Nec tamen quodlibet horum, nisi quando et quantum² permittuntur alta et secreta Dei providentia: non autem tanquam medii inter homines et deos per amicitiam deorum multum apud homines valeant. Illi enim diis bonis, quos sanctos Angelos nos vocamus rationalesque creaturas sanctæ cælestis habitationis³, sive Sedes, sive Dominationes, sive Principatus, sive Potestates, amici esse omnino non possunt; a quibus tam longe absunt animi affectione, quam longe absunt a virtutibus vitia, et a bonitate malitia.

CAPUT XXV. — *De his quæ sanctis Angelis et hominibus possunt esse communia.*

Nulla modo igitur per demonum quasi mediocritatem ambiendum est ad benevolentiam seu beneficentiam deorum, vel potius bonorum Angelorum; sed per bonæ voluntatis similitudinem, qua cum illis sumus, et cum illis vivimus, et cum illis Deum quem colunt colimus, etsi eos carnalibus oculis videre non possumus: in quantum autem dissimilitudine voluntatis et fragilitate infirmitatis miseri sumus, in tantum ab eis longe sumus vitæ merito, non corporis loco. Non enim quia in terra conditione carnis habitamus, sed si immunditia cordis⁴ terrena sapimus,

¹ Editi, et propter suos pessimos ac turpissimos mores, ipsi etiam homines. Castigantur a manuscriptis.

² In Mss. non est, et quantum.

³ Probæ notæ Mss., *cælestes habitationes*: minus recte; nisi forte velis pro, *sanctæ*, legere, *aliquæ*.

⁴ Editi, *sed si per immunditiam cordis*. At Mss., *sed si immunditia cordis*.

non eis jungimur. Cum vero sanamur, ut quales ipsi sunt, simus; fide interim illis propinquamus, si ab illo nos fieri beatos, a quo et ipsi facti sunt, etiam ipsis faventibus credimus.

CAPUT XXVI. — *Quod omnis religio Paganorum circa homines mortuos fuerit impleta.*

1. Sane advertendum est quomodo iste Ægyptius, cum doleret tempus esse venturum, quo illa auferrentur ex Ægypto, quæ fatetur a multum errantibus et incredulis, et a cultu divinæ religionis aversis esse instituta, ait inter cætera: *Tunc terra ista sanctissima sedes delubrorum atque templorum, sepulcrorum erit mortuorumque plenissima.* Quasi vero, si illa non auferrentur, non essent homines morituri, aut alibi essent mortui ponendi quam in terra: et utique quanto plus volveretur temporis et dierum, tanto major esset numerus sepulcrorum, propter majorem numerum mortuorum. Sed hoc videtur dolere, quod memoriæ martyrum nostrorum templis eorum delubrisque succederent: ut videlicet qui hæc legunt animo a nobis averso atque perverso, putent a Paganis deos cultos fuisse in templis, a nobis autem coli mortuos in sepulcris. Tanta enim homines impli cæcitate in montes quodammodo offendunt, resque oculos suos ferientes nolunt videre, ut non attendant in omnibus litteris Paganorum aut non inveniri, aut vix inveniri deos, qui non homines fuerint, mortuisque divini honores delati sint¹. Omitto quod Varo dicit, omnes ab eis mortuos existimari Manes deos, et probat per ea sacra, quæ omnibus fere mortuis exhibentur, ubi et ludos commemorat funebres, tanquam hoc sit maximum divinitatis indicium, quod non soleant ludi nisi numinibus celebrari.

2. Hermes ipse, de quo nunc agitur, in ipso eodem libro ubi quasi futura prænuntiando deplorans ait, *Tunc terra ista sanctissima sedes delubrorum atque templorum, sepulcrorum erit mortuorumque plenissima;* deos Ægypti, homines mortuos esse testatur. Cum enim dixisset proavos suos multum errantes circa deorum rationem, incredulos et non animadvertentes ad cultum religionemque divinam, invenisse artem qua efficerent deos; *Cui inventæ, inquit, adjunxerunt virtutem de mundi natura convenientem, eamque miscentes, quoniam animas facere non poterant, evocantes animas dæmonum vel angelorum, eas indiderunt imaginibus sanctis divinisque mysteriis, per quas idola et bene faciendi, et male, vires habere potuissent:* deinde sequitur tanquam hoc exemplis probaturus, et dicit, *Avus enim tuus, o Asclepi, medicinæ primus inventor, cui templum consecratum est in monte Libyæ circa litus Crocodilorum, in quo ejus jacet mundanus homo, id est corpus: reliquus enim, vel potius totus, si est homo totus in sensu vitæ, melior remeavit in cælum, omnia etiam nunc hominibus adjumenta præstans infirmitatis numine nunc suo, quæ ante solebat medicinæ arte*

¹ Ante editi sic habent, qui non homines fuerint, omnibusque honores studeant exhibere divinos, quasi nihil imaginem humanitatis habuerint. Et paulo post, existimari inanes deos. Emendatur ad veteres libros.

præbere. Ecce dixit mortuum coli pro deo in eo loco ubi habebat sepulcrum: falsus ac fallens, quod remeavit in cælum. Adjungens deinde aliud: *Hermes, inquit, cujus avitum mihi nomen est, nonne in sibi cognomine patria¹ consistens, omnes mortales undique venientes adjuvat atque conservat?* Hic enim Hermes major, id est Mercurius, quem dicit avum suum fuisse, in Hermopoli, hoc est in sui nominis civitate, esse perhibetur². Ecce duos deos dicit homines fuisse, Æsculapium et Mercurium. Sed de Æsculapio et Græci et Latini hoc idem sentiunt; Mercurium autem multi non putant fuisse mortalem, quem tamen iste avum suum fuisse testatur. At enim alius est ille, alius iste, quamvis eodem nomine nuncupentur. Non multum pugno, alius ille sit, alius iste: verum et iste, sicut Æsculapius, ex homine deus secundum testimonium tanti apud suos viri, hujus Trismegisti, nepotis sui.

3. Adhuc addit, et dicit: *Isin vero uxorem³ Osiris quam multa bona præstare propitiæ, quantis obesse scimus iratam?* Deinde ut ostenderet ex hoc genere esse deos, quos illa arte homines faciunt: unde dat intelligi dæmones se optari ex hominum mortuorum animis exstitisse, quos per artem, quam invenerunt homines multum errantes, increduli et irreligiosi, ait inditos simulacris, quia hi qui tales deos faciebant, animas facere non utique poterant: cum de Iside dixisset, quod commemoravi, quantis obesse scimus iratam, secutus adjunxit, *Terrenis etenim diis atque mundanis facile est irasci, utpote qui sint ab hominibus ex utraque natura⁴ facti atque compositi.* Ex utraque natura dicit, ex anima et corpore: ut pro anima sit dæmon, pro corpore simulacrum. *Unde contigit, inquit, ab Ægyptiis hæc sancta animalia nuncupari, colique per singulas civitates eorum animas, quorum sunt consecratæ viventes⁵, ita ut eorum legibus incolantur, et eorum nominibus nuncupentur.* Ubi est illa velut querela luctuosa, quod terra Ægyptii sanctissima sedes delubrorum atque templorum, sepulcrorum futura esset mortuorumque plenissima? Nempe spiritus fallax, cujus instinctu Hermes ista dicebat, per eum ipsum coactus est confiteri jam tunc illam terram sepulcrorum et mortuorum, quos pro diis colebant, fuisse plenissimam. Sed dolor dæmonum per eum loquebatur, qui suas futuras penas apud sancto-

¹ Sic Mss. Apud Er. autem et Lov., in cognominis sui patria. Servatur illic sensus: sed minime in Asclepio, qui habet, sibi cognomen patrium; omissa particula, in.

² In hoc vigesimo sexto capite verba nonnulla removiimus, quæ addita fuerant in excusis, in quibus ita legebatur: *Falsus ac fallens (dicendo) quod remeavit in cælum, (omnia etiam nunc hominibus adjumenta præstans infirmis). Adjungens deinde aliud.* Et paulo post: *In sui nominis civitate perhibetur esse (sepultus).* Verbum, *sepultus*, et alia parentesi inclusa non ibi habeantur in manuscriptis.

³ Vox, *uxorem*, ahest a manuscriptis necnon ab Asclepio, in quo sic legitur: *Isin vero et Osirim quam multa bona præstare propitiæ, tantum obesse scimus iratam.*

⁴ Mercurii Asclepius pro, ex utraque natura, habet, *ex utraque naturam*: corruptissime.

⁵ Sic Am. et manuscripti cum Asclepio. At Lov., qui ea consecravere viventes. sic etiam Er. mutato solum, *eu*, in, *tas*.

rum martyrum memorias imminere mœrebant. In multis enim talibus locis torquentur et conflentur, et de possessis hominum corporibus ejiciuntur.

CAPUT XXVII. — *De modo honoris, quem Christiani martyribus impendunt.*

1. Nec tamen nos eisdem martyribus templa, sacerdotia, sacra et sacrificia constituimus: quoniam non ipsi, sed Deus eorum nobis est Deus. Honoramus sane memorias eorum tanquam sanctorum hominum Dei, qui usque ad mortem corporum suorum pro veritate certarunt, ut innotesceret vera religio, falsis fictisque convictis: quod etiam si qui antea sentiebant, timendo reprimebant. Quis autem audivit aliquando fidelium stantem sacerdotem ad altare etiam super sanctum corpus martyris ad Dei honorem cultumque constructum, dicere in precibus, Offero tibi sacrificium, Petre, vel Paule, vel Cypriane; cum apud eorum memorias offeratur Deo, qui eos et homines et martyres fecit; et sanctis suis Angelis cœlesti honore sociavit; ut ea celebritate et Deo vero de illorum victoriis gratias agamus, et nos ad imitationem talium coronarum atque palmarum eodem invocato in auxilium ex illorum memoriæ renovatione adhortemur? Quæcumque igitur adhibentur religiosorum obsequia in martyrum locis, ornamenta sunt memoriarum, non sacra vel sacrificia mortuorum tanquam deorum (a). Quicumque etiam epulas suas eo deferunt, quod quidem a christianis melioribus non fit, et in plerisque terrarum nulla talis est consuetudo; tamen quicumque id faciunt, quas cum apposuerint, orant, et auferunt, ut vescantur, vel ex eis etiam indigentibus largiantur, sanctificari sibi eas volunt per merita martyrum in nomine Domini martyrum (b). Non autem esse ista sacrificia martyrum novit qui novit unum, quod etiam¹ illic offertur, Sacrificium Christianorum.

2. Nos itaque martyros nostros nec divinis honori-

¹ Sic Mss. Editi vero, *ibi*.

² Editi, *Deo*. At Mss., loco, *Deo*, habent, *etiam*.

(a) Conf. lib. 20 contra Faustum, cap. 21.

(b) Vide lib. 6 Confess., cap. 2.

bus, nec humanis criminibus colimus, sicut colunt illi deos suos: nec sacrificia illis offerimus, nec eorum probra in eorum sacra convertimus. Nam de Iside uxore Osiris, Ægyptia dea, et de parentibus eorum, qui omnes reges fuisse scribuntur, quibus parentibus suis illa cum sacrificaret, invenit hordeum segetem, atque inde spicas marito regi et ejus consiliario Mercurio demonstravit, unde eandem et Cereinem volunt, quæ et quanta mala, non a poetis, sed mysticis eorum litteris memoriæ mandata sint, sicut, Leone sacerdote prodente, ad Olympiadem matrem scribit Alexander (a), legant qui volunt vel possunt, et recolant qui legerunt; et videant quibus hominibus mortuis, vel de quibus eorum factis tanquam diis sacra fuerint instituta. Absit ut eos, quamvis deos habeant, sanctis martyribus nostris, quos tamen deos non habemus, ulla ex parte audeant comparare. Sic enim non constituimus sacerdotes, nec offerimus sacrificia martyribus nostris; quia incongruum, indebitum, illicitum est, atque uni Deo tantummodo debitum: ut nec criminibus suis, nec ludis eos turpissimis oblectemus, ubi vel flagitia isti celebrant deorum suorum, si, cum homines essent, talia commiserunt; vel conficta delectamenta dæmonum noxiorum, si homines non fuerunt. Ex isto genere dæmonum Socrates non haberet deum, si haberet Deum¹: sed fortasse homini ab illa arte faciendi deos alieno et innocenti, illi importaverint talem deum, qui eadem arte excellere voluerunt. Quid ergo plura? Non esse spiritus istos colendos propter vitam beatam² quæ post mortem futura est, nullus vel mediocriter prudens ambigit. Sed fortasse dicturi sunt, deos quidem esse omnes bonos, dæmones autem alios malos, alios bonos: et eos per quos ad vitam in æternum beatam perveniamus colendos esse censebunt, quos bonos opinantur. Quod quale sit, jam in volumine sequenti videndum est.

¹ Verba, *si haberet Deum*, absunt a Mss. 766, 2050 et 2053. M.

(a) Supra, cap. 5.

LIBER NONUS.

Postquam dixit in superiore libro de abjiciendo dæmonum cultu, quippe qui spiritus malos se ipsi prodant tam multis argumentis; in isto jam libro is occurrit Augustinus, qui dæmonum differentiam afferunt aliorum malorum, aliorum bonorum: qua ipse explorata differentia probat nulli omnino dæmoni, sed uni Christo manus mediatoris hominum ad beatitudinem posse competere.



CAPUT PRIMUM. — *Ad quem articulum disputatio præmissa pervenerit, et quid discutiendum sit de residua questione.*

Et bonos et malos deos esse quidam opinati sunt: quidam vero de diis meliora sentientes, tantum eis honoris laudisque tribuerunt, ut nullum dæorum malum credere auderent. Sed illi qui deos quosdam bonos, quosdam malos esse dixerunt, dæmones quoque appellaverunt nomine deorum: quanquam et deos, sed rarius, nomine dæmonum; ita ut ipsum

Jovem, quem volunt esse regem ac principem cæterorum, ab Homero fateantur dæmonem nuncupatum (a). Illi autem, qui omnes deos non nisi bonos esse asserunt, et longe præstantiores eis hominibus qui boni perhibentur merito, moventur dæmonum factis, quæ negare non possunt, eaque nullo modo a diis, quos omnes bonos volunt, committi posse existimantes, differentiam inter deos et dæmones adhibere coguntur; ut quid-

(a) Plutarch. in libello quod cessarunt oracula.

quid eis merito displicet in operibus vel affectibus pravis, quibus vim suam manifestant occulti spiritus, id credant esse dæmonum, non deorum. Sed quia eosdem dæmones inter homines et deos ita medios constitutos putant, tanquam nullus deus homini misceatur ut hinc perferant desiderata, inde referant impetrata; atque hoc Platonici præcipui philosophorum ac nobilissimi sentiunt, cum quibus velut cum excellentioribus placuit istam examinare quæstionem, utrum cultus plurimorum deorum prosit ad consequendam vitam beatam, quæ post mortem futura est: libro superiore quæsimus, quo pacto dæmones, qui talibus gaudent, qualia boni et prudentes homines aversantur et damnant, id est sacrilega, flagitiosa, facinorosa, non de quolibet homine, sed de ipsis diis fignenta poetarum, et magicarum artium sceleratam puniendamque violentiam, possint quasi propinquiores et amiciores diis bonis conciliare homines bonos; et hoc nulla ratione posse, compertum est.

CAPUT II. — *An inter dæmones, quibus dii superiores sunt, sit aliqua pars bonorum, quorum præsidio ad veram beatitudinem possit humana anima pervenire.*

Proinde hic liber, sicut in illius sine promisimus, disputationem continere debet de differentia (si quam volunt esse), non deorum inter se, quos omnes bonos dicunt; nec de differentia deorum et dæmonum, quorum illos ab hominibus longe lateque sejungunt, istos inter deos et homines collocant; sed de differentia ipsorum dæmonum, quod ad præsentem pertinet quæstionem. [II.] Apud plerosque enim usitatum est dici alios bonos, alios malos dæmones: quæ sive sit etiam Platoniorum, sive quorumlibet sententia, nequaquam ejus est negligenda discussio, ne quisquam velut dæmones bonos sequendos sibi esse arbitretur, per quos tanquam medios, diis quos omnes bonos credit, dum conciliari affectat et studet, ut quasi cum eis possit esse post mortem, irretitus malignorum spirituum deceptusque fallacia, longe aberret a vero Deo, cum quo solo, et in quo solo, et de quo solo, anima humana, id est rationalis et intellectualis, beata est.

CAPUT III. — *Quæ dæmonibus Apuleius adscribat; quibus cum rationem non subtrahat, nihil virtutis assignat.*

Quæ igitur est differentia dæmonum bonorum et malorum? quandoquidem Platonius Apuleius, de his universaliter disserens, et tam multa loquens de aeriis eorum corporibus, de virtutibus tacuit animorum, quibus essent præditi, si boni essent. Tacuit ergo beatitudinis causam; indicium vero miseræ tacere non potuit, confitens eorum mentem, qua rationales esse perhibuit, non saltem imbutam munitamque virtute, passionibus animi irrationabilibus nequaquam cedere, sed ipsam quoque, sicut stultarum mentium mos est, procellosis quodammodo perturbationibus agitari. Verba namque ejus de hac re ista sunt: *Ex hoc ferme dæmonum numero, inquit, poetæ solent, haudquaquam procul a veritate, usores et amatores quorundam hominum deos fingere; hos prospere et evahere, illos contra adversari et affligere.*

Igitur et misereri, et indignari, et angere, et lætari, omnemque humani animi faciem pati, simili motu cordis et salo mentis, per omnes cogitationum æstus fluctuare. Quæ omnes turbellæ tempestatesque procul a deorum cælestium tranquillitate exsulant (Apuleius in libro De deo Socratis). Num est in his verbis ulla dubitatio, quod non animorum aliquas inferiores partes, sed ipsas dæmonum mentes, quibus rationalia sunt animalia, velut procellosum salum dixit passionum tempestate turbari? ut ne hominibus quidem sapientibus comparandi sint, qui hujusmodi perturbationibus animorum, a quibus humana non est immunis infirmitas, etiam cum eas hujus vitæ conditione patiuntur, mente imperturbata resistunt, non eis cedentes ad aliquid approbandum vel perpetrandum, quod exorbitet ab itinere sapientiæ et lege justitiæ: sed stultis mortalibus et injustis, non corporibus, sed moribus similes (ut non dicam deteriores, eo quo vetustiores et debita poena insanabiles), ipsius quoque mentis, ut iste appellavit, salo fluctuant; nec in veritate atque virtute, qua turbulentis et pravis affectionibus repugnatur, ex illa animi parte consistunt.

CAPUT IV. — *De perturbationibus quæ animo accidunt, quæ sit Peripateticorum Stoicorumque sententia.*

1. Duæ sunt sententiæ philosophorum, de his animi motibus, quæ Græci πάθη¹, nostri autem quidam, sicut Cicero (*De Finibus, lib. 3, cap. 20; Tuscul. Quæst. lib. 3, cap. 4; lib. 4, capp. 5, 6, alibique*), perturbationes, quidam affectiones, vel affectus (*a*), quidam vero, sicut iste de græco expressius, passiones vocant. Ilas ergo perturbationes, sive affectiones, sive passiones quidam philosophi dicunt etiam in sapientem cadere, sed moderatas rationique subjectas, ut eis leges quodammodo, quibus ad necessarium redigantur modum, dominatio mentis imponat. Hoc qui sentiunt, Platonici sunt sive Aristotelici, cum Aristoteles discipulus Platonis fuerit, qui sectam Peripateticam condidit. Aliis autem, sicut Stoicis, cadere ullas omnino hujusmodi passiones in sapientem non placet. Hos autem, id est Stoicos, Cicero in libris de Finibus bonorum et malorum, verbis magis quam rebus adversus Platonicos seu Peripateticos certare convincit; quandoquidem Stoici nolunt bona appellare, sed commoda corporis et externa; eo quod nullum bonum volunt esse hominis præter virtutem, tanquam artem bene vivendi, quæ non nisi in animo est. Hæc autem isti simpliciter et ex communi loquendi consuetudine appellant bona; sed in comparisonem virtutis, qua recte vivitur, parva et exigua. Ex quo fit, ut ab utrisque quodlibet vocentur, seu bona, seu commoda, pari tamen æstimatione pensentur, nec in hac quæstione Stoici delectentur, nisi novitate verborum. Videtur ergo mihi etiam in hoc, ubi quæritur utrum accidant sapienti passiones animi, an ab eis

¹ Scribendum, quæ Græci πάθη, ex auctoritate manuscriptorum, jusserunt Patres Benedictini in Addendis [quæ Græci πάθη.] M.

(a) Quintil. lib. 6 Instit., cap. 2, § 20.

sit prorsus alienus, de verbis eos potius quam de rebus facere controversiam. Nam et ipsos nihil hinc aliud quam Platonicos et Peripateticos sentire existimo, quantum ad vim rerum attinet, non ad vocabulorum sonum.

2. Ut enim alia omittam quibus id ostendam, me longum faciam, aliquid unum quod sit evidentissimum dicam. In libris quibus titulus est Noctium Atticarum, scribit A. Gellius¹, vir elegantissimi eloqui, et multae ac facundae scientiae, se navigasse aliquando cum quodam philosopho nobili Stoico. Is philosophus, sicut latius et uberius, quod ego breviter attingam, narrat A. Gellius (*Lib. 19, cap. 1*), cum illud navigium horribili caelo et mari periculosissime jactaretur, vi timoris expalluit. Id animadversum est ab eis qui aderant, quamvis in mortis vicinia, curiosissime attentis, utrumne philosophus animo turbaretur. Deinde tempestate transacta, mox ut securitas praebuit colloquendi vel etiam garriendi locum, quidam ex his, quos navis illa portabat, dives luxuriosus Asiaticus philosophum compellat, illudens quod extimisset atque palluisset, cum ipse mansisset intrepidus in eo quod impendebat exitio. At ille Aristippi Socratici responsum retulit, qui cum in re simili eadem verba ab homine simili audisset, respondit illum pro anima nequissimi nebulonis merito non fuisse sollicitum, se autem pro Aristippi anima timere debuisse. Hac illo divite responsione depulso, postea quaesivit A. Gellius a philosopho, non exagitandi animo, sed discendi, quaenam illa ratio esset pavoris sui. Qui ut doceret hominem sciendi studio naviter accensum, protulit statim de sarcinula sua Stoici Epicteti librum, in quo ea scripta essent, quae congruerent decretis Zenonis et Chryssippi, quos fuisse Stoicorum principes novimus. In eo libro se legisse dicit A. Gellius, hoc Stoicis placuisse, quod animi visa, quas appellant phantasias, nec in potestate est utrum et quando incidant animo; cum veniunt² ex terribilibus et formidabilibus rebus, necesse est etiam sapientis animum moveant; ita ut paulisper vel paveat metu, vel tristitia contrahatur, tanquam his passionibus praevientibus mentis et rationis officium: nec ideo tamen in mente fieri opinionem mali, nec approbari ista, eisque consentiri. Hoc enim esse volunt in potestate, idque interesse censent inter animum sapientis et stulti, quod stulti animus eisdem passionibus cedit, atque accommodat mentis assensum; sapientis autem, quamvis eas necessitate patiat, retinet tamen de his quae appetere vel fugere rationabiliter debet, veram et stabilem inconcussa mente sententiam. Haec ut potui, non quidem commodius A. Gellio, sed certe brevius, et, ut puto, planius exposui, quae ille se in Epicteti libro legisse commemorat, eum ex decretis Stoicorum dixisse atque sensisse.

3. Quae si ita sunt, aut nihil, aut pene nihil distat

¹ Vind. et Mss., *Agellius*. At Am. Fr. et Lov. *A. Gellius*.

² Sic plerique manuscripti. Ad editi, *cum veniant*. — Paulo post omnes nostri Mss., *necesse est*. In B., *necesse esse*.

inter Stoicorum aliorumque philosophorum opinionem de passionibus et perturbationibus animorum; utriusque enim mentem rationemque sapientis ab eorum dominatione defendunt. Et ideo fortasse dicunt eas in sapientem non cadere Stoici, quia nequaquam ejus sapientiam, qua utique sapiens est, ullo errore obnubilant, aut labe subvertunt. Accidunt autem animo sapientis, salva serenitate sapientiae, propter illa, quae commoda vel incommoda appellantur, quamvis ea nolint dicere bona vel mala. Nam profecto si nihil penderet eas res ille philosophus, quas amissurum se naufragio sentiebat, sicuti est vita ista salusque corporis; non ita illud periculum perhorresceret, ut pallores etiam testimonio proderetur. Verumtamen et illam poterat perturbationem pati, et fixam tenere mentem sententiam, vitam illam salutemque corporis, quorum amissionem minabatur tempestatis immanitas, non esse bona quae illos, quibus inessent, facerent bonos, sicut facit justitia. Quod autem alunt ea nec bona appellanda esse, sed commoda; verborum certamini, non rerum examini deputandum est. Quid enim interest, utrum aptius bona vocentur, an commoda; dum tamen ne his privetur, non minus Stoicus, quam Peripateticus paveat et pallescat; ea non aequaliter appellando, sed aequaliter aestimando? Ambo sane, si honorum istorum seu commodorum periculis ad flagitium vel facinus urgeantur, ut aliter ea retinere non possint, malle se dicunt haec amittere quibus natura corporis salva et incolumis habetur, quam illa committere quibus justitia violatur. Ita mens, ubi fixa est ista sententia, nullas perturbationes, etiamsi accidant inferioribus animi partibus, in se contra rationem prevalere permittit: quin imo eis ipsa dominatur, eisque non consentiendo, sed potius resistendo regnum virtutis exercet. Talem describit etiam Virgilius *Aeneas*, ubi ait:

Mens inmotata manet, lacrymae volvuntur inanes.
(*Aeneid. lib. 4, vers. 449.*)

CAPUT V. — *Quod passiones, quae christianos animos afficiunt, non in vitium trahant, sed virtutem exercent.*

Non est nunc necesse copiose ac diligenter ostendere, quid de istis passionibus doceat Scriptura divina, qua christiana eruditio continetur. Deo quippe illam ipsam mentem subjicit regendam et juvandam, mentique passiones ita moderandas atque frenandas, ut in usus justitiae convertantur. Denique in disciplina nostra non tam quaeritur utrum pius animus irascatur, sed quare irascatur; nec utrum sit tristis, sed unde sit tristis; nec utrum timeat, sed quid timeat. Irasci enim peccanti, ut corrigatur; constriari pro afflicto, ut liberetur; timere periclitanti, ne pereat; nescio utrum quisquam sana consideratione reprehendat. Nam et misericordiam Stoicorum est solere culpae (a): sed quanto honestius ille Stoicus misericordia perturbaretur hominis liberandi, quam timore naufragii! Longe melius et humanius, et piorem sensibus accommodatus Cicero in Caesaris laude locutus est, ubi ait: *Nulla de virtutibus tuis nec admi-*

(a) Vid. infra, lib. 14, capp. 8 et 9.

rabiliur, nec gratior misericordia est (Orat. pro Q. Ligorio, cap. 12). Quid est autem misericordia, nisi alienæ miseræ quædam in nostro corde compassio, qua utique, si possumus, subvenire compellimur? Servit autem motus iste rationi, quando ita præbetur misericordia, ut justitia conservetur, sive cum indigni tribuitur, sive cum ignoscitur penitenti. Hanc Cicero, locutor egregius, non dubitavit appellare virtutem, quam Stoicos inter vitia numerare non pudet; qui tamen, ut docuit liber Epicæti nobilissimi Stoici, ex decretis Zenonis et Chrysippi, qui hujus sectæ primas (a) habuerunt, hujusmodi passiones in animum sapientis admittunt, quem vitii omnibus liberum volunt. Unde fit consequens, ut hæc ipsa non putent vitia, quando sapienti sic accidunt, ut contra virtutem mentis rationemque nihil possint, et una sit eademque sententia Peripateticorum, vel etiam Platonicorum, et ipsorum Stoicorum: sed, ut ait Tullius, verbi controversia jam diu torqueat homines Græculos contentions cupidiores, quam veritatis (*De oratore, lib. 1, c. 11, § 47*). Sed adhuc merito quæri potest, utrum ad vitæ¹ presentis pertineat infirmitatem, etiam in quibusque bonis officii hujuscemodi perpeti affectus: sancti vero Angeli et sine ira puniant quos accipiunt æterna Dei lege puniendos, et miseris sine miseræ compassione subveniant, et periclitantibus eis quos diligunt, sine timore opitulentur; et tamen istarum nomina passionum consuetudine locutionis humanæ etiam in eos usurpentur, propter quamdam operum similitudinem, non propter affectionum infirmitatem: sicut ipse Deus secundum Scripturas irascitur, nec tamen ulla passione turbatur (b). Hoc enim verbum vindictæ usurpavit effectus, non illius turbulentus affectus.

CAPUT VI. — *Quibus passionibus dæmones, confitente Apuleio, exagitantur, quorum ope homines apud deos asserit adjuvari.*

Qua interim de sanctis Angelis quæstione dilata, videamus quemadmodum dicant Platonicus medios dæmones inter deos et homines constitutos istis passionum æstibus fluctuare. Si enim mente ab his libera eisque dominante motus hujuscemodi paterentur², non eos diceret Apuleius simili motu cordis et salo mentis per omnes cogitationum æstus fluctuare (*De deo Socratis*). Ipsa igitur mens eorum, id est pars animi superior, qua rationales sunt, in qua virtus et sapientia, si ulla eis esset, passionibus turbulentis inferiorum animi partium regendis moderandisque dominaretur; ipsa, inquam, mens eorum, sicut iste Platonicus confitetur, salo perturbationum fluctuat. Subjecta est ergo mens dæmonum passionibus libidinum, formidinum, irarum, atque hujuscemodi cæteris. Quæ igitur pars in eis libera est compositæ sapientiæ, qua placeant diis, et

¹ In Mss. nonnullis, *utrum cum ad rita*, etc. Paulo post in sola editione Lov.: *Sancti vero Angeli cum et sine ira puniunt*.

² Editti, *non paterentur*: male ac i sfragantibus manuscriptis.

(a) Supple, *partes*.

(b) Vid. lib. 1 contra Advers. Leg. et Prophet., n. 40, et alibi.

ad bonorum morum¹ similitudinem hominibus consulant; cum eorum mens passionum vitii subjugata et oppressa, quidquid rationis naturaliter habet, ad fallendum et decipiendum tanto acrius intendat, quanto eam magis possidet nocendi cupiditas?

CAPUT VII. — *Quod Platonicus figmentis poetarum infamatos asserant deos de contrariorum studiorum certamine, cum hæ partes dæmonum, non deorum sint.*

Quod si quisquam dicit, non ex omnium, sed ex malorum dæmonum numero esse, quos poeta quorundam hominum osores et amatores deos non procul a veritate constringunt: hos enim dixit Apuleius, salo mentis per omnes cogitationum æstus fluctuare: quomodo istud intelligere poterimus, quando, cum hoc diceret, non quorundam, id est malorum, sed omnium dæmonum medietatem propter aëria corpora, inter deos et homines describebat? Hoc enim ait fingere poetas, quod ex istorum dæmonum numero deos faciunt, et eis deorum nomina imponunt, et quibus voluerint hominibus ex his amicos inimicosque distribuunt ficti carminis impunita licentia; cum deos ab his dæmonum moribus, et cælesti loco et beatitudinis opulentiã remotos esse perhibeant (*De deo Socratis*). Hæc est ergo fictio poetarum, deos dicere qui dii non sunt, eosque sub deorum nominibus inter se decertare propter homines, quos pro studio partium diligunt vel oderunt. Non procul autem a veritate dicit hanc esse fictionem; quoniam deorum appellati vocabulis qui dii non sunt, tales tamen describuntur dæmones, quales sunt. Denique hinc esse dicit Homericam illam Minervam, quæ mediis costibus Græciis cõhibendo Achilli intervenit (*Ibid.*). Quod ergo Minerva illa fuerit, poeticum vult esse figmentum; eo quod Minervam deam putat, eamque inter deos, quos omnes bonos beatosque credit, in alta ætheria sede collocat, procul a conversatione mortalium. Quod autem aliquis dæmon fuerit Græcis favens Trojanisque contrarius, sicut alius adversus Græcos Trojanorum opulator, quem Veneris seu Martis nomine idem poeta commemorat, quos deos iste talia non agentes in cælestibus habitationibus ponit; et hi dæmones pro eis quos amabant, contra eos quos oderant, inter se decertaverint, hoc non procul a veritate poetas dixisse confessus est. De his quippe ista dixerunt, quos hominibus simili motu cordis et salo mentis per omnes cogitationum æstus fluctuare testatur, ut possent amores et odia, non pro justitia, sed sicut populus similis eorum in venatoribus et aurigis, secundum suarum studia partium, pro aliis adversus alios exercere (a). Id enim videtur philosophus curasse Platonicus, ne, cum hæc a poetis canerentur, non a dæmonibus mediis, sed ab ipsis diis, quorum nomina poetæ fingendo ponunt, fieri crederentur.

¹ Sic probæ notæ Mss. At editio Lov. omittit, *morum*: cuius vocis loco Vind. et Am. habent, *deorum*. Denique pro, *bonorum*, Er. habet, *horum*.

(a) Vid. Enarr. in Psal. 117, n. 8 et 9, et in Psal. 117, n. 10.

CAPUT VIII. — *De diis caelestibus et daemonibus aëris hominibusque terrenis Apuleii Platonici definitio.*

Quid illa ipsa definitio daemonum, parumne intuenda est (ubi certe omnes determinando complexus est), quod ait daemones esse genere animalia, animo passiva, mente rationalia, corpore aëria, tempore aeterna (*Ibid.*)? In quibus quinque commemoratis, nihil dixit omnino, quod¹ daemones cum bonis saltem hominibus id viderentur habere commune, quod non esset in malis. Nam ipsos homines cum aliquanto latius describendo complecteretur, suo loco de illis dicens tanquam de infimis atque terrenis, cum prius dixisset de caelestibus diis; ut commendatis duabus partibus ex summo et infimo ultimis², tertio loco de mediis daemonibus loqueretur: *Igitur homines, inquit, ratione cientes³, oratione pollentes, immortalibus animis, moribundis membris, levibus et anxiiis mentibus, brutis et obnoxiiis corporibus, dissimilibus moribus, similibus erroribus, pervicaci audacia, pertinaci spe, casso labore, fortuna caduca, singillatim mortales, cuncti tamen universo genere perpetui, viciisim sufficiens prole mutabiles, voluceri tempore, tarda sapientia, cita morte, querula vita terras incolunt (De deo Socratis).* Cum hic⁴ tam multa diceret, quæ ad plurimos homines pertinent, numquid etiam illud tacuit, quod noverat esse paucorum, ubi ait *tarda sapientia?* quod si prætermisisset, nullo modo recte genus humanum descriptionis hujus tam intenta diligentia terminasset. Cum vero deorum excellentiam commendaret, ipsam beatitudinem, quo volunt homines per sapientiam pervenire, in eis affirmavit excellere. Proinde si aliquos daemones bonos vellet intelligi, aliquid etiam in ipsorum descriptione poneret, unde vel cum diis aliquam beatitudinis partem, vel cum hominibus qualemcumque sapientiam putarentur habere communem. Nunc vero nullum bonum eorum commemoravit, quo boni discernuntur a malis. Quamvis et eorum malitiæ liberius exprimebat pepercit, non tam ne ipsos, quam ne cultores eorum, apud quos loquebatur, offenderet: significavit tamen prudentibus, quid de illis sentire deberent; quandoquidem deos, quos omnes bonos beatosque credi voluit, ab eorum passionibus, atque, ut ait ipse, turbellis omni modo separavit, sola illos corporum aeternitate jungens; animo autem non diis, sed hominibus similes daemones apertissime inculcans: et hoc non sapientiæ bono, cujus et homines possunt esse participes; sed perturbatione passionum, quæ stultis malisque dominatur, a sapientibus vero et bonis ita regitur, ut malitiam non habere, quam vincere. Nam si non corpo-

rum, sed animorum aeternitatem cum diis habere daemones vellet intelligi, non utique homines ab huius rei consortio separaret: quia et hominibus aeternos esse animos, procul dubio, sicut Platonius, sentit. Ideo cum hoc genus animantium describeret, immortalibus animis, moribundis membris dixit esse homines. Ac per hoc si propterea communem cum diis aeternitatem non habent homines, quia corpore sunt mortales: propterea ergo daemones habent, quia corpore sunt immortales.

CAPUT IX. — *An amicitia caelestium deorum per intercessionem daemonum possit homini provideri.*

Quales igitur mediatores sunt inter homines et deos, per quos ad deorum amicitias homines ambiant, qui hoc cum hominibus habent deterius, quod est in animante melius, id est animum; hoc autem habent cum diis melius, quod est in animante deterius, id est corpus? Cum enim animans, id est animal, ex anima constet et corpore, quorum duorum anima est utique corpore melior; etsi vitiosa et infirma, melior certe corpore etiam sanissimo atque firmissimo; quoniam ejus natura excellentior nec labe vitiorum postponitur corpori; sicut aurum etiam sordidum argento seu plumbo, licet purissimo, carius aestimatur: isti mediatores deorum et hominum, per quos interpositis divinis humana junguntur, cum diis habent corpus aeternum, vitiosum autem cum hominibus animum; quasi religio, qua volunt diis homines per daemones jungi, in corpore sit, non in animo, constituta. Quoniam tandem istos mediatores falsos atque fallaces quasi capite deorsum nequitia vel pœna suspendit, ut inferiorem animalis partem, id est corpus, cum superioribus, superiorem vero, id est animum, cum inferioribus habeant, et cum diis caelestibus in parte serviente conjuncti, cum hominibus autem terrestribus in parte dominante sint miseri? Corpus quippe servum est, sicut etiam Sallustius ait: *Animi imperio, corporis servitio magis utimur.* Adjunxit autem ille, *Alterum nobis cum diis, alterum cum belluis commune est (Sallust. in Catil., cap. 1):* quoniam de hominibus loquebatur, quibus, sicut belluis, mortale corpus est. Isti autem, quos inter nos et deos mediatores nobis philosophi providerunt¹, possunt quidem dicere de animo et corpore, *Alterum nobis cum diis, alterum cum hominibus commune est:* sed, sicut dixi, tanquam in perversum ligati atque suspensi, servum corpus cum diis beatis, dominum animum cum hominibus miseris habentes², parte inferiore exaltati, superiore dejecti. Unde etiam si quisquam propter hoc eos putaverit aeternitatem habere cum diis, quia nulla morte, sicut animalium terrestrium, animi eorum solvuntur a corpore: nec sic existimandum est eorum corpus tanquam honoratorum aeternum vehiculum, sed aeternum vinculum damnatorum³.

¹ Forte, quo.

² Editi, *ad ultimum*. Castigantur ad veteres libros, quoniam lectionem confirmat illud infra, n. 12, dictum, *de nuabus naturæ partibus ultimis, id est summis atque infimis.*

³ Mira hic codicum varietas. Vind. Am. et probæ notæ Mss. habent, *gaudentes*. Er. Lov., *plaudentes*. Alii quidam Mss., *ferventes*. Nonnulli, *fruentes*. Sed verius Colbertinus codex, ut apud Apuleium *cientes*; id est excellentes.

⁴ Vind. App. et plerique Mss., *hinc*.

¹ Plures probæ notæ manuscripti, *prodiderunt*.

² Verbum, *habentes*, non est in Mss.

³ Vind. Am. et Er., *damnandorum*.

CAPUT X. — *Quod secundum Plotini sententiam, minus miseri sint homines in corpore mortali, quam dæmones in æterno.*

Plotinus certe nostræ memoriæ vicinis¹ temporibus, Platonem cæteris excellentius intellexisse laudatur (a). Is cum de humanis animis ageret, Pater, inquit, *miseri cordia mortalia illis vincula faciebat* (*Enneadis 4 libro 3, cap. 12*). Ita hoc ipsum quod mortales sunt homines corpore, ad misericordiam Dei patris pertinere arbitratus est, ne semper hujus vitæ miseria tenerentur. Hac misericordia indigna iudicata est iniquitas dæmonum, quæ in animi passivi miseria, non mortale, sicut homines, sed æternum corpus accipit. Essent quippe feliciores hominibus, si mortale cum eis haberent corpus, et cum diis beatum animum. Essent autem pares hominibus, si cum animo misero corpus saltem mortale cum eis habere meruissent; si tamen acquirerent aliquid pietatis, ut ab ærumnis vel in morte requiescerent. Nunc vero non solum feliciores hominibus non sunt animo misero, sed etiam miserioribus sunt perpetuo corporis vinculo. Non enim aliqua pietatis et sapientiæ disciplina proficientes, intelligi voluit ex dæmonibus fieri deos, cum apertissime dixerit dæmones æternos.

CAPUT XI. — *De opinione Platoniorum, qua putant animas hominum dæmones esse post corpora.*

Dicit quidem (b) et animas hominum dæmones esse, et ex hominibus fieri Lares, si boni meriti sunt; Lemures, si mali, seu Larvas: Manes autem deos dici, si incertum est honorum eos, seu malorum esse meritum. In qua opinione, quantam voraginem aperiant sectandis perditis moribus, quis non videat, si vel paululum attendat? Quandoquidem quamlibet nequam fuerint homines, vel Larvas se fieri dum opinantur, vel dum Manes deos; tanto peiores fiunt, quanto sunt nocendi cupidiores: ut etiam quibusdam sacrificiis tanquam divinis honoribus post mortem se invitari opinentur, ut noceant: Larvas quippe dicit esse noxios dæmones ex hominibus factos. Sed hinc alia quæstio est. Iude autem perhibet appellari græce beatos *εὐδαίμονας*, quod boni sint animi, hoc est boni dæmones; animos quoque hominum dæmones esse confirmans.

CAPUT XII. — *De ternis contrariis, quibus secundum Platonicos dæmonum et hominum natura distinguitur.*

Sed nunc de his agimus, quos in natura propria descripsit inter deos et homines genere animalia, mente rationalia, animo passiva, corpore aëria, tempore æterna. Nempe cum prius deos in sublimi cælo, homines autem in terra infima disjunctos locis, et naturæ dignitate secerneret, ita conclusit: *Habetis, inquit, interim bina animalia; deos ab hominibus plu-*

rimum differentes, loci sublimitate, vitæ perpetuitate, naturæ perfectione; nullo inter se propinquo communitate, cum et habitacula summa ab infimis tanta intercapedo fastigii dispeccat¹; et vivacitas illic æterna et indefecta sit, hic caduca et subciviva; et ingenia illa ad beatitudinem sublimata, hæc ad miseras infimata (*De deo Socratis*). Hic terna video commemorata contraria de duabus naturæ partibus ultimis, id est summis atque infimis. Nam tria quæ proposuit de diis laudabilia, eadem repetivit, aliis quidem verbis, ut eis alia tria adversa ex hominibus redderet. Tria deorum hæc sunt: loci sublimitas, vitæ perpetuitas, perfectio naturæ. Hæc aliis verbis ita repetivit, ut eis tria contraria humanæ conditionis opponeret: *Cum et habitacula, inquit, summa ab infimis tanta intercapedo fastigii dispeccat*: quia dixerat loci sublimitatem. *Et vivacitas illic, inquit, æterna et indefecta sit, hic caduca et subciviva*: quia dixerat vitæ perpetuitatem. *Et ingenia illa, inquit, ad beatitudinem sublimata, hæc ad miseras infimata*: quia dixerat naturæ perfectionem. Tria igitur ab eo posita sunt deorum, id est, locus sublimis, æternitas, beatitudo: et his contraria tria hominum, id est, locus infimus, mortalitas, miseria.

CAPUT XIII. — *Quomodo dæmones, si nec cum diis beati, nec cum hominibus sunt miseri, inter utramque partem sine utriusque communionis sint medii.*

1. Inter hæc terna deorum et hominum, quoniam dæmones medios posuit, de loco nulla est controversia: inter sublimem quippe et infimum, medius locus aptissime habetur et dicitur. Cætera bina restant, quibus cura attentior adhibenda est, quemadmodum vel aliena esse a dæmonibus ostendantur, vel sic eis distribuantur, ut mediætas videtur exposcere. Sed ab eis aliena esse non possunt. Non enim, sicut dicimus locum medium nec esse summum, nec infimum, ita dæmones cum sint animalia rationalia, nec beatos esse, nec miseros, sicuti sunt arbusta vel pecora, quæ sunt sensus vel rationis expertia, recte possumus dicere. Quorum ergo ratio mentibus inest, aut miseros esse, aut beatos necesse est. Item non possumus recte dicere, nec mortales esse dæmones, nec æternos. Omnia namque viventia aut in æternum vivunt, aut finiunt morte quod vivunt. Jam vero iste tempore æternos dæmones dixit. Quid igitur restat, nisi ut hi medii de duobus summis unum habeant, et de duobus infimis alterum? Nam si utraque de imis habebunt, aut utraque de summis, medii non erunt, sed in alterutram partem vel resiliunt, vel recumbunt². Quia ergo his binis, sicut demonstratum est, carere utrisque non possunt, acceptis ex utraque parte singulis mediabuntur. Ac per hoc quia de infimis habere non possunt æternitatem, quæ ibi non est unum hoc de summis habent: et ideo non est alterum ad complendam mediætas suam, quod de infimis habeant, nisi miseriam.

2. [XIII.] Est itaque, secundum Platonicos, sublimium deorum vel beata æternitas, vel æterna bea-

¹ Sic Am. et Mss. At Vind. Er. et Lov., *vicinus*. Porro Plotinus philosophus sub initium imperii Aureliani, hoc est anno Christi circiter 270 mortuus est, ut ex Porphyrio in ejus vita intelligitur.

(a) Conf. lib. 5 contra Academicos, n. 41.

(b) Nempè Apuleius, lib. de deo Socratis.

SANCT. AUGUST. VII.

¹ Apud Apuleium, *tanta intercapedine fastigii dispeccant*.

² Sola fere editio Lov. vel, *recumbent*:

(Neuf.)

titudo; hominum vero infimorum vel miseria mortalis, vel mortalitas misera: dæmonum autem mediorum vel misera æternitas, vel æterna miseria. Nam et quinque illis, quæ in definitione dæmonum posuit, non eos medios, sicut prômitebat, ostendit; quoniam tria dixit eos habere nobiscum, quod genere animalia, quod mente rationalia, quod animo passiva sunt; cum diis autem unum, quod tempore æterna; et unum proprium, quod corpore aëria. Quomodo ergo medii, quando unum habent cum summis, tria cum infimis? Quis non videat, relicta medietate, quantum inclinentur et deprimantur ad infima? Sed plane ibi etiam medii possunt ita inveniri, ut unum habeant proprium, quod est corpus aërium, sicut et illi de summis atque infimis singula propria, dii corpus ætherium, hominesque terrenum; duo vero communia sint omnibus, quod genere sunt animalia, et mente rationalia. Nam et ipse cum de diis et hominibus loqueretur, « Habetis » inquit, « bina animalia. » Et non solent isti deos nisi rationales mente perhibere. Duo sunt residua, quod sunt animo passiva, et tempore æterna: quorum habent unum cum infimis, cum summis alterum, ut proportionali ratione librata medietas neque sustollatur in summa, neque in infima deprimatur. Ipsa est autem illa dæmonum misera æternitas, vel æterna miseria. Qui enim ait, animo passiva, etiam misera dixisset, nisi eorum cultoribus¹ crudulisset. Porro quia providentia summi Dei, sicut etiam ipsi fatentur, non fortuito temeritate regitur mundus, nunquam esset istorum æterna miseria, nisi esset magna malitia.

3. Si igitur beati recte dicuntur eudæmones, non sunt eudæmones dæmones, quos inter homines et deos isti in medio locaverunt. Quis ergo est locus honorum dæmonum, qui supra homines, infra deos, istis præbeant adiutorium, illis ministerium? Si enim boni æternique sunt, profecto et beati sunt. Æterna autem beatitudo medios eos esse non sinit, quia multum diis comparat, multumque ab hominibus separat. Unde frustra isti conabuntur ostendere, quomodo dæmones boni, si et immortales sunt et beati, recte medii constituantur inter deos immortales ac beatos et homines mortales ac miseros. Cum enim utrumque habeant cum diis, et beatitudinem scilicet et immortalitatem, nihil autem horum cum hominibus et miseris et mortalibus; quomodo non potius remoti sunt ab hominibus, diisque conjuncti, quam inter utrosque medii constituti? Tunc enim medii essent, si haberent et ipsi duo quædam sua, non cum binis alterutrorum, sed cum singulis utrorumque communia: sicut homo medium quiddam est, sed inter pecora et Angelos; ut, quia pecus est animal irrationale atque mortale, angelus autem rationale et immortale, medius homo esset, inferior Angelis, superior pecoribus, habens cum pecoribus mortalitatem, rationem cum Angelis, animal rationale mortale. Ita ergo cum querimus medium inter beatos immortales miseros-

¹ Editi, pro eorum cultoribus. Abest, pro, a manuscriptis.

que mortales, hoc invenire debemus, quod aut mortale sit beatum, aut immortale sit miserum.

CAPUT XIV. — *An homines, cum sint mortales, possint vera beatitudine esse felices.*

Utrum autem et beatus et mortalis homo esse possit, magna est inter homines quæstio. Quidam enim conditionem suam humiliter inspexerunt, negaveruntque hominem capacem esse posse beatitudinis, quamdiu mortaliter vivit: quidam vero extulerunt se, et ausi sunt dicere, sapientiæ compotes, beatos esse posse mortales. Quod si ita est, cur non ipsi potius medii constituuntur inter mortales miseros et immortales beatos, beatitudinem habentes cum immortalibus beatis, mortalitatem cum mortalibus miseris? Profecto enim si beati sunt, invident nemini: (nam quid miserius invidentia?) et ideo mortalibus miseris, quantum possunt, ad consequendam beatitudinem consulunt¹; ut et etiam immortales valeant esse post mortem, et Angelis immortalibus beatisque conjungi.

CAPUT XV. — *De Mediatore Dei et hominum, homine Christo Jesu.*

1. Si autem, quod multo credibilis et probabilis disputatur, omnes homines, quamdiu mortales sunt, etiam miseri sint necesse est, querendus est medius, qui non solum homo, verum etiam Deus sit; ut homines ex mortali miseria ad beatam immortalitatem hujus medii beata mortalitas interveniendo perducatur. Quem neque non fieri mortalem oportebat, neque permanere mortalem. Mortalis quippe factus est, non infirmata Verbi divinitate, sed carnis infirmitate suscepta: non autem permansit in ipsa carne mortalis, quam resuscitavit a mortuis: quoniam ipse fructus est mediationis ejus, ut nec ipsi, propter quos liberandos mediator effectus est, in perpetua vel carnis morte remanerent. Proinde mediatorem inter nos et Deum, et mortalitatem habere oportuit transeuntem, et beatitudinem permanentem: ut per id quod transit, congrueret morituris; et ad id quod permanet, transferret ex mortuis. Boni igitur Angeli inter miseros mortales et beatos immortales medii esse non possunt; quia ipsi quoque et beati et immortales sunt: possunt autem medii esse angeli mali quia immortales sunt cum illis, miseri cum istis. His contrarius est Mediator bonus, qui adversus eorum immortalitatem et miseriam, et mortalis esse ad tempus voluit, et beatus in æternitate persistere potuit: ac sic eos et immortales superbos, et miseros noxios, ne immortalitatis jactantia seducerent ad miseriam, et suæ mortis humilitate et suæ beatitudinis benignitate destruxit in eis, quorum corda per suam fidem mundans, ab illorum immundissima dominatione liberavit.

2. Homo itaque mortalis et miser longe sejunctus ab immortalibus et beatis, quid eligat medium, per quod immortalitati et beatitudini copuletur? Quod possit delectare in dæmonum immortalitate, mise-

¹ Sic Mss. Editi vero, consulunt.

rum est : quod possit offendere in Christi mortalitate, jam non est. Ibi ergo cavenda est miseria sempiterna : hic mors timenda non est, quæ esse non potuit sempiterna, et beatitudo amanda est sempiterna. Ad hoc quippe se interponit medius immortalis et miser, ut ad immortalitatem beatam transire non sinat, quoniam persistit quod impedit, id est ipsa miseria : ad hoc autem se interposuit mortalis et beatus, ut mortalitate transacta, et ex mortuis faceret immortales, quod in se resurgendo monstravit, et ex miseris beatos, unde nunquam ipse discessit. Alius est ergo medius malus, qui separat amicos; alius bonus, qui reconciliat inimicos. Et ideo multi sunt medii separatores, quia multitudo quæ beata est, unius Dei participatione fit beata; cujus participationis privatione misera multitudo malorum angelorum, quæ se opponit potius ad impedimentum, quam interponit ad beatitudinis adiutorium, etiam ipsa multitudo obstrepit quodammodo, ne possit ad illud unum beatificum bonum perveniri, ad quod ut perduceremur, non multis, sed uno mediatore opus erat; et hoc eo ipso, cujus participatione simus beati, hoc est Verbo Dei non facto, per quod facta sunt omnia. Nec tamen ob hoc mediator est, quia Verbum : maxime quippe immortale et maxime beatum Verbum longe est a mortalibus miseris; sed mediator per quod homo : eo ipso utique ostendens ad illud non solum beatum, verum etiam beatificum bonum non oportere quæri alios mediatores, per quos arbitremur nobis porventionis gradus esse molliendos; quia beatus et beatificus Deus factus particeps humanitatis nostræ compendium præbuit participandæ divinitatis suæ. Neque enim nos a mortalitate et miseria liberans ad Angelos immortales beatosque ita perducit, ut eorum participatione etiam nos immortales et beati simus; sed ad illam Trinitatem, cujus et Angeli participatione beati sunt. Ideo quando in forma servi (*Phlipp. II, 7*), ut mediator esset, infra Angelos esse voluit, in forma Dei supra Angelos mansit : idem in inferioribus vitam, qui in superioribus vita.

CAPUT XVI. — *An rationabiliter Platonicæ definiunt deos caelestes, declinantes terrena contagia, hominibus non misceri, quibus ad amicitiam deorum demones suffragentur.*

Non enim verum est, quod idem Platonice ait dixisse Platonem, *Nullus deus miscetur homini*. Et hoc præcipuum eorum sublimitatis ait esse specimen, quod nulla atrectatione hominum contaminantur (*Apuleius, de deo Socratis*). Ergo demones contaminari fatetur : et ideo eos a quibus contaminantur, mundare non possunt, omnesque immundi pariter fiunt, et demones contractatione hominum, et homines culta demonom. Aut, si et contractari miscerique hominibus, nec tamen contaminari, demones possunt, diis profecto meliores sunt : quia illi, si miscerentur, contaminarentur. Nam hoc deorum dicitur esse præcipuum, ut eos sublimer separatos humana contractatio contaminare non possit. Deum

quidem summum omnium creatorem, quem nos verum Deum dicimus, sic a Platone prædicari asseverat, quod ipse sit solus qui non possit penuria sermonis humani quavis oratione vel modice comprehendere; vix autem sapientibus viris, cum se vigore animi, quantum licuit, a corpore removerint, intellectum huius Dei, et id quoque interdum velut in altissimis tenebris rapidissimo coruscamine lumen candidum intermicare (*De deo Socratis*). Si ergo supra omnia vere summus Deus intelligibili et ineffabili¹ quadam præsentia, etsi interdum, etsi tanquam rapidissimo coruscamine lumen candidum intermicans, adest tamen sapientium mentibus, cum se, quantum licuit, a corpore removerint, nec ab eis contaminari potest; quid est quod isti dii propterea constituuntur longe in sublimi loco, ne contractatione contaminentur humana? Quasi vero aliud corpora illa ætheria quam videre sufficiat, quorum luce terra, quantum sufficit, illustratur². Porro si non contaminantur sidera, cum videntur, quos deos omnes visibiles dicit; nec demones hominum contaminantur aspectu, quamvis de proximo videantur. An forte vocibus humanis contaminarentur, qui acie non contaminantur oculorum; et ideo demones medios habent, per quos eis voces hominum nuntientur, a quibus longe absunt, ut incontaminatissimi perseverent? Quid jam de ceteris sensibus dicam? Non enim olfaciendo contaminari vel dii possent, si adessent, vel cum adsunt demones, possunt vivorum corporum vaporibus humanorum, si tantis sacrificiorum cadaverinis non contaminantur nidoribus (*a*). In gustandi autem sensum³ nulla necessitate reficiendæ mortalitatis urgentur, ut fame adacti cibos ab hominibus quærant. Tactus vero in potestate est. Nam licet ab eo potissimum sensu contractatio dicta videatur, hactenus tamen, si vellent, miscerentur hominibus, ut viderent et viderentur, audirent et audirentur: tangendi autem quæ necessitas? nam neque homines id concupiscere auderent, cum deorum vel demonom honorum conspectu vel colloquio fruerentur: et, si in tantum curiositas progrediretur, ut vellent; quoniam pacto quispiam posset invitum tangere deum, vel demonem, qui nisi captum non potest passerem?

2. Videndo igitur visibusque se præbendo et loquendo et audiendo, dii corporaliter misceri hominibus possent. Hoc autem modo demones si miscerentur, ut dixi, et non contaminantur, dii autem contaminarentur, si miscerentur; incontaminabiles dicunt demones, et contaminabiles deos. Si autem contaminantur et demones, quid conferunt hominibus ad vitam post mortem beatam, quos contaminati mundare non possunt, ut eos mundos diis incontaminatis possint adungere, inter quos et illos medii constituti sunt? Aut si hoc eis beneficii non conferunt, quid prodest hominibus demonom amica me-

¹ Sic nostri omnes Mss. in B. deest, et ineffabili. M.

² Er. Ven., quasi corpora illa ætheria tactu tantum queant humano, et non etiam visu contaminari. M.

³ vind. Am. Er. et plerique manuscriptorum, sensu.

(a) vid. infra, lib. 10, cap. 11, n. 2.

diatio? an ut post mortem non ad deos homines per dæmones transeant, sed simul vivant utrique contaminati, ac per hoc neutri beati? Nisi forte quis dicat more spongiarum vel hujuscemodi rerum mundare dæmones amicos suos, ut tanto ipsi sordidiores fiant, quanto fiunt homines eis velut tergentibus mundiores. Quod si ita est, contaminationibus dii miscentur dæmonibus, qui ne contaminarentur, hominum propinquitatem contractationemque vitant. An forte dii possunt ab hominibus contaminatos mundare dæmones, nec ab eis contaminari, et eo modo non possent et homines? Quis talia sentiat, nisi quem fallacissimi dæmones deceperunt? Quid, quod si videri et videre contaminat, videntur ab hominibus dii, quos visibiles dicit (*De deo Socratis*), *clarissima mundi lumina* (*Virgil. Georg. lib. 1, vers. 5, 6*) et cætera sidera, tutioresque sunt dæmones ab ista hominum contaminatione, qui non possunt videri, nisi velint? Aut si non videri, sed videre contaminat, negent ab istis clarissimis mundi luminibus, quos deos opinantur, videri homines, cum radios suos terras usque pertendant. Qui tamen eorum radii per quæque immunda diffusi non contaminantur: et dii contaminarentur, si hominibus miscerentur, etiamsi esset necessarius in subveniendo contactus? Nam radiis solis et lunæ terra contingitur, nec istam contaminat lucem.

CAPUT XVII. — *Ad consequendam vitam beatam, quæ in participatione est summi boni, non tali mediatore indigere hominem qualis est dæmon, sed tali qualis unus est Christus.*

Miror autem plurimum tam doctos homines, qui cancta corporea et sensibilia, præ¹ incorporalibus et intelligibilibus, postponenda judicaverunt, cum agitur de beata vita, corporalium contractationum facere mentionem. Ubi est illud Plotini, ubi ait, *Fugiendum est igitur ad charissimam² patriam, et ibi pater, et ibi omnia? Quæ igitur, inquit, classis aut fuga? Similem deo fieri* (*Enneadis 1 lib. 6, cap. 8; lib. 2, cap. 3*). Si ergo deo quanto similior, tanto sit quisque propinquior; nulla est ab illo alia longinquitas quam ejus dissimilitudo. Incorporali vero illi æterno et incommutabili tanto est anima hominis dissimilior, quanto rerum temporalium mutabiliumque cupidior. [XVII.] Hoc ut sanetur, quoniam immortalis puritati, quæ in summo est, ea quæ in imo sunt mortalia et immunda convenire non possunt, opus est quidem mediatore; non tamen tali qui corpus quidem habeat immortale propinquum summis, animum autem morbidum similem infimis; quo morbo nobis invidet potius ne sanemur, quam adjuvet ut sanemur: sed tali qui nobis infimis ex corporis mortalitate coaptatus, immortalis spiritus justitia³, per quam non locorum distantia, sed similitudinis excellentia mansit in summis, mundandis liberandisque nobis vere divinum præbeat adjuto-

¹ Fr. et Lov. omittunt, præ.

² Editi, *clarissimam*. At Mss., *charissimam*: juxta græcum Plotini.

³ Plerique manuscripti, *immortalis spiritus justitia*.

rium. Qui profecto incontaminabilis Deus absit ut contaminationem timeret ex homine quo indutus est, aut ex hominibus inter quos in homine conversatus est⁴. Non enim parva sunt hæc interim duo, quæ salubriter sua incarnatione monstravit, nec carne⁵ posse contaminari veram divinitatem, nec ideo putandos dæmones nobis esse meliores, quia non habent carnem (a). Hic est, sicut eum prædicat sancta Scriptura, *Mediator Dei et hominum, homo Christus: Jesus* (1 Tim. 11, 5), de cujus et divinitate, qua Patri est semper æqualis, et humanitate, qua nobis factus est similis, non hic locus est ut compctenter pro nostra facultate dicamus.

CAPUT XVIII. *Quod fallacia dæmonum, dum sua intercessione viam spondet ad Deum, hoc annitatur, ut homines a via veritatis avertat.*

Falsi autem illi fallacesque mediatores dæmones, qui cum per spiritus immunditiam miseri ac maligni multis effectibus clareant, per corporalium tamen locorum intervalla et per æriorum corporum levitatem a propectu animorum nos avocare atque avertere moliantur, non viam⁶ præbent ad Deum; sed, ne via teneatur, impediunt. Quandoquidem et in ipsa via corporali, quæ falsissima est et plenissima erroris, qua non iter agit justitia; quoniam non per corporalem altitudinem, sed per spiritualem, hoc est incorporalem, similitudinem ad Deum debemus ascendere; in ipsa tamen corporali via, quam dæmonum amici per elementorum gradus ordinant, inter ætherios deos et terrenos homines æriis dæmonibus mediis constitutis, hoc deos opinantur habere præcipuum, ut propter hoc intervallum locorum contractatione non contaminentur humana. Ita dæmones contaminari potius ab hominibus, quam homines mundari a dæmonibus credunt, et deos ipsos contaminari potuisse, nisi loci altitudine munirentur. Quis tam infelix est, ut ista via mundari se existimet, ubi homines contaminantes, dæmones contaminati, dii contaminabiles prædicantur; et non potius eligat viam, ubi contaminantes magis dæmones evitentur, et ab incontaminabili Deo⁷ ad ineundam societatem incontaminatorum Angelorum homines a contaminatione mundentur?

CAPUT XIX. — *Quod appellatio dæmonum jam nec apud cultores eorum assumatur in significationem alicujus boni.*

Sed ne de verbis etiam nos certare videamur, quoniam nonnulli istorum, ut ita dixerim, dæmonicolarum, in quibus et Labco est, eosdem perhibent ab aliis angelos dici, quos ipsi dæmones nuncupant, jam mihi de bonis Angelis aliquid video disserendum, quos isti esse non negant, sed eos bonos dæmones vocare quam Angelos malunt. Nos autem, sicut Scriptura loquitur, secundum quæm christiani sumus, An-

¹ Nonnulli Mss. sed non melioris notæ, *inter quos homo conversatus est*.

² Sic Vind. Am. et Mss. At Fr. et Lov., *nec in carne*.

³ Lov., *et non viam*. Particula, *et*, abest ab aliis libris.

⁴ Sola editio Lov., *et ab incontaminabili Deo*.

(a) Conf. lib. 13 de Trinit., n. 22.

gelos quidem partim bonos, partim malos, nunquam vero bonos dæmones legimus : sed ubicumque illarum Litterarum hoc nomen positum reperitur, sive dæmones, sive dæmonia dicantur, non nisi maligni significantur spiritus. Et hanc loquendi consuetudinem in tantum populi usquequaque secuti sunt, ut eorum etiam qui Pagani appellantur, et deos multos ac dæmones colendos esse contendunt, nullus fere sit tam litteratus et doctus, qui audeat in laude vel servo suo dicere, Dæmonem habes (a) : sed cui libet hoc dicere voluerit, non se aliter accipi, quam maledicere voluisse, dubitare non possit. Quæ igitur nos² causa compellit, ut post offensionem aurius tam multarum, ut jam pene sint omnium, quæ hoc verbum non nisi in malam partem audire consueverunt, quod diximus cogamur exponere, cum possimus Angelorum nomine adhibito, eandem offensionem, quæ nomine dæmonum fieri poterat, evitare?

CAPUT XX. — *De qualitate scientiæ, quæ dæmones superbos facit.*

Quanquam etiam ipsa origo huius nominis, si divinos intueamur Libros, aliquid affert cognitione dignissimum. *δαίμων* enim dicuntur, quoniam vocabulum græcum est, ob scientiam nominati (b). Apostolus autem Spiritu sancto locutus ait, *Scientia inflat, charitas vero ædificat* (I Cor. viii, 1). Quod recte aliter non intelligitur, nisi scientiam tunc prodesse, cum charitas inest; sine hac autem inflare, id est in superbiam inanissimæ quasi ventositatis extollere. Est ergo in dæmonibus scientia sine charitate, et ideo tam inflati, id est tam superbi, sunt, ut honores divinos et religionis servitutem, quam vero Deo deberi sciunt, sibi sategerint³ exhiberi, et quantum possunt, et apud quos possunt, adhuc agunt. Contra superbiam porro dæmonum, qua pro meritis possidebatur genus humanum, Dei humilitas, quæ in forma servi apparuit⁴, quantum virtutem habeat, animæ hominum nesciunt immunditia elationis inflatæ, dæmonibus similes superbia, non scientia.

CAPUT XXI. — *Ad quem modum Dominus voluerit dæmonibus innotescere.*

Ipsi autem dæmones etiam hoc ita sciunt, ut eidem Domino infirmitate carnis induto dixerint : *Quid nobis et tibi, Jesu Nazarene? venisti ante tempus perdere nos*⁵ (Marc. i, 24; et Matth. viii, 29)? Clarum est in his verbis, quod in eis et tanta scientia erât, et charitas non erat. Pœnam quippe suam formidabant ab illo, non in illo justitiam diligebant. Tantum vero eis innotuit, quantum voluit: tantum autem voluit, quantum oportuit.

¹ Ms. 766, sed *quilibet hæc*. M.

² Mss. 766 et 2050, non. M.

³ Vind. et Mss., *satis egerint*. Sic aliis locis constanter, *satis ago*; pro, *satago*.

⁴ Vind. Am. Er. et plures manuscripti, *quæ in Christo apparuit*. Nonnulli veteres libri, *qui in Christo apparuit*. — Sic Corbeiensis. Sed A, B, C ut editum est. M.

⁵ Omnes Mss., *venisti perdere nos?* omisso, *ante tempus*.

(a) Coqueus hic notat consulendum Tertullianum, de Testim. animæ, cap. 3. M.

(b) Plato in Cratylo, *dæmones* dictos tradit quasi *dæmones*, id est peritos ac rerum scios. Vide Lactant., lib. 2 luit.

tuit. Sed innotuit, non sicut Angelis sanctis, qui ejus secundum id quod Dei Verbum est, participata æternitate perfruuntur (a); sed sicut eis terrendis innotescendum fuit, ex quorum tyrannica quodammodo potestate fuerat liberaturus prædestinatos in suum regnum et gloriam semper veracem et veraciter sempiternam. Innotuit ergo dæmonibus, non per id quod est vita æterna, et lumen incommutabile quod illuminat pios, cui videndo per fidem, quæ in illo est, corda mundantur; sed per quædam temporalia suæ virtutis effecta et occultissimæ signa præsentis, quæ angelicis sensibus etiam malignorum spirituum potius quam infirmitati hominum possent esse conspicua. Denique quando ea paululum supprimenda judicavit, et aliquanto altius latuit, dubitavit de illo dæmonum princeps, eumque tentavit, an Christus esset explorans, quantum se tentari ipse permisit, ut hominem quem gerebat, ad nostræ imitationis temperaret exemplum. Post illam vero tentationem, cum Angeli, sicut scriptum est, ministrarent ei (Matth. iv, 3-11), boni utique et sancti, ac per hoc spiritibus immundis metuendi et tremendi, magis magisque innotescerebat dæmonibus quantus esset, ut ei jubenti, quamvis in illo contemptibilis videretur carnis infirmitas, resistere nullus auderet.

CAPUT XXII. — *Quid intersit inter scientiam sanctorum Angelorum, et scientiam dæmonum.*

His igitur Angelis bonis omnis corporalium temporaliumque rerum scientia, qua inflantur dæmones, vilis est: non quod earum ignari sint, sed quod illis Dei, qua sanctificantur, charitas chara est, præ cuius non tantum incorporali, verum etiam incommutabili et ineffabili pulchritudine, cuius sancto amore inardescunt, omnia quæ infra sunt, et quod illud est non sunt, seque ipsos inter illa contemnunt, ut ex toto, quod boni sunt, eo bono, ex quo boni sunt, perfruuntur. Et ideo certius etiam temporalia et mutabilia ista noverunt; quia eorum principales causas in Verbo Dei conspiciunt, per quod factus est mundus: quibus causis quædam probantur, quædam reprobantur, cuncta ordinantur. Dæmones autem non æternas temporum causas et quodammodo cardinales in Dei Sipientia contemplantur; sed quorundam signorum nobis occultorum majore experientia multo plura quam homines futura prospiciunt. Dispositiones quoque suas aliquando prænuntiant. Denique sæpe isti, nunquam illi omnino falluntur. Aliud est enim temporalibus temporalia et mutabilia mutabilia conjectare, eisque temporalem et mutabilem modum¹ suæ voluntatis et facultatis inserere, quod dæmonibus certa ratione permixtum est: aliud autem in æternis atque incommutabilibus Dei legibus, quæ in ejus Sipientia vivunt, mutationes temporum prævidere, Deique voluntatem, quæ tam certissima quam potentissima est omnium², Spiritus ejus participa-

¹ Aliquot Mss., *motum*. — Sic Cd. 2051. M.

² Sic Er. et Mss. At Vind. Am. et Lov., *quam potentissima est, divini Spiritus*, etc.

(a) Conf. lib. 4 de Gen. ad Litt., nn. 49, 50; vide etiam cap. seq.

tionem cognoscere; quod sanctis Angelis recta discretionem donatum est. Itaque non solum æterni, verum etiam beati sunt. Bonum autem quo beati sunt, Deus illis est, a quo creati sunt. Illius quippe indeclinabiliter participatione et contemplatione perfruuntur.

CAPUT XXIII.—*Nomen deorum falso adscribi diis Gentium, quod tamen et Angelis sanctis et hominibus iustis ex divinarum Scripturarum auctoritate commune est.*

1. Hos si Platonici malunt deos quam dæmones dicere, eisque annumerare, quos a summo Deo conditos deos scribit eorum auctor et magister Plato (*In Timæo*); dicant quod volunt: non enim cum eis de verborum controversia laborandum est. Si enim sic immortales, ut tamen a summo Deo factos, etsi non per se ipsos, sed ei, a quo facti sunt, adhaerendo, beatos esse dicunt; hoc dicunt quod dicimus, quolibet eos nomine appellent. Hanc autem Platonicorum esse sententiam, sive omnium, sive meliorum, in eorum litteris inveniri potest. Nam et de ipso nomine, quo huiusmodi immortalium beatitudinem creaturam deos appellant; ideo inter nos et ipsos pene nulla dissensio est, quia et in nostris sacris Litteris legitur, *Deus deorum Dominus locutus est* (*Psal. xlii, 1*); et alibi, *Confitemini Deo deorum* (*Psal. cxxxv, 2*). Et alibi, *Rex magnus super omnes deos* (*Psal. xciv, 3*). Illud autem ubi scriptum est, *Terribilis est super omnes deos*; cur dictum sit, deinceps ostenditur. Sequitur enim, *Quoniam omnes dii gentium dæmonia, Dominus autem caelos fecit* (*Psal. xcv, 4, 5*). Super omnes ergo deos dixit, sed gentium, id est, quos gentes pro diis habent, quæ sunt dæmonia: ideo *terribilis*, sub quo terrore Domino dicebant, *Venisti perdere nos* (*Marc. 1, 24*)? Illud vero ubi dicitur, *Deus deorum*, non potest intelligi Deus dæmoniorum: et *Rex magnus super omnes deos*, absit ut dicatur Rex magnus super omnia dæmonia. Sed homines quoque in populo Dei, eadem Scriptura deos appellat. *Ego, inquit, dixi, Tu estis, et filii Excelsi omnes* (*Psal. lxxxii, 6*). Potest itaque intelligi horum deorum Deus, qui dictus est *Deus deorum*: et super hos deos Rex magnus, qui dictus est *Rex magnus super omnes deos*.

2. Veruntamen cum a nobis quaeritur, si homines dicti sunt dii, quod in populo Dei sunt, quem per Angelos vel per homines alloquitur Deus; quanto magis immortales eo nomine digni sunt, qui ea fruuntur beatitudine, ad quam Deum colendo cupiunt homines pervenire? quid respondebimus, nisi non frustra in Scripturis sanctis expressius homines nuncupatos deos, quam illos immortales et beatos, quibus nos æquales futuros in resurrectione promittitur, ne scilicet propter illorum excellentiam aliquem eorum nobis constituere deum infidelis auderet infirmitas?

Quod in homine facile est evitare. Et evidentius dici debuerunt homines dii in populo Dei, ut certi ac confidentes fierent, eum esse Deum suum, qui dictus est *Deus deorum*: quia, etsi appellentur dii immortales illi et beati, qui in caelis sunt (a); non tamen dicti sunt dii deorum, id est dii hominum in populo Dei constitutorum, quibus est dictum, *Ego dixi, Dii estis, et filii Excelsi omnes*. Hinc est quod ait Apostolus: *Etsi sunt qui dicuntur dii, sive in caelo, sive in terra; sicuti sunt dii multi, et domini multi: nobis tamen unus Deus Pater, ex quo omnia, et nos in ipso; et unus Dominus Jesus Christus, per quem omnia, et nos per ipsum* (*I Cor. viii, 5, 6*).

3. Non multum ergo de nomine disceptandum est, cum res ipsa ita clareat, ut a scrupulo dubitationis aliena sit. Illud vero, quod nos ex eorum immortalium beatorum numero missos Angelos esse dicimus, qui Dei voluntatem hominibus annuntiarent, illis autem non placet, quia hoc ministerium non per illos quos deos appellant, id est immortales et beatos, sed per dæmones fieri credunt, quos immortales tantum, non etiam beatos audent dicere; aut certe ita immortales ac beatos, ut tamen dæmones bonos, non deos sublimiter collocatos et ab humana contractione semotos: quamvis nominis controversia videatur, tamen ita detestabile est nomen dæmonum, ut hoc modis omnibus a sanctis Angelis nos removere debeamus. Nunc ergo ita liber iste claudatur, ut sciamus immortales ac beatos, quodlibet¹ voentur, qui tamen facti et creati sunt, medios non esse ad immortalium beatitudinem perducendis mortalibus miseris, a quibus utraque differentia separantur. Qui autem medii sunt communem habendo immortalitatem cum superioribus, miseriam cum inferioribus, quoniam merito malitia sunt miseri, beatitudinem quam non habent, invidere nobis possunt potius quam præbere. Unde nihil habent amici dæmonum quod nobis dignum afferant, cur eos tanquam adiutores colere debeamus, quos potius ut deceptores evitare debemus. Quos autem bonos, et ideo non solum immortales, verum etiam beatos deorum nomine sacris et sacrificiis propter vitam beatam post mortem adipiscendam colendos putant, qualescumque illi sint, et quolibet vocabulo digni sunt, non eos velle per tale religionis obsequium nisi unum Deum coli, a quo creati et cuius participatione beati sunt, adjuvante ipso, in sequenti libro diligentius disseremus.

¹ Particula, *autem*, desideratur in sola editione Lov.

² Editi, *quomodolibet*. Et infra, *ad immortalitatem beatitudinemque perducendis*, etc. At Miss., *quodlibet... ad immortalitatem beatitudinem perducendis*, etc.

(a) Illud Origenem, Homil. 8 in Exod., ex sacris Litteris docere animadvertit Coquæus. M.



LIBER DECIMUS.

In quo docet Augustinus divinum honorem, qui latris cultus dicitur et sacrificiis agitur, nolle Angelos bonos exhiberi nisi uni Deo, cui et ipsi serviunt. De principio subinde ac via purgandæ ac liberandæ animæ disputat contra Porphyrium.



CAPUT PRIMUM. — *Veram beatitudinem sive Angelis, sive hominibus, per unum Deum tribui, etiam Platonicos definisse: sed utrum hi, quos ob hoc ipsum colendos putant, uni tantum Deo, an etiam sibi sacrificari velint, esse querendum.*

1. Omnium certa sententia est, qui ratione quoquo modo uti possunt, beatos esse omnes homines velle. Qui autem sint, vel unde fiant, dum mortalium quærit infirmitas, multæ magnæque controversiæ concitatae sunt, in quibus philosophi sua studia et otia contriverunt; quas in medium adducere atque discutere, et longum est, et non necessarium. Si enim recolit qui hæc legit, quid in libro cgerinus octavo in eligendis philosophis, cum quibus hæc de beata vita, quæ post mortem futura est, quæstio tractaretur, utrum ad eam uni Deo vero, qui etiam est deorum effector, an plurimis diis religione sacrificando, pervenire possimus; non etiam hic eadem repeti exspectat, præsertim cum possit relegendo, si forte oblitus est, adminiculari ¹ memoriam. Elegimus enim Platonicos omnium philosophorum merito nobilissimos: propterea, quia sicut ² sapere potuerunt, licet immortalem ac rationalem vel intellectualem hominis animam, nisi participato lumine illius Dei, a quo et ipsa et mundus factus est, beatam esse non posse; ita illud quod omnes homines appetunt, id est vitam beatam, quemquam isti assecutorum negant, qui non illi uni optimo, qui est incommutabilis Deus, puritate casti amoris adhæserit. Sed quia ipsi quoque sive cedentes vanitati errorique populorum, sive, ut ait Apostolus, evanescentes in cogitationibus suis (*Rom. 1, 21*), multos deos colendos ita putaverunt, vel putari voluerunt, ut quidam eorum etiam dæmonibus divinos honores sacrorum et sacrificiorum deferendos esse censerent, quibus jam non parva ex parte respondimus: nunc videndum ac disserendum est, quantum Deus donat, immortales ac beati in cælestibus sedibus, dominationibus, principatibus, potestatibus constituti, quos isti deos, et ex quibus quosdam vel bonos dæmones, vel nobiscum Angelos dominant, quomodo credendi sint velle a nobis religionem pietatemque servari; hoc est, ut apertius dicam, utrum etiam sibi, an tantum Deo suo, qui etiam noster est, placeat eis ut sacra faciamus et sacrificemus, vel aliqua nostra seu nos ipsos religionis ritibus consecremus.

2. Hic est enim divinitati vel, si expressius dicendum est, deitati debitus cultus, propter quem uno verbo significandum, quoniam mihi satis idoneum non occurrit latinum, græco ubi necesse est insinuo quid velim

¹ Plures Mss., *adjuvare*. Nostri Mss., *adminiculari*. M.

² Particula, *sicut*, abest a manuscriptis, et ab editis Vind. Am. Er. — Abest etiam a nostris manuscriptis, cum magno elocutionis commodo; sequens, *ita*, sic accipiendum est ac si dixisset, *proinde*. M.

dicere. *Λατρεία* quippe nostri, ubicumque sanctarum Scripturarum positum est, interpretati sunt Servitutum. Sed ea servitus, quæ debetur hominibus, secundum quam præcipit Apostolus, servos dominis suis subditos esse debere (*Ephes. vi, 5*), alio nomine græce nuncupari solet (a): *λατρεία* vero secundum consuetudinem qua locuti sunt qui nobis divina eloquia condiderunt, aut semper, aut tam frequenter ut pene semper, ea dicitur servitus quæ pertinet ad colendum Deum. Proinde si tantummodo Cultus ipse dicatur, non soli Deo deberi videtur. Dicimur enim colere etiam homines, quos honorifica vel recordatione vel præsentia frequentamus: Nec solum ea quibus nos religiosa humilitate subjicimus, sed quædam etiam quæ subjecta sunt nobis, coli perhibent. Nam ex hoc verbo et agricolæ et coloni et incolæ vocantur: et ipsos deos non ob aliud appellant cœlicolas, nisi quod cœlum colant; non utique venerando, sed inhabitando; tanquam cœli quosdam colonos: non sicut appellantur coloni, qui conditionem debent genitrali solo propter agriculturam sub dominio possessorum (b); sed, sicut ait quidam latini eloquii magnus auctor,

Urbs antiqua fuit, Tyrii tenuere coloni.

(*Virg. Æneid. l. 1, v. 12.*)

Ab incolendo enim colonos vocavit, non ab agricultura. Hinc et civitates a majoribus civitatibus velut populorum examinibus conditæ, coloniæ nuncupantur. Ac per hoc cultum quidem non deberi nisi Deo, propria quadam notione verbi hujus omnino verissimum est: sed quia et aliarum rerum dicitur cultus, ideo latine uno verbo significari cultus Deo debitus non potest.

3. Nam et ipsa Religio quamvis distinctius non quemlibet, sed Dei cultum significare videatur; unde isto nomine interpretati sunt nostri eam quæ græce *θερησιας* dicitur (c): tamen quia latina loquendi consuetudine, non imperitorum ¹, verum etiam doctissimorum, et

¹ Editi, *non solum imperitorum*. Abest, *solum*, a manuscriptis.

(a) Nempe *δουλεία*, ut in eo quem supra citat Apostoli loco, græce est, *οι δουλοι, servi*. Idipsum passim observat Augustinus: in Exodum quæst. 94: «*Douleia*, inquit, debetur Deo tanquam Domino, *latreia* vero non nisi Deo tanquam Deo.» Item in Gen. quæst. 61, et in lib. 15 contra Faust., n. 9; lib. 20, n. 21; in epist. 102, n. 20, et alibi.

(b) Hæc vox non fuit in usu apud veteres Græcos. *Thréskeian* describit Div. Jacobi Epistola, cap. 1, γ. 27.

LARCHER.

(c) Sophocles in *Philocæta*, vers. 1440-1444:

. Τοῦτο δ' ἔνεκατ' ὅ . . .
 εὐσεβεῖν τὰ πρὸς θεούς.
 Ὡς πᾶντα πάντα δεύτερ' ἠγέλται πατὴρ
 Ζεὺς· οὐ γὰρ ἠύσεια σωθῆναι βροτοῖς,
 Κἂν ζῶσι, κἂν δάσωνται, οὐκ ἀπόλλυται.

Id est: Hoc autem meminertis... ut pietatem erga deos colatis; huic evangetia omnia posteriora ducit pater Jupiter: quippe pietas haud una cum hominibus occidit; sed, sem vivat, seu mortui sint, ipsa nunquam perit. LARCHER.

cognationibus humanis atque affinitatibus et quibusque necessitudinibus dicitur exhibenda religio; non eo vocabulo vitatur ambiguum, cum de cultu deitatis vertitur quaestio, ut fidenter dicere valeamus, religionem non esse nisi Dei cultum; quoniam videtur hoc verbum a significanda observantia propinquitatis humanae insolenter¹ auferri. Pietas quoque proprie Dei cultus intelligi solet, quam Graeci εὐσεβεια vocant. Haec tamen et erga parentes officiose haberi dicitur. More autem vulgi hoc nomen etiam in operibus misericordiae frequentatur: quod ideo arbitrari evenisse, quia haec fieri praecipue Deus mandat, eaque sibi vel pro sacrificiis, vel pro sacrificiis placere testatur. Ex qua loquendi consuetudine factum est, ut et Deus ipse dicatur pius (II Par. xxx, 9; Eccli. xi, 15; Judith. vii, 20): quem sane Graeci nullo suo sermonis usu εὐσεβειαν vocant; quamvis εὐσεβειαν pro misericordia illorum etiam vulgus usurpet. Unde in quibusdam Scripturarum locis, ut distinctio certior appareret, non εὐσεβεια, quod ex bono cultu, sed θεοσεβεια, quod ex Dei cultu compositum resonat, dicere maluerunt (a). Utrumlibet autem horum nos uno verbo enuntiare non possumus. Quae itaque λατρεία graece nuncupatur, et latine interpretatur Servitus, sed ea qua colimus Deum: vel qua θρησκεία graeco, latine autem Religio dicitur, sed ea qua nobis est erga Deum: vel quam illi θεοσεβεια, nos vero non uno verbo exprimere, sed Dei cultum possumus appellare; hanc ei tantum Deo debere dicimus, qui verus est Deus, facitque suos cultores deos (Psal. lxxxii, 6; Joan. x, 34, 35). Quicumque igitur sunt in caelestibus habitationibus immortales et beati, si nos non amant nec beatos esse nos volunt, colendi utique non sunt. Si autem amant et beatos volunt, profecto inde volunt, unde et ipsi sunt: an aliunde ipsi beati, aliunde nos?

CAPUT II. — De superna illuminatione quid Plotinus Platonius senserit.

Sed non est nobis ullus cum his excellentioribus philosophis in hac quaestione confictus. Viderunt enim, suisque litteris multis modis copiosissime mandaverunt, hinc illos, unde et nos, fieri beatos, obiecto quodam lumine intelligibili, quod Deus est illis, et aliud est quam illi, a quo illustrantur, ut clareant, atque ejus participatione perfecti beatique subsistant. Saepe multumque Plotinus asserit sensum Platonis explanans, ne illam quidem, quam credunt esse universitatis animam, aliunde beatum esse quam nostram: idque esse lumen quod ipsa non est, sed a quo creata est, et quo intelligibiliter illuminante intelligibiliter lucescit. Dat etiam similitudinem ad illa incorporea de his caelestibus conspicuis² amplisque corporibus, tanquam nil sit sol, et ipsa sit luna. Lunam quippe solis objectu illuminari putant. Dicit ergo ille magnus Platonius, animam rationalem (sive potius intellectualis dicenda sit, ex quo genere etiam immortalium beatorumque animas esse intelligit, quos³ in caelestibus sedibus ha-

bitare non dubitat) non habere supra se naturam nisi Dei, qui fabricatus est mundum, a quo et ipsa facta est: nec aliunde illis supernis praebere vitam beatam, et lumen intelligentiae veritatis, quam unde praebetur et nobis; consonans Evangelio, ubi legitur, *Fuit homo missus a Deo, cui nomen erat Joannes: hic venit in testimonium, ut testimonium perhiberet de lumine, ut omnes crederent per eum. Non erat ille lumen, sed ut testimonium perhiberet de lumine. Erat lumen verum, quod illuminat omnem hominem venientem in hunc mundum.* In qua differentia satis ostenditur, animam rationalem vel intellectualem, qualis erat in Joanne, sibi lumen esse non posse, sed alterius veri luminis participatione lucere. Hoc et ipse Joannes fatetur, ubi ei perhibens testimonium dicit: *Nos omnes de plenitudine ejus accepimus (Joan. i, 6-9, 16).*

CAPUT III. — De vero Dei cultu, a quo Platonici, quamvis creatorem universitatis intellexerint, deviarunt colendo angelos sive bonos sive malos honore divino.

1. Quae cum ita sint, si Platonici, vel quicumque alii ista senserunt, cognoscentes Deum, sicut Deum glorificarent, et gratias agerent, ne evanescerent in cogitationibus suis, nec populorum erroribus partim auctores fierent, partim resistere non auderent; profecto confiterentur, et illis immortalibus ac beatis, et nobis mortalibus ac miseris, ut immortales ac beati esse possimus, unum Deum deorum colendum, qui et noster est et illorum.

2. [IV.] Huic nos servitatem, quae λατρεία graeco dicitur, sive in quibusque sacramentis, sive in nobis ipsis debemus. Hujus enim templum simul omnes, et singuli templa sumus (I Cor. iii, 16, 17); quia et omnium concordiam, et singulos inhabitare dignatur: non in omnibus quam in singulis major; quoniam nec mole distenditur, nec partitione minuitur. Cum ad illum sursum est, ejus est altare cor nostrum: ejus Unigenito eum sacerdote placamus: ei creantas victimas caedimus, quando usque ad sanguinem pro ejus veritate certamus: ei suavissimum adolemus incensum¹, cum in ejus conspectu pio sanctoque amore flagramus: ei dona ejus in nobis, nosque ipsos vovemus, et reddimus: ei beneficiorum ejus solemnitatibus festis et diebus statutis dicamus sacramusque memoriam, ne volumine temporum ingrata subrepat oblivio: ei sacrificamus hostiam humilitatis et laudis in ara cordis igne fervidae² charitatis. Ad hunc videndum, sicut videri potest, cique cohaerendum, ab omni peccatorum et cupiditatum malarum labe mundamur, et ejus nomine³ consecramur. Ipse enim fons nostrae beatitudinis, ipse omnis appetitionis est fons. Hunc eligentes, vel potius religentes, amiseramus enim negligentes: hunc ergo religentes, unde et religio dicta perhibetur (a), ad eum dilectione tendimus, ut perve-

¹ Nostri omnes Mss., eum suavissimo adolemus incenso. M.

² Aliquot Mss., fervidam. Et nonnulli, fervida.

³ Libri quidam, nonini.

¹ Nonnulli Mss., insolenter.

² Vox, conspicuis, abest a plerisque Mss.

³ Fr. et Lov., qua. Alii libri, quos. — sic etiam nostri codices. M.

(a) Conf. Enchirid., n. 1, cap. 2, de loco Job xxvii, 28.

(a) Cicero, lib. 2, de Nat. deor., cap. 28, religionem a relegendo dictam putat: « Qui omnia, » inquit, « quae ad cultum Dei pertinent, diligenter pertractarent, et quasi relegerent, sunt dicti religiosi ex relegendo. » At Lactan-

niendo quiescimus : ideo beati, quia illo fine perfecti. Bonum enim nostrum, de ejus fine inter philosophos magna contentio est, nullum est aliud, quam illi coherere : cujus unius anima intellectualis incorporeo, si dici potest, amplexu, veris impletur secundaturque virtutibus. Hoc bonum diligere in toto corde, in tota anima, et in tota virtute præcipitur. Ad hoc bonum debemus, et a quibus diligimur duci, et quos diligimus ducere. Sic complentur duo illa præcepta, in quibus tota Lex pendet et Prophetæ : *Diliges Dominum Deum tuum in toto corde tuo, et in tota anima tua, et in tota mente tua*; et, *Diliges proximum tuum tanquam te ipsum* (*Matth. xxii, 37-40*). Ut enim homo sese diligere nosset, constitutus est ei finis quo referret omnia quæ ageret, ut beatus esset. Non enim qui se diligit, aliud esse vult quam beatus. Hic autem finis est adhærere Deo (*Psal. lxxii, 28*). Jam igitur scienti diligere se ipsum, cum mandatur de proximo diligendo sicut se ipsum, quid aliud mandatur, nisi ut ei, quantum potest, commendet diligendum Deum (a)? Hic est Dei cultus, hæc vera religio, hæc recta pietas, hæc tantum Deo debita servitus. Quæcumque igitur immortalis potestas quantalibet virtute prædita, si nos diligit sicut se ipsam, ei vult esse subditos, ut beati simus, cui et ipsa subdita beata est (b). Si ergo non colit Deum, misera est, quia Deo privatur : si autem colit Deum, non vult se coli pro Deo. Illi enim potius divinæ sententiæ suffragatur, et dilectionis viribus favet, qua scriptum est : *Sacrificans diis eradicabitur, nisi Domino soli* (*Exod. xxii, 20*).

CAPUT IV. — *Quod uni vero Deo sacrificium debeatur.*

Nam, ut alia nunc taceam, quæ pertinent ad religionis obsequium, quo colitur Deus; sacrificium certe nullus hominum est qui audeat dicere deberi, nisi Deo¹. Multa denique de cultu divino usurpata sunt, quæ honoribus deferrentur humanis, sive humilitate uimiam, sive adulatione pestifera; ita tamen ut quibus ea deferrentur, homines haberentur, qui dicuntur colendi et venerandi; si autem eis multum additur, et adorandi : quis vero sacrificandum censuit, nisi ei quem Deum aut scilicet, aut putavit, aut finxit? Quam porro antiquus sit in sacrificando Dei cultus, duo illi fratres Cain et Abel satis indicant, quorum majoris Deus reprobavit sacrificium, minoris aspexit (c).

CAPUT V. — *De sacrificiis quæ Deus non requirit, sed ad significationem eorum observari voluit quæ requirit.*

Quis autem ita desipiat, ut existimet aliquibus usibus Dei esse necessaria quæ in sacrificiis offeruntur? Quod cum multis locis divina Scriptura testetur, ne longum faciamus, breve illud de Psalmo commemorare suffecerit : *Dixi Domino, Deus meus es tu; quoniam bonorum meorum non egres* (*Psal. xv, 2*). Non so-

tius, Institutionum lib. 4, cap. 28, a religando religionem mavult esse nominatum. Vid. lib. 1 *Retract.*, cap. 13, n. 9.

¹ Editi, nisi Deo (vel, Domino) soli. Hic vox, soli, non est in manuscriptis.

(a) Vid. epist. 133, n. 11 imprimis et seqq.

(b) Conf. lib. 1 de Doctr. Christ., n. 50.

(c) Conf. epist. 103, n. 17, quæst. 5, et capp. seqq. 5 et 6.

lum igitur pecore, vel qualibet alia re corruptibili atque terrena, sed ne ipsa quidem justitia hominis Deus egere credendus est, totumque quod recte colitur Deus, homini prodesse, non Deo. Neque enim fonti se quisquam dixerit profuisse¹, si biberit; aut luci, si viderit. Nec quod ab antiquis patribus talia² sacrificia facta sunt in victimis pecorum, quæ nunc Dei populus legit, non facit³, aliud intelligendum est, nisi rebus illis eas res fuisse significatas, quæ aguntur in nobis, ad hoc⁴ ut inhæreamus Deo, et ad eundem finem proximo consulamus. Sacrificium ergo visibile invisibilis sacrificii sacramentum, id est sacrum signum, est. Unde ille pœnitens apud prophetam, vel ipse propheta quærens Deum peccatis suis habere propitium: *Si voluisses, inquit, sacrificium, dedissem utique; holocaustis non delectaberis. Sacrificium Deo spiritus contritulus; cor contritum et humiliatum Deus non spernet* (a) (*Psal. li, 18, 19*). Intueamur quemadmodum ubi Deum dixit nolle sacrificium, ibi Deum ostendit velle sacrificium. Non vult ergo sacrificium trucidati pecoris, sed vult sacrificium contriti cordis. Illo igitur quod eum nolle dicit, hoc significatur quod eum velle subjecit. Sic itaque illa Deum nolle dixit, quomodo ab stultis ea velle creditur, velut suæ gratia voluptatis. Nam si ea sacrificia quæ vult, quorum hoc unum est, cor contritum et humiliatum dolore pœnitendi, nollet eis sacrificiis⁵ significari, quæ velut sibi delectabilia desiderare putatus est, non utique de his offerendis in Lege veteri præcepisset. Et ideo mutanda erant opportuno certoque jam tempore, ne ipsi Deo desiderabilia, vel certe in nobis acceptabilia, ac non potius quæ his significata sunt, crederentur. Hinc et alio loco psalmi alterius : *Si esuriero, inquit, non dicam tibi; meus est enim orbis terræ, et plenitudo ejus. Numquid manducabo carnes taurorum, aut sanguinem hircorum potabo* (*Psal. xlix, 12 et 13*)? tanquam diceret, Utique si mihi necessaria essent, non a te peterem, quæ habeo in potestate. Deinde subjungens quid illa significent : *Immola, inquit, Deo sacrificium laudis, et redde Altissimo vota tua. Et invoca me in die tribulationis, et eximam te, et glorificabis me* (*Ibid., 14, 15*). Item apud alium prophetam : *In quo, inquit, apprehendam Dominum, assumam Deum meum excelsum? Si apprehendam illum in holocaustis, in vitulis aniculis? si acceptaverit Dominus in millibus arietum, aut in denis millibus hircorum pinguium? si dederit primogenita mea pro impietate mea⁶, fructum ventris mei pro peccato animæ meæ? si annuntiatum est tibi, homo, bonum, aut quid Dominus exquirat a te, nisi facere judicium⁷, et diligere misericordiam, et paratum esse ire cum Domino Deo tuo* (*Michæ vi, 6-8*)? Et in

¹ Omnes Mss., consuluisset.

² Manuscripti, alia.

³ Vind. Am. Er., populus legitime non facit.

⁴ Lov., ad hoc tantum. Abest, tantum, a cæteris libris.

⁵ Plures Mss., eis sibi sacrificiis.

⁶ Non pauci Mss., primogenita impietatis; omisso, pro, et, mea.

⁷ Apud Lov. additur, et justitiam; quod hic a cæteris libris et a Scriptura sacra abest.

(a) Græce, ouk exoudensci.

hujus prophetæ verbis utrumque distinctum est, satisfactione declaratum, illa sacrificia per se ipsa non requirere Deum, quibus significantur hæc sacrificia quæ requirit Deus. In Epistola quæ inscribitur ad Hebræos (a), Bene facere, inquit, et communicatores esse nolite oblivisci: talibus enim sacrificiis placetur Deo¹ (Hebr. xiii, 16). Ac per hoc ubi scriptum est, Misericordiam volo² quam sacrificium (Osee vi, 6); nihil aliud quam sacrificio sacrificium prælatum oportet intelligi: quoniam illud quod ab omnibus appellatur sacrificium, signum est veri sacrificii. Porro autem misericordia verum sacrificium est: unde dictum est quod paulo ante commemoravi, Talibus enim sacrificiis placetur Deo. Quæcumque igitur in ministerio tabernaculi sive templi multis modis de sacrificiis leguntur divinitus esse præcepta, ad dilectionem Dei et proximi significantur³ referuntur. In his enim duobus præceptis, ut scriptum est, tota Lex pendet et Prophetæ (Matth. xxii, 40).

CAPUT VI. — De vero perfectoque sacrificio.

Proinde verum sacrificium est omne opus, quod agitur⁴, ut sancta societate in hæreamus Deo, relatum scilicet ad illum finem boni, quo veraciter beati esse possimus. Unde et ipsa misericordia qua homini subvenitur, si propter Deum non fit, non est sacrificium. Etsi enim ab homine fit vel offertur, tamen sacrificium res divina est: ita ut hoc quoque vocabulo id Latini veteres appellaverint. Unde ipse homo Dei nomine⁵ consecratus, et Deo votus⁶, in quantum mundo moritur ut Deo vivat, sacrificium est. Nam et hoc ad misericordiam pertinet, quam quisque in se ipsum facit. Propterea scriptum est: Misere animæ tuæ placens Deo (Eccli. xxx, 24). Corpus etiam nostrum cum per temperantiam castigamus⁷, si hoc, quemadmodum debemus, propter Deum facimus, ut non exhibeamus membra nostra arma iniquitatis peccato, sed arma justitiæ Deo (Rom. vi, 13), sacrificium est. Ad quod exhortans Apostolus ait: Obsecro itaque vos, fratres, per miserationem Dei, ut exhibeatis corpora vestra hostiam vivam, sanctam, Deo placentem, rationabile obsequium vestrum. Si ergo corpus, quo inferiore tanquam famulo, vel tanquam instrumento utitur anima, cum ejus bonus et rectus usus ad Deum refertur, sacrificium est; quanto magis anima ipsa cum se refert ad Deum, ut igne amoris ejus accensa, formam concupiscentiæ sæcularis amittat, eique tanquam incommutabili formæ subdita reformetur, hinc ei placens,

¹ Editi, placatur Deus. At Mss., placetur Deo: nec minus apte respondet græco, εὐαρεσκῆται ο θεός, quod est, conciliatur Deus.

² Editi, magis volo. Abest, magis, a Mss.

³ Viud. Am. Er. et Mss., significando.

⁴ Plerique Mss., quo agitur.

⁵ Editi, nomini. Castigantur ex manuscriptis et ex alio simili loco supra, cap. 3.

⁶ Sic Mss. At editi, Deo devotus.

⁷ Nostri Mss., cum temperantia castigamus. M.

(a) hæc citandi ratione significari dicit Lud. Vives, incertum esse auctorem Epistolæ ad Hebræos: quam tamen inter Paulinas quatuordecim numerat incluctanter Augustinus in libro secundo de Doctrina Christiana, n. 13. Et vero hic nonnulli probæ notæ manuscripti, Corheiensis, Colbertinus, etc., non habent, inscribitur; sed, scribitur.

quod ex ejus pulchritudine acceperit, fit sacrificium? Quod idem apostolus consequenter adjungens: Et nolite, inquit, conformari huic sæculo: sed reformamini in novitate mentis vestræ, ad probandum vos¹ quæ sit voluntas Dei, quod bonum et beneplacitum, et perfectum (Rom. xii, 1, 2). Cum igitur vera sacrificia opera misericordiæ, sive in nos ipsos, sive in proximos, quæ referuntur ad Deum; opera vero misericordiæ non ob aliud fiunt, nisi ut a miseria liberemur, ac per hoc ut beati simus; quod non fit, nisi bono illo de quo dictum est, Mihi autem adherere Deo bonum est (Psal. lxxii, 28): profecto efficitur, ut tota ipsa redempta civitas, hoc est congregatio societasque sanctorum, universale sacrificium offeratur Deo per sacerdotem magnum, qui etiam se ipsum obtulit in passione pro nobis, ut tanti capitis corpus essemus, secundum formam servi. Hanc enim obtulit, in hac oblati est; quia secundum hanc mediator est, in hac sacerdos, in hac sacrificium est. Cum itaque nos hortatus esset Apostolus, ut exhibeamus corpora nostra hostiam vivam, sanctam, Deo placentem, rationabile obsequium nostrum, et non conformemur huic sæculo, sed reformemur in novitate mentis nostræ; ad probandum quæ sit voluntas Dei, quod bonum et beneplacitum et perfectum, quod totum sacrificium ipsi nos sumus: Dico enim, inquit, per gratiam Dei, quæ data est mihi, omnibus qui sunt in vobis, non plus sapere, quam oportet sapere, sed sapere ad temperantiam; sicut unicusque Deus partitus est fidei mensuram. Sicut enim in uno corpore multa membra habemus, omnia autem membra non eisdem actus habent: ita multi unum corpus sumus in Christo; singuli autem, alter alterius membra, habentes dona diversa secundum gratiam, quæ data est nobis (Rom. xii, 3-6). Hoc est sacrificium Christianorum: multi unum corpus in Christo. Quod etiam Sacramento altaris fidelibus noto frequentat Ecclesia, ubi ei demonstratur, quod in ea re quam offert², ipsa offeratur.

CAPUT VII. — Quod sanctorum Angelorum ea sit in nos dilectio, ut nos non suos, sed unius veri Dei velint esse cultores.

Merito illi in cælestibus sedibus constituti, immortales et beati, qui Creatoris sui participatione congaudent, cujus æternitate firmi, cujus veritate certi, cujus munere sancti sunt; quoniam nos mortales et miseros, ut immortales beatique simus, misericorditer diligunt, nolunt nos sibi sacrificare³; sed ei, cujus et ipsi nobiscum sacrificium se esse noverunt. Cum ipsis enim sumus una civitas Dei, cui dicitur in Psalmo, Gloriosa⁴ dicta sunt de te, civitas Dei (Psal. lxxxvi, 3): cujus pars in nobis peregrinatur, pars in illis opitulatur. De illa quippe superna civitate, ubi Dei voluntas intelligibilis atque incommutabilis lex est, de illa superna quodammodo curia (geritur nam-

¹ In editis deerat, vos; quod huc revocamus ex manuscriptis.

² Sic manuscripti. At editi, quod in ea oblatione quam offert.

³ Aliquot Mss. sacrificari.

⁴ Hic et aliis locis probæ notæ manuscripti, gloriosissima.

que ibi cura de nobis) ad nos ministrata per Angelos sancta illa Scriptura descendit (a), ubi legitur: *Sacrificans diis eradicabitur, nisi Domino soli* (Exod. xxii, 20). Huic Scripturæ, huic legi, talibus præceptis tanta sunt attestata miracula, ut satis appareat, cui nos sacrificare velint immortales ac beati, qui hoc nobis volunt esse quod sibi.

CAPUT VIII. — *De miraculis quæ Deus ad corroborandam fidem piorum, etiam per Angelorum ministerium, promissis suis adhibere dignatus est.*

Nam nimis vetera si commemorem, longius quam sat est revolvere videbor, quæ miracula facta sint attestantia promissis Dei, quibus ante annorum millia prædixit Abrahæ, quod in semine ejus omnes gentes benedictionem fuerant habituræ (Gen. xviii, 18). Quis enim non miretur eidem Abrahæ filium peperisse conjugem sterilem, eo tempore senectutis, quo parere nec secunda jam posset¹ (Id. xxi, 2); atque in ejusdem Abrahæ sacrificio flammam cœlitus factam inter divisas victimas cucurrisse (b) (Id. xv, 17); eidemque Abrahæ prædictum ab Angelis cœleste incendium Sodomorum, quos Angelos hominibus similes hospitio susceperat, et per eos de prole ventura Dei promissa tenuerat (Id. xviii, 20, 14); ipsoque imminente jam incendio, miram de Sodomis per eosdem Angelos liberationem Lot filii fratris ejus; cujus uxor in via retro respiciens, atque in salem repente conversa (Id. xix, 17, 26), magno admonuit sacramento, neminem in via liberationis suæ præterita desiderare debere? Illa vero quæ et quanta sunt, quæ jam per Moysen pro populo Dei de jugo servitutis eruendo in Ægypto mirabiliter gesta sunt, ubi magi Pharaonis, hoc est regis Ægypti, qui populum illum dominatione deprimebat, ad hoc facere quædam mira permissi sunt, ut mirabilis vincerentur? Illi enim faciebant beneficiis et incantationibus magicis, quibus sunt mali angeli, hoc est dæmones, dediti: Moyses autem tanto potentius, quanto justius in nomine Domini, qui fecit cœlum et terram, servientibus Angelis, eos facile superavit (Exod. vii-viii, 7). Denique in tertia plaga deficientibus magis, decem plagæ per Moysen magna mysteriorum dispositione completæ sunt; quibus ad Dei populum dimitendum, Pharaonis et Ægyptiorum dura corda cesserunt (Id. viii-xi). Moxque pœnituit, et cum abscedentes Hebræos consequi conarentur, illis diviso mari per siccum transeuntibus, unda hinc atque hinc in sese redeunte cooperti et oppressi sunt (Id. xiv). Quid de illis miraculis dicam, quæ cum in deserto idem populus ductaretur, stupenda divinitate crebruerunt; aquas quæ bibi non poterant, misso in eas, sicut Deus præceperat, ligno, amaritudine caruisse, sitientesque satiasset (Id. xv, 23-25): manna esurientibus venisse de cœlo; et cum esset colligentibus con-

stituta mensura, quidquid amplius quisque collegerat, exortis vermibus putuisse; ante diem vero sabbati duplum collectum, quia sabbato colligere non licebat, nulla putredine violatum: desiderantibus carne vesci, quæ tanto populo nulla sufficere posse videbatur, volatilibus castra completa, et cupiditatis ardorem fastidio satietatis extinctum (Exod. xvi; Num. xi, 31-34): obvios hostes transitumque prohibentes atque præliantes, orante Moysese, manibusque ejus in figuram crucis extentis, nullo Hebræorum cadente prostratos (Exod. xvii, 8-16): seditiosos in populo Dei, ac sese ab ordinata divinitus societate dividentes, ad exemplum visibile invisibilis pœnæ, vivos terra deliscente submersos (Num. xvi, 23-34): virga percussam petram tantæ multitudini abundantia fluentia fuisse (Exod. xvii, 6, 7; Num. xx, 8-11): serpentum morsus mortiferos, pœnam justissimam peccatorum, in ligno exaltato atque prospecto æneo serpente sanatos, ut et populo subveniretur afflicto, et mors morte destructa, velut crucifixæ mortis similitudine signaretur (Num. xxi, 6-9)? Quem sane serpentem propter facti memoriam reservatum, cum postea populus errans tanquam idolum colere cœpisset, Ezechias rex religiosa potestate Deo serviens, cum magna pietatis laude contrivit (IV Reg. xviii, 4).

CAPUT IX. — *De illicitis artibus erga dæmonum cultum, in quibus Porphyrius Platonius, quædam probando, quædam quasi improbando, versatur.*

1. Hæc et alia multa hujusmodi, quæ omnia commemorare nimis longum est, fiebant ad commendandum unius Dei veri cultum, et multorum falsorumque prohibendum. Fiebant autem simplici fide atque fiducia pietatis, non incantationibus et carminibus nefariæ curiositatis arte compositis, quam vel magiam, vel detestabiliore nomine goetiam, vel honorabiliore theurgiam vocant (a) qui quasi conantur ista discernere, et illicitis artibus deditos alios damnabiles, quos et maledicos vulgus appellat (hos enim ad goetiam pertinere dicunt); alios autem laudabiles videri volunt, quibus theurgiam deputant; cum sint utriusque ritibus fallacibus dæmonum obstructi sub nominibus angelorum².

2. Nam et Porphyrius quamdam quasi purgationem animæ per theurgiam, cunctanter tamen et pudibunda, quodammodo disputatione promittit; reversionem vero ad Deum hanc artem præstare cuiquam negat: ut videas eum inter vitium sacrilegæ curiositatis et philosophiæ professionem sententiis alternantibus fluctuare. Nunc enim hanc artem tanquam fallacem et in ipsa actione periculosam et legibus prohibitam, cavendam monet (b): nunc autem velut ejus lauda-

¹ Editi, *immissos ad pœnam*. Abest, *immissis ad*, a manuscriptoribus.

² Hic incipit caput novum in Mss.

(a) *Goetia*, genus magiæ est quæ fit per excitationem mortuorum, sic dicta a planctu circa sepulcra, *Theurgia* vero, quasi divina operatio, appellatur ea qua dii seu dæmones certis sacrificiis et ceremoniis, paganorum opinione bonis, invocantur.

(b) Vide infra, cap. 28.

¹ Sic melioris notæ Mss. At editi, *quo nec parere, nec esse fecunda jam posset*.

(a) Conf. Knarr. in Psal. 90, serm. 2, n. 1.

(b) In lib. 2 Retract., cap. 45, n. 2. Augustinus: « Non debuit, » inquit, « pro miraculo poni in Abrahæ sacrificio, flammam cœlitus factam inter divisas victimas cucurrisse, quoniam hoc illi in visione monstratum est. »

toribus cedens, utilem dicit esse mundandæ parti animæ, non quidem intellectuali, qua rerum intelligibilium percipitur veritas, nullas habentium similitudines corporum; sed spirituali, qua corporalium rerum capiuntur imagines (a). Hanc enim dicit per quasdam consecrationes theurgicas, quas teletas (b) vocant, idoneam fieri atque aptam susceptioni spirituum et Angelorum, et¹ ad videndos deos. Ex quibus tamen theurgicis teletis fatetur intellectuali animæ nihil purgationis accedere, quod eam faciat idoneam ad videndum Deum suum, et perspicienda ea quæ vere sunt². Ex quo intelligi potest, qualium deorum vel qualem visionem fieri dicat theurgicis consecrationibus, in qua non ea videntur quæ vere sunt. Denique animam rationalem, sive quod magis amat dicere, intellectualem, in superna³ posse dicit evadere, etiamsi quod ejus spirituale est, nulla theurgica fuerit arte purgatum: porro autem a theurgo spiritualement purgari hactenus, ut non ex hoc ad immortalitatem æternitatemque perveniat. Quanquam itaque discernat a dæmonibus Angelos, aëria esse loca dæmonum, ætheria vel empyrea disserens Angelorum, et admo neat utendum alicujus dæmonis amicitia, quo subvectante vel paululum possit elevari a terra quisque post mortem, aliam vero viam esse perhibeat ad Angelorum superna consortia: cavendam tamen dæmonum societatem expressa quodammodo confessione testatur, ubi dicit animam post mortem luendo pœnas, cultum dæmonum a quibus circumveniebatur horrescere; ipsamque theurgiam, quam velut conciliatricem Angelorum deorumque commendat, apud tales agere potestates negare non potuit, quæ vel ipsæ (c) invideant purgationi animæ, vel artibus serviant invidorum, querelam de hac re Chaldæi nescio cujus expromens: *Conqueritur, inquit, vir in Chaldaea bonus, purgandæ animæ magno in^b molimine frustratos sibi esse successus, cum vir ad eadem potens tactus invidia adjuratus sacris precibus potentias alligasset, ne postulata concederent. Ergo et ligavit ille, inquit, et iste non solvit.* Quo indicio dixit apparere theurgiam esse tam boni conficiendi quam mali et apud deos et apud homines disciplinam; pati etiam deos, et ad illas perturbationes passionesque deduci, quas communiter dæmonibus et hominibus Apuleius attribuit, deos tamen ab eis ætheriæ sedis altitudine separans, et Platoni assersens in illa discretione sententiam.

¹ Hic editi omittunt, *et*; quod plerique habent manuscripti.

² Sic omnes prope Mss. At editi hoc tantum loco, *vera sunt*, præter Er. qui altero etiam infra loco habet, *vera, pro, vere.*

³ Mss., *in sua*; paucis exceptis qui habent, *insuper*. — Nostri codices, *in sua*. M.

^b Sic Mss. At editi, *magno molimine*, absque particula, *in*.

(a) Persimilem in lib. 12 de Genesi ad Litt., nn. 50, 51, reperies distinctionem, scilicet visionis intellectualis, spiritualis, et corporalis.

(b) *Teletas*, vocabant expiationes et sacrificia quædam perfecta, quibus nihil deesset.

(c) *Fortè, ipsi.*

CAPUT X. — *De theurgia, quæ falsam purgationem animis dæmonum invocatione promittit.*

Ecce nunc alius Platonius, quem doctorem ferunt, Porphyrius, per nescio quam theurgicam disciplinam etiam ipsos deos obstrictos passionibus et perturbationibus dicit: quoniam sacris precibus adjurari terrerique potuerunt, ne præstarent animæ purgationem, et ita terri ab eo qui imperabat malum, ut ab illo qui poscebat bonum, per eandem artem theurgicam solvi illo timore non possent, et ad dandum beneficium liberari (a). Quis non videat hæc omnia fallacium dæmonum esse commenta, nisi eorum miserrimus servus et a gratia veri liberatoris alienus? Nam si hæc apud deos agerentur bonos, plus ibi utique valeret beneficis purgator animæ, quam malevolus impeditor. Aut si diis justis homo, pro quo agebatur, purgatione videbatur indignus, non utique ab invido terri, nec, sicut ipse dicit, per metum valentioris numinis impediti, sed judicio libero id negare debuerunt. Mirum est autem, quod benignus ille Chaldæus, qui theurgicis sacris animam purgare cupiebat, non invenit aliquem superiorem deum, qui vel plus terreret atque ad benefaciendum cogeret territos deos, vel ab eis terrentem compesceret, ut libere beneficerent: si¹ tamen theurgo bono sacra defuerunt, quibus ipsos deos, quos invocabat animæ purgatores, prius ab illa timoris peste purgaret. Quid enim causæ est, cur deus potentior adhiberi possit a quo terreantur, nec possit a quo purgentur? An invenitur deus qui exaudiat invidum, et timorem diis incutiat ne benefaciant; nec invenitur Deus qui exaudiat benevolum, et timorem diis auferat ut benefaciant? O theurgia præclara! o animæ prædicanda purgatio! ubi plus imperat immunda invidentia, quam impetrat pura beneficentia: imo vero malignorum spirituum caveuda et detestanda fallacia, et² salutaris audienda doctrina. Quod enim qui has sordidas purgationes sacrilegis ritibus operantur, quasdam mirabiliter pulchras, sicut iste commemorat, vel Angelorum imagines vel deorum, tanquam purgato spiritu vident (si tamen vel tale aliquid vident), illud est quod Apostolus dicit, quoniam *satanas transfiguratur se velut angelum lucis* (II Cor. xi, 14). Ejus enim sunt illa phantasmata, qui miseris animas multorum falsorumque deorum fallacibus sacris cupiens irretire, et a vero veri Dei cultu, quo solo mundantur et sanantur, avertere, sicut de Proteo dictum est,

Formas se vertit in omnes,
(Virgil. Georg. lib. 4, vers. 411.)

hostiliter insequens, fallaciter subveniens, utrobique nocens.

CAPUT XI. — *De epistola Porphyrii ad Anebontem Ægyptium, in qua petit de diversitate dæmonum se doceri.*

1. Melius sapuit iste Porphyrius, cum ad Anebontem scripsit Ægyptium, ubi consulenti similis et

¹ Editi, *sic*. At Mss., *si*.

² sola editio Lov., *quam*.

(a) Vid. infra, cap. 11, n. 2.

quærenti, et prodit artes sacrilegas et evertit. Et ibi quidem omnes dæmones reprobat, quos dicit ob imprudentiam trahere humidum vaporem, et ideo non in æthere, sed in aere esse sub luna, atque in ipso lunæ globo: verumtamen non audet omnes fallacias et malitias et ineptias, quibus merito movetur, omnibus dæmonibus dare. Quosdam namque benignos dæmones more appellat aliorum, cum omnes generaliter imprudentes esse fateatur. Miratur autem quod non solum dii alliciantur victimis, sed etiam compellantur atque cogantur facere quod homines volunt: et si corpore et incorporalitate dii a dæmonibus distinguuntur, quomodo deos esse existimandum sit solem et lunam, et visibilia cætera in cælo, quæ corpora esse non dubitat; et si dii sunt, quomodo alii benefici, alii malefici esse dicantur; et quomodo incorporabilibus, cum sint corporei, conjungantur. Quærit etiam veluti dubitans, utrum in divinantibus et quædam mira facientibus animæ sint potentiores², an aliqui spiritus extrinsecus veniant, per quos hæc valeant. Et potius venire extrinsecus conjicit, eo quod lapidibus et herbis adhibitis, et alligent quosdam, et aperiant clausa ostia, vel aliquid ejusmodi mirabiliter operentur. Unde dicit alios opinari esse quoddam genus, cui exaudire sit proprium, natura fallax, omniforme, multimodum, simulans deos et dæmones et animas defunctorum; et hoc esse quod efficiat hæc omnia quæ videntur bona esse vel prava; cæterum circa ea quæ vere bona sunt nihil opitulari, imo vero ista nec nosse, sed et male conciliare, et insimulare atque impedire nonnunquam virtutis sedulos sectatores, et plenum esse temeritatis et fastus, gaudere nidoribus, adulationibus capi, et cætera quæ de hoc genere fallacium malignorumque spirituum, qui extrinsecus in animam veniunt, humanosque sensus sopitos vigilantesve deludunt, non tanquam sibi persuasa confirmat, sed tam tenuiter suspicatur aut dubitat, ut hæc alios asserat opinari. Difficile quippe fuit tanto philosopho cunctam diabolicam societatem vel nosse, vel fidenter arguere, quam quælibet ancilla christiana nec nosse cunctatur³, et liberrime detestatur. Nisi forte iste, et ipsum, ad quem scribit, Anebontem tanquam talium sacrorum præclarissimum antistitem, et alios talium operum tanquam divinorum et ad deos colendos pertinentium admiratores verecundatur offendere.

2. Sequitur tamen, et ea velut inquirendo commemorat, quæ sobrie considerata tribui non possunt nisi malignis et fallacibus potestatibus. Quærit enim cur tanquam melioribus invocatis, quasi peioribus imperetur, ut injusta hominis præcepta exsequantur: cur attractatum re venerea non exaudiant imprecantem, cum ipsi ad incestos quosque concubitus quoslibet ducere non morentur: cur animantibus suos antistites oportere abstinere denuntient,

¹ Editio Lov. omittit, in: necnon paulo post, et malitias. Utrumque habent cæteri libri.

² Mss., loco, potentiores, habent, passiones. — Melius. M.

³ Mss., nec cunctatur esse. — Verius. M.

ne vaporibus profecto corporeis polluantur, ipsi vero et aliis vaporibus illiciantur et nidoribus hostiarum; cumque a cadaveris contactu prohibeatur inspector, plerumque illa cadaveribus celebrentur: quid sit, quod non dæmoni vel alicui animæ defuncti, sed ipsi soli et lunæ aut cuicumque cælestium, homo vitio cuilibet obnoxius intendit minas, eosque territat falso, ut eis extorqueat veritatem. Nam et cælum se collidere comminatur, et cætera similia homini impossibilia, ut illi dii tanquam insipientissimi pueri falsis et ridiculis comminationibus territi, quod imperatur efficiant (a). Dicit etiam scripsisse Chæremonem quemdam, talium sacrorum vel potius sacrilegiorum peritum, ea quæ apud Ægyptios sunt celebrata rumoribus, vel de Iside, vel de Osiride marito ejus, maximam vim habere cogendi deos, ut faciant imperata, quando ille qui carminibus cogit, ea se prodere vel evertere comminatur, ubi se etiam Osiridis membra dissipaturum terribiliter dicit, si facere jussa neglexerint. Hæc atque hujusmodi vana et insana hominem diis minari, nec quibuslibet, sed ipsis cælestibus et siderea luce fulgentibus, nec sine effectu, sed violenta potestate cogentem, atque his terroribus ad facienda quæ voluerit perducentem, merito Porphyrius admiratur: imo vero sub specie mirantis et causas rerum talium requirentis, dat intelligi illos hæc agere spiritus, quorum genus superius sub aliorum opinatione descripsit, non, ut ipse posuit, natura, sed vitio fallaces, qui simulant deos et animas defunctorum, dæmones autem non, ut ait ipse, simulant, sed plane sunt. Et quod ei videtur herbis et lapidibus et animantibus et sonis certis quibusdam ac vocibus, et figurationibus atque figmentis, quibusdam etiam observatis in cæli conversione motibus siderum, fabricari in terra ab hominibus potestates idoneas variis effectibus exsequendis; totum hoc ad eosdem ipsos dæmones pertinet ludificatores animarum sibimet subditarum, et voluptuaria sibi ludibria de hominum erroribus exhibentes. Aut ergo revera dubitans et inquirens ista Porphyrius, ea tamen commemorat, quibus convincantur et redarguantur, nec ad eas potestates quæ nobis ad beatam vitam capessendam favent, sed ad deceptores dæmones pertinere monstrentur: aut, ut meliora de philosopho suspicemus, eo modo voluit hominem Ægyptium talibus erroribus deditum, et aliqua magna se scire opinantem, non superba quasi auctoritate doctoris offendere, nec aperte adversantis altercatione turbare, sed quasi quærentis et discere cupientis humilitate ad ea cogitanda convertere, et quam sint contemnenda vel etiam devitanda monstrare. Denique prope ad epistolæ finem petit se ab eo doceri, quæ sit ad beatitudinem via ex Ægyptia sapientia. Cæterum illos quibus conversatio cum diis ad hoc esset, ut ob inveniendum fugitivum vel prædium comparandum, vel propter nuptias vel mercaturam vel quid hujusmodi, mentem divinam inquietaret,

(a) Conf. Euseb. Præpar. evang. lib. 5, cap. 8-10, Demonstrations évangéliques, tom. 1. M.

frustra eos videri dicit coluisse sapientiam. Illa etiam ipsa numina cum quibus conversarentur, etsi de cæteris rebus vera prædicarent, quoniam tamen de beatitudine nihil cautum nec satis idoneum monebant, nec deos illos esse, nec benignos dæmones, sed aut illum qui dicitur fallax, aut humanum omne commentum.

CAPUT XIII. — *De miraculis quæ per sanctorum Angelorum ministerium Deus verus operatur.*

Verum quia tanta et talia geruntur his artibus, ut universum modum humanæ facultatis excedant: quid restat, nisi ut ea quæ mirifice tanquam divinitus prædici vel fieri videntur, nec tamen ad unius Dei cultum referuntur, cui simpliciter inhærere, fatentibus quoque Platonicis et permulta testantibus, solum beatificum bonum est, malignorum dæmonum ludibria et seductoria impedimenta, quæ vera pietate cavenda sunt, prudenter intelligantur? [XII.] Porro autem quæcumque miracula, sive per Angelos, sive quocumque modo ita divinitus fiunt, ut Dei unius, in quo solo beata vita est, cultum religionemque commendent, ea vere ab eis vel per eos, qui nos secundum veritatem pietatemque diligunt, fieri, ipso Deo in illis operante, credendum est. Neque enim audiendi sunt qui Deum invisibilem visibilia miracula operari negant; cum ipse etiam secundum ipsos fecerit mundum, quem certe visibilem negare non possunt. Quidquid igitur mirabile fit in hoc mundo, profecto minus est quam totus hic mundus, id est cælum et terra et omnia quæ in eis sunt, quæ certe Deus fecit. Sicut autem ipse qui fecit, ita modus quo fecit occultus est et incomprehensibilis homini. Quamvis itaque miracula visibilium naturarum videndi assiduitate viluerint; tamen cum ea sapienter intuemur, inusitatissimis rarissimisque majora sunt. Nam et omni miraculo quod fit per hominem, majus miraculum est homo (a). Quapropter Deus qui fecit visibilia cælum et terram, non dedignatur facere visibilia miracula in cælo vel in terra, quibus ad se invisibilem colendum excitet animam adhuc visibilibus deditam: ubi vero et quando faciat, incommutabile consilium penes ipsum est, in cujus dispositione jam tempora facta sunt quæcumque futura sunt. Nam temporalia movens, temporaliter non movetur; nec aliter novit faciendâ, quam facta; nec aliter invocantes exaudit, quam invocatos videt. Nam et cum exaudiunt Angeli ejus, ipse in eis exaudit, tanquam in vero, nec manufacto templo suo, sicut in hominibus sanctis suis; ejusque temporaliter fiunt jussa¹, æterna ejus lege conspecta.

CAPUT XIII. — *De invisibili Deo, qui se visibilem sæpe præstiterit, non secundum quod est, sed secundum quod poterant ferre cernentes.*

Nec movere debet, quod cum sit invisibilis, sæpe visibiliter Patribus apparuisse memoratur. Sicut enim sonus quo auditur sententia in silentio intelligentiæ

¹ Sic Mss. At editio Lov., *Sicut in omnibus sanctis ejus quæ temporaliter fiunt jussa.*

(a) Vid. serm. 126, n. 4.

constituta, non est hoc quod ipsa; ita et species qua visus est Deus in natura invisibili constitutus, non erat quod ipse (a). Verumtamen ipse in eadem specie corporali videbatur, sicut illa sententia ipsa in sono vocis auditur: nec illi ignorabant, invisibilem Deum in specie corporali, quod ipse non erat, se videre. Nam et loquebatur cum loquente Moyses, et ei tamen dicebat, *Si inveni gratiam ante te, ostende mihi temetipsum, scienter ut videam te* (b) (Exod. xxxiii, 13). Cum igitur oporteret Dei legem in edictis Angelorum terribiliter dari, non uni homini paucisve sapientibus, sed universæ genti et populo ingenti, coram eodem populo magna facta sunt in monte, ubi lex per unum dabatur, conspiciente multitudine metuenda ac tremenda quæ fiebant. Non enim populus Israel sic Moysi credidit, quemadmodum suo Lycurgo Lacedæmonii, quod a Jove seu Apolline leges, quas condidit, accepisset. Cum enim lex dabatur populo, qua coli unus jubebatur Deus, in conspectu ipsius populi, quantum sufficere divina providentia judicabat, mirabilibus rerum signis ac motibus apparebat, ad eandem legem dandam¹ Creatori servire creaturam.

CAPUT XIV. — *De uno Deo colendo, non solum propter æterna, sed etiam propter temporalia beneficia, quia universa in ipsius providentiæ potestate consistunt.*

Sicut autem unius hominis, ita humani generis, quod ad Dei populum pertinet, recta eruditio per quosdam articulos temporum tanquam ætatum profecit accessibus, ut a temporalibus ad æterna capiendâ et a visibilibus ad invisibilia surgeretur; ita sane ut etiam illo tempore quo visibilia promittebantur divinitus præmia, unus tamen colendus commendaretur Deus, ne mens humana vel pro ipsis terrenis vitæ transitoriæ beneficiis cuiquam nisi vero animæ Creatori ac Domino subderetur. Omnia quippe quæ præstare hominibus vel Angeli vel homines possunt, in unius esse Omnipotentis potestate quisquis dislitter, insanit. De providentia certe Plotinus Platoniscus disputat, eamque a summo Deo, cujus est intelligibilis atque ineffabilis pulchritudo, usque ad hæc terrena et ima pertingere, flosculorum atque foliorum pulchritudine comprobât: quæ omnia quasi adjecta et velocissime pereuntia decentissimos formarum suarum numeros habere non posse confirmat, nisi inde formentur, ubi forma intelligibilis et incommutabilis simul habens omnia perseverat (Enneadis 3 lib. 2, cap. 13). Hoc Dominus Jesus ibi ostendit, ubi ait: *Considerate lilia agri², non laborant, neque nent. Dico autem vobis, quia nec Salomon in tanta gloria sua sic amictus est sicut unum ex eis. Quod si fenum agri, quod hodie est et cras in clibanum mittitur, Deus sic vestit; quanto magis vos, modicæ fidei* (Math. vi, 28-30)? Optime igitur anima humana adhuc terrenis

¹ Lov., *dandam docentem.* Abest, *docentem*, ab editis aliis et a nostris manuscriptis.

² Ita Mss. Editi vero hic addunt, *quomodo crescunt: et infra pro, in tanta, habent, in omni.*

(a) Conf. quæst. 101 in Exod.

(b) De his quæst. 151 in Exod., et epist. 147, n. 20.

desideriis infirma, ea ipsa quæ temporaliter exoptat bona infirma atque terrena vitæ huic transitoria necessaria, et præ illius vitæ sempiternis beneficiis contemnenda, non tamen nisi ab uno Deo exspectare consuescit, ut ab illius cultu etiam in istorum desiderio non recedat, ad quem contemptu eorum et ab eis aversione perveniat.

CAPUT XV. — *De ministerio sanctorum Angelorum, quo providentiæ Dei serviunt.*

Sic itaque divinæ providentiæ placuit ordinare temporum cursum, ut quemadmodum dixi, et in Actibus Apostolorum legitur, lex in edictis Angelorum daretur de unius veri Dei cultu (*Act. vii, 53*), in quibus et persona ipsius Dei, non quidem per suam substantiam, quæ semper corruptibilibus oculis invisibilis permanet, sed certis indiciis per subjectam Creatori creaturam visibiliter apparet, et syllabam per transitorias temporum morulas humanæ linguæ vocibus loqueretur, qui in sua natura non corporaliter, sed spiritualiter; non sensibiliter, sed intelligibiliter; non temporaliter, sed, ut ita dicam æternaliter, nec incipit loqui, nec desinit (*a*): quod apud illum sincerius audiunt, non corporis aure, sed mentis, ministri ejus et nuntii, qui ejus veritate incommutabili perfruuntur immortaliter beati; et quod faciendum modis ineffabilibus audiunt, et usque in ista visibilia atque sensibilia perducendum, incunctanter atque indifficiliter efficiunt. Hæc autem lex distributione temporum data est (*b*), quæ prius haberet, ut dictum est, promissa terrena, quibus tamen significarentur æterna, quæ visibilibus sacramentis celebrarent multi, intelligerent pauci. Unius tamen Deicultus apertissima illic et vocum et rerum omnium contestatione præcipitur, non unius de turba, sed qui fecit ¹ cælum et terram, et omnem animam, et omnem spiritum qui non est quod ipse. Ille enim fecit, hæc facta sunt: atque ut sint et bene se habeant, ejus indigent a quo facta sunt.

CAPUT XVI. — *An de promerenda beata vita his angelis sit credendum, qui seculi exigunt honore divino; an vero illis, qui non sibi, sed uni Deo sancta præcipiunt religione servi.*

1. Quibus igitur Angelis de beata et sempiterna vita credendum esse censemus? utrum eis qui se religionis ritibus coli volunt, sibi sacra et sacrificia flagitantes a mortalibus exhiberi; an eis qui hunc omnem cultum uni Deo creatori omnium debent dicunt, eique reddendum vera pietate præcipiunt, cujus et ipsi contemplatione beati sunt, et nos futuros esse promittunt? Illa namque visio Dei tantæ pulchritudinis visio est, et tanto amore dignissima, ut sine hac quibuslibet aliis bonis præditum atque abundantem,

¹ Am. Er. et Lov., sed ejus qui fecit. Abest, ejus, a manuscriptis et a Vind.

(a) Huc recurrunt pulchre dicta Pn. v. in Psal. xlv, n. 5.

(b) De hac lege concinnavit Augustinus librum quartum contra Faustum.

non dabit Plotinus infelicissimum dicere (*Enneadis 1 lib. 6, cap. 7*). Cum ergo ad hunc unum quidam Angeli, quidam vero ad se ipsos latria colendos signis mirabilibus excitent; et hoc ita ut illi istos coli prohibeant, isti autem illum prohibere non audeant; quibus potius sit credendum, respondeant Platonicis, respondeant quicumque philosophi, respondeant theurgi, vel potius periurgi ¹: hoc enim sunt illæ omnes artes vocabulo digniores. Postremo respondeant homines, si ullus ² naturæ suæ sensus, quo rationales creati sunt, ex aliqua parte vivit in eis: respondeant, inquam, eisne sacrificandum sit diis vel angelis qui sibi sacrificari jubent, an illi uni, cui jubent hi qui et sibi et istis prohibent? Si nec illi nec isti ulla miracula facerent, sed tantum præciperent, alii quidem ut sibi sacrificaretur, alii vero id varent, sed uni tantum juberent Deo; satis deberet pietas ipsa discernere quid horum de fastu superbiæ, quid de vera religione descenderet. Plus etiam dicam: si tantum hi mirabilibus factis humanas permoverent mentes, qui sacrificia sibi expetunt, illi autem qui hoc prohibent, et uni tantum Deo sacrificari jubent, nequaquam ista visibilia miracula facere dignarentur; profecto non sensu corporis, sed ratione mentis præponenda eorum esset auctoritas: cum vero Deus id egerit ad commendanda eloquia veritatis suæ, ut per istos immortales nuntios, non sui fastum, sed majestatem illius prædicantes, faceret majora, certiora, clariora miracula, ne infirmis piis illi qui sacrificia sibi expetunt, falsam religionem facilius persuaderent, eo quod sensibus eorum quadam stupenda monstrarent; quem tandem ita desipere libeat, ut non vera eligat quæ sectetur, ubi et ampliora invenit quæ miretur?

2. Illa quippe miracula deorum gentilium, quæ commendat historia, non ea dico quæ intervallis temporum occultis ipsius mundi causis, verumtamen sub divina providentia constitutis et ordinatis monstrata contingunt; quales sunt inusitati partus animalium, et cælo terraque rerum insolita facies, sive tantum terrens, sive etiam nocens, quæ procurari atque mitigari dæmoniacis³ ritibus fallacissima eorum astutia perhibentur: sed ea dico, quæ vi ac potestate eorum fieri satis evidenter apparet, ut est quod effigies deorum Penatium quas de Troja Æneas fugiens advexit, de loco in locum migrasse referuntur (*a*); quod cotem Tarquinius novacula secuit (*b*); quod Epidaurius serpens Æsculapio naviganti Romæ comæ adhæsit (*c*); quod navim qua simulacrum matris Phrygiæ vehebatur, tantis hominum boumque cona

¹ Nonnulli codices, *periturgi*. Quidam, *periturgi*. Alii *periurgi*.

² Aliquot Mss., *illius*.

³ Vind. Am. et Mss., *dæmoniacis*.

(a) Supra, lib. 1, cap. 3.

(b) Tarquinius jussu secuit Actius Navius, uti testantur Cicero, lib. 1 de Divinat., cap. 17, et lib. 2 de Nat. deor., necnon Livius, lib. 1, cap. 33, aliique.

(c) Vid. Livium, epitome libri 11; Ovid., lib. 15 Metamorph., vers. 622 et seqq.; Valer. Maxim., lib. 1, cap. 8, § 2.

tibus immobilem redditam, una muliercula zona alligatam¹, ad suæ pudicitiae testimonium movit et traxit (a); quod virgo Vestalis (b), de cujus corruptione quæstio vertebatur, aqua impleto cribro de Tiberi, neque perfluente, abstulit controversiam. Hæc ergo atque alia hujusmodi nequaquam illis quæ in populo Dei facta legimus, virtute ac magnitudine conferenda sunt: quanto minus ea quæ illorum quoque populorum, qui tales deos coluerunt, legibus judicata sunt prohibenda atque plectenda, magica scilicet vel theurgica? quorum pleraque specie tenus mortalium sensus imaginaria ludificatione decipiunt, quale est lunam deponere, donec suppositas, ut ait Lucanus, *propior despumet in herbas* (*Phars. l. 6, vers. 503*) quædam vero etsi nonnullis piorum factis videantur opere coæquari, finis ipse quo discernuntur, incomparabiliter hæc nostra ostendit excellere. Illis enim multi tanto minus sacrificiis colendi sunt, quanto magis hæc expetunt: his vero unus commendatur Deus, qui se nullis talibus indigere, et Scripturarum suarum testificatione, et eorundem postea sacrificiorum remotione demonstrat. Si ergo angeli sibi expetunt sacrificium, præponendi eis sunt illi qui non sibi, sed Deo creatori omnium, cui serviunt. Hinc enim ostendunt quam sincero amore nos diligunt, quando per sacrificium non sibi, sed ei nos subdere volunt, cujus et ipsi contemplatione beati sunt, et ad eum nos pervenire, a quo ipsi non recesserunt. Si autem angeli qui non uni, sed plurimis sacrificia fieri volunt, non sibi, sed eis diis volunt, quorum deorum angeli sunt; etiam sic eis præponendi sunt illi qui unius Dei deorum Angeli sunt, qui sacrificari sic jubent, ut alicui alteri vetent; cum eorum nullus huic vetet, cui uni isti sacrificari jubent. Porro si, quod magis indicat eorum superba fallacia, nec boni, nec bonorum deorum angeli sunt, sed dæmones mali, qui non unum solum ac summum Deum, sed se ipsos sacrificiis coli volunt; quod majus² quam unius Dei contra eos eligendum est præsidium, cui serviunt Angeli boni, qui non sibi, sed illi jubent ut sacrificio serviamus, cujus nos ipsi sacrificium esse debemus?

CAPUT XVII. — *De arca Testamenti miraculisque signorum, quæ ad commendandam Legis ac promissionis auctoritatem divinitus facta sunt.*

Proinde lex Dei, quæ in edictis data est Angelorum, in qua unus Deus deorum religione sacrorum jussus est coli, alii vero quilibet prohibiti, in Arca erat posita, quæ Arca testimonii nuncupata est. Quo nomine satis significatur, non Deum, qui per illa omnia colebatur, circumcludi solere vel contineri loco, cum responsa ejus et quædam humanis sensibus darentur signa ex illius Arca loco, sed voluntatis ejus hinc testimonia perhiberi. Quod etiam ipsa lex erat in tabulis conscripta lapideis, et in Arca, ut dixi, posita;

¹ Sic Vind. Am. Er. et codices Mss. At Lov., *aligata*.

² Aliquot Mss., *magis*.

(a) Fuit mulier illa Claudia Quinta, ex Cicero, de harusp. Responsis; Ovid., lib. 4 Pastorum, vers. 295 et seq.; Liv. lib. 29, cap. 14.

(b) Hæc Turcia vocatur a Valerio Maximo, lib. 8, cap. 1, § 5.

quam tempore peregrinationis in eremo, cum Tabernaculo quod similiter appellatum est Tabernaculum testimonii, cum debita sacerdotes veneratione portabant: signumque erat, quod per diem nubes apparebat, quæ sicut ignis nocte fulgebat (*Exod. xiii, 21*) quæ nubes cum moveretur, castra movebantur; et ubi staret, castra ponebant (*Id. xl, 54, 55*). Reddita sunt autem illi legi magni miraculi testimonia, præter ista quæ dixi, et præter voces quæ ex illius Arca edebantur. Nam cum terram promissionis intrantibus eadem Arca transiret Jordanem, fluvius ex parte superiore subsistens, et ex inferiore decurrens, et ipsi et populo siccum præbuit transeundi locum (*Josue iii, 16, 17*). Deinde civitatis, quæ prima hostilis occurrit, more Gentium deos plurimos colens, septies eadem Arca circumacta, muri repente ceciderunt, nulla manu oppugnati, nullo ariete percussi (*Id. vi, 20*). Post hæc etiam cum jam in terra promissionis essent, et eadem Arca propter eorum peccata fuisset ab hostibus capta, hi qui eam ceperant, in templo Dei sui, quem præ cæteris colebant, honorifice collocarunt, abeuntesque clauserunt, apertoque postriedie, simulacrum cui supplicabant, invenerunt collapsum deformiterque contractum. Deinde ipsi prodigiis acti, deformiusque puniti, Arcam divini testimonii populo, unde ceperant, reddiderunt. Ipsa autem redditio qualis fuit? Imposuerunt eam plastro, eique juvenas, a quibus vitulos sugentes abstraxerant, subjuxerunt, et eas quo vellent ire siverunt, etiam hinc³ vim divinam explorare cupientes. At illæ sine homine duce atque rectore, ad Hebræos viam pertinaciter gradientes, nec revocatae mugitibus esurientium filiorum, magnum sacramentum suis cultoribus reportarunt (*1 Reg. iv-vi*). Hæc atque hujusmodi Deo parva sunt, sed magna terrendis salubriter erudiendisque mortalibus. Si enim philosophi, præcipueque Platonicæ, rectius cæteris sapuisse laudantur, sicut paulo ante commemoravi, quod divinam providentiam hæc quoque rerum infirma atque terrena administrare docuerunt, numerosarum testimonio pulchritudinum, quæ non solum in corporibus animalium, verum in herbis etiam fenoque gignuntur: quanto evidentius hæc attestantur divinitati, quæ ad horam prædicationis ejus sunt, ubi ea religio commendatur quæ omnibus cælestibus, terrestribus, infernis sacrificari vetat, uni Deo tantum jubens, qui solus diligens et dilectus beatos facit, eorumque sacrificiorum tempora imperata præfreniens, eaque per meliorem sacerdotem in melius mutanda prædicans, non ista se appetere, sed per hæc alia potiora significare testatur; non ut ipse his honoribus sublinetur, sed ut nos ad eum colendum, eique colærendum igne amoris ejus accensi, quod nobis, non illi, bonum est, excitemur.

CAPUT XVIII. — *Contra eos qui de miraculis, quibus Dei populus eruditus est, negant ecclesiasticis Libris esse credendum.*

An dicet aliquis ista falsa esse miracula, nec fuisse facta, sed mendaciter scripta? Quisquis hoc dicit, si

³ Vind. et plerique Mss., *hic*.

de his rebus negat omnino ullis litteris esse credendum, potest etiam dicere nec deos ullos curare mortalia. Non enim se aliter colendos esse persuaserunt, nisi mirabilium operum effectibus, quorum et historia gentium testis est, quarum dii se ostentare mirabiles potius quam utiles ostendere poterunt. Unde hoc opere nostro, cujus hunc jam decimum librum habemus in manibus, non eos suscepimus refellendos, qui vel ullam esse vim divinam negant, vel humana non curare contendunt; sed eos qui nostro Deo conditori sanctæ et gloriosissimæ civitatis deos suos præferunt, nescientes eum ipsum esse etiam mundi hujus visibilis et mutabilis invisibilem et incommutabilem conditorem, et vitæ beatæ non de his quæ condidit, sed de se ipso verissimum largitorem. Ejus enim propheta veracissimus ait, *Mihi autem adherere Deo, bonum est* (Psal. LXXII, 28). De fine namque boni inter philosophos quaeritur, ad quod adipiscendum omnia officia referenda sunt. Nec dixit iste, *Mihi autem divitiis abundare, bonum est; aut insigniri purpura et sceptro, vel diademate excellere; aut, quod nonnulli etiam philosophorum dicere non erubuerunt, Mihi voluptas corporis bonum est; aut, quod melius velut meliores dicere visi sunt, Mihi virtus animi mei bonum est; sed, Mihi, inquit, adherere Deo, bonum est.* Hoc eum docuerat, cui uni tantummodo sacrificandum sancti quoque Angeli ejus miraculorum etiam contestatione monuerunt¹. Unde et ipse sacrificium ejus factus erat, cujus igne intelligibili correptus ardebat, et in ejus ineffabilem incorporeumque complexum sancto desiderio ferebatur. Porro autem si multorum deorum cultores (qualescumque deos suos esse arbitrentur) ab eis facta esse miracula, vel civilium rerum historiarum, vel libris magicis, sive, quod honestius putant, theurgicis credunt; quid causæ est, cur illis Litteris nolint credere, ista facta esse, quibus tanto major debetur fides, quanto super omnes est magnus, cui uni soli sacrificandum esse præcipiunt?

CAPUT XIX. — *Quæ ratio sit visibilis sacrificii, quod uni vero et invisibili Deo offerri docet vera religio.*

Qui autem putant hæc visibilia sacrificia diis aliis congruere, illi vero tanquam invisibili invisibilia, et majora majori, meliorique meliora, qualia sunt puræ mentis et bonæ voluntatis officia; profecto nesciunt, hæc ita esse signa illorum, sicut verba sonantia signa sunt rerum. Quocirca, sicut orantes atque laudantes ad eum dirigimus significantes voces, cui res ipsas in corde quas significamus offerimus: ita sacrificantes non alteri visibile sacrificium offerendum esse noverimus, quam illi cujus in cordibus nostris invisibile sacrificium nos ipsi esse debemus. Tunc nobis favent, nobisque congaudent, atque ad hoc ipsum nos pro suis viribus adjuvant Angeli quique Virtutesque superiores et ipsa bonitate ac pietate potentiores. Si autem illis hæc exhibere voluerimus, non libenter accipiunt, et cum ad homines ita mittuntur,

¹ Sic Mss. At editi, *Angeli legalium sacrificiorum contestatione monuerunt.*

SANCT. AUGUST. VII.

ut eorum præsentia sentiat, apertissime vetant. Sunt exempla in Litteris sanctis. Potaverunt quidam deferendum Angelis honorem, vel adorando, vel sacrificando, qui debetur Deo, et eorum sunt admonitione prohibiti, jussusque hoc ei deferro, cui uni fas esse noverunt (*Judic. XIII, 16; Apoc. XXII, 8, 9.*) Imitati sunt Angelos sanctos etiam sancti homines Dei. Nam Paulus et Barnabas in Lyconia facti quodam miraculo sanitatis putati sunt dii, eisque Lyconii immolare victimas voluerunt; quod a se humili pietate removentes, eis in quem crederent annuntia verent Deum (*Act. XIV.*) Nec ob aliud fallaces illi superbe sibi hoc exigunt, nisi quia vero Deo deberi sciunt. Non enim revera, ut ait Porphyrius et nonnulli putant, cadaverinis nidoribus, sed divinis honoribus gaudent. Copiam vero nidorum magnam habent undique, et si amplius vellent, ipsi sibi poterant exhibere. Qui ergo divinitatem sibi arrogant spiritus, non ejuslibet corporis fumo, sed supplicantis animo delectantur, cui decepto subjectoque dominentur, intercludentes iter ad Deum verum, ne sit homo illius sacrificium, dum sacrificatur cuiquam præter illum.

CAPUT XX. — *De summo veroque sacrificio, quod ipse Dei et hominum Mediator effectus est.*

Unde verus ille Mediator, in quantum formam servi accipiens mediator effectus est Dei et hominum homo Christus Jesus, cum in forma Dei sacrificium cum Patre sumat, cum quo et unus Deus est, tamen in forma servi sacrificium maluit esse quam sumere, ne vel hac occasione quisquam existimaret cuilibet sacrificandum esse creaturæ. Per hoc et sacerdos est, ipse offerens, ipse et oblatio. Cujus rei sacramentum quotidianum esse voluit Ecclesiæ sacrificium: quæ cum ipsius capitis corpus sit, se ipsam per ipsum discit offerre¹. Hujus veri sacrificii multiplicia variaque signa erant sacrificia prisca sanctorum, cum hoc unum per multa figuraretur, tanquam verbis multis res una diceretur, ut sine fastidio multum commendaretur (a). Huic summo veroque sacrificio cuncta sacrificia falsa cesserunt.

CAPUT XXI. — *De modo potestatis dæmonibus data ad glorificandos sanctos per tolerantiam passionum², qui aërios spiritus non placando ipsos, sed in Deo permanendo vicerunt.*

Moderatis autem præfinitisque temporibus, etiam potestas permissa dæmonibus, ut hominibus quos possident excitis, inimicitias adversus Dei civitatem tyrannice exerceant, sibi que sacrificia non solum ab offerentibus sumant, et a volentibus expetant, verum etiam ab invitiis persequendo violentè extorqueant, non solum pernicioza non est, sed etiam uti-

¹ Vind. Am., *Cujus rei sacramentum quotidianum. Er., esse voluit Ecclesiæ sacrificium; cum ipsius corporis ipse sit caput, et ipsius capitis ipsa sit corpus, tam ipse per ipsum, quam ipse per ipsam suetus offerri. Hujus veri sacrificii, etc.*

² Editi, *sanctos qui pertulerunt jam passionem. Emendantur a manuscriptis.*

(a) Conf. lib. I contra Advers. Leg. et Prophet., n. 38.

(Dix.)

his invenitur Ecclesiae (a), ut martyrum numerus impleatur (Aoc. vi, 11): quos civitas Dei tanto clariores et honoratiores cives habet, quanto fortius adversus impietatis peccatum¹ etiam usque ad sanguinem certant. Hoc multo elegantius, si ecclesiastica loquendi consuetudo pateretur, nostros Heroes vocaremus. Hoc enim nomen a Junone dicitur tractum, quod græce Juno Ἥρα appellatur; et ideo nescio quis filius ejus secundum Græcorum fabulas, Heros fuerit nuncupatus: hoc videlicet veluti mysticum significante fabula, quod aer Junoni deputetur, ubi volunt cum dæmonibus heroes habitare, quo nomine appellant alicujus meriti animas defunctorum. Sed a contrario martyres nostri heroes nuncuparentur, si, ut dixi, usus ecclesiastici sermonis admitteret; non quod eis esset cum dæmonibus in aere societas, sed quod eosdem dæmones, id est, aërias vincerent potestates; et in eis ipsam, quidquid putatur significare, Junonem, quæ non usquequaque inconvenienter a poetis inducitur inimica virtutibus, et cælum potentibus viris fortibus invida. Sed rursus ei succumbit infeliciter ceditque Virgilius, ut cum apud eum illa dicat,

Vincor ab Ænea!
(Æneid. lib. 7, vers. 310.)

ipsum Ænean admoncat Helenus quasi consilio religioso, et dicat,

Junoni cæne vota libens, dominamque potentem
Supplicibus supera donis.
(Æneid. lib. 3, vers. 438, 439.)

Ex qua opinione Porphyrius, quamvis non ex sua sententia, sed ex aliorum, bonum dicit deum vel genium non venire in hominem, nisi malus fuerit ante placatus (b): tanquam fortiora sint apud eos numina mala quam bona; quandoquidem mala impediunt adjuvantia bonorum, nisi eis placata dent locum, malisque nolentibus bona prodesse non possunt; nocere autem mala possunt, non sibi valentibus resistere bonis. Non est ista veræ veraciterque sanctæ religionis via: non sic Junonem, hoc est aërias potestates piorum virtutibus invidentes, nostri martyres vincunt. Non omnino, si dici usitate posset, heroes nostri supplicibus donis, sed virtutibus divinis Heram superant. Commodius quippe Scipio Africanus est cognominatus, quod virtute Africam vicerit, quam si hostes donis placasset, ut parcerent.

CAPUT XXII. — Unde sit sanctis adversus dæmones potestas, et unde cordis vera purgatio.

Vera pietate homines Dei aëriam potestatem inimicam contrariamque pietati exorcizando ejiciunt, non placando; omnesque tentationes adversitatis ejus² vincunt orando, non ipsam, sed suum Deum

¹ Editi, *adversus impietatem potestatum*. Alia, quæ omnium est manuscriptorum lectio, videtur præferenda: nam perspicue audit Augustinus ad illud Hebr. xii, 4: *Nondum enim usque ad sanguinem restitistis adversus peccatum repugnantes*.

² sic Mss. At Editi, *omnes tentationes adversitatesque ejus*.

(a) Coquus Tertullianum hic citat dicentem in Apologético, cap. 50: « Plures efficitur, quoties metimur a vobis; semen est sanguis Christianorum. » Et in lib. ad Scapulum, cap. 5: « Sectam hanc tunc magis ædificari scias, cum cædi videtur. » M.

(b) Conf. Porphyr., lib. 2 de Abstinencia animalium, cap. 39.

adversus ipsam. Non enim aliquem vincit, aut subjungit, nisi societate peccati. In ejus ergo nomine vincitur, qui hominem assumpsit, egitque sine peccato, ut in ipso sacerdote ac sacrificio fieret remissio peccatorum, id est per Mediatorem Dei et hominum hominem Christum Jesum, per quem facta peccatorum purgatione reconciliamur Deo. Non enim nisi peccatis homines separantur a Deo, quorum in hac vita non sit nostra virtute, sed divina miseratione purgatio; per indulgentiam illius, non per nostram potentiam. Quia et ipsa quantulumque virtus, quæ dicitur nostra, illius est nobis bonitate concessa. Multum autem nobis in hac carne tribueremus, nisi usque ad ejus depositionem sub venia viveremus. Propterea ergo nobis per Mediatorem præstita est gratia, ut polluti carne peccati carnis peccati similitudine mundaremur. Hac Dei gratia, qua in nos ostendit magnam misericordiam suam, et in hac vita per fidem regimur, et post hanc vitam per ipsam speciem incommutabilis veritatis ad perfectionem plenissimam perducemur.

CAPUT XXIII. — De principiis, in quibus Platonicæ purgationem animæ esse profitentur.

Dicit etiam Porphyrius divinis oraculis fuisse responsum, non nos purgari lunæ teletis atque solis: ut hinc ostenderetur nullorum deorum teletis hominem posse purgari. Cujus enim teletæ purgant, si lunæ solisque non purgant, quos inter cœlestes deos præcipuos habent? Denique eodem dicit oraculo expressum, principia posse purgare; ne forte cum dictum esset non purgare teletas solis et lunæ, alicujus alterius dei de turba valere ad purgandum teletæ crederentur. Quæ autem dicat esse principia tanquam Platonicis, novimus. Dicit enim Deum Patrem et Deum Filium, quem græce appellat paternum intellectum, vel paternam mentem (a): de Spiritu autem sancto, aut nihil, aut non aperte aliquid dicit: quamvis quem alium dicat horum medium, non intelligo. Si enim tertiam, sicut Plotinus, ubi de tribus principalibus substantiis disputat (*Enneadis 5 lib. 1*), animæ naturam etiam iste vellet intelligi, non utique diceret horum medium, id est Patris et Filii medium. Postponit quippe Plotinus animæ naturam paterno intellectui (*Ibid.*, cap. 6, et alibi): iste autem cum dicit medium, non postponit, sed interponit. Et nimirum hoc dixit ut potuit, sive ut voluit, quod nos Spiritum sanctum, nec Patris tantum, nec Filii tantum, sed utriusque Spiritum dicimus. Liberis enim verbis loquuntur philosophi, nec in rebus ad intelligendum difficillimis offensionem religiosarum aurium pertimescunt. Nobis autem ad certam regulam loqui fas est, ne verborum licentia etiam de rebus quæ his significantur, impiam gignat opinionem.

CAPUT XXIV. — De uno veroque principio, quod solum¹ naturam humanam purgat et renovat.

Nos itaque ita non dicimus duo vel tria principia,

¹ Editi, *solum*. Verius Mss., *solum*.

(a) Conf. infra, cap. 28.

cum de Deo loquimur, sicut nec duos deos vel tres nobis licitum est dicere : quamvis de unoquoque loquentes, vel de Patre, vel de Filio, vel de Spiritu sancto, etiam singulum quemque Deum esse fateamur; nec dicamus tamen quod hæretici Sabelliani (a), eundem esse Patrem, qui est et Filius, et eundem Spiritum sanctum, qui est et Pater et Filius; sed Patrem esse Filii Patrem, et Filium Patris Filium, et Patris et Filii Spiritum sanctam nec Patrem esse nec Filium. Verum itaque dictum est, non purgari hominem nisi principio, quamvis pluraliter sint apud eos dicta principia. [XXIV.] Sed subditus Porphyrius invidis potestatibus, de quibus et erubescbat, et eas libere redarguere formidabat, noluit intelligere Dominum Christum esse principium, cujus incarnatione purgamur. Eum quippe in ipsa carne contempsit, quam propter sacrificium nostræ purgationis assumpsit; magnum scilicet sacramentum ea superbia non intelligens, quam sua ille humilitate dejecit verus benignusque Mediator, in ea se ostendens mortalitate mortalibus, quam maligni fallacesque mediatores non habendo se superbius extulerunt, miseriaque hominibus adulatorum deceptorum velut immortales mortalibus promiserunt. Bonus itaque verusque Mediator ostendit peccatum esse malum, non carnis substantiam vel naturam; quæ cum anima hominis et suscipi sine peccato potuit, et haberi, et morte deponi, et in mellis resurrectione mutari: nec ipsam mortem, quamvis esset poena peccati, quam tamen pro nobis sine peccato ipse persolvit, peccando esse vitandam; sed potius, si facultas datur, pro justitia perferendam. Ideo enim solvere potuit moriendo peccata, quia et mortuus est, et non pro suo peccato¹. Hunc ille Platonius non cognovit esse principium; nam cognosceret purgatorium. Neque enim caro principium est, aut anima humana; sed Verbum per quod facta sunt omnia. Non ergo caro per se ipsam mundat, sed per Verbum a quo suscepta est, cum *Verbum caro factum est, et habitavit in nobis* (Joan. 1, 14). Nam de carne sua manducanda mystice loquens, cum hi qui non intellexerunt offensus recederent, dicentes, *Durus est hic sermo, quis eum potest audire?* respondit manentibus cæteris, *Spiritus est qui vivificat, caro autem non prodest quidquam* (Id. vi, 61, 64). Principium ergo suscepta anima et carne et animam credentium mundat et carnem. Ideo quærentibus Judæis quis esset, respondit se esse principium (Id. viii, 25). Quod utique carnales, infirmi, peccatis obnoxii, et ignorantie tenebris obvoluti nequaquam percipere possemus, nisi ab eo mundaremur atque sanaremur, per hoc quod eramus et non eramus. Eramus enim homines, sed justi non eramus (b) : in illius autem incarnatione natura humana erat, sed justa, non pec-

¹ In Mss., *et non pro peccato*; ubi supplendum relinquatur, *suo*.

(a) Coquæus, de hac hæresi disserens, hæc inter alia plurima habet : « Existimant omnes Sabellium primum auctorem fuisse hujus hæresis. Epiphanius tamen hæresi 57 « refert, Noetium, Sabellii præceptorem, ante eum hanc, ut « alias plerasque hæreses, excogitasse » M.

(b) Conf. epist. 140, n. 10.

catris erat. Hæc est mediatio, qua manus lapsis jacentibusque porrecta est : hoc est semen dispositum per Angelos, in quorum edictis et lex dabatur (Galat. iii, 19), qua et unus Deus coli jubebatur, et hic Mediator venturus promittebatur.

CAPUT XXV. — *Omnes sanctos et sub Legis tempore, et sub prioribus sæculis, in sacramento et fide Christi justificatos fuisse.*

Hujus sacramenti fide etiam justi antiqui mundant pie vivendo potuerunt, non solum antequam lex populo Hebræo daretur (neque enim eis prædicator Deus vel Angeli defuerunt), sed ipsius quoque legem temporibus, quamvis in figuris rerum spiritualium habere videretur¹ promissa carnalia, propter quod vetus dicitur Testamentum. Nam et Prophetæ tunc erant, per quos, sicut per Angelos, eadem promissio prædicata est : et ex illorum numero erat, cujus tam magnam divinamque sententiam de boni humani sine paulo ante commemoravi, *Mihi autem adherere Deo, bonum est*. In quo plane psalmo duorum Testamentorum, quæ dicuntur vetus et novum, satis est declarata distinctio. Propter carnales enim terrenasque promissiones, cum eas impiis abundare perspiceret, dicit pedes suos pene fuisse commotos, et effusos in lapsum propemodum gressus suos, tanquam frustra Deo ipse serviasset, cum ea felicitate, quam de illo exspectabat, contemptores ejus florere perspiceret; seque in rei hujus inquisitione laborasse, volentem cur ita esset apprehendere, donec intraret in sanctuarium Dei, et intelligeret in novissima eorum, qui felices videbantur erranti. Tunc eos intellexit in eo quod se extulerunt, sicut dicit, fuisse dejectos, et defecisse ac perisse propter iniquitates suas; totumque illud culmen temporalis felicitatis ita eis factum tanquam somnium evigilantis, qui se repente invenit suis quæ somniabat fallacibus gaudiis destitutum. Et quoniam in hac terra vel civitate terrena magni sibi videbantur, *Domine, inquit, in civitate tua imaginem eorum ad nihilum rediges*. Quod huic tamen utile fuerit, etiam ipsa terrena non nisi ab uno vero Deo quærere, in cujus potestate sunt omnia, satis ostendit, ubi ait, *Velut pecus factus sum apud te, et ego semper tecum. Velut pecus dixit, utique non intelligens. Ea quippe a te desiderare debui, quæ mihi cum impiis non possunt esse communia; non ea quibus eos cum abundare cernerem, putavi me incassum tibi servisse, quando et illi hæc haberent, qui tibi servire nolissent. Tamen ego semper tecum, qui etiam in talium rerum desiderio deos alios non quæsivi. Ac per hoc sequitur : Tenuisti manum dexteræ meæ², et in voluntate tua deduxisti me, et cum gloria assumpsisti me : tanquam ad sinistram cuncta illa pertineant, quæ abundare apud impios cum vidisset, pene collapsus est. Quid enim mihi est, inquit, in cælo? et a te quid volui super terram?*

¹ Er. et Lov., *viderentur*. Alii libri, *videretur*, scilicet lex.

² Lov., *dexteram meam*; dissentientibus cæteris libris.

Reprehendit se ipsum, justeque sibi displicuit : quia cum tam magnum bonum haberet in cœlo (quod post intellexit), rem transitoriam, fragilem, et quodammodo lateam felicitatem a suo Deo quæsit in terra. *Defecit, inquit, cor meum et caro mea, Deus cordis mei : defecta utique bono ab inferioribus ad superna. Unde in alio psalmo dicitur : Desiderat et deficit anima mea in atria Domini (Psal. lxxxiii, 5). Itē in alio : Defecit in salutare tuum anima mea (Psal. cxviii, 81). Tamen cum de utroque dixisset, id est de corde et carne deficiente, non subjecti, Deus cordis et carnis meæ; sed, Deus cordis mei. Per cor quippe caro mundatur. Unde dicit Dominus : Mundate quæ intus sunt, et quæ foris sunt munda erunt (Matth. xxiii, 26). Partem deinde suam dicit ipsum Deum, non aliquid ab eo, sed ipsum : Deus, inquit, cordis mei, et pars mea Deus in sæcula : quod inter multa quæ ab hominibus eliguntur, ipse illi placuerit eligendus. Quia ecce, inquit, qui longe se faciunt a te, peribunt : perdidisti omnem qui fornicatur abs te ; hoc est, qui multorum deorum vult esse prostibulum. Unde sequitur illud, propter quod et cætera de eodem psalmo dicenda visa sunt : *Mihi autem adhærere Deo, bonum est : non longe ire, non per plurima fornicari. Adhærere autem Deo tunc perfectum erit, cum totum quod liberandum est, fuerit liberatum. Nunc vero sit illud quod sequitur : Ponere in Deo spem meam. Spes enim quæ videtur, non est spes : quod enim videt quis, quid sperat ?* ait Apostolus. *Si autem quod non videmus speramus, per patientiam expectamus (Rom. viii, 24, 25).* In hac autem spe nunc constituti agamus quod sequitur, et sinus nos quoque pro modulo nostro angeli Dei, id est nuntii ejus, annuntiantes ejus voluntatem, et gloriam gratiamque laudantes. Unde cum dixisset, *Ponere in Deo spem meam : ut annuntiam, inquit, omnes laudes tuas in portis filiæ Sion (Psal. lxxii).* Hæc est gloriosissima civitas Dei ; hæc unum Deum novit et colit : hanc Angeli sancti annuntiaverunt, qui nos ad ejus societatem invitaverunt, civesque suos in illa esse voluerunt ; quibus non placet ut eos colamus tanquam nostros deos, sed cum eis et illorum et nostrum Deum ; nec eis sacrificemus, sed cum ipsis sacrificium Deo simus. Nullo itaque dubitante, qui hæc deposita maligna obstinatione considerat, omnes immortales beati, qui nobis non invident (neque enim, si inviderent, essent beati), sed potius nos diligunt, ut et nos cum ipsis beati simus ; plus nobis favent, plus adjuvant, quando unum Deum cum illis colimus, Patrem et Filium et Spiritum sanctum, quam si eos ipsos per sacrificia coleremus.*

CAPUT XXVI.— *De inconstantia Porphyrii inter confessionem veri Dei et cultum dæmonum fluctuantis.*

Nescio quomodo (quantum mihi videtur) amicis suis theurgis erubescerat Porphyrius. Nam ista utrumque sapiebat, sed contra multorum deorum cultum

¹ Editi, pro amicis. Absc., pro, a Mss.

non libere defendebat ¹ (a). Et angelos quippe alios esse dixit, qui deorsum descendentes hominibus theurgicis divina pronuntiant ; alios autem qui in terris et quæ Patris sunt, et altitudinem ejus profunditatemque declarent. Num igitur hos angelos, quorum ministerium est declarare voluntatem Patris, credendum est velle nos subdi, nisi ei cujus nobis annuntiant voluntatem ? Unde optime admonet etiam ipse Platonius, imitandos eos potius quam invocandos. Non itaque debemus metuere, ne immortales et beatos uni Deo subditos non eis sacrificando offendamus. Quod enim non nisi uni vero Deo deberi sciunt, cui et ipsi adhærendo beati sunt, procul dubio neque per ullam significantem figuram, neque per ipsam rem quæ sacramentis significatur, sibi exhiberi volunt. Dæmonum est hæc arrogantia superbiorum atque miserorum, a quibus longe diversa est pietas subditorum Deo, nec aliunde quam illi coherendo beatorum. Ad quod bonum percipiendum etiam nobis sincera benignitate oportet ut faveant, neque sibi arrogant quo eis subjiciamur ; sed eum annuntiant, sub quo eis in pace sociemur. Quid adhuc trepidas, o philosophæ, adversus potestates et veris virtutibus et veri Dei muneribus invidas habere liberam vocem ? Jam distinxisti angelos qui Patris annuntiant voluntatem, ab eis angelis qui ad theurgos homines ², nescio qua deducti arte, descendunt. Quid adhuc eos honoras, ut dicas pronuntiare divina ? Quæ tandem divina pronuntiant, qui non voluntatem Patris nuntiant ? Nempe illi sunt, quos sacris precibus invidus alligavit, ne præstarent animæ purgationem ; nec a bono, ut dicis, purgare cupiente ³ ab illis vinculis solvi et suæ potestati reddi potuerunt. Adhuc dubitas hæc maligna esse dæmonia ; vel te singis fortasse nescire, dum non vis theurgos offendere, a quibus curiositate deceptus, ista perniciose et insana pro magno beneficio didicisti (b) ? Audes istam invidiam, non potentiam, sed pestilentiam, et non dicam dominam, sed quo tu fateris, ancillam potius invidorum, isto aere transceuso levare in cœlum, et inter deos vestros etiam sidereos collocare, vel ipsa quoque sidera his opprobriis infamare ?

CAPUT XXVII.— *De impietate Porphyrii, qua etiam Apuleii transcendit errorem.*

Quanto humanius et tolerabilius consecutaneus tuus Platonius Apuleius erravit, qui tantummodo dæmones a luna et infra ordinatos agitari morbis passionum mentisque turbellis, honorans quidem eos, sed volens nolensque confessus est ; deos tamen cœli

¹ Editi, sed contra multorum deorum cultum Deum verum non libere defendebat. Istud, Deum verum, glossæma est, quod non habent manuscripti. Ergo, defendebat, referendum ad ista quæ utrumque sapiebat Porphyrius.

² Editi, Jam dixisti angelos qui Patris annuntiant voluntatem, ab eis angelis esse diversos, qui ad theurgicos homines. Hic nos hæremus MSS.

³ Editi, cupientes. Emendantur ex manuscriptis.

(a) Mitiores hanc Augustini de Porphyrio sententiam esse demonstrant plurima historiae ecclesiasticæ scripta et monumenta, ex quibus colligitur Porphyrium ultro nec verè religionis dogmatum ullo modo inscium Christianos læcessivisse. Conf. Socrat., lib. 3, cap. 23 ; Suidam, et alios. M.

(b) Conf. Euseb. lib. 4 præpar. evang., capp. 9, 10.

superiores ad ætheria spatia pertinentes, sive visibiles, quos conspicuos lucere cernebat, solem ac lunam et cætera ibidem lumina, sive invisibiles quos putabat, ab omni labe istarum perturbationum¹ quanta potuit disputatione secrevit² (*De deo Socratis*). Tu autem hoc didicisti non a Platone, sed a Chakleis magistro³, ut in ætherias vel empyreas mundi sublinitates et firmamenta cœlestia extolleret vitia humana, ut possent dii vestri theurgis pronuntiare divina: quibus divinis te tamen per intellectualem vitam facis altiore, ut tibi videlicet tanquam philosopho theurgicæ artis purgationes nequaquam necessaria videantur; sed aliis eas tamen importas, ut hanc veluti mercedem reddas magistro tuis, quod eos qui philosophari non possunt, ad ista seducis, quæ tibi tanquam superiorum capaci esse inutilia constiteris; ut videlicet quicumque a philosophiæ virtute remoti sunt, quæ ardua nimis atque paucorum est, te auctore theurgos homines, a quibus non quidem in anima intellectuali, verum saltem in anima spirituali purgentur, inquirent; et quoniam istorum quos philosophari piget, incomparabiliter major est multitudo, plures ad secretos et illicitos magistros tuos, quam ad scholas Platonicas venire cogantur. Hoc enim tibi impudensissimi dæmones, deos ætherios se esse fingentes, quorum prædicator et angelus factus es (a), promiserunt; quod in anima spirituali theurgica arte purgati, ad Patrem quidem non redeunt, sed super aerias plagas inter deos ætherios habitabunt. Non audit ista hominum multitudo, propter quos a dæmonum dominatu liberandos Christus advenit. In illo enim habent misericordissimam purgationem et mentis et spiritus et corporis sui. Propterea quippe totum hominem sine peccato ille suscepit, ut totum quo constat homo, a peccatorum peste sanaret. Quem tu quoque utinam cognovisses, eique te potius, quam vel tuæ virtuti, quæ humana, fragilis et infirma est, vel perniciosissimæ curiositati sanandum tutius commisisses. Non enim te decepisset, quem vestra, ut tu ipse scribis, oracula sanctum immortalemque confessa sunt (b). De quo etiam poeta nobilissimus, poetice quidem, quia in alterius adumbrata persona, veraciter tamen, si ad ipsum referas, dixit:

Te duce, si qua manent sceleris vestigia nostri,
vrita perpetua solvant formidine terras.

(Virgil. Eclog. 4, vers. 13, 14.)

Ea quippe dixit, quæ etiam multum proficientium in virtute justitiæ possunt, propter hujus vitæ infirmitatem, etsi non scelera, scelerum tamen manere vestigia, quæ non nisi ab illo Salvatore sanantur, de quo iste versus expressus est. Nam hoc utique non a se ipso se dixisse Virgilius in Eclogæ ipsius quarto ferme versu indicat, ubi ait:

Ultima Cumæi venit jam carminis ætas.

¹ Editi, *perturbationum alienos*. Abest, *alienos*, a manuscriptis.

² Ha nostri Mss. in B., *discretis*. M.

³ Editi addunt, *his*.

(a) Conf. Euseb. Præpar. evang., lib. 4, cap. 4.

(b) Vid. infra, lib. 19, cap. 23.

Unde hoc a Cumæa Sybilla dictum esse incunctanter apparet. Theurgi vero illi, vel potius dæmones, deorum species figurasque fingentes, inquinant potius quam purgant humanum spiritum falsitate phantasmatum et deceptorum vanarum ludificatione formarum. Quomodo enim purgant hominis spiritum, qui immundum habent proprium? Alioquin nullo modo: carminibus invidi hominis ligentur, ipsaque inano beneficium quod præstatur¹ videbantur, aut metu premerent, aut simili invidentia denegarent. Sufficit quod purgatione theurgica, neque intellectualem animam, hoc est mentem nostram, dicis posse purgari, et ipsam spiritualem, id est nostræ animæ partem mente inferiorem, quam tali arte purgari posse asseris, immortalem tamen æternamque non posse hac arte fieri constiteris. Christus autem vitam promittit æternam: unde ad eum mundus, vobis quidem stomachantibus, mirantibus tamen stupentibusque concurrat. Quid prodest quia negare non potuisti errare homines theurgica disciplina, et quamplurimos fallere per cæcam insipientemque sententiam, atque esse certissimum errorem, agendo et supplicando ad principes angelosque decurrere; et rursus, quasi ne operam perdidisse videaris ista discendo², mittis homines ad theurgos, ut per eos anima spiritualis purgetur illorum, qui non secundum intellectualem animam vivunt?

CAPUT XXVIII. — *Quibus persuasionibus Porphyrius obcæcatus non potuerit veram sapientiam, quod est Christus, agnoscere.*

Mittis ergo homines in errorem certissimum. Neque hoc tantum malum te pudet, cum virtutis et sapientiæ profitearis amatorem³. Quam si verè ac fideliter amasses, Christum Dei virtutem et Dei sapientiam cognovisses, nec ab ejus saluberrima humilitate tumore inflatus vanæ scientiæ resiluisses (a). Constiteris tamen etiam spiritualem animam sine theurgicis artibus et sine teletis, quibus frustra discendis elaborasti, posse continentiæ virtute purgari. Aliquando etiam dicis, quod teletæ non post mortem elevant animam; ut jam nec eidem ipsi, quam spiritualem vocas, aliquid post hujus vitæ finem prodesse videantur: et tamen versas hæc multis modis et repetis, ad nihil aliud, quantum existimo, nisi ut talium quoque rerum quasi peritus appareas, et placeas illicitarum artium curiosus, vel ad eas facias ipse curiosos. Sed bene, quod metuendam dicis hanc artem vel legum periculis, vel ipsius actionis (b) Atque utinam hoc saltem abs te miseri audiant, et

¹ Sola editio Lov., *præstituri*.

² Sic Mss. Al Editi, *dicendo*.

³ Editi, *et sapientiæ te profitearis amatorem*. Abest, *te*, a manuscriptis.

(a) Porphyrius enim prius fuit christianus, postea vero fidei desertor et adversarius. Conf. Socras., Hist. eccles., lib. 3, cap. 23.

(b) *Vel legum periculis*, quia leges civiles pœnas magicæ arti constituerunt; *vel ipsius actionis*, nam periculosa res est, nisi rite exerceatur. Irritantur enim dæmones et magna inferunt mala imperite excautanti, quod multis exemplis ostenderunt: quippe amant perfoctam impietatem, a qua difficilis sit ad pietatem recursus. Ideo terroribus ad eam homines impellunt. L. C. VIVVS.

inde, ne illic absorbeantur, abscedant, aut eo penitus non accedant. Ignorantiam certe et propter eam multa vitia per nullas telelas purgari dicis, sed per solum *παρρησίαν* *τοῦν*, id est, paternam mentem sive intellectum, qui paternæ est voluntatis conscius (a). Hunc autem Christum esse non credis: contemnis enim eum propter corpus ex femina acceptum et propter crucis opprobrium, excelsam videlicet sapientiam spreis atque abjectis infimis idoneus de superioribus carpere. At ille implet, quod Prophetæ sancti de illo veraciter prædixerunt: *Perdam sapientiam sapientium, et prudentiam prudentium reprobabo* (Isai. xxix, 14). Non enim suam in eis perdit et reprobat, quam ipse donavit; sed quam sibi arrogat qui non habent ipsius. Unde commemorato isto prophetico testimonio, sequitur et dicit Apostolus: *Ubi sapiens? ubi scriba? ubi conquistator hujus sæculi? Nonne stultum fecit Deus sapientiam hujus mundi? Nam quoniam in Dei sapientia non cognovit mundus per sapientiam Deum, placuit Deo per stultitiam prædicationis salvos facere credentes. Quoniam quidem Judæi signa petunt, et Græci sapientiam quaerunt: nos autem, inquit, prædicamus Christum crucifixum; Judæis quidem scandalum, Gentibus autem stultitiam; ipsis vero vocatis Judæis et Græcis Christum Dei virtutem et Dei sapientiam: quoniam stultum Dei sapientius est hominibus, et infirmum Dei fortius est hominibus* (I Cor. i, 19-25). Hoc quasi stultum et infirmum nunquam sua virtute sapientes fortesque contemnunt. Sed hæc est gratia, quæ sanat infirmos, non superbæ jactantes falsam beatitudinem suam, sed humiliter potius veram miseriam confitentes.

CAPUT XXIX. — *De incarnatione Domini nostri Jesu Christi, quam confiteri Platoniorum erubescit impietas.*

1. Prædicas Patrem et ejus Filium, quem vocas paternum intellectum seu mentem; et horum medium, quem putamus te dicere Spiritum sanctum, et more vostro appellas tres deos (b). Ubi, etsi verbis indisciplinatis utimini, videtis tamen qualitercumque et quasi per quædam tenuis imaginationis umbracula, quo nitendum sit: sed incarnationem incommutabilis Filii Dei, qua salvamur, ut ad illa quæ credimus, vel ex quantalacumque parte intelligimus, venire possimus, non vultis agnoscere. Itaque videtis utcumque, etsi de longinquo, etsi acie caligante, patriam in qua manendum est; sed viam qua eundum est, non tenetis. Confiteris tamen gratiam, quandoquidem ad Deum per virtutem intelligentiæ pervenire, paucis dicis esse concessum. Non enim dicis, paucis placuit; vel, pauci voluerunt: sed cum dicis esse concessum, procul dubio Dei gratiam, non hominis sufficientiam confiteris. Uteris etiam hoc verbo apertius, ubi, Platonis sententiam (c) sequens, nec ipse dubitas, in hac vita hominem nullo modo ad perfectionem sapientiæ

(a) Multa de mente paterna ex Platonis Eugubinus, libro 4 de Perenni Philosophia, quæ illis etiam o *epekaina nous* dicitur. Porphyrii ipsius sententiam de mente divina seu latina refert in capite 11. *Coğrafος*.

(b) Vide infra, lib. 19, cap. 25.

(c) In Phædone et Epinomide.

pervenire, secundum intellectum tamen viventibus omne quod deest, providentia Dei et gratia, post hanc vitam posse compleri. O si cognovisses Dei gratiam per Jesum Christum Dominum nostrum, ipsamque ejus incarnationem, qua hominis animam corpusque suscepit, summum esse exemplum gratiæ videri potuisses. Sed quid faciam? Scio me frustra loqui mortuo: sed quantum ad te atinet; quantum autem ad eos, qui te magnipendunt, et te vel quicumque amore sapientiæ, vel curiositate artium, quas non debuisti discere, diligunt, quos potius in tua compellatione alloquor, fortasse non frustra. Gratia Dei non potuit gratius commendari, quam ut ipse unicus Dei Filius in se incommutabiliter manens indueret hominem¹, et spem dilectionis suæ daret hominibus, homine medio, quo ad illum ab hominibus veniretur, qui tam longe erat immortalis a mortalibus, incommutabilis a commutabilibus, justus ab impiis, beatus a miseris. Et quia naturaliter indidit nobis, ut beati immortalesque esse cupiamus, manens beatus, suscipiensque mortalem, ut nobis tribueret quod amamus, perpetuando docuit contemnere quod timemus.

2. Sed huic veritati ut possetis acquiescere, humilitate opus erat, quæ cervici vestræ difficillime persuaderi potest. Quid enim incredibile dicitur, præsertim vobis qui talia sapitis, quibus ad hoc credendum vos ipsos admonere debeatis; quid, inquam, vobis incredibile dicitur, cum Deus dicitur assumpsisse humanam animam et corpus? Vos certe tantum tribuitis animæ intellectuali, quæ anima utique humana est, ut eam consubstantialem paternæ illi menti, quem Dei Filium confitemini, fieri posse dicatis. Quid ergo incredibile est, si aliqua una intellectualis anima modo quodam ineffabili et singulari pro multorum salute suscepta est? Corpus vero animæ cohærere, ut homo totus et plenus sit, natura nostra ipsa teste cognoscimus. Quod nisi utilitissimum esset, hoc profecto esset incredibilis: facilius quippe in fidem recipiendum est, etsi humanum divino, etsi mutabilem incommutabili, tamen spiritum spiritui, aut, ut verbis utar quæ in usu habetis, incorporeum incorporeo quam corpus incorporeo cohærere. An forte vos offendit inusitatus corporis partus ex virgine? Neque hoc debet offendere, imo potius ad pietatem suscipiendam debet adducere, quod mirabilis mirabiliter natus est. An vero quod ipsum corpus morte depositum, et in melius resurrectione mutatum, jam incorruptibile, neque mortale² in superna subvexit? Hoc fortasse credere recusatis, intuentes Porphyrium in his ipsis libris, ex quibus multa posui, quos de regressu animæ scripsit, tam crebro præcipere, omne corpus esse fugiendum, ut anima possit beata permanere cum Deo. Sed ipse potius ista sentiens corrigendus fuit, præsertim cum de anima mundi hujus visibilis et tam ingentis corporeæ molis, cum illo tam incredibilia

¹ Vind. Am. Fr. et plures Mss., *indueretur hominem*. Et iidem libri post, *homine medio*, habent, *qua ad illum*. — Sic etiam nostri Mss. M.

² Sic Mss. Editi vero, *atque immortale*.

capiat. Platone quippe auctore (*In Timæo*), animal esse dicitis mundum, et animal beatissimum, quod vultis esse etiam sempiternum. Quomodo ergo nec unquam solvetur a corpore, nec unquam carebit beatitudinis, si ut anima beata sit, corpus est omne fugiendum? Solem quoque istum et cætera sidera, non solum in libris vestris corpora esse fatemini, quod vobiscum omnes homines et conspiciere non cunctantur, et dicere: verum etiam altiore, ut putatis, peritia, hæc esse animalia beatissima perhibetis, et cum his corporibus sempiterna. Quid ergo est, quod cum vobis fides christiana suadet, tunc obliviscimini, aut ignorare vos fingitis, quid disputare aut docere soleatis? Quid causæ est cur, propter opiniones vestras, quas vos ipsi oppugnat, christiani esse nolitis, nisi quia Christus humiliter venit, et vos superbi estis? Qualia sanctorum corpora in resurrectione futura sint, potest aliquando¹ scrupulosius inter christianarum Scripturarum doctissimos disputari: futura tamen sempiterna minime dubitamus; et talia futura, quale sua resurrectione Christus demonstravit exemplum². Sed qualiacumque sint, cum incorruptibilia prorsus et immortalia, nihiloque animæ contemplationem, qua in Deo figitur, impediunt prædicentur; vosque etiam dicatis esse in cælestibus immortalia corpora immortaliter beatorum: quid est quod ut beati simus, omne corpus fugiendum esse opinamini, ut fidem christianam quasi rationabiliter fugere videamini; nisi quia illud est, quod iterum dico, Christus est humilis, vos superbi? An forte corrigi pudet? Et hoc vitium nonnisi superbiorum est. Pudet videlicet doctos homines ex discipulis Platonis fieri discipulos Christi, qui piscatorem suo Spiritu docuit sapere ac dicere, *In principio erat Verbum, et Verbum erat apud Deum, et Deus erat Verbum: hoc erat in principio apud Deum. Omnia per ipsum facta sunt, et sine ipso factum est nihil. Quod factum est, in ipso vita erat; et vita erat lux hominum, et lux in tenebris lucet, et tenebræ eam non comprehenderunt.* Quod initium sancti Evangelii, cui nomen est, Secundum Joannem, quidam Platonius, sicut a sancto sene Simpliciano, qui postea Mediolanensi Ecclesiæ præsedidit episcopus (a), solebamus audire, aureis litteris conscribendum, et per omnes Ecclesias in locis eminentissimis proponendum esse dicebat. Sed ideo viluit superbis Deus ille magister, quia *Verbum caro factum est, et habitavit in nobis* (*Joan. 1, 4-5, 14*): ut parum sit miseris quod ægrotant, nisi se in ipsa etiam ægitudine extollant, et de medicina qua sanari poterant, erubescant. Non enim hoc faciunt ut erigantur, sed ut cadendo gravius affligantur.

CAPUT XXX. — *Quanta Platonici dogmatis Porphyrius refutaverit, et dissentiendo correxerit.*

Si post Platonem aliquid emendare existimatur indignum, cur ipse Porphyrius nonnulla et non parva

¹ Sic nostri Codd. 2050, 2052. In B., *aliquando*. M.

² Sola editio Lov., *quale resurrectionis suæ Christus demonstravit exemplo.*

(a) vid. lib. de Prædest. sanct., n. 4, et lib. 8 Confess., cap. 2, n. 4.

emendavit? Nam Platonem, animas hominum post mortem revolvi usque ad corpora bestiarum, scripsisse certissimum est (a). Hanc sententiam Porphyrii doctor tenuit¹ et Plotinus (*Enneadis 3, lib. 4, cap. 2*): Porphyrio tamen jure displicuit. In hominum sane, non sua quæ dimiserant, sed alia nova corpora redire humanas animas arbitratus est. Puduic scilicet illud credere, ne mater fortasse filium in mulam revoluta vectaret: et non puduit hoc credere, ubi revoluta² mater in puellam filio forsitan nuberet. Quanto creditur honestius quod sancti et veraces Angeli docuerunt, quod Prophætæ Dei Spiritu acti locuti sunt, quod ipse quem venturum Salvatorem præmissi nuntii prædixerunt, quod missi Apostoli qui orbem terrarum Evangelio repleverunt? quanto, inquam, honestius creditur, reverti semel animas ad corpora propria, quam reverti toties ad diversa? Verumtamen, ut dixi, ex magna parte correctus est in hac opinione Porphyrius, ut saltem in solos homines humanas animas præcipitari posse sentiret; belluinos autem carceres evertere, minime dubitaret. Dicit etiam, Deum ad hoc animam mundo dedisse, ut materiæ cognoscens mala, ad Patrem recurreret, nec aliquando jam talium polluta contagione teneretur. Ubi etsi aliquid inconvenienter sapit (magis enim data est corpori, ut bona faceret; non enim mala disceret, si non faceret), in eo tamen aliorum Platoniorum opinionem, et non in re parva emendavit, quod mundatam ab omnibus malis animam et cum Patre constitutam, nunquam jam mala mundi hujus passuram esse confessus est. Qua sententia profecto abstulit, quod esse Platonium maxime perhibetur, ut mortuus ex vivis, ita vivos ex mortuis semper fieri (*Plato in Phædone*): falsumque esse ostendit, quod Platonicè videtur dixisse Virgilius, in campos Elysios purgatas animas missas (quod nomine tanquam per fabulam videntur significari gaudia beatorum), ad fluvium Letheum evocari (b), hoc est ad oblivionem præteritorum:

Scilicet immemores supra ut convexa revisant,
Rursus et incipiunt in corpora velle reverti.
(*Æneid. lib. 6, vers. 750, 751.*)

Merito displicuit hoc Porphyrio: quoniam revera credere stultum est, ex illa vita, quæ beatissima esse non poterit nisi de sua fuerit æternitate certissima, desiderare animas corporum corruptibilium labem, et inde ad ista³ remeare, tanquam hoc agat summa purgatio, ut inquinatio requiratur. Si enim

¹ Ante editi, *Plato doctor tenuit*. Postea vind. Am. Er. sic prosequuntur, *et Platonis discipulo Porphyrio tamen jure displicuit*. Lov. autem, *et Plotinus, discipulo Porphyrio tamen*, etc. Locum restituunt libri veteres hic maxime inter se consentientes. Plotinus certe Platonis opinionem de reditu animarum in quævis corpora secutus est in *Ennead. 3, lib. 4, cap. 2*. Ipse vero Porphyrius scribit se decimo Gallieni imperatoris anno Romam e Græcia venisse, cum Plotinus annum fere quinquagesimum novum ageret, audissetque illum quinque annos.

² Sic Mss. At Editi, *ne revoluta*.

³ Nonnulli Mss., *istam*. — Ita Ms. 2052. M.

(a) Conf. Euseb. de Præpar. evang. lib. 13, cap. 16, in versione gallica, *Démonstrations évangéliques*, tom. 1. M.
(b) vid. Platonem in lib. 10 de Repub.

quod perfecte mundantur, hoc efficit, ut omnium obliviscantur malorum, malorum autem oblivio facit corporum desiderium, ubi rursus implicentur malis: profecto erit infelicitatis causa, summa felicitas: et stultitiæ causa, perfectio sapientiæ; et immundiæ causa, summa mundatio¹. Nec veritate ibi beata, erit anima, quamdiucumque erit, ubi oportet fallatur, ut beata sit. Non enim beata erit, nisi secunda. Ut autem secunda sit, falso putabit semper se beatam fore: quoniam aliquando erit et misera. Cui ergo gaudendi causa falsitas erit, quomodo de veritate gaudebit? Vidit hoc Porphyrius, purgatamque animam ob hoc reverti dixit ad Patrem, ne aliquando jam malorum polluta contagione teneatur. [XXXI.] Falso igitur a quibusdam Platonicis est creditus quasi necessarius orbis illa, ab eisdem abeundi et ad eadem revertendi. Quod etiamsi verum esset, quid hoc scire prodesset, nisi forte inde se nobis auderent præferre Platonici, quia id nos in hac vita jam nesciremus, quod ipsi in alia meliore vita purgatissimi et sapientissimi fuerant nescituri, et falsum credendo beati futuri? Quod si absurdissimum et stultissimum est dicere, Porphyrii profecto est præferenda sententia, his qui animarum circulos alternante semper beatitudine et miseria suspicati sunt. Quod si ita est, ecce Platonici in melius a Platone dissentit; ecce vidit, quod ille non vidit, nec post talem ac tantum magistrum refugit correctionem, sed homini præposuit veritatem.

CAPUT XXXI. — *Contra argumentum Platonicorum, quo animam humanam Deo asserunt esse coeternam.*

Cur ergo non potius divinitati credimus de his rebus, quas humano ingenio pervestigare non possumus, quæ animam quoque ipsam non Deo coeternam, sed creatam dicit esse, quæ non erat? Ut enim hoc Platonici nolent credere, hanc utique causam idoneam sibi videbantur afferre, quia nisi quod semper antea fuisset, sempiternum deinceps esse non posset. Quanquam et de mundo et de his quos in mundo deos a Deo factos scribit Plato (*In Timæo*), apertissime dicat eos esse cœpisse, et habere initium, finem tamen non habituros, sed per Conditoris potentissimam voluntatem in æternum permansuros esse perhibeat. Verum id quomodo intelligant, invenerunt, non esse hoc videlicet temporis, sed substitutionis initium. Sicut enim, inquit, si pes ex æternitate semper fuisset in pulvere, semper ei subesset vestigium; quod tamen vestigium a calcante factum nemo dubitaret, nec alterum altero prius esset, quamvis alterum ab altero factum esset: sic, inquit, et mundus atque in illo dii creati, et semper fuerunt semper existente qui facit, et tamen facti sunt. Numquid ergo si anima semper fuit, etiam miseria ejus semper fuisse dicenda est? Porro si aliquid in illa, quod ex æterno non fuit, esse cœpit ex tempore, cur non fieri potuerit, ut ipsa esset ex tempore, quæ antea non fuisset? Deinde beatitudo quoque ejus post experimentum malorum

firmior et sine fine mansura, sicut iste confitetur, procul dubio cœpit ex tempore, et tamen semper erit, cum antea non fuerit. Hæc igitur omnis argumentatio dissoluta est, quæ putatur nihil esse posse sine fine temporis, nisi quod initium non habet temporis. Inventa est enim animæ beatitudo, quæ cum initium temporis habuerit, finem temporis non habebit. Quapropter divinæ auctoritati humana cedat infirmitas, eisque beatis et immortalibus de vera religione credamus, qui sibi honorem non expetunt, quem Deo suo, qui etiam noster est, deberi sciunt; nec jubent, ut sacrificium faciamus, nisi ei tantummodo, cujus et nos cum illis, ut sæpe dixi et sæpe dicendum est, sacrificium esse debemus, per eum sacerdotem offerendi, qui in homine quem suscepit, secundum quem¹ et sacerdos esse voluit, etiam usque ad mortem sacrificium pro nobis dignatus est fieri.

CAPUT XXXII. — *De universali via animæ liberandæ, quam Porphyrius male quærendo non reperit, et quam sola gratia christiana reseravit.*

1. Hæc est religio, quæ universalem continet viam animæ liberandæ; quoniam nulla nisi hac liberari potest. Hæc est enim quodam modo regalis via, quæ una ducit ad regnum, non temporali fastigio nutandum, sed æternitatis firmitate securum. Cum autem dicit Porphyrius in primo juxta finem de Regressu animæ libro, nondum receptam unam quamdam sectam, quæ² universalem contineat viam animæ liberandæ, vel a philosophia verissima aliqua, vel ab Indorum moribus ac disciplina, aut inductione Chaldæorum, aut alia qualibet via, nondumque in suam notitiam eandem viam historiali cognitione perlata; procul dubio confitetur esse aliquam, sed nondum in suam venisse notitiam. Ita ei non sufficiebat quidquid de anima liberanda studiosissime didicerat, sibi que, vel potius aliis nosse ac tenere videbatur. Sentiebat enim adhuc sibi deesse aliquam præstantissimam auctoritatem, quam de re tanta sequi oporteret. Cum autem dicit, vel a philosophia verissima aliqua nondum in suam notitiam pervenisse sectam quæ universalem contineat viam animæ liberandæ; satis, quantum arbitrator, ostendit, vel eam philosophiam, in qua ipse philosophatus est, non esse verissimam, vel ea non contineri talem viam. Et quomodo jam potest esse verissima, qua non continetur hæc via? Nam quæ alia via est universalis animæ liberandæ, nisi qua universæ animæ liberantur, ac per hoc sine illa nulla anima liberatur? Cum autem addit et dicit, *Vel ab Indorum moribus et disciplina, vel ab inductione Chaldæorum, vel alia qualibet via*; manifestissima voce testatur, neque illis quæ ab Indis, neque illis quæ a Chaldæis didicerat, hanc universalem viam animæ liberandæ contineri; et

¹ Quidam haud melioris notæ Mss., *in forma quam suscepit, secundum quam*, etc. — Ita Ms. 2050. M.

² Vind. Am. Er., *nondum receptam in unam quamdam sectam*. sic etiam plerique manuscripti, qui mox tamen ab odis illis in verbo, *quæ*, dissentiunt, et habent, *quod*. — sic etiam nostri codices. M.

¹ Sic Mss. At cœlli, *munditia*.

utique se a Chaldæis oracula divina sumpsisse, quorum assiduum commemorationem facit, tacere non potuit. Quam vult ergo intelligi animæ liberandæ universalem viam nondum receptam, vel ex aliqua verissima philosophia, vel ex earum gentium doctrinis, quæ magnæ velut in divinis rebus habebantur, quia plus apud eas curiositas valuit quorumque angelorum cognoscendorum et colendorum, nondumque in suam notitiam historiali cognitione perlata? Quænam ista est universalis via, nisi quæ non suæ cuique genti propria, sed universis gentibus quæ communis esset, divinitus impertita est? Quam certe iste homo non mediocri ingenio præditus esse non dubitat. Providentiam quippe divinam sine ista universali via liberandæ animæ genus humanum relinquere potuisse non credit. Neque enim ait non esse, sed hoc tantum bonum tantumque adjutorium nondum receptum, nondum in suam notitiam esse perlatum: nec mirum. Tunc enim Porphyrius erat in rebus humanis, quando ista liberandæ animæ universalis via, quæ non est alia quam religio christiana, oppugnari permittebatur ab idolorum dæmonumque cultoribus regibusque terrenis (a), propter asserendum et consecrandum martyrum numerum, hoc est testium veritatis, per quos ostenderetur, omnia corporalia mala pro fide pietatis et commendatione veritatis esse toleranda. Videbat ergo ista Porphyrius, et per hujusmodi persecutiones cito istam viam perituram, et propterea non esse ipsam liberaudæ animæ universalem putabat, non intelligens hoc quod eum movebat, et quod in ejus electione perpeti metuebat, ad ejus confirmationem robustioremque commendationem potius pertinere.

2. Hæc est igitur animæ liberandæ universalis via, id est universis gentibus divina miseratione concessa; cujus profecto notitia ad quoscumque jam venit, et ad quoscumque ventura est, nec debuit, nec debet ei dici, Quare modo? et quare sero? quoniam mittentis consilium non est humano ingenio penetrabile. Quod sensit etiam iste, cum dixit, nondum receptum hoc donum Dei, et nondum in suam notitiam fuisse perlatum. Nec enim propterea verum non esse judicavit, quia nondum in suam fidem receptum fuerat, vel in notitiam nondum pervenerat. Hæc est, inquam, liberandorum credentium universalis via, de qua fidelis Abraham divinum accepit oraculum: *In semine tuo benedicentur omnes gentes* (Gen. xxii, 18). Qui fuit quidem gens Chaldæus, sed ut talia promissa perciperet, et ex illo propagaretur semen dispositum per Angelos in manu Mediatoris (Galat. iii, 19), in quo esset ista liberandæ animæ universalis via, hoc est omnibus gentibus data, jussus est discedere de terra sua et de cognatione sua et de domo patris sui (Gen. xii, 1). Tunc ipse primitus a Chaldæorum superstitionibus liberatus (b), unum verum Deum sequendo coluit, cui

hæc promittenti fideliter credidit. Hæc est universalis via, de qua in sancta prophetia dictum est: *Deus miserereatur nostri, et benedicat nos; illuminet vultum suum super nos, et miserereatur nostri: ut cognoscamus in terra viam tuam, in omnibus gentibus salutare tuum* (Psal. lxxvi, 2 et 3). Unde tanto post ex Abrahæ semine carne suscepta, de se ipso ait ipse Salvator: *Ego sum via, et veritas, et vita* (Joan. xiv, 6). Hæc est universalis via, de qua tanto ante tempore prophetatum est: *Erit in novissimis diebus manifestus mons domus Domini¹, paratus in cacumine montium, et extolletur super colles; et venient ad eum univærae gentes, et ingredientur nationes multæ, et dicent: Venite, ascendamus in montem Domini, et in domum Dei Jacob; et annuntiabit nobis viam suam, et ingrediemur in ea. Ex Sion enim prodiet lex, et Verbum Domini ab Jerusalem* (Isai. ii, 2 et 3). Via ergo ista non est unius gentis, sed universarum gentium. Et lex verbumque Domini non in Sion et Jerusalem remansit; sed inde processit, ut se per universa diffunderet. Unde ipse Mediator post resurrectionem suam discipulis trepidantibus ait: *Oportebat impleri quæ scripta sunt in Lege, et Prophetis, et Psalmis de me. Tunc aperuit illis sensum, ut intelligerent Scripturas, et dixit eis. Quia oportebat Christum pati, et resurgere a mortuis tertio die, et prædicari in nomine ejus penitentiam et remissionem peccatorum per omnes gentes, incipientibus ab Jerusalem* (Luc. xxiv, 44-47). Hæc est igitur universalis animæ liberandæ via, quam sancti Angeli sanctique Prophetæ prius in paucis hominibus ubi potuerunt Dei gratiam reperientibus, et maxime in Hebræa gente, cujus erat ipsa quodammodo sacrata, respublica, in prophetationem et prænuntiationem civitatis Dei ex omnibus gentibus congregandæ, et tabernaculo et templo et sacerdotio et sacrificiis significaverunt, et eloquiis quibusdam manifestis, plerisque mysticis, prædixerunt; præsens autem in carne ipse Mediator, et beati ejus Apostoli jam Testamenti novi gratiam revelantes apertius indicaverunt, quæ aliquanto occultius superioribus sunt significata temporibus, pro astatum generis humani distributione; sicut eam Deo sapienti placuit ordinare, mirabilem operum divinatorum, quorum superiorum pauca jam posui, contestantibus signis. Non enim apparuerunt tantummodo visiones angelicæ, et cælestium ministrorum sola verba sonuerunt: verum etiam hominibus Dei verbo simplicis pietatis agentibus spiritus immundi de hominum corporibus ac sensibus pulsi sunt; vitia corporis languoresque sanati; fera animalia terrarum et aquarum, volatilia cœli, ligna, elementa, sidera, divina jussa fecerunt, inferna cesserunt, mortui revixerunt: exceptis ipsius Salvatoris propriis singularibusque miraculis, maxime nativitatis et resurrectionis; in quorum uno maternæ virginitatis tantummodo sacramentum, in altero autem etiam eorum qui in fine resurrecturi sunt, demonstravit exemplum. Hæc via totum hominem mundat, et immortalitati

(a) Vixit Porphyrius sub Diocletiano et Maximiano principibus, qui Christianos iniquissimo insectati sunt odio.

(b) Conf. infra, lib. 16, cap. 12.

¹ In veteribus libris omittitur, *domus domus*.

mortalem ex omnibus quibus constat partibus præparat. Ut enim non alia purgatio ei parti quæreretur, quam vocat intellectualem Porphyrius, alia ei quam vocat spirituales, aliaque ipsi corpori, propterea totum suscepit veracissimus potentissimusque mundator atque salvator. Præter hanc viam, quæ partim cum hæc futura prænuntiantur, partim cum facta nuntiantur, nunquam generi defuit humano, nemo liberatus est, nemo liberatur, nemo liberabitur.

3. Quod autem Porphyrius universalem viam animæ liberandæ nondum in suam notitiam historiali cognitione dicit esse perlata: quid hac historia vel illustrius inveniri potest, quæ universum orbem tanto apice auctoritatis obtinuit, vel fidelius, in qua ita narrantur præterita, ut futura etiam prædicantur; quorum multa videmus impleta, ex quibus ea quæ restant sine dubio speremus implenda? Non enim potest Porphyrius, vel quicumque Platonici, etiam in hac via quasi terrenarum rerum et ad istam vitam mortalem pertinentium, divinationem prædictionemque contemnere: quod merito in aliis vaticinationibus¹ et quorumlibet modorum vel artium divinationibus faciunt. Negant enim hæc vel magnorum hominum, vel magni esse pendenda: et recte. Nam vel inferiorum sunt præsentione causarum, sicut arte medicinæ quibusdam antecedentibus signis plurima eventura² valetudini prævidentur; vel immundi dæmones sua disposita facta prænuntiant, quorum jus et in mentibus atque cupiditatibus iniquorum ad quæque congruentia facta ducendis quodam modo sibi vindicant, et in materia infirma fragilitatis humanæ³ (a). Non talia sancti homines in ista universali animarum liberandarum via gradientes, tanquam magna prophettare curarunt: quamvis et ista eos non fugerint, et ab

¹ veteres libri, vaticinationibus.

² Sic Mss. At editi, venturae.

³ Editi, et in quorumvis mentibus atque cupiditatibus iniquorum, congrua factis dicta vel dictis facta compensant, ut sibi jus quodam modo vindicent in materia infirma fragilitatis humanæ. Corriguntur auctoritate manuscritorum, qui sic habent: quorum (intellige, factorum suorum) jus et in mentibus atque cupiditatibus iniquorum ad quæque congruentia (id est, cupiditatibus iisdem pravis consentanea) facta ducendis quodammodo sibi vindicant, et in materia infirma fragilitatis humanæ.

(a) Vid. lib. de Divinat. dæmon., n. 3 et seqq.

eis sæpe prædicta sint, ad eorum fidem faciendam, quæ mortalium sensibus non poterant intimari, nec ad experimentum celeri facilitate perducere. Sed alia erant vere magna atque divina, quæ quantum dabatur, cognita Dei voluntate, futura nuntiabant. Christus quippe in carne venturus, et quæ in illo tam clara perfecta sunt atque in ejus nomine impleta, pœnitentia hominum et ad Deum conversio voluntatum, remissio peccatorum, gratia justitiæ, fides pio- rum et per universum orbem in veram divinitatem multitudo credentium, culturæ simulacrorum demonumque subversio et a tentationibus exercitatio, proficientium purgatio et liberatio ab omni malo, iudicii dies, resurrectio mortuorum, societatis impiorum æterna damnatio, regnumque æternum gloriosissimæ civitatis Dei conspectu ejus immortaliter perfruendis, in hujus viæ Scripturis prædicta atque promissa sunt: quorum tam multa impleta conspicimus, ut recta pietate futura esse cætera confidamus. Hujus viæ rectitudinem usque ad Deum videndum eique in æternum cohærendum, in sanctarum Scripturarum, qua¹ prædicatur atque asseritur, veritate, quicumque non credunt, et ob hoc nec intelligunt, oppugnare possunt, sed expugnare non possunt (a).

4. Quapropter in decem libris istis, etsi minus quam nonnullorum de nobis exspectabat intentio, tamen quorundam studio, quantum verus Deus et Dominus adjuvare dignatus est, satisfacimus, refutando contradictiones impiorum, qui Conditori sanctæ civitatis, de qua disputare instituimus, deos suos præferunt. Quorum decem librorum quinque superiores adversus eos conscripti sunt, qui propter bona vitæ hujus deos colendos putant; quinque autem posteriores adversus eos qui cultum deorum propter vitam, quæ post mortem futura est, servandum existimant. Deinceps itaque, ut in primo libro polliciti sumus, de duarum civitatum, quas in hoc sæculo perplexas diximus invicemque permixtas, exortu et procurso et debitis finibus, quod dicendum arbitror, quantum divinitus adjuvabor, expediám.

¹ Sic Mss. Editi vero, in sanctuario Scripturarum esse locatam, qua, etc.

(a) Conf. epist. 137, ad Volusianum.

LIBER UNDECIMUS (a).

incipit operis hujus pars altera (b), quæ est de duarum civitatum, terrenæ et cælestis, exortu, et procurso, ac debitis finibus. Hoc primum libro civitatum earundem exordia quomodo in Angelorum honorum et malorum discretionem præcesserunt, demonstrat Augustinus, eaque occasione agit de constitutione mundi, quæ sacris Litteris in principio libri Geneseos describitur.



CAPUT PRIMUM. — De ea parte operis, qua duarum civitatum, id est cælestis ac terrenæ, initia et fines incipiunt demonstrari.

Civitatem Dei dicimus, cujus ea Scriptura testis

(a) Scriptus anno Christi 416 aut 417.

(b) « Pars altera operis hujus, » ait Augustinus in lib. 2 retract., cap. 43, n. 2, « duodecim libris continetur. Horum primi quatuor continent exortum duarum civitatum, « quarum est una Dei, altera hujus mundi: secundi qua-

est, quæ non fortuitis motibus animorum, sed plane

« tuor excursus earum sive procursum: tertii vero, qui « et postremi, debitos fines. » Undecimo huic libro dabit operam Augustinus, quando ipse rogatu Paulus Orosius suos Historiarum libros scribere aggressus est, anno videlicet Christi 416 aut 417. Ipsum enim Orosius in præfatione laudat « perficiendo adversus Paganos undecimo libro insistente: tem: quorum, » ait, « jam decem orientes radii mox ut « de specula ecclesiasticæ claritatis clati sunt, toto orbe « fulserunt. »

summæ dispositione providentiæ super omnes omnium gentium litteras, omnia sibi genera ingeniorum humanorum divina excellens auctoritate subjecit (a). Ibi quippe scriptum est : *Gloriosa dicta sunt de te, civitas Dei* (Psal. LXXXVI, 3). Et in alio psalmo legitur : *Magnus Dominus, et laudabilis valde in civitate Dei nostri, in monte sancto ejus, dilatans exultationes universæ terræ*. Et paulo post in eodem psalmo : *Sicut audivimus, ita et vidimus, in civitate Domini virtutum, in civitate Dei nostri; Deus fundavit eam in æternum* (Psal. XLVII, 2, 3, 9). Item in alio : *Fluminis impetus lætificavit civitatem Dei, sanctificavit tabernaculum suum Altissimus; Deus in medio ejus, non commovebitur* (Psal. XLV, 5 et 6). Illis atque hujusmodi testimoniis, quæ omnia commemorare nimis longum est, dilicimus esse quamdam civitatem Dei, cujus cives esse concupiscimus¹ illo amore, quem nobis illius Conditor inspiravit. Huic Conditori sanctæ civitatis, cives terrænæ civitatis deos suos præferunt, ignorantes eum esse Deum deorum, non deorum falsorum, hoc est impiorum et superbiorum, qui ejus incommutabili omnibusque communi luce privati, et ob hoc ad quamdam egenam potestatem redacti, suas quodammodo privatas potentias consecantur, honoresque divinos a deceptis subditis quærent; sed deorum piorum atque sanctorum, qui potius se ipsos ani subdere quam multos sibi, potiusque Deum colere quam pro Deo coli delectantur. Sed hujus sanctæ civitatis inimicis, decem superioribus libris, quantum potuimus, Domino et Rege nostro adjuvante, respondimus. Nunc vero quid a me jam expectetur agnoscens, meique non immemor debiti, de duarum civitatum, terrænæ scilicet et cælestis, quas in hoc interim sæculo perplexas quodammodo diximus invicemque permixtas, exortu et excursu et debitis finibus, quantum valuerim, disputare, ejus ipsius Domini et Regis nostri ubique opitulatione fretus, aggrediar : primumque dicam quemadmodum exordia duarum istarum civitatum in Angelorum diversitate præcesserint.

CAPUT II. — De cognoscendo Deo, ad cujus notitiam nemo hominum pervenit, nisi per Mediatorem Dei et hominum hominem Jesum Christum.

Magnum est et admodum rarum universam creaturam corpoream et incorpoream consideratam compertamque mutabilem intentione mentis excedere, atque ad incommutabilem Dei substantiam pervenire, et illic discere ex ipso, quod cunctam naturam quæ non est quod ipse, non fecit nisi ipse. Sic enim Deus cum homine non per aliquam creaturam loquitur corporalem, corporalibus instrepens auribus, ut inter sonantem et audientem aëria spatia verberentur; neque per ejusmodi spiritualem quæ corporum similitudinibus figuratur, sicut in somniis vel quo alio tali modo; nam et sic velut corporis auribus loquitur, quia velut per corpus loquitur et velut interposito corporalium locorum intervallo; multum enim

similia sunt talia visa corporibus: sed loquitur ipsa veritate, si quis sit idoneus ad audiendum mente, non corpore. Ad illud enim hominis ita loquitur, quod in homine cæteris quibus homo constat est melius, et quo ipse Deus solus est melior. Cum enim homo rectissime intelligatur, vel si hoc non potest, saltem credatur factus ad imaginem Dei; profecto ea sui parte est propinquior superiori Deo, qua superat inferiores suas (a), quas etiam cum pecoribus communes habet. Sed quia ipsa mens, cui ratio et intelligentia naturaliter inest, vitii quibusdam tenebrosis et veteribus invalida est, non solum ad inhærendum fruendo, verum etiam ad perferendum incommutabile lumen¹, donec de die in diem renovata atque sanata fiat tantæ felicitatis capax, fide primum fuerat imbuenda atque purganda. In qua ut fidentius ambularet ad veritatem, ipsa veritas Deus Dei Filius homine assumpto, non Deo consumpto, eandem constituit atque fundavit fidem, ut ad hominis² Deum iter esset homini per hominem Deum. Hic est enim mediator Dei et hominum homo Christus Jesus. Per hoc enim mediator, per quod homo³; per hoc et via. Quoniam si inter eum qui tendit et illud quo tendit, via media est, spes est perveniendi: si autem desit, aut ignoretur qua eundum sit, quid prodest nosse quo eundum sit? Sola est autem adversus omnes errores via munitissima, ut idem ipse sit Deus et homo: quo itur, Deus; qua itur, homo.

CAPUT III. — De auctoritate canonicæ Scripturæ, divino Spiritu conditæ.

Hic prius per Prophetas, deinde per se ipsi, postea per Apostolos, quantum satis esse judicavit, locutus, etiam Scripturam condidit, quæ canonica nominatur, eminentissimæ auctoritatis, cui fidem habemus de his rebus quas ignorare non expedit, nec per nosmetipsos nosse idonei sumus. Nam si ea sciri possunt testibus nobis, quæ remota non sunt a sensibus nostris, sive interioribus sive etiam exterioribus; unde et præsentia nuncupantur, quod ita ea dicimus esse præ sensibus, sicut præ oculis quæ præsto sunt oculis: profecto ea quæ remota sunt a sensibus nostris, quoniam nostro testimonio scire non possumus, de his alios testes requirimus, eis que credimus, a quorum sensibus remota esse vel fuisse non credimus. Sicut ergo de visibilibus, quæ non vidimus, eis credimus qui viderunt, atque ita de cæteris quæ ad suum quemque sensum corporis pertinent: ita de his quæ animo ac mente sentiuntur (quia et ipse rectissime dicitur sensus, unde et sententiæ vocabulum accepit), hoc est de invisibilibus quæ a nostro sensu interiore⁴ remota sunt, iis nos oportet credere, qui hæc in illo incorporeo lumine disposita didicerunt, vel manentia contuentur.

¹ Vind. Fr. et unus e Mss., *ad perfruendum merendo incommutabile lumen*. Am., *ad perferendum merendo incommutabile lumen*. Tres Mss., *ad perfruendum incommutabile lumen*. — Sic etiam Ms. 2050. M.

² Vox, *hominis*, ommissa est a Vind. et Lov.

³ Editi, *per quod et homo*. Manuscripti carent particula, et; cujus loco quidam codex habet, *est*.

⁴ Lov., *exteriore*, dissentientibus editis aliis et manuscriptis.

(a) Supple, *partes*.

¹ Mss. plerique, *concupimus*. Et quidam, *concupimus*. (a) Conl. lib. 2 de Doctr. Christ., n. 63.

CAPUT IV. — *De conditione mundi, quod nec intemporalis sit, nec novo Dei ordinata consilio, quasi postea voluerit, quod antea noluerit.*

1. Visibilium omnium maximus est mundus; invisibilium omnium maximus est Deus. Sed mundum esse conspicimus, Deum esse credimus. Quod autem Deus mundum fecerit, nulli tutius credimus, quam ipsi Deo. Ubi eam audivimus? Nusquam interim nos melius quam in Scripturis sanctis, ubi dixit propheta ejus, *In principio fecit Deus caelum et terram* (*Gen. 1, 1*). Numquidnam ibi fuit iste propheta, quando fecit Deus caelum et terram? Non: sed ibi fuit Sapientia Dei (a), per quam facta sunt omnia, quæ in animas etiam sanctas se transfert, amicos Dei et Prophetas constituit (*Sap. vii, 27*), eisque opera sua sine strepitu intus enarrat. Loquuntur eis quoque Angeli Dei, qui semper vident faciem Patris (*Matth. xviii, 10*), voluntatemque ejus quibus oportet annuntiant. Ex his unus erat iste propheta, qui dixit et scripsit, *In principio fecit Deus caelum et terram*. Qui tam idoneus testis est per quem Deo credendum sit, ut eodem Spiritu Dei, quo hæc sibi revelata cognovit, etiam ipsam fidem nostram futuram tanto ante prædixerit.

2. Sed quid placuit Deo æterno tunc facere caelum et terram, quæ antea non fecisset (b)? Qui hoc dicunt, si mundum æternum¹ sine ullo initio, et ideo nec a Deo factum videri volunt, nimis aversi sunt a veritate, et letali morbo impietatis insaniunt. Exceptis enim propheticis vocibus, mundus ipse ordinatissima sua mutabilitate et mobilitate et visibilium omnium pulcherrima specie quodammodo tacitus et factum se esse, et non nisi a Deo ineffabiliter atque invisibiliter magno et ineffabiliter atque invisibiliter pulchro fieri se potuisse proclamat. Qui autem a Deo quidem factum fatentur, non tamen eum volunt temporis habere, sed suæ creationis initium, ut modo quodam vix intelligibili semper sit factus, dicunt quidem aliquid, unde sibi Deum videntur velut a fortuita temeritate defendere, ne subito illi venisse credatur in mentem, quod nunquam ante venisset, facere mundum, et accidisse illi voluntatem novam, cum in ullo sit omnino mutabilis: sed non video quomodo eis possit hæc cæteris rebus ratio ista subsistere, maximeque in anima, quam si Deo cœternam esse contenderint, unde illi acciderit nova miseria, quæ nunquam antea per æternum, nullo modo poterunt explicare. Si enim alternasse semper ejus miseriam et beatitudinem dixerint, necesse est dicant etiam semper alternaturam²: unde illa eos sequetur absurditas, ut etiam cum beata dicitur, in hoc utique non sit beata, si futuram suam miseriam et turpitudinem prævidet; si autem non prævidet, nec se turpem ac miseram fore,

sed beatam semper existimat, falsa opinione sit beata: quo dici stultius nihil potest. Si autem semper quidem per sæcula retro infinita cum beatitudine alternasse animæ miseriam putant, sed nunc jam de cætero cum fuerit liberata, ad miseriam non esse redituram, nihilominus convincuntur nunquam eam fuisse vere beatam, sed deinceps esse incipere nova quadam nec fallaci beatitudine; ac per hoc fatebuntur accidere illi aliquid novi, et hoc magnum atque præclarum, quod nunquam retro per æternitatem accidisset. Cujus novitatis causam si Deum negabunt in æterno habuisse consilio, simul eum negabunt beatitudinis ejus auctorem; quod nefandæ impietatis est: si autem dicent etiam ipsum novo consilio excogitasse, ut de cætero sit anima in æternum beata, quomodo eum alienum ab ea, quæ illis quoque displicet, mutabilitate monstrabunt? Porro, si ex tempore creatam, sed nullo ulterius tempore perituram, tanquam numerum³, habere initium, sed non habere finem fatentur, et ideo semel expertam miseriam, si ab eis fuerit liberata, nunquam miseram postea futuram, non utique dubitabunt hoc fieri manente incommutabilitate consilii Dei. Si ergo credant et mundum ex tempore fieri potuisse, nec tamen ideo Deum in eo faciendo æternum consilium voluntatemque mutasse.

CAPUT V. — *Tam non esse cogitandum de infinitis temporum spatiis ante mundum, quam nec de infinitis locorum.*

Deinde videndum est istis, qui Deum conditorem mundi esse consentiunt, et tamen quærent de mundi tempore quid respondeamus, quid ipsi respondeant de mundi loco. Ita enim quæritur cur potius tunc et non antea factus sit, quemadmodum quæri potest cur hic potius ubi est et non alibi. Nam si infinita spatia temporis ante mundum cogitant, in quibus eis non videtur Deus ab opere cessare potuisse, similiter cogitent⁴ extra mundum infinita spatia locorum, in quibus si quisquam dicat non potuisse vacare omnipotentem, nonne consequens erit, ut innumerabiles mundos cum Epicuro somnare cogantur⁵; ea tantum differentia, quod eos ille fortuitis motibus atomorum gigni asserit et resolvi, isti autem opere Dei factos dicturi sunt, si eum per interminabilem immensitatem locorum extra mundum circumquaque patentium vacare noluerint, nec eosdem mundos, quod etiam de isto sentiunt, ulla causa posse dissolvi? Cum his enim agimus qui et Deum incorporeum, et omnium naturarum quæ non sunt quod ipse, creatorem nobiscum sentiunt; alios autem nimis indignum est ad istam disputationem religionis admittere: maxime quod apud eos⁶ qui multis diis sacrorum obsequium

¹ Hic sola editio Lov. addit, *existimarent*.

² *Er., semper alternare naturam*. Aliquot Mss., *semper alternasse naturam*. Et quidam, *semper alternatam naturam*. (a) Proverb. viii, 27: *Quando præparabat caelos, aæram, etc.*

(b) Conf. lib. 1 de Gen. contra Manich., n. 3, et lib. 11 Confess., capp. 10, 12 et 30.

³ Editi, *tanquam verum*. Verius Mss., *tanquam numerum*. Numerus enim habet quidem initium ab unitate, sed finem per se in quo sistat non habet: quippe quancumque addito numero major semper adjici potest.

⁴ Nonnulli Mss., *cogitant*.

⁵ Sic Mss. At Editi, *cogatur*.

⁶ In editione Lov. omisum est, *maxime quod apud eos*, et verba sic male sunt colligata: *Alios autem nimis indignum est ad istam disputationem religionis admittere, qui multis diis sacrorum obsequium deferendum putant. Isti philosophi cæteros, etc.; quasi ijsi cum quibus agere de*

deferendum putant, isti philosophos ceteros nobilitate atque auctoritate vicerunt, non ob aliud, nisi quia longo quidem intervallo, verumtamen reliquis propinquiores sunt veritati. An forte substantiam Dei, quam nec includunt, nec determinant, nec distendunt loco, sed eam, sicut de Deo sentire dignum est, fatentur incorporea presentia ubique totam, a tantis locorum extra mundum spatii absentem esse dicturi sunt, et uno tantum, atque in comparatione illius infinitatis tam exiguo loco, in quo mundus est, occupatam? Non opinor eos in hæc vaniloquia progressuros. Cum igitur unum mundum ingenti quidem mole corporea, finitum tamen et loco suo determinatum, et operante Deo factum esse dicant: quod respondent de infinitis extra mundum locis, cur in eis ab opere Deus cesset; hoc sibi respondeant de infinitis ante mundum temporibus, cur in eis ab opere Deus cessaverit. Et sicut non est consequens ut fortuito potius quam ratione divina Deus, non alio, sed isto in quo est loco, mundum constituerit, cum pariter infinitis ubique patentibus nullo excellentiore merito posset hic eligi, quamvis eandem divinam rationem, qua id factum est, nulla possit humana comprehendere¹: ita non est consequens ut Deo aliquid existimemus accidisse fortuitum, quod illo potius quam anteriore tempore condidit mundum, cum æqualiter anteriora tempora per infinitum retro spatium præterissent, nec fuisset aliqua differentia unde tempus tempori eligendo præponeretur. Quod si dicunt inanes esse hominum cogitationes quibus infinita imaginantur loca, cum locus nullus sit præter mundum; respondetur eis, isto modo inaniter homines cogitare præterita tempora vacationis Dei, cum nullum tempus sit ante mundum (a).

CAPUT VI. — *Creationis mundi et temporum unum esse principium, nec aliud alio præveniri.*

Si enim recte discernantur æternitas et tempus, quod tempus sine aliqua mobili mutabilitate² non est, in æternitate autem nulla mutatio est; quis non videat quod tempora non fuissent, nisi creatura fieret, quæ aliquid aliqua motione mutaret; cujus motionis et mutationis cum aliud atque aliud, quæ simul esse non possunt, cedit atque succedit, in brevioribus vel productioribus morarum intervallis tempus sequeretur? Cum igitur Deus, in cujus æternitate nulla est omnino mutatio, creator sit temporum et ordinator, quomodo dicatur post temporum spatia mundum creasse, non video; nisi dicatur ante mundum jam aliquam fuisse creaturam, cujus motibus tempora currerent (b). Porro si Litteræ sacræ maximeque veraces ita dicunt, in principio fecisse Deum cælum

religione non indignum videtur (haud dubie Platonicæ) non cum aliis etiam putantur diis multis deferendum sacrarum obsequium.

¹ Vind. Am. Er. post; *comprehendere*, addunt, *natura*: Lov., *mens*. Superfluo: nam in veteribus libris subaudiendum relinquitur, *ratio*.

² Sic Vind. Am. Er. et plures Mss. At Lov., *mobili mobilitate*.

(a) Conf. lib. 11 Confess., capp. 13 et seqq.

(b) Conf. lib. 5 de Gen. ad Litt., n. 13.

et terram (*Gen. 1, 1*), ut nihil antes fecisse intelligatur, quia hoc potius in principio fecisse diceretur, si quid fecisset ante cætera cuncta quæ fecit; procul dubio non est mundus factus in tempore, sed cum tempore. Quod enim sit in tempore, et post aliquod sit, et ante aliquod tempus; post id quod præteritum est, ante id quod futurum est: nullum autem posset esse præteritum; quia nulla erat creatura, cujus mutabilibus motibus ageretur. Cum tempore autem factus est mundus, si in ejus conditione factus est mutabilis motus, sicut videtur se habere etiam ordo ille primorum sex vel septem dierum, in quibus et mane et vespera nominantur, donec omnia quæ his diebus Deus fecit, sexto perficiantur die, septimoque in magno mysterio Dei vacatio commendetur. Qui dies ejusmodi sint, aut perdifficile nobis, aut etiam impossibile est cogitare; quanto magis dicere?

CAPUT VII. — *De qualitate primorum dierum, qui antequam sol fieret, vesperam et mane traduntur habuisse.*

Videmus quippe istos dies notos non habere vesperam nisi de solis occasu, nec mane nisi de solis exortu: illorum autem priores tres dies sine sole peracti sunt, qui quarto die factus refertur. Et primitus quidem lux verbo Dei facta, atque inter ipsam et tenebras Deus seporasse narratur, et eandem lucem vocasse diem, tenebras autem noctem (*Gen. 1, 4*): sed qualis illa sit lux, et quo alternante motu; qualemque vesperam et mane fecerit, remotum est a sensibus nostris; nec ita ut est, intelligi a nobis potest, quod tamen sine ulla hæsitacione credendum est. Aut enim aliqua lux corporea est, sive in superioribus mundi partibus longe a conspectibus nostris, sive unde sol postmodum accensus est: aut lucis nomine significata est sancta civitas, in sanctis Angelis et spiritibus beatis, de qua dicit Apostolus, *Quæ sursum est Jerusalem, mater nostra æterna in cælis* (*Galat. iv, 26*). Ait quippe et alio loco, *Omnes enim vos filii lucis estis, et filii diei; non sumus noctis neque tenebrarum* (*1 Thess. v, 5*). Si tamen et vesperam diei hujus et mane aliquatenus congruenter intelligere valeamus. Quoniam¹ scientia creaturæ in comparatione scientiæ Creatoris quodammodo vesperascit: itemque lucescit et mane fit, cum et ipsa refertur ad laudem dilectionemque Creatoris; nec in noctem vergitur, ubi non Creator creaturæ dilectione relinquitur. Denique Scriptura cum illos dies dinumeraret ex ordine, nusquam interposuit vocabulum noctis. Non enim ait alicubi, *Facta est nox*; sed, *Facta est vespera, et factum est mane dies unus* (*Gen. 1, 5*). Ita dies secundus, et cæteri. Cognitio quippe creaturæ in se ipsa decoloratio est, ut ita dicam, quam cum in Dei Sapientia cognoscitur, velut in arte qua facta est. Ideo vespera congruentius quam nox dici potest: quæ tamen, ut dixi, cum ad laudandum et amandum refertur Creatorem, recurrit in mane. Et hoc cum facit in cognitione sui ipsius, dies unus est: cum in cognitione firmamenti, quod

¹ Sic Mss. At Editi: *Fit tamen et vespera diei hujus et mane aliquatenus: quoniam scientia creaturæ in comparatione, etc.*

inter aquas inferiores et superiores caelum appellatum est, dies secundus : cum in cognitione terrae ac maris omniumque gignentium, quae radicibus continuata sunt terrae, dies tertius : cum in cognitione luminarium majoris et minoris omniumque siderum, dies quartus : cum in cognitione omnium ex aquis animalium natatum atque volatilium, dies quintus : cum in cognitione omnium animalium terrenorum atque ipsius hominis, dies sextus (a).

CAPUT VIII. — *Quae qualisve intelligenda sit Dei requies, qua post opera sex dierum requievit in septimo.*

Cum vero in die septimo requiescit Deus ab omnibus operibus suis, et sanctificat eum; nequaquam est accipiendum pueriliter, tanquam Deus laboraverit operando, qui dixit, et facta sunt (Psal. cxlviii, 5), verbo intelligibili et sempiterno, non sonabili et temporali. Sed requies Dei requiem significat eorum qui requiescunt in Deo; sicut laetitia domus, laetitiam significat eorum qui laetantur in domo, etiamsi non eos domus ipsa, sed alia res aliqua laetos facit. Quanto magis, si eadem domus pulchritudine sua faciat laetos habitatores, ut non solum eo loquendi modo laeta dicatur, quo significamus per id quod continet id quod continetur; sicut, Theatra plaudunt, prata mugiunt, cum in illis homines plaudant, in his boves mugiant: sed etiam illo quo significatur per efficientem id quod efficitur; sicut laeta epistola dicitur, significans eorum laetitiam, quos legentes efficit laetos? Convenientissime itaque cum Deum requievisse prophetica narrat auctoritas, significat requies eorum qui in illo requiescunt, et quos facit ipse requiescere (b). Hoc etiam hominibus quibus loquitur, et propter quos utique conscripta est, promittente prophetia, quod etiam ipsi post bona opera quae in eis et per eos operatur Deus, si ad illum prius in ista vita per fidem quodammodo accesserint, in illo habebunt requiem sempiternam. Hoc enim et sabbati vacatione ex praeepto legis in vetere Dei populo figuratum est, unde suo loco diligentius arbitror disserendum.

CAPUT IX. — *De Angelorum conditione quid secundum divina testimonia sentiendum sit.*

Nunc, quoniam de sanctae civitatis exortu dicere institui, et prius quod ad sanctos Angelos attinet dicendum putavi, quae hujus civitatis et magna pars est, et eo beatior, quod nunquam peregrinata, quae hinc divina testimonia suppetant, quantum satis videbitur, Deo largiente, explicare curabo. Ubi de mundi constitutione sacrae Litterae loquuntur, non evidenter dicitur utrum vel quo ordine creati sint Angeli: sed si praetermissi non sunt, vel caeli nomine, ubi dictum est, *In principio fecit Deus caelum et terram* (Gen. 1, 4); vel potius lucis hujus, de qua loquor, significati sunt. Non autem praeter-

missos esse hinc existimo, quod scriptum est requievisse Deum in septimo die ab omnibus operibus suis quae fecit; cum liber ipse ita sit exorsus, *In principio fecit Deus caelum et terram*: ut ante caelum et terram nihil aliud fecisse videatur. Cum ergo a caelo et terra caeperit, atque ipsa terra quam primitus fecit, sicut Scriptura consequenter eloquitur, invisibilis et incomposita, nondumque luce facta, utique tenebrae fuerint super abyssum, id est super quamdam terrae et aquae indistinctam confusionem (ubi enim lux non est, tenebrae sint necesse est); deinde omnia creando disposita sint, quae per sex dies consummata narrantur: quomodo Angeli praetermitterentur, tanquam non essent in operibus Dei, a quibus in die septimo requievit? Opus autem Dei esse Angelos, hic quidem etsi non praetermissum, non tamen evidenter expressum est; sed alibi hoc sancta Scriptura clarissima voce testatur. Nam et in hymno trium in camino virorum cum praedictum esset, *Benedicite, omnia opera Domini, Domino*; in executione eorumdem operum, etiam Angeli nominati sunt (Dan. iii, 57, 58). Et in Psalmo canitur: *Laudate Dominum de caelis, laudate eum in excelsis. Laudate eum, omnes Angeli ejus; laudate eum, omnes Virtutes ejus. Laudate eum, sol et luna; laudate eum, omnes stellae et lumen. Laudate eum, caeli et caelorum; et aquae quae super caelos sunt, laudent nomen Domini. Quoniam ipse dixit, et facta sunt; ipse mandavit, et creata sunt* (Psal. cxlviii, 1-5). Etiam hic apertissime a Deo factos esse Angelos divinitus dictum est, cum eis inter caetera caelestia commemoratis, inferatur ad omnia, *Ipsa dixit, et facta sunt*. Quis porro audebit opinari, post omnia ista quae sex diebus enumerata sunt, Angelos factos? Sed et si quisquam ita desipit, redarguit istam vanitatem illa Scriptura paris auctoritatis, ubi Deus dicit, *Quando facta sunt sidera, laudaverunt me voce magna omnes Angeli mei* (Job xxxviii, 7, sec. LXX). Jam ergo erant Angeli, quando facta sunt sidera. Facta sunt autem quarto die. Numquidnam ergo die tertio factos esse dicemus? Absit. In promptu est enim, quid illo die factum sit. Ab aquis utique terra discreta est, et distinctas sui generis species duo ista elementa sumpserunt, et produxit terra quidquid ei radicibus inhaeret. Numquidnam secundo? Ne hoc quidem: tunc enim firmamentum factum est inter aquas superiores et inferiores, caelumque appellatum est; in quo firmamento facta sunt sidera quarto die. Nimirum ergo si ad istorum dierum opera Dei pertinent Angeli, ipsi sunt lux illa quae diei nomen accepit, cujus unitas ut commendaretur, non est dictus dies primus, sed dies unus (a). Nec alius est dies secundus, aut tertius, aut caeteri: sed idem ipse unus ad implendum senarium vel septenarium

¹ Sola editio Lov., post *communia omnia ista*. Et paulo post, *patri auctoritate*; dissentientibus caeteris libris.

(a) Confer libros de Gen. ad Litt., passim, sed imprimis lib. 1 et 4.

(b) Aristobulus, verba sunt Eusebii, Praepar. evang., lib. 13, cap. 12, « prodidit ideo dictum esse septimo die Deum quievisse, quod conditis a se rebus quietem indidit, id est stabilitatem permanentem, perpetuitatem, ordinemque ratum, fixum et immutabilem; vel quod quae cumque facere decesserat, ita prorsus, ut destinaret, peracta fuerunt. » Cognatus.

numerum repetitus est, propter senariam vel septenariam cognitionem; senariam scilicet operum quæ se fit Deus, et septenariam quietis Dei (a). Cum enim dixit Deus, *Fiat lux; et facta est lux*; si recte in hac luce creatio intelligitur Angelorum, profecto facti sunt participes lucis æternæ, quod est ¹ ipsa incommutabilis Sapientia Dei, per quam facta sunt omnia, quem dicimus unigenitum Dei Filium; ut ea luce illuminati, qua creati, fierent lux, et vocarentur dies participatione incommutabilis lucis et diei, quod est Verbum Dei, per quod et ipsi et omnia facta sunt. *Lumen quippe verum, quod illuminat omnem hominem venientem in hunc mundum* ² (Joan. 1, 9), hoc illuminat et omnem angelum mundum, ut sit Lux non in se ipso, sed in Deo: a quo si avertitur angelus, fit immundus; sicut sunt omnes qui vocantur immundi spiritus, nec jam lux in Domino, sed in se ipsis tenebræ, privati participatione lucis æternæ. Mali enim nulla natura est; sed amissio boni, mali nomen accepit.

CAPUT X. — *De simplici et incommutabili Trinitate, Patris et Filii et Spiritus sancti, unius Dei: cui non est aliud qualitas, aliud substantia.*

1. Est itaque bonum solum simplex, et ob hoc solum incommutabile, quod est Deus. Ab hoc bono creata sunt omnia bona, sed non simplicia, et ob hoc mutabilia. Creata sane, inquam, id est facta, non genita. Quod enim de simplici bono genitum est, pariter simplex est, et hoc est quod illud de quo genitum est; quæ duo Patrem et Filium dicimus; et utrumque hoc cum Spiritu sancto unus est Deus: qui Spiritus Patris et Filii, Spiritus sanctus propria quadam notione hujus nominis in sacris Litteris nuncupatur. Alius est autem quam Pater et Filius, quia nec Pater est, nec Filius: sed, Alius dixi; non, Aliud; quia et hoc pariter simplex pariterque bonum est incommutabile et cœternum. Et hæc Trinitas unus est Deus: nec ideo non simplex, quia Trinitas. Neque enim propter hoc naturam istam boni simplicem dicimus, quia Pater in ea solus, aut solus Filius, aut solus Spiritus sanctus; aut vero sola est ista nominis Trinitas sine subsistentia ³ personarum (b), sicut Sabelliani hæretici putaverunt: ⁴ sed ideo simplex dicitur, quoniam quod habet, hoc est, excepto quod relative quæque persona ad alteram dicitur. Nam utique Pater habet Filium, nec tamen ipse est Filius; et Filius habet Patrem, nec tamen ipse est Pater. In quo ergo ad se ipsum dicitur, non ad alterum, hoc est quod habet: sicut ad se ipsum dicitur vivens ⁵, habendo utique vitam, et eadem vita ipse est.

¹ Editi, quæ est. At manuscripti in hoc et similibus locis, quod est.

² Sic manuscripti nostri omnes. In B., quod illuminat omnem hominem in hunc mundum venientem. M.

³ Am. Er. et nonnulli Mss., sine substantia.

⁴ Sic Vind. Am. et Er. adiunt, Pater qui genuit, simplex est, et Filius qui genitus est pariter simplex est, et hoc est quod illud de quo genitus est. Sed hæc absunt a Lov. et a manuscriptis.

⁵ Mss., vivus.

(a) Vid. infra, capp. 30, 31.

(b) Conf. infra, cap. 34 hujus libri.

2. Propter hoc itaque natura dicitur simplex, cui non sit aliquid habere, quod vel possit amittere; vel aliud sit habens, aliud quod habet; sicut vas aliquem liquorem, aut corpus colorem, aut aer lucem sive fervorem, aut anima sapientiam. Nihil enim horum est id quod habet: nam neque vas liquor est, nec corpus color, nec aer lux sive fervor, neque anima sapientia est. Ilinc est quod etiam privari possunt rebus quas habent, et in alios habitus vel qualitates verti atque mutari, ut et vas evacuetur humore quo plenum est, et corpus decoloretur, et aer tenebrescat sive frigescat, et anima desipiat. Sed etsi sit corpus incorruptibile, quale sanctis in resurrectione promittitur, habet quidem ipsius incorruptionis inamissibilem qualitatem, sed manente substantia corporali non hoc est, quod ipsa incorruptio. Nam illa etiam per singulas partes corporis tota est, nec alibi major, alibi minor; neque enim ulla pars est incorruptior quam altera: corpus vero ipsum majus est in toto quam in parte; et cum alia pars est in eo amplior, alia minor, non ea quæ amplior est incorruptior quam ea quæ minor. Aliud est itaque corpus, quod non ubique sui totum est: alia incorruptio, quæ ubique ejus tota est; quia omnis pars incorruptibilis corporis etiam cæteris inæqualis æqualiter incorrupta est. Neque enim, verbi gratia, quia digitus minor est quam tota manus, ideo incorruptibilior manus quam digitus. Ita cum sint inæquales manus et digitus, æqualis est tamen incorruptibilitas manus et digiti. Ac per hoc quamvis a corpore incorruptibili inseparabilis incorruptibilitas sit; aliud est tamen substantia, qua corpus dicitur, aliud qualitas ejus, qua incorruptibile nuncupatur. Et ideo etiam sic non hoc est quod habet. Anima quoque ipsa, etiamsi semper sit sapiens, sicut erit cum liberabitur in æternum; participatione tamen ¹ incommutabilis sapientiæ sapiens erit, quæ non est quod ipsa. Neque enim si aer infusa luce nunquam deseratur, ideo non aliud est ipse, aliud lux qua illuminatur. Neque hoc ita dixerim, quasi aer sit anima: quod putaverunt quidam, qui non potuerunt incorpoream cogitare naturam (a). Sed habent hæc ad illa etiam in magna disparitate quamdam similitudinem, ut non inconuenienter dicatur, sic illuminari animam incorpoream luce incorporea simplicis sapientiæ Dei, sicut illuminatur aeris corpus luce corporea; et sicut aer tenebrescit ista luce desertus (nam nihil sunt aliud quæ dicuntur locorum quorumcumque corporalium tenebræ, quam aer carens luce [b]), ita tenebrescere animam sapientiæ luce privatam.

3. Secundum hoc ergo dicuntur illa simplicia, quæ principaliter vereque divina sunt, quod non aliud est in eis qualitas, aliud substantia, nec aliorum participatione vel divina, vel sapientia, vel beata

¹ Sic omnes Mss. At editi, sicut erit cum a præsentis miseria liberabitur in æternum; quia licet tunc sapiens sit in æternum, participatione tamen incommutabilis sapientiæ, etc.

(a) Diogenes ex Aristot., lib. 1 de Anima, cap. 2; Anaximenes et Anaximenes ex Tertull., lib. de Anima, cap. 9.

(b) Conf. lib. 1 de Gen. contra Manich., n. 7.

sunt. Cæterum dictus est in Scripturis sanctis Spiritus sapientiæ multiplex (*Sap. vii, 22*), eo quod multa in se habeat : sed quæ habet, hæc et est, et ea omnia unus est. Neque enim multæ, sed una sapientia est, in qua sunt immensi quidam atque infiniti thesauri¹ rerum intelligibilium, in quibus sunt omnes invisibiles atque incommutabiles rationes rerum, etiam visibilibus et mutabilibus, quæ per ipsam factæ sunt. Quoniam Deus non aliquid uesciens fecit, quod nec de quolibet homine artifice recte dici potest : porro, si sciens fecit omnia, ea utique fecit quæ noverat. Ex quo occurrit animo quiddam mirum, sed tamen verum, quod iste mundus nobis notus esse non posset, nisi esset ; Deo autem nisi notus esset, esse non posset.

CAPUT XI. — *An ejus beatitudinis, quam sancti Angeli ab initio sui semper habuerunt, etiam illos spiritus qui in veritate non steterunt, participes fuisse credendum sit.*

Quæ cum ita sint, nullo quidem modo secundum aliquod temporis spatium prius erant illi spiritus tenebræ, quos Angelos dicimus ; sed simul ut facti sunt, lux facti sunt (a) : non tamen ita tantum creati, ut quoquo modo essent, et quoquo modo viverent ; sed etiam illuminati, ut sapienter beateque viverent. Ab hac illuminatione aversi quidam angeli, non obtinuerunt excellentiam sapientis beatæque vitæ, quæ procul dubio nonnisi æterna est æternitatisque suæ certa atque segura : sed et rationalem vitam licet insipientem sic habent, ut eam non possint amittere, nec si velint. Quatenus autem antequam peccassent, illius sapientiæ fuerint participes, definire quis potest ? In ejus tamen participatione æquales fuisse istos illis, qui propterea vere pleneque beati sunt, quoniam nequaquam de suæ beatitudinis æternitate falluntur, quomodo dicturi sumus ? quandoquidem si æquales in ea fuissent, etiam isti in ejus æternitate mansissent pariter beati, quia pariter certi. Neque enim sicut vita quamdiucumque fuerit, ita æterna vita veraciter dici poterit, si finem habitura sit : siquidem vita tantummodo vivendo, æterna vero finem non habendo nominata est. Quapropter, quamvis non quidquid æternum, continuo beatum sit (dicitur enim etiam pœnalis ignis æternus) ; tamen si vere perfecteque beata vita nonnisi æterna est, non erat talis istorum, quandoque desitura, et propterea non æterna, sive id scirent, sive nescientes aliud putarent : quia scientes timor, nescientes error beatos esse utique non sinebat. Si autem hoc ita nesciebant, ut falsis incertive non fiderent, sed utrum sempiternum, an quandoque finem habiturum esset bonum suum, in neutram partem firma assensione ferrentur, ipsa de tanta felicitate cunctatio eam beatæ vitæ plenitudinem, quam in sanctis Angelis esse credimus, non habebat. Neque enim beatæ

vitæ vocabulum ita contrahimus ad quasdam significationis angustias, ut solum Deum dicamus beatum (a) ; qui tamen ita vere beatus est, ut major beatitudo esse non possit : in cujus comparatione, quod Angeli beati sunt, sua quadam summa beatitudine, quanta esse in Angelis potest, quid aut quantum est ?

CAPUT XII. — *De comparatione beatitudinis justorum, necdum tenentium promissionis divinæ præmii, et primorum in paradiso hominum ante peccatum.*

Nec ipsos tantum, quod attinet ad rationalem vel intellectualem creaturam, beatos nuncupandos putamus¹. Quis enim primos illos homines in paradiso negare audeat beatos fuisse ante peccatum (b), quamvis de sua beatitudine² quam diuturna vel utrum æterna (c) esset incertos (esset autem æterna, nisi peccassent) ; cum hodie non impudenter beatos vocemus, quos videmus juste ac pie cum spe futuræ immortalitatis hanc vitam ducere sine crimine vastante conscientiam, facile impetrantes peccatis hujus infirmitatis divinam misericordiam. Qui licet de suæ perseverantiæ præmio certi sint, de ipsa tamen perseverantia sua reperiuntur incerti. Quis enim hominum se in actione profectoque justitiæ perseveraturum usque in finem sciat, nisi aliqua revelatione ab illo fiat certus, qui de hac re justo latentique judicio non omnes instruit, sed neminem fallit ? Quantum itaque pertinet ad delectationem præsentis boni, beatorum erat primus homo in paradiso, quam quilibet justus in hac infirmitate mortali : quantum autem ad spem futuri, beatorum quilibet in quibuslibet cruciatibus corporis, cui non opinione, sed certa veritate manifestum est, sine fine se habiturum omni molestia carentem societatem Angelorum in participatione summi Dei, quam erat ille homo sui casus incertus in magna illa felicitate paradisi (d).

CAPUT XIII. — *An ita unius felicitatis omnes Angeli sint creati, ut neque lapsuros se possent nosse qui lapsi sunt, et post ruinam labentium perseverantiæ suæ præscientiam acceperint qui steterunt.*

Quocirca culvis jam non difficulter occurrit utroque conjuncto effici beatitudinem, quam recto proposito intellectualis natura desiderat ; hoc est, ut et bono incommutabili, quod Deus est, sine ulla molestia perfruatur, et in eo se in æternum esse mansuram, nec ulla dubitatione cunctetur, nec ullo errore fallatur. Hanc habere Angelos lucis pia fide credimus : hanc nec antequam caderent, habuisse angelos peccato-

¹ Editiones tres, Vind. Am. et Er. : *Nec ipsos enim huic tantæ beatitudini comparatos, quod attinet ad rationalem vel intellectualem creaturam, beatos nuncupandos putamus.* Emendandi sunt ad Lov. et Mss.

² Nostri omnes, *quamvis sua beatitudo.* M.

(a) Beatitudinem definire veteres, statum perfectum et numeris omnibus honorum absolutum, qui in solum Deum videtur cadere, cujus participatione et Angeli beati sunt et homines sancti. Lov. Vives.

(b) Vid. lib. de Correctione et Gratia, n. 26, tom. 10.

(c) Vid. lib. 11 de Gen. ad Litt., nn. 24, 25.

(d) Conf. passim libros de Dono Persev. et de Corrept et Grat.

¹ Plures Mss., *in qua sunt infiniti quidam eisque finiti thesauri.* Alii vero, *in qua sunt infinita quædam eisque finiti thesauri.* — Mss. 2030, eisque finiti. M.

(a) Vid. lib. 12, cap. 8, infra.

res, qui sua pravitate illa luce privati sunt, consequenti ratione colligimus; habuisse tamen aliquam, etsi non præsciam beatitudinem, si vitam egerunt ante peccatum, profecto credendi sunt (a). Aut si durum videtur, quando facti sunt Angeli, alios credere ita factos ut non acciperent præscientiam vel perseverantiæ vel casus sui, alios autem ita ut veritate certissima æternitatem suæ beatitudinis nossent; sed æqualis felicitatis omnes ab initio creati sunt, et ita fuerunt, donec isti qui nunc mali sunt, ab illo bonitatis lumine sua voluntate cecidissent: procul dubio multo est durius pinc putare Angelos sanctos æternæ suæ beatitudinis incertos, et ipsos de semetipsis ignorare, quod nos de illis per Scripturas sanctas nosse potuimus. Quis enim catholicus christianus ignorat, nullam ne diabolum ex bonis Angelis ulterius fuisse istum in societatem bonorum Angelorum crediturum? Veritas quippe in Evangelio et librisque¹ promittit quod erunt æquales illis (Matth. xxii, 30): quibus etiam promittunt in vitam æternam (Id. xxv, 46). Nos certi sumus, nunquam nos ex illa societate casuros, illi vero si certi non sunt; non æquales eis erimus. Sed quia necesse fallit, et æquales eis erimus, pro certi sunt suæ felicitatis æternæ. Certe non certi non fuerunt; non enim erat eorum felicitas cujus certi essent, quæ finem faceret ut aut impares fuerint, aut si post istorum ruinam illis certa scientia felicitatis accesserit. Nisi forte quis Dominus ait de diabolo in Evangelio, *factus ab initio, et in veritate non stetit* (Joan. vi, 42) esse accipiendum, ut non solum ab initio, id est initio humani generis, homo factus est, quem decipiendo posterum etiam ab initio suæ conditionis steterit; et ideo nunquam beatus cum fuerit, suo recusans esse subditus Creatoris superbiæ² velut privata potestate hoc falsus et fallax; quia nec unquam omnipotentis evadit, et qui per suam voluntatem³ simulare quod non est: ut sic in libro quod beatus Joannes apostolus ait *diabolus peccat* (1 Joan. iii, 8); hoc est, ex hoc, justitiam recusavit, quam nisi pia Deoque submissa voluntas habere non possit. Huic sententiæ quisquis acquiescit, non cum illis hæreticis sapit, id est Manichæis, et si quæ aliæ pestes ita sentiunt, quod suam quamdam propriam tanquam ex adverso quodam principio diabolus habeat naturam ma-

li: qui tanta vanitate desipiunt, ut cum verba ista evangelica in auctoritate nobiscum habeant, non attendant non dixisse Dominum, A veritate alienus fuit; sed, *In veritate non stetit*: ubi a veritate lapsus intelligi voluit: in qua utique si stetisset, ejus particeps factus, beatus cum sanctis Angelis permaneret (a).

CAPUT XIV. — *Quo genere locutionis dictum sit de diabolo, quod in veritate non steterit, quia veritas non est in eo.*

Subjecit autem indicium, quasi quæsissemus unde ostendatur quod in veritate non steterit, atque ait, *Quia non est veritas in eo.* Esset autem in eo, si in illa stetisset. Locutione autem dictum est minus usitata. Sic enim videtur sonare, *In veritate non stetit, quia non est veritas in eo* (Joan. viii, 44), tanquam ea sit causa, ut in veritate non steterit, quod in eo veritas non sit: cum potius ea sit causa, ut in eo veritas non sit, quod in veritate non steterit. Ista locutio est et in Psalmo: *Ego clamavi, quoniam exaudisti me, Deus* (Psal. xvi, 6): cum dicendum fuisse videatur, *Exaudisti me, Deus, quoniam clamavi.* Sed cum dixisset, *Ego clamavi*; tanquam ab eo quaereretur, unde se clamasse monstraret, ab effectu exauditionis Dei clamoris sui ostendit affectum; tanquam diceret, hinc ostendo clamasse me, quoniam exaudisti me.

CAPUT XV. — *Quid sentiendum sit de eo quod scriptum est, Ab initio diabolus peccat.*

Illud etiam quod ait de diabolo Joannes, *Ab initio diabolus peccat* (1 Joan. iii, 8); non intelligunt, si naturale est, nullo modo esse peccatum¹. Sed quid respondetur propheticis testimoniis, sive quod Isaias ait, sub figurata persona principis Babylonice diabolum notans, *Quomodo cecidit Lucifer, qui mane oriebatur* (Isai. xiv, 12)? sive quod Ezechiel, *In deliciis paradisi Dei fuisti, omni lapide pretioso ornatus es?* ubi intelligitur fuisse aliquando sine peccato (b). Nam expressius ei paulo post dicitur: *Ambulasti in diebus tuis sine vitio* (Ezech. xxviii, 13, 14). Quæ si aliter convenientius intelligi nequeunt, oportet etiam illud quod dictum est, *In veritate non stetit*, sic accipiamus, quod in veritate fuerit, sed non permanserit. Et illud, quod *ab initio diabolus peccat*, non ab initio ex quo creatus est peccare putandus est; sed ab initio peccati, quod ab ipsius superbia cœperit esse peccatum. Nec illud quod scriptum est in libro Job, cum de diabolo sermo esset, *Hoc est initium figmenti Domini, quod fecit ad illudendum ab Angelis suis* (Job. xl, 14, sec. LXX); cui consonare videtur et Psalmus, ubi legitur, *Draco hic quem finxisti ad illudendum ei* (Psal. ciii, 26); sic intelligendum est, ut existimemus talem ab initio creatum, cui ab Angelis illuderetur, sed

¹ sic vind. Am et Mss. At Er. et Lov., *sanctis fidelibus*; *omisso, que.*

² vind. Am. Er. et aliquot Mss., *et superbia sua.* Et infra *coliti, elutus*; quo loco melioris notæ manuscripti habent, *latius.*

³ nonnulli codices, *affectat per superbiæ elationem.* — *ms. 2030, affectat per superbiæ et elationem.* M.

(a) Conf. lib. 11 de Gen. ad Litt., n. 21-34, et lib. de Cor. rept. et Grat., n. 10.

¹ Probæ notæ Mss., *non intelligunt, si natura talis est nullo modo esse peccatum.* Et nonnulli, *si naturalis est.* At vind. Am. et Er. locum glossemate auctum sic referunt: *non intelligunt qui inde volunt asserere peccati naturam non naturalem nullum sit omnino peccatum.*

(a) Conf. lib. 11 de Gen. ad Litt., n. 27 et seqq.

(b) Conf. lib. 11 de Gen. ad Litt., n. 32.

sunt. Cæterum dictus est in Scripturis sanctis Spiritus sapientiæ multiplex (*Sap. vii, 22*), eo quod multa in se habeat : sed quæ habet, hæc et est, et ea omnia unus est. Neque enim multæ, sed una sapientia est, in qua sunt immensi quidam atque infiniti thesauri rerum intelligibilium, in quibus sunt omnes invisibiles atque incommutabiles rationes rerum, etiam visibilibus et mutabilibus, quæ per ipsam factæ sunt. Quoniam Deus non aliquid nesciens fecit, quod nec de quolibet homine artifice recte dici potest : porro, si sciens fecit omnia, ea utique fecit quæ noverat. Ex quo occurrit animo quiddam mirum, sed tamen verum, quod iste mundus nobis notus esse non posset, nisi esset; Deo autem nisi notus esset, esse non posset.

CAPUT XI. — *An ejus beatitudinis, quam sancti Angeli ab initio sui semper habuerunt, etiam illos spiritus qui in veritate non steterunt, participes fuisse credendum sit.*

Quæ cum ita sint, nullo quidem modo secundum aliquod temporis spatium prius erant illi spiritus tenebræ, quos Angelos dicimus; sed simul ut facti sunt, lux facti sunt (a) : non tamen ita tantum creati, ut quoquo modo essent, et quoquo modo viverent; sed etiam illuminati, ut sapienter beateque viverent. Ab hac illuminatione aversi quidam angeli, non obtinuerunt excellentiam sapientis beateque vitæ, quæ procul dubio non nisi æterna est æternitatisque suæ certa atque secunda : sed et rationalem vitam licet insipientem sic habent, ut eam non possint amittere, nec si velint. Quatenus autem antequam peccassent, illius sapientiæ fuerint participes, definire quis potest? In ejus tamen participatione æquales fuisse istos illis, qui propterea vere pleneque beati sunt, quoniam nequaquam de suæ beatitudinis æternitate falluntur, quomodo dicturi sumus? quandoquidem si æquales in ea fuissent, etiam isti in ejus æternitate mansissent pariter beati, quia pariter certi. Neque enim sicut vita quamdiucumque fuerit, ita æterna vita veraciter dici poterit, si finem habitura sit : siquidem vita tantummodo vivendo, æterna vero finem non habendo nominata est. Quapropter, quamvis non quidquid æternum, continuo beatum sit (dicitur enim etiam pœnalis ignis æternus); tamen si vere perfecteque beata vita non nisi æterna est, non erat talis istorum, quandoque desitura, et propterea non æterna, sive id scirent, sive nescientes aliud putarent : quia scientes timor, nescientes error beatos esse utique non sinebat. Si autem hoc ita nesciebant, ut falsis incertisve non fiderent, sed utrum sempiternum, an quandoque finem habiturum esset bonum suum, in neutram partem firma assensione ferrentur, ipsa de tanta felicitate concitatio eam beate vitæ plenitudinem, quam in sanctis Angelis esse credimus, non habebat. Neque enim beate

vitæ vocabulum ita contrahimus ad quasdam significationis angustias, ut solum Deum dicamus beatum (a); qui tamen ita vere beatus est, ut major beatitudo esse non possit : in cujus comparatione, quod Angeli beati sunt, sua quadam summa beatitudine, quanta esse in Angelis potest, quid aut quantum est?

CAPUT XII. — *De comparatione beatitudinis justorum, necdum tenentium promissionis divinæ præmium, et primorum in paradiso hominum ante peccatum.*

Nec ipsos tantum, quod attinet ad rationalem vel intellectualem creaturam, beatos nuncupandos putamus¹. Quis enim primos illos homines in paradiso negare audeat beatos fuisse ante peccatum (b), quamvis de sua beatitudine² quam diuturna vel utrum æterna (c) esset incertos (esset autem æterna, nisi peccassent); cum hodie non impudenter beatos vocemus, quos videmus juste ac pie cum spe futuræ immortalitatis hanc vitam ducere sine crimine vastante conscientiam, facile impetrantes peccatis hujus infirmitatis divinam misericordiam. Qui licet de suæ perseverantiæ præmio certi sint, de ipsa tamen perseverantia sua reperiuntur incerti. Quis enim hominum se in actione profectique justitiæ perseveraturum usque in finem sciat, nisi aliqua revelatione ab illo fiat certus, qui de hac re justo latentique judicio non omnes instruit, sed neminem fallit? Quantum itaque pertinet ad delectationem præsentis boni, beator erat primus homo in paradiso, quam quilibet justus in hac infirmitate mortali : quantum autem ad spem futuri, beator quilibet in quibuslibet cruciatibus corporis, cui non opinione, sed certa veritate manifestum est, sine fine se habiturum omni molestia carentem societatem Angelorum in participatione summi Dei, quam erat ille homo sui casus incertus in magna illa felicitate paradisi (d).

CAPUT XIII. — *An ita unus felicitatis omnes Angeli sint creati, ut neque lapsuros se possent nosse qui lapsi sunt, et post ruinam perseverantiæ suæ præscientiam acceperint qui steterunt.*

Quocirca culvis jam non difficulter occurrit utroque conjuncto effici beatitudinem, quam recto proposito intellectualis natura desiderat; hoc est, ut et bono incommutabili, quod Deus est, sine ulla molestia perfruatur, et in eo se in æternum esse mansuram, nec ulla dubitatione cunctetur, nec ullo errore fallatur. Hanc habere Angelos lucis pia fide credimus : hanc nec antequam caderent, habuisse angelos peccato-

¹ Editiones tres, Vind. Am. et Er. : *Nec ipsos enim huic tantæ beatitudinis comparatos, quod attinet ad rationalem vel intellectualem creaturam, beatos nuncupandos putamus.* Emendandi sunt ad Lov. et Mss.

² Nostri omnes, *quamvis sua beatitudo.* M.

(a) Beatitudinem definire veteres, statum perfectum et numeris omnibus honorum absolutum, qui in solum Deum videtur cadere, cujus participatione et Angeli beati sunt et homines sancti. LUD. VIVES

(b) Vid. lib. de Correctione et Gratia, n. 26, tom. 10.

(c) Vid. lib. 11 de Gen. ad Litt., nn. 24, 25.

(d) Conf. passim libros de Dono Persev. et de Corrept et Grat.

¹ Plures Mss., *in qua sunt infiniti quidam eisque finiti thesauri.* Alii vero, *in qua sunt infinita quædam eisque finiti thesauri.* — Ms. 2030, *eisque infiniti.* M.
(a) Vid. lib. 12, cap. 9, infra.

res, qui sua pravitare illa luce privati sunt, consequenti ratione colligimus; habuisse tamen aliquam, eisi non præsciam beatitudinem, si vitam egerunt ante peccatum, profecto credendi sunt (a). Aut si durum videtur, quando facti sunt Angeli, alios credere ita factos ut non acciperent præscientiam vel perseverantiæ vel casus sui, alios autem ita ut veritate certissima æternitatem suæ beatitudinis nossent; sed æqualis felicitatis omnes ab initio creati sunt, et ita fuerunt, donec isti qui nunc mali sunt, ab illo bonitatis lumine sua voluntate cecidissent: procul dubio multo est durius nunc putare Angelos sanctos æternæ suæ beatitudinis incertos, et ipsos de semetipsis ignorare, quod nos de illis per Scripturas sanctas nosse potuimus. Quis enim catholicus christianus ignorat, nullum novum diabolum ex bonis Angelis ulterius futurum; sicut nec istum in societatem bonorum Angelorum ulterius rediturum? Veritas quippe in Evangelio sanctis fidelibusque¹ promittit quod erunt æquales Angelis Dei (Matth. xxii, 30): quibus etiam promittitur quod ibunt in vitam æternam (Id. xxv, 46). Porro autem si nos certi sumus, nunquam nos ex illa immortalis felicitate casuros, illi vero si certi non sunt; jam potiores, non æquales eis erimus. Sed quia nequaquam Veritas fallit, et æquales eis erimus, profecto etiam ipsi certi sunt suæ felicitatis æternæ. Cujus illi alii quia certi non fuerunt; non enim erat eorum æterna felicitas cujus certi essent, quæ finem fuerat habitura: restat ut aut imparcs fuerint, aut si pares fuerunt, post istorum ruinam illis certa scientia suæ sempiternæ felicitatis accesserit. Nisi forte quis dicat, id quod Dominus ait de diabolo in Evangelio, *Ille homicida erat ab initio, et in veritate non stetit* (Joan. viii, 44); sic esse accipiendum, ut non solum homicida fuerit ab initio, id est initio humani generis, ex quo utique homo factus est, quem decipiendo posset occidere: verum etiam ab initio suæ conditionis in veritate non steterit; et ideo nunquam beatus cum sanctis Angelis fuerit, suo recisans esse subditus Creatori, et sua per superbiam² velut privata potestate tractatus, ac per hoc falsus et fallax; quia nec unquam potestatem Omnipotentis evadit, et qui per piam subjectionem noluit tenere quod vere est, affectat per superbiam elationem³ simulare quod non est: ut sic intelligatur etiam quod beatus Joannes apostolus ait *Ab initio diabolus peccat* (I Joan. iii, 8); hoc est, ex quo creatus est, justitiam recusavit, quam nisi pia Deoque subdita voluntas habere non possit. Hæc sententiæ quisquis acquiescit, non cum illis hæreticis sapit, id est Manichæis, et si quæ aliæ pestes ita sentiunt, quod suam quamdam propriam tanquam ex adverso quodam principio diabolus habeat naturam ma-

li: qui tanta vanitate desipiunt, ut cum verba ista evangelica in auctoritate nobiscum habeant, non attendant non dixisse Dominum, A veritate alienus fuit; sed, *In veritate non stetit*: ubi a veritate lapsus intelligi voluit: in qua utique si stetisset, ejus particeps factus, beatus cum sanctis Angelis permaneret (a).

CAPUT XIV. — *Quo genere locutionis dictum sit de diabolo, quod in veritate non steterit, quia veritas non est in eo.*

Subjecit autem indicium, quasi quæsissemus unde ostendatur quod in veritate non steterit, atque ait, *Quia non est veritas in eo.* Esset autem in eo, si in illa stetisset. Locutione autem dictum est minus usitata. Sic enim videtur sonare, *In veritate non stetit, quia non est veritas in eo* (Joan. viii, 44), tanquam ea sit causa, ut in veritate non steterit, quod in eo veritas non sit: cum potius ea sit causa, ut in eo veritas non sit, quod in veritate non steterit. Ista locutio est et in Psalmo: *Ego clamavi, quoniam exaudisti me, Deus* (Psal. xvi, 6): cum dicendum fuisse videtur, *Exaudisti me, Deus, quoniam clamavi.* Sed cum dixisset, *Ego clamavi*; tanquam ab eo quæreretur, unde se clamasse monstraret, ab effectu exauditionis Dei clamoris sui ostendit affectum; tanquam diceret, hinc ostendo clamasse me, quoniam exaudisti me.

CAPUT XV. — *Quid sentiendum sit de eo quod scriptum est, Ab initio diabolus peccat.*

Illud etiam quod ait de diabolo Joannes, *Ab initio diabolus peccat* (I Joan. iii, 8); non intelligunt, si naturale est, nullo modo esse peccatum¹. Sed quid respondetur prophetis testimoniis, sive quod Isaias ait, sub figurata persona principis Babylonie diabolus notans, *Quomodo cecidit Lucifer, qui mane oriebatur* (Isai. xiv, 12)? sive quod Ezechiel, *In deliciis paradisi Dei fuisti, omni lapide pretioso ornatus es?* ubi intelligitur fuisse aliquando sine peccato (b). Nam expressius ei paulo post dicitur: *Ambulasti in diebus tuis sine vitio* (Ezech. xxviii, 13, 14). Quæ si aliter convenientius intelligi nequeunt, oportet etiam illud quod dictum est, *In veritate non stetit*, sic accipiamus, quod in veritate fuerit, sed non permanserit. Et illud, quod *ab initio diabolus peccat*, non ab initio ex quo creatus est peccare putandus est; sed ab initio peccati, quod ab ipsius superbia cœperit esse peccatum. Nec illud quod scriptum est in libro Job, cum de diabolo sermo esset, *Hoc est initium figmenti Domini, quod fecit ad illudendum ab Angelis suis* (Job. xl, 14, sec. LXX); cui consonare videtur et Psalmus, ubi legitur, *Draco hic quem finxisti ad illudendum ei* (Psal. ciii, 26); sic intelligendum est, ut existimemus tamen ab initio creatum, cui ab Angelis illuderetur, sed

¹ Sic Vind. Am et Mss. Al Er. et Lov., *sanctis fidelibus*; omissio, *que*.

² Vind. Am. Er. et aliquot Mss., *et superbia sua*. Et infra oditi, *elatus*; quo loco melioris notæ manuscripti habent, *latulus*.

³ Nonnulli codices, *affectat per superbiam elationem*. — M. 2030, *affectat per superbiam et elationem*. M.

(a) Conf. lib. 11 de Gen. ad Litt., n. 21-34, et lib. de Cor rept. et Grat., n. 10.

¹ Probe notæ Mss., *non intelligunt, si natura talis est nullo modo esse peccatum*. Et nonnulli, *si naturalis est*. At Vind. Am. et Er. locum glossemate auctum sic referunt: *non intelligunt qui inde volunt asserere peccati naturam non naturale nullum sit omnino peccatum*.

(a) Conf. lib. 11 de Gen. ad Litt., n. 27 et seqq.

(b) Conf. lib. 11 de Gen. ad Litt., n. 32.

hac poena post peccatum ordinatum (a). Initium ergo ejus figmentum est Domini: non enim est ulla natura etiam in extremis infimisque bestiolis, quam non ille constituit, a quo est omnis modus, omnis species, omnis ordo, sine quibus nihil rerum inveniri vel cogitari potest: quanto magis angelica creatura, quæ omnia cætera quæ Deus condidit, naturæ dignitate præcedit?

CAPUT XVI. — *De gradibus et differentiis creaturarum, quod aliter vendit¹ usus utilitatis, aliter ordo rationis.*

In his enim quæ quoquo modo sunt, et non sunt quod Deus est a quo facta sunt, præponuntur viventia non viventibus; sicut ea quæ habent vim gignendi vel etiam appetendi, his quæ isto motu carent. Et in his quæ vivunt, præponuntur sentientia non sentientibus, sicut arboribus animalia. Et in his quæ sentiunt, præponuntur intelligentia non intelligentibus, sicut homines pecoribus. Et in his quæ intelligunt, præponuntur immortalia mortalibus, sicut Angeli hominibus. Sed ista præponuntur naturæ ordine: est autem alius atque alius pro suo cujusque usu æstimationis modus, quo fit ut quædam sensu carentia quibusdam sentientibus præponamus, in tantum ut si potestas esset, ea prorsus de natura rerum auferre vellemus, sive quem in ea locum habeant ignorantes, sive etiamsi sciamus, nostris ea commodis postponentes. Quis enim non domi suæ panem habere quam mures, nummos quam pulices malit? Sed quid mirum, cum ipsorum etiam hominum æstimatione, quorum certe natura tantæ est dignitatis, plerumque carius comparetur equus quam servus, gemma quam famula? Ita libertate judicandi plurimum distat ratio considerantis a necessitate indigentis, seu voluptate cupientis, cum ista quid per se ipsum in rerum gradibus pendat, necessitas autem quid propter quid expectat, cogitet²; et ista quid verum luci mentis appareat, voluptas vero quid jucundum corporis sensibus blandiat, exquirat³. Sed tantum valet in naturis rationalibus quoddam veluti pondus voluntatis et amoris, ut cum ordine naturæ Angeli hominibus, tamen lege justitiæ boni homines malis angelis præferantur.

CAPUT XVII. — *Vitium malitiæ non naturam esse, sed contra naturam, cui ad peccandum non Conditor causa est, sed voluntas.*

Propter naturam igitur, non propter malitiam diaboli, dictum recte intelligimus, *Hoc est initium figmenti Domini (Job xl, 14, sec. LXX)*: quia sine dubio ubi esset vitium malitiæ, natura non vitiosa præcessit. Vitium autem ita contra naturam est, ut non possit nisi nocere naturæ. Non itaque esset vitium recedere a Deo, nisi naturæ, cujus id vitium est, potius competeret esse cum Deo. Quapropter etiam voluntas mala grande testimonium

¹ In B., *pendet*. Morel, Elem. Crit., p. 110, restituit, *pendit*, id est, æstimat. M.

² Nostri Mss., *cogitat*. M.

³ Nostri Mss., *expectat*. M.

(a) Vid. lib. 11 de Gen. ad Litt., nn. 29, 30, 34, 35.

est naturæ bonæ. Sed Deus sicut naturarum bonarum optimus creator est, ita malarum voluntatum justissimus ordinator; ut cum male illæ utuntur naturis bonis, ipse bene utatur etiam voluntatibus malis. Itaque fecit ut diabolus institutione illius bonus, voluntate sua malus, in inferioribus ordinatus illuderetur ab Angelis ejus, id est, ut prosint tentationes ejus sanctis, quibus eas obesse desiderat. Et quoniam Deus eum eum conderet, futuræ malignitatis ejus non erat utique ignarus, et prævidebat quæ bona de malis ejus esset ipse factururus: propterea Psalmus ait, *Draco hic, quem finxisti ad illudendum ei (Psal. ciii, 26)*, ut in eo ipso quod eum finxit, licet per suam bonitatem bonum, jam per suam præscientiam præparasse intelligatur quomodo illo uteretur et malo.

CAPUT XVIII. — *De pulchritudine universalitatis, quæ per ordinationem Dei etiam ex contrariorum fit oppositione luculentior.*

Neque enim Deus ullum, non dico Angelorum, sed vel hominum crearet, quem malum futurum esse præscisset, nisi pariter nosset quibus eos honorum usibus commodaret, atque ita ordinem sæculorum tanquam pulcherrimum carmen (a) ex quibusdam quasi antithetis honestaret. Antitheta enim quæ appellantur, in ornamentis elocutionis sunt decentissima, quæ latine appellantur opposita¹, vel quod expressius dicitur, contrapositiona. Non est apud nos hujus vocabuli consuetudo, cum tamen eisdem ornamentis locutionis etiam sermo latinus utatur, imo linguae omnium gentium. His antithetis et Paulus apostolus in secunda ad Corinthios Epistola, illum locum suaviter explicat, ubi dicit: *Per arma justitiæ a dextris et a sinistris, per gloriam et ignobilitatem, per infamiam et bonam famam; ut seductores, et veraces; ut qui ignoramus, et cognoscimur; quasi morientes, et ecce vivimus; ut coerciti², et non mortificati; ut tristes, semper autem gaudentes; sicut egeni, multos autem ditantes; tanquam nihil habentes, et omnia possidentes (II Cor. vi, 7-10.)* Sicut ergo ista contraria contrariis opposita sermonis pulchritudinem reddunt; ita quadam, non verborum, sed rerum eloquentia contrariorum oppositione sæculi pulchritudine componitur. Apertissime hoc positum est in libro Ecclesiastico, hoc modo: *Contra malum bonum est, et contra mortem vita: sic contra pium peccator. Et sic intueri in omnia opera Altissimi, bina et bina, unum contra unum (Eccli. xxxiii, 15.)*

CAPUT XIX. — *Quid sentiendum videntur de eo quod scriptum est, Divisit Deus inter lucem et tenebras.*

Quamvis itaque divini sermonis obscuritas etiam ad hoc sit utilis, quod plures sententias veritatis parit et in lucem notitiæ producit, dum alius eum sic, alius sic intelligit; ita tamen ut quod in obscuro loco intelligitur, vel attestatione rerum manifestarum, vel aliis locis minime dubiis asseratur; sive cum multi tractantur, ad id quoque perveniant, quod sensus ille qui scripsit; sive id quidem lateat, sed ex occasione

¹ Plures non deterioris notæ Mss., *quæ latine ut appellantur opposita.*

(a) Simili comparatione utitur epist. 158, n. 5, et 198, n. 15.

tractandæ profundæ obcurritatis aliæ quædam vera dicantur : non mihi videtur ab operibus Dei absurda¹ sententia, si cum lux illa prima facta est, Angeli creati intelliguntur, et inter sanctos Angelos et immundos fuisse discretum, ubi dictum est, *Et divisit Deus inter lucem et tenebras; et vocavit Deus lucem diem, et tenebras vocavit noctem.* Solus quippe ille ista discernere potuit, qui potuit etiam priusquam caderent præscire casuros, et lumine privatos veritatis in tenebrosa superbia remansuros. Nam inter istum nobis notissimum diem et noctem, id est inter hanc lucem et has tenebras, vulgatissima sensibus nostris luminaria cæli ut dividerent, imperavit: *Fiant, inquit, luminaria in firmamento cæli, ut luceant super terram, et dividant inter diem et noctem.* Et Paulo post: *Et fecit, inquit, Deus duo luminaria magna; luminare majus in principia¹ diei, et luminare minus in principia noctis; et stellas: et posuit illa² Deus in firmamento cæli, lucere super terram, et præesse diei et nocti, et dividere inter lucem et tenebras (Gen. 1, 4, 5, 14, 16-18).* Inter illam vero lucem, quæ sancta societas Angelorum est illustratione veritatis intelligibiliter fulgens, et ei contrarias tenebras, id est malorum angelorum aversorum a luce justitiæ teterrimas mentes, ipse dividere potuit, cui etiam futurum, non naturæ, sed voluntatis malum, occultum aut incertum esse non potuit.

CAPUT XX. — *De eo quod post discretionem lucis atque tenebrarum dictum est, Et vidit Deus lucem, quia bona est.*

Denique nec illud est prætereundum silentio, quod ubi dixit Deus, *Fiat lux, et facta est lux;* continuo subjunctum est, *Et vidit Deus lucem quia bona est:* non posteaquam separavit inter lucem et tenebras; et vocavit lucem diem, et tenebras noctem, ne simul cum luce etiam talibus tenebris testimonium placiti sui perhibuisse videretur. Nam ubi tenebræ inculpabiles sunt, inter quas et lucem istam his oculis conspicuam luminaria cæli dividunt, non ante, sed post infertur, *Et vidit Deus quia bonum est. Et posuit illa, inquit, in firmamento cæli, lucere super terram, et præesse diei et nocti, et separare inter lucem et tenebras. Et vidit Deus quia bonum est.* Utrumque enim placuit, quia utrumque sine peccato est. Ubi autem dixit Deus, *Fiat lux, et facta est lux. Et vidit Deus lucem, quia bona est;* et postmodum infertur, *Et separavit Deus inter lucem et tenebras; vocavitque Deus lucem diem, et tenebras vocavit noctem (Gen. 1, 3-5, 17, 18):* non hoc loco additum est, *Et vidit Deus quia bonum est;* ne utrumque appellaretur bonum, cum esset horum alterum malum, vitio proprio, non natura. Et ideo sola ibi lux placuit Conditori: tenebræ autem angelicæ, etsi fuerant ordinandæ, non tamen fuerant approbandæ.

CAPUT XXI. — *De æterna et incommutabili scientia Dei ac voluntate, qua semper illi universa quæ facit, sic placuerunt facienda, quemadmodum facta.*

Quid est enim aliud intelligendum in eo quod per

¹ Plures manuscripti hoc et altero loco, *in principio.* Sed excusis suffragatur græca interpretatio LXX, *eis archas.*

² sic Mss. At cæli, *illas.* At ud LXX est, *autous.*

omnia dicitur, *Vidit Deus quia bonum est:* nisi operis approbatio secundum artem facti, quæ Sapientia Dei est? Deus autem usque adeo non cum factum est, tunc didicit bonum (a), ut nihil eorum fieret, si ei fuisset incognitum. Dum ergo videt quia bonum est, quod nisi vidisset antequam fieret, non nique fieret; docet bonum esse, non discit. Et Plato quidem plus ausus est dicere, elatum esse scilicet Deum gaudio, mundi universitate perfecta (*In Timæo*). Ubi et ipse non usque adeo desipiebat, ut putaret Deum sui operis novitate factum beatiorum: sed sic ostendere voluit, artifici suo placuisse jam factum, quod placuerat in arte faciendum; non quod ullo modo Dei scientia varietur, ut aliud in ea faciant¹ quæ nondum sunt, aliud quæ jam sunt, aliud quæ fuerunt. Non enim more nostro ille vel quod futurum est prospicit, vel quod præsens est aspicit, vel quod præteritum est respicit; sed alio modo quodam a nostrarum cogitationum consuetudine longe atque² diverso. Ille quippe non ex hoc in illud cogitatione mutata, sed omnino incommutabiliter videt; ita ut illa quidem quæ temporaliter fiunt, et futura nondum sint, et præsentia jam sint, et præterita jam non sint, ipse vero hæc omnia stabili ac sempiterna præsentia comprehendat: nec aliter oculis, aliter mento; non enim ex animo constat et corpore: nec aliter nunc, aliter antea, et aliter postea; quoniam non sicut nostra, ita ejus quoque scientia trium temporum, præsentis videlicet et præteriti vel futuri, varietate mutatur: apud quem non est immutatio, nec momenti obumbratio (*Jacobi* 1, 17). Neque enim ejus intentio de cogitatione in cogitationem transit, in cujus incorporeo intuitu simul adsunt cuncta quæ novit: quoniam tempora ita novit nullis suis temporalibus notionibus, quemadmodum temporalia movet nullis suis temporalibus motibus. Ibi ergo vidit bonum esse quod fecit, ubi bonum esse vidit ut faceret. Nec quia factum vidit, scientiam duplicavit, vel ex aliqua parte auxit, tanquam minoris scientiæ fuerit priusquam faceret quod videret: qui tam perfecte non operaretur, nisi tam perfecta scientia, cui nihil ex ejus operibus adderetur. Quapropter, si tantummodo nobis insinuandum esset quis fecerit lucem, sufficeret dicere, Deus fecit lucem. Si autem non solum quis fecerit, verum etiam per quid fecerit; satis esset ita enuntiari, *Et dixit Deus, Fiat lux, et facta est lux;* ut non tantum Deum, sed etiam per Verbum lucem fecisse nossemus. Quis vero tria quædam maxime scienda de creatura nobis oportuit intimari, quis eam fecerit, per quid fecerit, quare fecerit: *Deus dixit, inquit, Fiat lux, et facta est lux. Et vidit Deus lucem, quia bona est.* Si ergo quærimus quis fecerit, Deus est. Si per quid fecerit, *Dixit, Fiat, et facta est.* Si quare fecerit, *Quia bona est.* Nec auctor est excellentior Deo, nec ars efficacior Dei Verbo, nec causa melior quam ut bonum crearetur a Deo bono. Hanc etiam Plato causam condendi mundi justissimam di-

¹ Sic Vind. Am. et Mss. At Er. et Lov., *fiant.*

² Fr. Lov., *lateque.* Cæteri libri, *atque.*

(a) Istud nempe objiciebant Manichæi. Conf. lib. 1 de Gen. cont. Manich., n. 43.

cit, ut a bono Deo bona opera fierent (*In Timæo*) : sive ista legerit, sive ab his qui legerant forte cognoverit ; sive accerrimo ingenio invisibilia Dei, per ea quæ facta sunt, intellecta conspexerit, sive ab his qui ista conspexerant et ipse didicerit.

CAPUT XXII. — *De his quibus in universitate rerum a bono Creatore bene conditarum quædam displicent, et putant nonnullam esse naturam malam.*

Hanc tamen causam, id est ad bona creanda bonitatem Dei; hanc, inquam, causam tam justam atque idoneam, quæ diligenter considerata et pie cogitata omnes controversias quærentium mundi originem terminat, quidam hæretici non videntur : quia egenam carnis hujus fragilemque mortalitatem, jam de justo supplicio venientem, dum ei non conveniunt, plurima offendunt ; sicut ignis, aut frigus, aut fera bestia, aut quid hujusmodi. Nec attendunt, quam vel in suis locis naturisque vigeant, pulchroque ordine disponantur ; quantumque universitati rerum pro suis portionibus¹ decoris tanquam in communem rempublicam conferant, vel nobis ipsis, si eis congruenter atque scienter utamur, commoditatis attribuant ; ita ut venena ipsa, quæ per inconvenientiam perniciosa sunt, convenienter adhibita in salubria medicamenta vertantur : quamque a contrario etiam hæc quibus delectantur, sicut cibus et potus et ista lux, immoderato et inopportuno² usu noxia sentiantur (a). Unde nos admonet divina providentia, non res insipienter vituperare, sed utilitatem rerum diligenter inquirere ; et ubi nostrum ingenium vel infirmitas deficit, ita credere occultam, sicut erant quædam quæ vix potuimus invenire : quia et ipsa utilitatis occultatio, aut humilitatis exercitatio est, aut elationis attritio ; cum omnino natura nulla sit malum, nomenque hoc non sit nisi privationis boni : sed a terrenis usque ad cœlestia, et a visibilibus usque ad invisibilia sunt aliis alia bona meliora ; ad hoc inæqualia, ut essent omnia. Deus autem ita est artifex magnus³ in magnis, ut minor non sit in parvis : quæ parva non sua granditate (nam nulla est), sed artificis sapientia metienda sunt : sicut in specie visibilis⁴ hominis, si unum radatur supercilium, quam propemodum nihil corpori, et quam multum detrahitur pulchritudini ; quoniam non mole constat, sed parilitate ac dimensione membrorum. Nec sane multum mirandum est, quod hi qui nonnullam malam putant esse naturam suo quodam contrario exortam propagatamque principio, nolunt accipere istam causam creationis rerum, ut bonus Deus conderet bona ; credentes eum potius ad hæc mundana molimina rebellantis adversum se mali repellendi⁵ extrema necessitate perductum, suamque naturam bonam malo coercendo superandoque miscuisse, quam

¹ Nonnulli Mss., *positionibus*.

² Sic probæ notæ manuscripti. At editi, *importuno*.

³ Plures Mss., *maximus*.

⁴ Vind. Am. et aliorum Mss., *visibilis*.

⁵ Sic codex 2051. in cod. 2050, *malis repellendis*. In B., verbum, *repellendi*, deest omnino. M.

(a) Contra Manichæos. Vid. lib. 1 de Gen. cont. Manich., pp. 23, 26.

turpissimæ pollutam et crudelissimæ captivam et oppressam labore magno vix mundet ac liberet, non totam tamen ; sed quod ejus non potuerit ab illa iniquatione purgari, tegmen ac vinculum futurum hostis victi et inclusi. Sic autem Manichæi non desiperent vel potius insanirent, si Dei naturam, sicuti est, incommutabilem atque omnino incorruptibilem crederent, cui nocere nulla res possit : animam vero quæ volutate mutari in deterius et peccato corrumpi potuit, atque ita incommutabilis veritatis luce privari, non Dei partem, nec ejus naturæ quæ Dei est¹, sed ab illo conditam longe inparem Conditori christiana sanitate sentient.

CAPUT XXIII. — *De errore, in quo Origenis doctrina inculpatur.*

1. Sed multo est mirandum amplius, quod etiam quidam, qui unum nobiscum credunt omnium rerum esse principium, ullamque naturam, quæ non est quod Deus est, nisi ab illo conditore esse non posse ; noluerunt tamen istam causam fabricandi mundi tam bonam ac simplicem bene ac simpliciter credere, ut Deus bonus conderet bona, et essent post Deum quæ non essent quod est Deus, bona tamen quæ non faceret nisi bonus Deus. Sed animas dicunt, non quidem partes Dei, sed factas a Deo, peccasse a Conditore recedendo ; et diversis progressibus pro diversitate peccatorum, a cœlis usque ad terras, et diversa corpora quasi vincula meruisse : et hunc esse mundum, eamque causam mundi fuisse faciendi, non ut conderentur bona, sed ut mala cohiberentur. Hinc Origenes jure culpatur. In libris enim quos appellat *περὶ Ἀρχῶν*, id est, de Principiis, hoc sensit, hoc scripsit. Ubi plus quam dici potest, miror hominem in ecclesiasticis litteris tam doctum et exercitatum, non attendisse, primum quam hoc esset contrarium Scripturæ hujus tantæ auctoritatis intentioni, quæ per omnia opera Dei subjungens, *Et vidit Deus, quia bonum est ; completisque omnibus inferens, Et vidit Deus omnia, quæ fecit, et ecce bona valde* (*Gen. 1*) : nullam aliam causam faciendi mundi intelligi voluit, nisi ut bona fierent a bono Deo. Ubi si nemo peccasset, tantummodo naturis bonis esset mundus ornatus et plenus : et quia peccatum est, non ideo cuncta sunt impleta peccatis, cum bonorum longe major numerus in cœlestibus suæ naturæ ordinem servet. Nec mala voluntas, quia naturæ ordinem scrvare noluit, ideo justi Dei leges omnia bene ordinantis effugit. Quoniam sicut pictura cum colore nigro, loco suo posita, ita universitas rerum, si quis possit intueri, etiam cum peccatoribus pulchra est, quamvis per se ipsos consideratos sua deformitas turpet.

2. Deinde videre debuit Origenes, et quicumque ita sapiunt, si hæc opinio vera esset, mundum ideo factum, ut animæ pro meritis peccatorum suorum tanquam ergastula quibus poenaliter includerentur, corpora acciperent, superiora et leviora quæ minus, inferiora vero et graviora quæ amplius peccaverunt ;

¹ Nonnulli Mss., *quæ Deus est*

dæmones quibus deterius nihil est, terrena corpora quibus inferius et gravius nihil est, potius quam homines etiam malos¹ habere debuisse. Nunc vero ut intelligeremus animarum merita non qualitatibus corporum esse pensanda, aerium pessimus dæmon, homo autem et nunc licet malus, longe minoris malitiorisque malitiæ, et certe ante peccatum tamen laetum corpus accepit. Quid autem stultius dici potest, quam per² istum solem, ut in uno mundo unus esset, non decori pulchritudinis, vel etiam salutis rerum corporalium consuluisset artificem Deum (a), sed hoc potius evenisse, quia una anima sic peccaverat, ut tali corpore mereretur includi? Ac per hoc si contigisset, ut non una, sed duæ; imo non duæ, sed decem, vel centum, similiter æqualiterque peccassent, centum soles haberet hic mundus. Quod ut non fieret, non opifisci provisione mirabili ad rerum corporalium salutem decoremque consultum est; sed contigit potius tanta unius animæ progressionem peccantis, ut sola corpus tale mereretur. Non plane animarum, de quibus nesciunt quid loquantur, sed eorum ipsorum qui tanta sapient, multum longe a veritate et merito est coercenda progressio. Hæc ergo tria quæ superius commendavi, cum in unaquaque creatura requiruntur, quis eam fecerit, per quid fecerit, quare fecerit, ut respondeatur, Deus, per Verbum, Quia bona est³, utrum altitudine mystica nobis ipsa Trinitas intimetur, hoc est Pater et Filius et Spiritus sanctus; an aliquid occurrat, quod in hoc loco Scripturarum id accipiendum esse prohibeat, multi sermonis est quæstio, nec omnia uno volumine ut explicemus urgendum est.

CAPUT XXIV. — *De Trinitate divina, quæ per omnia opera sua significationis suæ sparsit indicia.*

Credimus, et tenemus, et fideliter prædicamus, quod Pater genuerit Verbum, hoc est Sapientiam, per quam facta sunt omnia, unigenitum Filium, unus unum, æternus cœternus, summe bonus æqualiter bonus; et quod Spiritus sanctus simul et Patris et Filii sit Spiritus, et ipse consubstantialis et cœternus ambobus: atque hoc totum et Trinitas sit propter proprietatem personarum, et unus Deus propter inseparabilem divinitatem, sicut unus omnipotens propter inseparabilem omnipotentiam: ita tamen ut etiam cum de singulis quæritur, unusquisque eorum et Deus et omnipotens esse respondeatur; cum vero de omnibus simul, non tres dii vel tres omnipotentes, sed unus Deus omnipotens; tanta ibi est in tribus inseparabilis unitas, quæ sic se voluit prædicari. Utrum autem boni Patris et boni Filii Spiritus sanctus, quia communis ambobus est, recte bonitas dici possit amborum, non audeo temerariam præcipitare senten-

tiam: verumtamen amborum eum dicere sanctitatem facilius ausus fuero, non amborum quasi qualitatem, sed ipsum⁴ quoque substantiam, et tertiam in Trinitate personam. Ad hoc enim me probabilius ducit, quod cum sit et Pater spiritus et Filius spiritus, et Pater sanctus, et Filius sanctus, proprie tamen ipse vocatur Spiritus sanctus, tanquam sanctitas substantialis et consubstantialis amborum. Sed si nihil aliud est bonitas divina quam sanctitas, profecto et illa diligentia rationis est, non præsumptionis audacia, ut in operibus Dei secreto quodam loquendi modo, quo nostra exerceatur intentio, eadem nobis insinuata intelligatur Trinitas, unamquamque creaturam quis fecerit, per quid fecerit, propter quid fecerit. Pater quippe intelligitur Verbi, qui dixit, *Fiat*. Quod autem illo dicente factum est, procul dubio per Verbum factum est. In eo vero quod dicitur, *Vidit Deus quia bonum est*; satis significatur, Deum nulla necessitate, nulla suæ cuiusquam utilitatis indigentia, sed sola bonitate fecisse quod factum est, id est, quia bonum est: quod ideo, postquam factum est, dicitur, ut res quæ facta est, congruere bonitati propter quam facta est, indicetur. Quæ bonitas si Spiritus sanctus recte intelligitur, universa nobis Trinitas in suis operibus intimatur. Inde est civitatis sanctæ, quæ in sanctis Angelis sursum est, et origo, et informatio, et beatitudo. Nam si quæritur unde sit, Deus eam condidit: si unde sit sapiens, a Deo illuminatur: si unde sit felix, Deo fruatur: subsistens modificatur, contemplans illustratur, inhærens jucundatur; est, videt, amat; in æternitate Dei viget, in veritate Dei lucet, in bonitate Dei gaudet.

CAPUT XXV. — *De tripartita totius philosophiæ disciplina.*

Quantum intelligi datur, hinc philosophi sapientiæ disciplinam tripartitam esse voluerunt; imo tripartitam esse animadvertere potuerunt (neque enim ipsi instituerunt ut ita esset, sed ita esse potius invenerunt): cuius una pars appellaretur physica, altera logica, tertia ethica. Quarum nomina latina jam multorum litteris frequentata sunt, ut naturalis, rationalis, moralisque vocarentur: quas etiam in octavo libro breviter perstrinximus (*Cap. 4 seqq.*). Non quod sit consequens⁵, ut isti in his tribus aliquid secundum Deum de Trinitate cogitaverint. Quamvis Plato primus istam distributionem reperisse et commendasse dicatur, cui neque naturarum omnium auctor nisi Deus visus est, neque intelligentiæ dator, neque amoris, quo bene beateque vivitur, inspirator. Sed certe cum et de natura rerum, et de ratione indagandæ⁶ veritatis, et de boni fine ad quem cuncta quæ agimus referre debemus, diversi diversa sentiant: in his tamen tribus magnis et generalibus quæstionibus omnis eorum versatur intentio. Ita cum in unaquaque earum quid quisque sectetur, multiplex si discrepantia opinionum, esse tamen aliquam naturæ

¹ Mss., *etiam malos*. Sic etiam vind. et Am, sed hi duo exiti post, *etiam bonos*; addunt, *potius etiam quam malos*.

² Particula, *per*, abest a manuscriptis et ab editis vind. Am, et Er.

³ Sic vind. Am. et Mss. At Er. et Lov., *quia bonus est*.

(a) Conf. lib. ad Oros. contr. Priscillianist. et Origenist., n. 11.

⁴ Sic Mss. Editi vero, *ipsam*.

⁵ Vind. et plerique Mss.: *Non quo sit consequens*.

⁶ Probæ notæ Mss., *inveniente*.

causam, scientiæ formam, vitæ summam, nemo cunctatur. Tria etiam sunt quæ in unoquoque homine artifice spectantur, ut aliquid efficiat; natura, doctrina, usus: natura ingenio, doctrina scientia, usus fructu dijudicandus est. Nec ignoro quod proprie fructus fruētis, usus utentis sit; atque hæc interesse videatur, quod ea re frui dicimur, quæ nos non ad aliud referenda per se ipsam¹ delectat; uti vero ea re, quam propter aliud quærimus (a). Unde temporalibus magis utendum est, quam fruendam, ut frui mereamur æternis. Non sicut perversi, qui frui volunt nummo, uti autem Deo; quoniam non nummum propter Deum impendunt, sed Deum propter nummum colunt. Verumtamen eo loquendi modo, quem plus obtinuit consuetudo, et fructibus utimur, et usibus fruimur. Nam et fructus jam proprie dicuntur agrorum, quibus utique omnes temporaliter utimur. Hoc itaque more² usum dixerim in his tribus quæ in homine spectanda commonui, quæ sunt natura, doctrina, usus. Ex his propter obtinendam beatam vitam, tripartita, ut dixi, a philosophis inventa est disciplina; naturalis propter naturam, rationalis propter doctrinam, moralis propter usum. Si ergo natura nostra esset a nobis, profecto et nostram nos genuissemus sapientiam, nec eam doctrina, id est aliunde discendo, percipere curarem; et noster amor a nobis profectus, et ad nos relatus, ad beate vivendum sufficeret, nec bono alio quo frueremur ullo indigeret: nunc vero quia natura nostra, ut esset, Deum habet auctorem; procul dubio ut vera sapiamus, ipsum debemus habere doctorem; ipsum etiam ut beati simus, suavitalis intimæ largiorem.

CAPUT XXVI. — *De imagine summæ Trinitatis, quæ secundum quemdam modum in natura etiam necdum beatificati hominis invenitur.*

Et nos quidem in nobis, tametsi non æqualem, imo valde longeque distantem, neque cœternam, et quo brevius totum dicitur³, non ejusdem substantiæ, cuius est Deus, tamen qua Deo nihil sit in rebus ab eo factis natura propinquius, imaginem Dei, hoc est summæ illius Trinitatis, agnoscimus, adhuc reformatione perficiendam, ut sit etiam similitudine proxima⁴. Nam et sumus, et nos esse novimus, et id esse⁵ ac nosse diligimus. In his autem tribus quæ dixi, nulla nos falsitas verisimilis turbat. Non enim ea, sicut illa quæ foris sunt, ullo sensu corporis tangimus, velut colores videndo, sonos audiendo, odores olfaciendo, sapes gustando, dura et mollia contrectando sentimus, quorum sensibilibus etiam imagines eis simillimas, nec jam corporeas, cogitatione versamus, memoria tenemus, et per ipsas in istorum desideria concitatur: sed sine ulla phantasiarum vel phantasmatum

imaginatione ludibricaria, mihi esse me, idque nosse et amare certissimum est. Nulla in his veris Academicorum argumenta formido, dicentium; Quid, si falleris? Si enim fallor, sum. Nam qui non est, utique nec falli potest: ac per hoc sum, si fallor. Quia ergo sum si fallor, quomodo esse me fallor, quando certum est me esse, si fallor? Quia igitur essem qui fallerer, etiamsi fallerer; procul dubio in eo quod me novi esse, non fallor. Consequens est autem, ut etiam in eo quod me novi nosse, non fallar. Sicut enim novi me esse, ita novi etiam hoc ipsum, nosse me. Eaque duo cum amo, eundem quoque amorem quiddam tertium, nec imparis æstimationis, eis quæ novi rebus adjungo. Neque enim fallor amare me, cum in his quæ amo non fallar: quanquam etsi illa falsa essent, falsa me amare verum esset. Nam quo pacto recte reprehenderer et recte prohiberer ab amore falsorum, si me illa amare falsum esset? Cum vero et illa vera atque certa sint, quis dubitet quod eorum, cum amantur, et ipse amor verus et certus est? Tam porro nemo est qui esse se velit, quam nemo est qui non beatus esse velit. Quomodo enim potest beatus esse, si nihil sit?

CAPUT XXVII. — *De essentia et scientia, et utriusque amore.*

4. Ita vero vi quadam naturali ipsum esse jucundum est, ut non ob aliud et hi qui miseri sunt nolint interire, et cum se miseros esse sentiant, non se ipsos de rebus, sed miseriam suam potius auferri velint. Illis etiam qui et sibi miserrimi apparent, et plane sunt, et non solum a sapientibus, quoniam stulti, verum et ab his qui se beatos putant, miseri judicantur, quia pauperes atque mendici sunt, si quis immortalitatem daret, qua nec ipsa miseria moreretur, proposito sibi quod si in eadem miseria semper esse nollent, nulli et nusquam essent futuri, sed omni modo perituri, profecto exsultarent lætitia, et sic semper eligerent esse, quam omnino non esse. Hujus rei testis est notissimus sensus illorum. Unde enim mori metuunt, et malunt in illa ærumna vivere, quam eam morte finire, nisi quia satis apparet quam refugiat natura non esse? Atque ideo cum se noverint esse morituros, pro magno beneficio sibi hanc impendi misericordiam desiderant, ut aliquanto productius in eadem miseria vivant, tardiusque moriantur. Procul dubio ergo indicant immortalitatem saltem talem quæ non habeat finem mendicitatis, quanta gratulatione susciperent. Quid? animalia omnia etiam irrationalia, quibus datum non est ista cogitare, ab immensis draconibus usque ad exiguos vermiculos, nonne se esse velle, atque ob hoc interitum fugere omnibus quibus possunt motibus indicant? Quid? arbusta omnesque frutices, quibus nullus est sensus ad vitandam manifesta motione perniciem, nonne ut in auras tutum culminis germen emittant, alius terræ radices affigunt⁶, quo

¹ Plures Mss., nisi per se ipsam.

² Sic Vind. Am. et Mss. At Er. et Lov., modo.

³ Sola editio Lov., dicitur.

⁴ Hic incipit caput vigesimum septimum in præcipuis manuscriptis.

⁵ Sic Mss. Editi vero, et nostrum esse.

(a) Vide lib. 1 de Doctr. Christ., n. 3-3, et lib. 10 de Trin., n. 12, prove fia.

⁶ Sic Vind. Am. et nonnulli Mss. Alii veteres libri habent, aliud terræ radices affigunt. At Er. et Lov., aliud terræ radices affigunt.

alimentum trahant, atque ita suum quodammodo esse conservent? Ipsa postremo corpora, quibus non solum sensus, sed nec ulla saltem seminalis est vita, ita tamen vel exsiliunt in superna, vel in ima descendunt, vel librantur in mediis, ut essentiam suam, ubi secundum naturam possunt esse, custodiant.

2. Jam vero nosse quantum ametur, quamque falli nolit humana natura, vel hinc intelligi potest, quod lamentari quisque sana mente mavult, quam lætari in amentia. Quæ vis magna atque mirabilis mortalibus, præter homini¹, animantibus nulla est; licet eorum quibusdam ad istam lucem contuendam multo quam nobis sit acrior sensus oculorum: sed lucem illam incorpoream contingere nequeunt, qua inens nostra quodammodo irradiatur, ut de his omnibus recte judicare possimus. Nam in quantum eam capimus, in tantum id possumus. Verumtamen inest sensibus irrationalium animantium, etsi scientia nullo modo, at certe quædam scientiæ similitudo. Cætera autem rerum corporalium, non quia sentiunt, sed quia sentiuntur, sensibilia nuncupata sunt. Quorum in arbutis hoc simile est sensibus, quod aluntur et gignunt². Verumtamen et hæc et omnia corporalia latentes in natura causas habent; sed formas suas, quibus mundi hujus visibilis structura formosa est, sentiendis sensibus præbent, ut pro eo quod nosse non possunt, quasi innotescere velle videantur. Sed nosse ea sensu corporis ita capimus, ut de his non sensu corporis judicemus. Habemus enim alium interioris hominis sensum isto longe præstantiorem, quo justa et injusta sentimus: justa, per intelligibilem speciem; injusta, per ejus privationem. Ad hujus sensus officium non acies pupillæ, non foramen auriculæ, non spiramenta narium, non gustus faucium, non ullus corporeus tactus accedit. Ibi me et esse et hoc nosse certus sum, et hæc amo³ atque amare me similiter certus sum.

CAPUT XXVIII. — *An etiam ipsum amorem, quo et esse et scire diligimus, diligere debeamus, quo magis divinæ Trinitatis imaginè propinquamus.*

Sed de duobus illis, essentia scilicet et notitia, quantum amentur in nobis, et quemadmodum etiam cæteris rebus quæ infra sunt, eorum reperiatur, etsi differens, quædam tamen similitudo, quantum suscepti hujus operis ratio visa est postulare, satis diximus: de amore autem quo amantur, utrum et ipse amor ametur, non dictum est. Amatatur autem: et hinc probamus, quod in hominibus qui rectius amantur⁴, ipse magis amatatur. Neque enim vir bonus merito dicitur qui scit quod bonum est, sed qui diligit. Cur ego et in nobis ipsis non et ipsum amorem nos amare sentimus, quo amamus quid quid boni amamus? Est enim et amor, quo amatur et quod aman-

dum non est: et istum amorem odit in se, qui illum diligit, quo id amatatur quod amandum est. Possunt enim ambo esse in uno homine, et hoc bonum est homini, ut illo proficiente quo bene vivimus, iste deficiat quo male vivimus⁵, donec ad perfectum sanetur, et in bonum commutetur omne quod vivimus. Si enim pecora cœsemus, carnalem vitam et quod secundum sensum ejus est amaremus; idque esset sufficiens bonum nostrum, et secundum hoc cum esset nobis bene, nihil aliud quæreremus. Item si arbores essemus, nihil quidem sentiente motu amare possemus, verumtamen id quasi appetere videremur, quo feracius essemus uberiusque fructuosæ. Si essemus lapides, aut fluctus, aut ventus, aut flamma, vel quid ejusmodi, sine illo quidem sensu atque vita, non tamen nobis deesset quasi quidam nostrorum locorum atque ordinis appetitus. Nam velut amores corporum momenta sunt ponderum, sive deorsum gravitate, sive sursum levitate nitantur. Ita enim corpus pondere, sicut animus amore fertur, quocumque fertur (a). Quoniam igitur homines sumus, ad nostri Creatoris imaginem creati, cujus est vera æternitas, æterna veritas, æterna et vera charitas, estque ipsa⁶ æterna et vera et chara Trinitas, neque confusa, neque separata; in his quidem rebus quæ infra nos sunt, quoniam et ipsa nec aliquo modo essent, nec aliqua specie continerentur, nec aliquem ordinem vel appetent, vel tenerent, nisi ab illo facta essent qui summe est, qui summe sapiens est, qui summe bonus est: tanquam per omnia quæ fecit mirabili stabilitate currentes, quasi quædam ejus alibi magis, alibi minus impressa vestigia colligamus; in nobis autem ipsis ejus imaginem contuentes, tanquam minor ille evangelicus filius ad nosmetipsos reversi surgamus (Luc. xv, 18), ut⁷ ad illum redeamus, a quo peccando recesseramus. Ibi esse nostrum non habebit mortem, ibi nosse nostrum non habebit errorem, ibi amare nostrum non habebit offensionem. Nunc autem ista tria nostra quamvis certa teneamus, nec aliis ea credamus testibus, sed nos ipsi præsentia sentiamus, atque interiore veracissimo cernamus aspectu, tamen quamdiu futura, vel utrum nunquam defutura, et quo si bene, quo autem si male agantur, perventura sint, quoniam per nos ipsos nosse non possumus, alios hinc testes vel quærimus, vel habemus; de quorum fide cur nulla debeat esse dubitatio, non est iste, sed posterior erit diligentius disserendi locus. In hoc autem libro de civitate Dei, quæ non peregrinatur in hujus vitæ mortalitate, sed immortalis semper in cœlis est, id est, de Angelis sanctis Deo coherentibus, qui nec fuerunt unquam, nec futuri sunt desertores, inter quos et illos qui æternam lucem desertores, tenebræ facti sunt, Deum primitus divisisse jam diximus, illo adjuvante quod cœpimus, ut possumus explicemus.

¹ Er. et Lov., *homines*; dissentientibus editis aliis et Mss. — Ms. 2050, *humanem*. M.

² Sic Vind. Am. et Mss. At Er. et Lov., *gignuntur*.

³ Ita Mss. Editi vero, *et hoc amo*.

⁴ Sola editio Lov., *quod hominibus que rectus amantur*.

⁵ Sic Mss. At editi, *estque ipse*.

⁶ Editi, *et*; dissentientibus veteribus libris.

(a) Vid. lib. 15 Confess., cap. 9.

CAPUT XXIX. *De sanctorum Angelorum scientia, qua Trinitatem in ipsa ejus deitate noverunt, et qua operum causas prius in operantis arte, quam in ipsis operibus artificis intuentur.*

Illi quippe Angeli sancti non per verba sonantia Deum discunt; sed per ipsam præsentiam immutabilis veritatis, hoc est, Verbum ejus unigenitum: et ipsum Verbum et Patrem et eorum Spiritum sanctum; eamque esse inseparabilem Trinitatem, singulasque in ea personas esse unam substantiam; et tamen omnes non tres deos esse, sed unum Deum, ita noverunt, ut eis magis ista, quam nos ipsi nobis cogniti sumus. Ipsam quoque creaturam melius ibi, hoc est in sapientia Dei, tanquam in arte qua facta est, quam in ea ipsa sciunt: ac per hoc et se ipsos ibi melius quam in se ipsis, verumtamen et in se ipsis. Facti sunt enim, et aliud sunt quam ille qui fecit. Ibi ergo tanquam in cognitione diurna, in se ipsis autem tanquam in vespertina, sicut supra jam diximus (Cap. 7). Multum enim differt utram in ea ratione cognoscatur aliquid secundum quam factum est, an in se ipso. Sicut aliter scitur relictio linearum seu veritas figurarum, cum intellecta conspicitur, aliter cum in pulvere scribitur (a); et aliter justitia in veritate incommutabili, aliter in anima justi. Sic deinde cætera, sicut firmamentum inter aquas superiores et inferiores, quod cælum vocatum est; sicut deorsum aquarum congeries terræque nudatio, et herbarum institutio atque lignorum; sicut solis et lunæ stellarumque conditio; sicut ex aquis animalium, volucrum scilicet atque piscium belluarumque natantium; sicut quorumcumque¹ in terra gradientium atque reptantium, et ipsius hominis, qui cunctis in terra rebus excelleret. Omnia hæc aliter in Verbo Dei cognoscuntur ab Angelis, ubi habent causas rationesque suas, id est secundum quas facta sunt, incommutabiliter permanentes, aliter in se ipsis; illic clariore, hic obscuriore² cognitione, velut artis atque operum: quæ tamen opera cum ad ipsius Creatoris laudem venerationemque referuntur, tanquam mane luceat in mentibus contemplantium.

CAPUT XXX. *De senarii numeri perfectione, qui primus partium suarum quantitate completur.*

Hæc autem propter senarii numeri perfectionem, eodem die sexies repetito, sex diebus perfecta narratur: non quia Deo necessaria fuerit mora temporum, quasi qui non potuerit creare omnia simul, quæ deinceps congruis motibus peragerent tempora; sed quia per senarium numerum est operum significata perfectio. Numerus quippe senarius primus completur suis partibus, id est, sexta sui

¹ In Mss., quorumcumque.

² Mss., illac clariore, hac obscuriore.

(a) Certius meliusque scitur tota ratio linearum superficialiumque ex dogmatis mathematicis, quam ex pictura, quæ nunquam tam exacta est, ut ante oculos rem ipsam, ut se habet, exponat; meliusque mente intelligitur rectam esse lineam quæ a nota in notam est brevissima, ut ait Euclides, aut lineas omnes a centro ad circum esse pares, ex præceptis geometriæ, quam ex descriptione non modo pulveris, sed ne Parrhasii quidem aut Apellii. Lom. vivæ.

parte, et tertia, et dimidia, quæ sunt unum, et duo, et tria: quæ in summam ducta, sex fiunt. Partes autem in hac consideratione numerorum illæ intelligendæ sunt, quæ quotæ sint dici potest: sicut dimidia, tertia, quarta, et deinceps ab aliquo numero denominatæ. Neque enim, exempli gratia, quia in novenario numero quatuor pars aliqua ejus est, ideo dici potest quota ejus sit: unum autem potest, nam nona ejus est; et tria potest, nam tertia ejus est. Conjectæ vero istæ duæ partes ejus, nona scilicet atque tertia, id est, unum et tria, longe sunt a tota summa ejus, quod est novem. Itemque in denario quaternarius est aliqua pars ejus; sed quota sit dici non potest: unum autem potest; nam decima pars ejus est. Habet et quintam, quod sunt duo: habet et dimidiam, quod sunt quinque. Sed hæ tres partes ejus, decima et quinta et dimidia, id est unum et duo et quinque, simul ductæ non complent decem: sunt enim octo. Duodenarii vero partes numeri in summam ductæ, transeunt cum: habet enim duodecimam, quod est unum; habet sextam, quæ sunt duo; habet quartam, quæ sunt tria; habet tertiam quæ sunt quatuor; habet et dimidiam, quæ sunt sex: unum autem et duo et tria et quatuor et sex, non duodecim, sed amplius, id est, sexdecim fiunt. Hoc breviter commemorandum putavi ad commendandam senarii numeri perfectionem, qui primus, ut dixi, partibus suis in summam redactis ipse perficitur: in quo perfecit Deus opera sua (a). Unde ratio numeri contemnenda non est, quæ in multis sanctarum Scripturarum locis, quam magni æstimanda sit, elucet diligenter intuentibus. Nec frustra in laudibus Dei dictum est, *Omnia in mensura et numero et pondere disposuisti* (Sap. xi, 21).

CAPUT XXXI. — *De die septimo, in quo plenitudo et requies commendatur.*

In septimo autem die, id est eodem die septies repetito, qui numerus etiam ipse alia ratione perfectus est, Dei requies commendatur, in qua primum sanctificatio sonat (Gen. ii, 2, 3) (b). Ita Deus noluit istum diem in ullis suis operibus sanctificare, sed in requie sua, quæ non habet vesperam: neque enim ulla creatura est, ut etiam ipsa (c) aliter in Dei Verbo, aliter in se cognita, faciat aliam velut diurnam, aliam velut vespertinam notitiam. De septenarii porro numeri perfectione dici quidem plura possunt: sed et liber iste jam prolixus est; et vereor ne occasione compta, scientiolam nostram leviter magis quam utiliter jactare velle videamur. Habenda est itaque ratic moderationis atque gravitatis, ne forte cum de numero multum loquimur, mensuram et pondus negligere judicemur. Hoc itaque satis sit admonere, quod totus impar primus numerus ternarius est, totus par quaternarius: ex quibus duobus septenarius constat.

(a) Conf. lib. 4 de Gen. ad Litt., n. 2-7, et de Trinit. lib. 4, n. 7-9.

(b) Lib. 5 de Gen. ad Litt., n. 1-5, et lib. 4, n. 31-37.

(c) Ipsa scilicet requies Dei, quæ non est aliqua creatura.

Ideo pro universo sæpe ponitur, sicuti est, *Septies cadet justus, et resurget* (*Prov. xxiv, 16*): id est, quotiescumque ceciderit, non peribit. Quod non de iniquitatibus, sed de tribulationibus ad humilitatem perducentibus intelligi voluit. Et, *Septies in die laudabo te* (*Psal. cxviii, 164*). Quod alibi alio modo dictum est: *Semper laus ejus in ore meo* (*Psal. xxxiii, 2*) Et multa hujusmodi in divinis auctoritatibus reperiuntur, in quibus septenarius numerus, ut dixi, pro cujusque rei universitate poni solet. Propter hoc eodem sæpe numero significatur Spiritus sanctus (a), de quo Dominus ait, *Docet vos omnem veritatem* (*Joan. xvi, 13*). Ibi requies Dei, qua requiescitur in Deo. In toto quippe, id est in plena perfectione, requies; in parte autem labor. Ideo laboramus, quamdiu ex parte scimus; sed cum venerit quod perfectum est, quod ex parte est evacuabitur (*I Cor. xiii, 9, 10*). Hinc est quod etiam Scripturas istas cum labore rimamur. Sancti vero Angeli, ad quorum societatem et congregationem in hac peregrinatione laboriosissima suspiramus, sicut habent permanendi æternitatem, ita cognoscendi facilitatem: et requiescendi felicitatem. Sine difficultate quippe nos adjuvant; quoniam spiritualibus motibus puris et liberis non laborant.

CAPUT XXXII. — *De opinione eorum qui Angelorum creationem anteriorem volunt esse, quam mundi.*

Ne quis autem contendat, et dicat non sanctos Angelos esse significatos, in eo quod scriptum est, *Fiat lux, et facta est lux*; sed quamlibet lucem tunc primum factam esse corpoream aut opinetur, aut doceat: Angelos autem prius esse factos, non tantum ante firmamentum, quod inter aquas et aquas factam, appellatum est cælum, sed ante illud quod dictum est, *In principio fecit Deus cælum et terram*: atque illud quod dictum est, *In principio*, non ita dictum tanquam primum hoc factum sit, cum ante fecerit Angelos; sed quia omnia in sapientia fecit, quod est Verbum ejus, et ipsum Scriptura principium nominavit; sicut ipse in Evangelio Judæis quærentibus quis esset, respondit se esse principium (*Joan. viii, 25*). non e contrario referam contentionem, maxime quia hoc me delectat plurimum, quod etiam in summo exordio sancti libri Geneseos Trinitas commendatur. Cum enim ita dicitur, *In principio fecit Deus cælum et terram*, ut Pater fecisse intelligatur in Filio, sicut attestatur Psalmus, ubi legitur, *Quam magnificata sunt opera tua, Domine! omnia in sapientia fecisti* (*Psal. ciii, 24*): convenientissime paulo post commemoratur etiam Spiritus sanctus. Cum enim dictum esset, qualem terram Deus primitus fecerit, vel quam molem materiamve futuræ constructionis mundi cæli et terræ nomine nuncupaverit, subjiciendo et addendo, *Terra autem erat invisibilis et incomposita, et tenebræ erant super abyssum*: mox ut Trinitatis

* Mss. omittunt particulam, *ad*: et ex his nonnulli habent, *societati et congregationi*.
(a) Conf. serm. 8, n. 13.

commemoratio completeretur, *Et spiritus, inquit, Dei superferabatur super aquam* (*Gen. 1, 1-3*). Proinde ut volet quisque accipiat, quod ita profundum est, ut ad exercitationem legentium a fidei regula non aberrantes plures possit generare sententias: dum tamen Angelos sanctos in sublimibus sedibus¹, non quidem Deo cœternos, sed tamen de sua sempiterna et vera felicitate securos et certos esse, nemo ambigat. Ad quorum societatem pertinere parvulos suos Dominus docens, non solum illud ait, *Erunt æquales Angelis Dei* (*Matth. xxii, 30*): verum ipsi quoque Angeli qua contemplatione fruuntur, ostendit, ubi ait, *Videte ne contemnatis unum ex pusillis istis: dico enim vobis quia Angeli eorum in cælis semper vident faciem Patris mei, qui in cælis est* (*Id. xviii, 10*).

CAPUT XXXIII. — *De duabus Angelorum societatibus diversis atque disparibus, quæ non incongrue intelliguntur lucis et tenebrarum nominibus nuncupatæ.*

Peccasse autem quosdam angelos, et in hujus mundi ima detrusos, qui eis velut carcer est, usque ad futuram in die judicii ultimam damnationem, apostolus Petrus apertissime ostendit, dicens, quod Deus angelis peccantibus non pepercerit, sed carceribus caliginis inferi² retrudens tradiderit in judicio puniendos reservari (*II Petr. ii, 4*). Inter hos ergo et illos, Deum vel præscientia vel opere divisisse quis dubitet? illosque lucem merito appellari, quis contradicat? quandoquidem nos adhuc in fide viventes, et eorum æqualitatem adhuc sperantes, utique nondum tenentes, jam lux dicti ab Apostolo sumus: *Fuistis enim, inquit, aliquando tenebræ, nunc autem lux in Domino* (*Ephes. v, 8*). Istos vero desertores, tenebras apertissime nuncupari, profecto advertunt, qui peiores esse hominibus infidelibus sive intelligunt, sive credunt. Quapropter, etsi alia lux in isto hujus libri loco intelligenda est, ubi legitur, *Dixit Deus, Fiat lux, et facta est lux*; et alia tenebræ significatæ sunt in eo quod scriptum est, *Divisit Deus inter lucem et tenebras* (*Gen. 1, 3, 4*): nos tamen has duas angelicas societates, unam fruentem Deo, alteram tumentem typho³ (a): unam cui dicitur, *Adorate eum, omnes Angeli ejus* (*Psal. xcvi, 8*); aliam cujus princeps dicit, *Illic omnia tibi dabo, si prostratus adoraveris me* (*Matth. iv, 9*): unam Dei sancto amore flagrantem, alteram propriæ celsitudinis immundo amore fumentem: et quoniam, sicut scriptum est, *Deus superbis resistit, humilibus autem dat gratiam* (*Jacobi iv, 6*; *I Petr. v, 5*), illam in cælis cælorum habitantem, istam inde dejectam in hoc infimo aërio cælo tumultuantem: illam luminosa pietate tranquillam, istam tenebrosis cupiditatibus turbulentam: illam Dei nutu clementer subvenientem, juste ulciscentem: istam suo fastu subdendi et nocendi libidine exæstantem: illam, ut quantum vult consulat, Dei bonitati⁴ mini-

¹ Editi, *cæli sedibus*. Abest, *cæli*, a Mss.

² Am. Er. Lov., *inferni*. At vind. et Mss., *inferi*.

³ Vind. Am. et plures Mss., *typho*.

⁴ Sic Mss. At editi, *bonitatis*.

(a) Eodem verbo utitur Augustinus lib. 3 Confess., cap. 3, et lib. 7, cap. 9, ad exprimendam scilicet superbiam et arrogantiam.

stram; istam, ne quantum vult noceat, Dei potestate frenatam; illam huic illudentem, ut nolens prosit persecutionibus suis; hanc illi invidentem, cum peregrinos colligit suos: nos ergo has duas societates angelicas inter se dispares atque contrarias, unam et naturam bonam, et voluntate rectam; aliam vero naturam bonam, sed voluntate perversam, aliis manifestioribus divinarum Scripturarum testimoniis declaratas, quod etiam in hoc libro, cui nomen est Genesis, lucis tenebrarumque vocabulis significatas existimavimus, etiamsi aliud sensit hoc loco forte qui scripsit, non est inutiliter obscuritas hujus pertractata sententiæ: quia etsi voluntatem auctoris libri hujus indagare nequivimus, a regula tamen fidei, quæ per alias ejusdem auctoritatis sacras Litteras satis fidelibus nota est, non aberravimus¹. Etsi enim corporalia hic commemorata sunt opera Dei, habent procul dubio nonnullam similitudinem spiritualium, secundum quam dicit Apostolus: *Omnes enim vos filii lucis estis et filii diei; non sumus noctis, neque tenebrarum* (1 Thess. v, 5). Si autem hoc sensit etiam ille qui scripsit, ad perfectionem disputationis finem nostra pervenit intentio: ut homo Dei tam eximie divinæque sapientiæ, imo per eum Spiritus Dei in commemorandis operibus Dei, quæ omnia sexto die dicit esse perfecta, nullo modo Angelos prætermisisse credatur: sive *In principio*, quia primo fecit; sive quod convenientius intelligitur, *In principio*, quia in Verbo unigenito fecit, scriptum sit, *In principio fecit Deus cælum et terram*: quibus nominibus universalis est significata creatura, vel spiritualis et corporalis, quod est credibilis; vel magnæ duæ mundi partes, quibus omnia quæ creata sunt continentur, ut primitus eam totam proponeret, ac deinde partes ejus secundum mysticum dierum numerum exsequeretur.

CAPUT XXXIV. — *De eo quod quidam putant, in conditione firmamenti aquarum discretarum nomine Angelos significatos, et quod quidam aquas existimant non creatas.*

Quamquam nonnulli putaverint aquarum nomine significatos quodammodo populos Angelorum (a); et hoc esse quod dictum est, *Fiat firmamentum inter aquam et aquam* (Gen. 1, 6): ut supra firmamentum

¹ Nostri omnes, excepto Cod. 2030, *abhorruimus*. M.

(a) Hoc putasse ipse Augustinus videtur lib. 15 Confess., capp. 15 et 52. Sed haec sententiam improbavit in lib. 2 Retract., cap. 6, n. 2. Eadem opinio fuit Origenis, reprehensa ab Epiphano in Epistola ad Joannem Jerosolymitanum, et ab Hieronymo, ad Pammachium adversus errores Joannis Jerosolymitani.

Angeli intelligantur, infra vero vel aquæ istæ visibiles, vel malorum angelorum multitudo, vel omnium hominum gentes. Quod si ita est, non illic apparet ubi facti sunt Angeli, sed ubi discreti. Quamvis et aquas, quod perversissimæ atque impiæ vanitatis est, negent quidam factas a Deo, quoniam nusquam scriptum est, *Dixit Deus, Fiant aquæ* (a). Quod possunt simili vanitate etiam de terra dicere: nusquam enim legitur, *Dixit Deus, Fiat terra*. Sed, inquit, scriptum est, *In principio fecit Deus cælum et terram*. Illic ergo et aqua intelligenda est: uno enim nomine utrumque comprehensum est. Nam *ipsius est mare*, sicut in Psalmo legitur, *et ipse fecit illud, et aridam terram¹ manus ejus finxerunt* (Psal. xciv, 5). Sed hi qui in nomine aquarum quæ super cælos sunt, Angelos intelligi volunt, ponderibus elementorum moveantur, et ideo non putant aquarum fluidam gravemque naturam in superioribus mundi locis potuisse constitui: qui secundum rationes suas si ipsi hominem facere possent, non ei pituitam, quod græce *φλέγμα* dicitur, et tanquam in elementis corporis nostri aquarum vicem obtinet, in capite ponerent. Ibi enim sedes est phlegmatis, secundum Dei opus utique aptissime: secundum istorum autem conjecturam tam absurde, ut si hoc nesciremus, et in hoc libro similiter scriptum esset, quod Deus humorem fluidum et frigidum, ac per hoc gravem, in superiore omnibus cæteris humani corporis parte posuerit, isti trutinatores elementorum nequaquam crederent; et si auctoritati ejusdem Scripturæ subditi essent, aliquid aliud ex hoc intelligendum esse censerent. Sed quoniam, si diligenter singula scrutemur atque tractemus, quæ in illo divino libro de constitutione mundi scripta sunt, et multa dicenda, et a proposito instituti operis longe digrediendum est; jamque de duabus istis diversis inter se atque contrariis societatibus Angelorum, in quibus sunt quædam exordia duarum etiam in rebus humanis civitatum, de quibus deinceps dicere institui, quantum satis esse visum est, disputavimus, hunc quoque librum aliquando claudamus.

¹ Vind. Er. et Lov. omittunt, *terram*. Habent potiores manuscripti juxta græcum LXX. Habet etiam editio Am. sed cum additamento sic: *et aridam, id est terram manus ejus finxerunt*.

(a) Hujus etiam hæresis meminit libro de Hæresibus, hæc. 76, nec tamen auctorem nominat. Eam Audianus tribuit Theodoretus, libro 4 Hæreticarum fabularum. Epiphanius contra, Hæresi 54, quæ est Sampseorum, inter cætera hos hæreticos notat, quod colerent aquam, et hanc veluti Deum putarent. Coquæsus.

LIBER DUODECIMUS.

In quo prius quidem de Angelis inquit Augustinus, unde nimirum aliis bona voluntas, aliis mala, et quæ causa beatitudinis bonorum, quæ causa miseriæ malorum angelorum fuerit. Postea vero de hominis institutione agit, docetque eum scire ab æterno, sed in tempore esse conditum, nec alio auctore quam Deo.



CAPUT PRIMUM. — *De una bonorum malorumque angelorum natura.*

1. Antequam de institutione hominis dicam, ubi

duarum civitatum, quantum ad rationalium mortalium¹ genus attinet, apparebit exortus, sicut sope

¹ Editi, *mortaliumque*. Abest, *que*, a manuscriptoris.

riore libro apparuisse in Angelis jam videtur; prius mihi quædam de ipsis Angelis video esse dicenda, quibus demonstraretur, quantum a nobis potest, quam non inconveniens neque incongrua dicatur esse hominibus Angelisque societas: ut non quatuor, duas scilicet Angelorum totidemque hominum, sed duas potius civitates, hoc est societas, merito esse dicantur; una in bonis, altera in malis, non solum Angelis, verum etiam hominibus constitutæ.

2. Angelorum bonorum et malorum inter se contrarios appetitus non naturis principiisque diversis, cum Deus omnium substantiarum bonus auctor et conditor utrosque creaverit, sed voluntatibus et cupiditatibus existisse, dubitare fas non est; dum alii constanter in communi omnibus bono, quod ipse illis Deus est, atque in ejus æternitate, veritate, charitate persistunt; alii sua potestate potius delectati, velut bonum suum sibi ipsi essent, a superiore communi omnium beatifico bono ad propria defluerunt; et habentes elationis fastum pro excelsissima æternitate, vanitatis astutiam pro certissima veritate, studia partium pro individua charitate, superbi, fallaces, invidi effecti sunt. Beatitudinis igitur illorum causa est, adhærere Deo. Quocirca istorum miseræ causa ex contrario est intelligenda, quod est, non adhærere Deo. Quamobrem, si cum quæritur quare illi beati sint, recte respondetur, quia adhærere Deo; et cum quæritur cur isti sint miseri, recte respondetur, quia non adhærere Deo: non est creaturæ rationalis vel intellectualis bonum, quo beata sit, nisi Deus. Ita quamvis non omnis beata possit esse creatura (neque enim hoc munus adipiscuntur aut capiunt feræ, ligna, saxa, et si quid ejusmodi est), ea tamen quæ potest, non ex se ipsa potest, quia ex nihilo creata est; sed ex illo, a quo creata est. Hoc enim adepto beata, quo amisso misera est. Ille vero qui non alio, sed se ipso bono beatus est, ideo ipse miser non potest esse, quia non se potest amittere.

3. Dicimus itaque incommutabile bonum non esse, nisi unum verum beatum Deum: ea vero quæ fecit, bona quidem esse, quod ab illo; verumtamen mutabilia, quod non de illo, sed de nihilo facta sunt. Quanquam ergo summa non sint; quibus est Deus majus bonum: magna sunt tamen ea mutabilia bona, quæ adhærere possunt ut beata sint, immutabili bono; quod usque adeo bonum eorum est, ut sine illo misera esse necesse sit. Nec ideo cætera in hac creaturæ universitate meliora sunt, quia misera esse non possunt. Neque enim cætera membra corporis nostri ideo dicendum est oculis esse meliora, quia cæca esse non possunt. Sicut autem melior est natura sentiens et cum dolet, quam lapis qui dolere nullo modo potest: ita rationalis natura præstantior est etiam misera, quam illa quæ rationis vel sensus est experta, et ideo in eam non cadit miseria. Quod cum ita sit, huic naturæ, quæ in tanta excellentia creata est, ut licet ipsa sit mutabilis, inhærendo tamen incommutabili bono, id est summo Deo, beatitudinem consequatur, nec expleat indigentiam suam

nisi utique beata sit, eique expletæ non sufficiat nisi Deus, profecto non illi adhærere, vitium est. Omne autem vitium naturæ nocet, ac per hoc contraria naturam est. Ab illa igitur quæ adhæreret Deo, non natura differt ista, sed vitio: quo tamen etiam vitium valde magna multumque laudabilis ostenditur ipsa natura. Cujus enim recte vituperatur vitium, procul dubio natura laudatur. Nam recta vitii vituperatio est, quod illo dehonestatur natura laudabilis. Sicut ergo cum vitium oculorum dicitur cæcitas, id ostenditur, quod ad naturam oculorum pertinet visus; et cum vitium aurium dicitur surditas, ad earum naturam pertinere demonstratur auditus: ita cum vitium creaturæ angelicæ dicitur, quod non adhæreret Deo, hinc apertissime declaratur, ejus naturæ, ut Deo adhæreret, convenire. Quam porro magna sit læsio adhærere Deo, ut ei vivat, inde sapiat, illo gaudeat, tantoque bono sine morte, sine errore, sine molestia perfruatur, quis cogitare digne possit, aut eloqui? Quapropter etiam vitio malorum angelorum, quo non adhæreret Deo, quoniam omne vitium naturæ nocet, satis manifestatur Deum tam bonam eorum creasse naturam, cui noxium sit non esse cum Deo.

CAPUT II.— *Nullam essentiam Deo esse contrariam, quia ab eo qui summe est et semper est, hoc totum videtur diversum esse quod non est.*

Hæc dicta sint, ne quisquam, cum de angelis apostaticis loquimur, existimet eos aliam velut ex alio principio habere potuisse naturam, nec eorum naturæ auctorem Deum. Cujus erroris impietate tanto quisque carebit expeditius et facilius, quanto perspicacius intelligere potuerit, quod per angelum dixit Deus, quando Moysen mittebat ad filios Israel: *Ego sum, qui sum* (Exod. III, 14). Cum enim Deus summa essentia sit, hoc est summe sit, et ideo immutabilis sit; rebus quas ex nihilo creavit, esse dedit, sed non summe esse, sicut ipse est; et aliis dedit esse amplius, aliis minus; atque ita naturas essentialium gradibus ordinavit. Sicut enim ab eo quod est sapere, vocatur sapientia; sic ab eo quod est esse, vocatur essentia: novo quidem nomine, quo jam veteres non sunt latini sermonis auctores, sed jam nostris temporibus usitato, ne deesset etiam linguæ nostræ, quod Græci appellant *οὐσία*. Hoc enim verbum e verbo expressum est, ut diceretur essentia. Ac per hoc ei naturæ, quæ summe est, qua faciente sunt quæcumque sunt, contraria natura non est, nisi quæ non est. Et quippe quod est, non esse contrarium est. Et propterea Deo, id est summæ essentiæ, et auctori omnium qualiumcumque essentialium, essentia nulla contraria est.

CAPUT III.— *De inimicis Dei, non per naturam, sed per contrariam voluntatem, quæ cum ipsis nocet, bonæ utique naturæ nocet: quia vitium si non nocet, non est.*

Dicuntur autem in Scripturis inimici Dei, qui non natura, sed vitii adversantur ejus imperio: nihil ei

¹ Quidam manuscripti, *hoc in toto*.

valentes nocere, sed sibi. Inimici enim sunt resistendi voluntate, non potestate laedendi. Deus namque immutabilis est, et omnimodo incorruptibilis. Ideo vitium quo resistunt Deo, qui ejus appellatur inimici, non est Deo, sed ipsis malum. Neque hoc ob aliud, nisi quia corrumpit in eis naturam bonam. Natura igitur non est contraria Deo, sed vitium. Quia quod malum est, contrarium est bono¹. Quis autem neget Deum summe bonum? Vitium ergo contrarium est Deo, tanquam malum bono. Porro autem bonum est et natura quam vitiat; unde et huic bono utique contrarium est: sed Deo tantummodo tanquam bono malum; naturam vero quam vitiat, non tantum malum, sed etiam noxium. Nulla quippe mala Deo noxia, sed mutabilibus corruptibilibusque naturis, bonis tamen ipsorum quoque testimonio vitiorum. Si enim bonae non essent, eis vitia nocere non possent. Nam quid eis nocendo faciunt, nisi adimunt integritatem, pulchritudinem, salutem, virtutem, et quidquid boni naturae per vitium detrahi sive minui consuevit? Quod si omnino desit, nihil boni adimendo non nocet, ac per hoc nec vitium est. Nam esse vitium, et non nocere, non potest. Unde colligitur, quamvis non possit vitium nocere incommutabili bono, non tamen posse nocere nisi bono: quia non inest, nisi ubi nocet. Hoc etiam isto modo dici potest, vitium esse nec in summo posse bono, nec nisi in aliquo bono. Sola ergo bona alicubi esse possunt, sola mala nusquam: quoniam naturae etiam illae quae ex male voluntatis vitio² vitiatæ sunt, in quantum vitiosae sunt, malae sunt; in quantum autem naturae sunt, bonae sunt. Et cum in poenis est natura vitiosa, excepto eo quod natura est, etiam hoc ibi bonum est, quod impunita non est. Hoc enim est justum, et omne justum procul dubio bonum. Non enim quisquam de vitiiis naturalibus, sed de voluntariis poenas luit. Nam etiam quod vitium consuetudine nimio progressu roboratum velut naturaliter inolevit, a voluntate sumpsit exordium. De vitiiis quippe nunc loquimur ejus naturae, cui mens inest capax intelligibilis lucis, qua discernitur justum ab injusto.

CAPUT IV. — *De natura irrationalium, aut vita carentium, quas in suo genere atque ordine ab universitatis decore non discrepat.*

Cæterum vitia pecorum et arborum, aliarumque rerum mutabilium atque mortalium, vel intellectu, vel sensu, vel vita omnino carentium, quibus eorum dissolubilis natura corrumpitur, damnabilia putare, ridiculum est: cum istæ creaturæ eum modum nutu Creatoris acceperint, ut cedendo ac succedendo peragant infamam pulchritudinem temporum in genere suo istius mundi partibus congruentem. Neque enim celestibus fuerant terrena coequantia, aut ideo universitati deesse ista debuerunt, quoniam sunt illa meliora. Cum ergo in his locis, ubi talia esse compe-

¹ Nonnulli Mss., sed vitium, quia malum est, contrarium est bono.

² Plures et probæ notæ Mss., vitio.

tebat, alia aliis deficientibus oriuntur, et succumbunt minoribus majoribus, atque in qualitates superantium superata vertuntur, rerum est ordo transeuntium. Cujus ordinis decus propterea nos non delectat, quoniam parti ejus pro conditione nostræ mortalitatis intexti, universum, cui particulae quæ nos offendunt, satis apte decenterque conveniunt, sentire non possumus. Unde nobis, in quibus eam contemplari minus idonei sumus, rectissime credenda præcipitur providentia Conditoris, ne tanti artificis opus in aliquo reprehendere vanitate humanæ temeritatis audeamus. Quanquam et vitia rerum terrenarum non voluntaria, neque poenalia, naturas ipsas, quarum nulla omnino est, cujus non sit auctor et conditor Deus, si prudenter attendamus, eadem ratione commendant: quia et in eis hoc nobis per vitium tolli displicet, quod in natura placet: nisi quia hominibus etiam ipsæ naturæ plerumque displicent, cum eis fiunt noxiæ, non eas considerantibus, sed utilitatem suam; sicut illa animalia, quorum abundantia Ægyptiorum superbia vapulavit. Sed isto modo possunt et solem vituperare; quoniam quidam peccantes, vel debita non reddentes, poni a iudicibus jubentur ad solem (a). Non itaque ex commodo vel incommodo nostro, sed per seipsam considerata natura dat artificis suo gloriam. Sic est et natura ignis æterni sine ulla dubitatione laudabilis, quamvis damnatis impiis futura poenalis. Quid enim est igne flammante, vigente, lucente pulchrius? quid calefaciente, curante, coquente utilius? quamvis eo nihil sit urente molestius. Idem igitur ipse aliter³ appositus perniciosus, qui convenienter adhibitus commodissimus invenitur. Nam ejus in universo mundo utilitates verbis explicare quis sufficit? Nec audiendi sunt, qui laudant in igne lucem, ardorem autem vituperant: videlicet non ex sui natura, sed ex suo commodo vel incommodo. Videre enim volunt, ardere nolunt. Sed parum attendunt eam ipsam lucem, quæ certe et illis placet, oculis infirmis per inconvenientiam nocere; et in illo ardore, qui eis displicet, nonnulla animalia per convenientiam salubriter vivere (b).

CAPUT V. — *Quod in omni naturæ specie ac modo laudabilis sit Creator.*

Naturæ igitur omnes, quoniam sunt, et ideo habent modum suum, speciem suam, et quamdam secum pacem suam, profecto bonæ sunt. Et cum ibi sunt, ubi esse per naturæ ordinem debent, quantum acceperunt, suum esse custodiunt. Et quæ semper esse non acceperunt, pro usu motuque rerum, quibus Creatoris lege subduntur, in melius deteriusve mutantur, in eum divina providentia tendentes exitum, quem ratio gubernandæ universitatis includit: ita ut nec tanta corruptio, quanta usque ad interitum naturas

³ vind. Am. et Er., poenaltier.

(a) Genus hoc est poenæ quod ad infamiam spectat potius quam ad cruciatum supplicii; etsi nec deest suus cruciatus. Eo afficiuntur in Hispania lenæ numellis affixæ et perunctæ melle, quo muscæ et apes et vespæ advolant. LUD. VIVAS.

(b) vide infra, lib. 21, cap. 4.

mutabiles mortalesque perducit, sic faciat non esse quod erat, ut non inde fiat consequenter quod esse debeat. Quæ cum ita sint, Deus qui summe est, atque ob hoc ab illo facta est omnis essentia, quæ non summe est (quia neque illi æqualis esse deberet, quæ de nihilo facta esset); neque ullo modo esse posset, si ab illo facta non esset: nec ullorum vitiorum offensione vituperandus, et omnium naturarum consideratione laudandus est.

CAPUT VI. — *Quæ causa sit beatitudinis Angelorum bonorum, et quæ causa sit miseræ angelorum malorum.*

Proinde causa beatitudinis Angelorum bonorum ea verissima reperitur, quod ei adhærent qui summe est. Cum vero causa miseræ malorum angelorum quæritur, ea merito occurrit, quod ab illo qui summe est aversi, ad se ipsos conversi sunt, qui non summe sunt: et hoc vitium quid aliud quam superbia nuncupatur? *Initium quippe omnis peccati superbia* (Eccli. x, 15). Noluerunt ergo ad illum custodire fortitudinem suam (Psal. lviij, 10): et qui magis essent, si ei qui summe est adhærerent; se illi præferendo, id quod minus est prætulerunt. Hic primus defectus et prima inopia primumque vitium ejus naturæ, quæ ita creata est, ut nec summe esset, et tamen ad beatitudinem habendam, eo qui summe est frui posset, a quo aversa, non quidem nulla, sed tamen minus esset, atque ob hoc misera fieret. Hujus porro malæ voluntatis causa efficiens si quæretur, nihil invenitur. Quid est enim quod facit voluntatem malam, cum ipsa faciat opus malum? Ac per hoc mala voluntas efficiens est operis mali, male autem voluntatis efficiens est nihil. Quoniam si res aliqua est, aut habet aut non habet aliquam voluntatem: si habet, aut bonam profecto habet, aut malam: si bonam, quis ita desipiat, ut dicat quod bona voluntas faciat voluntatem malam? Erit enim, si ita est, bona voluntas causa peccati: quo absurdius putari nihil potest. Si autem res ista quæ putatur facere voluntatem malam, ipsa quoque habet voluntatem malam; etiam eam quæ fecerit res, consequenter interrogo: atque ut sit aliquis inquirendi modus, causam primæ malæ voluntatis inquirō. Non est enim prima voluntas mala, quam fecit voluntas mala¹: sed illa prima est, quam nulla fecit. Nam si præcessit a qua fieret, illa prior est, quæ alteram fecit. Si respondetur quod eam nulla res fecerit, et ideo semper fuerit; quæro utrum in aliqua natura fuerit. Si enim in nulla fuit, omnino non fuit: si autem in aliqua, vitiabat eam et corrumpabat, eratque illi noxia, ac per hoc bono privabat. Et ideo in mala natura voluntas mala esse non poterat; sed in bona, mutabili tamen, cui vitium hoc posset nocere. Si enim non nocuit, non utique vitium fuit: ac per hoc nec mala voluntas fuisse dicenda est. Porro si nocuit, bonum auferendo vel minuendo utique nocuit. Non igitur esse potuit sempiterna voluntas mala in ea re, in qua bonum naturale præcesserat, quod mala voluntas nocendo posset adimere.

¹ vind. Am. et Lov., *quam nulla fecit* (vel, *facti*) *voluntas etiam mala*. Castigantur ex Mss.

Si ergo non erat sempiterna, quis eam fecerit, quæro. Restat ut dicatur, quod ea res fecerit malam voluntatem, in qua nulla voluntas fuit. Hæc utrum superior sit, requiro; an inferior, an æqualis. Sed si superior, utique melior: quomodo ergo nullius, ac non potius bonæ voluntatis? Hoc idem profecto et æqualis¹. Duo quippe quandiu sunt pariter voluntatis bonæ, non facit alter in altero voluntatem malam. Relinquitur ut inferior res, cui nulla voluntas est, fecerit angelicæ naturæ, quæ prima peccavit, voluntatem malam. Sed etiam res ipsa quæcumque est inferior usque ad infimam terram, quoniam natura et essentia est, procul dubio bona est, habens modum et speciem suam in genere atque ordine suo. Quomodo ergo res bona efficiens est voluntatis malæ? quomodo, inquam, bonum est causa mali? Cum enim se voluntas relicto superiore ad inferiora convertit, efficitur mala: non quia malum est, quo se convertit; sed quia perversa est ipsa conversio. Idcirco non res inferior voluntatem malam fecit: sed rem inferioriorem prave atque inordinate ipsa quæ² facta est, appetivit. Si enim aliqui duo æqualiter affecti animo et corpore videant unius corporis pulchritudinem, qua visa unus eorum ad illicite perfruendum moveatur, alter in voluntate pudica stabilis perseveret; quid putamus esse causæ, ut in illo fiat, in illo non fiat voluntas mala? Quæ illam res fecit, in quo facta est? Neque enim pulchritudo illa corporis; nam eam non fecit in ambobus: quandoquidem amborum non dispariliter occurrit aspectibus. An caro intuentis in causa est? Cur non et illius? An vero animus? Cur non utriusque? Ambos enim et animo et corpore æqualiter affectos fuisse prædiximus. An dicendum est, alterum eorum occulta maligni spiritus suggestionem tentatum? quasi non eidem suggestioni et qualicumque suasioni propria voluntate consensarit. Hanc igitur consensionem, hanc malam quam male suadenti adhibuit voluntatem, quæ in eo res fecerit, quærimus. Nam ut hoc quoque impedimentum ab ista quæstione tollatur, si eadem tentatione ambo tententur, et unus ei cedat atque consentiat, aliter idem qui fuerat perseveret; quid aliud apparet, nisi unum voluisse, alterum noluisse a castitate descere? Unde, nisi propria voluntate, ubi eadem fuerat in utroque corporis et animi affectio? Amborum oculis pariter visa est eadem pulchritudo, ambobus pariter institit occulta tentatio: propriam igitur in uno eorum voluntatem malam quæ res fecerit scire volentibus, si bene intueantur, nihil occurrit. Si enim dixerimus quod ipse eam fecerit, quid erat ipse ante voluntatem malam nisi natura bona, cujus auctor Deus, qui est incommutabile bonum? Qui ergo dicit eum qui consensit tentanti atque suadenti, cui non consensit alius, ad illicite utendum pulchro corpore, quod videndum ambobus pariter adfuit, cum ante illam visionem ac tentationem similes ambo animo et

¹ Sic Mss. At editi: *Hoc idem profecto, et æqualis si fuerit, dicit volens.*

² Omnes manuscripti, *quæ*.

corpore fuerit, ipsum sibi fecisse voluntatem malam, quia utique bonus ante voluntatem malam fuerit; quærat cur eam fecerit, utrum quia natura est, an quia ex nihilo facta est: et inveniet voluntatem malam non ex eo esse incipere quod natura est, sed ex eo quod de nihilo natura facta est. Nam si natura causa est voluntatis malæ, quid aliud cogimur dicere, nisi a bono fieri malum, et bonum esse causam mali? siquidem a natura bona fit voluntas mala. Quod unde fieri potest, ut natura bona, quamvis mutabilis, antequam habeat voluntatem malam, faciat aliquid mali, hoc est, ipsam voluntatem malam?

CAPUT VII. — Causam efficientem malæ voluntatis non esse quærendam.

Nemo igitur quærat efficientem causam malæ voluntatis: non enim est efficiens, sed deficiens; quia nec illa effectio est, sed defectio. Deficere namque ab eo quod summe est, ad id quod minus est, hoc est incipere habere voluntatem malam. Causas porro defectionum istarum, cum efficientes non sint, ut dixi, sed deficientes, velle invenire, tale est ac si quisquam velit videre tenebras, vel audire silentium: quod tamen utrumque nobis notum est; neque illud nisi per oculos, neque hoc nisi per aures; non sane in specie, sed in specie privatione. Nemo ergo ex me scire quærat, quod me nescire scio, nisi forte ut nescire discat, quod sciri non posse sciendum est. Ea quippe quæ non in specie, sed in ejus privatione sciuntur, si dici aut intelligi potest, quodammodo nesciendo sciuntur, ut sciendo nesciantur. Cum enim acies etiam oculi corporalis currit per species corporales, nusquam tenebras videt, nisi ubi cœperit non videre. Ita etiam non ad aliquem alium sensum, sed ad solas aures pertinet sentire silentium: quod tamen nullo modo nisi non audiendo sentitur. Sic species intelligibiles mens quidem nostra intelligendo conspicit; sed ubi deficient, nesciendo condiscit. *Delicta enim quis intelligit (Psal. xviii, 13)?*

CAPUT VIII. — De amore perverso, quo voluntas ab incommutabili bono ad commutabile bonum deficit.

Hoc scio, naturam Dei nunquam, nusquam, nulla ex parte posse deficere; et ea posse deficere, quæ ex nihilo facta sunt. Quæ tamen quanto magis sunt, et bona faciunt (tunc enim aliquid faciunt), causas habent efficientes¹: in quantum autem deficient, et ex hoc mala faciunt, (quid enim tunc faciunt nisi vana?) causas habent deficientes [VIII.] Itemque scio in quo sit mala voluntas, id in eo fieri, quod si nollet, non fieret: et ideo non necessarios, sed voluntarios defectus justa pœna consequitur. Deficitur enim non ad mala, sed male; id est, non ad malas naturas, sed ideo male, quia contra ordinem naturarum ab eo quod summe est ad id quod minus est. Neque enim auri vitium est avaritia, sed hominis perverse amantis aurum, justitia derelicta, quæ incomparabiliter auro debuit anteponi.

¹ Vind. Am. et Er., *tunc enim aliquid faciunt, cum causas habent efficientes.* Lov., *tunc enim cum aliquid faciunt, causas habent efficientes.* Expungenda particula, *cum*, quæ Mss. abest.

Nec luxuria est vitium pulchrorum suaviumque corporum, sed animæ perverse amantis corporeas voluptates, neglecta temperantia, qua rebus spiritualiter pulchrioribus, et incorruptibiliter suavioribus coaptamur. Nec jactantia vitium est laudis humanæ, sed animæ perverse amantis laudari ab hominibus, spreto testimonio conscientiæ. Nec superbia vitium est dantis potestatem, vel ipsius etiam potestatis, sed animæ perverse amantis potestatem suam, potentioris justiore contempta. Ac per hoc qui perverse amat cuiuslibet naturæ bonum, etiamsi adipiscatur, ipse sit in bono malus, et miser meliore privatus.

CAPUT IX. — An sancti Angeli quem habent creatorem naturæ, eundem habeant bonæ voluntatis auctorem per Spiritum sanctum in eis charitate diffusa.

1. Cum ergo malæ voluntatis efficiens naturalis, vel, si dici potest, essentialis nulla sit causa; ab ipsa quippe incipit spirituum mutabilium malum, quo minuitur atque depravatur naturæ bonum, nec talem voluntatem facit nisi defectio, qua deseritur Deus, cujus defectionis etiam causa utique deficit: si dixerimus nullam esse efficientem causam etiam voluntatis bonæ, cavendum est, ne voluntas bona bonorum Angelorum, non facta, sed Deo coæterna esse credatur. Cum ergo¹ ipsi facti sint, quomodo illa non esse facta dicitur? Porro quia facta est, utrum cum ipsa facta est, an sine illa fuerint prius? Sed si cum ipsis, non dubium quod ab illo facta sit, a quo et ipsi; simulque ut facti sunt, ei a quo facti sunt, amore cum quo facti sunt, adhæserunt. Eoque sunt isti ab illorum societate discreti, quod hi in eadem voluntate bona manserunt, illi ab ea deficiendo mutati sunt, mala scilicet voluntate, hoc ipso quod a bona defecerunt: a qua non defecissent, si utique voluissent². Si autem boni Angeli fuerunt prius sine bona voluntate, eamque in se ipsi Deo non operante fecerunt; ergo meliores a se ipsis, quam ab illo facti sunt. Absit. Quid enim erant sine bona voluntate, nisi mali? Aut si propterea non mali, quia nec mala voluntas eis inerat (neque enim ab ea, quam nondum cœperant habere, defecerant), certe nondum tales, nondum tam boni, quam esse cum voluntate bona cœperunt. Aut si non potuerunt se ipsos facere meliores, quam eos ille fecerat, quo nemo melius quidquam facit; profecto et bonam voluntatem, qua meliores essent, nisi operante adiutorio Creatoris, habere non possent. Et cum id egit eorum voluntas bona, ut non ad se ipsos, qui minus erant, sed ad illum qui summe est, converterentur, eique adherentes magis essent, ejusque participatione sapienter beateque viverent; quid aliud ostenditur, nisi voluntatem quamlibet bonam inopem fuisse in solo desiderio remansuram, nisi ille qui bonam naturam ex nihilo sui capacem fecerat, ex se ipso faceret implendo meliorem, prius faciens excitando avidum?

¹ Vind. Am. et Lov., *enim.* At Er. et Mss., *ergo.*

² Sic Mss. Editi vero, *hoc ipso quod a bono defecerunt; a quo non defecissent, si utique voluissent.*

2. Nam et hoc discutiendum est, si boni Angeli ipsi in se fecerunt voluntatem bonam, utrum aliqua eam, an nulla voluntate fecerunt. Si nulla, utique nec fecerunt. Si aliqua, utrum mala, an bona. Si mala, quomodo esse potuit mala voluntas bonæ voluntatis effectrix? Si bona, jam ergo habebant. Et istam quis fecerat, nisi ille qui eos cum bona voluntate, id est cum amore casto, quo illi adhærerent, creavit, simul eis et condens naturam, et largiens gratiam? Unde sine bona voluntate, hoc est Dei amore, nunquam sanctos Angelos fuisse, credendum est. Isti autem, qui cum boni creati essent, tamen mali sunt, mala propria voluntate, quam bona natura non fecit, nisi cum a bono sponte defecit, ut mali causa non sit bonum, sed defectus a bono, aut minorem acceperunt amoris divini gratiam, quam illi qui in eadem perstiterunt; aut si utrique boni æqualiter creati sunt, istis mala voluntate cadentibus, illi amplius adjuti, ad eam beatitudinis plenitudinem, unde se nunquam casuros certissimi fuerent, pervenerunt: sicut jam etiam in libro, quem sequitur iste, tractavimus (cap. 13). Constatendum est igitur cum debita laude Creatoris, non ad solos sanctos homines pertinere, verum etiam de sanctis Angelis posse dici, quod charitas Dei diffusa sit in eis per Spiritum sanctum, qui datus est eis (Rom. v, 5); nec tantum hominum, sed primitus præcipueque Angelorum bonum esse, quod scriptum est, *Mihi autem adherere Deo, bonum est* (Psalm. lxxii, 28). Hoc bonum quibus commune est, habent et cum illo cui adhærent et inter se societatem sanctam, et sunt una civitas Dei, eademque vivum sacrificium ejus vivumque templum ejus. Cujus pars quæ conjungenda immortalibus Angelis ex mortalibus hominibus congregatur (a), et nunc mortaliter peregrinatur in terris, vel in eis qui morte obierunt, secretis animarum receptaculis sedibusque requiescit, eodem Deo creante, quemadmodum exorta sit, sicut de Angelis dictum est, jam video esse dicendum. Ex uno quippe homine, quem primum Deus condidit, genus humanum sumpsit exordium, secundum sanctæ Scripturæ fidem, quæ mirabilem auctoritatem non immerito habet in orbe terrarum, atque in omnibus gentibus, quas sibi esse credituras inter cætera vera quæ dixit, vera divinitate prædixit.

CAPUT X. — De falsitate ejus historiæ, quæ multa millia annorum præteritis temporibus adscribat.

1. Omittamus igitur conjecturas hominum nescientium quid loquantur de natura vel institutione generis humani. Alii namque, sicut de ipso mundo crediderunt, semper fuisse homines opinantur (b). Unde ait et Apuleius, cum hoc animantium genus describeret: « *Singillatim mortales, cunctim tamen universo genere*

¹ Editi, in eis. Abest, in, a Mss.

² Apud Er. et Lov. omissum est, vera.

³ Libri quidam, cuncti: ut supra, lib. 9, cap. 8. At Apuleius, cunctim.

(a) Conf. Enchirid., n. 9.

(b) Basilium, Homilia prima in Hexaemeron: « Profanorum hominum alii naturam humanam æternam asseruerunt, alii primum in Attica natos fuisse homines, alii in Arcadia, alii in Ægypto. » Quibus Scythas etiam addiderunt. Cocquozos.

perpetui (In libro de deo Soeratis). Et cum illis dictum fuerit, si semper humanum genus fuit, quoniam modo verum eorum loquatur historia, narrans qui fuerint quarumque rerum inventores, qui primi liberalium disciplinarum aliarumque artium institutores, vel a quibus primum illa vel illa regio parsque terrarum, illa atque illa insula incolæ cœperit: respondent, diluviis et conflagrationibus per certa intervalla temporum (a) non quidem omnia, sed plurima terrarum ita vastari, ut redigantur homines ad exiguum paucitatem, ex quorum progenie rursus multitudo pristina reparatur; ac sic identidem reparari et institui quasi prima, cum restituantur potius quæ fuerant illis nimis vastationibus interrupta et extincta; cæterum hominem nisi ex homine existere omnino non posse. Dicunt autem quod putant, non quod sciunt.

2. Fallunt eos etiam quædam mendacissimæ litteræ, quas perhibent in historia temporum multa annorum millia continere (b): cum ex Litteris sacris ab institutione hominis nondum completa annorum sex millia computemus (c). Unde, ne multa disputem quemadmodum illarum litterarum, in quibus longe plura annorum millia referuntur, vanitas refellatur, et nulla in illis rei hujus idonea reperitur auctoritas; illa epistola Alexandri Magni ad Olympiadem matrem suam (d), quam scripsit narrationem ejusdem Ægyptii sacerdotis insinuans, quam protulit ex litteris quæ sacre apud illos haberentur, continentem regna quæ Græca quoque novit historia: in quibus regnum Assyriorum in eadem epistola Alexandri quinque millia excedit annorum; in Græca vero historia mille ferme et trecentos habet ab ipsius Beli principatu, quem regem et ille Ægyptius in ejusdem regni ponit exordio. Persarum autem et Macedonum imperium usque ad ipsum Alexandrum, cui loquebatur, plus quam octo et annorum millium ille constituit: cum apud Græcos Macedonum usque ad mortem Alexandri quadringenti octoginta quinque reperiantur; Persarum vero, donec ipsius Alexandri victoria finiretur, ducenti et triginta tres computentur (e). Longe itaque hi numeri annorum illis Ægyptiis sunt minores, nec eis, etiamsi ter tantum computarentur, æquarentur. Perhibentur enim Ægyptii quondam tam breves annos habuisse, ut quaternis mensibus finirentur (f). Unde annus plenior et verior, qualis nunc et nobis et illis est, tres

¹ vind. Am. et Er., quasi prima restituantur; omissa particula, cum; cujus loco nonnulli Mss. habent, ut.

² Sic Mss. At editi, continet etiam regna.

³ Nostri Mss., æquarent. M.

(a) Vid. Senec. lib. 3 natural. Quæst., capp. 27 et seqq., et Cicer. lib. 2 de Nat. deor.

(b) Vid. Cicer. lib. 1 de Divinat., cap. 19, et Lact. lib. 7 Instit., cap. 14.

(c) Eusebius, quem in digestionem temporum Augustinus sequitur, a condito mundo ad Romam a Gothicis captam, quinquies mille sexcentos undecim annos computat, idque ex supputatione septuaginta interpretum. Nam ex Hebræo Beda usque ad principatum Honorii et Theodosii junioris, quo tempore Urbem ceperunt Gothi, quater mille trecentos septuaginta septem annos ponit. Læo. Vivas.

(d) Vid. supra, lib. 8, cap. 5.

(e) Vid. supra notam ad lib. 4, cap. 7.

(f) Vid. Plin. lib. 7 Hist. nat., cap. 48, Lactant. lib. 2 falsit., cap. 12, et ipsum Augustinum infra, lib. 15, cap. 12.

eorum annos complectebatur antiquos. Sed ne sic quidem, ut dixi, Græca Ægyptiæ numero temporum concordat historia, Et ideo Græcæ potius fides habenda est : quia veritatem non excedit annorum, qui Litteris nostris, quæ vere sacræ sunt continentur. Porro si hæc epistola Alexandri, quæ maxime innotuit, multum abhorret in spatii temporum a probabili fide rerum ; quanto minus credendum est illis litteris, quas plenas fabulosis velut antiquitatibus proferre voluerint¹ contra auctoritatem notissimorum divinorumque librorum, quæ totum orbem sibi crediturum esse prædixit, et cui totus orbis, sicut ab ea prædictum est, credidit ; quæ vera se narrasse præterita, ex his quæ futura prænuntiavit, cum tanta veritate implerent, ostendit ?

CAPUT XI. — *De his qui hunc quidem mundum non sempiternum putant, sed aut innumerabiles, aut eundem unum certa conclusione sæculorum semper nasci et resolvi opinantur.*

Alii vero qui mundum istum non existimant sempiternum, sive non eum solum, sed innumerabiles opinantur, sive solum quidem esse, sed certis sæculorum intervallis innumerabiliter oriri et occidere (a) ; necesse est fateantur hominum genus prius sine hominibus gignentibus extitisse. Neque enim ut alluvionibus incendiisque terrarum, quas illi non putant toto prorsus orbe contingere, et ideo paucos homines ex quibus multitudo pristina reparatur, semper renascere contendunt, ita et hi possunt putare, quod aliqui hominum pereunte mundo relinquuntur in mundo² : sed sicut ipsum mundum ex materia sua renasci existimant, ita in illo ex elementis ejus genus humanum, ac deinde a parentibus progeniem pullulare mortaliū, sicut aliorum animalium.

CAPUT XII. — *Quid respondendum sit his, qui primam conditionem hominis tardam esse causantur.*

Quod autem respondimus, cum de mundi origine questio verteretur, eis qui nolunt credere non eum semper fuisse, sed esse cœpisse, sicut etiam Plato apertissime confitetur (*In Timæo*), quamvis a nonnullis contra quam loquitur, sensisse credatur : hoc etiam de prima hominis conditione responderim, propter eos qui similiter moventur, cur homo per innumerabilia atque infinita retro tempora creatus non sit, tamque sero sit conditus, ut minus quam sex millia sint annorum, ex quo esse cœpisse in sacris Litteris invenitur (b). Si enim brevitatis eos offendit temporis, quod tam pauci eis videntur anni ex quo institutus homo in nostris auctoritatibus legitur ; considerent nihil esse diuturnum, in quo est aliquid extremum, et omnia sæculorum spatia definita, si æternitati interminatæ³ comparentur, non exigua existi-

manda esse, sed nulla. Ac per hoc, si non quinque vel sex, verum etiam sexaginta millia, sive sexcenta, aut sexagies, aut sexcenties, aut sexcenties millies dicerentur annorum ; aut itidem per totidem toties multiplicaretur hæc summa, ubi jam nullum numeri nomen haberemus, ex quo Deus hominem fecit ; similiter quæri posset, cur ante non fecerit. Dei quippe ab hominis creatione cessatio retrorsus æterna sine initio tanta est, ut si ei conferatur quamlibet inagna et ineffabilis numerositas temporum, quæ tamen sine conclusa certi spatii terminetur, nec saltem tanta videri debeat, quanta si humoris brevissimam guttam universo mari, etiam quantum Oceanus circumfluit, comparemus : quoniam istorum duorum unum quidem perexiguū est, alterum incomparabiliter magnum, sed utrumque finitum ; illud vero temporis spatium, quod ab initio aliquo progreditur et aliquo termino coercetur, magnitudine quantacumque tendatur, comparatum illi quod initium non habet, nescio utrum pro minimo, an potius pro nullo deputandum est. Hinc enim⁴ si a fine vel brevissima singillatim momenta detrahantur, decrescente numero, licet tam ingenti, ut vocabulum non inveniatur retrorsum redeundo ; tanquam si hominis dies ab illo in quo nunc vivit, usque ad illum in quo natus est, detrahas : quandoque ad initium illa detractio perducentur. Si autem detrahantur retrorsus in spatio, quod a nullo cœpit exordium, non dico singillatim minuta momenta, vel horarum aut dierum aut mensium aut annorum etiam quantitates ; sed tam magna spatia, quanta illa summa comprehendit annorum, quæ jam dici a quibuslibet computatoribus non potest, quæ tamen momentorum minutatim detractioe consumitur ; et detrahantur hæc tanta spatia, non semel atque iterum sæpiusque, sed semper : quid sit, quid agitur, quando nunquam ad initium, quod omnino nullum est, pervenitur ? Quapropter, quod nos modo quærimus post quinque millia et quod excurrit⁵ annorum, possent et posteri etiam post annorum sexcenties millies eadem curiositate requirere, si in tantum hæc mortalitas hominum exoriendo et occumbendo, et imperita perseveraret infirmitas. Potuerunt et qui fuerunt ante nos, ipsis recentibus hominis creati temporibus, istam movere quæstionem. Ipse denique primus homo, vel postridie, vel eodem die posteaquam factus est, potuit inquirere, cur non ante sit factus. Et quodcumque⁶ antea factus esset, non vires tunc alias et alias nunc, vel etiam postea, ista de initio rerum temporalium controversia reperiret.

CAPUT XIII. — *De revolutione sæculorum, quibus certo fine conclusis, universa semper in eundem ordinem eandemque speciem reditura quidam philosophi crediderunt.*

1. Hanc autem se philosophi mundi hujus non

¹ Viud. Am. Ex. et plures manuscripti, *voluerunt*.

² Viud. Am. et Mss., *illu et li possunt putare, quod uliquid hominum pereunte mundo relinquatur in mundo*.

³ Colbertinus Ms., *si æternitatis interminio*.

(a) Vid. Lactant. lib. 2 luscit., cap. 9, et infra, lib. 18, cap. 41, n. 3.

(b) supra, lib. 11, cap. 3.

⁴ Sic Mss. At editi, *hinc enim*.

⁵ Editi, *amplius excurrit*. Abest, *amplius*, a manuscriptis.

Loz., *quantocumque*. Editi alii et Mss., *quodcumque*.

aliter putaverunt posse vel debere dissolvere, nisi ut circuitus temporum inducerent, quibus eadem semper fuisse renovata atque repetita in rerum natura, atque ita deinceps fore sine cessatione asseverarent volumina venientium prætereuntiumque sæculorum : sive in mundo permanente istius circuitus fierent, sive certis intervallis oriens et occidens mundus eadem semper quasi nova, quæ transacta et quæ ventura sunt, exhiberet. A quo ludibrio prorsus immortalem animam, etiam cum sapientiam perceperit, liberare non possunt, euntem sine cessatione ad falsam beatitudinem, et ad veram miseriam sine cessatione redeuntem. Quomodo enim vera beatitudo est, de cujus nunquam æternitate confiditur, dum anima venturam miseriam aut imperitissime in veritate nescit, aut infelicissime in beatitudine pertimescit ? Aut si ad miseriam nunquam ulterius reditura, ex his ad beatitudinem pergat ; fit ergo aliquid novi in tempore, quod finem non habet temporis. Cur non ergo et mundus ? cur non et homo factus in mundo ? ut illi nescio qui falsi circuitus a falsis sapientibus fallacibusque comperti, in doctrina sana tramite recti itineris evitentur.

2. Nam quidam et illud quod legitur in libro Salomonis, qui vocatur Ecclesiastes, *Quid est quod fuit ? Ipsum quod erit. Et quid est quod factum est ? Ipsum quod fiet : et non est omne recens sub sole. Quis loquatur, et dicat*¹, *Ecce hoc novum est ? Jam fuit in sæculis quæ fuerunt ante nos (Eccle. 1, 9, 10)* ; propter hos circuitus in eadem redeuntes et in eadem cuncta revocantes, dictum intelligi volunt (a) : quod ille aut de his rebus dixit, de quibus superius loquebatur, hoc est de generationibus aliis euntibus, aliis venientibus, de solis anfractibus, de torrentium lapsibus ; aut certe de omnium rerum generibus, quæ oriuntur, atque occidunt. Fuerunt enim homines ante nos, sunt et nobiscum, et erunt post nos ; ita quæque animantia, vel arbuta. Monstra quoque ipsa, quæ inusitata nascuntur, quamvis inter se diversa sint, et quædam eorum semel facta narrentur, tamen secundum id quod generaliter miracula et monstra sunt, utique et fuerunt, et erunt ; nec recens et novum est, ut monstrum sub sole nascatur. Quamvis hæc verba quidam sic intellexerint, tanquam in prædestinatione Dei jam facta fuisse omnia, sapiens ille voluisset intelligi, et ideo nihil recens esse sub sole. Absit autem a recta fide, ut his Salomonis verbis illos circuitus significatos esse credamus, quibus illi putant sic eadem temporum temporaliumque rerum volumina repeti, ut, verbi gratia, sicut isto sæculo Plato philosophus in urbe Atheniensi, et in ea schola quæ Academia² dicta est, discipulos docuit, ita per innumerabilia retro sæcula, multum prolixis quidem intervallis, sed tamen certis, et idem Plato et eadem civitas et eadem schola eundemque discipuli repetiti, et per

¹ Editi. *nec quisquam loquitur et dicit*. Corrigitur ad manuscriptorum.

² Vind. Ann. et plerique Mss., *Academia*.

(a) Ut Origenes, lib. 3, *peri Archon*, cap. 3, et *ibid.*, lib. 2, cap. 3.

innumerabilia deinde sæcula repetendi sint : absit, inquam, ut nos ista credamus. Semel enim Christus mortuus est pro peccatis nostris ; resurgens autem a mortuis jam non moritur, et mors ei ultra non dominabitur (Rom. vi, 9) : et nos post resurrectionem semper cum Domino erimus (I Thess. iv, 16), cui modo dicimus, quod sacer admonet Psalmus, *Tu, Domine, servabis nos, et custodies nos a generatione hac in æternum*. Satis autem istis existimo convenire quod sequitur, *In circuitu impii ambulant* (Psal. xi, 8, 9) : non quia per circulos quos opinantur, eorum vita est recursura ; sed quia modo talis est erroris eorum via, id est, falsa doctrina.

CAPUT XIV. — *De temporali conditione generis humani, quam Deus nec novo consilio constituerit, nec mutabili voluntate.*

Quid autem mirum est, si in his circuitibus errantes, nec aditum, nec exitum inveniant ? Quia genus humanum atque ista nostra mortalitas, nec quo initio cæpta sit sciunt, nec quo fine claudatur ; quandoquidem altitudinem Dei penetrare non possunt : quia cum ipse sit æternus et sine initio, ab aliquo tamen initio exorsus est tempora, et hominem quem nunquam ante fecerat, fecit in tempore, non tamen novo et repentino, sed immutabili æternoque consilio. Quis hanc valeat altitudinem investigabilem vestigare¹, et inscrutabilem perscrutari, secundam quam Deus hominem temporalem, ante quem nemo unquam hominum fuit, non mutabili voluntate in tempore condidit, et genus humanum ex uno multiplicavit ? Quandoquidem Psalmus ipse cum præmisisset atque dixisset, *Tu, Domine, servabis nos, et custodies nos a generatione hac in æternum* ; ac deinde repercutisset eos, in quorum stulta impiaque doctrina nulla liberationis et beatitudinis animæ servatur æternitas, continuo subjiciens, *In circuitu impii ambulant* : tanquam ei diceretur, *Quid ergo tu credis, sentis, intelligis ? numquidnam existimandum est subito Deo placuisse hominem facere, quem nunquam antea infinita retro æternitate fecisset, cui nihil novi accedere potest, in quo mutabile aliquid non est ? continuo respondit*² *ad ipsum Deum loquens, Secundum altitudinem tuam multiplicasti filios hominum (Ibid.)*. Sentiant, inquit, homines quod putant, et quod eis placet opinentur et disputent : *Secundum altitudinem tuam, quam nullus potest nosse hominum, multiplicasti filios hominum*. Valde quippe altum est³, et semper Deum fuisse⁴, et hominem quem nunquam fecerat, ex aliquo tempore primum facere voluisse, nec consilium voluntatemque mutasse.

¹ Editi, *investigare*. Concinnius Mss., *vestigare* : quo præcedens dictio, *investigabilem* ; posita intelligatur pro, *non vestigabilem*.

² Locus veterum codicum ope liberatus a glossemate, quod in ante editis passus erat hunc in modum : *Et ne nos hæc audientes aliqua forte turbaret ambiguitas, continuo respondit, etc.*

³ Lov. et pauciores Mss., *altum est scrutari*.

⁴ Mss., *et semper fuisse ; omisso, Deum*.

CAPUT XV. — *An ut Deus semper, etiam dominus fuisse semper intelligatur, credendum sit creaturam quoque nunquam defuisse cui dominaretur : et quomodo dicatur semper creatum, quod dici non potest coæternum.*

1. Ego quidem sicut Dominum Deum aliquando dominum non fuisse dicere non audeo (a), ita hominem nunquam antea fuisse, et ex quodam tempore primum hominem creatum esse dubitare non debeo. Sed cum cogito ejus rei dominus semper fuerit, si semper creatura non fuit, affirmare aliquid pertinesco : quia et me ipsum intueor, et scriptum esse recolo, *Quis hominum potest scire consilium Dei? aut quis poterit cogitare quid velit Dominus? Cogitationes enim mortalium timidæ, et incertæ adinventiones nostræ. Corruptibile enim corpus aggravat animam, et deprimit terrena inhabitatio sensum multa cogitantem* (Sap. 11, 13-15). Ex his igitur quæ in hac terrena habitatione multa cogito¹ (ideo utique multa, quia unum quod ex illis vel præter illa, quod forte non cogito, verum est, invenire non possum), si dixerò, semper fuisse creaturam, cujus dominus esset, qui semper est dominus, nec dominus unquam non fuit; sed nunc illam, vanc aliam, per alia atque alia temporum spatia, ne aliquam Creatori coæternam esse dicamus, quod fides ratioque sana condemnat : cavendum est, ne sit absurdum et a luce veritatis alienum, mortalem quidem per vices temporum semper fuisse creaturam decedentem aliam, aliam succedentem; immortalẽ vero non esse cœpisse, nisi cum ad nostrum sæculum ventum est, quando et Angeli creati sunt, si eos recte lux illa primum facta significat, aut illud potius cœlum de quo dictum est, *In principio fecit Deus cœlum et terram* (Gen. 1, 1) : cum tamen non fuerint, antequam fierent, ne, immortales si semper fuisse dicantur, Deo coæterni esse credantur. Si autem dixerò, non in tempore creatos Angelos, sed ante omnia tempora et ipsos fuisse, quorum Deus dominus esset, quæ nunquam nisi dominus fuit : quæretur a me etiam, si ante omnia tempora facti sunt, utrum semper potuerint esse qui facti sunt. Hic respondendum forte videatur, Quomodo non semper, cum id quod est omni tempore, non inconvenienter semper esse dicatur? Usque adeo autem isti omni tempore fuerunt, ut etiam ante omnia tempora facti sint : si tamen a cœlo cœpta sunt tempora, et illi jam erant ante cœlum. At si tempus non a cœlo², verum et ante cœlum fuit; non quidem in horis, et diebus, et mensibus, et annis (nam istæ dimensiones temporalium spatiorum, quæ usitate ac proprie dicuntur tempora, manifestum est quod a motu siderum cœperint; unde et Deus, cum hæc institueret, dixit, *Et sint in signa, et in tempora, et in dies, et in annos* (Ibid., 14) : sed in aliquo mutabili motu, cujus aliud prius, aliud posterius præ-

¹ Hic Vind. Am. et Er. addunt, *deprimant me*. Additamento caret editio Lov., sed prava nihilominus subsequenterium verborum interpunctione sensum corrumpit.

² Aliquot Mss., *non cum cœlo*.

(a) Vid. lib. 3 de Trinit., n. 17.

terierit¹, eo quod simul esse non possunt : si ergo ante cœlum in angelicis motibus tale aliquid fuit (a), et ideo tempus jam fuit, atque Angeli ex quo facti sunt, temporaliter movebantur; etiam sic omni tempore fuerunt, quandoquidem cum illis facta sunt tempora. Quis autem dicat, Non semper fuit, quod omni tempore fuit?

2. Sed si hoc respondero, dicetur mihi, Quomodo ergo non sunt coæterni Creatori, si semper ille, semper illi fuerunt? quomodo etiam creati dicendi sunt, si semper fuisse intelliguntur? Ad hoc quid responderitur? An dicendum est, et semper eos fuisse, quoniam omni tempore fuerunt, qui cum tempore facti sunt, aut cum quibus tempora facta sunt, et tamen creatos? Neque enim et ipsa tempora creata esse negabimus, quamvis omni tempore tempus fuisse nemo ambigat. Nam si non omni tempore fuit tempus, erat ergo tempus, quando nullum erat tempus? Quis hoc stultissimus dixerit? Possumus enim recte dicere : Erat tempus, quando non erat Roma; erat tempus, quando non erat Jerusalem; erat tempus, quando non erat Abraham; erat tempus, quando non erat homo; et si quid hujusmodi : postremo si non cum initio temporis, sed post aliquod tempus factus est mundus; possumus dicere, Erat tempus, quando non erat mundus. At vero, Erat tempus, quando nullum erat tempus, tam inconvenienter dicimus, ac si quisquam dicat, Erat homo, quando nullus erat homo; aut, Erat iste mundus, quando iste non erat mundus. Si enim de alio atque alio intelligatur, potest dici aliquo modo, hoc est; Erat alius homo, quando non erat iste homo. Sic ergo, Erat aliud tempus, quando non erat hoc tempus, recte possumus dicere : at vero, Erat tempus, quando nullum erat tempus, quis vel insipientissimus dixerit? Sicut ergo dicimus creatum tempus, cum ideo semper fuisse dicatur, quia omni tempore tempus fuit : ita non est consequens, ut si semper fuerunt Angeli, ideo non sint creati, ut propterea semper fuisse dicantur, quia omni tempore fuerunt; et propterea omni tempore fuerunt, quia nullo modo sine his ipsa tempora esse potuerunt. Ubi enim nulla creatura est, cujus mutabilibus motibus tempora peragantur, tempora omnino esse non possunt. Ac per hoc et si semper fuerunt, creati sunt; nec, si semper fuerunt, ideo Creatori coæterni sunt. Ille enim semper fuit æternitate immutabili : isti autem facti sunt; sed ideo semper fuisse dicuntur, quia omni tempore fuerunt, sine quibus tempora nullo modo esse potuerunt : tempus autem quoniam mutabilitate transcurrit, æternitati immutabili non potest esse coæternum. Ac per hoc etiamsi immortalitas Angelorum non transit in tempore, nec præterita est quasi jam non sit, nec futura quasi nondum sit, tamen eorum motus quibus tempora peraguntur, ex futuro in præteritum transeunt : et ideo Creatori, in cujus motu dicendum non est vel fuisse quod jam non sit,

¹ Sic Mss. At edditi, *aliud antèrùs præterierit, aliud posterius successerit*.

(a) Conf. dicta ad lib. 8 de Gen. ad Litt., n. 39.

vel futurum esse quod nondum sit, coæterni esse non possunt.

5. Quapropter, si Deus semper dominus fuit, semper habuit creaturam suo dominatui servientem; verumtamen non de ipso genitam, sed ab ipso de nihilo factam; nec ei coæternam: erat quippe ante illam, quamvis nullo tempore sine illa; non eam spatio transcurrente¹, sed manente perpetuitate præcedens (a). Sed hoc si respondero eis qui requirunt quomodo semper creator, semper dominus fuit, si creatura serviens non semper fuit; aut quomodo creata est, et non potius creatori coæterna est, si semper fuit: vereor ne facilius judicer affirmare quod nescio, quam docere quod scio. Redeo igitur ad id quod Creator noster scire nos voluit: illa vero quæ vel sapientioribus in hac vita scire permisit, vel omnino perfectis in alia vita scienda servavit, ultra vires meas esse confiteor. Sed ideo putavi sine affirmatione tractanda, ut qui hæc legunt, videant a quibus quæstionum periculis debeant temperare, nec ad omnia se idoneos arbitrentur; potiusque intelligant quam sit Apostolo obtemperandum præcipienti salubriter, ubi ait: *Dico autem per gratiam quæ² data est mihi, omnibus qui sunt in vobis, non plus sapere quam oportet sapere; sed sapere ad temperantiam, sicut unicuique Deus partitus est mensuram fidei (Rom. xii, 3)*. Si enim pro viribus suis alatur infans, fiet ut crescendo plus capiat: si autem vires suæ capacitatis excedat, deficiet antequam crescat.

CAPUT XVI. — *Quomodo intelligenda sit promissio homini a Deo vita æterna ante tempora æterna.*

Quæ sæcula præterierint antequam genus institueretur humanum, me fateor ignorare: non tamen dubito nihil omnino creaturæ Creatori esse coæternum. Dicit etiam Apostolus tempora æterna, nec ea futura, sed, quod magis est mirandum, præterita. Sic enim ait: *In spem vitæ æternæ, quam promissit non mendax Deus ante tempora æterna (b); manifestavit autem temporibus suis Verbum suum (Tit. i, 2 et 3)*. Ecce dixit retro quod fuerint tempora æterna, quæ tamen non fuerint Deo coæterna. Si quidem ille ante tempora æterna non solum erat, verum etiam promissit vitam

¹ Sola editio Lov., *transcurrens*. Et paulo post, *quomodo creator semper fuit dominus*.

² Vind. Am. Er. et Mss., *per gratiam Dei quæ*.

(a) Vid. Confess. lib. 11, cap. 13, n. 16, et cap. 16, ad initium.

(b) Græce est, *pro tîn chronôn aiônôn*: quod vulgata editione vertitur, *ante tempora sæcularia*: ea vero quam interpretatur Hieronymus, *ante tempora æterna*: quia scilicet græcum, *aiôn*, *sæculum* et *æternum* latine reddi potest, uti observat Augustinus lib. contra Priscillianistas, n. 5. Unde Rom. xvi, 23, pro græco, *chronois aiôniois*, in ipsa vulgata est, *temporibus æternis*. Hieronymus locum Epistolæ ad Titum enarrans, « Ante hæc igitur mundi tempora, » inquit, « æternitatem quamdam sæculorum fuisse credendum est... sex millia necdum nostri orbis implentur anni: « quas prius æternitates? quanta tempora? quantas sæculorum origines fuisse arbitrandum est? Ante hæc itaque « omnia tempora... promissit Deus Pater sapientiæ suæ Verbum suum, et ipsam sapientiam suam, et vitam eorum « qui credituri erant mundo esse venturam. » Brevior et facilius est Augustini interpretatio in libro contra Priscillianistas, n. 6, Apostolum scilicet æterna dixisse tempora, *quæ ante se non habent ullum tempus*. Confer lib. 1 de Gen. contra Manich., n. 4, et lib. 83 Quæst., qu. 73.

æternam, quam manifestavit temporibus suis, id est congruis, quid aliud quam Verbum suum? Hoc est enim vita æterna. Quomodo autem promissit, cum hominibus utique promiserit, qui nondum erant ante tempora æterna; nisi quia in ipsius æternitate, atque in ipso ejus Verbo eidem coæterno, jam prædestinatione fixum erat, quod suo tempore futurum erat?

CAPUT XVII. — *Quid de incommutabili consilio aut voluntate Dei fides sana defendat, contra ratiocinationes eorum qui opera Dei ex æternitate repetita per eosdem semper volunt sæculorum redire circuitus.*

1. Illud quoque non dubito, antequam primus homo creatus esset, nunquam quemquam hominem fuisse: nec eundem ipsum, nescio quibus circuitibus, nescio quoties revolutum, nec alium aliquem natura similem. Neque ab hac fide me philosophorum argumenta deterrent, quorum acutissimum illud putatur, quod dicunt, nulla infinita ulla scientia posse comprehendi: ac per hoc Deus inquit, rerum quas facit¹, omnium finitarum omnes finitas apud se rationes habet. Bonitas autem ejus nunquam vacua fuisse credenda est, ne sit temporalis ejus operatio, cujus retro fuerit æterna cessatio, quasi pœnituerit eum prioris sine initio vacationis, ac propterea sit operis aggressus initium. Et ideo necesse est, inquit, eadem semper repeti, eademque semper repetenda transcurrere: vel manente mundo mutabiliter, qui licet nunquam non fuerit et sine initio temporis tamen factus est; vel ejus quoque ortu et occasu semper illis circuitibus repetito, semperque repetendo: ne vide licet, si aliquando primum Dei opera cœpta dicantur, priorem suam sine initio vacationem tanquam inertem ac desidiosam, et ideo sibi displicentem damnasse quodammodo, atque ob hoc mutasse credatur. Si autem semper quidem temporalia, sed alia atque alia perhibetur operatus, ac sic aliquando etiam ad hominem faciendum, quem nunquam antea fecerat, pervenisse: non scientia, qua putant non posse quæcumque infinita comprehendi, sed quasi ad horam, sicut veniebat in mentem, fortuita quadam inconstantia videatur fecisse quæ fecit. Porro si illi circuitus admittantur, inquit, quibus vel manente mundo, vel ipso quoque revolutibus ortus suos et occasus eisdem circuitibus inseverente, eadem temporalia repetuntur, nec ignavum otium, præsertim tam longæ sine initio diuturnitatis, Deo tribuitur, nec improvida temeritas operum suorum. Quoniam si non eadem repetantur, non possunt infinita diversitate variata ulla ejus scientia vel præscientia comprehendi.

2. Has argumentationes quibus impii nostram simplicem pietatem, ut cum illis in circuitu ambulemus, de via recta conantur avertere, si ratio refutare non posset, fides irridere deberet. Huc accedit, quod in adiutorio Domini Dei nostri hos volubiles circulos, quos opinio confingit, ratio manifesta confringit. Hinc enim maxime isti errant, ut in circuita falso ambulare, quam

¹ Editi, *fecit*. At Mss., *facit*.

vero et recto itinere malint, quod mentem divinam omnino immutabilem cujuscumque infinitatis capacem, et innumera omnia sine cogitationis alternatione numerantem, de sua humana, mutabili, angustaque metuntur. Et sit illis quod ait Apostolus: *comparantes enim semetipsos sibi semetipsos (a), non intelligunt* (II Cor. x, 12). Nam quia illis quidquid novi faciendum venit in mentem, novo consilio faciunt (mutabiles quippe mentes gerunt); profecto non Deum, quem cogitare non possunt, sed semetipsos pro illo cogitantes, non illum sed se ipsos, nec illi, sed sibi comparant. Nobis autem fas non est credere, aliter Deum affici cum vacat, aliter cum operatur: quia nec affici dicendus est, tanquam in ejus natura fiat aliquid, quod non ante fuerit. Patitur quippe qui afficitur, et mutabile est omne quod aliquid patitur. Non itaque in ejus vacatione cogitetur ignavia, desidia, inertia; sicut nec in ejus opere labor, conatus, industria. Novit quiescens agere, et agens quiescere. Potest ad opus novum, non novum, sed sempiternum adhibere consilium; nec poenitendo quia prius cessa verat, coepit facere quod non fecerat. Sed et si prius cessavit, et posterius operatus est (quod nescio quemadmodum ab homine possit intelligi), hoc procul dubio quod dicitur, prius et posterius, in rebus prius non existentibus et posterius existentibus fuit. In illo autem non alteram praecedentem altera subsequens mutavit aut abstulit voluntatem, sed una eademque sempiterna et immutabili voluntate res quas condidit, et ut prius non essent egit, quamdiu non fuerunt, et ut posterius essent, quando esse coeperunt: hinc eis qui talia videre possunt mirabiliter fortassis ostendens, quam non eis indiguerit, sed eas gratuita bonitate condiderit, cum sine illis ex aeternitate initio carente in non minore beatitate permansit.

CAPUT XVIII. — *Contra eos qui dicunt, ea quae infinita sunt nec Dei posse scientia comprehendere.*

Illud autem aliud quod dicunt, nec Dei scientia quae infinita sunt posse comprehendere; restat eis ut dicere audeant, atque huic se voragini profundae impietatis immergant, quod non omnes numeros Deus noverit. Eos quippe infinitos esse, certissimum est: quoniam in quocumque numero finem faciendum putaveris, idem ipse, non dico uno addito augeri, sed quamlibet sit magnus et quamlibet ingentem multitudinem continens in ipsa ratione atque scientia numerorum, non solum duplicari, verum etiam multiplicari potest. Ita vero suis quisque numerus proprietatis terminatur, ut nullus eorum par esse cuicumque alteri possit. Ergo et dispaes inter se atque diversi sunt, et singuli quique finiti sunt, et omnes infiniti sunt. Itane numeros propter infinitatem nescit omnes Deus? et usque ad quamdam summam nume-

rorum scientia Dei pervenit, caeteros ignorat? Quis hoc etiam dementissimus dixerit? Nec audebunt istu contemnere numeros, et eos dicere ad Dei scientiam non pertinere, apud quos Plato Deum magna auctoritate commendat in unum numeris fabricantem (*In Timæo*): et apud nos Deo dictum legitur, *Omnia in mensura, et numero, et pondere disposuisti* (*Sap. xi, 21*)? De quo dicit et propheta, *Qui profert numerosa saeculum* (*Isai xl, 26, sec. LXX*). Et Salvator in Evangelio, *Capilli, inquit, vestri omnes numerati sunt* (*Matth. x, 30*). Absit itaque ut dubitemus, quod ei notus sit omnis numerus, *cujus intelligentiae, sicut in Psalmo canitur, non est numerus* (*Psal. cxlvi, 5*). Infinitas itaque numeri, quamvis infinitorum numerorum nullus sit numerus, non est tamen incomprehensibilis ei cujus intelligentiae non est numerus. Quapropter si, quidquid scientia comprehenditur, scientis comprehensione finitur; profecto et omnis infinitas quodam ineffabili modo Deo finita est, quia scientiae ipsius incomprehensibilis non est. Quare si infinitas numerorum scientiae Dei, qua comprehenditur, esse non potest infinita; qui tandem nos sumus homunculi, qui ejus scientiae limites figere praesumamus, dicentes quod, nisi eisdem circuitibus temporum eadem temporalia repetantur, non potest Deus cuncta quae fecit vel praescire ut faciat, vel scire cum fecerit? cujus sapientia simpliciter multiplex et uniformiter multiformis, tam incomprehensibili comprehensione omnia incomprehensibilia comprehendit, ut quaecumque nova et dissimilia consequentia praecedentibus si semper facere vellet, inordinata et improvisa habere non posset; nec ea praevideret ex proximo tempore, sed aeterna praescientia contineret.

CAPUT XIX. — *De saeculis saeculorum.*

Quod utrum ita faciat, et continuata sibi connectione copulentur quae appellantur saecula saeculorum, alia tamen atque alia, ordinata dissimilitudine procurrentia, eis duntaxat qui ex miseria liberantur in sua beata immortalitate sine fine manentibus; an ita dicantur saecula saeculorum, ut intelligantur saecula in sapientia Dei inconcussa stabilitate manentia, istorum quae cum tempore transeunt tanquam effluentia saeculorum, definire non audeo (a). Fortassis enim possit dici saeculum, quae sunt saecula; ut nihil aliud perhibeatur saeculum saeculi, quam saecula saeculorum: sicut nihil aliud dicitur caelum caeli, quam caeli caelorum. Nam caelum Deus vocavit firmamentum super quod sunt aquae (*Gen. i, 8*), et tamen Psalmus, *Et aquae, inquit, quae super caelos sunt, laudent nomen Domini* (*Psal. cxlviii, 4*). Quid ergo istorum duorum sit, an praeter haec duo aliquid aliud de saeculis saeculorum possit intelligi, profundissima

¹ Sic Er. et Mss. At Vind. Am. et Lov., *nescit omnipotens Deus.*

(a) Aliter Vulgata; sed Augustinus hic et in Psal. 51, et contra Faustum, lib. 22, cap. 47, sequitur graecam lectionem, *cui suggeruntur eaulous eaulois, ou suntousin*. Editi Am. Er. et Lov. hoc ut, *semetipsos non intelligunt*. At Vind. et Mss. consequentia: *græca, voce, semetipsos, carent.*

¹ Editi: *Qui profert numero saeculum*. At Mss., *Qui profert numero saeculum*. Locus est Isaiæ xl, 26, secundum LXX, *o epheron cal'arithmon ton kosmon ainoi.*

² Sola editio Lov., *consequantur*.

³ Lov. *Quod ut ita faciat*. Editi vero alii et Mss.: *Quod utrum ita faciat*, scilicet quemadmodum in superioris capituli fine dictum est.

(a) Vide Micron. in Epist. ad Galatas, cap. 1, v. 5.

quæstio est : neque hoc quod nunc agimus impedit , si indiscussa interim differatur ; sive aliquid in ea definire valeamus , sive nos faciat cautos diligenter ipsa tractatio , ne in tanta obscuritate rerum affirmare aliquid temere audeamus . Nunc enim contra opinionem disputamus , qua illi circuitus asseruntur , quibus semper eadem per intervalla temporum necesse esse repeti existimantur . Quælibet autem illarum sententiarum de sæculis sæculorum vera sit , ad hos circuitus nihil pertinet : quoniam sive sæcula sæculorum sint , non eadem repetita , sed alterum ex altero connexionem ordinatissima procurrentia , liberatorum beatitudine sine ullo recursum miseriarum certissima permanente , sive sæcula sæculorum æterna sint temporalium tanquam dominantia subditorum , circuitus illi eadem revolventes locum non habent , quos maxime refellit æterna vita sanctorum (*Matth.* xxv , 46).

CAPUT XX. — *De impietate eorum qui asserunt animas summæ veræque beatitudinis participes , iterum atque iterum per circuitus temporum ad eandem miserias laboresque redituras.*

1. Quorum enim aures piorum ferant , post emensam tot tantisque calamitatibus vitam (si tamen ista vita dicenda est , quæ potius mors est , ita gravis , ut mors quæ ab hac liberat , mortis hujus amore timeatur (a) , post tam magna mala tamque multa et horrenda , tandem aliquando per veram religionem atque sapientiam expiata atque finita , ita pervenire ad conspectum Dei , atque ita fieri beatum contemplatione incorporeæ lucis per participationem immutabilis immortalitatis ejus , cujus adipiscendæ amore flagramus , ut eam quandoque necesse sit deserere , et eos qui deserunt , ab illa æternitate , veritate , felicitate dejectos , tartaræ mortalitati¹ , turpi stultitiæ , miseris execrabilibus implicari , ubi Deus amittitur , ubi odio veritas habeatur , ubi per immundas nequitias beatitudo quæritur ; et hoc itidem atque itidem sine ullo sine priorum et posteriorum certis intervallis et dimensionibus sæculorum factum et futurum ; et hoc propterea , ut possint Deo , circuitibus definitis euntibus semper atque redeuntibus per nostras falsas beatitudines et veras miserias , alternatim quidem , sed revolutione incessabili sempiternas , nota esse opera sua ; quoniam neque a faciendo quiescere , neque sciendo possit ea quæ infinita sunt , indagare ? quis hæc audiat ? quis credat ? quis ferat ? Quæ si vera essent , non solum tacerentur prudentius , verum etiam (ut quomodo valeo dicam quod volo) doctius nescirentur . Nam si hæc illic in memoria non habebimus , et ideo beati erimus , cur hic per eorum scientiam gravatur amplius nostra miseria ? Si autem ibi ea necessario scituri sumus , hic saltem nesciamus , ut hic felicior sit expectatio , quam illic adeptio summæ boni : quando hic æterna vita consequenda expectatur ; ibi autem beata , sed non æterna , quandoque amittenda cognoscitur .

¹ In sola editione Lov., *immortalitati*.

(a) Conf. Ciceronis *Somnium Scipionis*, cap. 3.

2. Si autem dicant , neminem posse ad illam beatitudinem pervenire , nisi hos circuitus , ubi beatitudo et miseria vicissim alternant , in hujus vitæ eruditione cognoverit ; quomodo ergo fatentur , quanto plus quisque amaverit Deum , tanto eum facilius ad beatitudinem perventurum , qui ea docent quibus amor ipse torpescat ? Nam quis non remissius et tepidius amet eum , quem se cogitat necessario deserturum , et contra ejus veritatem sapientiamque sensurum , et hoc cum ad ejus plenam pro sua capacitate notitiam beatitudinis perfectione pervenerit ; quando nec hominem amicum possit quisque amare fideliter , cui se futurum noverit inimicum ? Sed absit ut vera sint , quæ nobis minantur veram miseriam nunquam finientiam , sed interpositionibus falsæ beatitudinis sæpe ac sine fine rumpendam . Quid enim illa beatitudo falsius atque fallacius , ubi nos futuros miseros , aut in tanta veritatis luce nesciamus , aut in summa felicitatis arcu timeamus ? Si enim venturam calamitatem ignoraturi sumus , peritior est hic nostra miseria , ubi venturam beatitudinem novimus . Si autem nos illie clades imminens non latebit , beatus tempora transigit anima misera quibus transactis ad beatitudinem sublevetur , quam beata quibus transactis in miseriam revolvatur . Atque ita spes nostræ infelicitatis est felix et felicitatis infelix . Unde fit , ut quia hic mala presentia patimur , ibi metuimus imminencia , verius semper miseri quam beati aliquando esse possimus .

3. Sed quoniam hæc falsa sunt clamante pietate , convincente veritate (illa enim nobis veraciter promittitur vera felicitas , cujus erit semper retinenda , et nulla infelicitate rumpenda certa securitas) ; viam rectam sequentes , quæ nobis est Christus , eo duce ac salvatore a vano et inepto impiorum circuitu iter fidei mentemque avertamus . Si enim de istis circuitibus et sine cessatione alternantibus itionibus et reditionibus animarum Porphyrius Platonius suorum opinionem sequi noluit , sive ipsius rei vanitate permotus , sive jam tempora christiana reveritus ; et quod in libro decimo commemoravi , (*cap.* 30) , dicere maluit , animam propter cognoscenda mala traditam mundo , ut ab eis liberata atque purgata , cum ad Patrem redierit , nihil ulterius tale patiatur : quanto magis nos istam inimicam christianæ fidei falsitatem detestari ac devitare debemus ? His autem circuitibus evacuatis atque frustratis , nulla necessitas nos compellit , ideo putare non habere initium temporis ex quo esse coeperit genus humanum , quia per nescio quos circuitus nihil sit in rebus novi , quod non et antea certis intervallis temporum fuerit , et postea sit futurum . Si enim liberatur anima non reditura ad miserias , sicut nunquam antea liberata est , fit in illa aliquid quod antea nunquam factum est² , et hoc quidem valde magnum , id est , quæ nunquam desinat æterna felicitas . Si autem in natura immortalis sit tanta novitas³ , nullo repetita , nullo repetenda circuitu ,

¹ Mss., *quod*.

² Nonnulli Mss., *fit in illa aliquid quod ei nunquam factum est*.

³ Sic Vind. Am. et Mss. At Lov., *sit tanta novitas futura*.

cōr in rebus mortalibus fieri non posse contenditur? Si dicunt non fieri in anima beatitudinis novitatem, quoniam ad eam revertitur in qua semper fuit, ipsa certe liberatio nova sit, cum de miseria liberatur in qua nunquam fuit, et ipsa miseriæ novitas in ea facta est quæ nunquam fuit. Hæc autem novitas si non in rerum, quæ divina providentiâ gubernantur, ordinem¹ venit, sed casu potius evenit, ubi sunt illi determinati dimensique circuitus, in quibus nulla nova sunt, sed repetantur eadem quæ fuerunt? Si autem et hæc novitas ab ordinatione providentiæ² non excluditur, sive data sit anima, sive lapsa sit³, possunt fieri nova, quæ neque antea facta sint, nec tamen a rerum ordine aliena sint. Et si potuit anima facere per imprudentiam sibi novam miseriam, quæ non esset improvisa divini providentiæ, ut hanc quoque in rerum ordine includeret, et ab hac eam non improvide liberaret; qua tandem temeritate humanæ vanitatis audemus negare divinitatem facere posse res, non sibi, sed mundo novas, quas neque antea fecerit, nec unquam habuerit improvisas? Si autem dicunt liberatas quidem animas ad miseriam non reversuras, sed cum hoc sit, in rebus nihil novi fieri, quoniam semper aliæ atque aliæ liberatæ sunt, et liberantur, et liberabuntur: hoc certe concedant, si ita est, novas animas fieri, quibus sit et nova miseria et nova liberatio. Nam si antiquas eas dicunt esse, et retrorsum sempiternas, ex quibus quotidie novi fiant homines, de quorum corporibus, si sapienter vixerint, ita liberentur, ut nunquam ad miserias revolvantur, consequenter dicturi sunt infinitas. Quantuslibet namque finitus numerus fuisset animarum, infinitis retro sæculis sufficere non valeret, ut ex illo semper fierent homines, quorum essent animæ ab ista semper mortalitate liberandæ, nunquam ad eam deinceps redituræ. Nec ullo modo explicabunt, quomodo in rebus, quas, ut Deo notæ esse possint, finitas volunt⁴, infinitus sit numerus animarum.

4. Quapropter quoniam circuitus illi jam explosi sunt, quibus ad easdem miserias necessario putabatur anima reditura; quid restat convenientius pietati, quam credere non esse impossibile Deo, et ea quæ nunquam fecerit nova facere, et ineffabili præscientiâ voluntatem mutabilem non habere? Porro autem utrum animarum liberatarum nec ulterius ad miserias rediturarum numerus possit semper augeri, ipsi viderint, qui de rerum infinitate cohibenda tam subtiliter disputant: nos vero ratiocinationem nostram ex utroque latere terminamus. Si enim potest, quid causæ est ut negetur creati potuisse quod nunquam

antea creatum esset, si liberatarum animarum numerus, qui nunquam antea fuit, non solum factus est semel, sed nunquam fieri desinet? Si autem oportet ut certus sit liberatarum aliquis numerus animarum, quæ ad miseriam nunquam redeant, neque iste numerus ulterius augeatur; etiam ipse sine dubio quicumque crit, ante ullque nunquam fuit: qui profecto crescere, et ad suæ quantitatis terminum pervenire sine aliquo non possit initio; quod initium eo modo antea nunquam fuit. Hoc ergo ut esset, creatus est homo, ante quem nullus fuit.

CAPUT XXI. — *De conditione unius primi hominis, atque in eo generis humani.*

Hæc igitur quæstione difficillima propter æternitatem Dei nova creantis sine novitate aliqua voluntatis, quantum potuimus, explicata, non est arduum videre multo fuisse melius quod factum est, ut ex uno homine quem primum condidit, multiplicaret genus humanum, quam si id inchoasset a pluribus. Nam cum animantes alias solitarias, et quodammodo solivagas, id est, quæ solitudinem magis appetant, sicuti sunt aquilæ, milvi, leones, lupi, et quæcumque ita sunt; alias congreges instituerit, quæ congregatæ atque in gregibus malint vivere, ut sunt columbæ, starni, cervi, damulæ (a), et cætera huiusmodi: utrumque tamen genus non ex singulis propagavit, sed plura simul jussit existere. Hominem vero, cujus naturam quodammodo mediam inter Angelos bestiasque condebat, ut, si Creatori suo tanquam vero Domino subditus præceptum¹ ejus pia obedientia custodiret, in consortium transiret angelicum, sine morte media (b) beatam immortalitatem absque ullo termino consecutus; si autem Dominum Deum suum libera voluntate superbe atque inobedienter usus offenderet, morti addictus bestialiter viveret, libidinis servus æternoque post mortem supplicio destinatus; unum ac singulum creavit, non utique solum sine humana societate deserendum, sed ut eo modo vehementius ei commendaretur ipsius societatis unitas vinculumque concordiæ, si non tantum inter se naturæ similitudine, verum etiam cognationis affectu homines necterentur; quando nec ipsam quidem feminam copulandam viro, sicut ipsum creare illi placuit, sed ex ipso, ut omne ex homine uno diffunderetur genus humanum.

CAPUT XXII. — *Quod præseierit Deus hominem, quem primum condidit, peccaturum; simulque præviderit quantum piorum populum ex ejus genere in angelicum consortium sua esset gratia translaturus.*

Nec ignorabat Deus hominem peccaturum, et morti jam obnoxium morituros propagaturum, eoque progressuros peccandi immanitate mortales, ut tutius atque pacatius inter se rationalis voluntatis expertes bestiæ sui generis viverent, quarum ex aquis et terris

¹ Sic Mss. Editi vero, *ordinae*.

² Editi, *ab ordinatione divini providentiæ*. Abest, *divinas*, a manuscriptis.

³ Vind. AIN. ER., *Sive elata sit anima, sive lapsa sit. OV., sive data sit anima, sive a se sit*. Melius autem Mss., *sive lata sit anima, sive lapsa sit*. Propter duas nimirum opiniones, aliorum quidem docentium animas corporibus a Deo datas et missas, aliorum autem existantium eas suapte culpa delapsas esse de caelis in corpora ad luendas penas.

⁴ Sic Mss. At editi, *quas Deo notas esse, eo quod sint infinitæ, non volunt*.

¹ plures Mss., *præcepta*.

(a) Damulæ sic diminutive dixit, quia meticulousum est animal, nec ferum nec mansuetum. LUD. VIVES.

(b) Hic, juxta Coquæzum, tangitur Pelagianorum hæresis, de qua vid. lib. de Hæresibus, hæc. 88.

plurimum¹ pullulavit exordium, quam homines, quorum genus ex uno est ad commendandam concordiam propagatum. Neque enim unquam inter se leones, aut inter se dracones, qualia homines, bella gesserunt. Sed praevidebat etiam gratia sua populum piorum in adoptionem vocandum, remissisque peccatis justificatum Spiritu sancto sanctis Angelis in aeterna pace sociandum, novissima inimica morte destructa: cui populo esset hujus rei consideratio profutura, quod ex uno homine Deus ad commendandum hominibus, quam ei grata sit etiam in pluribus unitas, genus instituisset humanum.

CAPUT XXIII. — *De natura humanae animae creatae ad imaginem Dei.*

Fecit ergo Deus hominem ad imaginem suam. Talem quippe illi animam creavit, qua per rationem atque intelligentiam omnibus esset praestantior animalibus terrestribus et natatilibus et volatilibus, quae mentem hujusmodi non haberent. Et cum virum tereno formasset ex pulvere, eique animam qualem dixi, sive quam jam fecerat sufflando indidisset, sive potius sufflando fecisset (a), eumque flatum quem sufflando fecit, (nam quid est aliud sufflare, quam flatum facere?) animam hominis esse voluisset, etiam conjugem illi in adiutorium generandi ex ejus latere osse detracto fecit, ut Deus. Neque enim haec carnali consuetudine cogitanda sunt, ut videre solemus opifices ex materia quacumque terrena corporalibus membris, quod artis industria potuerint, fabricantes. Manus Dei potentia Dei est, qui etiam visibilia invisibiliter operatur. Sed haec fabulosa potius quam vera esse arbitrantur, qui virtutem ac sapientiam Dei, qua novit et potest etiam sine seminibus ipsa certe facere² semina, ex his usitatis et quotidianis metiuntur operibus; ea vero quae primitus instituta sunt, quoniam non noverunt, infideliter cogitant: quasi non haec ipsa quae noverunt de humanis conceptibus atque partibus, si inexpertis narrarentur, incredibilia viderentur; quamvis et ea ipsa plerique magis naturae corporalibus causis, quam operibus divinae mentis assignent.

CAPUT XXIV. — *An ullius vel minimae creaturae possint dici Angeli creatores.*

Sed cum his nullum nobis est in his libris negotium, qui divinam mentem facere vel curare ista non credunt. Illi autem qui Platoni suo credunt, non ab illo summo Deo qui fabricatus est mundum, sed ab aliis minoribus, quos quidem ipse creaverit, permissu sive jussu ejus animalia facta esse cuncta mortalia, in quibus homo praecipuum disque ipsis cognatum teneret locum (*In Timæo*); si superstitione careant, qua quaerunt unde juste videantur sacra, et sacrificia facere quasi conditoribus suis, facile carebunt etiam hujus opinionis errore. Neque enim fas est ullius naturae quamlibet minimae mortalisque

creatorem nisi Deum credere ac dicere, et antequam possit intelligi. Angeli autem, quos illi deos libentius appellant, etiamsi adhibent vel jussi vel permissi operationem suam rebus quae gignuntur in mundo, tamen³ tam non eos dicimus creatores animalium, quam nec agricolas frugum atque arborum.

CAPUT XXV. — *Omnem naturam et omnem speciem⁴ universae creaturae non nisi opere Dei formari.*

Cum enim alia sit species quae adhibetur extrinsecus cuiusque materiae corporali, sicut operantur homines figuli et fabri atque id genus opifices, qui etiam pingunt et effingunt formas similes corporibus animalium; alia vero quae intrinsecus efficientes causas habet de secreto et occulto naturae viventis atque intelligentis arbitrio, quae non solum naturales corporum species, verum etiam ipsas animantium animas, dum non sit, facit: supradicta illa species artificibus quibusque tribuatur; haec autem altera non nisi uni artifice creatori et conditori Deo, qui mundum ipsum et Angelos sine ullo mundo et sine ullis Angelis fecit. Qua enim vi divina, et, ut ita dicam, effectiva, quae fieri nescit, sed facere, accepit speciem, cum mundus fieret, rotunditas caeli et rotunditas solis; eadem vi divina et effectiva, quae fieri nescit, sed facere, accepit speciem rotunditas oculi et rotunditas pomi, et caeterae figurae naturales quas videmus in rebus quibusque nascentibus non extrinsecus adhiberi, sed intima Creatoris potentia, qui dixit, *Caelum et terram ego impleo* (*Jerem. xxiii, 24*): et cuius sapientia est quae attingit a fine usque ad finem fortiter, et disponit omnia suaviter (*Sap. viii, 1*). Proinde, facti primitus Angeli cujusmodi ministerium praebuerint Creatori caetera facienti, nescio; nec tribuere illis audeo quod forte non possunt, nec debeo derogare⁵ quod possunt. Creationem tamen conditionemque omnium naturarum, qua sit ut omnino naturae sint, eis quoque faventibus illi Deo tribuo, cui se etiam ipsi debere quod sunt cum gratiarum actione noverunt. Non solum igitur agricolos non dicimus fructuum quorumque creatores, cum legamus, *Neque qui plantat est aliquid, neque qui rigat; sed qui incrementum dat Deus* (*I Cor. iii, 7*): sed ne ipsam quidem terram, quamvis mater omnium fecunda videatur, quae germinibus erumpentia promovet, et fixa radicibus continet, cum itidem legamus, *Deus illi dat corpus quomodo voluerit, et unicuique seminam proprium corpus* (*Id. xv, 38*). Ita nec feminam sui puerperii creatricem appellare debemus, sed potius illum qui cuidam suo famulo dixit, *Priusquam te formarem in utero, novi te* (*Jerem. i, 5*). Et quamvis anima sic vel sic affecta praegnantis valeat aliquibus velut induere qualitibus fetum, sicut de virgine variis fecit Jacob, ut pecora colore varia gignerentur (*Gen. xxx, 37*); naturam tamen illam quae gignitur, tam ipsa non fecit, quam nec ipsa se fecit. Quaelibet igitur corporales vel

¹ Am. et plerique Mss., plurimum.

² Am., ipsa certa facere. Plurcs Mss., ipsa quoque facere.

(a) Conf. lib. 7 de Gen. ad lra. n. 33.

³ Particula, tamen, abest a Vind. Am. Er. et Mss.

⁴ Sic Mss. Editi autem ferebant: *Omnium naturam et omnium speciem.*

⁵ Plerique Mss., denegare.

seminales causæ gignendis rebus adhibeantur, sive operationibus Angelorum aut hominum, aut quorumque animalium, sive marium feminarumque mixtionibus; quælibet etiam desideria motusve animæ matris valeant aliquid lineamentorum aut colorum aspergere teneris mollibusque conceptibus, ipsas omnino naturas, quæ sic vel sic in suo genere afficiantur, non facit nisi summus Deus: cujus occulta potentia cuncta penetrans incontaminabili¹ præsentia facit esse quidquid aliquo modo est, in quantumcumque est; quia nisi faciente illo, non tale vel tale esset, sed prorsus esse non posset (a). Quapropter, si in illa specie quam forinsecus corporalibus opifices rebus imponunt, urbem Romam et urbem Alexandriam non fabros et architectos, sed reges, quorum voluntate, consilio, imperio fabricate sunt, illam Romulum, illam Alexandrum habuisse dicimus conditores: quanto potius non nisi Deum debemus conditorem dicere naturarum, qui neque ex ea materia facit aliquid quam ipse non fecerit, nec operarios habet nisi quos ipse creaverit; et si potentiam suam, ut ita dicam, fabricatoriam rebus subtrahat, ita non erunt, sicut ante quam fierent non fuerunt? Sed ante dico, æternitate, non tempore. Quis enim alius creator est temporum, nisi qui fecit ea, quorum motibus currerent tempora?

CAPUT XXVI. — *De Platonicorum opinione, qua pataverunt angelos quidem a Deo conditos, sed ipsos esse humanorum corporum conditores.*

Ita sane Plato minores et a summo Deo factos deos effectores esse voluit animalium cæterorum, ut immortalem partem ab ipso sumerent, ipsi vero mortalem attaxerent (*In Timæo*). Proinde animarum nostrarum eos creatores esse noluit, sed corporum. Unde quoniam Porphyrius propter animæ purgationem dicit omne corpus fugiendum, simulque cum suo Platone aliisque Platonicis sentit eos, qui immoderate ac inhoneste vixerint, propter luendas pœnas ad corpora redire mortalia, Plato quidem etiam ad bestiarum, Porphyrius tantummodo ad hominum (b); sequitur eos, ut dicant deos istos, quos a nobis volunt quasi parentes et conditores nostros coli, nihil esse aliud quam fabros compedum carcerumve nostrorum; nec institutores, sed inclusores alligatoresque nostros ergastulis ærumnosis et gravissimis vinculis. Aut ergo desinant Platonici pœnas animarum ex istis corporibus comminari; aut eos nobis deos colendos non prædicent, quorum in nobis operationem ut, quantum possumus, fugiamus et evadamus, hortantur; cum tamen sit utrumque falsissimum. Nam neque ita luunt pœnas animæ, cum ad istam vitam denuo revolvuntur; et omnium viventium sive in cœlo, sive in terra, nullus est conditor, nisi a quo facta sunt cœlum et terra. Nam si nulla causa est vivendi in

¹ Sic Mss. Editi autem ferunt, *incommutabili*.

(a) Conf. lib. 3 de Trinit., n. 13-16.

(b) Conf. supra, lib. 10, cap. 30.

hoc corpore, nisi propter pudenda supplicia; quomodo dicit idem Plato aliter mundum fieri non potuisse pulcherrimum atque optimum, nisi omnium animalium, id est immortalium et mortalium, generibus impleretur (*In Timæo*)? Si autem nostra institutio, qua vel mortales conditi sumus, divinum munus est; quomodo pœna est ad ista corpora, id est ad divina beneficia, remeare? Et si Deus, quod assidue Plato commemorat, sicut universi mundi, ita omnium animalium species æterna intelligentia continebat, quomodo non ipse cuncta condebat? An aliquorum esse artifex nollet, quorum efficiendorum artem ineffabilis ejus et ineffabiliter laudabilis mens haberet?

CAPUT XXVII. — *In primo homine exortam fuisse omnem plenitudinem generis humani, in qua prævidit Deus quæ pars honoranda esset præmio, quæ damnanda supplicio.*

1. Merito igitur vera religio, quæ mundi universum, animalium quoque universorum, hoc est et animarum et corporum, conditorem agnoscit et prædicat. In quibus terrenis præcipuus ab illo ad ejus imaginem homo propter eam causam, quam dixi, et si qua forte alia major latet, factus est unus, sed non relictus est solus. Nihil enim est quam hoc genus tam discordiosum vitio, tam sociale natura. Neque commodius contra vitium discordiæ vel cavendum ne existeret, vel sanandum cum exstitisset, natura loqueretur humana, quam recordationem illius parentis, quem propterea Deus creare voluit unum, de quo multitudo propagaretur, ut hac admonitione etiam in multis concursus unitas servaretur. Quod vero femina illi ex ejus latere facta est, etiam hinc satis significatum est quam chara mariti et uxoris debeat esse conjunctio. Hæc opera Dei propterea sunt utique inusitata, quia prima. Qui autem ista non credunt, nulla facta prodigia debent credere: neque enim et ipsa, si usitato naturæ curriculo gignerentur, prodigia dicerentur. Quid autem sub tanta gubernatione divinæ providentiæ, quamvis ejus causa lateat, frustra gignitur? Ait quidam psalmus sacer: *Venite, et videte opera Domini, quæ posuit prodigia super terram* (*Psal. xlv, 9*). Cur ergo ex latere viri femina facta sit, et hoc primum quodammodo prodigium quid præfiguraverit, alio loco, quantum me Deus adjuverit, dicam.

2. [XXVII.] Nunc quoniam liber iste claudendus est, in hoc primo homine, qui primitus factus est, pondum quidem secundum evidentiam, jam tamen secundum Dei præscientiam exortas fuisse existimemus in genere humano societates tanquam civitates duas. Ex illo enim futuri erant homines, alii malis angelis in supplicio, alii bonis in præmio sociandi, quamvis occulto Dei judicio, sed tamen justo. Cum enim scriptum sit, *Universe viæ Domini, misericordia et veritas* (*Psal. xxiv, 10*): nec injusta ejus gratia, nec crudelis potest esse justitia.

sic nostri omnes manuscripti. In B. deest, quæ. M. . .

LIBER DECIMUS TERTIUS.

In quo docetur, mortem in hominibus esse poenalem, ortanique ex Adami peccato.



CAPUT PRIMUM. — *De lapsu primi hominis, per quem est contracta mortalitas.*

Expeditis de nostri sæculi exortu et de initio generis humani difficillimis quæstionibus, nunc jam de lapsu primi hominis, imo primorum hominum, et de origine ac propagine mortis humanæ disputationem a nobis institutam rerum ordo deposcit. Non enim eo modo quo Angelos, condiderat Deus homines; ut etiam si peccassent, mori omnino non possent: sed ita ut perfunctos obedientiæ munere sine interventu mortis angelica immortalitas¹ et beata æternitas sequeretur; inobedientes autem mors plecteret damnatione justissima: quod etiam in libro superiore jam diximus (*cap. 21*).

CAPUT II. — *De ea morte quæ animæ semper utcumque victuræ accidere potest, et ea cui corpus obnoxium est.*

Sed de ipso genere mortis video mihi paulo diligentius disserendum. Quamvis enim humana anima veraciter immortalis perhibeatur, habet tamen quamdam etiam ipsa mortem suam. Nam ideo dicitur immortalis, quia modo quodam quantalocumque non desinit vivere atque sentire: corpus autem ideo mortale, quoniam deserit omni vita potest, nec per se ipsum aliquatenus vivit. Mors igitur animæ fit, cum eam deserit Deus: sicut corporis, cum id deserit anima. Ergo utriusque rei, id est totius hominis, mors est cum anima a Deo deserta deserit corpus. Ita enim nec ex Deo vivit ipsa, nec corpus ex ipsa. Hujusmodi autem totius hominis mortem illa sequitur, quam secundam mortem divinorum eloquiorum appellat auctoritas (*Apoc. 11, 14; 21, 8*). Hanc Salvator significavit, ubi ait: *Eum timeate, qui habet potestatem et corpus et animam perdere in gehennam* (*Matth. x, 28*). Quod cum ante non fiat, quam cum anima corpori sic fuerit copulata, ut nulla diremptione separentur; mirum videri potest quomodo corpus ea morte dicatur occidi, qua non ab anima deseritur, sed animatum sentiensque cruciatur. Nam in illa poena ultima ac sempiterna, de qua diligentius suo loco disserendum est, recte mors animæ dicitur, quia non vivit ex Deo: mors autem corporis quoniam modo, cum vivat ex anima? non enim aliter potest ipsa corporalia, quæ post resurrectionem futura sunt, sentire tormenta. An quia vita qualiscumque aliquid bonum est, dolor autem malum, ideo nec vivere corpus dicendum est, in quo anima non vivendi causa est, sed dolendi? Vivit itaque anima ex Deo, cum vivit bene; non enim potest bene vivere, nisi Deo in se operante quod bonum est: vivit autem corpus ex anima, cum anima vivit in corpore; seu vivat ipsa, seu non vivat ex Deo. Impiorum namque in corporibus vita, non animarum, sed corporum vita est: quam possunt

eis animæ etiam mortuæ, hoc est a Deo deserte, quantalocumque propria vita, ex qua et immortales sunt, non desistente, conferre. Verum in damnatione novissima quamvis homo sentire non desinat, tamen quia sensus ipse nec voluptate suavis, nec quiete salubris, sed dolore poenalis est, non immerito mors est potius appellata quam vita. Ideo autem secunda, quia post illam primam est, qua fit coherentium diremptio naturarum, sive Dei et animæ, sive animæ et corporis. De prima igitur corporis morte dici potest, quod bonis bona sit, malis mala. Secunda vero sine dubio sicut nullorum bonorum est, ita nulli bona (*a*).

CAPUT III. — *Utrum mors, quæ per peccatum primorum hominum in omnes homines pertransiit, etiam sanctis poena peccati sit.*

Non autem dissimulanda nascitur quæstio, utrum revera mors, qua separantur anima et corpus, bona sit bona (*b*). Quia si ita est, quomodo poterit obtineri quod etiam ipsa sit poena peccati? Hanc enim primi homines, nisi peccavissent, perpessi utique non fuissent. Quo igitur pacto bona esse possit bonis, quæ occidere non posset nisi malis? Sed rursus si nonnulli malis posset accidere, non deberet bonis bona esse, sed nulla. Cur enim esset ulla poena, in quibus non essent ulla puniendi? Quapropter fateendum est, primos quidem homines ita fuisse institutos, ut, si non peccassent, nullum mortis experirentur genus: sed eosdem primos peccatores ita fuisse morte malctatos, ut etiam quidquid de eorum stirpe esset exortum, eidem poenæ teneretur¹ obnoxium. Non enim aliud ex eis, quam quod ipsi fuerant, nasceretur. Pro magnitudine quippe culpæ illius naturam damnatio mutavit in pejus; ut quod poenaliter præcessit in peccatis hominibus primis, etiam naturaliter sequeretur in nascentibus cæteris. Neque enim ita homo ex homine, sicut homo ex pulvere. Pulvis namque homini faciendo materies fuit: homo autem homini gignendo parens. Proinde quod est terra, non hoc est caro; quamvis ex terra facta sit caro. Quod est autem parens homo, hoc est et proles homo. In primo igitur homine per feminam in progeniem transiturum universum genus humanum fuit, quando illa conjugum copula divinam sententiam suæ damnationis excepit: et quod homo factus est, non cum crearetur, sed cum peccaret et puniretur, hoc genuit, quantum quidem attinet ad peccati et mortis originem. Non enim ad infantilem hebetudinem et infirmitatem animi et corporis, quam videmus in parvulis, peccato vel poena ille rotatus est: quæ Deus voluit esse tanquam primordia catu-

¹ Nonnulli Mss., *tenetur*.

(a) Conf. serm. 63.

(b) De hac quæstione confer s. Hieronymum, Epistola 24, de obitu Lexæ, et Epistola 25, ad Paulam, super obitu Mellæ illiæ. *Coq. sus.*

¹ Mss. 2030 et 2031 ferunt, *inmutabilitas*. M.

lorum, quorum parentes in bestialem vitam mortemque dejecerat; sicut scriptum est, *Homo cum in honore esset, non intellexit; comparatus est pecoribus non intelligentibus, et similis factus est illis (Psal. XLVIII, 13)*. Nisi quod infantes infirmiores etiam cernimus in usu motique membrorum et sensu appetendi atque vitandi, quam sunt aliorum tenerrimi fetus animalium: tanquam se tanto attollat excellentius supra cætera animalia vis humana, quanto magis impetum suum, velut sagitta, cum arcus extenditur, retrorsum reducta distulerit. Non ergo ad ista infantilia rudimenta præsumptione illicita et damnatione justa prolapsus vel impulsus est primus homo (a): sed hactenus in eo natura humana vitata atque mutata est, ut repugnantem pateretur in membris inobedientiam concupiscendi, et obstringeretur necessitate moriendi; atque ita id quod vitio pœnaque factus est, id est, obnoxius peccato mortique generaret. A quo peccati vinculo, si per Mediatoris gratiam solvuntur infantes, hanc solam mortem perpeti possunt, quæ animam sejungit a corpore: in secundam vero illam sine fine pœnalem liberati a peccati obligatione non transeunt.

CAPUT IV. — *Cur ab his qui per gratiam regenerationis absoluti sunt a peccato, non auferatur mors, id est, pœna peccati.*

Si quem vero movet, cur vel ipsam patientur, si et ipsa pœna peccati est, quorum per gratiam reatus aboletur; jam ista quæstio in alio nostro opere, quod scripsimus de Baptismo parvulorum (b), tractata ac soluta est: ubi dictum est, ad hoc relinqui animæ experimentum separationis a corpore, quamvis ablato jam criminis nexu; quoniam, si regenerationis Sacramentum continuo sequeretur immortalitas corporis, ipsa fides enervaretur, quæ tunc est fides, quando exspectatur in spe quod in re nondum videtur (c). Fidei autem robore atque certamine, in majoribus dumtaxat ætatibus, etiam mortis fuerat superandus timor, quod in sanctis martyribus maxime eminuit: cuius profecto certaminis nulla esset victoria, nulla gloria; quia nec ipsum omnino posset esse certamen, si post lavacrum regenerationis jam sancti non posset mortem perpeti corporalem. Cum parvulis autem baptizandis quis non ad Christi gratiam propterea potius curreret, ne a corpore solveretur? Atque ita non invisibili præmio probaretur fides; sed jam nec fides esset, confestim sui operis quærendo et sumendo mercedem. Nunc vero majore et mirabiliore gratia Salvatoris in usus justitiæ peccati pœna conversa est. Tunc enim dictum est homini, *Moriaris, si peccaveris: nunc dicitur martyri, *Morre, ne pecces*. Tunc dictum est, *Si mandatum transgressi fueritis, morte moriemini (Gen. II, 17)*: nunc dicitur, *Si mortem recusaveritis, mandatum transgrediemini*. Quod tunc timendum fuerat, ut non peccaretur; nunc suscipiendum est, ne peccetur. Sic*

per ineffabilem Dei misericordiam, et ipsa pœna vitiorum transit in arma virtutis, et fit justis meritum etiam supplicium peccatoris. Tunc enim mors est acquisita peccando, nunc impletur justitia moriendo. Verum hoc in sanctis martyribus, quibus alterutrum a persecutore proponitur, ut aut deserant fidem, aut sufferant mortem. Justis enim maluit credendo perpeti, quod sunt primi¹ iniqui non credendo perpessi. Nisi enim peccassent illi, non morerentur: peccabunt autem isti, nisi moriantur. Mortui sunt ergo illi, quia peccaverunt: non peccant isti, quia moriuntur. Factum est per illorum culpam, ut veniretur in pœnam: fit per istorum pœnam, ne veniatur in culpam; non quia mors bonum aliquod facta est, quæ antea malum fuit; sed tantam Deus fidei præstitit gratiam, ut mors, quam vitæ constat esse contrariam, instrumentum fieret per quod transiretur ad vitam.

CAPUT V. — *Quod sicut iniqui male utuntur lege quæ bona est, ita et justis bene utuntur morte quæ mala est.*

Apostolus cum vellet ostendere, quantum peccatum, gratia non subveniente, ad nocendum valeret, etiam ipsam legem qua prohibetur peccatum, non dubitavit dicere virtutem esse peccati. *Aculeus, inquit, mortis est peccatum; virtus autem peccati, lex (I Cor. xv, 56)*. Verissime omnino. Auget enim prohibita desiderium operis illiciti, quando justitia non sic diligitur, ut peccandi cupiditas ejus delectatione vincatur. Ut autem diligatur et delectet vera justitia, non nisi divina subvenit gratia. Sed ne propterea lex putaretur malum quoniam virtus est dicta peccati; ideo ipse alio loco versans hujusmodi quæstionem, inquit, *Lex quidem sancta, et mandatum sanctum et justum et bonum. Quod ergo bonum est, inquit, mihi factum est mors? Absit. Sed peccatum, ut appareat peccatum, per bonum mihi operatum est mortem, ut fiat supra modum peccator aut peccatum² per mandatum (Rom. VII, 12, 13)*. *Supra modum, dixit; quia etiam prævaricatio additur, cum peccandi aucta libidine etiam lex ipsa contemnitur. Cur hoc commemorandum putavimus? Quia scilicet sicut lex non est malum, quando auget peccantium concupiscentiam; ita nec mors bonum est, quando auget patientium gloriam: cum vel illa pro iniquitate deseritur, et efficit prævaricatores; vel ista pro veritate suscipitur, et efficit martyres. Ac per hoc lex quidem bona est, quia prohibitio est peccati; mors autem mala, quia stipendium est peccati: sed quemadmodum injusti male utuntur³ non tantum malis, sed etiam bonis; ita justis bene non tantum bonis, sed etiam malis. Hinc fit ut et mali male lege utantur, quamvis sit lex bonum; et boni bene moriantur, quamvis sit mors malum.*

(a) Conf. lib. 1 de Peccat. Merit. et Remis., nn. 67-68.

(b) Designantur hic libri tres de Peccat. Merit. et Remiss., quorum titulo superadduntur hæc verba in lib. 2 Retract., cap. 53, et de Baptismo parvulorum.

(c) Conf. lib. 2 de Peccat. Merit. et Remiss., n. 49-53.

¹ Sola editio Lov., *primitus*.

² Editi, *peccans peccatum*. At manuscripti, *peccator aut peccatum*. In græco est, *amartôlos é amartia*.

³ Mss., *injustitia male utitur*. Pauloque post, *ita justitia bene, etc.*

CAPUT VI. — *De generalis mortis malo, quo animæ et corporis societas separatur.*

Quapropter, quod attinet ad corporis mortem, id est separationem animæ a corpore, cum eam patiuntur qui morientes appellantur, nulli bona est. Habet enim asperum sensum et contra naturam vis ipsa qua utrumque divellitur, quod fuerat in vivente conjunctum atque consertam, quamdiu moratur, donec omnis adimatur sensus, qui ex ipso inerat animæ carnisque complexu. Quam totam molestiam nonnunquam unus ictus corporis vel animæ raptus intercipit, nec eam sentiri præveniente celeritate permittit. Quidquid tamen illud est in morientibus, quod cum gravi sensu adimit sensum, pie fideliterque tolerando auget meritum patientiæ, non aufert vocabulum pœnæ. Ita cum ex hominis primi perpetuata propagine procul dubio sit mors pœna nascentis; tamen si pro pietate justitiæque pendatur, fit gloria reuascens: et cum sit mors peccati retributio, aliquando impetrat ut nihil retribuatur peccato.

CAPUT VII. — *De morte, quam non regenerati pro Christi confessione suscipiunt.*

Nam quicumque etiam non percepto regenerationis lavacro pro Christi confessione moriuntur, tantum eis valet ad dimittenda peccata, quantum si abluerentur sacro fonte Baptismatis. Qui enim dixit, *Si quis non renatus fuerit ex aqua et Spiritu sancto, non intrabit in regnum cælorum* (Joan. iii, 5); alia sententia istos fecit exceptos, ubi non minus generaliter dixit, *Qui me confessus fuerit coram hominibus, confitebor et ego eum coram Patre meo qui in cælis est* (Matth. x, 32); et alio loco, *Qui perdidit animam suam propter me, inveniet eam* (Id. xvi, 25). Hinc est quod scriptum est, *Pretiosa in conspectu Domini mors sanctorum ejus* (Psal. cxv, 15). Quid enim pretiosius quam mors, per quam fit ut et delicta omnia dimittantur, et merita cumulatiùs augeantur? Neque enim tantum sunt meriti, qui, cum mortem differre non possent, baptizati sunt, deletisque omnibus peccatis ex hac vita emigrarunt, quanti sunt hi qui mortem, cum possent, ideo non distulerunt, quia maluerunt Christum confitendo fluire vitam, quam eum negando ad ejus Baptismum pervenire. Quod utique si fecissent, etiam hoc eis in illo lavacro dimitteretur, quod timore mortis negaverant Christum; in quo lavacro et illis facinus tam immane dimissum est, qui occiderant Christum. Sed quando sine abundantia¹ gratiæ Spiritus illius, qui ubi vult spirat (Joan. iii, 8), tantum Christum amare possent, ut eum in tanto vitæ discrimine tanta sub spe veniæ negare non possent? Mors igitur pretiosa sanctorum, quibus cum tanta gratia est præmissa et prærogata mors Christi, ut ad eam acquirendum suam non conculcarentur impendunt, in eos usus redactum esse monstravit, quod ad pœnam peccantis antea fuerat constitutum, ut inde justitiæ fructus uberius nasceretur. Mors ergo

¹ Sic Er. et Mss. At Vind. et Am.: *Sed quando in abundantia*, Lov.: *Sed quando nisi abundantia*.

non ideo bonam videri debet, quia in tantam utilitatem non vi sua, sed divina opitulatione conversa est; ut quæ tunc metuenda proposita est, ne peccatum committeretur, nunc suscipienda proponatur, ut peccatum non committatur, commissumque deleatur, magnæque victoriæ debita justitiæ palma reddatur.

CAPUT VIII. — *Quod in sanctis primæ mortis pro veritate susceptio, secundæ sit mortis absolutio.*

Si enim diligentius consideremus, etiam cum quisque pro veritate fideliter et laudabiliter moritur, mors cavetur. Ideo quippe aliquid ejus suscipitur, ne tota contingat, et secunda insuper, quæ nunquam finiatur, accedat. Suscipitur enim animæ a corpore separatio, ne Deo ab anima separato etiam ipsa separaretur a corpore, ac sic totius hominis prima morte completa, secunda excipiat sempiterna. Quocirca mors quidem, ut dixi, cum eam morientes patiuntur, cumque in eis ut moriantur facit, nemini bona est, sed laudabiliter toleratur pro tenendo vel adipiscendo bono. Cum vero in ea sunt, qui jam mortui nuncupantur, non absurde dicitur et malis mala, et bonis bona. In requie enim sunt animæ piorum a corpore separatæ; impiorum autem pœnas luunt: donec istarum ad æternam vitam, illarum vero ad æternam mortem, quæ secunda dicitur, corpora reviviscant.

CAPUT IX. — *Tempus mortis, quo vitæ sensus aufertur, in morientibus, an in mortuis esse dicendum sit.*

Sed id tempus, quo animæ a corpore separatæ aut in bonis sunt, aut in malis, utrum post mortem potius, an in morte dicendum est? Si enim post mortem est, jam non ipsa mors, quæ transacta atque præterita est, sed post eam vita præseus animæ, bona seu mala est. Mors autem tunc eis mala erat, quando erat, hoc est, quando eam patiebantur, cum morerentur: quoniam gravis et molestus eis inerat sensus; quo malo bene utuntur boni. Peracta autem mors quoniam modo vel bona, vel mala est, quæ jam non est? Porro, si adhuc diligentius attendamus, nec illa mors esse apparebit, cujus gravem ac molestum in morientibus diximus sensum. Quamdiu enim sentiunt, adhuc utique vivunt; et si adhuc vivunt, ante mortem quam in morte potius esse dicendi sunt: quia illa cum venerit, aufert omnem corporis sensum, qui ea propinquante molestus est. Ac per hoc, quomodo morientes dicamus eos qui nondum mortui sunt, sed imminente morte jam extrema et mortifera afflictione jactantur, explicare difficile est: etiamsi recte isti appellantur morientes; quia cum mors quæ jam impendet, advenerit, non morientes, sed mortui nuncupantur. Nullus est ergo moriens, nisi vivens; quoniam cum in tanta est extremitate vitæ, in quanta sunt quos agere animam dicimus, profecto qui nondum anima caruit, adhuc vivit. Idem ipse igitur simul et moriens est et vivens: sed morti accedens, vita decedens²; adhuc tamen in vita, quæ

² In Mss., *vita cedens*.

inest anima corpori; nondum autem in morte, quia nondum abcessit a corpore. Sed si cum abcesserit, nec tunc in morte, sed post mortem potius erit; quando sit in morte quis dixerit? Nam neque ullus moriens erit, si moriens et vivens simul esse nullus potest: quamdiu quippe anima in corpore est, non possumus negare viventem. Aut si moriens potius dicerendus est, in cuius jam corpore agitur ut moriatur, nec simul quisquam potest esse vivens et moriens; quando sit vivens nescio.

CAPUT X. — *De vita mortalium, quæ mors potius quam vita dicenda est.*

Ex quo enim quisque in isto corpore morituro esse cœperit, nunquam in eo non agitur ut mors veniat (a). Hoc enim agit ejus mutabilitas toto tempore vitæ hujus (si tamen vita dicenda est), ut veniatur in mortem. Nemo quippe est qui non ei post annum sit, quam ante annum fuit, et cras quam hodie, et hodie quam heri, et paulo post quam nunc, et nunc quam paulo ante propinquior. Quoniam quidquid temporis vivitur, de spatio vivendi demitur; et quotidie sit minus minusque quod restat: ut omnino nihil sit aliud tempus vitæ hujus, quam cursus ad mortem, in quo nemo vel paululum stare, vel aliquanto tardius ire permittitur: sed omnes urgentur pari motu, nec diverso impelluntur accessu. Neque enim cui vita brevior fuit, celerius diem duxit, quam ille cui longior: sed cum aequaliter et aequalia momenta raperentur ambobus, alter habuit propius, alter remotius quo non impari velocitate ambo currebant. Aliud est autem amplius vitæ peregrisse, aliud tardius ambulasse. Qui ergo usque ad mortem productiora spatia temporis agit, non lentius pergit, sed plus itineris conficit. Porro si ex illo quisque incipit mori, hoc est esse in morte, ex quo in illo agi coepit ipsa mors, id est vitæ detractio; quia, cum detrahendo finita fuerit, post mortem jam erit, non in morte: profecto ex quo esse incipit in hoc corpore, in morte est. Quid enim aliud diebus, horis, momentisque singulis agitur, donec ea consumpta mors quæ agebatur, impleatur; et incipiat jam tempus esse post mortem, quod cum vita detraheretur, erat in morte? Nunquam igitur in vita homo est, ex quo est in corpore isto moriente potius quam vivente, si et in vita et in morte simul non potest esse. An potius et in vita et in morte simul est: in vitâ scilicet in qua vivit, donec tota detrahatur; in morte autem, qua jam moritur, cum vita detrahitur? Si enim non est in vita, quid est quod detrahitur, donec ejus fiat perfecta consumptio? Si autem non est in morte, quid est vitæ ipsa detractio? Non enim frustra, cum vita fuerit corpori tota detracta, post mortem jam dicitur, nisi quia mors erat, cum detraheretur. Nam si ea detracta non est homo in morte, sed post mortem; quando, nisi cum detrahitur, erit in morte?

¹ Vind. Am. Er. et nonnulli Mss., *consummata*.

² Nostri Mss., *quia jam*. M.

(a) Magna pars eorum, quæ in hoc capite Augustinus dicit, sumpta sunt ex Seneca, variis locis. LOP. VIVES.

CAPUT XI. — *An quisquam simul et vivens esse possit, et mortuus.*

1. Si autem absurdum est ut hominem, antequam ad mortem perveniat, jam esse dicamus in morte; (cui enim propinquat peragendo vitæ suæ tempora, si jam in illa est?) maxime quia nimis est insolens, ut simul et vivens esse dicatur et moriens, cum vigilans et dormiens simul esse non possit: quærendum est quando crit moriens. Etenim antequam mors veniat, non est moriens, sed vivens: cum vero mors venerit, mortuus erit, non moriens. Illud ergo est adhuc ante mortem, hoc jam post mortem. Quando ergo in morte? (tunc enim est moriens:) utquemadmodum tria sunt cum dicimus, Ante mortem, in morte, post mortem; ita tria singulis singula, Vivens, moriens, mortuusque reddantur. Quando itaque sit moriens, id est in morte, ubi neque sit vivens, quod est ante mortem, neque mortuus, quod est post mortem, sed moriens, id est in morte, difficillime definitur. Quamdiu quippe est anima in corpore, maxime si etiam sensus adsit, procul dubio vivit homo, qui constat ex anima et corpore; ac per hoc adhuc ante mortem, non in morte esse dicens est: cum vero anima abcesserit, omnemque abstulerit corporis sensum, jam post mortem mortuusque perhibetur. Perit igitur inter utrumque, quo moriens, vel in morte sit: quoniam si adhuc vivit, ante mortem est; si vivere desiit, jam post mortem est. Nunquam ergo moriens, id est in morte esse comprehenditur. Ita etiam in transcurso temporum quæritur præsens, nec invenitur: quia sine ullo spatio est, per quod transitur ex futuro in præteritum. Nonne ergo videndum est, ne ista ratione mors corporis nulla esse dicatur? Si enim est, quando est quæ in nullo, et in qua ullus esse non potest? quandoquidem si vivitur, adhuc non est; quia hoc ante mortem, non in morte: si autem vivere jam cessatum est, jam non est; quia et hoc post mortem est, non in morte. Sed rursus si nulla mors est ante vel post, quid est quod dicitur ante mortem, sive post mortem? nam et hoc inaniter dicitur, si mors nulla est. Atque utinam in paradiso bene vivendo egissemus, ut revera nulla esset mors. Nunc autem non solum est, verum etiam tam molesta est, ut nec ulla explicari locutione possit, nec ulla ratione vitari.

2. Loquamur ergo secundum consuetudinem²; non enim aliter debemus: et dicamus, Ante mortem, prius quam mors accidat; sicut scriptum est, *Ante mortem ne laudes hominem quemquam* (Eccl. xi, 30). Dicamus etiam cum acciderit, Post mortem illius vel illius factum est illud vel illud. Dicamus et de præsentis tempore ut possumus, velut cum ita loquimur, *Moriens ille testatus est, et illis atque illis illud atque illud moriens dereliquit*: quamvis hoc nisi vivens omnino facere non posset, et potius hoc ante mortem fecerit,

¹ Sic Vind. Am. Er. et plerique Mss. At Lov., *quomodo*.

² Lov., *consuetudinem Scripturarum*. Abest, *Scripturarum*, ab aliis libris.

non in morte. Loquamur etiam sicut loquitur Scriptura divina, quæ mortuos quoque non post mortem, sed in morte esse non dubitat dicere. Hinc enim est illud: *Quoniam non est in morte, qui memor sui tui* (Psal. vi, 6). Donec enim reviviscant, recte dicuntur esse in morte; sicut in somno esse quisque, donec evigilet, dicitur: quamvis in somno positos dicamus dormientes, nec tamen eo modo possumus dicere eos qui jam sunt mortui, morientes. Non enim adhuc moriuntur qui, quantum attinet ad corporis mortem, de qua nunc disserimus, jam sunt a corporibus separati. Sed hoc est quod dixi explicari aliqua locutione non posse, quoniam modo vel morientes dicantur vivere, vel jam mortui etiam post mortem adhuc esse dicantur in morte. Quomodo enim post mortem si adhuc in morte? Præsertim cum eos nec morientes dicamus, sicuti eos qui in somno sunt dicimus dormientes; et qui in languore, languentes; et qui in dolore, utique dolentes; et qui in vita, viventes: at vero mortui priusquam resurgant, esse dicantur in morte, nec tamen possunt appellari morientes. Unde non importune neque incongrue arbitror accidisse, etsi non humana industria, iudicio fortasse divino, ut hoc verbum quod est, moritur, in latina lingua nec grammatici declinare potuerint, ea regula qua cætera talia declinantur. Namque ab eo quod est oritur, sit verbum præteriti temporis, ortus est: et si qua similia sunt, per temporis præteriti participia declinantur. Ab eo vero quod est moritur, si quæramus præteriti temporis verbum, responderi assolet, mortuus est, u littera geminata. Sic enim dicitur mortuus, quomodo fatuus, arduus, conspicuus, et si qua similia, quæ non sunt præteriti temporis, sed quoniam nomina sunt, sine tempore declinantur. Illud autem, quasi ut declinetur quod declinari non potest, pro participio præteriti temporis ponitur nomen. Convenienter itaque factum est, ut, quemadmodum id quod significat, non potest agendo, ita ipsum verbum declinari loquendo non possit (a). Agi tamen potest in adiutorio gratiæ Redemptoris nostri, ut saltem secundam mortem declinare possimus. Illa enim est gravior, et omnium malorum pessima, quæ non sit separatione animæ et corporis, sed in æternam pœnam potius utriusque complexu. Ibi e contrario non erunt homines ante mortem atque post mortem, sed semper in morte: ac per hoc nunquam viventes, nunquam mortui, sed sine fine morientes. Nunquam enim erit homini pejus in morte, quam ubi erit mors ipsa sine morte.

CAPUT XII. — *Quam mortem primis hominibus Deus, si mandatum ejus transgrederebantur, fuerit comminatus.*

Cum ergo requiritur, quam mortem Deus primis hominibus fuerit comminatus, si ab eo mandatum transgrederebantur acceptum, nec obedientiam custodirent; utrum animæ, an corporis, an totius hominis,

¹ Sic Mss. Editi vero, non.

² Plures Mss., ponitur. Non inconvenienter itaque, etc.

(a) Ludit ambiguitate verbi illius, declinari: agendo, inquit, non potest declinari, id est, vitari; nec loquendo potest per modos inflecti. LUD. VIVAS.

an illam quæ appellatur secunda: respondendum est, Omnes. Prima enim ex duabus constat; secunda ex omnibus tota. Sicut enim universa terra ex multis terris, et universa Ecclesia ex multis constat Ecclesiis; sic universa mors ex omnibus. Quoniam prima constat ex duabus, una animæ, altera corporis: ut sit prima totius hominis mors, cum anima sine Deo et sine corpore ad tempus pœnas luit; secunda vero, ubi anima sine Deo cum corpore pœnas æternas luit. Quando ergo dixit Deus primo illi homini, quem in paradiso constituerat, de cibo vetito, *Quacumque die ederitis ex eo, morte moriemini* (Gen. ii, 17): non tantum primæ mortis partem priorem, ubi anima privatur Deo; nec tantum posteriorem, ubi corpus privatur anima; nec solum ipsam totam primam, ubi anima et a Deo et a corpore separata punitur: sed quiquid mortis est usque ad novissimam, quæ secunda dicitur, quæ est nulla posterior, comminatio illa complexa est.

CAPUT XIII. — *Prævaricatio primorum hominum, quam primam senserit pœnam.*

Nam posteaquam præcepti facta transgressio est, confestim gratia deserente divina, de corporum suorum nuditate confusi sunt. Unde etiam foliis ficulneis, quæ forte a perturbatis prima comperta sunt, pudenda texerunt (Gen. iii, 7): quæ prius eadem membra erant, sed pudenda non erant. Senserant ergo novum motum inobedientis carnis suæ, tanquam reciprocam pœnam inobedientiæ suæ. Jam quippe anima libertate in perversum propria delectata, et Deo dedignata servire, pristino corporis servitio destituebatur: et quia superiorem Dominum suo arbitrio deseruerat, inferiorem famulum ad suam arbitrium non tenebat: nec omni modo habebat subditam carnem, sicut semper habere potuisset, si Deo subdita ipsa mansisset. Tunc ergo cœpit caro concupiscere adversus spiritum (Galat. v, 17): cum qua controversia nati sumus, trahentes originem mortis, et in membris nostris vitiatæque naturæ contentionem ejus sive victoriam de prima prævaricatione gestantes.

CAPUT XIV. — *Qualis homo sit factus a Deo, et in quam sortem deciderit suæ voluntatis arbitrio.*

Deus enim creavit hominem rectum, naturarum auctor, non utique vitiorum: sed sponte depravatus justæque damnatus, depravatos damnatosque generavit. Omnes enim fuimus in illo uno, quando omnes fuimus ille unus, qui per feminam lapsus est in peccatum, quæ de illo facta est ante peccatum. Nondum erat nobis singillatim creata et distributa forma, in qua singuli viveremus; sed jam natura erat seminalis, ex qua propagaremur: qua scilicet propter peccatum vitiatæ, et vinculo mortis obstrictæ, justæque damnata, non alterius conditionis homo ex homine nasceretur. Ac per hoc a liberi arbitrii malo usu series hujus calamitatis exorta est, quæ humanum genus origine depravata, velut radice corrupta, usque ad secundæ mortis exitum, quæ non habet finem,

¹ Nonnulli Mss., mortem.

solis eis exceptis qui per gratiam Dei liberantur, miseriarum connexionem perducit.

CAPUT XV. — *Quod Adam peccans prius reliquerit Deum, quam relinqueretur a Deo; et primam fuisse animæ mortem a Deo recessisse.*

Quamobrem etiamsi in eo quod dictum est, *Morte moriemini*, quoniam non est dictum, *Mortibus*, eam solam intelligamus, quæ sit cum anima descripta sua vita, quod illi Deus est: (non enim deserta est ut desereret, sed ut desereretur, deseruit: ad malum quippe ejus prior est voluntas ejus; ad bonum vero ejus prior est voluntas Creatoris ejus, sive ut eam faceret quæ nulla erat, sive ut resciat quæ lapsa perierat¹): etiamsi ergo hanc intelligamus Deum denuntiasse mortem, in eo quod ait, *Qua die ederitis ex illo, morte moriemini*; tanquam diceret, *Qua die me deserueritis per inobedientiam, deseram vos per justitiam*: profecto in ea morte etiam cæteræ denuntiate sunt, quæ procul dubio fuerant secuturæ. Nam in eo quod inobediens motus in carne animæ inobedientis exortus est, propter quem pudenda texerunt, sensa est mors una in qua deseruit animam Deus. Ea significata est verbis ejus, quando timore dementi sese abscondenti hominî dixit, *Adam, ubi es* (*Gen. iii, 9*)? non utique ignorando querens, sed increpando admonens, ut attenderet ubi esset in quo non esset Deus. Cum vero corpus anima ipsa deseruit ætate corruptum et senectute confectum, venit in experimentum mors altera, de qua Deus peccatum adhuc puniens hominî dixerat, *Terra es, et in terram ibis* (*Ibid., 19*): ut ex his duabus mors illa prima, quæ totius est hominis, compleretur, quam secunda in ultimo sequitur, nisi homo per gratiam liberetur. Neque enim corpus quod de terra est, rediret in terram, nisi sua morte, quæ illi accidit cum deseritur sua vita, id est anima. Unde constat inter Christianos veraciter catholicam tenentes fidem, etiam ipsam nobis corporis mortem, non lege naturæ, qua nullam mortem hominî² Deus fecit, sed merito inflictam esse peccati: quoniam peccatum vindicans Deus, dixit hominî, in quo tunc omnes eramus, *Terra es, et in terram ibis*.

CAPUT XVI. — *De philosophis, qui animæ separationem a corpore non putant esse penalem, cum Plato inducat summum Deum diis minoribus promittentem, quod nunquam sint corporibus exuendi.*

1. Sed philosophi, contra quorum calumnias defendimus civitatem Dei, hoc est ejus Ecclesiam, sapienter sibi videntur irridere quod dicimus, animæ a corpore separationem inter pœnas ejus esse deputandam: quia videlicet ejus perfectam beatitudinem tunc illi fieri existimant, cum omni prorsus corpore exuta ad Deum simplex et sola et quodammodo nuda redierit. Ubi si nihil, quo ista refelleretur opinio, in eorum litteris invenirem, operosius mihi disputandum esset, quo demonstrarem non corpus esse animæ, sed corruptibile corpus onerosum. Unde illud est quod de Scripturis no-

stris in superioribus libro commemoravimus (*cap. 15*), *Corpus enim corruptibile aggravat animam* (*Sap. ix, 15*). Addeudo utique *corruptibile*, non qualicumque corpore, sed quale factum est ex peccato consequente vindicta, animam perhibuit aggravari. Quod etiamsi non addidisset, nihil aliud intelligere deberemus. Sed cum apertissime Plato deos a summo Deo factos habere immortalia corpora prædicet, eisque ipsam Deum, a quo facti sunt, inducat pro magno beneficio pollicentem, quod in æternum cum suis corporibus permanebunt, nec ab eis ulla morte solventur: quid est quod isti ad exagitantam christianam fidem fingunt se nescire quod sciunt; aut etiam sibi repugnantes adversum se ipsos malunt dicere, dum nobis non desinant contradicere? Nempe Platonis hæc verba sunt, sicut ea Cicero in latinum vertit (*a*), quibus inducit summum Deum deos quos fecit alloquentem ac dicentem: *Vos qui deorum satum orti estis, attendite quorum operam ego parens effectorque sum. Hæc sunt indissolubilia me invito¹: quanquam omne colligatum solvi potest. Sed haudquaquam boni est², ratione vincitum velle dissolvere³. Sed quoniam estis orti, immortales vos quidem esse et indissolubiles non potestis: nequaquam⁴ tamen dissolvemini, neque vos ulla mortis fata periment, nec erunt valentiora quam consilium meum, quod majus est vinculum ad perpetuitatem vestram, quam illa quibus estis, tum cum gignebamini, colligati. Ecce deos Plato dicit et corporis animæque colligatione mortales, et tamen immortales Dei a quo facti sunt voluntate atque consilio. Si ergo animæ pœna est in qualicumque corpore colligari, quid est quod eos alloquens Deus tanquam sollicitos, ne forte moriantur, id est dissolvantur a corpore, de sua facit immortalitate securos; non propter eorum naturam, quæ sit compacta, non simplex, sed propter suam invictissimam voluntatem, qua potens est facere, ut nec orta occidant, nec connexa solvantur, sed incorruptibiliter perseverent?*

2. Et hoc quidem utrum Plato veram de sideribus dicat, alia quæstio est: neque enim ei continuo concedendum est, globos istos luminum sive orbiculos luce corporea super terras, seu die, seu nocte fulgentes, suis quibusdam propriis animis vivere, eisque intellectualibus et beatis, quod etiam de ipso universo mundo, tanquam uno animali maximo, quo cuncta cætera containerentur animalia, instanter affirmat (*b*). Sed hæc, ut dixi, alia quæstio est, quam nunc discutiendam non suscepimus. Hoc tantum contra istos commemorandum putavi, qui se Platonicos vocari vel esse gloriantur, cujus superbia

¹ Editi, *indissolubilia nutu meo*. At manuscripti, ut apud Ciceronem, *me invito*. Forte pro, *me non invito*. Nam in Platonis Timæo est, *εμοὶ γὰρ ἀθέλωτος*.

² Editi, *bonum est*. Melius Mss., *boni est*: juxta Ciceronem et Platonis græcum, *καλοῦ*.

³ Sic nostri codices atque veteres libri tum Augustini, tum Ciceronis. In B., *dissolvere velle*. M.

⁴ Sic manuscripti. Editi autem, *nec unquam*.

(a) Libello scilicet qui de Universo inscribitur, et pars est Timæi Platonis. Conf. de eodem infra, lib. 22, cap. 26, et tom. 3, serm. 241, n. 8.

(b) Hæc Plato passim in Timæo et in Epinomide.

¹ Mss., *quia lapsa perierat*.

² Probæ notæ Mss., *hominis*. — Sic Ms. 2051. M.

nomina erubescunt esse Christiani, ne commune illis cum vulgo vocabulum, vilem faciat palliatorum (a), tanto magis inflatam, quanto magis exiguam paucitatem: et quærentes quid in doctrina christiana reprehendant, exagitant æternitatem corporum, tanquam hæc sint inter se contraria, ut et beatitudinem quæramus animæ, et eam semper esse velimus in corpore, velut ærumnoso vinculo colligatam: cum eorum auctor et magister Plato, donum a Deo summo diis ab illo factis dicat esse concessum, ne aliquando moriantur, id est a corporibus, quibus eos connexuit, separentur.

CAPUT XVII. — *Contra eos qui asserunt, terrena corpora incorruptibilia fieri et æterna non posse.*

1. Contendunt etiam isti, terrestria corpora sempiterna esse non posse, cum ipsam universam terram dei sui, non quidem summi, sed tamen magni, id est totius hujus mundi, membrum in medio positum et sempiternum esse non dubitent. Cum ergo Deus illo summus fecerit eis alterum quem putant deum (Plato in *Timæo*), id est istum mundum, cæteris diis qui infra eum sunt præferendum, eundemque esse existiment animantem, anima scilicet, sicut asserunt, rationali vel intellectuali in tam magna mole corporis ejus inclusa; ipsiusque corporis tanquam membra locis suis posita atque digesta, quatuor constituerit elementa, quorum juncturam, ne unquam deus eorum tam magnus moriatur, insolubilem ac sempiternam velint: quid cause est, ut in corpore majoris animantis tanquam medium membrum æterna sit terra, et aliorum animantium terrestrium corpora, ei, Deus sicut illud velit, æterna esse non possint? Sed terræ, inquit, terra reddenda est, unde animalium terrestria sumpta sunt corpora: ex quo fit, inquit, ut ea sit necesse dissolvi et emori; et eodem modo terræ stabili ac sempiternæ, unde fuerant sumpta, restitui. Si quis hoc etiam de igne similiter affirmet, et dicat reddenda esse universo igni corpora, quæ inde sumpta sunt, ut cælestia fierent animalia; nonne immortalitas, quam talibus diis, velut Deo summo loquente, promisit Plato, tanquam violentia disputationis hujus intercidet? An ibi propterea non fit, quia Deus non vult, cujus voluntatem, ut sit Plato, nulla vis vincit? Quid ergo prohibet, ut hoc etiam de terrestribus corporibus Deus possit efficere, quandoquidem ut nec ea quæ orta sunt, occidant, nec ea quæ sunt juncta solvantur, nec ea quæ sunt ex elementis sumpta reddantur, atque ut animæ in corporibus constitutæ nec unquam ea deserant, et cum eis immortalitate ac sempiterna beatitudine perfruantur, posse Deum facere confitetur Plato? Cur ergo non possit, ut nec terrestria moriantur? An Deus non est potens quousque Christiani credunt, sed quousque Platonicæ volunt? Nimirum quippe consilium Dei et potestatem potuerunt philo-

sophi, nec potuerunt nosse Prophetas? cum potius a contrario Dei Prophetas ad ebuntiam ejus, quantum dignatus est, voluntatem, Spiritus ejus docuerit; philosophos autem in ea cognoscenda conjectura humana deceperit.

2. Verum non usque adeo decipi debuerunt, non solum ignorantia, sed magis etiam¹ pervicacia, ut et sibi apertissime refragentur, magnis disputationum viribus asserentes, animæ, ut beata esse possit, non terrenum tantum, sed omne corpus esse fugiendum; et deos rursus dicentes habere beatissimas animas, et tamen æternis corporibus illigatas, cælestes quidem igneis, Jovis autem ipsius animam, quem mundam istum volunt, omnibus omnino corporeis elementis, quibus hæc tota moles a terra in cælum surgit, inclusam. Hanc enim animam Plato ab intimo terræ medio, quod geometriæ centrum vocant, per omnes partes ejus usque ad cæli summa et extrema diffundi et extendi per numeros musicos opinatur, ut sit iste mundus animal maximum, beatissimum, sempiternum, cujus anima et perfectam sapientiæ felicitatem teneret, et corpus proprium non relinqueret; cujusque corpus et in æternum ex illa viveret, et eam quamvis non simplex, sed tot corporibus tantisque compactum, hebetare atque tardare non posset. Cum igitur suspicionibus suis ista permittant, cur nolunt credere, divina voluntate atque potentia immortalia corpora fieri posse terrena, in quibus animæ nulla ab eis morte separatæ, nullis eorum oneribus aggravatæ, sempiternæ ac feliciter vivant (a); quod deos suos posse asserunt in corporibus igneis, Jovemque ipsum regem eorum in omnibus corporeis elementis? Nam si animæ, ut beata sit, corpus est omne fugiendum, fugiant dii eorum de globis siderum, fugiat Jupiter de cælo et terra: aut si non possunt, miseri judicentur. Sed neutrum isti volunt, qui neque a corporibus separationem audent dare diis suis, ne illos mortales colere videantur; nec beatitudinis privationem, ne infelices eos esse fateantur. Non ergo ad beatitudinem consequendam omnia fugienda sunt corpora; sed corruptibilia, molesta, gravia, moribunda; non qualia fecit primis hominibus bonitas Dei, sed qualia esse compulit poena peccati (b).

CAPUT XVIII. — *De terrenis corporibus, quæ philosophi affirmant in cælestibus esse non posse; quia quod terrenum est, naturali pondere vocetur ad terram.*

Sed necesse est, inquit, ut terrena corpora naturale pondus vel in terra teneat, vel cogat ad terram: et ideo in cælo esse non possint (c). Primi quidem illi homines in terra erant nemorosa atque fructuosa, quæ paradisi nomen obtinuit: sed quia et ad hoc respondendum est, vel propter Christi corpus cum quo ascendit in cælum, vel propter sanctorum qualia in resurrectione futura sunt, intueantur quousque

¹ Nonnulli Mss., *vincta*.

(a) *Palliatorum* nomine philosophos intelligit. Hinc apud A. Gellium, lib. 9, cap. 2, de quodam qui corporis cultu smicinctique philosophum mentiebatur: *Video barbam et palium, philosophum nondum video*.

² Sic Mss. Editi autem, *verum etiam*.

(a) Conf. lib. 6 de Gen. ad Litt., nn. 36, 37.

(b) Conf. serm. 241, nn. 67.

(c) Conf. lib. de Fide et Symbolo, n. 13.

attentius pondera ipsa terrena. Si enim ars humana efficit ut ex metallis, quæ in aquis posita continuo submergantur, quibusdam modis vasa fabricata etiam natante possint; quanto credibilis et efficacius occultus aliquis modus operationis Dei, cujus omnipotentissima voluntate Plato dicit nec orta interire, nec colligata posse dissolvi, cum multo mirabilius incorporea corporeis, quam quæcumque corporea quibuscumque corporibus copulentur, potest motibus præstare terrenis, ut nullo in una pondere deprimantur; ipsisque animis perfectissime beatis, ut quamvis terrena, tamen incorruptibilia jam corpora ubi volunt ponant, et quo volunt agant, situ motuque facillimo? An vero si hoc Angeli faciant, et quælibet animalia terrestria rapiant unde libet, constituentque ubi libet, aut eos sine labore¹ non posse, aut onera sentire credendum est? Cur ergo sanctorum perfectos et beatos divino munere spiritus sine ulla difficultate posse ferre quo voluerint, et sistere ubi voluerint sua corpora non credamus? Nam cum terrenorum corporum, sicut onera in gestando sentire consuevimus, quanto major est quantitas, tanto major sit et gravitas, ita ut plura pondus quam pauciora plus premant: membra tamen suæ carnis leviora² portat anima cum in sanitate robusta sunt, quam in languore cum macra sunt. Et cum aliis gestantibus onerosior sit sanus³ et validus, quam exilis et morbidus; ipse tamen ad suum corpus movendum atque portandum agillior est, cum in bona valetudine plus habet molis, quam cum in peste vel fame minimum roboris. Tantum valet in habendis etiam terrenis corporibus, quamvis adhuc corruptibilibus atque mortalibus, non quantitatis pondus, sed temperationis modus. Et quis verbis explicet, quantum distet inter præsentem, quam dicimus sanitatem, et immortalitatem futuram? Non itaque nostram fidem redarguant philosophi de ponderibus corporum. Nolo enim querere, cur non credant terrenum posse esse corpus in cælo, cum terra universa libretur in nihilo. Fortassis enim de ipso medio mundi loco, eo quod in eum coeant quæque graviora, etiam argumentatio verisimilior habeatur. Illud dico: si dii minores, quibus inter animalia terrestria cætera etiam hominem faciendum comisit Plato (in *Timæo*), poterunt, sicut dicit, ab igne removere urendi qualitatem, lucendi relinquere quæ per oculos emicaret (*Ibid.*); itane Deo summo concedere dubitabimus, cujus ille voluntati potestatique non moriantur concessit quæ orta sunt, et tam diversa, tam dissimilia, id est corporea et incorporea, sibimet connexa, nulla possint dissolutione se jungi, ut de carne hominis, cui donat immortalitatem, corruptionem auferat, naturam relinquat, congruentiam figuræ membrorumque detineat, detrahat ponderis tarditatem? Sed de fide resurrectionis mortuorum, et de corporibus eorum immortalibus diligentius, si Deus voluerit, in fine hujus operis discernendum est.

¹ Abest, sine labore, a *Mass.*

² Sola editio *LOV.*, *levius.*

³ *Vind.* et *Mass.*, *salvus.*

CAPUT XIX. — *Contra eorum dogmata, qui primos homines, si non peccassent, immortales futuros fuisse non credunt.*

Nunc de corporibus primorum hominum quod instituimus explicemus: quoniam nec mors ista, quæ bona perhibetur bonis, nec tantum paucis intelligentibus sive credentibus, sed omnibus nota est, qua sit animæ a corpore separatio, qua certe corpus animantis, quod evidenter vivebat, evidenter emoritur, eis potuisset accidere, nisi peccati meritum sequeretur. Licet enim justorum ac piorum animæ defunctorum, quod in requie vivant, dubitare fas non sit, usque adeo tamen eis melius esset cum suis corporibus bene valentibus vivere (a), ut etiam illi qui omni modo esse sine corpore beatissimum existimant, hanc opinionem suam¹ sententia repugnante convincant. Neque enim quisquam audebit illorum sapientes homines, sive morituros, sive jam mortuos, id est, aut carentes corporibus, aut corpora relicturos, diis immortalibus antepone, quibus Deus summus apud Platonem munus ingens, indissolubile scilicet vitæ, id est æternum cum suis corporibus consortium, pollicetur. Optime autem cum hominibus agi arbitratur idem Plato, si tamen hanc vitam pie justeque peregerint, ut a suis corporibus separati, in ipsorum deorum, qui sua corpora nunquam deserunt, recipiantur sinum (in *Phædone* et *Phædro*):

scilicet immemores supra ut convexa revisant,
rursus et incipiant in corpora velle reverti.
(*Virgil. Æneid. lib. 6, vers. 750, 751.*)

Quod Virgilius ex Platónico dogmate dixisse laudatur. Ita quippe animas mortalium, nec in suis corporibus semper esse posse existimat, sed mortis necessitate dissolvi; nec sine corporibus durare perpetuo, sed alternantibus vicibus indesinenter vivos ex mortuis, et ex vivis mortuos fieri putat: ut a cæteris hominibus hoc videantur differre sapientes, quod post mortem ferantur ad sidera, ut aliquanto diutius in astro sibi congruo quisque requiescat, atque inde rursus miseræ pristinæ oblitus et cupiditate habendi corporis victus, redeat ad labores ærumnasque mortalium; illi vero qui stultam duxerint vitam, ad corpora suis meritis debita, sive hominum, sive bestiarum, de proximo revolvantur (in *Phædro*). In hac itaque durissima conditione constituit etiam bonas atque sapientes animas, quibus non talia corpora distributa sunt, cum quibus semper atque immortaliter viverent, ut neque in corporibus permanere, neque sine his possint in æterna puritate durare. De quo Platónico dogmate jam in libris superioribus (*Præsertim* in *lib. 10, cap. 30*) diximus christiano tempore erubuisse Porphyrium, et non solum ab humanis animis removisse corpora bestiarum, verum etiam sapientium animas ita voluisse de corporeis nexibus liberari, ut corpus omne fugientes beatæ apud Patrem sine fine teneantur. Itaque ne a Christo vinci videretur vitam sanctis pollicente perpetuam, etiam ipse purgatas animas sine ullo ad miseras pristinas reditu

¹ *LOV.*, *sua*; dissentientibus cæteris libris.

(a) *Conf. lib. 13 de Gen. ad Litt., n. 68, et Retract. lib. 1, cap. 14, n. 2.*

in æterna felicitate constituit : et ut Christo adversaretur, resurrectionem incorruptibilium corporum negans, non solum sine terrenis, sed sine ullis omnino corporibus eas asseruit in sempiternum esse victuras (a). Nec tamen ista qualicumque opinione præcevit saltem ne diis corporatis religionis obsequio subderentur. Quid ita, nisi quia eas quamvis nulli corpori sociatas, non credidit illis esse meliores? Quapropter, si non audebunt isti ¹, sicut eos ausuros esse non arbitror, diis beatissimis, et tamen in æternis corporibus constitutis, humanas animas antepone; cur eis videtur absurdum, quod fides christiana prædicat, et primos homines ita fuisse conditos, ut si non peccassent, nulla morte a suis corporibus solverentur, sed pro meritis obedientiæ custoditæ immortalitate donati, cum eis viverent in æternum; et talia sanctos in resurrectione habituros ea ipsa, in quibus hic laboraverunt, corpora, ut nec eorum carni aliquid corruptionis vel difficultatis, nec eorum beatitudini aliquid doloris et infelicitatis possit accidere?

CAPUT XX. — *Quod caro sanctorum, quæ nunc requiescit in spe, in meliorem reparanda sit qualitatem, quam fuit primorum hominum ante peccatum.*

Proinde nunc sanctorum animæ defunctorum Ideo non habent gravem mortem, qua separatæ sunt a corporibus suis, quia caro eorum requiescit in spe, quaslibet sine ullo jam sensu contumelias accepisse videatur. Non enim, sicut Platoni visum est, corpora oblivione ² desiderant : sed potius, quia meminerunt quid sibi ab eo sit promissum, qui neminem fallit, qui eis etiam de capillorum suorum integritate securitatem dedit (*Luc. xxi, 18*), resurrectionem corporum, in quibus multa dura perpessi sunt, nihil in eis ulterius tale sensuri, desiderabiliter et patienter expectant. Si enim carnem suam non oderant (*Ephes. v, 29*), quando eam suæ menti infirmitate resistentem ³, spirituali jure coercebant, quanto magis eam diligunt etiam ipsam spiritualem futuram? Sicut enim spiritus carni serviens non incongrue carnalis, ita caro spiritui serviens recte appellabitur spiritualis; non quia in spiritum convertetur, sicut nonnulli putant ex eo quod scriptum est, *Seminatur corpus animale, resurget corpus spirituale* (b) (*1 Cor. xv, 42*): sed quia spiritui summa et mirabili obtemperandi facilitate ⁴ subdetur, usque ad immortalitatis ⁵ indissolubilis securissimam voluntatem omni molestiæ sensu, omni corruptibilitate et tarditate detracta. Non solum enim non erit tale, quale nunc est in quavis optima valetudi-

¹ Sola editio Lov., *istis*.

² Sic Vind. Am. et meliores Mss. At Er., *corpora oblivionem*. Lov., *corporum oblivionem*.

³ Aliquot Mss., *resistente*.

⁴ In libris nonnullis, *facultate*.

⁵ Ms. 2051, *usque ad plenam immortalitatis*; Ms. 2050, *usque ad implendam immortalitatis*. M.

(a) Infra, lib. 22, cap. 27.

(b) Origenes in libris, *peri Archôn*, ait fore ut omnis corporea creatura in spiritualia corpora mutetur, et cuncta substantia in unum corpus mundissimum et omni splendore purius convertatur, ac tale quale nunc humana mens cogitare non potest; et præst, inquit, erit Deus omnia in omnibus, ut universa natura corporea redigatur in eam substantiam, quæ omnibus melior est, in divinam scilicet, qua nulla est melior. LUD. VIVES.

SANCT. AUGUST. VII.

ne; sed nec tale quidem, quale fuit in primis hominibus ante peccatum. Qui licet morituri non essent, nihil peccassent; alimentis tamen ut homines utebantur, nondum spiritualia, sed adhuc animalia corpora terrena gestantes. Quæ licet senio non veterascerent, ut necessitate perducerentur ad mortem (qui status eis de ligno vitæ, quod in medio paradiso cum arbore vetita simul erat, mirabili Dei gratia præstabatur): tamen et alios sumebant cibos præter unam arborem, quæ fuerat interdicta, non quia ipsa erat malum, sed propter commendandum puræ et simplicis obedientiæ bonum, quæ magna virtus est rationalis creaturæ sub Creatore Domino constitutæ. Nam ubi nullum malum tangebatur, profecto si prohibitum tangeretur, sola inobediencia peccabatur. Alebantur ¹ ergo aliis quæ sumebant, ne animalia corpora molestiæ aliquid esuriendo ac sitiendo sentirent: de ligno autem vitæ propterea gustabatur, ne mors eis undecumque subreperet, vel senectute confecta ² decursis temporum spatiis interirent: tanquam cætera essent alimento, illud sacramento; ut sic fuisse accipiatur lignum vitæ in paradiso corporali, sicut in spirituali, hoc est intelligibili paradiso, Sapientia Dei, de qua scriptum est, *Lignum vitæ est ³ amplectentibus eam* (*Prov. iii, 18*).

CAPUT XXI. — *De paradiso, in quo primi homines fuerant, quod recte possit significatione ejus spirituale aliquid intelligi, salva veritate narrationis historicæ de corporali loco.*

Unde nonnulli totum ipsam paradikum, ubi primi homines parentes generis humani sanctæ Scripturæ veritate fuisse narratur, ad intelligibilia referunt, arboresque illas et ligna fructifera in virtutes vitu moresque convertunt (a): tanquam visibilia et corporalia illa non fuerint, sed intelligibilium significandorum causa eo modo dicta vel scripta sint. Quasi propterea non potuerit esse paradikus corporalis, quia potest etiam spiritualis intelligi: tanquam ideo non fuerint duæ mulieres, Agar et Sara, et ex illis duo filii Abrahæ, unus de ancilla, alius de libera, quia duo Testamenta in eis figurata dicit Apostolus (*Galat. iv, 22-24*): aut ideo de nulla petra Moyse percutiente aqua defluerit (*Exod. xvii, 6*; *Num. xx, 11*), quia potest illic figurata significatione etiam Christus intelligi, eodem apostolo dicente, *Petra autem erat Christus* (*1 Cor. x, 4*). Nemo itaque prohibet intelligere paradikum, vitam beatorum; quatuor ejus flumina, quatuor virtutes, prudentiam, fortitudinem, temperantiam, atque justitiam; et ligna ejus, omnes utiles disciplinas; et lignorum fructus, mores piorum; et lignum vitæ, ipsam honorum omnium matrem sapientiam; et lignum scientiæ boni et mali, transgressi

¹ Mss. quidam, *Agebatur ergo*. — Codex 2051, *Agebatur ergo ab his quæ sumebant*. M.

² Sic Vind. Am. et Mss. At Er. et Lov., *confecti*.

³ Sic sola editio Lov. addit, *omnibus*.

(a) Philo Judæus, extremo libro de Opificio mundi, et libro primo Allegoriarum Legis, mystice duntaxat et allegorice interpretatur narrationem Moysis de paradiso, nec aliter esse intelligendum censet. Eodem modo Origenes in tomis super Genesim, et in libro quarto, *peri Archôn*, cap. 3. COCCÆUS.

(Treize.)

mandati experimentum. Pœnam enim peccatoribus bene utique, quoniam iuste, constituit Deus, sed non bono suo experitur homo. Possunt hæc etiam in Ecclesia intelligi, ut ea melius accipiamus tanquam prophetica indicia præcedentia futurorum: paradisum scilicet ipsam Ecclesiam, sicut de illa legitur in Cautico canticorum (*Cant. iv, 13*): quatuor autem paradisi flumina, quatuor Evangelia; ligna fructifera, sanctos; fructus autem eorum, opera eorum; lignum vitæ, Sanctum sanctorum, utique Christum; lignum scientiæ boni et mali, proprium voluntatis arbitrium. Nec se ipso quippe homo divina voluntate contempta nisi perniciose uti potest: atque ita discit, quid intersit, utrum inhæreat communi omnibus bono, an proprio delectetur. Se quippe amans donatur sibi, ut inde timoribus mœroribusque completus cantet in Psalmo, si tamen mala sua sentit, *Ad me ipsum turbata est anima mea (Psal. xli, 7)*: correctusque jam dicat: *Fortitudinem meam ad te custodiam (Psal. lvi, 10)*. Hæc, et si qua alia commodius dici possunt de intelligendo spiritualiter paradiso, nemine prohibente dicantur: dum tamen et illius historiæ veritas fidelissima rerum gestarum narratione commendata credatur.

CAPUT XXII. — *De corporibus sanctorum post resurrectionem, quæ sic spiritualia erunt, ut non in spiritu caro vertatur.*

Corpora ergo justorum quæ in resurrectione futura sunt, neque ullo ligno indigebunt, quo fiat ut nullo morbo vel senectute inveterata moriantur; neque ullis aliis corporalibus alimentis, quibus esuriendi ac sitiendi qualiscumque molestia devitetur: quoniam certo et omnimodo inviolabili munere immortalitatis induentur, ut nonnisi velint, possibilitate, non necessitate vescantur. Quod Angeli quoque visibiliter et tractabiliter apparentes, non quia indigebant, sed quia volebant et poterant, ut hominibus congruerent sui ministerii quadam humanitate, fecerunt (a). Neque enim in phantasmate Angelos edisse credendum est, quando eos homines hospitio susceperunt (*Gen. xviii, et Tob. xi*): quamvis utrum Angeli essent ignorantibus, consimili nobis indigentia vesci viderentur. Unde est quod ait angelus in libro Tobiæ, *Videbatis me manducare, sed visu vestro, videbatis (Tob. xii, 19)*: id est, necessitate reficiendi corporis, sicut vos facitis, me cibum sumere putabatis. Sed si forte de Angelis aliud credibilius disputari potest, certe fides christiana de ipso Salvatore non dubitat, quod etiam post resurrectionem, jam quidem in spiritali carne, sed tamen vera, cibum ac potum cum discipulis sumpsit (*Luc. xxiv*). Non enim potestas, sed egestas edendi ac hibendi talibus corporibus auferetur. Unde et spiritualia erunt; non quia corpora esse desistent, sed quia spiritu vivificante subsistent.

CAPUT XXIII. — *Quid intelligendum sit de corpore animalis et de corpore spiritali: aut qui moriuntur in Adam, qui vero vivificantur in Christo.*

1. Nam sicut corpora ista, quæ habent animam viventem, nondum spiritum vivificantem, animata di-

cuntur corpora; nec tamen animæ sunt, sed corpora: ita illa spiritalia vocantur corpora; absit tamen ut spiritus ea credamus futura, sed corpora carnis habitura substantiam, sed nullam tarditatem corruptionemque carnalem spiritu vivificante passura. Tunc jam non terrenus, sed cœlestis homo erit: non quia corpus quod de terra factum est, non ipsum erit; sed quia dono cœlesti jam tale erit, ut etiam cœlo incolendo non amissa natura, sed mutata qualitate conveniat. Primus autem homo de terra terrenus (*I Cor. xv, 47*), in anipam viventem factus est, non in spiritum vivificantem, quod ei per obedientiæ meritum servabatur. Ideo corpus ejus, quod cibo ac potu egebat, ne fame afficeretur ac siti, et non immortalitate illa absoluta atque indissolubili, sed ligno vitæ a mortis necessitate prohibebatur, atque in juventutis flore tenebatur, non spirituale, sed animale fuisse, non dubium est: nequaquam tamen moriturum, nisi in Dei prædicentis minantisque sententiam delinquendo corruisset. Et alimentis quidem etiam extra paradisum non negatis, a ligno tamen vitæ prohibitus, traditus esset tempori vetustatique finiendus¹, in ea duntaxat vita, quam in corpore licet animali, donec spirituale obedientiæ merito fieret, posset in paradiso, nisi peccasset, habere perpetuam. Quapropter, etiamsi mortem istam manifestam, qua sit animæ a corpore separatio, intelligamus simul significatam in eo quod Deus dixerat, *Qua die ederitis ex illo, morte moriemini (Gen. ii, 17)*; non ideo debet absurdum videri, quia non eo prorsus die a corpore sunt soluti, quo cibum interdictum mortiferumque sumpserunt. Eo quippe die mutata in deterius vitæque natura, atque a ligno vitæ separatione justissima, mortis in eis etiam corporalis necessitas facta est, cum qua nos necessitate nati sumus. Propter quod Apostolus non ait, *Corpus quidem moriturum est propter peccatum*; sed ait, *Corpus quidem mortuum est propter peccatum, spiritus autem vita est propter justitiam*. Deinde subjungit: *Si autem Spiritus ejus qui suscitavit Christum a mortuis, habitat in vobis; qui suscitavit Christum a mortuis, vivificabit et mortalia corpora vestra, per inhabitantem Spiritum ejus in vobis (Rom. viii, 10, 11)*. Tunc ergo erit corpus in spiritum vivificantem, quod nunc est in animam viventem; et tamen mortuum dicit Apostolus, quia jam moriendi necessitate constrictum est. Tunc autem ita erat in animam viventem, quamvis non in spiritum vivificantem, ut tamen mortuum dici recte non posset; quia nisi perpetrato peccati necessitatem moriendi habere non posset. Cum vero Deus et dicendo, *Adam, ubi es?* mortem significaverit animæ, quæ facta est illo deserente; et dicendo, *Terra es, et in terram ibis (Gen. iii, 9, 19)*, mortem significaverit corporis, quæ illi sit anima discedente²: propterea de morte secunda nihil dixisse credendus est, quia occultam esse voluit propter dispensationem Te-

¹ Sic optimæ notæ Mss. Editi autem, *tardius esset tempore vetustateque finiendus*.

² Ita Mss. At editi, *discedente*.

tamenti novi, ubi secunda mors aperissime declaratur; ut prius ista mors prima, quæ communis est omnibus, proderetur ex illo venisse peccato, quod in uno commune factum est omnibus: mors vero secunda non utique communis est omnibus, propter eos qui secundum propositum vocati sunt¹, quos ante præcivit, et prædestinavit, sicut ait Apostolus, conformes imaginis Filii sui, ut sit ipsa primogenitus in multis fratribus (Rom. viii, 28 et 29), quos a secunda morte per Mediatorem Dei gratia liberavit².

2. In corpore ergo animali primum hominem factum, sic Apostolus loquitur. Volens enim ab spirituali quod in resurrectione futurum est, hoc quod nunc est animale discernere: *Seminatur*, inquit, *in corruptione, surgit in incorruptione; seminatur in contumelia, surgit in gloria; seminatur in infirmitate, surgit in virtute; seminatur corpus animale, surgit corpus spirituale*. Deinde ut hoc probaret, *Si est*, inquit, *corpus animale, est et spirituale*. Et ut quid esset corpus animale ostenderet, *Sic*, inquit, *scriptum est: Factus est primus homo in animam viventem*. Isto igitur modo voluit ostendere quid sit corpus animale, quamvis Scriptura non dixerit de primo homine, qui est appellatus Adam, quando illi³ anima flatu Dei creata est, Et factus est homo in corpore animali; sed, *Factus est homo in animam viventem* (Gen. ii, 7). In eo ergo quod scriptum est, *Factus est primus homo in animam viventem*, voluit Apostolus intelligi corpus hominis animale. Spirituale autem quemadmodum intelligendum esset, ostendit addendo, *Novissimus autem Adam in spiritum vivificantem*: procul dubio Christum significans, qui jam ex mortuis ita resurrexit, ut mori omnino deinceps non possit. Denique sequitur et dicit: *Sed non primum quod spirituale est, sed quod animale; postea, spirituale*. Ubi multo apertius declaravit, se animale corpus insinuas in eo quod scriptum est, factum esse primum hominem in animam viventem: spirituale autem in eo quod ait, *Novissimus Adam in spiritum vivificantem*. Prius est enim animale corpus, quale habuit primus Adam, quamvis non moriturum, nisi peccasset; quale nunc habemus et nos, hactenus ejus mutata vitiatæque natura, quatenus in illo, posteaquam peccavit, effectum est, unde haberet jam moriendi necessitatem; quale pro nobis etiam Christus primitus habere dignatus est, non quidem necessitate, sed potestate: postea vero spirituale, quale jam præcessit in Christo tanquam in capite nostro, securum est autem in membris ejus ultima resurrectione mortuorum.

3. Adjungit deinde Apostolus duorum istorum hominum evidentissimam differentiam, dicens: *Primus homo de terra, terrenus; secundus homo de cælo, cælestis. Qualis terrenus, tales et terreni: qualis cælestis,*

tales et cælestes. Et quomodo induimus imaginem terreni, induamus et imaginem ejus qui de cælo est (I Cor. xv, 42-49). Ille Apostolus ita posuit, ut nunc quidem in nobis secundum Sacramentum regenerationis fiat; sicut alibi dicit, *Quotquot in Christo baptizati estis, Christum induistis* (Galat. iii, 27): re autem ipsa tunc perficietur, cum et in nobis quod est animale nascendo, spirituale factum fuerit resurgendo. Ut enim ejus itidem verbis utar, *Spe salvi facti sumus* (Rom. viii, 24). Induimus autem imaginem terreni hominis propagatione prævaricationis et mortis, quam nobis intulit generatio: sed induimus imaginem cælestis hominis gratia indulgentiæ vitæque perpetuæ, quod nobis præstat regeneratio, non nisi per Mediatorem Dei et hominum hominem Jesum Christum (I Tim. ii, 5): quem cælestem hominem vult intelligi, quia de cælo venit, ut terrenæ mortalitatis corpore vestiretur, quod cælesti immortalitate vestiret. Cælestes vero ideo appellat et alios, quia fiunt per gratiam membra ejus, ut cum illis sit unus Christus, volut caput et corpus (α). Hoc in eadem Epistola evidentius ita ponit: *Per hominem mors, et per hominem resurrectio mortuorum. Sicut enim in Adam omnes moriuntur, sic et in Christo omnes vivificabuntur* (I Cor. xv, 21 et 22). Jam utique in corpore spirituali, quod erit in spiritum vivificantem. Non quia omnes qui in Adam moriuntur, membra erunt Christi (ex illis enim multo plures secunda in æternum morte plectentur); sed ideo dictum est, *omnes atque omnes*, quia sicut nemo corpore animali nisi in Adam moritur, ita nemo corpore spirituali nisi in Christo vivificatur. Proinde nequaquam putandum est, nos in resurrectione tale corpus habituros, quale habuit homo primus ante peccatum. Neque illud quod dictum est, *Qualis terrenus, tales et terreni*; secundum illud intelligendum est, quod factum est admissione peccati. Non enim existimandum est, eum prius quam peccasset, spirituale corpus habuisse, et peccati merito in animale mutatum. Ut enim hoc putetur, parum attenduntur tantum verba doctoris, qui ait, *Si est corpus animale, est et spirituale; sicut scriptum est, Factus est primus homo Adam in animam viventem*. Numquid hoc post peccatum factum est, cum sit ista hominis prima conditio, de qua beatissimus Apostolus ad corpus animale monstrandum, hoc testimonium Legis assumpsit?

CAPUT XXIV. — *Qualiter accipienda sit vel illa insufflatio, in qua primus homo factus est in animam viventem; vel illa quam Dominus fecit, dicens, Accipite Spiritum sanctum.*

1. Unde et illud parum considerate quibusdam visum est, in eo quod legitur, *Inspiravit Deus in faciem ejus spiritum vitæ, et factus est homo in animam viventem* (Gen. ii, 7), non tunc animam primo homini da-

¹ Filii. *vocati sunt sancti*; et infra, *conformes fieri*. At Mss. non habent, *sancti*, neque, *fieri*; quæ verba etiam absent a græco textu Apostoli.

² Illic incipit caput vigesimum tertium in nonnullis manuscriptoribus.

³ In quadam editione, *quomodo illa*.

(α) Ita visum est Origeni, libro 1, *peri Archôn*, cap. 3; Tertulliano, libro de Baptismo, cap. 5; Cypriano, Epistola ad Jubaianum; Cyrillo, libro nono in Joannem, cap. 47; Basilio, in Psalmum 48; Ambrosio, libro de Paradiso; Philastrio, et aliis. Conf. lib. 2 de Genesi contra Manich., ubi, 10, 11.

tam, sed eam quæ jam inerat, Spiritu sancto vivificatam. Movet enim eos, quod Dominus Jesus posteaquam resurrexit a mortuis, insufflavit, dicens discipulis suis, *Accipite Spiritum sanctum* (Joan. xx, 22). Unde tale aliquid existimant factum, quale tunc factum est: quasi et hic secutus Evangelista dixerit, *Et facti sunt in animam viventem*. Quod quidem si dictum esset, hoc intelligeremus, quod animarum quædam vita sit Spiritus Dei, sine quo animæ rationales mortuæ deputandæ sunt, quamvis earum præsentia vivere corpora videantur. Sed non ita factum, quando est conditus homo, satis ipsa libri verba testantur, quæ ita se habent: *Et formavit Deus hominem pulverem de terra*¹. Quod quidam planius interpretandum putantes dixerunt, *Et finxit Deus hominem de limo terræ*. Quoniam superius dictum fuerat, *Fons autem ascendebat de terra, et irrigabat omnem faciem terræ* (Gen. ii, 7. 6): ut ex hoc limus intelligendus videretur, humore scilicet terraque concretus. Ubi enim hoc dictum est, continuo sequitur, *Et formavit Deus hominem pulverem de terra*: sicut græci codices habent, unde in latinam linguam Scriptura ista conversa est (a). Sive autem *formavit*, sive *finxit*, quis dicere voluerit, quod græce dicitur *επλασεν*, ad rem nihil interest: magis tamen proprie dicitur, *finxit*. Sed ambiguitas visa est devitanda eis, qui *formavit* dicere maluerunt, eo quod in latina lingua illud magis obtinuit consuetudo, ut hi dicantur fingere, qui aliquid mendacio simulante componunt². Hunc igitur formatum hominem de terræ pulvere, sive limo (erat enim pulvis humectus); hunc, inquam, ut expressius dicam, sicut Scriptura locuta est, *pulverem de terra*, animale corpus factum esse docet Apostolus, cum animam accepit. *Et factus est iste homo in animam viventem*: id est, formatus iste pulvis factus est in animam viventem.

2. Jam, inquiunt, habebat animam, alioquin non appellaretur homo: quoniam homo non est corpus solum, vel anima sola, sed qui ex anima constat et corpore. Hoc quidem verum est, quod non totus homo, sed pars melior hominis anima est; nec totus homo corpus, sed inferior hominis pars est: sed cum est utrumque conjunctum simul, habet hominis nomen; quod tamen et singula non amittunt, etiam cum de singulis loquimur. Quis enim dicere prohibetur quotidiani quadam lege sermonis, Homo ille defunctus est, et nunc in requie est vel in pœnis; cum de anima sola possit hoc dici: et, Illo aut illo loco homo ille sepultus est; cum hoc nisi de solo corpore non possit intelligi? An dicturi sunt, sic loqui Scri-

pturam non solere divinam? Imo vero illa ita nobis in hoc attestatur, ut etiam cum duo ista conjuncta sunt et vivit homo, tamen etiam singula hominis vocabulo appellet; animam scilicet interiorem hominem, corpus vero exteriorem hominem vocans (II Cor. iv, 16), tanquam duo sint homines, cum simul utrumque sit homo unus. Sed intelligendum est, secundum quid dicatur homo ad imaginem Dei, et homo terra atque iturus in terram. Illud enim secundum animam rationalem dicitur, quem Deus insufflando, vel, si commodius dicitur, inspirando indidit homini, id est hominis corpori: hoc autem secundum corpus, quem hominem Deus finxit ex pulvere, cui data est anima, ut fieret corpus animale, id est homo in animam viventem.

3. Quapropter in eo quod Dominus fecit, quando insufflavit dicens, *Accipite Spiritum sanctum*, nimirum hoc intelligi voluit, quod Spiritus sanctus non tantum sit Patris, verum etiam Unigeniti ipsius Spiritus. Idem ipse quippe Spiritus est et Patris et Filii, cum quo est Trinitas Pater et Filius et Spiritus sanctus, non creatura, sed Creator. Neque enim flatus ille corporeus de carnis ore procedens substantia erat Spiritus sancti atque natura, sed potius significatio, qua intelligeremus, ut dixi, Spiritum sanctum Patri esse Filioque communem: quia non sunt eis singulis singuli, sed unus amborum est. Semper autem iste Spiritus in Scripturis sanctis græco vocabulo *πνεῦμα* dicitur, sicut eum et hoc loco Dominus appellavit, quando eum corporalis sui oris flatu significans, discipulis suis dedit: et locis omnibus divinatorum eloquiorum non mihi aliter unquam nuncupatus occurrit. Hic vero, ubi legitur, *Et finxit Deus hominem pulverem de terra, et insufflavit*, sive *inspiravit in faciem ejus spiritum vitæ*; non ait græcus *πνεῦμα*, quod solet dici Spiritus sanctus, sed *πνεῦμα*: quod nomen in creatura quam in Creatore frequentius legitur: unde nonnulli etiam Latini, propter differentiam, hoc vocabulum non spiritum, sed flatum appellare maluerunt. Hoc enim est in græco etiam illo loco apud Isaiam, ubi Deus dicit, *Omnem flatum ego feci* (Isai. lvi, 16, sec. LXX), omnem animam sine dubitatione significans. Quod itaque græce *πνεῦμα* dicitur, nostri aliquando flatum, aliquando spiritum, aliquando inspirationem, vel adspirationem, quando etiam Dei dicitur, interpretati sunt³: *πνεῦμα*, vero nunquam nisi spiritum; sive hominis, de quo ait Apostolus, *Quis enim scit hominum quæ sunt hominis, nisi spiritus hominis qui in ipso est* (I Cor. ii, 11)? sive pecoris, sicut in Salomonis libro scriptum est, *Quis scit si spiritus hominis ascendat sursum in cælum, et spiritus pecoris descendat deorsum in terram* (Eccle. iii, 21)? sive istum corporeum, qui etiam ventus dicitur: nam ejus hoc nomen est, ubi in Psalmo canitur, *Ignis, grando, nix, glacies, spiritus tempestatis* (Psal. cxlviii, 8): sive jam non creatum, sed Creatorem, sicut est de quo dicit Dominus in Evangelio,

¹ Ludovicus Vives: Septuaginta sic verterunt, *Καὶ ἐπλασεν ὁ Θεὸς τὸν ἀνθρώπον, χλοῦν λαβὼν ἀπὸ τῆς γῆς*: *Et finxit Deus hominem, pulvere de terra sumpto*. Suspicio hoc Augustini loco deesse unum verbum; ut sit, *Finxit Deus hominem, pulverem capiens de terra*; aut in ablativo, *Finxit Deus hominem, pulvere capto de terra*. Nam Laurini codex habet, *pulvere*. Tametsi in Targo Chaldaeo legitur, *Creavit Deus hominem pulverem de terra*.

² Aliquot Mss., *simulant et componunt*.

(a) Ostendit olim usas Ecclesias interpretatione latina ex græco Septuaginta, cui postea successit interpretatio Hieronymi ex hebræo.

³ Sic Mss. At editi, *aliquando etiam animam interpretantur*.

Accipite Spiritum sanctum; eum corporei¹ sui oris significans flatu. Et ubi ait, *Ite, baptizate omnes gentes in nomine Patris et Filii et Spiritus sancti* (*Matth. xxviii, 19*): ubi ipsa Trinitas excellentissime et evidentissime commendata est. Et ubi legitur, *Deus spiritus est* (*Joan. 17, 24*). Et aliis plurimis sacrarum Litterarum locis. In his quippe omnibus testimoniis Scripturarum, quantum ad Græcos attinet, non πνεῦμα videmus scriptum esse, sed πνοή: quantum autem ad Latinos, non flatum, sed spiritum. Quapropter in eo quod scriptum est, *Inspiravit*, vel, si magis proprie dicendum est, *Insufflavit in faciem ejus spiritum vitæ*; si græcus non πνοή, sicut ibi legitur, sed πνεῦμα posuisset, nec sic esset consequens, ut Creatorem Spiritum, qui proprie dicitur in Trinitate Spiritus sanctus, intelligere cogeremur: quandoquidem πνεῦμα, ut dictum est, non solum de Creatore, sed etiam de creatura dici solere manifestum est.

4. Sed cum dixisset, inquit, *spiritum*, non adderet *vitæ*, nisi illic² Spiritum sanctum vellet intelligi: et cum dixisset, *Factus est homo in animam*, non adderet, *viventem*, nisi animæ vitam significaret, quæ illi divinitus impertitur dono Spiritus Dei. Cum enim vivat anima, inquit, proprio suæ vitæ modo, quid opus erat addere *viventem*, nisi ut ea vita intelligeretur, quæ illi per Spiritum sanctum datur? Hoc quid est aliud, nisi diligenter pro humana suspitione contendere, et Scripturas sanctas negligenter attendere? Quid enim magnum erat non ire longius, sed in eodem libro ipso paulo superius legere, *Producat terra animam viventem* (*Gen. 1, 24*); quando animalia terrestria cuncta creata sunt? Deinde aliquantis interpositis, in eodem tamen ipso libro, quid magnum erat advertere quod scriptum est, *Et omnia quæ habent spiritum vitæ, et omnis qui erat super aridam, mortuus est* (*Id. vii, 22*); cum insinualet omnia quæ vivebant in terra periisse diluvio? Si ergo et animam viventem, et spiritum vitæ etiam in pecoribus invenimus, sicut loqui divina Scriptura consuevit; et cum hoc quoque loco, ubi legitur, *Omnia quæ habent spiritum vitæ*, non græcus πνεῦμα, sed πνοή dixerit: cur non dicimus, Quid opus erat ut adderet, *viventem*, cum anima nisi vivat esse non possit? aut, Quid opus erat ut adderet, *vitæ*, cum dixisset *spiritum*? Sed intelligimus *spiritum vitæ*, et *animam viventem* Scripturam suo more dixisse, cum animalia, id est corpora animata, vellet intelligi, quibus inesset per animam perspicuus iste etiam corporis sensus. In hominis autem conditione obliviscimur, quemadmodum loqui Scriptura consueverit, cum suo prorsus more locuta sit: quo insinualet hominem etiam rationali anima accepta, quam non sicut aliarum carniū aquis et terra producentibus, sed Deo flante creatam voluit intelligi; sic tamen factum, ut in corpore animali, quod sit anima in eo vivente, sicut illa animalia viveret, de quibus dixit, *Producat terra animam viventem*: et quæ itidem dicit habuisse in se

spiritum vitæ; ubi etiam in græco non dixit πνεῦμα, sed πνοή: non utique Spiritum sanctum, sed eorum animam tali exprimens nomine.

5. Sed enim Dei flatus, inquit, Dei ore exisse intelligitur, quem si animam crediderimus, consequens erit ut ejusdem fateamur esse substantiæ, parremque illius Sapientiæ, quæ dicit, *Ego ex ore Altissimi providi* (*Eccli. xxiv, 5*). Non quidem dixit Sapientia ore Dei efflatam se fuisse, sed ex ejus ore prodisse. Sicut autem nos possumus, non de nostra natura qua homines sumus, sed de isto aere circumfuso, quem spirando ac respirando ducimus ac reducimus³, flatum facere cum sufflamus: ita omnipotens Deus, non de sua natura, neque de subjacenti creatura, sed etiam de nihilo potuit facere flatum, quem corpori hominis inserendo inspirasse vel insufflasse convenientissime dictus est, incorporeus incorporeum, sed immutabilis mutabilem; quia non creatus creatum. Verumtamen ut sciant isti, qui de Scripturis loqui volunt, et Scripturarum locutiones non advertunt, non hoc solum dici ex ore Dei, quod est æqualis ejusdemque nature, audiant, vel legant quod Deo dicente scriptum est: *Quoniam tepidus es, et neque calidus neque frigidus, incipiam te evomere ex ore meo* (*Apoc. iii, 16*).

6. Nulla itaque causa est, cur apertissime loquenti resistamus Apostolo, ubi ab spirituali corpore corpus animale discernens, id est, ab illo in quo futuri sumus, hoc in quo nunc sumus, ait: *Seminatur corpus animale, surg: corpus spirituale: si est corpus animale, est et spirituale, sicut scriptum est, Factus est primus homo Adam in animam viventem, novissimus Adam in spiritum vivificantem. Sed non primum quod spirituale est, sed quod animale; postea, quod spirituale. Primus homo de terra, terrenus; secundus homo de cælo, cælestis. Qualis terrenus, tales et terreni: qualis cælestis, tales et cælestes. Et quomodo induimus imaginem terreni, induamus et imaginem ejus qui de cælo est* (*I Cor. xv, 44-49*). De quibus omnibus apostolicis verbis superius locuti sumus. Corpus igitur animale, in quo primum hominem Adam factum esse dicit Apostolus, sic erat factum, non ut mori omnino non posset; sed ut non moreretur, nisi homo peccasset. Nam illud quod spiritu vivificante spirituale erit et immortale, mori omnino non poterit. Sicut anima creata est immortalis, quæ licet peccato mortua perhibeatur carens quadam vita sua, hoc est Dei Spiritu, quo etiam sapienter et beate vivere poterat: tamen propria quadam, licet misera, vita sua non desinit vivere; quia immortalis est creata. Sicut etiam desertores angeli, licet secundum quemdam modum mortui sint peccando; quia fontem vitæ deseruerunt, qui Deus est, quem potando, sapienter beateque poterant vivere: tamen non sic mori poterunt, ut omnino desisterent vivere atque sentire; quoniam immortales creati sunt: atque ita in secundam mortem post ultimum præcipitabantur judicium, ut nec illic vita careant; quandoquidem etiam sensu,

¹ sic Mss. At editi alii, corporeo; alii, incorporeo.

² Vind. Am. Ex. et Mss., illum.

³ Nostri codices 2030 et 2031, ac reddimus. M.

cum in doloribus futuri sunt, non carebunt. Sed homines ad Dei gratiam pertinentes cives sanctorum Angelorum in beata vita manentium, ita spiritualibus corporibus induentur, ut neque peccent amplius, neque moriantur: ea tamen immortalitate vestiti, quæ, sicut Angelorum, nec peccato possit auferri; natura quidem manente carnis, sed nulla omnino carnali corruptibilitate vel tarditate remanente.

7. Sequitur autem quæstio necessario pertractanda, et Domino Deo veritatis adjuvante solvenda. Si libido membrorum inobedientium ex peccato inobedienciæ

in illis primis hominibus, cum illos divina gratia deseruisset, exorta est; unde in suam nuditatem oculos aperuerunt, id est, eam curiosius adverterunt, et quia impudens motus voluntatis arbitrio resistebat, pudenda texerunt: quomodo essent filios propagaturi, si, ut creati fuerant, sine prævaricatione mansissent. Sed quia et liber iste claudendus est, nec tanta quæstio in sermonis angustias coarctanda, in eum qui sequitur, commodiore dispositione differatur.¹

¹ Sic Er. et aliquot Mss. Alii, *dispositione differtur*.

LIBER QUARTUS DECIMUS (a).

Rursum de primi hominis peccato, ex quo vitæ carnalis et vitiosorum affectuum causam profluxisse docet Augustinus: sed præsertim libidinis erubescendæ malum poenam inobedienciæ reciprocam esse ostendit, et quomodo, si non peccasset homo, filios fuisset absque libidine propagaturus, inquirat.

CAPUT PRIMUM. — *Per inobedientiam primi hominis in secundæ mortis perpetuitatem ruituros omnes fuisse, nisi multos Dei gratia liberaret.*

Diximus jam in superioribus libris ad humanum genus, non solum naturæ similitudine sociandum, verum etiam quadam cognationis necessitudine in unitatem concordem pacis vinculo colligandum, ex homine uno Deum voluisse homines instituere: neque hoc genus fuisse in singulis quibusque moriturum, nisi duo primi, quorum creatus est unus ex nullo, altera ex illo, id inobediencia meruissent: a quibus admissum est tam grande peccatum, ut in deterius eo natura mutaretur humana, etiam in posterorū obligatione peccati et mortis necessitate transmissa. Mortis autem regnum in homines usque adeo dominatum est, ut omnes in secundam quoque mortem, cujus nullus est finis, pœna debita præcipites ageret, nisi inde quosdam indebita Dei gratia liberaret. Ac per hoc factum est, ut cum tot tantæque gentes per terrarum orbem diversis ritibus moribusque viventes, multiplices linguarum, armorum, vestium varietate distinctæ; non tamen amplius quam duo quædam genera humanæ societatis existerent, quas civitates duas secundum Scripturas nostras merito appellare possimus. Una quippe est hominum secundum carnem, altera secundum spiritum vivere in sui cujusque generis pace volentium; et cum id quod expetunt assequuntur, in sui cujusque generis pace viventium.

CAPUT II. — *De vita carnali, quæ non ex corporis tantum, sed etiam ex animi sit intelligenda vitii.*

1. Prius ergo videndum est, quid sit secundum carnem, quid secundum spiritum vivere. Quisquis enim hoc quod diximus prima fronte inspicit, vel non recolens, vel minus advertens quemadmodum Scripturæ sanctæ loquantur, potest putare philosophos quidem Epicureos secundum carnem vivere, quia summum bonum hominis in corporis voluptate po-

suerunt; et si qui alii sunt, qui quoquo modo corporis bonum, summum bonum esse hominis opinati sunt; et omne eorum vulgus, qui non aliquo dogmate, vel eo modo philosophantur, sed proclives ad libidinem, nisi ex voluptatibus, quas corporeis sensibus capiunt, gaudere nesciunt: Stoicos autem, qui summum bonum hominis in animo ponunt, secundum spiritum vivere; quia et hominis animus quid est, nisi spiritus? Sed sicut loquitur Scriptura divina, secundum carnem vivere utrique monstrantur. Carnem quippe appellat, non solum corpus terreni atque mortalis animantis: veluti cum dicit, *Non omnis caro eadem caro; sed alia quidem hominis, alia autem caro pecoris, alia volucrum, alia piscium* (1 Cor. xv, 39): sed aliis multis modis significatione hujus nominis utitur, inter quos varios locutionis modos sæpe etiam ipsum hominem, id est naturam hominis, carnem nuncupat, modo locutionis a parte totum¹, quale est, *Ex operibus legis non justificabitur omnis caro* (Rom. iii, 20). Quid enim voluit intelligi, nisi omnis homo? Quod apertius paulo post ait, *In lege nemo justificatur*² (Galat. iii, 11): et ad Galatas, *Scientes quia non justificabitur homo ex operibus legis* (Id. ii, 16). Secundum hoc intelligitur, *Et Verbum caro factum est* (Joan. i, 14): id est, homo. Quod non recte accipientes quidam (a), putaverunt Christo humanam animam defuisse. Sicut enim a toto pars accipitur, ubi Mariæ Magdalenæ verba in Evangelio leguntur dicentis, *Abstulerunt Dominum meum, et nescio ubi posuerunt eum* (Id. xx, 13); cum de sola Christi carne loqueretur, quam sepultam de monumento putabat ablata: ita et a parte totum, carne nominata intelligitur homo; sicuti ea sunt quæ supra commemoravimus.

2. Cum igitur multis modis, quos perscrutari et colligere longum est, divina Scriptura nuncupet car-

¹ Er. et Lov., *a parte totum significans*. Abest, *significans*, ab editis aliis et Mss. ut sensus sit, *modo locutionis quæ appellatur, a parte totum*.

² Lov., *in lege non justificabitur omnis homo*. Editi alii et Mss., *in lege nemo justificatur; vel, justificabitur*.

³ Codex 2031, *justificatur*. M.

(a) Apollinaristæ.

(a) Citatur hic liber in libro I contra Advers. Legis et Prophet., n. 18, scripto circiter annum 420.

nen: quid sit secundum carnem vivere (quod profecto malum est, cum ipsa carnis natura non sit malum) ut indagare possimus, inspicimus diligenter illum locum Epistolæ Pauli apostoli, quam scripsit ad Galatas, ubi ait, *Manifesta autem sunt opera carnis, quæ sunt adulteria, fornicationes, immunditiæ, luxuriæ, idolorum servitus, veneficia, inimicitias, contentiones, æmulationes, animositates, dissensiones, hæreses, invidiæ, ebrietates, comessationes, et his similia; quæ prædico vobis, sicut et prædixi, quoniam qui talia agunt, regnum Dei non possidebunt* (Galat. v, 19-21). Iste totus Epistolæ apostolicæ locus, quantum ad rem præsentem satis esse videbitur, consideratis, poterit hanc dissolvere quæstionem, quid sit secundum carnem vivere. In operibus namque carnis, quæ manifesta esse dixit, eaque commemorata damnavit, non illa tantum invenimus, quæ ad voluptatem pertinent carnis, sicuti sunt fornicationes, immunditiæ, luxuriæ, ebrietates, comessationes; verum etiam illa quibus animi vitia demonstrantur a voluptate carnis aliena. Quis enim servitatem quæ idolis exhibetur, veneficia, inimicitias, contentiones, æmulationes, animositates, dissensiones, hæreses, invidias, non potius intelligat animi vitia esse quam carnis? Quandoquidem fieri potest, ut propter idololatriam vel hæresis alicujus errorem a voluptatibus carnis temperetur: et tamen etiam tunc homo; quamvis carnis libidines continere atque cohibere videatur, secundum carnem vivere hæc apostolica auctoritate vincitur; et in eo quod abstinet a voluptatibus carnis, damnabilia opera carnis agere demonstratur. Quis inimicitias non in animo habeat? aut quis ita loquatur, ut inimico suo, vel quem putat inimicum, dicat, *Malam carnem, ac non potius, Malum animum habes adversum me?* Postremo sicut carnalitates, ut ita dicam, si quis audisset, non dubitasset carni tribuere; ita nemo dubitat animositates ad animum pertinere: cur ergo hæc omnia et his similia Doctor Gentium in fide et veritate opera carnis appellat, nisi quia eo locutionis modo, quo totum significatur a parte, ipsum hominem vult nomine carnis intelligi?

CAPUT III. — *Peccati causam ex anima, non ex carne prodiisse, et corruptionem ex peccato contractam, non peccatum esse, sed penam.*

1. Quod si quisquam dicit, carnem causam esse in malis moribus quorumcumque vitiorum, eo quod anima carne affecta sic vivit; profecto non universam hominis naturam diligenter advertit. Nam *corpus* quidem *corruptibile aggravat animam* (Sap. ix, 15). Unde etiam ideam apostolus agens de hoc corruptibili corpore, de quo paulo ante dixerat, *Etsi exterior homo noster corrumpitur* (II Cor. iv, 16): *Scimus, inquit, quia si terrena nostra domus habitationis¹ dissolvatur, ædificationem habemus ex Deo, domum non manufactam æternam in cælis. Etenim in hoc ingemiscimus, habitaculum nostrum quod de cælo est superindui cupientes: si tamen et induti², non*

nudi inveniamur. Etenim qui sumus¹ in hac habitatione, ingemiscimus gravati: eo quod nolumus exspoliari, sed supervestiri, ut absorbeatur mortale a vita (II Cor. v, 1-4). Et aggravamur ergo corruptibili corpore, et ipsius aggravationis causam, non naturam substantiamque corporis, sed ejus corruptionem scientes, nolumus corpore exspoliari, sed ejus immortalitate vestiri. Et tunc enim erit (a), sed quia corruptibile non erit, non gravabit. *Aggravat ergo nunc animam corpus corruptibile, et deprimit terrena inhabitatio sensum multa cogitantem* (Sap. ix, 15). Verumtamen qui omnia animæ mala ex corpore putant accidisse, in errore sunt.³

2. Quamvis enim Virgilius Platoniam videatur luculentis versibus explicare sententiam, dicens,

Ignes est ollis³ vigor et celestis origo
Semiisibus, quantum non noxia corpora tardant,
Terrenique hebetant artus moribundaque membra;

omnesque illas notissimas quatuor animi perturbationes, cupiditatem, timorem, lætitiā, tristitiā, quasi origines omnium peccatorum atque vitiorum volens intelligi ex corpore accidere, subjungat et dicat,

Hinc metuunt cupiuntque, dolent gaudentque, nec auras
Suspiciunt, clausæ tenebris et carcere cæco:
(Æneid. lib. 6, vers. 750-754.)

tamen aliter se habet fides nostra. Nam corruptio corporis, quæ aggravat animam, non peccati primi est causa, sed pœna; nec caro corruptibilis animam peccatricem, sed anima peccatrix fecit esse corruptibilem carnem. Ex qua corruptione carnis licet existant quædam incitamenta vitiorum, et ipsa desideria vitiosa: non tamen omnia vitæ huius vitia tribuenda sunt carni, ne ab his omnibus purgemus diabolum, qui non habet carnem. Etsi enim diabolus fornicator vel ebriosus, vel si quid hujusmodi mali est quod ad carnis pertinet voluptates, non potest dici, cum sit etiam talium peccatorum suasor et instigator occultus: est tamen maxime superbus atque invidus. Quæ illum vitiositas sic obtinuit, ut propter hanc esset in carceribus caliginosi hujus aeris æterno supplicio destinatus (b). Hæc autem vitia quæ tenent in diabolo principatum, carni tribuit Apostolus, quam certum est diabolum non habere. Dicit enim, inimicitias, contentiones, æmulationes, animositates, invidias, opera esse carnis (Galat. v, 20-21): quorum omnium malorum caput atque origo superbia est, quæ sine carne regnat in diabolo. Quis autem illo est inimicior sanctis? quis adversus eos contentiosior, animosior et magis æmulus atque invidus invenitur? Et hæc omnia cum habeat sine carne, quomodo sunt ista opera carnis, nisi quia opera sunt hominis, quem, sicut dixi, nomine carnis appellat? Non enim habendo carnem, quam non habet diabolus; sed vivendo secundum se ipsum, hoc est secundum hominem, factus est homo similis diabolo: quia et ille secundum se ipsum

¹ Editi, *quamdiu sumus*. Verius Mss., *qui sumus*.

² Hic incipit caput tertium in Mss.

³ Nostri Mss., *illis*. M.

(a) Supple, *corpus*.

(b) Conf. lib. de Agone Christ., n. 5-3, et lib. de Sal. Bouët contra Manich., cap. 33.

¹ Editi, *hujus habitationis*. Abest, *hujus*, a manuscriptis et a græco textu Apostoli

² Sic Mss. juxta græc. At editi, *si tamen induti*; omisso, et.

vivere voluit, quando in veritate non stetit; ut non de Dei, sed de suo, mendacium loqueretur, qui non solum mendax, verum etiam mendacii pater est (Joan. viii, 44). Primus est quippe mentitus, et a quo peccatum, ab illo coepit esse mendacium.

CAPUT IV. — *Quid sit secundum hominem, quidve secundum Deum vivere.*

1. Cum ergo vivit homo secundum hominem, non secundum Deum, similis est diabolo. Quia nec angelo secundum angelum, sed secundum Deum vivendum fuit, ut staret in veritate, et veritatem de illius, non de suo mendacium loqueretur. Nam et de homine alio loco idem apostolus ait, *Si autem veritas Dei in meo mendacio abundavit* (Rom. iii, 7). Meum¹ dixit mendacium, veritatem Dei. Cum itaque vivit homo secundum veritatem, non vivit secundum se ipsum, sed secundum Deum. Deus est enim qui dixit, *Ego sum veritas* (Joan. xiv, 6). Cum vero vivit secundum se ipsum, hoc est secundum hominem, non secundum Deum, profecto secundum mendacium vivit: non quia homo ipse mendacium est, cum sit ejus auctor et creator Deus, qui non est utique auctor creatorque mendacii; sed quia homo ita factus est rectus, ut non secundum se ipsum, sed secundum eum a quo factus est, viveret; id est, illius potius, quam suam faceret voluntatem: non autem ita vivere, quemadmodum est factus ut viveret, hoc est mendacium. Beatus quippe vult esse, etiam non sic vivendo ut possit esse. Quid est ista voluntate mendacius? Unde non frustra dici potest, omne peccatum esse mendacium. Non enim fit peccatum, nisi ea voluntate, qua volumus ut bene sit nobis, vel nolimus ut male sit nobis. Ergo mendacium est, quod cum fiat ut bene sit nobis, hinc potius male est nobis; vel cum fiat ut melius sit nobis, hinc potius pejus est nobis. Unde hoc, nisi quia de Deo potest bene esse homini, quem delinquendo deserit; non de se ipso, secundum quem vivendo delinquit?

2. Quod itaque diximus, hinc exstitisse civitates duas diversas inter se atque contrarias, quod alii secundum carnem, alii secundum spiritum viverent; potest etiam isto modo dici quod alii secundum hominem, alii secundum Deum vivant. Apertissime quippe Paulus ad Corinthios dicit: *Cum enim inter vos sint ambulatio et contentio, nonne carnales estis, et secundum hominem ambulatis* (1 Cor. iii, 3)? Quod ergo est ambulare secundum hominem, hoc est esse carnalem; quod a carne, id est a parte hominis, intelligitur homo. Eisdem ipsos quippe dixit superius animales, quos postea carnales, ita loquens: *Quis enim scit, inquit, hominum quas sunt hominis, nisi spiritus hominis, qui in ipso est? Sic et quas Dei sunt, nemo scit nisi Spiritus Dei. Nos autem, inquit, non spiritum hujus mundi accepimus, sed Spiritum qui ex Deo est, ut sciamus quas a Deo donata sunt nobis; quas et loquimur, non in sapientia humanae doctis verbis, sed doctis spiritu², spiritualibus spiritualibus comparantes. Animalis autem homo non percipit quas sunt Spiritus Dei: stultitia est*

¹ Mss.: Nostrum.

² Editi et Mss., *sed docti spiritus*: excepto Colbertino veteri codice, qui habet, *sed doctis spiritu*; juxta graecum, *all' en didactois*; pro quo vulgata, *sed in doctrina*.

enim illi (1 Cor. ii, 11-14). Talibus igitur, id est animalibus, paulo post dicit, *Et ego, fratres, non potui loqui vobis quasi spiritualibus, sed quasi carnalibus* (Id. iii, 1). Et illud ex hoc eodem loquendi modo intelligitur, id est¹, a parte totum. Et ab anima namque, et a carne, quae sunt partes hominis, potest totum significari, quod est homo; atque ita non est aliud animalis homo, aliud carnalis; sed idem ipsum est utrumque, id est, secundum hominem vivens homo. Sicut non aliud quam homines significantur, sive ubi legitur, *Ex operibus legis non justificabitur omnis caro* (Rom. iii, 20): sive quod scriptum est, *Septuaginta quinque animae (a) descenderunt cum Jacob in Egyptum* (Gen. xlvi, 27). Et ibi enim per omnem carnem omnis homo, et ibi per septuaginta quinque animas septuaginta quinque homines intelliguntur. Et quod dictum est, *Non in sapientiae humanae doctis verbis*, potuit dici, *Non in sapientiae carnalis*: sicut quod dictum est, *Secundum hominem ambulatis*; potuit dici, *Secundum carnem*. Magis autem hoc apparuit in his quae subjunxit: *Cum enim quis dicat, Ego sum Pauli; alius autem, Ego Apollo: nonne homines estis* (1 Cor. iii, 4)? Quod dicebat, *Animales estis*, et, *Carnales estis*; expressius dixit, *Homines estis*: quod est, *Secundum hominem vivitis, non secundum Deum; secundum quem si viveretis, dii essetis*.

CAPUT V. — *Quod de corporis animaeque natura tolerabilior quidem Platonicorum quam Manichaeorum sit opinio; sed et ipsi reprobantur, quoniam vitiorum causas naturae carnis adscribunt.*

Non igitur opus est in peccatis vitis que nostris ad Creatoris injuriam carnis accusare naturam, quae in genere atque ordine suo bona est: sed deserto Creatore bono, vivere secundum creatum bonum, non est bonum; sive quisque secundum carnem, sive secundum animam, sive secundum totum hominem, qui constat ex anima et carne (unde et nomine solius animae, et nomine solius carnis significari potest), eligat vivere. Nam qui velut summum bonum laudat animae naturam, et tanquam malum naturam carnis accusat, profecto et animam carnaliter appetit, et carnem carnaliter fugit: quoniam id vanitate sentit humana, non veritate divina. Non quidem Platonicus, sicut Manichaei desipiunt, ut tanquam mali naturam terrena corpora detestentur (b); cum omnia elementa, quibus iste mundus visibilis contrectabilisque compactus est, qualitatesque eorum Deo artifice tribuant. Verumtamen ex terrenis artibus moribundisque membris sic affici animas opinantur, ut hinc eis sint morbi cupiditatum et timorum et laetitiae sive tristitiae: quibus quatuor vel perturbationibus, ut Cicero appellat (*Tusculo, quaest. lib. 4, cap.*) vel passionibus, ut plerique, verbum e verbo graeco exprimunt (c), omnis

¹ Mss., *Ex hoc eodem loquendi modo, id est; nec habent, intelligitur*.

(a) Sequitur editionem LXX Interpretum. Nam vulgata nostra non plures quam septuaginta animas recenset. Tametsi liber Actuum Apostolorum, vii, 14, habet animas septuaginta quinque. Vide infra, lib. 16, cap. 40.

(b) Conf. lib. de Haeres., haer. 48.

(c) Conf. supra, lib. 8, cap. 17, n. 1.

humanorum morum vitiositas continetur. Quod si ita est, quid est quod Æneas apud Virgilium, cum audisset a patre apud inferos, animas rursus ad corpora redituras, hanc opinionem miratur, exclamans :

O pater, ane aliquas ad cælum hinc ire putandum est
Sublimes animas, iterumque ad tarda reverti
Corpora? Quæ lucis miseris tam dira cupido?

(*Æneid. lib. 6, vers. 719-721.*)

Nam quidnam hæc tam dira cupido ex terrenis artibus moribundisque membris adhuc inest animarum illi prædicatissimæ puritati? Nonne ab hujusmodi corporeis, ut dicit, pestibus omnibus eas asserit esse purgatas, cum rursus incipiunt in corpora velle reverti? Unde colligitur, etiamsi ita se haberet, quod est omnino vanissimum, vicissim alternans incessabiliter euntium atque redeuntium animarum mundatio et inquinatio, non potuisse veraciter dici, omnes culpabiles atque vitiosos motus animarum eis ex terrenis corporibus inolescere: siquidem secundum ipsos illa, ut locutor nobilis ait, dira cupido usque adeo non est ex corpore, ut ab omni corporea peste¹ purgatam, et extra omne corpus animam constitutam, ipsam compellat esse in corpore. Unde etiam, illis fatentibus, non ex carne tantum afflicta anima, ut cupiat, metuat, lætetur, agrescat²; verum etiam ex se ipsa his potest motibus agitari.

CAPUT VI. — *De qualitate voluntatis humanæ, sub cuius iudicio affectiones animi aut prævæ habentur, aut rectæ.*

Interest autem qualis sit voluntas hominis: quia si perversa est, perversos habebit hos motus; si autem recta est, non solum inculpabiles, verum etiam laudabiles erunt. Voluntas est quippe in omnibus: imo omnes nihil aliud quam voluntates sunt. Nam quid est cupiditas et lætitia, nisi voluntas in eorum consensionem³ quæ volumus? et quid est metus atque tristitia, nisi voluntas in dissensionem ab his quæ volumus? Sed cum consentimus appetendo ea quæ volumus, cupiditas; cum autem consentimus fruendo his quæ volumus, lætitia vocatur. Itemque cum dissentimus ab eo quod accidere volumus, talis voluntas metus est; cum autem dissentimus ab eo quod nolentibus accidit, talis voluntas tristitia est. Et omnino pro varietate rerum quæ appetuntur atque fugiuntur, sicut allicitur vel offenditur voluntas hominis, ita in hos vel illos affectus mutatur et vertitur. Quapropter homo qui secundum Deum, non secundum hominem vivit, oportet ut sit amator boni: unde fit consequens ut malum oderit. Et quoniam nemo natura, sed quisquis malus est, vitio malus est: perfectum odium (*Psal. cxxxviii, 22*) debet malis, qui secundum Deum vivit; ut nec propter vitium oderit hominem, nec amet vitium propter hominem; sed oderit vitium, amet hominem. Sædato enim vitio, totum quod amare, nihil autem quod debeat odisse, remanebit.

¹ Nonnulli codices, *parte*.

² Sic MSS. At editi, *et tristetur*.

³ MSS., *consensione*: et infra, *in dissensione*.

CAPUT VII. — *Amorem et dilectionem indifferenter et in bono et in malo apud sacras Litteras inveniri.*

1. Nam cujus propositum est amare Deum, et non secundum hominem, sed secundum Deum amare proximum, sicut etiam se ipsum; procul dubio propter hunc amorem dicitur voluntatis bonæ, quæ usitatus in Scripturis sacris charitas appellatur: sed amor quoque secundum easdem sacras Litteras dicitur. Nam et amatorem boni dicit Apostolus esse debere, quem regendo populo præcepit eligendum (*1 Tim. iii, 4-10*). Et ipse Dominus Petrum apostolum interrogans, cum dixisset, *Diligis me plus his?* ille respondit, *Domine, tu scis quia amo te*. Et iterum Dominus quæsit, non utrum amaret, sed utrum diligeret eum Petrus: at ille respondit iterum, *Domine, tu scis quia amo te*. Tertio vero interrogatione et ipse Dominus non ait; *Diligis me, sed, Amas me?* ubi secutus ait Evangelista, *Contristatus est Petrus, quia dixit ei tertio, Amas me?* cum Dominus non tertio, sed semel dixerit, *Amas me?* bis autem dixerit, *Diligis me?* Unde intelligimus, quod etiam cum dicebat Dominus, *Diligis me?* nihil aliud dicebat, quam, *Amas me?* Petrus autem non mutavit hujus unius rei verbum, sed etiam tertio, *Domine, inquit, tu omnia scis, tu scis quia amo te* (*Joan. xxi, 15-17*).

2. Hoc propterea commemorandum putavi, quia nonnulli arbitrantur aliud esse dilectionem sive charitatem, aliud amorem. Dicunt enim dilectionem accipiendam esse in bono, amorem in malo (a). Sic autem nec ipsos auctores secularium litterarum locutos esse, certissimum est. Sed viderint philosophi utrum vel qua ratione ista discernant. Amorem tamen eos in bonis rebus et erga ipsum Deum magni pendere, libri eorum satis loquuntur. Sed Scripturas religionis nostræ, quarum auctoritatem cæteris quibusque litteris anteponimus, non aliud dicere amorem, aliud dilectionem vel charitatem, insinuandum fuit. Nam et amorem in bono dici, jam ostendimus. Sed ne quis existimet amorem quidem et in bono et in malo, dilectionem autem non nisi in bono esse dicendam, illud attendat quod in Psalmo scriptum est: *Qui autem diligit iniquitatem, odit animam suam* (*Psal. x, 6*). Et illud apostoli Joannis: *Si quis dilexerit mundum, non est dilectio Patris in eo* (*1 Joan. ii, 15*). Ecce uno loco dilectio et in bono et in malo. Amorem autem in malo (quia in bono jam ostendimus) ne quisquam flagitet, legat quod scriptum est: *Erunt enim homines se ipsos amantes, amatores pecuniæ* (*II Tim. iii, 2*). Recta itaque voluntas est bonus amor, et voluntas perversa malus amor. Amor ergo inhians habere quod amatur, cupiditas est; id autem habens eoque fruens, lætitia est: fugiens quod ei adversatur, timor est: idque si acciderit sentiens, tristitia est. Proinde mala sunt ista, si malus est amor; bona, si bonus. Quod dicimus, de Scripturis probemus. Concupiscit Apostolus dissolvi, et esse cum Christo (*Philipp. 1, 25*): et, *Concupivit anima mea desiderare judicia tua*; vel s accommodatius dicitur, *Desideravit anima mea concupi-*

(a) Sic Origenes usum scripturæ exponit in Homilia 1 in Cantica canticorum. LUD. VIVES.

scere iudicia tua (Psal. cxxviii, 26); et, *Concupiscentia sapientiæ perducit ad regnum* (Sap. vi, 21). Hoc tamen loquendi obtinuit consuetudo, ut si cupiditas vel concupiscentia dicatur, nec addatur cuius rei sit, non nisi in malo possit intelligi. Lætitia in bono est, *Lætamini ir. Domino, et exsultate iusti* (Psal. xxxi, 11): et, *Dedisti lætitiā in cor meum* (Psal. iv, 7): et, *Adimplebis me lætitiā cum vultu tuo* (Psal. xv, 11). Timor in bono est apud Apostolum, ubi ait, *Cum timore et tremore vestram ipsorum salutem operamini* (Philipp. ii, 12): et, *Noli altum sapere, sed time* (Rom. xi, 20): et, *Timeo autem, ne sicut serpens Evam seduxit astutia sua, sic et vestræ mentes corrumpantur a castitate quæ est in Christo* (II Cor. xi, 3). De tristitia vero, quam Cicero magis ægritudinem appellat (*Tuscul. quæst. lib. 3, cap. 10 sqq. et alibi*) dolorem autem Virgilius, ubi ait, « Dolent gaudentque, » (sed ideo malui tristitiam dicere, quia ægritudo vel dolor usitatius in corporibus dicitur,) scrupulosior quæstio est, utrum inveniri possit in bono.

CAPUT VIII. — *De tribus perturbationibus, quas in animo sapientis Stoici esse voluerunt, excluso dolore sive tristitia, quam virtus animi sentire non debeat.*

1. Quas enim Græci appellant *ἐνπάθειαι*, latine autem Cicero constantias nominavit, Stoici tres esse voluerunt, pro tribus perturbationibus in animo sapientis, pro cupiditate voluntatem, pro lætitiā gaudium, pro metu cautionem: pro ægritudine vero vel dolore, quam nos vitandæ ambiguitatis gratia, tristitiam maluimus dicere, negaverunt esse posse aliquid in animo sapientis. Voluntas quippe, inquit, appetit bonum, quod facit sapiens; gaudium de bono adeptum est, quod ubique adipiscitur sapiens; cautio devitat malum, quod debet sapiens devitare: tristitia porro quia de malo est, quod jam accidit, nullum autem malum existimant posse accidere sapienti; nihil in ejus animo pro illa esse posse dixerunt. Sic ergo illi loquuntur, ut velle, gaudere, cavere negent nisi sapientem; stultum autem nonnisi cupere, lætari, metuere, contristari. Et illas tres esse constantias, has autem quatuor perturbationes secundum Ciceronem, secundum plurimos autem passiones. Græce autem illæ tres, sicut dixi, appellantur *ἐνπάθειαι*; istæ autem quatuor *πάθειαι*. Hæc locutio utrum Scripturis sanctis congruat, cum quærerem quantum potui diligenter, illud inveni quod ait Propheta, *Non est gaudere impiis dicit, Dominus* (Isai. lvi, 21, seo. LXX): tanquam impii lætari possint potius quam gaudere de malis; quia gaudium proprie bonorum et piorum est. Item illud in Evangelio, *Quæcumque vultis ut faciant vobis homines: s, hæc et vos facite illis* (Math. vii, 12), ita dictum videtur, tanquam nemo possit aliquid male vel turpiter velle, sed cupere. Denique propter consuetudinem locutionis nonnulli interpretes addiderunt, *bona*, et ita interpretati sunt: *Quæcumque vultis ut faciant vobis homines bona*. Cavendum enim putaverunt, ne quisquam inhonesta velit sibi fieri ab hominibus, ut de turpioribus taceam, certe luxuriosa convivia, in quibus se, si et ipse illis faciat similia, hoc præ-

ceptum existimet impleturum. Sed in græco Evangelio, unde in latinum translatum est, non legitur, *bona*; sed, *Quæcumque vultis ut faciant vobis homines, hæc et vos facite illis*: credo propterea, quia in eo quod dixit, *vultis*, jam voluit intelligi *bona*. Non enim ait, *Cupitis*.

2. Non tamen semper his proprietatibus locutio nostra frenanda est, sed interdum his utendum est: et cum legimus eos quorum auctoritati resultare fas non est, ibi sunt intelligendæ¹, ubi rectus sensus alium exitum non potest invenire; sicut ista sunt quæ exempli gratia partim ex Propheta, partim ex Evangelio commemoravimus. Quis enim nescit impios exsultare lætitiā? et tamen *non est gaudere impiis dicit Dominus*. Unde, nisi quia gaudere aliud est, quando proprie signateque hoc verbum ponitur? Item quis negaverit non recte præcipi hominibus, ut quæcumque sibi ab aliis fieri cupiunt, hæc eis et ipsi faciant; ne se invicem turpitudine illicitæ voluptatis oblectent? Et tamen saluberrimum verissimumque præceptum est, *Quæcumque vultis ut faciant vobis homines, eadem et vos facite illis*. Et hoc unde, nisi quia hoc loco modo quodam proprio voluntas posita est, quæ in malo accipi non potest? Locutione vero usitaliore, quam frequentat maxime consuetudo sermonis, non utique diceretur, *Noli velle mentiri omne mendacium* (Eccli. vii, 14); nisi esset et voluntas mala, a cujus pravitate illa distinguitur, quam prædicaverunt Angeli dicentes, *Pax in terra hominibus bonæ voluntatis* (Luc. ii, 14). Nam ex abundantiam additum est, *bonæ*, si esse non potest nisi bona. Quid autem magnum in charitatis laudibus dixisset Apostolus, quod non gaudeat super iniquitate (I Cor. xiii, 6), nisi quia ita malignitas gaudet? Nam et apud auctores sæcularium litterarum, talis istorum verborum indifferentia reperitur. Ait enim Cicero orator amplissimus: « Cupio, Patres conscripti, me esse clementem » (*Orat. 1 in Catil., cap. 2*). Quia id verbum in bono posuit, quis tam perverse doctus existat, qui non eum Cupio, sed Volo potius dicere debuisset contendat? Porro apud Terentium flagitiosus adolescens insana flagrans cupidine: « Nihil volo aliud, » inquit, « nisi Philumenam. » Quam voluntatem fuisse libidinem, responso quæ ibi servi ejus senioris² inducitur, satis indicat. Ait namque domino suo:

Quanto satius est, te id dare operam, quo istum
ex animo amorem amoveas tuo,
Quam id loqui quo magis libido frustra accendatur tua?
(*In Andria, act. 2, scen. 1, vers. 6-8.*)

Gaudium vero eos et in malo posuisse, ille ipse Virgilianus testis est versus, ubi has quatuor perturbationes summa brevitate complexus est:

Hinc metuunt cupiuntque, dolent gaudentque.
(*Æneid. lib. 8, vers. 733.*)

Dixit etiam idem auctor, « Mala mentis gaudia » (*Ibid. vers. 278, 279*).

3. Proinde volunt, cavent³, gaudent et boni et mali; atque ut eadem aliis verbis enuntiemus, cu-

¹ Er. et plerique Mss., *intelligendi*.

² Quidam libri, *senioris*.

³ Hic in editis post, *cavent*; additum erat, *timent*. Sed male, cum loquatur Augustinus Stoicorum verbis, qui tres tantum affectus sive *eupatheias*, et in eis, *pro metu cautionem*, ponunt, ut in hujus captis initio dicit.

piunt, timent, lætantur et boni et mali : sed illi bene, isti male, sicut hominibus seu recta seu perversa voluntas est. Ipsa quoque tristitia, pro qua Stoici nihil in animo sapientis inveniri posse putaverunt, reperitur in bono, et maxime apud nostros. Nam laudat Apostolus Corinthios, quod contristati fuerint secundum Deum. Sed fortasse quis dixerit, illis Apostolum fuisse congratulatum, quod contristati fuerint pœnitendo : qualis tristitia, nisi eorum qui peccaverint, esse non potest. Ita enim dicit: *Video quod epistola illa, etsi ad horam contristavit vos, nunc gaudeo, non quia contristati estis, sed quia contristati estis ad pœnitentiam.* Contristati enim estis secundum Deum, ut in nullo detrimentum patiamini ex nobis. *Quæ enim secundum Deum est tristitia, pœnitentiam in salutem impœnitendam¹ operatur : mundi autem tristitia mortem operatur. Ecce enim idipsum secundum Deum contristari, quantum perficit in vobis industriam* (II Cor. vii, 8-11). Ac per hoc possunt Stoici pro suis partibus respondere, ad hoc videri utilem esse tristitiam, ut peccasse pœniteat ; in animo autem sapientis ideo esse non posse, quia nec peccatum in eum cadit, cujus pœnitentia contristetur, nec ullum aliud malum, quod perpetuando et sentiendo sit tristis. Nam et Alcibiadem ferunt (si me de nomine hominis memoria non fallit), cum sibi beatus videretur, Socrate disputante, et ei quam miser esset, quoniam stultus esset, demonstrante, flevisse (a). Huic ergo stultitia fuit causa etiam hujus utilis optandæque tristitiæ, qua homo esse se dolet quod esse non debet. Stoici autem non stultum, sed sapientem aiunt tristem esse non posse.

CAPUT IX. — *De perturbationibus animi, quarum affectus rectos habet vita justorum.*

1. Verum his philosophis, quod ad istam quæstionem de animi perturbationibus attinet, jam respondimus in nono hujus operis libro, ostendentes eos non tam de rebus, quam de verbis cupidiore esse contentionis, quam veritatis (Capp. 4, 5). Apud nos autem juxta Scripturas sacras sanamque doctrinam, cives sanctæ civitatis Dei in hujus vitæ peregrinatione secundum Deum viventes, metuunt cupiuntque, dolent gaudentque. Et quia rectus est amor eorum, istas omnes affectiones rectas habent. Metuunt pœnam æternam, cupiunt vitam æternam : dolent in re², quia ipsi in semetipsis adhuc ingemiscunt, adoptionem expectant redemptionem corporis sui (Rom. viii, 23) ; gaudent in spe, quia fiet sermo, qui scriptus est, *Absorpta est mors in victoriam* (I Cor. xv, 54). Item metuunt peccare, cupiunt perseverare : dolent in peccatis, gaudent in operibus bonis. Ut enim metuant peccare, audiunt, *Quoniam abundabit iniquitas, refrigeret charitas multorum* (Matth. xxiv, 12). Ut cupiant perseverare, audiunt quod scriptum est, *Qui perseveraverit usque in finem, hic salvus erit* (Id. x, 22). Ut

¹ Vind. Am. omittunt, *impœnitendam*. Sed habent ceteri libri, eamque vocam, quæ græco respondet *amētumelēton*, præterire non solet Augustinus, ut videre est in sermone 354, n. 2.

² Nostri codices, *in se*. M.

(a) Cicer., Tuscul. Quæst. lib. 5, cap. 32.

doleant in peccatis, audiunt, *Si dixerimus quia peccatum non habemus, nos ipsos seducimus, et veritas in nobis non est* (I Joan. 1, 8). Ut gaudeant in operibus bonis, audiunt, *Hilarem datorem diligit Deus* (II Cor. ix, 7). Item sicuti se infirmitas eorum firmitasque habuerit, metuunt tentari, cupiunt tentari : dolent in tentationibus, gaudent in tentationibus. Ut enim metuunt tentari, audiunt, *Si quis præoccupatus fuerit in aliquo delicto, vos qui spirituales estis, instruite hujusmodi in spiritu mansuetudinis ; intendens te ipsum, ne et tu teneris* (Galat. vi, 1). Ut autem cupiant tentari, audiunt quemdam virum fortem civitatis Dei dicentem, *Proba me, Domine, et tenta me ; ure renes meos et cor meum* (Psal. xxv, 2). Ut doleant in tentationibus, vident Petrum fientem (Matth. xxvi, 75) : ut gaudeant in tentationibus, audiunt Jacobum dicentem, *Omne gaudium existimate, fratres mei, cum in tentationes varias incideritis* (Jacobi 1, 2).

2. Non solum autem propter se ipsos his moventur affectibus, verum etiam propter eos quos liberari cupiunt, et ne pereant metuunt, et dolent si pereunt, et gaudent si liberantur. Illum quippe optimum et fortissimum virum, qui in suis infirmitatibus gloriatur (II Cor. xii, 5), ut eum potissimum commemoremus, qui in Ecclesiam Christi ex Gentibus venimus, Doctorem Gentium in fide et veritate, qui et plus omnibus suis coapostolis laboravit (I Cor. xv, 10), et pluribus Epistolis populos Dei, non eos tantum qui præsentibus ab illo videbantur, verum etiam illos qui futuri prævidebantur, instruxit ; illum, inquam, virum, athletam Christi¹, doctum ab illo, unctum de illo (Galat. i, 12), crucifixum cum illo (Id. ii, 19), gloriosum in illo, in theatro hujus mundi, cui spectaculum factus est et Angelis et hominibus (I Cor. iv, 9), legitime magnum agonem certantem, et palmam supernæ vocationis in anteriora sectantem², gaudere cum gaudentibus, flere cum flentibus (Rom. xii, 15), foris habentem pugnas, intus timores (II Cor. vii, 5) ; cupientem dissolvi, et esse cum Christo (Philipp. i, 23) ; desiderantem videre Romanos, ut aliquem fructum habeat et in illis, sicut et in cæteris gentibus (Rom. i, 11, 13) ; æmulantem Corinthios, et ipsa æmulatione metuentem, ne seducantur eorum mentes a castitate quæ in Christo est (II Cor. xi, 2, 3) ; magnam tristitiam et continuum dolorem cordis de Israelitis habentem (Rom. ix, 2), quod ignorantes Dei justitiam, et suam volentes constituere, justitiæ Dei non essent subjecti (Id. x, 3) ; nec solum dolorem, verum etiam luctum suum denuntiantem quibusdam qui ante peccaverunt, et non egerunt pœnitentiam super immunditia et fornicationibus suis (II Cor. xii, 21).

3. Hi motus, hi affectus de amore boni et de sancta charitate venientes, si vitia vocanda sunt, sinamus ut ea quæ vere³ vitia sunt, virtutes vocentur. Sed cum rectam rationem sequantur istæ affectiones, quando

¹ Vind. Am. Er. et plerique Mss., *verum athletam Christi*.

² Plures manuscripti, *expectantem*. Et quidam, *spectantibus*.

³ Sic Viud. Am. et Mss. At Er. et Lov., *vera*.

ubi oportet adhibentur, quis eas tunc morbos seu vitiosas passiones audeat dicere? Quamobrem etiam ipse Dominus in forma servi agere vitam dignatus humanam, sed nullum habens omnino peccatum, adhibuit eas ubi adhibendas esse iudicavit. Neque enim in quo verum erat hominis corpus et verus hominis animus, falsus erat humanus affectus. Cum ergo ejus in Evangelio ista referuntur, quod super duritiam cordis Judæorum cum ira contristatus sit (*Marc. III, 5*); quod dixerit, *Gaudeo propter vos, ut credatis* (*Joan. XI, 15*); quod Lazarum suscitaturus etiam lacrymas fuderit (*Ibid., 35*); quod concupiverit cum discipulis suis manducare pascha (*Luc. XXII, 15*); quod propinquante passione tristis fuerit anima ejus (*Matth. XXVI, 38*), non falso utique referuntur. Verum ille hos motus certæ dispensationis gratia, ita cum voluit suscepit animo humano, ut cum voluit factus est homo.

4. Proinde, quod fatendum est, etiam cum rectas et secundum Deum habemus has affectiones, hujus vitæ sunt, non illius quam futuram speramus, et sæpe illis etiam inviti cedimus. Itaque aliquando, quamvis non culpabili cupiditate, sed laudabili charitate moveamur, etiam dum nolumus, stemus. Habemus ergo eas ex humanæ conditionis infirmitate: non autem ita Dominus Jesus, cujus et infirmitas fuit ex potestate. Sed dum vitæ hujus infirmitatem gerimus, si eas omnino nullas habeamus, tunc potius non recte vivimus. Vituperabat enim et detestabatur Apostolus quosdam, quos etiam esse dixit sine affectione (*Rom. I, 31*). Culpavit etiam illos sacer Psalmus, de quibus ait, *Sustinui qui simul contristaretur, et non fuit* (*Psal. LXVII, 21*). Nam omnino non dolere, dum sumus in hoc loco miseræ, profecto, sicut quidam etiam apud sæculi hujus litteratos sensit et dixit (a), non sine magna mercede contingit, immanitatis in animo, stuporis in corpore. Quocirca illa quæ ἀπάθεια græce dicitur, quæ si latine posset, impassibilitas diceretur, si ita intelligenda est (in animo quippe, non in corpore accipitur), ut sine his affectionibus vivatur, quæ contra rationem accidunt mentemque perturbant, bona plane et maxime optanda est; sed nec ipsa hujus est vitæ. Non enim qualicumque hominum vox est, sed maxime piorum multumque justorum atque sanctorum, *Si dixerimus quoniam peccatum non habemus, nos ipsos seducimus, et veritas in nobis non est* (*I Joan. I, 8*). Tunc itaque ἀπάθεια ista erit, quando peccatum in homine nullum erit. Nunc vero satis bene vivitur, si sine crimine: sine peccato autem qui se vivere existimat, non id agit, ut peccatum non habeat, sed ut veniam non accipiat. Porro si ἀπάθεια illa dicenda est, cum animum² contingere omnino non potest ullus affectus, quis hunc stuporem non omnibus vitiis iudicet esse pejorem? Potest ergo non absurde dici perfectam beatitudinem sine stimulo timoris et sine ulla tristitia futuram: non ibi autem futurum amorem gaudiumque quis dixerit, nisi omni modo a

veritate seclusus? Si autem ἀπάθεια illa est, ubi nec metus ullus exterret, nec angit dolor¹, aversanda est in hac vita, si recte, hoc est secundum Deum, vivere volumus: in illa vero beata, quæ sempiterna promittitur, plane speranda est².

5. Timor namque ille de quo dicit apostolus Joannes, *Timor non est in charitate, sed perfecta charitas foras mittit timorem, quia timor poenam habet; qui autem timet, non est perfectus in charitate* (*I Joan. IV, 18*), non est ejus generis timor, cujus ille quo timebat apostolus Paulus, ne Corinthii serpentina seducerentur astutia (*II Cor. XI, 3*); hunc enim timorem habet charitas, imo non habet nisi charitas: sed illius est generis timor, qui non est in charitate; de quo ipse apostolus Paulus ait, *Non enim accepistis spiritum servitutis iterum in timorem*³ (*Rom. VIII, 15*). Timor vero ille castus, permanens in sæculum sæculi (*Psal. XVIII, 40*), si erit et in futuro sæculo, (nam quo alio modo potest intelligi permanere in sæculum sæculi?) non est timor exterrrens a malo, quod accidere potest; sed tenens in bono, quod amitti non potest. Ubi enim boni adepti amor immutabilis est, profecto, si dici potest, mali cavendi timor securus est. Timoris quippe casti nomine ea voluntas significata est, qua nos necesse erit nolle peccare, et non sollicitudine infirmitatis, ne forte peccemus, sed tranquillitate charitatis cavere peccatum. Aut si nullius omnino generis timor esse poterit in illa certissima securitate perpetuorum felicitumque gaudiorum; sic dictum est, *Timor Domini castus, permanens in sæculum sæculi*, quemadmodum dictum est, *Patientia pauperum non peribit in æternum* (*Psal. IX, 19*). Neque enim æterna erit ipsa patientia, quæ necessaria non est, nisi ubi toleranda sunt mala: sed æternum erit, quo per patientiam pervenitur. Ita fortasse timor castus in sæculum sæculi dictus est permanere, quia id permanebit, quo timor ipse perducit.

6. Quæ cum ita sint, quoniam recta vita ducenda est, qua perveniendum sit ad beatam, omnes affectus istos vita recta rectos habet, perversa perversos. Beata vero eademque æterna amorem habebit et gaudium non solum rectum, verum etiam certum; timorem autem ac dolorem nullum. Unde jam apparet utcumque, quales esse debeant in hac peregrinatione cives civitatis Dei, viventes secundum spiritum, non secundum carnem, hoc est, secundum Deum, non secundum hominem: et quales in illa quo tendunt, immortalitate futuri sint. Civitas porro, id est societas, impiorum non secundum Deum, sed secundum hominem viventium, et in ipso cultu falsæ, contemptuque veræ divinitatis, doctrinas hominum dæmonumve sectantium, his affectibus pravis tanquam murrbis et perturbationibus quatitur. Et si quos cives habet qui moderari talibus motibus et eos quasi temperare videantur, sic impietate superbi et elati sunt, ut hoc

¹ Mss. nonnulli, *nec tangit dolor*.

² Vind. Am. et Fr., *timor plane superandus est*. Lov., *timor plane sperandus est*. At manuscriptorum carent verbo, *timor*; et habent, *speranda est*, scilicet *apatheia*.

³ Nostri Mss., *timore*. Sic etiam vulgata. M.

¹ Particula, *et*, abest a Mss. plerisque.

² Plures Mss., *animo*.

(a) Crantor Academicus apud Ciceronem in Tuscul. Quæst. lib. 3, cap. 6.

ipso in eis sint majores tumores, quo minores dolores. Et si nonnulli tanto immaniore, quanto rariore vanitate hoc in se ipsis adamaverint, ut nullo prorsus erigantur et excitentur, nullo flectantur atque inclinentur affectu; humanitatem totam potius amittunt, quam veram assequantur tranquillitatem. Non enim quia durum aliquid, ideo rectum; aut quia stupidum est, ideo sanam (a).

CAPUT X. — *An primos homines in paradiso constitutos nullis perturbationibus, priusquam deliquerint, affectos fuisse credendum sit.*

Sed utrum primus homo vel primi homines (duorum erat quippe conjugium) habebant istos affectus in corpore animali ante peccatum, quales in corpore spirituali non habebimus, omni purgato finitoque peccato, non immerito quaeritur. Si enim habebant, quomodo erant beati in illo memorabili beatitudinis loco, id est paradiso? Quis tandem absolute dici beatus potest, qui timore afficitur, vel dolore? Quid autem timere aut dolere poterant illi homines in tantorum tanta affluentia honorum, ubi nec mors metuebatur, nec ulla corporis mala valetudo; nec aberat quidquam, quod bona voluntas adipisceretur, nec inerat quod carni animumve hominis feliciter viventis offenderet? Amor erat imperturbatus in Deum, atque inter se conjugum fida et sincera societate viventium, et ex hoc amore grande gaudium, non desistente quod amabatur ad fruendum. Erat devitatio tranquilla peccati, qua manente nullum omnino aliunde malum, quod contristaret, irruebat. An forte cupiebant prohibitum lignum ad vescendum contingere, sed mori metuebant; ac per hoc cupiditas, et metus jam tunc illos homines etiam in illo perturbabat loco? Absit ut hoc existimemus fuisse, ubi nullum erat omnino peccatum. Neque enim nullum peccatum est, ea quae lex Dei prohibet concupiscere, atque ab his abstinere timore poenae, non amore justitiae. Absit, inquam, ut ante omne peccatum jam ibi fuerit tale peccatum, ut hoc de ligno admitterent, quod de muliere Dominus ait, *Si quis viderit mulierem ad concupiscendum eam, jam nuchatus est eam in corde suo (Matth. v, 28)*. Quam igitur felices erant primi homines, et nullis agitabantur perturbationibus animorum, nullis corporum laedebantur incommodis: tam felix universa societas esset humana, si nec illi malum, quod etiam in posteros trajecerunt, nec quisquam ex eorum stirpe iniquitatem committeret, quae damnationem reciperet: atque ista¹ permanente felicitate, donec per illam benedictionem, qua dictum est, *Crescite, et multiplicamini (Gen. i, 28)*, praedestinatorum sanctorum numerus completeretur, alia major daretur, quae beatissimis Angelis data est: ubi jam esset certa securitas peccatorum neminem, neminemque moriturum: et talis esset vita sanctorum, post nullum laboris, doloris, mortis experimentum, qua-

¹ Aliquot MSS., *ita*.

(a) Medici quibusdam membris affectis, cum sanitatem afferre nequeunt, stuporem inducunt, ut omni doloris sensu vacuefaciant, non quo sana sint, sed ne quid sentiant. LUC. VIIII.

lis erit post haec omnia in inebriatione corporum reddita resurrectione mortuorum.

CAPUT XI. — *De lapsu primi hominis, in quo bona condita natura est, nec potest nisi a suo Auctore reparari.*

1. Sed quia Deus cuncta praescivit, et ideo hominem quoque peccatorum ignorare non potuit; secundum id quod praescivit atque disposuit civitatem sanctam, eam¹ debemus asserere, non secundum illud quod in nostram cognitionem pervenire non potuit, quia in Dei dispositione non fuit. Nec enim homo peccato suo divinum potuit perturbare consilium, quasi Deum quod statuerat mutare compulerit: cum Deus praesciendo utrumque praevenerit, id est, et homo, quem bonum ipse creavit, quam malus esset futurus, et quid boni etiam sic de illo esset ipse facturus. Deus enim etsi dicitur statuta mutare (unde tropica locutione in Scripturis sanctis etiam poenituisse legitur Deum [*Gen. vi, 6; I Reg. xv, 41*]), juxta id dicitur, quod homo speraverat, vel naturalium causarum ordo gestabat; non juxta id quod se Omnipotens facturum esse praesciverat. Fecit itaque Deus, sicut scriptum est, hominem rectum (*Eccle. vii, 30*): ac per hoc voluntatis bonae. Non enim rectus esset, bonam non habens voluntatem. Bona igitur voluntas opus est Dei: cum ea quippe ab illo factus est homo. Mala vero voluntas prima, quoniam omnia mala opera praecessit in homine, defectus potius fuit quidam ab opere Dei ad sua opera, quam opus ullum. Et ideo mala opera, quia secundum se, non secundum Deum: ut eorum operum tanquam fructuum malorum voluntas ipsa esset velut arbor mala, aut ipse homo in quantum malae voluntatis. Porro mala voluntas, quamvis non sit secundum naturam, sed contra naturam, quia vitium est; tamen ejus naturae est, cujus est vitium, quod nisi in natura non potest esse: sed in ea quam creavit ex nihilo, non quam genuit Creator de semetipso, sicut genuit Verbum, per quod facta sunt omnia. Quia etsi de terrae pulvere Deus sinit hominem; eadem terra omnisque terrena materiae omnino de nihilo est, animamque de nihilo factam dedit corpori, cum factus est homo. Usque adeo autem mala vincuntur a bonis, ut quamvis sinantur esse ad demonstrandum quam possit et ipsis bene uti justitia providentissima Creatoris; bona tamen sine malis esse possint, sicut Deus ipse verus et summus, sicut omnis super istum caliginosum aerem caelestis invisibilis visibilisque² creatura; mala vero sine bonis esse non possint, quoniam naturae in quibus sunt, in quantum naturae sunt, utique bonae sunt. Detrahatur porro malum, non aliqua natura quae accesserat vel ulla ejus parte sublata, sed ea quae vitiosa ac depravata fuerat, sanata atque correcta. Arbitrium igitur voluntatis tunc est vere liberum, cum vitiis peccatisque non servit. Tale datum est a Deo: quod amissum proprio vitio, nisi a quo dari potuit,

¹ Apud Lov. omissum est, *eam*.

² Sola editio Lov., *irrisibilisque*; ommissa voce, *visibilia*.

reddi non potest. Unde Veritas dicit, *Si vos Filius liberaverit, tunc vere liberi eritis* (Joan. viii, 36). Idipsum est autem, ac si diceret, *Si vos Filius salvos fecerit, tunc vere salvi eritis*. Inde quippe liberator, unde salvator.

2. Vivebat itaque homo secundum Deum in paradiso, et corporali et spirituali. Neque enim erat paradisi corporalis propter corporis bona, et propter mentis non erat spiritualis; aut vero erat spiritualis quo per interiores, et non erat corporalis quo per exteriores sensus homo frueretur. Erat plane utrumque propter utrumque (a). Postea vero quam superbus ille angelus, ac per hoc invidus, per eandem superbiam a Deo ad semelipsum conversus, quodam quasi tyrannico fastu gaudere subditis, quam esse subditus eligens, de spirituali paradiso cecidit (de cuius lapsu sociorumque ejus, qui ex Angelis Dei angeli ejus effecti sunt, in libris undecimo et duodecimo hujus operis satis, quantum potui, disputavi), male-suada¹ versutia in hominis sensus serpere affectans, cui utique stanti, quoniam ipse ceciderat, invidabat, colubrum in paradiso corporali, ubi cum duobus illis hominibus masculo et femina animalia etiam terrestria cætera subdita et innoxia versabantur, animal scilicet lubricum et tortuosis anfractibus mobile, operi suo congruum, per quem loqueretur, elegit; eoque per angelicam præsentiam præstantioremque naturam spirituali nequitia sibi subjecto, et tanquam instrumento abutens, fallacia² sermocinatus est feminæ: a parte scilicet inferiore illius humanæ copulæ incipiens, ut gradatim perveniret ad totum; non existimans virum facile credulum, nec errando posse decipi, sed dum alieno cedit errori. Sicut enim Aaron erranti populo ad idolum fabricandum non consensus inductus, sed cessit obstrictus (*Exod. xxxii, 3-5*); nec Salomonem credibile est errore putasse idolis esse serviendum, sed blanditiis femineis ad illa sacrilegia fuisse compulsus (*III Reg. xi, 4*): ita credendum est, illum virum suæ feminæ, uni unum, hominem homini, conjugem conjugi, ad Dei legem transgrediendam, non tanquam verum loquenti credidisse seductum, sed sociali necessitudine paruisse. Non enim frustra dixit Apostolus, *Sed et Adam non est seductus, mulier autem seducta est* (*I Tim. ii, 14*): nisi quia illa quod ei serpens locutus est, tanquam verum esset, accepit, ille autem ab unico noluit consortio dirimi, nec in communione peccati; nec ideo minus reus, sed sciens³ prudensque peccavit. Unde et Apostolus non ait, *Non peccavit*; sed, *Non est seductus*. Nam utique ipsum ostendit⁴, ubi dicit, *Per unum hominem intravit peccatum in mundum*: et paulo post apertius, *In similitudine*, inquit, *prævaricationis Adæ* (*Rom. v, 12, 14*). Eos autem seductos

¹ Vind. Am. Er. et nonnulli Mss., *malesuada*. Cæteri fere Mss., *mulesuadenda*. Mellius Lov., *malesuada*, ut apud Virgil. *Ancid.* lib. 6, vers. 278, «malesuada fames.»

² Plures Mss., *fallaciam*.

³ Er. et Mss., *sciens*.

⁴ Fditi, *ipsum peccasse ostendit*. Abest, *peccasse*, a manuscriptis.

(a) Conf. supra, lib. 13, cap. 21.

intelligi voluit, qui id quod faciunt, non putant esse peccatum: ille autem scivit. Alioquin quomodo verum erit, *Adam non est seductus*? Sed inexpertus divinæ severitatis in eo falli potuit, ut veniale crederet esse commissum. Ac per hoc in eo quidem quo mulier seducta est, non est ille seductus, sed eum sefellit, quomodo fuerat judicandum quod erat dicturus, *Mulier quam dedisti mecum*¹, *ipsa mihi dedit, et manducavi* (*Gen. iii, 12*). Quid ergo pluribus (a)? Etsi credendo non sunt ambo decepti, peccando tamen ambo sunt capti, et diaboli laqueis implicati.

CAPUT XII. — *De qualitate primi peccati per hominem admissi.*

Si quem vero movet, cur aliis peccatis sic natura non mutetur humana, quemadmodum illa duorum primorum hominum prævaricatione mutata est; ut tantæ corruptioni, quantam videmus atque sentimus, et per hanc subjaceret morti², ac tot et tantis tamque inter se contrariis perturbaretur et fluctuaret affectibus, qualis in paradiso ante peccatum, licet in corpore esset animal, utique non fuit: si quis hoc movetur, ut dixi, non ideo debet existimare leve ac parvum illud fuisse commissum, quia in esca factum est, non quidem mala, nec noxia, nisi quia prohibita. Neque enim quidquam mali Deus in illo tantæ felicitatis loco crearet atque plantaret. Sed obedientia commendata est in præcepto, quæ virtus in creatura rationali mater quodammodo est omnium custosque virtutum: quandoquidem ita facta est, ut ei subditam esse sit utile; perniciosum autem suam, non ejus a quo creata est, facere voluntatem. Hoc itaque de uno cibi genere non edendo, ubi aliorum tanta copia subjacebat, tam leve præceptum ad observandum, tam breve ad memoria retinendum, ubi præsertim nondum voluntati cupiditas resistebat, quod de poena transgressionis postea subsecutum est, tanto majore injustitia violatum est, quanto faciliore posset observantia custodiri.

CAPUT XIII. — *Quod in prævaricatione Adæ ad opus malum voluntas præcessit mala.*

1. In occulto autem mali esse cœperunt, ut in apertam inobedientiam laberentur. Non enim ad malum opus perveniretur, nisi præcessisset mala voluntas. Porro malæ voluntatis initium quod³ potuit esso nisi superbia? *Initium enim omnis peccati superbia est* (*Eccli. x, 15*). Quid est autem superbia, nisi perversæ celsitudinis appetitus? Perversa enim celsitudo est, deserto eo cui debet animus inhærere principio, sibi quodammodo fieri atque esse principium. Hoc fit, cum sibi nimis placet. Sibi vero ita placet, cum ab illo bono immutabili deficit, quod et magis placere debuit quam ipse sibi. Spontaneus est autem iste defectus: quoniam si voluntas in amore superioris immutabilis boni, a quo illustrabatur ut videret, et accendebatur ut amaret, stabilis permanere-

¹ Sic Mss. juxta græcum LXX. At editi, *quam dedisti mihi sociam*.

² Am. Er. et Lov., *et morti*. Abest, *et*, a manuscriptis.

³ Codices 2050 et 2051, *quid. n.*

(a) Suppæ, *opus est*.

ret, non inde ad sibi placendam averteretur, et ex hoc tenebresceret ¹ et frigeret, ut vel illa verum crederet dixisse serpentem, vel ille Dei mandato uxoris præponeret voluntatem, putaretque se venialiter transgressorem esse præcepti, si vitæ suæ sociam non desereret etiam in societate peccati. Non malum ergo corpus factum est, id est, illa transgressio, ut cibo prohibito vescerentur, nisi ab eis qui jam mali erant. Neque enim fieret ille fructus malus, nisi ab arbore mala (*Matth.* vii, 18). Ut autem esset arbor mala, contra naturam factum est: quia nisi vitio voluntatis, quod contra naturam est, non utique fieret. Sed vitio depravari, nisi ex nihilo facta, natura non posset. Ac per hoc ut natura sit, ex eo habet quod a Deo facta est; ut autem ab eo quod est ² deficiat, ex hoc quod de nihilo facta est. Nec sic defecit homo, ut omnino nihil esset: sed ut inclinatus ad se ipsum minus esset, quam erat, cum ei qui summe est inhærebat. Relicto itaque Deo, esse in semetipso, hoc est sibi placere, non jam nihil esse est, sed nihilo propinquare. Unde superbi secundum Scripturas sanctas alio nomine appellantur, *sibi placentes* (*II Petr.* ii, 10). Bonum est enim sursum habere cor: non tamen ad se ipsum, quod est superbiæ; sed ad Dominum, quod est obedientiæ, quæ nisi humilium non potest esse. Est igitur aliquid humilitatis miro modo quod sursum faciat cor, et est aliquid elationis quod deorsum faciat cor. Hoc quidem quasi contrarium videtur, ut elatio sit deorsum, et humilitas sursum. Sed pia humilitas facit subditum superiori; nihil est autem superius Deo: et ideo exaltat humilitas, quæ facit subditum Deo. Elatio autem quæ in vitio est, eo ipso quo ³ respuit subjectionem, et cadit ab illo, quo non est quidquam superius, et ex hoc erit inferius, et fit quod scriptum est: *Dejecisti eos, cum extollerentur* (*Psal.* lxxii, 18). Non enim ait, Cum elati fuissent, ut prius extollerentur, et postea dejicerentur: sed cum extollerentur, tunc dejecti sunt. Ipsum quippe extolli, jam dejici est. Quapropter quod nunc in civitate Dei, et civitati Dei in hoc sæculo peregrinanti maxime commendatur humilitas, et in ejus Rege, qui est Christus, maxime prædicatur; contrariumque huic virtuti elationis vitium, in ejus adversario, qui est diabolus, maxime dominari, sacris Litteris edocetur: profecto ista est magna differentia, qua civitas, unde loquimur, utraque discernitur; una scilicet societas piorum hominum, altera impiorum, singula quæque cum Angelis ad se pertinentibus, in quibus præcessit hac amor Dei, hac amor sui.

2. Manifesto ergo apertoque peccato, ubi factum est quod Deus fieri prohibuerat, diabolus hominem non cepisset, nisi jam ille sibi ipsi placere cœpisset. Hinc enim et delectavit quod dictum est, *Eritis sicut dii* (*Gen.* iii, 5). Quod melius esse possent summo veroque principio cohærendo per obedientiam, non suum sibi existendo principium per superbiam. Dii

enim creati, non sua veritate ¹, sed Dei veri participatione sunt dii. Plus autem appetendo ², minus est: qui dum sibi sufficere diligit ³, ab illo qui ei vere sufficit, deficit. Illud itaque malum, quo cum sibi homo placet, tanquam ait et ipse lumen, avertitur ab eo lumine, quod et si placeat et ipse fit lumen: illud, inquam, malum præcessit in abdito, ut sequeretur hoc malum quod perpetratum est in aperto. Verum est enim quod scriptum est: *Ante ruinam exaltatur cor, et ante gloriam humiliatur* (*Prov.* xvi, 18). Illa prorsus ruina quæ fit in occulto, præcedit ruinam quæ fit in manifesto, dum illa ruina esse non putatur. Quis enim exaltationem ruinam putat; cum jam ibi sit defectus, quo est relictus Excelsus? Quis autem ruinam esse non videat, quando fit mandati evidens atque indubitata transgressio? Propter hoc Deus illud prohibuit, quod cum esset admissum, nulla defendi posset imaginatione justitiæ. Et audeo ⁴ dicere, superbis esse utile cadere in aliquod apertum manifestumque peccatum, unde sibi displiceant, qui jam sibi placendo ceciderant (a). Salubrius enim Petrus sibi displicuit quando flevit, quam sibi placuit quando præsumpsit (*Matth.* xxvi, 75, 33). Hoc dicit et sacer Psalmus: *Imple facies eorum ignominia, et quærent nomen tuum, Domine* (*Psal.* lxxxii, 17): id est, ut tu eis placeas quærentibus nomen tuum, qui sibi placuerunt quærendo suum.

CAPUT XIV. — De superbia transgressionis, quæ ipsa fuit transgressionem deterior.

Sed est pejor damnabiliorque superbia, qua etiam in peccatis manifestis suffugium excusationis inquiritur: sicut illi primi homines, quorum et illa dixit, *Serpens seduxit me, et manducavi*; et ille dixit, *Mulier quam dedisti mecum, hæc mihi dedit a ligno, et edi* (*Gen.* iii, 13, 12). Nusquam hic sonat petitio veniæ, nusquam imploratio medicinæ. Nam licet isti non sicut Cain, quod commiserunt, negent (*Id.* iv, 9), adhuc tamen superbia in alium quærit referre, quod perperam fecit: superbia mulieris, in serpentem; superbia viri, in mulierem. Sed accusatio potius quam excusatio vera est, ubi mandati divini est aperta transgressio. Neque enim hoc propterea non fecerunt, quia id mulier serpente suadente, vir muliere impertiente commisit; quasi quidquam Deo, cui vel crederetur, vel cederetur, anteponendum fuerit.

CAPUT XV. — De justitia retributionis, quam primi homines pro sua inobedientia receperunt.

1. Quia ergo contemptus est Deus jubens, qui creaverat, qui ad suam imaginem fecerat ⁵, qui cæteris animalibus præposuerat, qui in paradiso constituerat,

Vind. prosequitur, *cadit ab illo*; ommissa particula, et.

¹ Sic vind. et Mss. At Am. Er. et Lov., *virtute*.

² Editi, *homo appetendo*. Abest, *homo*, a manuscriptis.

³ Sic vind. Am. et Mss. At Er. et Lov., *delegit*.

⁴ Editi, *Et ideo*. Abest, *ideo*, a Mss.

⁵ Editi, *qui hominem creaverat, qui ad suam imaginem eum fecerat*. At manuscripti non habent, *humanem*: nec eum.

(a) Conf. lib. de Nat. et Grat. cont. Pelag., nn. 26, 27, 32.

¹ Sola fere editio Lov., *intenebresceret*.

² Sic melioris notæ Mss. At vind. Am. Er., *ab eo quod facta est*. Lov., *ab eo a quo facta est*.

³ Plerique Mss. omittunt, *quo*: postque, *subjectionem*.

qui rerum omnium copiam salutisque præstiterat, qui præceptis nec pluribus nec grandibus nec difficilibus oneraverat, sed uno brevissimo atque levissimo ad obedientiæ salubritatem adminiculaverat, quo eam creaturam, cui libera servitus expediret, se esse Dominum commonebat: justa damnatio subsecuta est, talisque damnatio, ut homo qui custodiendo mandatum futurus fuerat etiam carne spiritualis, fieret etiam mente carnalis; et qui¹ sua superbia sibi placuerat, Dei justitia sibi donaretur; nec sic ut in sua esset² omnimodis potestate, sed a se ipse quoque dissentiens, sub illo cui³ peccando consensit, pro libertate quam concupivit, duram miseramque ageret servitutem; mortuus spiritu volens, et corpore moriturus invitus: desertor æternæ vitæ, etiam æterna, nisi gratia liberaret, morte damnatus. Quisquis hujusmodi damnationem vel nimiam, vel injustam putat, metiri profecto nescit quanta fuerit iniquitas in peccando, ubi tanta erat non peccandi facilitas. Sicut enim Abrahæ non immerito magna obedientia prædicatur, quia ut occideret filium, res difficillima est imperata (*Gen. xiiii, 2*): ita in paradiso tanto major inobedientia fuit, quanto id quod præceptum est, nullius difficultatis fuit. Et sicut obedientia secundi hominis eo prædicabilior, quo factus est obediens usque ad mortem (*Philipp. ii, 8*): ita inobedientia primi hominis eo detestabilior, quo factus est inobediens usque ad mortem. Ubi enim magna est inobedientiæ pœna proposita, et res a Creatore facilis imperata, quisnam satis explicet, quantum malum sit, non obedire in re facili, et tantæ potestatis imperio, et tanto terrenti supplicio?

2. Denique, ut breviter dicatur, in illius peccati pœna quid inobedientiæ nisi inobedientia retributa est? Nam quæ hominis est aliâ miseria, nisi adversus eum ipsum inobedientia ejus ipsius, ut quoniam noluit quod potuit, quod non potest velit (*a*)? In paradiso enim etiamsi non omnia poterat ante peccatum, quidquid tamen non poterat, non volebat; et ideo poterat omnia quæ volebat. Nunc vero sicut in ejus stirpe cognoscimus, et divina Scriptura testatur, homo vanitati similis factus est (*Psal. cxlii, 4*). Quis enim enumerat, quam multa quæ non potest velit, dum sibi ipse, id est voluntati ejus, ipse animus ejus, eoque inferior caro ejus non obtemperat? Ipso namque invito, et animus plerumque turbatur, et caro dolet, et veterascit, et moritur; et quidquid aliud patimur, quod non pateremur invito, si voluntati nostræ nostra natura omni modo atque ex omnibus partibus obediret. At enim aliquid caro patitur, quo servire non sinitur. Quid interest unde, dum tamen per justitiam dominantis Dei⁴, cui subditi servire nolimus, caro nostra nobis,

quæ subdita fuerat, non serviendo molesta sit; quamvis nos Deo non serviendo, molesti nobis potuerimus esse, non illi? Neque enim sic ille nostro, ut nos servitio corporis indigemus: et ideo nostra est quod recipimus, non illius pœna quod fecimus. Dolores porro qui dicuntur carnis, animæ sunt in carne, et ex carne. Quid enim caro per se ipsam sine anima vel dolet, vel concupiscit? Sed quod concupiscere caro dicitur vel dolere, aut ipse homo est, sicut disseruimus; aut aliquid animæ, quod carnis afficit passio, vel aspera, ut faciat dolorem; vel levis, ut voluptatem. Sed dolor carnis tantummodo offensio est animæ ex carne, et quædam ab ejus passione dissensio: sicut animæ dolor, quæ tristitia nuncupatur, dissensio est ab his rebus quæ nobis nolentibus acciderunt. Sed tristitiam plerumque præcedit metus, qui et ipse in anima est, non in carne. Dolorem autem carnis non præcedit ullus quasi metus carnis, qui ante dolorem in carne sentiatur. Voluptatem vero præcedit appetitus quidam, qui sentitur in carne quasi cupiditas ejus; sicut fames et sitis, et ea quæ in genitalibus usitatius libido nominatur, cum hoc sit generale vocabulum omnis cupiditatis. Nam et ipsam iram nihil aliud esse, quam ulciscendi libidinem, veteres definierunt (*a*): quamvis nonnunquam homo, ubi vindictæ nullus est sensus, etiam rebus inanimis irascatur, ut⁵ male scribentem stilum collidat, vel calamum frangat iratus. Verum et ista licet irrationabilior, tamen quædam ulciscendi libido est, et nescio quæ, ut ita dixerim, quasi umbra retributionis, ut qui male faciunt, mala patiantur. Est igitur libido ulciscendi, quæ ira dicitur: est libido habendi pecuniam, quæ avaritia: est libido quomodocumque vincendi, quæ pervicacia: est libido gloriandi, quæ jactantia nuncupatur. Sunt multæ varietates libidines, quarum nonnullæ habent etiam vocabula propria, quædam vero non habent. Quis enim facile dixerit, quid vocetur libido dominandi, quam tamen plurimum valere in tyrannorum animis, etiam civilia bella testantur?

CAPUT XVI. — *De libidinibus malo, cujus nomen cum multis vitiis congruat, proprie tamen motibus obscenæ corporis adscribitur.*

Cum igitur sint multarum libidines rerum, tamen cum libido dicitur, neque cujus rei libido sit additur, non fere assolet animo occurrere nisi illa, qua obscenæ corporis partes excitantur. Hæc autem sibi non solum totum corpus, nec solum extrinsecus, verum etiam intrinsecus vindicat, totumque commovet hominem animi simul affectu cum carnis appetitu conjuncto atque permixto, ut ea voluptas sequatur, qua major in corporis voluptatibus nulla est: ita ut momento ipso temporis, quo ad ejus pervenitur extremum, pene omnis acies et quasi vigilia cogitationis

5, 6: *Quoniam non potest id fieri quod vis, id velis quod possit.*

(a) Conf. Cicer. lib. 3 Tuscul. Quæst., cap. 5, et lib. 4, cap. 9.

⁴ Nonnulli Mss., et. — Sic nostri excepto 2030. M.

¹ Sic Mss. At Editi, et quia.

² Vind. Am. Er., *ne sicut affectabat, in sua esset, etc. Lov., nec sicut affectabat, etc.* Abest, *affectabat*, a manuscriptis qui habent, *nec sic* (intellige, sibi donaretur) *ut in sua esset, etc.*

³ Sic legit Ms. 2031, et sic legendum probat Morel, Elem. Crit., p. 89. In B., *qui*. M.

⁴ Aliquot Mss., *dum tamen pro justitia damnantis Dei.* — Sic codex 2031. M.

(a) Invertit dictum Terentii, Andr. act. 2, scœp. 1, vers.

obruatur. Quis autem amicus sapientiae sanctorumque gaudiorum, conjugalem agens vitam, sed, sicut Apostolus monuit, *sciens vas suum possidere in sanctificatione et honore, non in morbo desiderii, sicut et Gentes quas ignorant Deum* (1 Thess. iv, 4, 5), non mallet, si posset, sine hac libidine filios procreare; ut etiam in hoc serendæ piæ officio, sic ejus menti ea quæ ad hoc opus creata sunt, quemadmodum cætera suis quæque operibus distributa membra servirent, nutu voluntatis acta, non æstu libidinis incitata? Sed neque ipsi amatores hujus voluptatis, sive ad concubitus conjugales, sive ad immunditias flagitiorum, cum voluerint commoventur: sed aliquando motus ille importunus est nullo poscente, aliquando autem destituit inhiantem, et cum in animo concupiscentia ferveat, friget in corpore: atque ita mirum in modum non solum generandi voluntati, verum etiam lasciviendi libidini libido non servit; et cum tota plerumque menti cohibenti adversetur, nonnunquam et adversus se ipsam dividitur, commotoque animo in commovendo corpore se ipsa non sequitur.

CAPUT XVII. — *De nuditate primorum hominum, quam post peccatum turpem pudendamque viderunt.*

Merito hujus libidinis maxime pudet, merito et ipsa membra, quæ suo quodam, ut ita dixerim, jure, non omnimodo ad arbitrium nostrum movet, aut non movet¹, pudenda dicuntur, quod ante peccatum hominis non fuerunt. Nam sicut scriptum est, *Nudi erant, et non confundebantur* (Gen. ii, 25): non quod eis sua nuditas esset incognita, sed turpis nuditas nondum erat; quia nondum libido membra illa præter arbitrium commovebat, nondum ad hominis inobedientiam redarguendam sua inobedientia caro quodammodo testimonium perhibebat. Neque enim cæci creati erant, ut imperitum vulgus opinatur: quandoquidem et ille vidit animalia, quibus nomina imposuit (Ib. 20); et de illa legitur, *Vidit mulier quia bonum lignum in escam, et quia placet oculis ad videndum* (Ib. iii, 6.) Patebant ergo oculi eorum, sed ad hoc non erant aperti, hoc est non attenti, ut cognoscerent quid eis indumento gratiæ præstaretur, quando membra eorum voluntati repugnare nesciebant. Qua gratia remota, ut pœna reciproca inobedientia plecteretur, existit in motu corporis quædam impudens novitas, unde esset indecens nuditas; et fecit attentos, reddiditque confusos. Hinc est quod, posteaquam mandatum Dei aperta transgressione violarunt, scriptum est de illis, *Et aperti sunt oculi amborum, et cognoverunt quia nudi erant, et consuerunt folia fici, et fecerunt sibi campestria*. (Ibid. 7.) *Aperti sunt, inquit, oculi amborum, non ad videndum* (nam et antea videbant); sed ad discernendum inter bonum quod amiserant, et malum quo ceciderant. Unde et ipsum lignum, eo quod istam faceret dignoscantiam, si ad vescendum contra vetitum tangeretur, ex ea re nomen accepit, ut appellaretur lignum sciendi² boni et mali. Experta enim morbi molestia, evidenter sit etiam jucunditas

¹ Vind. Am. et plures Mss., *moventur, aut non moventur*. Er., *movent, aut non movent*.

² Editi, *scientiæ*. At Mss., *sciendi*.

SANCT. AUGUST. VII.

sanitatis. *Cognoverunt ergo quia nudi erant*: nudati scilicet ea gratia, qua fiebat ut nuditas corporis nulla eos lege peccati menti eorum repugnante confunderet. Hoc itaque cognoverunt, quod feliciter ignorarent, si Deo credentes et obediens non committerent, quod eos congeret experiri infidelitas et inobedientia quid nocerent. Proinde confusi inobedientia carnis suæ, tanquam teste pœna inobedientiæ suæ, *consuerunt folia fici, et fecerunt sibi campestria*, id est succinctoria genitalium. Nam quidam interpretes *succinctoria* posuerunt (a). Porro autem *campestria* latinum quidem verbum est, sed ex eo dictum, quod juvenes, qui nudi exercebantur in campo, pudenda operiebant: unde qui ita succincti sunt, campestratos vulgus appellat. Quod itaque adversus damnatam culpa¹ inobedientiam voluntatem libido inobedienter movebat, verecundia pudenter tegebat. Ex hoc omnes gentes, quoniam ab illa stirpe procreatæ sunt, usque adeo tenent insitum pudenda velare, ut quidam barbari illas corporis partes nec in balneis nudas habeant, sed cum earum tegumentis lavent (b). Per opacas quoque Indiæ solitudines, cum quidam nudi philosophentur, unde Gymnosophistæ nominantur, adhibent tamen genitibus tegmina, quibus per cætera membrorum carent.

CAPUT XVIII. — *De pudore concubitus, non solum vulgari, sed etiam conjugali.*

Opus vero ipsum quod libidine tali peragitur, non solum in quibusque stupris, ubi latebræ ad subterfugienda humana judicia requiruntur; verum etiam in usu scortorum, quam terrena civitas licitam turpitudinem fecit (c), quamvis id agatur, quod ejus civitatis nulla lex vindicat, devitat tamen publicum etiam permessa atque impunita libido conspectum; et verecundia naturali habent provisum lupanaria ipsa secretum, faciliusque potuit impudicitia non habere vincula prohibitionis, quam impudentia remove latibula illius scditatis. Sed hanc etiam ipsi turpes turpitudinem vocant: cujus licet sint amatores, ostentatores esse non audent. Quid? concubitus conjugalis, qui secundum matrimonialium præscripta Tabularum procreandorum sit causa liberorum, nonne et ipse quanquam sit licitus et honestus, remotum ab arbitris cubile requirit? nonne omnes famulos, atque ipsos etiam paranympnos, et quoscumque ingredi quælibet necessitudo permiserat, ante mittit foras, quam vel blandiri conjux conjugii incipiat? Et quoniam, sicut ait quidam, *Romani maximus auctor eloquii* (d), omnia recte facta in luce se collocari volunt (e), id est appetunt sciri:

¹ Sic probæ notæ Mss. At editi, *culpam*.

(a) Apud LXX, *perizonata*.

(b) Vide Herodotum, lib. 1, cap. 10; Platonem, de Republica, lib. 5, pag. 452. LARCHER.

(c) Hieronymus in Epitaphio Fabiolæ, ad Oceanum: « Alæ sunt, » inquit, « leges Caesarum, aliæ Christi; alii Papinianus, alii Paulus noster præcipit. Apud illos viris impudiciæ freua laxantur, et solo stupro atque adulterio condemnato, passim per lupanaria et ancillulas libido permittitur: quasi culpam dignitas faciat, non voluntas. »

(d) Ciceronem hoc titulo exornat Lucianus, libro 7, vers. 62, 65, eoque utitur itidem Augustinus in libro quarto de Doctrina Christiana, n. 34.

(e) Cicero, lib. 2 Tuscul. Quæst., cap. 26.

(Quatorze.)

hoc recte factum sic appetit sciri, ut tamen erubescat videri. Quis enim nescit, ut filii procreentur, quid inter se conjuges agant? quandoquidem ut id agatur, tanta celebritate ducuntur uxores: et tamen cum agitur unde filii nascentur, nec ipsi filii, si qui inde jam nati sunt, testes fieri permittuntur. Sic enim hoc recte factum ad sui notitiam lucem appetit animorum, ut tamen refugiat oculorum. Unde hoc, nisi quia sic geritur quod deceat ex natura, ut etiam quod pudeat comitetur ex pœna?

CAPUT XIX. — *Quod partes iræ atque libidinis tam vitiose moventur, ut eas necesse sit frenis sapientiæ cohiberi, quæ in illa ante peccatum naturæ sanitate non fuerunt.*

Hinc est quod et illi philosophi, qui veritati propius accesserunt (a), iram atque libidinem vitiosas animi partes esse confessi sunt, eo quod turbide atque inordinate moventur, ad ea etiam quæ sapientia perpetrari non velat¹; ac per hoc opus habere moderatrice mente atque ratione. Quam partem animi tertiam, velut in arce quadam ad istas regendas perhibent collocatam; ut illa imperante, istis servientibus, possit in homine justitia ex omni animi parte servari. Hæc igitur partes, quas et in homine sapiente ac temperante fatentur esse vitiosas, ut eas ab his rebus ad quas injuste moventur, mens compescendo et cohibendo refrenet ac revocet, atque ad ea permittat, quæ sapientiæ lege concessa sunt; sicut iram ad exercendam justam coercionem, sicut libidinem ad propagandam prolis officium: hæc, inquam, partes in paradiso ante peccatum vitiosæ non erant. Non enim contra rectam voluntatem ad aliquid movebantur, unde necesse esset eas rationis² tanquam frenis regentibus abstinere. Nam quod nunc ita moventur, et ab eis qui temperanter et juste et pie vivunt, alias facilius, alias difficiliter, tamen cohibendo et refrenando³ modificantur, non est utique sanitas ex natura, sed languor ex culpa. Quod autem iræ opera aliarumque affectionum in quibusque dictis atque factis non sic abscondit verecundia, ut opera libidinis quæ sunt genitalibus membris, quid causæ est, nisi quia in cæteris membra corporis non ipsæ affectiones, sed, cum eis consenserit, voluntas movet, quæ in usu eorum omnino dominatur? Nam quisquis verbum emittit iratus, vel etiam quemquam percutit, non posset hoc facere, nisi lingua et manus jubente quodammodo voluntate moverentur: quæ membra, etiam cum ira nulla est, moventur eadem voluntate. At vero genitales corporis partes ita libido suo juri quodammodo mancipavit, ut moveri non valeant, si ipsa defuerit, et nisi ipsa vel ultro vel excitata surrexerit. Hoc est quod pudet, hoc est quod intuentium oculos erubescendo devitat: magisque fert homo spectantium multitudinem, quando injuste irascitur homini, quam vel unius aspectum et quando juste miscetur uxori.

¹ Vind. Am. Fr. et nostri Mss., *perpetrari velat*; ommissa negante particula.

² Lov., *ratione*.

³ Mss., *et repugnando*.

(a) Platonici, ut passim supra disserit.

CAPUT XX. — *De vanissima turpitudine Cynicorum.*

Hoc illi canini philosophi, hoc est Cynici, non viderunt, proferentes contra humanam verecundiam, quid aliud quam caninam, hoc est immundam impudentemque sententiam? ut scilicet quoniam justum est quod fit in uxore, palam non pudeat id agere; nec in vico aut platea qualibet conjugalem concubitus devitare. Vicit tamen pudor naturalis opinionem hujus erroris. Nam etsi perhibent hoc aliquando gloriabundum fecisse Diogenem, ita putantem sectam suam nobiliorem futuram, si in hominum memoria insignior ejus impudentia figeretur: postea tamen a Cynicis fieri cessatum est; plusque valuit pudor, ut erubescerent homines hominibus, quam error, ut homines canibus esse similes affectarent. Unde et illum vel illos, qui hoc fecisse referuntur, potius arbitror concumbentium motus dedisse oculis hominum nescientium quid sub pallio gereretur¹, quam humano premente conspectu potuisse illam peragi voluptatem. Ibi enim philosophi non erubescerent videri se velle concumbere, ubi libido ipsa erubesceret surgere. Et nunc videmus adhuc esse philosophos Cynicos; hi enim sunt, qui non solum amiciuntur pallio, verum etiam clavam ferunt: nemo tamen eorum audet hoc facere; quod si aliqui ausi essent, ut non dicam ietibus lapidantium, certe conspuentium salivis obruerentur. Pudet igitur hujus libidinis humanam sine ulla dubitatione naturam, et merito pudet. In ejus quippe inobedientia, quæ genitalia corporis membra solis suis motibus subdidit, et potestati voluntatis eripuit, satis ostenditur quid sit hominis illi² primæ inobedientiæ retributum: quod in ea maxime parte oportuit apparere, qua generatur ipsa natura, quæ illo primo et magno in deterius est mutata peccato: a cujus nexu nullus eruitur, nisi id quod, cum omnes in uno essent, in communem perniciem perpetratum est, et Dei justitia vindicatum, Dei gratia in singulis expietur.

CAPUT XXI. — *De benedictione multiplicandæ fecunditatis humanæ ante peccatum, quam prævaricatio non adimeret, et cui libidinis morbus accesserit.*

Absit itaque, ut credamus illos conjuges in paradiso constitutos per hanc libidinem, de qua erubescendo eadem membra texerunt, impleturos fuisse quod in sua benedictione Deus dixit, *Crescite, et multiplicamini, et implete terram* (Gen. 1, 28). Post peccatum quippe orta est hæc libido; post peccatum eam natura non impudens, amissa potestate cui corpus ex omni parte serviebat, sensit, attendit, erubuit, operuit. Illa vero benedictio nuptiarum, ut conjugati crescerent, et multiplicarentur, et impleverent terram, quamvis et in delinquentibus manserit; tamen antequam delinquerent, data est, ut cognosceretur procreationem filiorum ad gloriam connubii, non ad poenam pertinere peccati. Sed nunc homines, profecto illius quæ in paradiso fuit felicitatis ignari, nisi per hoc quod experti sunt, id est per libidinem, de qua

¹ Sola editio Lov., *tegeretur*. Paulo post plerique Mss., *præsertim conspectu*.

² Sic Vind. Am. et Mss. At Fr. et Lov., *illius*.

videmus ipsam etiam honestatem erubescere nuptiarum, non potuisse gigni filios opinantur: alii Scripturas divinas, ubi legitur post peccatum puduisse nuditatis, et pudenda esse contacta, prorsus non accipientes, sed infideliter irridentes (a); alii vero quamvis eas accipiant et honorent, illud tamen quod dictum est, *Crescite, et multiplicamini*, non secundum carnalem fecunditatem volunt intelligi (b); quia et secundum animam legitur tale aliquid dictum, *Multiplicabis me in anima mea virtute tua* (Psal. cxxxvii, 4): ut id quod in Genesi sequitur, *Et implete terram, et dominamini ejus*, terram intelligant carnem, quam præsencia sua implet anima, ejusque maxime dominatur, cum in virtute multiplicatur. Carnales autem fetus sine libidine, quæ post peccatum exorta, inspecta, confusa, velata est, nec tunc nasci potuisse, sicut neque nunc possunt; nec in paradiso futuros fuisse, sed foris, sicut et factum est. Nam posteaquam inde dimissi sunt, ad gignendos filios coicrunt, eosque genuerunt.

CAPUT XXII. — *De copula conjugali a Deo primitus instituta, atque benedicta.*

Nos autem nullo modo dubitamus secundum benedictionem Dei crescere et multiplicari et implere terram, donum esse nuptiarum, quas Deus ante peccatum hominis ab initio constituit, creando masculum et feminam: qui sexus evidens utique in carne est. Huic quippe operi Dei etiam benedictio ipsa subjuncta est. Nam cum Scriptura dixisset, *Masculum et feminam fecit eos*; continuo subdidit, *Et benedixit eos Deus, dicens: Crescite, et multiplicamini, et implete terram, et dominamini ejus* (Gen. 1, 27, 28), et cætera. Quæ omnia quamquam non inconvenienter possint etiam ad intellectum spirituales referri, masculum tamen et feminam, non sicut simile aliquid etiam in homine uno intelligi potest, quia videlicet in eo aliud est quod regit, aliud quod regitur: sed sicut evidentissime apparet in diversi sexus corporibus, masculum et feminam ita creatos, ut prolem generando crescerent, et multiplicarentur, et impleverent terram¹, magnæ absurditatis est reluctari. Neque enim de spiritu qui imperat, et carne quæ obtemperat; aut de animo rationali qui regit, et irrationali cupiditate quæ regitur; aut de virtute contemplativa quæ excellit, et de activa quæ subditur; aut de intellectu mentis, et sensu corporis: sed aperie de vinculo conjugali, quo invicem sibi uterque sexus obstringitur, Dominus interrogatus utrum liceret quacunque ex causa dimittere uxorem, quoniam propter

¹ Sic Mss. Juxta græcum LXX. At editi, *Multiplicabis in anima mea virtutem.*

² Post, *et impleverent terram*, in editis additum est, *Cus sententiæ tam evidenti*, quod abest a manuscriptis.

(a) Manichæi scilicet, qui Veteris Testamenti scripturas rejiciebant. Conf. lib. de Utilitate credendi, ad Honoratum, n. 4.

(b) Redarguit eos qui spiritualiter hæc verba interpretantur; cujus sensus etiam meminit in libro de Bono Conjugali, n. 2. Et ab eadem opinione non longe fuit alienus aliquando ipse, ut patet ex his quæ disserit tum in libro primo de Genesi contra Manichæos, n. 30, tum libro decimo tertio Confessionum, cap. 24: verum hoc loco, et recte quidem, interpretatur ad litteram. COQUAUS.

duritiam cordis Israelitarum Moyses dari libellum repudii permisit, respondit atque ait: *Non legistis quia qui fecit ab initio¹, masculum et feminam fecit eos, et dixit: Propter hoc dimittet homo patrem et matrem, et adheret uxori suæ, et erunt duo in carne una? Itaque jam non sunt duo, sed una caro. Quod ergo Deus conjunxit, homo non separet* (Matth. xix, 4-6). Certum est igitur, masculum et feminam ita primitus institutos, ut nunc homines duos diversi sexus videmus et novimus: unum autem dici, vel propter conjunctionem, vel propter originem feminæ, quæ de masculi latere creata est. Nam et Apostolus per hoc primum quod Deo instituentem præcessit exemplam, singulos quosque admonet, ut viri uxores suas diligant (Ephes. v, 25 et Coloss. iii, 19).

CAPUT XXIII. — *An etiam in paradiso generandum fuisset, si nemo peccasset; vel utrum contra actum libidinis pugnatura illic fuisset traditio castitatis.*

1. Quisquis autem dicit non fuisse coituros, nec generaturos, nisi peccassent, quid dicit, nisi propter numerositatem sanctorum necessarium hominis fuisse peccatum? Si enim non peccando soli remanerent, quia, sicut putant, nisi peccassent, generare non possent; profecto ut non soli duo justi homines possent esse, sed multi, necessarium peccatum fuit. Quod si credere absurdum est, illud potius est credendum, quod sanctorum numerus quantus complendæ illi sufficit beatissimæ civitati, tantus existeret, etsi nemo peccasset, quantus nunc per Dei gratiam de multitudine colligitur peccatorum, quousque filii hujus sæculi generant et generantur (Luc. xx, 34).

2. Et ideo illæ nuptiæ dignæ felicitate paradisi, si peccatum non fuisset, et diligendam prolem gignerent, et pudendam libidinem non haberent (a). Sed quomodo id fieri posset, nunc non est quo demonstretur exemplo. Nec ideo tamen incredibile debet videri, etiam illud unum sine ista libidine voluntati potuisse servire, cui tot membra nunc serviunt. An vero manus et pedes movemus, cum volumus, ad ea quæ his membris agenda sunt, sine ullo renisu, tanta facilitate, quanta et in nobis et in aliis videmus, maxime in artificibus quorumque² operum corporalium, ubi ad exercendam infirmiore tardioreque naturam agilior accessit industriâ; et non credimus ad opus generationis filiorum, si libido non fuisset, quæ peccato inobedientiæ retributa est, obedienter hominibus ad voluntatis nutum similiter ut cætera potuisse illa membra servire? Nonne Cicero in libris de Republica, cum de imperiorum differentia disputaret, et hujus rei similitudinem ex natura hominis assumeret, ut filiis dixit imperari corporis membris propter obediendi facilitatem; vitiosas vero animi partes ut servos asperiore imperio coerceri? Et utique ordine

¹ Vind. Am. et Er., *qui fecit hominem ab initio. Vox, hominem*, abest a Lov. et a manuscriptis, necnon a græcorum Evangelii textu, imo et a latino in Corbeiensibus Bibliis versionis vulgatæ.

² Lov., *quorumcumque*. Editi alii et Mss., *quorumque*. (a) Vid. lib. de Pecc. Orig., n. 40-43.

naturali animus anteponitur corpori, et tamen ipse animus imperat corpori facilius quam sibi. Verumtamen hæc libido, de qua nunc disserimus, eo magis erubescenda existit, quod animus in ea nec sibi efficaciter imperat, ut omnino non libeat; nec omnimodo corpori, ut pudenda membra voluntas potius quam libido commoveat: quod si ita esset, pudenda non essent¹. Nunc vero pudet animum resisti sibi a corpore, quod ei natura inferiori subjectum est. In aliis quippe affectionibus cum sibi resistit, ideo minus pudet, quia cum a se ipso vincitur, ipse se vincit; etsi inordinate atque vitiose, quia ex his partibus, quæ rationi subjici debent; tamen a partibus suis, ac per hoc, ut dictum est, a se ipso vincitur. Nam cum ordinate se animus vincit, ut irrationales motus ejus menti rationique subdantur (si tamen et illa Deo subdita est), laudis atque virtutis est. Minus tamen pudet, cum sibi animus ex vitiosis suis partibus non obtemperat, quam cum ei corpus, quod alterum ab illo est, atque infra illum est, et cuius sine illo natura² non vivit, volenti jubentique non cedit.

3. Sed cum alia membra retinentur voluntatis imperio, sine quibus illa quæ contra voluntatem libidine concitantur, id quod appetant, implere non possunt; pudicitia custoditur, non amissa, sed non permissa delectatione peccati. Hunc renisum, hanc repugnantiam, hanc voluntatis et libidinis rixam, vel certe ad voluntatis sufficientiam, libidinis indigentiam, procul dubio nisi culpabilis inobedientia pœnali inobedientia plecteretur, in paradiso nuptiæ non haberent, sed voluntati membra illa, ut cætera cuncta, servirent³. Ita genitale arvom (*Virgil. Georg. lib. 3, vers. 136*) vas in hoc opus creatum seminaret, ut nunc terram manus. Et quod modo de hac re nobis volentibus diligentius disputare, verecundia resistit, et compellit veniam honore præfato a pudicis auribus poscere, cur id fieret nulla causa esset: sed in omnia quæ de hujusmodi membris sensum cogitantis attingerent, sine ullo timore obscenitatis liber sermo ferretur: nec ipsa verba essent, quæ vocarentur obscena; sed quidquid inde diceretur, tam honestum esset, quam de aliis cum loquimur corporis partibus. Quisquis ergo ad has litteras impudicus accedit, culpam refugiat, non naturam; facta denotet suæ turpitudinis, non verba nostræ necessitatis; in quibus mihi facillime pudicus et religiosus lector vel auditor ignoscit, Jonec infidelitatem refellam, non de fide rerum inexperatarum, sed de sensu experatarum argumentantem. Legit enim hæc sine offensione, qui non exhorret Apostolum horrenda seminarum flagitia reprehendentem, quæ *immutaverunt naturalem usum in eum usum qui est contra naturam* (*Rom. 1, 26*): præcipue quia nos non damnabilem obscenitatem nunc, sicut ille commemoramus atque reprehendimus, sed in explicandis,

quantum possumus, humanæ generationis effectibus¹, verba tamen, sicut ille, obscena vitamus.

CAPUT XXIV. — *Quod insontes homines et merito obedientiæ in paradiso permanentes, ita genitalibus membris fuissent usuri ad generationem prolis, sicut cæteris ad arbitrium voluntatis.*

1. Seminaret igitur prolem vir, susciperet femina genitalibus membris quando id opus esset, et quantum opus esset, voluntate motis, non libidine concitatis. Neque enim ea sola membra movemus ad motum, quæ compactis articulata sunt ossibus, sicut pedes et manus et digitos; verum etiam illa quæ mollibus remissa sunt nervis, cum volamus, movemus agitando, et porrigendo producimus, et torquendo flectimus, et constringendo duramus; sicut ea sunt quæ in ore ac facie, quantum potest, voluntas movet. Pulmones denique ipsi omulium, nisi medullarum, mollissimi viscerum, et ob hoc antro pectoris communiti, ad spiritum ducendum ac remittendum vocemque emittendam seu modificandam, sicut folles fabrorum vel organorum, flantis, respirantis, loquentis, clamantis, cantantis, serviunt voluntati. Omitto quod animalibus quibusdam naturaliter inditum est, ut tegmen quo corpus omne vestitur, si quid in quocumque loco ejus senserint abigendum, ibi tantum moveant, ubi sentiunt; nec solum insidentes muscas, verum etiam hærentes hastas² cutis tremore discutiant. Nam quid quia id non potest homo, ideo Creator quibus voluit animalibus donare non potuit? Sic ergo et ipse homo potuit obedientiam etiam inferiorum habere membrorum, quam sua inobedientia perdidit. Neque enim Deo difficile fuit sic illum condere, ut in ejus carne etiam illud non nisi ejus voluntate moveretur, quod nunc nisi libidine non movetur.

2. Nam et hominum quorundam naturas novimus multam cæteris dispares, et ipsa raritate mirabiles, nonnulla ut volunt de corpore facientium, quæ alii nullo modo possunt, et audita vix credunt. Sunt enim qui et aures moveant vel singulas, vel ambas simul. Sunt qui totam cæsariem capite immoto, quantum capilli occupant, deponunt ad frontem; revocantque cum volunt. Sunt qui eorum quæ voraverint incredibiliter plurima et varia, paululum præcordiis contrectatis tanquam de sacculo quod placuerit integerrimum proferunt. Quidam voces avium pecorumque et aliorum quorumlibet hominum sic imitantur atque expriment, ut nisi videantur, discerni omnino non possint. Nonnulli ab imo sine pudore³ ullo ita numerosos pro arbitrio sonitus edunt, ut ex illa etiam parte cantare videantur. Ipse sum expertus, sudare hominem solere cum vellet. Notum est, quosdam flere cum volunt, atque ubertim lacrymas fundere. Jam illud multo est incredibile quod plerique fratres memoria recentissima experti sunt. Presbyter fuit quidam no-

¹ Lov., *pudenda omnino non essent*. Abest, *omnino*, ab *istis* libris.

² Editi, *ulla natura*. Abest, *ulla*, a Mss.

³ Omnes Mss., *membra ut cætera, ita cuncta servirent*.

¹ In sola editione Lov., *affectibus*.

² Vind. Am. et Er., *aristas*.

³ Sic Mss. Editi vero, *pudore*.

mine Restitutus in parocia Calamensis (a) Ecclesiae, qui quando ei placebat (rogabatur autem ut hoc faceret ab eis qui rem mirabilem coram scire cupiebant), id imitatas quasi lamentantis cujuslibet hominis voces, ita se auferebat a sensibus, et jacebat simillimus mortuo, ut non solum vellicantes atque pungentes minime sentiret, sed aliquando etiam igne ureretur admoto, sine ullo doloris sensu, nisi postmodum ex vulnere: non autem obnitendo, sed non sentiendo non movere corpus, eo probabatur, quod tanquam in defuncto nullus inveniebatur anhelitus: hominum tamen voces, si clarius loquerentur, tanquam de longinquo se audire postea referebat. Cum itaque corpus etiam nunc quibusdam, licet in carne corruptibili hanc ærumnosam ducentibus vitam, ita in plerisque motionibus et affectionibus extra usitatum naturæ modum mirabiliter serviat; quid causæ est, ut non credamus ante inobedienciæ peccatum corruptionisque supplicium, ad propagandam prolem sine ulla libidine servire voluntati humanæ humana membra potuisse? Donatus est itaque homo sibi, quia deseruit Deum placendo sibi: et non obediens Deo, non potuit obedire nec sibi. Hinc evidentior miseria, quæ homo non vivit ut vult, Nam si ut vellet viveret, beatum se putaret: sed nec sic tamen esset, si turpiter viveret.

CAPUT XXV. *De vera beatitudine, quam temporalis vita non obtinet.*

Quoniam si diligentius attendamus, nisi beatus, non vivit ut vult: et nullus beatus, nisi justus. Sed etiam ipse justus non vivit ut vult, nisi eo pervenerit, ubi mori, falli, offendi omnino non possit; eique sit certum, ita semper futurum. Hoc enim natura expetit: nec plena atque perfecte beata erit, nisi adepta quod expetit. Nunc vero quis hominum potest ut vult vivere, quando ipsum vivere non est in potestate? Vivere enim vult, mori cogitur. Quomodo ergo vivit ut vult, qui non vivit quamdiu vult? Quod si mori voluerit, quomodo potest ut vult vivere, qui non vult vivere? Et si ideo mori velit, non quo nolit vivere, sed ut post mortem melius vivat: nondum ergo ut vult vivit, sed cum ad id quod vult, moriendo pervenerit. Verum ecce vivat ut vult, quoniam sibi extorsit sibi que imperavit non velle quod non potest, atque hoc velle quod potest; sicut ait Terentius,

Quoniam non potest id fieri quod vis,

Id valis quod possis:

(*And. act. 2, scen. 1, v. 3, 6.*)

num ideo beatus est, quia patienter miser est? Beata quippe vita si non amatur, non habetur. Porro si amatur et habetur, cæteris omnibus rebus excellentius necesse est ametur: quoniam propter hanc amandum est quidquid aliud amatur. Porro si tantum amatur, quantum amari digna est (non enim beatus est, a quo ipsa beata vita non amatur ut digna est), fieri non potest, ut eam qui sic amat, non æternam velit. Tunc igitur beata erit quando æterna erit.

¹ Nonnulli Mss., *quia*. Et quidam, *quo*.

(a) Calama, de qua hic loquitur, non Phœnicie oppidum est, ut creditur Ludovicus Vives, sed Africæ, inter Hippocum et Cirtam situm, de quo frequentissime Augustinus.

CAPUT XXVI. — *Quod felicitas in paradiso viventium sine erubescendo, appetitu generandi officium credenda sit implere potuisse.*

Vivebat itaque homo in paradiso sicut volebat, quamdiu hoc volebat quod Deus jusserat: vivebat fruens Deo, ex quo bono erat bonus: vivebat sine ulla egestate, ita semper vivere habens in potestate. Cibus aderat, ne esuiret; potus, ne sitiret; lignum vitæ, ne illum senecta dissolveret. Nihil corruptionis, in corpore vel ex corpore ullas molestias ullis ejus sensibus ingerebat. Nullus intrinsecus morbus, nullus ictus metuebatur extrinsecus. Summa in carne sanitas, in anima ¹ tota tranquillitas. Sicut in paradiso nullus æstus aut frigus, ita in ejus habitatore nulla ex cupiditate vel timore accedebat ² bonæ voluntatis offensio. Nihil omnino triste, nihil erat iuaniter lætum: gaudium verum ³ perpetuabatur ex Deo, in quem flagrabat charitas de corde puro et conscientia bona et fide non ficta (1 *Tim.* 1, 5): atque inter se conjugum fida ex honesto amore societas, concursus mentis corporisque vigilia, et mandati sine labore custodia. Non lassitudo fatigabat otiosum, non somnus premebat invitum (a). In tanta facilitate rerum et felicitate hominum, absit ut suspicemur non potuisse prolem seri sine libidinis morbo: sed eo voluntatis nutu moverentur illa membra quo cætera, et sine ardoris illecebrosi stimulo cum tranquillitate animi et corporis nulla corruptione integritatis infunderetur gremio maritus uxoris (*Æncid. lib. 8, vers. 406*). Neque enim quia experientia probari non potest, ideo credendum non est; quando illas corporis partes non ageret turbidus calor, sed spontanea potestas, sicut opus esset, adhiberet; ita tunc potuisse utero conjugis salva integritate feminei genitalis virile semen immitti, sicut nunc potest eadem integritate salva ex utero virginis fluxus menstrui cruoris emitti. Eadem quippe via posset illud injici, qua hoc potest ejici. Ut enim ad pariendum non doloris gemitus, sed maturitatis impulsus feminea viscera relaxaret: sic ad fetandum et concipiendum non libidinis appetitus, sed voluntarius usus naturam utramque conjungeret. De rebus loquimur nunc pudeendis: et ideo quamvis, antequam earum puderet, quales esse potuissent conjiciamus ut possumus; tamen necesse est ut nostra disputatio magis frenetur ea quæ nos revocant verecundia, quam eloquentia, quæ nobis parum suppedit, adjuvetur. Nam cum id quod dico, nec ipsi experti fuerint qui experiri potuerunt (quoniam præoccupante peccato exsilium de paradiso ante meruerunt, quam sibi in opere serendæ propaginis tranquillo arbitrio convenirent), quomodo nunc cum ista commemorantur, sensibus occurrit humanis, nisi experientia libidinis turbidæ, non conjectura placidæ voluntatis? Hinc est quod impedit loquentem pudor,

¹ Mss., *in animo*.

² Mss., *accidebat*.

³ Nonnulli Mss., *vero*. — Nostri, *verum*. M.

(a) Similis est descriptio paradisi terrestris apud divum Basilium, Homilia de Paradiso, et apud divum Joannem Damascenum, lib. 2 de Fide orthodox., cap. 11. Cognatus.

etsi non deficiat ratio cogitantem. Verumtamen omnipotentī Deo, summo ac summe bono creatori omnium naturarum, voluntatum autem bonarum adjutori et remuneratori, malarum autem relictōri et damnatori, utrarumque ordinatori, non defuit utique consilium, quo certum numerum civium in sua sapientia prædestinatum etiam ex damnato genere humano suæ civitatis impleret : non eos jam meritis, quandoquidem universa massa tanquam in vitata radice damnata est, sed gratia discernens; et liberatis non solum de ipsis, verum etiam de non liberatis, quid eis largiatur, ostendens. Non enim debita, sed gratuita bonitate tunc se quisque agnoscit erutum malis, cum ab eorum hominum consortio sit immunis, cum quibus illi justa esset pœna communis. Cur ergo non crearet Deus, quos peccaturos esse præscivit; quandoquidem in eis et ex eis, et quid eorum culpa mereatur, et quid sua gratia donaretur, posset ostendere, nec sub illo creatore ac disponente perversa inordinatio delinquentium rectum perverteret ordinem rerum?

CAPUT XXVII. — *De peccatoribus et angelis et hominibus, quorum perversitas non perturbat providentiam Dei.*

Proinde peccatores, et angeli, et homines nihil agunt, quo impediantur *Magna opera Domini, exquisita in omnes voluntates ejus* (Psal. cx, 2). Quoniam qui providenter atque omnipotenter sua cuique distribuit, non solum bonis, verum etiam malis bene uti novit. Ac per hoc propter meritum primæ malæ voluntatis ita damnato atque obdurato angelo malo, ut jam bonam voluntatem ulterius non haberet, bene utens Deus, cur non permitteret ut ab illo primus homo, qui rectus, hoc est bonæ voluntatis, creatus fuerat, tentaretur? Quandoquidem sic erat institutus, ut, si de adjutorio Dei fideret bonus homo, malum angelum vinceret; si autem creatorem atque adjutorem Deum superbe sibi placendo desereret, vinceatur: meritum bonum habens in adjuta divinitus voluntate recta, malum vero in deserente Deum voluntate perversa. Quia et ipsum fidere de adjutorio Dei, non quidem posset sine adjutorio Dei: nec tamen ideo ab his divinæ gratiæ beneficiis sibi placendo recedere non habebat in potestate. Nam sicut in hac carne vivere sine adjumentis alimentorum in potestate non est, non autem in ea vivere in potestate est; quod faciunt qui se ipsos necant: ita bene vivere sine adjutorio Dei, etiam in paradiso, non erat in potestate; erat autem in potestate male vivere, sed beatitudine non permansura, et pœna justissima secutura. Cum igitur hujus futuri casus humani Deus non esset ignarus, cur eum non sineret invidi angelis malignitate tentari? nullo modo quidem quod vince-

retur incertus; sed nihilominus præscius quod ab ejus semine adjuto sua gratia idem ipse diabolus fuerat sanctorum gloria majore vincendus. Ita factum est ut nec Deum aliquid futurorum lateret, nec præsciendo quemquam peccare compelleret; et quid interesset inter propriam cujusque præsumptionem et suam tuitionem, angelicæ et humanæ rationali creaturæ, consequenti experientia demonstraret. Quis enim audeat credere, aut dicere, ut neque angelus, neque homo caderet, in Dei potestate non fuisse? Sed hoc eorum potestati maluit non auferre; atque ita et quantum mali eorum superbia, et quantum boni sua gratia valeret, ostendere.

CAPUT XXVIII. — *De qualitate duarum civitatum, terrenæ atque cælestis.*

Fecerunt itaque civitates duos amores duo; terrenam scilicet amor sui usque ad contemptum Dei, cælestem vero amor Dei usque ad contemptum sui (a). Denique illa in se ipsa, hæc in Domino gloriatur. Illa enim quærit ab hominibus gloriam: huic autem Deus conscientiæ testis, maxima est gloria. Illa in gloria sua exultat caput suum: hæc dicit Deo suo, *Gloria mea, et exaltans caput meum* (Psal. iii, 4). Illi¹ in principibus ejus, vel in eis quas subjugat nationibus dominandi libido dominatur: in hac serviunt invicem in charitate, et præpositi consulendo, et subditi obtemperando. Illa in suis potentibus diligit virtutem suam: hæc dicit Deo suo, *Diligam te, Domine, virtus mea* (Psal. xvii, 2). Ideoque in illa sapientes ejus secundum hominem viventes, aut corporis aut animi sui bona, aut utriusque sectati sunt; aut qui potuerunt cognoscere Deum, non ut Deum honoraverunt, vel gratias egerunt; sed evanuerunt in cogitationibus suis, et obscuratum est insipientis cor eorum: dicentes se esse sapientes, id est, dominante sibi superbia in sua sapientia sese extollentes, *stulti facti sunt; et immutaverunt gloriam incorruptibilis Dei in similitudinem imaginis corruptibilis hominis, et volucrum, et quadrupedum, et serpentium*: ad hujuscemodi enim simulacra adoranda vel duces populorum, vel sectatores fuerunt: *et coluerunt atque servierunt creaturæ potius quam Creatori, qui est benedictus in sæcula* (Rom. i, 21-25). In hac autem nulla est hominis sapientia, nisi pietas, qua recte colitur verus Deus, id exspectans premium in societate sanctorum, non solum hominum, verum etiam Angelorum, *ut sit Deus omnia in omnibus* (I Cor. xv, 28).


¹ sola editio Lov., *illa*.

(a) in libro undecimo de Genesi ad Litteram, n. 90, opus de Civitate Dei his verbis pollicebatur: « Hi duo amores, quorum alter sanctus est, alter immundus; alter socialis, alter privatus... distinxerunt conditas in genere humano civitates duas... De quibus duabus civitatibus latius fortasse alio loco, si Dominus voluerit, disseremus. »



LIBER QUINTUS DECIMUS.

Postquam egit quatuor proxime antecedentibus libris de civitatibus duarum, terrenæ ac cœlestis exortu, libros totidem de earundem civitatum prokursu subiungit Augustinus, idque argumentum ea ratione aggreditur, ut præcipua capita sacræ historiæ eodem spectantia pertractet, primum scilicet quinto decimo hoc libro quæ in Genesi leguntur a Cain et Abel usque ad diluivium.



CAPUT PRIMUM. — De duobus ordinibus generationis humanæ in diversos fines ab initio procurrentis.

1. De felicitate paradisi, vel de ipso paradiso, et de vita ibi primorum hominum, eorumque peccato¹ atque supplicio, multi multa senserunt, multa dixerunt, multa litteris mandaverunt. Nos quoque secundum Scripturas sanctas, vel quod in eis legimus, vel quod ex eis intelligere potuimus, earum congruentes auctoritati, de his rebus in superioribus libris diximus. Enucleatius autem si ista querantur, multiplices atque multimodas pariunt disputationes, quæ pluribus intextendæ sunt voluminibus, quam hoc opus tempusque deposcit. Quod non ita largum habemus, ut in omnibus quæ possunt requirere otiosi et scrupulosi², paratiores ad interrogandum, quam capaciores ad intelligendum, nos oporteat immorari. Arbitror tamen satis nos jam fecisse magnis et difficillimis quæstionibus de initio vel mundi³, vel animæ, vel ipsius generis humani: quod in duo genera distribuimus; unum eorum qui secundum hominem, alterum eorum qui secundum Deum vivunt. Quas etiam mystice appellamus civitates duas, hoc est duas societates hominum: quarum est una quæ prædestinata est in æternum regnare cum Deo; altera, æternum supplicium subire cum diabolo. Sed iste finis est earum, de quo post loquendum est. Nunc autem quoniam de exortu earum, sive in Angelis, quorum numerus ignoratur a nobis, sive in duobus primis hominibus, satis dictum est, jam mihi videtur earum aggrediendus excursus, ex quo illi duo generare cœperunt, donec homines generare cessabunt. Hoc enim universum tempus, sive sæculum, in quo cedunt morientes, succeduntque nascentes, istarum duarum civitatum, de quibus disputamus, excursus est.

2. Natus est igitur prior Cain ex illis duobus generis humani parentibus, pertinens ad hominum civitatem; posterior Abel, ad civitatem Dei. Sicut enim in uno homine, quod dixit Apostolus, experimur quia non primum quod spirituale est, sed quod animale, postea spirituale (1 Cor. xv, 46): unde unusquisque, quoniam ex damnata⁴ propagine exoritur, primo sit necesse est ex Adam malus atque carnalis; quod si in Christum⁵ renascendo profecerit, post erit bonus et spiritualis: sic in universo genere humano cum

primum duæ istæ cœperunt nascendo atque moriendo procurrere civitates, prior est natus civis hujus sæculi; posterior autem isto peregrinus in sæculo, et pertinens ad civitatem Dei, gratia prædestinatus, gratia electus, gratia peregrinus deorsum, gratia civis sursum. Nam quantum ad ipsum attinet, ex eadem massa oritur, quæ originaliter est tota damnata: sed tanquam sigulus Deus (hanc enim similitudinem non imprudenter, sed prudenter introducit (a) Apostolus) ex eadem massa fecit aliud vas in honorem, aliud in contumeliam (Rom. ix, 21). Prius autem factum est vas in contumeliam, post vero alterum in honorem: quia et in ipso uno, sicut jam dixi, homine, prius est reprobum, unde necesse est incipiamus, et ubi non est necesse ut remaneamus; posterius vero probum, quo proficientes veniamus, et quo pervenientes maneamus. Proinde non quidem omnis homo malus erit bonus, nemo tamen erit bonus qui non erat malus: sed quanto quisque citius mutatur in melius, hoc in se facit nominari quod apprehendit celerius, et posteriore cooperit vocabulum prius. Scriptum est itaque de Cain, quod condiderit civitatem (Gen. iv, 17): Abel autem tanquam peregrinus non condidit. Superna est enim sanctorum civitas, quamvis hic pariat cives, in quibus peregrinatur, donec regni ejus tempus adveniat, cum congregatura est omnes in suis corporibus resurgentes, quando eis promissum dabitur regnum, ubi cum suo principe Rege sæculorum sine ullo temporis fine regnabunt.

CAPUT II. — De filiis carnis, et filiis promissionis.

Umbra sane quædam civitatis hujus et imago prophetica ei significandæ potius quam præsentandæ servivit in terris, quo eam tempore demonstrari oportebat, et dicta est etiam ipsa civitas sancta merito significantis imaginis, non expressæ, sicut futura est, veritatis. De hac imagine serviente, et de illa quam significat libera civitate, sic Apostolus ad Galatas loquitur: *Dicite mihi, inquit, sub lege volentes esse, legem non audistis?*¹ Scriptum est enim quod Abraham duos filios habuit, unum de ancilla, et unum de libera. Sed ille quidem qui de ancilla, secundum carnem natus est; qui autem de libera, per repromissionem: quæ sunt in allegoria (b). Hæc enim sunt duo

¹ Codex 238, scripulosi. M.

² Iov., de initio vel de fine mundi. Abest, de fine, ab editis Vind. Am. Fr. et melioribus manuscriptis, debetque abesse, cum de fine Augustinus post loquendum esse mox dicat.

³ Nonnulli Mss., ex Adam nata.

⁴ sola editio Iov., in Christo.

¹ Aliquot manuscripti juxta Vulgatam, *legem non legistis?* Alii cum editis, *legem num audistis?* In græco est, *ton nonon onc acouete*; hoc est, *legem non audistis?* — Ex nostris, Ms. 2050 solus cum Vulgata consentit. M.

(a) Sive potius mutatus est ab Isaia, xlv, 9, et Jeremia, xviii, 3 seqq. COCCEJUS.

(b) C. d. hic lib. 15 de Trinit., n. 13.

testamenta; unum quidem a monte Sina¹ in servitute generans, quod est Agar². Sina enim est mons in Arabia, qui conjunctus est³ huic quæ nunc est Jerusalem: servit enim cum filiis suis. Quæ autem sursum est Jerusalem, libera est, quæ est mater omnium nostrum⁴. Scriptum est enim, *Lætare, sterilis, quæ non parit; erumpe et clama, quæ non parturit: quoniam nulli filii desertæ, magis quam ejus quæ habet virum. Nos autem, fratres, secundum Isaac promissionis filii sumus. Sed sicut tunc qui secundum carnem natus fuerat, persequabatur eum qui secundum spiritum; ita et nunc. Sed quid dicit Scriptura? Ejice ancillam et filium ejus: non enim hæres erit filius ancillæ cum filio liberæ. Nos autem, fratres, non sumus ancillæ filii, sed liberæ, qua libertate Christus nos liberavit (Galat. iv, 21-31)*. Hæc forma intelligendi de apostolica auctoritate descendens locum nobis aperit, quemadmodum Scripturas duorum Testamentorum, Veteris et Novi accipere debeamus. Pars enim quædam terrenæ civitatis imago cœlestis civitatis effecta est, non se significando, sed alteram; et ideo serviens. Non enim propter se ipsam, sed propter aliam significandam est instituta; et præcedente alia significatione et ipsa præfigurans præfigurata est. Namque Agar ancilla Sarræ, ejusque filius, imago quædam hujus imaginis fuit. Et quoniam transituræ erant umbræ luce veniente, ideo dixit libera Sarra, quæ significabat liberam civitatem, cui rursus alio modo significandæ etiam illa umbra serviebat: *Ejice ancillam, et filium ejus; non enim hæres erit filius ancillæ cum filio meo Isaac, quod ait Apostolus, cum filio liberæ*. Invenimus ergo in terrena civitate duas formas; unam suam præsentiam demonstrantem, alteram cœlesti civitati significandæ sua præsentia servientem. Parit autem cives terrenæ civitatis peccato vitiosa natura; cœlestis vero civitatis cives parit a peccato naturam liberans gratia: unde illa vocantur vasa iræ; ista, vasa misericordiæ (Rom. ix, 22, 23). Significatum est hoc etiam in duobus filiis Abrahæ, quod unus de ancilla, quæ dicebatur Agar, secundum carnem natus est Ismael, alter autem de Sarra libera secundum reprobationem natus Isaac. Uterque quidem de semine Abrahæ: sed illum genuit demonstrans consuetudo naturam, istum vero dedit promissio significans gratiam. Ibi humanus usus ostenditur, hic divinum beneficium commendatur.

CAPUT III. — De sterilitate Sarræ, quam Dei gratia fecundavit.

Sarra quippe sterilis erat, et desperatione prolis, saltem de ancilla sua concupiscens habere, quod de se ipsa non se posse cernebat, dedit eam fetandam viro, de quo parere voluerat, nec potuerat. Exegit

¹ Ita omnes editi, juxta græcum, *apo orous Sina*: nec aliter manuscripti si paucos exceperis, qui juxta Vulgatam habent, *in monte Sina*.

² Sic MSS. Editi vero, *quæ est Agar*.

³ Lov., *quæ conjuncta est*; dissentientibus editis aliis et plerisque manuscriptis.

⁴ Sic vind. et aliquot manuscripti juxta græcum, *etis esta unctæ paritæ omni*. At Er. et Lov., *quæ est mater nostra*.

Itaque etiam sic debitum de marito, utens jure suo in utero alieno. Natus est ergo Ismael, sicut nascuntur homines, permixtionè sexus utriusque, usitata lege naturæ. Ideo dictum est *secundum carnem*: non quod ista beneficia Dei non sint, aut non illa operetur Deus, cujus opifex sapientia attingit, sicut scriptum est, *a fine usque ad finem fortiter, et disponit omnia suaviter (Sap. viii, 1)*: sed ubi significandum fuerat Dei donum, quod indebitum hominibus gratis gratia largiretur, sic oportuit dari filium, quemadmodum naturæ non debebatur excursibus. Negat enim natura jam filios tali commixtionis maris et femine, qualis esse poterat Abrahæ et Sarræ in illa jam ætate, etiam mulieris accedente sterilitate, quæ nec tunc parere potuit, quando non ætas fecunditati, sed ætati fecunditas defuit. Quod ergo naturæ sic affectæ fructus posteritatis non debebatur, significat quod natura generis humani peccato vitiosa, ac per hoc jure damnata, nihil veræ felicitatis in posterum merebatur. Recte igitur significat Isaac per reprobationem natus filius gratiæ, cives civitatis liberæ, socios pacis æternæ, ubi sit non amor propriæ ac privatæ quodammodo voluntatis, sed communi eodemque immutabili bono gaudens, atque ex multis unum cor faciens, id est perfecte concors¹, obedientia charitatis.

CAPUT IV. — De terrenæ civitatis vel concertatione, vel pace.

Terrena porro civitas, quæ sempiterna non erit (neque enim cum in extremo supplicio damnata fuerit, jam civitas erit), hic habet bonum suum, cujus societate lætatur, qualis esse de talibus rebus læticia potest. Et quoniam non est tale bonum, ut nullas angustias faciat amatoribus suis, ideo civitas ista adversus se ipsam plerumque dividitur litigando, bellando, atque pugnando, et aut mortiferas, aut certe mortales victorias requirendo. Nam ex quacumque sui parte adversus alteram sui partem bellando surrexerit, quærit esse victrix gentium, cum sit captiva vitiorum. Et si quidem cum vicerit, superbius extollitur, etiam mortifera²; si vero conditionem cogitans casusque communes, magisque accidere possunt adversis angitur, quam eis quæ provenerint³ secundis rebus inflatur, tantummodo mortalis est ista victoria. Neque enim semper dominari poterit permanendo eis quos potuerit subjugare vincendo. Non autem recte dicuntur ea bona non esse, quæ concupiscit hæc civitas, quando est et ipsa in suo genere humano melior. Concupiscit enim terrenam quamdam pro rebus infimis pacem: ad eam namque desiderat pervenire bellando. Quoniam si vicerit, et qui resistat non fuerit, pax erit, quam non habebant partes invicem adversantes, et pro his rebus quas simul habere non poterant infelici egestate certantes. Hanc pacem requirunt laboriosa bella; hanc adipiscitur quæ putatur gloriosa victoria. Quando autem vincunt

¹ Vind. Am. et Er., *perfecte facta concors*.

² Editi, *etiam sic mortifera*. Abest, sic, a manuscriptis.

³ Ms. 2051, *provenerunt*. M.

qui causa justiore pugnabant, quis dubitet gratulandam esse victoriam, et provenisse optabilem pacem? Hæc bona sunt, et sine dubio Dei dona sunt. Sed si, neglectis melioribus, quæ ad supernam pertinent civitatem, ubi erit victoria in æterna et summa pæce secuta, bona ista sic concupiscantur, ut vel sola esse credantur, vel his quæ meliora creduntur, amplius diligantur; necesse est miseria consequatur, et quæ inerat augetur.

CAPUT V. — *De primo terrenæ civitatis auctore fratricida, cujus impietati Romanæ urbis conditor germani cæde responderit.*

Primus itaque fuit terrenæ civitatis conditor fratricida: nam suum fratrem civem civitatis æternæ in hac terra peregrinantem invidentia victus occidit. Unde mirandum non est, quod tanto post in ea civitate condenda, quæ fuerat hujus terrenæ civitatis, de qua loquimur, caput futura, et tam multis gentibus regnatura, huic primo exemplo et, ut Græci appellant, ἀρχέτυπον quædam sui generis imago respondit. Nam et illic, sicut ipsum facinus quidam poeta commemoravit illorum,

Fraterno primi maduerunt sanguine muri.
(Lucan. lib. 1 Pharsal., v. 98.)

Sic enim condita est Roma, quando occisum Remum a fratre Romulo Romana testatur historia: nisi quod isti terrenæ civitatis ambo cives erant. Ambo gloriam de Romanæ reipublicæ institutione quærebant: sed ambo eam tantam, quantam, si unus esset, habere non poterant. Qui enim volebat dominando gloriari, minus utique dominaretur, si ejus potestas vivo consorte minueretur. Ut ergo totam dominationem haberet unus, ablati est socius: et scelere crevit in pejus, quod innocentia minus esset et melius. Hi autem fratres Cain et Abel non habebant ambo inter se similem rerum terrenarum cupiditatem; nec in hoc alter alteri invidit, quod ejus dominatus fieret ægustior, qui alterum occidit, si ambo dominarentur (Abel quippe non quærebat dominationem in ea civitate, quæ condebatur a fratre): sed invidentia illa diabolica, qua invidet bonis mali, nulla alia causa¹, nisi quia illi boni sunt, illi mali. Nullo enim modo sit minor accedente seu permanente consorte possessio bonitatis; imo possessio bonitas, quam tanto latius, quanto concordius individua sociorum possidet charitas². Non habebit denique istam possessionem, qui eam noluerit habere communem; et tanto eam reperiet amplioem, quanto amplius ibi potuerit amare consortem. Illud igitur quod inter Remum et Romulum exortum est, quemadmodum adversus se ipsam terrena civitas dividatur, ostendit: quod autem inter Cain et Abel, inter duas ipsas civitates, Dei et hominum, inimicitias demonstravit. Pugnans ergo inter se mali et mali:

item pugnant inter se boni et mali. Boni vero et boni, si perfecti sunt, inter se pugnare non possunt: proficientes autem nondumque perfecti ita possunt, ut bonus quoque ex ea parte pugnet contra alterum, qua etiam contra seipsum. Et in uno quippe homine caro concupiscit adversus spiritum, et spiritus adversus carnem (Galat. v, 17). Concupiscentia ergo spiritualis contra alterius potest pugnare carnalem, vel concupiscentia carnalis contra alterius spiritalem, sicut inter se pugnant boni et mali: vel certe ipsæ concupiscentiæ carnales inter se duorum bonorum, nondum utique perfectorum, sicut inter se pugnant mali et mali, donec eorum qui caratur ad ultimam victoriam sanitas perducatur.

CAPUT VI. — *De languoribus, quos ex pœna peccati etiam cives civitatis Dei in hujus vitæ peregrinatione patiuntur, et a quibus Deo medente sanantur.*

Languor est quippe iste, id est illa inobedientia, de qua in libro quartodecimo disserrimus (Capp. 1, 11 et alibi), primæ inobedientiæ supplicium; et ideo non natura, sed vitium: propter quod dicitur proficientibus bonis, et ex fide in hac peregrinatione viventibus, *Invicem onera vestra portate, et sic adimplebitis legem Christi* (Galat. vi, 2) (a). Item alibi dicitur: *Corripite inquietos, consolamini pusillanimes, suscipite infirmos, patientes estote ad omnes. Videte ne quis malum pro malo alicui reddat* (1 Thess. v, 14 et 15). Item alio loco: *Si preoccupatus fuerit homo in aliquo delicto, vos qui spirituales estis, instruite hujusmodi in spiritu mansuetudinis, intendens te ipsum, ne et tu teneris* (Galat. vi, 1). Et alibi: *Sol non occidat super iracundiam vestram* (Ephes. iv, 26). Et in Evangelio: *Si peccaverit in te frater tuus, corripe eum inter te et ipsum solum*¹ (Matth. xviii, 15). Item de peccatis, in quibus multorum cavetur offensio, Apostolus dicit: *Peccantes coram omnibus argue, ut et ceteri timorem habeant* (1 Tim. v, 20). Propter hoc et de venia invicem danda, multa præcipiuntur, et magna cura, propter tenendam pacem, sine qua nemo poterit videre Deum (Hebr. xii, 14): ubi ille terror est, quando jubetur servus decem millium talentorum reddere debita, quæ illi fuerant relaxata, quoniam debitum denariorum centum conservo suo non relaxavit. Qua similitudine proposita, Dominus Jesus adjecit, atque ait, *Sic et vobis faciat Pater vester celestis, si non dimiseritis unusquisque fratri suo de cordibus vestris* (Matth. xviii, 35). Hoc modo curantur cives civitatis Dei in hac terra² peregrinantes, et paci supernæ patriæ suspirantes. Spiritus autem sanctus operatur intrinsecus, ut valeat aliquid medicina, quæ adhibetur extrinsecus. Alioquin etiamsi Deus ipse utens creatura sibi subdita in aliqua specie humana sensus alloquatur humanos, sive istos corporis, sive illos quos istis simillimos habemus in somnis, nec interiore gratia mentem regat atque agat, nihil prodest homini omnis predicatio veritatis. Facit

¹ Vind. Am. Er., *nulla alia causa est*. Verbum, est, perperam additum; nam auferendi casu posita sunt verba illa superiora, *invidentia illa diabolica*; supple, *invidit*.

² Sic omnes prope MSS. At Vind. Am. et Er., *imo possessio bonitatis tanto fit latior, quanto concordius eum individua sociorum possidet charitas*. Lov., *imo possessionem bonitatis tanto latius, quanto concordius individua, etc.*

¹ Abest, solum, a manuscriptis.

² Sola editio Lov., *in hac terra*.
(a) Conf. lib. de Quæst. 83, qu. 71.

autem hoc Deus a vasis misericordiae irae vasa discernens, dispensatione qua ipse novit multum occulta, sed tamen justa. Ipso quippe adjuvante mirabilibus et latentibus modis, cum peccatum, quod habitat in membris nostris, quæ potius jam poena peccati est, sicut Apostolus præcipit, non regnat in nostro mortali corpore ad obediendum desideriis ejus, nec ei membra nostra velut iniquitatis arma exhibemus (Rom. vi, 12, 13), convertitur ad mentem non sibi ad mala, Deo regente, consentientem; et eam regentem tranquillius nunc habebit, postea sanitate perfecta¹ atque immortalitate percepta homo sine ullo peccato in æterna pace regnabit.

APUT VII. — *De causa et pertinacia sceleris Cain, quem a facinore concepto nec Dei sermo revocavit.*

1. Sed hoc ipsum, quod sicut potuimus exposuimus, cum Deus locutus esset ad Cain eo more², quo cum primis hominibus per creaturam subjectam velut eorum socius forma congrua loquebatur (a), quid ei profuit? nonne conceptum scelus in necando fratre etiam post verbum divinæ admonitionis implevit? Nam cum sacrificia discrevisset amborum, in illius respiciens, hujus despiciens, quod non dubitandum est potuisse cognosci signo aliquo attestante visibili; et hoc ideo fecisset Deus, quia mala erant opera hujus, fratris vero ejus bona: contristatus est Cain valde, et concidit facies ejus. Sic enim scriptum est: *Et dixit Dominus ad Cain, Quare tristis factus es, et quare concidit facies tua? Nonne si recte offeras, recte autem non divides, peccasti? Quiesce: ad te enim conversio ejus, et tu dominaberis illius (Gen. iv, 6, 7, sec. LXX).* In hac admonitione quam Deus protulit ad Cain, illud quidem quod dictum est, *Nonne si recte offeras, recte autem non divides, peccasti?* quia non elucet cur vel unde sit dictum, multos sensus peperit ejus obscuritas, cum divinarum Scripturarum quisque tractator secundum fidei regulam id conatur exponere. Recte quippe offertur sacrificium, cum offertur Deo vero, cui uni tantummodo sacrificandum est. Non autem recte dividitur, dum non discernuntur recte vel loca, vel tempora, vel res ipsæ quæ offeruntur, vel qui offert, et cui offertur, vel hi quibus ad vescendum distribuitur quod oblatum est: ut divisionem hic discretionem intelligamus; sive cum offertur, ubi non oportet, aut quod non ibi, sed alibi oportet; sive cum offertur, quando non oportet, aut quod non tunc, sed alias oportet; sive cum id offertur, quod nusquam et nunquam penitus debuit; sive cum electiora sibi ejusdem generis rerum tenet homo, quam sunt ea quæ offert Deo; sive cum ejus rei quæ oblata est, sit particeps profanus, aut quilibet quem fas non est fieri. In quo autem horum Deo displicuerit Cain, facile non

potest inveniri. Sed quoniam Joannes apostolus, cum de his fratribus loqueretur, *Non sicut Cain, inquit, qui ex maligno erat, et occidit fratrem suum: et cuius rei gratia occidit eum? Quia opera illius maligna fuerunt fratris autem illius justa (I Joan. iii, 12):* datur intelligi propterea Deum non respexisse in munus ejus, quia hoc ipso malo dividebat, dans Deo aliquid suum, sibi autem se ipsum. Quod omnes faciunt qui non Dei, sed suam sectantes voluntatem, id est, non recto, sed perverso corde viventes, offerunt tamen Deo munus, quo putant eum redimi, ut eorum non opituletur sanandis pravis cupiditatibus, sed explendis. Et hoc est proprium terrenæ civitatis, Deum vel deos colere, quibus adjuvantibus regnet in victoriis et pace terrena, non charitate consulendi, sed dominandi cupiditate. Boni quippe ad hoc volunt mundo, ut fruatur Deo: mali autem contra, ut fruatur mundo, uti volunt Deo; qui tamen eum vel esse, vel res humanas curare jam credunt. Sunt enim multo deteriores, qui nec hoc quidem credunt. Cognito itaque Cain quod super ejus germani sacrificium, nec super suum respexerat Deus, utique fratrem bonum mutatus imitari, non elatus debuit æmulari. Sed contristatus est, et concidit facies ejus. Hoc peccatum maxime arguit Deus, tristitiam de alterius bonitate, et hoc fratris. Hoc quippe arguendo interrogavit dicens, *Quare contristatus es, et quare concidit facies tua?* Quia enim fratri invadebat, Deus videbat, et hoc arguebat. Nam hominibus, quibus absconditum est cor alterius, esse posset ambiguum, et prorsus incertum, utrum illa tristitia malignitatem suam, in qua se Deo displicuisse didicerat, an fratris doluerit bonitatem, quæ Deo placuit, cum in sacrificium ejus aspexit. Sed rationem Deus reddens, cur ejus oblationem accipere noluerit, ut sibi ipso potius merito, quam ei frater immerito displiceret¹, cum esset injustus non recte dividendo, hoc est non recte vivendo, et indignus cujus approbaretur oblatio, quam esset injustior, quod fratrem justum gratis odisset, ostendit.

2. Non tamen eum dimittens sine mandato sancto, justo et bono, *Quiesce, inquit; ad te enim conversio ejus, et tu dominaberis illius.* Numquid fratris? Absit. Cujus igitur, nisi peccati? Dixerat enim, *Peccasti: tum deinde addidit, Quiesce; ad te enim conversio ejus, et tu dominaberis illius.* Potest quidem ita intelligi ad ipsum hominem conversionem esse debere peccati, ut nulli alii quam sibi sciat tribuere debere quod peccat. Hæc est enim salubris penitentiae medicina, et veniæ petitio non incongrua, ut ubi ait, *Ad te enim conversio ejus, non subaudiatur, Erit; sed, Sit; præcipientis videlicet, non prædicentis modo.* Tunc enim dominabitur quisque peccato, si id sibi non defendendo præposuerit, sed penitendo subjecerit: alioquin et illi serviet dominanti, si patrocinium adbibuerit accidenti². Sed ut peccatum intelligatur concupiscentia ipsa carnalis, de qua dicit Apostolus, *Caro concupiscit adversus spiritum (Galat. v, 17);* in cuius carnis fru-

¹ Viud. et Am., et eam regens tranquillius nunc habebit prope sanitatem perfectam. Paulo post loco, regnabit; sola fere editio Lov. habet, regnauem.

² Viud. Am. Er. et aliquot Mss., eo modo.

(a) Conf. lib. 8 de Gen. ad Litt., n. 57, et lib. 9, nn. 5 et 4.

¹ Sic nostri codices. In B., quam ei immerito frater displiceret.

² Lov., accidenti. Alii libri, accidenti.

etibus et invidiam commemorat, qua utique Cain stimulabatur, et accendebatur in fratris exitium: bene subauditur, Erit, id est, *Ad te enim conversio ejus erit, et tu dominaberis illius*. Cum enim commota fuerit pars ipsa carnalis, quam peccatum appellat Apostolus, ubi dicit, *Non ego operor illud, sed quod habitat in me peccatum* (Rom. vii, 17): quam partem animi etiam philosophi dicunt esse vitiosam, non quæ mentem debeat trahere, sed cui mens debeat imperare, eamque ab illicitis operibus ratione cohibere: cum ergo commota fuerit ad aliquid perperam committendum, si quiescat¹ et obtemperetur dicenti Apostolo, *Nec exhibueritis membra vestra arma iniquitatis peccato* (Id. vi, 13); ad mentem domita et victa convertitur, ut subditæ ratio dominetur. Hoc præcepit Deus huic, qui facibus invidiæ inflammabatur in fratrem, et quem debuerat imitari, cupiebat auferri. *Quiesce*, inquit: manus ab scelere contine; non regnet peccatum in tuo mortali corpore ad obediendum desideriis ejus, nec exhibeas membra tua iniquitatis arma peccato. *Ad te enim conversio ejus*: dum non adjuvatur relaxando, sed quiescendo frenatur. *Et tu dominaberis illius*: ut cum forinsecus non permittitur operari, sub potestate mentis regentis et benevolentis assuescat etiam intrinsecus non moveri. Dicitum est tale aliquid in eodem divino libro et de muliere, quando post peccatum Deo interrogante atque judicante damnationis sententias acceperunt, in serpente diabolus, et in se ipsis illa et maritus. Cum enim dixisset ei, *Multiplians multiplicabo tristitias tuas et gemitum tuum, et in tristitiis paries filios*: deinde addidit, *Et ad virum tuum conversio tua, et ipse dominabitur tui* (Gen. iii, 16). Quod dictum est ad Cain de peccato, vel de vitiosa carnis concupiscentia, hoc isto loco de peccatrice femina: ubi intelligendum est virum ad regendam uxorem, animo carnem regenti similem esse oportere. Propter quod dicit Apostolus: *Qui diligit uxorem suam, se ipsum diligit: nemo enim unquam carnem quam odio habuit* (Ephes. v, 28 et 29). Sananda sunt enim hæc, sicut nostra; non sicut aliena, damnanda. Sed illud Dei præceptum Cain sicut prævaricator accepit. Invalescente quippe invidiæ vitio, fratrem² insidiatus occidit. Talis erat terrene conditor civitatis. Quomodo autem significaverit etiam Judæos, a quibus Christus occisus est pastor ovium hominum, quem pastor ovium pecorum præfigurabat Abel, quia in allegoria prophetica res est, parco nunc dicere, et quædam hinc adversus Faustum Manichæum dixisse me recolo (a).

CAPUT VIII. — *Quæ ratio fuerit, ut Cain inter principia generis humani conderet civitatem.*

1. Nunc autem defendenda mihi videtur historia, ne sit Scriptura incredibilis, quæ dicit ædificatam ab uno homine civitatem eo tempore, quo non plus quam viri quatuor, vel potius tres, posteaquam fratrem

frater occidit, fuisse videntur in terra; id est, primus homo pater omnium, et ipse Cain, et ejus filius Enoch, ex cujus nomine ipsa civitas nuncupata est. Sed hoc quos movet, parum considerant, non omnes homines, qui tunc esse potuerint, scriptorem sacre hujus historiæ necesse habuisse nominare; sed eos solos, quos operis suscepti ratio postulabat. Propositum quippe scriptoris illius fuit, per quem Spiritus sanctus id agebat, per successiones certarum generationum ex uno homine propagatarum pervenire ad Abraham, ac deinde ex ejus semine ad populum Dei: in quo distincto a cæteris gentibus præfigurarentur et prænuentiarentur omnia quæ de civitate, cujus æternum erit regnum, et de Rege ejus eodemque conditore Christo in Spiritu prævidebantur esse ventura; ita ut nec de altera societate hominum taceretur, quam terrenam dicimus civitatem, quantum ei commemorandæ satis esset, ut civitas Dei etiam suæ adversariæ comparatione clarescat. Cum igitur Scriptura divina, ubi et numerum annorum, quos illi homines vixerunt, commemorat, ita concludat, ut dicat de illo de quo loquebatur, *Et genuit filios et filias, et fuerunt omnes dies illius, vel illius, quos vixit, anni tot, et mortuus est* (Gen. v, 4, 5, et alibi): numquid quia eisdem filios et filias non nominat, ideo intelligere non debemus per tam multos annos, quibus tunc in sæculi hujus prima ætate vivebant, nasci potuisse plurimos homines, quorum cœtibus condi possent etiam plurimæ civitates? sed pertinuit ad Deum, quo ista inspirante conscripta sunt, has duas societates suis diversis generationibus primitus digerere atque distinguere: ut seorsum hominum, hoc est secundum hominem viventium, seorsum autem filiorum Dei, id est hominum secundum Deum viventium, generationes contexerentur usque ad diluvium, ubi ambarum societatum discretio concretioque narratur: discretio quidem, quod ambarum separatim generationes commemorantur, unius fratricidæ Cain, alterius autem qui vocabatur Seth; natus quippe fuerat et ipse de Adam, pro illo quem frater occidit: concretio autem, quia, bonis in deterius declinantibus, tales universi facti fuerant, ut diluvio delerentur, excepto uno justo, cui nomen erat Noc, et ejus conjuge, et tribus filiis, totidemque nuribus, qui homines octo ex illa omnium vastatione mortalium per arcam evadere meruerunt.

2. Quod igitur scriptum est, *Et cognovit Cain uxorem suam, et concipiens peperit Enoch; et erat ædificans civitatem in nomine filii sui Enoch*: non est quidem consequens, ut istum primum filium genuisse credatur. Neque enim hoc ex eo putandum est, quia dictus est cognovisse uxorem suam, quasi tunc se illi primitus concumbendo miscuisset. Nam et de ipso patre omnium Adam non tunc solum hoc dictum est, quando conceptus est Cain, quem primogenitum videtur habuisse: verum etiam posterius eadem Scriptura, *Cognovit, inquit, Adam uxorem suam Evam, et concepit, et peperit filium, et nominavit nomen illius Seth* (Id. iv, 17, 25). Unde intelligitur ita solere illam Scripturam loqui, quamvis non semper cum in

¹ sic Mss. Editi vero, *acquiescatur*.

² Aliquot Mss., *fratri*.

(a) scilicet lib. 12, cap. 9 et seqq.

ca legitur factos hominum fuisse conceptus, non tamen solum cum primum sibi sexus uterque miscetur. Nec illud necessario est argumento, ut primogenitum patri existimemus Enoch, quod ejus nomine civitas illa nuncupata est. Non enim ab re est, ut propter aliquam causam, cum et alios haberet, diligeret eum pater cæteris amplius. Neque enim et Judas primogenitus fuit, a quo Judæa cognominata est, et Judæi. Sed etiamsi conditori civitatis illius iste filius primus est natus, non ideo putandum est tunc a patre condite civitati nomen ejus impositum, quando natus est; quia nec constitui tunc ab uno poterat civitas, quæ nihil aliud est quam hominum multitudo aliquo societatis vinculo colligata: sed cum illius hominis familia tanta numerositate cresceret, ut haberet jam populi quantitatem, tunc potuit utique fieri, ut et constitueret, et nomen primogeniti sui constitutæ imponeret civitati. Tam longa quippe vita illorum hominum fuit, ut illic memoratorum, quorum et anni taciti nos sunt, qui minimum vixit ante diluvium, ad septingentos quinquaginta tres perveniret (a). Nam plures nongentos annos etiam transierunt, quamvis nemo ad mille pervenerit. Quis itaque dubitaverit per unius hominis ætatem tantum multiplicari potuisse genus humanum, ut esset unde constitueretur¹ non una, sed plurimæ civitates (b)? Quod ex hoc conjici facillime potest, quia ex uno Abraham non multo amplius quadringentis annis numerositas Hebrææ gentis tanta procreata est, ut in exitu ejusdem populi ex Ægypto sexcenta millia hominum² fuisse referantur bellicæ juventutis (Exod. xii, 37), ut omitamus gentem Idumæorum non pertinentem ad populum Israel, quam genuit frater ejus Esau, nepos Abraham, et alias (c) natas ex semine ipsius Abraham, non per Sarram conjugem procreatas.

CAPUT IX. — De longa vita hominum, quæ fuit ante diluvium, et de ampliore humanorum corporum forma.

Quamobrem nullus prudens rerum existimatores dubitaverit, Cain, non solum aliquam, verum etiam magnam potuisse condere civitatem, quando in tam longum tempus protendebatur vita mortalium (d): nisi forte infidelium quispiam ex ipsa numerositate annorum nobis ingerat quæestionem, qua vixisse tunc homines scriptum est in auctoribus nostris³; et hoc neget esse credendum. Ita quippe non credunt etiam magnitudines corporum longe ampliores tunc fuisse quam nunc sunt. Unde et nobilissimas eorum poeta

¹ Mss., ut esset constituerentur.

² Nostri, sexcenta hominum millia, excepto cod. 2050 qui legit, sexcenta LX hominum milia. M.

³ Vind. Am. Br. et plures Mss., in auctoritatibus nostris.

(a) Hic est Lamech, secundum septuaginta interpretes, Gen. v, 31.

(b) Fuit nostrorum adeo patrum memoria vicus pene centum domorum in Hispania, cujus omnes incolæ erant a senes quodam, qui adhuc vivebat, progeniti, ita ut propinquitatis nomen jam deesset, quo a nominali natu vocaretur: lingua enim nostra supra abavum non ascendit.

Lub. Vivas.

(c) Supple. gentes.

(d) Vid. Plin. lib. 7 Hist. nat., capp. 49, 50.

Virgilius, de ingenti lapide, quem in agrorum limite infixum vir fortis¹ illorum temporum pugnavit et rapuit, et cucurrit, et intorsit, et misit,

Vix illum² (inquit) lecti bis sex corvæe subirent,
Qualia nunc hominum producti corpora tellus:
(Æneid. lib. 12, v. 899-900.)

significans majora tunc corpora producere solere tellurem. Quanto magis igitur temporibus recentioribus mundi, ante illud nobile diffamatumque diluvium? Sed de corporum magnitudine plerumque incredulos nudata per vetustatem sive per vim fluminum variorumque casus sepulcra convincunt, ubi apparuerunt, vel unde ceciderunt incredibilis magnitudinis ossa mortuorum. Vidi ipse non solus, sed aliquot mecum in Uticensi littore molarem hominis dentem tam ingentem, ut si in nostrorum dentium modulos minutatim concideretur, centum nobis videretur facere potuisse. Sed illum gigantis alicujus fuisse crediderim. Nam præter quod erant omnium multo majora, quam nostra, tunc corpora, gigantes longe cæteris anteibant. Sicut aliis deinde nostrisque temporibus rara quidem, sed nunquam ferme defuerunt, quæ modum aliorum plurimum excederent. Plinius Secundus, doctissimus homo, quanto magis magisque præterit sæculi excursus, minora corpora naturam ferre testatur. Quod etiam Homerum commemorat sæpe carmine fuisse conquestum, non hæc velut poetica signa credens, sed in historicam fidem tanquam miraculorum naturalium scriptor assumens (Hist. natur. lib. 7, cap. 16). Verum, ut dixi, antiquorum magnitudines corporum inventa plerumque ossa, quoniam diuturna sunt, etiam multo posterioribus sæculis produunt. Annorum autem numerositas cujusque hominis qui³ temporibus illis fuit, nullis nunc talibus documentis venire in experimentum potest. Nec tamen ideo fides sacræ huic historiæ deroganda est, cujus tanto impudentius narrata non credimus, quanto impleri certius prænuntiata conspiciamus. Dicit tamen etiam idem Plinius (a), esse adhuc gentem, ubi ducentos annos vivitur. Si ergo humanarum vitæ diuturnitates, quas experti non sumus, hodie habere creduntur incognita nobis loca, cur non habuisse credantur et tempora? An vero est credibile alicubi esse quod hic non est, et incredibile est aliquando fuisse quod nunc non est?

CAPUT X. — De differentia qua inter hebræos et nostros codices videntur annorum numeri dissonare.

Quæcirca etsi inter hebræos et nostros codices (b) de ipso numero annorum nonnulla videtur esse distantia, quod ignoro qua ratione sit factum: non tamen tanta est, ut illos homines tam longævos fuisse

¹ sola editio Lov., fortissimus.

² Er. et Lov. Vix illud. At editi alii et Mss. Vix illum. Potest referri aut ad saxum, aut ad limitem de quo proxime ante virgilius.

³ Er. et Mss., quæ. — Melius. M.

(a) Vid. Plin. lib. 7 Hist. nat., cap. 49.

(b) Nostros codices appellat, quibus Ecclesia tunc utebatur latinis, ex græca interpretatione septuaginta: codices vero hebræos, qui ex hebraica Scriptura erant versæ. Conf. lib. 2 de Doct. christ., nn. 16, 22.

discrepant. Nam ipse homo primus Adam, antequam gigneret filium qui appellatus est Seth, ducentos triginta annos vixisse reperitur in codicibus nostris, in hebraeis autem centum triginta perhibetur (*Gen. v. 5*). Sed posteaquam eum genuit, septingentos vixisse legitur in nostris, octingentos vero in illis (*Ibid., 4*). Atque ita in utrisque universalis summa concordat. Ac deinde per consequentes generationes antequam gignatur qui gigni commemoratur, minus vixisse apud hebraeos pater ejus invenitur centum annos : sed posteaquam est genitus item ipse, centum minus quam in hebraeis invenitur in nostris. Atque ita hinc et inde numeri universitas consonat. In sexta autem generatione nusquam utriusque codices discrepant. In septima vero, ubi ille qui natus est Enoch, non mortuus, sed quod Deo placuerit translatus esse narratur, eadem dissonantia est, quae in superioribus quinque de centum annis antequam gigneret eum qui ibi commemoratus est filium : atque ita in summa similis consonantia. Vixit enim annos, antequam transferretur, secundum utrosque codices, trecentos sexaginta et quinque (*Ibid., 21-25*). Octava generatio habet quidem nonnullam diversitatem, sed minorem, ac dissimilem ceteris. Mathusalem¹ quippe, quem genuit Enoch, antequam gigneret eum qui in ipso ordine sequitur, secundum hebraeos non centum minus, sed viginti amplius vixit annos : qui rursus in nostris posteaquam eum genuit, reperiuntur additi, et in utrisque sibi summa universi numeri occurrit (*Ibid. 25-27*). In sola nona generatione, id est in annis Lamech filii Mathusalem, patris autem Noe, summa universitatis discrepat, sed non plurimum. Viginti enim et quatuor annos plus vixisse in hebraeis, quam in nostris codicibus invenitur. Nam antequam gigneret filium, qui vocatus est Noe, sex minus habet in hebraeis quam in nostris : postea vero quam eum genuit, triginta amplius in eisdem quam in nostris (*Ibid. 28-31*). Unde sex illis detractis, restant viginti et quatuor, ut dictum est.

CAPUT XI. — *De annis Mathusalem, cujus aetas quatuordecim annis diluvium videtur excedere.*

Per hanc autem discrepantiam hebraeorum codicum atque nostrorum, exoritur illa famosissima quaestio, ubi Mathusalem quatuordecim annos vixisse post diluvium computatur (a), cum Scriptura ex omnibus qui in terra tunc fuerant, solos octo homines in arca exitum commemoret evasisse diluvii (*1 Petr. III, 20*), in quibus Mathusalem non fuit. Secundum codices enim nostros Mathusalem, priusquam gigneret illum quem vocavit Lamech, vixit annos centum sexaginta septem : deinde ipse Lamech, antequam ex illo natus esset Noe, vixit annos centum octoginta octo, qui simul fiunt trecenti quinquaginta quinque. His adduntur sexcenti Noe, quotus ejus anno diluvium factum est (*Gen. VII, 6*) : qui fiunt nongenti quinquaginta quinque, ex quo Mathusalem natus est usque ad

annum diluvii. Omnes autem anni vite Mathusalem nongenti sexaginta novem computantur : quia cum vixisset annos centum sexaginta septem, et genuisset filium, qui est appellatus Lamech, post eum genitum vixit annos octingentos duos ; qui omnes, ut diximus, nongenti sexaginta novem sunt (*Gen. x, 25-27*). Unde detractis nongentis quinquaginta quinque ab ortu Mathusalem usque ad diluvium, remanent quatuordecim, quibus vixisse creditur post diluvium. Propter quod eam nonnulli, etsi non in terra, ab omnem carnem, quam vivere in aquis natura non sinit, constat fuisse deletam, cum patre suo qui translatus fuerat aliquantum fuisse, atque ibi donec diluvium praeteriret, vixisse arbitrantur ; nolentes derogare fidem codicibus, quos in auctoritatem celebriorem suscepit Ecclesia, et credentes Judaeorum potius quam istos non habere quod verum est. Non enim admittunt, quod magis hic esse poterit error interpretum, quam in ea lingua esse falsum, unde in nostram per graecam Scriptura ipsa translata est. Sed iniqui, non esse credibile Septuaginta interpretes, qui uno simul tempore unoque sensu interpretati sunt, errare potuisse, aut ubi nihil eorum intererat, voluisse mentiri ; Judaeos vero, dum nobis invident, quod Lex et Prophetae ad nos interpretando transierint, mutasse quidam in cordibus suis, ut nostris minueretur auctoritas. Hanc opinionem vel suspicionem accipiat quisque ut putaverit : certum est tamen, non vixisse Mathusalem post diluvium, sed eodem anno fuisse defunctum, si verum est quod de numero annorum in hebraeis codicibus invenitur. De illis autem Septuaginta interpretibus quid mihi videatur, suo loco diligentius inserendum est, cum ad ipsa tempora, quantum necessitas hujus operis postulat, commemoranda, adjuvante Domino, venerimus (a). Praesenti enim sufficit quaestioni secundum utrosque codices tam longas habuisse vitas illius aevi homines, ut posset¹ aetate unus, qui de duobus, quos solos terra tunc habuit parentibus primus est natus, ad constituendam etiam civitatem multiplicari genus humanum.

CAPUT XII. — *De opinione eorum, qui primorum temporum homines tam longevos, quam scribitur, fuisse non credunt.*

1. Neque enim ullo modo audiendi sunt, qui putant aliter annos illis temporibus computatos, id est tantae brevitate, ut unus annus noster decem illos habuisse credatur. Quapropter, iniqui, cum audierit quisque vel legerit nongentos annos quemquam vixisse, debet intelligere nonaginta : decem quippe illi anni unus est noster ; et decem nostri, centum illi fuerunt. Ac per hoc, ut putant, viginti trium annorum fuit Adam, quando genuit Seth ; et ipse Seth viginti (b) habebat et sex menses, quando ex filio natus est Enos, quos appellat Scriptura ducentos et quinque annos. Quoniam, sicut isti suspicantur quorum exponimus opinionem, unum annum qualem

¹ In *ans. Mathusalem*. Postea in sola editione Lov., quippe cum genuit Enoch. verius in ceteris libris, quippe quem.

(a) Vide Hieronymum, de Quaestionibus hebraicis in Genesisum.

¹ Sic nostri codices. in B., ut possit. M.

(a) Infra, lib. 18, capp. 42, 45 et 44

(b) Supple, annos.

nunc habemus, in decem partes illi dividebant, et easdem partes annos vocabant. Quarum partium habet una quadratum senarium, eo quod Deus sex diebus perfecit opera sua, ut in septimo requiesceret. De qua re in libro undecimo (*Cap. 8*), sicut potui, disputavi. Sexies autem seni, qui numerus quadratum senarium facit, triginta sex dies fiunt: qui multiplicati decies, ad trecentos sexaginta perveniunt, id est duodecim menses lunares. Propter quinque dies enim reliquos, quibus solaris annus impletur, et diei quadrantem, propter quem quater ductum eo anno, quo bissextum vocant, unus dies adjicitur, addebantur a veteribus postea dies, ut occurreret numerus annorum, quos dies Romani intercalares vocabant. Proinde etiam Enos, quem genuit Seth, decem et novem agebat annos, quando ex illo natus est filius ejus Cainan, quos annos dicit Scriptura centum nonaginta (*Gen. v, 9, sec. LXX*). Et deinceps per omnes generationes, in quibus hominum anni commemorantur ante diluvium, nullus fere in nostris codicibus invenitur, qui cum esset centum annorum vel infra, vel etiam centum viginti, aut non multo amplius, genuerit filium; sed qui minima ætate genuerunt, centum sexaginta, et quod excurrit, fuisse referuntur: quia nemo, inquit, decem annorum homo potest gignere filios, qui numerus centum appellabatur anni ab illis hominibus; sed in annis sexdecim est matura pubertas, et proli janu idonea procreandæ, quos centum et sexaginta annos illa tempora nuncupabant. Ut autem aliter annum tunc fuisse computatum non sit incredibile, adjiciunt quod apud plerisque scriptores historiæ reperitur, Ægyptios habuisse annum quatuor mensium (*a*), Acarnanas sex mensium, Lavinios tredecim mensium. Plinius Secundus cum commemorasset, relatum fuisse in litteras, quendam vixisse centum quinquaginta duos annos, alium ¹ decem amplius, alios ducentorum annorum habuisse vitam, alios trecentorum, quosdam ad quingentos, alios ad sexcentos, nonnullos ad octingentos etiam pervenisse, hæc omnia propter inscientiam temporum accidisse arbitratus est. *Alii quippe*, inquit, *ætate unum determinabant annum, et alterum hieme; alii quadripartitis temporibus, sicut Arcades*, inquit, *quorum anni trimestres fuerunt*. Adjecit etiam, aliquando Ægyptios, quorum parvos annos quatuor mensium fuisse supra diximus, lunæ sine limitasse annum. *Itaque apud eos*, inquit, *et singula millia annorum vixisse produntur* (*b*).

2. His velut probabilibus argumentis quidam non destruunt fidem sacræ hujus historiæ, sed astruere nitentes, ne sit incredibile quod tam multos annos vixisse referuntur antiqui, persuaserunt sibi, nec se suadere imprudenter existimant, tam exiguum spatium temporis tunc annum vocatum, ut illi decem sint unus noster, et decem nostri centum illorum. Hoc autem falsissimum esse documento evidentissimo ostenditur. Quod antequam faciam, non mihi tacendum vi-

¹ Plures Mss., *alios*.

(a) Vld. Lactant. lib. 2 Instit., cap. 12.

(b) Plin. lib. 7, cap. 49.

detur, quæ credibilior possit esse suspicio. Poteramus certe hanc asseverationem ex hebræis codicibus redarguere atque convincere, ubi Adam non ducentorum triginta, sed centum triginta annorum fuisse reperitur, quando tertium genuit filium (*Gen. v, 3*): qui anni si tredecim nostri sunt, procul dubio primum genuit, quando undecim vel non multo amplius annorum fuit. Quis potest hac ætate generare usitata ista nobisque notissima lege naturæ? Sed hunc omnittamus, qui fortasse etiam quando creatus est, potuit. Non enim eum tam parvum, quam infantes nostri sunt, factum fuisse, credibile est. Sed filius ejus non ducentorum quinque, sicut nos legimus, sed centum quinque fuit, quando genuit Enos (*Ibid.*, 6): ac per hoc, secundum istos, nondum habebat undecim annos ætatis. Quid dicam de Cainan ejus filio, qui cum apud nos centum septuaginta reperitur, apud Hebræos septuaginta legitur fuisse, quando genuit Malalehel (*Ibid.*, 12)? Quis generat homo septennis, si tunc anni septuaginta nuncupabantur qui septem fuerunt?

CAPUT XIII. — *An in dinumeratione annorum, Hebræorum magis quam Septuaginta interpretum sui sequenda auctoritas.*

1. Sed cum hoc dixerò, continuo referetur illud Judæorum esse mendacium; de quo superius satis acium est: nam Septuaginta interpretes laudabiliter celebratos viros non potuisse mentiri. Ubi si quæram, quid sit credibilis, Judæorum gentem, tam longe lateque diffusam, in hoc conscribendum mendacium uno consilio conspirare potuisse, et dum aliis invident auctoritatem, sibi abstulisse veritatem; an septuaginta homines, qui etiam ipsi Judæi erant, in uno loco positos, quoniam rex Ægypti Ptolemæus eos ad hoc opus asciverat, ipsam veritatem gentibus alienigenis invidisse, et communicato istud fecisse consilio: quis non videat quid proclivius faciliusque credatur? Sed absit ut prudens quispiam, vel Judæos cujuslibet perversitatis atque malitiæ tantum potuisse credat in codicibus tam multis et tam longe lateque dispersis; vel Septuaginta illos memorabiles viros hoc de invidenda gentibus veritate unum communicasse consilium. Credibilis ergo quis dixerit, cum primum de bibliotheca Ptolemæi describi ista cœperunt, tunc aliquid tale fieri potuisse in codice uno, scilicet ¹ primitus inde descripto, unde jam latius emanaret, ubi potuit quidem accidere etiam scriptoris error. Sed hoc in illa quæstione de vita Mathusalem non absurdum est suspicari; et in illo alio, ubi superantibus viginti et quatuor annis summa non convenit. In his autem in quibus continuatur ipsius mendositatis similitudo, ita ut ante genitum filium, qui ordini inseritur, alibi supersint centum anni, alibi desint; post genitum autem ubi deerant, supersint; ubi supererant, desint, ut summa conveniat; et hoc in prima, secunda, tertia, quarta, quinta, septima generatione invenitur: videtur habere quamdam, si dici potest,

¹ Mss., *sed*.

error ipse constantiam; nec casum redolet, sed industriam.

2. Itaque illa diversitas numerorum aliter se habentium in codicibus græcis et latinis, aliter in hebræis, ubi non est ista de centum annis prius additis et postea detractis per tot generationes continuata parilitas, nec malitiæ Judæorum, nec diligentiae vel prudentiæ Septuaginta interpretum, sed scriptoris tribuatur errori, qui de bibliotheca supradicti regis codicem describendum primus accepit. Nam etiam nunc, ubi numeri non faciunt intentum ad aliquid quod facile possit intelligi, vel quod appareat utiliter disci, et negligenter describuntur, et negligentius emendantur. Quis enim existimet sibi esse descendum, quot millia hominum tribus Israel sigillatim habere potuerunt? quoniam prodesse aliquid non putatur: et quotus quisque hominum est, cui profunditas utilitatis hujus appareat? Hic vero ubi per tot contextas generationes centum anni alibi adsunt, alibi desunt; et post natum, qui commemorandus fuerat, filium, desunt ubi adfuerunt, adsunt ubi defuerunt, ut summa concordet: nimirum cum vellet persuadere, qui hoc fecit, ideo numerosissimos annos vixisse antiquos, quod eos brevissimos nuncupabant; et hoc de maturitate pubertatis, qua idonea filii gignerentur, conaretur ostendere; atque ideo in illis centum annis decem nostros insinuandos putaret incredulis, ne homines tam diu vixisse recipere in fidem nollent; addidit centum, ubi gignendis filiis habitum non invenit ætatem; eosdemque, post genitos filios, ut congrueret summa, detraxit. Sic quippe voluit credibiles facere idonearum generandæ proli convenientias ætatum, ut tamen numero non fraudaret universas ætates viventium singulorum. Quod autem in sexta generatione id non fecit, hoc ipsum est quod magis movet, illum ideo fecisse, cum res quam dicimus postulavit, quia non fecit ubi non postulavit. Invenit namque in eadem generatione apud hebræos vixisse Jareth, antequam genuisset Enoch, centum sexaginta duos annos (*Gen. v, 18*), qui secundum illam rationem brevium annorum sunt anni sexdecim, et aliquid minus quam menses duo; quæ jam ætas apta est ad gignendum: et ideo addere centum annos breves, ut nostri viginti sex fierint, necesse non fuit; nec post natum Enoch eos detrahere, quos non addiderat ante natum. Sic factum est ut hic nulla esset inter codices utroque varietas.

3. Sed rursus movet, cur in octava generatione, antequam de Mathusalem nasceretur Lamech, cum apud hebræos legantur centum octoginta duo¹ anni, viginti minus inveniuntur in codicibus nostris, ubi potius addi centum solent; et post genitum Lamech complendam restituuntur ad summam, quæ in codicibus utriusque non discrepat. Si enim centum septuaginta annos propter pubertatis maturitatem, decem et septem volebat intelligi, sicut nihil addere, ita nihil

detrahere jam debebat: quia invenerat ætatem idoneam generationi filiorum, propter quam in aliis centum illos annos, ubi eam non inveniebat, addebat. Hoc autem de viginti annis merito putarem casu mendositatis accidere potuisse, nisi eos sicut prius detraxerat, restituere postea curaret, ut summæ conveniret integritas. An forte astutius factum existimandum est, ut illa, qua centum anni prius solent adjici et postea detrahi, occultaretur industria, cum et illic ubi necesse non fuerat, non quidem de centum annis, verumtamen de quantolocumque numero prius detracto, post reddito, tale aliquid fieret? Sed quomodolibet istud accipiatur, sive credatur ita esse factum, sive non credatur; sive postremo ita, sive non ita sit: recte fieri nullo modo dubitaverim, ut cum diversum aliquid in utrisque codicibus inventur, quandoquidem ad fidem rerum gestarum utrumque esse non potest verum, ei linguæ potius credatur, unde est in aliam per interpretes facta translatio. Nam in quibusdam etiam codicibus græcis tribus, et uno latino, et uno etiam syro inter se consentientibus, inventus est Mathusalem sex annis ante diluvium fuisse defunctus (a).

CAPUT XIV. — *De parilitate annorum, qui iisdem quibus nunc spatiis et in prioribus sæculis cucurrerunt.*

1. Nunc jam videamus quonam modo evidenter possit ostendi, non tam breves, ut illi decem unus esset noster, sed tantæ prolixitatis annos quantæ nunc habemus (quos utique circuitus conficit solis), in illorum hominum vita prolixissima computatos. Sexcentesimo nempe anno vitæ Noe scriptum est factum esse diluvium. Cur ergo ibi legitur, *Et aqua diluvii facta est super terram sexcentesimo anno in vita¹ Noe, secundi mensis, septima et vicesima mensis* (*Gen. vii, 10, 11 sec. LXX*); si annus ille minimus, quales decem faciunt unum nostrum, triginta sex dies habebat? Tantillus quippe annus, si antiquo more hoc nomen accepit, aut non habet menses, aut mensis ejus est triduum, ut habeat duodecim menses. Quomodo igitur hic dictum est, *Sexcentesimo anno, secundi mensis, septima et vicesima die mensis*; nisi quia tales quales nunc sunt, etiam tunc erant menses? Nam quo pacto aliter vicesimo et septimo die secundi mensis diceretur coeptum esse diluvium? Deinde postea in fine diluvii ita legitur: *Et sedit arca in mense septimo, septima et vicesima die mensis, super montes Ararat. Aqua autem minuebatur usque ad undecimum mensem: in undecimo autem mense, prima die mensis, paruerunt capita montium* (*Id. viii, 4, 5*). Si igitur tales menses erant, tales profecto et anni erant, quales nunc habemus. Menses quippe illi triduanus, viginti et septem dies habere non poterant. Aut si pars tricesima tridui tunc appellabatur dies, ut omnia proportionem minuantur; ergo nec toto quadriduo nostro factum est illud tam grande diluvium, quod memoratur factum

¹ Nonnulli manuscripti omittunt, duo; pro quo legendum videtur, septem: sic enim apud Hebræos, *Gen. v, 25*; quo loco apud Septuaginta interpretes habetur, centum sexaginta septem anni. — Codices nostri ferunt, duo. M.

¹ Editti, vitæ. At Mss., in vita: juxta græcum Septuaginta.

(a) Conf. Quæst. in *Gen.*, q. 2.

quadraginta diebus et noctibus. Quis hanc absurditatem et vanitatem forat? Proinde removeatur hic error, qui conjectura falsa ita vult astruere Scripturam nostrarum fidem, ut alibi destruat. Prorsus tantus etiam tunc dies fuit, quantus et nunc est, quem viginti et quatuor horæ diurno curricula nocturnoque determinat: tantus mensis, quantus et nunc est, quem luna cœpta et finita concludit: tantus annus, quantus et nunc est, quem duodecim menses lunares, additis propter cursum solarem quinque diebus et quadrante, consummant: quanti anni¹ sexcentissimi vitæ Noe secundus erat mensis ejusque mensis vicesimus et septimus dies, quando cœpit esse diluvium; in quo dies quadraginta continuatæ ingentes pluvie memorantur (*Gen. vii, 12*), qui dies non binas ac paulo amplius horas habebant, sed vicenas et quaternas die noctuque transactas. Ac per hoc tam magnos annos vixerunt illi antiqui usque amplius quam nongentos, quantos postea vixit Abraham centum septuaginta quinque² (*Id. xxv, 7*), et post eum filius ejus Isaac centum octoginta (*Id. xxxv, 28*), et filius ejus Jacob prope centum quinquaginta (*Id. xxvii, 28*), et quantos interposita aliquanta ætate Moyses centum viginti (*Deut. xxxiv, 7*), et quantos etiam nunc vivunt homines septuaginta vel octoginta, vel non multo amplius, de quibus dictum est: *Et amplius eis labor et dolor* (*Psal. lxxxix, 10*).

2. Illa vero numerorum varietas, quæ inter codices hebræos invenitur et nostros, neque de hac antiquorum longevitate dissentit, et si quid habet ita diversam, ut verum esse utrumque non possit, rerum gestarum fides ab ea lingua repetenda est, ex qua interpretatum est quod habemus. Quæ facultas eum volentibus ubique gentium præsto sit; non tamen vacat (a), quod Septuaginta interpretes, in plurimis quæ diversa dicere videntur, ex hæbreis codicibus emendare ausus est nemo. Non enim est illa diversitas potata mendacitas; nec ego ullo modo putandam existimo. Sed ubi non est scriptoris error, aliquid eos divino Spiritu, ubi sensus esset consentaneus veritati, et prædicans veritatem, non interpretantium more³, sed prophetantium libertate aliter dicere voluisse credendum est. Unde merito, non solum hebræis, verum etiam ipsis, cum adhibet testimonia de Scripturis, uti apostolica invenitur auctoritas. Sed hinc me opportuniori loco, si Deus adjuverit, promisi diligentius locuturum: nunc quod instat expediatur. Non enim ambigendum est ab homine, qui ex primo homine primus est natus, quando tam diu vivebant, potuisse constitui civitatem, sive terrenam, non illam quæ dicitur civitas Dei: de qua ut scriberemus, laborem tantum hujus operis in manus sumpsimus.

¹ Sic omnes Mss. At editi, *tantus anni*; mendose.

² Plerique Mss., *centum septuaginta*; omisso, *quinque*.

³ Mss., *numere*.

(a) Hoc vult: non est inane, et sine mysterio et causa. sup. VIII.

CAPUT XV. — *An credibile sit, primi sæculi viros usque ad eam ætatem, qua filios generasse referuntur, a concubitu continuisse.*

1. Dicit ergo aliquis: Itane credendum est, hominem filios generaturum, nec habentem propositum continentie, centum et amplius, vel secundum Hebræos non multo minus, id est octoginta, septuaginta, sexaginta annos a concumbendi opere vacavisse; aut si non vacaret, nihil proles gignere potuisse? Hæc quæstio duobus modis solvitur. Aut enim tanto serior fuit proportione pubertas, quanto vitæ totius major annositas: aut, quod magis video esse credibile, non hic primogeniti filii commemorati sunt, sed quos successionis ordo posebat, ut perveniretur ad Noe, a quo rursus ad Abraham videmus esse perventum; ac deinde usque ad certum articulum temporis, quantum oportebat signari etiam generationibus commemoratis cursum gloriosissimæ civitatis in hoc mundo peregrinantis, et supernam patriam requirentis. Quod enim negari non potest, prior omnibus Cain ex conjunctione maris et femine natus est. Neque enim illo nato dixisset Adam, quod dixisse legitur, *Acquisivi hominem pro Deum*; nisi illis duobus ipse fuisset homo nascendo additus primus. Hunc secutus Abel, quem major frater occidit, præfiguratione¹ quadam peregrinantis civitatis Dei, quod ab impiis, et quodammodo terrigenis, id est terrenam originem diligentibus, et terrenæ civitatis terrena sollicitate gaudentibus, persecutiones iniquas passura fuerat, primus ostendit. Sed quot annorum erat Adam, cum eos genuit, non apparet. Exinde digeruntur generationes aliæ de Cain, aliæ de illo quem genuit Adam in ejus successionem, quem frater occidit, et appellavit nomen illius Seth, dicens ut scriptum est, *Suscitavit enim mihi Deus semen aliud pro Abel, quem occidit Cain* (*Gen. iv, 1, 25*). Cum itaque istæ duæ series generationum, una de Seth, altera de Cain, has duas de quibus agimus, distinctis ordinibus insinuent civitates, unam cœlestem in terris peregrinantem, alteram terrenam terrenis tanquam sola sint gaudiis inhiantem vel inbarentem; nullus de progenie Cain, cum dinumerata sit connumeratio Adam usque ad octavam generationem, quot annorum fuisset expressus est, quando genuit eum qui commemoratur post eum. Noluit enim Spiritus Dei in terrenæ civitatis generationibus tempora notare ante diluvium, sed in cœlestis maluit, tanquam essent memoria digniores. Porro autem Seth quando natus est, non quidem taciti sunt anni patris ejus, sed jam generat alios: et utrum soles Cain et Abel, affirmare quis audeat? Non enim quia soli nominati sunt propter ordines generationum, quas commemorari oportebat, ideo consequens videri debet solos fuisse tunc generatos ex Adam. Cum enim silentio cooperitis omnium nominibus ceterorum, legatur eum genuisse filios et filias, quæta fuerit ista proles ejus, quis præsumat asserere, si culpam temeritatis

¹ Lov., *præfigurationem*; dissentientibus editis aliis et manuscriptis.

evitat? Potuit quippe Adam divinitus admonitus dicere, posteaquam Seth natus est, *Suscitavit enim mihi Deus semen aliud pro Abel*; quoniam talis erat futurus, qui impleret illius sanctitatem, non quod ipse prior post eum temporis ordine nasceretur. Deinde quod scriptum est, *Vixit autem Seth quinque et ducentos annos*, vel secundum Hebræos, *quinque et centum annos*, et genuit Enos: quis possit nisi inconsideratus asseverare, hunc ejus primogenitum fuisse? Ut admirantes merito requiramus, quomodo per tot annos immunis fuerit a connubio sine ullo proposito continentiae, vel non genuerit conjugatus; quandoquidem etiam de ipso legitur, *Et genuit filios et filius, et fuerunt omnes dies Seth duodecim et nongenti anni, et mortuus est (Gen v, 4-8)*. Atque ita deinceps quorum anni commemorantur, nec filios filiasque genuisse reticentur. Ac per hoc non apparet omnino, utrum qui nominatur genitus, ipse fuerit primogenitus: imo vero, quoniam credibile non est, patres illos ætate tam longa aut impuberes fuisse, aut conjugibus caruisse vel fetibus; nec illos eorum filios primos eis natos fuisse credibile est. Sed cum sacræ scriptor historie ad ortum vitamque Noe, cujus tempore diluivum factum est, per successiones generationum notatis temporibus intenderet pervenire, eas utique commemoravit, non quæ primæ suis parentibus fuerint, sed quæ in propagationis ordinem venerint.

2. Exempli gratia, quo id fiat apertius, aliquid interponam, unde nullus ambigat fieri potuisse quod dico. Evangelista Matthæus generationem Dominicæ carnis per seriem parentum volens commendare memoriæ, ordiens a patre Abraham, atque ad David primitus ut perveniret intendens, *Abraham*, inquit, *genuit Isaac*: cur non dixit, Ismael, quem primitus genuit? *Isaac autem*, inquit, *genuit Jacob*: cur non dixit, Esau, qui ejus primogenitus fuit? Quia scilicet per illos ad David pervenire non posset. Deinde sequitur, *Jacob autem genuit Judam, et fratres ejus*: numquid Judas primogenitus fuit? *Judas*, inquit, *genuit Phares et Zaram (Math. 1, 2, 3)*: nec istorum geminorum aliquis fuit primogenitus Judæ, sed ante illos jam tres genuerat. Eos itaque tenuit in ordine generationum, per quos ad David, atque inde quo intenderat, perveniret. Ex quo intelligi potest, veteres quoque homines ante diluivum non primogenitos, sed eos fuisse commemoratos, per quos succedentium ordo generationum ad Noe patriarcham duceretur, ne seræ pubertatis illorum obscura et non necessaria quæstio nos fatigaret.

CAPUT XVI. — *De jure conjugiorum, quod dissimile a subsequentibus matrimoniis habuerint prima connubia.*

1. Cum igitur genus humanum post primam copulam viri facti ex pulvere, et conjugis ejus ex viri latere, marium feminarumque conjunctione opus haberet, ut gignendo multiplicaretur; nec essent ulli homines, nisi qui ex illis duobus nati fuissent; viri sorores suas conjuges acceperunt: quod profecto quanto est anti-

quius compellente necessitate, tanto postea factum est damnabilius religione prohibente. Habita est enim ratio rectissima charitatis, ut homines quibus esset utilis atque honesta concordia, diversarum necessitatum vinculis necerentur; nec unus in uno¹ multas haberet, sed singulæ spargerentur in singulos; ac sic ad socialen vitam diligentius colligandam² plurimæ plurimos obtinerent. Pater quippe et socer duarum sunt necessitatum nomina. Ut ergo alium quisque habeat patrem, alium socerum, numerosius se charitas perrrigit. Utrumque autem unus Adam esse cogebatur et filiis et filiabus suis, quando fratres sororesque connubio jungebantur. Sic et Eva, uxor ejus, utrique sexui filiorum fuit et socrus et mater: quæ si duæ feminæ fuissent, mater altera, et socrus altera, copiosius se socialis dilectio colligaret. Ipsa denique jam soror, quod³ etiam uxor fiebat, duas tenebat una necessitudines: quibus per singulas distributis, ut altera esset soror, altera uxor, hominum numero socialis propinquitatis augetur. Sed hoc unde fieret tunc non erat, quando nisi fratres et sorores ex illis duobus primiti nulli homines erant. Fieri ergo debuit quando potuit, ut existente copia inde ducerentur uxores, quæ non erant jam sorores; et non solum istud ut fieret, nulla necessitas esset, verum etiam si fieret, nefas esset. Nam si et nepotes primorum hominum, qui jam co-sobrinas poterant accipere conjuges, sororibus matrimonio jungerentur; non jam duæ, sed tres in homine uno necessitudines fierent, quæ propter charitatem numerosiore propinquitate necendam, disseminari per singulos singulæ debuerunt. Esset enim unus homo filiis suis, fratri scilicet sororique conjugibus, et pater et socer et avunculus: ita et uxor ejus iisdem communibus filiis et mater et amita et socrus: fidemque inter se filii eorum, non solum essent fratres atque conjuges, verum etiam consobrini; quia et fratrum filii. Omnes autem istæ necessitudines, quæ uni homini tres homines connectebant, novem connecterent, si essent in singulis singulæ, ut unus homo haberet alteram sororem, alteram uxorem, alteram consobrinam, alterum patrem, alterum avunculum, alterum socerum, alteram matrem, alteram amitam, alteram socrum: atque ita se non in paucitate coarctatum, sed latius atque numerosius propinquitatibus crebris vinculum sociale diffunderet.

2. Quod humano genere crescente et multiplicato, etiam inter impios deorum multorum falsorumque cultores sic observari cernimus, ut etiamsi perversis legibus permittantur fraterna conjugia, melior tamen consuetudo ipsam malit exhorrere licentiam; et cum sorores accipere in matrimonium primis humani generis temporibus omnino licuerit, sic aversetur, quasi nunquam licere poterit. Ad humanum enim sensum vel alliciendum, vel offendendum mos valet plurimum. Qui cum in hac causa immoderationem concupiscen-

¹ Am. et Lov., in una. Emendantur ad Vinl. Br. et ad manuscriptoros.

² Sola editio Lov., colligendam.

³ Plures MSS., quæ.

(Quinse.)

SANCT. AUGUST. VII.

4æ coerceat, eum designari¹ atque corrumpi merito esse nefarium judicatur. Si enim iniquum est, aviditate possidendi transgredi limitem agrorum, quanto est iniquus libidine concumbendi subvertere limitem morum? Experti autem sumus in connubiis consobrinarum etiam nostris temporibus propter gradum propinquitatis fraterno gradui proximum, quam raro per mores fiebat, quod fieri per leges licebat; quia id nec divina prohibuit, et nondum prohibuerat lex humana (a). Verumtamen factum etiam licitum propter vicinitatem horrebatur illiciti; et quod fiebat cum consobrina, pene cum sorore fieri videbatur: quia et ipsi inter se propter tam propinquam consanguinitatem fratres vocantur, et pene germani sunt. Fuit autem antiquis patribus religioe curæ, ne ipsa propinquitatis se paulatim propaginum ordinibus dirimens longius abiret et propinquitatis esse desisteret, eam nondum longe positam rursus matrimonii vinculo colligare, et quodammodo revocare fugientem. Unde jam pleno hominibus orbe terrarum, non quidem sorores ex patre vel matre, vel ex ambobus suis parentibus natas, sed tamen amabant de suo genere ducere uxores. Verum quis dubitet honestius hoc tempore etiam consobrinorum² prohibita esse conjugia? non solum secundum ea quæ disputavimus, propter multiplicandas affinitates, ne habeat eas necessitudines una persona, cum duæ possint eas habere, et numerus propinquitatis augeri; sed etiam quia nescio quomodo inest humanæ verecundiæ quiddam naturale atque laudabile, ut cui debet causa propinquitatis reverendum³ honorem, ab ea contineat, quamvis generatricem, tamen libidinem, de qua erubescere videmus et ipsam pudicitiam conjugalem.

3. Copulatio igitur maris et femine, quantum attinet ad genus mortaliū, quoddam seminarium est civitatis: sed terrena civitas generatione tantummodo, cælestis autem etiam regeneratione opus habet, ut noxam generationis evadat. Utrum autem aliquid fuerit, vel si fuit, quale fuerit corporale atque visibile regenerationis signum ante diluvium (b), sicut Abrahæ circumcisio postea est imperata (Gen. xvii, 10, 11), sacra historia tacet. Sacrificasse tamen Deo etiam illos antiquissimos homines non tacet: quod et in duobus primis fratribus claruit; et Noë post diluvium, cum de arca fuisset egressus, hostias Deo legitur immolasse (Id. viii, 20). De qua re in præcedentibus

¹ Editi, *designari*. Melius plures manuscripti, *dissignari*; id est convelli et dirumpi. sic in Terentio, Adelp. act. 1, scen. 2, pro, *modo quid designavit*, Eusebius legit, *dissignavit*, dicitque dissignare proprie esse aliquid legibus signatum rumpere.

² Sic Mss. At editi, *consobrinarum*.

³ Editi, *verecundam*; dissentientibus Mss.

(a) Legem a Theodosio latam ne inter consobrinos et parentea inirentur matrimonia, laudat Aurelius Victor in Theodosio, et Ambrosius, lib. 8, epist. 66, eamque legem fortassis indicat hic postea Augustinus verbis illis: « Verum quis dubitet honestius hoc tempore etiam consobrinorum prohibita esse conjugia? » Lex porro ista Theodosii hactenus desideratur: superest autem in eandem rem lex alia, quæ Constantio tribuitur, sancta Romæ, Arbustione et Loliano consulibus, in Cod. Theod., lib. 2 de incest. Nupt. Dispensatum olim a Cesaribus, ut legitima esset uxor consobrina, docet Cassiodorus Senator, lib. 7 Variar., cap. 46.

(b) Conf. lib. 5 cont. Julian., n. 45.

libris jam diximus, non ob aliud dæmones arrogantes sibi divinitatem deosque se credi cupientes sibi expetere sacrificium, et gaudere hujusmodi honoribus, nisi quia verum sacrificium vero Deo deberi sciunt.

CAPUT XVII. — *De duobus ex uno genitore procreatis patribus atque principibus.*

Cum ergo esset Adam utriusque generis pater, id est, et cujus series ad terrenam, et cujus series ad cælestem pertinet civitatem; occiso Abel, atque in ejus interfectione commendato mirabili sacramento, facti sunt duo patres singulorum generum, Cain et Seth: in quorum filiis, quos commemorari oportebat, duarum istarum civitatum in genere mortaliū evidentius indicia clarere cœperunt. Cain quippe genuit Enoch, in cujus nomine condidit civitatem, terrenam scilicet, non peregrinantem in hoc mundo, sed in ejus temporali pace ac felicitate quiescentem. Cain autem interpretatur Possessio: unde dictum est quando natus est, sive a patre, sive a matre ejus, *Acquisivi hominem per Deum* (Gen. iv, 1). Enoch vero, Dedicatio: hic enim dedicatur terrena civitas, ubi conditur; quoniam hic habet eum, quem intendit et appetit finem. Porro ille Seth Resurrectio interpretatur, et Enos filius ejus interpretatur Homo: non sicut Adam (et ipsum enim nomen interpretatur Homo), sed commune perhibetur esse in illa lingua, id est hebræa, masculo et femine. Nam sic de illo scriptum est: *Masculum et feminam fecit illos, et benedixit illos, et cognominavit nomen eorum Adam* (Id. v, 2). Unde non ambigitur, sic appellatam fuisse feminam Evam proprio nomine, ut tamen Adam, quod interpretatur Homo, nomen esset amborum. Enos autem sic interpretatur Homo, ut hoc non posse feminam nuncupari periti lingue asseverent, tanquam filius resurrectionis, ubi non nubent, neque uxores ducent (Luc. xx, 35). Non enim erit ibi generatio, cum illic perduxerit regeneratio. Quare et hoc non incassum notandum arbitror, quod in eis generationibus quæ propagantur ex illo qui est appellatus Seth, cum genuisse filios filiasque dicantur¹, nulla ibi genita nominatim femina expressa est: in his autem quæ propagantur ex Cain, in ipso sine quousque protendantur², novissima femina genita nominatur (a). Sic enim legitur: *Mathusael genuit Lamech: et sumpsit sibi Lamech duas uxores, nomen uni Ada, et nomen secundæ Sella; et peperit Ada Jobel: hic erat pater habitantium in tabernaculis pecuvariorum. Et nomen fratris ejus Jubal: hic fuit qui ostendit psalterium et citharam. Sella autem peperit et ipsa Thobel, et erat ararius et malleator aramenti et ferri. Soror autem Thobel Noem³* (Gen. iv, 18-22). Huc usque porrecte sunt generationes ex Cain, quæ sunt omnes ab Adam octo, annumerato ipso Adam, septem scilicet usque ad Lamech, qui duarum maritus uxorum fuit: et

¹ Sic Mss. At editi, *dicuntur*.

² Plerique Mss., *perpendunt*.

³ Nonnulli Mss. *Noemina*.

(a) cum his et sequentibus confer Theodoretum in Genesim, quest. 47. Cœquæus.

octava est generatio in filiis ejus, in quibus commemoratur et femina. Ubi eleganter significatum est, terrenam civitatem usque in sui finem carnales habitum generationes, quæ marium seminarumque conjunctione proveniunt. Unde et ipsæ, quod præter Evam nusquam reperitur ante diluvium, nominibus propriis exprimentur uxores illius hominis, qui nominatur hic novissimus pater. Sicut autem Cain, quod interpretatur Possessio, terrenæ conditor civitatis, et filius ejus, in cuius nomine condita est, Enoch, quod interpretatur Dedicatio, indicat istam civitatem et initium et finem habere terrenum; ubi nihil speratur amplius, quam ¹ in hoc sæculo cerni potest: ita Seth, quod interpretatur Resurrectio, cum sit generationum seorsum commemoratarum pater, quid de filio ejus sacra hæc historia dicat, intuendum est.

CAPUT XVIII. — *Quid significatum sit in Abel, et Seth, et Enos, quod appareat ad Christum et corpus ejus, id est Ecclesiam, pertinere.*

Et Seth, inquit, natus est filius, et nominavit nomen ejus Enos: hic speravit invocare nomen Domini Dei (Gen. iv, 26). Nempe clamat attestatio veritatis. In spe igitur vivit homo filius resurrectionis; in spe vivit, quamdiu peregrinatur hic civitas Dei, quæ gignitur ex fide resurrectionis Christi. Ex duobus namque illis hominibus, Abel, quod interpretatur Luctus, et ejus fratre Seth, quod interpretatur Resurrectio, mors Christi et vita ejus ex mortuis figuratur. Ex qua fide gignitur hic civitas Dei, id est homo, qui speravit invocare nomen Domini Dei. *Spe enim salvi facti sumus, ait Apostolus. Spes autem quæ videtur, non est spes: quod enim videt quis, quid sperat? Si autem quod non videmus, speramus, per patientiam expectamus (Rom. viii, 24, 25).* Nam quis vacare hoc existimet ab altitudine sacramenti? Numquid enim Abel non speravit invocare nomen Domini Dei, cujus sacrificium Scriptura tam acceptum Deo fuisse commemorat? numquid ipse Seth non speravit invocare nomen Domini Dei, de quo dictum est, *Suscitavit enim mihi Deus semen aliud pro Abel (Gen. iv, 25)?* Cur ergo huic proprie tribuitur quod piorum omnium intelligitur esse commune, nisi quia oportebat in eo qui de patre generationum in meliorem partem, hoc est supernæ civitatis separatarum, primus commemoratur exortus, præfigurari hominem, id est hominum societatem, quæ non secundum hominem in re felicitatis terrenæ, sed secundum Deum vivit in spe felicitatis æternæ? Nec dictum est, *Hic speravit in Dominum Deum; aut, Hic invocavit nomen Domini Dei: sed, Hic speravit, inquit, invocare nomen Domini Dei.* Quid sibi hoc vult, *Speravit invocare,* nisi quia prophetia est, exorturum populum, qui secundum electionem gratiæ invocaret nomen Domini Dei? Hoc est, quod per alium prophetam dictum, *Apostolus de hoc populo intelligit ad Dei gratiam pertinente: Et erit, omnis quicumque invocaverit nomen Domini, salvus erit (Rom. x, 13; Joel ii, 32).* Hoc enim ipsum quod dicitur, *Et nominavit nomen ejus Enos, quod interpretatur Homo; ac deinde additur, Hic spe-*

¹ Editti, quam quod. Abest, quod, a Mss.

rahit invocare nomen Domini Dei: satis ostenditur, quod non in se ipso spem ponere debeat homo. Maledictus enim omnis, sicut alibi legitur, qui spem suam ponit in homine (Jerem. xvii, 5): ac per hoc, nec in se, ut sit civis alterius civitatis, quæ non secundum filium Cain dedicatur hoc tempore, id est mortalis hujus sæculi labente transcurso, sed in illa immortalitate beatitudinis sempiternæ.

CAPUT XIX. — *De significatione quæ in Enoch translatione monstratur.*

Nam et ista propago, cujus est pater Seth, in ea generatione habet dedicationis nomen, quæ septima est ab Adam, annumerato Adam. Septimus enim ab illo natus est Enoch, quod interpretatur Dedicatio. Sed ipse est ille translatus, quoniam placuit Deo, et insigni numero in ordine generationum, quo sabbatum consecratum est, septimo scilicet ab Adam. Ab ipso autem patre istarum generationum, quæ discerantur a propagine Cain, id est a Seth, sextus est: quoto die factus est homo, et consummavit Deus omnia opera sua. Sed hujus Enoch translatio nostræ dedicationis est præfigurata dilatio. Quæ quidem jam facta est in Christo capite nostro, qui sic resurrexit, ut non moriatur ulterius, sed etiam ipse translatus est: restat autem altera dedicatio universæ domus, cujus ipse Christus est fundamentum, quæ differtur in finem, quando erit omnium resurrectio, non moriturorum amplius. Sive autem domus Dei dicatur, sive templum Dei, sive civitas Dei, id ipsum est, nec abhorret a latina eloquii consuetudine. Nam et Virgilius imperiosissimam civitatem domum appellat Assaraci, Romanos volens intelligi, qui de Assaraco per Trojanos originem ducunt; et domum Æneæ eosdem ipsos (*Æneid. lib. 1, vers. 284; lib. 3, vers. 97*), quia eo duce Trojani cum Italiam venissent, ab eis condita est Roma. Imitatus namque est poeta ille sacras Litteras, in quibus dicitur domus Jacob tam ingens populus Hebræorum.

CAPUT XX. — *De eo quod Cain successio in octo ab Adam generationes clauditur, et in posteris ab eodem patre Adam Noe decimus invenitur.*

1. Dicet aliquis: Si hoc intendebat scriptor hujus historiæ in commemorandis generationibus ex Adam per filium ejus Seth, ut per illas perveniret ad Noe, sub quo factum est diluvium, a quo rursus contexteretur ordo nascentium, quo perveniret ad Abraham, a quo Mathæus evangelista incipit generationes, quibus ad Christum pervenit æternum Regem civitatis Dei; quid intendebat in generationibus ex Cain, et quo eas perducere volebat? Respondetur: Usque ad diluvium, quo totum illud genus terrenæ civitatis absumptum est, sed reparatum ex filiis Noe. Neque enim desse poterit hæc terrena civitas societasque hominum secundum hominem viventium usque ad hujus sæculi finem, de quo Dominus ait, *Filii hujus sæculi generant, et generantur (Luc. xx, 34).* Civitatem vero Dei peregrinantem in hoc sæculo generatio perducit ad alterum sæculum, cujus filii nec generant, nec generantur. Hic ergo generari et generare civitati utri-

que commune est : quamvis Dei civitas habeat etiam hic multa civium millia, quæ ab opere generandi se abstinent ; sed habet etiam illa ex imitatione quadam, licet errantium¹. Ad eam namque pertinent etiam, qui deviantes ab hujus fide diversas hæreses condiderunt : secundum hominem quippe vivunt, non secundum Deum. Et Indorum Gymnosophistæ, qui nudi perhibentur philosophari in solitudinibus Indiæ, cives ejus sunt, et a generando se cohíbent (a). Non enim est hoc bonum, nisi cum sit secundum fidem summi boni, qui est Deus. Hoc tamen nemo fecisse ante diluvium reperitur : quandoquidem etiam ipse Enoch septimus ab Adam, qui translatus refertur esse, non mortuus, genuit filios et filias antequam transferretur ; in quibus fuit Mathusalem, per quem generationum memorandarum ordo transcurrit.

2. Cur ergo tanta paucitas successio-
norum in generationibus ex Cain, si eas usque ad diluvium perducere oportebat, nec erat diuturna ætas præveniens pubertatem, quæ centum vel amplius annos vacaret a feibus? Nam si non intendebat auctor libri hujus aliquem, ad quem necessario perduceret seriem generationum, sicut in illis quæ veniunt de semine Seth intendebat pervenire ad Noe, a quo rursus ordo necessarius sequeretur ; quid opus erat prætermittere primogenitos filios, ut perveniretur ad Lamech, in cujus filiis finitur illa contextio, octava generatio scilicet ex Adam, septima ex Cain, quasi esset inde aliquid deinceps connectendum, unde perveniretur vel ad Israeliticum populum, in quo cœlesti civitati etiam terrena Jerusalem figuram prophetica præbuit, vel ad Christum secundum carnem, qui est super omnia Deus benedictus in sæcula (Rom. ix, 5), supernæ Jerusalem fabricator atque regnator ; cum tota progenies Cain diluvio sit deleta? Unde videri potest, in eodem ordine generationum primogenitos fuisse commemoratos. Cur ergo tam pauci sunt? Non enim usque ad diluvium tot esse potuerunt, non vacantibus usque ad centenariam pubertatem patribus ab officio generandi, si non erat tunc proportio longævitas illius etiam sera pubertas. Ut enim peræque triginta annorum fuerint, cum filios generare cœperunt, octies triceni (quoniam octo sunt generationes cum Adam et cum eis quos genuit Lamech), ducenti et quadraginta sunt anni : num itaque toto deinde tempore usque ad diluvium non generaverunt? Qua tandem causa, qui hæc scripsit, generationes commemorare noluit quæ sequuntur? Nam ex Adam usque ad diluvium computantur anni, secundum codices nostros, duo millia ducenti sexaginta duo² : secundum hebræos utem, mille sexcenti quinquaginta sex. Ut ergo istum numerum minorem credamus esse veriorum, de mille sexcentis quinquaginta sex annis ducenti quadraginta

¹ Ita Mss. Editi autem, *sed habet etiam illa cives nonnullos istis similes ex imitatione quadam licet errantes.*

² Aliquot Mss., *duo millia ducenti quinquaginta.* Eusebius, Hieronymus, Beda alique secundum septuaginta interpretum codices computant duo millia ducentos quadraginta et duos annos. — Codex 2050, *duo millia ducenti* LXXII. M.

(a) Conf. supra, lib. 14, cap. 17, in fin.

dehantur : numquid credibile est per mille quadringentos, et quod excurrit, annos, qui restant usque ad diluvium, progeniem Cain a generationibus vacare potuisse?

3. Sed qui ex hoc movetur, meminerit, cum quærerem quomodo credendum sit, antiquos illos homines per tam multos annos a gignendis filiis cessare potuisse, duobus modis istam solutam esse quæstionem ; aut de sera pubertate, proportione tam longævitate ; aut de filiis qui commemorantur in generationibus, quod non fuerint primogeniti ; sed hi per quos ad eum, quem intendebat auctor libri, poterat pervenire, sicut ad Noe in generationibus Seth. Proinde in generationibus Cain, si non occurrit qui deberet intendi, ad quem prætermisiss primogenitis, per eos qui commemorati sunt, perveniri oportebat, sera pubertas intelligenda restabit ; ut aliquanto post centum annos, puberes habilesque ad gignendum facti fuerint, ut ordo generationum per primogenitos curreret, et usque ad diluvium ad numerum annorum tantæ quantitatis occurreret. Quamvis fieri possit, ut propter aliquam secretiorem causam, quæ me latet, usque ad Lamech et ejus filios generationum perveniente contextu, commendaretur hæc civitas, quam dicimus esse terrenam ; ac deinde cessaret scriptor libri commemorare cæteras, quæ usque ad diluvium esse potuerunt (a). Potest et illa esse causa, cur non ordo generationum per primogenitos duceretur, ut necesse non sit in illis hominibus tam seram credere pubertatem, quod scilicet eadem civitas, quam Cain in nomine Enoch filii sui condidit, longe lateque regnare potuerit, et reges habere non simul plures, sed suis ætalibus singulos, quos genuissent sibi¹ successuros quicumque regnassent. Horum regum primus esse potuit ipse Cain, secundus filius ejus Enoch, in cujus nomine ubi regnaretur, condita est civitas : tertius Gaidad, quem genuit Enoch : quartus Manihel², quem genuit Gaidad : quintus Mathusael, quem genuit Manihel : sextus Lamech, quem genuit Mathusael, qui septimus est ab Adam per Cain. Non autem erat consequens, ut primogeniti regum³ regnantibus succederent patribus, sed quos regnandi meritum propter virtutem terrenæ utiliter civitati, vel sors aliqua reperiret, vel ille potissimum succederet patri hæreditario quodam jure reguandi, quem præ cæteris filiis dilexisset. Potuit autem vivente adhuc Lamech atque regnante fieri diluvium, ut ipsum cum aliis omnibus hominibus, exceptis qui in arca fuerunt, quem

¹ Sola editio Lov., *ubi* : et paulo post, *ubi regnaret* ; pro, *ubi regnaretur.*

² Aliquot Mss. *Maviael.* Et nonnulli, *Maviael.* Apud Septuaginta vero, *Maleleel.*

³ Sic codices nostri. In B., *ut primogeniti in regnum.* M.

(a) Credo esse enumeratas tantum generationes Cain, que puniri debebant propter fratricidium. Sic enim Josephus scribit, Antiq. Jud. lib. 1, cap. 2, § 1 : « Cain sacrificium celebranti ac poscenti ne ob hoc iram susciperet, a sæviore poenâ homicidii relaxavit ; maledictumque esse constituit, et ejus sobolem usque ad septimam generationem interminatus est esse puniendam. » Tum etiam usque ad id tempus vixit Cain : cujus finem vitæ per generationem ejus volebat narrator prætermittere. Lcp. Vives.

perderet, inveniret. Neque enim mirandum est, si varia quantitate numerositatis annorum interposita, per tam longam ætatem ab Adam usque ad diluvium non æqualis numeri generationes habuit utraque progenies, sed per Cain septem, per Seth autem decem: septimus est enim, ut jam dixi, ab Adam Lamech, decimus Noe: et ideo non unus filius Lamech, sicut in cæteris superius, sed plures commemorati sunt; quia incertum erat quis ei fuisset mortuo successurus, si regnandi tempus inter ipsum et diluvium remansisset.

4. Sed quoquo modo se habeat, sive per primogenitos, sive per reges, ex Cain generationum ordo decurrens, illud mihi nullo pacto prætereundum silentio videtur, quod cum Lamech septimus ab Adam fuisset inventus, tot ejus annumerati sunt filii, donec undenarius numerus impleretur, quo significatur peccatum. Adduntur enim tres filii, et una filia. Uxores autem alii possunt significare, non hoc quod nunc commendandum videtur. Nunc enim de generationibus loquimur: illæ vero unde sint genitæ, tacitum est. Quoniam ergo Lex denario numero prædicatur, unde est memorabilis ille Decalogus; profecto numerus undenarius, quoniam transgreditur denarium, transgressionem legis, ac per hoc peccatum significat. Hinc est quod in tabernaculo testimonii, quod erat in itinere populi Dei velut templum ambulatorium¹, undecim vela cilicina fieri præcepta sunt (*Exod. xxvi, 7*). In cilicio quippe recordatio est peccatorum, propter hædos ad sinistram futuros: quod confidentes in cilicio prosternimur, tanquam dicentes quod in Psalmo scriptum est, *Et peccatum meum ante me est semper* (*Psal. L, 5*). Progenies ergo ex Adam per Cain sceleratum undenario numero finitur, quo peccatum significatur: et ipse numerus femina clauditur, a quo sexu initium factum est peccati, per quod omnes morimur. Commissum est autem, ut et voluptas carnis, quæ spiritui resisteret, sequeretur. Nam et ipsa filia Lamech Noema Voluptas interpretatur. Per Seth autem ab Adam usque ad Noe denarius insinuatur legitimus numerus. Cui Noe tres adjiciuntur filii: unde uno lapsu duo benedicuntur a patre, ut remoto reprobo et probatis filiis ad numerum additis etiam duodenarius numerus intimetur, qui et in Patriarcharum et in Apostolorum numero insignis est, propter septenarii partes, alteram per alteram multiplicatas. Nam ter quaterni, vel quater terni ipsum faciunt. His ita se habentibus, video considerandum et commemorandum, ista utraque progenies, quæ distinctis generationibus duas insinuat civitates, unam terrigenarum, alteram regeneratarum, quomodo postea sic commixta fuerit atque confusa, ut universum genus humanum, exceptis octo hominibus, perire mereretur diluvio,

CAPUT XXI. — *Qua ratione commemorato Enoch, qui fuit filius Cain, totius generationis ejus usque ad diluvium sit continuata narratio; commemorato au-*

tem Enos, qui fuit filius Seth, ad conditionis humanæ principium sit reditum.

Primo autem intuendum est, quemadmodum cum ex Cain generationes enumerarentur, commemorato ante cæteros posteros ejus illo in cujus nomine condita est civitas, id est Enoch, contexti sunt cæteri usque ad illum finem, de quo locutus sum, donec illud genus atque universa propago diluvio deleteretur: cum vero filius Seth unus commemoratus fuisset Enos, nondum usque ad diluvium additis cæteris, articulus quidam interponitur et dicitur, *Hic liber natiuitatis hominum, qua die fecit Deus Adam, ad imaginem Dei fecit illum. Masculum et feminam fecit illos, et benedixit illos, et cognominavit nomen eorum Adam, qua die fecit illos* (*Gen. v, 1, 2*). Quod mihi videtur ad hoc interpositum, ut hinc rursus inciperet ab ipso Adam dinumeratio temporum, quam noluit facere qui hæc scripsit in civitate terrena: tanquam eam Deus sic commemoraret, ut non computaret. Sed quare hinc reditur ad istam recapitulationem, posteaquam commemoratus est filius Seth, homo qui speravit invocare nomen Domini Dei; nisi quia sic oportebat istas duas proponere civitates, unam per homicidam usque ad homicidam; nam et Lamech duabus uxoribus suis se perpetrasse homicidium confitetur (*Gen. iv, 23*): alteram per eum qui speravit invocare nomen Domini Dei? Hoc est quippe in hoc mundo peregrinantis civitatis Dei totum atque summum in hæc mortalitate negotium, quod per unum hominem, quem sane occisi resurrectio genuit, commendandum fuit. Homo quippe ille unus totius supernæ civitatis est unitas; nondum quidem completa, sed præmissa ista prophetica præfiguratione complenda. Filius ergo Cain, hoc est filius possessionis (cujus, nisi terrenæ?) habeat nomen in civitate terrena, quæ in ejus nomine condita est. De his est enim de quibus cantatur in Psalmo, *Invocabunt nomina eorum in terris ipsorum* (*Psal. xlviii, 12*). Propter quod sequitur eos quod in alio Psalmo scriptum est, *Domine, in civitate tua imaginem ipsorum ad nihilum rediges* (*Psal. lxxii, 20*). Filius autem Seth, hoc est filius resurrectionis, speret invocare nomen Domini Dei. Eam quippe societatem hominum præfiguratur quæ dicit, *Ego autem, sicut oliva fructifera in domo Dei speravi, in misericordia Dei* (*Psal. li, 10*). Vanas autem glorias famosi in terra nominis non requirat: *Beatus enim vir, cuius est nomen Domini spes ejus, et non respexit in vanitates, et insanias mendaces*¹ (*Psal. xxxix, 5*). Propositis itaque duabus civitatibus, una in re hujus sæculi, altera in spe Dei, tanquam ex communi, quæ aperta est in Adam, janua mortalitatis egressis, ut procurrant² et excurrant ad discretos proprios ac debitos fines, incipit dinumeratio temporum: in qua et aliæ generationes adjiciuntur, facta recapitulatione ex Adam, ex cujus origine damnata, veluti massa una meritæ damnationi tradita, fecit

¹ Editi, falsas. At Mss., mendaces: sic passim Augustinus.

² Ita Mss. Editi autem, percurrant.

¹ In sola editione Lov., templum deambulatorium.

Deus alia in contumelliam vasa iræ, alia in honorem vasa misericordiæ (*Rom. ix, 23*); illis reddens quod debetur in pœna, istis donans quod non debetur in gratia: ut ex ipsa etiam comparatione vasorum iræ, superna civitas discat, quæ peregrinatur in terris, non fidere libertate arbitrii sui, sed speret invocare nomen Domini Dei. Quoniam voluntas, in natura quæ facta est bona a Deo bono, sed mutabilis ab inmutabili, quia ex nihilo, et a bono potest declinare, ut faciat malum, quod fit libero arbitrio; et a malo, ut faciat bonum, quod non fit sine divino adiutorio.

CAPUT XXII. — *De lapsu filiorum Dei alienigenarum mulierum amore captorum, unde et omnes, exceptis octo hominibus, diluvio perire meruerunt.*

Hoc itaque libero voluntatis arbitrio genere humano progrediente atque crescente, facta est permixtio, et iniquitate participata quædam utriusque confusio civitatis. Quod malum a sexu femineo causam rursus invenit: non quidem illo modo quo ab initio; non enim cuiusquam etiam tunc fallacia seductæ illæ femine persuaserunt peccatum viris: sed ab initio quæ pravis moribus fuerant in terrena civitate, id est in terrigenarum societate, anatae sunt a filiis Dei, civibus scilicet peregrinantibus in hoc sæculo alterius civitatis, propter pulchritudinem corporis (*Gen. vi, 4 sqq.*). Quod bonum Dei quidem donum est: sed propterea id largitur etiam malis, ne magnum bonum videatur bonis. Deserto itaque magno bono et honorum proprio, lapsus est factus ad bonum minimum, non bonis proprium, sed bonis malisque commune: ac sic filii Dei filiarum hominum amore sunt capti, atque ut eis conjugibus fruerentur, in mores societatis terrigenæ defluerunt, deserta pietate quam in sancta societate servabant. Sic enim corporis pulchritudo, a Deo quidem factum, sed temporale, carnale, infirmum bonum, male amatur postposito Deo, æterno, interno, sempiterno bono: quemadmodum iustitia deserta et aurum amatur ab avaris, nullo peccato auri, sed hominis. Ita se habet omnis creatura. Cum enim bona sit, et bene potest amari, et male: bene, scilicet ordine custodito; male, ordine perturbato. Quod in laude quadam Cerei breviter versibus dixi¹:

Hæc tua sunt, bona sunt, quia tu bonus ista creasti.
Nil nostrum est in eis, nisi quod peccamus amantes,
Ordine neglecto, pro te, quod conditur abs te.

Creator autem si veraciter ametur, hoc est, si ipse, non aliud pro illo quod non est ipse, ametur, male amari non potest. Nam et amor ipse ordinate amandus est, quo bene amatur quod amandum est, ut sit in nobis virtus qua vivitur bene. Unde mihi videtur, quod definitio brevis et vera virtutis, Ordo est amoris: propter quod in sancto Cantico canticorum cantat sponsa Christi, civitas Dei, *Ordinate in me charitatem* (*Cantic. ii, 4*). Hujus igitur charitatis, hoc est, dilectionis et amoris ordine (a) perturbato, Deum

¹ Sic omnes ad unum libri Mss. At editi, *in laude quidam Creatoris breviter versibus dixi.*
(a) *Conf. lib. 1 de Doct. Christ., n. 28.*

filiis Dei neglexerunt, et filias hominum dilexerunt. Quibus duobus nominibus satis civitas utraque discernitur. Neque enim et illi non erant filii hominum per naturam: sed aliud nomen cœperant habere per gratiam. Nam in eadem Scriptura, ubi dicti sunt dilexisse filias hominum filii Dei, iidem dicti sunt etiam angeli Dei. Unde illos multi putant non homines fuisse, sed angelos.

CAPUT XXIII. — *An credendum sit angelos substantiæ spiritualis, amore speciosarum mulierum captos, eorumdem iniisse conjugia, ex quibus gigantes sint creati.*

1. Quam quæstionem nos transeunter commemoratam in tertio hujus operis libro (*cap. 5*) reliquimus insolutam, Utrum possint angeli, cum spiritus sint, corporaliter coire cum feminis. Scriptum est enim, *Qui facit angelos suos spiritus*: id est, eos qui natura spiritus sunt, facit esse angelos suos, injungendo eis officium nuntiandi. Qui enim græce dicitur ἀγγελος, quod nomen latina declinatione angelus perhibetur, latina lingua nuntius interpretatur. Sed utrum eorum corpora consequenter adjunxerit, dicendo, *Et ministros suos ignem ardentem* (*Psal. ciii, 5*): an quod charitate tanquam igne spirituali fervere debeant ministri ejus, ambiguum est. Apparuisse tamen hominibus angelos in talibus corporibus, ut non solum videri, verum etiam tangi possent, eadem verissima Scriptura testatur. Et quoniam creberrima fama est, multique se expertos, vel ab eis qui experti essent, de quorum fide dubitandum non est¹, audisse confirmant, Silvanos², et Faunos, quos vulgo incubos vocant, improbos sæpe exstitisse mulieribus, et earum appetisse ac peregisse concubitum (a); et quosdam dæmones, quos Dusios Galli nuncupant, hanc assidue immunditiam et tentare et efficere, plures talesque asseverant, ut hoc negare impudentiæ videatur: non hinc aliquid audeo definire, utrum aliqui spiritus elemento aërio corporati (nam hoc elementum etiam cum agitur flabello, sensu corporis tactuque sentitur), possint etiam hanc pati libidinem, ut quomodo possunt, sentientibus feminis misceantur. Dei tamen Angelos sanctos nullo modo illo tempore sic labi potuisse crediderim: nec de his dixisse apostolum Petrum, *Si enim Deus angelis peccantibus non pepercit, sed carceribus caliginis inferi retrudens tradidit in iudicio puniendos reservari* (*II Petr. ii, 4*); sed potius de illis qui primum apostatantes a Deo cum diabolo principe suo ceciderunt, qui primum hominem per invidiam serpentina fraude dejecit³. Angelos autem fuisse etiam Dei homines nuncupatos, eadem Scriptura sancta locupletissima testis est (b). Nam et de Joanne scriptum est, *Ecce mitto angelum meum ante*

¹ Nostri codices, *non esset. M.*

² Hic apud Lov. additur, *Panes*: quod ab editis aliis et Mss. abest.

³ Sic Mss. Editi vero, *decepit.*

(a) *Supra, lib. 6, cap. 9, n. 2.*

(b) Idem observavit Tertullianus, contra Judæos, lib. 2, cap. 9; Joannes Chrysostomus, Homilia 21 in Genesim. *Coquos.*

faciem tuam, quæ præparabit viam tuam (Marc. 1, 2). Et Malachias propheta propria quadam, id est sibi proprie impertita, gratia dictus est angelus (Malach. II, 7).

2. Verum hoc movet quosdam, quod ex illis qui dicti sunt angeli Dei, et ex mulieribus quas amaverunt, non quasi homines generis nostri, sed gigantes legimus esse natos. Quasi vero corpora hominum modum nostrum longe excedentia, quod etiam supra commemoravi (cap. 9), non etiam nostris temporibus nata sunt. Nonne ante paucos annos, cum Romæ urbis, quod a Gothis factum est, appropinquaret excidium, Romæ fuit femina cum suo patre et sua matre, quæ corpore quodammodo gigante longe cæteris præemineret? Ad quam visendam mirabilis fiebat usquequaque concursus. Et hoc erat maxime admirationi, quod ambo parentes ejus nec saltem tam longi homines erant, quam longissimos videre consuevimus. Potuerunt ergo gigantes nasci et prius quam filii Dei, qui et angeli Dei dicti sunt, filiius hominum, hoc est secundum hominem viventium, miscerentur; filii scilicet Seth filiius Cain. Nam et canonica Scriptura sic loquitur, in quo libro hæc legimus, cujus verba ista sunt: *Et factum est, postquam ceperunt homines multi fieri super terram, et filiae natæ sunt illis: videntes autem angeli Dei filias hominum, quia bonæ sunt, sumpserunt sibi uxores ex omnibus quas elegerant. Et dixit Dominus Deus: Non permanebit spiritus meus in hominibus his in æternum, propter quod caro sunt. Erunt autem dies eorum centum viginti anni. Gigantes autem erant super terram in diebus illis: et post illud cum intrarent filii Dei ad filias hominum, et generabant sibi, illi erant gigantes, a sæculo homines nominati (a) (Gen. vi, 1-4).* Hæc libri verba divini satis indicant, jam illis diebus fuisse gigantes super terram, quando filii Dei acceperunt uxores filias hominum, cum eas amarent bonas, id est pulchras. Consuetudo quippe Scripturæ hujus est, etiam speciosos corpore, bonos vocare. Sed et postquam hoc factum est, nati sunt gigantes. Sic enim ait: *Gigantes autem erant super terram in diebus illis: et post illud, cum intrarent filii Dei ad filias hominum.* Ergo et ante in illis diebus, et post illud. Quod autem ait, *Et generabant sibi*, satis ostendit quod prius, antequam sic caderent filii Dei, Deo generabant, non sibi, id est, non dominante libidine coeundi, sed serviente officio propagandi; non familiam fastus sui, sed cives civitatis Dei: quibus annuntiarent tanquam angeli Dei, ut ponerent in Deo spem suam (Psal. LXXVII, 7), similes illius qui natus est de Seth, filius resurrectionis, et speravit invocare nomen Domini Dei: in qua spe essent cum suis posteris coheredes æternorum honorum, et sub Deo patre fratres filiorum.

¹ Particula, *autem*, quæ ommissa in editis fuerat, habetur in mss. et apud LXX.

(a) Hic locus Geneseos male a Lactantio, institutionum libro 2, cap. 15, sulphicio Severo, Historiæ sacræ libro 1, cap. 2, et nonnullis aliis intellectus, ausam dedit fabulis quibus dicuntur angeli se cum mulieribus miscuisse; quem errorem plures ex antiquis seculi sunt. *Lactantia.*

3. Non autem illos ita fuisse angelos Dei, ut homines non essent, sicut quidam putant, sed homines procul dubio fuisse, Scriptura ipsa sine ulla ambiguitate declarat. Cum enim præmissum esset, quod *videntes angeli Dei filias hominum, quia bonæ sunt, sumpserunt sibi uxores ex omnibus quas elegerant*; mox adjunctum est, *Et dixit Dominus Deus: Non permanebit spiritus meus in hominibus his in æternum, propter quod caro sunt.* Spiritu deique Dei fuerant facti angeli Dei et filii Dei: sed declinando ad inferiora, homines dicuntur nomine naturæ, non gratiæ; dicuntur et caro, desertores spiritus et deserendo deserti. Et Septuaginta quidem interpretes et angelos Dei dixerunt istos, et filios Dei: quod quidem non omnes codices habent; nam quidam nisi filios Dei non habent. Aquila autem, quem interpretem Judæi cæteris anteponunt, non angelos Dei, nec filios Dei, sed filios deorum interpretatus est (a). Utrumque autem verum est. Nam et filii Dei erant, sub quo patre suorum patrum etiam fratres erant; et filii deorum, quoniam a diis geniti erant, cum quibus et ipsi dii erant, juxta illud Psalmi: *Ego dixi, Dii estis, et filii Excelsi omnes (Psal. LXXXI, 6).* Merito enim creduntur Septuaginta interpretes accepisse propheticum spiritum, ut si quid ejus auctoritate mutarent, atque aliter quam erat quod interpretabantur dicerent, neque hoc divinius esse dictum dubitaretur. Quamvis hoc in hebræo esse perhibeatur ambiguum, ut et filii Dei, et filii deorum, posset interpretari.

4. Omittamus igitur earum scripturarum fabulas, quæ apocryphæ nuncupantur, eo quod earum occulta origo non claruit patribus, a quibus usque ad nos auctoritas veracium Scripturarum certissima et notissima successione pervenit. In his autem apocryphis etsi invenitur aliqua veritas, tamen propter multa falsa nulla est canonica auctoritas. Scripsisse quidem nonnulla divina Enoch, illum septimum ab Adam, negare non possumus, cum hoc in Epistola canonica Judas apostolus dicat (*Judæ 14*). Sed non frustra non sunt in eo canone Scripturarum, qui servabatur in templo Hebræi populi succedentium diligentia sacerdotum, nisi quia ob antiquitatem suspectæ fidei judicata sunt, nec utrum hæc essent quæ ille scripsisset¹, poterat inveniri, non talibus proferentibus, qui ea per seriem successionis reperirentur rite servasse. Unde illa quæ sub ejus nomine proferuntur, et continent istas de gigantibus fabulas, quod non habuerint homines patres, recte a prudentibus judicantur non ipsius esse credenda; sicut multa sub nominibus et aliorum Prophetarum, et recentiora sub nominibus

¹ Hic editi addunt, *Cui autem hoc*; quod ab omnibus manuscriptis abest.

(a) Vixit (Aquila) sub Adriano imperatore; et cum prius Christo nomen dedisset, et abduceretur a mathematicis astrologicisque studiis, quibus unum erat deditus, ab Apostolis et discipulis Domini, nihilominus tamen in vanis illis studiis persisteret, Ecclesia pulsus est. Quo factum ut relicto Christianismo transiret ad Judaismum, et magna postea animi contentione hebræam didicit linguam, eo animo, testis Epiphania, ut oppugnaret translationem Septuaginta, et vaticinia de Christo intervorteret, et ita interpretaretur, ut nihil minus in eis quam de Christo agi videretur. *Cocqæus.*

Apostolorem ab hæreticis præferuntur, quæ omnia nomine apocryphorum ab auctoritate canonica diligenti examinatione remota sunt. Igitur secundum Scripturas canonicas hebræas atque christianas, multos gigantes ante diluvium fuisse, non dubium est, et hos fuisse cives terrigenæ societatis hominum; Dei autem filios, qui secundum carnem de Seth propagati sunt, in hanc societatem deserta justitia declinasse. Nec mirandum est, quod etiam de ipsis gigantes nasci potuerunt. Neque enim omnes gigantes, sed magis multi utique tunc fuerant, quam post diluvium temporibus cæteris. Quos propterea creare placuit Creatori, ut etiam hinc ostenderetur non solum pulchritudines, verum etiam et magnitudines et fortitudines corporum non magnipendeudas esse sapienti, qui spiritalibus atque immortalibus longe melioribus atque firmiteribus et bonorum propriis, non bonorum malorumque communibus beatificatur bonis. Quam rem alius propheta commendans ait: *Ibi fuerunt gigantes illi nominati, qui ab initio fuerunt staturosi, scientes prælitum. Non hos elegit Dominus, nec viam scientiæ dedit illis: et interierunt, quia non habuerunt sapientiam, perierunt propter inconsiderantiam* (Baruch III, 26-28).

CAPUT XXIV. — *Quomodo intelligendum sit, quod de eis qui diluvio perendi erant, Dominus dixit, Erunt dies eorum centum viginti anni.*

Quod autem dixit Deus, *Erunt dies eorum centum viginti anni* (Gen. vi, 3), non sic accipiendum est, quasi prænuntiatum sit, post hæc homines centum viginti annos vivendo non transgredi, cum et post diluvium etiam quingentos excessisse inveniamus. Sed intelligendum est hoc Deum dixisse, cum circa finem quingentorum annorum esset Noe, id est, quadringentos octoginta vitæ annos ageret, quos more suo Scriptura quingentos vocat, nomine totius maximam partem plerumque significans: sexcentesimo quippe anno vitæ Noe, secundo mense factum est diluvium (*Id. vii, 11*); ac sic centum viginti anni prædicti sunt futuri vitæ hominum periturorum, quibus transactis diluvio deleberent. Nec frustra creditur sic factum esse diluvium, jam non inventis in terra qui non erant digni tali morte defungi, qua in impios vindicatum est: non quo hic quidquam bonis quandoque morituris tale genus mortis faciat aliquid quod eis possit obesse post mortem. Verumtamen nullus eorum diluvio mortuus est, quos de semine Seth propagatos sancta Scriptura commemorat. Sic autem divinitus diluvii causa narratur: *Videns, inquit, Dominus Deus, quia multiplicatæ sunt malitiæ hominum super terram, et omnis quisque cogitat in corde suo diligenter super maligna omnes dies: et cogitavit Deus quia fecit hominem super terram, et recogitavit, et dixit Deus, Delebo hominem quem feci a facie terræ, ab homine usque ad pecus, et a reptilibus usque ad volatilia cæli, quia iratus sum, quoniam feci eos* (*Id. vi, 5-7*).

¹ Editi, et quod unusquisque. At Mss. et omnis quisque: juxta LXX, hæc pas illi.

² Mss., Deleam.

CAPUT XXV. — *De ira Dei, quæ incommutabilem tranquillitatem nulla inflammatione perturbat.*

Ira Dei non perturbatio animi ejus est, sed iudicium quo irrogatur poena peccato. Cogitatio vero ejus et recogitatio, mutandarum rerum est immutabilis ratio. Neque enim sicut hominem, ita Deum cujusquam facti sui poenitet, cujus est de omnibus omnino rebus tam fixa sententia, quam certa præscientia. Sed si non utatur Scriptura talibus verbis, non se quodammodo familiariter insinuabit omni generi hominum, quibus vult esse consultum, ut et perterreat superbientes, et excitet negligentes, et exerceat quærentes, et alat intelligentes: quod non faceret, si non se prius inclinaret, et quodammodo descenderet ad jacentes. Quod autem etiam interitum omnium animalium terrenorum volatiliumque denuntiat, magnitudinem futuræ cladis effatur; non animantibus rationis expertibus, tanquam et ipsa peccaverint, minatur exitium.

CAPUT XXVI. — *Quod arca quam Noe jussus est facere, in omnibus Christum Ecclesiamque significet*

1. Jam vero quod Noe homini justo, et sicut de illo Scriptura veridica loquitur, in sua generatione perfecto (Gen. vi, 9) (non utique sicut perficiendi sunt cives civitatis Dei in illa immortalitate, qua æquabuntur Angelis Dei, sed sicut esse possunt in hac peregrinatione perfecti), imperat Deus, ut arcam faciat, in qua cum suis, id est, uxore, filiis, et nuribus, et cum animalibus, quæ ad illum ex Dei præcepto in arcam ingressa sunt, liberaretur a diluvii vastitate; procul dubio figura est peregrinantis in hoc sæculo civitatis Dei, hoc est Ecclesiæ, quæ sit salva per lignum, in quo pependit Mediator Dei et hominum homo Christus Jesus (I Tim. ii, 5). Nam et mensuræ ipsæ¹ longitudinis, altitudinis, latitudinisque ejus, significant corpus humanum, in cujus veritate ad homines prænuntiatum est venturus, et venit. Humani quippe corporis longitudo a vertice usque ad vestigia sexies tantum habet, quam latitudo, quæ est ab uno latere ad alterum latus; et decies tantum, quam altitudo, cujus altitudinis mensura est in latere a dorso ad ventrem: velut si jacentem hominem metiaris supinum, seu pronum, sexies tantum longus est a capite ad pedes, quam latus a dextra ad sinistram, vel a sinistra in dexteram; et decies, quam altus a terra. Unde facta est arca trecentorum in longitudine cubitorum, et quinquaginta in latitudine, et triginta in altitudine. Et quod ostium in latere accepit, profecto illud est vulnus, quando latus crucifixi lancea perforatum est (Joan. xix, 34): hac quippe ad illum venientes ingrediuntur; quia inde Sacramenta manantur, quibus credentes unctantur. Et quod de lignis quadratis fieri jubetur, unctique stabilem vitam sanctorum significat: quacumque enim verteris quadratum, stabit. Et cætera quæ in ejusdem arce constructione dicuntur, ecclesiasticarum signa sunt rerum.

¹ Plures Mss., ipsius. Sic etiam 2051. M.

2. Sed ea nunc persequi longum est: et hoc jam fecimus in opere quod adversus Faustum Manichæum scripsimus (lib. 12, cap. 14), negantem in libris Hebræorum aliquid de Christo esse prophetatum. Et fieri quidem potest, ut et nobis quispiam, et alius alio exponat hæc aptius: dum tamen ea quæ dicuntur, ad hanc de qua loquimur Dei civitatem, in hoc sæculo maligno tanquam in diluvio peregrinantiem, omnia referantur; si ab ejus sensu qui ista conscripsit, non vult longe aberrare qui exponit. Exempli gratia, velut si quispiam quod hic scriptum est, *Inferiora bicamerata et tricamerata facies eam*¹ (Gen. vi, 16); non quod ego in illo opere dixi (lib. 4, cap. 16), velit intelligi; quia ex omnibus gentibus Ecclesia congregatur, bicameratam dictam, propter duo genera hominum, circumcisionem scilicet et præputium, quos Apostolus et alio modo dicit Judæos et Græcos (Rom. iii, 9); tricameratam vero, eo quod omnes gentes de tribus filiis Noe post diluvium reparatæ sunt: sed aliud dicat aliquid, quod a fidei regula non sit alienum. Nam quoniam non solas in inferioribus mansiones habere arcam voluit, verum etiam in superioribus, et hæc dixit bicamerata; et in superioribus superiorum, et hæc appellavit tricamerata: ut ab imo sursum versus tertia consurgeret habitatio. Possunt hic intelligi et illa tria quæ commendat Apostolus, fides, spes, charitas (I Cor. xiii, 13). Possunt etiam multo convenientius tres illæ ubertates evangelicæ, tricena, sexagena, centena (Matth. xiii, 8); ut in infimo habitet pudicitia conjugalis, supra vidualis, atque hac superior virginalis: et si quod melius secundum fidem civitatis hujus intelligi et dici potest. Hoc etiam de cæteris quæ hic exponenda sunt, dixerim, quia etsi non uno disseveruntur modo, ad unam tamen catholicæ fidei concordiam revocanda sunt.

CAPUT XXVII. — *De arca atque diluvio, nec illis esse consentiendum, qui solam historiam recipiunt sine allegorica significatione; nec illis qui solas figuras defendunt repudiata historica veritate.*

1. Non tamen quisquam putare debet, aut frustra hæc esse conscripta, aut tantummodo rerum gestarum veritatem sine ullis allegoricis significationibus hic esse quærendam; aut e contrario hæc omnino gesta non esse, sed solas esse verborum figuras; aut quidquid illud est, nequaquam ad prophetiam Ecclesiæ pertinere. Quis enim nisi mente perversus, inaniter scriptos esse contendat libros per annorum millia tanta religione et tam ordinatæ successionis observantia custoditos; aut solas res gestas illic inveniendas, ubi certe, ut alia omittam, si numerositas animalium coegit arcam tantam fieri magnitudinem, immunda bina et munda septena intromitti animalia (Gen. vii, 2) quid coegit, cum æqualis numeri posent utraque servari (a)? Aut vero Deus, qui propter reparandum genus servanda præcepit, eo modo illa

¹ Editi, *facies ea*. At manuscripti, juxta Septuaginta, *facies eam*; et ex his quidam habent, *bicameratam et tricameratam*.

(a) Conf. lib. 12 cont. Faust. Manich., capp. 38 et 13.

quo instituerat, restituere non valebat?

2. Qui vero non esse gesta, sed solas rerum significandarum figuras esse contendunt, primum opinantur tam magnum fieri non potuisse diluvium, ut altissimos montes quindecim cubitis aqua crescendo transscenderet; propter Olympi verticem montis, supra quem perhibentur nubes non posse concreescere¹, quod tam sublimis quam cælum sit, ut non ibi sit aer iste crassior, ubi venti, nebulae imbresque gignuntur (a): nec attendunt omnium elementorum crassissimam terram ibi esse potuisse. An forte negant esse terram verticem montis? Cur igitur usque ad illa cæli spatia terris exaltari licuisse, et aquas exaltari non licuisse contendunt, cum isti mensores et pensores elementorum, aquas terris perhibeant superiores atque leviores? Quid itaque rationis afferunt, quare terra gravior et inferior locum cæli tranquillioris invaserit per volumina tot annorum, et aqua levior ac superior permissa non sit hoc facere saltem ad tempus exiguum?

3. Dicunt etiam non potuisse capere arcæ illius quantitatem animalium genera tam multa in utroque sexu, bina de immundis, septena de mundis. Qui mihi videntur non computare nisi trecenta cubita longitudinis, et latitudinis quinquaginta², nec cogitare aliud tantum esse in superioribus, itemque aliud tantum in superioribus superiorum, ac per hoc ter ducta illa cubita fieri noncenta centum quinquaginta. Si autem cogitemus quod Origenes non ineleganter astruxit (Homilia 2 in Genesim), Moysen scilicet hominem Dei³ eruditum, sicut scriptum est, omni sapientia Ægyptiorum (Act. vii, 22), qui geometricam dilexerunt, geometrica cubita significare potuisse, ubi unum quantum sex nostra valere asseverant; quis non videat quantum rerum capere potuit illa magnitudo? Nam illud quod disputant tantæ magnitudinis arcam non potuisse compingi, ineptissime calumniantur, cum sciant immensas urbes fuisse constructas, nec attendunt centum annos quibus arca illa est fabricata: nisi forte lapis lapidi adhærere potest sola calce conjunctus, ut murus per tot millia circumagatur, et lignum ligno per subsrudines, epiros⁴,

¹ Sic Mss. At editi, *consendere*. Postea Mss. sic habent, *quod tam sublimis jam cælum sit*. — Nostri codices, excepto 2050, ferunt, *sublime*, pro, *sublimis*; et ed. 225, *quam*, pro, *jam*. M.

² In editis additur, *triginta altitudinis*. Et paulo post, ut superioribus quadrent inferiora, sic habetur, *cubita fieri noncenta per longum, centum quinquaginta per latum, nonaginta per altum*. Corrigitur ad codices manuscriptos, in quibus ibi cubita altitudinis merito nulla memorantur: nam hæc ad propositam difficultatem solvendam non eo modo licet, quo longitudinis et latitudinis cubita, salva Scripturæ fide multiplicare.

³ Vox, *Dei*, abest a pluribus manuscriptis, non tamen ab omnibus.

⁴ Joanni Meursio aliquando visum erat scribendum, *epi-* (a) Loquitur de Olympo in Thessalia, decem stadiorum altitudine, ut inquit Plutarchus in Æmilio Paulo (cap. 15). Cæcumen ejus locum in quo nubes et venti fiunt, superætas creditur: argumento est, cinerem sacrificiorum toto anno nec diffari nec dilui, ut Solinus (Polyhistor, cap. 9) scribit. Quod fabulosum esse dicit Franciscus Philadelphus, qui se montem ascendisse affirmat, ut rem tantam explorarebat. VIVES.

clavos, gluten bituminis non potest adhærere, ut fabricetur ¹ arca, non curvis, sed rectis lineis longe lateque porrecta, quam nullus in mare mittat conatus hominum, sed levet unda, cum venerit, naturali ordine ponderum, magisque divina providentia, quam humana prudentia natantem gubernet, ne incurrat ubicunque naufragium.

4. Quod autem scrupulosissime quæri solet de minutissimis bestiolis, non solum quales sunt mures et stelliones, verum etiam quales locustæ, scarabæi, muscæ denique et pulices, utrum non amplioris numeri in arca illa fuerint, quam qui est definitus, cum hoc imperaret Deus: prius admonendi sunt quos hæc movent, sic accipiendum esse quod dictum est, *Quæ repunt super terram*; ut necesse non fuerit conservari in arca, quæ possunt in aquis vivere, non solum mersa, sicut pisces; verum etiam supernatantia, sicut multæ alites. Deinde cum dicitur, *Masculus et femina erunt*: profecto intelligitur ad reparandum genus dici: ac per hoc nec illa necesse fuerat ibi esse, quæ possunt sine concubitu de quibusque rebus vel rerum corruptionibus nasci: vel si fuerunt, sicut in domibus esse consueverunt, sine ullo numero definito esse potuisse: aut si mysterium sacratissimum quod agebatur, et tantæ rei figura etiam in veritate ² facti aliter non posset impleri, nisi ut omnia ibi certo illo numero essent, quæ vivere in aquis natura prohibente non possent, non fuit ista cura illius hominis, vel illorum hominum, sed divina. Non enim ea Noe capta intromittebat, sed venientia et intransia permittebat. Ad hoc enim valet quod dictum est, *Intrabunt ad te* (*Gen. vi, 19, 20*): non scilicet hominis actu, sed Dei nutu: ita sane, ut non illic fuisse credenda sint, quæ sexu carent. Præscriptum est enim, atque definitum, *Masculus et femina erunt*. Alia sunt quippe quæ de quibusque rebus sine concubitu ita nascuntur, ut postea concumbant et generent, sicut muscæ: alia vero in quibus nihil sit maris, et feminæ, sicut apes. Ea porro quæ sic habent sexum, ut non habeant fetum, sicut muli et mulæ, mirum si ibi fuerunt, ac non potius parentes eorum ibi

gros, juxta Isidorum, in cujus libro 19 Orig. cap. 19 legitur: « Epigri et clavi sunt quibus lignum ligno adhæret. » Postea vero in Glossario corrigendum ait, *epiuros*; ex voce græco, *epiuros*, quæ est, *compages*. — Coquæus: « For-
« tasse legendum, *epiuros*; a voce græca, *epiuros*, quæ
« clavum ligneum significat. » M.

¹ Sic nostri omnes. In B., ut fabricaretur. M.

² Ms., etiam veritate; omisso, in.

fuisse suffecerit, equinum videlicet atque asininum: genus: et si qua alia sunt, quæ commixtione diversæ generis genus aliquod gignunt. Sed si et hoc ad m-⁴ sterium pertinebat, ibi erant. Habet enim et hoc genus masculum et feminam.

5. Solet etiam movere nonnullos, genera escarum quæ illic habere poterant animalia, quæ nonnisi carne vesci putantur, utrum præter numerum ibi fuerint sine transgressione mandati, quæ aliorum alendorum necessitas illic coegisset includi: an vero, quod potius est credendum, præter carnes, aliqua alimenta esse potuerint, quæ omnibus convenirent (a). Novimus enim quam multa animalia, quibus caro cibis est, frugibus pomisque vescantur, et maxime fico atque castaneis. Quid ergo mirum, si vir ille sapiens et justus, etiam divinitus admonitus, quid cuique congrueret, sine carnibus aptam cuique generi alimoniam præparavit et recondidit? Quid est autem, quo vesci non cogeret fames? aut quid non suave ac salubre facere posset Deus, qui etiam, ut sine cibo viverent, divina facilitate ¹ donaret, nisi ut pascerentur etiam hoc implendæ figuræ tanti mysterii conveniret? Non autem ad præfigurandam Ecclesiam pertinere tam multiplicia rerum signa gestarum, nisi fuerit contentiosus, nemo permittitur opinari. Jam enim gentes ita Ecclesiam repleverunt, mundique et immundi, donec certum veniatur ad finem, ita ejus unitatis quadam compagine continentur, ut ex hoc uno manifestissimo, etiam de cæteris, quæ obscurius aliquando dicta sunt, et difficiliter agnosce queunt, dubitari fas non sit. Quæ cum ita sint, si nec ² inaniter ista conscripta esse putare quisquam vel durus audebit, nec nihil significare cum gesta sint, nec sola dicta esse significativa, non facta, nec aliena esse ab Ecclesia ³ significanda probabiliter dici potest: sed magis credendum est, et sapienter esse memoriæ literisque mandata, et gesta esse, et significare aliquid et ipsum aliquid ad præfigurandam Ecclesiam pertinere. Jam usque ad hunc articulum perductus liber iste claudendus est, ut ambarum civitatum cursus, terrenæ scilicet secundum hominem viventis, et cælestis secundum Deum, post diluvium et deinceps in rebus consequentibus requiratur.

¹ Sola editio Lov., facultate.

² In Corbeiensi Ms., sic nec.

³ Codex 238, Ecclesia Dei. M.

(a) Conk. Quæst. in Gen., qu. 6.

LIBER DECIMUS SEXTUS.

In cujus priore parte (a), a capite videlicet primo ad duodecimum, civitatis utriusque, cælestis ac terrenæ, procursum exhibetur secundum sacram historiam a Noe usque ad Abraham: posteriore autem parte de cælestis tantummodo civitatis procursum ab Abraham usque ad Israelitarum reges disputatur.

OPUSCULUM

CAPUT PRIMUM. — An post diluvium, a Noe usque ad Abraham, aliquæ familiæ secundum Deum viventium reperiantur.

Post diluvium procurrentis sanctæ vestigia civitatis,

(a) vid. lib. 18, cap. 1.

utrum continuata sint, an intercurrentibus impietatis interrupta temporibus, ita ut nullus hominum veri unius Dei cultor existeret, ad liquidum Scripturis loquentibus invenire difficile est: propterea quod in canonicis Libris post Noe, qui cum conjugæ ac tribus

filii totidemque nurbus suis meruit per arcam a vastatione diluvii liberari, non invenimus usque ad Abraham cujusquam pietatem evidenti divino eloquio prædicatam, nisi quod Noe duos filios suos Sem et Japhet prophetica benedictione commendat, intuens et prævidens quod longe fuerat post futurum. Unde factum est etiam illud, ut filium suum medium, hoc est primogenito minorem ¹ ultimoque majorem, qui peccaverat in patrem, non in ipso, sed in filio ejus suo nepote malediceret his verbis: *Maledictus Chanaan puer, famulus erit fratribus suis*. Chanaan porro natus fuerat ex Cham, qui patris dormientis nec texerat, sed potius prodiderat nuditatem. Unde etiam quod secutus adjungit benedictionem duorum maximi et minimi filiorum, dicens: *Benedictus Dominus Deus Sem, et erit Chanaan puer illius; laetificet Deus Japhet, et habitet in domibus Sem* (*Gen. ix, 25-27*): sicut ipsa ejusdem Noe et vineæ plantatio, et ex ejus fructu inebriatio, et dormientis nudatio, et quæ ibi cætera facta atque conscripta sunt, prophetice sunt gravidata sensibus et velata tegminibus (a).

CAPUT II.— *Quid in filiis Noe prophetice fuerit præfiguratum.*

1. Sed nunc rerum effectu jam in posteris consecuto, quæ operta fuerant, satis aperta sunt. Quis enim hæc diligenter et intelligenter advertens, non agnoscat in Christo Sem quippe, de cujus semine in carne natus est Christus, interpretatur Nominatus. Quid autem nominatus Christo, cujus nomen ubique jam fragrat, ita ut in Canticis canticorum, etiam ipsa præcinente ² prophetia, unguento comparetur effuso (*Cantic. 1, 2*): in cujus domibus, id est ecclesiis, habitat gentium latitudo? Nam Japheth Latitudo interpretatur. Cham porro, quod interpretatur Calidus³, medius Noe filius, tanquam se ab utroque discernens et inter utrumque remanens, nec in primitiis Israelitarum, nec in plenitudine Gentium, quid significat nisi hæreticorum genus calidum, non spiritu sapientiæ, sed impatientiæ, quo solet ⁴ hæreticorum fervere præcordia⁵, et pacem perturbare sanctorum? Sed hæc in usum cedunt proficientium, juxta illud Apostoli: *Oportet et hæreses esse, ut probati manifesti fiant in vobis* (*I Cor. xi, 19*). Unde etiam scriptum est, *Filius eruditus sapiens erit, imprudente autem ministro utetur* (*Prov. x, 4, apud LXX*). Multa quippe ad fidem catholicam pertinentia, dum hæreticorum calida ⁶ inquietudine exagitantur, ut adversus eos defendi possint, et considerantur diligentius, et intelliguntur clarius, et instantius prædicantur: et ab adversario mota quæstio, discendi existit occasio. Quamvis non solum qui sunt apertissime separati, verum etiam omnes qui christiano vocabulo glorian-

¹ Mss., *juniorum*.

² Mss., *precedente*.

³ Vind. Am. Er. et plerique Mss. *calidus*: pauloquo post habeat, *genus calidum*.

⁴ Vind. Am. et Er., *sed spiritus verspellis astutiæ, quæ solent, etc.*

⁵ Mss., *primordia*,

⁶ Sic Er. Editti vero alii cum plerisque manuscriptis, *calida*. — Ms. 253, *calida*. M.

(a) Sensus illos vide lib. 12 cont. Faust. Manich., capp. 23 et seqq.

tur et perditæ vivant, non absurde possunt videri medio Noe filio figurati: passionem quippe Christi, quæ illius hominis nuditate significata est, et annuntiant profitendo, et male agendo exhonorent. De talibus ergo dictum est, *Ex fructibus eorum cognoscetis eos* (*Matth. vii, 20*). Ideo Cham in filio suo maledictus est, tanquam in fructu suo, id est in opere suo. Unde convenienter et ipse filius ejus Chanaan interpretatur. Motus eorum: quod aliud quid est, quam opus eorum? Sem vero et Japhet tanquam circumcisio et præputium, vel sicut alio modo eos appellat Apostolus, Judæi et Græci, sed vocati et iustificati, cognita quoquo modo nuditate patris, qua significabatur passio Salvatoris, sumentes vestimentum, posuerunt supra dorsa sua ¹, et intraverunt aversi, et operuerunt nuditatem patris sui, nec viderunt quod reverendo texerunt (*Gen. ix, 23*). Quodam enim modo in passione Christi, et quod pro nobis factum est honoramus, et Judæorum facinus aversamur. Vestimentum significat sacramentum; dorsa, memoriam præteritorum: quia passionem Christi eo scilicet jam tempore quo habitat Japhet in domibus Sem et malus frater in medio eorum, transactam celebrat Ecclesia, non adhuc prospectat futuram.

2. Sed malus frater in filio suo, hoc est in opere suo, puer, id est servus, est fratrum honorum, cum vel ad exercitationem patientiæ, vel ad profectum sapientiæ scienter utuntur malis boni. Sunt enim, teste Apostolo, qui Christum annuntiant non caste: *Sed sive occasione, inquit, sive veritate Christus annuntietur, in hoc gaudeo, sed et gaudebo* (*Philipp. 1, 18*). Ipse quippe plantavit vineam, de qua dicit Propheta, *Vinea Domini Sabaoth domus Israel est* (*Isai. v, 7*): et bibit de vino ejus: sive ille calix hic intelligatur, de quo dicit, *Potestis bibere calicem, quem ego bibiturus sum* (*Matth. xx, 22*)? et, *Pater, si feri potest, transeat a me calix iste* (*Id. xxvi, 39*); quo suam sine dubio significat passionem: sive quia vinum fructus est vineæ, hoc potius illo sit significatum, quod ex ipsa vinea, hoc est ex genere Israelitarum, carnem pro nobis et sanguinem, ut pati posset, assumpsit: *Et inebriatus est*, id est, passus est: *Et nudatus est* (*Gen. ix, 21*); ibi namque nudata est, id est apparuit ejus infirmitas, de qua dicit Apostolus, *Etsi crucifixus est ex infirmitate* (*II Cor. xiii, 4*). Unde idem dicit, *Infirmum Dei fortius est hominibus, et stultum Dei sapientius est hominibus* (*I Cor. 1, 25*). Quod vero cum dictum esset, *Et nudatus est*; addidit Scriptura, *in domo sua*: eleganter ostendit, quod a suæ carnis gente et domesticis sanguinis sui, utique Judæis, fuerat crucem mortemque passurus. Hanc passionem Christi foris in sono tantum vocis reprobii annuntiant: non enim quod annuntiant, intelligunt. Probi autem in interiore homine habent tam grande mysterium, atque honorant intus in corde infirmum et stultum Dei, quod fortius et sapientius est hominibus. Hujus rei figura est, quod Cham exiens hoc nuntiavit foris:

¹ Plures Mss., *duo dorsa sua*.

Sem vero et Japheth, ut hoc velarent, id est honorarent, ingressi sunt, hoc est, interius id egerunt.

3. Hæc Scripturæ secreta divinæ indagamus, ut posuimus, alius alio magis minusve congruenter, verumtamen fideliter certum tenentes, non ea sine aliqua præfiguratione futurorum gesta atque conscripta, neque nisi ad Christum et ejus Ecclesiam, quæ civitas Dei est, esse referenda: cujus ab initio generis humani non defuit prædicatio, quam per omnia videmus impleri. Benedictis igitur duobus filiis Noe, atque uno in medio eorum maledicto, deinceps usque ad Abraham de justorum aliquorum, qui pie Deum colerent, commemoratione silitum est¹ per annos amplius quam mille. Nec eos defuisse crediderim: sed si omnes commemorarentur, nimis longum fieret; et hæc esset magis historica diligentia, quam prophetica providentia. Illa itaque exsequitur Litterarum sacrarum scriptor istarum, vel potius per eum Dei Spiritus, quibus non solum narrentur præterita, verum etiam prænuntientur futura, quæ tamen pertinent ad civitatem Dei: quia et de hominibus qui non sunt cives ejus, quidquid hic dicitur, ad hoc dicitur, ut illa ex comparatione contraria vel proficiat, vel emineat. Non sane omnia quæ gesta narrantur, aliquid etiam significare putanda sunt: sed propter illa quæ aliquid significant, etiam ea quæ nihil significant attextuntur. Solo enim vomere terra proscinditur; sed ut hoc fieri possit, etiam cætera aratri membra sunt necessaria: et soli nervi in citharis atque hujusmodi vasis musicis aptantur ad cantum; sed ut aptari possint, insunt et cætera in compagibus² organorum, quæ non percutiuntur a canentibus, sed ea quæ percussa resonant, his connectuntur. Ita in prophetica historia dicuntur et aliqua quæ nihil significant, sed quibus adhæreant quæ significant, et quodammodo religuntur.

CAPUT III. — De generationibus trium filiorum Noe.

1. Generationes ergo filiorum Noe deinceps intuentur, et quod de his dicendum videtur, attextendum est huic operi, quo civitatis utriusque, terrenæ scilicet et cœlestis, per tempora procursus ostenditur. Cœptæ sunt autem³ commemorari a minimo filio, qui vocatus est Japheth; cujus filii octo nominati sunt (a); nepotes autem septem de duobus filiis ejus, tres ex uno, quatuor ex altero: sunt itaque omnes quindecim. Filii autem Cham, hoc est medii filii Noe, quatuor, et nepotes quinque ex uno ejus filio, pronepotes duo ex nepote uno: fit eorum summa undecim. Quibus enumeratis, reditur tanquam ad caput, et dicitur: *Chus autem genuit Nebroth*⁴: hic cœpit esse gigas super

¹ Sic Vind. Am. et Mss. At Er. et Lov., *silentium est.*

² Ita Mss. Editi vero, *compaginibus.*

³ Mss., *Cœptæ sunt enim.*

⁴ Sic in veteribus libris constanter scribitur, ut apud LXX *Nebroth.* At in excusis, *Nemroth.*

(a) Augustinus secutus est codices græcos, qui addunt octavum filium Japheth, nomine Elisa; quo fit ut posteros Japheth numerent quindecim; verum illum Elisa nec Scriptura hebraica, nec paraphrasis chaldaica, nec græca translatio Complutensis habet; nec denique ii codices græci, quibus usus est Hieronymus, habent, ut constat ex ejus Quæstionibus hebraicis in Genesim. Coq. xus.

terram. Hic erat gigas venator contra Dominum Deum. Propter hoc dicunt: Sicut Nebroth gigas venator contra Dominum. Et factum est initium regni ejus Babylon, Orech, Archad, et Chalanne in terra Sennaar. De terra illa exiit Assur, et ædificavit Niniven et Roboath civitatem, et Chalach, et Dasem inter medium Ninives et Chalach: hæc civitas magna. Iste porro Chus pater gigantis Nebroth primus nominatus est in filiis Cham, cujus quinque filii jam fuerant computati, et nepotes duo. Sed istum gigantem aut post nepotes suos natos genuit; aut, quod est credibilis, seorsum de illo propter ejus eminentiam Scriptura locuta est; quandoquidem et regnum ejus commemoratum est, cujus initium erat illa nobilissima Babylon civitas, et quæ juxta commemoratæ sunt, sive civitates, sive regiones. Quod vero dictum est, de terra illa, id est de terra Sennaar, quæ pertinebat ad regnum Nebroth, exisse Assur, et ædificasse Niniven, et alias quas contexit civitates, longe postea factum est, quod ex hac occasione perstrinxit, propter nobilitatem regni Assyriorum, quod mirabiliter dilatavit Ninus, Beli filius, conditor Ninivæ civitatis magnæ: cujus civitatis nomen ex illius nomine derivatum est, ut a Nino Ninive vocaretur. Assur autem, unde Assyrii, non fuit in filiis Cham medii filii Noe, sed in filiis Sem reperitur, qui fuit Noe maximus filius. Unde apparet de progenie Sem exortos fuisse qui postea regnum gigantis illius obtinerent, et inde procederent, atque alias conderent civitates, quarum prima est a Nino appellata Ninive. Hinc reditur ad alium filium Cham, qui vocabatur Mesraim, et commemorantur quos genuit; non tanquam singuli homines, sed nationes septem. Et de sexta, velut de sexto filio, gens commemoratur exiisse, quæ appellatur Philistiim; unde fiunt octo. Inde iterum ad Chanaan reditur, in quo filio maledictus est Cham; et quos genuit undecim nominantur. Deinde usque ad quos fines pervenerint, commemoratis quibusdam civitatibus, dicitur. Ac per hoc, filiis nepotibusque computatis, de progenie Cham triginta unus geniti referuntur.

2. Restat commemorare filios Sem, maximi filii Noe: ad eum quippe gradatim generationum istarum pervenit a minimo exorta narratio. Sed unde incipiunt commemorari filii Sem, habet quiddam obscuritatis, quod expositione illustrandum est: quia et multum ad rem pertinet, quam requirimus. Sic enim legitur: *Et Sem natus est etiam ipsi patri omnium filiorum Heber, fratri Japheth majori.* Ordo verborum est: *Et Sem natus est Heber, etiam ipsi, id est ipsi Sem, natus est Heber, qui Sem pater est omnium filiorum suorum*¹. Sem ergo patriarcham intelligi voluit omnium qui de stirpe ejus exorti sunt, quos commemoraturus est, sive sint filii, sive nepotes, sive pronepotes, et deinceps indidem exorti. Non sane istum Heber genuit Sem: sed ab illo quintus in progenitorum serie reperitur. Sem quippe inter alios filios genuit Arphaxat, Arphaxat genuit Çainan, Çainan

¹ Abest, *suorum*, in codd. 253 et 258. M.

genuit Sala, Sala genuit Heber. Non utique frustra ipse primus est nominatus in progenie veniente de Sem, et praelatus etiam filiis, cum sit quintus nepos; nisi quia verum est quod traditur, ex illo Hebræos esse cognominatos, tanquam Hebræos: cum et alia possit esse opinio, ut ex Abraham tanquam Abrahami dicti esse videantur (a). Sed nimirum hoc verum est, quod ex Heber Heberæi appellati sunt; ac deinde, una detracta littera, Hebræi: quam linguam hebraicam¹ solus Israel populus potuit obtinere, in quo Dei civitas et in sanctis peregrinata est, et in omnibus sacramento adumbrata. Igitur filii Sem prius sex nominantur, deinde ex uno eorum nati sunt quatuor nepotes ejus: itemque alter filiorum Sem genuit ejus nepotem, atque ex illo itidem pronepos natus est, atque inde abnepos, qui est Heber. Genuit autem Heber duos filios, quorum unum appellavit Phalech, quod interpretatur Dividens. Deinde Scriptura subjungens, rationemque hujus nominis reddens, *Quia in diebus, inquit, ejus divisa est terra.* Hoc autem quid sit, postea apparebit. Alius vero qui natus est ex Heber, genuit duodecim filios: ac per hoc fiunt omnes progeniti de Sem viginti septem. In summa igitur omnes progeniti de tribus filiis Noe, id est, quindecim de Japheth, et triginta unus de Cham, viginti septem de Sem, fiunt septuaginta tres. Deinde sequitur Scriptura dicens: *Hi filii Sem in tribus suis secundum linguas suas, in regionibus suis et in gentibus suis.* Itemque de omnibus: *Hæ, inquit, tribus filiorum Noe secundum generationes eorum, et secundum gentes eorum. Ab his dispersæ sunt insulæ gentium super terram post diluvium.* Unde colligitur septuaginta tres, vel potius (quod postea demonstrabitur) septuaginta duas gentes tunc fuisse, non homines. Nam et prius cum fuissent commemorati filii Japheth, ita conclusum est: *Ex his segregatæ sunt insulæ gentium in terra sua, unusquisque secundum linguam suam in tribus suis et in gentibus suis.*

3. Jam vero in filiis Cham quodam loco apertius gentes commemoratæ sunt, sicut superius ostendi. *Mezraim genuit eos qui dicuntur Ludiim:* et eodem modo cæteræ usque ad septem gentes. Et enumeratis omnibus, postea concludens: *Hi filii Cham, inquit, in tribus suis, secundum linguas suas in regionibus suis, et in gentibus suis (Gen. x).* Propterea ergo multorum filii non sunt commemorati, quia gentibus aliis nascendo accesserunt, ipsi autem gentes facere nequiverunt. Nam qua alia causa, cum filii Japheth octo enumerentur, ex duobus eorum tantum filii nati commemorantur; et cum filii Cham quatuor nominentur, ex tribus tantum qui nati sunt adjiciuntur; et cum filii Sem nominentur sex, duorum tantum posteritas attexitur? numquid cæteri sine filiis remanserunt? Absit hoc credere: sed gentes propter quas commemorari digni essent, non utique fecerunt; quia sicut nascebantur, aliis gentibus addebantur.

¹ Nostri omnes, *Non Itaque.* M.

² *Deest, hebraicam, in codd. nostris.* M.

(a) Conf. lib. 2 Retract., cap. 16.

CAPUT IV. — *De diversitate linguarum, principioque Babylonis.*

Cum ergo in suis linguis istæ gentes fuisse refo-rantur, redit tamen narrator ad illud tempus; quando una lingua omnium fuit, et inde jam expositi quid acciderit, ut linguarum diversitas nasceretur. *Et erat, inquit, omnis terra labium unum, et vox una omnibus. Et factum est, cum moverent ipsi ab Oriente, invenerunt campum in terra Sennaar, et habitaverunt ibi. Et dixit homo proximo suo: Venite, faciamus lateres, et coquamus illos igni. Et facti sunt illis lateres in lapidem¹, et bitumen erat illis lutum: et dixerunt, Venite, et ædificemus nobismetipsis civitatem, et turrem cujus caput erit² usque ad cælum, et faciamus nobis nomen³, antequam dispergamur in faciem omnis terræ. Et descendit Dominus videre civitatem et turrem, quam ædificaverunt filii hominum. Et dixit Dominus Deus⁴: Ecce genus unum, et labium unum omnium; et hoc inchoaverunt facere, et nunc non deficient ex illis omnia quæ conati fuerint facere: venite, et descendentes confundamus ibi linguam eorum, ut non audiant unusquisque vocem proximi sui. Et dispersit eos Dominus inde super faciem omnis terræ, et cessaverunt ædificantes civitatem et turrem. Propter hoc appellatum est nomen illius Confusio; quia ibi confudit Dominus labia omnis terræ: et inde dispersit illos Dominus Deus super faciem omnis terræ (Gen. xi, 1-9).* Ista civitas quæ appellata est Confusio, ipsa est Babylon, cujus mirabilem constructionem Gentium etiam commendat historia. Babylon quippe interpretatur Confusio. Unde colligitur gigantem illum Nebroth fuisse illius conditorem, quod superius breviter fuerat intimatum, ubi cum de illo Scriptura loqueretur, ait initium regni ejus fuisse Babylonem, id est, quæ civitatum cæterarum gereret principatum, ubi esset tanquam in metropoli habitaculum regni: quamvis perfecta non fuerit usque in tantum modum, quantum superba cogitabat impietas. Nam nimia disponebatur altitudo, quæ dicta est usque in cælum, sive unius turris ejus, quam præcipuam moliebantur inter alias; sive omnium turrium, quæ per numerum singularem ita significatæ sunt, ut dicitur miles, et intelliguntur millia militum: ut rana, ut locusta; sic enim appellata est multitudo ranarum ac locustarum in plagis, quibus Ægyptii percussi sunt per Moysen (Exod. x, 4, et alibi; Psal. LXXVII, 45). Quid autem factura fuerat humana et vana præsumptio? Cujuslibet et quantumlibet in cælum adversus Deum altitudinem molis extolleret, quando montes transcenderet universos? quando spatium nebulosi aeris hujus evaderet? Quid denique noceret Deo quantumcumque vel spiritualis, vel corporalis elatio? Tutam veramque in cælum viam molitur humilitas, sarsum levans cor ad Domi-

¹ Lov., *terres.* Editi vero alii et manuscripti juxta græcum, *terra.*

² Lov., *in lapides;* dissentientibus cæteris libris et LXX.

³ Editi, *est.* At Mss., *erit;* juxta LXX, *estai.*

⁴ Mss., *et faciamus nostrum nomen.*

⁵ Hic vox, *Deus,* in sola editione Lov. omittitur.

num, non contra Dominum: sicut dicitur est gigas iste venator contra Dominum (Gen. x, 9). Quod non intelligentes nonnulli, ambiguo græco decepti sunt, ut non interpretarentur contra Dominum, sed ante Dominum: *ἔναντιον* quippe et ante et contra significat. Hoc enim verbum est in Psalmo: *Et ploremus ante Dominum, qui fecit nos* (Psal. xciv, 6). Et hoc verbum est etiam in libro Job, ubi scriptum est, *In furorem erupisti contra Dominum* (Job. xv, 13, sec. LXX). Sic ergo intelligendus est gigas iste venator contra Dominum. Quid autem hic significatur hoc nomine, quod est venator, nisi animalium terrigenarum deceptor, oppressor, extinator? Erigebat ergo cum suis populis turrem contra Dominum, qua est impia significata superbia. Merito autem malus punitur affectus, etiam cui non succedit effectus. Genus vero ipsum pœnæ quale fuit? Quoniam dominatio imperantis in lingua est, ibi damnata est superbia, ut non intelligeretur jubens homini, qui noluit intelligere ut obediret Deo jubenti. Sic illa conspiratio dissoluta est, cum quisque ab eo quem non intelligebat, abscederet, nec se nisi ei, cum quo loqui poterat, aggregaret: et per linguas diviæ sunt gentes, dispersæque per terras, sicut Deo placuit, qui hoc modis occultis nobisque incomprehensibilibus fecit.

CAPUT V. — *De descensione Domini ad confundendam linguam ædificantium turrem.*

Quod enim scriptum est, *Et descendit Dominus videre civitatem et turrem, quam ædificaverunt filii hominum*; hoc est, non filii Dei, sed illa societas secundum hominem vivens, quam terrenam dicitur civitatem: non loco movetur Deus, qui semper ubique est totus; sed descendere dicitur, cum aliquid facit in terra, quod præter usitatum naturæ cursum mirabiliter factum, præsentiam quodammodo ejus ostendat: nec videndo discit ad tempus, qui nunquam potest aliquid ignorare; sed ad tempus videre et cognoscere dicitur, quod videri et cognosci facit. Non sic ergo videbatur illa civitas, quomodo eam Deus videri fecit, quando sibi quantum displiceret ostendit. Quamvis possit intelligi Deus ad illam civitatem descendisse, quia descenderunt Angeli ejus in quibus habitat; ut quod adjunctum est, *Et dixit Dominus Deus, Ecce genus unum, et labium unum omnium*, et cætera; ac deinde additum, *Venite, et descendentes confundamus ibi linguam eorum* (Gen. xi, 5-7); recapitulatio sit, demonstrans quemadmodum factum sit, quod dictum fuerat, *Descendit Dominus*. Si enim jam descenderat, quid sibi vult, *Venite, et descendentes confundamus* (quod intelligitur Angelis dictum), nisi quia per Angelos descendebat, qui in Angelis descendentibus erat? Et bene non ait, *Venite, et descendentes confundite*: sed, *Confundamus ibi linguam eorum*; ostendens ita se operari per ministros suos, ut sint etiam ipsi cooperatores Dei: sicut Apostolus dicit, *Dei enim sumus cooperarii* (I Cor. iii, 9).

† sola editio Lov., autem.

CAPUT VI. — *Qualis intelligenda sit esse locutio, qua Deus Angelis loquitur.*

1. Poterat et illud, quando factus est homo, de Angelis intelligi quod dictum est, *Faciamus hominem*, quia non dixit, *Faciam*: sed quia sequitur, *ad imaginem nostram*; nec fas est credere ad imaginem Angelorum hominem factum, aut eandem esse imaginem Angelorum et Dei; ideo recte illic intelligitur pluralitas Trinitatis. Quæ tamen Trinitas, quia unus est Deus, etiam cum dixisset, *Faciamus*: *Et fecit*, inquit, *Deus hominem ad imaginem Dei* (Gen. i, 26, 26): non dixit, *Fecerunt dii*, aut, *ad imaginem deorum*. Poterat et hic eadem intelligi Trinitas, tanquam Pater dixerit ad Filium et Spiritum sanctum, *Venite, et descendentes confundamus ibi linguam eorum*; si aliquid esset, quod Angelos prohiberet intelligi: quibus potius convenit venire ad Deum motibus sanctis, hoc est cogitationibus piis, quibus ab eis consulitur incommutabilis Veritas, tanquam lex æterna in illa eorum curia superna. Neque enim sibi ipsi sunt veritas; sed creatricis participes Veritatis, ad illam moventur, tanquam ad fontem vitæ, ut quod non habent ex se ipsis, capiant ex ipsa. Et eorum stabilis est iste motus¹, quo veniunt, qui non recedunt². Nec sic loquitur Angelis Deus, quomodo nos invicem nobis, vel Deo, vel Angelis, vel ipsi Angeli nobis, sive per illos Deus nobis; sed ineffabili suo modo, nobis autem hoc indicatur nostro modo. Dei quippe sublimior ante suum factum locutio, ipsius sui facti est immutabilis ratio, quæ non habet sonum strepentem atque transeuntem, sed vim sempiternæ manentem, et temporaliter operantem. Hac loquitur Angelis sanctis, nobis autem aliter longe positus. Quando autem etiam nos aliquid talis locutionis interioribus auribus capimus, Angelis propinquamus. Non itaque mihi assidue reddenda est ratio in hoc opere de locutionibus Dei. Aut enim Veritas incommutabilis per se ipsam ineffabiliter loquitur rationalis creaturæ mentibus, aut per mutabilem creaturam loquitur, sive spiritualibus imaginibus nostro spiritui, sive corporalibus vocibus corporis sensui.

2. Illud sane quod dictum est, *Et nunc non deficient ex illis omnia, quæ conati fuerint facere* (Id. xi, 6), non dictum est confirmando, sed tanquam interrogando, sicut solet a comminantibus dici, quemadmodum ait quidam,

non arma expedient, totaque ex urbe sequentur?
(Virgil., *Æneid. lib. 4, v. 592.*)

Sic ergo accipiendum est, tanquam dixerit, Nonne omnia deficient ex illis, quæ conati fuerint facere? Sed si ita dicatur, non exprimit comminantem. Verum propter tardiusculos addidimus particulam, id est, Ne, ut diceremus, Nonne: quoniam vocem pronuntiantis scribere non possumus. Ex illis igitur tribus hominibus, Noe filiis, septuaginta tres, vel potius, ut ratio declaratura est, septuaginta duæ gentes toti-

¹ Ita Mas. At editi: *Et ideo eorum stabilis est iste motus.*

² MSS., *quia non recedunt.*

demque linguæ (a) per terras esse cœperunt, quæ crescendo et insulas impleverunt. Auctus est autem numerus gentium multo amplius quam linguarum. Nam et in Africa barbaras gentes in una lingua plurimas novimus; et homines quidem, multiplicato genere humano, ad insulas inhabitandas navigio transire potuisse, quis ambigat?

CAPUT VII. — *An omne bestiarum genus etiam remotissimæ a terris insulæ ex eo numero acceperint, qui in arca a diluvii inundatione servatus est.*

Sed quæstio de omni genere bestiarum est, quæ sub cura hominum non sunt, nec sicuti ranae nascuntur ex terra, sed sola commixtione maris et feminæ propagantur, sicut lupi atque huiusmodi cætera, quomodo post diluvium, quo ea quæ in arca non erant, cuncta deleta sunt, etiam in insulis esse potuerint, si reparata non sunt nisi ex his, quorum genera in utroque sexu arca servavit. Possunt quidem credi ad insulas natando transisse, sed proximas. Sunt autem quædam tam longe positæ a continentibus terris, ut ad eas nulla videatur natare potuisse bestiarum. Quod si homines eas captas secum advexerunt, et eo modo ubi habitabant earum genera instituerunt, venandi studio fieri potuisse incredibile non est: quamvis jussu Dei sive permissu etiam opere Angelorum negandum non sit potuisse transferri. Si vero e terra exortæ sunt secundum originem primam, quando dixit Deus, *Producat terra animam vivam* (Gen. 1, 24): multo clarius apparet, non tam reparandorum animalium causa, quam figurandarum variarum gentium propter Ecclesiæ sacramentum in arca fuisse omnia genera, si in insulis, quo transire non possent, multa animalia terra produxit.

CAPUT VIII. — *An ex propagine Adam vel filiorum Noe quædam genera hominum monstrosa prodierint.*

1. Quæritur etiam, utrum ex filiis Noe, vel potius ex illo uno homine, unde etiam ipsi exstiterunt, propagata esse credendum sit quædam monstrosa hominum genera, quæ gentium narrat historia: sicut perhibentur quidam unum habere oculum in fronte media: quibusdam plantas versas esse post crura: quibusdam utriusque sexus esse naturam, et dextram mammam virilem, sinistram muliebrem, vicibusque alternis cocundo¹ et gignere et parere: alii ora non esse, eosque per nares tantummodo halitu² vivere: alios statura esse cubitales, quos Pygmæos (b) a cubito Græci vocant: alibi quinquennes concipere feminas, et octavum vitæ annum non excedere. Item ferunt esse gentem, ubi singula crura in pedibus habent, nec poplitem flectunt, et sunt mirabilis celeritatis; quos Sciopodas (c) vocant, quod per æstum int'erra jacentes resupini umbra se pedum protegant: quosdam sine cervice oculos habentes in humeris: et cætera hominum, vel quasi hominum genera, quæ in mari-

tima platea Carthaginis musivo picta sunt, ex libris deprompta velut curiosioris historiæ. Quid dicam de Cynocephalis (a), quorum canina capita atque ipsa latratus magis bestias quam homines constetur? Sed omnia genera hominum quæ dicuntur esse, credere non est necesse. Verum quisquis usquam nascitur homo, id est animal rationale mortale, quamlibet nostris inusitatum sensibus gerat corporis formam, seu colorem, sive motum, sive sonum, sive qualibet vi, qualibet parte, qualibet qualitate naturæ, ex illo uno protoplasto originem ducere, nullus fidelium dubitaverit. Apparet tamen quid in pluribus natura obtinuerit, et quid sit ipsa raritate mirabile.

2. Qualis autem ratio redditur de monstrosis apud nos hominum partibus, talis de monstrosis quibusdam gentibus reddi potest. Deus enim creator est omnium, qui ubi et quando creati quid oporteat vel oportuerit, ipse novit, sciens universitatis pulchritudinem quarum partium vel similitudine vel diversitate contextat. Sed qui totum inspicere non potest, tanquam deformitate partis offenditur; quoniam cui congruat, et quo referatur, ignorat. Pluribus quam quinque digitis in manibus et pedibus nasci homines, novimus; et hæc levior est quam illa distantia³: sed tamen absit ut quis ita desipiat, ut existimet in numero humanorum digitorum errasse Creatorem, quamvis nesciens cur hoc fecerit. Ita etsi major diversitas oriatur, scit ille quid egerit, cuius opera jure non reprehendit. Apud Hipponem Diarrhytum (b) est homo quasi lunatas habens plantas, et in eis binos tantummodo digitos, similes et manus. Si aliqua gens talis esset, illi curiosæ atque mirabili adderetur historiæ. Num igitur istum propter hoc negabimus ex uno illo, qui primus creatus est, esse propagatum? Androgyni, quos etiam Hermaphroditos nuncupant, quamvis admodum rari sint, difficile est tamen ut temporibus desint, in quibus sic uterque sexus apparet, ut ex quo potius debeant accipere nomen, incertum sit: a meliore tamen, hoc est a masculino, ut appellarentur, loquendi consuetudo prævaluit. Nam nemo unquam Androgynæas⁴ aut Hermaphroditas nuncupavit. Ante annos aliquot, nostra certe memoria, in Oriente duplex homo natus est superioribus membris, inferioribus simplex: nam duo erant capita, duo pectora, quatuor manus; venter autem unus, et pedes duo, sicut uni homini; et tam diu vixit, ut multos ad eum videndum fama contraheret. Quis autem omnes commemorare possit humanos fetus longe dissimiles his ex quibus eos natos esse certissimum est? Sicut ergo hæc ex illo uno negari non possunt originem ducere; ita quæcumque gentes in diversitatibus corporum ab usitato naturæ cursu, quem plures et prope omnes tenent, velut exorbitasse traduntur,

¹ Plerique Mss., *quam ulla distantia.*

² Vind. Am. *Androgenas.* Fr. et aliquot Mss. *Androgynas.*

(a) cynocephali dicti, quasi canicipites.

(b) Duo fuerunt Hippones in Africa, Hippo-Regius cognomine *Bona*, et Hippo-Diarrhytos, quæ a nonnullis *Biserta* nunc dici creditur. Non hujus, ut Ludovicus Vives putavit, sed alterius Hipponis, Regis scilicet, episcopus fuit Augustinus.

¹ Mss., *vicibusque inter se cocundo.*

² Editi, *suscepto et emissio halitu.* Verba, *suscepto et emissio*, absunt a Mss.

(a) Sic etiam Ambrosius in Psalmum civ, et Eucherius libro secundo in Genesim, cap. 7. *COCOËUS.*

(b) Pygmæi dicti, quasi cubitales.

(c) Sciopodæ, quasi umbripedes.

si definitione illa includuntur, ut rationalia animalia sint atque mortalia, ab eodem ipso uno primo patre omnium stirpem trahere confitendum est: si tamen vera sunt quæ de illarum nationum varietate et tanta inter se atque nobiscum diversitate traduntur. Nam et simias, et cercopithecus, et sphingas, si nesciremus non homines esse, sed bestias, possent illi historici de sua curiositate gloriantes, velut gentes aliquas hominum nobis impunita vanitate mentiri. Sed si homines sunt, de quibus illa mira conscripta sunt; quid, si propterea Deus voluit etiam nonnullas gentes ita creare, ne in his monstris, quæ apud nos patet¹ ex hominibus nasci, ejus sapientiam, qua naturam fingit humanam, velut artem cujuscumque minus perfecti opificis, putarem errasse? Non itaque nobis videri absurdum debet, ut quemadmodum in singulis quibusque gentibus quædam monstra sunt hominum, ita in universo genere humano quædam monstra sint gentium. Quapropter, ut istam quæstionem pedetentim cauteque concludam: aut illa, quæ talia de quibusdam gentibus scripta sunt, omnino nulla sunt; aut si sunt, homines non sunt; aut ex Adam sunt, si homines sunt.

CAPUT IX. — *An inferiorem partem terræ, quæ nostræ habitationi contraria est, Antipodas habere credendum sit.*

Quod vero et Antipodas esse fabulantur, id est, homines a contraria parte terræ, ubi sol oritur, quando occidit nobis, adversa pedibus nostris calcare vestigia, nulla ratione credendum est (a). Neque hoc ulla historica cognitione didicisse se affirmant, sed quasi ratiocinando conjectant, eo quod intra convexa cæli terra suspensa sit, eundemque locum mundus habeat, et infimum, et medium: et ex hoc opinantur alteram terræ partem, quæ infra est, habitatione hominum carere non posse. Nec attendunt, etiamsi figura conglobata et rotunda mundus esse credatur, sive aliqua ratione monstretur; non tamen esse consequens, ut etiam ex illa parte ab aquarum congerie nuda sit terra: deinde etiamsi nuda sit, neque hoc statim necesse esse, ut homines habeat. Quoniam nullo modo Scriptura ista mentitur, quæ narratis præteritis facit fidem, eo quod ejus prædicta complentur: nimisque absurdum est, ut dicatur aliquos homines ex hac in illam partem, Oceani immensitate trajecta, navigare ac pervenire potuisse, ut etiam illic ex uno illo primo homine genus institueretur humanum. Quapropter inter illos tunc hominum popu-

¹ Mss., oportet.

(a) De Antipodum existentia pugnam inter litteratos et vulgus ingentem fuisse scribit Plinius, Hist. nat. lib. 2, cap. 63. Nec alia haud dubie vulgo erat causa, cur Antipodas negaret, quam quæ Lactantio fuit, Inst. lib. 5, cap. 24, ubi « inceptum » dicit « credere esse homines quorum vestigia « sint superiora quam capita, aut ibi quæ apud nos jacent, « inversa pendere; fruges et arbores deorsum versus crescere, etc., atque « hujus erroris originem philosophis « fuisse, quod existimarent rotundum esse mundum. » Antipodas etiam Augustinus negandos putabat, non tamen propter allatas a Lactantio rationes; sed ne admittere cogere homines non ortos ex Adamo, quod scripturæ repugnat. Hinc Zacharias papa in Epist. 10 ad Bonifacium, data anno 748, *persersam et iniquam* appellat doctrinam Virgilii cujusdam asserentis quod alius mundus et alii homines sub terra sint.

los, qui per septuaginta duas gentes et totidem linguas colliguntur fuisse divisi, quæramus, si possumus invenire illam in terris peregrinantem civitatem Dei, quæ usque ad diluvium arcamque perducta est, atque in filiis Noe per eorum benedictiones perseverasse monstratur, maxime in maximo, qui est appellatus Sem: quandoquidem Japheth ita benedictus est, ut in ejusdem fratris sui domibus habitaret.

CAPUT X. — *De generatione Sem, in cujus progenie tendens ad Abraham civitatis Dei ordo dirigitur.*

1. Tenenda est igitur series generationum ab ipso Sem, ut ipsa ostendat post diluvium civitatem Dei; sicut eam series generationum ab illo qui est appellatus Seth, ostendebat ante diluvium. Propter hoc ergo Scriptura divina cum terrenam civitatem in Babylone, hoc est in confusione, monstrasset, ad patriarcliam Sem recapitulando revertitur, et orditur inde generationes usque ad Abraham, commemorato etiam numero annorum quanto quisque ad hanc seriem pertinentem filium genuisset, quantoque vixisset. Ubi certe agnoscendum est quod ante promissam, ut apparet quare sit dictum de filiis Heber, *Nomen unius Phalech, quia in diebus ejus divisa est terra.* (Gen. x, 25). Quid enim aliud intelligendum est, terram esse divisam, nisi diversitate¹ linguarum? Omissis igitur cæteris filiis Sem ad hanc rem non pertinentibus, illi connectuntur in ordine generationum per quos possit ad Abraham perveniri: sicut illi connectebantur ante diluvium, per quos perveniretur ad Noe, generationibus² quæ propagatæ sunt ex illo Adam filio, qui appellatus est Seth. Sic ergo incipit generationum ista contextio: *Et hæ generationes Sem. Sem filius centum annorum³, cum genuit Arphaxat, secundo anno post diluvium. Et vixit Sem, postquam genuit Arphaxat, quingentos annos, et genuit filios et filias, et mortuus est* (Id. xi, 10, 11). Sic exsequitur cæteros, dicens quoto quisque anno vitæ suæ filium genuerit, ad istum generationum ordinem pertinentem, qui pertendit ad Abraham; et quot annos postmodum vixerit, intmans eum filios filiasque genuisse: ut intelligamus unde potuerint populi accrescere, ne in paucis qui commemorantur hominibus occupati pueriliter hæsitemus, unde tanta spatia terrarum atque regnorum repleti potuerint de genere Sem; maxime propter Assyriorum regnum, unde Ninus ille Orientalium domitor⁴ usquequaque populorum ingenti prosperitate regnavit, et latissimum ac fundatissimum regnum, quod diuturno tempore duceretur, suis posteris propagavit.

2. Sed nos, ne diutius quam opus est immoremur, non quot annos quisque in ista generationum serie vixerit, sed quoto anno vitæ suæ genuerit filium, hoc ordine memorandum tantummodo ponimus, ut et numerum annorum a transacto diluvio usque ad

¹ Vind. Am. Er., *diversitatem*. Aliquot Mss., *diversitates*.

² Ms. 238, *per generationes*. M.

³ Editi: *Sem filius Noe centum erat annorum*. At veteres libri, juxta græcum LXX, omittunt, *Noe, et, erat*. Confer librum Locutionum in Genesim ad hunc versum.

⁴ Vind. Am. et quidam e manuscriptis, *dominator*.

Abraham colligamus, et propter illa ¹, in quibus nos rogit necessitas immorari, breviter alia cursimque tangamus. Secundo igitur anno post diluvium Sem, cum esset centum annorum, genuit Arphaxat; Arphaxat autem, cum esset centum triginta quinque annorum, genuit Cainan; qui cum esset centum triginta, genuit Sala. Porro etiam ipse Sala totidem annorum erat, quando genuit Heber. Centum vero et triginta et quatuor agebat annos Heber, cum genuit Phalech, in cuius diebus divisa est terra. Ipse autem Phalech vixit centum triginta, et genuit Ragau: et Ragau centum triginta duos, et genuit Seruch: et Seruch centum triginta, et genuit Nachor: et Nachor septuaginta novem, et genuit Thara: Thara autem septuaginta, et genuit Abram (*Gen. 10-26*): quem postea Deus mutato vocabulo nominavit Abraham (*Id. xvii, 5*). Fiunt itaque anni a diluvio usque ad Abraham mille septuaginta et duo, secundum Vulgatam editionem, hoc est interpretum Septuaginta. In hebræis autem codicibus longe pauciores annos perhibent inveniri: de quibus rationem aut nullam, aut difficillimam reddunt.

3. Cum ergo quaerimus in illis septuaginta duabus gentibus civitatem Dei, non possumus affirmare illo tempore, quo erat illis labium unum (*Id. xi, 1*), id est loquela una, tunc jam genus humanum alienatum fuisse a cultu veri Dei, ita ut in solis istis generationibus pietas vera remaneret, quæ descendunt de semine Sem per Arphaxat, et tendunt ad Abraham: sed ab illa superbia ædificandæ turris usque in cælum, qua impii significatur elatio, apparuit civitas ², hoc est societas, impiorum. Utrum itaque ante non fuerit, an latuerit, an potius utraque permanserit, pia scilicet in duobus filiis Noe, qui benedicti sunt, eorumque posteris; impii vero in eo qui maledictus est, atque ejus progenie, ubi etiam exortus est gigas venator contra Dominum, non est dijudicatio facilis. Fortassis enim, quod profecto est credibilis, et in filiis duorum illorum jam tunc antequam Babylonia cœpisset institui, fuerunt contempiores Dei, et in filiis Cham cultores Dei: utrumque tamen hominum genus terris nunquam defuisse credendum est. Siquidem et quando dictum est, *Omnes declinaverunt, simul inutiles facti sunt; non est qui faciat bonum, non est usque ad unum*; in utroque Psalmo, ubi hæc verba sunt, et hæc legitur, *Nonne cognoscent omnes, qui operantur iniquitatem, qui devorant populum meum in cibo panis?* Erat ergo etiam tunc populus Dei. Unde illud quod dictum est, *Non est qui faciat bonum, non est usque ad unum*; de filiis hominum dictum est, non de filiis Dei. Nam præmissum est, *Deus de cælo prospexit super filios hominum, ut videret si est intelligens, aut requirens Deum* (*Psal. xiii, 5, 4, 2; Psal. lxx, 4, 5, 3*): ac deinde illa subjuncta, qua: omnes filios hominum, id est, ad civitatem pertinentes quæ vivit secundum hominem, non secundum Deum, reprobos esse demonstrant.

¹ Vind. Am. Er. et plures Mss., et præter illa.

² Filii, terrena apparuit civitas. Abest, terrena, a manuscriptis.

CAPUT XI. — *Quod ea primitus lingua in usu hominum fuerit, quæ postea Hebræa ab Heber nomine nuncupata est, et in cuius familia remansit, cum diversitas esset facta linguarum.*

1. Quamobrem sicut lingua una cum esset omnium, non ideo filii pestilentia defuerunt; nam et ante diluvium una erat lingua, et tamen omnes præter unam Noe justi domum delert diluvio merguerunt: ita quando merito elationis impietatis gentes linguarum diversitate punitæ atque divisæ sunt, et civitas impiorum confusionis nomen accepit, hoc est, appellata est Babylonia, non defuit domus Heber, ubi ea quæ antea fuit omnium lingua remaneret. Unde, sicut supra memoravi, cum cœpissent enumerari filii Sem, qui singuli gentes singulas procurarunt, primus est commemoratus Heber, cum sit abnepos ipsius, hoc est, ab illo quintus invenitur exortus. Quia ergo in ejus familia remansit hæc lingua (a), divisis per alias linguas cæteris gentibus, quæ lingua prius humano generi non immerito creditur fuisse communis, ideo deinceps Hebræa est nuncupata. Tunc enim opus erat eam distingui ab aliis linguis nomine proprio, sicut aliæ quoque vocatæ sunt nominibus propriis. Quando autem erat una, nihil aliud quam humana lingua, vel humana locutio vocabatur, qua sola universum genus humanum loquebatur.

2. Dixerit aliquis: Si in diebus Phalech filii Heber divisa est terra per linguas, id est, homines qui tunc crant in terra; ex ejus nomine potius debuit appellari lingua illa, quæ fuit omnibus ante communis. Sed intelligendum est ipsum Heber propterea tale nomen imposuisse filio suo, ut vocaretur Phalech, quod interpretatur Divisio, quia tunc ei natus est, quando per linguas terra divisa est, id est ipso tempore, ut hoc sit quod dictum est: *In diebus ejus divisa est terra* (*Gen. x, 25*). Nam nisi adhuc Heber viveret, quando linguarum facta est multitudo, non ex ejus nomine nomen acciperet lingua, quæ apud illum potuit permanere (b). Et ideo credenda est ipsa fuisse prima illa communis: quoniam de postea venit illa multiplicatio mutatioque linguarum; et utique præter hanc posteam esse debuit populus Dei. Nec frustra lingua hæc est, quam tenuit Abraham ¹, nec in omnes filios suos transmittere potuit, sed in

¹ Sic Mss. Editi vero, *Nec frustra linguam istam, hoc est quam tenuit Abraham.*

(a) vide infra, lib. 18, cap. 39.

(b) De hac re non una omnium est sententia. Hebræi enim in suo Chronico, quod appellant Seder-Holam, id est Ordo sæculi, tradunt divisionem linguarum factam esse extremo tempore vitæ Phaleg, scilicet anno trecentesimo quadragésimo post diluvium, decem annis ante mortem Noe. Phaleg enim natus est anno centesimo primo post diluvium, et vixit ducentis novem annis. Voluit itaque Hebræi prophetam fuisse Heber, ut qui spiritu prophetico longe ante præviderit futuram divisionem linguarum, ideoque nascenti filio hoc nomen imposuerit. Videtur S. Hieronymus in Traditionibus hebræicis accedere ad hanc sententiam, affirmans Heber vaticinio quodam, scilicet ex futuro eventu divisionis linguarum, nomen imposuisse filio. Vide tur et eadem opinio S. Chrysostomi esse, Homilia 26 in Genesim. COQUAZ.

eos tantum qui propagati per Jacob, et insignius atque eminentius in Dei populum coalescentes, Dei Testamenta et stirpem Christi habere potuerunt. Nec Heber ipse eandem linguam in universam progeniem suam refudit; sed in eam tantum, cujus generationes perducuntur ad Abraham. Quapropter, etiamsi non evidenter expressum est fuisse aliquod primum genus hominum, quando ab impiis Babylonia condebatur; non ad hoc valuit hæc obscuritas, ut quærentis fraudaretur, sed potius ut exerceretur intentio. Cum enim legitur unam fuisse linguam primitus omnium, et ante omnes filios Sem commendatur Heber, quamvis ab illo quintus oriatur; et Hebræa vocatur lingua, quam Patriarcharum et Prophetarum, non solum in sermonibus suis, verum etiam in Litteris sacris custodivit auctoritas: profecto cum quæritur in divisione linguarum, ubi lingua illa remanere potuerit, quæ fuit ante communis; quæ, sine ulla dubitatione, ubi remansit, non ibi fuit illa pœna, quæ facta est mutatione linguarum; quid aliud occurrit, nisi quod in hujus gente remanserit, a cujus nomine nomen accepit; et hoc justitiæ gentis hujus non parvum apparuisse vestigium, quod, cum antiæ gentes plecterentur mutatione linguarum, ad istam non pervenit tale supplicium?

3. Sed adhuc illud movet: quomodo potuerunt singulas gentes facere Heber et filius ejus Phalech, si una lingua permansit ambobus? Et certe una est Hebræa gens ex Heber propagata usque ad Abraham, et per eum deinceps, donec magnus fieret populus Israël. Quomodo igitur omnes filii qui commemorati sunt trium filiorum Noe, fecerunt singulas gentes, si Heber et Phalech singulas non fecerunt? Nimirum illud est probabilius, quod gigas ille Nebroth fecerit etiam ipso gentem suam, sed propter excellentiam dominationis et corporis seorsum eminentius nominatus est, ut maneat numerus septuaginta duarum gentium atque linguarum. Phalech autem propterea commemoratus est, non quod gentem fecerit (nam eadem ipsa est ejus gens Hebræa, eademque lingua); sed propter tempus insigne, quod in diebus ejus terra divisa est. Nec movere nos debet, quomodo potuerit gigas Nebroth ad illud ætatis occurrere, quo Babylôn condita est, et confusio facta linguarum, atque ex hac¹ divisio gentium. Non enim quia Heber sextus est a Noe, ille autem quartus, ideo non potuerunt ad id tempus convenire vivendo. Hoc enim contigit, cum plus viverent, ubi pauciores sunt generationes, minus ubi plures; aut serius nati essent ubi pauciores, maturius ubi plures. Sane intelligendum est, quando terra divisa est, non solum jam natos cæteros filios filiorum Noe, qui commemorantur patres gentium; sed etiam ejus ætatis fuisse, ut numerosas familias haberent, quæ dignæ fuissent nominibus gentium. Unde nequaquam putandum, quod eo fuerint ordine geniti, quo commemorati leguntur: Alioquin duodecim filii Jectan, qui erat filius alius Heber, frater Phalech, quomodo potuerunt

jam gentes facere, si post Phalech fratrem suum Jectan natus est, sicut post eum commemoratus est: quandoquidem tempore quo natus est Phalech, divisa est terra. Proinde intelligendum est, priorem quidem nominatum, sed longe post fratrem suum Jectan fuisse natum, cujus Jectan duodecim filii tam grandes jam familias haberent, ut in linguas proprias dividi possent. Sic enim potuit prior commemorari, qui erat ætate posterior; quemadmodum prius commemorati sunt ex tribus filiis Noe procreati filii Japheth, qui erat minimus eorum; deinde filii Cham, qui erat medius; postremo filii Sem, qui erat primus et maximus. Illarum autem gentium vocabula partim manserunt, ita ut hodieque appareat unde fuerint derivata; sicut ex Assur Assyrii, et ex Heber Hebræi: partim temporis vetustate mutata sunt, ita ut vix homines doctissimi antiquissimas historias perscrutantes, nec omnium, sed aliquarum ex istis origines gentium potuerint reperire. Nam quod ex filio Cham, qui vocabatur Mesraim, Ægyptii perhibentur exorti, nulla hic resonat origo vocabuli: sicut nec Æthiopicum, qui dicuntur ad eum filium Cham pertinere, qui Chus appellatus est. Et si omnia considerentur, plura mutata, quam manentia nomina apparent.

CAPUT XII. — *De articulo temporis in Abraham, a quo sanctæ successionis novus ordo contextitur.*

Nunc jam videamus procursum civitatis Dei, etiam ab illo articulo temporis, qui factus est in Patre Abraham, unde incipit esse notitia ejus evidentiore, et ubi clariora leguntur promissa divina, quæ nunc in Christo videmus impleri. Sicut ergo Scriptura sancta indicante didicimus, in regione Chaldæorum natus est Abraham (*Gen. xi, 28*): quæ terra ad regnum pertinebat Assyriorum¹. Apud Chaldæos autem jam etiam tunc superstitiones impiæ prævalebant, quemadmodum per cæteras gentes. Una igitur Tharæ domus erat, de qua² natus est Abraham, in qua unius veri Dei cultus, et quantum credibile est, in qua jam sola etiam Hebræa lingua remanserat; quamvis et ipsa³, sicut jam manifestior Dei populus in Ægypto, ita in Mesopotamia servisse diis alienis, Jesu Nave narrante referatur (*Josue xxiv, 2*); cæteris ex progenie illius Heber in linguas paulatim alias et in nationes alias defluentibus. Proinde sicut per aquarum diluvium una domus Noe remanserat ad reparandum genus humanum, sic in diluvio multarum superstitionum per universum mundum una remanserat domus Tharæ, in qua custodita est plantatio civitatis Dei. Denique sicut illic enumeratis supra generationibus usque ad Noe simul cum annorum numeris, et exposita diluvii causa, priusquam Deus inciperet de arca fabricanda loqui ad Noe, dicitur, *Hæ autem generationes Noe* (*Gen. vi, 9*): ita et hic, enumeratis generationibus ab illo, qui est appellatus Sem, filio Noe, usque ad Abraham, deinde insignis articulus similiter ponitur, ut dicatur, *Hæ sunt gene*

¹ Nostri codices, ad regnum Assyrium pertinebat. M

² Sola editio Lov., de quo.

³ Sic Mss. At editi, et ipse.

¹ Mss., ex hoc.

rationes Tharæ. Thara genuit Abram et Nachor et Aran : et Aran genuit Lot. Et mortuus est Aran coram Thara patre suo in terra in qua natus est, in regione Chaldæorum. Et sumpserunt Abram et Nachor sibi uxores : nomen mulieris Abram Sara, et nomen mulieris Nachor Melcha, filia Aran (Gen. xi, 27-29). Iste Aran pater Melchæ fuit et pater Jescæ, quæ Jesca creditur ipsa esse etiam Sara¹ uxor Abrahæ (a).

CAPUT XIII. — Quæ ratio fecisse videatur, ut in transmigratione Tharæ, qua Chaldæos deserens in Mesopotamiam transiit, nulla filii ejus Nachor facta sit mentio.

Deinde narratur quemadmodum Thara cum suis regionem reliquerit Chaldæorum, et venerit in Mesopotamiam, et habitaverit in Charra : tacetur autem de uno ejus filio, qui vocabatur Nachor, tanquam eum non duxerit secum. Nam ita narratur : *Et sumpsit Thara Abram filium suum, et Lot filium Aran, filium filii sui, et Saram nurum suam, uxorem Abram filii sui, et eduxit illos de regione Chaldæorum ire in terram Chanaan : et venit in Charram, et habitavit ibi (Ibid., 31)*. Nusquam hic nominatus est Nachor, et uxor ejus Melcha. Sed invenimus postea, cum servum suum mitteret Abraham ad accipiendam uxorem filio suo Isaac, ita scriptum : *Et accepit puer decem camelos de camelis domini sui, et de omnibus bonis domini sui secum, et exurgens profectus est in Mesopotamiam in civitatem Nachor (Id. xxiv, 10)*. Isto et aliis sacra hujus historiæ testimoniis ostenditur etiam Nachor frater Abrahæ exisse de regione Chaldæorum, sedesque constituisse in Mesopotamia, ubi cum patre suo habitaverat Abraham. Cur ergo Scriptura eum non commemoravit, quando ex gente Chaldæa cum suis profectus est Thara, et habitavit in Mesopotamia, ubi non solum Abraham filius ejus, verum etiam Sarra nurus et Lot nepos ejus commemorantur, quod eos duxerit secum? Cur, putamus, nisi forte quod a paterna et fraterna pietate desciverat, et superstitioni adhæserat Chaldæorum, et postea inde, sive pœnitendo, sive persecutionem passus, quod suspectus haberetur, et ipse emigravit? In libro enim qui inscribitur Judith, cum quæreret Holofernes hostis Israelitarum, quenam gens illa esset, utrum adversus eam bellandum fuisset, sic ei respondit Achior dux Ammonitarum² : *Audiat dominus noster verbum de ore pueri sui, et referam tibi veritatem de populo qui habitat juxta te moptanum hanc³, et non exhibit mendacium de ore servi tui. Hæc enim progenies populi est Chaldæorum, et antea habitaverunt Mesopotamiam, quia noluerunt sequi deos patrum suorum, qui fuerunt in terra Chaldæorum gloriosi, sed declinaverunt de via parentum suorum et adoraverunt Deum cæli, quem cognoverunt, et pro-*

¹ Abest, Sara, a Ms. 258. M.

² Mss. Ammanitarum : et infra, Ammanites; loco, Ammonites.

³ Lov., montana hæc. At Mss., montanam hanc : juxta græcum, τὴν ορεινὴν ταυῆν.

(a) Hoc tradit Josephus, Antiquitatum Judaicarum libro 1, cap. 7, et Hebræi in libro Seder-Holain, cap. 2; denique Hieronymus in Traditionibus hebraicis. Coq. vus.

jecerunt eos a facie deorum suorum, et fugerunt in Mesopotamiam, et habitaverunt ibi dies multos. Dixitque illis Deus eorum, ut exirent de habitatione sua, et irent in terram Chanaan; et illic habitaverunt (Judith v, 5-9): et cætera quæ narrat Achior Ammonites. Unde manifestum est, domum Tharæ persecutionem passam fuisse a Chaldæis pro vera pietate, qua unus et verus ab eis colebatur Deus.

CAPUT XIV. — De annis Tharæ, qui in Charra vitæ suæ tempus implevit.

Defuncto autem Thara in Mesopotamia, ubi vixisse perhibetur ducentos et quinque annos, jam incipiunt indicari factæ ad Abraham promissiones Dei, quod ita scriptum est : *Et fuerunt dies¹ Tharæ in Charra quinque et ducenti anni, et mortuus est in Charra (Gen. xi, 32)*. Non sic autem accipiendum est, quasi omnes hos dies ibi egerit; sed quia omnes dies vitæ suæ, qui fuerunt anni ducenti quinque, ibi compleverit : alioquin nesciretur quot annos vixerit Thara, quoniam non legitur quoto anno vitæ suæ in Charram venerit; et absurdum est existimare in ista serie generationum, ubi diligenter commemoratur quot annos quisque vixerit, hujus solius numerum annorum vitæ non commendatum esse memoriæ. Quod enim quorundam, quos eadem Scriptura commemorat, tacentur anni, non sunt in hoc ordine, in quo temporum dinumeratio decessione gignentium et genitorum successione contextitur. Iste autem ordo, qui dirigitur ab Adam usque ad Noe, et inde usque ad Abraham, sine numero annorum vitæ suæ neminem continet.

CAPUT XV. — De tempore profectionis Abrahæ, qua secundum præceptum Dei exiit de Charra.

1. Quod vero, commemorata morte Tharæ patris Abraham, deinde legitur, *Et dixit Dominus ad Abram, Exi de terra tua, et de cognatione tua, et de domo patris tui, et cætera*; non quia hoc sequitur in sermone libri, hoc etiam in rerum gestarum tempore sequi existimandum est. Erit quippe, si ita est, insolubilis quaestio. Post hæc enim verba Dei, quæ ad Abraham facta sunt, Scriptura sic loquitur : *Et exiit Abram, quemadmodum locutus est illi Dominus, et abiit cum eo Lot. Abram autem erat quinque et septuaginta annorum, cum exiit ex Charra (Id. xii, 1, 4)*. Quomodo potest hoc verum esse, si post mortem patris sui exiit de Charra? Cum enim esset Thara septuaginta annorum, sicut supra intimatum est, genuit Abraham : cui numero additis septuaginta quinque annis, quos agebat Abraham, quando egressus est de Charra, fiunt anni centum quadraginta quinque. Tot igitur annorum erat Thara, quando exiit Abraham de illa Mesopotamiæ civitate : agebat enim annum ætatis suæ septuagesimum quintum; ac per hoc pater ejus, qui eum septuagesimo anno suo genuerat, agebat, ut dictum est, centesimum quadragesimum et quintum. Non ergo inde post mortem patris, id est post ducentos quinque annos, quibus pater ejus vixit, egressus est : sed annus

¹ Lov., *Et fuerunt omnes dies*. Abest, omnes, a cæteris libris et a græco LXX.

de illo loco profectionis ejus, quoniam ipsius septuagesimus quintus erat, procul dubio patris ejus, qui eum septuagesimo suo anno genuerat, centesimus quadragesimus quintus fuisse colligitur. Ac per hoc intelligendum est more suo Scripturam redisse ad tempus, quod jam narratio illa transierat: sicut superius, cum filios filiorum Noe commemorasset, dixit illos fuisse in gentibus et linguis suis (*Gen. x, 31*), et tamen postea quasi hoc etiam in ordine temporum sequeretur, *Et erat, inquit, omnis terra labium unum, et vox una omnibus (Id. xi, 1)*. Quomodo ergo secundum suas gentes et secundum suas linguas erant, si una erat omnibus; nisi quia ad illud quod jam transierat recapitulando est reversa narratio? Sic ergo et hic cum dictum esset, *Et fuerunt dies Tharæ in Charra quinque et ducenti anni, et mortuus est Thara in Charra (Ibid., 31)*: deinde Scriptura redeundo ad id quod ideo prætermiserat, ut prius de Thara id quod inchoatum fuerat completeretur, *Et dixit, inquit, Dominus ad Abram, Exi de terra tua, et cætera*. Post quæ Dei verba subjungitur, *Et exiit Abram, quemadmodum locutus est illi Dominus, et abiit cum eo Lot: Abram autem erat quinque et septuaginta annorum, cum exiit ex Charra*. Tunc itaque factum est, quando pater ejus centesimum quadragesimum et quintum annum agebat ætatis: tunc enim fuit hujus septuagesimus quintus (a). Soluta est autem quæstio ista et aliter, ut septuaginta quinque anni Abrahæ, quando egressus est de Charra, ex illo computarentur, ex quo de igne Chaldæorum liberatus, non ex quo natus est, tanquam tunc potius natus habendus sit (b).

2. Sed beatus Stephanus in Actibus Apostolorum cum ista narraret, *Deus, inquit, gloriæ apparuit Abraham patri nostro, cum esset in Mesopotamia, priusquam habitaret in Charra, et ait ad illum, Exi de terra tua, et de cognatione tua, et de domo patris tui, et veni in terram, quam tibi demonstrabo*. Secundum hæc verba Stephani non post mortem patris ejus locutus est Deus Abrahæ, qui utique in Charra mortuus est, ubi cum illo et ipse filius habitavit; sed priusquam habitaret in eadem civitate, jam tamen cum esset in Mesopotamia. Jam ergo exierat a Chaldæis. Quod itaque adjungit Stephanus, *Tunc Abraham egressus est de terra Chaldæorum, et habitavit in Charra*, non demonstrat¹ quid sit factum, posteaquam locutus est illi Deus (neque enim post illa Dei verba egressus est de terra Chaldæorum, cum dicat ei locutum Deum cum esset in Mesopotamia), sed ad totum illud tempus pertinet quod ait, *Tunc, id est, ex quo egressus est a Chaldæis, et habitavit in Charra*. Item quod sequitur, *Et inde postquam mortuus est pater ejus, collocavit illum in terra hac, in qua vos nunc habitatis, et patres vestri (Act. vii, 2-4)*: non ait, Postquam mortuus est pater ejus, exiit de Charra; sed inde hic

eum collocavit, postquam mortuus est pater ejus. Intelligendum est igitur locutum Deum fuisse ad Abraham, cum esset in Mesopotamia, priusquam habitaret in Charra; sed eum in Charram pervenisse cum patre, retento apud se præcepto Dei, et inde exisse septuagesimo et quinto suo, patris autem sui centesimo quadragesimo quinto anno. Collocationem vera ejus in terra Chanaan, non profectionem de Charra, post mortem patris ejus factam esse dicit; quia jam mortuus erat pater ejus, quando emit terram, cujus ibi jam suæ rei cœpit esse possessor. Quod autem jam in Mesopotamia constituto, hoc est jam egresso de terra Chaldæorum, dicit Deus, *Exi de terra tua, et de cognatione tua, et de domo patris tui*; non ut corpus inde ejiceret, quod jam fecerat, sed ut animum avelleret, dicitur. Non enim exierat inde animo, si spe redeundi et desiderio tenebatur, quæ spes et desiderium, Deo jubente ac juvante, et illo obediente, fuerat amputandum. Non sane incredibiliter existimatur, cum postea secutus esset Nachor patrem suum, tunc Abraham præceptum Domini implesse, ut cum Sarra conjugæ suæ et Lot filio fratris sui exiret de Charra.

CAPUT XVI. — *De ordine et qualitate promissionum Dei, quæ ad Abraham factæ sunt.*

Jam considerandæ sunt promissiones Dei factæ ad Abraham. In his enim apertiora Dei nostri¹, hoc est Dei veri, oracula apparere cœperunt de populo piorum², quem prophetica prænuntiavit auctoritas. Harum prima ita legitur: *Et dixit Dominus ad Abram: Exi de terra tua, et de cognatione tua, et de domo patris tui, et vade in terram, quam tibi demonstravero; et faciam te in gentem magnam, et benedicam te, et magnificabo nomen tuum, et eris benedictus, et benedicam benedicentes te, et maledicam maledicentes te, et benedicentur in te omnes tribus terræ*. Advertendum est igitur, duas res promissas Abrahæ: unam scilicet, quod terram Chanaan possessurum fuerat semen ejus, quod significatur, ubi dictum est, *Vade in terram, quam tibi demonstravero, et faciam te in gentem magnam*: aliam vero longe præstantiorem, non de carnali, sed de spiritali semine, per quod pater est, non unius gentis Israeliticæ, sed omnium gentium quæ fidei ejus vestigia consequuntur, quod promitti cœpit his verbis, *Et benedicentur in te omnes tribus terræ*. Hanc promissionem factam arbitratur Eusebius septuagesimo quinto anno ætatis Abrahæ, tanquam mox ut facta est, de Charra exierit Abraham: quoniam Scripturæ contradici non potest, ubi legitur, *Abram erat quinque et septuaginta annorum, cum exiit ex Charra (Gen. xii, 1-4)*. Sed si eo anno facta est ista promissio, jam utique in Charra cum patre suo demorabatur Abraham. Neque enim inde exire posset, nisi prius ibi habitasset. Numquidnam ergo contradicitur Stephano dicenti: *Deus gloriæ apparuit Abraham patri nostro cum esset in Mesopotamia, prius-*

¹ Verbum, *demonstrat*, abest a Mss.

(a) Conf. Quæst. in Gen., q. 28.

(b) Solutio hæc ab Hieronymo profertur, ducta ex traditione Hebræorum, qui Abraham in ignem, quem adorare nollet, coniectum a Chaldæis, indeque divinitus liberatumarrant.

¹ Sic Mss. At Lov. *Domini nostri Jesu Christi*.

² Nonnulli codices, *improborum*.

quam habitaret in Charra (Act. vii, 2)? Sed intelligendum est, quod eodem anno facta sint omnia, et Dei promissio antequam in Charra habitaret Abraham, et in Charra habitatio ejus, et inde profectio: non solum quia Eusebius in Chronicis ab anno hujus promissionis computat et ostendit post quadringentos et triginta annos exitum esse de Ægypto, quando lex data est; verum etiam quia id commemorat apostolus Paulus (Galat. iii, 17).

CAPUT XVII. — *De tribus excellentioribus gentium regnis, quorum unum, id est Assyriorum, jam Abraham¹ genito sublimius eminebat.*

Per idem tempus eminentia regna erant gentium, in quibus terrigenarum civitas, hoc est societas hominum secundum hominem viventium, sub dominatu angelorum desertorum insignis excelebat; regna videlicet tria, Sicyoniorum, Ægyptiorum, Assyriorum. Sed Assyriorum multo erat potentius atque sublimius. Nam rex ille Ninus Beli filius, excepta India, universæ Asiæ populos subjugaverat. Asiam nunc dico, non illam partem quæ hujus majoris Asiæ una provincia est, sed eam quæ universa Asia nuncupatur, quam quidam in altera duarum, plerique autem in tertia totius orbis parte posuerunt, ut sint omnes, Asia, Europa, et Africa: quod non æquali divisione fecerunt. Namque ista quæ Asia nuncupatur, a meridie per orientem usque ad septentrionem pervenit: Europa vero a septentrione usque ad occidentem; atque inde Africa ab occidente usque ad meridiem. Unde videntur orbem dimidium duæ tenere, Europa et Africa, alium vero dimidium sola Asia. Sed ideo illæ duæ partes factæ sunt, quia inter utramque ab Oceano ingreditur quiddam aquarum terras interluit, et hoc mare magnum nobis facit. Quapropter si in duas partes orbem divides, Orientis et Occidentis, Asia erit in una, in altera vero Europa et Africa. Quamobrem trium regnorum², quæ tunc præcallebant, scilicet Sicyoniorum non erat sub Assyriis, quia in Europa sunt: Ægyptiorum autem quomodo eis non subjacebat, a quibus tota Asia tenebatur, solis Indis, ut perhibetur, exceptis? In Assyria igitur prævaluerat dominatus impiæ civitatis: hujus caput erat illa Babylon, cujus terrigenæ civitatis nomen aptissimum est, id est Confusio. Ibi jam Ninus regnabat post mortem patris sui Beli, qui primus illic regnaverat sexaginta quinque annos. Filius vero ejus Ninus, qui defuncto patri successit in regnum, quinquaginta duos regnavit annos, et habebat in regno quadraginta tres, quando natus est Abraham, qui erat annus circiter millesimus ducentesimus ante conditam Romam, veluti alteram in Occidente Babyloniam.

CAPUT XVIII. — *De iterato alloquio Dei ad Abraham, quo ei et semini ejus Chanaan terra promittitur.*

Egressus ergo Abraham de Charra septuagesimo quinto anno ætatis suæ, centesimo autem quadrage-

¹ Lov., jam tempore Abraham.

² Editt., quamobrem unum regnorum: pauloque post, regnum scilicet Sicyoniorum. Verba, unum, et, regnum, non habent Mss.

simo et quinto patris sui, cum Lot filio fratris et Sarra conjugæ perrexit in terram Chanaan, et pervenit usque ad Sichem, ubi rursus accepit divinum oraculum, de quo ita scriptum est: *Et apparuit Dominus Abraham, et dixit illi, Semini tuo dabo terram hanc* (Gen. xii, 7). Nihil hic de illo semine promissum est, in quo pater factus est omnium gentium: sed de illo solo, de quo pater est unius Israëlitiæ gentis; ab hoc enim semine terra illa possessa est.

CAPUT XIX. — *De Sarrae pudicitia in Ægypto per Deum custodita, quam Abraham non uxorem suam esse dixerat, sed sororem.*

Deinde ædificato ibi altari, et invocato Deo, Abraham profectus est inde, et habitavit in eremo, atque inde ire in Ægyptum famis necessitate compulsus est. Ubi uxorem suam dixit sororem (Gen. xii, 7-19), nihil mentitus. Erat enim et hoc, quia propinqua erat sanguine: sicut etiam Lot eadem propinquitate, cum fratris ejus esset filius, frater ejus est dictus. Itaque uxorem tacuit, non negavit, conjugis tuendam pudicitiam committens Deo, et humanas insidias cavens ut homo: quoniam si periculum quantum caveri poterat, non caveret, magis tentaret Deum, quam speraret in Deum. De qua re contra calumniantem Faustum Manichæum satis diximus (*Lib. 22, cap. 36*). Denique factum est quod de Domino præsumpsit Abraham. Nam Pharaon rex Ægypti, qui eam sibi uxorem acceperat, graviter afflictus marito reddidit (Gen. xii, 20). Ubi absit ut credamus, alieno concubitu fuisse pollutam: quia multo est credibilis, hoc Pharaonem facere afflictionibus magnis non fuisse permissum.

CAPUT XX. — *De secessione Lot et Abraham, quæ illis salva charitate complacuit.*

Reverso igitur Abraham ex Ægypto in locum unde venerat, tunc Lot fratris filius ab illo in terram Sodomorum, salva charitate, discessit. Divites quippe facti erant, pastoresque multos pecorum habere cœperant, quibus inter se rixantibus, eo modo familiarum suarum pugnacem discordiam vitaverunt. Poterat quippe hinc, ut sunt humana, etiam inter ipsos aliqua rixa consurgere. Proinde hoc malum præcaventis Abraham verba ista sunt ad Lot: *Non sit rixa inter me et te, et inter pastores meos et pastores tuos, quia homines fratres nos sumus: nonne ecce tota terra ante te est? Discede a me: si tu in sinistram, ego in dextram; vel si tu in dextram, ego in sinistram* (*Id. xiii, 8 et 9*). Hinc fortassis effecta est inter homines pacifica consuetudo, ut quando terrenorum aliquid partiendum est, major dividat, minor eligat (*a*).

CAPUT XXI. — *De tertia promissione Dei, qua terram Chanaan Abraham et semini ejus in perpetuum pollicetur.*

Cum ergo digressi essent, separatimque habitarent Abraham et Lot necessitate sustentandæ familiæ, non fœditate discordiæ, et Abraham in terra Chanaan, Lot autem esset in Sodomis, oraculo tertio Dominus

(a) Vide Senec., Excerpt. Contror. lib. 6, cap. 3

dixit ad Abraham : *Respiciens oculis tuis vide a loco in quo nunc tu es, ad Aquilonem, et Africum, et Orientem, et Mare; quia omnem terram quam tu vides, tibi dabo, et semini tuo usque in sæculum, et faciam semen tuum tanquam arenam terræ. Si potest aliquis dinumerare arenam terræ, et semen tuum dinumerabitur. Surgens perambulans terram in longitudinem ejus, et in latitudinem, quia tibi dabo eam* (Gen. xiii, 14-17). In hac promissione utrum sit etiam illa, qua pater factus est omnium gentium, non evidenter apparet. Potest enim videri ad hoc pertinere, *Et faciam semen tuum tanquam arenam terræ*: quod ea locutione dictum est, quam Græci vocant hyperbolen; quæ utique tropica est, non propria. Quo tamen modo, ut cæteris tropis uti solere Scripturam, nullus qui eam didicit, ambigit. Iste autem tropus, id est modus locutionis, fit quando id quod dicitur, longe est amplius, quam quod eo dicto significatur. Quis enim non videat, quam sit incomparabiliter amplior arenæ numerus, quam potest esse omnium hominum ab ipso Adam usque ad terminum sæculi? quanto ergo magis quam semen Abrahamæ; non solum quod pertinet ad Israeliticam gentem, verum etiam quod est, et futurum est, secundum imitationem fidei, toto orbe terrarum in omnibus gentibus? Quod semen, in comparatione multitudinis impiorum, profecto in paucis est. quamvis et ipsi pauci faciant innumerabilem multitudinem suam, quæ significata est secundum hyperbolen per arenam terræ. Sane ista multitudo quæ promittitur Abrahamæ, non Deo est innumerabilis, sed hominibus: Deo autem nec arena terræ. Proinde quia non tantum gens Israelitica, sed universum semen Abrahamæ, ubi est et promissio¹, non secundum carnem, sed secundum spiritum plurium filiorum, congruentius arenæ multitudini comparatur; potest hic intelligi utriusque rei facta promissio (a). Sed ideo diximus, quod non evidenter appareat, quia et illius gentis unius multitudo, quæ secundum carnem nata est ex Abraham per ejus nepotem Jacob, in tantum crevit, ut pene omnes partes orbis impleverit. Et ideo potuit et ipsa secundum hyperbolen arenæ multitudini comparari; quia et hæc sola innumera est homini. Terram certe illam solam significatam, quæ appellata est Chanaan, nemo ambigit. Sed quod dictum est, *Tibi dabo eam, et semini tuo usque in sæculum*; potest movere nonnullos, si usque in sæculum intelligant in æternum. Si autem in sæculum hoc loco sic accipiant, quemadmodum fideliter tenemus, initium futuri sæculi a fine præsentis ordiri, nihil eos movebit: quia etsi expulsi sunt Israelitæ de Jerosolymis, manent tamen in aliis civitatibus terræ Chanaan, et usque in finem manebunt; et universa terra illa cum a christianis inhabitatur, etiam ipsum semen est Abrahamæ.

CAPUT XXII. — *De superatis ab Abraham hostibus Sodomorum, quando et Lot de captivitate eripuit, et a Melchisedech sacerdote benedictus est.*

Hoc responso promissionis accepto migravit Abra-

¹ Sic Mss. At editi, ubi est expressa promissio.
(a) Conf. lib. 22 cont. Faust. Manich., cap. 83.

ham, et mansit in alio ejusdem terræ loco, id est juxta quercum Mambre, quæ erat Chebron (Gen. xiii, 18). Deinde ab hostibus qui Sodomis irruerant, cum quinque reges adversus quatuor bellum gererent, et victis Sodomitis etiam Lot captus esset, liberavit eum Abraham, adductis secum in prælium trecentis decem et octo vernaculis suis: et victoriam fecit regibus¹ Sodomorum, nihilque spoliatorum auferre voluit. cum rex cui vicerat obtulisset. Sed plane tunc benedictus est a Melchisedech, qui erat sacerdos Dei excelsi (Id. xiv, 1-20): de quo in Epistola quæ inscribitur ad Hebræos, quam plures apostoli Pauli esse dicunt, quidam vero negant, multa et magna conscripta sunt (Hebr. vii). Ibi quippe primum apparuit sacrificium, quod nunc a Christianis offertur Deo toto orbe terrarum, impleturque illud quod longe post hoc factum per prophetam dicitur ad Christum, qui fuerat adhuc venturus in carne: *Tu es sacerdos in æternum secundum ordinem Melchisedech* (Psal. cix, 4). Non scilicet secundum ordinem Aaron: qui ordo fuerat auferendus illucescentibus rebus, quæ illis umbris prænotabantur.

CAPUT XXIII. — *De verbo Domini ad Abraham, quod ei promittitur secundum multitudinem stellarum multiplicanda posteritas; quod credens justificatus est adhuc in præputio constitutus.*

Etiam tunc factum est verbum Domini ad Abraham in visu. Qui cum ei protectionem mercedemque promitteret valde multam; ille de posteritate sollicitus, quemdam Eliezer vernaculum suum futurum sibi hæredem dixit: continuoque illi promissus est hæres, non ille vernaculus, sed qui de ipso Abraham fuerat exiturus: rursusque semen innumerable, non sicut arena terræ, sed sicut stellæ cæli (Gen. xv, 1-5): ubi mihi magis videtur promissa posteritas cælesti felicitate sublimis. Nam quantum ad multitudinem pertinet, quid sunt stellæ cæli ad arenam terræ, nisi quis et istam comparisonem in tantum esse similem dicat, in quantum etiam stellæ dinumerari non valent? quia nec omnes eas videri posse credendum est. Nam quanto quisque acutius intuetur, tanto plures videt: unde et acerrime cernentibus aliquas occultas esse merito existimatur, exceptis eis sideribus quæ in alia parte orbis a nobis remotissima oriri et occidere prohibentur. Postremo quicumque universum stellarum numerum comprehendisse et conscripsisse jactantur, sicut Aratus vel Eudoxus, vel si qui alii sunt, eos libri hujus contemnit auctoritas. Hic sane illa sententia ponitur, cujus Apostolus meminit propter Dei gratiam commendandam, *Credidit Abraham Deo, et deputatum est illi ad justitiam* (Gen. xv, 6; Rom. iv, 5. et Galat. iii, 6): ne circumcisio gloriaretur, gentesque incircumcisas ad fidem Christi nollet admitti. Hoc enim quando factum est, ut credenti Abraham deputaretur fides ad justitiam, nondum fuerat circumcisus.

¹ Editi, de regibus. Abest, de, a manuscriptis et aesse debet: nam victoria in gratiam regum Sodomorum de hostibus eorum facta est.

CAPUT XXIV. — De significatione sacrificii, quod

Abraham offerre præceptus est, cum poposcisset ut de his quæ crediderat ¹, doceretur.

1. In eodem visu cum loqueretur ei Deus, etiam hoc ait ad illum: *Ego Deus qui te eduxi de regione Chaldæorum, ut dem tibi terram hanc, ut hæres sis ejus.* Ubi cum interrogasset Abraham secundum quid sciret, quod hæres ejus erit, dixit illi Deus: *Accipe mihi juvencam trimam, et capram trimam, et arietem trimum, et turturem, et columbam. Accepti autem illi ² hæc omnia, et divisit illa media, et posuit ea contra faciem alterum alteri: aves autem non divisit. Et descenderunt, sicut scriptum est, aves supra corpora quæ divisa erant, et consedit illis Abram. Circa solis autem occasum pavor irruit super Abram, et ecce timor tenebrosus magnus incidit ei: et dictum est ad Abram, *Sciendo scies, quia peregrinum erit semen tuum in terra non propria, et in servitute redigent eos, et affligent eos quadringentis annis; gentem autem cui servierint, judicabo ego. Post hæc vero exibit huc cum supplicetilli multa. Tu autem ibis ad patres tuos cum pace nutritus (a) in senecta bona. Quarta vero generatione convertent se huc. Nondum enim impleta sunt peccata Amorrhæorum usque adhuc. Cum autem jam sol erat ad occasum, facta est flamma, et ecce fornax fumabunda, et lampades ignis, quæ pertransierunt per media divisa illa. In die illa disposuit Dominus Deus testamentum ad Abram, dicens: Semini tuo dabo terram hanc, a flumine Ægypti usque ad flumen magnum Euphratem, Cenæos, et Cenæos, et Cedmonæos, et Chetæos, et Pheræos, et Raphaim, et Amorrhæos, et Chananæos, et Evas, et Gergesæos, et Jebusæos.**

2. Hæc omnia in visu facta divinitus atque dicta sunt, de quibus singulis enucleate disserere longum est, et intentionem operis hujus excedit. Quod ergo satis est, nosse debemus: posteaquam dictum est, credidisse Abraham Deo, et deputatum esse illi ad justitiam, non eum in fide defecisse, ut diceret, *Dominator Domine, secundum quid sciam quia hæres ejus ero (Gen. xv, 7-21)?* terræ quippe illius promissa erat hæreditas. Non enim ait, *Unde sciam*, quasi adhuc non crederet: sed ait, *Secundum quid sciam*, ut ei rei quam crediderat, aliqua similitudo adhiberetur, qua ejus modus agnosceretur. Sicut non est virginis Mariæ diffidentia, quod ait, *Quomodo fiet istud, quoniam virum non cognosco?* Quod enim futurum esse certa erat, modum quo fieret inquirebat (b). Et hoc cum quæsisset, audivit, *Spiritus sanctus superveniet in te, et virtus Altissimi obumbrabit tibi ³ (Luc. 1, 34, 35).* Denique et hic similitudo data est de animalibus, juvencæ, capra et ariete, et duabus volucribus, turture et columba: ut secundum hæc futu-

¹ Sic Mss. At editi, *crederet.*

² Editi, *ille.* At Mss., *illi*: juxta græcum LXX, *autò.*

³ Nostri omnes codices omittunt verba, *Spiritus sanctus superveniet in te, et virtus Altissimi obumbrabit tibi.* M.

(a) Septuaginta Interpretes in antiquis codicibus habent, *t'aphets, ntrutus*: altamen in Complutensi *taphets, sepultus.*

(b) Hoc s. Virginis exemplo in eadem re utitur Ambrosius, libro 2 de Abraham patriarcha, cap. 8. Ubi plura cum hoc capite conferri possunt. COQUÆUS.

rum sciret, quod futurum esse jam non ambigeret. Sive ergo per juvencam significata sit plebs posita sub jugo legis, per capram eadem plebs peccatrix futura, per arietem eadem plebs etiam regnatura (quæ animalia propterea trima dicuntur, quia cum sint insignes articuli temporum ab Adam usque ad Noe, et inde usque ad Abraham, et inde usque ad David, qui reprobo Saûle primus in regno gentis Israëliticæ est Domini voluntate fundatus; in hoc ordine tertio, qui tenditur ex Abraham usque ad David, tanquam tertiam ætatem gerens ille populus adolevit); sive aliquid aliud convenientius ista significant; nullo tamen modo dubitaverim, spirituales in ea præfiguratos additamento turturis et columbæ. Et ideo dictum est, *Aves autem non divisit*: quoniam carnales inter se dividuntur, spirituales autem nullo modo; sive a negotiosis conversationibus hominum se removeant, sicut turtur; sive inter illas degant, sicut columba: utraque tamen avis est simplex et innoxia; significans et in ipso Israëliticò populo, cui terra illa danda erat, futuros individuos filios promissionis et hæredes regni in æterna felicitate mansuri ¹. Aves autem descendentes super corpora quæ divisa erant, non boni aliquid, sed spiritus indicant aeris hujus, pastum quemdam suum de carnalium divisione querentes. Quod autem illis consedit Abraham, significat etiam inter illas carnalium divisiones ² veros usque in finem perseveraturos fideles. Et circa solis occasum quod pavor irruit in Abraham, et timor tenebrosus magnus, significat circa hujus seculi finem magnam perturbationem ac tribulationem futuram deliquitum: de qua Dominus dixit in Evangelio, *Erit enim tunc tribulatio magna, qualis non fuit ab initio (Matth. xxiv, 21).*

3. Quod vero dictum est ad Abraham, *Sciendo scies quia peregrinum erit semen tuum in terra non propria, et in servitute redigent eos, et affligent eos quadringentis annis*; de populo Israel, qui fuerat in Ægypto serviturus, apertissime prophetatum est. Non quod in eadem servitute sub Ægyptiis affligentibus quadringentos annos ille populus fuerat peracturus; sed in ipsis quadringentis annis prænuntiatum est hoc futurum. Quæ admodum enim scriptum est de Thara patre Abraham, *Et fuerunt dies Tharæ in Charra quinque et ducenti anni (Gen. xi, 32)*; non quia ibi omnes acti sunt, sed quia ibi completi sunt: ita et hic propterea interpositum est, *Et in servitute redigent eos, et affligent eos quadringentis annis*; quoniam iste numerus in eadem afflictione completus est, non quia ibi universus peractus est. Quadringenti sane dicuntur anni propter numeri plenitudinem, quamvis aliquanto amplius sint; sive ex hoc tempore computentur, quo ista promittebantur Abraham, sive ex quo natus est Isaac, propter semen Abraham, de quo ista prædicuntur. Computantur enim, sicut superius jam diximus, ab anno septuagesimo et quinto Abraham, quando ad eum

¹ Sic Mss. Editi vero, *mansuros.*

² Vind. Am. et Er. post, *carnalium divisiones*, addunt, *spirituales esse nonnullos.* Id non habent Mss., sed plerique pro, *veros, serunt, viros.*

facta est prima promissio, usque ad exitum Israel ex Ægypto, quadringenti et triginta anni: quorum Apostolus ita meminit: *Hoc autem dico, inquit, testamentum confirmatum a Deo, quæ post quadringentos et triginta annos facta est lex, non infirmat ad evacuatam promissionem* (Galat. iii, 17). Jam ergo isti quadringenti et triginta anni, quadringenti poterant nuncupari, quia non sunt multo amplius: quanto magis cum aliquot jam ex isto numero præterissent, quando illa in visu demonstrata et dicta sunt Abrahæ; vel quando Isaac natus est centenario patri suo, a prima promissione post viginti et quinque annos, cum jam ex istis quadringentis triginta quadringenti et quinque remanerent, quos Deus quadringentos voluit nominare, et cætera quæ sequuntur in verbis prænantiantis Dei, nullas dubitaverit ad Israeliticum populum pertinere (a).

4. Quod vero adjungitur, *Cum autem jam sol erat ad occasum, flamma facta est, et ecce fornax sumabunda, et lampades ignis, quæ pertransierunt per media divisa illa; significat jam in fine sæculi per ignem judicandos esse carnales*. Sicut enim afflictio civitatis Dei, qualis antea nunquam fuit, quæ sub Antichristo futura speratur, significatur tenebroso timore Abrahæ circa solis occasum, id est, propinquante jam fine sæculi: sic ad solis occasum, id est, ad ipsum jam finem¹, significatur isto igne dies judicii dirimens carnales per ignem salvandos, et in igne damnandos. Deinde testamentum factum ad Abraham, terram Chanaan propriè manifestat, et nominat in ea undecim gentes a flumine Ægypti usque ad flumen magnum Euphratem. Non ergo a flumine magno Ægypti, hoc est Nilo; sed a parvo, quod dividit inter Ægyptum et Palestinam, ubi est civitas Rhinocorura (b).

CAPUT XXV. — *De Agar ancilla Sarre. quam eadem Sarra Abraham voluit esse concubinam.*

Jam hinc tempora consequuntur filiorum Abrahæ, unius de Agar ancilla, alterius de Sarra libera, de quibus in libro superiore jam diximus (cap. 3). Quod solum attinet ad rem gestam, nullo modo est inurendum de hac concubina crimen Abrahæ (c). Usus est ea quippe ad generandam prolem, non ad explendam libidinem; nec insultans, sed potius obediens conjugii, quæ suæ sterilitatis credidit esse solatium, si secundum ancillæ uterum, quoniam natura non poterat, voluntate faceret sumum, et eo jure quo dicit Apostolus, *Similiter et vir non habet potestatem corporis sui, seu mulier* (I Cor. vii, 4), uteretur mulier ad pariendum ex altera, quod non poterat ex se ipsa. Nulla est hic cupiditas lascivæ, nulla nequitie turpitudine. Ab uxore causa prolis ancilla marito traditur, a marito causa prolis accipitur: ab utroque non culpæ luxus, sed naturæ fructus exquiritur. Denique cum ancilla gravida, domina² sterili, superbiret, et hoc Sarra

suspicione muliebri viro potius imputaret, etiam illi demonstravit Abraham non se amatorem servum, sed liberum fuisse genitorem, et in Agar Sarre conjugii pudicitiam custodisse; nec voluptatem suam, sed voluntatem illius implevisse: accepisse, nec petivisse; accessisse, nec hæsisse; seminasse, nec amasse. Ait enim: *Ecce ancilla tua in manibus tuis, utere ea quomodo tibi placuerit* (Gen. xvi, 6). O virum viriliter utentem feminis, conjugè temperanter, ancilla obtinenteranter, nulla intemperanter!

CAPUT XXVI. — *De testificatione Dei ad Abraham, qua eidem seni de sterili Sarra filium spondet, patremque eum gentium statuit, et promissi fidem sacramento circumcisionis obsignat.*

1. Post hæc est natus Ismael ex Agar, in quo putare posset impletum, quod ei promissum fuerat, cum sibi vernaculum suum adoptare voluisset, dicente Deo, *Non erit hæres tuus hic; sed qui exiet de te, ille erit hæres tuus* (Gen. xv, 4). Hoc ergo promissum ne in ancillæ filio putaret impletum, jam cum esset annorum nonaginta et novem, apparuit ei Dominus, et dixit illi: *Ego sum Deus, place in conspectu meo, et esto sine querela, et ponam testamentum meum inter me et inter te, et implebo te valde. Et prociidit Abram in faciem suam. Et locutus est illi Deus, dicens: Et ego, ecco testamentum meum tecum; et eris pater multitudinis gentium: et non appellabitur adhuc nomen tuum Abram, sed erit nomen tuum Abraham; quia patrem multarum gentium posui te: et augebo te valde, et ponam te in gentes, et reges ex te exibunt: statuam testamentum meum inter me et inter te, et inter semen tuum post te in generationes eorum in testamentum æternum, ut sim tibi Deus, et semini tuo post te. Et dabo tibi et semini tuo post te terram, in qua incola es, omnem terram Chanaan in possessionem æternam, et ero illis Deus. Et dixit Deus ad Abraham: Tu autem testamentum meum conservabis, tu et semen tuum post te in progenies suas. Et hoc est testamentum quod conservabis inter me et vos, et inter semen tuum post te in generationes suas. Circumcidetur vestrum omne masculinum, et circumcidemini carnem præputii vestri: et erit in signum testamenti inter me et vos. Et puer octo dierum circumcidetur, vestrum omne masculinum in progenies vestras. Vernaculus et emptitius ab omni filio alienigena, qui non est de semine tuo, circumcisione circumcidetur: vernaculus domus tuæ et emptitius. Et erit testamentum meum in carne vestra in testamentum æternum. Et qui non fuerit circumcisus, masculus qui non circumcidetur carnem præputii sui octavo die, interibit*

¹ sic manuscripti juxta Septuaginta. At Vind. Am. Er., *Ecce ego, et ecce testamentum*. Lov., *Et ecce ego, testamentum*.

² Mss. constanter habent, *augeam*.

³ Sic nostri omnes manuscripti. In B. deest, *tu*, et pro, *in progenies*, legitur, *in generationes*. M.

⁴ Editi, *testamentum meum*. Abest, *meum*, a Mss. et a LXX.

⁵ Ita manuscripti juxta græcum Septuaginta. At editi, *in carne*.

⁶ In manuscriptis, *alieno*. Apud Septuaginta, *allotriem*.

⁷ Editio Lov., *Et masculus qui non fuerit circumcisus carne præputii*, etc. Castigatur auctoritate manusccriptorum qui nihil hic dissentiunt a Septuaginta. At Vind. et Am. in

¹ Vind. Am. et Er., *finem sæculi*.

² Sic probæ notæ codex Corb. Alii manuscripti cum editis, *domina*.

(a) Conf. Quæst. in Exod., q. 47.

(b) Conf. Quæst. in Josue, q. 21.

(c) Quod quidem faciebat Faustus Manichæus. Vid. lib. 22 contra ipsum, cap. 30.

anima illa de genere ejus; quia testamentum meum dissipavit. Et dixit Deus ad Abraham: Sara uxor tua, non appellabitur nomen ejus Sara, sed Sarra erit nomen ejus¹. Benedicam autem illam, et dabo tibi ex ea filium: et benedicam illum; et erit in nationes, et reges gentium ex eo erunt. Et procidit Abraham super faciem suam; et risit, et dixit in animo suo, dicens: Si mihi centum annos habenti nascetur filius, et si Sarra annorum nonaginta pariet? Dixit autem Abraham ad Deum: Ismael hic vivat in conspectu tuo. Dixit autem Deus ad Abraham: Ita, ecce Sarra uxor tua pariet tibi filium, et vocabis nomen ejus Isaac: et statuam testamentum meum ad illum in testamentum æternum, esse illi Deus², et semini ejus post illum. De Ismael autem ecce exaudivi te³: ecce benedixi eum, et ampliato⁴ illum, et multiplicabo illum valde⁵. Duodecim gentes generabit: et dabo illum in gentem magnam. Testamentum autem meum statuam ad Isaac, quem pariet tibi Sarra in tempore hoc ad annum sequentem (Gen. xvii, 1-21).

2. Hic apertiora promissa sunt de vocatione Gentium in Isaac, id est, in filio promissionis, quo significatur gratia, non natura: quia de sene et aну sterili promittitur filius. Quamvis enim et naturalem procreationis excursus Deus operetur: ubi tamen evidens opus Dei est, vitata et cessante natura, ibi evidentius intelligitur gratia. Et quia hoc non per generationem, sed per regenerationem futurum erat, ideo nunc imperata est circumcisio, quando de Sarra promissus est filius. Et quod omnes, non solum filios, verum etiam servos vernaculos et emptitios circumcidi jubet, ad omnes istam gratiam pertinere testatur. Quid enim aliud circumcisio significat, quam vetustate exuta naturam renovatam (a)? et quid aliud quam Christum octavus dies, qui hebdomada completa, hoc est post sabbatum, resurrexit (b)? Parentum mutantur et nomina, omnia resonant novitatem, et in Testamento vetere obumbratur novum. Quid est enim quod dicitur Testamentum vetus, nisi occultatio novi? et quid est aliud quod dicitur novum, nisi veteris revelatio? Risus Abraham, exultatio est gratulantis, non irrisio diffidentis. Verba quoque ejus illa in animo suo, Si mihi centum annos habenti nascetur filius, et si Sarra annorum nonaginta pariet? non sunt dubitantis, sed admirantis. Si quem vero movet quod dicitur est, Et dabo tibi et semini tuo post te terram, in qua tu incola es, omnem terram Chanaan in possessionem æternam; quomodo accipiatur impletum,

eo non consentiunt, quod loco, qui non circumcidetur, habent, qui non circumcidet. Er., si non circumcidetur carne præputii.

¹ Ita manuscripti secundum Septuaginta. Editi autem, Sarai uxor tua, non appellabitur nomen ejus Sarai (vel, ultra Sarai), sed Sarra erit nomen ejus.

² Lov., et ero illi Deus. Er., et sim illi Deus. Melius vind. et Am., ut sim illi Deus. Attamen manuscripti habeant, esse illi Deus. Græcum Septuaginta, εἶμαι αὐτὸ Θεός.

³ Editi, audivi te. At Mss., exaudivi te: quod respondet græco, ἐπέκουσα σου.

⁴ Sic Mss. At editi, amplificabo.

⁵ Nostri Mss., et multiplicabo eum valde. Et paulo post, et dabo illum in magnam gentem.

(a) Conf. lib. cont. Faust. Manich., cap. 29.

(b) Conf. lib. de Peccat. Orig., n. 30.

sive adhuc expectetur implendum, cum possessio quæcumque terrena æterna cuilibet genti esse non possit: sciat æternam a nostris interpretari, quod Græci appellant αἰώνιον quod a sæculo derivatum est: αἰὼς quippe græce sæculum nuncupatur. Sed non sunt ausi Latini hoc dicere sæculare, ne longe in aliud mitterent sensum. Sæcularia quippe dicuntur multa, quæ in hoc sæculo sic aguntur, ut brevi etiam tempore transeant: αἰώνιον autem: quod dicitur, aut non habet finem, aut usque in hujus sæculi tenditur finem.

CAPUT XXVII. — De masculino, qui si octavo die non fuerit circumcisus, perit anima ejus, quia testamentum Dei dissipavit.

Item potest movere, quomodo intelligi oporteat quod hic dictum est, Masculus qui non circumcidetur carnem præputii sui octavo die, interibit anima illa de genere ejus, quia testamentum meum dissipavit: cum hæc nulla culpa sit parvuli, cujus dixit animam perituram; nec ipse dissipaverit testamentum Dei, sed majores qui eum circumcidere non curarunt: nisi quia etiam parvuli, non secundum suæ vitæ proprietatem, sed secundum communem generis humani originem, omnes in illo uno testamentum Dei dissipaverunt, in quo omnes peccaverunt (Rom. v. 12). Multa quippe appellantur testamenta Dei, exceptis illis duobus magnis, vetere et novo, quod licet cuique legendo cognoscere. Testamentum autem primum, quod factum est ad hominem primum, profecto illud est: Qua die ederitis, morte moriemini (Gen. ii, 17). Unde scriptum est in libro, qui Ecclesiasticus appellatur, Omnis caro sicut vestis veterascit. Testamentum enim a sæculo, Morte morieris¹ (Eccli. xiv, 18, sec. LXX). Cum enim lex evidentiore postea data sit, et dicat Apostolus, Ubi autem non est lex, nec prævaricatio (Rom. iv, 15): quo pacto quod legitur in Psalmo verum est, Prævaricatores æstimavi omnes peccatores terræ (Psal. cxviii, 119); nisi quia omnes legis alicujus prævaricate sunt rei, qui aliquo peccato tenentur obstricti? Quamobrem si etiam parvuli, quod vera fides habet, nascuntur non proprie, sed originaliter peccatores, unde illis gratiam remissionis peccatorum necessariam confitemur; profecto eo modo quo sunt peccatores, etiam prævaricatores legis illius, quæ in paradiso data est, agnoscuntur; ut verum sit utrumque, quod scriptum est, et, Prævaricatores æstimavi omnes peccatores terræ; et, Ubi lex non est; nec prævaricatio. Ac per hoc, quia circumcisio signum regenerationis fuit, et² non immerito parvulum propter originale peccatum, quo primum Dei dissipatum est testamentum, generatio disperdet, nisi regeneratio liberet: sic intelligenda sunt hæc divina verba, tanquam dictum sit, Qui non fuerit regeneratus, interibit anima illa de populo

¹ Editi, Testamentum est a sæculo, morte morietur, qui transgreditur præcepta Dei. Locus veterum librorum οὐκ liberatur a glossemate, et redintegratur. Sumpit est ex Ecclesiastico, xiv, 18, apud Septuaginta. In vulgata vero jungitur versiculo duodecimo, et exhibetur sic: Testam. n. tum hujus mundi, morte morietur.

² Particula, et, desideratur in excusis.

ejus, quia testamentum dei dissipavit¹, quando in Adam eum omnibus etiam ipse peccavit. Si enim dixisset, Quia hoc testamentum meum dissipavit; non nisi de ista circumcissione intelligi cogeret: nunc vero, quoniam non expressit cujusmodi testamentum parvulus dissipaverit, liberum est intelligere de illo testamento dictum, cujus dissipatio pertinere possit ad parvulum. Si autem quisquam hoc non nisi de ista circumcissione dictum esse contendit, quod in ea testamentum Dei, quoniam non est circumcissus, dissipaverit parvulus; quærat locutionis aliquem modum, quo non absurde possit intelligi, ideo dissipasse testamentum, quia licet non ab illo, tamen in illo est dissipatum. Verum sic quoque animadvertendum est, nulla in se negligentia sua injuste² interire incircumcisi animam parvuli, nisi originalis obligatione peccati.

CAPUT XXVIII. — De commutatione nominum Abrahamæ et Sarræ, qui cum ob unius sterilitatem, ob utriusque autem senectutem generare non possent, manus fecunditatis indepti sunt.

Facta igitur promissione tam magna tamque dilucida ad Abraham, cui evidentissime dictum est, *Patrem multarum gentium posui te; et augebo te valde, et ponam te in gentes, et reges exibunt ex te: et dabo tibi ex Sarra filium; et benedicam illum, et erit in nationes, et reges gentium ex eo erunt*: quam promissionem nunc in Christo cernimus reddi: ex illo deinceps illi conjuges non vocantur in Scripturis, sicut antea vocabantur, Abram et Sara; sed sicut nos eos ab initio vocavimus, quoniam sic jam vocantur ab omnibus, Abraham et Sarra. Cur autem mutatum sit nomen Abrahamæ, reddita est ratio: *Quia patrem, inquit, multarum gentium posui te*. Hoc ergo significare intelligendum est Abraham: Abram vero, quod ante vocabatur, interpretatur Pater excelsus. De nomine autem mutato Sarræ non est reddita ratio: sed, sicut aiunt, qui scripserunt interpretationes nominum hebræorum, quæ his sacris litteris continentur, Sara interpretatur Princeps mea; Sarra autem Virtus. Unde scriptum est in Epistola ad Hebræos: *Fide et ipsa Sarra virtutem accepit ad emissionem³ seminis* (*Hebr.* xi, 11). Ambo autem seniores⁴ erant, sicut Scriptura testatur: sed illa etiam sterilis, et cruore menstruo jam destituta; propter quod iam parere non posset, etiamsi sterilis non fuisset. Porro si femina ita sit provectoris ætatis, ut ei solita mulierum adhuc fluant, de juvene parere potest, de seniore non potest: quamvis adhuc possit ille senior, sed de adolescentula gignere: sicut Abraham post mortem Sarræ de Cethura potuit, quia vividam ejus invenit ætatem. Hoc ergo est quod mirum commendat Apostolus, et ad hoc dicit Abrahamæ jam fuisse corpus mortuum (*Rom.* iv, 19): quoniam non ex omni fe-

mina, cui esset adhuc aliud pariendi tempus extremum, generare ipse in illa ætate adhuc posset. Ad aliquid enim emortuum corpus intelligere debemus, non ad omnia. Nam si ad omnia, non jam senectus vivi, sed cadaver est mortui. Quamvis etiam sic solvi soleat ista quæstio, quod de Cethura postea genuit Abraham, quia gignendi donum, quod a Domino accepit, etiam post obitum mansit uxoris. Sed propterea mihi videtur illa, quam secuti sumus, hujus quæstionis solutio præferenda, quia centenarius quidem senex, sed temporis nostri, de nulla potest femina gignere; non tunc, quando adhuc tam diu vivebant, ut centum anni nondum facerent hominem decrepitæ senectutis.

CAPUT XXIX. — De tribus viris vel angelis, in quibus ad quercum Mambre apparuisse Abrahamæ Dominus indicatur.

Item Deus apparuit Abrahamæ ad quercum Mambre in tribus viris, quos dubitandum non est Angelos fuisse; quamvis quidam existiment unum in eis fuisse Dominum Christum, asserentes eum etiam ante indumentum carnis fuisse visibilem (a). Est quidem divinæ potestatis, et invisibilis, incorporalis incommutabilisque naturæ, sine ulla sui mutatione etiam mortalibus aspectibus apparere, non per id quod est, sed per aliquid quod sibi subditum est. Quid autem illi subditum non est? Verumtamen si propterea confirmant horum trium aliquem fuisse Christum, quia cum tres vidisset, ad Dominum singulariter est locutus: sic enim scriptum est, *Et ecce tres viri stabant super eum, et videns procucurrit obviam illis ab ostio tabernaculi sui, et adoravit super terram, et dixit: Domine, si inveni gratiam ante te* (*Gen.* xviii, 1-5), et cætera: cur non etiam illud advertunt, duos ex eis venisse, ut Sodomitæ delerentur, cum adhuc Abraham ad unum loqueretur, Dominum appellans, et intercedens ne simul justum cum impio in Sodomis perderet? Illos autem duos sic suscepit Lot, ut etiam ipse in colloquio cum illis suo singulariter Dominum appellaret¹. Nam cum eis pluraliter dixisset, *Ecce, domini, declinate in domum pueri vestri*, et cætera quæ ibi dicuntur: postea tamen ita legitur, *Et tenuerunt Angeli manum ejus, et manum uxoris ejus, et manus duarum filiarum ejus, in eo quod parceret Dominus ipsi. Et factum est, mox ut eduxerunt illum foras, et dixerunt: Salvam fac animam tuam, ne respexeris retro, nec steteris in tota regione: in monte salvum te fac, ne quando comprehendaris. Dixit autem Lot ad illos: Oro,*

¹ Sola editio Lov., in colloquio suo cum illis duos singulariter Dominum appellaret.

² Particula, in, deest in editis: sed habetur in omnibus manuscriptis juxta Septuaginta.

(a) Ita docuerunt Tertullianus, libri de Carne Christi capite 6, Contra Judæos, cap. 9, Contra Marcionem, lib. 2, cap. 27, et lib. 3, cap. 9, alibi; Ireneus, libro 3, cap. 6, et libro 4, cap. 26; Clemens Romanus, Constitutionum Apostolicarum capite 21; Justinus Martyr, in Dialogo contra Tryphonem; Eusebius, Historiæ Ecclesiasticæ libro 1, cap. 2. Probabilior tamen est sententia Augustini, quam etiam profertur in libro 2 de Trinitate, n. 21, et in libro 2 contra Maximinum, cap. 26, nn. 5 et 6; cui denique consentit Ambrosius, libro 1 de Abraham, cap. 5. COCCEUS.

¹ Am. Er. et Lov., quia testamentum meum dissipavit. At Vind. et Mss., quia testamentum Dei dissipavit.

² Vind. Am. Er. et nonnulli Mss., juste.

³ Navarræus Ms., in conceptionem; dissentientibus cæteris libris. Græce est, eis catabolên.

⁴ Sic Mss. Editi autem, senes.

Domine, quia invenit puer tuus misericordiam ante te, et quæ sequuntur. Deinde post hæc verba singulariter illi respondit et Dominus, cum in duobus Angelis esset, dicens, *Ecce miratus sum¹ faciem tuam* (*Gen. xix, 2-21*), et cætera. Unde multo est credibilis, quod et Abraham in tribus et Lot in duobus viris Dominum agnoscebant, cui per singularem numerum loquebantur, etiam cum eos homines esse arbitrantur: neque enim aliam ob causam sic eos susceperunt, ut tanquam mortalibus et humana refectione indigentibus ministrarent: sed erat profecto aliquid, quo ita excellebant, licet tanquam homines, ut in eis esse Dominum, sicut esse assolet in Prophetis, hi qui hospitalitatem illis exhibebant, dubitare non possent; atque ideo et ipsos aliquando pluraliter, et in eis Dominum aliquando singulariter appellabant². Angelos autem fuisse Scriptura testatur, non solum in hoc Genesis libro, ubi hæc gesta narrantur; verum etiam in Epistola ad Hebræos, ubi, cum hospitalitas laudaretur, *Per hanc, inquit, etiam quidam nescientes hospitio receperunt Angelos* (*Hebr. xiii, 2*). Per illos igitur tres viros, cum rursus filius Isaac de Sarra promitteretur Abraham, divinum datum est etiam tale responsum, ut diceretur, *Abraham erit in gentem³ magnam et multam, et benedicentur in eo omnes gentes terræ* (*Gen. xviii, 18*). Et hic duo illa brevissime plenissimeque promissa sunt, gens Israel secundum carnem, et omnes gentes secundum fidem.

CAPUT XXX. — De Lot a Sodomis liberato, atque eidem cælesti igne consumptis; et de Abimelech; cuius concupiscentia castitati Sarra nocere non potuit.

Post hanc promissionem liberato de Sodomis Lot, et veniente igneo imbore de cælo, tota illa regio impiæ civitatis in cinerem versa est, ubi supra in masculos in tantam consuetudinem convaluerant, quantam leges solent aliorum factorum præbere licentiam (a). Verum et hoc eorum supplicium specimen futuri iudicii divini fuit. Nam quo pertinet quod prohibiti sunt qui liberabantur ab Angelis retro respicere, nisi quia non est animo redeundum ad veterem vitam, qua per gratiam regeneratus exiit, si ultimum evadere iudicium cogitamus? Denique uxor Lot, ubi respexit, remansit; et in salem conversa (*Gen. xix*) hominibus fidelibus quoddam præstitit condimentum, quo sapiant aliquid, unde illud caveatur exemplum. Inde rursus Abraham fecit in Geraris apud regem civitatis illius Abimelech, quod in Ægypto de conjugate fecerat, eique intacta similiter reddita est. Ubi sane Abraham obijurganti regi cur tacuisset uxorem, sororemque dixisset, aperiens quid timuerit, etiam hoc addidit: *Et enim vere soror mea est de patre, sed non de matre* (*Gen.*

¹ Editi, *miseratus sum*. Verius Mss., *miratus sum*: nam græce est apud LXX, *ethaumas*, quod licet forte sonat, *reverti, reveritus sum*.

² Sic Mss. Editi vero, *et ipsos aliquando pluraliter ut dominos, aliquando singulariter ut in eis dominum appellabant*.

³ *Lox.*, ut diceretur ad Abraham, *Erit in gentem magnam et multam*. Editi alii et manuscripti consentiunt cum Septuaginta.

(a) Conf. supra, lib. 14, cap. 18, initio.

xx, 2): quia de patre suo soror erat Abraham, de quo propinqua ejus erat. Tantæ autem pulchritudinis fuit, ut etiam in illa ætate posset adamari.

CAPUT XXXI. — De Isaac secundum promissionem nato, cui nomen ex risu utriusque parentis est inditum.

Post hæc natus est Abraham, secundum promissionem Dei, de Sarra filius, eumque nominavit Isaac, quod interpretatur Risus. Riserat enim et pater, quando ei promissus est, admirans in gaudio: riserat et mater, quando per illos tres viros iterum promissus est, dubitans in gaudio; quamvis exprobrante angelo quod risus ille, etiamsi gaudii fuit, tamen plenæ fidei non fuit (*Gen. xviii, 12-15*). Post ab eodem angelo in fide etiam confirmata est. Ex hoc ergo puer nomen accepit. Nam quod risus ille non ad irridendum opprobrium, sed ad celebrandum gaudium pertinebat, nato Isaac, et eo nomine vocato, Sarra monstravit; ait quippe, *Risus mihi fecit Dominus; quicumque enim audierit, congaudebit mihi* (*Id. xxi, 6*). Sed post aliquantulum tempus ancilla de domo ejicitur cum filio suo, et duo illa secundum Apostolum Testamenta significantur, vetus et novum: ubi Sarra illa¹ supernæ Jerusalem, hoc est civitatis Dei, figuram gerit (*Galat. iv, 26*).

CAPUT XXXII. — De obedientia et fide Abraham, qua per oblationem immolandi filii probatus est, et de morte Sarra.

1. Inter hæc, quæ omnia commemorare nimis longum est, tentatur Abraham de immolando dilectissimo filio ipso Isaac, ut pia ejus obedientia probaretur, sæculis in notitiam proferenda, non Deo. Neque enim omnis est culpanda tentatio: quia et gratulanda est, qua fit probatio (a). Et plerumque aliter animus humanus sibi ipsi innotescere non potest, nisi vires suas sibi, non verbo, sed experimento, tentatione quodammodo interrogante, respondeat: ubi si Dei munus agnoverit, tunc pius est, tunc soliditate firmitate gratiæ, non inflatur inanitate jactantiæ. Nunquam sane crederet Abraham, quod victimis Deus delectaretur humanis: quamvis, divino intonante præcepto, obediendum sit, non disputandum. Verumtamen Abraham confestim filium, cum fuisset immolatus, resurrecturum credidisse laudandus est. Dixerat namque illi Deus, cum de ancilla et filio ejus foras ejiciendis voluntatem conjugis nollet implere: *In Isaac vocabitur tibi semen*. Et certe ibi sequitur ac dicitur, *Filium autem ancillæ hujus in magnam gentem faciam illum²; quia semen tuum est* (*Gen. xxi, 12, 13*). Quomodo ergo dictum est, *In Isaac vocabitur tibi semen*, cum et Ismaelem Deus semen ejus vocaverit? Exponens autem Apostolus, quid sit, *In Isaac voca-*

¹ Sic Mss. Editi autem, *illius*.

² In editis omittitur, *illum*. Habetur tamen in manuscriptis et apud Septuaginta.

(a) Quod explicat in Quæstionibus in Genesim, quæst. 57, et in Exodum, quæst. 88. Ambrosius, de Abraham patriarcha, lib. 4, cap. 8: « Aliter Deus tentat, aliter diabolus: diabolus tentat, ut subruat; Deus tentat, ut coronet. » *Coquæus*.

bitur tibi semen: Id est, inquit, non qui filii carnis, hi filii Dei; sed filii promissionis deputantur in semine¹. (Rom. ix, 8). Ac per hoc filii promissionis, ut sint semen Abrahæ, in Isaac vocantur, hoc est, in Christum² vocante gratia congregantur. Hanc ergo promissionem pater pius fideliter tenens, quia per hunc oportebat impleri, quem Deus jubebat occidi, non hæsitavit quod sibi reddi poterat immolatus, qui dari potuit non speratus. Sic intellectum est et in Epistola ad Hebræos, et sic expositum. Fide, inquit, præcessit Abraham, in Isaac³ tentatus; et unicum obtulit, qui promissionis suscepit, ad quem dictum est, In Isaac vocabitur tibi semen: cogitans quia et ex mortuis excitare potest Deus. Proinde addidit, Pro hoc etiam eum et in similitudinem adduxit (Hebr. xi, 17-19). Cujus similitudinem, nisi illius de quo dicit idem Apostolus, Qui proprio Filio non pepercit, sed pro nobis omnibus tradidit illum (Rom. viii, 32)? Propterea et Isaac, sicut Dominus, crucem suam, ita sibi ligna ad victimæ locum, quibus fuerat imponendus, ipse portavit. Postremo quia Isaac occidi non oportebat, posteaquam est pater ferire prohibitus, quis erat ille aries, quo immolato impletum est significativo sanguine sacrificium? Nempe quando eum vidit Abraham, cornibus in frutice tenebatur. Quis ergo illo figurabatur, nisi Jesus, antequam immolaretur, spinis Judaicis coronatus?

2. Sed divina per Angelum verba potius audiamus. Ait quippe Scriptura: Et extendit Abraham manum suam sumere machæram, ut occideret filium suum. Et vocavit illum Angelus Domini de cælo, et dixit: Abraham! Ille autem dixit: Ecce ego. Et dixit: Non injicias manum tuam super puerum, neque facias illi quidquam: nunc enim scivi quia times Deum tu⁴, et non pepercisti filio tuo dilecto propter me. Nunc scivi, dictum est, nunc sciri feci: neque enim hoc nondum sciebat Deus. Deinde ariete illo immolato pro Isaac filio suo, vocavit, ut legitur, Abraham nomen loci illius, Dominus vidit: ut dicant hodie, In monte Dominus apparuit. Sicut dictum est, Nunc scivi, pro eo quod est, Nunc sciri feci: ita hic, Dominus vidit; pro eo quod est, Dominus apparuit; hoc est, Videri se fecit. Et vocavit Angelus Domini Abraham secundo de cælo, dicens: Per memetipsum juravi, dicit Dominus, propter quod fecisti verbum hoc, et non pepercisti filio tuo dilecto propter me, nisi benedicens benedicam te, et multiplicans multiplicabo semen tuum, sicut stellas cæli, et tanquam arenam quæ est juxta labium maris. Et hereditate possidebit semen tuum civitates adversariorum⁵; et benedicentur in semine tuo omnes gentes terræ; quia obaudisti vocem meam (Gen. xxii, 10-18). Hoc modo est illa de vocatione gentium in semine

¹ Er. Lov., filii repromissionis deputantur in semen; dis-sentientibus editis aliis et manuscriptis.

² Sola editio Lov., in Christo.

³ Nonnulli Mss., Fide, inquit, obtulit Abraham Isaac. — Mss. 2030, 2031 et 2033 legunt, Fide autem non pepercit Abraham Isaac. M.

⁴ Editi, Deum tuum. Melius Mss. Juxta Septuaginta, Deum tu.

⁵ Editi addunt, suorum: quod a manuscriptis et a Septuaginta abest.

Abrahæ, post holocaustum, quo significatus est Christus, etiam juratione Dei firmata promissio. Sarpe enim promiserat, sed nunquam juraverat. Quid autem est Dei veri veracisque juratio, nisi promissi confirmatio, et infidelium quædam increpatio?

3. Post hæc Sarra mortua est, centesimo et vicesimo septimo anno vitæ suæ (Gen. xxiii, 4), centesimo autem et tricesimo septimo viri sui. Decem quippe annis eam præcedebat ætate; sicut ipse, quando sibi ex illa promissus est filius, ait, Si mihi annorum centum nascetur filius, et si Sarra annorum nonaginta pariet (Id. xvii, 17)? Tunc emit agrum Abraham, in quo sepelivit uxorem. Tunc ergo, secundum narrationem Stephani, in terra illa est collocatus, quoniam cœpit ibi esse possessor (Act. vii, 4); post mortem scilicet patris sui, qui colligitur ante biennium fuisse defunctus.

CAPUT XXXIII. — De Rebecca nepte Nachor, quam Isaac accepit uxorem.

Deinde Rebecam, neptem Nachor patri sui, cum annorum quadraginta esset Isaac, duxit uxorem, centesimo scilicet et quadragesimo anno vitæ patris sui, triennio post mortem matris suæ. Ut autem illam duceret, quando ab ejus patre in Mesopotamiam servus missus est, quid aliud demonstratum est, cum eidem servo dixit Abraham, Pone manum tuam sub femore meo, et adjurabo te per Dominum Deum cæli et Dominum terræ, ut non sumas filio meo Isaac uxorem de filiabus Chananaeorum (Gen. xxiv, 2, 3), nisi Dominum Deum cæli et Dominum terræ in carne, quæ ex illo femore trahebatur, fuisse venturum? Numquid hæc parva sunt prænuntiæ indicia veritatis, quam compleri videmus in Christo¹?

CAPUT XXXIV. — Quid intelligendum sit in eo quod Abraham post mortem Sarre accepit uxorem Cethuram.

Quid autem sibi vult, quod Abraham post mortem Sarre Cethuram duxit uxorem (a)? Ubi absit ut incontinentiam suspicemur, præsertim in illa jam ætate, et in illa fidei sanctitate. An adhuc procreandi filii quærebantur, cum jam Deo promittente tanta multiplicatio filiorum ex Isaac per stellas cæli et arenam terræ fide probatissima teneretur? Sed profecto si Agar et Ismael, doctore Apostolo, significaverunt carnales veteris Testamenti (Galat. iv, 24); cur non etiam Cethura et filii ejus significant carnales, qui se ad Testamentum novum existimant pertinere? Ambæ quippe et uxores Abrahæ, et concubinæ sunt appellatæ: Sarra vero nunquam dicta est concubina². Nam et quando data est Agar Abrahæ, ita scriptum est: Et apprehendit Sarra uxor Abram Agar Ægyptiam ancillam suam, post decem annos quam habitaverat Abram

¹ Sic Mss. At editi, indicia veritatis, quæ compleri videamus in Christo.

² In editis additur, sed uxor tantum.

(a) Hieronymus in Traditionibus hebraicis refert opinionem Hebræorum, existimantium Cethuram ipsam fuisse Agar. COQUÆUS.

in terra Chanaan, et dedit eam Abram viro suo, ipsi¹ uxorem¹ (Gen. xvi, 5). De Cethura autem quam post obitum Sarrae accepit, sic legitur: *Adjiciens autem Abraham sumpsit uxorem, cui nomen Cethura. Ecce ambæ dicuntur uxores: ambæ porro concubinæ fuisse reperiuntur, postea dicente Scriptura, Dedit autem Abraham omnem censum suum Isaac filio suo, et filiis concubinarum suarum dedit Abraham donationes, et dimisit eos ab Isaac filio suo adhuc se vivo, ad Orientem, in terram Orientis* (Id. xxv, 1, 5, 6). Habent ergo nonnulla munera filii concubinarum, sed non perveniunt ad regnum promissum, nec hæretici, nec Judæi carnales: quia præter Isaac nullus est hæres; et non qui filii carnis, hi filii Dei; sed filii promissionis deputantur in semine (Rom. ix, 8), de quo dictum est, *In Isaac vocabitur tibi semen* (Gen. xxi, 12). Neque enim video, cur etiam Cethura post uxoris mortem ducta, nisi propter hoc mysterium, dicta sit concubina. Sed quisquis hæc non vult in istis significationibus accipere, non calumniatur Abraham. Quid si enim et hoc provisum est contra hæreticos futuros secundarum adversarios nuptiarum (a), ut in ipso patre multarum gentium post obitum conjugis iterum conjugari demonstraretur non esse peccatum? Et mortuus est Abraham, cum esset annorum centum septuaginta quinque² (Id. xxv, 7). Annorum ergo septuaginta quinque Isaac filium dereliquit, quem centenarius genuit.

CAPUT XXXV. — *De geminis adhuc in utero Rebeckæ matris inclusis quid indicaverit divina responsio.*

Jam ex hoc, quemadmodum per posteros Abraham civitatis Dei procurrant tempora, videamus. A primo igitur anno vite Isaac, usque ad sexagesimum quo ei nati sunt filii, illud memorabile est, quod cum illi Deum roganti ut pareret uxor ejus, quæ sterilis erat, concessisset Dominus quod petebat, atque haberet illa conceptum, gestiebant gemini adhuc in utero ejus inclusi. Quæ molestia cum angeretur, Dominum interrogavit, accepitque responsum: *Duæ gentes in utero tuo sunt, et duo populi de ventre tuo separabuntur, et populus populum superabit, et major serviet minori* (Ibid., 25). Quod Paulus apostolus magnum vult intelligi gratiæ documentum: quia nondum illis natis, nec aliquid agentibus boni seu mali, sine ullis bonis meritis eligitur minor, majore reprobato (Rom. ix, 11-13): quando procul dubio, quantum attinet ad originale peccatum, ambo pares erant; quantum autem ad proprium, ullius eorum nullum erat. Sed nunc de hæc re dicere aliquid latius, instituti operis ratio non sinit, unde et in aliis jam multa diximus. Quod autem dictum est, *Major serviet minori*, nemo fere nostrum aliter intellexit, quam majorem populum Judæorum minori populo Christiano serviturum.

¹ Vox, ipsi, deest in editis; sed habetur in manuscriptis et apud Septuaginta.

² Hoc et proximo loco abest, quinque, a manuscriptis. (n) Secundas nuptias Cataphryges nihil a fornicatione differre censebant, ut scribit Augustinus in libro de Hæresibus ad quodvultdeum, hæc. 26.

Et revera quamvis in gente Idumæorum, quæ nata est de majore, cui duo nomina erant (nam et Esau vocabatur, et Edom, unde Idumæi), hoc videri possit impletum; quia postea superanda fuerat a populo, qui ortus est ex minore, id est Israelitico, eique fuerat futura subjecta: tamen in aliquid majus intentam fuisse istam prophetiam, qua dictum est, *Populus populum superabit, et major serviet minori*, convenientius creditur. Et quid est hoc, nisi quod in Judæis et Christianis evidenter impletur?

CAPUT XXXVI. — *De oraculo et benedictione, quam Isaac non aliter quam pater ipsius, merito ejusdem dilectus¹, accepit.*

Accepit etiam Isaac oraculum tale, quale aliquoties pater ejus acceperat. De quo oraculo sic scriptum est: *Facta est autem fames super terram, præter famem quæ prius facta est in tempore Abrahæ. Abiit autem Isaac ad Abimelech regem Philistinorum in Gerara. Apparuit autem illi Dominus, et dixit: Noli descendere in Ægyptum: habita autem in terra quam tibi dixerò, et incole in terra hac; et ero tecum, et benedicam te. Tibi enim et semini tuo dabo omnem terram hanc: et statuam juramentum meum quod juravi Abraham patri tuo; et multiplicabo semen tuum tanquam stellas cæli, et dabo semini tuo omnem terram, et benedicentur terram ha in semine tuo omnes gentes terræ, pro eo quod obaudi-vit Abraham pater tuus vocem meam, et custodivit præcepta mea, et mandata mea, et justificationes meas, et legitima mea* (Gen. xxvi, 1-5). Iste patriarcha nec uxorem habuit aliam, nec aliquam concubinam, sed posteritate duorum geminorum ex uno concubitu procreatorum contentus fuit. Timuit sane etiam ipse periculum de pulchritudine conjugis, cum habitaret inter alienos, fecitque quod pater, ut eam sororem diceret, taceret uxorem: erat enim ei propinqua paterno et materno sanguine: sed etiam ipsa ab alienigenis², cognito quod uxor ejus esset, mansit intacta. Nec ideo tamen istum patri ejus præferre debemus, quia iste nullam feminam præter unam conjugem noverat. Erant enim procul dubio paternæ fidei et obedientiæ merita potiora, in tantum ut propter illum dicat Deus, huic se facere bona quæ facit: *Benedicentur, inquit, in semine tuo omnes gentes terræ, pro eo quod obaudi-vit Abraham pater tuus vocem meam, et custodivit præcepta mea, et mandata mea, et justificationes meas, et legitima mea*. Et alio rursus oraculo: *Ego sum, inquit, Deus Abraham patris tui: noli timere; tecum enim sum, et benedixi te, et multiplicabo semen tuum propter Abraham patrem tuum* (Ibid. 24). Ut intelligamus quam caste Abraham fecerit, quod hominibus impudicis et nequitiaæ suæ de Scripturis sanctis patrocinia requirentibus videtur fecisse libidine: deinde ut etiam hoc noverimus, non ex bonis singulis inter se homines comparare, sed in unoquoque consideremus universa. Fieri enim potest, ut habeat aliquid in vita et moribus quispiam quo superat alium,

¹ Sic Mss. At editi, merito ejusdem ac dilectione.

² Mss., ab alienis.

idque sit longe præstabilius, quam est illud unde ab alio superatur. Ac per hoc sano veroque iudicio, cum continentia conjugati præferatur, melior est tamen homo fidelis conjugatus, quam continens infidelis. Sed infidelis homo non solum minus laudandus, verum etiam maxime detestandus est. Constituamus ambos bonos¹; etiam sic profecto melior est conjugatus fidelissimus et obedientissimus Deo, quam continens minoris fidei minorisque obedientiæ: si vero paria sint cætera, continentem conjugato præferre² quis ambigat?

CAPUT XXXVII. — *De his quæ in Esau et Jacob mystice præfigurabantur.*

Duo igitur Isaac filii, Esau et Jacob, pariter crescunt. Primatus majoris transfunditur in minorem ex pacto et placito inter illos, eo quod lenticulam, quem cibum minor paraverat³, major immoderatus concupivit, eoque pretio primogenita sua fratri iuratione interposita vendidit. Ubi discimus in vescendo non cibi genere, sed aviditate immoderata quemque culpandum. Senescit Isaac, ejusque oculis per senectam visus aufertur. Vult benedicere filium majorem, et pro illo nesciens benedicit minorem, pro fratre majore, qui erat pilosus, se paternis manibus supponentem, hædinis sibi pelliculis coaptatis velut aliena peccata portantem. Iste dolus Jacob, ne putaretur fraudulentus dolus, et non in eo magnæ rei mysterium quæreretur, superius prædixit Scriptura: *Erat Esau homo sciens venari, ngrestis: Jacob autem homo simplex, habitans domum* (Gen. xxv, 29-34, 27). Hoc nostri quidam interpretati sunt, *sine dolo*. Sive autem sine dolo, sive simplex, sive potius sine fictione dicatur, quod est græce ἀπλοστος, quis est in ista percipienda benedictione dolus hominis sine dolo? quis est dolus simplicis, quæ fictio non mentientis, nisi profundum mysterium veritatis? Ipsa autem benedictio qualis est? *Ecce, inquit, odor filii mei tanquam odor agri pleni, quem benedixit Dominus. Et det tibi Deus de rore cæli, et de ubertate terræ, et multitudinem frumenti et vini: et serviant tibi gentes, et adorent te principes, et fias⁴ dominus fratris tui, et adorabunt te filii patris tui. Qui maledixerit te, maledictus; et qui benedixerit te, benedictus.* Benedictio igitur Jacob, prædicatio Christi est in omnibus gentibus. Hoc fit, hoc agitur: Lex et Prophetia est Isaac⁵: etiam per os Judæorum Christus ab illa benedicitur velut a nesciente, quia ipsa nescitur. Odore nominis Christi, sicut ager, mundus impletur: ejus est benedictio de rore cæli, hoc est, de verborum pluvia divinorum; et de ubertate terræ, hoc est, de congregatione populorum: ejus est multitudo frumenti et vini, hoc est,

multitudo quam colligit frumentum et vinum in Sacramento corporis et sanguinis ejus. Ei serviunt gentes, ipsum adorant principes. Ipse est dominus fratris sui, quia populus ejus dominatur Judæis. Ipsum adorant filii patris ejus, hoc est, filii Abrahæ secundum fidem: quia et ipse filius est Abrahæ secundum carnem. Ipsum qui maledixerit, maledictus; et qui benedixerit, benedictus est. Christus, inquam, noster etiam ex ore Judæorum, quamvis errantium, sed tamen Legem Prophetasque cantantium benedicitur, id est veraciter dicitur; et alius benedici putatur, qui ab eis errantibus exspectatur. Ecce benedictionem promissam repetente majore, expavescit Isaac, et alium pro alio se benedixisse cognoscens miratur, et quisnam ille sit, percunctatur: nec tamen se deceptum esse conqueritur; imo confestim revelato sibi intus in corde magno sacramento devitat indignationem, confirmat benedictionem. *Quis ergo, inquit, venatus est mihi venationem, et intulit mihi, et manducavi ab omnibus, antequam tu venires, et benedixi eum, et sit benedictus* (Gen. xxvii, 27-29, 35)? Quis non hic maledictionem potius exspectaret irati, si hæc non superna inspiratione, sed terreno more gererentur? O res, gestas sed propheticæ gestas; in terra, sed cælitus; per homines, sed divinitus! Si excutiantur singula tantis secundâ mysteriis, multa sunt implenda volumina: sed huic operi modus moderate imponendus nos in alia festinare compellit.

CAPUT XXXVIII. — *De misso Jacob in Mesopotamiam ad accipiendam uxorem, et de visione quam in itinere somniavit, et de quatuor ipsius feminis, cum unam petiisset uxorem.*

1. Mittitur Jacob a parentibus in Mesopotamiam, ut ibi ducat uxorem. Patris mittentis hæc verba sunt: *Non accipies uxorem ex filiabus Chananæorum: surgens fuge in Mesopotamiam in domum Bathuel, patris matris tuæ, et sume tibi inde uxorem de filiabus Laban, fratris matris tuæ. Deus autem meus benedical te, et augeat te, et multiplicet te; et eris in congregationes gentium: et det tibi benedictionem Abrahæ patris tui (a), tibi et semini tuo post te, ut hæres fias terræ incolatus tui, quam dedit Deus Abrahæ* (Gen. xxviii, 1-4). Hic¹ jam intelligimus segregatum semen Jacob ab alio semine Isaac, quod factum est per Esau. Quando enim dictum est, *In Isaac vocabitur tibi semen* (Id. xxii, 12), pertinens utique semen ad civitatem Dei; separatum est inde aliud semen Abrahæ, quod erat in ancillæ filio, et quod futurum erat in filiis Cethuræ. Sed adhuc erat ambiguum de duobus geminis filiis Isaac, an ad utrumque, an ad unum eorum illa benedictio pertineret; et si ad unum, quisnam esset illorum. Quod nunc declaratum est, cum propheticæ a patre benedicitur Jacob, et dicitur ei: *Et eris in congregationes gentium, et det tibi benedictionem Abrahæ patris tui.*

¹ Sic magno consensu manuscripti. At editi, *Sed continens infidelis homo non solum minus laudandus est, quia se continet, dum non credit; verum etiam multo magis vituperandus, quia non credit, cum se contineat. Constituamus ergo ambos bonos.*

² Mss. 2030 et 2038, præferri. M.

³ Sola editio Lov., eo quod lenticulam, quam minor paraverat. M.

⁴ Mss., et fieri.

⁵ Er. et Lov., est in Isaac. Abest, in, a Vind. Am. et Mss.

¹ Sic Vind. Am. et Mss. At Er. et Lov., *Hinc.*

(a) In græcis Bibliis, *patros non, patris mei.*

2. Pergens itaque in Mesopotamiam Jacob, in somnis accepit oraculum, de quo sic scriptum est : *Et exiit Jacob a Puteo jurationis, et profectus est in Charram, et devenit in locum, et dormivit ibi : occiderat enim sol : et sumpsit ex lapidibus loci, et posuit ad caput suum, et dormiit in loco illo, et somniavit. Et ecce scala stabilita super terram, cujus caput pertingebat ad cælum : et Angeli Dei ascendebant et descendebant per illam ; et Dominus incumbebat super illam ; et dixit : Ego sum Deus Abraham patris tui, et Deus Isaac, noli timere : terram in qua tu dormis super eam¹, tibi dabo illam, et semini tuo : et erit semen tuum sicut arena terræ ; et dilatabitur super Mare, et in Africum, et in Aquilonem, et ad Orientem : et benedicentur in te omnes tribus terræ, et in semine tuo. Et ecce ego sum tecum, custodiens te in omni via quacunque ibis ; et reducant te in terram hanc : quia non te derelinquam, donec faciam omnia, quæ tecum locutus sum. Et surrexit Jacob de somno suo, et dixit : Quia Dominus est in loco hoc, ego autem nesciebam. Et timuit, et dixit : Quam terribilis locus hic ! non est hoc² nisi domus Dei, et hæc porta est cæli. Et surrexit Jacob, et sumpsit lapidem quem supposuit ibi³ ad caput, et statuit illum in titulum, et superfudit oleum in cacumen ejus : et vocavit Jacob nomen loci illius, Domus Dei (Gen. xxviii, 10-19). Hoc ad prophetiam pertinet : nec more idololatriæ lapidem perfudit oleo Jacob, velut faciens illum deum ; neque enim adoravit eundem lapidem, vel ei sacrificavit : sed quoniam Christi nomen a chrismate est, id est ab unctione ; profecto figuratum est hic aliquid, quod ad magnum pertineat sacramentum. Scalam vero istam intelligitur ipse Salvator nobis in memoriam revocare in Evangelio, ubi cum dixisset de Nathanaele, *Ecce vere Israelita, in quo dolus non est* ; quia Israel viderat istam visionem, ipse est enim Jacob : eodem loco ait, *Amen, amen dico vobis, videbitis cælum apertum, et Angelos Dei ascendentes et descendentes super Filium hominis* (Joan. 1, 47, 51).*

3. Perrexit ergo Jacob in Mesopotamiam, ut inde acciperet uxorem. Unde autem illi acciderit quatuor habere feminas, de quibus duodecim filios et unam filiam procreavit, cum earum nullam concupisceret illicite, divina Scriptura indicat. Ad unam quippe accipiendam venerat (Gen. xxix) ; sed cum illi altera pro altera supposita fuisset, nec ipsam dimisit, qua nesciens usus fuerat in nocte, ne ludibrio eam videretur habuisse ; et eo tempore, quando multiplicandæ posteritatis causa plures uxores lex nulla prohibebat, accepit etiam illam, cui uni jam futuri conjugii fidem fecerat. Quæ cum esset sterilis, ancillam suam, de qua filios ipsa susciperet, marito dedit : quod etiam major soror ejus, quamvis peperisset, imitata, quoniam multiplicare prolem cupiebat, effecit. Nullam Jacob legitur petiisse præter unam, nec usus plurimis nisi gignendæ prolis officio, conjugali jure servato, ut neque hoc faceret, nisi uxores ejus id fieri flagitassent, quæ corporis

¹ Er. et Lov., per eam. Castigantur ex editis aliis et Mss.

² Editi, non est hic. Al Mss., non est hoc ; juxta græc. in titulo.

³ Al. u. l. Lov., supposuit sibi. In Mss. autem est, supposuit illi. Apud LXX. ekei.

viri sui habebant legitimam potestatem. Genuit ergo duodecim filios et unam filiam ex quatuor mulieribus. Deinde ingressus est in Ægyptum per filium suum Joseph, qui venditus ab invidentibus fratribus eo perductus fuit, atque ibidem sublimatus.

CAPUT XXXIX. — *Quæ ratio fuerit ut Jacob etiam Israel cognominaretur.*

Jacob autem etiam Israel, sicut paulo ante dixi, vocabatur : quod nomen magis populus ex illo procreatus obtinuit. Hoc autem nomen illi ab Angelo impositum est, qui cum illo fuerat in itinere de Mesopotamia redeunte luctatus, typum Christi evidentissime gerens. Nam quod ei prævaluit Jacob, utique volenti, ut mysterium figuraret, significat passionem Christi, ubi visi sunt ei prævalere Judæi. Et tamen benedictionem ab eodem angelo, quem superaverat, impetravit : ac sic hujus nominis impositio benedictio fuit. Interpretatur autem Israel, Videns Deum : quod erit in fine præmium omnium sanctorum. Tetigit porro illi idem angelus velut prævalenti latitudinem femoris, eumque isto modo claudum reddidit (Gen. xxxii, 24-29). Erat itaque unus atque idem Jacob et benedictus et claudus ; benedictus in eis qui in Christum ex eodem populo crediderunt, atque in infidelibus claudus (a). Nam femoris latitudo, generis est multitudo. Plures quippe sunt in ea stirpe, de quibus propheticè prædictum est : *Et claudicaverunt a semitis suis* (Psal. xvii, 46).

CAPUT XL. — *Quomodo Jacob cum septuaginta quinque animabus Ægyptum narretur ingressus ; cum plerique ex his qui commemorantur, tempore posteriore sint geniti.*

Ingressi itaque referuntur in Ægyptum simul cum ipso Jacob septuaginta quinque homines (Gen. xlvi, 27, sec. LXX, et Act. vii, 14), annumerato ipso cum¹ filiis suis. In quo numero duæ tantum feminæ commemorantur, una filia, neptis altera. Sed res diligenter considerata non indicat, quod tantus numerus fuerit in progenie Jacob die vel anno quo ingressus est Ægyptum. Commemorati sunt quippe in eis etiam pronepotes Joseph, qui nullo modo jam tunc esse potuerunt : quoniam tunc centum triginta annorum erat Jacob, filius vero ejus Joseph triginta novem ; quem cum accepisse tricesimo anno suo, vel amplius, constet uxorem, quomodo potuit per novem annos habere pronepotes de filiis, quos ex eadem uxore suscepit ? Cum igitur nec filios haberent Ephraem et Manasses filii Joseph, sed eos pueros infra quam novemnes Jacob Ægyptum ingressus invenerit, quo pacto eorum non solum filii, sed etiam nepotes, in illis septuaginta quinque numerantur, qui tunc Ægyptum ingressi sunt cum Jacob ? Nam commemoratur ibi Machir filius Manasse, nepos Joseph, et ejusdem Machir filius, id est Galaad, nepos Manasse, pronepos Joseph : ibi est et quem genuit Ephraem, alter filius

¹ Particula, cum, adest a Mss.

(a) Conf. Enarr. in Psal. xlvii, v. 20.

Joseph, id est Utalaam¹, nepos Joseph; et filius ipsius Utalæ Edem, nepos Ephræni, pronepos Joseph (Gen. 1. 22; Num. xxvi, 29 sqq.): qui nullo modo esse potuerunt, quando Jacob in Ægyptum venit, et filios Joseph nepotes suos, avos istorum, minores quam novem annorum pueros invenit. Sed nimirum introitus Jacob in Ægyptum, quando eum in septuaginta quinque annibus Scriptura commemorat, non unus dies, vel unus annus, sed totum illud est tempus, quamdiu vixit Joseph, per quem factum est ut intrarent. Nam de ipso Joseph eadem Scriptura sic loquitur: *Et habitavit Joseph in Ægypto, ipse et fratres ejus, et omnis cohabitatio patris ejus: et vixit annos centum et decem, et vidit Joseph filios Ephræm usque in tertiam generationem.* Ipse est ille pronepos ejus ab Ephræm tertius. Generationem quippe tertiam dicit, filium, nepotem, pronepotem. Deinde sequitur: *Et filii Machir, filii Manasse, nati sunt supra femora Joseph* (Gen. 1. 22). Et hic ille ipse est nepos Manasse, pronepos Joseph. Sed pluraliter appellati sunt, sicut Scriptura consuevit; quæ unam quoque filiam Jacob filias nuncupavit: sicut in latinæ linguæ consuetudine liberi dicuntur pluraliter filii, etiamsi non sint uno amplius (a). Cum ergo ipsius Joseph prædiceretur felicitas, quia videre potuit pronepotes, nullo modo putandi sunt jam fuisse tricesimo nono anno proavi sui Joseph, quando ad eum in Ægyptum Jacob pater ejus advenit. Illud autem est, quod fallit minus ista diligenter intuentes, quoniam scriptum est, *Hæc autem nomina filiorum Israel, qui intraverunt in Ægyptum simul cum Jacob patre suo* (Id. xlv, 8). Hoc enim dictum est, quia simul cum illis computantur septuaginta quinque, non quia simul jam erant omnes, quando Ægyptum ingressus est ipse: sed, ut dixi, totum tempus habetur ejus ingressus, quo vixit Joseph, per quem videtur ingressus.

CAPUT XLII.— *De benedictione, quam Jacob in Judam filium suum promisit.*

Igitur propter populum christianum, in quo Dei civitas peregrinatur in terris, si carnem Christi in Abrahamæ semine requiramus, remotis concubinarum filiis, occurrit Isaac: si in semine Isaac, remoto Esau, qui est etiam Edom, occurrit Jacob, qui est et Israel: si in semine Israel ipsius, remotis cæteris, occurrit Judas, quia de tribu Juda exortus est Christus. Ac per hoc cum in Ægypto moriturus Israel filios suos benediceret, quemadmodum Judam propheticè benedixerit, audiamus: *Juda, inquit, te laudabunt fratres tui. Manus tuæ super dorsum inimicorum tuorum: adorabunt te filii patris tui. Catulus leonis Juda: ex germinatione, fili mi, ascendisti:*

¹ Nonnulli probæ notæ Mss., *Utalaam*, vel *Uttalaam*. Apud Septuaginta vero, *Sutalaam*. Mox post, *nepos Joseph*; in editis sic legebatur, *ibi est et Bareth filius ipsius Utalæ, id est nepos Ephræm*. Emendantur auctoritate veterum librorum, quibus suffragatur editio Septuaginta, nisi quod hæc pro, *Edem*, habet, *Edom*, et, *Sutalæ*; pro, *Uttalæ*.

(a) Ita latine unus filius liberi dicitur, sicut Gellius scribit, Noct. Attic. lib. 2, cap. 13, assertque dictum Sempronii Assellionis historici, qui de unico Tiberii Gracchi filio «liberos» dixit. Herennius, jurisconsultus, libro Digestorum 50 idem confirmat. LUD. VIVES.

recumbens dormisti ut leo, et ut catulus leonis, quis suscitabit eum? Non deficiet princeps ex Juda, et dux de femoribus ejus, donec veniant quæ reposita sunt ei: et ipse expectatio gentium¹; alligans ad vitem pullum suum, et cilicio (a) pullum asinæ suæ. Lavabit in vino stolam suam, et in sanguine uxoris amictum suum. Fulvi oculi ejus a vino, et dentes candidiores lacte (Gen. xlix, 8-12). Exposui hæc adversus Manichæum Faustum disputans (*Contra Faustum Manichæum, lib. 12, cap. 42*): et satis esse arbitror, quantum veritas prophetiæ hujus elucet; ubi et mors Christi prædicta est verbo dormitionis, et non necessitas, sed potestas in morte, nomine leonis. Quam potestatem in Evangelio ipse prædicat, dicens: *Potestatem habeo ponendi animam meam, et potestatem habeo iterum sumendi eam. Nemo eam tollit a me: sed ego eam pono a me, et iterum sumo eam* (Joan. x, 18, 17). Sic leo fremuit, sic quod dixit implevit. Ad eam namque pertinet potestatem, quod de resurrectione ejus adjunctum est, *Quis suscitabit eum?* hoc est, quia nullus hominum, nisi se ipse, qui etiam de corpore suo dixit, *Solvite templum hoc, et in triduo resuscitabo illud* (Id. ii, 19). Ipsum autem genus mortis, hoc est sublimitas crucis, in uno verbo intelligitur, quod ait, *Ascendisti*. Quod vero addidit, *Recumbens dormisti*, evangelista exponit, ubi dicit, *et inclinato capite tradidit spiritum* (Id. xix, 30). Aut certe sepultura ejus agnoscitur, in qua recubuit dormiens; et unde illum nullus hominum, sicut Prophetæ aliquos, vel sicut ipse alios suscitavit, sed sicut a somno ipse surrexit. Stola porro ejus quam lavat in vino, id est, mundat a peccatis in sanguine suo, cujus sanguinis sacramentum baptizati sciunt, unde et adjungit, *Et in sanguine uxoris amictum suum*, quid est nisi Ecclesia? *Et fulvi oculi ejus a vino*: spirituales ejus inebriati poculo ejus, de quo canit Psalmus, *Et calix tuus inebrians quem præclarus est* (Psal. xxii, 5)! *Et dentes ejus candidiores lacte*: quod potant apud Apostolum parvuli, verba scilicet nutrientia, nondum idonei solido cibo (I Cor. iii, 2). Ipse igitur est in quo reposita erant promissa Judæ, quæ donec veniant, nunquam principes, hoc est reges, Israel ab illa stirpe defuerunt. *Et ipse expectatio gentium*: quod clarius est videndo, quam sit exponendo.

CAPUT XLIII.— *De filiis Joseph, quos Jacob prophetica manuum suarum transmutatione benedixit.*

Sicut autem duo Isaac filii, Esau et Jacob, figuram præbuerunt duorum populorum in Judæis et Christianis (quamvis quod ad carnis propaginem pertinet, nec Judæi venerint ex semine Esau, sed Idumæi; nec Christianæ gentes de Jacob, sed potius Judæi (b), ad hoc enim tantum figura valuit, quod dictum est, *Major serviet minori* [Gen. xxv, 23]); ita factum est etiam in duobus filiis Joseph: nam major gessit tyrum Judæorum, Christianorum autem minor. Quos

¹ Editi, *et ipse erit expectatio gentium*. Abest, *erit*, a manuscriptis et a greco Septuaginta.

(a) Græce est, *id eliki*: quod Cyprianus, lib. 1 adversus Judæos, vertit, *ad helicem*, id est ad palmitem.

(b) Conf. Epist. 186, ad Asellitum.

cum benediceret Jacob, manum dexteram ponens super minorem, quem habebat ad sinistram; sinistram super majorem, quem habebat ad dextram: grave visum est patri eorum, et admonuit patrem velut corrigens ejus errorem, et quisnam eorum esset major ostendens. At ille mutare manus noluit, sed dixit: *Scio, fili, scio. Et hic erit in populum, et et hic exaltabitur: sed frater ejus junior major illo erit, semen ejus erit in multitudinem gentium* (Gen. XLVIII, 19). Etiam hic duo illa promissa demonstrat¹. Nam ille in *populum*, iste in *multitudinem gentium*: quid evidentius quam his duabus promissionibus contineri populum Israelitarum orbemque terrarum in semine Abrahamæ, illum secundum carnem, istum secundum fidem?

CAPUT XLIII. — *De temporibus Moysi, et Jesu Nave, ac Judicum, atque exinde Regum, quorum quidem Saül primus est, sed David præcipuus et sacramento habetur et merito.*

1. Defuncto Jacob, defuncto etiam Joseph, per reliquos centum quadraginta quatuor annos, donec exiret de terra Ægypti, in modum incredibilem illa gens crevit, etiam tantis attrita persecutionibus, ut quodam tempore nati masculi necarentur, cum mirantes Ægyptios nimia populi illius incrementa terrent. Tunc Moyses subtractus furto trucidatoribus parvulorum, ad domum regiam, ingentia per eum Deo præparante, pervenit, nutritusque et adoptatus a filia Pharaonis (quod nomen in Ægypto omnium regum fuit), in tantum pervenit virum, ut ipse illam gentem mirabiliter multiplicatam, ex durissimo et gravissimo, quod ibi ferebat, jugo servitutis extraheret, imo per eum Deus, qui hoc promiserat Abrahamæ. Prius quippe exinde fugiens, quod, cum Israelitam defenderet, Ægyptium occiderat, et territus fuerat²; postea divinitus missus in potestate Spiritus Dei superavit resistentes Pharaonis magos. Tunc per eum Ægyptiis illatæ sunt decem memorabiles plagæ, cum dimittere populum Dei nollent; aqua in sanguinem versa, ranæ et sciniphes, cynomyia, mors pecorum, ulcera, grando, locusta, tenebræ, mors primogenitorum. Ad extremum Israelitas, quos plagis tot tantisque perfracti tandem aliquando dimiserant, Ægyptii in mari Rubro dum persequuntur, extincti sunt. Illis quippe abeuntibus divisum mare fecit: hos autem insequentis in se rediens unda submersit. Deinde per annos quadraginta, duce Moysi, Dei populus per desertum³ actus est, quando Tabernaculum testimonii nuncupatum est, ubi Deus sacrificiis futura prænuntiantibus colebatur: cum scilicet jam data lex fuisset in monte multum terribiliter; attestabatur enim evidentissima mirabilibus signis vocibusque divinitas. Quod factum est mox ut exitum est de Ægypto, et in deserto populus esse cœpit, quinquagesimo die post

celebratum Pascha per ovis immolationem: qui usque adeo typus Christi est, prænuntians cum per victimam passionis de hoc mundo transiturum ad Patrem (Pascha quippe hebræa lingua Transitus interpretatur [Exod. XII, 11]), ut jam cum revelaretur Testamentum novum, posteaquam Pascha nostrum immolatus est Christus, quinquagesimo die veniret de cœlo Spiritus sanctus: qui dictus est in Evangelio digitus Dei (Luc. XI, 20), ut recordationem nostram in primi præfigurati facti memoriam revocaret; quia et legis illæ tabulæ digito Dei scriptæ referuntur (Exod. XXXI, 18).

2. Defuncto Moysi, populum rexit Jesus Nave, et in terram promissionis introduxit, eamque populo divisit. Ab his duobus mirabilibus ducibus bella etiam prosperrime ac mirabiliter gesta sunt, Deo constante non tam propter merita Hebræi populi, quam propter peccata earum quæ debellabantur gentium, illas eis provenisse victorias. Post istos duces, Judices fuerunt, jam in terra promissionis populo collocato: ut inciperet interim reddi Abrahamæ prima promissio de gente una, id est Hebræa, et terra Chanaan; nondum de omnibus gentibus et toto orbe terrarum: quod Christi adventus in carne, et non veteris Legis observationes, sed Evangelii fides fuerat impletura. Cujus rei præfiguratio facta est, quod non Moyses, qui legem populo acceperat in monte Sina, sed Jesus, cui etiam nomen Deo præcipiente mutatum fuerat ut Jesus vocaretur, populum in terram promissionis induxit. Temporibus autem Judicum, sicut se habebant et peccata populi et misericordia Dei, alternaverunt prospera et adversa bellorum.

3. Inde ventum est ad Regum tempora: quorum primus regnavit Saül: quo reprobato et bellica clade prostrato, ejusque stirpe rejecta, ne inde reges orirentur, David successit in regnum, cujus maxime Christus dictus est filius. In quo articulus quidam factus est et exordium quodammodo juventutis populi Dei: cujus generis quædam velut adolescentia ducebatur ab ipso Abraham usque ad hunc David. Neque enim frustra Matthæus evangelista sic generationes commemoravit, ut hoc primum intervallum quatuordecim generationibus commendaret, ab Abraham scilicet usque ad David (Matth. I, 17). Ab adolescentia quippe incipit homo posse generare: propterea generationum⁴ ex Abraham sumpsit exordium; qui etiam pater gentium constitutus est, quando mutatum nomen accepit. Ante hunc ergo velut pueritia fuit hujus generis populi Dei, a Noe usque ad ipsum Abraham: et ideo prima lingua⁵ inventa est, id est hebræa. A pueritia namque homo incipit loqui post infantiam, quæ hinc appellata est, quia dari non potest. Quam profecto ætatem primam demergit obhi-

¹ Sic Mss. Editi autem, *quæ*.

² Editi, *generationum series*; et paulo post, *qui etiam pater multarum gentium*. Abest, *series*, a manuscriptis necnon quæ infra addita fuerat vox, *multarum*.

³ Plures Mss., *et ideo lingua*; omisso, *prima*. Alii veteres libri, *et ideo in lingua*; vel, *et ideo hinc lingua*.

vin, sicut ætas prima generis humani est deleta dilu-
v. Quotus enim quisque est, qui suam recordetur
infantiam? Quamobrem in isto procurso civitatis Dei,
sicut superior unam eandemque primam, ita duas
ætates secundam et tertiam liber iste continet, in qua
tertia propter vaccam trimam, capram trimam, et

arietem trimam (*Gen. xv, 9*), impositum est Legis
jugum, et apparuit abundantia peccatorum, et regi
terreni surrexit exordium, ubi non defuerant spiritua-
les, quorum in torture et columba (*Ibid.*) figuratum
est sacramentum.

LIBER DECIMUS SEPTIMUS.

¶ quo agitur de civitate Dei procurso temporibus Regum et Prophetarum a Samuele et David usque ad Christum, et quæ
sacris Litteris mandate sunt vaticinationes eorundem temporum in Regum, Psalmorum et Salomonis libris de Christo et
Ecclesia exponuntur.



CAPUT PRIMUM. — De temporibus Prophetarum.

Promissiones Dei, quæ factæ sunt ad Abraham, cuius semini et gentem Israeliticam secundum carnem et omnes gentes deberi secundum fidem, Deo pollicente, didicimus, quemadmodum compleantur, per ordinem temporum procurrans Dei civitas indicabit. Quoniam ergo superioris libri usque ad regnum David factus est finis, nunc ab eodem regno, quantum suscepto operi sufficere videtur, cetera quæ sequuntur attingimus. Hoc itaque tempus, ex quo sanctus Samuel prophetare cœpit, et deinceps donec populus Israel captivus in Babyloniâ duceretur, atque inde secundo sancti Jeremiæ prophetiam post septuaginta annos reversis Israelitis (*Jerem. xxv, 11*) Dei domus instauraretur totum tempus est Prophetarum. Quamvis enim et ipsum Noe patriarcham, in cuius diebus universa terra diluvio deleta est, et alios supra et infra usque ad hoc tempus, quo reges in Dei populo esse cœperunt, propter quædam per eos futura sive quoquo modo significata, sive prædicta, quæ pertinerent ad civitatem Dei regnumque cœlorum, non immerito possimus appellare prophetas; præsertim quia nonnullos eorum id expressius legimus nuncupatos, sicut Abraham (*Gen. xx, 7*), sicut Moysen (*Deut. xxxiv, 10*): tamen dies Prophetarum præcipue maximeque hi dicti sunt, ex quo cœpit prophetare Samuel, qui et Saphem prius, et eo reprobo ipsam David, Deo præcipiente, unxit in regem, de cuius cæteri stirpe succederent, quousque illos succedere sic oporteret. Quæ igitur a Prophetis sunt prædicta de Christo, cum moriendo decedentibus et nascendo succedentibus suis membris civitas Dei per ista curreret tempora, si omnia velim commemorare, in immensum pergitur. Primum quia ipsa Scriptura, quæ per ordinem Reges eorumque facta et eventa digerens, videtur tanquam historica diligentia rebus gestis occupata esse narrandis, si adjuvante Dei Spiritu considerata tractetur, vel magis, vel certe non minus prænuntiandis futuris, quam præteritis enuntiandis, invenietur intenta. Et hoc perscrutando indagare ac disserendo monstrare, quam sit ope-

rosam atque prolixum, et quam multis indignum voluminibus, quis ignorat, qui hæc vel mediocriter cogitat? Deinde quia ea ipsa quæ ad prophetiam non ambigitur pertinere, ita sunt multa de Christo regnoque cœlorum, quæ civitas Dei est, ut ad hoc aperiendum major sit disputatio necessaria, quam huius operis modus flagitat. Proinde ita, si potuero, stilo moderabor meo, ut huic operi in Dei voluntate peragendo, nec ea quæ supersint dicam, nec ea quæ satis sint prætermittam.

CAPUT II. — Quo tempore sit impleta promissio Dei de terra Chanaan, quam in possessionem etiam Israel carnalis accepit.

In præcedente libro diximus, ab initio ad Abraham promissionum Dei duas res fuisse promissas: unam scilicet, quod terram Chanaan possessurum fuerat semen ejus; quod significatur, ubi dictum est, *Vade in terram, quam tibi demonstravero, et faciam te in gentem magnam*: aliam vero longe præstantiorem, non de carnali, sed de spirituali semine, per quod pater est, non unius gentis Israeliticæ, sed omnium gentium, quæ fidei ejus vestigia consequuntur; quod promitti cœpit his verbis: *Et benedicentur in te omnes tribus terræ* (*Gen. xii, 1-5*). Et deinceps aliis multis admodum testimoniis hæc duo promissa esse monstravimus. Erat igitur jam in terra promissionis semen Abraham, id est populus Israel, secundum carnem: atque ibi non solum tenendo ac possidendo civitates adversariorum, verum etiam reges habendo, regnare jam cœperat, impletis de ipso populo promissionibus Dei jam magna ex parte; non solum quæ illis tribus patribus, Abraham, Isaac, et Jacob, et quæcumque aliæ temporibus eorum, verum etiam quæ per ipsam Moysen, per quem populus idem de servitute Ægyptiæ liberatus est, et per quem cuncta præterita revelata sunt temporibus ejus, cum populum per eremum duceret, factæ fuerant. Neque autem per insignem duces Jesum Nave, per quem populus ille in promissionis inductus est terram, expugnatisque gentibus, eam duodecim tribubus, quibus Deus jusserat, divisit, et mortuus est; neque post illum toto tempore Judicum impleta fuerat promissio Dei de terra Chanaan,

¹ Fditi, dissentientibus manuscriptoris plerisque, indicat: et infra loco, attingimus, habent, attingamus.

² In sola editione Lov., facta: male.

¹ Vind. Am. Fr., indiget. Lov., dignum, At melioris notæ Mss., indignum.

a quodam flumine Ægypti usque ad flumen magnum Euphratem ¹ (*Gen. xv, 18*) : nec tamen adhuc prophetabatur futurum, sed expectabatur implendum. Impletum est autem per David, et ejus filium Salomonem; cujus regnum tanto, quanto promissum fuerat, spatio dilatatum est: universos quippe illos subdiderunt, tributariosque fecerunt. Sic igitur in terra Chanaan, sub his regibus semen Abraham fuerat constitutum, ut nihil deinde superesset, quo terrena illa Dei promissio compleretur, nisi ut in eadem terra, quantum ad prosperitatem attinet temporalem, per posteritatis successionem inconcusso statu usque ad mortalis sæculi hujus terminum gens permaneret Hebræa, si Domini Dei sui legibus obediret. Sed quoniam Deus noverat, hoc eam non esse facturam, usus est ejus etiam temporalibus pœnis ad exercendos in ea paucos fideles suos, et admonendos qui postea futuri erant in omnibus gentibus, quod eos ² admoneri oportebat, in quibus alteram promissionem, revelato novo Testamento, per incarnationem Christi fuerat impleturus.

CAPUT III. — *De tripartitis significationibus Prophetarum, quæ nunc ad terrenam, nunc ad cælestem Jerusalem, nunc autem ad utramque referuntur.*

1. Quocirca, sicut oracula illa divina ad Abraham, Isaac, et Jacob, et quæcumque alia signa, vel dicta prophetica, in sacris Litteris præcedentibus facta sunt: ita etiam cæteræ ab isto Regum tempore prophetiæ partim pertinent ad gentem carnis Abraham, partim vero ad illud semen ejus, in quo benedicuntur omnes gentes coheredes Christi per Testamentum novum, ad possidendam vitam æternam regnumque cælorum. Partim ergo ad ancillam, quæ in servitutem generat, id est terrenam Jerusalem, quæ servit cum filiis suis; partim vero ad liberam civitatem Dei, id est veram Jerusalem æternam in cælis, cujus filii homines secundum Deum viventes peregrinantur in terris: sed sunt in eis quædam, quæ ad utramque pertinere intelliguntur, ad ancillam proprie, ad liberam figurate.

2. Tripartita itaque reperiuntur eloquia Prophetarum: siquidem aliqua sunt ad terrenam Jerusalem spectantia, aliqua ad cælestem, nonnulla ad utramque. Exemplis video probandum esse quod dico. Missus est Nathan propheta, qui regem David argueret de peccato gravi, et ei, quæ consecuta sunt mala, futura prædiceret (*II Reg. xii*). Hæc atque hujusmodi sive publice, id est pro salute vel utilitate populi, sive privatim, cum pro suis quisque rebus divina promeretur eloquia, quibus pro usu temporalis vitæ futuri aliquid nosceretur, ad terrænâ civitatem pertinuisse, quis ambigit? Ubi autem legitur, *Ecce dies veniunt, dicit Dominus, et consummabo domui Israel et domui Juda testamentum novum, non secundum testamentum quod disposui patribus eorum, in die qua apprehendi manum eorum, ut educerem eos de terra Ægypti: quoniam ipsi non permanserunt in testamento meo, et ego neglexi eos,*

¹ Sic Mss. Editi vero, quod a flumine Ægypti usque ad flumen magnum Euphratem populus iste dominaretur.

² Editi, in omnibus gentibus, quas per eos. Castigantur ex manuscriptis.

dicit Dominus, Quia hoc est testamentum, quod constituam domui Israel: post dies illos, dicit Dominus, dabo leges meas in mentem eorum, et super corda eorum scribam eas, et videbo eos (a), et ero illis in Deum, et ipsi erunt mihi in plebem (Jerem. xxxi, 31-33; Hebr. viii, 8-10); Jerusalem sine dubio superna prophetatur, cujus Deus ipse præmium est, eumque habere atque ipsius esse summum ibi est ² atque totum bonum. Ad utramque vero pertinet hoc ipsum, quod Jerusalem dicitur Dei civitas, et in ea prophetatur futura domus Dei, eaque prophetia videtur impleri, cum Salomon rex ædificat illud nobilissimum templum. Hæc enim et in terrena Jerusalem secundum historiam contigerunt, et cælestis Jerusalem figuræ fuerunt. Quod genus prophetiæ ex utroque veluti compactum atque commixtum in Libris veteribus canonicis, quibus rerum gestarum narrationes continentur, valet plurimum, multumque exerevit et exercet ingenia scrutantium Litteras sacras, ut quod historiæ prædictam completumque legitur in semine Abraham secundum carnem, etiam in semine Abraham secundum fidem quid implendum allegorice significet inquiratur: in tantum ut quibusdam visum sit, nihil esse in eisdem libris vel prænuntiatum et effectum, vel effectum, quamvis non prænuntiatum, quod non insinuet aliquid ad supernam civitatem Dei ejusque filios in hac vita peregrinos figurata significatione referendum. Sed si hoc ita est, jam bipartita, non tripartita erunt eloquia Prophetarum, vel potius illarum Scripturarum omnium, quæ veteris Instrumenti appellatione censentur. Nihil enim erit illic, quod ad Jerusalem terrenam tantum pertineat, si quidquid ibi de illa, vel propter illam, dicitur atque completur, significat aliquid, quod etiam Jerusalem cælestem allegorice præfiguratione referatur: sed erunt sola duo genera, unum quod ad Jerusalem liberam, alterum quod ad utramque pertineat. Mihi autem sicut multum videntur errare, qui nullas res gestas in eo genere litterarum aliquid aliud præter id quod eo modo gestæ sunt significare arbitrantur; ita multum audere, qui prorsus ibi omnia significationibus allegoricis involuta esse contendunt (b). Ideo tripartita, non bipartita esse dixi. Hoc enim existimo, non tamen culpans eos, qui potuerint illic de quacumque re gesta sensum intelligentiæ spiritualis exculpere, servati primitus duntaxat historiæ veritate. Cæterum quæ ita dicuntur, ut rebus humanitas sen divinitus gestis sive gerendis convenire non possint, quis fidelis dubitet non esse inaniter dicta? quis ea non ad intelligentiam spirituales revocet, si possit, aut ab eo qui potest revocanda esse fateatur?

CAPUT IV. — *De præfigurata commutatione Israelitici regni et sacerdotii, et de his quæ Anna mater Samuelis, personam gerens Ecclesie, prophetavit.*

1. Procursus igitur civitatis Dei, ubi pervenit ad

¹ In manuscriptis habetur, *dando*. Apud LXX est *didous dôs, dum dabo*.

² Sic nostri omnes codices. In B., *summum illi est*. M. (a) Verba, et *videbo eos*, in Bibliis desunt latinis et grecis.

(b) Conf. passim libros cont. Faust. Manich.

Regum tempora, quando David Saule reprobato Ita regnum primus obtinuit, ut ejus deinde posteri in terrena Jerusalem diuturna successione regnarent, dedit figuram, re gesta ¹ significans atque prænuntians, quod non est prætercundum silentio, de rerum mutatione futurarum, quod attinet ad duo Testamenta, velut et novum: ubi sacerdotium regnumque mutatum est per sacerdotem eundemque regem novum ac sempiternum, qui est Christus Jesus. Nam et Heli sacerdote reprobato substitutus ² in Dei ministerium Samuel, simul officio functus sacerdotis et judicis, et Saule abjecto rex David fundatus in regno, hoc quod dico figuraverunt. Mater quoque ipsa Samuelis Anna, quæ prius fuit sterilis, et posteriore fecunditate lætata est, prophetare aliud non videtur, cum gratulationem suam Domino fundit exultans: quando eundem puerum uatum et ablatatum Deo reddit eadem pietate, qua voverat. Dicit enim: *Confirmatum est cor meum in Domino, et exaltatum est cornu meum in Deo meo. Dilatum est super inimicos meos os meum; lætata sum in saluari tuo. Quoniam non est sanctus, sicut Dominus; et non est justus, sicut Deus noster; non est sanctus præter te. Nolite gloriari superbe ³, et nolite loqui excelsa, neque procedat magniloquium de ore vestro. Quoniam Deus scientiarum Dominus, et Deus præparans adventiones suas. Arcum potentium fecit infirmum, et infirmi præcincti sunt virtute. Pleni panibus minorati sunt, et esurientes transierunt terram. Quia sterilis peperit septem, et multa in filiis infirmata est. Dominus mortificat et vivificat; deducit ad inferos, et reducit. Dominus pauperes facit ⁴, et dilatat; humiliat, et exaltat. Suscitavit a terra pauperem, et de stercore erigit inopem: ut collocet eum cum potentibus populi ⁵, et sedem gloriæ hereditatem daret eis: dans votum votenti, et benedixit annos justi: quoniam non in virtute potens est vir. Dominus infirmum faciet adversarium suum, Dominus sanctus. Non gloriatur prudens in prudentia sua, et non gloriatur potens in potentia sua, et non gloriatur dives in divitiis suis: sed in hoc gloriatur qui gloriatur, intelligere et scire Dominum, et facere judicium et justitiam in medio terræ. Dominus ascendit in cælos, et tonuit: ipse judicabit extrema terræ quia justus est (a); et dat virtutem regibus nostris, et exaltabit cornu Christi sui. (I Reg. II, 1-10, sec. LXX).*

2. Itane vero verba hæc unius putabuntur esse mulierculæ, de nato sibi filio gratulantis? tantumno mens hominum a luce veritatis aversa est, ut non sentiat supergredi modum feminæ hujus dicta quæ lædit? Porro qui rebus ipsis, quæ jam cœperunt etiam in hac terrena peregrinatione compleri, convenienter

¹ Sic Mss. At editi, *rei gestæ*. Et infra ex his duo, Er. et Lov., pro, *de rerum mutatione*, habent, *rerum mutationem*.

² Er. et Lov., *substitutus est*. Expungi debuit, *est*, juxta Vind. Am. et Mss.

³ Editi, *nolite gloriari*, omisso, *superbe*, quod manuscripti omnes adjungunt.—Abest vox illa a Mss. 2031, 238 et 233. M.

⁴ Sic Mss. At editi, *Dominus pauperem facit*. In græco est, *picchazet*.

⁵ Ita Vind. Am. et manuscripti juxta Septuaginta. At Er. et Lov., *populi sui*: et paulo post, *dans ei*.

(a) Biblia sacra omittunt, *quia justus est*. Habent græca quedam exemplaria et Theodoræ stus, *dicaos õn*.

movetur, nonne inteadit, et aspicit, et agnoscit per hanc mulierem, cujus etiam nomen. id est Anna, Gratia ejus interpretatur, ipsam religionem christianam, ipsam civitatem Dei, cujus rex est et conditor Christus, ipsam postremo Dei gratiam prophetico spiritu sic locutam, a qua superbi alienantur, ut cadant, qua humiles implentur, ut surgant, quod maxime hymnus iste personuit? Nisi quisquam forte dicturus est, nihil istam prophetasse mulierem, sed Deum tantummodo propter filium, quem precata impetravit, exultanti prædicatione laudasse. Quid ergo sibi vult quod ait: *Arcum potentium fecit infirmum, et infirmi præcincti sunt virtute: pleni panibus minorati sunt, et esurientes transierunt terram: quia sterilis peperit septem, et multa in filiis infirmata est?* Numquid septem ipsa pepererat, quamvis sterilis fuerit? Unicum habebat, quando ista dicebat: sed nec postea septem peperit, sive sex, quibus septimus esset ipse Samuel; sed tres mares, et duas feminas (I Reg. II, 20). Deinde in illo populo cum adhuc nemo regnaret, quod in extremo posuit, *Dat virtutem regibus nostris, et exaltabit cornu Christi sui*; unde dicebat, si non prophetabat?

3. Dicat ergo Ecclesia Christi, civitas Regis magnigratia plena, prole secunda; dicat quod tanto ante de se prophetatum per os hujus piæ matris agnoscit *Confirmatum est cor meum in Domino, et exaltatum est cornu meum in Deo meo*. Vere confirmatum cor, et cornu vere exaltatum; quia non in se, sed in Domino Deo suo. *Dilatum est super inimicos meos os meum*: quia et in angustiis pressurarum sermo Dei non est alligatus, nec in præconibus alligatis. *Lætata sum*, inquit, *in saluari tuo*. Christus est iste Jesus, quem Simeon, sicut in Evangelio legitur, senex amplectens parvum ¹, agnosceus magnum, *Nunc dimittis*, inquit, *Domine, servum tuum in pace, quoniam viderunt oculi mei salutare tuum* (Luc. II, 29 et 30). Dicat itaque Ecclesia, *Lætata sum in saluari tuo. Quoniam non est sanctus, sicut Dominus; et non est justus, sicut Deus noster*; tanquam sanctus et sanctificans, justus et justificans. *Non est sanctus præter te*: quia nemo fit nisi abs te. Denique sequitur, *Nolite gloriari superbe ², et nolite loqui excelsa, neque exeat magniloquium de ore vestro. Quoniam Deus scientiarum Dominus*. Ipse vos scit, et ubi nemo scit ³: quoniam qui putat se aliquid esse, cum nihil sit, se ipsum seducit (Galat. VI, 5). Hæc dicuntur adversariis civitatis Dei ad Babyloniam pertinentibus, de sua virtute præsumentibus, in se, non in Domino gloriantibus; ex quibus sunt etiam carnales Israelitæ, terrenæ Jerusalem cives terrigenæ, qui, ut dicit Apostolus, *ignorantes Dei justitiam*, id est quam dat homini Deus, qui solus est justus et justificans; *et suam volentes constituere*, id est, velut a se sibi partam, non ab illo impertitam; *justitiæ Dei non sunt*

¹ Sic Mss. Editi, *parvulum*.

² Nostri omnes codices omittunt verbum, *superbe*. M.

³ Sic veteres libri, exceptis nonnullis, qui habent, *ipse vos scit, et ubi nemo sit*. At editi, *ipse, et nemo scit quod ipse scit*.

subjecti (Rom. x, 3), utique quia superbi, de suo putantes, non de Deo, posse placere se Deo, qui est Deus scientiarum, atque ideo et arbitri conscientiarum, ibi videns cogitationes hominum, quoniam vanæ sunt (Psalm. xciii, 14), si hominum sunt, et ab illo non sunt. *Et præparans*, inquit, *adinventiones suas*. Quas adinventiones putamus, nisi ut superbi cadant, et humiliter surgant? Has quippe adinventiones exsequitur, dicens, *Arcus potentium infirmatus est, et infirmi præcincti sunt virtute*. Infirmatus est arcus, id est, intentio eorum qui tam potentes sibi videntur, ut sine Dei dono atque adjutore humana sufficientia divina possint implere mandata; et præcinguntur virtute, quorum interna vox est, *Miserere mei, Domine, quoniam infirmus sum* (Psalm. vi, 3).

4. *Pleni panibus*, inquit, *minorati sunt, et esurientes transierunt terram*. Qui sunt intelligendi pleni panibus, nisi iidem ipsi quasi potentes, id est Israelitæ, quibus credita sunt eloquia Dei (Rom. iii, 2)? Sed in eo populo ancillæ filii minorati sunt: quo verbo minus quidem latino, bene tamen expressum est, quod ex majoribus minores facti sunt: quia et in ipsis panibus, id est divinis eloquiis, quæ Israelitæ soli tunc ex omnibus gentibus acceperunt, terrena sapiunt. Gentes autem quibus lex illa non erat data, posteaquam per novum Testamentum ad eloquia illa venerunt, multum esuriendo terram transierunt; quia in eis non terrena, sed cælestia sapuerunt. Et hoc, velut quæreretur causa cur factum sit, *Quia sterilis*, inquit, *peperit septem, et multa in filiis infirmata est*. Hic totum quod prophetabatur eluxit agnoscantibus numerum septenarium, quo est universæ Ecclesiæ signifiata perfectio. Propter quod et Joannes apostolus ad septem scribit Ecclesias (Apoc. i, 4), eo modo se ostendens ad unius plenitudinem scribere: et in Proverbiis Salomonis hoc antea præfigurans Sapientia, *ædificavit sibi domum, et suffulsit columnas septem* (Prov. ix, 1). Sterilis enim erat in omnibus gentibus Dei civitas, antequam iste fetus, quem cernimus¹, oriretur. Cernimus etiam, quæ multa in filiis erat, nunc infirmatam Jerusalem terrenam. Quoniam quicumque filii liberæ in ea erant, virtus ejus erant: nunc vero ibi quoniam litera est, et spiritus non est, amissa virtute infirmata est.

5. *Dominus mortificat, et vivificat*: mortificavit illam, quæ multa erat in filiis; et vivificavit hanc sterilem, quæ peperit septem. Quamvis commodius possit intelligi eodem vivificare, quos mortificaverit. Id enim velut repetitum addendo, *Deducit ad inferos, et reducit*. Quibus enim dicit Apostolus, *Si mortui estis (a) cum Christo, quæ sursum sunt quærite, ubi Christus est in dextera Dei sedens*: salubriter utique mortificantur a Domino: quibus adjungit, *Quæ sursum sunt sapite, non quæ super terram*; ut ipsi sint illi, qui esurientes transierunt terram. *Mortui enim estis*, inquit: ecce quomodo salubriter mortificat Deus. Deinde sequitur, *Et vita vestra abscondita est*

¹ Editi, dissentientibus libris, per quem eam factam secundam cernimus.

(a) In sacris Bibliis, si consurrexistis.

cum Christo in Deo (Coloss. iii, 1-3): ecce quomodo eisdem ipsos vivificat Deus. Sed nunquid eosdem deduxit ad inferos et reduxit? Hoc utrumque sine controversia fidelium in illo potius videmus impletum, Capite scilicet nostro, cum quo vitam nostram in Deo Apostolus dixit absconditam. Nam cum *proprio Filio non pepercit, sed pro nobis omnibus tradidit eum* (Rom. viii, 32), isto modo utique mortificavit eum. Et quia resuscitavit a mortuis, eundem rursus vivificavit. Et quia in prophetia¹ vox ejus agnoscitur, *Non derelinques animam meam in inferno* (Psalm. xv, 10), eundem deduxit ad inferos et reduxit. Hæc ejus paupertate ditati sumus. *Dominus enim pauperes facit, et ditat*. Nam quid hoc sit ut sciamus, quod sequitur audiamus: *Humiliat, et exaltat*; utique superbos humiliat, et humiles exaltat. Quod enim alibi legitur, *Deus superbis resistit, humilibus autem dat gratiam* (Jacobi iv, 6); hoc totus habet sermo hujus, cujus nomen interpretatur Gratia ejus.

6. Jam vero quod adjungitur, *Suscitat a terra pauperem*: de nullo melius quam de illo intelligo, qui *propter nos factus est pauper, cum dives esset, ut ejus paupertate*, sicut paulo ante dictum est, *ditaremur*. (I Cor. viii, 9). Ipsum enim de terra suscitavit tam cito, ut caro ejus non videret corruptionem. Nec illud ab illo alienabo, quod additum est, *Et de stercore erigit inopem*. Inops quippe idem qui pauper². Stercus vero unde erectus est, rectissime intelliguntur persecutores Judæi. In quorum numero cum se dixisset Apostolus Ecclesiam persecutum, *Quæ mihi, inquit, fuerunt lucra, hæc propter Christum damna esse duxi: nec solum detrimenta, verum etiam stercore existimari esse, ut Christum lucrifacerem* (Philipp. iii, 7 et 8). De terra ergo suscitatus est ille supra omnes divites pauper, et de illo stercore erectus est supra omnes opulentos ille inops: *ut sedeat cum potentibus populi*, quibus ait, *Sedebitis super duodecim sedes. Et sedem gloriæ hæreditatem dans eis*. Dixerant enim potentes illi, *Ecce nos dimisimus omnia, et secuti sumus te* (Math. xix, 28, 27), hoc votum potentissimo³ voverant.

7. Sed unde hoc eis, nisi ab illo, de quo hic continuo dictum est, *Dans votum vorenti*? Alioquin ex illis essent potentibus, quorum infirmatus est arcus. *Dans*, inquit, *votum vorenti*. Non enim Domino quisquam quidquam rectum voveret, nisi qui ab illo acciperet quod voveret. Sequitur, *Et benedixit annos justis*: ut cum illo scilicet sine fine vivat, cui dictum est, *Et anni tui non deficient* (Psalm. cx, 28). Ibi enistant anni, hic autem transcunt, imo pereunt: antequam enim veniant, non sunt; cum autem venerint, non erunt, quia cum suo fine veniunt. Horum autem duorum, id est, *Dans votum vorenti, et benedixit annos justis*; unum est quod facimus, alterum quod sumimus. Sed hoc alterum Deo largitore non sumitur, nisi cum ipso adjutore primum illud efficitur: *quia non in virtute potens est vir. Dominus infirmum faciet adversa-*

¹ Sola editio Lov., in prophetia.

² Sic Mss. At editi, idem est quod pauper.

³ Editi, potentissimum; dissentientibus manuscriptis.

rium ejus : illum scilicet qui homini voventi invidet, et restitit, nō valeat implere quod vovit. Potest ex ambiguo græco intelligi et *adversarium suum* (a). Cum enim Dominus possidere nos cœperit, profecto adversarius qui noster fuerat ipsius fit, et vincitur a nobis¹; sed non viribus nostris : quia non in virtute potens est vir. Dominus ergo infirmum faciet adversarium suum, Dominus sanctus : ut vincatur a sanctis, quos Dominus sanctus sanctorum effecit sanctos.

8. Ac per hoc, *Non gloriatur prudens in prudentia sua, et non gloriatur potens in potentia sua, et non gloriatur dives in divitiis suis : sed in hoc gloriatur qui gloriatur, intelligere et scire Dominum, et facere judicium et justitiam in medio terræ* (b). Non parva ex parte intelligit et scit Dominum, qui intelligit et scit etiam hoc a Domino sibi dari, ut intelligat et sciat Dominum. Quid enim habes, ait Apostolus, quod non accepisti? Si autem et accepisti, quid gloriaris, quasi non acceperis (I Cor. iv, 7)? Id est, quasi a te ipso tibi sit, nudo gloriaris. Facit autem judicium et justitiam, qui recte vivit. Recte autem vivit, qui obtemperat præcipienti Deo : et *finis præcepti*, id est, ad quod refertur præceptum, *charitas est de corde puro, et conscientia bona, et fide non ficta* (I Tim. i, 5, 15). Porro ista charitas, sicut Joannes apostolus testatur, *ex Deo est* (I Joan. iv, 7). Facere igitur judicium et justitiam, ex Deo est. Sed quid est, *in medio terræ*? Neque enim non debent facere judicium et justitiam qui habitant in extremis terræ? quis hoc dixerit? Cur ergo additum est, *in medio terræ*? Quod si non adderetur, et tantummodo diceretur, *facere judicium et justitiam*; magis hoc præceptum ad utrosque homines pertineret, et mediterraneos et maritimos. Sed ne quisquam putaret post finem vitæ, quæ in hoc agitur corpore, superesse tempus judicium justitiamque faciendi, quam dum esset in carne non fecit, et sic divinum evadi posse judicium; *in medio terræ*; mihi videtur dictum, cum quisque vivit in corpore. In hac quippe vita suam terram quisque circumfert, quam moriente homine recipit terra communis, resurgenti utique redditura. Proinde *in medio terræ*, id est, cum anima nostra isto terreno clauditur corpore, faciendum est judicium et justitia, quod nobis prosit in posterum, quando recipiet quisque secundum ea quæ per corpus gessit, sive bonum, sive malum (II Cor. v, 10). Per corpus quippe ibi dixit Apostolus, per tempus quo vivit in corpore. Neque enim si quis maligna mente atque impia cogitatione blasphemet, neque id ullis membris corporis operetur, ideo non erit reus, quia id non motu corporis gessit, cum hoc per illud tempus gesserit, quo gessit et corpus. Isto modo congruenter intelligi potest etiam illud quod in Psalmo legitur, *Deus autem rex noster ante sæcula operatus est salutem in medio terræ* (Psal. lxxiii, 12) : ut Dominus Jesus accipiat Deus noster qui est ante sæcula, quia per ipsum facta sunt sæcula, operatus salutem non

¹ Nonnulli codices, *ipsius fiet, et vincetur a nobis*. — sic MSS. 2031 et 253. M.

² Editi *operatus est*. Expunximus est, juxta manuscriptos.

(a) in græco nempe legimus, *antidicon autod*.

(b) hæc in vulgata habentur, Jerem. ix, 23, 24.

stram in medio terræ, cum Verbum caro factum est et terreno habitavit in corpore (Joan. i, 14).

9. Deinde posteaquam prophetatum est in his verbis Annæ, quomodo gloriari debeat qui gloriatur, non in se utique, sed in Domino; propter retributionem quæ in die judicii futura est, *Dominus, inquit, ascendit in cælos, et tonuit : ipse judicabit extrema terræ, quia justus est*. Prorsus ordinem tenuit confessionis fidelium. Ascendit enim in cœlum Dominus Christus, et inde venturus est ad vivos et mortuos judicandos. Nam *quis ascendit*, sicut dicit Apostolus, *nisi qui et descendit in inferiores partes terræ? Qui descendit, ipse est et qui ascendit super omnes cælos, ut adimpleret omnia* (Ephes. iv, 9 et 10.) Per nubes ergo suas tonuit; quas Spiritu sancto, cum ascendisset, implevit. De quibus ancillæ Jerusalem, hoc est ingrati vineæ, comminatus est apud Isaiam prophetam, ne pluant super eam imbrem (Isai. v, 6). Sic autem dictum est, *Ipse judicabit extrema terræ* : ac si diceretur; Etiam extrema terræ. Non enim alias partes non judicabit, qui omnes homines procul dubio judicabit. Sed melius intelliguntur extrema terræ, extrema hominis : quoniam non judicabuntur, quæ in melius vel in deterius medio tempore commutantur, sed in quibus extremis inventus fuerit qui judicabitur. Propter quod dictum est, *Qui perseveraverit usque in finem, hic salvus erit* (Matth. x, 22). Qui ergo perseveranter facit judicium et justitiam in medio terræ, non damnabitur, cum judicabuntur extrema terræ. *Et dat*, inquit, *virtutem regibus nostris* : ut non eos judicando condemnet. Dat eis virtutem, qua carnem sicut reges regant, et in illo mundum, qui propter eos sudit sanguinem, vincant. *Et exaltabit cornu Christi sui*. Quomodo Christus exaltabit cornu Christi sui? De quo enim supra dictum est, *Dominus ascendit in cælos*, et intellectus est Dominus Christus; ipse, sicut hic dicitur, *exaltabit cornu Christi sui*. Quis ergo est Christus Christi sui? An cornu exaltabit uniuscujusque fidelis sui, sicut ista ipsa in principio hujus hymni ait : *Exaltatum est cornu meum in Deo meo*? Omnes quippe unctos ejus chrismate, recte christos possumus dicere : quod tamen totum cum suo capite corpus unus est Christus. Hæc Anna prophetavit, Samuelis mater, sancti viri, multumque laudati. In quo quidem tunc figurata est mutatio veteris sacerdotii, et nunc impleta, quando infirmata est quæ multum erat in filiis, ut novum haberet in Christo sacerdotium sterilis, quæ peperit septem.

CAPUT V. — *De his quæ ad Heli sacerdotem homo Dei prophetico locutus est spiritu, significans sacerdotium, quod secundum Aaron institutum fuerat, auferendum.*

1. Sed hoc evidentius ad ipsum Heli sacerdotem missus loquitur homo Dei, cujus quidem nomen tacetur, sed intelligitur officio ministerioque suo sine dubitatione propheta (a). Sic enim scriptum est : *Et*

(a) « Hunc virum Dei Judæi Phinees esse dicunt, quem et Heliam autumant, » inquit Hieronymus in Traditionibus hebraicis, in librum I Regum. LIB. VIUS.

venit homo Dei ad Heli, et dixit: *Hæc dicit Dominus: Revelans¹ revelatus sum ad domum patris tui, cum essem in terra Ægypti servi in domo Pharaonis; et elegi domum patris tui ex omnibus sceptris Israel mihi sacerdotio fungi, ut ascenderent ad altare meum, et incenderent incensum, et portarent Ephod; et dedi domui patris tui omnia quæ sunt ignis filiorum Israel in escam. Et utquid respexisti in incensum meum, et in sacrificium meum impudenti oculo, et glorificasti filios tuos super me, benedicere primitias omnis sacrificii² in Israel in conspectu meo? Propter hoc hæc dicit Dominus Deus Israel: Dixi, Domus tua et domus patris tui transibunt coram me usque in æternum. Et nunc dicit Dominus: Nequaquam, sed glorificantes me glorificabo; et qui spernit me, spernetur. Ecce dies veniunt, et exterminabo semen tuum, et semen domus patris tui, et non erit tibi senior in domo mea omnibus diebus, et virum exterminabo tibi ab altari meo, ut deficiant oculi ejus, et defluat anima ejus; et omnis qui superaverit³ domus tuæ, decidet in gladio virorum. Et hoc tibi signum, quod veniet super duos filios tuos hos, Ophni et Phinees; una die morientur ambo. Et suscitabo mihi sacerdotem fidelem, qui omnia quæ in corde meo et quæ in anima mea, faciat; et ædificabo ei domum fidelem, et transibit eoram Christo meo omnibus diebus. Et erit, qui superaverit in domo tua, veniet adorare ei obolo argenti, dicens: *Jaeta me in unam partem sacerdotii tui manducare panem* (I Reg. II, 27-36).*

2. Non est ut dicatur ista prophetia, ubi sacerdotii veteris tanta manifestatione prænnuntiata mutatio est, in Samuele fuisse completa. Quanquam enim non esset de alia tribu Samuel, quam quæ constituta fuerat a Domino, ut serviret altari; tamen non erat de filiis Aaron (a), cujus progenies fuerat deputata, unde fierent sacerdotes: ac per hoc in ea quoque re gesta, eadem mutatio, quæ per Christum Jesum futura fuerat, adumbrata est: et ad vetus Testamentum proprie, figurate vero pertinebat ad novum, prophetia facti etiam ipsa, non verbi; id scilicet facti significans, quod verbo ad Heli sacerdotem dictum est per Prophetam. Nam fuerunt postea sacerdotes ex genere Aaron, sicut Sadoch et Abiathar regnante David (II Reg. xv), et alii deinceps, antequam tempus veniret, quo ista quæ de sacerdotio mutando tanto ante prædicta sunt, effici per Christum oportebat. Quis autem nunc fideli oculo hæc intuens non videat esse completa? quandoquidem nullum tabernaculum, nullum templum, nullum altare, nullum sacrificium, et ideo nec ullus sacerdos remansit Judæis, quibus, ut de semine Aaron ordinaretur, in Dei fuerat lege mandatum. Quod et hic commemoratum est, illo dicente propheta, *Hæc dicit Dominus Deus Israel: Dixi, Domus tua et domus patris tui transibunt coram me usque in æternum. Et nunc dicit Dominus: Nequaquam, sed*

glorificantes me glorificabo; et qui me spernit, spernetur. Quod enim nominat domum patris ejus, non eum de proximo patre dicere, sed de illo Aaron, qui primus sacerdos est institutus, de cujus progenie cæteri sequerentur, superiora demonstrant, ubi ait, *Revelatus sum ad domum patris tui, cum essent in terra Ægypti servi in domo Pharaonis, et elegi domum patris tui ex omnibus sceptris Israel, mihi sacerdotio fungi.* Quis patrum fuit⁴ hujus in illa Ægyptia servitute, unde, cum liberati essent, electus est ad sacerdotium, nisi Aaron? De hujus ergo stirpe isto loco dixit futurum fuisse, ut non essent ulterius sacerdotes: quod jam videmus impletum. Vigilet fides, præsto sunt res, ceruntur, tenentur, et videre volentium oculis ingeruntur. *Ecce, inquit, dies veniunt, et exterminabo semen tuum, et semen domus patris tui, et non erit tibi senior in domo mea omnibus diebus, et virum exterminabo tibi ab altari meo, ut deficiant oculi ejus, et defluat anima ejus.* Ecce dies qui prænnuntiati sunt, jam venerunt. Nullus sacerdos est secundum ordinem Aaron: et quicumque ex ejus genere est homo, cum videt sacrificium Christianorum toto orbe polere, sibi autem honorem illum magnum esse subtractum, deficiunt oculi ejus, et defluit anima ejus tabe mæroris.

3. Proprie autem ad hujus domum Heli, cui hæc dicebantur, quod sequitur pertinet: *Et omnis qui superaverit domus tuæ, decidet in gladio virorum. Et hoc tibi signum, quod veniet super duos filios tuos hos, Ophni et Phinees; die uno morientur ambo.* Hoc ergo signum factum est mutandi sacerdotii de domo hujus, quo signo significatum est mutandum sacerdotium domus Aaron. Mors quippe filiorum hujus significavit mortem, non hominum, sed ipsius sacerdotii de filiis Aaron. Quod autem sequitur, ad illum jam pertinet sacerdotem, cujus figuram gessit huic (a) succedendo Samuel. Proinde quæ sequuntur, de Christo Jesu, novi Testamenti vero sacerdote, dicuntur: *Et suscitabo mihi sacerdotem fidelem, qui omnia quæ in corde meo et quæ in anima mea, faciat; et ædificabo ei domum fidelem.* Ipsa est æterna et superna Jerusalem. *Et transibit, inquit, eoram Christo meo omnibus diebus. Transibit, dixit, conversabitur: sicut superius dixerat de domo Aaron, Dixi, Domus tua et domus patris tui transibunt coram me in æternum.* Quod autem ait, *eoram Christo meo transibit;* de ipsa domo utique intelligendum est, non de illo sacerdote, qui est Christus ipse Mediator atque Salvator. Domus ergo ejus coram illo transibit. Potest et *transibit* intelligi de morte ad vitam, omnibus diebus, quibus peragitur usque in finem sæculi hujus ista mortalitas. Quod autem ait Deus, *Qui omnia quæ in corde meo, et quæ in anima mea, faciat;* non arbitremur habere animam Deum, cum sit conditor animarum; sed ita hoc de Deo tropice, non proprie, dicitur, sicut manus et pedes et alia corporis membra. Et, ne secundum hoc credatur homo in carnis hujus effigie factus ad imaginem Dei, adduntur et alæ, quas utique

¹ Apud Lov. omissum est *Revelans*; quod quidem reperitur in cæteris editis ac plerisque manuscriptis et in græco Septuaginta.

² Mss.: *Benedicere primitias nominis sacrificii.*

³ Sic Mss. In editis, *supererit.*

(a) Vid. *Retract.* lib. 2, cap. 43, n. 2.

⁴ Sic omnes Mss. At editi, *quis pater fuit.*

(a) Huic, scilicet Heli.

non habet homo; et dicitur Deo, *Sub umbra alarum tuarum protege me* (Psal. xvi, 8): ut intelligant homines de illa ineffabili natura, non propriis, sed translatis rerum vocabulis ista dici.

4. Quod vero adjungitur, *Et erit, qui superaverit in domo tua, veniet adorare ei*: non proprie de domo dicitur hujus Heli, sed illius Aaron, de qua usque ad adventum Jesu Christi homines remanserunt, de quo genere etiam nunc usque non desunt. Nam de illa domo hujus Heli jam supra dictum erat, *Et omnis qui superaverit domus tuæ, decidet in gladio virorum*. Quomodo ergo hic vere dici potuit, *Et erit, qui superaverit in domo tua, veniet adorare ei*; si illud est verum, quod ultoro gladio nemo inde supererit: nisi quia illos intelligi voluit, qui pertinent ad stirpem, sed illius totius sacerdotii secundum ordinem Aaron? Ergo si de illis est predestinatis reliquiis, de quibus alius propheta dixit, *Reliquiæ salvæ fient* (Isai. x, 22); unde et Apostolus, *Sic ergo, inquit, et in hoc tempore reliquiæ per electionem gratiæ salvæ factæ sunt* (Rom. xi, 5); quia de talibus reliquiis bene intelligitur esse de quo dictum est, *Qui superaverit in domo tua: profecto credit in Christum*; sicut temporibus Apostolorum ex ipsa gente plurimi crediderunt; neque nunc desunt, qui, licet rarissime, tamen credant, et impletur in eis quod hic iste homo Dei continuo secutus adjunxit, *Veniet adorare ei obolo argenti*: cui adorare, nisi illi summo sacerdoti, qui et Deus est? Neque enim in illo sacerdotio secundum ordinem Aaron, ad hoc veniebant homines ad templum vel altare Dei, ut sacerdotem adorarent. Quid est autem quod ait, *obolo argenti*, nisi brevitate verbi fidei, de quo commemorat Apostolus dictum, *Verbum consummans et brevians faciet Dominus super terram* (Rom. ix, 28; Isai. x, 23); Argentum autem pro eloquio poni, Psalmus testis est, ubi canitur: *Eloquia Domini eloquia casta, argentum igne examinatum* (Psal. xi, 7).

5. Quid ergo dicit iste, qui venit adorare sacerdoti Dei et sacerdoti Deo? *Jacta me in unam partem sacerdotii tui, manducare panem*. Nolo in patrum meorum collocari honore, qui nullus est: jacta me in partem sacerdotii tui. *Elegi enim abjectus esse in domo Dei* (Psal. lxxxiii, 11): qualecumque et quantulumcumque membrum esse cupio sacerdotii tui. Sacerdotium quippe hic ipsam plebem dicit, ejus plebis ille sacerdos est Mediator Dei et hominum homo Christus Jesus. Cui plebi dicit apostolus Petrus, *Plebs sancta, regale sacerdotium* (I Petr. ii, 9). Quamvis nonnulli, *sacrificii tui* sint interpretati; non, *sacerdotii tui*: quod nihilominus eundem significat populum christianum. Unde dicit apostolus Paulus, *Unus panis, unum corpus multi sumus* (I Cor. x, 17). Quod ergo addidit, *manducare panem*, etiam ipsum sacrificii genus eleganter expressit, de quo dicit sacerdos ipse,

¹ Sola editio Lov., *credet*.

² Vind. Am. Er. et plerique Mss., *in eo*.

³ Apud Lov., *quia*.

⁴ Apud Lov. additur, *in Christo. Et iterum, Exhibeatis, inquit, corpora vestra hostiam vivam*. Ceteri libri omittunt, *in Christo*. Nonnulli tamen manuscripti cum Vind. Am. et Er. alium subjiciunt locum ex Epist. ad Roman. xii, 1: *Et iterum, Exhibeatis, inquit, corpora*, etc.

Panis quem ego dederò, caro mea est pro sæculi vita (Joan. vi, 52). Ipsum est sacrificium, non secundum ordinem Aaron, sed secundum ordinem Melchisedech: qui legit, intelligat. Brevis itaque ista confessio et salubriter humilis, qua dicitur, *Jacta me in partem sacerdotii tui, manducare panem*, ipse est obolus argenti; quia et brevis est¹, et eloquium Domini est habitantis in corde credentis. Quia enim dixerat superius dedisse se domui Aaron cibos de victimis veteris Testamenti, ubi ait, *Dedi domui patris tui omnia quæ sunt ignis filiorum Israel in escam*; hæc quippe fuerant sacrificia Judæorum: ideo hic dixit, *manducare panem*; quod est in novo Testamento sacrificium Christianorum.

CAPUT VI. — *De Judaico sacerdotio et regno, quæ cum in æternum dicantur statuta², non permanent; ut alia intelligantur, quorum spondetur æternitas³.*

1. Cum igitur hæc tanta tunc altitudine prænuntiata sint, tanta nunc manifestatione clarescant⁴; non frustra tamen moveri quispiam potest, ac dicere: Quomodo confidimus venire omnia⁵, quæ in libris illis ventura prædicta sunt, si hoc ipsum quod ibi divinitus dictum est, *Domus tua et domus patris tui transibunt coram me in æternum*, effectum habere non potuit? Quoniam videmus illud sacerdotium fuisse mutatum; et quod illi domui promissum est, nec sperari aliquando complendum: quia illud quod ei reprobo mutatoque succedit, hoc potius prædicatur æternum. Hoc qui dicit, nondum intelligit, aut non recollit, etiam ipsum secundum ordinem Aaron sacerdotium, tanquam umbram futuri æterni sacerdotii constitutum: ac per hoc quando ei æternitas promissa est, non ipsi umbræ ac figuræ, sed ei quod per ipsam adumbrabatur figurabaturque, promissum est. Sed ne putaretur ipsa umbra esse mansura, ideo etiam mutatio ejus debuit prophetari.

2. Regnum quoque isto modo etiam Sæulis ipsius, qui certe reprobatus atque rejectus est, futuri regni erat umbra in æternitate mansuri. Oleum quippe illud quo unctus est, et ab eo chrismate christus est dictus, mystice accipiendum, et magnum sacramentum intelligendum est: quod in eo tantum veneratus est ipse David, ut percusso corde pavitaverit, quando in tenebroso occultatus antro, quo etiam Saül urgente intraverat necessitate naturæ, exiguum particulam vestis ejus retrorsum latenter abscedit, ut haberet unde monstraret, quomodo ei pepercerit, cum posset occidere; atque ita suspicionem de animo ejus, qua sanctum David putans iniquicum suum vehementer persequabatur, auferret. Ne itaque reus esset tanti sacramenti in Saüle violati, quia vel indumentum ejus sic atrectavit, extimuit. Ita enim scriptum est: *Et*

¹ Sola editio Lov., *quia et brevis est*.

² Apud Lov., *statuta*.

³ Sic Mss. At editi, *ut alia intelligantur, quæ spondentur æterna*.

⁴ Sic Mss. At editi, *quanta nunc manifestatione clarescunt*.

⁵ Vind. et Am.: *Quomodo confidimus venire omnia*. Fr. et Lov., *Quomodo confidimus evitare omnia*. Mss. *evitare*.

percussit cor David super eum, quia abstulit pinnulam chlamydis ejus. Viris autem, qui cum illo erant, et ut Saül in manus suas traditum interimeret suadebant, *Non mihi, inquit, contingat a Domino, si fecero hoc verbum domino meo christo Domini, inferre manum meam super eum; quia christus Domini est hic* (1 Reg. xiv, 6, 7). Huic ergo umbræ futuri non propter ipsam, sed propter illud quod præfigurabat, tanta venerationis exhibebatur. Unde et illud quod ait Saül Samuel, *Quoniam non servasti mandatum meum, quod mandavi tibi Dominus; quemadmodum nunc paraverat Dominus regnum tuum usque in æternum super Israel, et nunc regnum tuum non stabit tibi; et quæret Dominus sibi hominem secundum cor suum, et mandabit ei Dominus esse in principem super populum suum; quia non custodisti quæ mandavi tibi Dominus* (Id. xiii, 13, 14): non sic accipiendum est, ac si ipsum Saül Deus in æternum præparaverit regnaturum, et hoc postea noluerit servare peccanti; neque enim eum peccatum esse nesciebat: sed præparaverat regnum ejus, in quo figura esset regni æterni. Ideo addidit, *Et nunc regnum tuum non stabit tibi.* Scilicet ergo, et stabit, quod in illo significatum est: sed non huic stabit, quia non in æternum ipso fuerat regnaturus, nec progenies ejus, ut saltem per posteros alterum sibi succedentes videretur impleri quod dictum est, *in æternum.* Et quæret, inquit, Dominus sibi hominem: sive David, sive ipsam Mediatorem significans Testamenti novi, qui figurabat in christo etiam quo unctus est ipse David et progenies ejus. Non autem quasi nesciat ubi sit, ita Deus sibi hominem quærit: sed per hominem more hominum loquitur; quia et sic loquendo nos quærit. Non solum enim Deo Patri, verum etiam ipsi quoque Unigenito ejus, qui venit querere quod perierat (Luc. xix, 10), usque adeo jam gramus noti, ut in ipso essemus electi ante constitutionem mundi (Ephes. i, 4). Quæret sibi ergo dixit, suum habebit¹. Unde in latina lingua hoc verbum accipit præpositionem, et, Acquirit, dicitur: quod satis apertum est quid significet. Quanquam et sine additamento præpositionis Quærerem intelligatur Acquirere: ex quo luca vocantur et quæstus.

CAPUT VII. — *De disruptione regni Israelitici, qua præfiguratur perpetua divisio Israelis spiritualis ab Israele carnali.*

1. Rursus peccavit Saül per inobedientiam, et rursus Samuel ait illi in verbo Domini: *Quia sprevisisti verbum Domini, sprevit te Dominus, ut non sis rex super Israel.* Et rursus pro eodem peccato, cum id confiteretur Saül, et veniam precaretur, rogaretque Samuelem, ut revertetur cum illo ad placandum Deum: *Non revertetur, inquit, tecum; quia sprevisisti verbum Domini, et spernet te Dominus, ne sis rex super Israel. Et convertit Samuel faciem suam, ut abiret: et tenuit Saül pinnulam diploidis ejus, et disruptit eam. Et dixit ad eum Samuel, Disrupt Dominus regnum ab*

Israel de manu tua hodie, et dabit proximo tuo bono super te, et dividetur Israel in duo: et non convertetur, neque poenitebit eum; quoniam non est sicut homo, ut poeniteat eum: ipse minatur, et non permanet (1 Reg. xv, 23-29). Iste cui dicitur, *Spernet Dominus, ne sis rex super Israel;* et, *Disrupt Dominus regnum ab Israel de manu tua hodie;* quadraginta annos regnavit super Israel (a), tanto scilicet spatio temporis, quanto et ipse David, et audivit hoc primo tempore regni sui: ut intelligamus ideo dictum, quia nullus de stirpe ejus fuerat regnaturus; et respiciamus ad stirpem David, unde exortus est secundus Mediator Dei et hominum homo Christus Jesus.

2. Non autem habet Scriptura, quod in plerisque latinis codicibus legitur, *Disrupt Dominus regnum Israel de manu tua;* sed sicut a nobis positum est inventum in græcis, *Disrupt Dominus regnum ab Israel de manu tua:* ut hoc intelligatur, *de manu tua;* quod est, *ab Israel.* Populi ergo Israel personam figurato gerebat homo iste, qui populus regnum fuerat amissurus, Christo Jesu Domino nostro per novum Testamentum, non carnaliter, sed spiritualiter regnataro. De quo cum dicitur, *Et dabit illud proximo tuo,* ad carnis cognationem id refertur: ex Israel enim Christus secundum carnem, unde et Saül. Quod vero additum est, *bono super te,* potest quidem intelligi, *meliori te;* nam et quidam sic sunt interpretati: sed melius sic accipitur, *bono super te,* ut quia ille bonus est, ideo sit super te¹, juxta illud aliud propheticum, *Donec ponam omnes inimicos tuos sub pedibus tuis* (Psal. cix, 1). In quibus est et Israel, cui suo persecutori regnum abstulit Christus. Quamvis fuerit illic et Israel, in quo dolus non erat (Joan. i, 47), quoddam quasi frumentum illarum palearum. Nam utique inde erant Apostoli, inde tot martyres, quorum prior Stephanus; inde tot Ecclesie, quas apostolus Paulus commemorat, in conversione ejus magnificantes Deum (Galat. i, 24).

3. De qua re non dubito intelligendum esse quod sequitur, *Et dividetur Israel in duo:* in Israel scilicet inimicum Christo, et Israel adhærentem Christo; in Israel ad ancillam, et Israel ad liberam pertinentem. Nam ista duo genera primum simul erant, velut Abraham adhuc adhæretet ancillæ, donec sterilis per Christi gratiam fecundata clamaret, *Ejice ancillam et filium ejus* (Gen. xxi, 10). Propter peccatum quidem Salomonis regnante filio ejus Roboam, scimus Israel in

¹ Apud Lev. omissum est, *super te.*

(a) Ita docet etiam infra, lib. 18, cap. 20, et sic legitur Actuum xiii, 21. Nam in libris Regum non recensentur anni regni Saülis, sicut postea aliorum regum. Josephus in libri 6 antiquitatum verbis extremis: *Ebasilense de (Saül) Simonelou zontos etè octò pros tois deca, teleutantos de duo cai ficosi: Regnavit Saül vivente Samuele annis duodringenti, mortuo eo viginti duo, unde efficiuntur quadraginta.* Communis tamen opinio est, quam sequuntur Eusebius et Sulpicius Severus, Samuelis annos comprehendit sub illis quadraginta annis, quibus Saül regnasse dicitur, quia ex sacra chronologia colliguntur tantum quadraginta anni a morte Heli summi sacerdotis, qui judicavit Israel usque ad initium regni David, quamquam præcise quot annos Saül post mortem Samuelis, vel etiam ab initio regni vixit, non inter omnes conveniat. Cognosc.

¹ Ita magno consensu veteres libri. At editi: *Quæret sibi ergo dixit, pro eo ac si diceret, quem suum esse jam novit, sibi esse familiarem aliis ostendet. Unde, etc.*

duo fuisse divisam, atque ita perseverasse, habentibus singulis partibus reges suos, donec illa gens tota a Chaldæis esset ingenti vastatione subversa atque translata. Sed hoc quid ad Saûlem, cum si tale aliquid comminandum esset, ipsi David fuerit potius comminandum, cujus erat filius Salomon? Postremo nunc inter se gens Hebræa divisa non est, sed indifferenter in ejusdem erroris societate dispersa per terras. Divisio vero illa, quam Deus sub persona Saûlis, illius regni et populi figuram gerentis, eidem regno populoque minatus est, æterna atque immutabilis significata est, per hoc quod adjunctum est, *Et non convertetur, neque pœnitebit eum; quoniam non est sicut homo, ut pœniteat eum: ipse ninatur, et non permanet*: id est, homo minatur, et non permanet; non autem Deus, quem non pœnitet, sicut hominem. Ubi enim legitur quod pœniteat eum, mutatio ferum significatur, immutabili præscientia manente divina. Ubi ergo non pœnitere dicitur, non mutare intelligitur¹.

4. Prorsus insolubilem videmus per hæc verba prolatam divinitus fuisse sententiam de ista divisione populi Israel, et omniſio perpetuam. Quicumque enim ad Christum transierunt, vel trahseunt, vel transibunt inde, non erant inde secundum Dei præscientiam, non secundum generis humani unam eandemque naturam. Prorsus quicumque ex Israelitis adhærentes Christo perseverant in illo, nunquam erunt cum eis Israelitis, qui ejus inimici usque in finem vite hujus esse persistunt: sed in divisione, que hic prænuntiata est, perpétuè permanebunt. Nihil enim prodest Testamentum vetus de monte Sina in servitum generans (Galat. iv, 24), nisi quid testimonium perhibet Testamento novo. Alioquin quamdiu legitur Moyses, velamen super corda eorum positum est: cum autem qui que Iude transierit ad Christum, auferetur velamen (1 Cor. iii, 15 et 16). Transéuntium quippe intentio ipsa mutatur de vetere ad novum; ut non jam quisque intendat accipere carnalem, sed spirituales felicitatem. Propter quod ipse magnis propheta Samuel, antequam unxisset regem Saûl, quando exclamavit ad Dominum pro Israel, et exaudivit eum; et cum offerret holocaustosim², accedentibus alienigenis ad pugnam contra populum Dei, tonuit Dominus super eos, et confusi sunt, et offenderunt coram Israel, atque superati sunt: assumi sit lapidem unum, et statuit illum inter Massephat³ novam et veterem, et vocavit nomen ejus Abenezzer, quod est latine Lapis adjutoris⁴: et dixit, *Usque huc adjuvit nos Dominus* (1 Reg. vii, 5 12). Massephat interpretatur Intentio. Lapis ille adjutoris medietas est Salvatoris, per quem transeundum est a Massephat veteri ad novam, id est, ab intentione qua expectabatur in carnali regno beatitudo falsa carnalis, ad intentionem qua per novum Testamentum expectatur in regno cælorum

beatitudo verissima spiritualis: qua quoniam nihil est melius, huc usque adjuvat Deus.

CAPUT VIII. — *De promissionibus ad David in filio ejus, quæ nullatenus in Salomone, sed plenissime inveniuntur in Christo.*

1. Jam nunc video esse monstrandum quid ipsi David, qui Saûli successit in regnum, cujus mutatione finalis illa mutatio figurata est, propter quam divinitus cuncta dicta, cuncta conscripta sunt, Deus promiserit, quod ad rem qua de agnibus pertinet. Cum regi David multa prospera provenissent, cogitavit facere Deo domum, templum illud scilicet excellentissime difamatum, quod a rege Salomone filio ejus postea fabricatum est. Hoc eo cogitante, factum est verbum Domini ad Nathan prophetam, quod perferret ad regem. Ubi cum dixisset Deus quod non ab ipso David sibi edificaretur domus, neque per tantum tempus se mandasse cuiquam in populo suo, ut sibi fieret domus cedrina: *Et nunc, inquit, hæc dices servo meo David: Hæc dicit Dominus omnipotens: Accepi te de ovili ovium, ut esses in ducem super populum meum in Israel, et eram tecum in omnibus quibus ingrediebaris, et exterminavi omnes inimicos tuos a facie tua, et feci te nominatum secundum nomen magnorum qui sunt super terram: et ponam locum populo meo Israel, et plantabo illum, et inhabitabit securum, et non sollicitus erit ultra; et non apponet filius iniquitatis humiliare eum, sicut ab initio a diebus quibus constitui iudices super populum meum Israel. Et requiem tibi dabo ab omnibus inimicis tuis: et nuntiabit tibi Dominus, quoniam domum edificabis ipsi. Et erit cum repleti fuerint dies tui, et dormies cum patribus tuis, et suscitabo semen tuum post te, qui erit de ventre tuo, et præparabo regnum ejus. Hic edificabit mihi domum nomini meo, et dirigam thronum illius usque in æternum. Ego ero illi in patrem, et ille erit mihi in filium. Et si venerit iniquitas ejus, redarguam illum in virga virorum; et in tactibus filiorum hominum: misericordiam autem meam non amoveam ab eo, sicut amovi a quibus amovi a facie mea: et fidelis erit domus ejus, et regnum ejus usque in æternum coram me, et thronus ejus erit erectus usque in æternum* (1 Reg. vii, 8-16).

2. Hanc tam grandem promissionem qui putat in Salomone fuisse completam, multum errat. Attendit enim quod dictum est, *Hic edificabit mihi domum*; quoniam Salomon templum illud nobile exstruxit: et non attendit, *Fidelis erit domus ejus, et regnum ejus usque in æternum coram me*. Attendat ergo et aspiciat Solomonis domum plenam mulieribus alienigenis

¹ Hic restituitur ex Mss. particula, in, ante, Israel; respondens græco: *epi*, ad I. XX.

² Sic Mss. Editi vero hic et cap. 12, et nuntiavit.

³ Editi omittunt, et. Habent Mss. juxta LXX: proque, dormies, nonnulli ferunt, dormierit.

⁴ Sola editio Lov. Et cum venerit. — Sic etiam omnes codices nostri, excepto 2030.

⁵ Editi, a quibus amovi faciem meam. At proke notæ manuscriptorum Gervasianus, Colbertinus, etc., concordant cum græco Septuaginta, *aph'ôn apestêsa ek prosôpon* *mon*.

¹ Sola editio Lov., non mutari intelligitur.

² Sic Mss. juxta Septuaginta. At editi, holocaustum: cui verbo Fr. addit, simul.

³ Editi, Massephat. Veteres autem libri, ut apud septuaginta, Massephat.

⁴ Editi, adjutorii. At Mss., adjutoris: juxta Septuaginta, *abenezzer*.

contentibus deos falsos, et ipsum ab eis regem aliquando sapientem in eandem idololatricam seductum atque dejectum: et non audeat existimare Deum vel hoc profuturum mendaciter, vel talem Salomonem dominumque ejus futuram non potuisse præscire. Non sine autem deberemus ambigere, nec si non in Christo Domino nostro, qui factus est ex semine David secundum carnem (Rom. 1, 3); jam videremus ista compleri; ne vane atque inaniter hic affum aliquem requiramus, sicut carnales Judæi. Nam et ipsi usque adeo filium, quem loco isto regi David promissum legunt, intelligunt non fuisse Salomonem, ut eo qui promissus est tanta jam manifestatione declarato adhuc mirabili cæcitate alium sperare se dicant. Facta est quidem nonnulla imago rei future etiam in Salomone, in eo quod templum ædificavit, et pacem habuit secundum nomen suum (Salomon quippe Pacificus est latine), et in exordio regni sui mirabiliter laudabilis fuit: sed eadem sua persona per umbram futuri prænuntiabat etiam ipse Christum Dominum nostrum; non exhibebat. Unde quædam de illo ita scripta sunt; quasi de ipso ista prædicta sint, dum Scriptura sancta etiam rebus gestis prophetans, quodammodo in eo figuram delineat futurorum. Nam præter libros divinæ historię, ubi regnasse narratur, Psalmus etiam septuagesimus primus titulo nominis ejus inscriptus est: in quo tam multa dicuntur, quæ omnino ei convenire non possunt, Domino autem Christo aptissima perspicuitate conveniunt, ut evidenter appareat, quod in illo figura qualiscumque adumbrata sit, in isto autem ipsa veritas præsentata. Notum est enim quibus terminis regnum conclusum fuerit Salomonis: et tamen in eo psalmo legitur, ut alia taceam, *Dominabitur a mari usque ad mare, et a flumine usque ad terminos orbis terræ* (Psal. LXXI, 8); quod in Christo videmus impleri. A flumine quippe dominandi sumpsit exordium; ubi baptizatus a Joanne, eodem monstrante cœpit agnoscere a discipulis, qui eum non solum magistrum, verum etiam Dominum appellaverunt (a).

3. Nec ob aliud, vivente adhuc patre suo David, regnare Salomon cœpit; quod nulli illorum regum contigit, nisi ut hinc quoque satis eluceat non esse ipsum, quem prophetia ista præsignat (b), quæ ad ejus patrem loquitur; dicens: *Et erit, cum repleti fuerint dies tui, et dormies cum patribus tuis, et suscitabo semen tuum post te, qui erit de ventre tuo; et præparabo regnum illius*. Quomodo ergo propter id quod sequitur, *Hic ædificabit mihi domum*; iste Salomon putabitur prophetatus: et non potius propter id quod præcedit, *Cum repleti fuerint dies tui, et dormies cum patribus tuis; suscitabo semen tuum post te*, alius pacificus intelligitur esse promissus, qui non ante, sicut iste, sed post mortem David prænuntiatus est suscitandus? Quamlibet enim longo interposito tempore Jesus Christus veniret, procul dubio post mortem

regis David; cui sic est promissus; eum venire oportebat; qui ædificaret domum Dei, non de lignis et lapidibus, sed de hominibus, qualem illam ædificare gaudemus. Huic enim domui dicit Apostolus, hoc est, fidelibus Christi: *Templum enim Dei sanctum est quod estis vos* (1 Cor. III, 17).

CAPUT IX. — *Quam similis in Psalmo octogesimo octavo sit prophetia de Christo; his quæ in Regiõrum libris Nathan propheta promittuntur.*

Propter quod et in Psalmo octogesimo et octavo; cujus est titulus, *Intellectus ipsi Æthan Israelitæ*, commemoratur promissiones Dei factæ regi David, et istis, quæ in libro Regnorum sunt posita, quædam ibi similia dicuntur; sicut est: *Juravi David seruo meo: Usque in æternum præparabo semen tuum. Et iterum: Tunc locusus es in aspectu filiis tuis, et dixisti: Posui adjutorium super potentem, et exaltavi electum de populo meo. Inveni David servum meum, in oleo sancto meo unxi eum. Manus enim mea auxiliabitur ei, et brachium meum confortabit eum. Non proficiet inimicus in eo, et filius iniquitatis non apponet nocere ei. Et concidam inimicos ejus a facie ejus, et eos qui oderunt eum, fugabo. Et veritas mea et misericordia mea cum ipso, et in nomine meo exaltabitur cornu ejus. Et ponam in mari manum ejus, et in fluminibus dexteram ejus. Ipse invocabit me: Pater meus es tu, Deus meus et susceptor salutis meæ. Et ego primum genitum ponam illum; excelsum apud reges terræ. In æternum servabo illi misericordiam meam, et testamentum meum fidele ipsi. Et ponam in sæculum sæculi semen ejus; et thronum ejus sicut dies cæli* (Psal. LXXXVIII, 4, 5, 20-30). Quæ omnia de Domino Jesu intelliguntur; quando recte intelliguntur, sub nomine David, propter formam servi; quam de semine David idem Mediator assumpsit ex virgine. Continuo etiam dicitur de peccatis filiorum ejus tale aliquid, quale in Regnorum libro positum est, et quasi de Salomone proclivius accipitur. Ibi namque, hoc est in Regnorum libro, *Et si venerit, inquit, iniquitas ejus, redarguam illum in virga virorum, et in tactibus filiorum hominum: misericordiam autem meam non amoveam ab eo* (II Reg. VII, 14 et 15): tactibus significans plagas correctionis. Unde illud est, *Ne tetigeritis christos meos* (Psal. CIV, 15). Quod quid est aliud, quam, *Ne læseritis?* In Psalmo vero cum ageret tanquam de David, ut quiddam ejusmodi etiam ibi diceret, *Si dereliquerint, inquit, filii ejus legem meam, et in judiciis meis non ambulaverint; si justificationes meas profunaverint, et mandata mea non custodierint; visitabo in virga iniquitates eorum, et in flagellis delicta eorum: misericordiam autem meam non dispergam ab eo* (Psal. LXXXVIII, 31-34). Non dixit, Ab eis, cum loqueretur de illis ejus, non de ipso: sed dixit, *ab eo*; quod bene intellectum tantumdem valet. Non enim Christi ipsius, quod est caput Ecclesiæ, possent inveniri ulla peccata, quæ opus esset humanis correctionibus servata misericordia divinitus coerceri; sed in ejus

^a Vind. Am. Fr. et aliquot manuscripti, *apertissima*.

(a) Conf. Epist. cont. Donatist., de Unit. Eccles., n. 22.

(b) Conf. Iactant. Instit. lib. 4, cap. 15, § 24 et seqq.

¹ Mss. 2050 et 2061, *sedem ejus*. 2:

corpore ac membris, quod populus ejus est. Ideo in libro Regnorum, *iniquitas ejus dicitur*; in Psalmo autem, *florum ejus*: ut intelligamus de ipso dici quodammodo, quod de ejus corpore dicitur. Propter quod etiam ipse de caelo, cum corpus ejus, quod sunt fideles ejus, Saulus persequeretur, *Saule, inquit, Saule, quid me persequeris (Act. ix, 4)?* Deinde in consequentibus Psalini, *Neque nocebo*, inquit, *in veritate mea, neque profanabo testamentum meum, et quæ procedunt de labiis meis non reprobo. Semel juravi in sancto meo, si David mentiar*: id est, nequamquam David mentiar. Solet enim sic loqui Scriptura. Quid autem non mentiatur, adjungit, et dicit, *Semen ejus in æternum manebit; et sedes ejus sicut sol in conspectu meo, et sicut luna perfecta in æternum, et testis in caelo fidelis (Psal. lxxxviii, 34-38).*

CAPUT X. — *Quam diversa acta sunt in regno terrenæ Jerusalem, ab his quæ promiserat Deus, ut intelligeretur promissionis veritas ad alterius Regis et regni gloriam pertinere.*

Post hæc tantæ promissionis validissima firmamenta, ne putarentur in Salomone completa, tanquam id speraretur, nec inveniretur: *Tu vero, inquit, repulisti, et ad nihilum deduxisti, Domine. Hoc quippe factum est de regno Salomonis in posteris ejus, usque ad eversionem ipsius terrenæ Jerusalem, quæ regni ejusdem sedes fuit; et maxime ipsius templi labem, quod fuerat a Salomone constructum (a). Sed ne ob hoc putaretur Deus contra sua promissa fecisse, continuo subjecit, Distulisti Christum tuum (Psal. lxxxviii, 39). Non est ergo ille Salomon, sed nec ipse David, si dilatatus est Christus Domini. Cum enim christi ejus dicerentur omnes reges mystico illo chrismate consecrati, non solum a rege David et deinceps, sed ab illo etiam Saule, qui populo eidem rex primus est unctus (I Reg. xlv, 7); ipse quippe David eum christum Domini appellat: erat tamen unus verus Christus, cujus illi figuram prophetica notatione gestabant; qui secundum opinionem hominum, qui eum putabant in David vel in Salomone intelligendum, differebatur in longum; secundum autem dispositionem Dei venturus suo tempore parabatur. Interea dum ille differtur, quid factum sit de regno terrenæ Jerusalem, ubi sperabatur utique regnaturus, secutus iste psalmus adjunxit, atque ait: *Evertisti testamentum servi tui, profanasti in terra sanctitatem ejus. Destruxisti omnes macerias ejus, posuistimunitiones ejus in formidinem. Diripuerunt cum omnes**

¹ Aliquot manuscripti, *Avertisti*. Græce est, *καταστρέψαι*.

(a) De eversione regni hæc Josephus, Antiquitatum Judaicarum libro 10, cap. 11: « Atque hic fuit Davidici generis regnum exitus, qui unus et viginti regnaverunt deinceps, idque temporis spatium quingentos et quindecim annos continet, et menses insuper sex cum diebus septem, annumeratis viginti annis primi regis Saûlis, qui fuit tribus alterius; qui si subtrahantur, a Davide ad ultimum annum Sedechie fluxerunt anni quadringenti nonaginta quatuor et menses sex. » Item Josephus scribit templum esse incensum annis ex quo extractum fuerat, quadringentis septuaginta, mensibus sex et diebus decem additis: quem sequitur Bonarus. Eusebius et Cedrenus numerant annos quadringentos quadraginta duos; Hebraei, annos quadringentos octoginta tres; et alii rursus aliter. C. G. G. Z. S.

transcuntes viam, factus est opprobrium vicinis suis. Extulisti dexteram inimicorum ejus, jucundasti omnes inimicos ejus. Avertisti adjutorium gladii ejus, et non es opululentus ei in bello. Dissolvisti eum ab emundatione, sedem ejus in terram collidisti. Minuisti dies sedis ejus, persuadisti eum confusione (Psal. lxxxviii, 40-46). Hæc omnia venerunt super ancillam Jerusalem, in qua regnaverunt nonnulli etiam filii liberæ, regnum illud tententes in dispensatione temporaria: regnum autem cælestis Jerusalem, cujus erant filii, in vera fide habentes, et in vero Christo sperantes. Quomodo autem ista venerint super illud regnum, index est rerum gestarum, si legatur, historia.

CAPUT XI. — *De substantia populi Dei, quæ per susceptionem carnis in Christo est: qui solus crucendi ab inferis animam suam habuit potestatem.*

Post hæc autem prophetata ad precandum Deum Propheta convertitur: sed et ipsa precatio prophetatio est. *Usquequo, Domine, avertis in finem (Psal. lxxxviii, 47)?* subauditur, *faciem tuam*: sicut talibi dicitur, *Usquequo avertis faciem tuam a me (Psal. xii, 1)* Nam ideo quidam codices hic non habent, *avertis*; sed, *avertis*: quanquam possit intelligi, *Avertis misericordiam tuam, quam promisisti David*. Quod autem dixit, *in finem*; quid est, nisi, *Usque in finem*? Qui finis intelligendus est ultimum tempus, quando in Christum Jesum etiam illa gens est creditura, ante quem finem illa fieri oportebat, quæ superius ærumnosa deslevisit. Propter quæ et hic sequitur, *Exardescet sicut ignis iratus. Memento quæ est mea substantia. Nihil hic melius, quam ipse Jesus intelligitur, substantia populi ejus, ex quo natura est carnis ejus. Non enim vane, inquit, constitutisti omnes filios hominum. (Psal. lxxxviii, 48). Nisi enim esset unus Filius hominis substantia Israel, per quem Filium hominis liberarentur multi filii hominum, vane utique constituti essent omnes filii hominum. Nunc vero omnis quidem humana natura per peccatum primi hominis in vanitatem de veritate collapsa est, propter quod dicit alius psalmus, *Homo vanitati simul factus est, dies ejus velut umbra prætereunt (Psal. cxliii, 4)*: sed non vane Deus constituit omnes filios hominum; quia et multos a vanitate liberat per mediatorem Jesum, et quos liberandos non esse præcevit, ad utilitatem liberandorum et comparationem duarum inter se a contrario civitatum, non utique vane in totius rationalis creaturæ pulcherrima atque justissima ordinatione constituit. Deinde sequitur, *Quis est homo qui vivet, et non videbit mortem; eruet animam suam de manu inferi (Psal. lxxxviii, 49)?* Quis est iste, nisi substantia illa Israel ex semine David, Christus Jesus? De quo dicit Apostolus, *quod surgens a mortuis, jam non moritur, et mors ei ultra non dominabitur (Rom. vi, 9)*. Sic enim vivet et non videbit mortem, ut tamen mortuus fuerit; sed animam suam eruerit de manu inferi, quo propter quorundam solvenda inferni vincula descenderat: crucerit autem potestate illa, de qua in Evangelio dicit, *Potestatem**

¹ Editi, *successionem*. Emendantur ex manuscriptis.

² Sic omnes MSS. At editi, *quæ propter quorundam solvenda peccatorum vincula ad inferna descendit*.

habeo peccandi animam meam, et potestatem habeo iterum veniendi eam (Joan. i, 18).

CAPUT XII. — *Ad quorum personam pertinere intelligenda sit flagitatio promissorum, de quibus in Psalmo dicitur, Ubi sunt misericordiae tuae, Domine, antiquae, etc.*

Sed caetera psalmi hujus, quae ita se habent, *Ubi sunt miserationes tuae antiquae, Domine, quas jurasti David in veritate tua? Memento, Domine, opprobrii servorum tuorum, quod continui in sinu meo multarum gentium: quod exprobraverunt inimici tui, Domine; quod exprobraverunt, commutationem Christi tui: utrum ex persona dicta sint illorum Israelitae: rum, qui desiderabant reddi sibi promissionem, quae facta est ad David; an potius Christianorum, qui non secundum carnem, sed secundum spiritum sunt Israelitae, merito, quaeri potest. Dicta sunt quippe ista vel scripta tempore quo fuit Aethan, de cujus nomine titulum iste psalmus accepit; et idem tempus regni David fuit: ac per hoc non diceretur, *Ubi sunt miserationes tuae antiquae, Domine, quas jurasti David in veritate tua?* nisi eorum personam in se Propheta¹ transfiguraret, qui longe postea futuri erant, quibus hoc tempus esset antiquum, quando regi David ista promissa sunt. Potest autem intelligi multas gentes, quando persequabantur Christianos, exprobrasse illis passionem Christi, quam Scriptura commutationem vocat; quoniam moriendo immortalis est factus. Potest et commutatio Christi secundum hoc accipi exprobrata Israelitis, quia cum eorum speraretur futurus, factus est gentium: et hoc eis nunc exprobrant multae gentes, quae crediderunt in eum per novum Testamentum, illis in vetustate remanentibus: ut ideo dicatur, *Memento, Domine, opprobrii servorum tuorum;* quia non eos obliviscens, sed potius misericors Dominus, et ipsi post hoc opprobrium credituri sunt. Sed ille quem prius posui, convenientior sensus mihi videtur. Inimicis enim Christi, quibus exprobratur, quod eos ad gentes transiens reliquerit Christus, incongrue vox ista coaptatur, *Memento, Domine, opprobrii servorum tuorum:* non enim servi Dei nuncupandi sunt tales Judaei: sed eis verba ista competunt, qui cum graves humilitates persecutionum pro Christi nomine paterentur, recordari potuerunt excelsum regnum semini David fuisse promissum; et ejus desiderio dicere, non desperando, sed petendo, quaerendo, pulsando, *Ubi sunt miserationes tuae antiquae, Domine, quas jurasti David in veritate tua? Memento, Domine, opprobrii servorum tuorum, quod continui in sinu meo multarum gentium;* hoc est, In interioribus meis patienter pertuli. *Quod exprobraverunt inimici tui, Domine; quod exprobraverunt, commutationem Christi tui:* non eam putantes commutationem, sed consumptionem². Quid est autem, *Memento, Domine,* nisi, ut miserearis, et pro tolerata patienter humilitate mea, reddas celsitudinem, quam jurasti David in veritate tua? Si autem Judaeis assignemus haec*

verba, isti servi Dei talia dicere potuerunt, qui expugnata terrena Jerusalem, antequam Jesus Christus humanitus nasceretur, in captivitatem ducti sunt, intelligentes commutationem Christi, quia scilicet non per eum terrena carnalisque felicitas, qualis paucis annis regis Salomonis apparuit, sed caelestis ac spiritualis esset fideliter expectanda: quam tunc ignorans infidelitas gentium, cum Dei populum exultabat atque insultabat esse captivum, quid aliud quam Christi commutationem, sed scientibus nesciens, exprobrabat? Et ideo quod sequitur, ubi psalmus iste concluditur, *Benedictio Domini in aeternum: fiat, fiat (Psal. lxxxviii, 50-53);* universo populo Dei ad caelestem Jerusalem pertinenti, sive in illis qui latebant in Testamento vetere, antequam revelaretur novum, sive in his qui jam Testamento novo revelato manifeste pertinere cernuntur ad Christum, satis congruit. Benedictio quippe Domini in semine David, non ad aliquod tempus, qualis diebus Salomonis apparuit, sed in aeternum speranda est, in qua certissima spe dicitur, *Fiat, fiat.* Illius enim spei est confirmatio verbi hujus iteratio. Hoc ergo intelligens David ait in secundo Regnorum libro, unde ad istum psalmum digressi sumus: *Et locutus es pro domo servi tui in longinquum.* Ideo autem post paululum ait: *Nunc incipe, et benedic domum servi tui usque in aeternum (II Reg. vii, 19, 29),* et caetera; quia tunc genitura erat filium, ex quo progenies ejus duceretur ad Christum, per quem futura erat domus ejus aeterna, eadeoque domus Dei. Domus enim David, propter genus David; domus autem Dei eadem ipsa, propter templum Dei, de hominibus factum, non de lapidibus, ubi habitet in aeternum populus cum Deo et in Deo suo, et Deus cum populo atque in populo suo: ita ut Deus sit implens populum suum, et populus plenus Deo suo, cum Deus erit omnia in omnibus (I Cor. xv, 28), ipse in pace praemium, qui virtus in bello. Ideo cum in verbis Nathan dictum sit, *Et nuntiabit tibi Dominus quoniam domum aedificabis ipsi: postea dictum est in verbis David, Quoniam tu Dominus omnipotens Deus Israel, revelasti aurem servi tui, dicens, Domum aedificabo tibi (II Reg. vii, 11, 27).* Hanc enim domum et nos aedificamus bene vivendo, et Deus ut bene vivamus opitulando: quia *nisi Dominus aedificaverit domum, in vanum laborabunt aedificantes eam (Psal. cxvii, 1).* Cujus domus cum venerit ultima dedicatio, tunc fiet illud, quod hic per Nathan locutus est Deus, dicens: *Et ponam locum populo meo Israel, et plantabo illum, et inhabitabit seorsum, et non sollicitus erit ultra: et non apponet filius iniquitatis humiliare eum, sicut ab initio a diebus quibus constitui iudices super populum meum Israel (II Reg. vii, 10 et 11).*

CAPUT XIII. — *An promissae pacis veritas illis temporibus possit adscribi, quae sub Salomone fluxerunt*

Hoc tam magnum bonum quisquis in hoc saeculo et in hac terra sperat, insipienter sapit. An quispiam putabit in pace regni Salomonis id esse completum? Pacem quippe illam Scriptura in umbra futuri excellenti praedicatione commendat. Sed haec suspitioni

¹ Reg., prophetia.

² Ita manuscripsi. Editi autem, sed consummationem.

vigilanter occursum est, cum, posteaquam dictum est, *Et non apponet filius iniquitatis humiliare eum*; continuo subiectum est, *Sicut ab initio a diebus quibus constitui iudices super populum meum Israel*. Iudices namque, priusquam Reges ibi esse cœpissent, super illum populum fuerant constituti, ex quo terram promissionis accepit. Et utique humiliabat eum filius iniquitatis, hoc est hostis alienigena, per intervalla temporum, quibus leguntur paces alternasse cum bellis: et inveniuntur illic pacis tempora prolixiora quam Salomon habuit, qui quadraginta regnavit annos. Nam sub eo Iudice qui appellatus est Aod, octoginta anni pacis fuerunt (*Judicum* III, 50). Absit ergo, ut Salomonis tempora in hac promissione prædicta esse credantur: multo minus utique cujuslibet regis alterius. Non enim qui-quam eorum in tanta, quanta ille, pace regnavit: nec unquam omnino gens illa ita regnum tenuit, ut sollicita non fuerit ne hostibus subderetur; quia in tanta mutabilitate rerum humanarum nulli aliquando populo concessa est tanta securitas, ut huic vitæ hostiles non formidaret incursus. Locus ergo iste qui promittitur tam pacatæ ac securæ habitationis, æternus est, æternique debetur in matre Jerusalem libera, ubi erit veraciter populus Israel: hoc enim nomen (a) interpretatur Videns Deum: cuius præmiis desiderio pia per fidem vita in hac ærumnosa peregrinatione ducenda est.

CAPUT XIV. — De studio David in dispositione mysterioque Psalmorum.

Procurrente igitur per tempora civitate Dei, primo in umbra futuri, in terrena scilicet Jerusalem regnavit David. Erat autem David vir in canticis eruditus, qui harmoniam musicam non vulgari voluptate, sed fidei voluntate dilexerit; eaque Deo suo, qui verus est Deus, mysticæ rei magnæfiguratione serjserit. Diversorum enim sonorum rationabilis moderatusque concertus concordie varietate compæctam bene ordinatæ civitatis insinuat unitatem. Denique omnis fere prophetia ejus in Psalmis est, quos centum quinquaginta liber continet, quem Psalmorum vocamus. In quibus nonnulli volunt, eos solos factos esse a David, qui ejus nomine inscripti sunt. Sunt item qui putant non ab eo factos, nisi qui prænotantur, *Ipsius David*: qui vero habent in titulis, *Ipsi David*, ab aliis factos, perspicue ipsius fuisse coaptatos. Quæ opinio voce evangelica Salvatoris ipsius refutatur, ubi ait, quod ipse David in Spiritu Christum dixerit esse Dominum suum (*Matth.* XXII, 43): quoniam Psalmus centesimus nonus sic incipit: *Dixit Dominus Dominus meo, Sede a dextris meis, donec ponam inimicos tuos scabellum pedum tuorum* (*Psal.* CIX, 4). Et certe idem psalmus non habet in titulo, *Ipsius David*; sed, *Ipsi David*, sicut plurimi. Mihi autem credibilis videntur existimare qui omnes illos centum et quinquaginta Psalmos ejus operi tribuunt, eumque aliquos prænotasse etiam nominibus aliorum, aliquid quod ad rem pertineat figurantibus, cæteros autem nullius hominis nomen in titulis habere voluisse: sicut si varietatis

(a) scilicet, *Israel*.

hujus dispositionem, quamvis interbreccam, non tamen inanem Dominus inspiravit. Nec movere debet ad hoc non credendum, quod nonnullorum nomina Prophetarum, qui longe post David regis tempora fuerunt, quibusdam psalmis in eo libro leguntur inscripta; e quæ ibi dicuntur, velut ab eis dici videntur. Neque enim non potuit propheticus Spiritus prophetanti regi David hæc etiam futurorum Prophetarum nomina revelare, ut aliquid, quod eorum personæ conveniret, propheticè cantaretur: sicut rex Josias exorturus et regnurus post annos amplius quam trecentos, cuidam prophetæ, qui etiam facta ejus futura prædixit, cum suo nomine revelatus est (*III Reg.* XIII).

CAPUT XV. — An omnia quæ in Psalmis de Christo et Ecclesia prophetantur, ad contextum hujus operis coaptanda sint.

Nunc jam exspectari a me video, ut hoc loco libri hujus aperiatur quid in Psalmis David de Domino Jesu Christo vel ejus Ecclesia prophetaverit. Ego autem ut hoc non ita faciam, sicut videtur ipsa exspectatio postulare (quamvis jam in uno fecerim), copia quam inopia magis impediatur. Omnia enim ponere vitandæ prolixitatis causa prohibeor: vereor autem ne, cum aliqua elegero, multis qui ea noverunt, videar magis necessaria præterisse; deinde, quia testimonium quod profertur, de contextione totius Psalmi debet habere suffragium ut certe nihil sit! quod ei refragetur, si non omnia suffragantur), ne more centonum ad rem quam volumus, tanquam versiculos decerpere videamur, velut de grandi carmine², quod non de re illa, sed de alia longæque diversa reperitur esse conscriptum. Hoc autem ut in quocumque psalmo possit ostendi, exponendus est totus: quod quanti operis sit, et aliorum, et nostra volumina, in quibus hoc fecimus, satis indicant. Legat ergo illa, qui voluerit, et potuerit: inveniet quot et quanta rex David idemque propheta de Christo et ejus Ecclesia prophetaverit, de Rege scilicet et civitate quam condidit.

CAPUT XVI. — De his quæ in quadragesimo quarto Psalmo ad Christum et Ecclesiam pertinentia, aut aperte dicuntur, aut tropice.

1. Quamlibet enim de quacumque re propriæ sint atque manifestæ prophetiæ locutiones, necesse est ut eis etiam tropicæ misceantur: quæ maxime propter tardiores ingerunt doctoribus laboriosum disputandi exponendique negotium. Quædam tamen Christum et Ecclesiam ipsa prima facie, mox ut dicuntur, ostendunt; etsi ex aliis restant exponenda, quæ in eis minus intelliguntur: quale illud est in eodem Psalmorum libro: *Erectavi cor meum verbum bonum, dico ego opera mea regi. Lingua mea calamus scribæ velociter scribentis. Speciosus forma præ filiis hominum: diffusa est gratia in labiis tuis, propterea benedixit te Deus in æternum. Accingere gladium tuum circa femur³, potentissime. Specie tua et pulchritudine*

¹ Mss., aut certe nihil sit.

² Sic Mss. At editi, velut de retrogrado carmine.

³ Editi addunt, tuum: quod a manuscriptis et a superioribus abest.

tua, intende, prospere procede, et regna. Propter veritatem et mansuetudinem et justitiam; et deducet te mirabiliter dextera tua. Sagittæ tuæ acutæ potentissimæ¹. Populi sub te cadent, in corde inimicorum regis. Sedes tua, Deus, in sæcula sæculorum, virga directionis virga regni tui. Dilixisti justitiam, et odio habuisti iniquitatem: propterea unxit te, Deus, Deus tuus oleo exultationis præ participibus tuis. Myrrha et gutta et casia a vestimentis tuis, a domibus eburneis: ex quibus delectaverunt te filię regum in honore tuo (Psal. XLIV, 2-10). Quis non hic Christum, quem prædicamus, et in quem credimus, quamlibet sit tardus, agnoscat: cum audiat Deum, cujus sedes est in sæcula sæculorum; et unctum a Deo, utique sicut ungit Deus, non visibili, sed spirituali atque intelligibili chrismate? Quis enim tam rudis est in hac religione, vel tam surdus adversus ejus famam longe lateque diffusam, ut Christum a chrismate, hoc est ab unctione, appellatum esse non noverit? Agnito autem rege Christo, jam cætera quæ hic tropice dicta sunt, quomodo sit speciosus forma præ filiis hominum, quadam tanto magis amanda atque miranda, quanto minus corporea pulchritudine; quis gladius ejus, quæ sagittæ, et cætera isto modo non proprie, sed tropice posita, jam subditus ei qui regnat propter veritatem et mansuetudinem et justitiam, inquirat ex otio.

2. Deinde aspiciat ejus Ecclesiam, tanto viro suo spirituali connubio et divino amore conjunctam: de qua dicitur in his quæ sequuntur: *Astitit regina a dextris tuis in vestitu deaurato, circumamicta varietate. Audi, filia, et vide, et inclina aurem tuam, et obliviscere populum tuum, et domum patris tui. Quoniam concupivi rex speciem tuam, quia ipsa est Dominus Deus tuus. Et adorabunt eum filii Tyri in manibus: vultum tuum deprecabuntur divites plebis. Omnis gloria ejus filiæ regis intrinsecus, in fimbriis aureis, circumamicta varietate. Afferentur regi virgines post eam, proxique ejus afferentur tibi. Afferentur in lætitia et exultatione: adducentur in templum regis. Pro patribus tuis nati sunt tibi filii: constitues eos principes super omnem terram. Memores erunt nominis tui, in omni generatione et generatione. Propterea populi confitebuntur tibi in æternum, et in sæculum sæculi* (Psal. XLIV, 10-18). Non opinor quemquam ita desipere, ut hic aliquam mulierculam prædicari credat atque describi: conjugem videlicet illius, cui dictum est, *Sedes tua, Deus, in sæcula sæculorum: virga directionis virga regni tui. Dilixisti justitiam, et odio habuisti iniquitatem: propterea unxit te, Deus, Deus tuus oleo exultationis præ participibus tuis*: Christum utique præ Christianis. Illi sunt enim participes ejus, ex quorum in omnibus gentibus unitate atque concordia fit ista regina: sicut in alio psalmo de illa dicitur, *Civitas Regis magni* (Psal. XLVII, 3). Ipsa est Sion spiritualiter: quod nomen latine interpretatum Speculatio est. Speculatur enim futuri sæculi magnum bonum: quoniam illuc di-

rigitur ejus intentio. Ipsa est et Jerusalem eodem modo spiritualiter, unde multa jam diximus. Ejus inimica est civitas diaboli Babylon, quæ Confusio interpretatur. Ex qua tamen Babylone regina ista in omnibus gentibus regeneratione liberatur, et a pessimo rege ad optimum Regem, id est, a diabolo transit ad Christum. Propter quod ei dicitur, *Oliviscere populum tuum et domum patris tui*. Cujus civitatis impie portio sunt et Israelitæ sola carne, non fide: inimici etiam ipsi magni hujus Regis, ejusque reginæ. Ad ipsos enim veniens, et ab eis Christus occisus, magis aliorum factus est, quos non vidit in carne. Unde per ejusdam psalmi prophetiam dicit Rex ipse noster, *Erues me de contradictionibus populi, constitues me in caput gentium. Populus quem non cognovi, servivit mihi; in obauditu auris obaudiuit mihi* (Psal. XVII, 44 et 45). Populus ergo iste gentium, quem non cognovit Christus præsentia corporali, in quem tamen Christum sibi annuntiatum credidit, ut nemto de illo diceretur, *In obauditu auris obaudiuit mihi*; quia fides ex auditu est. (Rom. x, 17); iste, inquam, populus additus veris et carne et fide Israelitis civitas est Dei, quæ ipsum quoque secundum carnem peperit Christum, quando in solis illis Israelitis fuit. Inde quippe erat virgo Maria, in qua carnem Christus, ut homo esset, assumpsit. De qua civitate psalmus alius ait, *Mater Sion, dicet homo, et homo factus est in ea, et ipse fundavit eam Altissimus* (Psal. LXXXVI, 5). Quis iste Altissimus, nisi Deus? Et per hoc Christus Deus, antequam in illa civitate per Mariam fieret homo, ipse in Patriarchis et Prophetis fundavit eam. Cum igitur huic reginæ civitati Dei tanto ante dictum sit per prophetiam, quod jam videmus impletum, *Pro patribus tuis nati sunt tibi filii, constitues eos principes super omnem terram*: ex filiis quippe ejus per omnem terram sunt præpositi et patres ejus, cum confiteantur² ei populi concurrentes ad eam cum confessione laudis æternæ in sæculum sæculi (a): procul dubio quidquid hic tropicis locutionibus subobscurè dictum est, quoquo modo intelligatur, debet his rebus manifestissimis convenire.

CAPUT XVII. — *De his quæ ad sacerdotium Christi in Psalmo centesimo nono, et de his quæ in Psalmo vigesimo primo ad passionem ipsius spectant.*

Sicut etiam in illo psalmo, ubi sacerdos Christus, quemadmodum hic rex, apertissime prædicatur: *Dixit Dominus Domino meo, Sede a dextris meis, donec ponam inimicos tuos scabellum pedum tuorum*. Sedere Christus ad dexteram Dei Patris creditur, non videtur: ejus etiam inimicos poni sub pedibus ejus nondum apparet; id agitur³, apparebit in fine; etiam hoc nunc creditur, post videbitur. Verum quod sequitur, *Virgam virtutis tuæ emittet Dominus ex Sion*,

¹ Mss., in capite gentium.

² Sic Mss. At editi Vind. Am. Fr., sunt præpositi principes, cum confiteantur. Lov., sunt præpositi et patres ejus principes, cum confiteantur. Paulo post loco, cum confessione, nonnulli manuscripti habent, confessionem: alii cum Vind. Am. Fr., confessione, omnino, cum.

³ Editi, id igitur. Verius manuscripti, id agitur, (a) Conf. Fuarr. 1491. XLV, 4. 33.

¹ Editi, potentissime; pauloque post, in corda. At manuscripti hic et alia inferioris locis conveniunt cum ea versione, quam Augustinus sequitur Fuarr. in Psal. XLV.

et ¹ *dominare in medio inimicorum tuorum*, ita clarum est, ut non solum infideliter et infeliciter, sed etiam impudenter negetur. Et ipsi quippe fatentur inimici, ex Sion missam fuisse legem Christi, quod Evangelium nos vocamus, et eam virgam virtutis ejus agnoscimus. Dominari vero eum in medio inimicorum suorum, iidem ipsi inter quos dominatur, dentibus frendendo et tabescendo, et nihil adversus eum valendo, testantur. Deinde quod paulo post dicit, *Juravit Dominus, et non penitebit eum*: quibus verbis immutabile futurum esse significat, quod adjungit, *Tu es sacerdos in aeternum secundum ordinem Melchisedech* (Psal. cix, 1, 2, 4), ex eo quod jam nusquam est sacerdotium et sacrificium secundum ordinem Aaron, et ubique offertur sub sacerdote Christo, quod protulit Melchisedech, quando benedixit Abraham (Gen. xiv, 18 sqq.), quis ambigere permittitur, de quo ista dicantur? Ad hæc itaque manifesta referuntur, quæ paulo obscurius in eodem psalmo posita sunt, quando recte intelliguntur: quod in nostris jam popularibus Sermonibus fecimus ². Sic et in illo ubi humilitatem passionis suæ per prophetiam Christus eloquitur, dicens, *Foderunt manus meas et pedes* ³, *dinumeraverunt omnia ossa mea. Ipsi vero consideraverunt et conspexerunt me*. Quibus utique verbis in cruce corpus significavit extentum, manibus pedibusque confixis et clavorum transverberatione confossis, eoque modo se spectaculum considerantibus et conspicientibus præbuisse. Addens etiam, *Diviserunt sibi vestimenta mea, et super vestem meam miserunt sortem* (Psal. xxi, 17-19). Quæ prophetia quemadmodum impleta sit, evangelica narratur historia (Math. xxvii, 35). Tunc profecto et alia recte intelliguntur, quæ ibi minus aperte dicta sunt, cum congruunt his quæ tanta manifestatione clafnerunt: præsertim quia et illa quæ non transacta credimus, sed præsentia contuemur, sicut in eodem psalmo leguntur tanto ante prædicta, ita nunc exhibita jam toto orbe cernuntur. Ibi enim paulo post dicitur: *Commemorabuntur, et convertentur ad Dominum universi fines terræ, et adorabunt in conspectu ejus universæ patrie gentium; quoniam Domini est regnum, et ipse domiabitur gentium* (Psal. xxi, 28, 29).

CAPUT XVIII. — De Psalmo tertio, et de quadagesimo, et de quinto decimo, et de sexagesimo septimo, in quibus mors et resurrectio Domini prophetantur.

1. De resurrectione quoque ejus nequaquam Psalworum oracula tacuerunt. Nam quid est aliud quod in Psalmo tertio ex persona ejus canitur, *Ego dormivi, et somnum cepi; exurrexi quoniam Dominus suscipiet me* ⁴ (Psal. iii, 6)? An forte quisquam ita desipit, ut credat velut aliquid magnum nobis indicare voluisse Prophetam, quod dormierit, et exsur-

rexerit, nisi somnus iste mors esset, et evigilatio resurrectio, quam de Christo sic oportuit prophetari? Nam et in quadagesimo multo manifestius id ostenditur, ubi ex persona ejusdem Mediatoris, more solito, tanquam præterita narratur, quæ futura prophetabantur; quoniam quæ ventura erant jam in prædestinatione et præsentia Dei velut facta erant, quia certa erant ⁵. *Inimici, inquit, mei dixerunt mala mihi: Quando morietur, et peribit nomen ejus? Et si ingrediebatur ut videret, vana locutum est cor ejus, congregavit iniquitatem sibi. Egrediebatur foras, et loquebatur simul in unum. Adversus me susurrabant omnes inimici mei, adversus me cogitabant mala mihi. Verbum iniquum disposuerunt adversus me: Numquid qui dormit, non adjiciet ut resurgat? Nuncquid qui dormit, non adjiciet ut resurgat? Nuncquid qui dormit, non adjiciet ut resurgat? Et tamen eos tam magnam nefas non impune facturos, consequentibus indicat versibus, dicens: Etenim homo pacis meæ in quem speravi, qui edebat panes meos, ampliavit super me calcaneum; hoc est, conculcavit me. Tu autem, inquit, Domine, miserere mei, et resuscita me, et reddam illis* (Psal. xl, 6-11). Quis hoc jam neget, qui Judæos post passionem resurrectionemque Christi de sedibus suis bellica strage et excidio funditus eradicatos videt (a)? Occisus enim ab eis resurrexit, et reddidit eis interim temporariam disciplinam, excepto quod non correctis servat, quando vivos et mortuos judicabit. Nam Dominus ipse Jesus istum ipsum traditorem suum per pacem porrectum ostendens Apostofis (Joan. xiii, 26), hunc etiam versum psalmi hujus commemoravit, et in se dixit impletum: *Qui edebat panes meos, ampliavit super me calcaneum*. Quod autem ait, *In quem speravi*, non congruit capiti, sed corpori. Neque enim nesciebat eum ipse Salvator, de quo antè jam dixerat, *Unus ex vobis diabolus est* ⁶ (Id. vi, 71). Sed solet in se membrorum suorum transferre personam, et sibi tribuere quod esset illorum, quia caput et corpus unum est Christus: unde illud est in Evangelio, *Esurivi, et dedistis mihi manducare*. Quod expo-

¹ Monet Ludovicus Vives vetus exemplar non habere, quia certa erant; viderique additum ab aliquo ceu acholum. Id vero habent libri omnes quos inspeximus.

² vetus liber Corbeiensis, et loquebatur.

³ In quibusdam manuscriptis loci duo citantur sic: *Unus ex vobis me tradet; et, Unus ex vobis diabolus est*. Prior est ex Joan. xiii, 21.

(a) Parnam hoc esse sceleris in Christum commissi, præter Patres, ostendit Rabbi Samuel Marochianus, libro de adventu Messie. COQUAUS.

⁴ Editi omittunt, et. Habent manuscripti hic et Enarr. in Psal. cix.

⁵ sic Mss. Editi autem, quæ quomodo recte intelligantur, in nostris jam popularibus Sermonibus notum fecimus.

⁶ Editi, pedes pieos. Abest, meos, a Mss.

⁷ sic manuscripti juxta Septuaginta. At editi, et exurrexi, quoniam Dominus suscepit me.

nens ait : *Quando uni ex minimis meis fecistis, vobis fecistis* (Matth. xxv, 35, 40). Se itaque dixit sperasse, quod tunc speraverant de Juda discipuli ejus, quando est connumeratus Apostolis.

2. Judæi autem Christum, quem sperant, moriturum esse non sperant. Ideo quem Lex et Prophetæ annuntiaverunt, nostrum esse non putant; sed nescio quem suum, quem sibi alienum a mortis passione confingunt. Ideo mirabili vanitate atque cæcitate verba quæ posuimus, non mortem et resurrectionem, sed somnum et evigilationem significasse contendunt. Sed clamat eis etiam Psalmus quintus decimus : *Propter hoc jucundatum est cor meum, et exultavit lingua mea, insuper et caro mea requiescet in spe : quoniam non derelinques animam meam in inferno, nec dabis Sanctum tuum videre corruptionem* (Psal. xv, 9 et 10). Quis in ea spe diceret requiescisse carnem suam, ut non derelicta anima sua in inferno, sed cito ad eam redeunte revivisceret, ne corrumpetur, sicut cadavera corrumpi solent, nisi qui die tertio resurrexit? Quod utique dicere non possunt de propheta et rege David. Clamat et sexagesimus septimus Psalmus : *Deus noster, Deus salvos facienti, et Domini exitus (a) mortis* (Psal. lxxvii, 21). Quid apertius diceretur? Deus enim salvos facienti Dominus est Jesus, quod interpretatur Salvator, sive Salutaris. Nam ratio nominis hujus hæc reddita est, quando priusquam ex virgine nasceretur dictum est : *Pariet filium, et vocabis nomen ejus Jesum. Ipse enim salvum faciet populum suum a peccatis eorum* (Matth. i, 21). In quorum peccatorum remissionem quoniam sanguis ejus effusus est, non utique oportuit eum de hac vita exitum alios habere quam mortis. Ideo cum dictum esset, *Deus noster, Deus salvos facienti*; continuo subjunctum est, *Et Domini exitus mortis*; ut ostenderetur moriendo salvos esse facturum. Sed mirando dictum est, *Et Domini*; tanquam diceretur, Talis est ista vita mortalium, ut nec ipse Dominus aliter ab illa exiret, nisi per mortem.

CAPUT XIX. — *De Psalmo sexagesimo octavo, in quo Judæorum pertinax infidelitas declaratur.*

Sed ut Judæi tam manifestis hujus prophetiæ testimoniis, etiam rebus ad effectum tam clarum certumque perductis, omnino non cedant¹, profecto in eis illud impletur, quod in eo psalmo qui hunc sequitur, scriptum est. Cum enim et illic ex persona Christi, quæ ad ejus passionem pertinent, prophetice dicerentur, commemoratum est quod in Evangelio patuit : *Dederunt in escam meam fel, et in siti mea potum mihi dederunt acetum* (Psal. lxxviii, 22; Matth. xxvii, 34, 48). Et velut post tale convivium epulasque sibi hujuscemodi exhibitas mox intulit, *Fiat mensa eorum eorum ipsis in muscipalam, et in retributionem, et in scandalum : obscurentur oculi eorum ne videant, et*

dorsum eorum semper incurva (Psal. lxxviii, 25, 24) : et cætera, quæ non optando sunt dicta, sed optandi specie prophetando prædicta. Quid ergo mirum, si hæc manifesta non vident, quorum oculi sunt obsecrati, ne videant? quid mirum, si cælestia non suscipiunt², qui ut in terrena sint proni, dorsum eorum semper incurvum est? Illis enim verbis translatis a corpore, vitia significantur animorum. Ista de Psalmis, hoc est de prophetia regis David, satis dicta sunt, ut aliquis modus sit. Ignoscant autem qui hæc legunt, et cuncta illa noverunt; et de his quæ fortasse firmiora me prætermisisse vel intelligunt, vel existimant, non querantur.

CAPUT XX. — *De regno ac merito David, et de filio ipsius Salomone, eaque prophetia quæ ad Christum pertinens invenitur, vel in eis libris qui scriptis ipsius copulantur, vel in eis quos ipsius esse non dubium est.*

1. Regnavit ergo David in terrena Jerusalem, filius cælestis Jerusalem, divino multum testimonio prædicatus : quia et delicta ejus tanta pietate superata sunt, per saluberrimam poenitendi humilitatem, ut prorsus inter eos sit, de quibus ipse ait, *Beati quorum remissæ sunt iniquitates, et quorum tecta sunt peccata* (Psal. xxxi, 1). Post hunc regnavit eidem populo universo Salomon ejus filius, qui, ut supra dictum est, patre suo vivente cœpit regnare. Illic bonis initiis, malos exitus habuit. Quippe secundæ res, quæ sapientium animos fatigant (a), magis huic obfuerunt, quam profuit ipsa sapientia, etiam nunc et deinceps memorabilis, et tunc longe lateque laudata. Prophetas etiam ipse reperitur in suis libris, qui tres recepti sunt in auctoritatem canonicam, Proverbia, Ecclesiastes, et Canticum canticorum. Alii vero duo, quorum unus Sapientia, alter Ecclesiasticus dicitur, propter eloquii nonnullam similitudinem, ut Salomonis dicantur, obtinuit consuetudo : non autem esse ipsius, non dubitant doctiores; eos tamen in auctoritatem, maxime occidentalis, antiquitus recepit Ecclesia (b) : quorum in uno, qui appellatur Sapientia Salomonis, passio Christi apertissime prophetatur. Impii quippe interfectores ejus commemorantur dicentes : *Circumveniamus justum, quoniam insuavis est nobis, et contrarius est operibus nostris, et improperat nobis peccata legis, et infamat in nos peccata disciplinæ nostræ. Promittit scientiam Dei se habere, et filium Dei se nominat. Factus est nobis in traductionem cogitationum nostrarum. Gravis est nobis etiam ad videndum, quoniam dissimilis est aliis vita illius, et immutatæ viæ ejus. Tanquam nugaces æstimati sumus ab illo, et abstinet se a viis nostris quasi ab immunditiis : præfert³ novissima justorum, et gloriatur patrem Deum se habere. Vidoamus ergo si sermones illius veri sunt,*

¹ vind. Am et aliquot manuscripti, *suscipiunt*.

² vulgata, et *præfert*. Sic etiam Ms. 258. M.

(a) Imitatur Sallustium in bello Catilinario, cap. 11 cujus etiam hæc ibidem verba sunt, *Quippe secundæ res sapientium animos fatigant*.

(b) vide librum 2 de Doctrina Christiana, n. 13, et Speculum.

et tentemus quæ ventura sunt illi, et sciemus quæ erunt movissima ejus. Si enim justus est filius Dei, suscipiet illum, et liberabit eum de manu contrariorum. Contumelia et tormento interrogemus illum, ut sciamus reverentiam illius, et probemus patientiam ipsius. Morte tarpissima condemnemus illum: erit enim ei respectus ex sermonibus illius. Hæc cogitaverunt, et erraverunt: excæcavit enim illos malitia ipsorum (Sap. 11, 12-21). In Ecclesiastico autem fides gentium futura prædicitur isto modo: *Miserere nostri, dominator Deus omnium, et immitte timorem tuum super omnes gentes: extolle manum tuam super gentes alienas, et videant potentiam tuam. Sicut coram illis sanctificatus es in nobis, ita coram nobis magnificeris in illis, ut agnoscant te secundum quod et nos agnovimus te, quia non est Deus præter te, Domine (Eccli. xxxvi, 1-5)*. Hanc optandi et precandi specie prophetiam per Jesum Christum videmus impletam. Sed adversus contradictores non tanta firmitate proferuntur, quæ scripta non sunt in canone Judæorum.

2. In tribus vero illis, quos Salomonis esse constat, et Judæi canonicos habent, ut ostendatur ad Christum et Ecclesiam pertinere quod in eis ejusmodi reperitur, operosa disputatio necessaria est, quæ nos ultra quam oportet, si nunc adhibetur, extendit. Tamen quod in Proverbiis legitur, viros impios dicere, *Abscondamus in terra virum justum injuste, absorbeamus vero eum tanquam infernus viventem, et auferamus ejus memoriam de terra, possessionem ejus pretiosam apprehendamus (Prov. 1, 14-13)*: non ita obscurum est, ut de Christo et possessione ejus Ecclesia sine laboriosa expositione non possit intelligi. Tale quippe aliquid etiam Dominus ipse Jesus per evangelicam parabolam ostendit dixisse malos colonos: *Hic est hæres, venite, occidamus eum, et nostra erit hæreditas (Matth. xxi, 38)*. Itemque illud in eodem libro, quod jam ante perstrinximus, cum ageremus de sterili quæ peperit septem (Supra, cap. 4, n. 4), non nisi de Christo et Ecclesia mox ut fuerit pronuntiatum consuevit intelligi ab eis, qui Christum Sapientiam Dei esse noverunt. *Sapientia edificavit sibi domum, et suffulsit columnas septem; immolavit suas victimas, miscuit in cratere vinum suum, et paravit mensam suam. Misit servos suos convocans cum excellenti prædicatione ad craterem, dicens: Quis est insipiens? divertat ad me. Et inopibus sensu dixit: Venite, manducate de meis panibus, et bibite vinum quod miscui vobis (Prov. ix, 1-5)*. Hic certe agnoscimus Dei Sapientiam, hoc est, Verbum Patri cœternum, in utero virginali domum sibi ædificasse corpus humanum, et huic, tanquam capiti membra, Ecclesiam subjunxisse, martyrum victimas immolasse, mensam in vino et panibus præparasse, ubi apparet etiam sacerdotium secundum ordinem Melchisedech, insipientes et inopes sensu vocasse; quia, sicut dicit Apostolus, infirma hujus mundi elegit, ut confunderet fortia (I Cor. 1, 27). Quibus tamen infirmis quod sequitur dicit: *Derelinquite insipientiam, ut vivatis; et quærите prudentiam, ut habeatis*

vitam (Prov. ix, 6). Participem autem fieri mensæ illius, ipsum est incipere habere vitam. Nam et in alio libro, qui vocatur Ecclesiastes, ubi ait, *Non est bonum homini, nisi quod manducabit et bibet (Eccl. viii, 15)*; quid credibilius dicere intelligitur, quam quod ad participationem mensæ hujus pertinet, quam sacerdos ipse Mediator Testamenti novi exhibet secundum ordinem Melchisedech de corpore et sanguine suo? Id enim sacrificium successit omnibus illis sacrificiis veteris Testamenti, quæ immolabantur in umbra futuri: propter quod etiam vocem illam in Psalmo tricesimo et nono ejusdem Sacerdotis per prophetiam loquentis agnoscimus: *Sacrificium et oblationem noluisti, corpus autem perfecisti mihi (Psal. xxxix, 7)*. Quia pro illis omnibus sacrificiis et oblationibus corpus ejus offertur, et participantibus ministratur. Nam istum Ecclesiastem in hac sententia manducandi et bibendi, quam sæpe repetit, plurimumque commodat, non sapere carnalis epulas voluptatis, satis illud ostendit, ubi ait, *Melius est ire in domum luctus, quam ire in domum potus: et paulo post, Cor, inquit, sapientium in domo luctus, et cor insipientium in domo epularum (Eccl. vii, 3, 5)*. Sed illud magis commemorandum existimo de hoc libro, quod pertinet ad civitates duas, unam diaboli, alteram Christi, et earum reges diabolum et Christum: *Væ tibi, terra, inquit, cujus rex adolescens, et principes tui mane comedunt. Beata tu, terra, cujus rex tuus filius ingenuorum, et principes tui in tempore comedunt, in fortitudine, et non in confusione (Id. x, 16 et 17)*. Adolescentem dixit diabolum, propter stultitiam, et superbiam, et temeritatem, et petulantiam, cæteraque vitia, quæ huic ætati assolent abundare: Christum autem filium ingenuorum, sanctorum scilicet Patriarcharum, pertinentium ad liberam civitatem, ex quibus est in carne progenitus. Principes illius civitatis mane manducantes, id est ante horam congruam; quia non expectant opportunam, quæ vera est, in futuro sæculo felicitatem, festinanter beari hujus sæculi celebritate cupientes¹. Principes autem civitatis Christi tempus non fallacis beatitudinis patienter expectant. Hoc ait, *in fortitudine, et non in confusione*: quia non eos fallit spes; de qua dicit Apostolus, *Spes autem non confundit (Rom. v, 5)*. Dicit et Psalmus, *Etenim qui² te expectant, non confundentur (Psal. xxiv, 3)*. Jam vero Canticum canticorum spiritualis quædam sanctorum est voluptas mentium, in conjugio illius Regis et reginæ civitatis, quod est Christus et Ecclesia. Sed hæc voluptas allegoricis tegminibus involuta est, ut desideretur ardentius, nudeturque jucundius, et appareat sponsus, cui dicitur in eodem Cantico, *Æquitas dilexit te (Cantic. i, 3)*; et sponsa quæ ibi audit, *Charitas in deliciis tuis (Id. vii, 6)*. Tacita³ multa transimus, cura hujus operis terminandi.

¹ Plures Mss., *celeritate cupientes*.

² Lov., *Etenim universi qui. Abest universi a cæteris libris.*

³ Ita Mss. At editi, *Tacite*.

CAPUT XXI. — *De regibus post Salomonem, sive in Juda, sive in Israel.*

Cæteri post Salomonem reges Hebræorum vix inveniuntur per aliqua ænigmata dictorum suorum rerumve gestarum, quod ad Christum et Ecclesiam pertineat, prophetasse, sive in Juda, sive in Israel. Sic enim appellatæ sunt illius populi partes, ex quo propter Salomonis offensam tempore filii ejus Roboam, qui patri successit in regnum, Deo vindicante divisus est. Proinde tribus decem, quas accepit Jeroboam servus Salomonis, rex eis in Samaria constitutus, proprie vocabantur Israel, quamvis hoc universi populi illius nomen esset. Duabus vero tribubus, Judæ scilicet et Benjamin, quæ propter David, ne penitus regnum stirpis ejus fuisset eradicatum, remanserant subjacentes civitati Jerusalem, Judæ nomen fuit: quia ipsa erat tribus unde David. Benjamin vero tribus altera ad idem regnum, sicut dixi, pertineus, erat unde fuit Saül rex ante David. Sed simul istæ duæ tribus, ut dictum est, Juda vocabantur; et hoc nomine discernebantur ab Israel, quod¹ appellabantur proprie decem tribus habentes suum regem. Nam tribus Levi, quoniam sacerdotalis fuit, Dei, non regum servitio mancipata, tertia decima numerabatur. Joseph quippe unus ex duodecim filiis Israel, non unam, sicut cæteri singulas, sed duas tribus fecit, Ephræm et Manassen. Verumtamen etiam tribus Levi ad regnum Jerosolymitanum pertinebat magis, ubi erat Dei templum, cui serviebat. Diviso igitur populo, primus regnavit in Jerusalem Roboam, rex Juda, filius Salomonis; et in Samaria Jeroboam, rex Israel, servus Salomonis. Et cum voluisset Roboam tanquam tyrannidem divisæ illius partis bello persequi, prohibitus est populus pugnare cum fratribus suis, dicente Deo per prophetam, se hoc fecisse (III Reg. XII, 24). Unde apparuit nullum in ea re, vel regis Israel, vel populi fuisse peccatum, sed voluntatem Dei vindicanti impletam. Qua cognita, pars utraque inter se pacata conquievit: non enim religionis, sed regni fuerat facta divisio.

CAPUT XXII. — *De Jeroboam, qui impietate idololatriæ subditum sibi populum profanavit, in quo tamen non destitit Deus et Prophetas inspirare², et multos ab idololatriæ crimine custodire.*

Verum rex Israel Jeroboam mente perversa non credens Deo, quem veracem promisso sibi regno datoque probaverat, timuit ne veniendo ad templum Dei, quod erat in Jerusalem, quo secundum divinam legem sacrificandi causa universæ illi genti veniendum fuit, seduceretur ab eo populus, et stirpi David tanquam regio semini redderetur; et instituit idololatriam in regno suo, et populum Dei secum simulacrorum cultu obstrictum nefanda impietate decepit. Nec tamen omnimodo cessavit Deus non solum illum regem, verum etiam successores ejus et impietatis imi-

tores, populumque ipsum, arguere per Prophetas. Nam ibi exstiterunt et magni illi insignesque Prophetæ, qui etiam mirabilia multa fecerunt, Elias et Eliasus discipulus ejus. Etiam ibi dicenti Eliæ, *Domine Prophetas tuos occiderunt, altaria tua suffoderunt, et ego relictus sum solus, et quærunt animam meam* (III Reg. XIX, 10); responsum est, illic esse septem millia virorum, qui non curvaverunt genua ante Baal.

CAPUT XXIII. — *De vario utriusque regni Hebræorum statu, donec ambo populi in captivitatem diversæ tempore ducerentur, revocato postea Juda in regnum suum. quod novissime in Romanorum transitu potestatem.*

Itemque in regno Juda pertinente ad Jerusalem, etiam succedentium regum temporibus non defuerunt Prophetæ: sicut Deo placebat eos mittere, vel ad prænuntiandum quod opus erat, vel ad corripienda peccata, præcipiendamque justitiam. Nam et illic, etsi longe minus quam in Israel, tamen exstiterunt reges qui suis impietatibus Deum graviter offenderent, et moderatis flagellis cum populo simili⁴ plecterentur. Piorum sane regum merita ibi non parva laudantur. In Israel autem reges alios magis, alios minus, omnes tamen reprobos legimus. Utraque igitur pars, sicut jubebat divina providentia, vel sinebat, variis et erigebatur prosperitatibus, et adversitatibus premelatur: et sic affligebatur, non solum externis, verum etiam inter se civilibus bellis, ut certis existentibus causis, misericordia Dei vel ira patesceret; donec ejus indignatione crescente, universa gens illa Chaldæis debellantibus, non solum subverteretur in sedibus suis, sed etiam ex maxima sui parte transferretur in terras Assyriorum, prius illa pars, quæ vocabatur Israel in tribus decem; postea vero etiam Judas, eversa Jerusalem et templo illo nobilissimo: in quibus terris per annos septuaginta captivum egit otium. Post quos inde dimissa, templum quod eversum fuerat, instauravit: et quamvis plurimi ejus in alienigenarum degerent terris, non habuit tamen deinceps duas regni partes, et duos diversos in singulis partibus reges: sed in Jerusalem princeps eorum unus erat; atque ad Dei templum, quod ibi erat, omnes undique, ubicumque essent, et undecumque possent, per certa tempora veniebant. Sed nec tunc eis hostes ex aliis gentibus expugnatoresque defuerunt: nam etiam Romanorum jam tributarios eos Christus invenit.

CAPUT XXIV. — *De Prophetis qui vel apud Judæos postremi fuerunt, vel quos circa tempus natiuitatis Christi evangelica prodit historia.*

Toto autem illo tempore, ex quo redierunt de Babylonia, post Malachiam, Aggæum et Zachariam, qui tunc prophetaverunt, et Esdram, non habuerunt Prophetas usque ad Salvatoris adventum, nisi alium Zachariam patrem Joannis, et Elisabeth ejus uxorem, Christi natiuitate jam proxima; et eo jam nato, Simeonem senem, et Annam viduam jamque grandæ-

¹ Er. et Lov., quæ. Melius alii codices, quod, nomen scilicet Israel.

² In Antea excusis, prophetias inspirare.

³ Er. et Lov., simul. Melius autem Vind. Am. et Mss., simili.

vam, et ipsum Joannem novissimum : qui juvenis, jam juvenem Christum, non quidem futurum prædixit, sed tamen incognitum prophetica cognitione monstravit : propter quod ipse Dominus ait, *Lex et Prophetæ usque ad Joannem* (Matth. xi, 13). Sed istorum quinque prophetatio ex Evangelio nobis nota est: ubi et ipsa Virgo mater Domini ante Joannem prophetasse invenitur (Luc. i, 46-55). Sed hanc istorum prophetiam Judæi reprobi non accipiunt : acceperunt autem, qui ex eis innumerabiles Evangelio crediderunt. Tunc enim vere Israel divisus est in duo, divisione illa, quæ per Samuelem prophetam Saûli regi

est immutabilis prænuntiata. Malachiam vero, Aggæum, Zachariam, et Esdræm, etiam Judæi reprobi in auctoritatem canonicam receptos novissimos habent. Sunt enim et scripta eorum, sicut aliorum, qui in magna multitudine Prophetarum¹ perpauci ea scripserunt, quæ auctoritatem canonis obtinerent. De quorum prædictis, quæ ad Christum Ecclesiamque ejus pertinent, nonnulla mihi in hoc opere video esse ponenda : quod commodius fiet, adjuvante Domino, sequenti libro; ne hunc tam prolixum ulterius oneremus.

¹ Sic Mss. Editi vero, *prophetarum*.

LIBER DECIMUS OCTAVUS (a).

Dicit de terrenæ civitatis a tempore Abraham ad mundi finem procurso cum ipsa civitate cœlesti : et attingit oracula de Christo, cum Sibyllarum, tum maxime sacrorum Vatum, qui ab regni Romanorum exordio scripserunt, Osee, Amos, Isaiæ, Michææ, et subsequenium.

CAPUT PRIMUM. — *De his quæ usque ad tempora Salvatoris decem et septem voluminibus disputata suat.*

De civitatum duarum, quarum Dei una, sæculi hujus est altera, in qua nunc est, quantum ad hominum genus pertinet, etiam ista peregrina, exortu et procurso¹ et debitis finibus me scripturum esse promisi : cum prius inimicos civitatis Dei, qui conditori ejus Christo deos suos præferunt, et livore sibi perniciosissimo atrociter invident Christianis, quantum me adjuvaret ejus gratia, refellissem; quod voluminibus decem prioribus feci. De hac vero mea, quam modo commemoravi, tripartita promissione, decimum² sequentibus quatuor libris ambarum est digestus exortus; deinde procurso ab homine primo usque ad diluvium libro uno, qui est hujus operis quintus decimus; atque inde usque ad Abraham rursus ambæ, sicut in temporibus, ita et in nostris litteris accurrunt. Sed a patre Abraham usque ad Regum tempus Israelitarum, ubi sextum decimum volumen absolvimus, et inde usque ad ipsius in carne Salvatoris adventum, quosque decimus septimus liber tenditur, sola videtur in meo³ stilo cucurrisse Dei civitas : cum in hoc sæculo non sola cucurrerit, sed ambæ utique in genere humano, sicut ab initio simul, suo procurso tempora variaverint. Verum hoc ideo feci, ut prius, ex quo apertiores Dei promissiones esse cœperunt, usque ad ejus ex Virgine nativitatem, in quo⁴ fuerant quæ primo promittebantur implenda, sine interpellatione a contrario alterius civitatis, ista quæ Dei est procurrens, distinctius appareret; quamvis usque ad revelationem Testamenti novi, non in lumine, sed in umbra occurrerit. Nunc ergo, quod intermiseram, video esse faciendum, ut ex Abrahæ temporibus quomodo etiam illa cucurrerit, quantum satis videtur,

attingam, ut ambæ inter se possint consideratione legitimum comparari.

CAPUT II. — *De terrenæ civitatis regibus utque temporibus, quibus ab exortu Abrahæ sanctorum tempora supputata conveniunt.*

1. Societas igitur usquequaque mortalium diffusa per terras et in locorum quantislibet diversitatibus, unius tamen ejusdemque naturæ quadam communione devincta, utilitates et cupiditates suas quibusque sectantibus, dum id quod appetitur, aut nemini, aut non omnibus sufficit, quia non est id ipsum, adversum se ipsam plerumque dividitur, et pars partem, quæ prævalet, opprimit. Victrici enim victa succumbit, dominationi scilicet, vel etiam libertati qualemcumque pacem præferens ac salutem : ita ut magnæ fuerint admirationi qui perire quam servire maluerunt. Nam in omnibus fere gentibus quodammodo vox naturæ ista personuit, ut subjugari victoribus mallent, quibus contigit vinci, quam bellica omnifariam¹ vastatione deleri. Hinc factum est ut non sine Dei providentia, in cujus potestate est ut quisque bello aut subjugetur aut subjuget, quidam essent regnis præditi, quidam regnantibus subditi : sed inter plurima regna terrarum, in quæ terrenæ utilitatis vel cupiditatis est divisa societas (quam civitatem mundi hujus universali vocabulo nuncupamus), duo regna cernimus longe cæteris provenisse clariora, Assyriorum primum, deinde Romanorum, ut temporibus, ita locis inter se ordinata atque distincta. Nam quo modo illud prius, hoc posterius; eo modo illud in Oriente, hoc id Occidente surrexit : denique in illius sine hujus initium confestim fuit (a). Regna cætera, cæterosque reges velut appendices istorum dixerim.

2. Ninus ergo jam secundus rex erat Assyriorum, qui patri suo Belo successerat, regni illius primo regi, quando in terra Chaldæorum natus est Abra-

¹ Codices 2080, 2081 et 258, *progressu*. M.

² Apud Lov., *in decimum* : minus bene.

³ Am. et Lov., *in medio*. Editi alii et manuscripti, *in meo*.

⁴ Sola editio Lov., *in qua*.

(a) scriptus circiter annum 426. Vide infra, cap. 54.

¹ Sic plures manuscripti. Alii vero cum editis, *omnifaria*.

(a) Vide infra, cap. 27.

lam (e). Erat etiam tempore illo regnum Sicyoniorum admodum parvum, a quo ille undecumque doctissimus Marcus Varro scribens de Gente populi Romani, velut antiquo tempore, exorsus est. Ab his enim Sicyoniorum regibus ad Athenienses pervenit, a quibus ad Latinos, inde ad Romanos; sed ante conditam Romam in comparatione regni Assyriorum perexigua ista memorantur. Quamvis Athenienses in Græcia plurimum claruisse fateatur etiam Sallustius Romanus historicus, plus tamen fama, quam re ipsa. Nam loquens de illis: *Atheniensium, inquit, res gestæ, sicuti ego existimo, satis amplæ magnificæque fuere: verum aliquanto minores tamen, quam fama feruntur. Sed quis prævenere ibi scriptorum magna ingenia, per terrarum orbem Atheniensium facta pro maximis celebrantur. Ita eorum qui fecere, virtus tanta habetur, quantum eam verbis potuere extollere præclara ingenia (Belli Catil., cap. 8). Accedit huic civitati non parva etiam ex litteris et philosophis gloria, quod ibi potissimum talia studia vigerunt. Nam quantum attinet ad imperium, nullum majus primis temporibus, quam Assyriorum fuit, nec tam longe lateque diffusum. Quippe ubi Ninus rex, Beli filius, universam Asiam, quæ totius orbis ad numerum partium tertia dicitur, ad magnitudinem vero dimidia reperitur, usque ad Libyæ fines subegisse traditur (b). Solis quippe Indis in partibus Orientis non dominabatur: quos tamen eo defuncto Semiramis uxor ejus est agressa bellando. Ita factum est, ut quicumque in illis terris populi, sive reges erant, Assyriorum regno ditionique parerent, et quidquid imperaretur efficerent. Abraham igitur in eo regno apud Chaldæos Nini temporibus natus est. Sed quoniam res Græcæ multo sunt nobis quam Assyriæ notiores, et per Græcos ad Latinos, ac deinde ad Romanos, qui etiam ipsi Latini sunt, temporum seriem duxerunt qui gentem populi Romani in originis ejus antiquitate rimati sunt; ob hoc debemus, ubi opus est, Assyrios memorare reges: ut appareat quemadmodum Babylonia, quasi prima Roma, cum peregrina in hoc mundo Dei civitate procurrat. Res autem quas propter comparationem civitatis utriusque, terrenæ scilicet et cælestis, huic operi oportet inserere, magis ex Græcis et Latinis, ubi et ipsa Roma quasi secunda Babylonia est, debemus assumere.*

3. Quando ergo natus est Abraham, secundi reges erant, apud Assyrios Ninus, apud Sicyonios Europus (c): primi autem, illic Belus, hic Ægialeus fuerunt. Cum vero egresso Abraham de Babylonia, promissit ei Deus ex illo magnam gentem futuram, et in ejus semine omnium gentium benedictionem, Assyrii quartum regem habebant, Sicyonii quintum: apud illos enim regnabat filius Nini post matrem Semiramidem, quæ ab illo interfecta perhibetur, ausa filium mater incestare concubitu. Hanc putant nonnulli

(a) Jam dixit supra lib. 16, cap. 17, natum Abrahamum anno regnantis Nini quadragesimo tertio, secutus Chronicon Eusebii; quo alii improbato ortum Abrahami ad Semiramidis annum vigesimum tertium referant.

(b) Vide infra, cap. 22; et supra, lib. 16, cap. 17, et lib. 4, cap. 6.

(c) Eusebius in Chron.

condidisse Babylonem, quam quidem potuit instaurare (a). Quando autem, vel quomodo condita fuerit, in sexto decimo libro diximus (Cap. 4). Filium porro Nini et Semiramidis, qui matri successit in regnum, quidam etiam ipsum Ninum, quidam vero derivato a patre vocabulo Ninyam¹ vocant. Sicyoniorum autem regnum tunc tenebat Telxion². Quo regnante usque adeo ibi mitia et læta tempora fuerunt, ut eum defunctum velut deum colerent sacrificando, et ludos celebrando, quos ei primitus institutos ferunt.

CAPUT III. — *Quibus regnantibus apud Assyrios atque Sicyonios Abrahamæ centenario Isaac de promissione sit natus, vel ipsi Isaac sexagenario Esau et Jacob gemini de Rebecca sint editi.*

Hujus temporibus etiam Isaac ex promissione Dei natus est centenario patri filius Abrahamæ de Sarra conjuge, quæ sterilis et anus jam spem prolis amiserat. Tunc et Assyriis quintus erat rex Arrius (b). Ipsi vero Isaac sexagenario nati sunt gemini, Esau et Jacob, quos ei Rebecca uxor peperit, avo eorum Abraham adhuc vivente, et centum sexaginta ætatis annos agente: qui expletis centum septuaginta quinque defunctus est; regnantibus apud Assyrios Xerxe illo antiquiore, qui etiam Baleus (a) vocabatur, et apud Sicyonios Thuriaco, quem quidam Thurimachum³ scribunt, septimis regibus. Regnum autem Argivorum simul cum Abrahamæ nepotibus ortum est, ubi primus regnavit Inachus. Sane quod prætereundum non fuit, etiam apud sepulcrum septimi sui regis Thuriaci sacrificare Sicyonios solere, Varro refert. Regnantibus porro octavis regibus, Armamitre Assyriorum, Sicyoniorum Leucippo, et primo Argivorum Inacho, Deus locutus est ad Isaac, atque ipsi quoque eadem quæ patri ejus duo illa promissit, semini scilicet ejus terram Chanaan, et in ejus semine benedictionem cunctarum gentium. Hæc ipsa promissa sunt etiam filio ejus; nepoti Abrahamæ, qui est appellatus primo Jacob, post Israel, cum jam Belocus rex nonus Assyriis, et Phoroneus Inachi filius secundus regnaret Argivis, Leucippo adhuc apud Sicyonios permanente. His temporibus Græcia sub Phoroneo Argolico rege legum et judiciorum quibusdam clarior facta est institutis: Phegous tamen frater hujus Phoronei junior, cum esset mortuus, ad ejus sepulcrum templum est constitutum, in quo coleretur ut deus, et ei boves immolarentur. Credo honore tanto ideo dignum putarunt, quia in regni sui parte (pater quippe loca ambobus distribuerat, in quibus eo vivente regnarent) iste sacella constituerat ad colendos deos, et docuerat observari tempora per menses atque annos, quid eorum

¹ Editi, *Ninyam*. At Mss. cum Eusebio, *Ninyam*.

² Editi, *Telexion*. Manuscripti vero, *Telxion*; vel *Telxion*.

³ Aliquot Mss., *Thirimachum*. Eusebius vero, *Thiramachum*.

(a) Babylonem a Semiramide exstructam asserunt Diodorus, Justinus et alii. Josephus vero, Eusebius, Marcellinus, aliique, instauratam solummodo ab ea dicunt, et amplissimo moenium ambitu cinctam, qui inter miracula mundi numeratur, stadiaque quadringenta et octoginta fertur collegisse.

(b) Eusebii Chron., *Mattus*. — Ex nostris et ex pluribus PP. Benedictinorum Mss. reponimus, *Arrius*. [*Arrius*.] M.

(c) Apud Eusebium, *Baleus*.

quatenus metirentur atque numerarent. Haec in eo nova mirantes rudes adhuc homines, morte obita deum esse factum sive opinati sunt, sive voluerunt. Nam et Io filia Inachi fuisse perhibetur, quae postea Isis appellata, ut magna dea culta est in Aegypto: quaevis alii scribant eam ex Aethiopia in Aegyptum venisse reginam; et quod late justequae imperaverit, cisque multa commoda et litteras instituerit, hunc honorem illi habitum esse divinum posteaquam ibi mortua est, et tantum honorem, ut capitali crimine reus fieret, si quis eam fuisse hominem diceret.

CAPUT IV. — *De temporibus Jacob et filii ejus Joseph.*

Regnantibus Assyriorum decimo rege Baleo, et Sicyoniorum nono Messapo, qui etiam Cephisos¹ a quibusdam traditur (si tamen duorum nominum homo unus fuit, ac non potius alterum pro altero putaverunt fuisse hominem, qui in suis posuerunt scriptis alterum nomen), cum rex Argivorum tertius Apis esset, mortuus est Isaac annorum centum octoginta, et reliquit geminos suos annorum centum et viginti: quorum minor Jacob pertinens ad civitatem Dei, de qua scribimus, majore utique reprobato, habebat duodecim filios; quorum illum, qui vocabatur Joseph, mercatoribus in Aegyptum transeuntibus fratres, adhuc Isaac avo eorum vivente (a), vendiderant. Stetit autem ante Pharaonem Joseph, quando ex humilitate, quam pertulit, sublimatus est, cum triginta esset annorum: quoniam somnia regis divine interpretatus, praenuntiavit septem ubertatis annos futuros, quorum abundantiam prepolentem consequentes alii septem steriles fuerant consumpturi; et ob hoc eum rex praefecerat Aegypto, de carcere liberatum, quo eum conjecerat integritas castitatis; quam fortiter servans male amanti dominæ, et male credulo domino mentituræ, veste etiam derelicta de manibus attrahentis aufugiens, non consensit ad stuprum. Secundo autem anno septem annorum steriliū, Jacob in Aegyptum eum suis omnibus venit ad filium, agens annos centum et triginta, sicut interroganti regi ipse respondit (Gen. XLVII, 9); cum Joseph ageret triginta et novem, ad triginta scilicet quos agebat, quando a rege honoratus est, additis septem ubertatis, et duobus famis.

CAPUT V. — *De Api rege Argivorum, quem Aegyptii Serapim nominatum divino honore coluerunt.*

His temporibus rex Argivorum Apis navibus transvectus in Aegyptum, cum ibi mortuus fuisset, factus est Serapis omnium maximus Aegyptiorum deus. Nominis autem hujus, cur non Apis etiam post mortem, sed Serapis appellatus sit, facillimam rationem Varro reddidit. Quia enim arca in qua mortuus ponitur, quod omnes jam sarcophagum (b) vocant, *σάρφας* dicitur graeco; et ibi eum venerari sepultum cœperant, priusquam templum ejus esset exstructum: velut So-

¹ Nonnulli, Mss., *Cephisos*.

(a) Conf. Quæst. in Gen., q. 122.

(b) *Sarcophagum*, id est, carnicorum, qui graeco *σώρος*, id est, locus et urna dicitur.

ros et Apis, Sorapis primo¹, deinde una littera, ut fieri assolet, commutata, Serapis dictus est (a). Et constitutum est etiam de illo, ut quisquis eum hominem dixisset fuisse, capitalem penderet poenam. Et quoniam fere in omnibus templis, ubi colebantur Isis et Serapis, erat etiam simulacrum, quod digito labiis impresso admonere videretur, ut silentium fieret; hoc significare idem Varro existimat, ut homines eos fuisse taceretur. Ille autem hos, quem mirabili vanitate decepta Aegyptus in ejus honorem deliciis affluentibus alebat, quoniam eum sine sarcophago vivum venerabantur, Apis, non Serapis vocabatur. Quo bove mortuo, quoniam quærebatur et reperiebatur vitulus coloris ejusdem, hoc est, albis quibusdam maculis similiter insignitus; mirum quiddam et divinitus sibi procuratum esse credebant. Non enim magnum erat dæmonibus ad eos decipiendos phantasiā talis tauri, quam sola cerneret, ostentare vaccae concipienti atque prægnavanti, unde libido matris attraheret quod in ejus fetu jam corporaliter appareret: sicut Jacob de virgibus variatis, ut oves et caprae variae nascerentur, effecit (Gen. xxx, 37-42). Quod enim homines coloribus et corporibus veris, hoc dæmones figuris fictis facillime possunt animalibus concipientibus exhibere.

CAPUT VI. — *Quo regnante apud Argivos, quove apud Assyrios, Jacob in Aegypto sit mortuus.*

Apis ergo rex, non Aegyptiorum, sed Argivorum, mortuus est in Aegypto. Huic filius Argus successit in regnum, ex cujus nomine et Argi, et ex hoc Argivi, appellati sunt: superioribus autem regibus nondum vel locus vel gens habebat hoc nomen. Hoc ergo regnante apud Argivos, et apud Sicyonios Erato, apud Assyrios vero adhuc manente Baleo, mortuus est Jacob in Aegypto annorum centum quadraginta septem, cum moriturus filios suos et nepotes ex Joseph benedixisset, Christumque apertissime prophetasset, dicens in benedictione Judæ, *Non deficiet princeps ex Juda, et dux de femoribus ejus, donec veniant quæ reposita sunt ei: et ipse expectatio gentium* (Gen. XLIX, 10). Regnante Argo suis cœpit uti frugibus Græcia, et habere segetes in agricultura, delatis aliunde seminibus. Argus quoque post obitum deus haberi cœpit, templo et sacrificiis honoratus. Qui honor eo regnante ante illum delatus est homini privato et fulminato cuidam Homogyro, eo quod primus ad aratrum boves junxerit.

CAPUT VII. — *Quorum regum tempore Joseph in Aegypto defunctus sit.*

Regnantibus Assyriorum duodecimo Mamito², et undecimo Sicyoniorum Plemaeo³, et Argis adhuc

¹ Sic omnes Mss. At editi, *velut Sorosapis vel Sorapis primo*.

² Vind. Am. et Gr., *Hermasco*. Nonnulli Mss., *Amutho*. Alii cum Lov., *Mamito*; juxta Eusebium, qui tamen hanc non duodecimum, sed undecimum Assyriorum regem ponit; deinde duodecimum Manchaelum, tertium decimum Iphereum, quartum decimum Mamytam, cujus loco Sopherum capite sequenti refert Augustinus.

³ Plures Mss., *Plemaeo*. Eusebius, *Plemaeo*, vocat.

(a) De his etymologis quid sentiendum sit, vide apud Jablonskium ad Pantheum Aegyptiorum, lib. 2, cap. 3, § 8, qui te meliora docebit. LANCMA.

nunciat: Argo, mortuus est Joseph in Ægypto annorum centum et decem (*Gen. 1. 23*). Post cuius mortem populus Dei mirabiliter crescens mansit in Ægypto centum quadraginta quinque annos, tranquille prius, donec morerentur quibus Joseph notus fuit: deinde quia invidabatur incrementis ejus, erantque suspecta, quousque inde liberaretur, persecutionibus¹ (inter quas tamen divinitus secundata multiplicatione crescebat) et laboribus premebatur intolerabilis servitutis. In Assyria vero et Græcia per idem tempus regna eadem permanebant.

CAPUT VIII. — *Quorum regum ætate Moyses natus sit, et quorum deorum iisdem temporibus sit orta religio.*

Cum ergo regnaret Assyriis quartus decimus Saphrus, et Sicyoniis duodecimus Orthopolis, et Criasus quintus Argivis, natus est in Ægypto Moyses, per quem populus Dei de servitute Ægyptia liberatus est, in qua eum ad desiderandum sui Creatoris auxilium sic exerceri oportebat. Regnantibus memoratis regibus fuisse a quibusdam creditur Prometheus (a); quem propterea ferunt de luto formasse homines, quia sapientiæ optimus doctor fuisse perhibetur: nec tamen ostenditur qui ejus temporibus fuerint sapientes. Frater ejus Atlas² magnus fuisse astrologus dicitur: unde occasionem fabula invenit, ut cum cælum portare confingeret: quamvis mons ejus nomine nuncupetur, cujus altitudine potius cæli portatio in opinionem vulgi venisse videatur. Multa quoque alia ex illis in Græcia temporibus confingi fabulosa cœperunt: sed usque ad Cæcropem regem Atheniensium, quo regnante eadem civitas etiam talem accepit, et quo regnante Deus per Moysen eduxit ex Ægypto populum suum, relati sunt in deorum numerum aliquot mortui cæca et vana consuetudine ac superstitione Græcorum. In quibus Criasi regis conjux Melantomice³, et Phorbas filius eorum, qui post patrem rex Argivorum sextus fuit, et septimi regis Triopæ filius Iasus, et rex nonus Sthenelas, sive Sthenelus, sive Sthenelus, varie quippe in diversis auctoribus invenitur. His temporibus etiam Mercurius fuisse perhibetur, nepos Atlantis, ex Maia filia: quod vulgariore etiam literæ personant. Multarum autem artium peritus claruit, quas et hominibus tradidit, quo merito eum post mortem deum esse voluerunt, sive etiam crediderunt. Posterior fuisse Hercules dicitur, ad ea tamen tempora pertinens Argivorum: quamvis nonnulli eum Mercurio præferant tempore; quos falli existimo. Sed quolibet tempore nati sint, constat inter historicos graves, qui hæc antiqua li-

teris mandaverunt, ambos homines fuisse, et quod mortalibus ad istam vitam commodius ducendam beneficia multa contulerint, honores ab eis meruisse divinos. Minerva vero longe his antiquior. Nam temporibus Ogygii⁴ ad lacum, qui Tritonis dicitur, virginali apparuisse fertur ætate; unde et Tritonia nuncupata est: multorum sane operum inventrix; et tanto proclivius dea credita, quanto minus origo ejus innotuit. Quod enim de capite Jovis nata canitur, poetis et fabulis, non historiæ rebusque gestis est applicandum. Quanquam Ogygius ipse quando fuerit, cujus temporibus etiam diluvium magnum factum est, non illud maximum quo nulli homines evaserunt, nisi qui in arca esse potuerunt, quod gentium nec Græca nec Latina novit historia (a), sed tamen majus quam postea tempore Deucalionis fuit, inter scriptores historiæ non convenit. Nam Varro inde exorsus est librum, cujus mentionem superius feci, et nihil sibi, ex quo perveniat ad res Romanas, proponit antiquius quam Ogygii diluvium, hoc est, Ogygii factum temporibus. Nostri autem qui Chronica scripserunt, prius Eusebius, post Hieronymus, qui utique præcedentes aliquos historicos in hac opinione secuti sunt, post annos amplius quam trecentos jam secundo Argivorum Phoroneo rege regnante Ogygii diluvium fuisse commemorant. Sed quolibet tempore fuerit, jam tamen Minerva tanquam dea colebatur, regnante Atheniensibus Cæcrope, sub quo rege etiam ipsam vel instauratam ferunt, vel conditam civitatem.

CAPUT IX. — *Quando Atheniensem civitas sit condita, et quam causam nominis ejus Varro perhibeat.*

Nam ut Athenæ vocarentur, quod certe nomen a Minerva est, quæ græcè Ἀθηνᾶ dicitur, hanc causam Varro indicat. Cum apparuisset illic repente olivæ arbor, et alio loco aqua erupisset, regem prodigia ista moverant, et misit ad Apollinem Delphicum sciscitatum, quid intelligendum esset, quid faciendum. Ille respondit quod olea Minervam significaret, unda Neptunum, et quod esset in civium potestate, ex cujus nomine potius duorum deorum, quorum signa illa essent, civitas vocaretur. Isto Cæcropis oraculo accepto, cives omnium utriusque sexus (mos enim tunc in eisdem locis erat, ut etiam femine publicis consultationibus interessent) ad ferendum suffragium convocavit. Consulta igitur multitudine mares pro Neptuno, femine pro Minerva tulere sententias: et quia una plus est inventa feminarum, Minerva vicit. Tunc Neptunus iratus marinis fluctibus exæstuantibus terras Atheniensium populata est: quoniam spargere latius quaslibet aquas difficile dæmonibus non est. Cujus ut iracundia placat-

¹ Editi post, *persecutionibus* addunt, *affligebatur inuane* ris: quod a Mss. abest.

² In veteribus libris constanter scriptum est, *Atlans*.

³ Ita Mss. At Viud. Am. Er., *Melancomice*. Lov. *Melancomice*.

(a) Sic Eusebius in Chronico, ex aliorum et ipse opinione loquens: « secundum quorundam, » ait, « opinionem his temporibus fuit Prometheus, a quo homines factos esse commemorant: et re vera; cum enim sapiens esset, fertilitatem eorum et nimiam imperitiam ad humanitatem et scientiam transfiguravit. »

⁴ Mss., *Ogygi*: et infra pro, *Ogygius*, habent, *Ogygius*: quidam tamen isto secundo loco, *Ogygis*. Vide infra, lib. 21, cap. 8, n. 2.

(a) Non defuisse tamen inter gentiles historicos, qui maximi istius et universalis diluvii atque arce Noe meminerint, Berosum Babylonium scilicet, Maseam, Nicolaum Damascenum, et Hieronymum Ægyptium, scribit Josephus, libro 1 Antiquitatum Judaicarum, cap. 4, et ex ipso Eusebio, Præarationis evangelicæ libro 9, capp. 11 et 12: sed gentiliū illorum scripta ad barbaricas historias pertinent, non ad Græcas aut Latinas, de quibus Augustinus loquitur. Læp. Vivz.

retur, triplici supplicio dicit idem auctor ab Atheniensibus affectas esse mulieres : ut nulla ulterius ferrent suffragia, ut nullus nascentium matrum nomen acciperet, ut ne quis eas Athenæas vocaret. Ita illa civitas mater ac nutrix¹ liberalium doctrinarum, et tot tantorumque philosophorum, qua nihil habuit Græcia clarius atque nobilius, iudicantibus dæmonibus de lite deorum suorum, maris et feminæ, et de victoria per feminas feminæ² Athenas nomen accepit : et a victo læsa ipsam victricis victoriam punire compulsæ est, plus aquas Neptuni quam Minervæ arma formidans. Nam in mulieribus quæ sic punitæ sunt, et Minerva quæ vicerat, victa est ; nec adfuit suffragatricibus suis, ut suffragiorum deinceps perditæ potestate, et alienatis filiis a nominibus matrum, Athenæas saltem vocari liceret, et ejus deæ mereri vocabulum, quam viri dei victricem fecerant ferendo suffragium. Quæ et quanta hinc dici possent³, nisi sermo ad alia properaret ?

CAPUT X. — *Quid Varro tradit de nuncupatione Areopagi, et de diluvio Deucalionis.*

Attamen⁴ Marcus Varro non vult fabulosis adversus deos fidem adhibere signentis, ne de majestatis eorum dignitate indignum aliquid sentiat. Et ideo nec Areopagon⁵, ubi cum Atheniensibus Paulus apostolus disputavit (*Act. xvii, 19 seqq.*), ex quo loco Areopagitæ appellati sunt curiales urbis ejusdem, vult inde accepisse nomen, quod Mars, qui græcè Ἄρης dicitur, cum homicidii crimine reus fieret, iudicantibus duodecim diis in eo pago, sex sententiis absolutus est ; quia ubi paris numeri sententiæ fuissent, præconi absolutio damnationi solebat. Sed contra istam, quæ nullo est amplius celebrata, opinionem, aliam quamdam de obscurarum notitia litterarum causam nominis hujus conatur astruere, ne Areopagon Athenienses de nomine Martis et pagi, quasi Martis pagum nominasse credantur ; in injuriam videlicet numinum, a quibus litigia vel judicia existimat aliena : non minus hoc, quod de Marte dicitur, falsum esse asseverans, quam illud quod de tribus deabus, Junone scilicet, et Minerva, et Venere, quæ pro malo aureo adipiscendo, apud judicem Paridem de pulchritudinis excellentia certasse narratur ; et ad placandos ludis deus, qui delectantur seu veris, seu falsis istis criminibus suis, inter theatricos plausus cantantur atque saltantur. Hæc Varro non credit, ne deorum naturæ seu moribus credat incongrua : et tamen, non fabulosam, sed historicam rationem de Athenarum vocabulo reddens, tantam Neptuni et Minervæ litem suis litteris inserit, de cujus nomine potius illa civitas vocaretur, ut, cum prodigiorum ostentatione contendere, inter eos judicare nec Apollo consultus auderet, sed deorum jurgium finiendum, sicut memoratarum trium dearum

ad Paridem Jupiter, ita et iste ad homines mitteret, ubi vinceret Minerva suffragiis, et in pœna suarum suffragatricium vinceretur, quæ in adversariis suis viris obtinere Athenas potuit, et amicas suas feminas Athenæas habere non potuit. His temporibus, ut Varro scribit, regnante Atheniensibus Crauo, successore Cecropis, ut autem nostri Eusebius et Hieronymus, adhuc eodem Cecrope permanente, diluvium fuit, quod appellatum est Deucalionis (a), eo quod ipse regnabat in earum terrarum partibus, ubi maxime factum est. Hoc autem diluvium nequaquam ad Ægyptum atque ad ejus vicina pervenit (b).

CAPUT XI. — *Quo tempore Moyses populum de Ægypto eduçerit ; et de Jesu Nave, qui eidem successit, quorum regum ætate sit mortuus.*

Eduxit ergo Moyses ex Ægypto populum Dei, novissimo tempore Cecropis Atheniensium regis, cum apud Assyrios regnaret Ascatades, apud Sicyonios Marathus⁶, apud Argivos Triopas. Educto autem populo in monte Sina divinitus acceptam tradidit legem : quod vetus dicitur Testamentum, quia promissiones terrenas habet ; et per Jesum Christum futurum fuerat Testamentum novum, quo regnum cælorum promitteretur. Hunc enim ordinem servari oportebat, sicut in unoquoque homine, qui in Deum proficit, id agitur, quod ait Apostolus, ut non sit prius quod spirituale est ; sed quod animale, postea spirituale : quoniam sicut dicit, et verum est, *Primus homo de terra, terrenus ; secundus homo de cælo, celestis*⁷ (I Cor. xv. 46 et 47). Rexit autem populum Moyses per annos quadraginta in deserto : et mortuus est annorum centum et viginti (c), cum Christum etiam ipse prophetasset per figuras observationum carnalium in tabernaculo, et sacerdotio, et sacrificiis, aliisque mysticis plurimisque mandatis. Moysi successit Jesus Nave : et in terram promissionis introductum populum collocavit, ex auctoritate divina debellatis gentibus, a quibus eadem loca tenebantur. Qui cum populum rexisset post mortem Moysi viginti et septem annos (d), etiam ipse defunctus est : regnante apud Assyrios octavo decimo

¹ In multis Mss., *Marathus*. Apud Eusebium, *Marachus*.

² Deest, *cælestis*, in Ms. 238. M.

(a) Orosius, lib. 1, cap. 9, scribit Deucalionis diluvium contigisse anno 800 ante Urbem conditam, regnante Athenis Amphityone, qui tertius a Cecrope imperavit.

(b) Plato in Timæo.

(c) Conf. alibi sæpe, ac potissimum lib. 19 cont. Faust. Manich.

(d) De numero annorum, quibus Josue præfuit populo Dei, ex Scriptura non satis constat : ideo variae de hoc sunt sententiæ. Josephus, Antiquitatum Judaicarum libro 5, cap. 4, putat eum præfuisse annis viginti quinque ; Eusebius viginti septem vel octo, et ita plerique Hebræorum. Sulpicius, Historiæ sacræ libro 1, cap. 25, et Augustinus eandem sententiam sequuntur : nimirum ob septuaginta interpretum codices, in quibus deest Ahialou, qui, Judicum xii, 11, 12, perhibetur judicasse Israellem annis decem, quos tribuerant Josue, ut conficerent summam annorum quadringentorum octoginta ab egressione filiorum Israel ex terra Ægypti usque ad templi ædificationem, quæ ponitur III Reg. vi, 1. Videtur tamen ex Scriptura colligi Josue septem annos consumpsisse in terra Chananeorum expugnanda, et totidem alios in ea dividenda. Unde quidam Hebræorum tribuunt ei quatuordecim annos ; ac probabile est eum tres vel quatuor annos supervixisse, sicque republicam gubernasse annis septendecim vel octodecim. COCÆUS.

¹ Mss., *mater aut nutrix*.

² Sola editio Lov., *feminea*.

³ Sic Mss. At Editi, *suffragium*. De quo satis apparet, quæ et quanta dici possent.

⁴ In Mss., *Et tamen*.

⁵ Mss. constantiter pro, *Areopagon*, habent, *Areon pagon* ; vel, *Arion pagon*.

Amynta, apud Sicyonios sexto decimo Corace, apud Argivos decimo Danao, apud Athenienses quarto Erichthonio.

CAPUT XII. — *De sacris falsorum deorum, quæ reges Græciæ illis temporibus instituerunt, quæ ab exitu Israel ex Ægypto usque ad obitum Jesu Nave dinumerantur.*

Per hæc tempora, id est, ab exitu Israel ex Ægypto usque ad mortem Jesu Nave, per quem populus idem terram repromissionis accepit, sacra sunt instituta diis falsis a regibus Græciæ, quæ memoriam diluvii, et ab eo liberationis hominum, vitæque tunc ærumnosæ modo ad alta, modo ad plana migrantium, solemnæ celebritate revocarunt. Nam et Lupercorum per sacram viam ascensum atque descensum (a) sic interpretantur, ut ab eis significari dicant homines, qui propter aquæ inundationem summa montium petiverunt, et rursus eadem residente ad ima redierunt. His temporibus Dionysium, qui etiam Liber pater dictus est, et post mortem deus habitus, vitem ferunt ostendisse in Attica terra hospiti suo. Tunc Apollini Delphico instituti sunt ludi musici, ut placaretur ira ejus, qua putabant afflictas esse sterilitate Græciæ regiones, quia non defenderint templum ejus, quod rex Danaus, cum eadem terras bello invasisset, incendit. Hos autem ludos ut instituerent oraculo sunt ejus admoniti¹. In Attica vero rex Erichthonius ei ludos primus instituit: nec ei tantum, sed etiam Minervæ, ubi præmium victoribus oleum ponebatur, quod ejus fructus inventricem Minervam, sicut vini Liberum tradunt. Per eos annos a rege Xantho Cretensium, cujus apud alios aliud nomen invenimus (b), rapta perhibetur Europa, et inde geniti Rhadamanthus, Sarpedon, et Minos, quos magis ex eadem muliere filios Jovis esse vulgatam est. Sed talium deorum cultores illud quod de rege Cretensium diximus, historicæ veritati²; hoc autem quod de Jove poeta cantant, theatra concrepant, populi celebrant, vanitati deputant fabularum, ut esset unde ludi fierent placandis numinibus etiam falsis eorum criminibus. His temporibus Hercules in Tyria (c) clarus habebatur; sed nimirum alius, non ille de quo supra locuti sumus. Secretiore quippe historia plures fuisse dicuntur et Liberi patres et Hercules. Hunc sane Herculem, cujus ingentia duodecim facta numerant, inter quæ Antæi Afri necem non commemorant, quod ea res ad alterum Herculem pertinet, in OETA monte a se ipso, incensum produunt suis litteris, cum ea virtute,

¹ Lov., *oraculo sunt admoniti*; omisso, *ejus*, quod habent editi aiti et manuscripti.

² Lov., *dant veritati*. Abest, *dant*, ab editis aliis et a manuscriptis.

(a) sacra via, quæ a Varrone, de Lingua Latina, utcumque describitur, sic dicta est, quod ibi fœdus inter Romulam et Tatium regem Sabinorum lectum fuerit. Acclivis erat hæc via, ideo Lupercorum sacerdotum, sive eorum qui deo Pauli sacra faciebant, ascensus per eam et descensus dicitur.

(b) Asterius nominatur in Eusebii Chronico, qui ex Europa Rhadamantum, Sarpedonem et Minoem genuisse dicitur.

(c) Merique Mss., *in Syria*. Sed si hic est Hercules qui in OETA combustus est, Hercules Argivus erit, et legendum erit, *in Tyrrinthia*, quæ est urbs in Peloponneso prope Argos, in qua educatus est Hercules. Lov. VITÆ.

qua monstra subegerat, morbum tamen, quo languebat, sustinere non posset. Illo tempore vel rex, vel potius tyrannus Basiris suis diis suos hospites immolabat¹, quem filiam perhibent fuisse Neptuni, ex matre Libya, filia Epaphi. Verum non credatur hoc stuprum perpetrasse Neptunus, ne dii accusentur: sed poetis et theatris ista tribuantur, ut sit unde placentur. Erichthonii regis Atheniensium, cujus novissimis annis Jesus Nave mortuus reperitur, Vulcanus et Minerva parentes fuisse dicuntur. Sed quoniam Minervam virginem volunt, in amborum contentione Vulcanum commotum effudisse aiunt semen in terram, atque inde homini nato ob eam causam tale inditum nomen. Græca enim lingua *ἐρις* contentio, et *χθών* terra est; ex quibus duobus compositum vocabulum est Erichthonius. Verum, quod fatendum est, refellunt et a suis diis repellunt ista doctiores, qui hanc opinionem fabulosam hinc exortam ferunt, quia in templo Vulcani et Minervæ, quod ambo unum habebant Athenis, expositus inventus est puer dracone involutus, qui eum significavit magnum futurum, et propter commune templum, cum essent parentes ejus ignoti, Vulcani et Minervæ dictum esse filium: nominis tamen ejus originem fabula illa potius quam ista designat historia. Sed quid ad nos? Hoc in veracibus libris homines instruat religiosos², illud in fallacibus ludis demones delectet impuros: quos tamen illi religiosi tanquam deos colunt; et cum de illis hæc negant, ab omni eos crimine purgare non possunt, quoniam ludos eis poscentibus exhibent, ubi turpiter aguntur quæ velut sapienter negantur, et his falsis ac turpibus dii placantur, ubi etsi fabula cantat crimen naminum falsum, delectari tamen falso crimine, crimen est verum.

CAPUT XIII. — *Qualium fabularum fragmenta exorta sint eo tempore, quo Hebræis Judices præcesserunt.*

Post mortem Jesu Nave, populus Del Judices habuit, quibus temporibus alternaverunt apud eos et humilitates laborum pro eorum peccatis, et prosperitates consolationum propter miserationem Dei. His temporibus fabulæ factæ sunt de Triptolemo, quod jubente Cerere, anguibus portatus alitibus, indigentibus terris frumenta volando contulerit: de Minotauro, quod bestia fuerit inclusa Labyrintho; quod cum intrassent homines, inextricabili errore, inde exire non poterant: de Centauris, quod equorum hominumque fuerit natura conjuncta: de Cerbero, quod sit triiceps inferorum canis: de Phryxo et Helle ejus sorore, quod vecti ariete volaverint: de Gorgone, quod fuerit crinta serpentibus, et aspicientes convertibat in lapides: de Bellerophonte, quod equo pennis volante sit vectus, qui equus Pegasus dictus est: de Amphione, quod citharæ suavitate lapides mulserit et attraxerit: de fabro Dædalo, et ejus

¹ Plures Mss., *Basiris suis diis suos potius hospites immolabat*.

² Sic manuscripti. At editi: *Sed quid ad nos hoc, cum isti in veracibus libris homines instruant religiosos?*

Icaro filio, quod sibi coaptatis pennis volaverint : de Oedipo, quod monstrum quoddam, quæ Sphinga dicebatur, humana facie quadrupedem¹, soluta quæ ab illa proponi solebat velut insolubili questione, suo præcipitio perire compulerit : de Antæo, quem necavit Hercules, quod filius Terræ fuerit, propter quod cadens in terram fortior soleret assurgere : et si qua forte alia prætermisi. Hæ fabulæ bellum ad usque Trojanum, ubi secundum librum Marcus Varro de populi Romani gente finivit, ex occasione historiarum, quæ res veraciter gestas continent, ita sunt ingeniis hominum fictæ, ut non sint opprobriis numinum affixæ. Porro autem quicumque sinxerunt a Jove ad stuprum raptum pulcherrimum puerum Ganymedem, quod nefas rex Tantalus fecit, et Jovi fabula tribuit; vel Danaes per imbrem aureum appetisse concubitum, ubi intelligitur pudicitia mulieris auro fuisse corrupta; quæ illis temporibus vel facta vel ficta sunt, aut facta ab aliis et ficta de Jove, dici non potest quantum mali de hominum præsumpserint cordibus, quod possent ista patienter ferre mendacia, quæ tamen etiam libenter amplexi sunt : qui utique quanto devotius Jovem colunt, tanto eos qui hæc de illo dicere ausi sunt, severius punire debuerunt. Nunc vero, non solum eis qui ista sinxerunt, irati non sunt; sed ut² talia signenta etiam in theatris agerent, ipsos deos potius iratos habere timerunt. Illis temporibus Latona Apollinem peperit, non illum cujus oracula solere consuli superius loquebamur, sed illum qui cum Hercule servivit Admeto (a) : qui tamen sic est deis creditus, ut plurimi ac pene omnes unum eundemque Apollinem fuisse opinentur (b). Tunc et Liber pater bellavit in India, qui multas habuit in exercitu feminas, quæ Bacchæ appellatæ sunt, non tam virtute nobiles, quam furore. Aliqui sane et victum scribunt istum Liberum et victum; nonnulli et occisum in pugna a Perseo, nec ubi fuerit sepultus tacent (c) : et tamen ejus velut dei nomine per immundos dæmones Bacchanalia sacra, vel potius sacrilegia sunt instituta : de quorum rabiosa turpitudine post tam multos annos sic senatus erubuit, ut

¹ Editi, *quadrupes*. At Mss., *quadrupedem*.

² Sic Mss. Editi vero, *sed nisi*.

(a) Sic reponimus ex quinque nostris Mss., et ex omnibus quos consuluerant PP. Benedictini, qui tamen in textu veterum editionum lectionem servaverant, nempe, *sed illum quem cum Hercule ferunt Admeti regis armenta parisse*; erronee certe, siquidem Herculem Apollini in pastoris officio conitem nusquam adiungunt mythologi. Itaque verba, *cum Hercule*, in Augustini mente, non servitutis consorium, sed tempus quo vixit Apollo, designant. M.

(b) Illos enim Apollines, secundum Ciceronem, de Nat. deor., lib. 5, cap. 25, a quibusdam habebantur.

(c) Hac de re sic scribit Eusebius in Chron. : « Bacchus cum Perseo pugna congressus occiditur, ut scribit Dinarcius poeta, non rhetor. Qui autem voluerit, licet ei adhuc spectare Bacchi sepulcrum Delphis, juxta aureum Apollinem. » Discimus ex Cyrillo, lib. 10 cont. Julian., Dinarcium illum poetam, de quo hic Eusebius, res a Baccho gestas carminibus descripsisse. Clemens Alexandrinus, lib. 1 Stromat., cap. 21, tradit, Bacchum in pugna a Perseo occisum regnante in Macedonia Perseo rege diis annumeratum esse. Bacchi obitum diversimode narrat idem Clemens, cap. 2 Pædag., illum nempe a Titanibus dilaceratum, lebelibus elixum, verubusque igni admotis cepisse assari. Pallas vero, jubente Jove, cor et membra Bacchi extorsit e manibus carnificum, posteaque Apollini mandatum est ut illa in Parnasso Delphis proximo sepeliret.

in urbe Roma esse prohiberet (a). Per ea tempora Perseus et uxor ejus Andromeda posteaquam sunt mortui, sic eos in cælum receptos esse crediderunt, ut imagines eorum stellis designare, eorumque appellare nominibus non erubescerent, non timerent¹.

CAPUT XIV. — De theologicis poetis.

Per idem temporis intervallum exstiterunt poætæ, qui etiam theologi dicerentur, quoniam de diis carmina faciebant : sed talibus diis, qui licet magni homines, tamen homines fuerunt; aut mundi hujus, quem verus Deus fecit, elementa sunt; aut in principatibus et potestatibus pro voluntate Creatoris et suis meritis² ordinati : et si quid de uno vero Deo inter multa vana et falsa cecinerunt, colendo cum illo alios qui dii non sunt, eisque exhibendo famulatum qui uni tantum debetur Deo, non ei utique rite servierunt, nec a fabuloso deorum suorum dedecore etiam ipsi se abstinere potuerunt³ Orpheus, Musæus, Linus. Verum isti theologi deos coluerunt, non pro diis culti sunt : quamvis Orpheum nescio quomodo infernis sacris, vel potius sacrilegiis, præficere soleat civitas impiorum. Uxor autem regis Athamantis⁴ quæ vocabatur Ino, et ejus filius Melicertes præcipitio spontaneo in mari perierunt, et opinione hominum in deos relati sunt : sicut alii homines eorum temporum⁵, Castor et Pollux. Illam sane Melicertis matrem Leucothem Græci, Matutam Latini vocaverunt : utrique tamen putantes deam.

CAPUT XV. — De occasu regni Argivorum, quo tempore apud Laurentes Picus Saturni filius regnum patris primus accepit.

Per ea tempora regnum finitum est Argivorum, translatum ad Mycenæ, unde fuit Agamemnon : et exortum est regnum Laurentum, ubi Saturni filius Picus regnum primus accepit, judicante apud Hebræos femina Debhora : sed per illam Dei Spiritus id agebat : nam etiam prophetissa erat, cujus prophetia (*Judicum* v) minus aperta est, quam ut possimus eam sine diuturna expositione de Christo demonstrare prolata. Jam ergo regnabant Laurentes utique in Italia, ex quibus evidenter ducitur origo Romana post Græcos : et tamen adhuc regnum Assyriorum permanebat, ubi erat rex viceimus tertius Lampares, cum primus Laurentum Picus esse cœpisset. De hujus Pici patre Saturno viderint quid sentiant talium deorum cultores, qui negant hominem fuisse : de quo et alii scripserunt, quod ante Picum filium suum in

¹ Codex 258, *timerent*, omissa vocula, non. M.

² In editis, *et non suis meritis*. Abest, non, a manuscriptoris.

³ Post verbum, *potuerunt*, editi addunt, *Ex quorum numero fuisse perhibentur*. Hoc non habent veteres libri.

⁴ Aliquot Mss., *Adamantis*.

⁵ Hic in editis additur, *inter quos fuerunt, quod abest* a Mss.

(a) Has turritudines non in Roma tantum, sed totam peninsulam Italianam prohibitas tradit Livius, lib. 39, cap. 18; unde Tertullianus in Apologetico, cap. 6: « Liberum patrem cum mysteriis suis consules senatus auctoritate non modo a Urbe, sed universa Italia eliminaverunt. » vide supra, lib. 6, cap. 9, n. 1.

Italia ipse regnaverit; et Virgilius notioribus litteris dicit:

Is genus indocile ac dispersum montibus altis
Coniussit, legesque dedit, Latiumque vocæci
Maluit; his quoniam latuisset tutus in oris;
Auræque, ut perhibent, illo sub rege fuere
sæcula.

(Æneid. lib. 8, vers. 321-323.)

Sed hæc poetica opinentur esse figmenta, et Pici patrem Stercen potius fuisse asseverent, a quo peritissimo agricola inventum ferunt, ut fimo animalium agri fecundarentur, quod ab ejus nomine stercus est dictum: hunc quidam Stercutium vocatum ferunt. Qualibet autem ex causa eum Saturnum appellare voluerint, certe tamen hunc Stercen sive Stercutium merito agriculturæ fecerunt deum. Picum quoque similiter ejus filium in talium deorum numerum receperunt, quem præclarum augurem et belligeratorem fuisse asserunt. Picus Faunum genuit, Laurentum regem secundum: etiam iste deus illis vel est, vel fuit. Hos ante Trojanum bellum divinos honores mortuis hominibus detulerunt.

CAPUT XVI.—*De Diomede post Trojæ excidium in deos relato, cujus socii traditi sunt in volucres esse conversi.*

Troja vero eversa, excidio illo usquequaque cantato puerisque notissimo, quod et magnitudine sui et scriptorum excellentibus linguis insigniter diffamatum atque vulgatum est, gestumque regnante jam Latino Fauni filio, ex quo Latinorum regnum dici cœpit, Laurentumque cessavit: Græci victores, deletam Trojam derelinquentes, et ad propria remeantes, diversis et horrendis cladibus dilacerati atque contriti sunt: et tamen etiam ex eis deorum suorum numerum auxerunt. Nam et Diomedem fecerunt deum, quem poena divinitus irrogata perhibent ad suos non revertisse; ejusque socios in volucres fuisse conversos, non fabuloso poeticoque mendacio, sed historica attestazione confirmant: quibus nec deus, ut putant, factus, humanam revocare naturam, vel ipse potuit, vel certe a Jove suo rege tanquam cœlicola novitius impetravit. Quin etiam templum ejus esse aiunt in insula Diomedeæ, non longe a monte Gargano, qui est in Apulia, et hoc templum circumvolare, atque incolere has alites tam mirabili obsequio, ut rostrum¹ aqua impleant et aspergant: et eo si Græci venerint, vel Græcorum stirpe progeniti, non solum quietas esse, verum et insuper adulare; si autem alienigenas viderint, subvolare ad capita, tamque gravibus ictibus, ut etiam perimant, vulnerare. Nam duris et grandibus rostris satis ad hæc prælia perhibentur armatæ.

CAPUT XVII.—*De incredibilibus commutationibus hominum quid Varro tradiderit.*

Hoc Varro ut astruat, commemorat alia non minus incredibilia de maga illa famosissima Circe, quæ socios quoque Ulyssis mutavit in bestias, et de Arcadibus, qui sorte ducti transnabant quoddam stagnum, atque ibi convertebantur in lupos, et cum

¹ Vox, rostrum, non est in Mss.

similibus feris per illius regionis deserta vivebant. Si autem carne non vescerentur humana, rursus post novem annos eodem renato stagno reformabantur in homines. Denique etiam nominatim expressit quendam Demænetum, cum gustasset de sacrificio, quod Arcades immolato puero, deo suo Lycæo facere solebant, in lupum fuisse mutatum, et anno decimo in figuram propriam restitutum, pugilatu sese exercuisse¹, et Olympiaco vicisse certamine. Nec idem propter aliud arbitratur historicus in Arcadia tale nomen afflictum Pani Lycæo et Jovi Lycæo, nisi propter hanc in lupos hominum mutationem, quod eam nisi vi divina fieri non putarent. Lupus enim græce λύκος dicitur, unde Lycæi nomen apparet inflexum. Romanos etiam Lupercos ex illorum mysteriorum velut semine dicit exortos.

CAPUT XVIII.—*Quid credendum sit de transformationibus, quæ arte dæmonum hominibus videntur accidere.*

1. Sed de ista tanta ludificatione dæmonum, nos quid dicamus, qui hæc legent, fortassis expectent². Et quid dicemus, nisi de medio Babylonis esse fugiendum? Quod præceptum propheticum (Isai. XLVIII, 20) ita spiritualiter intelligitur, ut de hujus sæculi civitate, quæ profecto et angelorum et hominum societas impiorum est, fidei passibus, quæ per dilectionem operatur, in Deum vivum proficiendo fugiamus. Quanto quippe in hæc ima potestatem dæmonum majorem videmus, tanto tenacius Mediatori est inhærendum, per quem de imis ad summa conscendimus. Si enim dixerimus ea non esse credenda, non desunt etiam nunc, qui ejusmodi quædam, vel certissima audisse, vel etiam expertos se esse asseverent. Nam et nos cum essemus in Italia, audiebamus talia de quadam regione illarum partium, ubi stabularias mulieres imbutas his malis artibus, in caso dare solere dicebant, quibus vellent seu possent vitoribus, unde in jumenta illico verterentur, et necessaria quæque portarent, postque perfuncta opera iterum ad se redirent: nec tamen in eis mentem fieri bestialem, sed rationalem humanamque servari, sicut Apuleius in libris quos Asini aurei titulo inscripsit, sibi ipsi accidisse, ut accepto veneno, humano animo permanente asinus fieret, aut indicavit, aut finxit.

2. Hæc vel falsa sunt, vel tam inusitata, ut merito non credantur. Firmissime tamen credendum est, omnipotentem Deum omnia posse facere quæ voluerit, sive vindicando, sive præstando, nec dæmones aliquid operari secundum naturæ suæ potentiam (quia et ipsa angelica creatura est, licet proprio sit vitio maligna), nisi quod ille permiserit, cujus judicia occulta sunt multa, injusta nulla. Nec sane dæmones naturas creant, si aliquid tale faciunt, de quilibet factis ista vertitur quæstio; sed specie tenus, quæ a vero Deo sunt creata, commutant, ut videantur esse quod non sunt. Non itaque solum animum, sed

¹ Editi, ad pugilatum sese exercuisse.

² Post, fortassis expectent, editi addunt, quid Christiani agere debeant, quando inter idola gentium miracula fieri asseruntur. Adnotatio est e margine translata in textum; nam ea textus caret in veteribus libris.

nec corpus quidem ulla ratione crediderim dæmonum arte vel potestate in membra et lineamenta bestialia veraciter posse converti : sed phantasticum hominis, quod etiam cogitando sive somniando per rerum innumerabilia genera variatur, et cum corpus non sit, corporum tamen similes mira celeritate formas capit, sopitis aut oppressis corporeis hominis sensibus, ad aliorum sensum nescio quo ineffabili modo figura corporea posse perducī : ita ut corpora ipsa hominum alicubi jaceant, viventia quidem, sed multo gravius atque vehementius quam somno suis sensibus obseratis; phantasticum autem illud veluti incorporatum in alicujus animalis effigie appareat sensibus alienis, talisque etiam sibi homo esse videatur, sicut talis sibi videri posset in somnis, et portare onera : quæ onera, si vera sunt corpora, portantur a dæmonibus, ut illudatur hominibus, partim vera onerum corpora, partim jumentorum falsa cernentibus. Nam quidam nomine Præstantius patri suo contigisse indicabat, ut venenum illud per caseum in domo sua sumeret, et jaceret in lecto suo quasi dormiens, qui tamen nullo modo poterat excitari. Post aliquot autem dies eum velut evigilasse dicebat, et quasi somnia narrasse quæ passus est, caballum se scilicet factum, annonam inter alia jumenta bajulasse militibus, quæ dicitur Retica, quoniam ad Retias¹ deportatur. Quod ita, ut narravit, factum fuisse compertum est : quæ tamen ei sua somnia videbantur. Indicavit et alius se domi suæ per noctem, antequam requiesceret, vidisse venientem ad se quemdam philosophum sibi notissimum, sibi que exposuisse nonnulla Platonica, quæ antea rogatus exponere noluisset. Et cum ab eodem philosopho quæsitum fuisset, cur in domo ejus fecerit quod in domo sua petenti negaverat : *Non feci*, inquit, *sed me fecisse somniavi*. Ac per hoc alteri per imaginem phantasticam exhibitum est vigilanti, quod alter vidit in somnis.

3. Hæc ad nos non quibuscumque, qualibus credere putarem indignum, sed eis referentibus pervenerunt, quos nobis non existimarem fuisse mentitos. Proinde quod homines dicuntur, mandatumque est litteris, ab diis vel potius dæmonibus Arcadibus², in lupos solere converti, et quod

Carminibus Circe socios mutavit Ulyssel,
(Virgil. Eclog. 8, v. 70.)

secundum istum modum mihi videtur fieri potuisse, quem dixi; si tamen factum est. Diomedæas autem volucres, quandoquidem genus earum per successionem propaginis durare perhibetur, non mutatis hominibus factas, sed subtractis credo fuisse suppositas; sicut cerva pro Iphigenia, regis Agamemnonis filia. Neque enim dæmonibus judicio Dei permissis hujusmodi præstigie difficiles esse potuerunt : sed quia illa virgo postea viva reperta est, suppositam pro illa cervam, esse facile cognitum est (a). Socii

¹ Lov., ad retia. Melius editi alii et Mss., ad Retias, id est ad Retorum, seu ut alii scribunt, Rhætorum provincias.

² Sic omnes Mss. Editi, Arcades.

(a) In confirmationem hujus doctrinæ similis historia ex-

vero Diomedis quia nusquam subito comparuerunt, et postea nullo loco apparuerunt, perdentibus eos ultioribus angelis malis, in eas aves quæ pro illis sunt occulte ex aliis locis, ubi est hoc genus avium, ad ea loca perductæ ac repente suppositæ, creduntur esse conversi. Quod autem Diomedis in templum⁴ aquam rostris afferunt et aspergunt, quod blandiuntur Græcigenis, alienigenas persequuntur, mirandum non est fieri dæmonum instinctu; quorum interest, persuadere deum factum esse Diomedem, ad decipiendos homines, ut falsos deos cum veri Dei injuria multos colant, et hominibus mortuis, qui nec cum viverent, vere vixerunt, templis, altaribus, sacrificiis, sacerdotibus (quæ omnia cum recta sunt, non nisi uni Deo vivo et vero debentur) inservant.

CAPUT XIX. — *Quod eo tempore Æneas in Italiam venerit, quo Labdon Judex præsidebat Hebræis.*

Eo tempore post captam Trojam atque deletam, Æneas cum viginti navibus, quibus portabantur reliquæ Trojanorum, in Italiam venit, regnante ibi Latino, et apud Athenienses Menestheo⁵, apud Sicyonios Polyphide, apud Assyrios Tautane⁶; apud Hebræos autem Judex Labdon fuit. Mortuo autem Latino regnavit Æneas tribus annis, eisdem in supradictis locis manentibus regibus, nisi quod Sicyoniorum jam Pelasgus⁷ erat, et Hebræorum Judex Samson : qui cum mirabiliter fortis esset, putatus est Hercules. Sed Æneam, quoniam quando mortuus est, non comparuit, deum sibi fecerunt Latini. Sabini etiam regem suum primum Sancum, sive ut aliqui appellant Sanctum⁸, retulerunt in deos. Per idem tempus Codrus, rex Atheniensium, Peloponnensibus ejusdem hostibus civitatis se interficiendum ignotus objecit : et factum est. Hoc modo eum prædicant patriam liberasse. Responsum enim acceperant Peloponnenses tum demum se superaturos, si eorum regem non occidissent. Fefellit ergo eos habitu pauperis apparendo, et in suam necem per jurgium provocando. Unde ait Virgilius : Et⁹ jurgia Codri (Ecl. v, v. 11). Et hunc Athenienses tanquam deum sacrificiorum honore coluerunt. Quarto Latinorum rege Silvio Æneæ filio, non de Cræusa, de qua fuit Ascanius, qui tertius ibi regnavit, sed de Lavinio Latini filia, quem posthumum Æneas dicitur habuisse; Assyrio-

stat apud Eusebium, Historiæ ecclesiasticæ libro 7, cap. 4:

« Dum apud Cæsaream a Gentibus solemnibus hostia immolatur, factum est ut opera dæmonis tanta esset sublata celeritate, ut videretur in cælum elata fuisse : sed cum quidam nomine Astyrius Deum rogaret, ne ita sineret hominibus illud, aperti sunt eorum oculi, ut viderent hostiam illam ad vicinas paludes fuisse delatam atque ibi hæere. » COQUAUS.

¹ Nostri codices, Quod autem Diomedis templo. M.

² Sic vind. Am. et manuscripti cum Eusebio. At Er. et Lov., Menestheo.

³ vind. Am. et aliquot Mss., Antane, vel, Antane.

⁴ Am., Pelagus. Regius Ms., Pelafus.

⁵ vind. Am. Er., Xanthum, sive ut aliqui appellant Xanthium. Lov. priore loco, Sangum, ubi plerique Mss., Sancum; et nonnulli, Sancum. Sanctum vocat Ovidius, Fast. lib. 6, vers. 217, 218. In Lactantii lib. 4 Institut., cap. 13, § 6, legitur Sancum. In quadam ejusdem Lactantii editione Viæves Sangum legebat.

⁶ Sic nostri codices. In B., Ant. M.

rum autem vicesimo et nono Oneo et Melanthe Athenien sium sexto decimo. Iudice autem Hebræorum Heli sacerdote, regnum Sicyoniorum consumptum est, quod per annos nongentos quinquaginta et novem traditur fuisse porrectum.

CAPUT XX.—*De successione ordinis regii apud Israelitas post Iudicium tempora.*

Mox eisdem per loca memorata regnantibus, Israelitarum regnum, finito tempore Iudicium, a Saule rege sumpsit exordium: quo tempore fuit Samuel propheta. Ab illo igitur tempore hi reges Latinorum esse cœperunt, quos cogominabant Silvios: ab eo quippe qui filius Æneæ primus dictus est Silvius, cæteris subsecutis et propria nomina imponebantur, et hoc non defuit cognomentum; sicut longe postea Cæsares cognominati sunt, qui successerunt Cæsari Augusto. Reprobato autem Saule, ne quisquam ex ejus stirpe regnaret, eoque defuncto, David successit in regnum post annos a Saülis imperio quadraginta (a). Tunc Athenienses habere deinde reges post Codri interitum destiterunt, et magistratus habere cœperunt administrandæ reipublicæ (b). Post David, qui etiam ipse quadraginta regnavit annos, filius ejus Salomon rex Israelitarum fuit, qui templum illud nobilissimum Dei Jerosolymitanum condidit. Cujus tempore apud Latinos condita est Alba, ex qua deinceps non Latinorum, sed Albanorum reges appellari, in eodem tamen Latio, cœperunt. Salomoni successit filius ejus Roboam, sub quo in duo regna populus ille divisus est, et singulæ partes suos singulos reges habere cœperunt.

CAPUT XXI.—*De regibus Latii, quorum primus Æneas, et duodecimus Aventinus dii facti sunt.*

Latium post Æneam, quem deum fecerant, undecim reges habuit, quorum nullus deus factus est. Aventinus autem qui duodecimo loco Æneam sequitur, cum esset prostratus in bello, et sepultus in eo monte, qui etiam nunc ejus nomine nuncupatur, deorum talium, quales sibi faciebant, numero est additus. Alii sane noluerunt eum in prælio scribere occisum, sed non comparuisse dixerunt: sed nec ex ejus vocabulo appellatum montem, sed ex adventu avium dictum Aventinum (c). Post hunc non est deus factus in Latio, nisi Romulus conditor Romæ. Inter istum autem et illum reges reperiuntur duo: quorum primus est, ut Virgiliano eum versu eloquar¹,

Proximus ille Procas, Trojanæ gloria gentis.
(Æneid. lib. 6, vers. 767.)

Cujus tempore quia jam quodammodo Roma parturiebatur, illud omnium regnorum maximum Assyriorum finem tantæ diuturnitatis accepit. Ad Medos quippe translatus est post annos ferme mille trecentos quinque, ut etiam Beli, qui Ninum genuit, et illic parvo contentus imperio primus rex fuit, tempora computentur. Procas autem regnavit ante Amulium.

¹ Sic nostri omnes Mss. In B., loquar, minus recte. M.

(a) Tot enim annis regnavit Saül ex sacris Litteris, II Reg. n. 10, et ex Josepho. Eupolemus vero, qui Hebræorum conscripsit historiam, tantum viginti et unum ponit. Lov. VIVES.

(b) Nempe Archontes. M.

(c) Vd. Varronem, de Lingua latina, lib. 5, § 43.

Porro Amulius fratris sui Numitoris filiam Rhoam nomine, quæ etiam Ilia vocabatur, Romuli matrem, Vestalem virginem fecerat, quam voluit de Marte geminos concepisse, isto modo struprum ejus honorantes, vel excusantes, et adhibentes argumentum, quod infantes expositos lupa nutriverit. Hoc enim genus bestię ad Martem existimant pertinere, ut videlicet ideo lupa credatur admovisse ubera parvulis, quia filios domini sui Martis agnovit: quamvis non desint qui dicant, cum expositi vagientes jacerent, a nescio qua primæ meretrice fuisse collectos, et primas ejus suxisse mamillas (meretrices autem lupas vocabant, unde etiam nunc turpia loca earum lupanaria nuncupantur), et eos postea ad Faustulum pervenisse pastorem, atque ab ejus Acca uxore nutritos. Quamquam si ad arguendum hominem regem, qui eos in aquam projici crudeliter jusserat, eis infantibus per quos tanta civitas condenda fuerat, de aqua divinitus liberatis, per lactantem feram Deus voluit subvenire, quid mirum est? Amulio successit in regnum Latiale frater ejus Numitor, avus Romuli, cujus Numitoris primo anno condita est Roma; ac per hoc cum suo deinceps, id est Romulo, nepote regnavit.

CAPUT XXII.—*Quod eo tempore Roma sit condita, quo regnum Assyriorum intercidit, et quo Ezechias regnabat in Juda¹.*

Ne multis morer, condita est civitas Roma, velut altera Babylon, et velut prioris filia Babylonis, per quam Deo placuit orbem debellare terrarum, et in unam societatem reipublicæ legumque perductum longe lateque pacare. Erant enim jam populi validi et fortes, et armis gentes exercitatæ, quæ non facile cederent, et quas opus esset ingentibus periculis et vastatione utrimque non parva atque horrendo labore superari. Nam quando regnum Assyriorum totam pene Asiam subjugavit, licet bellando sit factum, non tamen multum asperis et difficilibus bellis fieri potuit, quia rudes adhuc ad resistendum gentes erant, nec tam multæ, vel tam magnæ: siquidem post illud maximum atque universale diluvium, cum in arca Noe octo soli homines evaserunt, anni non multo² amplius quam mille transierant, quando Ninus Asiam totam, excepta India, subjugavit. Roma vero tot gentes et Orientis et Occidentis, quas imperio Romano subditas cernimus, non ea celeritate ac facilitate perdomuit; quoniam paulatim crescendo robustas eas et bellicosas, quaquaversum dilatabatur, invenit. Tempore igitur quo Roma condita est, populus Israel habebat in terra promissionis annos septingentos decem et octo. Ex quibus viginti septem pertinent ad Jesum Nave, deinde ad tempus Iudicum trecenti viginti novem. Ex quo autem ibi reges esse cœperant, anni erant trecenti sexaginta duo. Et rex tunc erat in Juda, cujus nomen erat Achaz, vel, sicut alii computant, qui ei successit Ezechias, quem quidem constat optimum et piissimum regem Romuli regnasse temporibus. In ea vero Hebraici populi

¹ Edili hic, in Judæa. At Mas., in Juda: et sic ipsi edili in subjecto capite 22.

² Sola editio Lov. omittit, multo.

parto quæ appellabatur Israel, regnare cœperat Osee (a).

CAPUT XXIII. — *De Sibylla Erythræa, quæ inter alias Sibyllas cognoscitur de Christo evidentiâ multa cecinisse.*

1. Eodem tempore nonnulli Sibyllam Erythræam vaticinatam ferunt. Sibyllas autem Varro prodidit plures fuisse, non unam (b). Hæc sane Erythræa Sibylla quædam de Christo manifesta conscripsit: quod etiam nos prius in latina lingua versibus male latinis et non stantibus legimus, per nescio cuius interpretis imperitiam, sicut post cognovimus. Nam vir clarissimus Flaccianus, qui etiam proconsul fuit, homo facillimæ fecundæ, multæque doctrinæ, cum de Christo colloqueremur, græcum nobis codicem protulit, carmina esse dicens Sibyllæ Erythrææ, ubi ostendit quodam loco in capitibus versuum ordinem litterarum ita se habentem, ut hæc in eo verba legerentur, Ἰησοῦς Χριστὸς Θεοῦ Υἱὸς Σωτὴρ: quod est latine, *Jesus Christus Dei Filius Salvator*. Hi autem versus quorum primæ litteræ istum sensum, quem diximus, reddunt, sicut eos quidam latinis et stantibus¹ versibus est interpretatus, hoc continent:

I Iudicii signum² tellus sudore madescet.
 H E caelo Rex adveniet per sæcla futurus:
 O Scilicet in carne præsens ut iudicet orbem.
 O Unde Deum cernent incredulus atque fidelis
 5 Celsum cum sanctis, ævi jam termino in ipso.
 M Sic animæ cum carne aderunt, quas iudicat³ ipse:
 M Cum jacet incultus densus in vepribus orbis.
 P Rejicient simulacra viri, cunctam quoque gazam:
 E Exuret terras ignis, pontumque polumque
 10 Inquirens, tetri portas effringet Averni
 I Sanctorum sed enim cunctæ lux libera carni
 M Tradetur, fontes æterna⁴ flamma cremabit.
 O Occultos actus retagens, tunc quisque loquetur
 O Secreta, atque Deus reserabit pectora luci.
 15 Tunc erit et luctus, stridebunt dentibus omnes.
 O Eripitur solis jubar, et chorus interit astris.
 O Volvetur⁵ cœlum, lunaris splendor obibit.
 I Dejiciet colles, vales extollet ab imo.
 I Non erit in rebus hominum sublime vel altum.
 20 Jam æquantur campis montes, et cærulea ponti
 O Omnia cessabunt, tellus contracta peribit.
 M Sic pariter fontes torrentur, fluminaque igni.
 M Sed tuba tum sonitum tristem demittet ab alto
 O Orbe, gemens facinus miserum variosque labores:
 25 Tartareumque chaos monstrabit terra dehiscens.
 H Et coram hic Domino roges sistentur ad unum.
 P Recidet⁶ e caelis ignisque et sulphuris annis.

In his latinis versibus de græco utcumque translatis, ibi non potuit ille sensus occurrere, qui fit cum litteræ, quæ sunt in eorum capitibus, connectuntur, ubi

¹ Editi, latinis exstantibus. Castigantur ex manuscriptis.

² Sola editio Lov., signo.

³ Sic juxta manuscriptorum fidem reponimus hic, *iudicat*, quod quidem verbum usurpat auctor Orationis contra Judæos, Append. tom. 8. in B., *judicet*. M.

⁴ Sequimur hic nostros omnes Mss. in B., *æternum*. Apud auctorem Orationis supra memoratæ, Append. tom. 8, editum est, *æternaque*. M.

⁵ Editi, *Solvetur*. At Mss., *Volvetur*: quo prima littera *V* respondeat græcæ vocali O, sicut superius in quarto versu.

⁶ Er. et Lov., *Decidet*. Melius Vind. Am. et Mss., *Recidet*: nam hujus versus primam litteram oportet eandem esse atque ultimam nominis græci *σῶτηρ*.

(a) Cum rationibus chronologicis hæc pugnant. Josue prævit annos 14. Seniores vel Iudices præverunt annos 410. Saul fuit electus rex anno 1068 ante Christum. Urbs Roma fuit condita anno 753 ante Christum. Achaz nou erat rex in Juda, nedom Ezechias, qui tunc temporis nondum natus erat. Regnabat Joathan, filius Ozia. LARCHER.

(b) Sibyllas a Varrone decem numeratas tradit Lactantius, lib. 1 Instit., cap. 6.

T littera in græco posita est; quia non potuerunt verba latina inveniri, quæ ab eadem littera inciperent, et sententiæ convenirent. Hi autem sunt versus tres, quintus et octavus decimus et nonus decimus. Denique si litteras quæ sunt in capitibus omnium versuum connectentes, horum trium¹ quæ scriptæ sunt non legamus, sed pro eis T litteram, tanquam in eisdem locis ipsa sit posita, recordemur, exprimitur in quinque verbis, *Jesus Christus Dei Filius Salvator*; sed cum græce hoc dicitur, non latine. Et sunt versus viginti et septem, qui numerus quadratum ternarium solidum reddit. Tria enim ter ducta sunt novem: et ipsa novem si ter ducantur, ut ex lato in altum figura consurgat, ad viginti septem perveniunt. Horum autem græcorum quinque verborum, quæ sunt, Ἰησοῦς Χριστὸς Θεοῦ Υἱὸς Σωτὴρ, quod est latine, *Jesus Christus Dei Filius Salvator*, si primas litteras jungas, erit Ἰχθύς, id est Piscis, in quo nomine mystice intelligitur Christus, eo quod in hujus mortalitatis abisso velut in aquarum profunditate vivus, hoc est sine peccato, esse poterit.

2. Hæc autem Sybilla sive Erythræa, sive, ut quidam magis credunt, Cumæa, ita nihil habet in toto carmine suo, cujus exigua ista particula est, quod ad deorum falsorum sive factorum cultum pertineat; quin imo ita etiam contra eos et contra cultores eorum loquitur, ut in eorum numero deputanda videatur, qui pertinent ad civitatem Dei. Inserit etiam Lactantius operi suo quædam de Christo vaticinia Sibyllæ, quamvis non exprimat ejus. Sed quæ ipse singillatim posuit, ego arbitratus sum conjuncta esse ponenda, tanquam unum sit prolixum, quæ ille plura commemoravit et breviter. *In manus iniquas*, inquit, *infidelium postea veniet: dabunt autem Deo alapas manibus incestis, et impurato ore expuent venenatos sputus: dabit vero ad verbera simpliciter sanctum dorsum* (a). *Et colaphos accipiens tacebit, ne quis agnoscat, quod verbum, vel unde venit ut inferis loquatur, et corona spinea coronetur* (b). *Ad cibum autem fel, et ad sitim acetum dederunt: inhospitalitatis hanc monstrabunt mensam* (c). *Ipsa enim incipiens tuum Deum non intellexisti, ludentem mortalium mentibus; sed spinis coronasti, et horridum fel miscuisti* (d). *Templi vero*

¹ Apud Er. et Lov., *harum trium*. In editis aliis et manuscriptis verius, *harum trium*, versuum videlicet paulo ante dictorum, quinti et octavi decimi et noni decimi.

(a) Lactantius, lib. 4 Instit., cap. 18, hæc ita græce commemorat:

Εἰς ἀνόμους χεῖρας καὶ ἀπίστον ὕστερον ἔξει.
 Δώσουσι δὲ θεῷ φαρίσματα χερσὶν ἀνώμοις,
 Καὶ στόμασιν μαρτοῖσι πύσματα φαρμακέντα.
 Δώσει δ' εἰς μάστιγας ἀπλῶς ἀγροὶν τότε νόστον.

(b) Hæc ibidem Lactantius paucis interjectis:

Καὶ κολληθεὶς ἀπὸ σιγῆς, μὴ τις ἐπιγῆθ' ἴσῃ λόγος, ἢ ποδὸν ἦλθεν, ἵνα φθιμένοιαι λαλήσῃ καὶ σέφανον φορέσει τὸν ἀκάθιστον.

(c) Ibidem paulo post Lactantius:

Εἰς δὲ τὸ βροῦμα χολῆν, καὶ εἰς δίψαν ἔξος ἕδωκαν,
 Τῆς ἀπειροεῖνης ταύτην δειξούσι τράπεζαν.

(d) Hos versus ibidem Lactantius alterius sibyllæ esse dicit:

Αὐτὴ γὰρ σὺ ἄφρων τὸν σὸν θεὸν οὐκ ἐνόησας,
 Παίζοντα ἐν θνητοῖσι νόημασιν, ἀλλὰ καὶ ἀκάθιστος
 Ἐστράφησας στερεῶν, φεθερῶν τε χολῆν ἐπίρρασας.

velum scindetur : et medio die nox erit tenebrosa nimis in tribus horis (a). Et morte morietur tribus diebus somno suscepto : et tunc ab inferis regressus ad lucem¹ veniet primus, resurrectionis principio revocatis ostenso (b). Ista Lactantius carptim per intervalla disputationis suæ, sicut ea poscere videbantur, quæ probare intendat, adhibuit testimonia Sibyllina, quæ nos nihil interponentes, sed in unam seriem connexa ponentes, solis capitibus, si tamen scriptores deinceps ea servare non negligant, distinguenda curavimus. Nonnulli sane Erythræam Sibyllam, non Romuli, sed belli Trojani tempore fuisse scripserunt.

CAPUT XXIV. — Quod regnante Romulo septem Sapientes claruerint, quo tempore decem tribus quæ Israel dicebantur, in captivitate a Chaldæis ductæ sunt, idemque Romulus mortuus divino honore donatus est.

Eodem Romulo regnante Thales Milesius fuisse perhibetur (c), unus e septem Sapientibus, qui post theologos poetas, in quibus Orpheus maxime omnium nobilitatus est, Σοφοί appellati sunt, quod est latine Sapientes. Per idem tempus decem tribus, quæ in divisione populi vocatæ sunt Israel, debellatæ a Chaldæis, et in eas terras captivæ ductæ sunt (d), remanentibus in Judæa terra duabus illis tribubus, quæ nomine Judæ vocabantur, sedemque regni habebant Jerusalem. Mortuum Romulum, cum et ipse non comparuisset, in deos, quod et vulgo notissimum est, retulere Romani; quod usque adeo, fieri jam desierat, nec postea nisi adulando, non errando, factum est temporibus Cesarum, ut Cicero magnis Romuli laudibus tribuat (e), quod non rudibus et indoctis temporibus, quando facile homines fallebantur, sed jam expoliis et eruditus meruerit hos honores; quamvis nondum efferbuerat² ac pululaverat philosophorum subtilis et acuta loquacitas. Sed etiamsi posteriora tempora deos homines mortuos non instituerunt, tamen ab antiquis institutos colere ut deos et habere non destiterunt: quin etiam simulacris, quæ veteres non habebant (f), auxerunt vanæ atque impiæ superstitionis illecebram, id effluvit immundis in eorum corde dæmonibus, per fallacia quoque oracula decipientibus, ut fabulosa

¹ vind. Am. et Er. post, ad lucem, addunt, lætam. Lov. lætam. Neutrum est in veteribus libris.

² Mss., efferueral. Sic infra, cap. 52. n. 2, loco, feruuit persecutio; plures habent, feruuit persecutio.

(a) Lactantius, ejusdem libri 4, cap. 19:

Ναού δὲ σχισθῆσεται πύλαμα, καὶ ἡμετεὶ μέσση
Νῦν ἔσται σκοτεινὰ πάλωρος ἐν τριῶν ἡμέραις.

(b) Ibidem, aliquanto post:

Καὶ θανάτου μοῖραν τάλπει τρίτον ἡμαρ ὑπνώσας
Καὶ τότε ἀπὸ φθιμένων ἀνακίνας εἰς φάος ἦξει,
Πρῶτος ἀναστάσεως κλησὶ ἀρχὴν ὑποδείξας.

(c) Rationes chronologicæ, mirum in modum turbatæ. Thales natus est Damasio archonte, ut videre est apud Diogenem Laertium, lib. 1, § 23, anno primo olympiadis 33, ut S. Cyrillus Alexandrinus, adversus Julianum, lib. 1, pag. 12; id est, conditæ Urbis anno 115. Tunc regnabat Ancus Martius. LARCHER.

(d) Israelitæ in servitute abduoti sunt anno quarto olympiadis 14: anno 721 ante Christum natum, Urbis conditæ anno 33, regnante adhuc Romulo. LARCHER.

(e) Vide infra, lib. 22, cap. 6.

(f) Vide supra, lib. 4, cap. 51, n. 2, necnon notam (b), col. 158.

etiam crimina deorum, quæ jam urbane seculo non fingebantur, per ludos tamen in eorumdem falsorum numinum obsequium turpiter agerentur. Regnavit deinde Numa post Romulum, qui cum illam civitatem putaverit deorum profecto falsorum numerositate muniendam, in eamdem turbam referri mortuus ipse non meruit, tanquam ita putatus sit cœlum multitudine numinum constipasse, ut locum ibi reperire non posset. Hoc regnante Romæ, et apud Hebræos initio regni Manasse, a quo impio rege propheta Isaias perhibetur occisus (a), Samiam fuisse Sibyllam ferunt.

CAPUT XXV. — Qui philosophi entuerint regnante apud Romanos Tarquinio Prisco, apud Hebræos Sedechia, cum Jerusalem capta est, templumque subversum.

Regnante vero apud Hebræos Sedechia, et apud Romanos Tarquinio Prisco, qui successerat Ancus Martio, ductus est captivus in Babyloniam populus Judæorum, eversa Jerusalem et templo illo a Salomone constructo. Increpantes enim eos Prophætæ de iniquitatibus et impietatibus suis, hæc eis ventura prædixerant, maxime Jeremias, qui etiam numerum definivit annorum (Jerem. xxv, 11). Eo tempore Pittacus Mitylænæus, alius e septem Sapientibus, fuisse perhibetur (b) Et quinque cæteros, qui ut septem numerentur, Thaleti, quem supra commemoravimus, et huic Pittaco adduntur, eo tempore fuisse scribit Eusebius, quo captivus Dei populus in Babylonia tenebatur. Hi sunt autem, Solon Atheniensis, Chilo¹ Lacedæmonius, Periander Corinthius, Cleobulus Liudius, Bias Priænsis. Omnes hi septem appellati Sapientes post poetas theologos claruerunt, quia genere vitæ quodam laudabili præstabant hominibus cæteris, et morum nonnulla præcepta sententiarum brevitate complexi sunt. Nihil autem monumentorum, quod ad litteras attinet, posteris reliquerunt, nisi quod Solon quasdam leges Atheniensibus dedisse perhibetur; Thales vero physicus fuit, et suorum dogmatum libros reliquit (c). Eo captivitatis Judaicæ (d) tempore, et Anaximander, et Anaximenes, et Xenophanes physici claruerunt. Tunc et Pythagoras, ex quo cœperunt appellari philosophi (e).

CAPUT XXVI. — Quod eo tempore, quo impletis septuaginta annis Judæorum est resoluta captivitas Romani, quoque a dominatu sunt regio liberati.

Per idem tempus Cyrus rex Persarum, qui etiam

¹ Mss., Chilon; et infra, Periandrus, loco, Periander.

(a) Manasses, rex Judæ, cepit regnare anno 608 ante Christum natum, anno 17 regni Nume Pompilii. LARCHER. — Isaiam secutum fuisse a Manasse serra lignea ex certissima traditione Hebræorum scribit S. Hieronymus in caput lvi isaiæ, additque: « Unde et nostrorum plurimi illud quod « de passione sanctorum in Epistola ad Hebræos ponitur, « Serrati sunt, ad isaiæ referunt passionem. » Κορσμοσ.

(b) Pittacus natus anno 652 ante Christum, quod officias ex sulda; denatus anno 550: vide Lucianum, de Macrobiis, § 18. LARCHER.

(c) Imo nihil scriptis mandavit Thales: vide Themistium, Oratione 26, pag. 517, B, C. LARCHER.

(d) Anno 607 ante Christum natum Nabuchodonosor Hierosolymis captis Joachimo regi indicit tributum: huic septuaginta annorum captivitatis initium. LARCHER.

(e) Conf. supra, lib. 8, cap. 2, et infra, cap. 37, et alia.

Chaldæis et Assysiis Imperabat, relaxata aliquanta captivitate Judæorum, quinquaginta millia hominum ex eis ad instaurandum templum regredi fecit (a). A quibus tantum prima cœpta fundamina, et altare constructum est. Incursantibus autem hostibus, nequaquam progredi ædificando valuerunt, dilatatumque opus est usque ad Darium. Per idem tempus etiam illa sunt gesta, quæ conscripta sunt in libro Judith (b) : quem sane in canone Scripturarum Judæi non recepisse dicuntur. Sub Dario ergo rege Persarum impletis septuaginta annis, quos Jeremias propheta prædixerat, reddita est Judæis soluta captivitate libertas, regnante Romanorum septimo rege Tarquinio. Quo expulso etiam ipsi a regum suorum dominatione liberi esse cœperunt. Usque ad hoc tempus Prophetas habuit populus Israel : qui cum multi fuerint, paucorum et apud Judæos et apud nos canonica scripta¹ retinentur. De quibus me aliqua positurum esse promisi in hoc libro, cum clauderem superiorem, quod jam video esse faciendum.

CAPUT XXVII. — *De temporibus Prophetarum, quorum oracula habentur in libris; quique tunc de vocatione Gentium multa cecinerunt, quando Romanum regnum cœpit, Assyriumque defecit.*

Tempora igitur eorum ut possimus advertere, in anteriora paululum recurramus. In capite libri Osee propheta, qui primus in duodecim ponitur, ita scriptum est : *Verbum Domini quod factum est ad Osee in diebus Ozæ, et Joathan, et Achaz, et Ezechia regum Juda (Osee 1, 1)*. Amos quoque diebus regis Ozæ prophetasse se scribit : addit etiam Jeroboam regem Israel, qui per eosdem dies fuit (*Amos 1, 1*). Necnon Isaias filius Amos, sive supradicti propheta, sive, quod magis perhibetur, alterius qui non propheta eodem nomine vocabatur, eosdem reges quatuor quos posuit Osee, in capite libri sui ponit, quorum diebus se prophetasse præloquitur. Michæas etiam eadem suæ prophetiæ commemorat tempora post dies Ozæ. Nam tres qui sequuntur reges nominat, quos et Osee nominavit, Joathan, et Achaz, et Ezechiam (*Michæa 1, 1*). Hi sunt quos eodem tempore simul prophetasse ex eorum litteris invenitur. His adjungitur Jonas eodem Ozia rege regnante, et Joel cum jam regnarat Joathan, qui successit Ozia. Sed istorum prophetarum duorum tempora in Chronicis, non in eorum libris potuimus invenire, quoniam de suis diebus tacent. Tenduntur autem hi dies a rege Latinorum Proca, sive superiore Aventino, usque ad regem Romulum jam Romanorum², vel etiam usque ad regni primordia successoris ejus Numæ Pompilii : Ezechias quippe rex Juda eo usque regnavit ; ac per hoc per ea tempora isti velut fontes prophetiæ pariter eruperunt, quando regnum defecit Assyrium,

¹ Aliquot MSS., *Scriptura*.

² Editi, *Romanum*. At in MSS., *Romanorum*.

(a) Anno 538 ante Christum natum Cyrus edicto Judæis in patriam reditum concessit. LARCIER.

(b) Gesta Judith ad annum 654 ante Christum referenda sunt, ut probavit Montfauconus in libro cui titulus, *Histoire de Judith*. LARCIER.

cœpitque Romanum : ut scilicet quemadmodum regi Assyriorum primo tempore existit Abraham, cui promissiones apertissimæ fierent in ejus semine benedictionis omnium gentium : ita occidentalis Babylonis exordio, qua fuerat Christus imperante venturus, in quo implerentur illa promissa oracula Prophetarum, non solum loquentium, verum etiam scribentium in tantæ rei futuræ testimonium solverentur. Cum enim propheta nunquam fere defuissent populo Israel, ex quo ibi reges esse cœperunt, in usum tantummodo eorum fuere, non gentium : quando autem ea scriptura manifestius prophetica condebatur, qua gentibus quandoque prodesset, tunc oportebat inciperet¹, quando condebatur hæc civitas, quæ gentibus imperaret.

CAPUT XXVIII. — *De his quæ ad Evangelium Christi pertinent, quid Osee et Amos prophetaverint.*

Osee igitur propheta, quanto profundius quidem loquitur, tanto operosius penetratur. Sed aliquid inde sumendum est, et hic ex nostra promissione ponendum. *Et erit, inquit, in loco quo dictum est eis, Non populus meus vos, vocabuntur et ipsi filii Dei vivi (Osee 1, 10)*. Hoc testimonium propheticum de vocatione populi Gentium, qui prius non pertinebat ad Deum, etiam Apostoli intellexerunt (*Rom. ix, 26*). Et quia ipse quoque populus Gentium spiritualiter est in filiis Abraham, ac per hoc recte dicitur Israel, propterea sequitur, et dicit : *Et congregabuntur filii Juda et filii Israel in idipsum, et ponent sibi principatum unum, et ascendent a terra (Osee 1, 11)*. Hoc si adhuc velimus exponere, eloqui propheta obtundetur sapor. Recolatur tamen lapis ille angularis, et duo illi parietes, unus ex Judæis, alter ex Gentibus (*Ephes. ii, 14, 15, 20-22*) ; ille nomine filiorum Juda, iste nomine filiorum Israel, eidem uni principatui suo in idipsum innitentes, et ascendentes agnoscantur a terra. Istos autem carnales² Israelitas, qui nunc nolunt credere in Christum, postea credituros, id est, filios eorum (nam utique isti in suum locum moriendo transibunt), idem propheta testatur, dicens : *Quoniam diebus multis sedebunt filii Israel sine rege, sine principe, sine sacrificio, sine altari, sine sacerdotio, sine manifestationibus. Quis non videat, nunc sic esse Judæos ? Sed quid adjungat, audiamus : Et postea, inquit, revertentur filii Israel, et inquirent Dominum Deum suum, et David regem suum : et stupescunt in Domino, et in bonis ipsius, in novissimis diebus (Osee iii, 4, 5, sec. LXX)*. Nihil est ista prophetia manifestius, cum David regis nomine significatus intelligatur Christus³, qui factus est, sicut dicit Apostolus, *ex semine David secundum carnem (Rom. i, 3)*. Prænuntiavit iste propheta etiam tertio die Christi resurrectionem futuram, sicut eam prophetica altitudine prænuntiari oportebat, ubi ait : *Sanabit nos post biduum, in die tertio resurgemus (Osee vi, 3)*. Secundum hoc enim

¹ Editi, *incipere*. Melius MSS., *inciperet*.

² Vind. Am. et plures MSS., *carnaliter*. — Sic nostri omnes. M.

³ Sic manuscripti. Editi vero, *qua David.... intelligitur Christus*.

nobis dicit Apostolus, *Si resurrexistis cum Christo, quæ sursum sunt querite* (Coloss. III, 1). Amos quoque de rebus talibus sic prophetat: *Præpara, inquit, te, ut invoces Deum tuum Israel; quia ecce ego firmans tonitruum, et creans spiritum, et annuntians in hominibus Christum suum* (Amos IV, 12 et 13, sec. LXX). Et alio loco: *In illa die, inquit, resuscitabo tabernaculum David quod cecidit, et reedificabo quæ ceciderunt ejus, et destructa ejus resuscitabo, et reedificabo ea, sicut dies sæculi; ita ut exquirant me residui hominum, et omnes gentes in quibus invocatum est nomen meum super eos, dicit Dominus faciens hæc* (Id. IX, 11 et 12, sec. LXX).

CAPUT XXIX. — *Quæ ab Isaiâ de Christo et Ecclesia sint prædicta.*

1. Isaias propheta non est in libro duodecim Prophetarum, qui propterea dicuntur minores, quia sermones eorum sunt breves, in eorum comparatione qui majores ideo vocantur, quia proluxa volumina condiderunt: ex quibus est hic Isaias, quem propter eadem prophetiæ tempora subjungo supradictis duobus. Isaias ergo inter illa quæ arguit iniqua, et jus'a præcepit, et peccatori populo mala futura prædixit, etiam de Christo et Ecclesia, hoc est de Rege et ea quam condidit civitate, multo plura quam cæteri prophetavit: ita ut a quibusdam evangelista, quam propheta potius diceretur (a). Sed propter rationem operis terminandi, unum de multis hoc loco ponam. Ex persona quippe Dei Patris loquens: *Ecce, inquit, intelliget puer meus, et exaltabitur, et glorificabitur valde. Quemadmodum stupescunt super te multi, ita gloria privabitur ab hominibus species tua et gloria tua ab hominibus: ita mirabuntur gentes multæ super eum, et continebunt reges os suum: quoniam quibus non est annuntiatum de illo, videbunt; et qui non audierunt, intelligunt. Domine, quis credidit auditui nostro, et brachium Domini cui revelatum est? Annuntiavimus¹ coram illo, ut infans, ut radix in terra silianti: non est species illi, neque gloria. Et vidimus eum, et non habebat speciem, neque decorem: sed species ejus sine honore, deficiens præ omnibus hominibus (b). Homo in plaga positus, et sciens ferre infirmitatem: quoniam aversa est facies ejus: inhonoratus est, nec magni æstimatus est. Hic peccata nostra² portat, et pro nobis dolet: et nos existimavimus³ illum esse in dolore, et in plaga, et in afflictione. Ipse autem vulneratus est propter iniquitates nostras, et infirmatus est propter peccata nostra. Eruditio pacis nostræ in eo: livore ejus nos sanati sumus. Omnes ut vos erravimus, homo a via sua erravit: et Dominus tradidit illum pro peccatis nostris: et ipse propter quod afflictus est, non aperuit*

¹ Editi, *annuntiavimus*. At Mss., *annuntiavimus*. Græce in LXX est, *mengelamen*.

² In editione Lov. omissum est, *nostra*.

³ Codex 258, *æstimavimus*. M.

(a) Ut ab Hieronymo, Epistolis 103, ad Paulinum, et 117, ad Paulam et Eustochium, in Proœmio Commentarii in hunc prophetam, et a Cyrillo, in Oratione 4 in Isaiam. COGROS.

(b) Apud LXX, *præ filiis hominum*. Item apud eosdem paulo supra, pro, *privabitur ab hominibus*, habetur, *privabitur a filiis hominum*.

SANCT AUGUST. VII.

os suum¹. *Ut ovis ad immolandum ductus est, et est agnus ante eum qui se tondet, sine voce, sic non aperuit os suum. In humilitate judicium ejus sublatum est. Generationem ejus quis enarrabit? Quoniam tollitur de terra vita ejus. Ab iniquitatibus populi mei ductus est ad mortem. Et dabo malignos pro sepultura ejus, et divites pro morte ejus. Quoniam iniquitatem non fecit, nec dolum in ore suo: et Dominus vult purgare eum de plaga. Si dederitis pro peccato animam vestram, videbitis semen longævum (a): et Dominus vult auferre a dolore animam ejus, ostendere illi lucem, et formare intellectum, justificare justum bene servientem pluribus: et peccata eorum ipse portabit². Propterea ipse hæreditabit plures, et fortium dividet spolia: propter quod tradita est ad mortem anima ejus; et inter iniquos æstimatus est, et ipse peccata multorum portavit, et propter peccata eorum traditus est* (Isai. LIII, 13-15; LIII, 1-12, sec. LXX) Hæc de Christo.

2. Jam vero de Ecclesia, quod sequitur, audiamus: *Lætare, inquit, sterilis, quæ non parit; erumpe et clama, quæ non parturit: quoniam multi filii desertæ magis, quam ejus quæ habet virum. Dilata locum tabernaculi tui, et aulaearum tuarum: fige³, noli parcere, prolonga funiculos tuos, et palos tuos conforta; adhuc in dexteram et sinistram partem extende. Et semen tuum hæreditabit gentes; et civitates desertas inhabitabis. Ne timeas, quoniam confusa es; neque verearis, quia exprobrata es: quoniam confusionem æternam oblivisceris, et opprobrii viduitatis tuæ non eris memor. Quoniam Dominus faciens te, Dominus Sabaoth nomen ejus: et qui eruit te, ipse Deus Israel universæ terræ vocabitur* (Id. LIV, 1-5), et cætera. Verum ista sint satis: et in eis sunt exponenda nonnulla; sed sufficere arbitror, quæ ita sunt aperta, ut etiam inimici intelligera cogantur inviti.

CAPUT XXX. — *Quæ Michæas, et Jonas et Joel novo Testamento congruenti prophetaverunt.*

1. Michæas propheta Christum in figura ponens magni cujusdam montis, hæc loquitur: *Erit in novissimis diebus manifestus mons Domini paratus super vertices montium; et exaltabitur super colles. Et festinabunt ad eum plebes, et ibunt gentes multæ, et dicent: Venite, ascendamus in montem Domini, et in domum Dei Jacob, et ostendet nobis viam suam, et ibimus in semitis ejus: quia ex Sion procedet lex, et verbum Domini ex Jerusalem. Et judicabit inter plebes multas, et redarguet gentes potentes usque in longinquum* (Michææ IV, 1-3). Prædicens iste propheta et locum in quo natus est Christus: *Et tu, inquit, Bethlehem domus Ephrata, minima es, ut sis in millibus Juda: ex te mihi prodiet, ut sit in principem Israel: et egres-*

¹ Hic Vind. Am. Er. et manuscripti omittunt, *suum*. Et infra loco, *tondet*; habent, *tonderet*.

² Editi, *portavit*. At manuscripti, *portabit*. Græce est, *anoisei*.

³ Editi, et *palos caularum tuarum fige*. Emendantur ex manuscriptis qui habent, et *aulæarum tuarum*; omissio, *palos*, juxta LXX, ubi græce legitur, *καὶ τὸν αὐλαίδι σου*. Quod quidem latine vertitur, et *aulæarum tuarum*. Sed *aulæam* feminino etiam genere dici, notum est ex Quinto Curtio, lib. 8, si locus tamen mendo vacet.

(a) Apud LXX sic est: *Si detis pro peccato, anima vestra videbit semen longævum*.

(Dix-neuf.)

aus eius ab initio, et ex diebus æternitatis. Propterea dabit eos usque ad tempus parturientis pariet¹, et residui fratres ejus convertentur ad filios Israel. Et stabit, et videbit, et pascet gregem suum in virtute Domini, et in honore nominis Domini Dei sui erunt: quoniam nunc magnificabitur usque ad summum terræ (Mich. v, 2-4, sec. LXX).

2. Jonas autem propheta non tam sermone Christum, quam sua quadam passione prophetavit, profecto apertius, quam si ejus mortem et resurrectionem voce clamaret. Utquid enim exceptus est ventre belluino, et die tertio redditus, nisi ut significaret Christum de profundo inferni die tertio rediturum?

3. Joel omnia quæ prophetat, multis verbis compellit exponi, ut quæ pertinent ad Christum et Ecclesiam dilucescant. Unum tamen, quod etiam Apostoli commemoraverunt, quando in congregatos credentes Spiritus sanctus, sicut a Christo promissus fuerat, desuper venit (Act. II, 17, 18), non prætermittam. Et erit, inquit, post hæc, et effundam de Spiritu meo super omnem carnem: et prophetabunt filii vestri et filia vestra; et seniores vestri somnia somniabunt, et juvenes vestri visa videbunt: et quidem in servos meos et ancillas meas in illis diebus effundam de Spiritu meo (Joel II, 28 et 29).

CAPUT XXXI. — Quæ in Abdia, in Naum, et Ambacu de salute mundi in Christo prænuntiata reperiantur.

1. Tres prophetae de minoribus, Abdias, Naum, et Ambacum², nec sua tempora dicunt ipsi, nec in Chronicis Eusebii et Hieronymi, quando prophetaverint, inventitur (a). Abdias enim positus est quidem ab eis cum Michæa, sed non eo loco, ubi notantur tempora, quando Michæam prophetasse ex ejus litteris constat: quod errore negligenter describentium labores alienos existimo contigisse. Duos vero alios commemoratos in codicibus Chronicorum quos habuimus, non potuimus invenire: tamen quia canone continentur, nec ipsi oportet prætereantur a nobis. Abdias, quantum ad scripturam ejus attinet, omnium brevissimus Prophetarum, adversus Idumæam loquitur, gentem scilicet Esau, ex duobus³ geminis filiis Isaac, nepotibus Abraham, majoris illius reprobati. Porro si Idumæam modo locutionis, quo intelligitur a parte totum, accipiamus positam esse pro gentibus: de Christo agnoscere possumus quod ait inter cætera, In monte⁴

¹ Sic manuscripti secundum LXX. At editi, usque ad tempus quo parturiens pariet.

² In editis, Abacuc. At Mss., Ambacum.

³ Editi, adversus Idumæam gentem loquitur, scilicet Esau, unus ex duobus, etc. Castigantur ad veteres codices.

⁴ Sic manuscripti juxta LXX. At editi, in montem.

(a) Hieronymus, Commentario in Abdiam, « Hunc, » inquit, « esse aiunt Hebræi, qui sub rege Samariæ Achab et impiissima Jezabel pavit centum prophetas in specuibus, qui non curverunt genu ante Baal, » etc. Fuit ergo ætate Josaphat regis Juda, rege Latinorum Tiberio. Naum autem prophetam Josephus, lib. 9 Antiq. Jud., cap. 11, § 3, scribit fuisse temporibus Joathan regis Juda. Denique de propheta Habacuc dicitur Danielis XIV, 32-38, quod prandium suum ex Juda Babylonem tulit ad Danielem; et eum tempore captivitatis Babylonicæ vaticinatum esse notat Hieronymus, atque in Babylonem dirigi ejus vaticinia.

autem Sion erit salus, et erit sanctum. Et paulo post in fine ipsius prophetiæ: Et ascendent, inquit, resalvati ex monte Sion, ut defendant montem Esau, et erit Domino regnum (Abdiæ 17, 21, sec. LXX). Apparet quippe id esse completum, cum resalvati ex monte Sion, id est ex Judæa, credentes in Christum, qui præcipue agnoscuntur Apostoli, ascenderunt, ut defenderent non em Esau. Quomodo defenderent, nisi per Evangelii prædicationem salvos faciendo eos qui crediderunt, ut eruerentur de potestate tenebrarum, et transferrentur in regnum Dei? Quod consequenter expressit addendo, Et erit Domino regnum. Mons enim Sion Judæam significat, ubi futura prædicta est salus, et sanctum, quod est Christus Jesus: mons vero Esau Idumæa est, per quam significata est Ecclesia gentium, quam defenderunt, sicut exposui, resalvati ex monte Sion, ut esset Domino regnum. Hoc obscurum erat, antequam fieret; sed factum quis non fidelis agnoscat?

2. Naum vero propheta, imo per illum Deus: Exterminabo, inquit, sculptilia et conflabilia: ponam sepulturam tuam: quia veloces esse super montes pedes evangelizantis, et annuntiantis pacem. Celebra, Juda, dies festos tuos, redde vota tua: quia jam non adjicient ultra, ut transeant in vetustatem. Consummatum est, consumptum est, ablatum est¹. Ascendit, qui insufflat in faciem tuam, eripiens te ex tribulatione (Naum I, 14 et 15; II, 1, sec. LXX). Quis ascenderit ab inferis, et insufflaverit in faciem Judæ, hoc est Judæorum discipulorum, Spiritum sanctum, recolat² qui meminit Evangelium. Ad novum enim Testamentum pertinent, quorum dies festi ita spiritualiter innovant, ut in vetustatem transire non possint. Porro per Evangelium exterminata sculptilia et conflabilia, id est idola deorum falsorum, et oblivioni tanquam sepulturæ tradita jam videmus; et hanc etiam in hac re prophetiam completam esse cognoscimus.

3. Ambacum de quo alio, quam de Christi adventu, qui futurus fuerat, intelligitur dicere, Et respondit Dominus ad me, et dixit, Scribe visum aperte in buzo; ut assequatur qui legit ea: quia adhuc visio ad tempus, et orietur in fine, et non in vacuum: si tardaverit, sustine eum; quia veniens veniet, et non morabitur (Habacuc, II, 2 et 3)?

CAPUT XXXII. — De prophetia quæ in Oratione Ambac: et Cantico continetur.

In Oratione autem sua cum Cantico, cui nisi Domino Christo dicit, Domine, audivi auditionem tuam, et timui; Domine, consideravi opera tua, et expavi? quid enim hoc est, nisi præcognite, novæ, ac repentinae salutis hominum ineffabilis admiratio? In medio duorum animalium cognosceris, quid est, nisi aut in medio duorum Testamentorum, aut in medio duorum latronum, aut in medio Moysi et Eliæ cum eo in monte sermocinantium? Dum appropinquant anni, co-

¹ Apud Lov. omittitur, ablatum est; quod in editis aliis et manuscriptis habetur.

² Editi, spiritum recolat (vel, recolat) sanctum: prava vocam inter punctio, et ex Mss. emendata.

gnosceris; in adventu temporis ostenderis¹, nec exponendum est. In eo dum conturbata fuerit anima mea, in ira misericordiae memor eris, quid est, nisi quod Judaeos in se transfiguravit, quorum gentis fuit, qui cum magna ira turbati crucifigerent Christum, ille misericordiae memor dixit, *Pater, ignosce illis, quia nesciunt quid faciunt* (Luc. xxiii, 34)? *Deus de Theman veniet, et sanctus de monte umbroso et condenso*. Quod hic dictum est, *de Theman veniet*; alii interpretati sunt *ab Austro*, vel *ab Africo* (a) : per quod significatur meridies, id est fervor charitatis et splendor veritatis. Montem vero umbrosum atque condensum, quamvis nullis modis possit intelligi, libentius acceperim Scripturarum altitudinem divinarum, quibus prophetatus est Christus. Multa quippe ibi umbrosa atque condensa sunt, quae mentem quaerentis exercent. Inde autem venit, cum ibi eum, qui intelligit, invenit. *Operuit caelos virtus ejus, et laudis ejus plena est terra*, quid est, nisi quod etiam in Psalmo dicitur, *Ezaltare super caelos², Deus, et super omnem terram gloria tua* (Psal. lvi, 6)? *Splendor ejus ut lumen erit*, quid est, nisi, Fama ejus credentes illuminabit? *Cornua in manibus ejus sunt*, quid est, nisi tropaeum crucis? *Et posuit charitatem firmam fortitudinis suae*, nec exponendum est. *Ante faciem ejus ibit verbum, et prodiet in campum post pedes ejus*, quid est, nisi quod et antequam huc veniret, praenuntiatus est; et posteaquam hinc reversus est, annuntiatus est? *Stetit, et terra commota est*, quid est, nisi stetit ad subveniendum; et terra commota est ad credendum? *Respexit et tabuerunt gentes*: hoc est, misertus est, et fecit populos penitentes. *Contriti sunt montes violentia*: hoc est, vim facientibus miraculis, elatorum contrita est superbia. *Defluerunt colles aeternales*: hoc est, humiliati sunt ad tempus, ut erigerentur in aeternum. *Ingressus aeternos ejus pro laboribus vidi*: hoc est, non sine mercede aeternitatis laborem charitatis aspexi. *Tabernacula Aethiopum expavescent, et tabernacula terrae Madian*: hoc est, gentes repente³ perterritae nuntio mirabilium tuorum, etiam quae non sunt in jure Romano, erunt in populo christiano. *Numquid in fluminibus iratus es, Domine, aut in fluminibus furor tuus, vel in mari impetus tuus?* Illoc idem dictum est, quia non venit nunc ut judicet mundum, sed ut salvetur mundus per ipsum (Joan. iii, 17). *Quia ascendes super equos tuos; et equitatio tua salus*: hoc est, Evangelistae tui portabunt te, qui⁴ reguntur a te; et

¹ Ita in Mss. At in excusis post, *ostenderis*, haec leguntur: *Hoc quia per se patet, non exponendum; quod vero sequitur, exponendum, in eo dum conturbata, etc.*, nisi quod apud Lov. post verbum, *sequitur*, deest, *exponendum*.

² Lov., *super omnes caelos*. Abest, *omnes*, a caeteris libris.

³ sola editio Lov., *repentino*.

⁴ Sic Mss. At editi, *quia*.

(a) Praeter septuaginta, « et Aquila, » inquit Hieronymus, « et Symmachus et quinta editio ipsum hebraicum posuerunt. Solus Theodotus quid significaret Theman interpretatus est dicens, *Ab Austro veniet, et sanctus de monte Pharan*. » Idem Hieronymus in Locis hebraicis: « Theman regio principum Edon in terra Gebalitica, a Theman filio Elyphaz, filii Esau, sortita vocabulum; sed et usque hodie est villa nomine Theman, distans ab urbe Petra quinque millibus... sciendum autem quod omnis australis regio a Hebraeis Theman dicitur. » Luc. vii. 35.

Evangelium tuum salus est eis, qui credunt in te. *Intendens intendes arcum tuum super sceptrum, dicit Dominus*: hoc est, comminaberis iudicium tuum etiam regibus terrae. *Fluminibus scindetur terra*: hoc est, influentibus sermonibus praedicantium te, aperientur ad confitendum hominum corda, quibus dictum est, *Scindite corda vestra, et non vestimenta* (Joel ii, 13). Quid est, *Videbunt te, et dolebunt populi*, nisi ut lugendo sint beati? Quid est, *Dispergens aquas in cessu¹*, nisi ambulando in eis qui te usquequaque annuntiant, haec atque haec dispergis fluentia doctrinae? Quid est, *Abyssus dedit vocem suam*? an profunditas cordis humani quid ei videretur expressit? *Altitudo phantasiae suae*, tanquam versus superioris est expositio; altitudo enim est abyssus. Quod autem ait, *phantasiae suae*, subaudiendum est, *vocem dedit*: hoc est, quod diximus, quid ei videretur expressit. Phantasia quippe visio est, quam non tenuit, non operuit, sed confitendo eructavit. *Elevatus est sol, et luna stetit in ordine suo*: hoc est, ascendit Christus in caelum, et ordinata est Ecclesia sub rege suo. *In lucem jacula tua ibunt*: hoc est, non in occultum, sed in manifestum verba tua mittentur. *In splendorem coruscationis armorum tuorum*: subaudiendum est, *jacula tua ibunt*. Dixerat enim suis, *Quae dico vobis in tenebris, dicite in lumine* (Matth. x, 27). *In comminatione minorabis terram*: id est, comminando humiliabis homines. *Et in furore dejicies gentes*: quia eos qui se exaltant, vindicando collides. *Existi in salutem populi tui, ut salvos faceres² christos tuos (a); misisti in capita iniquorum mortem*: nihil horum est exponendum. *Excitasti vincula usque ad collum*. Et bona hic posuerunt intelligi vincula sapientiae, ut injiciantur³ pedes in compedes ejus, et collum in torquem ejus. *Præcidisti in stupore mentis*: subaudiamus, *vincula*: excitavit enim bona, præcidit mala, de quibus ei dicitur, *Dirupisti vincula mea* (Psal. cxv, 16): et hoc in stupore mentis, id est, mirabiliter. *Capita potentium movebuntur in ea*: in ea⁴ scilicet admiratione. *Adaperient morsus suos, sicut edens pauper absconse*. Potentes enim quidam Judaeorum veniebant ad Dominum facta ejus et verba mirati, et esurientes panem doctrinae manducabant absconse propter metum Judaeorum, sicut eos prodidit Evangelium (Joan. xix, 38). *Et immisisti in mare equos tuos turbantes aquas multas*: quae nihil sunt aliud, quam populi multi. Non enim alii timore converterentur, alii furore persequerentur, nisi omnes turbarentur. *Observavi, et expavit venter meus a voce orationis laborum meorum: et introivit tremor in ossa mea, et subtus me turbata est habitudo mea*. Intendit in ea quae dicebat, et ipsa sua est oratione perterritus, quam prophetice fundebat, et in qua futura cernebat.

¹ Editio Lov., *Disperges aquas in incessu*. Emendatur ex editis aliis et manuscriptis, quibus suffragantur Septuaginta.

² Mss., *facias*.

³ Editi, *ut vinciantur*. Aptius autem Mss., *ut injiciantur*.

⁴ Repetimus hic, *in ea*, juxta manuscriptos, quod ab Aug. Er. et Lov. omisum est.

(a) Sic secundum LXX legit etiam Tertullianus in libro 4 contra Marcionem, cap. 30. De reliquis interpretationibus videndus Hieronymus ad hunc locum. Coq. xv. 5.

Turbatis enim populis multis, vidit imminentes Ecclesiae tribulationes, continuoque se membrum ejus agnovit, atque ait, *Requiescam in die tribulationis: tanquam ad eos pertinens, qui sunt spe gaudentes, in tribulatione patientes (Rom. xii, 12). Ut ascendam, inquit, in populum peregrinationis meae: recedens utique a populo maligno carnalis cognationis suae, non peregrinante in hac terra, neque supernam patriam requirente. Quoniam ficus, inquit, non afferet fructus, et non erunt natiuitates in vineis: mentietur opus olivae, et campi non facient escam. Defecerunt ab esca oves, et non supersunt in praeseptibus boves. Vidit eam gentem, quae Christum fuerat occisura, ubertatem copiarum spiritualium perdituram, quas per terrenam secunditatem more prophetico figuravit. Et quia iram Dei talem propterea passa est illa gens, quia Dei ignorans justitiam, suam voluit constituere (Id. x, 3), iste continuo, Ego autem, inquit, in Domino exsultabo, gaudebo in Deo salutari meo. Dominus Deus meus virtus mea, statuet pedes meos in consummationem; super excelsa imponet me, ut vincam in cantico ejus (Habacuc iii), scilicet illo cantico, de quo similia quaedam dicuntur in Psalmo: Statuit supra petram pedes meos, et direxit gressus meos; et immisit in os meum canticum novum, hymnum Deo nostro (Psal. xxxix, 3 et 4). Ipse ergo vincit in cantico Domini, qui placet in ejus laude, non sua, ut qui gloriatur, in Domino gloriatur (I Cor. i, 31). Melius autem mihi videntur quidam codices habere, Gaudebo in Deo Jesu meo, quam hi qui volentes id latine ponere, nomen ipsum non posuerunt, quod est nobis amicus et dulcius nominare.*

CAPUT XXXIII. — *De Christo et vocatione Gentium quae Jeremias et Sophonius prophetico Spiritu sint praefati.*

1. Jeremias propheta de majoribus est, sicut Isaias; non de minoribus, sicut caeteri, de quorum scriptis nonnulla jam posui. Prophetavit autem regnante Josia in Jerusalem, et apud Romanos Anco Martio, jam propinquante captivitate Judaeorum (a). Tetendit autem prophetiam, usque ad quintum menseis captivitatis: sicut in ejus litteris invenimus. Sophonias autem unus de minoribus adjungitur ei. Nam et ipse in diebus Josiae prophetasse se dicit (Sophon. i, 1): sed quousque, non dicit. Prophetavit ergo Jeremias, non solum Anci Martii, verum etiam Tarquinii Prisci temporibus, quem Romani habuerunt quintum regem. Ipse enim, quando est illa captivitas facta, regnare jam coeperat. Prophetans ergo de Christo Jeremias, Spiritus, inquit, oris nostri Dominus Christus captus est in peccatis nostris (Thren. iv, 20); sic breviter ostendens, et Dominum nostrum Christum, et passum esse pro nobis. Item alio loco: *Hic Deus meus, inquit, et non estimabitur alter ad*

(a) Jeremias primum innotuit Epistola quam scripsit eis qui Babylone in captivitate degebant. Haec Epistola scripta fuit anno 599 ante Christum natum, sed jam quindecimus annus erat ex quo Josias occubuerat in pugna contra Necho regem Aegypti, nempe anno 611: et tunc Tarquinius Priscus erat Romanorum rex. LARCHER.

eum: qui invenit omnem viam prudentiae, et dedit eam Jacob puero suo, et Israel dilecto suo: post haec in terra¹ visus est, et cum hominibus conversatus est (Baruch iii, 36-38). Hoc testimonium quidam non Jeremiae, sed scribae ejus attribuunt, qui vocabatur Baruch: sed Jeremiae celebratius habetur. Rursus idem propheta de ipso: Ecce, inquit, dies veniunt, ait Dominus, et suscitabo David germen justum, et regnabit rex, et sapiens erit, et faciet judicium et justitiam in terra. In diebus illis salvabitur Juda, et Israel habitabit confidenter: et hoc est nomen quod vocabunt eum, Dominus justus noster (Jerem. xxiii, 5, 6). De vocatione etiam gentium, quae fuerat futura (et eam nunc impletam cernimus) sic locutus est: Domine, Deus meus et refugium meum in die malorum, ad te gentes venient ab extremo terrae, et dicent: Vere mendacia coluerunt patres nostri simulacra, et non est in illis utilitas (Id. xvi, 19). Quia vero non erant eum agniture Judaei, a quibus eum et occidi oportebat, sic idem propheta significat: Grave cor per omnia, et homo est, et quis cognoscat eum (Id. xvii, 9, sec. LXX)? Illius est etiam illud quod in libro decimo septimo posui de Testamento novo (Cap. 3), cujus est mediator Christus. Ipse quippe Jeremias ait, Ecce dies veniunt, dicit Dominus, et consummabo super domum Jacob Testamentum novum (Jerem. xxxi, 31), et caetera quae ibi leguntur.

2. Sophoniae autem prophetae, qui cum Jeremia prophetabat, haec praedicta de Christo interim ponam: *Exspecta me, dicit Dominus, in die resurrectionis meae, in futurum: quia judicium meum, ut congregem gentes, et colligam regna (Sophon. iii, 8). Et iterum: Horribilis, inquit, Dominus super eos, et exterminabit omnes deos terrae; et adorabit eum vir de loco suo, omnes insulae gentium (Id. ii, 11). Et paulo post: Tunc, inquit, transvertam in populos linguam, et in progenie² ejus³, ut omnes invocent nomen Domini, et serviant ei sub uno jugo; a finibus fluminum Aethiopiae afferat mihi hostias. In illo die non confunderis⁴ ex omnibus adinventionibus tuis, quas impie egisti in me: quia tunc auferam abs te pravitates injuriae tuae; et jam non adjicies ut magnificeris super montem sanctum meum: et subrelinquam in te populum mansuetum et humilem; et verentur a nomine Domini, qui reliqui fuerint Israel⁵ (Id. iii, 9-13, sec. LXX). Haec sunt reliquiae, de quibus alibi prophetatur, quod Apostolus etiam commemorat: Si fuerit numerus filiorum Israel sicut arena maris, reliquiae salvae fient (Isai. x, 22; Rom. ix, 27). Haec quippe in Christum illius gentis reliquiae crediderunt.*

CAPUT XXXIV. — *De prophetia Danielis et Ezechielis, quae in Christum Ecclesiamque concordat.*

1. In ipsa porro Babyloniae captivitate prius pro-

¹ Manuscripti juxta graecum LXX. At editi, in terris.
² Vind. Am. Er. et plerique Mss., et progenies ejus; omisso, in.

³ Mss.: in illo die confunderis; absque negante participulo.

⁴ Nonnulli manuscripti, in Israel. Graece est, tot Israel.

phetaverunt Daniel et Ezechiel¹, alii scilicet duo ex Prophetis maioribus. Quorum Daniel etiam tempus quo venturus fuerat Christus atque passurus, numero definivit annorum : quod longum est computando monstrare, et ab aliis facilitatum est ante nos. De potestate vero ejus et gloria² sic locutus est : *Videbam, inquit, in visu noctis, et ecce cum nubibus cæli ut filius³ hominis veniens erat, et usque ad vetustum diorum pervenit; et in conspectu ejus prælatum est; et ipsi datus est principatus, et honor, et regnum: et omnes populi, tribus et linguæ ipsi servient. Potestas ejus, potestas perpetua, quæ non transibit; et regnum ejus non corrumpetur (Dan. vii, 13 et 14).*

2. Ezechiel quoque more prophetico per David Christum significans, quia carnem de David semine assumpsit; propter quam formam servi, qua^b factus est homo, etiam servus Dei dicitur idem Dei Filius; sic eum prophetando prænuntiat ex persona Dei Patris : *Et suscitabo, inquit, super pecora mea pastorem unum qui pascat ea, seruum meum David: et ipse pascet ea, et ipse erit eis in pastorem. Ego autem Dominus ero eis in Deum, et servus meus David princeps in medio eorum: ego Dominus locutus sum (Ezech. xxxiv, 23 et 24).* Et alio loco : *Et rex, inquit, unus erit omnibus imperans: et non erunt ultra duæ gentes, nec dividuntur amplius in duo regna; neque polluentur ultra in idolis suis, et abominationibus suis, et in cunctis iniquitatibus suis. Et salvos eos faciam de universis sedibus suis, in quibus peccaverunt, et mundabo eos: et erunt mihi populus, et ego ero illis Deus: et servus meus David rex super eos, et pastor unus erit omnium eorum (Id. xxxvii, 22-24).*

CAPUT XXXV. — *De trium prophetarum vaticinio, id est, Aggæi, Zachariæ et Malachiæ.*

1. Restant tres minores Prophetæ, qui prophetaverunt in fine captivitatis, Aggæus, Zacharias, Malachias. Quorum Aggæus Christum et Ecclesiam hæc apertius brevitate prophetat : *Hæc dicit Dominus exercituum: Adhuc unum modicum est, et ego commovebo cælum, et terram, et mare, et aridam, et movebo omnes gentes; et veniet Desideratus cunctis gentibus (Aggæi ii, 7 et 8).* Hæc prophetia partim jam completa cernitur, partim speratur in fine complenda. Movit enim cælum Angelorum et siderum testimonio, quando incarnatus est Christus. Movit terram ingenti miraculo, de ipso virginis partu. Movit mare et aridam, cum et in insulis et in orbe toto Christus annuntiatur. Ita moveri omnes gentes videmus ad fidem. Jam vero quod sequitur, *Et veniet Desideratus cunctis gentibus*, de novissimo ejus exspectatur adventu (a). Ut enim desideratus esset exspectantibus, prius oportuit eum dilectum esse credentibus.

2. Zacharias de Christo et Ecclesia : *Exsulta, in-*

¹ In veteribus libris constanter scriptum, *Hiezechiel*.

² Mss. aliquot, et *Ecclesia*. Cæteri fere omnes, et *Ecclesie*.

³ Lov., et *filius*. Verius Mss., ut *filius*.

^b Plures Mss., *quia*.

(a) De secundo adventu Christi hunc locum interpretatus est etiam Justinus Martyr, in Dialogo cum Tryphone. Confer infra, can. 48. COQUEUS.

quit, valde, filia Sion; jubilata, filia Jerusalem: ecce Rex tuus veniet tibi, justus, et salvator; ipse pauper, et ascendens super asinam¹, et super pullum filium asinæ: et potestas ejus a mari usque ad mare, et a fluminibus usque ad fines terræ² (Zach. ix, 9 et 10). Hoc quando factum sit, ut Dominus Christus in itinere jumento hujus generis uteretur, in Evangelio legitur: ubi et hæc prophetia commemoratur ex parte, quantum illi loco sufficere visum est (Matth. xxi). Alio loco ad ipsum Christum in Spiritu prophetiæ loquens de remissione peccatorum per ejus sanguinem: *Tu quoque, inquit, in sanguine testamenti tui enisisti vinctos tuos de lacu, in quo non est aqua (Zach. ix, 11).* Quid per hunc lacum velit intelligi, possunt diversa sentiri, etiam secundum rectam fidem (a). Mihi tamen videtur non eo significari melius, nisi humanæ miseræ siccæ profunditatem quodammodo et sterilem, ubi non sunt fluentia justitiæ, sed iniquitatis lutum. De hoc quippe etiam in Psalmo dicitur: *Et eduxit me de lacu miseræ, et de luto limi (Psal. xxxix, 3).*

3. Malachias prophetans Ecclesiam, quam per Christum cernimus propagatam, Judæis apertissime dicit ex persona Dei: *Non est mihi voluntas in vobis, et munus non suscipiam de manu vestra. Ab ortu enim solis usque ad occasum, magnum est nomen meum in gentibus, et in omni loco sacrificabitur et offerretur nomini meo oblatio munda: quia magnum nomen meum in gentibus, dicit Dominus (Malach. i, 10).* Hoc sacrificium per sacerdotium Christi secundum ordinem Melchisedech, cum in omni loco a solis ortu usque ad occasum Deo jam videamus offerri, sacrificium autem Judæorum, quibus dictum est, *Non est mihi voluntas in vobis, nec accipiam de manibus vestris munus, cessasse negare non possunt; quid adhuc exspectant alium Christum, cum hoc quod prophetatum legunt et impletum vident, impleri non potuerit, nisi per ipsum? Dicit enim paulo post de ipso ex persona Dei: Testamentum meum erat cum eo vitæ et pacis: et dedi ei ut timore timeret me, et a facie nominis mei reverteretur. Lex veritatis erat in ore ipsius, in pace dirigens ambulavit mecum, et multos convertit³ ab iniquitate: quoniam labia sacerdotis custodient scientiam, et legem inquirent ex ore ejus; quoniam angelus Domini omnipotentis est (Id. ii, 5-7).* Nec mirandum est, quia omnipotentis Dei angelus dictus est Christus Jesus. Sicut enim servus propter formam servi, in qua venit ad homines: sic et angelus propter Evangelium, quod nuntiavit hominibus. Nam si græca ista interpretemur, et Evangelium bonæ nuntiatio est, et angelus nuntius. De ipso quippe iterum dicit: *Ecce*

¹ Vind. Am. et Mss., *asinum*.

² Lov., *usque ad fines orbis terræ*. Abest, *orbis*, a cæteris libris.

³ Sic plures manuscripti juxta LXX. At editi, *ambulabit mecum, et multos convertet*.

(a) De limbo patrum, quorum animæ ibi detinebantur usque ad passionem Christi, ipsas tandem inde liberantis, exponunt Hieronymus, Cyrillus, S. Thomas, quos omnes recentiores sequuntur. COQUEUS.

mitto ¹ angelum meum, et prospiciet viam ante faciem meam: et subito veniet in templum suum Dominus quem vos quaeritis, et angelus testamenti quem vos vultis. Ecce venit, dicit Dominus omnipotens ²: et quis sustinebit diem introitus ejus? aut quis resistet in aspectu ejus? (Malach. iii, 1, 2) Hoc loco et primum et secundum Christi prænuntiavit adventum: primum scilicet, de quo ait, *Et subito veniet in templum suum*; id est, in carnem suam, de qua dixit in Evangelio, *Solvite templum hoc, et in triduo resuscitabo illud* (Joan. ii, 19): secundum vero, ubi ait, *Ecce venit, dicit Dominus omnipotens, et quis sustinebit diem introitus ejus, aut quis resistet in aspectu ejus?* Quod autem dicit, *Dominus quem vos quaeritis, et angelus testamenti quem vos vultis*, significavit utique etiam Judæos secundum Scripturas quas legunt, Christum quaerere, et velle. Sed multi eorum, quem quaesierunt et voluerunt, venisse non agnoverunt, excæcati in cordibus suis præcedentibus meritis suis. Quod sane hic nominat testamentum, vel supra, ubi ait, *Testamentum meum erat cum eo*; vel hic, ubi eum dixit angelum testamenti: novum procul dubio Testamentum debemus accipere, ubi sempiterna; non vetus, ubi temporalia sunt promissa: quæ pro magno habentes plurimi infirmi, et Deo vero talium rerum mercede servientes, quando vident eis impios abundare, turbantur. Propter quod idem propheta, ut novi Testamenti beatitudinem æternam, quæ non dabitur nisi bonis, distingueret a veteris terrena felicitate, quæ plerumque datur et malis: *Ingravastis, inquit, super me verba vestra, dicit Dominus, et dixistis, In quo detraimus de te? Dixistis, Vanus est omnis qui servit Deo; et quid plus, quia custodimus observationes ejus, et quia ambulavimus supplicantes ante faciem Domini omnipotentis? Et nunc nos beatificamus alienos, et reedificamus omnes qui faciunt iniqua: et adversati sunt Deo, et salvi facti sunt. Hæc oblocuti sunt, qui timebant Dominum, unusquisque ad proximum suum: et animadvertit Dominus, et audivit: et scripsit librum memoriæ in conspectu suo, eis qui timent Dominum, et reverentur nomen ejus. Isto libro significatum est Testamentum Novum. Denique quod sequitur, audiamus: *Et erunt mihi, dicit Dominus omnipotens, in diem ³, qua ego facio, in acquisitionem; et eligam eos, sicut homo eligit ⁴ filium suum servientem sibi: et convertemini, et videbitis inter justum et injustum, et inter servientem Deo, et non servientem. Quoniam ecce dies venit ardens sicut cilibanus, et concremabit eos: et erunt omnes alienigenæ, et omnes facientes iniquitatem stipula, et incendet illos dies qui adveniet, dicit Dominus omnipotens: et non derelinquetur eorum radix, neque sarmentum. Et orietur vobis timentibus nomen meum, sol justitiæ: et sanitas in pennis ejus: et exibitis, et exultabitis sicut vituli ex vinculis resoluti;**

¹ Codex 288, *mittam*. M.

² Editi, *dicit Dominus Deus omnipotens*. Vox, *Deus*, abest a manuscriptis.

³ Editi, *in die*. Codices Mss., *in diem*: juxta græcæ Septuaginta.

⁴ Nostri codices, *elegit homo*. M.

et conculcabit iniquos, et erunt cinis sub pedibus vestris in die, in quo ego facio, dicit Dominus omnipotens (Malach. iii, 13-18; iv, 1-3). Hic est qui dicitur dies judicii: de quo suo loco, si Deus voluerit, loquemur uberius.

CAPUT XXXVI. — *De Esdra et libris Machabæorum.*

Post hos tres prophetas, Aggæum, Zachariam, Malachiam, per idem tempus liberationis populi ex Babylonica servitute scripsit etiam Esdras, qui magis rerum gestarum scriptor est habitus, quam propheta: sicuti est et liber, qui appellatur Esther: cujus res gesta in laudem Dei non longe ab his temporibus invenitur: nisi forte Esdras in eo Christum prophetasse intelligendus est, quod inter juvenes quosdam orti questione, quid amplius valeret in rebus; cum reges unus dixisset, alter vinum, tertius mulieres, quæ plerumque regibus imperarent: idem tamen tertius veritatem super omnia demonstravit esse victricem (III Esdræ, iii, 9 seqq.) (a). Consulto autem Evangelio, Christum cognoscimus esse veritatem. Ab hoc tempore apud Judæos restituito templo, non reges, sed principes fuerunt usque ad Aristobulum (b): quorum supputatio temporum non in Scripturis sanctis, quæ canonicæ appellantur, sed in aliis invenitur, in quibus sunt et Machabæorum libri (c), quos non Judæi, sed Ecclesia pro canonicis habet, propter quorundam Martyrum passiones vehementes atque mirabiles, qui antequam Christus venisset in carnem ¹, usque ad mortem pro Dei lege certaverunt, et mala gravissima atque horribilia pertulerunt.

CAPUT XXXVII. — *Quod prophetica auctoritas omni origine gentilis philosophiæ invenitur antiquior.*

Tempore igitur Prophetarum nostrorum, quorum jam scripta ad notitiam fere omnium gentium pervenerunt, philosophi gentium nondum erant, qui ² hoc etiam nomine vocarentur, quod cœpit a Samio Pythagora, qui eo tempore, quo Judæorum est soluta captivitas, cœpit excellere atque cognosci (d). Multo ergo magis cæteri philosophi post

¹ Mss., *in carne*.

² Omnes Mss. post, *pervenerunt*, sic prosequuntur, *et multo magis post eos fuerunt philosophi gentium, qui*.

(a) Tertius liber Esdræ, in quo hæc historia habetur, continet gesta ante Esdræ et Nehemiæ libros præcedentes; ideoque apud Græcos et canonicus est et Esdræ primus. Ab Origene citatur ut canonicus, Homilia 9 in Josue; ab Athanasio, libro 3 contra Arianos; a Cypriano, Epistola 74, ad Pompeium, et libro de Singularitate clericorum, cap. 21; et Augustinus videtur hic non obscure eum habere pro canonico, ut qui sententiam ejus prophetiam de Christo dici posse judicet. COQUÆDUS.

(b) Hyrcano Pontifice mortuo successit Aristobulus ejus filius, qui primus diadema sumpsit, anno 104 ante Christum natum. Auctor Josephus, Antiquitatum Judaicarum libro 13, cap. 19. LARCHER.

(c) Vide lib. 2 de Doctrina Christiana, n. 13, et lib. 1 contra Epistolam Gaudentii, n. 58.

(d) Pythagoras floruit olympiade, juxta Diogenem Laertium, sexagesima. Iustum Eusebium in Chronico ad olympiadem sexagesimam tertiam refert, et lib. 10 de Præparatione evangelica, cap. 4, scribit claruisse olympiade sexage-

Prophetas reperiuntur fuisse. Nam ipse Socrates Atheniensis, magister omnium qui tunc maxime clauerunt, tenens in ea parte, quæ moralis vel activa dicitur, principatum, post Esdras in Chronicis invenitur (a). Non multo post etiam Plato natus est, qui longe ceteros Socratis discipulos anteciret (b). Quibus si addamus etiam superiores, qui nondum philosophi vocabantur, septem scilicet Sapientes, ac deinde physicos qui Thaleti successerunt, in perscrutanda natura rerum studium ejus imitati, Anaximandrum scilicet et Anaximenem et Anaxagoram, aliosque nonnullos, antequam Pythagoras philosophum primus profiteretur, nec illi Prophetas nostros universos temporis antiquitate præcedunt: quandoquidem Thales, post quem cæteri fuerunt, regnante Romulo eminuise¹ fertur, quando de fontibus Israel in eis litteris, quæ toto orbe manarent, prophetiæ flumen erupit. Soli igitur illi theologi poetæ, Orpheus, Linus, Musæus, et si quis alius apud Græcos fuit, his Prophetis Hebræis, quorum scripta in auctoritate habemus, annis reperiuntur priores. Sed nec ipsi verum theologum nostrum Moysen, qui animum verum Deum veraciter prædicavit, cujus nunc scripta in auctoritatis canone prima sunt, tempore prævenerunt: ac per hoc quantum ad Græcos attinet, in qua lingua litteræ hujus sæculi maxime ferbuerunt, nihil habent unde sapientiam suam jactent, quo religione nostra, ubi vera sapientia est, si non superior, saltem videatur antiquior. Verum, quod fatendum est, non quidem in Græcia, sed in barbaris gentibus, sicut in Ægypto, jam fuerat ante Moysen nonnulla doctrina, quæ illorum sapientia diceretur: alioquin non scriptum esset in Libris sanctis, Moysen eruditum fuisse omni sapientia Ægyptiorum (Act. vii, 22), tunc utique quando ibi natus est, et a filia Pharaonis adoptatus atque nutritus, etiam liberaliter educatus est. Sed nec sapientia Ægyptiorum sapientiam Prophetarum nostrorum tempore antecedere potuit, quandoquidem et Abraham, propheta fuit (Gen. xx, 7). Quid autem sapientiæ esse potuit in Ægypto, antequam eis Isis, quam mortuam tanquam deam magnam colendam putaverunt, litteras traderet? Isis porro Inachi filia fuisse proditur, qui primus regnare cœpit Argivis, quando Abrahæ jam nepotes reperiuntur exorti.

sima secunda, pontifice apud Hebræos Jesu Filio Josedech, et principe Zorobabel, quo tempore prophetabant Aggæus, Zacharias et Malachias, regnabat autem apud Romanos Servius Tullius. Jamblichus circa olympiadem sexagesimam secundam venisse in Italiam scribit: id Cicero, Quæst. Tuscul. lib. 1, imperante Tarquinio Superbo contigisse, ibidemque, lib. 4, prodit fuisse eum in Italia iisdem temporibus quibus Junius Brutus patriam liberavit. Pythagoras mortem oblit anno olympiadis septuagesimæ quarto vel quinto, juxta Eusebii Chronicon, id est, ante Christum circiter 498, cum vixisset annos 90 vel 90, ut auctor est Diogenes Laertius.

¹ Sola editio Lov., emicuisse.

(a) Socratem Diogenes Laertius natum scribit anno quarto olympiadis septuagesimæ septimæ, qui in annum 468 ante Christum incurrit; mortuum vero esse anno primo olympiadis nonagesimæ quintæ, ætatis anno 70.

(b) Plato, ut Diog. Laertius ex Apollodoro scribit, natus est olympiade octogesima octava, ejusque anno primo mortuus est anno olympiadis centesimæ octavæ, qui est annus ante Christum 348, suæ ipse ætatis annum agens 81.

CAPUT XXXVIII. — *Quod quædam sanctorum scripta ecclesiasticus canon propter nimiam non receperit vetustatem, ne per occasionem eorum falsa veris insererentur.*

Jam vero si longe antiquiora repetam, et ante illud grande diluvium noster erat utique Noe patriarcha, quem prophetam quoque non immerito dixerim: si quidem ipsa arca quam fecit, et in qua cum suis evasit, prophetia nostrorum temporum fuit. Quid Enoch septimus ab Adam, nonne etiam in canonica epistola apostoli Judæ prophetasse prædicatur (Judæ 14)? Quorum scripta ut apud Judæos et apud nos in auctoritate non essent, nimia fecit antiquitas, propter quam videbantur habenda esse suspecta, ne proferrentur falsa pro veris (a). Nam et proferuntur quædam quæ ipsorum esse dicantur ab eis qui pro suo sensu passim, quod volunt, credunt. Sed ea castitas canonis non recepit, non quod eorum hominum, qui Deo placuerunt, reprobetur auctoritas, sed quod ista esse non credantur ipsorum. Nec mirum debet videri, quod suspecta habentur, quæ sub tantæ antiquitatis nomine proferuntur; quandoquidem in ipsa historia regum Juda¹ et regum Israel, quæ res gestas continet, de quibus eidem Scripturæ canonicæ credimus, commemorantur plurima, quæ ibi non explicantur, et in libris aliis inveniri dicuntur, quos Prophetæ scripserunt, et alicubi eorum quoque Prophetarum nomina non tacentur (I Par. xxix, 29; II Par. ix, 29); nec tamen inveniuntur in canone, quem recepit populus Dei. Cujus rei, fateor, causa me latet; nisi quod existimo, etiam ipsos, quibus ea quæ in auctoritate religionis esse deberent, sanctus utique Spiritus revelabat, alia sicut homines historica diligentia, alia sicut Prophetas inspiratione divina scribere potuisse; atque hæc ita fuisse distincta, ut illa tanquam ipsis, ista vero tanquam Deo per ipsos loquenti, judicarentur esse tribuenda; ac sic illa pertinerent ad ubertatem cognitionis, hæc ad religionis auctoritatem: in qua auctoritate custoditur canon, præter quem si qua jam etiam sub nomine veterum Prophetarum² scripta proferuntur, nec ad ipsam copiam scientiæ valent, quoniam utrum eorum sint, quorum esse dicuntur, incertum est; et ob hoc eis non habetur fides, maxime his in quibus etiam contra fidem librorum canonicorum quædam leguntur, propter quod ea prorsus non esse apparet illorum.

CAPUT XXXIX. — *De hebraicis litteris, quæ nunquam in suæ linguæ proprietate non fuerint.*

Non itaque credendum est, quod nonnulli arbitrantur, hebræam tantum linguam per illum qui vocabatur Heber, unde Hebræorum vocabulum est, fuisse servatam, atque inde pervenisse ad Abraham, hebræas autem litteras a lege cœpisse, quæ data est per Moysen; sed potius per illam successionem patrum, memoratam linguam cum suis litteris custoditam (b). Denique Moyses in populo Dei constituit,

¹ Sic Mss. Editi vero, Judæ.

² Nostri codices, verorum prophetarum. M.

(a) Conf. supra, lib. 13, cap. 25, n. 4.

(b) Multi enim, velut Cyrillus, contra Julianum, libro 7,

qui docendis litteris præessent, prius quam divinæ legis ulla litteras nossent. Hos appellat Scriptura *γραμματιστοι* *αγωγοις*, qui latine dici possunt litterarum inductores vel introductores, eo quod eas inducant, id est introducant quodammodo in corda discipulorum, vel in eas potius ipsos quos docent. Nulla igitur gens de antiquitate sapientiæ suæ super Patriarchas et Prophetas nostros, quibus inerat divina sapientia, ulla se vanitate jactaverit; quando nec Ægyptus invenitur, quæ solet falso et iuaniter de suarum doctrinarum antiquitate gloriari, qualicumque sapientia sua Patriarcharum nostrorum tempore prævenisse sapientiam. Neque enim quisquam dicere audebit mirabilium disciplinarum eos peritissimos fuisse, antequam litteras nossent, id est, antequam Isis eo venisset, easque ibi docuisset. Ipsa porro eorum memorabilis doctrina, quæ appellata est sapientia, quid erat nisi maxime astronomia, et si quid aliud talium disciplinarum magis ad exercenda ingenia, quam ad illuminandas vera sapientia mentes valere solet? Nam quod attinet ad philosophiam, quæ se docere profitetur aliquid, unde fiant homines beati, circa tempora Mercurii, quem Trismegistum vocaverunt, in illis terris ejusmodi studia claruerunt: longo quidem ante sapientes vel philosophos Græciæ, sed tamen post Abraham, et Isaac, et Jacob, et Joseph; nimirum etiam post ipsum Moysen. Eo quippe tempore, quo Moyses natus est, fuisse reperitur Atlas ille magnus astrologus, Promethei frater, maternus avus Mercurii majoris, cujus nepos fuit Trismegistus iste Mercurius (a).

CAPUT XL. — *De Ægyptiorum mendacissima vanitate, quæ antiquitati scientiæ suæ centum millia adscribit annorum.*

Frustra itaque vanissima præsumptione garriunt quidam, dicentes, ex quo rationem siderum comprehendit Ægyptus, amplius quam centum annorum millia numerari. In quibus enim libris istum numerum collegerunt, qui non multum ante annorum duo millia litteras magistra Iside didicerunt? Non enim parvus auctor est in historia Varro, qui hoc prodidit, quod a litterarum etiam divinarum veritate non disjag. 231, D, et Clemens Alexandrinus, Stromatum libro 1, cap. 23, § 135, scribunt Moysen primum fuisse sapientem, ac litteras et grammaticam primum tradidisse Judæis, Phœnicis acceperisse a Judæis, a Phœnicibus Græcos. Verum Augustinus, hoc non probans, vult, quemadmodum ante diluvium fuit lingua hebraica, ita etiam inventos fuisse characteres hebraicos. Hanc sententiam confirmare videtur quod scribit Josephus, Antiquitatum Judaicarum libro 1, cap. 3, de filiis Seth loquens: « sideralem scientiam, » acquit, « et cœlestium rerum cognitionem excogitaverunt. » Ne autem inventa sua ex hominum notitia delaberentur, et prius perirent quam pernoscerentur, scientes prædixisse Adamum duplicem fore universalem rerum interitum, unum incendio, alterum diluvio, excitatis duabus columnis, utriusque sæe inventa inscripserunt: ut, si lateritium diluvio deleri contingeret, lapidea superstes hominibus discendi copiam faceret, et quæ inscripta continentur, spectanda exhiberet; lapidea porro columna ab ipsius dicata, nostris etiam temporibus exstat in terra Syria. »

COQUARIUS

(a) Atlas vixit anno ante Christum 1638, secundum Eusebium; Moyses vero nascitur anno 1609 ante Christum, auctore Eusebio, de Preparatione evangelica, lib. 10, cap. 9, pag. 483, 484. Hinc ab Atlante ad Moysen sunt anni viginti novem. LARGIERA.

sonat. Cum enim ab ipso primo homine, qui est appellatus Adam, nondum sex millia annorum compleantur, quomodo non isti ridendi potius, quam refellendi sunt, qui de spatio temporum tam diversa, et huic exploratæ veritati tam contraria persuadere conantur? Cui enim melius narranti præterita credimus, quam qui etiam futura prædixit, quæ præsentia jam videmus? Nam et ipsa historicorum inter se dissonantia copiam nobis præbet, ut ei potius credere debeamus, qui divinæ, quam tenemus, non repugnat historiæ. Porro autem cives imperiæ civitatis, diffusi usquequaque per terras, cum legunt doctissimos homines, quorum nullius contemnenda videatur auctoritas, inter se de rebus gestis ab ætatis nostræ memoria remotissimis discrepantes, cui potius credere debeant, non inveniunt. Nos vero in nostræ religionis historia, fulti auctoritate divina, quidquid ei resistit, non dubitamus esse falsissimum, quomolibet sese habeant cætera in sæcularibus litteris; quæ seu vera seu falsa sint, nihil momenti afferunt, quo recte beateque vivamus.

CAPUT XLI. — *De philosophicarum opinionum dissonantibus, et canonicarum apud Ecclesiam concordia Scripturarum.*

1. Ut autem jam cognitionem omittamus historiæ, ipsi philosophi, a quibus ad ista progressi sumus, qui non videntur laborasse in studiis suis, nisi ut invenirent quomodo vivendum esset accommodato ad beatitudinem capessendam, cur dissenserunt et a magistris discipuli, et inter se condiscipuli, nisi quia ut homines humanis sensibus et humanis ratiocinationibus ista quæsierunt? Ubi quamvis esse potuerit et studium gloriandi, quo quisque alio sapientior et acutior videri cupit, nec sententiæ quodammodo addictus alienæ, sed sui dogmatis et opinionis inventor: tamen ut nonnullos vel etiam plurimos eorum fuisse concedam, quos a suis doctoribus vel discendi sociis amor veritatis abruperit, ut pro ea certarent, quam veritatem putarent, sive illa esset, sive non esset; quid agit, aut quo vel qua, ut ad beatitudinem perveniatur, humana se porrigit infelicitas, si divina non ducit auctoritas? Denique auctores nostri, in quibus non frustra sacrarum litterarum igitur et terminatur canon, absit ut inter se aliqua ratione dissentiant (a). Unde non immerito, cum illa scriberent, eis Deum vel per eos locutum, non pauci in scholis atque gymnasiis litigiosis disputationibus garruli, sed in agris atque in urbibus cum doctis atque indoctis tot tantique populi crediderunt. Ipsi sane pauci esse debuerunt, ne multitudine vilesceret quod religione earum esse oporteret: nec tamen ita pauci, ut eorum non sit miranda consensus. Neque enim in multitudine philosophorum, qui labore etiam litterario monumenta suorum dogmatum reliquerunt,

(a) Sic ratiocinatur: Omnes philosophi certant invicem, sæpe sibi contrarii sunt; sacri scriptores non dissentiunt inter se: philosophi dissentiunt inter se, quia homines proclives sunt ad errorem; sacri auctores nunquam dissentiunt inter se, quia sanctus Spiritus ore eorum loquitur. LARGIERA.

facile quis invenerit, inter quos cuncta quæ sensere conveniant: quod ostendere hoc opere longum est.

2. Quis autem sectæ cujuslibet auctor sic est in hac dæmonicola civitate approbatus, ut cæteri improbarerentur, qui diversa et adversa senserunt? Nonne apud Athenas et Epicurei clarebant, asserentes res humanas ad deorum curam non pertinere, et Stoici, qui contraria sentientes, eas regi atque muniri diis adiutoribus atque tutoribus disputabant? Unde miror cur Anaxagoras reus factus sit, quia solem esse dixit lapideum ardentem, negans utique Deum, cum in eadem civitate gloria floruerit Epicurus, vixeritque securus, non solum solem vel ullum siderum Deum esse non credens, sed nec Jovem, nec ullum deorum omnino in mundo habitare contendens, ad quem preces hominum supplicationesque perveniant. Nonne ibi Aristippus in voluptate corporis summum bonum ponens, ibi Antisthenes virtute animi potius hominem fieri beatum asseverans, duo philosophi nobiles et ambo Socratici, in tam diversis atque inter se contrariis finibus vitæ summam locantes, quorum etiam ille fugiendam, iste administrandam sapienti dicebat esse rempublicam, ad suam quisque sectam sectandam discipulos congregabat? Nempe palam in conspicua et notissima porticu, in gymnasiis, in hortulis, in locis publicis ac privatis, catervatim pro sua quisque opinione certabant: alii asserentes unum, alii innumerabiles mundos; ipsum autem unum alii ortum esse, alii vero initium non habere; alii interituum, alii semper futurum; alii mente divina, alii fortuito et casibus agi: alii immortales esse animas, alii mortales; et qui immortales, alii revolvi in bestias, alii nequaquam; qui vero mortales, alii mox interire post corpus, alii vivere etiam postea vel paululum, vel diutius, non tamen semper: alii in corpore constituentes finem boni, alii in animo, alii in utroque, alii extrinsecus posita etiam bona ad animum et corpus addentes: alii sensibus corporis semper, alii non semper, alii nunquam, putantes esse credendum. Has et alias pene innumerabiles dissensiones philosophorum, quis unquam populus, quis senatus, quæ potestas vel dignitas publica impiæ civitatis dijudicandas, et alias probandas ac recipiendas, alias improbandas repudiandasque curavit, ac non passim sine ullo iudicio confuseque habuit in gremio suo tot controversias hominum dissidentium, non de agris et domibus, vel quacumque pecuniaria ratione, sed de his rebus, quibus aut misere vivitur aut beate? Ubi etsi aliqua vera dicebantur, eadem licenti dicebantur et falsa: prorsus ut non frustra talis civitas mysticum vocabulum Babylonis acceperit. Babylon quippe interpretatur Confusio, quod nos jam dixisse meminimus (*Libro 16, cap. 4, et alibi*). Nec interest diaboli regis ejus, quam contrariis inter se rixentur erroribus, quos merito multæ variæque impietatis pariter possidet.

3. At vero gens illa, ille populus, illa civitas, illa respublica, illi Israelita, quibus credita sunt eloquia Dei, nullo modo pseudopphetas cum veris Prophe-

tis pari licenti¹ confoderunt: sed concordēs inter se atque in nullo dissentientes, sacrarum Litterarum veraces ab eis agnoscebantur et tenebantur auctores. Ipsi eis erant philosophi, hoc est, amatores sapientiæ, ipsi sapientes, ipsi theologi, ipsi prophætæ, ipsi doctiores probitatis atque pietatis. Quicumque secundum illos sapuit et vixit, non secundum homines, sed secundum Deum, qui per eos locutus est, sapuit et vixit. Ibi si prohibitum est sacrilegium, Deus prohibuit. Si dictum est, *Honora patrem tuum et matrem tuam*, Deus jussit. Si dictum est, *Non mæchaberis*, *Non homicidium facies*, *Non juraberis* (*Exod. xx, 12-15*), et cætera hujusmodi, non hæc ora humana, sed oracula divina fuderunt. Quidquid philosophi quidam inter falsa, quæ opinati sunt, verum videre potuerunt, et laboriosis disputationibus persuadere moliti sunt, quod mundum istum fecerit Deus, eumque ipse providentissimus administret, de honestate virtutum, de amore patriæ, de fide amicitæ, de bonis operibus atque omnibus ad mores probos pertinentibus rebus, quamvis nescientes ad quem finem et quonam modo essent ista omnia referenda, propheticis, hoc est divinis vocibus, quamvis per homines, in illa civitate populo commendata sunt, non argumentationum concertationibus inculcata; ut non hominis ingenium, sed Dei eloquium contemnere formidaret, qui illa cognosceret.

CAPUT XLII. — *Qua dispensatione providentiæ Dei Scripturæ sacræ Veteris Testamenti ex hebræo in græcum eloquium translatae sint, ut Gentibus innotescerent.*

Has sacras Litteras etiam unus Ptolemæorum² regum Ægypti nosse studuit et habere. Nam post Alexandri Macedonis, qui etiam Magnus cognominatus est, mirificentissimam minimeque diuturnam potentiam, qua universam Asiam, imo pene totum orbem, partim vi et armis, partim terrore subegerat, quando inter cætera Orientis³ etiam Judæam ingressus obtinuit; eo mortuo comites ejus, cum regnum illud amplissimum non pacifice inter se possessuri divisissent, sed potius dissipassent, bellis omnia vastaturi, Ptolemæos reges habere cœpit Ægyptus: quorum primus Lagi filius, multos ex Judæa captivos in Ægyptum transtulit. Huic autem succedens alius Ptolemæus, qui est appellatus Philadelphus, omnes quos ille adduxerat subjugatos, liberos redire permisit: insuper et dona regia in templum Dei misit, petivitque ab Eleazaro tunc pontifice, dari sibi Scripturas, quas profecto audierat fama prædicante divinas; et ideo concupiverat habere in bibliotheca, quam nobilissimam fecerat. Has ei cum idem pontifex misisset hebræas, post etiam ille interpretes postulavit: et dati sunt septuaginta duo, de singulis duodecim tribubus seni homines, linguæ utriusque doctissimi,

¹ In manuscriptis, *paritate licentiæ*.

² Omnes prope Mss., *Ptolomæorum*: et constanter, *Ptolomeus*, loco, *Ptolemæus*.

³ Editi, *Orientis regna*. Abest, *regna*, a manuscriptis.

hebrææ scilicet atque græcæ. Quorum interpretatio ut Septuaginta vocetur, jam obtinuit consuetudo. Traditur sane tam mirabilem ac stupendum pleneque divinum in eorum verbis fuisse consensum, ut cum ad hoc opus separatim singuli sederint (ita enim eorum fidem Ptolemæo placuit explorare), in nullo verbo, quod idem significaret et tantumdem valeret, vel in verborum ordine, alter ab altero discreparet: sed tanquam unus esset interpres, ita quod omnes interpretati sunt, unum erat: quoniam re vera Spiritus erat unus in omnibus (a). Et ideo tam mirabile Dei munus acceperant, ut illarum Scripturarum, non tanquam humanarum, sed sicut erant, tanquam divinarum, etiam isto modo commendaretur auctoritas, credituris quandoque gentibus profutura, quod jam videmus effectum.

CAPUT XLIII. — *De auctoritate Septuaginta interpretum, quæ, salvo honore hebræi stili, omnibus sit interpretibus præferenda.*

Nam cum fuerint et alii interpretes, qui ex hebræa lingua in græcam sacra illa eloquia transtulerunt, sicut Aquila, Symmachus, Theodotus; sicut etiam illa est interpretatio, cujus auctor non apparet, et ob hoc sine nomine interpretis, Quinta editio nuncupatur (b): hanc tamen quæ Septuaginta est, tanquam sola esset, sic recepit Ecclesia, eaque utuntur Græci populi Christiani, quorum plerique utrum alia sit aliqua ignorant. Ex hac Septuaginta interpretatione etiam in latinam linguam interpretatum est quod Ecclesiæ Latinæ tenent (c). Quamvis non defuerit temporibus nostris presbyter Hieronymus, homo doctissimus, et omnium trium linguarum peritus, qui non ex græco, sed ex hebræo in latinum eloquium easdem Scripturas converterit. Sed ejus tam litterarum laborem quamvis Judæi fateantur esse veracem, Septuaginta vero interpretes in multis errasse contendunt; tamen Ecclesiæ Christi tot hominum auctoritati, ab Eleazaro tunc pontifice ad hoc tantum opus electorum, neminem

(a) Aliorum Patrum et Philonis Judæi locos de hac re collegit Coqueus; aliquos habes in nota b ad libri de Doctrina Christiana secundi caput 15, vel n. 22, ubi Augustinus eadem refert. Hieronymus ibi comparatus hæc pro, « menda-
« cio » habet, quæ tantum in modum exornantur in libro de Historia translationis Septuaginta, qui sub Aristææ nomine circumfertur et Josepho tribuebatur olim. De quo jam Ludovicus Vives: « Confictus, ut puto, ab aliquo recentio-
« re. » — Fabula hæc de LXXII interpretibus jam dudum est ab eruditissimis explosa. « Græcæ versionis, » inquit Sange-
novelani in suis Thesibus, die 23 julii, 1704, « non eos au-
« ctore dicimus quos vendit ementitus Aristæas. » HAR-
DUNUS. — Aniles fabulæ, nullo idoneo auctore firmatæ, a
Judæis et Christianis excogitatæ. LARCHER.

(b) Aquila, homo semi-Judæus et semi-Christianus, interpretationem suam edidit sub Adriano, circa annum Christi 150, post Septuaginta editionem elapsis annis plus quadringentis. Symmachus proselytus suam sub Aurelio vel sub Severo scripsit, circa annum Christi 200. Theodotus, primo Marcionita et postea Judæus, suam ante Symmachum confecit, non longe a tempore Commodi, circiter annum Christi 180. Hunc Augustinus, Epiphanius aliosque secutus, post Symmachum memorat, ob id forsitan quod in Hexaplis ab Origene posita esset juxta Aquilæ editionem prior Symmachii, et posterior Theodotionis editio. Porro præter Quintam editionem inventam Hierichunte, cujus hic meminit Augustinus, celebratur et Sexta editio inventa Nicopoli, utraque Hexaplis iisdem Originianis, ut ferunt, quinto et sexto loco inserta. Sed Sexta illa Augustino ignota fuisse videtur.

(c) Conf. lib. 2 de Doct. Christ., n. 21 et seqq.

judicant præferendum: quia etsi non in eis unus apparuisset Spiritus, sine dubitatione divinus, sed inter se verba interpretationis suæ Septuaginta docti more hominum contulissent, ut quod placuisset omnibus hoc maneret, nullus eis unus interpres debuit anteponi; cum vero tantum in eis signum divinitatis apparuit, profecto quisquis alius illarum Scripturarum ex hebræa in quamlibet aliam linguam interpres est verax, aut congruit illis Septuaginta interpretibus, aut si congruere non videtur, altitudo ibi prophetica esse credenda est. Spiritus enim qui in Prophetis erat, quando illa dixerunt, idem ipse erat etiam in Septuaginta viris, quando illa interpretati sunt: qui profecto auctoritate divina et aliud dicere potuit, tanquam propheta ille utrumque dixisset, quia utrumque idem Spiritus diceret; et hoc ipsum aliter, ut si non eadem verba, idem tamen sensus bene intelligentibus dilucesceret; et aliquid prætermittere, et aliquid addere, ut etiam hinc ostenderetur non humanam fuisse in illo opere servitutem, quam verbis debebat interpres, sed divinam potius potestatem, quæ mentem replebat et regebat interpretis. Nonnulli autem codices græcos interpretationis Septuaginta ex hebræis codicibus emendandos putarunt: nec tamen ausi sunt detrahere, quod hebræi non habebant, et Septuaginta posuerunt; sed tantummodo addiderunt quæ in hebræis inventa, apud Septuaginta non erant; eaque signis quibusdam in stellarum modum factis, ad capita eorumdem versuum notaverunt, quæ signa asteriscos vocant. Illa vero quæ non habent hebræi, habent autem Septuaginta, similiter ad capita versuum jacentibus virgulis, sicut scribuntur unice, signaverunt. Et multi codices habent usquequaque diffusus sunt et latini¹. Quæ autem non prætermissa vel addita, sed aliter dicta sunt, sive alium sensum faciant etiam ipsum non abhorrentem, sive alio modo eundem sensum explicare monstrantur, nisi utrisque codicibus inspectis nequeunt reperiri. Si igitur, ut oportet, nihil aliud intueamur in Scripturis illis, nisi quid per homines dixerit Dei Spiritus, quidquid est in hebræis codicibus, et non est apud interpretes Septuaginta noluit ea per istos, sed per illos Prophetas Dei Spiritus dicere. Quidquid vero est apud Septuaginta, in hebræis autem codicibus non est, per istos ea maluit, quam per illos, idem Spiritus dicere, sic ostendens utrosque fuisse prophetas. Isto enim modo alia per Isaiam, alia per Jeremiam, alia per alium atque alium prophetam, vel aliter eadem per hunc ac per illum dixit, ut voluit. Quidquid porro apud utrosque invenitur, per utrosque dicere voluit unus atque idem Spiritus; sed ita, ut illi præcederent prophetando, isti sequerentur prophetice illos interpretando: quia sicut in illis vera, et concordantia dicentibus unus pacis Spiritus fuit; sic et in istis non secum conferentibus, et tamen tanquam uno ore cuncta interpretantibus, idem Spiritus unus apparuit.

¹ Lov., græci et latini. Editi alii et manuscripti non habent, græci.

CAPUT XLIV. — *Quid intelligendum sit de Ninivitarum excidio, cujus denuntiatio in hebræo quadraginta dierum spatio tenditur, in Septuaginta autem tridui brevitate concluditur.*

Sed ait aliquis, Quomodo sciam quid Jonas propheta dixerit Ninivitis, utrum *Triduum, et Ninive evertetur*; an, *Quadraginta dies* (*Jonæ* III, 4)? Quis enim non videat non potuisse utrumque tunc dici a Propheta, qui missus fuerat terrere comminatione imminenti exitii civitatem? Cui si tertio die fuerat futurus interitus, non utique quadragesimo die: si autem quadragesimo, non utique tertio. Si ergo a me quaeritur, quid horum Jonas dixerit, hoc puto potius quod legitur in hebræo, *Quadraginta dies, et Ninive evertetur*. Septuaginta quippe longe posterius interpretati aliud dicere potuerunt, quod tamen ad rem pertineret, et in unum eundemque sensum, quamvis sub altera significatione, concurreret; admoneretque lectorem, utraque auctoritate non sprete, ab historia sese attollere ad ea requirenda, propter quæ significanda historia ipsa conscripta est. Gesta sunt quippe illa in Ninive civitate, sed aliquid etiam significaverunt, quod modum illius civitatis excedat: sicut gestum est, quod ipse Propheta in ventre ceti triduo fuit, et tamen alium significavit in profundo inferni triduo futurum, qui Dominus est omnium Prophetarum. Quapropter si per illam civitatem recte accipitur Ecclesia gentium prophetice figurata, eversa scilicet per poenitentiam, ut qualis fuerat jam non esset; hoc quoniam per Christum factum est in Ecclesia gentium, cujus illa Ninive figuram gerebat, sive per quadraginta dies, sive per triduum, idem ipse significatus est Christus; per quadraginta scilicet, quia tot dies peregit cum discipulis suis post resurrectionem, et ascendit in caelum; per triduum vero, quia die tertio resurrexit: tanquam lectorem nihil aliud quam historiae rerum gestarum inhærere cupientem, de somno excitaverint Septuaginta interpretes, iidemque Prophetae, ad perscrutandam altitudinem prophetiae, et quodammodo dixerint: In quadraginta diebus ipsum quaere, in quo et triduum potueris¹ invenire; illud in ascensione, hoc in ejus resurrectione reperies. Propter quod utroque numero significari convenientissime potuit, quorum unum per Jonam prophetam, alterum per Septuaginta interpretum prophetiam, tamen unus atque idem Spiritus dixit. Longitudinem fugio, ut non hæc per multa demonstrarem, in quibus ab hebraica veritate putantur Septuaginta interpretes discrepare, et bene intellecti inveniuntur esse concordantes. Unde etiam ego pro meo modulo vestigia sequens Apostolorum, quia et ipsi ex utrisque, id est, ex hebræis et ex Septuaginta, testimonia prophetica posuerunt, utraque auctoritate utendum putavi, quoniam utraque una atque divina est. Sed jam quæ restant, ut possumus, exsequamur.

¹ Sic MSS. Editi vero, poteris.

CAPUT XLV. — *Quod post instaurationem templi prophetas Judæi habere destiterint, et exinde usque ad nativitatem Christi continuis adversitatibus sint afflicti, ut probaretur alterius templi ædificationem propheticiis vocibus fuisse promissam.*

1. Posteaquam gens Judæa cœpit non habere Prophetas, procul dubio deterior facta est, eo scilicet tempore, quo se sperabat instaurato templo post captivitatem, quæ fuit in Babylonia, futuram esse meliorem. Sic quippe intelligebat populus ille carnalis, quod prænuntiatum est per Aggæum prophetam dicentem, *Magna erit gloria domus istius novissimæ, plus quam primæ*. Quod de novo Testamento dictum esse, paulo superius demonstravit, ubi ait aperte Christum promittens, *Et movebo omnes gentes, et veniet Desideratus cunctis gentibus* (*Aggæi* II, 10, 8). Quo loco Septuaginta interpretes alium sensum magis corpori quam capiti, hoc est, magis Ecclesiæ quam Christo convenientem prophetica auctoritate dixerunt: *Venient quæ electa sunt Domini de cunctis gentibus*, id est homines, de quibus ipse Jesus in Evangelio, *Multi*, inquit, *vocati, pauci vero electi* (*Matth.* XXII, 14). Talibus enim electis gentium, domus Dei ædificatur per Testamentum novum lapidibus vivis, longe gloriosior, quam templum illud fuit, quod a rege Salomone constructum est, et post captivitatem instauratum. Propter hoc ergo nec Prophetas ex illo tempore habuit illa gens, et multis cladibus afflictata est ab alienigenis regibus, ipsisque Romanis, ne hanc Aggæi prophetiam in illa instauratione templi opinaretur impletam.

2. Non multo enim post adveniente Alexandro subjugata est (a); quando etsi nulla facta est vastatio, quoniam non sunt ausi ei resistere, et ideo placatum facillime subditi receperunt, non erat tamen gloria tanta domus illius, quanta fuit in suorum regum libera potestate. Hostias sane Alexander immolavit in Dei templo, non ad ejus cultum vera pietate conversus, sed impia vanitate cum diis eum falsis colendum putans. Deinde Ptolemæus Lagi filius, quod supra memoravi, post Alexandri mortem captivos inde in Ægyptum transtulit, quos ejus successor Ptolemæus Philadelphus benevolentissime inde dimisit: per quem factum est, quod paulo ante narraui, ut Septuaginta interpretum Scripturas haberemus. Deinde contriti sunt bellis, quæ in Machabæorum libris explicantur. Post hæc capti a rege Alexandriæ Ptolemæo, qui est appellatus Epiphanes (b); inde ab Antiocho rege Syriæ multis et gravissimis malis ad idola colenda compulsi, templumque ipsum repletum sacrilegis superstitionibus gentium, quod tamen dux eorum strenuissimus Judas, qui etiam Machabæus dictus est, Antiochi ducibus pulsus, ab omni illa idololatriæ contaminatione mundavit (c).

3. Non autem multo post Alcimus quidam per ambitionem, cum a genere sacerdotali esset alienus, quod nefas erat, pontifex factus est (d). Hinc jam post

(a) Josephus, lib. 11 Antiq. Jud., cap. 8.

(b) Conf. eund., lib. 12, cap. 3.

(c) Ibid., lib. cit. capp. 7, 8 et 1 Machab. vi.

(d) 1 Machab. vii, et Josephus, lib. 12 Antiq. Jud., cap. 15.

annos ferme quinquaginta, in quibus eis tamen pax non fuit, quamvis aliqua et prospere gesserint, primus apud eos Aristobulus assumpto diademate, et rex et pontifex factus est (a). Antea quippe, ex quo de Babylonice captivitate reversi sunt, templumque instauratum est, non reges, sed duces vel principes habuerunt: quamvis et qui rex est, possit dici princeps a principatu imperandi, et dux eo quod sit ductor exercitus: sed non continuo quicumque principes vel duces sunt, etiam reges dici possunt, quod iste Aristobulus fuit. Cui successit Alexander, etiam ipse rex et pontifex, qui crudeliter in suos regnasse traditur (b). Post hunc uxor ejus Alexandra regina Judæorum fuit (c), ex cujus tempore et deinceps mala sunt eos secuta graviora. Filii quippe hujus Alexandræ Aristobulus et Hyrcanus inter se de imperio dimicantes, vires adversus Israeliticam gentem provocare Romanas. Hyrcanus namque ab eis contra fratrem poposcit auxilium (d). Tunc jam Roma subjugaverat Africam, subjugaverat Græciam, lateque etiam aliis orbis partibus imperans tanquam se ipsam ferre non valens, sua se quodammodo magnitudine fregerat. Pervenerat quippe ad seditiones domesticas graves, atque inde ad bella socialia, moxque civilia, tantumque se comminuerat atque attriverat, ut ei mutandus reipublice status, quo regeretur regibus, immineret. Pompeius ergo populi Romani præclarissimus princeps, Judæam cum exercitu ingressus civitatem capit, templum reserat, non devotione supplicis, sed jure victoris, et ad sancta sanctorum, quo nisi summum sacerdotem non licebat intrare, non ut venerator, sed ut profanator accedit: confirmatoque Hyrcani pontificatu, et subjugatæ genti imposito custode Antipatro, quos tunc procuratores vocabant, vinctum secum Aristobulum ducit (e). Ex illo Judæi etiam tributarii Romanorum esse cœperunt. Postea Cassius (f) etiam templum expoliavit. Deinde post paucos annos etiam Herodem alienigenam regem habere meruerunt, quo regnante natus est Christus (g). Jam enim venerat

(a) Conf. supra cap. 36.

(b) Conf. Josephum, lib. 13 Antiq., cap. 12.

(c) Josephus, ibid., cap. 16.

(d) Josephus, lib. 14, capp. 3 et seqq.

(e) Factum hac anno secundo olympiadis 179, consulibus Marco Tullio Cicerone et Caio Antonio Nepote, ut tradit Josephus, Antiquitatum libro 14, cap. 4, § 5; ante Christum natum anno 65. LARCHER.

(f) Forte legendum, *crassus*: nam is cum in Parthos tenderet, spoliavit templum 8000 talentis, id est 43, 200, 000 libris nostræ monetæ. Refert Josephus, Antiquitatum libro 14, cap. 7. Hæc acta sunt anno 53 ante Christum natum. Cassius vero, Cesare occiso, venit in Syriam et Judææ tributum imperavit 700 talentorum, id est 3,780,000 librarum nostræ monetæ; anno ante Christum 43. Narrat Josephus, ibidem cap. 11, § 2. LARCHER.

(g) Herodes obtinet regnum Judææ ex senatusconsulto, anno ante Christum 40. Christus natus esse creditur anno quarto olympiadis 194, Urbis conditæ 753. Hinc æra Christiana incipit anno sequenti 754. Sed revera natus est anno secundo olympiadis 193, paulo antequam consulatum inirent Decimus Lælius Balbus et Caius Antistius Vetus, anno Urbis conditæ 748, id est quinque annis, novem mensibus et septem diebus ante æram vulgarem. Hinc reformandus auctor libri cui titulus est, *l'art de vérifier les dates*, cui non cautum fuit de ratione olympiadum. Annus secundus olympiadis 193 incipit mense junio, circa solstitium æstivum; ergo sex menses istius secundi anni nondum elapsi erant. Roma autem condita fuit mense octobri, anno tertio olympiadis sextæ, secundum Tarrutium, quem sequi-

plentudo temporis significata prophetico Spiritu per os patriarchæ Jacob, ubi ait: *Non deficiet princeps ex Juda, neque dux de femoribus ejus, donec veniat cui repositum est, et ipse expectatio gentium* (Gen. XLIX, 10). Non ergo defuit Judæorum princeps ex Judæis, usque ad istum Herodem, quem primum acceperunt alienigenam regem. Tempus ergo jam erat, ut veniret ille cui repositum erat, quod novo promissum est Testamento, ut ipse esset expectatio gentium. Fieri autem non posset, ut expectarent gentes eum venturum, sicut eum cernimus expectari, ut veniat ad faciendum judicium in claritate potentæ, nisi prius in eum crederent, cum venit ad patiendum judicium in humilitate patientiæ.

CAPUT XLVI. — *De ortu Salvatoris nostri, secundum quod Verbum caro factum est; et de dispersione Judæorum per omnes gentes, sicut fuerat prophetatum.*

Regnante ergo Herode in Judæa, apud Romanos autem jam mutato reipublicæ statu, imperante Cesare Augusto, et per eum orbe pacato, natus est Christus secundum præcedentem prophetiam (*Michæ v, 2*) in Bethlehem Judæ, homo manifestus ex homine virgine, Deus occultus ex Deo Patre. Sic enim propheta prædixerat: *Ecce virgo in utero accipiet, et pariet filium, et vocabunt nomen ejus Emmanuel, quod est interpretatum, Nobiscum Deus* (*Isai. vii, 14; Math. i, 23; Luc. i, 31*). Qui ut in se commendaret Deum, miracula multa fecit; ex quibus quædam, quantum ad eum prædicandum satis esse visum est, Scriptura evangelica continet. Quorum primum est, quod tam mirabiliter natus est: ultimum autem, quod cum suo resuscitato a mortuis corpore ascendit in cælum. Judæi autem, qui eum occiderunt, et in eum credere noluerunt, quia oportebat eum mori et resurgere, vastati infelicis a Romanis, funditusque a suo regno, ubi jam eis alienigenæ dominabantur, eradicati dispersique per terras (quandoquidem ubique non desunt), per Scripturas suas testimonio nobis sunt prophetias nos non finxisse de Christo; quas pluri mi eorum considerantes, et ante passionem, et maxime post ejus resurrectionem crediderunt in eum, de quibus prædictum est, *Si fuerit numerus filiorum Israel sicut arena maris, reliquæ salvæ fient* (*Isai. x, 22*). Cæteri vero excæcati sunt, de quibus prædictum est, *Fiat mensa eorum coram ipsis in laqueum, et in retributionem, et in scandalum. Obscurentur oculi eorum, ne videant; et dorsum illorum semper incurva* (*Psal. Lxviii, 23 et 24*). Proinde cum Scripturis nostris non credunt, complentur in eis suæ, quas cæci legunt: nisi forte quis dixerit illas prophetias Christianos finxisse de Christo, quæ Sibyllæ nomine, vel aliorum proferuntur, si quæ sunt, quæ non pertinent ad populum Judæorum (a). Nobis quidem illæ sufficient, quæ tur Varro: vide Petavium, de Doctrina temporum, libro 9, cap. 54. LARCHER.

¹ Editi, *eradicati sunt, dispersique per terras. Quandoquidem ubique non desunt, et per Scripturas suas, etc.* Emendantur ex manuscriptoribus.

² Omittunt, MSS., *coram ipsis*.

(a) Male feriat homines inter primos Christianos fluxerunt oracula Sibyllarum de Christo. LARCHER.

de nostrorum inimicorum codicibus proferuntur, quos agnoscimus propter hoc testimonium, quod nobis inviti perhibent eosdem codices habendo atque servando, per omnes gentes etiam ipsos esse dispersos, quaquaversum Christi Ecclesia dilatatur. Nam prophetia in Psalmis, quos etiam legunt, de hac re præmissa est, ubi scriptum est : *Deus meus, misericordia ejus præveniet me. Deus meus demonstravit mihi in inimicis meis* ¹, *ne occideris eos, ne quando obliviscantur legem tuam : disperge eos in virtute tua* (Psal. LVIII, 11, 12). Demonstravit ergo Deus Ecclesie in ejus inimicis Judæis gratiam misericordie suæ, quoniam, sicut dicit Apostolus, delictum illorum, salus gentibus ² (Rom. XI, 11). Et ideo non eos occidit, id est, non in eis perdidit quod sunt Judæi, quamvis a Romanis fuerint devicti et oppressi ; ne obliu legem Dei, ad hoc, de quo agimus, testimonium nihil valerent. Ideo parum fuit, ut diceret, *Ne occideris eos, ne quando obliviscantur legem tuam* : nisi etiam adderet, *Disperge eos* : quoniam si cum isto testimonio Scripturarum in sua tantummodo terra, non ubique essent, profecto Ecclesia quæ ubique est, eos prophetiarum, quæ de Christo præmissæ sunt, testes in omnibus gentibus habere non posset.

CAPUT XLVII. — *An ante tempora christiana aliqui fuerint extra Israeliticum genus, qui ad cælestis civitatis consortium pertinerent.*

Quapropter quisquis alienigena, id est, non ex Israel progenitus, nec ab illo populo in canonem sacrarum litterarum receptus, legitur aliquid prophetasse de Christo, si in nostram notitiam venit, aut venerit, ad cumulum a nobis commemorari potest : non quo necessarius sit, etiamsi desit, sed quia non incongrue creditur fuisse et in aliis gentibus homines, quibus hoc mysterium revelatum est, et qui hoc etiam prædicere impulsus sunt, sive participes ejusdem gratiæ fuerint, sive expertes, sed per malos angelos docti sunt, quos etiam præsentem Christum, quem Judæi non agnoscebant, scimus fuisse confesos. Nec ipsos Judæos existimo audere contendere, neminem pertinuisse ad Deum, præter Israelitas, ex quo propago Israel esse cœpit, reprobato ejus fratre majore. Populus enim revera, qui proprie Dei populus diceretur, nullus alius fuit : homines autem quosdam non terrena, sed cælesti societate ad veros Israelitas supernæ civis patriæ pertinentes etiam in aliis gentibus fuisse, negare non possunt : quia si negant, facillime convincuntur de sancto et mirabili viro Job, qui nec indigena, nec proselytus, id est advena populi Israel fuit ; sed ex gente Idumæa genus ducens, ibi ortus, ibidem mortuus est : qui divino sic laudatur eloquio, ut quod ad justitiam pietatemque attinet, nullus ei homo suorum temporum cœquetur (Job 1 ; Ezech. XIV, 20). Quæ tempora ejus

quamvis non inveniamus in Chronicis, colligimus tamen ex libro ejus, quem pro sui merito Israelitæ in auctoritatem canonicam receperunt, tertia generatione posteriorem fuisse quam Israel (a). Divinitus autem provisum fuisse non dubito, ut ex hoc uno sciremus etiam per alias gentes esse potuisse qui secundum Deum vixerunt eique placuerunt, pertinentes ad spiritualem Jerusalem ¹. Quod nemini concessum fuisse credendum est, nisi cui divinitus revelatus est unus mediator Dei et hominum homo Christus Jesus : qui venturus in carne sic antiquis sanctis prænuntiabatur, quemadmodum nobis venisse nuntiatus est, ut una eademque per ipsum fides omnes in Dei civitatem, Dei domum, Dei templum prædestinatos perducatur ad Deum. Sed quæcumque aliorum prophetiæ de Dei per Christum Jesum gratia proferuntur, possunt putari a Christianis esse confictæ. Ideo nihil est firmius ad convincendos quoslibet alienos, si de hac re contenderint, nostrosque faciendos ², si recte sapuerint, quam ut divina prædicta de Christo ea proferantur, quæ in Judæorum scripta sunt codicibus : quibus avulsis de sedibus propriis, et propter hoc testimonium toto orbe dispersis, Christi usquequaque crevit Ecclesia.

CAPUT XLVIII. — *Prophetiam Aggæi, qua dixit majorem futuram gloriam domus Dei, quam primum fuisset, non in reedificatione templi, sed in Ecclesia Christi esse completam.*

Hæc domus Dei majoris est gloriæ, quam fuerat illa prima lignis et lapidibus, cæterisque pretiosis rebus metallisque constructa. Non itaque Aggæi prophetia in templi illius instauratione completa est. Ex quo enim instauratum est, nunquam ostenditur habuisse tantam gloriam, quantum habuit tempore Salomonis : imo potius ostenditur primum cessatione prophetiæ fuisse domus illius gloriam diminutam, deinde ipsius gentis cladibus tantis usque ad ultimum excidium, quod factum est a Romanis, sicut ea quæ supra sunt commemorata testantur (b). Hæc autem domus ad novum pertinens Testamentum, tanto utique majoris est gloriæ, quanto meliores sunt lapides vivi, quibus credentibus renovatisque constructur. Sed ideo per instaurationem templi illius significata est, quia ipsa renovatio illius ædificii significat eloquio prophetico alterum Testamentum, quod appellatur novum. Quod ergo Deus dixit per memoratum prophetam, *Et dabo pacem in loco isto* (Aggæi II, 10) ; per significantem locum, ille qui eo significatur, intelligendus est : ut quia illo loco instaurato significata est Ecclesia, quæ fuerat ædificanda per Christum, nihil aliud accipiatur, quod dictum est, *Dabo pacem in loco isto* ; nisi, Dabo pacem in loco, quem signifi-

¹ Nonnulli Mss., *Israel*.

² Editi, *nostrosque fulciendos*. Aptius, nisi fallimur, quod omnes habent manuscripti, *nostrosque faciendos*.

(a) Vide Euseb. lib. 4 Demonstr. evang., capp. 5 et 6.

(b) Nihilominus hæc prophetia potest intelligi secundum sensum proprium. Nam dicit Aggæus, *implebo domum istam gloria*, ob Christi Redemptoris præsentiam, qui in illo templo frequenter versatus est. LANCHEA.

¹ Editi, *de inimicis meis*. At Mss., *in inimicis meis*; juxta græcum septuaginta.

² Vind. Am. Er., *salus est in gentibus*. Manuscripti non habent, *est in*.

cat locus iste. Quoniam omnia significantia videntur quodammodo earum rerum, quas significant, sustinere personas: sicut dictum est ab Apostolo, *Petra erat Christus* (1 Cor. x, 4); quoniam petra illa, de qua hoc dictum est, significabat utique Christum. Major est itaque gloria domus hujus novi Testamenti, quam donus prioris veteris Testamenti: et tunc apparebit major, cum dedicabitur. Tunc enim *veniet Desideratus cunctis gentibus* (Aggæi ii, 8), sicut legitur in Hebræo. Nam prius ejus adventus nondum erat desideratus omnibus gentibus. Non enim quem deberent desiderare, sciebant, in quem non crediderant. Tunc etiam secundum Septuaginta interpretes (quia et ipse propheticus sensus est), *venient quæ electa sunt Domini de cunctis gentibus*. Tunc enim vere non venient nisi electa, de quibus dicit Apostolus, *Sicut elegit nos in ipso ante mundi constitutionem* (Ephes. i, 4). Ipse quippe architectus, qui dixit, *Multi vocati, pauci autem electi* (Matth. xxii, 14), non de his¹ qui vocati sic venerunt, ut de convivio projicerentur, sed de electis demonstraturus est ædificatam domum, quæ nullam deinceps formidabit ruinam. Nunc autem, quando et hi replent ecclesias, quos tanquam in area ventilatio separabit, non apparet tanta gloria domus hujus, quanta tunc apparebit, quando quisquis ibi erit, semper erit.

CAPUT XLIX. — *De indiscreta² multiplicatione Ecclesiarum, qua in hoc sæculo multi reprobi miscentur electis.*

In hoc ergo maligno sæculo, in his diebus malis, ubi per humilitatem præsentem futuram comparat Ecclesia celsitudinem, et timorum stimulis, dolorum tormentis, laborum molestiis, tentationum periculis eruditur, sola spe gaudens, quando sanum gaudet, multi reprobi miscentur bonis; et utriusque tanquam in sagenam evangelicam colliguntur (Id. xiii, 47); et in hoc mundo, tanquam in mari, utriusque inclusi retibus indiscrete natant, donec perveniatur ad littus, ubi mali segregentur a bonis, et in bonis tanquam in templo suo, sit Deus omnia in omnibus (1 Cor. xv, 28). Proinde vocem nunc agnoscimus ejus impleri, qui loquebatur in Psalmo, atque dicebat, *Annuntiavi, et locutus sum, multiplicati sunt super numerum* (Psal. xxxix, 6). Hoc lit nunc, ex quo primum per os præcursoris sui Joannis, deinde per os proprium annuntiavit, et locutus est, dicens, *Agite pœnitentiam, appropinquavit enim regnum cælorum* (Matth. iii, 2; iv, 17). Elegit discipulos, quos et Apostolos nominavit (Luc. vi, 13), humiliter natos, inhonoratos, illiteratos; ut quidquid magnum essent et facerent, ipse in eis esset et faceret. Habuit inter eos unum, quo malo utens bene, et suæ passionis dispositum impleret, et Ecclesiæ suæ tolerandorum malorum præberet exemplum. Seminato, quantum per ejus oportebat præsentiam corporalem, sancto Evangelio, passus est, mortuus est, resurrexit: passione ostendens quid sustinere pro veritate, resurrectione quid

sperare in æternitate debeamus; excepta altitudine sacramenti, qua sanguis ejus in remissionem peccatorum fusus est. Conversatus est in terra quadraginta dies cum discipulis suis, atque ipsis videntibus ascendit in cælum, et post dies decem misit promissum Spiritum sanctum¹: cujus venientis in eos qui crediderant, tunc signum erat maximum et maxime necessarium, ut unusquisque eorum linguis omnium gentium loqueretur: ita significans unitatem catholicæ Ecclesiæ per omnes gentes futuram, ac sic linguis omnibus locuturam.

CAPUT L. — *De prædicatione Evangelii, quæ per passiones prædicantium clarior et potentior facta est.*

Deinde secundum illam prophetiam, *Ex Sion lex prodiet, et verbum Domini ex Jerusalem* (Isai. ii, 3): et secundum ipsius Domini Christi prædicta, ubi post resurrectionem stupentibus cum discipulis suis aperuit sensum, ut intelligerent Scripturas, et dixit eis, *Quoniam sic scriptum est, et sic oportebat Christum pati, et resurgere a mortuis tertio die, et prædicari in nomine ejus pœnitentiam et remissionem peccatorum per omnes gentes, incipientibus ab Jerusalem* (Luc. xxiv, 46, 47); et ubi rursus eis de adventu ejus novissimo requirentibus respondit, atque ait, *Non est vestrum scire tempora vel momenta², quæ Pater posuit in sua potestate: sed accipietis virtutem Spiritus sancti supervenientem in vos, et eritis mihi testes in Jerusalem, et in tota Judæa et Samaria, et usque in fines terræ* (Act. i, 7, 8): primum se ab Jerusalem diffudit Ecclesia, et cum in Judæa atque Samaria plurimi credidissent, et in alias gentes itum est, eis annuntiantibus Evangelium, quos ipse, sicut luminaria, et aptaverat verbo, et accenderat Spiritu sancto. Dixerat enim eis, *Nolite timere eos qui corpus occidunt, animam autem non possunt occidere* (Matth. x, 28). Qui ut frigidum timore non essent, igne charitatis ardebant. Denique per ipsos, non solum qui eum et ante passionem et post resurrectionem viderant et audierant, verum etiam post obitum eorum per posterorum, inter horrendas persecutiones et varios cruciatus ac funera martyrum prædicatum est toto orbe Evangelium, contestante Deo signis, et ostentis, et variis virtutibus, et Spiritus sancti muneribus: ut populi gentium credentes in eum, qui pro eorum redemptione crucifixus est, christiano amore venerarentur sanguinem martyrum, quem diabolico furore fuderunt; ipsique reges, quorum legibus vastabatur Ecclesia, ei nomini salubriter subderentur, quod de terra crudeliter auferre conati sunt, et falsos deos inciperent persequi, quorum causa cultores Dei veri fuerant antea persecuti.

CAPUT LI. — *Quod etiam per hæreticorum dissensiones fides catholica roboretur.*

4. Videns autem diabolus templa dæmonum deseri, et in nomen liberantis Mediatoris currere genus humanum, hæreticos movit, qui sub vocabulo chri-

¹ Editi, non de his dixit. Abest, dixit, a manuscriptis.

² Sic Mss. Editi autem, incerta.

¹ Editi addunt, Patris sui: non autem veteres libri.

² In Mss. non est, vel momenta.

stiano doctrinæ resisterent christianæ, quasi possent indifferenter sine ulla correptione haberi in civitate Dei, sicut civitas confusionis indifferenter habuit philosophos inter se diversa et adversa sentientes. Qui ergo in Ecclesia Christi morbidum aliquid pravumque sapiunt, si correpti ut sanum rectumque sapiant, resistunt contumaciter, suaque pestifera et mortifera dogmata emendare nolunt, sed defensare persistent; hæretici fiunt, et foras eximtes habentur in exercentibus inimicis. Etiam sic quippe veris illis catholicis membris Christi malo suo prosunt, dum Deus utitur et malis bene, et diligentibus eum omnia cooperantur¹ in bonum (Rom. viii, 28). Inimici enim omnes Ecclesiæ, quolibet errore cæcentur vel malitia depraventur, si accipiunt potestatem corporaliter affligendi, exercent ejus patientiam; si tantummodo male sentiendo adversantur, exercent ejus sapientiam; ut autem etiam inimici diligantur, exercent ejus benevolentiam, aut etiam beneficentiam, sive suadibili² doctrina cum eis agatur, sive terribili disciplina. Ac per hoc diabolus princeps impiæ civitatis, adversus peregrinantem in hoc mundo civitatem Dei vasa propria commovendo, nihil ei nocere permittitur. Cui procul dubio et rebus prosperis consolatio, ut non frangatur adversis; et rebus adversus exercitatio, ut non corrumpatur prosperis, per divinam providentiam procuratur: atque ita temperatur utrumque ab alterutro, ut in Psalmo illam vocem non aliunde agnoscamus exortam, *Secundum multitudinem dolorum meorum in corde meo, consolationes tuæ jucundaverunt animam meam* (Psal. xciii, 19). Hinc est et illud Apostoli, *Spe gaudentes, in tribulatione patientes* (Rom. xii, 12).

2. Nam et id, quod ait idem doctor, *Quicumque volunt in Christo pie vivere, persecutionem patientur*³ (II Tim. iii, 12), nullis putandum est deesse posse temporibus. Quia et cum ab eis qui foris sunt non sævientibus, videtur esse tranquillitas, et revera est⁴, plurimumque consolationis affert, maxime infirmis; non tamen desunt, imo multi sunt intus, qui corda pie viventium suis perditis moribus cruciant: quoniam per eos blasphematur christianum et catholicum nomen: quod quanto est charius eis, qui volunt pie vivere in Christo, tanto magis dolent, quod per malos intus positos fit, ut minus quam piorum mentes desiderant, diligatur. Ipsi quoque hæretici, cum cogitantur habere nomen⁵ et sacramenta christiana, et Scripturas, et professionem, magnum dolorem faciunt in cordibus piorum: quia et multi volentes esse Christiani, propter eorum dissensiones hæsitare coguntur, et multi maledici etiam in his inveniunt materiam blasphemandi Christianum no-

men; quia et ipsi quoquo modo Christiani appellantur. His atque hujusmodi pravis moribus et erroribus; hominum persecutionem patiuntur qui volunt in Christo pie vivere, etiam nullo infestante neque vexante corpus illorum. Patiuntur quippe hanc persecutionem non in corporibus, sed in cordibus. Unde illa vox est: *Secundum multitudinem dolorum meorum in corde meo*. Non enim ait, In corpore meo. Sed rursus quoniam cogitantur immutabilia divina promissa, et quod ait Apostolus, *Novit Dominus qui sunt ejus* (II Tim. ii, 19): *Quos enim præscivit, et prædestinavit conformes¹ imaginis Filii sui* (Rom. viii, 29); ex eis perire nullus potest; ideo sequitur in illo psalmo, *Consolationes tuæ jucundaverunt animam meam*. Dolor autem ipse, qui fit in cordibus piorum, quos persequuntur mores Christianorum malorum sive falsorum, prodest dolentibus; quoniam de charitate descendit, qua eos perire nolunt, nec impedire aliorum salutem. Denique magnæ consolationes fiunt etiam de correctionibus eorum, quæ piorum animas tanta jucunditate perfundunt, quantis doloribus de sua perditione cruciaverunt. Sic in hoc sæculo, in his diebus malis, non solum a tempore corporalis præsentis Christi et Apostolorum ejus, sed ab ipso Abel, quem primum justum impius frater occidit, et deinceps usque in hujus sæculi finem, inter persecutiones mundi et consolationes Dei peregrinando procurrit Ecclesia.

CAPUT LII. — *An credendum sit, quod quidam putant, impletis decem persecutionibus quæ fuerunt, nullam jam superesse præter undecimam, quæ in ipso Antechristi tempore sit futura.*

1. Proinde ne illud quidem temere puto esse dicendum, sive credendum, quod nonnullis visum est, vel videtur, non amplius Ecclesiam passuram persecutiones usque ad tempus Antichristi, quam quot jam passa est, id est decem, ut undecima eademque novissima sit ab Antichristo. Primam quippe computant a Nerone quæ facta est², secundam a Domitiano, a Trajano tertiam, quartam ab Antonino, a Severo quintam, sextam a Maximino, a Decio septimam, octavam a Valeriano, ab Aureliano nonam, decimam a Diocletiano et Maximiano (a). Plagas enim Ægyptiorum, quoniam decem fuerunt, antequam inde exire inciperet populus Dei; putant ad hunc intellectum esse referendas, ut novissima Antichristi persecutio, similis videatur undecimæ plagæ, qua Ægyptii, dum hostiliter sequerentur Hebræos, in mari Rubro, populo Dei per siccum transeunte,

¹ Editi, *conformes fieri*. Verbum, *fieri*, non est in manuscriptis nec in græco textu Apostoli.

² Vind. Am. et aliquot manuscripti omittunt, *quæ facta est*.

(a) Prima persecutio sub Nerone, anno Christi 64; secunda sub Domitiano, anno 93; tertia sub Trajano, anno 107; quarta sub Adriano, anno 118, vel potius sub Antonino, anno 162; quinta sub Severo, anno 202; sexta sub Maximino, anno 238; septima sub Decio, anno 250; octava sub Valeriano, anno 257; nona sub Aureliano, anno 27; decima sub Diocletiano et Maximiano, anno 302, LANCHE.

¹ Plures et probæ notæ Mss., *cooperatur*. Alludit ad locum Apostoli, Rom. viii, 28, ubi græce est, *sumergei*: quod utrolibet modo verti potest, referendo ad *Theon*, vel ad *panem*.

² Sic Mss. Editi autem, *suasibili*.

³ *patientur*, juxta codd. nostros, excepto 2050. M.

⁴ Fr. et aliquot Mss., *et revera utile est*.

⁵ Editi., *cum christianum cogitantur habere nomen*. Ab et christianum a Mss.

perierunt (a). Sed ego illa re gesta in Ægypto, istas persecuciones propheticæ significatas esse non arbitrator: quamvis ab eis, qui hoc putant, exquisite et ingeniose illa singula his singulis comparata videantur, non propheticæ Spiritu, sed conjectura mentis humanæ, quæ aliquando ad verum pervenit, aliquando fallitur.

2. Quid enim, qui hoc sentiunt, dicturi sunt de persecutione, qua ipse Dominus crucifixus est? in quam numero positori? Si autem hac excepta existimant computandum, tanquam illæ numerandæ sint, quæ ad corpus pertinent, non qua ipsum caput est appetitum et occisum; quid agent de illa, quæ, posteaquam Christus ascendit ad cælum, Jerosolymis facta est, ubi beatus Stephanus lapidatus est, ubi Jacobus frater Joannis gladio trucidatus est, ubi apostolus Petrus ut occideretur inclusus et per Angelum liberatus, ubi fugati atque dispersi de Jerosolymis fratres, ubi Saulus, qui postea Paulus apostolus factus est, vastabat Ecclesiam; ubi ipse quoque jam fidem, quam persequebatur, evangelizans, qualia faciebat, est passus, sive per Judæam, sive per alias gentes, quacumque Christum ferventissimus prædicabat? Cur ergo eis a Nerone videtur ordiendum, cum ad Neronis tempora inter atrocissimas persecuciones, de quibus nimis longum est cuncta dicere, Ecclesia crescendo pervenerit? Quod si a regibus factas persecuciones in numero existimant esse debere; rex fuit Herodes, qui etiam post ascensum Domini gravissimam fecit. Deinde quid respondent etiam de Juliano, quem non numerant in decem? An ipse non est Ecclesiam persecutus, qui Christianos liberales literas docere ac discere vetuit? Sub quo Valentinianus major, qui post eum tertius imperator fuit, fidei christianæ confessor exstitit, militiæque privatus est (b). Ut omitam quæ apud Antiochiam facere cœperat, nisi unius fidelissimi et constantissimi juvenis, qui multis, ut torquerentur, apprehensis, per totum diem primus est tortus, inter ungulas cruciatusque psallentis libertatem atque hilaritatem miratus horruisset et in cæteris deformius erubescere timuisset (c). Postremo nostra memoria Valens supradicti

(a) Sic putant Orosius, lib. 7 Hist., cap. 27, necnon Sulpicius Severus Hist. sacr. lib. 2, cap. 55.

(b) Julianus Apostata arcebat ritus christianos docere magistros rhetoricos et grammaticos, teste Ammiano, libro 23, cap. 10, sub finem. De Valentiniano privato militia vide Socratem, Historiæ Ecclesiasticæ libro 3, cap. 13, Λατρεα. — Conf. Amnianum, lib. 26, cap. 10, sub fin.; Eutropium et alios.

(c) Cum jussi a Juliano Christiani sepulcrum Babylæ: martyris alio transferre, psalmum audiente Principe canerent, cujus est initium, *In exitu Israel de Ægypto* (Psal. cxm.), accensus Julianus duci eos frequentes postriedie et torqueri jussit. Sallustius erat præfectus, cui negotium mandaverat, primumque Theodorum quemdam juvenem arripuit: cui variis tormentorum generibus admotis, juvenis fronte alacri atque hilari ab initio lucis ad horam undecimam perstitit, hymnum psalmumque suavissime cantillans quem pridie cœcinerat Ecclesia. Quod ubi Sallustius vidit, reddi custodiæ imperavit, et ipse ad Principem admirabundus pervenit, dehortans ne torquere Christianos pergeret, illis gloriæ, ipsi principi ignominie ac dedecoris plenum futurum; et ordine re audita, Julianus ab incepto destitit. Eum Theodorum Eusebius testificatur se Antiochiæ convenisse, quæsisseque an in equileo doluisset? « Minime vero, » inquit ille: « nam pone me assistebat juvenis in alba veste,

Valentiniani frater Arianus, nonne magna persecutione per Orientis partes catholicam vastavit Ecclesiam (a)? Quale est autem, non considerare, Ecclesiam per totum mundum fructificantem atque crescentem posse in aliquibus gentibus persecutionem pati a regibus, et quando in aliis non patitur? Nisi forte non est persecutio computanda, quando rex Gothorum in ipsa Gothia persecutus est Christianos crudelitate mirabili, cum ibi non essent nisi catholici, quorum plurimi martyrio coronati sunt: sicut a quibusdam fratribus, qui tunc illic pueri fuerant, et se ista vidisse incunctanter recordabantur, audivimus (b)? Quid modo in Perside (c)? nonne ita in Christianos serbuit persecutio (si tamen jam quievit), ut fugientes inde nonnulli usque ad Romana oppida pervenerint? Hæc atque hujusmodi mihi cogitanti, non videtur esse definiendus numerus persecutionum, quibus exerceri oportet Ecclesiam. Sed rursus affirmare aliquas futuras a regibus, præter illam novissimam, de qua nullus ambigit Christianus, non minoris est temeritatis. Itaque hoc in medio relinquimus, neutram partem quæstionis hujus astruentes, sive destruentes, sed tantummodo ab affirmandi quodlibet horum audaci præsumptione revocantes.

CAPUT LIII. De tempore novissimæ persecutionis occulto.

1. Illam sane novissimam persecutionem, quæ ab Antichristo futura est, præsentia sua ipse exstinguet Jesus. Sic enim scriptum est, quod *cum interficiet spiritu oris sui, et evacuabit illuminatione præsentis sæculi* (1 Thess. ii, 8). Hic quæri solet, Quando istud erit? Importune omnino. Si enim hoc nobis nosse prodesset, a quo melius quam ab ipso Deo magistro interrogantibus discipulis diceretur? Non enim siluerunt inde apud eum; sed a præsentem quæsierunt, dicentes: *Domine, si hoc tempore præsentaberis, et quando regnum Israel?* At ille: *Non est, inquit, vestrum scire tempora, quæ Pater in sua posuit potestate* (Act. i, 6, 7). Non utique illi de hora, vel die, vel annos, sed de tempore interrogaverunt, quando istud acceperere responsum. Frustra igitur annos, qui huic sæculo remanent, computare ac definire conamur, cum hoc scire non

« qui subinde frigidam mihi suffundebat, et sudorem sæculo candidissimo detergebat; ita ut grave potius fuerit cum illic detraherer. » Macte esto, tam admiranda virtute juvenis, memoria sæculorum omnium dignissime, nobisque propitius et benignus effice, ut æmulari te et juvenes et et senes exoptemus. IUP. VIVES.

¹ Editi, *si hoc in tempore representabis regnum Israel?* Sed Augustinus, ut alibi jam est observatum legere solet, *si hoc tempore presentaberis, et quando regnum Israel?* Et sic habet hoc loco liber optime notæ Colbertinus.

(a) Conf. Socratem, Hist. eccl. lib. 4, cap. 2, et Oros. lib. 7, cap. 33, vide etiam Augustinum lib. 2 contra Lit. Petil. n. 206.

(b) Athanarici regis Gothorum notat persecutionem anno Domini 370 in Christianos motam, de qua Hieronymus in Chronico, et Orosius lib. 7, cap. 32. De eadem loquitur Epiphanius, Hæresi 70. COGROSUS.

(c) Hæc persecutio commota est circa annum Christi 420, sub Isidgerde rege Persarum, ut scribit Theodoretus, lib. 5, Hist. eccl. cap. 38, vel potius sub Vararane ejus filio, ut Socrates, lib. 7, cap. 18, et Nicephorus, lib. 14, cap. 19. De eadem persecutione Cassiodorus, lib. 10 Hist. tripart. cap. 50.

esse nostrum ex ore Veritatis audiamus. Quos tamen alii quadringentos, alii quingentos, alii etiam mille ab ascensione Domini usque ad ejus ultimum adventum compleri posse dixerunt. Quemadmodum autem quisque eorum astruat opinionem suam, longam est demonstrare, et non necessarium. Conjecturis quippe utantur humanis, non ab eis certum aliquid de Scripturæ canonicæ auctoritate profertur. Omnium vero de hac re calculantium digitos resolvit (a) et quiescere jubet ille qui dicit: *Non est vestrum scire tempora, quæ Pater in sua posuit potestate.*

2. Sed hæc quia evangelica sententia est, mirum non est non ea repressos fuisse deorum multorum falsorumque cultores, quominus fingerent dæmonum responsis, quos tanquam deos colunt, definitum esse quanto tempore mansura esset religio christiana. Cum enim viderent, nec tot tantisque persecutionibus eam potuisse consumi, sed his potius mira incrementa sumpsisse, excogitaverunt nescio quos versus græcos, tanquam consulenti eisdem, divino oraculo effusos, ubi Christum quidem ab hujus tanquam sacrilegii crimine faciunt innocentem; Petrum autem maleficiis fecisse¹ subjungunt, ut coleretur Christi nomen per trecentos sexaginta quinque annos, deinde completo memorato numero annorum, sine mora sumeret finem (b). O hominum corda doctorum! o ingenia litterata² digna credere ista de Christo, quæ credere non vultis in Christum, quod ejus discipulus Petrus ab eo magicas artes non didicerit, sed ipso innocente tamen ejus maleficus fuerit³ nomenque illius, quam suum, coli maluerit magicis artibus suis, magnis laboribus et periculis suis, postremo etiam effusione sanguinis sui! Si Petrus maleficus fecit, ut Christum sic diligeret mundus; quid fecit innocens Christus, ut eum sic diligeret Petrus? Respondeant igitur ipsi sibi, et si possunt, intelligant illa superna gratia factum esse, ut propter æternam vitam Christum diligeret mundus, quæ gratia factum est, ut et propter æternam vitam ab illo accipiendam et usque ad temporariam mortem pro illo patiendam⁴ Christum diligeret Petrus. Deinde isti dii qui sunt, qui possunt ista prædicere, nec possunt avertere, ita succumbentes uni malefico, et uni sceleri magico, quo puer, ut dicunt, annicius occisus, et dilaniatus, et ritu nefario sepultus est (c), ut sectam sibi adversariam tam prolixo tempore convalescere, tot tantarum-

¹ Sic aliquot manuscripti. At editi, *maleficia fecisse.*

² In sola editione Lov., *litteratorum, pro, litterata.*

³ Editi, *ejus discipulus maleficus fuerit.* Abest, *discipulus*, a manuscriptis.

⁴ Codex 258, *capientem.* M.

(a) De ratione digitis computandi vide Herodotum, lib. 6, cap. 63; Plinium, *Historiæ naturalis* libro 31, cap. 7; Juvenalem, *Satira* 10, vers. 248; Alexandrum ab Alexandro, lib. 4, cap. 14, pag. 114. LARCOMA.

(b) Baronius hoc refert ad annum Domini 313. Simile habes oraculum a quodam pagano confictum apud Prosperum, parte 3 de Prædicationibus, c. p. 38, COEUVAS.

(c) Infantocidia solita objici Christianis ostendit Tertullianus in Apologetico, paulo post initium, ubi id crimen falsissimum atque impudentissimum purgat. Quanquam Caiaphryges et Pepuziani, duo hominum genera hæresis cumprimis perditæ ac desperatæ, infantis tenellum cor, us soliti erant per omnia membra compungere, ut sic expresso sanguine farina mæceretur, qua conficerent pacem in Eucharistiæ usum, ut Augustinus narrat in libro de Hæresibus, hæc. 26 et 27. ICD. VIVES.

SANCT. AUGUST. VII.

que persecutionum horrendas crudelitates, non resistendo sed patiendo superare, et ad suorum simulatorum, templorum, sacrorum, oraculorum eversionem pervenire permetterent? Quis postremo est deus, non noster utique, sed ipsorum, qui vel illectus tanto scelere vel impulsus est ista præstare? Non enim alicui dæmoni, sed deo dicunt illi versus hæc Petrum arte magica defuisse. Talem deum habent, qui Christum non habent.

CAPUT LIV. — *De stultissimo mendacio Pagano rum, quo christianam religionem non ultra trecentos sexaginta quinque annos mansuram esse finxerunt.*

1. Hæc atque hujusmodi multa colligerem, si nondum annus ipse transisset, quem divinatio ficta promisit, et decepta vanitas credidit. Cum vero ex quo nominis Christi cultus per ejus in carne præsentiam et per Apostolos institutus est, ante aliquot annos anni trecenti sexaginta quinque completi sint quid aliud quærimus, unde ista falsitas refellatur? Ut enim in Christi nativitate hujus rei non ponamus initium, quia infans et puer discipulos non habebat, tamen quando habere cœpit, procul dubio tunc innuit per ejus corporalem præsentiam doctrina et religio christiana, id est, posteaquam in fluvio Jordane ministerio Joannis est baptizatus. Propter hoc enim de illo prophetia illa præcesserat, *Dominabitur a mari usque ad mare, et a flumine usque ad terminos orbis terræ* (Psal. LXXI, 8). Sed quoniam priusquam passus esset et resurrexisset a mortuis, nondum fides omnibus fuerat definita; in resurrectione quippe Christi definita est (nam sic apostolus Paulus Atheniensibus loquitur dicens, *Jam nunc annuntiat hominibus, omnes ubique agere poenitentiam, eo quod statuit diem, judicare orbem in æquitate, in vitro, in quo definiit fidem omnibus, resuscitans illum a mortuis* [Act. xvii, 30 et 31]): melius in hac quæstione solvenda inde initium sumimus; præsertim quia tunc datus est etiam Spiritus sanctus, sicut eum dari post resurrectionem Christi oportebat in ea civitate, ex qua debuit incipere lex secunda, hoc est Testamentum novum. Prima enim fuit ex monte Sina per Moysen, quod Testamentum vocatur vetus. De hac autem quæ per Christum danda erat, prædictum est, *Ex Sion prodiet lex, et verbum Domini ex Jerusalem* (Isai. ii, 3). Unde et ipse per omnes gentes dixit prædicari oportere in nomine suo poenitentiam, sed tamen incipientibus ab Jerusalem (Luc. xxiv, 47). Ibi ergo exorsus est hujus nominis cultus, ut in Christum Jesum, qui crucifixus fuerat et resurrexerat, crederetur: ibi hæc fides tam insignibus initiis incanduit, ut aliquot hominum millia in Christi nomen mirabili alacritate conversa, venditis suis rebus ut egenis distribuissent, proposito sancto et ardentissima charitate ad paupertatem voluntariam pervenirent, atque inter frementes et sanguinem sitientes Judæos, se usque ad mortem pro veritate certare, non armata potentia, sed potentiore patientia præpararent. Hoc si nullis magicis artibus factum

¹ Lov., *incaluit*: dissentientibus editis aliis et manuscriptis.

(Vingt.)

est. cur credere dubitant, eadem virtute divina per totum mundum id fieri potuisse qua hoc factum est? Si autem ut Jerosolymis sic ad cultum nominis Christi accenderetur tanta hominum multitudo, quæ illum in cruce, vel fixerat prensam, vel riserat fixum, jam maleficium illud fecerat Petrus, ex ipso anno querendum est, quando trecenti sexaginta quinque completi sint. Mortuus est ergo Christus duobus Geminis consulibus, octavo kalendas aprilis (a). Resurrexit tertia die, sicut Apostoli suis¹ etiam sensibus probaverunt. Deinde post quadraginta dies ascendit in cælum: post decem dies, id est quinquagesimo post suam resurrectionem die, misit Spiritum sanctum. Tunc tria millia hominum Apostolis eum prædicantibus crediderunt. Tunc itaque nominis illius cultus exorsus est, sicut nos credimus, et veritas habet, efficacia Spiritus sancti; sicut autem finxit vanitas impia vel putavit, magicis artibus Petri. Paulo post etiam signo mirabili facto, quando ad verbum ipsius Petri quidam mendicus ab utero matris ita

¹ Vind. Am. et plures Mss., *Apostoli sui*.

(a) Tertullianus, libro contra Judæos, cap. 8: «Tiberius,» inquit, «Caesar imperium habuit annis viginti duobus, mensibus septem, diebus viginti: hujus quinto decimo anno imperii passus est Christus, annos habens quasi triginta cum pateretur.» Et paulo post: «passio hujus exterminii intra tempora septuaginta hebdomadarum perfecta est sub Tiberio Cesare, consulibus Rubellio Gemino, et Fusio Gemino, mense martio, temporibus Paschæ, die octavo kalendarum aprilium.» Hunc secutus Lactantius, lib. 4 *Instit.*, cap. 10, eundem Tiberii imperantis annum, eosdemque consules assignat, nec in die variat nisi librariorum forsitan vitio, quo factum est ut codices alii «ante diem» decimum, alii «ante diem septimum» habeant, alii vero melius, «ante diem viii kal. april.» quod idem est atque «octavo ante diem kal. april.» quemadmodum Tullianis exemplis plurimis ostendi potest. Christum passum viii kal. april. vel die martii vigesimo quinto, asserit rursus Augustinus, lib. 83 *Quæst.*, q. 80, et lib. 4 de Trinitate, n. v; cumque eo Joannes Chrysostomus, in sermone de Nativitate S. Joannis Baptistæ; Gregorius Turonensis, lib. 10, capite ultimo; Beda, lib. de Ratione Temporum, cap. 47, et alii. Eusebius autem in *Chronico*, et Epiphanius, *heresi 51*, passionem Domini ad annum Tiberii octavum decimum referunt. Huic opinioni favet Evangelium: nam Lucae iii, 1, baptisma datum Christo a Joanne et exordium prædicationis ejus in decimum quintum Tiberii annum refertur, et liquet tres abhinc annos solidos Christum, antequam pateretur, prædicasse regnum Dei. Sed Tiberii annos haudquaquam more Romano computatos ab Eusebio et Epiphanio fuisse, contendit Dionysius Petavius, de *Doctrina temporum*, lib. 12, cap. 12: «Etenim a populari,» inquit, «civitatum a suarum exordio Patres illi annos inchoabant, nimirum a ab autumno antecedente ætatem illam, qua Augustus excessit,» adeoque «annum Tiberii decimum octavum putare incipiunt ab autumno anni Juliani 75.» Ipse itaque Petavius in *Rationario temporum*, parte 1, libro 3, scribit mortuum Christum Tiberio quintum et Sejano consulibus, martii die vigesimo tertio. At Baronius, Ludovicus Vives, Leonardus Coquæus et alii, consulibus Cneio Domitio, Enobarbo et Camillo Scriboniano. Alia denique est non minus probata viris eruditis opinio, passionem Christi ad annum referens Tiberii decimum nonum currentem cum Juliano 78, cumque eo cui Phlegon, Olympiadum scriptor, apud Eusebium defectionem solis assignat, olympiadis 202 anno 4 consulibus Severo Sulpitio Galba et Lucio Cornelio Sulla, et ad diem aprilis tertium.

caudus, ut ab aliis portaretur, et ad portam templi, ubi stipem peteret, poneretur, in nomine Jesu Christi salvus exsilivit, quinque millia hominum crediderunt: ac deinde aliis atque aliis accessibus credentium crevit Ecclesia. Ac per hoc colligitur etiam dies, ex quo annus ipso sumpsit initium, scilicet quando missus est Spiritus sanctus, id est, per idus maias. Numeratis proinde consulibus, trecenti sexaginta quinque anni reperiuntur impleti per easdem idus, consulatu Honorii et Eutyhiani. Porro sequenti anno, consule Mallio Theodoro, quando jam secundum illud oraculum dæmonum aut figmentum hominum nulla esse debuit religio christiana, quid per alias terrarum partes forsitan factum sit, non fuit necesse perquirere. Interim quod scimus in civitate potissima et eminentissima Carthagine Africae Gaudentius et Jovius comites imperatoris Honorii, quarto decimo kalendas aprilis falsorum deorum templa everterunt, et simulacra fregerunt. Ex quo usque ad hoc tempus per triginta ferme annos (a) quis non videat quantum creverit cultus nominis Christi, præsertim posteaquam multi eorum Christiani facti sunt, qui tanquam vera illa divinatione revocabantur a fide, eamque completo eodem annorum numero inanem rideadamque viderunt? Nos ergo qui sumus vocamurque Christiani, non in Petrum credimus, sed in quem credidit Petrus; Petri de Christo ædificati sermonibus, non carminibus venenatis; nec decepti maleficiis, sed beneficiis ejus adjuti; Petri magister Christus in doctrina, quæ ad vitam ducit æternam, ipse est et magister noster.

2. Sed aliquando jam concludamus hunc librum, huc usque disserentes, et quantum satis visum est demonstrantes, quisnam sit duarum civitatum, cælestis atque terreneæ, ab initio usque in finem permixtarum mortalis excursus. Quarum illa quæ terrena est, fecit sibi quos voluit, vel undecumque, vel etiam ex hominibus falsos deos, quibus sacrificando serviret: illa autem quæ cælestis peregrinatur in terra, falsos deos non facit, sed a vero Deo ipsa fit, cujus verum sacrificium ipsa sit. Ambæ tamen temporalibus vel bonis pariter utuntur, vel malis pariter affliguntur, diversa fide, diversa spe, diverso amore, donec ultimo judicio separentur, et percipiat unaquæque suum finem, cujus nullus est finis: de quibus ambærum finibus deinceps disserendum est.

(a) Leonardus Coquæus in hunc locum, «Ad annum,» ait, «usque Christi 42,» Theodosii Junioris 22, quo hæc «scribetur Augustinus.» Eodem ex loco Baronius, ad annum 423, n. 17, putat scriptum hunc librum anno 429, quoniam a Mallio Theodori consulatu, qui in annum 509 incidit, computantur hic anni ferme triginta. Sed præfixa particula *ferme* non obscure significat Augustinum uti se rotundum numero, tametsi plenus non sit, et desint anni tres vel quatuor, quemadmodum intelligitur infra, lib. 23, cap. 8



LIBER DECIMUS NONUS.

In quo de finibus utriusque civitatis, terrenæ ac cœlestis, disputatur. Recensentur de bonorum et malorum finibus opiniones philosophorum, qui beatitudinem in hac vita facere ipsi sibi frustra conati sunt: qui dum operosius refelluntur, ipsius civitatis cœlestis, seu populi christiani beatitudo et pax quænam sit, qualisve hic haberi, vel in futurum sperari possit, demonstratur.

CAPUT PRIMUM. — *Quod in questione, quam de finibus bonorum et malorum philosophica disputatio ventilavit, ducentas octoginta et octo sectas esse posse Varro perspexerit.*

1. Quoniam de civitatis utriusque, terrenæ scilicet et cœlestis, debitis finibus deinceps mihi video disputandum; prius exponenda sunt, quantum operis hujus terminandi ratio patitur, argumenta mortalium, quibus sibi ipsi beatitudinem facere in hujus vitæ infelicitate moliti sunt, ut ab eorum rebus vanis spes nostra quid differat, quam Deus nobis dedit, et res ipsa, hoc est vera beatitudo quam dabit, non tantum auctoritate divina, sed adhibita etiam ratione, qualem propter infideles possumus adhibere, clarescat. De finibus enim bonorum et malorum multa et multipliciter inter se philosophi disputarunt: quam quæstionem maxima intentione versantes, invenire conati sunt quid efficiat hominem beatum. Illud enim est finis boni nostri, propter quod appetenda sunt cætera, ipsum autem propter seipsum: et illud finis mali, propter quod vitanda sunt cætera, ipsum autem propter se ipsum. Finem ergo boni nunc dicimus, non quo consumatur, ut non sit, sed quo perficiatur, ut plenum sit; et finem mali, non quo esse desinat, sed quo usque nocendo perducatur. Fines itaque isti sunt, summum bonum, et summum malum. De quibus invenendis, atque in hac vita summo bono adipiscendo, vitando autem summo malo, multum, sicut dixi, laboraverunt, qui studium sapientiæ in hujus sæculi vanitate professi sunt: nec tamen eos, quamvis diversis errantes modis naturæ lines in tantum ab itinere veritatis deviare permisit, ut non alii in animo, alii in corpore, alii in utroque fines bonorum ponerent et malorum. Ex qua tripartita velut generalium distributione sectarum, Marcus Varro in libro de Philosophia tam multam dogmatum varietatem diligenter et subtiliter scrutatus advertit, ut ad ducentas octoginta octo sectas, non quæ jam essent, sed quæ esse possent, adhibens quasdam differentias, facillime perveniret.

2. Quod ut breviter ostendam, inde oportet incipiam, quod ipsa advertit, et posuit in libro memorato: quatuor esse quædam, quæ homines sine magistro, sine ullo doctrinæ adminiculo, sine industria vel arte vivendi, quæ virtus dicitur, et procul dubio discitur, velut naturaliter appetunt; aut voluptatem, qua delectabiliter movetur corporis sensus; aut quietem, qua sit ut nullam molestiam quisque corporis patiat; aut utramque, quam tamen uno nomine voluptatis Epicurus appellat; aut universaliter prima naturæ, in quibus et hæc sunt, et alia, vel in cor-

pore, ut membrorum integritas, et salus atque incolumitas ejus; vel in animo, ut sunt ea quæ vel parva, vel magna in hominum reperiuntur ingeniis. Hæc igitur quatuor, id est, voluptas, quies, utrumque, prima naturæ, ita sunt in nobis, ut vel virtus, quam postea doctrina inserit, propter hæc appetenda sit, aut ista propter virtutem, aut utraque propter se ipsa: ac per hoc fiunt hinc duodecim sectæ: per hanc enim rationem singulæ triplicantur; quod cum in una demonstravero, difficile non erit id in cæteris invenire. Cum ergo voluptas corporis animi virtuti aut subditur, aut præfertur, aut jungitur, tripartita variatur diversitate sectarum. Subditur autem virtuti, quando in usum virtutis assumitur. Pertinet quippe ad virtutis officium, et vivere patriæ, et propter patriam filios procreare: quorum neutrum fieri potest sine corporis voluptate. Nam sine illa nec cibus potusque sumitur, ut vivatur; nec concumbitur, ut generatio propagetur. Cum vero præfertur virtuti, ipsa appetitur propter se ipsam, virtus autem assumenda creditur propter illam, id est, ut nihil virtus agat, nisi ad consequendam vel conservandam corporis voluptatem: quæ vita deformis est quidem, quippe ubi virtus servit dominæ voluptati; quamvis nullo modo hæc dicenda sit virtus: sed tamen etiam ista horribilis turpitudine quosdam philosophos patronos et defensores suos habuit. Virtuti porro voluptas jungitur, quando neutra earum propter alteram, sed propter se ipsas ambæ appetuntur. Quapropter sicut voluptas vel subdita, vel prælata, vel juncta virtuti, tres sectas facit; ita quies, ita utrumque, ita prima naturæ alias ternas inveniuntur efficere. Pro varietate quippe humanarum opinionum virtuti aliquando subduntur, aliquando præferuntur, aliquando junguntur, ac sic ad duodenarium sectarum numerum pervenitur. Sed iste quoque numerus duplicatur adhibita una differentia, socialis videlicet vitæ: quoniam quisquis sectatur aliquam istarum duodecim sectarum profecto aut propter se tantum id agit, aut etiam propter socium, cui debet hoc velle quod sibi. Quocirca duodecim sunt eorum, qui propter se tantum unamquamque tenendam putant; et aliæ duodecim eorum, qui non solum propter se sic vel sic philosophandum esse decernunt, sed etiam propter alios, quorum bonum appetunt sicut suum. Hæc autem sectæ viginti quatuor iterum geminantur, addita differentia ex Academicis novis (a), et fiunt quadraginta octo. Illarum quippe viginti quatuor unamquamque sectarum potest quisque sic tenere ac defendere ut

(a) Vid. paulo infra, n. 3.

certam, quemadmodum defenderunt Stoici, quod hominis bonum, quo beatus esset, in animi tantummodo virtute consisteret : potest alius ut incertam, sicut defenderunt Academici novi, quod eis etsi non certum, tamen verisimile videbatur. Viginti quatuor ergo sunt per eos, qui eas velut certas propter veritatem, et aliae viginti quatuor per eos, qui easdem quamvis incertas propter verisimilitudinem sequendas putant. Rursus, quia unamquamque istarum quadraginta octo sectarum potest quisque sequi habitu cæterorum philosophorum, itemque potest alius habitu Cynicorum, ex hac etiam differentia duplicantur, et nonaginta sex sunt. Deinde quia earum singulas quasque ita veri homines possunt atque sectari, ut aut otiosam diligant vitam, sicut hi qui tantummodo studiis doctrinæ vacare voluerunt atque valuerunt; aut negotiosam, sicut hi qui cum philosopharentur, tamen administratione reipublicæ regendisque rebus humanis occupatissimi fuerunt; aut ex utroque genere temperatam, sicut hi qui partim erudito otio, partim necessario negotio, alternantia vitæ suæ tempora tribuerunt : propter has differentias potest etiam triplicari numerus iste sectarum, et ad ducentas octoginta octo perducitur.

3. Hæc de Varronis libro, quantum potui, breviter ac dilucide posui, sententias ejus meis explicans verbis. Quomodo autem refutatis cæteris unam eligat, quam vult esse Academicorum veterum, quos a Platone institutos usque ad Polemonem, qui ab illo quartus ejus scholam tenuit, quæ Academia¹ dicta est, habuisse certa dogmata vult videri; et ob hoc distinguit ab Academicis novis, quibus incerta sunt omnia, quod philosophiæ genus ab Arcesila cœpit successore Polemonis (a); eamque sectam, id est veterum Academicorum, sicut dubitatione ita omni errore carere arbitretur, longum est per omnia demonstrare : nec tamen omni ex parte res omittenda est. Removet ergo prius illas omnes differentias, quæ numerum multiplicaverunt sectarum : quas ideo removendas putat, quia non in eis est finis boni. Neque enim existimat ullam philosophiæ sectam esse dicendam, quæ non eo distet a cæteris, quod diversos habeat fines bonorum et malorum. Quandoquidem nulla est homini causa philosophandi, nisi ut beatus sit : quod autem beatum facit, ipse est finis boni : nulla est igitur causa philosophandi, nisi finis boni : quamobrem quæ nullum boni finem sectatur, nulla philosophiæ secta dicenda est. Cum ergo quaeritur de sociali vita, utrum sit tenenda sapienti, ut sumnum bonum, quo fit homo beatus, ita velit et curet amici sui, quemadmodum suum, an suæ tantummodo beatitudinis causa faciat quidquid facit; non de ipso summo bono quaestio est, sed de assumendo vel non assumendo socio ad hujus participationem boni, non propter se ipsum, sed propter eundem socium, ut ejus bono ita gaudeat, sicut gaudet suo. Item cum quaeritur de Academicis novis, quibus incerta sunt

omnia, utrum ita sint res habendæ, in quibus philosophandum est, an, sicut aliis philosophis placuit certas eas habere debeamus; non quaeritur quid in boni sine sectandum sit, sed de ipsius boni veritate, quod sectandum videtur, utrum sit, necne, dubitandum : hoc est, ut id planius eloquar, utrum ita sectandum sit, ut qui sectatur, dicat esse verum; an ita, ut qui sectatur, dicat verum sibi videri, etiamsi forte sit falsum; tamen uterque sectetur unum atque idem bonum. In illa etiam differentia quæ adhibetur ex habitu et consuetudine Cynicorum, non quaeritur quisnam sit finis boni, sed utrum in illo habitu et consuetudine sit vivendum ei, qui verum sectatur bonum, quodlibet ei verum videatur esse atque sectandum. Denique fuerunt, qui cum diversa sequerentur bona finalia, alii virtutem, alii voluptatem, eundem tamen habitum et consuetudinem tenebant, ex qua¹ Cynici appellabantur. Ita illud quidquid est, unde philosophi Cynici discernuntur a cæteris, ad eligendum ac tenendum bonum, quo beati fierent, utique nil valebat. Nam si aliquid ad hoc interesset, profecto idem habitus eundem finem sequi cogeret, et diversus habitus eundem sequi finem non sineret.

CAPUT II. — *Quomodo, remotis omnibus differentiis, quæ non sectæ, sed quaestiones sunt, ad tripartitam summi boni definitionem Varro perveniat, quarum tamen una sit eligenda.*

In tribus quoque illis vitæ generibus, uno scilicet non segniter, sed in contemplatione vel inquisitione veritatis otioso, altero in gerendis rebus humanis negotioso, tertio ex utroque genere temperato, cum quaeritur quid horum sit potius eligendum, non finis boni habet controversiam; sed quid horum trium difficultatem vel facilitatem afferat ad consequendum vel retinendum finem boni, id in ista quaestione versatur. Finis enim boni, cum ad eum quisque pervenerit, protinus beatum facit. In otio autem litterato, vel in negotio publico, vel quando utrumque vicibus agitur, non continuo quisque beatus est. Multi quippe in quolibet horum trium possunt vivere, et in appetendo boni sine quo fit homo beatus, errare. Alia est igitur quaestio de finibus bonorum et malorum, quæ unamquamque philosophorum sectam facit : et aliae sunt quaestiones de sociali vita, de cunctatione Academicorum, de vestitu et victu Cynicorum, de tribus vitæ generibus, otioso, actioso, et ex utroque modificato; quarum nulla est, in qua de bonorum et malorum finibus disputatur. Proinde quoniam Marcus Varro has quatuor adhibens differentias, id est, ex vita sociali, ex Academicis novis, ex Cynicis, ex isto vitæ genere tripartito ad sectas ducentas octoginta octo pervenit, et si quæ aliae possunt similiter adici; remotis eis omnibus, quoniam de sectando summo bono nullam inferunt quaestionem, et ideo sectæ nec sunt, nec vocandæ sunt, ad illas duodecim, in quibus quaeritur quid sit bonum hominis, quo assecuto fit beatus, ut ex eis unam veram, cæteras falsas ostendat.

¹ Plures Mss., *Academica*.

(a) Conf. Cic. lib. 3 de Orat., cap. 13.

¹ Sic Mss. Editi autem, *ex quo*.

dat esse, revertitur. Nam remoto illo tripartito genere vitæ, duæ partes hujus numeri detrahuntur, et sectæ nonaginta sex remanent. Remota vero differentia ex Cynicis addita, ad dimidium rediguntur, et quadraginta octo fiunt. Auferamus etiam quod ex Academicis novis adhibitum est, rursus dimidia pars remanet, id est viginti quatuor. De sociali quoque vita quod accesserat, similiter auferatur, duodecim sunt reliquæ, quas ista differentia, ut viginti quatuor fierent, duplicaverat. De his ergo duodecim nihil dici potest, cur sectæ non sint habendæ. Nihil quippe aliud in eis quaritur, quam fines bonorum et malorum. Inventis autem bonorum finibus, profecto e contrario sunt malorum. Hæc autem ut fiant duodecim sectæ, illa quatuor triplicantur, voluptas, quies, utrumque, et prima naturæ, quæ primigenia Varro vocat (a). Hæc quippe quatuor dum singillatim virtuti aliquando subduntur, ut non propter se ipsa, sed propter officium virtutis appetenda videantur, aliquando præferuntur, ut non propter se ipsa, sed propter hæc adipiscenda vel conservanda necessaria virtus putetur, aliquando jungitur, ut propter se ipsa et virtus, et ista appetenda credantur; quaternarium numerum triplum reddunt, et ad duodecim sectas perveniunt. Ex illis autem quatuor rebus Varro tres tollit, voluptatem scilicet, et quietem, et utrumque: non quod eas improbet, sed quod primigenia illa naturæ et voluptatem in se habeant, et quietem. Quid ergo opus est ex his duabus tria quædam facere, duo scilicet, dum singillatim appetuntur voluptas antiquies, et tertium, cum ambæ simul; quandoquidem prima naturæ et ipsas, et præter ipsas alia multa contineant? De tribus ergo sectis ei placet diligenter esse tractandum, quænam sit potius eligenda. Non enim veram plus quam unam vera ratio esse permittit, sive in his tribus sit, sive alicubi alibi, quod post videbimus. Interim de his tribus quomodo unam Varro eligat, quantum breviter aperteque possumus, disseramus. Istæ nempe tres sectæ ita fiunt, cum vel prima naturæ propter virtutem, vel virtus propter prima naturæ, vel utraque, id est, et virtus et prima naturæ, propter se ipsa sunt expetenda.

CAPUT III. — *De tribus sectis summum hominis bonum quærentibus, quam eligendam Varro definit, se mens veteris Academicæ, Antiocho auctore, sententiam.*

1. Quid ergo istorum trium sit verum atque sectandum, isto modo persuadere conatur. Primum, quia summum bonum in philosophia non arboris, non pecoris, non dei, sed hominis quæritur, quid sit ipse homo, quærendum putat. Sentit quippe in ejus natura duo esse quædam, corpus et animam: et horum quidem duorum melius esse animam longeque præstabilius omnino non dubitat; sed utrum anima sola sit homo, ut ita sit ei corpus tanquam equus equiti¹. Eques enim non homo et equus, sed solus homo est:

¹ Hic in editis additur, *quærendum putat*: pro quo in Mss. relinquitur subaudiendum, *dubitat*.

(a) Vkl. Cicer. lib. 2 de Finibus, cap. 11, et lib. 3, cap. 7.

ideo tamen eques dicitur, quod aliquo modo se habeat ad equum. An corpus solum sit homo, aliquo modo se habens ad animam, sicut poculum ad potionem: non enim calix et potio, quam continet calix, simul dicitur poculum, sed calix solus; ideo tamen quod potioni continendæ sit accommodatus. An vero nec anima sola, nec solum corpus, sed simul utrumque sit homo, cujus pars sit una sive anima sive corpus, ille autem totus ex utroque constet, ut homo sit: sicut duos equos junctos bigas vocamus, quorum sive dexter, sive sinister, pars est bigarum, unum vero eorum quoquo modo se habeat ad alterum, bigas non dicimus, sed ambos simul. Horum autem trium hoc eligit tertium, hominemque nec animam solam, nec solum corpus, sed animam simul et corpus esse arbitratur. Proinde summum bonum hominis, quo sit beatus, ex utriusque rei bonis constare dicit, et animæ scilicet et corporis. Ac per hoc prima illa naturæ propter se ipsa existimat expetenda, ipsamque virtutem quam doctrina inserit velut artem vivendi, quæ in animæ bonis est excellentissimum bonum. Quapropter eadem virtus, id est ars agendæ vitæ, cum acceperit prima naturæ, quæ sine illa erant, sed tamen erant etiam quando eis doctrina adhuc deerat, omnia propter se ipsam appetit, simulque etiam se ipsam: omnibus que simul et se ipsa utitur, eo fine ut omnibus delectetur atque perfruatur, magis minusque, ut quæque inter se majora atque minora sunt, tamen omnibus gaudens, et quædam minora, si necessitas postulat, propter majora vel adipiscenda vel tenenda, contemnit. Omnium autem bonorum vel animi vel corporis, nihil sibi virtus omnino præponit. Hæc enim bene utitur et se ipsa, et cæteris, quæ hominem faciunt beatum, bonis. Ubi vero ipsa non est, quamlibet multa sint bona, non bono ejus sunt¹, cujus sunt; ac per hoc jam nec ejus bona dicenda sunt, cui male utenti utilia esse non possunt. Hæc ergo vita hominis, quæ virtute et aliis animi et corporis bonis, sit quibus virtus esse non potest, fruitur, beata esse dicitur: si vero et aliis, sine quibus esse virtus potest, vel ullis, vel pluribus, beatior: si autem prorsus omnibus, ut nullum omnino bonum desit, vel animi vel corporis, beatissima. Non enim hoc est vita, quod virtus; quoniam non omnis vita, sed sapiens vita virtus est: et tamen qualiscumque vita sine ulla virtute potest esse; virtus vero sine ulla vita non potest esse. Hoc et de memoria dixerim atque ratione, et si quid aliud tale est in homine. Sunt enim hæc et ante doctrinam, sine his autem non potest esse ulla doctrina: ac per hoc nec virtus, quæ utique discitur. Bene autem currere, pulchrum esse corpore, viribus ingentibus prævalere, et cætera hujusmodi talia sunt, ut et virtus sine his esse possit, et ipsa sine virtute: bona sunt tamen; et secundum istos² etiam ipsa propter se ipsam diligit virtus, utiturque illis et fruitur, sicut virtutem decet.

¹ Editi, *non bona ejus sunt*. Melius Mss., *non bono ejus sunt*.

² Editi, *et ipsa sine virtute bona sint: tamen et secundum istos, etc. emendantur ex Mss.*

2. Hanc vitam beatam etiam socialem perhibent esse, quæ amicorum bona propter se ipsa diligit sicut sua, eisque propter ipsos hoc velit quod sibi; sive in domo sint, sicut conjux et liberi et quicumque domestici; sive in loco, ubi domus ejus est, sicuti est urbs, ut sunt hi qui cives vocantur; sive in toto orbe, ut sunt gentes, quas ei societas humana conjungit; sive in ipso mundo, qui censetur nomine cæli et terræ, sicut esse dicunt deos, quos volunt amicos esse homini sapienti, quos nos familiariter Angelos dicimus. De bonorum autem et e contrario malorum flubus negant ullo modo esse dubitandum, et hanc inter se et novos Academicos affirmant esse distantiam, nec eorum interest quidquam, sive cynico, sive alio quolibet habitu et victu in his finibus, quos veros putant, quisque philosophetur. Ex tribus porro illis vitæ generibus, otioso, actuoso, et quod ex utroque compositum est, hoc tertium sibi placere asseverant. Hæc sensisse atque docuisse Academicos veteres, Varro asserit, auctore Antiocho, magistro Ciceronis et suo, quem sane Cicero in pluribus fuisse Stoicum, quam veterem Academicum vult videri (a). Sed quid ad nos, qui potius de rebus ipsis judicare debemus, quam pro magno de hominibus quid quisque senserit scire?

CAPUT IV. — *De summo bono et summo malo quid Christiani sentiant contra philosophos, qui summum bonum in se sibi esse dixerunt.*

1. Si ergo quæretur a nobis, quid civitas Dei de his singulis interrogata respondeat, ac primum de finibus bonorum malorumque quid sentiat, respondebit æternam vitam esse summum bonum, æternam vero mortem summum malum: propter illam proinde adipiscendam, istamque vitandam, recte nobis esse vivendum. Propter quod scriptum est, *Justus ex fide vivit (Habacuc 11, 2; Galat. 11, 11)*: quoniam neque bonum nostrum jam videmus, unde oportet ut credendo quæramus; neque ipsum recte vivere nobis ex nobis est, nisi credentes adjuvet et orantes, qui et ipsam fidem dedit, qua nos ab illo adjuvandos esse credamus. Illi autem qui in ista vita fines bonorum et malorum esse putaverunt, sive in corpore, sive in animo, sive in utroque ponentes summum bonum; atque, ut id explicatius eloquar, sive in voluptate, sive in virtute, sive in utraque; sive in quiete, sive in virtute, sive in utraque; sive in voluptate simul et quiete, sive in virtute, sive in utrisque; sive in primis naturæ, sive in virtute, sive in utrisque: hic beati esse, et a se ipsis beati fieri mira vanitate voluerunt. Irrisit hos Veritas per prophetam dicentem, *Novit Dominus cogitationes hominum*; vel, sicut hoc testimonium posuit apostolus Paulus, *Dominus novit cogitationes sapientium, quoniam vanæ sunt (Psal. xciii, 11; 1 Cor. 11, 20)*.

(a) Hic Antiochus Ascalonita fuit, docuitque Ciceronem, Varronem, Lucullum et alios plerosque nobiles Romanos; sequelaturque veterem Academicam, sed ita ut ad Zenonicam sectam inclinaret; eamque non tam Stoicam discipulam novam vocandam autumabat, quam antiquæ Academiæ correctionem: Idcirco ejus Antiochi et de aliis rebus permultis et in primis de summo bono sententia Marco Bruto, qui ejus fratrem audiebat, cæterisque Stoicis vehementer improbatur. LUD. VIVES.

2. Quis enim sufficit, quantovis eloquentiæ flumine, vitæ hujus miserias explicare? Quam lamentatus est Cicero in Consolatione de morte filiæ, sicut potuit: sed quantum est quod potuit? Ea quippe quæ dicuntur prima naturæ, quando, ubi, quomodo tam bene se habere in hac vita possunt, ut non sub incertis casibus fluctuent? Quis enim dolor contrarius voluptati, quæ inquietudo contraria quieti, in corpus cadere sapientis non potest? Membrorum certe amputatio vel debilitas hominis expugnat incolumitatem, deformitas pulchritudinem, imbecillitas sanitatem, vires lassitudo, mobilitatem torpor, aut tarditas: ecquid horum est, quod nequeat in carnem sapientis irruere? Status quoque corporis atque motus, cum decentes atque congruentes sunt, inter naturæ prima numerantur: sed quid si aliqua mala valetudo membra tremore concutiat? quid si usque ad ponendas in terram manus dorsi spina curvetur, et hominem quodammodo quadrupedem faciat? nonne omnem statuendi corporis et movendi speciem decusque pervertet? Quid ipsius animi primigenia quæ appellatur bona, ubi duo prima ponunt propter comprehensionem perceptionemque veritatis, sensum et intellectum? Sed qualis quantusque remanet sensus, si, ut alia taccam, fiat homo surdus et cæcus? Ratio vero et intelligentia quo recedet, ubi sopietur, si aliquo morbo efficiatur insanus? Phrenetici multa absurda cum dicunt, vel faciunt, plerumque a bono suo proposito et moribus aliena, imo suo bono proposito moribusque contraria, sive illa cogitemus, sive videamus, si digne consideremus, lacrymas tenere vix possumus, aut forte nec possumus¹. Quid dicam de his, qui dæmonum patiuntur incursus? ubi habent absconditam vel obrutam intelligentiam suam, quando secundum suam voluntatem et anima eorum et corpore malignus utitur spiritus? Et quis confidit hoc malum in hac vita evenire non posse sapienti? Deinde perceptio veritatis in hac carne qualis aut quanta est, quando, sicut legimus in veraci libro Sapientiæ, *Corpus corruptibile aggravat animam, et deprimit terrena inhabitatio sensum multa cogitantem (Sap. 11, 15)*? Impetus porro vel actionis appetitus, si hoc modo recte latine appellatur ea quam Græci vocant ἄρετή, quia et ipsam primis naturæ deputant bonis (a), nonne ipse est, quo geruntur etiam insanorum illi miserabiles motus, et facta quæ horremus, quando pervertitur sensus ratioque sopitur?

3. Porro ipsa virtus, quæ non est inter prima naturæ, quoniam eis postea doctrina introducente supervenit, cum sibi bonorum culmen vindicet humanorum, quid hic agit nisi perpetua bella cum vitiiis, nec exterioribus, sed interioribus; nec alienis, sed plane nostris et propriis; maxime illa, quæ græce σωφροσύνη, latine temperantia nominatur, qua carnales frenantur libidines, ne in quæque flagitia mentem

¹ Sola editio Lovaniensium omittit, aut forte nec possumus.

(a) Conf. Cicer. lib. 3 de Finibus, cap. 6, et lib. 3 de Naturis, cap. 22.

consentientem trahant (a)? Neque enim nullum est vitium, cum, sicut dicit Apostolus, *Caro concupiscit adversus spiritum*: cui vitio contraria virtus est, cum, sicut idem dicit, *Spiritus concupiscit adversus carnem*. *Hæc enim, inquit, invicem adversantur; ut non ea quæ vultis faciatis (Galat. v, 17)*. Quid autem facere volumus, cum perfici volumus finem summi boni, nisi ut caro adversus spiritum non concupiscat, nec sit in nobis hoc vitium, contra quod spiritus concupiscat? Quod in hac vita quamvis velimus, quoniam facere non valeamus, id saltem in adiutorio Dei faciamus, ne carni concupiscenti adversus spiritum, spiritu succumbente cedamus, et ad perpetrandum peccatum nostra consensione pertrahamur. Absit ergo ut, quamdiu in hoc bello intestinò sumus, jam nos beatitudinem, ad quam vincendo volumus pervenire, adeptos esse credamus. Et quis est usque adeo sapiens, ut contra libidines nullum habeat omnino conflictum?

4. Quid illa virtus, quæ prudentia dicitur? nonne tota vigilantia sua bona discernit a malis, ut in illis appetendis istisque vitandis nullus error obrepit? Ac per hoc et ipsa nos in malis, vel mala in nobis esse testatur. Ipsa enim docet nos, malum esse ad peccandum consentire, bonumque esse ad peccandum non consentire libidini. Illud tamen malum, cui nos non consentire docet prudentia, facit temperantia, nec prudentia, nec temperantia tollit huic vitæ. Quid justitia, cujus munus est sua cuique tribuere (b) (unde fit in ipso homine quidam justus ordo naturæ, ut anima subdatur Deo et animæ caro, ac per hoc Deo et anima et caro), nonne demonstrat in eo se adhuc opere laborare potius, quam in hujus operis jam sine requiescere? Tanto quippe minus anima subditur Deo, quanto minus Deum in ipsis suis cogitationibus concipit; et tanto minus animæ subditur caro, quanto magis adversus spiritum concupiscit. Quamdiu ergo nobis inest hæc infirmitas, hæc pestis, hic languor, quomodo nos jam salvos; et si nondum salvos, quomodo jam beatos illa finali beatitudine dicere audebimus? Jam vero illa virtus, cujus nomen est fortitudo, in quantacumque sapientia evidentissima testis est humanorum malorum, quæ compellitur patientia tolerare. Quæ mala Stoici philosophi miror qua fronte mala non esse contendunt, quibus fatentur, si tanta fuerint, ut ea sapiens vel non possit, vel non debeat sustinere, cogi eum mortem sibi inferre, atque ex hac vita emigrare (c). Tantus autem superbix stupor est in his hominibus, hic se habere finem boni et a se ipsis fieri beatos putantibus; ut sapiens eorum, hoc est, qualem mirabili vanitate describunt, etiamsi exerceat, obsurdescat, obmutescat, membris debilitetur, doloribus crucietur, et si quid aliud talium malorum dici aut cogitari potest, incidat in eum, quo sibi mortem cogatur inferre,

hanc in his malis vitam constitutam, eos non pudeat beatam vocare. O vitam beatam, quæ ut finiatur, mortis quærit auxilium! Si beata est, maneat in ea: si vero propter ista mala fugitur ab ea, quomodo est beata? Aut quomodo ista non sunt mala, quæ vincunt fortitudinis bonum, eandemque fortitudinem non solum sibi cedere, verum etiam delirare compellunt, ut eandem vitam et dicat beatam, et persuadeat esse fugiendam? Quis usque adeo cæcus est, ut non videat quod, si beata esset, fugienda non esset? Sed si propter, infirmitatis pondus, qua premitur, hanc fugiendam fatentur; quid igitur causæ est, cur non etiam miseram fracta superbix cervicæ fateantur? Utrum, obsecro, Cato ille (a) patientia, an potius impatientia se peremit? Non enim hoc fecisset, nisi victoriam Caesaris impatienter tulisset. Ubi est fortitudo? Nempe cessit, nempe succubuit, nempe usque adeo superata est, ut vitam beatam derelinqueret, desereret, fugeret. An non erat jam beata? Misera ergo erat. Quomodo igitur mala non erant quæ vitam miseram fugiendamque faciebant?

5. Quapropter etiam ipsi, qui mala ista esse confessi sunt, sicut Peripatetici, sicut veteres Academici, quorum sectam Varro defendit, tolerabilius quidem loquuntur: sed eorum quoque mirus est error, quod in his malis, etsi tam gravia sint, ut morte fugienda sint, ab ipso sibi met illata, qui hæc patitur, vitam beatam tamen esse contendunt. *Mala sunt, inquit, tormenta atque cruciatus corporis; et tanto sunt pejora, quanto potuerint esse majora; quibus ut careas, ex hac vita fugiendum est*. Qua vita, obsecro? Hac, inquit, quæ tantis aggravatur malis. Certe ergo beata est in eisdem ipsis malis, propter quæ dicis esse fugiendam? An ideo beatam dicis, quia licet tibi ab his malis morte discedere? Quid si ergo in eis aliquo judicio divino tenereris, nec permettereris mori, nec unquam sine illis esse sinereris? Nempe tunc saltem miseram talem diceres vitam. Non igitur propterea misera non est, quia cito relinquitur: quandoquidem si sempiterna sit, etiam abs te ipso misera judicatur. Non itaque propterea, quoniam brevis est, nulla miseria debet videri; aut, quod est absurdius, quia brevis miseria est, ideo etiam beatitudo appellari. Magna vis est in eis malis, quæ cogunt hominem, secundum ipsos etiam sapientem, sibi met auferre quod homo est: cum dicant, et verum dicant, hanc esse naturæ primam quodanmodo et maximam vocem, ut homo concilietur sibi, et propterea mortem naturaliter fugiat; ita sibi amicus, ut esse se animal, et in hac conjunctione corporis atque animæ vivere velit, vehementerque appetat (b). Magna vis est in eis malis, quibus iste

¹ *Miss., eum non pudeat.*

² Omnes *Miss.* hæc omittunt, *si vero propter ista mala fugitur ab ea, quomodo est beata? Aut*: postque, *maneat in ea*, proxime jungunt, *Quomodo ista non sunt mala, etc.*

³ Plures et probæ notæ *Miss.*: *Sed aperta infirmitatis voce fugiendam fatentur: quid igitur causæ est.*

⁴ *Sola editio Lov., morte sinereris.*

⁵ *In Miss., velit vehementer atque appetat.*

(a) Cato Uticensis.

(b) Cicero, lib. 1 de Officiis, cap. 4, et de Finibus lib. 3, cap. 5; lib. 5, cap. 9.

(a) Vid. Cicero, *Quæst. Tuscul.* lib. 3, cap. 8.

(b) *Justitia* ita definitur in *Institutionibus*, tit. de *Justitia et jure*: « Perpetua et constans voluntas sua cuique tribuendi. » *COGNUMUS.*

(c) Apud Ciceronem, lib. 3 de *Finibus*, et lib. 1 *Quæst. Tuscul.*

naturæ vincitur sensus, quo mors omni modo omnibus viribus conatibusque vitatur; et ita vincitur, ut quæ vitabatur, optetur, appetatur, et, si non poterit aliunde contingere, ab ipso homine sibi in inferatur. Magna vis est in eis malis, quæ fortitudinem faciunt homicidam: si tamen adhuc dicenda est fortitudo, quæ ita his malis vincitur, ut hominem, quem, sicut virtus, regendum tuendumque suscepit, non modo non possit per patientiam custodire, sed ipsa insuper cogatur occidere. Debet quidem etiam mortem sapiens ferre patienter, sed quæ accidit aliunde: secundum istos autem si eam sibi ipse inferre compellitur, profecto fatendum est eis, non solum mala, sed intolerabilia etiam mala esse, quæ hoc eum perpetrare compellunt. Vita igitur, quæ istorum tam magnorum tamque gravium malorum aut premitur oneribus, aut subjacet casibus, nullo modo beata diceretur, si homines qui hoc dicunt, sicut victi malis ingravescentibus, cum sibi ingerunt mortem, cedunt infelicitati, ita victi certis rationibus, cum quærunt beatam vitam, dignarentur cedere veritati, et non sibi putarent in ista mortalitate sine summi boni esse gaudendum; ubi virtutes ipsæ, quibus hic certe nihil melius atque utilius in homine reperitur, quanto majora sunt adjutoria contra vim periculorum, laborum, dolorum, tanto fideliora testimonia miseriarum. Si enim veræ virtutes sunt, quæ nisi in eis, quibus vera inest pietas, esse non possunt; non se proflentur hoc posse ut nullas miseras patientur homines, in quibus sunt: neque enim mendaces sunt veræ virtutes, et hoc profiteantur; sed ut vita humana, quæ tot et tantis hujus sæculi malis esse cogitur misera, spe futuri sæculi sit beata, sicut et salva. Quomodo enim beata est, quæ nondum salva est? Unde et apostolus Paulus non de hominibus imprudentibus, impatientibus, intemperantibus et iniquis, sed de his qui secundum veram pietatem viverent, et ideo virtutes quas haberent, veras haberent, ait, *Spe enim salvi facti sumus. Spes autem quæ videtur, non est spes: quod enim quis videt, quid sperat? Si autem quod non videmus speramus, per patientiam expectamus* (Rom. viii, 24 et 25). Sicut ergo spe salvi, ita spe beati facti sumus: et sicut salutem, ita beatitudinem, non jam tenemus præsentem, sed expectamus futuram: et hoc *per patientiam*; quia in malis sumus, quæ patienter tolerare debemus, donec ad illa veniamus bona ubi omnia erunt, quibus ineffabiliter delectemur; nihil erit autem, quod jam tolerare debeamus. Talis salus, quæ in futuro erit sæculo, ipsa erit etiam finalis beatitudo. Quam beatitudinem isti philosophi, quoniam non videntes nolunt credere, hic sibi conantur falsissimam fabricare, quanto superbiore, tanto mendaciore virtute.

CAPUT V. — *De sociali vita, quæ cum maxime expectanda sit, multis offensionibus sæpe subvertitur.*

Quod autem socialem vitam volunt esse sapientis, nos multo amplius approbamus. Nam unde ista Dei civitas, de qua hujus operis ecce jam undevicesimum librum versamus in manibus, vel inchoaretur exorta,

vel progrediretur excursu, vel apprehenderet debitos fines, si non esset socialis vita sanctorum? Sed in hujus mortalitatis ærumna quot et quantis abundet malis societas humana, quis enumerare valeat? quis æstimare sufficiat? Audiant apud comicos suos hominem cum sensu atque consensu omnium hominum dicere:

Auxi uxorem, quam ibi miseriam vidi! Natū illi, Alia cura.

(Terent. Adelphorum actu 3, scen. 4, vers. 13, 14.)

Quid itidem illa, quæ in amore vitia commemorat idem Terentius, injuriæ, suspiciones, inimicitia¹, bellum, pax rursus (Eunuch. act. 1, scen. 1, v. 14-16): nonne res humanas ubique impleverunt? nonne et in amicorum honestis amoribus plerumque contingunt? nonne his usquequaque plenæ sunt res humanæ, ubi injurias, suspiciones, inimicitias, bellum, mala certa sentimus; pacem vero incertum bonum, quoniam corda eorum, cum quibus eam tenere volumus, ignoramus; et si nosse hodie possemus, qualia cras futura essent utique nesciremus? Qui porro inter se amiciores solent esse, vel debent, quam qui una etiam continentur domo? Et tamen quis inde securus est, cum tanta sæpe mala ex eorum occultis insidiis exstiterint; tanto amariora, quanto pax dulcior fuit; quæ vera putata est, cum astutissime flingeretur? Propter quod omnium pectora sic attingit, ut cogat in gemitum, quod ait Tullius: *Nullæ sunt occultiores insidiæ, quam hæ quæ latent in simulatione officii, aut in aliquo necessitudinis nomine. Nam eum qui palam est adversarius, facile cavendo vitare possis: hoc vero occultum, intestinum ac domesticum malum non solum existit², verum etiam opprimit, antequam prospicere atque explorare potueris* (Cicer. in Verrem act. 2, lib. 1, cap. 15). Propter quod etiam divina vox illa, *Et inimici hominis, domestici ejus* (Math. x, 36), cum magno dolore cordis auditur: quia etsi quisque tam fortis sit, ut æquo animo perferat; vel tam vigilans, ut provido consilio caveat, quæ adversus eum molitur amicitia simulata: eorum tamen hominum perfidorum malo, cum eos esse pessimos experitur, si ipse bonus est, graviter excrucietur necesse est; sive semper mali fuerint, et se bonos finxerint, sive in istam malitiam ex bonitate mutati sint. Si ergo domus commune perfugium in his malis humani generis tuta non est, quid civitas, quæ quanto major est, tanto forum ejus litibus et civilibus et criminalibus plenius, etiamsi quiescant, non solum turbulentæ, verum sæpius et cruentæ seditio- nes, ac bella civilia, a quorum eventis sunt aliquando liberæ civitates, a periculis nunquam?

CAPUT VI. — *De errore humanorum judiciorum, cum veritas latet.*

Quid ipsa judicia hominum de hominibus, quæ civitatibus in quantalibet pace manentibus deesse non possunt, qualia putamus esse, quam misera, quam dolenda? quandoquidem hi judicant, qui conscientias eorum, de quibus judicant, cernere nequeunt. Unde sæpe coguntur tormentis innocentium testium ad alienam causam pertinentem quærere veritatem. Quid

¹ hic apud Terentium additur, *inducie*.

² Apud Ciceronem, *non modo non existit*.

cum in sua causa quisque torquetur ; et cum quaeritur utrum sit nocens, cruciatur, et innocens luit pro incerto scelere certissimas penas ; non quia illud commississe detegitur, sed quia non commississe nescitur ? Ac per hoc ignorantia iudicis plerumque est calamitas innocentis. Et quod est intolerabilius, magisque plangendum, rigandumque, si fieri possit ¹, fontibus lacrymarum ; cum propterea iudex torqueat accusatum, ne occidat nesciens innocentem, sit per ignorantiae miseriam, ut et tortum et innocentem occidat, quem ne innocentem occideret torserat. Si enim secundum istorum sapientiam delegerit ex hac vita fugere, quam diutius illa sustinere tormenta ; quod non commisit, commississe se dicit. Quo damnato et occiso, utrum nocentem an innocentem iudex occiderit, adhuc nescit, quem ne innocentem nesciens occideret torsit : ac per hoc innocentem et ut sciret torsit, et dum nesciret occidit. In his tenebris vitae socialis, sedebit iudex ille sapiens, an non sedebit ? Sedebit plane. Constringit enim eum, et ad hoc officium pertrahit humana societas, quam deserere nefas ducit. Hoc enim nefas esse non ducit, quod testes innocentes in causis torquentur alienis : quod hi qui arguuntur, vi doloris plerumque superati, et de se falsa confessi, etiam puniuntur innocentes, cum iam torti fuerint innocentes : quod etsi non morto puniuntur, in ipsis vel ex ipsis tormentis plerumque moriuntur : quod ² aliquando et ipsi qui arguunt, humanae societati fortasse, ne crimina impunita sint, prodesse cupientes, et mentientibus testibus, reoque ipso contra tormenta durante immaniter, nec fatente, probare quod objiciunt non valentes, quamvis vera objecerint, a iudice nesciente damnantur. Hæc tot et tanta mala non deputat esse peccata : non enim hæc facit sapiens iudex nocendi voluntate, sed necessitate nesciendi ; et tamen quia cogit humana societas, necessitate etiam iudicandi. Hæc est ergo quam dicimus, miseria certe hominis, etsi non malitia sapientis. An vero necessitate nesciendi atque iudicandi torquet insontes, punit insontes, et parum est illi quod non est reus, si non sit insuper et beatus ? Quanto consideratius et homine dignius agnoscit in ista necessitate miseriam, eamque in se odit ³ ; et, si pie sapit, clamat ad Deum, *De necessitatibus meis erue me* (*Psal. xxiv, 17*) ?

CAPUT VII. — *De diversitate linguarum, qua societas hominum dirimitur ; et de miseria bellorum, etiam quæ iusta dicuntur.*

Post civitatem vel urbem sequitur orbis terræ, in quo tertium gradum ponunt societatis humanæ, incipientes a domo, atque inde ad urbem, deinde ad orbem progrediendo venientes : qui utique, sicut aquarum congeries, quanto major est, tanto periculis plenior. In quo primum linguarum diversitas hominem

¹ Sic nostri omnes Mss. In B., *posset*. M.

² Nostri codices, *an non audebit* ? M.

³ Sola editio Lov., *Quid quod*, etc.

⁴ Vind. Am. et Er., *Quanto consideratius et homine dignius, et hominem agnoscit in ista necessitate, eamque miseriam in se odit.*

alienat ab homine. Nam si duo sibimet invicem flant obviam, neque præterire, sed simul esse aliqua necessitate cogantur, quorum neuter norit linguam alterius ; facilius sibi animalia muta, etiam diversi generis, quam illi, cum sint homines ambo, sociantur. Quando enim quæ sentiunt, inter se communicare non possunt, propter solam linguæ diversitatem, nihil prodest ad consociandos homines tanta similitudo naturæ : ita ut libentius homo sit cum cane suo, quam cum homine alieno. At enim opera data est, ut imperiosa civitas non solum jugum, verum etiam linguam suam domitis gentibus per pacem societatis imponeret : per quam non deesset, imo et abundaret etiam interpretum copia. Verum est : sed hoc quam multis et quam grandibus bellis, quanta strage hominum, quanta effusione humani sanguinis comparatum est ? Quibus transactis, non est tamen eorumdem malorum finita miseria. Quamvis enim non defuerint, neque desint hostes ¹ externæ nationes, contra quas semper bella gesta sunt, et geruntur : tamen etiam ipsa imperii latitudo peperit pejoris generis bella, socialia scilicet et civilia ; quibus miserabilius quattur genus humanum, sive cum belligeratur, ut aliquando conquiescant ; sive cum timetur, ne rursus exsurgant. Quorum malorum multas et multiplices clades, duras et diras necessitates, si ut dignum est eloqui velim, quanquam nequaquam sicut res postulat possim ; quis erit prolixæ disputationis modus ? Sed sapiens, inquit, iusta bella gesturus est. Quasi non, si se hominem meminit, multo magis dolebit justorum necessitatem sibi exstitisse bellorum ; quia nisi iusta essent, ei gerenda non essent, ac per hoc sapienti nulla bella essent. Iniquitas enim partis adversæ iusta bella ingerit gerenda sapienti (a) : quæ iniquitas utque homini est dolenda, quia hominum est, etsi nulla ex ea bellandi necessitas nasceretur. Hæc itaque mala tam magna, tam horrenda, tam sava, quisquis cum dolore considerat, miseriam fateatur. Quisquis autem vel patitur ea sine animi dolore, vel cogitat, multo utique miserius ideo se putat beatum, quia et humanum perdidit sensum.

CAPUT VIII. — *Quod amicitia bonorum secunda esse non possit, dum a periculis quæ in hac vita sunt, trepidari necesse sit.*

Si autem non contingat quædam ignorantia similis dementiae, quæ tamen in hujus vitæ misera conditione sæpe contingit, ut credatur vel amicus esse qui inimicus est, vel inimicus qui amicus est ; quid nos consolatur in hac humana societate erroribus ærumnisque plenissima, nisi fides non ficta, et mutua dilectio verorum et honorum amicorum ? Quos quanto plures et in locis pluribus habemus, tanto longius latiusque metuimus, ne quid eis contingat mali de tantis malorum aggeribus hujus sæculi. Non enim tantummodo solliciti sumus, ne fame, ne bellis, ne morbis, ne captivitatibus affligantur, ne in eadem servitute talia

¹ sic nostri codices. In B., *neque hostes desint*. M. (a) Conf. Quæst. in Jesum Nave, q. 10.

patiantur, qualia nec cogitare sufficimus: verum etiam, ubi timor est multo amarior, ne in perfidiam, malitiam nequitiamque mutantur. Et quando ista contingunt (tanto utique plura, quanto illi sunt plures, et in pluribus locis¹) et in nostram notitiam perferuntur, quibus cor nostrum flagris uratur, quis potest, nisi qui talia sentit, advertere? Mortuos quippe audire mallems: quamvis et hoc sine dolore non possimus audire. Quorum enim nos vita propter amicitiae solatia² delectabat, unde fieri potest ut eorum mors nullam nobis ingerat molestitudinem? Quam qui prohibet, prohibeat, si potest, amica colloquia, interdicit amicalem vel interdicit affectum³, omnium humanarum necessitudinum vincula mentis immiti stupore dirumpat; aut sic eis utendum censeat, ut nulla ex eis animum dulcedo perfundat. Quod si fieri nullo modo potest, etiam hoc quo pacto futurum est, ut ejus nobis amara mors non sit? cuius dulcis est vita? Hinc est enim et luctus, quoddam non inhumani cordis⁴ quasi vulnus, aut ulcus, cui sanando adhibentur officiosae consolationes. Non enim propterea non est quod sanctur, quoniam quanto est animus melior, tanto in eo citius faciliusque sanatur. Cum igitur etiam de charissimorum mortibus, maxime quorum sunt humanae societati officia necessaria, nunc mitius, nunc asperius affligatur vita mortalium; mortuos tamen eos, quos diligimus, quam vel a fide, vel a bonis moribus lapsos, hoc est, in ipsa anima mortuos audire seu videre mallems: qua ingenti materia malorum plena est terra; propter quod scriptum est, *Numquid non tentatio (a) est vita humana super terram (Job vii, 1)*? Et propter quod ipse Dominus ait, *Vae mundo ab scandalis (Matth. xviii, 7)*: et iterum, *Quoniam abundavit, inquit, iniquitas, refrigerescet charitas multorum (Id. xxiv, 12)*. Ex quo fit, ut bonis amicis mortuis gratulemur, et cum mors eorum nos contristet, ipsa nos certius consoletur: quoniam malis caruerunt, quibus in hac vita etiam boni homines vel conteruntur, vel depravantur, vel in utroque periclitantur.

CAPUT IX. — *De amicitia sanctorum Angelorum, quae homini in hoc mundo non potest esse manifesta, propter fallaciam daemonum, in quos inciderunt qui multos sibi deos colendos putarunt.*

In societate vero sanctorum Angelorum, quam philosophi illi, qui nobis deos amicos esse voluerunt, quarto constituerunt loco, velut ad mundum venientes ab orbe terrarum, ut sic quodammodo complecterentur et caelum; nullo modo quidem metuemus, ne tales amici vel morte nos sua, vel depravatione contristent. Sed quia nobis non ea qua homines fa-

¹ Hic plerique manuscripti omittunt, et in pluribus locis
² Vind. Am. Er., *amicitiae specialis solatia*. Lov, *amicitiae socialis solatia*. At manuscripti nec habent, *specialis*, nec, *socialis*.

³ In editis, *interdicat amicalem societatem, vel interdicit affectum*. Absent, *societatem*, a manuscriptis; et verbum, *amicalem*, refertur ad *affectum*, tanquam adjectivum ad substantivum.

⁴ ita plerique et melioris notae manuscripti. Editi vero, *luctus quidam in humano corde*.

(a) In vulgata, *militia*.

militaritate miscetur (quod etiam ipsum ad arumnas hujus pertinet vitae) et aliquando satanas, sicut legimus transfiguratur se velut angelum¹ lucis (II Cor. xi, 14), ad tentandos eos quos ita vel erudiri opus est, vel decipi justum est; magna Dei misericordia necessaria est, ne quisquam, cum bonos Angelos amicos se habere putat, habeat malos daemones amicos fictos, eosque tanto nocentiores, quanto astutiores ac fallaciores patiatur inimicos. Et cui magna ista Dei misericordia necessaria est, nisi magnae humanae miseriae, quae ignorantia tanta premitur, ut facile istorum simulatione fallatur? Et illos quidem philosophos in impia civitate, qui deos sibi amicos esse dixerunt, in daemones malignos incidisse certissimum est, quibus tota ipsa civitas subditur, aeternum cum eis habitura supplicium. Ex eorum quippe sacris, vel potius sacrilegiis, quibus eos colendos, et ex ludis, inmundissimis, ubi eorum crimina celebrantur, quibus eos placandos putaverunt, eisdem ipsis auctoribus et exactoribus talium tantorumque dedecorum, satis ab eis qui colantur apertum est.

CAPUT X. — *Quis fructus sanctis de superata hujus vitae tentatione paratus sit².*

Sed neque sancti et fideles unius veri Dei summique cultores, ab eorum fallaciis et multiformi tentatione securi sunt. In hoc enim loco infirmitatis et diebus malignis etiam ista sollicitudo non est inutilis, ut illa securitas, ubi pax plenissima atque certissima est, desiderio ferventiore quaeratur. Ibi enim erunt naturae munera, hoc est, quae naturae nostrae ab omnium naturarum Creatore donantur, non solum bona, verum etiam sempiterna; non solum in animo, qui sanatur³ per sapientiam, verum etiam in corpore, quod resurrectione renovabitur. Ibi virtutes, non contra ulla vitia vel mala quaecumque certantes, sed habentes victoriae praemium aeternam pacem, quam nullus adversarius inquietet (a). Ipsa est enim beatitudo finalis, ipse perfectionis finis, qui consumentem non habet finem. Hic autem dicimur quidem beati, quando pacem habemus, quantumcumque hic haberi potest in vita bona: sed haec beatitudo illi, quam finalem dicimus, beatitudini comparata, prorsus miseria reperitur. Hanc ergo pacem, qualis hic potest esse, mortales homines in rebus mortalibus quando habemus, si recte vivimus, bonis ejus recte utitur virtus: quando vero eam non habemus, etiam malis, quae homo patitur, bene utitur virtus. Sed tunc est vera virtus, quando et omnia bona quibus bene utitur, et quidquid in bono eum honorum et malorum facit, et se ipsam ad eum finem refert, ubi nobis talis et tanta pax erit, qua melior et major esse non possit.

¹ Editi, *in angelum*. At Mss., *velut angelum*: et sic praesens Augustinus.

² Mss., *paratur*.

³ In editis, *sanabitur*. At in manuscriptis, *sanatur*.

(a) Conf. lib. 14 de Trinit., n. 12.

CAPUT IX. — *De beatitudine pacis æternæ, in qua sanctis finis est, id est vera perfectio.*

Quapropter possumus dicere, fines¹ bonorum nostrorum esse pacem, sicut æternam esse diximus vitam: præsertim quia ipsi civitati Dei, de qua nobis est ista operosissima disputatio, in sancto dicitur Psalmo, *Lauda, Jerusalem, Dominum; collauda Deum tuum, Sion. Quoniam confirmavit seras portarum tuarum, benedixit filios tuos in te, qui posuit fines tuos pacem (Psal. cXLVII, 12-14)*. Quando enim confirmatæ fuerint seræ portarum ejus, jam in illam nullus intrabit, nec ab illa ullus exibat. Ac per hoc fines ejus eam debemus hic intelligere pacem, quam volumus demonstrare finalem. Nam et ipsius civitatis mysticum nomen, id est Jerusalem, quod et ante jam diximus, Visio pacis interpretatur. Sed quoniam pacis nomen etiam in his rebus mortalibus frequenter, ubi utique non est vita æterna; propterea finem civitatis hujus, ubi erit summum bonum ejus, æternam vitam maluimus commemorare quam pacem. De quo sine Apostolus ait, *Nunc vero liberati a peccato, servi autem facti Deo, habetis fructum vestrum in sanctificationem, finem vero vitam æternam (Rom. vi, 22)*. Sed rursus quia vita æterna ab his qui familiaritatem non habent cum Scripturis sanctis, potest accipi etiam malorum vita; vel secundum quosdam etiam philosophos, propter animæ immortalitatem; vel etiam secundum fidem nostram, propter poenas interminabiles impiorum, qui utique in æternum cruciari non poterunt, nisi etiam vixerint in æternum: profecto finis civitatis hujus, in quo summum habebit bonum, vel pax in vita æterna, vel vita æterna in pace dicendus est, ut facilis ab omnibus possit intelligi. Tantum enim pacis bonum, ut etiam in rebus terrenis atque mortalibus nihil gratius soleat audiri, nihil desiderabilius concupisci, nihil postremo possit melius inveniri. De quo si aliquanto diutius loqui voluerimus, non erimus, quantum arbitror, onerosi legentibus, et propter finem civitatis hujus, de qua nobis sermo est, et propter ipsam dulcedinem pacis quæ omnibus chara est.

CAPUT XII. — *Quod etiam bellantium sævitia omnesque hominum inquietudines ad pacis finem cupiant pervenire, sine cujus appetitu nulla natura sit.*

1. Quod enim mecum quisquis res humanas naturamque communem utcumque intuetur agnoscit, sicut nemo est qui gaudere nolit, ita nemo est qui pacem habere nolit². Quandoquidem et ipsi qui bella volunt, nihil aliud quam vincere volunt: ad gloriosam ergo pacem bellando cupiunt pervenire. Nam quid est aliud victoria, nisi subjectio repugnantium? quod cum factum fuerit, pax erit. Pacis igitur intentione geruntur et bella, ab his etiam qui virtutem bellicam student exercere imperando atque pugnando. Unde pacem constat belli esse optabilem finem. Omnis

¹ Er. et Lov., *finem*. Cæteri libri, *fines*.

² Er. Lugd. Ven. sic legunt hunc locum: *Quod mecum quisquis res humanas naturamque communem utcumque intuetur, agnoscit. Sicut enim nemo est qui gaudere nolit, ita nemo est qui pacem habere nolit.* M.

enim homo etiam belligerando pacem requirit: nemo autem bellum pacificando. Nam et illi qui pacem, in qua sunt, perturbari volunt, non pacem oderunt, sed eam pro arbitrio suo cupiunt commutari. Non ergo ut sit pax nolunt, sed ut ea sit quam volunt. Denique etsi per seditionem se ab aliis separaverint, cum eis ipsis conspiratis vel conjuratis suis nisi qualemcumque pacis speciem teneant, non efficiunt quod intendunt. Proinde latrones ipsi, ut vehementius et tutius infesti sint paci cæterorum, pacem volunt habere sociorum. Sed etsi unus sit tam præpollens viribus, et conscius³ ita cavens, ut nulli socio se committat, solusque insidians et prævalens, quibus potuerit oppressis et extinctis prædas agat, cum eis certe quos occidere non potest, et quos vult latere quod facit, qualemcumque umbram pacis tenet. In domo autem sua cum uxore et cum filiis, et si quos alios illic habet, studet profecto esse pacatus: eis quippe ad nutum obtemperantibus sine dubio delectatur. Nam si non fiat, indignatur, corripit, vindicat: et domus suæ pacem, si ita necesse sit, etiam sæviendo componit; quam sentit esse non posse, nisi cuidam principio, quod ipse in domo sua est, cætera in eadem domestica societate subjecta sint. Ideoque si offerretur ei servitus plurium, vel civitatis vel gentis, ita ut sic ei servirent, quemadmodum sibi domi suæ serviri volebat; non se jam latronem latebris conderet, sed regem conspicuum sublimaret, cum eadem in illo cupiditas et malitia permaneret. Pacem itaque cum suis omnes habere cupiunt, quos ad suum arbitrium volunt vivere. Nam et cum quibus bellum gerunt, suos facere, si possint, volunt, eisque subjectis leges suæ pacis imponere.

2. Sed faciamus aliquem, qualem cauit poetica et fabulosa narratio; quem fortasse, propter ipsam insociabilem feritatem, semihominem quam hominem dicere maluerunt (a). Quamvis ergo hujus regnum diræ speluncæ fuerit solitudo, tamque⁴ malitia singularis, ut ex hac ei nomen inventum sit; nam malus græce κακός dicitur, quod ille vocabatur: nulla conjux ei blandum ferret referretque sermonem, nullis filiis vel alladeret parvulis, vel grandiusculis imperaret, nullo amici colloquio frueretur, nec Vulcani patris, quo vel hinc tantum non parum felicior fuit, quia tale monstrum ipse non genuit: nihil cuiquam daret, sed a quo posset quidquid vellet, et quando posset, et quantum vellet⁵ auferret: tamen in ipsa sua spelunca solitaria, cujus, ut describitur, semper recenti cæde tepebat humus (Virgil. *Æneid. lib. 8, vers. 195, 196*), nihil aliud quam pacem volebat, in qua nemo illi molestus esset, nec ejus quietem vis ullius terrorve turbaret. Cum corpore suo denique pacem habere cupiebat: et quantum habe-

¹ sola editio Lov., *consciens*. — Sic codd. 228 et 2080. M

² Plures mss., *tanquam*.

³ Nonnulli mss., *quæ vellet*; omisso, et. Alii, *quem*; vel, *quam*, vel *cum vellet*: paucis exceptis, qui cum editis habent, et *quantum vellet*.

(a) Significatur hic Cacus, de quo Virgil. *Æneid. lib. 8, v. 188-275*.

bat, tantum illi bene erat. Quandoquidem membris obtemperantibus imperabat; et ut suam mortalitatem adversum se ex indigentia rebellantem, ac seditionem famis ad dissociandam atque excludendam de corpore animam concitantem, quanta posset festinatione pacaret, rapiebat, necabat, vorabat; et quamvis immanis ac ferus, paci tamen suæ vitæ ac salutis immaniter et ferociter consulebat: ac per hoc si pacem, quam in sua spelunca atque in se ipso habere satis agebat¹, cum aliis etiam habere vellet, nec malus, nec monstrum, nec semihomo vocaretur. Aut si ejus corporis forma, et atrorum ignium vomitus ab eo deterrebat hominum societatem; forte non nocendi cupiditate, sed vivendi necessitate sæviebat. Verum iste non fuerit, vel, quod magis credendum est, talis non fuerit, qualis vanitate poetica describitur: nisi enim nimis accusaretur Cacus, parum Hercules laudaretur. Talis ergo homo, sive semihomo, melius, ut dixi, creditur non fuisse, sicut multa fragmenta poetarum. Ipsæ enim sævissimæ feræ, unde ille partem habuit feritatis (nam et semiferus dictus est) (*Virgil., Æneid. lib. 8, v. 267*), genus proprium quadam pace custodiunt, coeundo, gignendo, pariendo, fetus fovendo atque nutriendo, cum sint pleræque insociabiles et solivagæ: non scilicet ut oves, cervi, columbæ, sturni, apes; sed ut leones, vulpes, aquilæ, noctuæ. Quæ enim tigris non filiis suis mitis immurmurat, et pacata feritate blanditur? quis milvus, quantumlibet solitarius rapinis circumvolet, non conjugium copulat, nidum congerit, ova coafovet, pullos alit, et quasi cum sua matrefamilias societatem domesticam quanta potest pace conservat? Quanto magis homo fertur quodammodo naturæ suæ legibus ad ineundam societatem pacemque cum hominibus, quantum in ipso est, omnibus obtinendam: cum etiam mali pro pace suorum belligerent, omnesque, si possint, suos facere velint, ut uni cuncti et cuncta deserviant; quo pacto, nisi in ejus pacem², vel amando, vel timendo consentiant? Sic enim superbia perverse imitari Deum. Odit namque cum sociis æqualitatem sub illo: sed imponere vult sociis dominationem suam pro illo. Odit ergo justam pacem Dei et amat iniquam pacem suam: non amare tamen qualemcumque pacem nullo modo potest. Nullum quippe vitium ita contra naturam est, ut naturæ delectat etiam extrema vestigia.

3. Itaque pacem iniquorum in pacis comparatione justorum ille videt, nec pacem esse dicendam, qui novit præponere recta pravis et ordinata perversis. Quod autem perversum est, hoc etiam necesse est ut in aliqua et ex aliqua et cum aliqua rerum parte pacatum sit, in quibus est, vel ex quibus constat; alioquin nihil esset omnino. Velut si quisquam capite deorsum pendeat, perversus est utique situs corporis et ordo membrorum; quia id quod desuper esse natura postulat, subter est, et quod illa subter vult esse, desuper factum est; conturbavit³ carnis pacem ista

¹ sic manuscripti. Editi vero, *satagebatur*.

² Editi, *visi ut in ejus pacem*. Abest, *ut*, a manuscriptis.

³ sic Mss. Editi vero, *conturbavit*.

perversitas, et ideo est molesta: verumtamen anima corpori suo pacata est, et pro ejus salute satagit, et ideo est qui dolcat; quæ si molestiis ejus exclusa discesserit, quandiu membrorum manet compago, non est sine quadam partium pace quod remanet, et ideo adhuc est qui pendeat. Et quod terrenum corpus in terram nititur, et vinculo quo suspensum est renititur, in suæ pacis ordinem tendit, et locum quo requiescat quodammodo ponderis voce puscit, jamque examine ac sine ullo sensu, a pace tamen naturali sui ordinis non recedit, vel cum tenet eam, vel cum fertur ad eam. Si enim adhibeantur medicamenta, atque curatio, quæ formam cadaveris dissolvi dilabique non sinat⁴, adhuc pax quædam partes partibus jungit, totamque molem applicat terreno et convenienti, ac per hoc loco pacato. Si autem nulla adhibeatur cura condiendi⁵, sed naturali cursui relinquatur, tamdiu quasi tumultuatur dissidentibus exaltationibus et nostro inconvenientibus sensui: id enim est quod in putore sentitur, donec mundi conveniat clementis, et in eorum pacem particulatim paulatimque discedat. Nullo modo tamen inde aliquid legibus summi illius Creatoris Ordinatorisque subtrahitur, a quo pax universalis administratur: quia etsi de cadavere majoris animantis animalia minuta nascantur, eadem lege Creatoris quæque corpuscula in salutis pace suis animalibus⁶ serviunt: etsi mortuorum carnes ab aliis animalibus devorentur, easdem leges per cuncta diffusas ad salutem generis cujusque mortalium, congrua congruis pacificantes, quaquaversum trahantur, et rebus quibuscumque jungantur, et in res quaslibet convertantur et commutentur, inveniunt.

CAPUT XIII. — *De pace universali, quæ inter quantumlibet perturbationes privari non potest lege naturæ, dum sub justo judice ad id quisque pervenit ordinatione, quod meruit voluntate.*

1. Pax itaque corporis, est ordinata temperata partium. Pax animæ irrationalis, ordinata requies appetitionum. Pax animæ rationalis, ordinata cognitionis actionisque consensus. Pax corporis et animæ, ordinata vita et salus animantis. Pax hominis mortalis et Dei⁷, ordinata in fide sub æterna lege obedientia. Pax hominum, ordinata concordia. Pax domus, ordinata imperandi atque obediendi concordia cohabitantium. Pax civitatis, ordinata imperandi atque obediendi concordia civium. Pax cœlestis civitatis, ordinatissima et concordissima societas fruendi Deo et invicem in Deo. Pax omnium rerum, tranquillitas ordinis. Ordo est parium dispariumque rerum sua cuique loca tribuens dispositio. Proinde miseri, quia, in quantum miseri sunt, utique in pace non sunt, tranquillitate quidem ordinis carent, ubi perturbatio nulla est: verumtamen quia merito justæque miseri sunt, in ea quoque ipsa sua miseria præter ordinem

⁴ Sola editio Lov., *sinant*.

⁵ Nostri codices, *condendi*. M.

⁶ Vind. et Am., *suis animalibus*. Nonnulli Mss., *sui animalis*.

⁷ Editi, *et Dei immortalis*. Abest, *immortalis*, a manuscriptis.

esse non possunt; non quidem conjuncti beatissimis, sed ab eis tamen ordinis lege se juncti. Qui cum sine perturbatione sunt¹, rebus in quibus sunt, quantacumque congruentia coaptantur: ac per hoc est in eis ordinis nonnulla tranquillitas: inest ergo nonnulla pax. Verum ideo miseri sunt, quia, etsi in aliqua securitate non dolent, non tamen ibi sunt, ubi securi esse ac dolere non debeant: miseriore autem, si pax eis cum ipsa lege non est, qua naturalis ordo administratur. Cum autem dolent, ex qua parte dolent, pacis perturbatio facta est: in illa vero adhuc pax est, in qua nec dolor urit, nec compago ipsa dissolvitur. Sicut ergo est quaedam vita sine dolore, dolor autem sine aliqua vita esse non potest: sic est pax quaedam sine ullo bello, bellum vero esse sine aliqua pace non potest; non secundum id quod bellum est, sed secundum id quod ab eis vel in eis geritur, quæ aliquæ naturæ sunt: quod nullo modo essent, si non quælibetque pace subsisterent.

2. Quapropter natura est, in qua nullum malum est, vel etiam in qua nullum potest esse malum: esse autem natura, in qua nullum bonum sit, non potest. Proinde nec ipsius diaboli natura, in quantum natura est, malum est: sed perversitas eam malam facit. Itaque in veritate non stetit (*Joan. viii, 44*), sed veritatis iudicium non evasit: in² ordinis tranquillitate non mansit, nec ideo tamen a potestate Ordinatoris effugit. Bonum Dei, quod illi est in natura, non eum subtrahit justitiæ Dei, qua ordinatur in pœna: nec ibi Deus bonum insequitur quod creavit, sed malum quod ille commisit. Neque enim totum aufert quod naturæ dedit; sed aliquid admittit, aliquid relinquit, ut sit qui doleat quod admittit³. Et ipse dolor testimonium est boni adepti et boni relictii. Nisi enim bonum relictum esset, bonum amissum dolere non posset. Nam qui peccat, pejor est, si lætatur in damno æquitatis. Qui vero cruciatur, si nihil inde acquirit boni, dolet damnum salutis. Et quoniam æquitas ac salus utrumque bonum est, bonique amissione dolendum est potius quam lætandum (si tamen non sit compensatio melioris, melior est animi æquitas, quam corporis sanitas), profecto convenientius injustus dolet in supplicio, quam lætatur est in delicto. Sicut ergo lætitia deserti boni in peccato testis est voluntatis malæ; ita dolor amissi boni in supplicio testis est naturæ bonæ. Qui enim dolet amissam naturæ suæ pacem, ex aliquibus reliquiis pacis id dolet, quibus fit, ut sibi amica natura sit. Hoc autem in extremo supplicio recte fit, ut iniqui et impii naturalium bonorum damna in cruciatibus defleant, sentientes eorum ablatorem justissimum Deum, quem contempserunt benignissimum largitorem. Deus ergo naturarum omnium sapientissimus conditor et justissimus ordinatur, qui terrenorum ornamentorum maximum instituit mortale genus humanum, dedit hominibus quædam bona huic vitæ congrua, id est, pacem temporalem pro modulo

mortalis vitæ in ipsa salute et incoluntate ac societate sui generis, et quæque huic paci vel tuendæ vel recuperandæ necessaria sunt, sicut ea quæ apte ac convenienter adjacent sensibus, lux, mox⁴, auræ spirabiles, aquæ potabiles, et quidquid ad alendum, legendum, curandum ornandumque corpus congruit: eo pacto æquissimo, ut qui mortalis talibus bonis paci mortalium accommodatis recte usus fuerit, accipiat ampliora atque meliora, ipsam scilicet immortalitatis pacem, eique convenientem gloriam et honorem in vita æterna ad fruendum Deo, et proximo in Deo: qui autem perperam, nec illa accipiat, et hæc amittat.

CAPUT XIV. — *De ordine ac lege, sive cœlesti, sive terrena, per quam societati humanæ etiam dominando consulitur, cui et consulendo servitur.*

Omnis igitur usus rerum temporalium refertur ad fructum terrænæ pacis in civitate terrena: in cœlesti autem civitate refertur ad fructum pacis æternæ. Quapropter si irrationalia essemus animantia, nihil appeteremus præter ordinatam temperaturam partium corporis et requiem appetitionum: nihil ergo præter quietem carnis et copiam voluptatum, ut⁵ pax corporis prodesset paci animæ. Si enim de-let pax corporis, impeditur etiam irrationalis pax animæ; quia requiem appetitionum consequi non potest. Utrumque autem simul ei paci prodest, quam inter se habent anima et corpus, id est, ordinatæ vitæ ac salutis. Sicut enim pacem corporis amare se ostendunt animantia, cum fugiunt dolorem; et pacem animæ, cum propter explendas indigentias appetitionum voluptatem sequuntur: ita mortem fugiendo satis indicant quantum diligant pacem, qua sibi conciliantur anima et corpus. Sed quia homini rationalis anima inest, totum hoc quod habet commune cum bestiis, subdit paci animæ rationalis, ut mente aliquid contempletur, et secundum hoc aliquid agat, ut sit ei ordinata cognitionis actionisque consensus, quam pacem rationalis animæ dixeramus. Ad hoc enim velle debet nec dolore molestari, nec desiderio perturbari, nec morte dissolvi, ut aliquid utile cognoscat, et secundum eam cognitionem vitam moresque componat. Sed ne ipso studio cognitionis propter humanæ mentis infirmitatem in pestem alicujus erroris incurrat, opus habet magisterio divino, cui certus obtemperet, et adjuvatio, ut liber obtemperet. Et quoniam, quamdiu est in isto mortali corpore, peregrinatur a Domino; ambulat per fidem, non per speciem (*II Cor. v, 6 et 7*): ac per hoc omnem pacem vel corporis, vel animæ, vel simul corporis et animæ, refert ad illam pacem, quæ homini mortali est cum immortali Deo; ut ei sit ordinata in fide sub æterna lege obedientia. Jam vero quia duo præcipua præcepta; hoc est, dilectionem Dei et dilectionem proximi, docet magister Deus; in quibus tria invenit homo quæ diligat, Deum, se ipsum, et proximum;

¹ Sic Mss. Editi vero, non s. ni.

² Editi, quia in. At mss. non habent, quia.

³ Er. et Mss., ademit.

⁴ Sic ex auctoritate Mss. legendum iudicat Morel, Element. Critic., pag. 153. In B., lux ista visibilis, auræ, etc. M.

⁵ Sola editio Lov. et.

atque ille in se diligendo non errat qui diligit Deum : consequens est , ut etiam proximo ad diligendum Deum consulat , quem iubetur sicut se ipsum diligere. Sic uxori , sic filiis , sic domesticis , sic cæteris quibus potuerit hominibus ; et ad hoc sibi a proximo , si forte indiget , consuli velit : ac per hoc erit pacatus , quantum in ipso est , omni homini , pace hominum , id est ordinata concordia : cujus hic ordo est , primum ut nulli noceat , deinde ut etiam prosit cui potuerit. Primitus ergo inest ei suorum cura : ad eos quippe habet opportuniorem facilioremque aditum consulendi , vel naturæ ordine , vel ipsius societatis humanæ. Unde Apostolus dicit : *Quisquis autem suis , et maxima domesticis non providet , fidem denegat , et est infideli deterior* (1 Tim. v, 8). Hinc itaque etiam pax domestica oritur , id est , ordinata imperandi obediendique concordia cohabitantium. Imperant enim qui consulunt : sicut vir uxori , parentes filiis , domini servis. Obediunt autem quibus consulitur : sicut mulieres maritis , filii parentibus , servi dominis. Sed in domo justii viventis ex fide , et adhuc ab illa cœlesti civitate peregrinantis , etiam qui imperant , serviunt eis , quibus videntur imperare. Neque enim dominandi cupiditate imperant , sed officio consulendi ; nec principandi superbia , sed providendi misericordia.

CAPUT XV. — *De libertate naturali , et de servitate , cujus prima causa peccatum est , qua homo malæ voluntatis etiamsi non est mancipium alterius hominis , servus est propriæ libidinis.*

Hoc naturalis ordo præscribit ; ita Deus hominem condidit. Nam , *Dominetur* , inquit , *piscium maris , et volatilium cæli , et omnium reptantium quæ repunt super terram* (Gen. 1, 26). Rationalem factum ad imaginem suam noluit nisi irrationalibus dominari : non hominem homini , sed hominem pecori. Inde primi justii , pastores pecorum magis quam reges hominum constituti sunt : ut etiam sic insinuaret Deus , quid postulet ordo creaturarum , quid exigit meritum peccatorum. Conditi quippe servitutis jure intelligitur imposita peccatori. Proinde nusquam Scripturarum legimus servum , antequam hoc vocabulo Noe justus peccatum filii vindicaret (Id. ix, 25). Nomen itaque istud culpa meruit , non natura. Origo autem vocabuli servorum in latina lingua inde creditur ducta , quod hi qui jure belli possent occidi , a victoribus cum servabantur , servi fiebant , a servando appellati ; quod etiam ipsum sine peccati merito non est. Nam et cum justum geritur bellum , pro peccato et a contrario dimicatur¹ : et omnis victoria , cum etiam malis provenit , divino judicio victos humiliat , vel emendans peccata , vel puniens. Testis est homo Dei Daniel , cum in captivitate positus , peccata sua et peccata populi sui confitetur Deo , et hanc esse causam illius captivitatis pio dolore testatur (Dan. ix, 5-10). Prima ergo servitutis causa peccatum est ; ut homo homini

¹ Vind. Am. et aliquot Mss., *pro peccato e contrario dimicatur*. Fr. et alii quidam Mss., *pro peccato contrario dimicatur*. — Nostri codices , *pro peccato e contrario dimicatur*. M.

conditionis vinculo subderetur : quod non fit nisi Deo judicante , apud quem non est iniquitas , et novit diversas pœnas meritis distribuere delinquentium. Sicut autem superius Dominus dicit , *Omnis qui facit peccatum , servus est peccati* (Joan. viii, 34) : ac per hoc multi quidem religiosi dominis iniquis , non tamen liberis serviunt : *A quo enim quis devictus est , huic et servus addictus est* (II Petr. ii, 19). Et utique felicias servitur homini , quam libidini ; cum sævissimo dominatu vastet corda mortalium , ut alias omitam , libido ipsa dominandi. Hominibus autem illo pacis ordine , quo aliis alii subjecti sunt , sicut prodest humilitas servientibus , ita nocet superbia dominantibus. Nullus autem natura , in qua prius Deus hominem condidit , servus est hominis , aut peccati. Verum et pœnalis servitus ea lege ordinatur , quæ naturalem ordinem conservari jubet , perturbari vetat : quia si contra eam legem non esset factum , nihil esset pœnali servitute coercendum. Ideoque Apostolus etiam servos monet subditos esse dominis suis , et ex animo eis cum bona voluntate servire (Ephes. vi, 5) : ut scilicet , si non possunt a dominis liberi fieri , suam servitutem ipsi quodammodo liberam faciant ; non timore subdolo , sed fideli dilectione serviendo , donec transeat iniquitas , et evacuetur omnis principatus , et potestas humana , et sit Deus omnia in omnibus.

CAPUT XVI. — *De æquo jure dominandi*

Quocirca etiamsi habuerunt servos justii patres nostri , sic quidem administrabant¹ domesticam pacem , ut secundum hæc temporalia bona , filiorum sortem a servorum conditione distinguerent ; ad Deum autem colendum , in quo æterna bona speranda sunt , omnibus domus suæ membris pari dilectione consulerent. Quod naturalis ordo ita præscribit , ut nomen patrumfamilias hinc exortum sit , et tam late vulgatum , ut inique etiam dominantes hoc se gaudeant appellari. Qui autem veri patresfamilias sunt , omnibus in familia sua tanquam filiis ad colendum et promerendum Deum consulunt ; desiderantes atque optantes venire ad cœlestem domum , ubi necessarium non sit officium imperandi mortalibus , quia necessarium non erit officium consulendi jam in illa immortalitate felicibus : quo donec veniatur , magis debent patres quod dominantur , quam servi tolerare quod serviunt. Si quis autem in domo per inobedientiam domesticæ paci adversatur , corripitur , seu verbo , seu verbera , seu quolibet alio genere pœnæ justo atque licito , quantum societas humana concedit , pro ejus qui corripitur utilitate , ut paci unde dissiluerat coaptetur. Sicut enim non est beneficentiæ , adjuvando efficere ut bonum quod majus est amittatur ; ita non est innocentie , parcendo sinere ut in malum gravius incidatur. Pertinet ergo ad innocentis officium , non solum nemini malum inferre , verum etiam cohibere a peccato , vel punire peccatum ; ut aut ipse qui plectitur , corrigatur experimento , aut alii terreantur exemplo. Quia igitur hominis domus initium sive particula debet esse

¹ Mss., *sic administrabant* , omisso , *quidem*.

vitatis, omne autem initium ad aliquam sui generis nem, et omnia pars ad universi, cuius pars est, ingritatem refertur : satis apparet esse consequens, ad pacem civicam pax domestica referatur, id est, ordinata imperantii obediendique concordia colitantium referatur ad ordinatam imperandi obediendique concordiam civium. Ita fit, ut ex lege civitatis præcepta sumere patrefamilias oporteat, quibus domum suam sic regat, ut sit paci accommodata¹ civitatis.

CAPUT XVII. — *Unde cœlestis societas cum terrena civitate pacem habeat, et unde discordiam.*

Sed domus hominum qui non vivant ex fide, pacem terrenam ex hujus temporalis vitæ rebus commodisque sectatur. Domus autem hominum ex fide viventium, exspectat ea quæ in futurum æterna promissa sunt, terrenisque rebus ac temporalibus tanquam peregrina utitur, non quibus capiatur et avertatur quo tendit in Deum, sed quibus sustentetur ad facilius toleranda minimeque augenda onera corporis corruptibilis, quod aggravat animam (*Sap. ix, 15*). Idcirco rerum vitæ huic mortali necessariorum utrisque hominibus² et utrique domui communis est usus; sed finis utendi cuique suus proprius, multaque diversus. Ita etiam terrena civitas, quæ non vivit ex fide, terrenam pacem appetit; in eoque defigit imperandi obediendique concordiam civium, ut sit eis de rebus ad mortalem vitam pertinentibus humanarum quædam compositio voluntatum. Civitas autem cœlestis, vel potius pars ejus, quæ in hac mortalitate peregrinatur, et vivit ex fide, etiam ista pace necesse est utatur, donec ipsa cui talis pax necessaria est, mortalitas transeat. Ac per hoc dum apud terrenam civitatem, velut captivam vitam suæ peregrinationis agit, jam promissione redemptionis et dono spirituali tanquam pignore accepto, legibus terrenæ civitatis, quibus hæc administrantur, quæ sustentandæ mortali vitæ accommodata sunt, obtemperare non dubitat: ut, quoniam communis est ipsa mortalitas, servetur in rebus ad eam pertinentibus inter civitatem utramque concordia. Verum quia terrena civitas habuit quosdam suos sapientes, quos divina improbat disciplina, qui vel suspicati vel decepti a dæmonibus crederent multos deos conciliandos esse rebus humanis, ad quorum diversa quodammodo officia diversa subdita pertinerent, ad alium corpus, ad alium animus³, inque ipso corpore ad alium caput, ad alium cervix, et cætera singula ad singulos; similiter in animo ad alium ingenium, ad alium doctrinam, ad alium ira, ad alium concupiscentia; inque ipsis rebus vitæ adjacentibus, ad alium pecus, ad alium triticum, ad alium vinum, ad alium oleum, ad alium silvæ, ad alium nummi, ad

¹ Merique Mas., *accommodata*.

² Editi addunt, *fidelibus et infidelibus*. Sed his prætermissis nemo non facile intelligit, *utrisque hominibus*, dictum esse pro et iis qui ex fide, et iis qui non ex fide vivunt.

³ Editi, *ad alium animum*: et infra constanter accusandi casu, *cervicem, doctrinam, iram, concupiscentiam, silvas, nummos, navigationem*, etc. Castigantur ad Regium manuscriptum.

alium navigatio, ad alium bella atque victoriæ, ad alium conjugia, ad alium partus ac fecunditas, et ad alios alia cætera; cœlestis autem civitas unum Deum solum colendum nosset, eique tantummodo servendum servitute illa, quæ græce *λατρεία* dicitur, et non nisi Deo debetur, fideli pietate censeret (a): factum est, ut religionis leges cum terrena civitate non posset habere communes, proque his ab ea dissentire haberet necesse, atque oneri esse diversa sentientibus, eorumque iras et odia et persecutionum impetus sustinere, nisi cum animos adversantium aliquando terrore suæ multitudinis, et semper divino adjutorio propulsaret. Hæc ergo cœlestis civitas dum peregrinatur in terra, ex omnibus gentibus cives evocat, atque in omnibus linguis peregrinam colligit societatem; non curans quidquid in moribus, legibus, institutisque diversum est, quibus pax terrena vel conquiritur, vel tenetur; nihil eorum rescindens, nec destruens, imo etiam servans ac sequens: quod licet diversum in diversis nationibus, ad unum tamen eumdemque finem terrenæ pacis intenditur, si religionem qua unus summus et verus Deus colendus docetur, non impedit. Utitur ergo etiam cœlestis civitas in hac sua peregrinatione pace terrena, et de rebus ad mortalem hominum naturam pertinentibus, humanarum voluntatum compositionem, quantum salva pietate ac religione conceditur, tuetur atque appetit, eamque terrenam pacem refert ad cœlestem pacem: quæ vere ita pax est, ut rationalis duntaxat creaturæ sola pax habenda atque dicenda sit, ordinatissima scilicet et concordissima societas fruendi Deo, et invicem in Deo; quo cum ventum fuerit, non erit vita mortalis, sed plane⁴ certeque vitalis; nec corpus animale, quod dum corrumpitur, aggravat animam, sed spirituale sine ulla indigentia, ex omni parte subditum voluntati. Hanc pacem, dum peregrinatur in fide, habet; atque ex hac fide juste vivit, cum ad illam pacem adipiscendam refert quidquid bonarum actionum gerit erga Deum et proximum, quoniam vita civitatis utique socialis est.

CAPUT XVIII. — *Quam diversa sit Academicæ novæ ambiguitas a constantia fidei christianæ.*

Quod autem attinet ad illam differentiam, quam de Academicis novis Varro adhibuit, quibus incerta sunt omnia, omnino civitas Dei talem dubitationem tanquam dementiam detestatur, habens de rebus, quas mente atque ratione comprehendit, etiamsi parvam propter corpus corruptibile, quod aggravat animam, quoniam sicut dicit Apostolus, *Ex parte scimus* (I Cor. xiii, 9), tamen certissimam scientiam: creditque sensibus in rei cujusque evidentia, quibus per corpus animus utitur: quoniam miserabilis fallitur, qui nunquam putat eis esse credendum. Credit etiam Scripturis sanctis et veteribus et novis, quas Canonicas appellamus, unde fides ipsa concepta est, ex qua justus vivit (*Habacuc ii, 4*); per quam sine dubitatione ambulamus, quamdiu peregrinamur a Domino (II Cor. v,

⁴ Lov., *sed plene*.

(a) Supra, lib. 3, cap. 13, et lib. 6, cap. 1.

6) : qua salva atque certa, de quibusdam rebus, quas neque sensu, neque ratione percepimus¹, neque nobis per Scripturam canonicam claruerunt, nec per testes quibus non credere absurdum est, in nostram notitiam pervenerunt, sine justa reprehensione dubitamus (a).

CAPUT XIX. — *De habitu et moribus populi christiani.*

Nihil sane ad istam pertinet civitatem quo habitu vel more vivendi, si non est contra divina praecepta, istam fidem, qua pervenitur ad Deum, quisque sectetur : unde ipsos quoque philosophos, quando Christiani fiunt, non habitum vel consuetudinem victus, quae nihil impedit religionem, sed falsa dogmata mutare compellit. Unde illam quam Varro adhibuit ex Cynicis differentiam, si nihil turpiter atque intemperanter agat², omnino non curat. Ex tribus vero illis vitae generibus, otioso, actuoso, et ex utroque composito, quamvis salva fide quisque possit in quolibet eorum vitam ducere, et ad sempiterna praemia pervenire; interest tamen quid amore teneat veritatis, quid officio charitatis impendat. Nec sic quisque debet esse otiosus, ut in eodem otio utilitatem non cogitet proximi; nec sic actuosus, ut contemplationem non requirat Dei. In otio non iners vacatio delectare debet; sed aut inquisitio, aut inventio veritatis: ut in ea quisque proficiat, et quod invenerit teneat, et alteri non invidet³. In actione vero non amandus est honor in hac vita, sive potentia; quoniam omnia vana sub sole: sed opus ipsum, quod per eundem honorem vel potentiam fit, si recte atque utiliter fit, id est, ut valeat ad eam salutem subditorum, quae secundum Deum est; unde jam superius disputavimus (Cap. 6). Propter quod ait Apostolus, *Qui episcopatum desiderat, bonum opus desiderat* (1 Tim. iii, 1). Exponere voluit quid sit episcopatus; quia nomen est operis, non honoris (b). Graecum est enim, atque inde ductum vocabulum, quod ille qui praeficitur, eis quibus praeficitur superintendit, curam eorum scilicet gerens: ἐπι quippe, Super; σκοπός vero, Intentio est: ergo ἐπισκοπῆν, si velimus, latine Superintendere possumus dicere (c); ut intelligat non se esse episcopum, qui praesse dilexerit, non prodesse. Itaque a studio cognoscendae veritatis nemo prohibetur, quod ad laudabile pertinet otium: locus vero superior, sine quo regi populus non potest, etsi illa teneatur atque administraretur ut decet, tamen indecenter appetitur (d). Quamobrem otium sanctum quaerit charitas veritatis: negotium justum suscipit necessitas charitatis. Quam

¹ quidam Mss. *percepimus*. M.

² sola editio Lov., *agant*.

³ plures Mss., *et quod invenerit, ne alteri invidet*.

(a) Conf. cum hoc capite Tertullianum, in lib. de Anima, cap. 17. COQUAUS.

(b) Citatur in Aquisgranensi concilio anni 816, lib. 1, cap. 9.

(c) Hieronymus quoque, in Epistola 8, ad Evagrium, ita vertit, *episcopantes*, « superintendentes. » COQUAUS.

(d) Lex 5 Codicis, de Episcopis et Clericis: « Tantum ab ambitu debet esse sepositus Antistes, ut quaeratur cogendus, rogatus recedat, invitatus effugiat; sola illi suffragetur necessitas excusandi. » Et post: « Profecto indignus est sacerdotio, nisi fuerit ordinatus invitatus. » COQUAUS.

sarcinam si nullas imponit, percipiendae atque inveniendae vacandum est veritati: si autem imponitur, suscipienda est propter charitatis necessitatem (a): sed nec sic omni modo veritatis delectatio deserenda est, ne subtrahatur illa suavitas, et opprimat ista necessitas.

CAPUT XX. — *Quod cives sanctorum in vita hujus tempore spe beati sint.*

Quamobrem summum bonum civitatis Dei cum sit aeterna pax atque perfecta, non per quam mortales transeant nascendo atque moriendo, sed in qua immortales maneat nihil adversi omnino patiendi; quis est qui illam vitam vel beatissimam neget, vel in ejus comparatione istam, quae hic agitur, quantilibet animi et corporis externarumque rerum bonis plena sit, non miserrimam judicet? Quam tamen quicumque sic habet, ut ejus usum referat ad illius finem, quam diligit ardentissime, ac fidelissime sperat, non absurde dici etiam nunc beatus potest, spe illa potius, quam re ista. Res vero ista sine spe illa, beatitudo falsa et magna miseria est: non enim veris animi bonis utitur. Quoniam non est vera sapientia, quae intentionem suam in his quae prudenter discernit, gerit fortiter, cohibet temperanter, justeque distribuit, non in illum dirigit finem, ubi erit Deus omnia in omnibus (1 Cor. xv, 28), aeternitate certa et pace perfecta.

CAPUT XXI. — *An secundum definitiones Scipionis, quae in dialogo Ciceronis sunt, unquam fuerit Romana respublica.*

1. Quapropter nunc est locus, ut quam potero breviter ac dilucide expediam, quod in secundo hujus operis libro me demonstraturum esse promisi (Cap. 21, n. 4), secundum definitiones, quibus apud Ciceronem utitur Scipio in libris de Republica, nunquam rempublicam fuisse Romanam. Breviter enim rempublicam definit esse rem populi. Quae definitio, si vera est, nunquam fuit Romana respublica: quia nunquam fuit res populi; quam definitionem voluit esse rempublicae. Populum enim esse definit coetum multitudinis, juris consensu et utilitatis communione sociatum. Quid autem dicat juris consensum, disputando explicat; per hoc ostendens geri sine justitia non posse rempublicam: ubi ergo justitia vera non est, nec jus potest esse. Quod enim jure fit, profecto juste fit: quod autem fit injuste, nec jure fieri potest. Non enim jura dicenda sunt vel putanda iniqua hominum constituta: cum illud etiam ipsi jus esse dicant, quod de justitiae fonte manaverit; falsumque esse, quod a quibusdam non recte sentientibus dici solet, id esse jus, quod ei qui plus potest, utile est (b). Quocirca ubi non est vera justitia, juris consensu sociatus coetus hominum non potest esse; et ideo nec populus, juxta illam Scipionis vel Ciceronis definitionem: et si non populus, nec res populi; sed

(a) Conf. ej. ist. 48, n. 2.

(b) Sic justum definit Thrasymachus apud Platonem, in primo libro de Republica. Quam delationem Socrates refutat.

qualiscumque multitudinis, quæ populi nomine digna non est. Ac per hoc, si respublica res populi est, et populus non est qui consensu non sociatus est juris, non est autem jus, ubi nulla justitia est: procul dubio colligitur, ubi justitia non est, non esse rempublicam. Justitia porro ea virtus est, quæ sua cuique distribuit. Quæ igitur justitiæ est hominis, quæ ipsum hominem Deo vero tollit, et immundis dæmonibus subdit? Hoccine est sua cuique distribuere? An qui fundum aufert ei a quo emptus est, et tradit ei qui nihil in eo habet juris, injustus est; et qui se ipsum aufert dominanti Deo, a quo factus est, et malignis servit spiritibus, justus est?

2. Disputatur certe acerrime atque fortissime in eisdem ipsis de Republica libris adversus injustitiam pro justitiâ. Et quoniam, cum prius ageretur pro injustitiæ partibus contra justitiam, et diceretur nisi per injustitiam rempublicam stare augerique non posse; hoc veluti validissimum positum erat, injustum esse, ut homines hominibus dominantibus serviant; quam tamen injustitiam nisi sequatur imperiosa civitas, cujus est magna respublica, non eam posse provinciis imperare: responsum est a partē justitiæ, ideo justum esse, quod talibus hominibus sit utilis servitus, et pro utilitate eorum fieri cum recte sit, id est, cum improbis aufertur injuriarum licentia; et domiti se melius habebunt, quia indomiti deterius se habuerunt: subditumque est, ut ista ratio firmaretur, veluti a natura sumptum nobile exemplum, atque dictum est, *Cur igitur Deus homini, animus imperat corpori, ratio libidini cæterisque vitiosis animi partibus?* Plane hoc exemplo satis edoctum est, quibusdam esse utilem servitutem; et Deo quidem ut serviat, utile esse omnibus. Serviens autem Deo animus, recte imperat corpori, inque ipso animo ratio Domino Deo subdita, recte imperat libidini vitiosisque cæteris. Quapropter ubi homo Deo non servit, quid in eo putandum est esse justitiæ; quandoquidem Deo non serviens, nullo modo potest juste animus corpori, aut humana ratio vitiosis imperare? Et si in homine tali non est ulla justitia, procul dubio nec in hominum cætu, qui ex hominibus talibus constat. Non est hic ergo juris ille consensus, qui hominum multitudinem populum facit, cujus res dicitur esse respublica. Nam de utilitate quid dicam, cujus etiam communione sociatus cætus hominum, sicut se habet ista definitio, populus nuncupatur? Quamvis enim, si diligenter attendas, nec utilitas sit ulla viventium, qui vivunt impie; sicut vivit omnis qui non servit Deo, servitque dæmonibus, tanto magis impiis, quanto magis sibi, cum sint immundissimi spiritus, tanquam diis sacrificari volunt: tamen quod de juris consensu diximus, satis esse arbitror, unde appareat per hanc definitionem non esse populum, cujus respublica esse dicatur, in quo justitia non est. Si enim dicunt non spiritibus immundis, sed diis bonis atque sanctis in sua republica servisse Romanos; numquid eadem toties repetenda sunt, quæ jam satis, imo ultra quam satis est, diximus? Quis

enim ad hunc locum per superiores hujus operis libros pervenit, qui dubitare adhuc possit, malis et impuris dæmonibus servisse Romanos, nisi vel nimium stolidus, vel impudentissime contentiosus? Sed ut taceam quales sint, quos sacrificiis colebant; in lege veri Dei scriptum est, *Sacrificans diis eradicabitur, nisi Domino tantum* (Exod. xxii, 20). Nec bonis igitur, nec malis diis sacrificari voluit, qui hoc cum tanta comminatione præcepit.

CAPUT XXII. — *An verus sit Deus, cui Christiani serviunt, cui soli debeat sacrificari.*

Sed responderi potest: Quis iste Deus est, aut unde dignus probatur, cui deberent obtemperare Romani, ut nullum deorum præter ipsum colerent sacrificiis? Magnæ cæcitatæ est, adhuc quærere quis iste sit Deus. Ipse est Deus, cujus Prophete prædixerunt ista quæ cernimus. Ipse est Deus, a quo responsum accepit Abraham, *In semine tuo benedicentur omnes gentes* (Gen. xxii, 18). Quod in Christo fieri, qui secundum carnem de illo semine exortus est, iidem ipsi qui remanserunt hujus nominis inimici, velint nolint, cognoscant. Ipse est Deus, cujus divinus Spiritus per eos locutus est, quorum prædicta atque completa per Ecclesiam, quam videmus toto orbe diffusam, in libris superioribus posui. Ipse est Deus, quem Varro doctissimus Romanorum Jovem putat, quamvis nesciens quid loquatur (a): quod tamen ideo commemorandum putavi, quoniam vir tantæ scientiæ nec nullum istam deum potuit existimare, nec vilem. Hunc enim eum esse credidit, quem summum putavit Deum. Postremo ipse est Deus, quem doctissimus philosophorum, quamvis Christianorum acerrimus inimicus, etiam per eorum oracula, quos deos putat, Deum magnum Porphyrius constituitur.

CAPUT XXIII. — *Quæ Porphyrius dicat oraculis deorum responsa esse de Christo.*

1. Nam in libris quos *ἡ ἀληθὴν φιλοσοφία*¹ appellat, in quibus exsequitur atque conscribit rerum ad philosophiam pertinentium velut divina responsa (b), ut ipsa verba ejus, quemadmodum ex lingua græca in latinam interpretata sunt, ponam: *Interroganti, inquit, quem deum placando revocare possit uxorem suam a Christianismo, hæc ait versibus Apollo.* Deinde verba velut Apollinis ista sunt: *Forte magis poteris in aqua impressis litteris scribere, aut adinflans² pen-*

¹ In mss. plerisque est, *eglogion philosophias*; pro quo perperam fuerat in excusis emendatum *theologion philosophias*.

² Sic mss. Eilii, *inflans*.

(a) Conf. lib. 1 de Cons. Evang., n. 30.

(b) Citant hos libros passim Theodoretus ac Eusebius hocce titulo, *de Philosophia ex oraculis*, uti recte in Eusebio libro 4 Præparationis evangelicæ, cap. 6, non autem sicuti in ejusdem libro 3 de Demonstratione evangelicæ, cap. 6, et aliquoties apud Theodoretum quale redditur, *de Philosophia selectorum*. Inscriptionis causam et operis argumentum aperit cum Augustinus hic perspicue, tum luculentissime Eusebius, loco libri Præparationis evangelicæ nunc laudato.

¹ sola editio Lov., *riliis cæteris*.

nas leves per aera ut avis volare, quam polluta¹ revo-
ces impiæ uxoris senium. Pergat² quomodo vult inani-
bus fallacis perseverans, et lamentationibus fallaci-
simis mortuum Deum cantans³, quem a iudicibus recta
sentientibus perditum, pessima in speciosis ferro vincita
mors interfecit. Deinde post hos versus Apollinis, qui
non stante metro latine interpretati sunt, subjunxit at-
que ait: In his quidem tergiversationem⁴ irremediabilis
sententiæ eorum manifestavit, dicens quoniam Judæi susci-
piunt Deum magis quam isti. Ecce ubi decolorans Chri-
stum, Judæos præposuit Christianis, constens quod Ju-
dæi suscipiant Deum. Sic enim exposuit versus Apolli-
nis, ubi a iudicibus recta sentientibus Christum dicit oc-
cisum, tanquam illis iuste iudicantibus, merito sit ille
punitus. Viderit quid de Christo vates mendax Apol-
linis (a) dixerit, atque iste crediderit, aut fortasse va-
tem, quod non dixit, dixisse iste ipse confluerit: quæ
vero sibi constet, vel ipsa oracula inter se faci-
at convenire, postea videbimus. Hic tamen Judæos,
tanquam Dei susceptores, recte dicit iudicasse de
Christo, quod eum morte pessima excruciandum esse
censuerint. Deus itaque Judæorum, cui perhibet testi-
monium, audiendus fuit, dicens: Sacrificans diis
eradicabitur, nisi Domino tantum (Exod. xxii, 20).
Sed ad manifestiora veniamus, et audiamus quam
magnum Deum dicat esse Judæorum. Item ad ea quæ
i. interrogavit Apollinem, quid melius, verbum sive
ratio, an lex; respondit, inquit, versibus hæc dicens.
Ac deinde subjicit Apollinis versus, in quibus et isti
sunt, ut quantum satis est inde decerpam: In Deum
vero, inquit, generatorem, et in regem ante om-
nia⁵ (b), quem tremet et cælum, et terra, atque mare,
et infernorum abdita, et ipsa numina perhorrescunt:
quorum lex est Pater, quem valde sancti honorant He-
bræi (c). Tali oraculo dei sui Apollinis, Porphyrius
tam magnum Deum dixit Hebræorum, ut eum et ipsa
numina perhorrescant. Cum ergo Deus iste dixerit,
Sacrificans diis eradicabitur, miror quod ipse Porphy-
rius non perhorruerit, et sacrificans diis eradicari
non formidaverit.

2. Dicit etiam bona philosophus iste de Christo,
quasi oblitus illius, de qua paulo ante locuti sumus,
contumeliæ suæ; aut quasi in somnis dii ejus male-

¹ sic habent manuscripti. Editi vero, quam semel polluta.

² Corbeiensis, Peragat.

³ Regius vetus codex, perseverans lamentari mortuum Deum et cantans. Cæteri fere Mss., perseverans et lamentari fallacis mortuum Deum cantans: excepto altero e Corbeiensibus, qui habet sic, Pergat quomodo vult inani-
bus fallacis mortuum Deum. Cantans quem a iudicibus, etc.

⁴ Veteres libri carent verbo tergiversationem; et plures habent, irremediabilem sententiam; alii, irremediabili sententiæ, vel, irremediabile sententiæ.

⁵ Sola editio Lov.: In Deum vero, inquit, regem generatorem et regem ante omnia.

(a) Scilicet Pythia.

(b) Versus ille a:ud Lactantium, lib. de Ira Dei, cap. 23, sic habet græce:

Ὁ δὲ Θεὸς βασιλεὺς καὶ γεννητὴρ πρὸ πάντων.

(c) His affine est aliud oraculum, cuius meminit Justinus in sermone exhortatorio ad Gentes. Sciscitante enim quodam, qui unquam viri religiosi fuissent, ita responsum ab oraculo:

Μεῖνοι Χαλδαῖοι σοφίην λόγον ἢ δ' ἔδρατοι,

Ἀγαθὴν τὸν ἀνακτα σθεάζομενοι Θεὸν ἀγνοῖς.

id est: Soli Chaldaei sapientiam sortiti sunt atque Hebræi, ex se ipso ortum regem sancte colentes, Deum. COQU. x. 1.

dixerint Christo, et evigilantes eum bonum esse cognoverint, digneque laudaverint. Denique tanquam mirabile aliquid atque incredibile prolaturus, Præter opinionem, inquit, profecto quibusdam videatur esse quod dicturi sumus. Christum enim dii piissimum pronuntiaverunt et immortalem factum, et cum bona prædicatione ejus meminerunt: Christianos vero pollutos, inquit, et contaminatos, et errore implicatos esse dicunt; et multis talibus adversus eos blasphemis utuntur. Deinde subjicit velut deorum oracula blasphemantium Christianos. Et post hæc, De Christo autem, inquit, interrogantibus si est Deus, ait Hecate: Quoniam quidem immortalis anima post corpus ut incedit, nosti, a sapientia autem abscissa semper errat, tiri pietate præstantissimi est illa anima, hanc colunt aliama se veritate. Deinde post verba hujus quasi oraculi sua ipse contexens, Piissimum igitur virum, inquit, eum dixit, et ejus animam, sicut et aliorum piorum, post obitum immortalitate donatam¹, et hanc colere Christianos ignorantes². Interrogantibus autem, inquit, Cur ergo damnatus est? oraculo respondit dea, Corpus quidem debilitantibus tormentis semper oppositum est: anima autem piorum cælesti sedi insidet. Illa vero anima aliis animabus fataliter dedit, quibus fata non annuerunt deorum obtinere dona, neque habere Jovis immortalis agnitionem, errore implicari. Propterea ergo diis exosi: quia quibus fato non fuit nosse Deum, nec dona a diis accipere, his fataliter dedit iste errore implicari. Ipse vero pius, et in cælum, sicut pii, concessit. Itaque hunc quidem non blasphemabis, misereberis autem hominum dementiam: ex eo in eis facile præceptusque periculum (a).

3. Quis ita stultus est, ut non intelligat aut ab homine callido, eoque Christianis inimicissimo hæc oracula fuisse conflicta, aut consilio simili ab impuris dæmonibus ista fuisse responsa; ut scilicet, quoniam laudant Christum, propterea credantur veraciter vituperare Christianos; atque ita, si possint, intercludant viam salutis æternæ, in qua sit quisque christianus? Suxæ quippe nocendi astutiæ milleformi sentiunt non esse contrarium³, si credatur eis laudantibus Christum, dum tamen credatur etiam vituperantibus Christianos; ut eum qui utrumque crediderit, talem Christi faciant laudatorem, ne velit esse christianus: ac sic quamvis ab illo laudatus, ab istorum tamen dæmonum dominatu eum non liberet Christus. Præsertim quia ita laudant Christum, ut quisquis in eum talem crediderit, qualis ab eis prædicatur, Christianus verus non sit, sed Photinianus hæreticus, qui tantummodo hominem, non etiam Deum noverit Christum (b): et ideo per eum salvus esse non possit, nec istorum mendaciloquorum dæmonum laqueos vitare vel solvere. Nos autem nequæ

¹ veteres libri, immortalitate dignatam. Apud Eusebium, lib. 3, de Demonst. Evang., cap. 6, græce est, ἀφ' thanatisthênai.

² sic Mss. Editi autem, errantes.

³ sola editio Lov., Suxæ quippe nocendi iustitiæ milleformi non credunt esse contrarium.

(a) Hæc eadem Græce apud Eusebium, lib. 3 de Demonst. Evang., cap. 6.

(b) Conf. lib. de Hæres., lxx. 44, 45.

Apollinem vituperantem Christum, neque Hecaten possimus approbare laudantem. Ille quippe tanquam iniquum Christum vult credi, quem a iudicibus recta sententibus dicit occisum; ista, hominem piissimum, sed hominem tantum. Una est tamen et illius et huius intentio, ut nolint homines esse Christianos; quia nisi Christiani erunt, ab eorum erui potestate non poterunt. Isle vero philosophus, vel potius qui talibus adversus Christianos quasi oraculis credunt, prius faciant, si possunt, ut inter se de ipso Christo Hecate atque Apollo concordent, eumque aut ambo condemnent, aut ambo collaudent. Quod si facere potuissent, nihilominus nos et vituperatores et laudatores Christi fallaces dæmones vitaremus. Cum verò eorum deus et dea inter se de Christo, ille vituperando, ista laudando dissentiant; profecto eis blasphemantibus Christianos non credunt homines, si recte ipsi sentiant.

4. Sane Christum laudans, vel Porphyrius, vel Hecate, cum dicat eum ipsum dedisse fataliter Christianis, ut implicarentur errore, causas tamen ejusdem, sicut putat, pandit erroris. Quas antequam ex verbis ejus exponam, prius quæro, Si fataliter dedit Christus Christianis erroris implicationem, utrum volens, an nolens dederit. Si volens, quomodo justus? si nolens, quomodo beatus? Sed jam causas ipsius audiamus erroris. *Sunt, inquit, spiritus terreni minimi loco quodam¹ malorum dæmonum potestati subiecti. Ab his sapientes Hebræorum, quorum unus iste etiam Jesus fuit, sicut audisti divina Apollinis², quæ superius dicta sunt; ab his ergo Hebræi dæmonibus pessimis et minoribus spiritibus vetabant religiosos, et ipsis tacere prohibebant: venerari autem magis cælestes deos, amplius autem venerari Deum Patrem. Hoc autem, inquit, et dii præcipiunt, et in superioribus ostendimus, quemadmodum animum advertere ad Deum monent, et illum colere ubique imperant. Verum indocti et impiæ naturæ, quibus vere fatum non concessit a diis dona obtinere, neque habere Jovis immortalis notionem, non audientes et deos et divinos viros, deos quidem omnes recusaverunt, prohibitos autem dæmones et hos non odisse, sed revereri. Deum autem simulantes colere³, ea sola per quæ Deus adoratur, non agunt. Nam Deus quidem, utpote omnium Pater, nullius indiget: sed nobis est bene, cum eum per justitiam et castitatem aliasque virtutes adoramus, ipsam vitam precem ad ipsum facientes, per imitationem et inquisitionem de ipso. Inquisitio enim purgat, inquit: imitatio deificat affectionem ad ipsum operando. Bene quidem prædicavit Deum Patrem, et quibus sit colendus moribus dixit. Quibus præceptis prophetici Libri pleni sunt Hebræorum, quando sanctorum vita sive vituperatur⁴, sive*

¹ Editi, loco terreno quodam. Abest, terreno, a manuscriptis.

² Hic in cælis additur, oracula; quod abest a manuscriptis.

³ Sic omnes Mss. Editi vero, prohibitos autem dæmones non solum nullis odiis insequi, sed etiam revereri delegerunt. Deum autem simulantes se colere.

⁴ Plures Mss., sive imperatur. Hanc lectionem probat Ludovicus Vives, alteram improbat; nam « Prophetæ, » inquit, « sanctorum vitam non vituperant, » Loquitur Au-

laudatur. Sed in Christianis tantum errat, aut tantum calumniatur, quantum volunt dæmones, quos opinatur deos, quasi cuiquam difficile sit recolere, quæ turpia, quæ dedecora erga deorum obsequium in theatris agebantur et templis; et attendere quæ legantur, dicantur, audiantur in ecclesiis, vel Deo vero quid offeratur; et hinc intelligere ubi ædificium, et ubi ruina sit morum. Quis autem huic dixit vel inspiravit, nisi diabolicus spiritus, tum vanum apertumque mendacium, quod dæmones ab Hebræis coli prohibitos reverentur potius, quam oderint Christiani? Sed Deus ille quem coluerunt sapientes Hebræorum, etiam cælestibus sanctis Angelis et Virtutibus Dei, quos beatissimos tanquam cives in hac nostra peregrinatione mortali veneramus et amamus, sacrificari vetat, intonans in lege sua, quam dedit populo suo Hebræo, et valde minaciter dicens, *Sacrificans diis eradicabitur*. Et ne quisquam putaret dæmonibus pessimis terrenisque spiritibus, quos iste dicit minimos vel minores, ne sacrificetur esse præceptum; quia et ipsi in Scripturis sanctis dicti sunt dii, non Hebræorum, sed gentium; quod evidenter in Psalmo Septuaginta interpretes posuerunt, dicentes, *Quoniam omnes dii gentium dæmonia* (Psalm. xcvi, 5): ne quis ergo putaret istis quidem dæmonibus prohibito, cælestibus autem vel omnibus, vel aliquibus sacrificari esse permissum, mox addidit, *nisi Domino soli*, id est, nisi Domino tantum: ne forte in eo quod aliter, nisi Domino soli, Dominum solem credat esse quispian, cui sacrificandum potest: quod non ita esse intelligendum, in Scripturis græcis facillime reperitur.

5. Deus igitur Hebræorum, cui tam magnum tantus etiam iste philosophus perhibet testimonium, legem dedit Hebræo populo suo, hebræo sermone conscriptam, non obscuram et incognitam, sed omnibus jam gentibus diffamatam, in qua lege scriptum est, *Sacrificans diis eradicabitur, nisi Domino tantum*. Quid opus est in hac ejus lege, ejusque Prophetis de hac re multa perquirere? Imò non perquirere, non enim abstrusa vel rara sunt; sed aperta et crebra colligere, et in hac disputatione mea ponere: quibus luce clarius apparet⁵, nulli omnino nisi tantum sibi Deum verum et summum voluisse sacrificari. Ecce hoc unum breviter, imò granditer, minaciter, sed veraciter dictum ab illo Deo, quem tam excellenter⁶ eorum doctissimi prædicant, audiat, timeatur, impleatur, ne inobedientes eradicatio consequatur. *Sacrificans, inquit, diis eradicabitur, nisi Domino tantum*: non quo rei egeat alicujus, sed quia nobis expedit ut res ejus simus. Hinc⁶ enim canitur in sa-

Augustinus de sanctorum vita in terris, quæ non omnino vacavit culpa: et indicare videtur præceptorum duo genera, de vitando malo, quod in eorum etiam qui verum Deum colebant, moribus vituperatur; et de faciendi bono, quod in eisdem laudatur.

⁵ Lov., putat. Editi autem alii et manuscripti, putat. Addit Augustinus facillime reperiri in scripturis græcis quomodo locus ille sit intelligendus, quia in eis non ambigue dictum est, Exod. xxii, 30, *Kuriò monò*.

⁶ Fr. et Lov., appareat. Editi vero alii et Mss., apparat.

⁷ Plures Mss., excellentem.

⁸ Vind. Am. et Mss., Huic.

cris Litteris Hebræorum : *Dixi Domino, Deus meus es tu, quoniam bonorum meorum non egēs* (*Psal. xv, 2*). Hujus autem præclarissimum atque optimum sacrificium nos ipsi sumus, hoc est ¹ civitas ejus, cujus rei mysterium celebramus oblationibus nostris, quæ fidelibus notæ sunt, sicut in libris præcedentibus disputavimus (*Lib. 10, cap. 6, et alibi*). Cessaturas enim victimas, quas in umbra futuri offerebant Judæi, et unum sacrificium gentes a solis ortu usque ad occasum, sicut jam fieri cernimus oblaturas, per Prophetas Hebræos oracula increpuere divina : ex quibus quantum satis visum est, nonnulla protulimus, et huic jam operi aspersimus. Quapropter ubi non est ista justitia, ut secundum suam gratiam civitati obedienti Deus imperet unus et summus, ne cuiquam sacrificet, nisi tantum sibi; et per hoc in omnibus hominibus ad eandem civitatem pertinentibus atque obedientibus Deo, animus etiam corpori, atque ratio vitii, ordine legitimo fideliter imperet; ut quemadmodum justus unus, ita cætus populusque justorum vivat ex fide, quæ operatur per dilectionem, qua homo diligit Deum, sicut diligendus est Deus, et proximum sicut semetipsum : ubi ergo non est ista justitia, profecto non est cætus hominum juris consensu et utilitatis communione sociatus. Quod si non est, utique populus non est, si vera est hæc populi definitio. Ergo nec respublica est : quia res populi non est, ubi ipse populus non est.

CAPUT XXIV. — *Qua definitione constet populi et respublicæ nuncupationem recte sibi non solum Romanos, sed etiam regna alia vindicare.*

Si autem populus non isto, sed alio definiatur modo, velut si dicatur, Populus est cætus multitudinis rationalis, rerum quas diligit concordia communione sociatus : profecto ut videatur qualis quisque populus sit, illa sunt intuenda quæ diligit. Quæcumque tamen diligit, si cætus est multitudinis, non pecorum, sed rationalium creaturarum, et eorum quæ diligit concordia communione sociatus est, non absurde populus nuncupatur; tanto utique melior, quanto in melioribus; tantoque deterior, quanto est in deterioribus concors. Secundum istam definitionem nostram Romanus populus, populus est; et res ejus sine dubitatione respublica. Quid autem primis temporibus suis, quidve sequentibus populus ille dilexerit, et quibus moribus ad cruentissimas seditiones, atque inde ad socialia atque civilia bella perveniens, ipsam concordiam, quæ salus quodammodo est populi, ruperit atque corruperit, testatur historia : de qua in præcedentibus libris multa posuimus. Nec ideo tamen vel ipsum non esse populum, vel ejus rem dixerim non esse rempublicam, quamdiu manet qualiscumque rationalis multitudinis cætus, rerum quas diligit concordia communione sociatus. Quod autem de isto populo et de ista republica dixi, hoc de Atheniensium vel quorumcumque Græcorum, hoc de Ægyptiorum, hoc de illa priore Babylone Assyriorum, quando in

¹ *vind. Am. et Fr., hæc est.*

rebus suis publicis imperia vel parva vel magna tenuerunt, et de alia quacumque aliarum gentium intelligar dixisse atque æsensisse. Generaliter quippe civitas impiorum, cui non imperat Deus obedienti sibi, ut sacrificium non offerat, nisi tantummodi sibi, et per hoc in illa et animus corpori, ratioque vitii recte ac fideliter imperet, caret justitiæ veritate.

CAPUT XXV. — *Quod non possint ibi veræ esse virtutes, ubi non est vera religio.*

Quamlibet enim videatur animus corpori, et ratio vitii laudabiliter imperare; si Deo animus et ratio ipsa non servit, sicut sibi serviendum esse ipse Deus præcepit, nullo modo corpori vitiiisque recte imperat. Nam qualis corporis atque vitiorum potest esse mens domini, veri Dei nescia, nec ejus imperio subjugata, sed vitiosissimis dæmonibus corrumpentibus prostituta? Proinde virtutes, quas sibi habere videtur, per quas imperat corpori et vitii ad quodlibet adipiscendum vel tenendum, nisi ad Deum retulerit, etiam ipsæ vitia sunt potius quam virtutes. Nam licet a quibusdam tunc veræ et honestæ putentur esse virtutes, cum ad se ipsas referuntur, nec propter aliud expectantur; etiam tunc inflatæ ac superbæ sunt : et ideo non virtutes, sed vitia ¹ judicanda sunt (*n*). Sicut enim non est a carne, sed super carnem, quod carnem facit vivere : sic non est ab homine, sed super hominem, quod hominem facit beate vivere; nec solum hominem, sed etiam quamlibet Potestatem Virtutemque cœlestem.

CAPUT XXVI. — *De pace populi alienati a Deo, qui utitur ad pietatem populus Dei, dum in hoc peregrinus est mundo.*

Quocirca ut vita carnis anima est, ita beata vita hominis Deus est, de quo dicunt sacræ Litteræ Hebræorum, *Beatus populus, cujus est Dominus Deus ipsius* (*Psal. cxxliii, 15*). Miser igitur populus ab isto alienatus Deo. Diligit tamen ipse etiam quamdam pacem suam non improbandam, quam quidem non habebit in fine, quia non ea bene utitur ante finem. Hanc autem ut interim habeat in hac vita, nostra ² etiam interest : quoniam quamdiu permixtæ sunt ambæ civitates, utimur et nos pace Babylonis : ex qua ita per fidem populus Dei liberatur, ut apud hanc interim peregrinetur. Propter quod et Apostolus admonuit Ecclesiam, ut oraret pro regibus ejus atque sublimibus, addens et dicens, *ut quietam et tranquillam vitam agamus cum omni pietate et charitate* ³ (*1 Tim. ii, 2*). Et propheta Jeremias cum populo Dei veteri venturam ⁴ prænuuntiaret captivitatem, et divinitus imperaret ut obedierit in Babyloniā irent, Deo suo etiam ista patientia servientes, monuit et ipse ut orare-

¹ sola editio Lov. et ideo non virtutes, virtutes, sed vitia. etc.

² *ms., nostri.*

³ *Regius Ms., et castitate* : juxta vulgatam et juxta græcum, *kai semnoteti*.

⁴ *Abest, venturam, in codicibus nostris. M.*

(*n*) Vide de Trinit. lib. 13, nn. 23, 26, et lib. 14, n. 3

tur pro illa, dicens, *quia in ejus est pace pax vestra* (*Jerem. xxix, 7*), utique interim temporalis, quæ bonis malisque communis est.

CAPUT XXVII. — *De pace servientium Deo, cujus perfecta tranquillitas in hac temporalis vita non potest apprehendi.*

Pax autem nostra propria, et hic est cum Deo per eadem, et in æternum erit cum illo per speciem. Sed hic sive illa communis, sive nostra propria, talis est pax, ut solatium miseriæ sit potius quam beatitudinis gaudium. Ipsa quoque nostra justitia, quamvis vera sit propter veri boni finem¹, ad quem refertur, tamen tanta est in hac vita, ut potius peccatorum remissione constet, quam perfectione virtutum (a). Testis est oratio totius civitatis Dei, quæ peregrinatur in terris. Per omnia quippe membra sua clamat ad Deum, *Dimitte nobis debita nostra, sicut et nos dimittimus debitoribus nostris* (*Matth. vi, 12*). Nec pro eis est efficax hæc oratio, quorum fides sine operibus mortua est (*Jacobi ii, 17, 26*): sed pro eis quorum fides per dilectionem operatur (*Galat. v, 6*). Quia enim Deo quidem subdita, in hac tamen conditione mortali, et corpore corruptibili quod aggravat animam (*Sap. ix, 15*), non perfecte vitii imperat ratio, ideo necessaria est justis talis oratio. Nam profecto quanquam imperetur, nequaquam sine conflictu vitii imperatur. Et utique subrepat aliquid in hoc loco infirmitatis etiam bene configenti, sive hostibus talibus victis subditisque dominantibus, unde, si non facili operatione, certe labili locutione aut volatili cogitatione peccetur. Et ideo quamdiu vitii imperatur, plena pax non est: quia et illa quæ resistunt, periculoso debellantur prælio; et illa quæ victa sunt, nondum securo triumphantur otio, sed adhuc sollicito premuntur imperio. In his ergo tentationibus, de quibus omnibus in divinis eloquiis breviter dictum est, *Numquid non tentatio est vita humana super terram* (*Job vii, 1, sec. LXX*)? quis ita vivere se præsumat, ut dicere Deo, *Dimitte nobis debita nostra*, non necesse habeat, nisi homo elatus? Nec vero magnus, sed inflatus ac tumidus, cui per justitiam resistit qui gratiam largitur humilibus. Propter quod scriptum est: *Deus superbis resistit*,

¹ veteres libri, propter verum boni finem.

(a) Non intelligendus est ille locus, quasi justitia nostra constet sola remissione peccatorum. Hic potius, quemadmodum animadvertit et ipse Bellarminus, lib. 2 de Justific., cap. 13, non excludit perfectionem virtutum, sed præponit remissionem peccati; adeo ut sensus sit, justitiam nostram, quæ partim in remissione peccati, partim in perfectione virtutum sita est, magis constare remissione peccati, quam perfectione virtutis: illam enim plenius quam hanc præstare valeamus. Et hoc etiam sensu Hieronymus, lib. 2 contra Pelag., contendit in nobis esse veram justitiam licet non omnino perfectam; perfecta autem est remissio peccatorum. Ex Coquæo.

humilibus autem dat gratiam (*Jacobi iv, 6*; *I Petr. v, 5*). Illic itaque in unoquoque justitia est, ut obedienti Deus homini, animus corpori, ratio autem vitiiis etiam repugnantibus imperet, vel subigendo, vel resistendo; atque ut ab ipso Deo petatur et meritorum gratia, et venia delictorum, ac de acceptis bonis gratiarum actio persolvatur. In illa vero pace finali, quo referenda, et cujus adipiscendæ causa habenda est ista justitia, quoniam sanata immortalitate atque incorruptione natura vitia non habebit, nec unicuique nostrum vel ab alio vel a se ipso quidquam repugnabit, non opus erit ut ratio vitiiis, quæ nulla erunt, imperet: sed imperabit Deus homini, animus corpori; tantaque obediendi ibi erit suavitas et facilitas, quanta vivendi regnandique felicitas. Et hoc illic in omnibus¹ atque in singulis æternum erit, æternumque esse certum erit: et ideo pax beatitudinis hujus, vel beatitudo paciæ hujus, summum bonum erit.

CAPUT XXVIII. — *In quem finem venturus sit exitus impiorum.*

Eorum autem qui non pertinent ad istam civitatem Dei, erit et contrario miseria sempiterna, quæ etiam secunda mors dicitur (*Apoc. ii, 14*; *xx, 6*; *xxi, 8*): quia nec anima ibi vivere dicenda est, quæ a vita Dei alienata erit; nec corpus, quod æternis doloribus subjacebit. Ac per hoc ideo durior ista secunda mors erit, quia finire morte non poterit. Sed quoniam sicut miseria beatitudini, et mors vitæ, ita bellum paci videtur esse contrarium; merito quaeritur, sicut pax in honorum finibus prædicata est atque laudata, quod vel quale bellum in finibus malorum e contrario possit intelligi. Verum qui hoc quaerit, attendat quid in bello noxium perniciosumque sit, et videbit nihil aliud esse, quam inter se rerum adversitatem atque conflictum. Quod igitur bellum gravius et amarius cogitari potest, quam ubi voluntas sic adversa est passioni, et passio voluntati, ut nullius earum victoria tales inimicitias finiantur; et ubi sic configit eam ipsa natura corporis vis doloris, ut neutrum alteri cedat? Hic enim quando contingit iste conflictus, aut dolor vincit, et sensum mors adimit; aut natura vincit², et dolorem sanitas tollit. Ibi autem et dolor permanet, ut affligat; et natura perdurat, ut sentiat: quia utrumque ideo non deficit, ne poena deficiat. Ad hos autem fines bonorum et malorum, illos expetendos, istos cavendos, quoniam per judicium transibunt ad illos boni, ad istos mali; de hoc judicio, quantum Deus donaverit, in consequenti volumine disputabo.

¹ Editti, omnibus hominibus. Abest, hominibus, a manu scriptis.

² Lov., aut natura perdurans vincit. Editti alii et manu scripti carent verbo, perdurans.

LIBER VIGESIMUS.

De judicio novissimo, deque testimoniis cum Novi, tum Veteris Instrumenti, quibus denuntiatur futurum.

CAPUT PRIMUM. — *Quod quamvis omni tempore Deus judicet, in hoc tamen libro de novissimo ejus judicio sit proprie disputandum.*

1. De die ultimi judicii Dei, quod ipse donaverit,

locuturi, eamque asserturi adversus impios et incredulos, tanquam in ædificii fundamento prius ponere testimonia divina debemus. Quibus qui nolunt credere, humanis ratiunculis falsis atque fallacibus con-

travenire conantur, ad hoc ut aut aliud significare contendant quod adhibetur testimonium de Litteris sacris, aut omnino divinitus esse dictum negent. Nam nullum existimo esse mortalium, qui cum ea, sicut di et a sunt, intellexerit, et a summo ac vero Deo per a imas sanctas dicta esse crediderit, non eis cedat atque consentiat : sive id etiam ore fateatur, sive aliquo vitio fateri erubescat, aut metuat ; vel etiam pervicacia simillima insanix, id quod falsum esse novit aut credit, contra id quod verum esse novit aut credit, etiam contentiosissime defendere molitur.

2. Quod ergo in confessione ac professione tenet omnis Ecclesia Dei veri, Christum de cœlo esse venturum ad vivos ac mortuos judicandos, hunc divini iudicii ultimum diem dicimus, id est, novissimum tempus. Nam per quot dies hoc iudicium tendatur, incertum est : sed Scripturarum more sanctarum diem poni solere pro tempore, nemo qui illas litteras quamlibet negligenter legerit, nescit. Ideo autem cum diem iudicii Dei dicimus, addimus ultimum vel novissimum ; quia et nunc iudicat, et ab humani generis initio iudicavit, dimittens de paradiso, et a ligno vitæ separans primos homines peccati magni perpetratores : imo etiam quando angelis peccantibus non pepercit (II Petr. II, 4), quorum princeps homines a se ipso subversus¹ invidendo subvertit, procul dubio iudicavit. Nec sine illius alto iustoque iudicio, et in hoc aërio cœlo, et in terris, et dæmonum et hominum miserrima est vita, erroribus ærumnisque pleniissima. Verum etsi nemo peccasset, non sine bono rectoque iudicio universam rationalem creaturam perseverantissime sibi Domino suo coherentem in æterna beatitudine retineret. Iudicat etiam, non solum universaliter de genere dæmonum atque hominum, ut miseri sint propter primorum meritum peccatorum ; sed etiam de singulorum operibus propriis, quæ gerunt arbitrio voluntatis. Nam et dæmones ne torqueantur, precantur (Math. VIII, 29) : nec utique injuste vel parcitur eis, vel pro sua quique improbitate torqueantur. Et homines plerumque aperte, semper occulte, luunt pro suis factis divinitus pœnas, sive in hac vita, sive post mortem : quamvis nullus hominum agat recte, nisi divino adjuvetur auxilio ; nullus dæmonum aut hominum agat inique, nisi divino eodemque iustissimo iudicio permittatur. Sicut enim ait Apostolus, *Non est iniquitas apud Deum* (Rom. IX, 14) ; et, sicut ipse alibi dicit, *Inscrutabilia sunt iudicia Dei, et investigabiles viæ ejus* (Id. XI, 33). Non igitur in hoc libro de illis primis, nec de istis mediis Dei iudiciis, sed de ipso novissimo iudicio, quantum ipse tribuerit, disputabo, quando Christus de cœlo venturus est vivos iudicaturus et mortuos. Iste quippe dies iudicii proprie jam vocatur, eo quod nullus ibi erit imperitæ querelæ locus, cur injustus ille sit felix, et cur ille justus infelix. Omnium namque tunc nonnisi bonorum vera et plena felicitas, et omnium nonnisi malorum digna et summa infelicitas apparebit.

¹ Vind. Am. et plerique Mss., *subversos* : minus bene.

CAPUT II. — *De varietate rerum humanarum, cui non potest dici deesse iudicium Dei, quamvis nequeat vestigari.*

Nunc autem et mala æquo animo ferre discimus, quæ patiuntur et boni ; et bona non magnipendere, quæ adipiscuntur et mali. Ac per hoc etiam in his rebus, in quibus non apparet divina iustitia, salutaris est divina doctrina. Nescimus enim quo iudicio Dei bonus ille sit pauper, malus ille sit dives : iste gaudet, quem pro suis perditis moribus cruciari debuisse mœroribus arbitramur ; contristetur ille, quem vita laudabilis gaudere debuisse persuadet : exeat de iudicio non solum inultus, verum etiam damnatus innocens, aut iniquitate iudicis pressus, aut falsis obrutus testimoniis ; e contrario scelestus adversarius ejus non solum impunitus, verum etiam vindicatus insultet : impius optime valeat, pius languore tabescat : latrocinentur sanissimi juvenes ; et qui nec verbo quemquam lædere potuerunt, diversa morborum atrocitate affligantur infantes : utilis rebus humanis immatura morte rapiatur ; et qui videntur nec nasci debuisse, diutissime insuper vivant : plenus criminibus sublimetur honoribus, et hominem sine querela tenebræ ignobilitatis abscondant : et cætera hujusmodi, quæ quis colligit, quis enumerat ? Quæ si haberent in ipsa velut absurditate constantiam, ut in hac vita, in qua homo, sicut sacer Psalmus eloquitur, *vanitati similis factus est, et dies ejus velut umbra prætereunt* (Psalm. CXLIII, 4), nonnisi mali adipiscerentur transitoria bona ista atque terrena, nec nisi boni talia paterentur mala, posset hoc referri ad iudicium justum Dei, vel etiam benignum ; ut qui non erant assecuturi bona æterna, quæ faciunt beatos, temporalibus vel deciperentur pro malitia sua, vel pro Dei misericordia consolarentur bonis ; et qui non erant passuri æterna tormenta, temporalibus vel pro suis quibuscumque et quantuliscumque peccatis affligerentur, vel propter implendas virtutes exercerentur malis. Nunc vero quando non solum in malo sunt boni, et in bono mali, quod videtur injustum ; verum etiam plerumque et malis mala eveniunt, et bonis bona proveniunt : magis inscrutabilia sunt iudicia Dei (Rom. XI, 33), et investigabiles viæ illius. Quamvis ergo nesciamus quo iudicio Deus ista vel faciat, vel fieri sinat, apud quem summa virtus est et summa sapientia, summa¹ iustitia, nulla infirmitas, nulla temeritas, nulla iniquitas : salubriter tamen discimus non magnipendere seu bona, seu mala, quæ videmus esse bonis malisque communia ; et illa bona quærere, quæ bonorum, atque illa mala maxime fugere, quæ propria sunt malorum. Cum vero ad illud Dei iudicium venerimus, cuius tempus jam propriæ dies iudicii, et aliquando dies Domini nuncupatur ; non solum quæcumque tunc iudicabuntur, verum etiam quæcumque ab initio iudicata, et quæcumque usque ad illud tempus adhuc iudicanda sunt, apparebunt esse iustissima. Ubi hoc quoque manifestabitur, quam iusto iudicio Dei fiat, ut nunc tam multa ac pene omnia iusta iudicia Dei sensus mentesque mor-

¹ Sic nostri Mss. in B., *summaque*. M.

talium lateant: cum tamen in hac re piorum fidem non lateat, justum esse quod latet.

CAPUT III. — *Quid in libro Ecclesiaste Salomon de his quæ in hac vita et bonis et malis sunt communia, disputarit.*

Nempe Salomon, sapientissimus rex Israel, qui genuit in Jerusalem, librum qui vocatur Ecclesiastes, et a Judæis quoque habetur in sacrarum canone Litterarum, sic exorsus est: *Vanitas vanitatum*¹, *dixit Ecclesiastes; vanitas vanitatum, et omnia vanitas. Quæ homini abundantia in omni labore suo, quo laborat sub sole (Eccle. 1, 2 et 3)?* Et cum ex hac sententia conduceret cætera, commemorans ærumnas erroresque vitæ hujus, et vanescentes interea temporum lapsus, ubi nihil solidum, nihil stabile retinetur; in ea rerum vanitate sub sole, illud etiam deplorat quodammodo, quod cum sit abundantia sapientiæ super insipientiam, sicut abundantia lucis super tenebras, sapientisque oculi sint in capite ipsius, et stultas in tenebris ambulet; unus tamen incursus incurrat omnibus (*Id. 11, 13, 14*), utique in hac vita quæ sub sole agitur: significans videlicet ea mala, quæ bonis et malis videmus esse communia. Dicit etiam illud, quod et boni patiantur mala, tanquam mali sint, et mali tanquam boni sint, adipiscantur bona, Ita loquens: *Est, inquit, vanitas, quæ facta est super terram; quia sunt justi, super quos venit sicut factum impiorum; et sunt impii, super quos venit sicut factum justorum. Dixi quoniam hoc quoque vanitas (Id. viii, 14).* In hac vanitate, cui, quantum satis visum est, intimandæ totum istum librum vir sapientissimus deputavit, non utique ob aliud, nisi ut eam vitam desideremus, quæ vanitatem non habet sub hoc sole, sed veritatem sub illo qui fecit hunc solem: in hac ergo vanitate, numquid nisi justo Dei rectoque judicio similis eidem vanitati factus vanesceret homo? In diebus tamen vanitatis suæ interest plurimum, utrum resistat, an obtemperet veritati, et utrum sit expers veræ pietatis, an particeps: non propter vitæ hujus vel bona acquirenda, vel mala vitanda vanescendo transeuntia; sed propter futurum judicium, per quod erunt et bonis bona, et malis mala, sine fine mansura. Denique iste sapiens hunc librum sic conclusit, ut diceret, *Deum time, et mandata ejus custodi; quia hoc est omnis homo: quia omne hoc opus Deus adducet in judicium in omni despecto, sive bonum, sive malum (Id. xii, 13, 14).* Quid brevius, verius, salubrius dici potuit? *Deum, inquit, time, et mandata ejus custodi; quia hoc est omnis homo.* Quicumque enim est, hoc est, custos utique mandatorum Dei: quoniam qui hoc non est, nihil est. Non enim ad veritatis imaginem reformatur, remanens in similitudine vanitatis. *Quia omne hoc opus, id est, quod ab homine fit in hac vita, sive bonum, sive malum, Deus adducet in judicium, in omni despecto, id est, in omni etiam qui contemptibilis hic videtur, et ideo nec videtur: quoniam Deus et ipsum videt, nec eum*

despicit, nec cum judicat præterit.

CAPUT IV. — *Quod ad disserendum de novissimo judicio Dei, Novi primum Testamenti, ac deinde Veteris testimonia prolaturus sit.*

Hujus itaque ultimi judicii Dei testimonia de Scripturis sanctis quæ ponere institui, prius eligenda sunt de libris Instrumenti Novi, postea de Veteris. Quamvis enim vetera priora sint tempore, nova tamen anteponenda sunt dignitate; quoniam illa vetera præconia sunt novorum. Nova igitur ponentur prius, quæ ut firmius probemus, assumentur et vetera. In veteribus habentur Lex et Prophetæ¹, in novis Evangelium et apostolicæ Litteræ. Ait autem Apostolus, *Per legem enim cognitio peccati. Nunc autem sine lege justitia Dei manifestata est, testificata per Legem et Prophetas: justitia autem Dei, per fidem Jesu Christi in omnes qui credunt*² (*Rom. iii, 20-22*). Hæc justitia Dei ad novum pertinet Testamentum, et testimonium habet a veteribus Libris, hoc est, a Lege et Prophetis. Prius ergo ipsa causa ponenda est, et postea testes introducendi. Hunc et ipse Jesus Christus ordinem servandam esse demonstrans, *Scriba, inquit, eruditus in regno Dei, similis est viro patrifamilias, proferenti de thesauro suo nova et vetera (Math. xiii, 52).* Non dixit, Vetera et nova: quod utique dixisset, nisi maluisset meritorum ordinem servare quam temporum.

CAPUT V. — *Quibus sententiis Domini Salvatoris divinum judicium futurum in fine sæculi declaretur.*

1. Ergo ipse Salvator cum objurgaret civitates, in quibus virtutes magnas fecerat, neque crediderant, et eis alienigenas anteponeret, *Verumtamen, inquit, dico vobis, Tyro et Sidoni remissius erit in die judicii quam vobis.* Et paulo post alteri civitati, *Amen, inquit, dico vobis, quia terræ Sodomorum remissius erit in die judicii quam tibi (Math. xi, 22, 24).* Ille evidentissime prædicat diem judicii esse venturum. Et alio loco, *Viri Ninivitarum, inquit, surgent in judicio cum generatione ista, et condemnabunt eam; quia pœnitentiam egerunt in prædicatione Jonæ, et ecce plus quam Jona hic.* *Regina Austri surget in judicio cum generatione ista, et condemnabit eam; quia venit a finibus terræ audire sapientiam Salomonis, et ecce plus quam Salomon hic (Id. xii, 41, 42).* Duas hoc loco res discimus, et venturum esse judicium, et cum mortuorum resurrectione venturum. De Ninivitis enim et regina Austri quando ista dicebat, de mortuis sine dubio loquebatur, quos tamen in die judicii resurrecturos esse prædixit. Nec ideo dixit, *condemnabunt*, quia ipsi judicabunt: sed quia ex ipsorum comparatione isti merito damnabuntur.

2. Rursus alio loco, cum de hominum honorum et malorum nunc permixtione, postea separatione, quæ utique die judicii futura est, loqueretur, adhibuit similitudinem de tritico seminato et superseminatis zizaniis, eamque suis exponens discipulis: *Qui seminat,*

¹ Editi hic et statim vers. eod., *vanitatum*. At Mss. constanter habent, *vanitatum* Conf. lib. 1 Retract., cap. 7, n. 3.

¹ Sola editio Lov., *prophetiæ*.

² In ante editis, *qui credunt in eum*. Abest, *in eum*, a Mss., et a græco textu Apostoli.

inquit, bonum semen, est Filius hominis: ager autem est mundus¹: bonum vero semen hi sunt filii regni; zizaniam autem filii sunt nequam: inimicus autem qui seminavit ea, est diabolus: messis autem consummatio sæculi est, messores vero Angeli sancti. Sicut ergo colliguntur zizania, et igni comburantur; sic erit in consummatione sæculi. Mittet Filius hominis Angelos suos, et colligent de regno ejus omnia scandala, et eos qui faciunt iniquitatem, et mittent eos in caminum ignis: ibi erit fletus et stridor dentium. Tunc justii fulgebunt sicut sol in regno Patris eorum. Qui habes aures audiendi, audiat (Matth. XIII. 37-43). Hic quidem judicium vel diem iudicii non nominavit, sed multo eum clarius ipsis rebus expressit, et in fine sæculi futurum esse prædixit.

3. Item discipulis suis: Amen, inquit, dico vobis, quod vos qui sæculi estis me, in regeneratione, cum sederit Filius hominis in sede majestatis suæ, sedebitis et vos super sedes duodecim, judicantes duodecim tribus Israel (Id. XIX, 28). Hic discimus cum suis discipulis judicaturum Jerusalem. Unde et alibi Judæis dixit: Si ego in Bethsæbub ejicio dæmonia, filii vestri in quo ejiciunt? Ideo ipsi iudices vestri erunt (Id. XII, 27). Nec quoniam super duodecim sedes sessuros esse ait, duodecim solos homines cum illo judicatos putare debemus. Duodenario quippe numero, universa quædam significata est judicantium multitudo, propter duas partes numeri septenarii, quo significatur plerumque universitas: quæ duæ partes, id est tria et quatuor, altera per alteram multiplicatæ duodecim faciunt. Nam et quatuor ter, et tria quater duodecim sunt: et si qua alia hujus duodenarii numeri, quæ ad hoc valeat, ratio reperitur (a). Alioquin quoniam in locum Judææ traditoris apostolum Matthiam legimus ordinatum (Act. I, 26); apostolus Paulus, qui plus illis omnibus laboravit (I Cor. XV, 10), ubi ad judicandum sedeat non habebit: qui profecto cum aliis sanctis ad numerum iudicum se pertinere demonstrat, cum dicit, *Nescitis quia angelos judicabimus* (Id. VI, 3)? De ipsis quoque judicandis in hoc numero duodenario similis causa est. Non enim quia dictum est, *judicantes duodecim tribus Israel*, tribus Levi, quæ tertia decima est, ab eis judicanda non erit, aut solum illum populum, non etiam cæteras gentes judicabunt. Quod autem ait, *in regeneratione*, procul dubio mortuorum resurrectionem nomine voluit regenerationis intelligi. Sic enim caro nostra regenerabitur per incorruptionem, quemadmodum est anima nostra regenerata per fidem.

4. Multa prætereo, quæ de ultimo iudicio ita dici videntur, ut diligenter considerata reperiantur ambigua, vel magis ad aliud pertinentia; sive scilicet ad eum Salvatoris adventum, quo per totum hoc tempus in Ecclesia sua venit, hoc est, in membris suis, particulatim atque paulatim, quoniam tota corpus est ejus; sive ad excidium terrenæ Jerusalem: quia et de illo cum loquitur, plerumque sic loquitur, tanquam de fine sæculi atque de illo die iudicii novissimo et

magno loquatur; ita ut dignosci non possit omnino, nisi ea quæ apud tres evangelistas, Matthæum, Marcum, et Lucam de hac re similiter dicta sunt, inter se omnia conferantur. Quædam quippe alter obscurius, alter explicat planius; ut ea quæ ad unam rem pertinentia dicuntur, appareat unde dicantur. Quod facere utcumque curavi in quadam epistola, quam rescripsi ad beatæ memoriæ virum Hesygium, Salonitanæ urbis episcopum, cujus epistolæ titulus est, de Fine sæculi (Epist. 199).

5. Proinde jam illud hic dicam, quod in Evangelio secundum Matthæum de separatione bonorum et malorum legitur per iudicium præsentissimum atque novissimum Christi. *Cum autem venerit, inquit, Filius hominis in majestate sua, et omnes Angeli cum eo, tunc sedebit super sedem majestatis suæ, et congregabuntur ante eum omnes gentes, et separabit eos ab invicem, sicut pastor segregat oves ab hædis: et statuet oves quidem a dextris suis, hædos autem a sinistris. Tunc dicet Rex his, qui a dextris ejus erunt, Venite, benedicti Patris mei, possidete paratum vobis regnum a constitutione mundi. Esurivi enim, et dedistis mihi manducare; sitivi, et dedistis mihi bibere; hospes eram, et collegistis me; nudus, et cooperuistis me; infirmus, et visitastis me; in carcere eram, et venistis ad me. Tunc respondebit ei justus, dicens: Domine, quando vidimus te esurientem, et pavimus; sitientem, et dedimus tibi potum? Quando autem te vidimus hospitem, et collegimus te; aut nudum, et cooperuimus te? Aut quando te vidimus infirmum, aut in carcere, et venimus ad te? Et respondens Rex dicet illis, Amen dico vobis, quandiu fecistis uni de his fratribus meis minimis, mihi fecistis. Tunc dicet, inquit, et his qui a sinistris erunt: Discedite a me, maledicti, in ignem æternum, qui paratus est diabolo et angelis ejus. Deinde similiter etiam his enumerat, quod illa non fecerint, quæ dextros fecisse memoravit. Similiterque interrogantibus, quando eum viderint in horum indigentia constitutum: quod minimis suis factum non est, sibi factum non fuisse respondet; sermonemque concludens, *Et hi, inquit, in supplicium æternum ibunt, justi autem in vitam æternam* (Matth. XXV, 31-46). Joannes vero evangelista apertissime narrat eum in resurrectione mortuorum futurum prædixisse iudicium. Cum enim dixisset, *Neque enim Pater judicat quemquam, sed iudicium omne dedit Filio, ut omnes honorificent Filium, sicut honorificant Patrem: qui non honorificat Filium, non honorificat Patrem, qui misit illum: propterea addidit, Amen, amen dico vobis, quia qui verbum meum audit, et credit ei qui me misit, habet vitam æternam; et in iudicium non veniet, sed transit a morte in vitam* (Joan. V, 22-24). Ecce hic dixit fideles suos in iudicium non venire. Quomodo ergo per iudicium separabuntur a malis, et ad ejus dexteram stabunt, nisi quia hoc loco iudicium pro damnatione posuit? In tale quippe iudicium non venient, qui*

¹ Editt, est hic mundus; et infra, hi filii sunt nequam. At manuscripti non habent, hic, neque hi.

(a) Vide Enarr. in Psal. XLIX, n. 9.

¹ Hic plures MSS., non venit, sed transit. At editi, non veniet, sed transit. In aliis postea locis non sibi constat. Confer Tract. 22 in Joannem.

audiunt verbum ejus, et credunt ei qui misit illum.

CAPUT VI. — *Quæ sit prima resurrectio, quæ secunda.*

4. Deinde adjungit, et dicit: Amen, amen dico vobis quia venit hora, et nunc est, quando mortui audient vocem Filii Dei; et qui audierint, vivent. Sicut enim Pater habet vitam in semetipso, sic dedit et Filio habere vitam in semetipso (Joan. v, 25 et 26). Nondum de secunda resurrectione, id est corporum, loquitur, quæ in fine futura est; sed de prima, quæ nunc est. Hanc quippe ut distingueret, ait, Venit hora, et nunc est. Non autem ista corporum, sed animarum est. Habent enim et animæ mortem suam in impietate atque peccatis: secundum quam mortem mortui sunt, de quibus idem Dominus ait, Sine mortuos sepelire mortuos suos (Math. viii, 22); ut scilicet in anima mortui, in corpore mortuos sepelirent. Propter istos ergo impietate et iniquitate in anima mortuos, Venit, inquit, hora, et nunc est, quando mortui audient vocem Filii Dei; et qui audierint, vivent. Qui audierint dixit, qui obedierint, qui crediderint, et usque in finem perseveraverint. Nec fecit hic ullam differentiam bonorum et malorum. Omnibus enim bonum est audire vocem ejus, et vivere, ad vitam pietatis ex impietatis morte transeundo¹. De qua morte ait apostolus Paulus, Ergo omnes mortui sunt, et pro omnibus mortuus est², ut qui vivunt, jam non sibi vivunt, sed ei qui pro ipsis mortuus est, et resurrexit (II Cor. v, 14, 15). Omnes itaque mortui sunt in peccatis, nemine prorsus excepto, sive originalibus, sive etiam voluntate additis, vel ignorando, vel sciendo nec faciendo quod justum est: et pro omnibus mortuis vivus mortuus est unus, id est, nullum habens omnino peccatum: ut qui per remissionem peccatorum vivunt, jam non sibi vivunt, sed ei qui pro omnibus³ mortuus est propter peccata nostra, et resurrexit propter justificationem nostram; ut credentes in eum qui justificat impium, ex impietate justificati, tanquam ex morte vivificati, ad primam resurrectionem, quæ nunc est⁴, pertinere possimus. Ad hanc enim primam non pertinent, nisi qui beati erunt in æternum: ad secundam vero, de qua mox locuturus est, et beatos pertinere docebit, et miseros. Ista est misericordiæ, illa judicii. Propter quod in Psalmo scriptum est: Misericordiam et judicium cantabo tibi, Domine (Psal. c, 4).

2. De quo judicio consequenter adjunxit, atque ait: Et potestatem dedit ei judicium facere, quia Filius hominis est. Hic ostendit, quod in ea carne veniet judicaturus, in qua venerat judicandus. Ad hoc enim ait, quoniam Filius hominis est. Ac deinde subjungens

¹ sic Vind. Am. et Mss. At Lov., et ad vitam pietatis ex impietatis morte transire.

² Editi, mortuus est unus. Abest, unus, a manuscriptis.

³ In pluribus manuscriptis non habetur, pro omnibus.

⁴ Am. et Fr., quæ nunc est animarum. Cæteri libri carent voce, animarum, quæ exponendi hujus loci causa addita est. Sic paulo post, n. 2, eadem editiones, et Vind., qua nunc transitur a morte animarum ad vitam virtutum: ubi Lov. et Mss. habent tantum, qua nunc transitur a morte ad vitam.

unde agimus: Nolite, inquit, mirari hoc, quia venit¹ hora, in qua omnes qui in monumentis sunt, audient vocem ejus²; et procedent qui bona fecerunt, in resurrectionem vitæ; qui vero mala egerunt, in resurrectionem judicii (Joan. v, 27-29). Hoc est illud judicium, quod paulo ante, sicut nunc, pro damnatione posuerat, dicens, Qui verbum meum audit, et credit ei qui misit me, habet vitam æternam, et in judicium non veniet, sed transit a morte in vitam (Ibid., 24): id est, pertinendo ad primam resurrectionem, qua nunc transitur a morte ad vitam, in damnationem non veniet, quam significavit appellationem judicii, sicut etiam hoc loco, ubi ait, Qui vero mala egerunt, in resurrectionem judicii, id est, damnationis. Resurgat ergo in prima, qui non vult in secunda resurrectione damnari. Venit enim hora, et nunc est, quando mortui audient vocem Filii Dei; et qui audierint, vivent (Ibid., 25), id est, in damnationem non venient, quæ secunda mors dicitur: in quam mortem, post secundam, quæ corporum futura est, resurrectionem, præcipitabuntur, qui in prima, quæ animarum est, non resurgunt. Veniet enim hora (ubi non ait, et nunc est; quia in fine sæculi erit, hoc est in ultimo et maximo judicio Dei), quando omnes qui in monumentis sunt, audient vocem ejus, et procedent (Ibid., 28). Non dixit quemadmodum in prima, et qui audierint, vivent. Non enim omnes vivent, ea scilicet vita, quæ quoniam beata est, sola vita dicenda est. Nam utique non sine qualicumque vita possent audire, et de monumentis resurgente carne procedere. Quare autem non omnes vivent, in eo quod sequitur, docet: Qui bona, inquit, fecerunt, in resurrectionem vitæ, hi sunt qui vivent: qui vero mala egerunt, in resurrectionem judicii, hi sunt qui non vivent; quia secunda morte morientur. Mala quippe egerunt, quoniam male vixerunt: male autem vixerunt, quia in prima, quæ nunc est, animarum resurrectione non revixerunt, aut in eo quod revixerant, non in finem usque manserunt. Sicut ergo duæ sunt regenerationes, de quibus jam supra locutus sum, una secundum fidem, quæ nunc fit per Baptismum; alia secundum carnem, quæ fiet in ejus incorruptione atque immortalitate per judicium magnum atque novissimum: ita sunt et resurrectiones duæ, una prima, quæ et nunc est, et animarum est, quæ venire non permittit in mortem secundam; alia secunda, quæ nunc non est, sed in sæculi fine futura est, nec animarum, sed corporum est, quæ per ultimum judicium alios mittit in secundam mortem, alios in eam vitam, quæ non habet mortem.

CAPUT VII. — *De duabus resurrectionibus et de mille annis quid in Apocalypsi Joannis scriptum sit, et quid de eis rationabiliter sentiat.*

1. De his duabus resurrectionibus idem Joannes evangelista in libro qui dicitur Apocalypsis, eo modo locutus est, ut earum prima a quibusdam nostris non intellecta, insuper etiam in quasdam ridiculas

¹ Sic nostri codices. In B., quia venit. M.

² sic mss. Editi vero, vocem filii Dei.

fabulas verteretur. Ait quippe in libro memorato Joannes apostolus : *Et vidi angelum descendentem de caelo, habentem clavem abyssi, et catenam in manu sua, et tenuit draconem illum serpentem antiquum, qui cognominatus est diabolus et satanas, et alligavit illum mille annis, et misit illum in abyssum; et clausit, et signavit super eum, ut non seduceret jam gentes, donec finiantur mille anni: post hæc oportet eum solvi brevi tempore. Et vidi sedes, et sedentes super eas, et iudicium datum est. Et animæ occisorum propter¹ testimonium Jesu, et propter verbum Dei, et si qui non adoraverunt bestiam, nec imaginem ejus, neque acceperunt inscriptionem in fronte aut in manu sua, et regnabunt cum Jesu mille annis: reliqui eorum non vixerunt, donec finiantur mille anni. Hæc resurrectio prima est. Beatus et sanctus est, qui habet in hac prima resurrectione partem. In istis secunda mors non habet potestatem; sed erunt sacerdotes Dei et Christi, et regnabunt cum eo mille annis (Apoc. xx, 4-6). Qui propter hæc hujus libri verba primam resurrectionem futuram suspicati sunt corporalem, inter cætera maxime numero annorum mille permoti sunt, tanquam oporteret in sanctis eo modo veluti tanti temporis fieri sabbatum, vacatione scilicet sancta post labores annorum sex millium, ex quo creatus est homo, et magni illius peccati merito in hujus mortalitatis ærumnas de paradisi felicitate dimissus est, ut quoniam scriptum est, *Unus dies apud Dominum sicut mille anni, et mille anni sicut dies unus* (II Petr. iii, 8), sex annorum millibus tanquam sex diebus impletis, sequatur velut sabbati septimus in annis mille postremis, ad hoc scilicet sabbatum celebrandum resurgentibus sanctis. Quæ opinio esset utcumque tolerabilis, si aliquæ deliciae spirituales in illo sabbato adfuturæ sanctis per Domini præsentiam crederentur. Nam etiam nos hoc opinati fuimus aliquando (a). Sed cum eos qui tunc resurrexerint, dicant immoderatissimis carnalibus epulis vacaturos, in quibus cibus sit tantus ac potus, ut non solum nullam modestiam teneant, sed modum quoque ipsius incredulitatis excedant: nullo modo ista possunt nisi a carnalibus credi. Hi autem qui spirituales sunt, istos ista credentes *Χιλιάρταις*, appellant græco vocabulo; quos, verbum e verbo exprimentes, nos possumus Milliariorum nuncupare. Eos autem longum est refellere ad singula; sed potius, quemadmodum Scriptura hæc accipienda sit, jam debemus ostendere.*

2. Ait ipse Dominus Jesus Christus, *Nemo potest introire in domum fortis, et vasa ejus eripere, nisi prius alligaverit fortem* (Marc. iii, 27): diabolus volens intelligi fortem, quia ipse genus humanum potuit tenere captivum; vasa vero ejus, quæ fuerat erepturus, fideles suos futuros, quos ille in diversis peccatis atque impietatibus possidebat. Ut ergo alligaretur hic fortis,

¹ Editi, *datum est illis, et animas occisorum propter*. Sic plane vulgata et græca lectio Apoc. xx. Atamen manuscripti omnes hic omittunt, *illis*; habentque, *Et animæ occisorum*: atque hanc ipsam lectionem exponit postea Augustinus, cap. 9.

(a) Sicuti videre est in serm. 230, qui alias ex Sirmonianis 19.

propterea vidit iste apostolus in Apocalypsi angelum descendentem de caelo, habentem clavem abyssi, et catenam in manu sua. Et tenuit, inquit, draconem illum serpentem antiquum, qui cognominatus est diabolus et satanas, et alligavit eum mille annis, hoc est, ejus potestatem ab eis seducendis ac possidendis, qui fuerant liberandi, cohibuit atque frenavit. Mille autem anni duobus modis possunt, quantum mihi occurrit, intelligi: aut quia in ultimis annis mille ista res agitur, id est, sexto annorum milliario tanquam sexto die, cujus nunc spatia posteriora volvuntur; secuturo deinde sabbato, quod non habet vesperam, requie scilicet sanctorum, quæ non habet finem: ut hujus milliarii tanquam diei novissimam partem, quæ remanebat¹ usque ad terminum sæculi, mille annos appellaverit; eo loquendi modo, quo pars significatur a toto: aut certe mille annos pro annis omnibus hujus sæculi posuit; ut perfecto numero notaretur ipsa temporis plenitudo. Millenarius quippe numerus denarii numeri quadratum solidum reddit. Decem quippe decies ducta, fiunt centum; quæ jam figura quadrata, sed plana est². Ut autem in altitudinem surgat, et solida fiat, rursus centum decies multiplicantur, et mille sunt. Porro si centum ipsa pro universitate aliquando ponuntur, quale illud est, quod Dominus omnia sua dimittenti et eum sequenti promisit, dicens, *Accipiet in hoc sæculo centuplum* (Matth. xix, 29; Marc. x, 30): quod exponens quodammodo Apostolus, ait, *Quasi nihil habentes, et omnia possidentes* (II Cor. vi, 10); quia et ante (a) jam dictum erat, *Fidelis hominis totus mundus divitiarum est*: quanto magis mille pro universitate ponuntur, ubi est soliditas ipsius denariæ quadraturæ? Unde nec illud melius intelligitur, quod in Psalmo legitur: *Memor fuit in sæculum testamenti sui, verbi quod mandavit in mille generationes* (Psal. civ, 8), id est, in omnes.

3. *Et misit illum, inquit, in abyssum*: utique diabolus misit in abyssum. Quo nomine significata est multitudo innumerabilis impiorum, quorum in malignantate adversus Ecclesiam Dei multum profunda sunt corda: non quia ibi diabolus ante non erat; sed ideo dicitur illuc missus, quia exclusus a credentibus plus cepit impios possidere. Plus namque possidetur a diabolo, qui non solum alienatus est a Deo, verum etiam gratis odit servientes Deo. *Et clausit, inquit, et signavit super eum, ut jam non seduceret gentes, donec finiantur mille anni. Clausit super eum, dictum est, interdixit ei ne possit exire, id est, vetitum transgredi. Signavit autem, quod addidit, significasse mihi videtur, quia occultum esse voluit, qui pertineant ad partem diaboli, et qui non pertineant. Hoc quippe in sæculo isto prorsus latet: quia et qui vide-*

¹ Ita Mss. At editi, *remanebit*.

² Lov., *non figura quadrata*. Abest, *non*, a cæteris libris.

(a) Ibi particula, *ante*, non superiora verba Pauli indicat, sicuti visum est non nemini, sed superiora tempora. Id enim quod affertur, *Fidelis hominis totus mundus divitiarum est*, dictum fuit a salomone in Proverbiis, ibique cap. 17, post versum 6 legitur apud Septuaginta, non apud vulgata. Citatur a Clemente Alexandrino, lin. 2 Stromatum, et ab aliis veteribus, laudatis tom. 2, ad Epistolam 153, n. 26.

tur stare, utrum sit casurus; et qui videtur jacere, utrum sit surrecturus, incertum est. Ab eis autem gentibus seducendis hujus interdicti vinculo et claustrum diabolus prohibetur atque cohibetur, quas pertinentes ad Christum seducebat antea, vel tenebat. Has enim Deus elegit ante mundi constitutionem eruere de potestate tenebrarum (*Ephes. 1, 4*), et transferre in regnum Filii charitatis suæ¹ (*Coloss. 1, 13*), sicut Apostolus ait. Nam seducere illum gentes etiam nunc, et secum trahere in æternam poenam, sed non prædestinatas in æternam vitam, quis fidelis ignorat? Nec moveat, quod sæpe diabolus seducit etiam illos, qui jam regenerati in Christo, vias ingrediuntur Dei. *Novit enim Dominus qui sunt ejus* (*II Tim. 11, 19*): ex his in æternam damnationem neminem ille seducit. Sic enim novit eos Dominus, ut Deus, quem nihil latet etiam futurorum; non ut homo, qui hominem ad præsens videt (si tamen videt, cujus cor non videt), qualis autem postea sit futurus, nec se ipsum videt. Ad hoc ergo ligatus est diabolus, et inclusus in abyso, ut jam non seducat gentes, ex quibus constat Ecclesia, quas antea seductas tenebat, antequam esset Ecclesia. Nec enim dictum est, ut non seduceret aliquem; sed, *ut non seduceret*, inquit, *jam gentes*; in quibus Ecclesiam procul dubio voluit intelligi: *donec fiantur*, inquit, *mille anni*, id est, aut quod remanet de sexto die, qui constat ex mille annis; aut omnes anni, quibus deinceps hoc sæculum peragendum est.

4. Nec sic accipiendum est quod ait, *ut non seduceret jam gentes, donec fiantur mille anni*; quasi postea seducturus sit eas duntaxat gentes, ex quibus prædestinata constat Ecclesia, a quibus seducendis illo est vinculo claustrumque prohibitus. Sed aut illa locutione dictum est, quæ in Scripturis aliquoties invenitur, qualis est in Psalmo, *Sic oculi nostri ad Dominum Deum nostrum, donec miseretur nostri* (*Psal. cxxii, 2*); neque enim cum miseratus fuerit, non erunt oculi servorum ejus ad Dominum Deum suum: aut certe iste est ordo verborum, *Et clausit, et signavit super eum, donec fiantur mille anni*; quod vero interposuit, *ut non seduceret jam gentes*, ita se habet, ut ab hujus ordinis connexionem sit liberum, et seorsus intelligendum, velut si post adderetur, ut sic se haberet tota sententia, *Et clausit, et signavit super eum, donec fiantur mille anni, ut non seduceret jam gentes*; id est, ideo clausit, donec fiantur mille anni, ut jam non seduceret gentes.

CAPUT VIII. — De alligatione et solutione diaboli.

1. *Post hæc*, inquit, *oportet eum solvi brevi tempore* (*Apoc. x3, 3*). Si hoc est diabolo ligari et includi, Ecclesiam non posse seducere; hæc ergo erit solutio ejus, ut possit? Absit: nunquam enim ab illo Ecclesia seducetur prædestinata et electa ante mundi constitutionem, de qua dictum est, *Novit Dominus qui sunt ejus* (*II Tim. 11, 19*): et tamen hic erit² etiam

¹ Ita plures probæ notæ manuscripti. At editi, *claritatis suæ*.

² Editi, *et tamen hic erit Ecclesia*. Vox, *Ecclesia*, hoc loco non est in manuscriptis.

illo tempore, quo solvendus est diabolus, sicut ex quo est instituta, hic fuit et erit omni tempore, in suis utique qui succedunt nascendo morientibus. Nam paulo post dicit, quod solutus diabolus seductas gentes toto orbe terrarum attrahet in bellum adversus eam, quorum hostium numerus erit ut arena maris. *Et ascenderunt*, inquit, *super terræ latitudinem, et cinxerunt castra sanctorum, et dilectam civitatem: et descendit ignis de celo a Deo, et comedit eos: et diabolus qui seducebat eos, missus est in stagnum ignis et sulphuris, ubi et bestia et pseudopropheta*¹; *et cruciabuntur die ac nocte in sæcula sæculorum* (*Apoc. xx, 8-10*). Sed hoc jam ad judicium novissimum pertinet, quod nunc propterea commemorandum putavi, ne quis existimet eo ipso parvo tempore, quo solvetur diabolus, in hac terra Ecclesiam non futuram, illo hic eam vel non inveniende, cum fuerit solutus, vel absumente, cum fuerit modis omnibus persecutus. Non itaque per totum hoc tempus, quod liber iste complectitur, a primo scilicet adventu Christi usque in sæculi finem, quo erit secundus ejus adventus, ita diabolus alligatur, ut ejus hæc ipsa sit alligatio, per hoc intervallum, quod mille annorum numero appellat, non seducere Ecclesiam; quandoquidem illam nec solutus utique seducturus est. Nam profecto si ei alligari est, non posse seducere, sive non permitti; quid erit solvi, nisi posse seducere, sive permitti? Quod absit ut fiat: sed alligatio diaboli, est non permitti exercere² totam tentationem, quam potest vel vi vel dolo ad seducendos homines, in partem suam cogendo violenter, fraudulentissime fallendo. Quod si permitteretur in tam longo tempore et tanta infirmitate multorum, plurimos tales, quales Deus id perpeti non vult, et fideles dejiceret, et ne crederent impediret: quod ne faceret, alligatus est.

2. Tunc autem solvetur, quando et breve tempus erit. Nam tribus annis et sex mensibus legitur totis suis suorumque viribus sæviturus (a): et tales erunt, cum quibus ei belligerandum est, ut vinci tanto ejus impetu insidiisque non possint. Eius autem nunquam solveretur, minus appareret ejus maligna potentia, minus sanctæ civitatis fidelissima patientia probaretur; minus denique perspiceretur, quam magno ejus malo tam bene fuerit usus Omnipotens³: qui eum nec omnino abstulit a tentatione sanctorum, quamvis ab eorum interioribus hominibus⁴, ubi in Deum creditur, foras missum, ut forinsecus ejus oppugnatione proficerent; et in eis qui sunt ex parte ipsius, alligavit, ne quantam posset effundendo et exercendo malitiam, innumerabiles infirmos ex quibus Ecclesiam multiplicari et impleri oportebat, alios cre-

¹ Editi, *et pseudopropheta*. Castigantur ex manuscriptis.

² Plerique Mss., *exercere*.

³ Editi, *omnipotens Deus*. Abest, *Deus*, a manuscriptis.

⁴ Lov., *interioribus omnibus*. Verius editi alii et manuscripti, *interioribus hominibus*. Alludit Augustinus ad illud *Ephes. 11, 16, 17, Ut det vobis secundum divitias gloriæ suæ, virtute corroborari per spiritum ejus in interioribus hominum, Christum habitare per fidem in cordibus vestris*.

(n) Conf. Joannis Apocalypsim, cap. xi, §. 2.

dituros, alios jam credentes, a fide pietatis hos dellereret, hos frangeret; et solvet¹ in fine, ut quam fortem adversarium Dei civitas superaverit, cum ingenti gloria sui redemptoris, adjutoris, liberatoris, aspiciat. In eorum sane, qui tunc futuri sunt, sanctorum atque fidelium comparatione quid sumus? quandoquidem ad illos probandos tantus solvetur inimicus, cum quo nos ligato tantis periculis dimicamus. Quamvis et hoc temporis intervallo quosdam milites Christi tam prudentes et fortes fuisse atque esse, non dubium est, ut etiam si tunc in ista mortalitate viverent, quando ille solvetur, omnes insidias ejus atque impetus et caverent sapientissime, et patientissime sustinerent.

3. Hæc autem alligatio diaboli non solum facta est, ex quo cœpit Ecclesia præter Judæam terram in nationes alias aliasque dilatari; sed etiam nunc fit, et fiet usque ad terminum sæculi, quo solvendus est. Quia et nunc homines ab infidelitate, in qua ipse eos possidebat, convertuntur ad fidem, et usque in illum finem sine dubio convertentur: et utique unicuique² iste fortis tunc alligatur, quando ab illo tanquam vas ejus eripitur: et abyssus ubi inclusus est, non in eis consumpta est, quando sunt mortui, qui tunc erant quando esse cœpit inclusus; sed successerunt eis alii nascendo, atque succedunt, donec finiatur hoc sæculum, qui oderint Christianos, in quorum quotidie, velut in abisso, cæcis et profundis cordibus includatur. Utrum autem etiam illis ultimis tribus annis et mensibus sex, quando solutus totis viribus sæviturus est, aliquis in qua non fuerat, sit accessurus ad fidem, nonnulla quæstio est. Quomodo enim stabit quod dictum est, *Quis intrat in domum fortis, ut vasa ejus eripiat, nisi prius alligaverit fortem (Matth. xii, 29)*? si etiam soluto eripiuntur? Ac per hoc ad hoc cogere videtur ista sententia, ut credamus illo, licet exiguo, tempore neminem accessurum esse populo christiano, sed cum eis qui jam Christiani reperti fuerint, diabolum pognaturum: ex quibus etiam si aliqui victi secuti eum fuerint, non eos ad prædestinatum filiorum Dei numerum pertinere. Neque enim frustra idem Joannes apostolus, qui et hanc Apocalypsim scripsit, in epistola sua de quibusdam dicit, *Ex nobis exierunt, sed non erant ex nobis: nam si fuissent ex nobis, mansissent utique nobiscum (1 Joan. ii, 19)*. Sed quid fiet³ de parvulis? Nimium quippe incredibile est, nullos jam natos et nondum baptizatos præoccupari Christianorum filios illo tempore infantes, nullos etiam ipsis nasci jam diebus; aut si erunt, non eos a parentibus suis ad lavacrum regenerationis modo quocumque perducere. Quod si fiet, quo pacto soluto jam diabolo vasa ista eripientur, in cujus domum nemo intrat, ut vasa ejus eripiat, nisi prius alligaverit eum? Imo vero id potius est credendum, nec qui cadant de Ecclesia, nec qui cecedant Ecclesiæ illo tempore defuturos: sed profe-

cto tam fortes erunt et parentes pro baptizandis parvulis suis, et hi qui tunc primitus creditori sunt, ut illum fortem vincant etiam non ligatum, id est, omnibus, qualibus antea nunquam, vel artibus insidiantem, vel urgentem viribus, et vigilantem intelligant, et tolerant ferant; ac sic illi etiam non ligato eripiantur. Nec ideo falsa erit evangelica illa sententia, *Quis intrat in domum fortis, ut vasa ejus eripiat, nisi prius alligaverit fortem?* Secundam enim sententiæ ejus veritatem, ordo iste servatus est, ut prius alligaretur fortis, ereptisque vasis ejus, longo lateque in omnibus gentibus ex firmis et infirmis ita multiplicaretur Ecclesia, ut ex ipsa rerum divinitus prædictarum et impletarum robustissima fide, etiam soluto vasa possit auferre. Sicut enim fatendum est, multorum refrigescere charitatem, cum abundat iniquitas (*Matth. xxv, 12*), et inimitatis maximæque persecutionibus atque fallacis diaboli jam soluti, eos qui in libro vitæ scripti non sunt, multos esse cessuros: ita cogitandum est, non solum quos bonos fideles illud tempus inveniet, sed nonnullos etiam qui foris adhuc erant, adjuvante Dei gratia per considerationem Scripturarum, in quibus et alia et finis ipse prænuntiatus est, quem venire jam sentiunt, ad credendum quod non credebant, futuros esse firmiores, et ad vincendum etiam non ligatum diabolum fortiores. Quod si ita erit, propterea præcessisse dicenda est ejus alligatio, ut et ligati et soluti expoliatio sequeretur: quoniam de hac re dictum est, *Quis intrabit in domum fortis, ut vasa ejus eripiat, nisi prius alligaverit fortem?*

CAPUT IX.— *Quod sit regnum sanctorum cum Christo per mille annos, et in quo discernatur a regno æterno.*

1. Interea dum mille annis ligatus est diabolus, sancti⁴ regnant cum Christo etiam ipsis mille annis eisdem sine dubio, et eodem modo intelligendis, id est, isto jam tempore prioris ejus adventus. Excepto quippe illo regno, de quo in fine dicturus est, *Venite, benedicti Patris mei, possidete paratum vobis regnum (Matth. xxv, 34)*, nisi alio aliquo modo, longe quidem impari, jam nunc regnarent cum illo sancti ejus, quibus ait, *Ecce ego vobiscum sum usque in consummationem sæculi (Id. xxvii, 20)*; profecto non etiam nunc diceretur Ecclesia regnum ejus, regnumve cælorum. Nam utique isto tempore in regno Dei eruditur scriba ille, qui profert de thesauro suo nova et vetera (*Matth. xiii, 52*), de quo supra locuti sumus. Et de Ecclesia collecturi sunt zizania messorum illi, quæ permisit cum tritico simul crescere usque ad messem: quod exponens ait, *Messis est finis sæculi; messorum autem Angeli sunt. Sicut ergo colliguntur zizania; et igni comburuntur; sic erit in consummatione sæculi: mittet Filius hominis Angelos suos, et colligent de regno ejus omnia scandala (Ibid., 39-41)*. Numquid de regno illo, ubi nulla sunt scandala? De isto ergo regno ejus, quod est hic Ecclesia, colligentur. Item dicit, *Qui solverit unum de mandatis istis minimis, et docuerit sic homines, minimus vocabitur in regno cælorum: qui au-*

¹ Vind. et Am., et solvetur. Er. et Lov., et solvetur. At Mss., et solvet: scilicet Omnipotens qui eum alligavit.

² In editis, unicuique fidelium. Abest, fidei. a plerisque manuscriptis.

³ Mss., fit.

⁴ Editi, sancti D. i. At manuscripti omittunt, Dei.

tem faceret, et sic doceret, magnus vocabitur in regno cœlorum (Math. v, 19). Utramque dicit in regno cœlorum, et qui non facit mandata quæ docet, hoc est enim solvere, non servare, non facere; et illum qui facit, et sic docet: sed istum minimum, illum magnum. Et continuo secutus adjungit, *Dico enim vobis, quia nisi abundaverit justitia vestra super Scribarum et Phariseorum*, id est, super justitiam eorum qui solvunt quod docent¹. De Scribis enim et Phariseis dicit alio loco, *Quoniam dicunt, et non faciunt (Math. xxiii, 5)*. Nisi ergo super eos abundaverit justitia vestra, id est, ut vos non solvatis, sed faciatis potius quod docetis, non intrabitis, inquit, in regnum cœlorum (Id. v, 20). Alio modo igitur intelligendum est regnum cœlorum, ubi ambo sunt, et ille scilicet qui solvit quod docet, et ille qui facit; sed ille minimus, iste magnus²: alio modo autem regnum cœlorum dicitur, quo non intrat nisi ille qui facit. Ac per hoc ubi utrumque genus est, Ecclesia est qualis nunc est: ubi autem illud solum erit, Ecclesia est qualis tunc erit, quando malus in ea non erit. Ergo Ecclesia et nunc est regnum Christi, regnumque cœlorum. Regnant itaque cum illo etiam nunc sancti ejus, aliter quidem, quam tunc regnabunt: nec tamen cum illo regnant zizania, quamvis in Ecclesia cum tritico crescant. Regnant enim cum illo qui faciunt quod Apostolus ait, *Si resurrexistis cum Christo, quæ sursum sunt sapite, ubi Christus est in dextera Dei sedens: quæ sursum quærite, non quæ super terram (Coloss. iii, 1 et 2)*. De qualibus item dicit, quod eorum conversatio sit in cœlis (Philipp. iii 20). Postremo regnant cum illo, qui eo modo sunt in regno ejus, ut sint etiam ipsi regnum ejus. Quomodo autem sunt regnum Christi, qui, ut alia taceam, quamvis ibi sint donec colligantur in fine sæculi de regno ejus omnia scandala, tamen illic sua quærunt, non quæ Jesu Christi (Id. ii, 21)?

2. De hoc ergo regno militiæ, in quo adhuc cum hoste confligitur, et aliquando repugnatur repugnantibus vitiis³, aliquando cedentibus imperatur, donec veniatur ad illud pacatissimum regnum, ubi sine hoste regnabitur, et de hac prima resurrectione quæ nunc est, liber iste sic loquitur. Cum enim dixisset, alligari diabolum mille annis, et postea solvi brevi tempore; mox recapitulando quid in istis mille annis agat Ecclesia vel agatur in ea, *Et vidi, inquit, sedes et sedentes super eas, et judicium datum est*. Non hoc putandum est de ultimo judicio dici: sed sedes præpositorum, et ipsi præpositi intelligendi sunt, per quos Ecclesia nunc gubernatur. Judicium autem datum nullum melius accipiendum videtur, quam id quod dictum est, *Quæ ligaveritis in terra, ligata erunt et in cælo; et quæ solveritis in terra, soluta erunt et in cælo (Math. xviii, 18)*. Unde Apostolus, *Quid enim mihi est, inquit, de his qui foris sunt judicare? nonne de his qui intus sunt vos judicatis (I Cor. v, 12)? Et animæ, inquit, occisorum propter testimonium Jesu, et propter*

verbum Dei: subauditur quod postea dicturus est, *regnaverunt cum Jesu mille annis (Apoc. xx, 4)*, animæ scilicet martyrum nondum sibi corporibus suis redditis. Neque enim piorum animæ mortuorum separantur ab Ecclesia, quæ nunc etiam est regnum Christi. Alioquin nec ad altare Dei fieret eorum memoria in communicatione corporis Christi; nec aliquid prodesset ad ejus in periculis Baptismum currere, ne sine illo finiatur hæc vita; nec ad reconciliationem, si forte per poenitentiam malamve conscientiam quisque ab eodem corpore separatus est. Cur enim fiunt ista, nisi quia fideles, etiam defuncti, membra ejus sunt? Quamvis ergo cum suis corporibus nondum, jam tamen eorum animæ regnant cum illo, dum isti mille anni decurrunt. Unde in hoc eodem libro et alibi legitur: *Beati mortui, qui in Domino moriuntur, amodo et jam dicit Spiritus, ut requiescant a laboribus suis; nam opera eorum sequuntur illos (Id. xiv, 13)*. Regnat itaque cum Christo nunc primum Ecclesia in vis et mortuis. Præterea enim, sicut dicit Apostolus, *mortuus est Christus, ut et vivorum et mortuorum dominetur (Rom. xiv, 9)*. Sed ideo tantummodo martyrum animas commemoravit, quia ipsi præcipue regnant mortui, qui usque ad mortem pro veritate certaverunt. Sed a parte totum (a) etiam cæteros mortuos intelligimus pertinentes ad Ecclesiam, quod est regnum Christi.

3. Quod vero sequitur, *Et si qui non adoraverunt bestiam, nec imaginem ejus, nec acceperunt inscriptionem in fronte, aut in manu sua: simul de vivis ac mortuis debemus accipere*. Quæ sit porro ista bestia, quamvis sit diligentius inquirendum non tamen abhorret a fide recta, ut ipsa impia civitas intelligatur, et populus infidelium contrarius populo fideli et civitati Dei. Imago vero ejus simulatio ejus mihi videtur, in eis videlicet hominibus, qui velut fidem profitentur, et infideliter vivunt. Fingunt enim se esse quod non sunt, vocanturque non veraci effigie, sed fallaci imagine Christiani. Ad eandem namque bestiam pertinent non solum aperte inimici⁴ nominis Christi et ejus gloriosissimæ civitatis, sed etiam zizania, quæ de regno ejus, quod est Ecclesia, in fine sæculi colligenda sunt. Et qui sunt qui non adorant bestiam nec imaginem ejus, nisi qui faciunt quod ait Apostolus, *Ne sitis jugum ducentes cum infidelibus (II Cor. vi, 14)?* Non adorant enim, id est, non consentiunt, non subjiuntur: neque accipiunt inscriptionem, notam scilicet criminis, in fronte, propter professionem; in manu, propter operationem. Ab his igitur malis alieni, sive adhuc in ista mortali carne viventes, sive defuncti, regnant cum Christo jam nunc, quodam modo huic tempori congruo, per totum hoc interval lum, quod numero mille significatur annorum.

4. *Reliqui eorum, inquit, non vixerunt*. Hora enim nunc est, cum mortui audient⁵ vocem Filii Dei; et

¹ Omnes Mss., id est super eos qui solvunt quod docent.

² Mss., ille magnus.

³ Plures manuscripti, pugnantibus vitiis. Et mox idem alique omnes, aliquando cadentibus.

⁴ Editi, non solum aperti inimici. Codices Mss., non solum aperte inimici.

⁵ Vind. An. et Mss., audiverunt.

(a) Id est, sed figura qua a parte totum accipitur.

qui audierint, vivent : reliqui vero eorum non vivent (Joan. v, 25). Quod vero subdidit, *donec finiantur mille anni*; intelligendum est, quod eo tempore non vixerunt, quo vivere debuerunt, ad vitam scilicet de morte transeundo. Et ideo cum dies venerit, quo fiat et corporum resurrectio, non ad vitam de monumentis procedent, sed ad iudicium; ad damnationem scilicet, quæ secunda mors dicitur. Donec enim finiantur mille anni, quicumque non vixerit, id est, isto toto tempore quo agitur prima resurrectio, non audierit vocem Filii Dei, et ad vitam de morte transierit; profecto in secunda resurrectione, quæ carnis est, in mortem secundam cum ipsa carne transibit. Sequitur enim, et dicit, *Hæc resurrectio prima est. Beatus et sanctus qui habet in hac prima resurrectione partem* (Apoc. xx, 56), id est, particeps ejus est. Ipse est autem particeps ejus, qui non solum a morte, quæ in peccatis est, reviviscit, verum etiam in eo quod revixerit, permanebit. *In istis, inquit, secunda mors non habet potestatem.* Habet ergo in reliquis, de quibus superius ait, *Reliqui eorum non vixerunt, donec finiantur mille anni*: quoniam isto toto temporis intervallo, quod mille annos vocat, quantumcumque in eo quisque eorum vixit in corpore, non revixit a morte, in qua eum tenebat impietas, ut sic reviviscendo primæ resurrectionis particeps fieret, atque in eo potestatem secunda mors non haberet.

CAPUT X. — *Quid respondendum sit eis, qui putant resurrectionem ad sola corpora, non etiam ad animas pertinere.*

Sunt qui putant resurrectionem dici non posse nisi corporum: ideoque istam quoque in corporibus primam futuram esse contendunt. Quorum enim est, inquirunt, cadere, eorum est resurgere: cadunt autem corpora moriendo: nam et a cadendo cadavera nuncupantur (a). Non ergo animarum, inquirunt, resurrectio potest esse, sed corporum. Sed quid contra Apostolum dicunt, qui eam resurrectionem appellat? Nam secundum interiorem, non secundum exteriorem hominem utique resurrexerant, quibus ait, *Si resurrexistis cum Christo, quæ sursum sunt sapite* (Coloss. iii, 1). Quem sensum verbis aliis alibi posuit, dicens, *Ut quemadmodum Christus a mortuis resurrexit per gloriam Patris, sic et nos in novitate vitæ ambulemus* (Rom. vi, 4). Hinc est et illud, *Surge, qui dormis, et exsurge a mortuis, et illuminabit te Christus* (Ephes. v, 14). Quod autem dicunt, non posse resurgere, nisi qui cadunt; et ideo putant resurrectionem ad corpora, non ad animas pertinere, quia corporum est cadere: cur non audiunt, *Non recedatis ab illo, ne cadatis* (Eccli. ii, 7); et, *Suo domino stat aut cadit* (Rom. xiv, 4); et, *Qui putat se stare, videat ne cadat* (I Cor. x, 12)? Puto enim quod in anima, non in corpore casus iste cavendus est. Si igitur cadentium est resurrectio, cadunt autem et animæ; profecto et animas resurgere confitendum est. Quod autem cum dixisset, *In istis secunda mors non habet potestatem*; adijxit atque ait,

¹ Mss., *Qui putat se stare, caveat ne cadat.*

(a) vid. serm. 241, n. 2.

Sed erunt sacerdotes Dei et Christi, et regnabunt cum eo mille annis: non utique de solis episcopis et presbyteris dictum est, qui proprie jam vocantur in Ecclesia sacerdotes: sed sicut omnes Christianos dicimus propter mysticum chrisma, sic omnes sacerdotes, quoniam membra sunt unius sacerdotis. De quibus apostolus Petrus, *Plebs, inquit, sancta, regale sacerdotium* (I Petr. ii, 9). Sane, licet breviter atque trans-eunter, insinuavit Deum esse Christum (a), dicendo, *Sacerdotes Dei et Christi*, hoc est, Patris et Filii; quamvis propter formam servi, sicut filius hominis, ita etiam sacerdos Christus effectus sit in æternum, secundum ordinem Melchisedech (Psal. cix, 4). De qua re in hoc opere non semel diximus.

CAPUT XI. — *De Gog et Magog, quos ad persequendam Ecclesiam Dei, solutus prope finem sæculi diabolus incitabit.*

Et cum finiti fuerint, inquit, mille anni, solvetur satanas de custodia sua, et exhibit ad seducendas nationes, quæ sunt in quatuor angulis terræ, Gog et Magog, et trahet eos in bellum, quorum numerus est ut arena maris. Ad hoc ergo tunc seducet, ut in hoc bellum trahat. Nam et antea modis quibus poterat, per mala multa et varia seducebat. *Exhibet* autem dictum est, in apertam persecutionem de latebris erumpet odiorum. Hæc enim erit novissima persecutio, novissimo imminente iudicio, quam sancta Ecclesia toto terrarum orbe patitur, universa scilicet civitas Christi ab universa diaboli civitate, quantumcumque erit utraque super terram. Gentes quippe istæ, quas appellat Gog et Magog, non sic sunt accipiendæ, tanquam sint aliqui in aliqua parte terrarum barbari constituti, sive quos quidam suspicantur Getas et Massagetas, propter litteras horum nominum primas, sive aliquos alios alienigenas, et a Romano jure sejunctos. Toto namque orbe terrarum significati sunt isti esse, cum dictum est, *Nationes quæ sunt in quatuor angulis terræ*: easque subjecit esse *Gog et Magog*. Quorum interpretationem nominum esse comperimus Gog tectum, Magog de tecto (b): tanquam domus, et ipse qui procedit de domo. Gentes igitur sunt, in quibus diabolus velut in abyso superius intelligebamus inclusum; et ipse de illis quodammodo sese efferens et

(a) Christum itaque Deum esse profitebantur aperte martyres, quando diis sacrificare jussi, respondebant se uni Deo et Christo sacrificare. Sic beata Crispina, quæ passa est Diocletiano secundum et Maximiano Augusto consulibus, die nonarum decembrium, apud coloniam Thebestinam, sub Anulino proconsule, sicuti ferunt passionis illius Acta in Veterum Analactorum tomo tertio vulgata: « Nunquam ego, » inquit, « sacrificavi, nec sacrifico nisi uni Deo et Domino » nostro Jesu Christo Filio ejus, qui natus est et passus. » Et Vammarius martyr, quem sub eodem Anulino proconsule in civitate vagensi passum imperante Maximiano et Gallieno testantur Acta in Veterum Analactorum tomo quarto publicata: « Nunquam sacrificio dæmoniis, sed uni Deo, » etc. Atque aliquanto post, « Domino, » ait, « Jesu Christo sacrificamus, qui fecit celum et terram, mare et omnia quæ in eis sunt: huic Deo credimus et servimus. » Hanc de Christo fidem cultumque ipsius in Apostolos reiecerant ipsimet pagani, ut videre est supra, lib. 18, cap. 53, et lib. 1 de Consensu Evangelistarum, nn. 11, 12. Cyprianus etiam (quod hic non prætereundum silentio) « Christi et Dei patris » appellatur a Pontio in ipsius Vita.

(b) Hanc interpretationem comperit apud Hieronymum in Ezechielis cap. xxxviii.

procedens : ut illæ sint tectum , ipse de tecto. Si autem utrumque referamus ad gentes , non unum horum ad illas , alterum ad diabolum ; et tectum ipsæ sunt , quia in eis nunc includitur et quodammodo tegitur inimicus antiquus ; et de tecto ipsæ erunt , quando in apertum odium de operto erupturæ sunt. Quod vero ait , *Et ascenderunt super terræ latitudinem , eo cinxerunt castra sanctorum et dilectam civitatem* (*Apoc. xx , 7 , 8*) : non utique ad unum locum venisse , vel venturi esse significati sunt , quasi aliquo uno loco futura sint castra sanctorum et dilecta civitas ; cum hæc non sit nisi Christi Ecclesia toto terrarum orbe diffusa : ac per hoc ubicumque tunc erit , quæ in omnibus gentibus erit , quod significatum est nomine latitudinis terræ , ibi erunt castra sanctorum , ibi erit dilecta Deo civitas ejus ; ibi ab omnibus inimicis suis , quia et ipsi in omnibus gentibus cum illa erunt , persecutionis illius immanitate cingetur , hoc est , in angustias tribulationis arctabitur , urgebitur , concludetur ; nec militiam ¹ suam deseret , quæ vocabulo est appellata castrorum.

CAPUT XII. — *An ad ultimum supplicium pertineat impiorum , quod descendisse ignis de cælo , et eosdem comedisse memoratur.*

Quod vero ait , *Et descendit ignis (a) de cælos et comedit eos* (*Apoc. xx , 9*) : non extremum putandum est id esse supplicium , quod erit , cum dicetur , *Discedite a me , maledicti , in ignem æternum* (*Math. xxv , 41*). Tunc quippe in ignem mittentur ipsi , non ignis de cælo veniet super ipsos. Hic autem bene intelligitur *ignis de cælo* , de ipsa firmitate sanctorum , qua non cessuri sunt sævientibus , ut eorum faciant voluntatem. Firmamentum est enim cælum , cujus firmitate illi cruciabuntur ardentissimo zelo ; quoniam non poterunt atrahere in partes Antichristi sanctos Christi. Et ipse erit ignis qui comedet eos , et hoc *a Deo* : quia Dei munere insuperabiles flunt sancti , unde excruciantur inimici. Sicut enim in bono positum est , *Zelus domus tuæ comedit me* (*Psal. Lxviii , 10*) ; ita e contrario , *Zelus occupavit plebem inereditam , et nunc ignis contrarios comedit* (*Isai. xxvi , 11 , sec. LXX*). Et nunc utique , excepto scilicet ultimi illius igne iudicii. Aut si eam plagam , qua percutiendi sunt Ecclesiæ persecutores , veniente jam Christo , quos viventes inveniet super terram , quando interficiet Antichristum spiritu oris sui (*II Thess. ii , 8*) , ignem appellavit descendentem de cælo , eosque comedentem , neque hoc ultimum supplicium erit impiorum , sed illud quod facta corporum resurrectione passuri sunt.

CAPUT XIII. — *An tempus persecutionis Antichristi mille annis annumerandum sit ?*

Hæc persecutio novissima , quæ futura est ab An-

¹ Editio Lov. , *malitiam*. Emendatur ex editis aliis et manuscriptis.

² Ita Mss. At editi , *An ante tempus persecutionis Antichristi mille anni annumerandi sint*.

(a) Hic omissum est , *a Deo* , quod tamen eo loco Apocalypsis legebat Augustinus : nam id vox , quomodo illic intelligendum sit , exponit.

ticristo (sicut jam diximus , quia et in hoc libro superius [*Apoc. x , et xi*] , et apud Danielelem prophetam [*Dan. xii*] positum est) , tribus annis et sex mensibus erit. Quod tempus , quamvis exiguum , utrum ad mille annos pertineat , quibus et diabolum ligatum dicit , et sanctos regnare cum Christo ; an eisdem annis hoc parvum spatium superaddatur , atque sit extra , merito ambigitur. Quia si dixerimus ad eosdem annos hoc pertinere , non tanto tempore , sed prolixiore cum Christo regnum sanctorum reperietur extendi , quam diaboli alligari. Profecto enim sancti cum suo Rege etiam in ipsa præcipue persecutione regnabunt mala tanta vincentes , quando jam diaboli non erit alligatus , ut eos persequi omnibus viribus possit. Quomodo ergo ista Scriptura eisdem mille annis utrumque determinat , diaboli scilicet alligationem , regnumque sanctorum ; cum trium annorum et sex mensium intervallo prius desinat alligatio diaboli , quam regnum sanctorum in his mille annis cum Christo ? Si autem dixerimus parvum persecutionis hujus hoc spatium non computandum in mille annis , sed eis impletis potius adjiciendum ; ut proprie possit intelligi , quod cum dixisset , *Sacerdotes Dei et Christi regnabunt cum eo mille annis* , adjecit , *Et cum finiti fuerint mille anni , solvetur satanas de custodia sua* ; isto enim modo et regnum sanctorum et vinculum diaboli simul cessatura esse significat , ut deinde persecutionis illius tempus nec ad sanctorum regnum , nec ad custodiam satanæ , quorum utrumque in mille annis est , pertinere , sed superadditum et extra computandum esse credatur : cogemur fateri sanctos in illa persecutione regnatos non esse cum Christo. Sed quis audeat dicere , tunc cum illo non regnatura sua membra , quando ei maxime atque fortissime cohærebunt , et quo tempore quanto erit acrior impetus belli , tanto major gloria non cedendi ¹ , tanto densior corona martyrii ? Aut si propter tribulationes , quas passuri sunt , non dicendi sunt regnaturi ; consequens erit , ut etiam superioribus diebus in eisdem mille annis quicumque tribulabantur sanctorum , eo ipso tempore tribulationis suæ cum Christo non regnasse dicantur : ac per hoc et illi , quorum animas auctor libri hujus vidisse se scribit occisorum propter testimonium Jesu et propter verbum Dei , non regnabant cum Christo quando patiebantur persecutionem ; et ipsi regnum Christi non erant , quos Christus excellentius possidebat. Absurdissimum id quidem et omni modo aversandum. Sed certe animæ victrices gloriosissimorum martyrum , omnibus doloribus ac laboribus superatis atque finitis , posteaquam mortalia membra posuerunt , cum Christo utique regnaverunt et regnant , donec finiantur mille anni , ut postea receptis etiam corporibus jam immortalibus regnent. Proinde tribus illis annis atque dimidio , animæ occisorum pro ejus martyrio , et quæ antea de corporibus exierunt , et quæ ipsa novissima persecutione sunt exituræ , regnabunt cum illo , donec finiatur mortale sæculum , et ad illud

¹ *vini. Am. Rr. et plures manuscripti, non cedenti.*

regnum, ubi mors non erit, transeat. Quocirca cum Christo regnantium sanctorum plures anni erunt, quam vinculi diaboli et custodiæ: quia illi cum suo rege Dei Filio, jam diabolo non ligato etiam per tres illos annos ac semissem, regnabunt. Remanet igitur, ut cum audimus, *Sacerdotes Dei et Christi regnabunt cum illo mille annis, et cum finiti fuerint mille anni, solvetur satanas de custodia sua*; aut non regni hujus sanctorum intelligamus annos mille finiri, sed vinculi diaboli atque custodiæ; ut annos mille, id est, annos omnes suos, quæque pars habeat diversis ac propriis prolixitatibus finiendos, ampliore sanctorum regno, brevioris diaboli vinculo: aut certe, quoniam trium annorum et sex mensium brevissimum spatium est, computari noluisse credatur, sive quod minus satanæ vinculum, sive quod amplius videtur regnum habere sanctorum: sicut de quadringentis annis in sexto decimo hujus operis volumine disputavi (cap. 24); quoniam plus aliquid erant¹, et tamen quadringenti sunt nuncupati: et talia sæpe reperuntur in Litteris sacris, si quis advertat.

CAPUT XIV. — *De damnatione diaboli cum suis, et per recapitulationem de resurrectione corporea omnium mortuorum, et de judicio ultimæ retributionis.*

Post hanc autem commemorationem novissimæ persecutionis, breviter complectitur totum, quod ultimo jam judicio diabolus, et cum suo principe civitas inimica passura est. Dicit enim: *Et diabolus qui seducebat eos, missus est in stagnum ignis et sulphuris, quo bestia et pseudopropheta; et cruciabitur² die ac nocte in sæcula sæculorum* (Apoc. xx, 9 et 10). Bestiam bene intelligi ipsam impiam civitatem, supra jam diximus. Pseudo vero propheta ejus aut Antichristus est, aut imago illa, id est signum, de quo ibi locuti sumus. Post hæc ipsum novissimum judicium, quod erit in secunda resurrectione mortuorum, quæ corporum est, recapitulando narrans, quomodo fuerit sibi revelatum, *Et vidi, inquit, thronum magnum et candidum, et sedentem super eum, cujus a facie fugit cælum et terra, et locus eorum inventus non est* (Ibid., 11). Non ait, Vidi thronum magnum et candidum et sedentem super eum, et ab ejus facie fugit cælum et terra; quoniam non tunc factum est, id est, antequam esset de vivis et mortuis judicatum: sed eum se vidisse dixit in throno sedentem, a cujus facie fugit cælum et terra; sed postea. Peracto quippe judicio tunc esse desinet hoc cælum et hæc terra, quando incipiet esse cælum novum et terra nova. Mutatione namque rerum, non omni modo interitu transibit hic mundus. Unde et Apostolus ait, *Præterit enim figura hujus mundi, volo vos sine sollicitudine esse* (1 Cor. vii, 31 et 32). Figura ergo præterit, non natura. Cum ergo se Joannes vidisse dixisset sedentem super thronum, a cujus facie, quod postea futurum est, fugit cælum et terra: *Et vidi, inquit, mortuos magnos et*

pusillos; et aperti sunt libri; et alius liber apertus est, qui est vitæ uniuscujusque (a); et judicati sunt mortui ex ipsis scripturis librorum secundum facta sua (Apoc. xx, 12). Libros dixit esse apertos, et librum: sed librum cujusmodi non tacuit; *qui est, inquit, vitæ uniuscujusque*. Ergo illi libri, quos priore loco posuit, intelligendi sunt sancti et veteres et novi, ut in illis ostenderetur quæ Deus fieri sua mandata jussisset: in illo autem qui est vitæ uniuscujusque, quid horum quisque non fecisset, sive fecisset. Qui liber si carnaliter cogitetur, quis ejus magnitudinem, aut longitudinem, valeat æstimare? aut quanto tempore legi poterit liber, in quo scriptæ sunt universæ vitæ universorum? An tantus Angelorum numerus aderit, quantus hominum erit, et vitam suam quisque ab Angelo sibi adhibito audiet recitari? Non ergo unus liber erit omnium, sed singuli singulorum. Scriptura vero ista unum volens intelligi, *Et alius, inquit, liber apertus est*. Quædam igitur vis est intelligenda divina, qua fiet ut cuique opera sua, vel bona vel mala, cuncta in memoriam revocentur, et mentis intuita mira celeritate cernantur; ut accuset, vel excuset scientia conscientiam; atque ita simul et omnes et singuli judicentur. Quæ nimirum vis divina, libri nomen accepit. In ea quippe quodammodo legitur, quidquid ea faciente recolitur³. Ut autem ostendat, qui mortui judicandi sint, pusilli et magni, recapitulando dicit tanquam ad id rediens, quod præterierat, potiusve distulerat: *Et exhibuit mare mortuos qui in eo erant, et mors et infernus reddiderunt mortuos quos in se habebant* (Ibid., 13). Hoc procul dubio prius factum est, quam essent mortui judicati: et tamen illud prius dictum est. Hoc est ergo quod dixi, recapitulando eum ad id rediisse quod interniserat. Nunc autem ordinem tenuit, atque ut explicaretur ipse ordo, commodius etiam de judicatis mortuis, quod jam dixerat, suo repetivit loco. Cum enim dixisset, *Et exhibuit mare mortuos qui in eo erant, et mors et infernus reddiderunt mortuos quos in se habebant*; mox addidit quod paulo ante posuerat, *Et judicati sunt singuli secundum facta sua*. Hoc est enim quod supra dixerat, *Et judicati sunt mortui secundum facta sua*.

CAPUT XV. — *Qui sint mortui, quos ad judicium exhibuit mare, vel quos mors et inferi reddiderunt.*

Sed qui sunt mortui, quos exhibuit mare, qui in eo erant? Neque enim qui in mari moriuntur, non sunt in inferno, aut corpora eorum servantur in mari; aut, quod est absurdius, mare habebat bonos mortuos, et infernus malos. Quis hoc putaverit? Sed profecto convenienter quidam hoc loco mare pro isto sæculo positum accipiunt. Cum ergo et quos hic inveniet Christus in corpore constitutos, simul significaret cum iis qui resurrecturi sunt judicandos, etiam ipsos mortuos appellavit, et bonos quibus dicitur, *Mortui enim estis, et vita vestra abscondita est cum Christo in Deo* (Coloss. iii, 3); et malos de quibus

¹ In quosdam Mss., plus aliqui erant.

² Sic manuscripti juxta græcum. Editi vero, et pseudopropheta cruciabitur. Porro particula, et, proxime ante verbum, cruciabitur, deest quidem in impressis editionibus Vulgatae, sed in antiquis tamen Corbelensibus Bibliis latinis reperitur.

³ Ita Mss. At editi, quidquid a faciente recolitur.

(a) Abest vox, uniuscujusque, a Vulgata et a græco textu Apocalypseos.

dicitur. *Sine mortuos sepelire mortuos suos (Math. viii, 22)*. Possunt mortui etiam propter hoc dici, quod mortalia gerunt corpora : unde Apostolus, *Corpus quidem, inquit, mortuum est propter peccatum ; spiritus autem vita est propter justitiam (Rom. viii, 10)* : utrumque in homine vivente, atque in hoc corpore constituto esse demonstrans, et corpus mortuum, et spiritum vitam. Nec tamen dixit corpus mortale, sed mortuum : quamvis eadem paulo post etiam mortalia corpora (*Ibid. 11*), sicut usitatius vocantur, appellet. Hos ergo mortuos exhibuit mare, qui in eo erant, id est, exhibuit homines hoc sæculum, quicumque in eo erant, quia nondum obierant. *Et mors et infernus, inquit, reddiderunt mortuos, quos in se habebant*. Mare exhibuit, quia sicut inventi sunt, adfuerunt : mors vero et infernus reddiderunt, quoniam vitæ, de qua jam exierant, revocarunt. Nec frustra fortasse non satis fuit ut diceret *mors, aut infernus* ; sed utrumque dictum est : mors, propter bonos, qui tantummodo mortem perpeti potuerunt, non et infernum ; infernus autem propter malos, qui etiam pœnas apud inferos pendunt. Si enim non absurde credi videtur, antiquos etiam sanctos, qui venturi Christi tenuerunt fidem, locis quidem a tormentis impiorum remotissimis, sed apud inferos fuisse, donec eos inde sanguis Christi et ad ea loca descensus erueret, profecto deinceps boni fideles effuso illo pretio jam redempti, prorsus inferos nesciunt, donec etiam receptis corporibus, bona recipiant quæ merentur. Cum autem dixisset, *Et judicati sunt singuli secundum facta sua* ; breviter subjecit, quemadmodum fuerint judicati : *Et mors et infernus, inquit, missi sunt in stagnum ignis* : his nominibus significans diabolum, quoniam mortis est auctor et infernarum pœnarum, universamque simul dæmonum societatem. Hoc est enim quod supra evidentius præoccupando jam dixerat, *et diabolus qui seducebat eos, missus est in stagnum ignis et sulphuris*. Quod ibi vero obscurius adjunxerat, dicens, *Quo et bestia, et pseudopropheta* ; hic apertius, *Et qui non sunt, inquit, inventi in libro vitæ scripti, missi sunt in stagnum ignis (Apoc. xv, 14, 15)*. Non Deum liber istæ commemorat, ne oblivione fallatur : sed prædestinationem significat eorum, quibus æterna dabitur vita. Neque enim nescit eos Deus, et in hoc libro legit, ut sciat : sed potius ipsa ejus præscientia de illis, quæ falli non potest, liber est vitæ, in quo sunt scripti, id est, ante præcogniti.

CAPUT XVI. — De cælo novo, et terra nova.

Finito autem judicio, quo prænuntiavit judicandos malos, restat ut etiam de bonis dicat. Jam enim explicavit quod breviter a Domino dictum est, *Ibunt isti in supplicium æternum* ; sequitur, ut explicet quod etiam ibi connectitur, *Justi autem in vitam æternam (Math. xxv, 46)*. *Et vidi, inquit, cælum novum, et terram novam. Nam primam cælum et terra prima recesserunt, et mare jam non est (Apoc. xxi, 1)*. Isto fiet ordine, quod superius præoccupando jam dixit,

¹ In omnibus Mss. deest, *prima*.

SANCTI AUGUSTINI VII.

vidisse se super thronum sedentem, a cujus facie lucet cælum et terra. Judicatis quippe his, qui scripti non sunt in libro vitæ, et in æternum ignem missis (qui ignis ejusmodi, et in qua mundi vel rerum parte futurus sit, hominem scire arbitror neminem, nisi forte cui Spiritus divinus ostendit), tunc figura hujus mundi mundanorum ignium conflagratione præteribit, sicut factum est mundanarum aquarum inundatione diluvium. Illa itaque, ut dixi, conflagratione mundana elementorum corruptibilium qualitates, quæ corporibus nostris corruptibilibus congruebant, ardens penitus interibit ; atque ipsa substantia eas qualitates habebit, quæ corporibus immortalibus mirabili mutatione convenient : ut scilicet mundus in melius innovatus, apte accomodetur hominibus etiam carne in melius innovatis. Quod autem ait, *Et mare jam non est* : utrum maximo illo ardore siccetur, an et ipsum vertatur in melius, non facile dixerim. Cælum quippe novum et terram novam futuram legimus : de mari autem novo aliquid me uspiam legisse, non recolo ; nisi quod in hoc eodem libro reperitur, *tanquam mare vitreum simile crystallo (Apoc. iv, 6 ; xv, 2)*. Sed tunc non de isto fine sæculi loquebatur : nec proprie dixisse videtur mare, sed *tanquam mare*. Quamvis et nunc, sicut amat prophetica locutio propriis verbis translata miscere, ac sic quodammodo velare quod dicitur, potuit de illo mari dicere, *Et mare jam non est* ; de quo supra dixerat, *Et exhibuit mare mortuos, qui in eo erant*. Jam enim tunc non erit hoc sæculum vita mortalium turbulentum et procellosum, quod maris nomine signavit.

CAPUT XVII. — De Ecclesiæ glorificatione sine fine post finem ¹.

Et civitatem, inquit, magnam Jerusalem novam vidi descendentem de cælo a Deo, aptatam, quasi novam nuptiam ornatam marito suo. Et audivi vocem magnam de throno dicentem, Ecce tabernaculum Dei cum hominibus, et habitabit cum eis, et ipsi erunt populus ejus, et ipse Deus erit cum eis. Et absterget Deus omnem lacrymam ab oculis eorum ; et mors jam non erit, neque luctus, neque clamor, sed nec dolor ullus, quia priora abierunt. Et dixit sedens in throno, Ecce nova facio omnia (Id. xxi, 2-5). De cælo descendere ista civitas dicitur, quoniam cælestis est gratia, qua Deus eam fecit. Propter quod ei dicit etiam per Isaiam, *Ego sum Dominus faciens te (a) (Isai. xlv, 8)*. Et de cælo quidem ab initio sui descendit, ex quo per hujus sæculi tempus, gratia Dei desuper veniente per lavacrum regenerationis in ² Spiritu sancto misso de cælo subinde cives ejus accrescunt. Sed per judicium Dei, quod erit novissimum per ejus Filium Jesum Christum, tanta ejus et tam nova de Dei munere claritas apparebit, ut nulla remaneant vetustatis vestigia : quandoquidem et corpora ad incorruptionem atque immortalitatem novam ex vetere corruptione atque mor-

¹ Ita Mss. Editi vero, *post mortem*.

² Plures manuscripti omittunt, *in*.

(a) sequitur editionem septuaginta Interpretum, quæ græce habet, *o ktisas se* ; ubi vulgata latine, *creavi eum*.

(Vingt-deux.)

talitate transibunt. Nam hoc de isto tempore accipere, quo regnat¹ cum Rege suo mille annis, impudentiæ nimie mihi videtur: cum apertissime dicat, *Absterget Deus omnem lacrymam ab oculis eorum; et mors jam non erit, neque luctus, neque clamor, sed nec dolor ullus*. Quis vero tam sit absurdus, et obstinatissima contentione vesanus, qui audeat affirmare in hujus mortalitatis ærumnis, non dico populum sanctum, sed unumquemque sanctorum, qui hanc vel ducat, vel ducturus sit, vel duxerit vitam, nullas habentem lacrymas et dolores; cum potius quanto quisque est sanctior et desiderii sancti plenior, tanto sit ejus in orando fletus uberior? Annon est vox civis² supernæ Jerusalem, *Factæ sunt mihi lacrymæ meæ panis die ac nocte (Psal. xli, 4)?* et, *Lavabo per singulas noctes lectum meum, in lacrymis meis stratum meum rigabo (Psal. vi, 7)?* et, *Gemitus meus non est absconditus a te (Psal. xxxvii, 10)?* et, *Dolor meus renovatus est (Psal. xxxviii, 3)?* Aut vero non ejus filii sunt, qui ingemiscunt gravati, in quo nolunt exspoliari, sed supervestiri, ut absorbeat mortale³ a vita (II Cor. v, 4)? Nonne ipsi sunt, qui primitias habentes Spiritus, in semetipsis ingemiscunt, adoptionem expectantes, redemptionem corporis sui (Rom. viii, 23)? An ipse apostolus Paulus non erat supernus Jerosolymitanus, vel non multo magis hoc erat, quando pro Israelitis fratribus carnalibus suis tristitia illi erat magna, et continuus dolor cordi ejus (Rom. ix, 2)? Quando autem mors non erit in ista civitate, nisi quando dicetur, *Ubi est, mors, contentio tua (a)? ubi est, mors, aculeus tuus? Aculeus autem mortis est peccatum (I Cor. xv, 55 et 56)?* Quod tunc utique non erit, quando dicetur, *Ubi est?* Nunc vero non quilibet infirmus⁴ civis illius civitatis, sed idem ipse Joannes in Epistola sua clamat, *Si dixerimus quia peccatum non habemus, nos ipsos seducimus, et veritas in nobis non est (I Joan. i, 8)*. Et in hoc quidem libro, cujus nomen est Apocalypsis, obscure multa dicuntur, ut mentem legentis exerceant, et pauca in eo sunt, ex quorum manifestatione indagentur cætera cum labore: maxime quia sic eadem multis modis repetit, ut alia atque alia dicere videatur; cum aliter atque aliter hæc ipsa dicere vestigetur. Verum in his verbis, ubi ait, *Absterget Deus omnem lacrymam ab oculis eorum; et mors jam non erit, neque luctus, neque clamor, sed nec dolor ullus*: tanta luce dicta sunt de sæculo futuro et immortalitate atque æternitate sanctorum (tunc enim solum, atque ibi solum ista non erunt), ut nulla debeamus in Litteris sacris quærere vel legere manifesta, si hæc putaverimus obscura.

CAPUT XVIII. — *Quid apostolus Petrus de novissimo Dei judicio prædicavit.*

Nunc jam videamus, quid etiam apostolus Petrus

¹ Editi, *regnant*. At Mss., *regnat*: refertur ad civitatem celestem.

² Sic manuscripti. At editi, loco, *civis*, habent, *civitatis*: minus bene.

³ Editi, *mortale hoc*. Abest, *hoc*, a manuscriptis.

⁴ Plerique Mss., *infirmus*.

(a) Videtur igitur non, *nikos*; legisse a; ud Paulum, ut vulgata, quæ *victoria* vertit; sed, *nikos*. Et sic Ambrosius et Hieronymus interim legunt. Lvd. Vivus.

de hoc judicio scripserit: *Veniet, inquit, in novissimo dierum illusione illudentes, secundum proprias concupiscentias suas euntes, et dicentes, Ubi est promissum præsentis ipsius? Ex quo enim patres dormierunt, sic omnia perseverant ab initio creaturæ. Latet enim illos hoc volentes, quia cæli erant olim et terra de aqua, et per aquam constituta Dei verbo; per quæ, qui tunc erat mundus, aqua inundatus deperit. Qui autem nunc sunt cæli et terra, eodem verbo repositi sunt, igni reservandi in diem judicii et perditionis hominum impiorum. Hoc unum vero non lateat vos, charissimi, quia unus dies apud Dominum, sicut mille anni; et mille anni, sicut dies unus. Non tardat Dominus promissum, sicut quidam tarditatem existimant: sed patienter fert propter vos, nolens aliquem perire, sed omnes in penitentiam converti. Veniet autem dies Domini ut fur, in quo cæli magno impetu transcurrent: elementa autem ardentia resolventur; et terra, et quæ in ipsa sunt opera exurentur. His ergo omnibus pereuntibus, quales oportet esse vos in sanctis conversationibus expectantes, et properantes ad præsentiam diei Domini, per quam cæli ardentia solventur, et elementa ignis ardore decoquentur? Novos vero celos, et terram novam, secundum promissa ipsius, expectamus, in quibus justitia inhabitat (II Petri iii, 3-13)*. Nihil hic dixit de resurrectione mortuorum: sed sane de perditione mundi hujus satis. Ubi etiam commemorans factum ante diluvium, videtur admonuisse quodammodo, quatenus in fine hujus sæculi mundum istum perituum esse credamus. Nam et illo tempore perisse dixit, qui tunc erat, mundum: nec solum orbem terræ, verum etiam cælos, quos utique istos aërios intelligimus, quorum locum ac spatium tunc aqua crescendo superaverat. Ergo totus, aut pene totus aer iste ventosus (quod cælum vel potius cælos vocat, sed istos utique imos, non illos supremos, ubi sol, et luna, et sidera constituta sunt), conversus fuerat in humidam qualitatem (a); atque hoc modo cum terra perierat, cujus terræ utique prior facies fuerat deleta diluvio. *Qui autem nunc sunt, inquit, cæli et terra, eodem verbo repositi sunt, igni reservandi in diem judicii et perditionis hominum impiorum*. Proinde qui cæli, et quæ terra, id est, qui mundus, pro eo mundo qui diluvio periit, ex eadem aqua repositus est, ipse igni novissimo reservatur in diem judicii et perditionis hominum impiorum. Nam et hominum, propter magnam quandam commutationem, non dubitat dicere perditionem futuram; cum tamen eorum, quamvis in æternis pœnis, sit mansura natura. Quærat forsitan aliquis, si post factum judicium mundus iste ardebit, antequam pro illo cælum novum, et terra nova reponatur, eo ipso tempore conflagrationis ejus ubi erunt sancti, quomodo eos habentes corpora in aliquo corporali loco esse necesse sit. Possumus respondere, futuros eos esse in superioribus partibus, quo ita non ascendet flamma illius incendii, quemadmodum nec unda diluvii. Talia quippe illis inerunt corpora, ut illic sint, ubi esse voluerint. Sed

(a) Conf. lib. 3 de Gen. ad Litt., nn. 2, 3.

nec ignem conflagrationis illius pertimescent immortales atque incorruptibiles facti : sicut ¹ virorum trium corruptibilia corpora atque mortalia, in camino ardenti vivere illæsa potuerunt (*Dan.* III, 24).

CAPUT XIX. — *Quid apostolus Paulus Thessalonicensibus scripserit de manifestatione Antichristi, cujus tempus dies Domini subsequetur.*

1. Multas evangelicas apostolicasque sententias de divino isto iudicio novissimo video mihi esse prætereundas, ne hoc volumen in nimiam longitudinem provolvatur ² : sed nullo modo est prætereundus apostolus Paulus, qui scribens ad Thessalonicenses, *Rogamus, inquit, vos, fratres, per adventum Domini nostri Jesu Christi, et nostræ congregationis in ipsum, ut non cito moveamini mente, neque terreamini, neque per spiritum, neque per verbum, neque per epistolam tanquam per nos missam, quasi instet dies Domini : ne quis vos seducat ullo modo. Quoniam nisi venerit refuga (a) primum, ut revelatus fuerit homo peccati, filius interitus, qui adversatur et superextollitur supra omne quod dicitur Deus, aut quod colitur ; ita ut in templo Dei sedeat, ostentans ³ se tanquam sit Deus. Non retinetis in memoria, quod adhuc cum essem apud vos, hæc dicebam vobis ? Et nunc quid detineat scitis, ut reveletur in suo tempore. Jam enim mysterium iniquitatis operatur. Tantum qui modo tenet teneat, donec de medio fiat : et tunc revelabitur iniquus ⁴, quem Dominus Jesus interficiet spiritu oris sui, et evacuabit illuminatione præsentis sæculi, cujus est præsentis secundum operationem satanæ, in omni virtute, et signis, et prodigiis mendacii, et in omni seductione iniquitatis, his qui pereunt ; pro eo quod dilectionem veritatis non receperunt, ut salvi fierent. Et ideo mittet illis Deus operationem erroris, ut credant mendacio, et judicentur omnes qui non crediderunt veritati, sed consenserunt iniquitati (II Thess. II, 1-11).*

2. Nulli dubium est, eum de Antichristo ista dixisse ; diemque iudicii (hunc enim ⁵ appellat diem Domini) non esse venturum, nisi ille prior venerit, quem refugam vocat, utique a Domino Deo. Quod si de omnibus impiis merito dici potest, quanto magis de isto ? Sed in quo templo Dei sit sessurus ⁶, incertum est : utrum in illa ruina templi, quod a Salomone rege constructum est, an vero in Ecclesia. Non enim templum alicujus idoli aut dæmonis, templum Dei Apostolus diceret. Unde nonnulli, non ipsum principem, sed universum quadammodo corpus ejus, id est, ad eum pertinentem hominum multitudinem, simul cum ipso suo principe hoc loco intelligi Antichristum volunt : rectiusque putant etiam latine dici, sicut in græco est, non, in templo Dei ; sed, in templum Dei se-

¹ Nostri codices, si. M.

² Aliquot MSS., *protrahatur.*

³ Pures e veteribus libris, *ostendens*

⁴ In exaratis, *iniquus ille.* Abest, *ille*, a manuscriptis et a græco textu Apostoli.

⁵ Editi, *ista dixisse dieque iudicii.* Hunc enim, etc. Emendantur ex manuscriptis.

⁶ Editi, *ut Deus sit sessurus.* Abest, *ut Deus*, a manuscriptis.

(a) ¹⁰ Vulgata, *discessio.*

deat (a), tanquam ipse sit templum Dei, quod est Ecclesia : sicut dicimus, Sedet in amicum, id est, velut amicus ; vel si quid aliud isto locutionis genere dici solet. Quod autem ait, *Et nunc quid detineat scitis*, id est, quid sit in mora, quæ causa sit dilationis ejus, ut reveletur in suo tempore, scitis : quoniam scire illos dixit, aperte hoc dicere noluit. Et ideo nos qui nescimus quod illi sciebant, pervenire cum labore ad id quod sensit Apostolus, cupimus, nec valemus : præsertim quia et illa quæ addidit, hunc sensum faciunt obscuriorem. Nam quid est, *Jam enim mysterium iniquitatis operatur. Tantum qui modo tenet teneat, donec de medio fiat ; et tunc revelabitur iniquus ?* Ego prorsus quid dixerit, me fateor ignorare. Suspicionem tamen hominum, quas vel audire, vel legere potui, non tacebo.

3. Quidam putant hoc de imperio dictum fuisse Romano ; et propterea Paulum apostolum non id aperte scribere voluisse, ne calumniam videlicet incurreret, quod Romano imperio male optaverit, cum speraretur æternum : ut hoc quod dixit, *Jam enim mysterium iniquitatis operatur*, Neronem voluerit intelligi, cujus jam facta velut Antichristi videbantur. Unde nonnulli ipsum resurrecturum, et futurum Antichristum suspicantur (b). Alii vero nec occisum putant, sed subtractum potius, ut putaretur occisus ; et vivum occultari in vigore ipsius ætatis, in qua fuit, cum crederetur extinctus, donec suo tempore reveletur, et restitatur in regnum (c). Sed multum mihi mira est hæc opinantium tanta præsumptio. Illud tamen quod ait Apostolus, *Tantum qui modo tenet teneat, donec de medio fiat* : non absurde de ipso Romano imperio creditur dictum, tanquam dictum sit, *Tantum qui modo imperat imperet, donec de medio fiat*, id est, de medio tollatur. *Et tunc revelabitur iniquus* : quem significari Antichristum, nullus ambigit. Alii vero et quod ait, *Quid detineat scitis ; et, mysterium operari iniquitatis*, non putant dictum, nisi de malis et fictis, qui sunt in Ecclesia, donec perveniant ad tantum numerum, qui Antichristo magnum populum faciat ; et hoc esse mysterium iniquitatis, quia videtur occultum. Hortari autem Apostolum fideles, ut in fide quam tenent tenaciter perseverent, dicendo, *Tantum qui modo tenet teneat, donec de medio fiat* : hoc est, donec exeat de medio Ecclesiæ mysterium iniquitatis, quod nunc occultum est. Ad ipsum enim mysterium pertinere arbitrantur, quod ait in Epistola sua Joannes evangelista, *Pueri, novissima hora est : et sicut audistis, quod Antichristus sit venturus ; nunc autem antichristi multi facti sunt : unde cognoscimus quod novissima sit hora. Ex nobis exierunt : sed non erant ex nobis. Quod si fuissent ex nobis, permansissent utique nobiscum (I Joan. II, 18 et 19).* Sicut ergo ante finem in hac hora, inquit, quam Joannes novissimam dicit, exierunt multi hæretici de medio Ecclesiæ, quos multos

(a) *Ὡς ἄνθρωπος ἐν τῷ ναῦ τοῦ Θεοῦ ὡς Θεοῦ καθέσται.*

(b) Conf. Hieron. in *Dan.* XI, et Sulpitium Sever. lib. 2 *Hist.*, cap. 29.

(c) Vid. Suet. in Nerone, cap. 57, et Tacit. *Hist.* lib. 2, cap. 8.

dicit antichristos : ita omnes tunc inde exibunt , qui non ad Christum , sed ad illum novissimum Antichristum pertinebunt , et tunc revelabitur .

4. Alius ergo sic , alius autem sic Apostoli obscura verba conjunctant : quod tamen eum dixisse non dubium est , Non veniet ad vivos et mortuos judicandos Christus , nisi prius venerit ad seducendos in anima mortuos adversarius ejus Antichristus ; quamvis ad occultum jam judicium Dei pertineat , quod ab illo seducentur . *Præsentia* quippe *ejus erit* , sicut dictum est , *secundum operationem satanæ , in omni virtute , et signis , et prodigiis mendacii , et in omni seductione iniquitatis , his qui pereunt* . Tunc enim solvetur satanas , et per illum Antichristum in omni sua virtute mirabiliter quidem , sed mendaciter operabitur . Quæ ¹ solet ambigi utrum propterea dicta sint signa et prodigia mendaci , quoniam mortales sensus per phantasmata decepturus est ; ut quod non facit , facere videatur : an quia illa ipsa , etiamsi erunt vera prodigia , ad mendacium pertrahent credituros non ea potuisse nisi divinitus fieri , virtutem diaboli nescientes ; maxime quando tantam , quantam nunquam habuit , acceperit potestatem ² . Non enim quando de cælo ignis cecidit , et tantam familiam cum tantis gregibus pecorum sancti Job uno impetu absumpsit , et turbo irruens et domum dejiciens filios ejus occidit (*Job 1*) , phantasmata fuerunt : quæ tamen fuerunt opera satanæ , cui Deus dederat hanc potestatem . Propter quid horum ergo dicta sint prodigia et signa mendacii , tunc potius apparebit . Sed propter quodlibet horum dictum sit , seducentur eis signis ³ atque prodigiis , qui seduci merebuntur : *pro eo quod dilectionem veritatis , inquit , non receperunt , ut salvi fierent* . Nec dubitavit Apostolus addere , et dicere : *Ideo mittet illis Deus operationem erroris , ut credant mendacio (a)* . Deus enim mittet , quia Deus diabolum facere ista permittet , justo ipse judicio , quamvis faciat ille iniquo malignoque consilio . *Ut judicentur , inquit , omnes qui non crediderunt veritati , sed consenserunt iniquitati* . Proinde judicati seducentur , et seducti judicabuntur . Sed judicati seducentur illis judiciis Dei occulte justis , juste occultis , quibus ab initio peccati rationalis creaturæ nunquam judicare cessavit : seducti autem judicabuntur novissimo manifestoque judicio per Jesum Christum , justissime judicatum .

CAPUT XX. — *Quid idem apostolus in prima ad eandem Epistola de resurrectione mortuorum docuerit* .

1. Sed hic Apostolus tacuit de resurrectione mortuorum : ad eosdem autem scribens in Epistola prima , *Nolumus , inquit , ignorare vos , fratres , de dormientibus , ut non contristemini , sicut et cæteri , qui spem non habeant . Nam si credimus , quod Jesus mortuus est , et resurrexit : ita et Deus eos qui dormierunt per*

¹ Ita Mss. At editi, *Quod* .

² Sic Vind. Am. et Mss. At Er. et Lov., *accipiet potestatem* .

³ Sola editio Lovaniensium, *seducentur ejus signis* .

(a) De Judæis hoc exponunt Ambrosius , Joannes Chrysostomus , Theodoretus , alii , et ipse Hieronymus , quæstione 11 in Epistola 151 , ad Algasium . *Coquæus* .

Jesum , adducet cum eo . Hoc enim vobis dicimus in verbo Domini , quia nos viventes , qui reliqui sumus in adventum Domini , non præveniemus eos qui ante dormierunt : quoniam ipse Dominus in jussu , et in voce Archangeli , et in tuba Dei descendet de cælo ; et mortui in Christo resurgent primo ¹ ; deinde nos viventes , qui reliqui sumus , simul cum illis rapiemur in nubibus in obviam Christo in aera ; et ita semper cum Domino erimus (*1 Thess. iv. 12-16*) . Hæc verba apostolica resurrectionem mortuorum futuram , quando veniet Dominus Christus , utique ad vivos et mortuos judicandos , præclarissime ostendunt .

2. Sed quæri solet , utrum illi quos hic viventes inventurus est Christus , quorum personam in se atque illos qui tunc secum vivebant , transfigurabat Apostolus , nunquam omnino morituri sunt ; an ipso temporis puncto , quo cum resurgentibus rapiemur in nubibus in obviam Christo in aera , ad immortalitatem per mortem mira celeritate transibunt (a) . Neque enim dicendum est , fieri non posse , ut dum per aera in sublime portantur , in illo spatio et moriantur , et reviviscant . Quod enim ait , *Et ita semper cum Domino erimus* : non sic accipiendum est , tanquam in aere nos dixerit semper cum Domino esse mansuros ; quia nec ipse utique ibi manebit , quia veniens transiturus est . Venienti quippe ibitur obviam , non manenti : sed *ita cum Domino erimus* , id est , sic erimus habentes ² corpora sempiterna , ubicumque cum illo fuerimus . Ad hunc autem sensum , quo existimemus etiam illos , quos hic vivos inventurus est Dominus , in ipso parvo spatio et passuros mortem et accepturos immortalitatem , ipse Apostolus nos videtur urgere , ubi dicit , *In Christo omnes vivificabuntur (1 Cor. xv. 22)* : cum alio loco de ipsa loquens resurrectione corporum dicat , *Tu quod seminas , non vivificatur , nisi moriatur (Ibid. , 36)* . Quomodo igitur , quos viventes hic Christus inveniet , per immortalitatem in illo vivificabuntur , etsi non moriantur ; cum videamus propter hoc esse dictum , *Tu quod seminas , non vivificatur , nisi moriatur?* ³ Aut si recte non dicimus seminari , nisi ea corpora hominum , quæ moriendo quoquo modo revertuntur in terram ; sicut sese habet etiam illa in transgressorem patrem generis humani divinitus prolata sententia , *Terra es , et in terram ibis (Gen. iii. 19)* : fatendum est istos , quos nondum de corporibus egressos , cum veniet Christus , inveniet , et istis verbis Apostoli , et illis de Genesi non teneri : quoniam sursum in nubibus rapti , non utique seminantur ; quia nec eunt in terram , nec redeunt ; sive nullam prorsus experiantur mortem , sive paululum in aere moriantur .

3. Sed aliud rursus occurrit , quod idem dixit apostolus , cum de resurrectione corporum ad Corinthios

¹ Nostri codd., *primi* . M .

² In editis , *semper habentes* . Abest , *semper* , a manuscriptis .

³ Editi , *nisi prius moriatur* . Particula , *prius* , non est in manuscriptis , neque in græco textu Apostoli .

(a) Vid. Epist. 195 , ad Mercatorem , lib. de octo Dulciti quæst. , q. 3 , et alibi .

loqueretur : *Omnes resurgemus* ; vel, sicut alii codices habent, *Omnes dormiemus* (a) (I Cor. xv, 51). Cum ergo nec resurrectionem fieri possit, nisi mors præcesserit ; nec dormitionem possimus illo loco intelligere, nisi mortem ; quomodo omnes vel dormient, vel resurgent, si tam multi, quos in corpore inventurus est Christus, nec dormient, nec resurgent ? Si ergo sanctos, qui reperientur Christo veniente viventes, eique in obviam rapientur, crediderimus in eodem raptu de mortalibus corporibus exituros, et ad eadem mox immortalia redituros, nullas in verbis Apostoli patiemur angustias, sive ubi dicit, *Tu quod seminas, non vivificatur, nisi moriatur* ; sive ubi dicit, *Omnes resurgemus* ; aut, *Omnes dormiemus* : quia nec illi per immortalitatem vivificabuntur, nisi, quamlibet paululum, tamen ante moriantur ; ac per hoc et a resurrectione non erunt alieni, quam dormitio præcedit¹, quamvis brevissima, non tamen nulla. Cur autem nobis incredibile videatur, illam multitudinem corporum in aere quodammodo seminari, atque ibi protinus immortaliter atque incorruptibiliter reviviscere, cum credamus, quod idem ipse Apostolus apertissime dicit², in ictu oculi futuram resurrectionem (I Cor. xv, 52), et in membra sine fine victura tanta facilitate tamque inæstimabili velocitate rediturum antiquissimorum cadaverum pulverem ? Nec ab illa sententia, qua homini dictum est, *Terra es, et in terram ibis*, futuros illos sanctos arbitramur immunes, si eorum morientium in terram non recident corpora, sed sicut in ipso raptu morientur, ita et resurgent, dum ferentur in aera. *In terram* quippe *ibis*, est, in hoc ibis amissa vita, quod eras antequam sumeres vitam : id est, Hoc eris exanimatus³, quod eras antequam esses animatus. Terræ quippe insufflavit Deus in faciem flatum vitæ, cum factus est⁴ homo in animam vivam : tanquam diceretur, *Terra es animata*, quod non eras ; terra eris exanimis, sicut eras. Quod sunt et antequam putrescant omnia corpora mortuorum : quod erunt et illa, si morientur, ubicumque moriantur, cum vita carebunt, quam continuo receptura sunt. Sic ergo ibunt in terram, quia ex vivis hominibus terra erunt : quemadmodum it in cinerem, quod sit cinis ; it in vetustatem, quod sit vetus ; it in testam, quod ex luto sit testa : et alia sexcenta sic loquimur. Quomodo autem sit futurum quod nunc pro nostræ ratiunculæ viribus utcumque conjicimus, tunc erit potius, ut nosse possimus. Resurrectionem quippe mortuorum futuram esse in carne⁵, quando Christus venturus est vivos judicaturus et mortuos, oportet, si christiani esse volumus, ut credamus. Sed non ideo de hac re inanis est fides nostra, si quemadmodum futura sit, perfecte comprehendere non valemus. Verum jam, sicut supra

¹ Mss., *quam dormitione præcedunt*.

² Editi, *postolus alibi apertissime dicit*. Abest, *alibi*, a Mss.

³ sic Mss. Editi, *exanimis*.

⁴ In editis, *cum factus esset*. At Mss., *cum factus est*.

⁵ Mss., *futuram et in carne*. — Recte. M.

(a) Vid. Ejust. 205, ad Consentium, n. 14, et lib. de octo Dulciliæ Quæst., q. 3, n. 4.

promisimus, de hoc judicio Dei novissimo etiam prophetici veteres libri quid prænuntiaverint, quantum satis esse videbitur, debemus ostendere : quæ, sicut arbitror, non tanta mora necesse erit tractari et exponi, si istis, quæ præmisimus, lector curaverit adjuvari.

CAPUT XXI. — *Quid Isaias propheta de mortuorum resurrectione et de retributione judicii sit locutus.*

1. Propheta Isaias, *Resurgent, inquit, mortui, et resurgent qui in sepulcris erant : et lætabuntur omnes qui sunt in terra ; ros enim qui abs te est, sanitas illis est : terra vero impiorum cadet* (Isai. xxvi, 19, sec. LXX). Totum illud superius ad resurrectionem pertinet beatorum. Quod autem ait, *Terra vero impiorum cadet*, bene intelligitur dictum, Corpora vero impiorum ruina damnationis excipiet. Jam porro si de bonorum resurrectione quod dictum est, diligentius et distinctius velimus intueri, ad primam referendum est quod dictum est, *Resurgent mortui* ; ad secundam vero quod sequitur, *et resurgent qui in sepulcris erant*. Jam si et illos inquiramus sanctos, quos hic vivos inventurus est Dominus, eis congrue deputabitur quod adjunxit, *Et lætabuntur omnes qui sunt in terra ; ros enim qui abs te est, sanitas illis est*. Sanitatem loco isto, immortalitatem rectissime accipimus. Ea namque est plenissima sanitas, quæ non reficitur alimentis tanquam quotidianis medicamentis. Item de judicii die spem prius dans bonis, deinde terrens malos, idem propheta sic loquitur : *Hæc dicit Dominus, Ecce ego declino in eos ut flumen pacis, et ut torrens inundans gloriam gentium. Filiti eorum super humeros portabuntur, et super genua consolabuntur. Quemadmodum si quem mater consoletur, ita ego vos consolabor ; et in Jerusalem consolabimini : et videbitis, et gaudebit cor vestrum, et ossa vestra ut herba¹ exorientur. Et cognoscetur manus Domini colentibus eum : et comminabitur contumacibus. Ecce enim Dominus ut ignis veniet, et ut tempestas currus ejus, reddere in indignatione vindictam, et vastationem in flamma ignis. In igne enim Domini judicabitur omnis terra, et in gladio ejus omnis caro : multi vulnerati erunt a Domino* (Id. Lxvi, 12-16, sec. LXX). In bonorum promissione flumen pacis profecto² abundantiam pacis illius debemus accipere, qua major esse non possit. Ilac utique in flumine rigabimur : de qua in præcedenti libro abundanter locuti sumus. Hoc flumen se in eos declinare dicit, quibus tantam beatitudinem pollicetur, ut intelligamus in illius felicitatis regione, quæ in cælis est, hoc flumine omnia satiari. Sed quia et terrenis corporibus pax incorruptionis atque immortalitatis inde influet³, ideo declinare se dicit hoc flumen, ut de supernis quodammodo etiam inferiora perfundat, et homines æquales Angelis reddat. Jerusalem quoque, non illam quæ servit cum filiis suis, sed liberam matrem no-

¹ sic nostri codices, ut infra constanter Patres Benedictini, qui hoc loco, *sicut herba*. M.

² ita Mss. Editi vero, *in bonorum promissione se declinare dicit, ut flumen pacis, quod profecto*.

³ Editi, *rima influet*. Melius Mss., *inde influet*.

stram intelligamus, secundum Apostolum, æternam in cælis (*Galat. iv, 26*). Ibi post labores ærurnarum curarumque mortalium consolabimur, tanquam parvuli ejus in humeris genibusque portati. Rudes enim nos et novos blandissimis adjutoris insolita nobis illa beatitudo suscipiet. Ibi videbimus, et gaudebit cor nostrum. Nec expressit quid videbimus: sed quid, nisi Deum? ut impleatur in nobis promissum evangelicum, *Beati mundo corde, quoniam ipsi Deum videbunt (Math. v, 8)*; et omnia illa, quæ nunc non videmus, credentes autem, pro modulo capacitatis humanæ, longo minus quam sunt atque incomparabiliter cogitamus. *Et videbitis, inquit, et gaudebit cor vestrum. Sic creditis, ibi videbitis.*

2. Sed quoniam dixit, *Et gaudebit cor vestrum*: ne putaremus illa bona Jerusalem ad nostrum tantummodo spiritum pertinere; *Et ossa, inquit, vestra ut herba exorientur*: ubi resurrectionem corporum strinxit, velut quod non dixerat reddens: neque enim cum viderimus, fiet; sed cum fuerit facta¹, videbimus. Nam et de cælo novo ac terra nova jam supra dixerat, dum ea quæ sanctis promittuntur in fine, sæpe ac multiformiter diceret²: *Erit, inquit, cælum novum et terra nova, et non erunt memores priorum, nec ascendent³ in cor ipsorum: sed lætitiã et exultationem invenient in ea. Ecce ego faciam Jerusalem exultationem, et populum meum lætitiã; et exultabo in Jerusalem, et lætabor in populo meo; et ultra non audietur in illa vox fletus (Isai. LXV, 17-19, sec. LXX)*; et cætera, quæ quidam ad carnales illos⁴ mille annos referre conantur. Locutiones enim tropicæ propriis prophetico more miscentur: ut ad intellectum spiritualem intentio sobria cum quodam utili ac salubri labore perveniat: pigritia vero carnalis, vel ineruditæ atque inexercitæ tarditas mentis contenta lætitiæ superficiei, nihil putat interius requirendum. Hæc de prophetis verbis, quæ ante istum locum scripta sunt, satis dixerim. In hoc autem loco, unde ad illa digressi sumus, cum dixisset, *Et ossa vestra ut herba exorientur*, ut resurrectionem quidem carnis, sed tamen bonorum⁵, se nunc commemorare monstraret, adjunxit, *Et cognosceatur manus Domini colentibus eum*. Quid est hoc, nisi manus distinguentis

cultores suos a contemptoribus suis? De quibus sequentia contexens, *Et comminabitur, inquit, contumacibus, sive, ut ait alius interpres, incredulis*. Nec tunc comminabitur: sed quæ nunc dicuntur minaciter, tunc efficaciter implebuntur. *Ecce enim Dominus, inquit, ut ignis veniet, et ut tempestas currus ejus, reddere in indignatione vindictam, et vastationem in flamma ignis. In igne enim Domini judicabitur omnis terra, et in gladio ejus omnis caro: multi vulnerati erunt a Domino*. Sive igne, sive tempestate, sive gladio, pœnam judicii significat: quandoquidem ipsum Dominum quasi ignem dicit esse venturum, eis profecto quibus pœnalis ejus erit adventus. Currus vero ejus (nam pluraliter dicti sunt) angelica ministeria non inconvenienter accipimus. Quod autem ait, omnem terram et omnem carnem in ejus igne et in gladio judicari, non etiam hic spirituales intelligamus et sanctos, sed terrenos atque carnales, de quibus dictum est, *Qui terrena sapiunt (Philipp. iii, 19)*; et, *Sapere secundum carnem, mors est (Rom. viii, 6)*: et quales omnino caro appellantur a Domino, ubi dicit, *Non permanebit spiritus meus in hominibus istis, quoniam caro sunt (Gen. vi, 3)*. Quod vero hic positum est, *Multi vulnerati erunt a Domino*: isto vulnere fiet mors secunda. Potest quidem et ignis, et gladius, et vulnus accipi in bono. Nam et ignem Dominus velle se dixit mittere in mundum (*Luc. xii, 49*). Et visæ sunt illis linguæ divisæ velut ignis, quando venit Spiritus sanctus (*Act. ii, 3*). Et, *Non venit, inquit idem Dominus, pacem mittere in terram, sed gladium (Math. x, 34)*. Et sermonem Dei dicit Scriptura gladium bis acutum (*Hebr. iv, 12*); propter aciem geminam Testamentorum duorum. Et in Cantico canticorum, charitate se dicit sancta Ecclesia vulneratam, velut amoris impetu sagittatam (*Cantis. ii, 5, sec. LXX*). Sed hic cum legimus vel audimus ultorem Dominum esse venturum, quemadmodum hæc intelligenda sint, clarum est.

3. Deinde breviter commemoratis eis, qui per hoc judicium consumerentur; sub figura ciborum in Legè veterè vetitorum, a quibus se non abstinerunt, peccatores impiosque significans, recapitulat ab initio gratiam novi Testamenti a primo Salvatoris adventu usque ad ultimum judicium, de quò nunc agimus, perducens finiensque sermonem. Narrat namque Dominum dicere se venire, ut congreget omnes gentes, easque venturas et visuras gloriam ejus (*Isai. LXVI, 17, 18*). *Omnes enim, sicut dicit Apostolus, peccaverunt, et egent gloria Dei (Rom. iii, 23)*. Et relicturum se dicit super eos signa, quæ utique mirantes credant in eum: et emissurum ex illis salvatos in gentes diversas, et in longinquas insulas, quæ non audierunt nomen ejus, neque viderunt gloriam ejus; et annuntiaturos gloriam ejus in gentibus; et adducturos fratres istorum, quibus loquebatur, id est, in fide sub Deo Patre fratres Israelitarum electorum: adducturos autem ex omnibus gentibus munus Domino in jumentis et vehiculis (quæ jumenta et vehicula bene intelliguntur adjutoria esse divina, per

¹ Editi, *fient, sed cum fuerint facta*. At Mss., *fiet, sed cum veris facta*; subaudi, *resurrectio*.

² Aliquot Mss., *multipliciter diceret*.

³ In Mss. hic et infra lib. 22, cap. 3, *nec ascendet*. Apud septuaginta est, *oud' épélthê*.

⁴ Sola editio Lov., mutato vocum ordine habet, *quæ quidam carnales ad illos mille annos, etc.*, quasi ipsos auctores interpretationis hujus dicit Augustinus carnales. Sectabantur illi Papiam Hieropolitanam (teste Eusebio, lib. 3 Hist. eccles., cap. 33, et Hieronymo in Catalogo Script. eccles.); Justinum. Dial. cum Tryphone; Irenæum, lib. 3 adversus Hæreses, cap. 32; Tertullianum, lib. de Spe fidelium, et lib. 3 contra Marcionem, cap. 24; Lactantium, lib. 7 Iustit., capp. 24 et 26, etc., a quibus nonnisi modeste ac prudenter hac in re discedendum docet Hieronymus in Jerem. cap. 49: « Quamquam, » ait, sibi Judæi auream atque gemmatam Jerusalem restituendam putent, rursumque « victimas et sacrificia, et conjugia sanctorum, et regnum « in terris Domini Salvatoris: quæ licet non sequamur, tamen damnare non possumus; quia multi ecclesiasticorum « virorum et martyres ista dixerunt: ut unusquisque in suo « sensu abundet, et Domini cuncta judicio reserventur. »

⁵ Ita Mss. Editi vero, *sed tantum bonorum*.

cujusque generis ministeria Dei, vel angelica, vel humana, in civitatem sanctam Jerusalem, quæ nunc in sanctis fidelibus est diffusa per terras. Ubi enim divinitus adjuvantur, ibi credunt; et ubi credunt, ibi veniunt. Comparavit autem illos Dominus, tanquam per similitudinem, filiis Israel offerentibus ei suas hostias cum psalmis in domo ejus; quod ubique jam facit Ecclesia; et promisit ab ipsis se accepturum sibi Sacerdotes et Levitas; quod nihilominus fieri nunc videmus. Non enim ex genere carnis et sanguinis, sicut erat primum secundum ordinem Aaron; sed sicut oportebat in Testamento novo, ubi secundum ordinem Melchisedech summus sacerdos est Christus (*Psal. cix, 4*), pro cuiusque merito quod in eum gratia divina contulerit, Sacerdotes et Levitas eligi nunc videmus: qui non isto nomine, quod sæpe assequuntur indigui, sed ea quæ non est bonis malisque communis, sanctitate pensandi sunt.

4. Hæc cum de ista, quæ nunc impertitur Ecclesie, perspicua nobisque notissima Dei miseratione dixisset; promisit et fines ad quos per ultimum iudicium facta bonorum malorumque discretionem venietur, dicens per Prophetam, vel de Domino dicens ipse Propheta: *Quomodo enim cælum novum et terra nova manebit coram me, dixit Dominus, sic stabit semen vestrum et nomen vestrum; et erit mensis ex mense, et sabbatum ex sabbato. Veniet¹ omnis caro in conspectu meo adorare in Jerusalem, dixit Dominus: et egredientur, et videbunt membra hominum qui prævaricati sunt in me. Vermis eorum non morietur, et ignis eorum non exstinguetur, et erunt visui omni carni (*Isai. Lxvi, 22-24, sec. LXX*). Ad hoc iste propheta terminavit librum, ad quod terminabitur sæculum. Quidam sane non interpretati sunt, membra hominum, sed cadavera virorum (a), per cadavera significantes evidentem corporum poenam: quamvis cadaver nisi caro exanimis, non solet nuncupari; illa vero animata erunt corpora, alioquin nulla poterunt sentire tormenta: nisi forte quia mortuorum erunt corpora, id est, eorum qui in secundam mortem cadent, ideo non absurde etiam cadavera dici possunt. Unde est et illud, quod ab eodem propheta dictum jam supra posui: *Terra vero impiorum cadet*. Quis autem non videat a cadendo esse appellata cadavera (b)? Virorum autem pro eo posuisse illos interpretes, quod est hominum, manifestum est. Neque enim quisquam dicturus est, prævaricatrices feminas in illo supplicio non futuras: sed ex potiore, præsertim de quo femina facta est, uterque sexus accipitur. Verum quod ad rem maxime pertinet, cum et in bonis dicitur, *Veniet omnis caro*: quia ex omni genere hominum populus iste constabit; non enim omnes homines ibi erunt, quando in poenis plures erunt: sed, ut dicere cœperam, cum et in bonis caro, et in malis membra vel cadavera nominantur; profecto post resurrectionem carnis, cuius fides bis rerum vocabulis omnino*

firmatur, illud quo¹ boni et mali suis finibus dirimentur, futurum esse iudicium declaratur.

CAPUT XXII. — *Qualis futura sit egressio sanctorum ad videndas poenas malorum.*

Sed quomodo egredientur boni ad videndas poenas malorum? Numquid corporis motu beatas illas relicturi sunt sedes, et ad loca poenalia perrecturi, ut malorum tormenta conspiciant præsentia corporali? Absit: sed egredientur per scientiam. Hoc enim verbo significatum est, eos qui cruciabuntur extra futuros. Propter quod et Dominus ea loca tenebras exteriores vocat (*Matth. xxv, 30*): quibus contrarius est ille ingressus de quo dicitur servo bono, *Intra in gaudium Domini tui (*Ibid. 21*)*: ne illuc mali poterunt ingredi, ut sciatur; sed ad illos potius velut egredi scientia, qua eos cognitari sunt, boni; quia id quod extra est cognitari sunt. Qui enim erunt in poenis quid agatur intus in gaudio Domini nescient: qui vero erunt in illo gaudio, quid agatur foris in illis tenebris exterioribus scient. Ideo dictum est, *egredientur*: quia eos etiam qui² foris ab eis erunt, utique non latebunt. Si enim hæc Prophetæ nondum facta nosse potuerunt, per hoc quod erat Deus, quantumcumque erat, in eorum mortalium mentibus; quomodo immortales sancti jam facta tunc nescient, eum Deus erit omnia in omnibus (*I Cor. xv, 28*)? Stabit ergo in illa beatitudine sanctorum semen et nomen; semen, scilicet de quo Joannes ait, *Et semen ejus in ipso manet (*I Joan. iii, 9*)*: nomen vero, de quo per hunc Isaiam dictum est, *Nomen æternum dabo eis (*Isai. lvi, 5*)*. *Et erit eis mensis ex mense et sabbatum ex sabbato*, tanquam luna ex luna et requies ex requie: quorum utrumque ipsi erunt, cum ex his umbris veteribus et temporalibus in illa lumina nova ac sempiterna transibunt. In poenis autem malorum et inexstinguibilis ignis et vivacissimus vermis, ab aliis atque aliis aliter atque aliter est expositus. Alii quippe utrumque ad corpus, alii utrumque ad animum retulerunt: alii proprie ad corpus ignem, tropice ad animum vermem, quod creditur esse videtur. Sed nunc de hac differentia non est temporis³ disputare. De iudicio namque ultimo, quo fiet diremptio bonorum et malorum, hoc volumen implere suscepimus: de ipsis vero præmiis et poenis alias diligentius disserendum est.

CAPUT XXIII. — *Quid prophetaverit Daniel de persecutione Antichristi, et de iudicio Dei, regnoque sanctorum.*

1. Daniel de hoc ultimo iudicio sic prophetat, ut Antichristum prius quoque venturum esse prænuntiet, atque ad æternum regnum sanctorum perducatur narrationem suam. Cum enim visione prophetica quatuor bestias significantes quatuor regna vidisset; ipsumque quartum a quodam rege superatum, qui Antichristus agnoscitur; et post hæc æternum regnum Filii hominis, qui intelligitur Christus: *Horruit,*

¹ In editis, *Et veniet*. Abest, *Et*, a Mss.

(a) Sic in Vulgata.

(b) Supra, cap. 10 hujus libri, sub initium.

¹ Sic Er. et plures Mss. At Vind. Am. et Lov., *quod*.

² Aliquot Mss., *quæ*.

³ Editi, *non est hujus temporis*. Abest, *hujus*, a Mss.

inquit, *spiritus meus, ego Daniel in habitudine¹ mea, et visus capitis mei conturbabant me. Et accessi*, inquit, *ad unum de stantibus, et veritatem querebam ab eo de his omnibus: et dixit mihi veritatem.* Deinde, quid audierit ab illo, a quo de omnibus his quæ-ivit, tanquam eo sibi exponente, sic loquitur: *Hæ quatuor bestię magnæ, quatuor regna surgent in terra, quæ auferentur, et accipient regnum sancti Altissimi: et obtinebunt illud usque in sæculum et in usque sæculum sæculorum. Et querebam*, inquit, *diligenter de bestia quarta, quæ erat differens præ omni bestia, terribilis amplius: dentes ejus ferrei, et unguis ejus ærei, manducans et comminuens, et reliqua pedibus suis concalcans: et de cornibus ejus decem, quæ erant in capite ejus, et de altero quod ascendit, et excussit de prioribus tria: cornu illud in quo erant oculi, et os loquens magna; et visus ejus major cæteris. Videbam, et cornu illud faciebat bellum cum sanctis: et prævalebat ad ipsos, donec venit vetustus dierum, et regnum dedit sanctis Altissimi: et tempus pervenit, et regnum obtinuerunt sancti.* Hæc Daniel quæ-ivisse se dixit. Deinde quid audierit, continuo subjungens, *Et dixit*, inquit, *id est, ille a quo quæsierat, respondit, et dixit, Bestia quarta, quartum regnum erit in terra, quod prævalebit omnibus regnis; et manducabit omnem terram, et concalcabit eam, et concidet. Et decem cornua ejus, decem reges surgent: et post eos surget alius, qui superabit malis² omnes, qui ante eum fuerunt; et tres reges humiliabit, et verba adversus Altissimum loquetur: et sanctos Altissimi conteret. Et suspicabitur mutare tempora et legem: et dabitur in manu ejus usque ad tempus, et tempora, et dimidium temporis. Et judicium sedebit, et principatum removebunt³ ad exterminandum et perdendum usque in finem; et regnum, et potestas, et magnitudo regum, qui sub omni cælo sunt, data est sanctis Altissimi. Et regnum ejus regnum sempiternum: et omnes principatus ipsi servient, et obaudient. Huc usque*, inquit, *finis sermonis. Ego Daniel, nullum cogitationes meæ conturbabant me, et forma mea immutata est super me, et verbum in corde meo conservavi.* (Dan. vii, 15-28). Quatuor illa regna exposuerunt quidam Assyriorum, Persarum, Macedonum, et Romanorum. Quam vero convenienter id fecerint, qui nosse desiderant, legant presbyteri Hieronymi librum in Daniele, satis diligenter eruditeque conscriptum. Antichristi tamen adversus Ecclesiam sævissimum regnum, licet exiguo spatio temporis sustinendum, donec Dei ultimo iudicio regnum sancti accipiant sempiternum, qui vel dormitans hæc legit, dubitare non sinitur. Tempus quippe et tempora et dimidium temporis, annum unum esse et duos et dimidium, ac per hoc tres annos et semissem, etiam numero dierum posterius posito dilucescit, aliquando in Scripturis et mensium numero declaratur. Videntur enim tempora indefinite hic dicta lingua latina: sed per dualem

¹ Editi, *hebetudine*. Verius manuscripti, *habitudine*: nam apud Septuaginta græce est, *ezei*.

² Editi, *suis malis*. Abest, *suis*, a manuscriptis et a Septuaginta.

³ Editi, *removebit*. At manuscripti, *removebunt*. Græce est, *metastésousi*.

numerum dicta sunt, quem latini non habent. Sicut autem Græci, ita hunc dicuntur habere et Hebræi. Sic ergo dicta sunt tempora, tanquam dicerentur duo tempora. Vereri me sane fateor, ne in decem regibus, quos tanquam decem homines videtur inventurus Antichristus, forte fallamur, atque ita ille inopinatus adveniat, non existentibus tot regibus in orbe Romano. Quid enim si numero isto denario universitas regum significata est, post quos ille venturus est: sicut millenario, centenario, septenario significatur plerumque universitas, et aliis atque aliis numeris, quos nunc commemorare non est necesse?

2. Alio loco idem Daniel, *Et erit*, inquit, *tempus tribulationis, qualis non fuit ex quo nata est gens super terram usque ad tempus illud. Et in tempore illo sabbabitur populus tuus omnis qui inventus fuerit scriptus in libro. Et multi dormientium in terræ aggere exsurgent: hi in vitam æternam, et hi in opprobrium et in confusionem æternam. Et intelligentes fulgebunt sicut claritas firmamenti, et ex justis multi sicut stellæ in sæcula* (Dan. xii, 1-5). Et adhuc sententiæ illi evangelicæ est locus iste simillimus, de resurrectione duntaxat mortuorum corporum. Nam qui illic dicti sunt esse in monumentis, ipsi hic dormientes in terræ aggere; vel, sicut alii interpretati sunt, in terræ pulvere. Et sicut ibi, *procedent*, dictum est; ita hic, *exsurgent*. Sicut ibi, *Qui bona fecerunt, in resurrectionem vitæ; qui autem mala egerunt, in resurrectionem judicii*; ita et isto loco, *Hi in vitam æternam, et hi in opprobrium et in confusionem æternam* (Joan. v, 28, 29). Non autem diversum putetur, quod cum ibi positum sit, *Omnes qui sunt in monumentis*, hic non ait Propheta, *Omnes*; sed, *Multi dormientium in terræ aggere*. Ponit enim aliquando Scriptura pro omnibus multos. Propterea et Abrahæ dictum est, *Patrem multarum gentium posui te*; cui tamen alio loco, *In semine*, inquit, *tu benedicentur omnes gentes* (Gen. xvii, 5; xii, 18). De tali autem resurrectione huic quoque ipsi prophetæ Danieli paulo post dicitur: *Et tu veni, et requiesce: adhuc enim dies in completionem consummationis; et requiesces, et resurges in sorte tua in fine dierum* (Dan. xii, 13).

CAPUT XIV.— *In Psalmis Davidicis quæ de fine sæculi hujus et novissimo Dei iudicio prophetentur.*

1. Multa de iudicio novissimo dicuntur in Psalmis, sed eorum plura transeunter et strictim. Hoc tamen quod de fine hujus sæculi apertissime dictum est ibi, nequaquam silentio præteribo. *Principio terram tu fundasti, Domine, et opera manuum tuarum sunt cæli. Ipsi peribunt, tu autem permanes: et omnes sicut vestimentum veterascent, et sicut opertorium mutabis eos, et mutabuntur; tu autem idem ipse es, et anni tui non deficient* (Psal. ci, 26-28). Quid est quod Porphyrius, cum pietatem laudet Hebræorum, qua magnus et verus et ipsis numinibus terribilis ab eis colitur Deus, Christianos ob hoc arguit maximæ stultitiæ, etiam ex oraculis deorum suorum, quod istum mundum dicunt esse periturum (a)? Ecce in litteris pietatis (a) vide supra, lib. 19, cap. 25.

Hebræorum dicitur Deo, quem confitente tanto philosopho, etiam ipsa numina perhorrescunt, *Opera manuum tuarum sunt cæli, ipsi peribunt*. Numquid, quando cæli peribunt, mundus, cujus iidem cæli superior pars est tutior, non peribit? Si hæc sententia Jovi displicet, cujus, ut scribit iste philosophus, velut gravioris auctoritatis oraculo in christianorum credulitate culpatur; cur non similiter sapientiam, tanquam stultitiam, culpatur Hebræorum, in quorum libris piissimis invenitur? Porro si in illa sapientia¹, quæ Porphyrio tam multum placet, ut eam deorum quoque suorum vocibus prædicet, legitur cælos esse perituros; cur usque adeo vana est ista fallacia, ut in fide Christianorum, vel inter cætera, vel præ cæteris hoc detestentur, quod in ea periturus creditur mundus, quo utique nisi perunte cæli non possunt perire? Et in Litteris quidem sacris, quæ proprie nostræ sunt, non Hebræis nobisque communes, id est, in evangelicis et apostolicis libris legitur, *Præterit figura hujus mundi* (I Cor. vii, 31): legitur, *Mundus transit* (I Joan. ii, 17): legitur, *Cælum et terra transibunt*, (Matth. xxii, 35). Sed puto quod *præterit, transit, transibunt*, aliquando nitius dicta sunt, quam *peribunt*. In Epistola quoque Petri apostoli, ubi aqua inundatus, qui tunc erat, perisse dictus est mundus (II Petr. iii, 6), satis clarum est, et quæ pars mundi a toto significata, et quatenus perisse dicta sit, et qui cæli repositi igni reservandi in diem iudicii et perditionis hominum impiorum. Et in eo quod paulo post ait, *Veniet dies Domini ut fur, in quo cæli magno impetu transcurrent, elementa autem ardentia et solo nentur, et terra, et quæ in ipsa sunt opera exurentur*; ac deinde subiecit, *His omnibus pereuntibus quales oportet vos esse* (Ibid. 10, 11)? possunt illi cæli intelligi perituri, quos dixit repositos igni reservandos; et ea elementa accipi arsura, quæ in hac ima mundi parte subsistunt procellosa et turbulenta, in qua eosdem cælos dixit esse repositos, salvis illis superioribus, et in sua integritate manentibus, in quorum firmamento sunt sidera constituta. Nam et illud quod scriptum est, *stellas de cælo esse casuras* (Matth. xxiv, 29), præter quod potest multo probabilius et aliter intelligi, magis ostendit mansuros esse illos cælos: si tamen stellæ inde casuræ sunt; cum vel tropica sit locutio, quod est credibilis, vel in isto imo cælo futurum sit², utique mirabilis quam nunc fit. Unde et illa Virgiliana

stella facem ducens multa cum luce cucurrit,
et Idæa se condidit silva (*Æneid. lib. ii, v. 694, 696.*)
Hoc autem quod de Psalmo commemoravi, nullum cælorum videtur relinquere, quod periturum esse non dixerit. Ubi enim dicitur, *Opera manuum tuarum sunt cæli, ipsi peribunt*; quam nullum eorum ab opere Dei, tam nullum eorum a perditione secernitur. Non enim dignabuntur de Petri apostoli locutione, quem³ vehementer oderunt, Hebræorum defendere pie-

tatem, deorum suorum oraculis approbatam; ut altem ne totus mundus periturus esse credatur, sic a toto pars accipiatur, in eo quod dictum est, *Ipsi peribunt*, cum soli cæli infirmi sint perituri; quemadmodum in apostolica illa Epistola a toto pars accipitur, quod diluvio perisse dictus est mundus, quamvis sola ejus cum suis cælis pars ima perierit. Sed quia hoc, ut dixi, non dignabuntur, ne vel apostoli Petri approbent sensum vel tantum concedant conflagrationi novissimæ, quantum dicimus valuisse diluvium, qui nullis aquis, nullis flammis totum genus humanum posse perire contendunt: restat ut dicant, quod propterea dii eorum Hebræam sapientiam laudaverunt, quia istum Psalmum non legerant.

2. In Psalmo etiam quadragesimo nono de iudicio Dei novissimo intelligitur dictum, *Deus manifestus veniet, Deus noster, et non silebit. Ignis in conspectu ejus ardebit, et in circumitu ejus tempestas valida. Advocabit cælum sursum, et terram discernere populum suum. Congregate illi justos ejus, qui disponunt testamentum ejus super sacrificia* (Psal. xliix, 3-5). Hoc nos de Domino nostro Jesu Christo intelligimus, quem de cælo speramus esse venturum ad vivos et mortuos iudicandos. Manifestus enim veniet inter justos et injustos iudicaturus juste, qui prius venit occultus ab injustis iudicandus injuste. Ipse, inquam, *manifestus veniet, et non silebit*, id est, in voce iudicis evidens apparebit, qui prius cum venisset occultus, ante iudicem siluit, quando sicut ovis ad immolandum ductus est, et sicut agnus coram tondeute fuit sine voce, quemadmodum de illo per Isaiam legimus prophetatum (Isai. lxi, 7), et in Evangelio videmus impletum (Matth. xxvi, 63). De igne vero et tempestate, cum in Isaiæ prophetia tale aliquid tractaremus, quomodo essent hæc intelligenda, jam diximus (cap. 24). Quod vero dictum est, *Advocabit cælum sursum*: quoniam sancti et justi recte cælum appellantur; nimirum hoc est, quod ait Apostolus, *Simul cum illis rapiemur in nubibus in obviam Christo in aera* (I Thess. iv, 16). Nam secundum litteræ superficiem, quomodo sursum advocatur cælum, quasi possit esse nisi sursum? Quod autem adjunctum est, *Et terram discernere populum suum*, si tantummodo subaudiatur *advocabit*, id est, *advocabit et terram*, nec subaudiatur *sursum*, hunc videtur habere sensum secundum rectam fidem, ut cælum intelligatur in eis qui cum illo sunt iudicaturi, et terra in eis qui iudicandi sunt: ut *Advocabit cælum sursum*, non hic intelligamus, Rapiet in aera; sed, in iudiciarias sedes eriget. Potest et illud intelligi: *Advocabit cælum sursum*, Advocabit Angelos in supernis et excelsis locis, cum quibus descendat ad faciendum iudicium: *Advocabit et terram*, id est, homines in terra utique iudicandos. Si autem utrumque subaudiendum est, cum dicitur, *et terram*, id est et *advocabit*, et *sursum*; ut iste sit sensus, *Advocabit cælum sursum, et terram advocabit sursum*: nihil melius intelligi existimo, quam homines⁴ qui rapiuntur in obviam Christo in aera, sed cælum dictum propter

¹ Editi, *sapientia Judæorum*. Abest, *Judæorum*, a Mss.

² Sola editio Lov., *futurum sit aliquid*.

³ Merique Mss., *quam*.

⁴ In omnibus Mss., *quam omnes*.

animas, terram propter corpora. *Discernere* porro *populum suum*, quid est, nisi per iudicium separare bonos a malis, tanquam oves ab hædis? Deinde conversio sermonis ad Angelos facta est: *Congregate illi justos ejus*. Profecto enim per angelicum ministerium tanta res peragenda est. Si autem quærimus, quos justos ei congregaturi sunt Angeli: *Qui disponunt*, inquit, *testamentum ejus super sacrificia*. Hæc est omnis vita justorum; disponere testamentum Dei super sacrificia. Aut enim opera misericordiæ sunt *super sacrificia*, id est sacrificiis præponenda, juxta sententiam Dei dicentis, *Misericordiam volo¹ quam sacrificium* (*Oseevi*, 6): aut si *super sacrificia*, in sacrificiis intelligitur dictum, quomodo super terram fieri dicitur quod fit utique in terra: profecto ipsa opera misericordiæ sunt sacrificia quibus placetur Deo² sicut in libro hujus operis decimo me disseruisse reminiscor (*cap. 6, et alibi*): in quibus operibus disponunt justis testamentum Dei, quia propter promissiones quæ Novo ejus Testamento continentur, hæc faciunt. Unde congregatis sibi justis suis, et ad suam dexteram constitutis, novissimo utique iudicio, dicturus est Christus, *Venite, benedicti Patris mei, possidete paratum vobis regnum a constitutione mundi. Esurivi enim, et dedistis mihi manducare* (*Matth. xv, 34*); et cætera quæ ibi proferuntur de bonorum operibus bonis, et de eorum præmiis sempiternis per ultimam sententiam judicantis³.

CAPUT XXV. — *De prophetia Malachie⁴ qua Dei iudicium ultimum declaratur, et quorundam dicitur per purificatorias pœnas faciendæ mandatio.*

Propheta Malachias, sive Malachi, qui et Ange⁵ us dictus est, qui etiam Esdras sacerdos, cujus alia in canonem⁶ scripta recepta sunt, ab aliquibus creditur (nam de illo hanc esse Hebræorum opinionem dicit Hieronymus [*Proem. in Malach.*]), iudicium novissimum prophetat, dicens: *Ecce venit, dicit Dominus omnipotens: et quis sustinebit diem introitus ejus, aut quis ferre poterit ut aspiciat eum? Quia ipse ingreditur quasi ignis constatorii, et quasi herba lavantium: et sedebit conflans, et emundans, sicut aurum et sicut argentum, et emundabit filios Levi, et fundet eos sicut aurum et argentum: et erunt, Domino offerentes hostias in justitia. Et placebit Domino sacrificium Juda et Jerusalem, sicut diebus pristinis, et sicut annis prioribus. Et accedam ad vos in iudicio, et ero testis velox super maleficos, et super adulteros, et super eos qui jurant in nomine meo mendaciter, et qui fraudant mercedem mercenario⁷, et opprimunt per potentiam viduas, et percutiunt pupillos, et pervertunt iudicium advenæ et qui non timent me, dicit Dominus omnipotens. Quoniam ego Dominus Deus vester, et non mutator* (*Malach. iii, 1-6*). Ex his quæ dicta sunt, videtur

¹ Editi, *magis volo*. At Mss. carent particula, *magis*, quæ nec est in Septuaginta.

² Nonnulli Mss., *placetur Deus*.

³ Sola editio Lov., *judicandis*.

⁴ Mss., *Malachias*. Et lidem initio capituli, *Propheta Malachiel, sive Malachi*: et quidam, *sive Malachium*. Editiones Vind. Am. et Er., *Malachiel, sive Malachius*.

⁵ Vind. Am. Er. et Mss., *in canone*.

⁶ Er. et Lov., *mercede mercenarios*. At Vind. Am. et Mss., *mercedem mercenario*. Græce Septuaginta, *μισθον μηδύων*.

evidentius apparere in illo iudicio quasdam quorundam purgatorias pœnas futuras. Ubi enim dicitur, *Quis sustinebit diem introitus ejus, aut quis ferre poterit ut aspiciat eum? Quia ipse ingreditur quasi ignis constatorii, et quasi herba lavantium: et sedebit conflans, et emundans, sicut aurum et sicut argentum, et emundabit filios Levi, et fundet eos sicut aurum et argentum*; quid aliud intelligendum est? Dicit tale aliquid et Isaias: *Lavabit Dominus sordes filiorum et filiarum Sion, et sanguinem emundabit de medio eorum spiritu iudicii et spiritu combustionis* (*Isai. iv, 4*). Nisi forte sic eos dicendum est emundari a sordibus, et eliquari quodammodo, cum ab eis mali per pœnale iudicium separantur, ut illorum segregatio atque damnatio purgatio sit istorum, quia sine talium de cætero permixtione victuri sunt. Sed cum dicit, *Et emundabit filios Levi, et fundet eos sicut aurum et argentum, et erunt Domino offerentes hostias in justitia, et placebit Domino sacrificium Juda et Jerusalem*, utique ostendit eos ipsos, qui emundabuntur, deinceps in sacrificiis justitiæ Domino esse placituros, ac per hoc ipsi a sua injustitia mundabuntur, in qua Domino displicebant. Hostiæ porro in plena perfectaque justitia, cum mundati fuerint, ipsi erunt. Quid enim acceptius Deo tales offerunt, quam se ipsos? Verum ista quæstio de purgatoris pœnis, ut diligentius pertractetur, in tempus aliud differenda est. Filios autem Levi et Juda et Jerusalem, ipsam Dei Ecclesiam debemus accipere, non ex Hebræis tantum, sed ex aliis etiam gentibus congregatam: nec talem, qualis nunc est, ubi si *dixerimus quia peccatum non habemus, nos ipsos seducimus, et veritas in nobis non est* (*I Joan., i, 8*): sed qualis tunc erit, velut area per ventilationem, ita per iudicium purgata novissimum; eis quoque igne mundatis, quibus talis mundatio necessaria est; ita ut nullus omnino sit qui offerat sacrificium pro peccatis suis. Omnes enim qui sic offerunt, profecto in peccatis sunt, pro quibus dimittendis offerunt, ut cum obtulerint, acceptumque Deo fuerit, tunc dimittantur.

CAPUT XXVI. — *De sacrificiis qua: sancti offerent Deo sic placitura, quomodo in diebus pristinis et annis prioribus placuerunt.*

1. Volens autem Deus ostendere civitatem suam tunc in ista consuetudine non futuram, dixit filios Levi oblaturus hostias in justitia: non ergo in peccato, ac per hoc non pro peccato. Unde intelligi potest in eo quod secutus adjunxit, atque ait, *Et placebit Domino sacrificium Juda et Jerusalem, sicut diebus pristinis, et sicut annis prioribus*, frustra sibi Judæos secundum legem veteris Testamenti sacrificiorum suorum præterita tempora polliceri. Non enim tunc in justitia, sed in peccatis hostias offerebant, quando pro peccatis præcipue ac primitus offerebant, usque adeo ut sacerdos ipse, quem debemus utique credere cæteris fuisse justiore, secundum Dei mandatam soleret primum pro suis offerre peccatis, deinde pro populi (*Levit. xvi, 6; Hebr. vii, 27*). Quapropter exponere nos oportet quomodo sit accipiendum quod

dictum est, *Sicut diebus pristinis, et sicut annis prioribus*. Fortassis enim tempus illud commemorat, quo primi homines in paradiso fuerunt. Tunc enim puri atque integri ab omni sorde ac labe peccati se ipsos Deo mundissimas hostias offerebant. Cæterum ex quo commissæ prævaricationis causa inde dimissi sunt, atque humana in eis natura damnata est, excepto uno Mediatore, et post lavacrum regenerationis quibusque adhuc parvulis, *Nemo mundus a sorde, sicut scriptum est, nec infans, cujus est vita unius diei super terram (Job xiv, 4, sec. LXX)*. Quod si responderetur, etiam eos merito dici posse offerre hostias in justitia, qui offerunt in fide; *Justus enim ex fide vivit (Rom. 1, 17)*; quamvis se ipsum seducat, si dixerit se peccatum non habere (*1 Joan. 1, 8*); et ideo non dicat, quia ex fide vivit: numquid dicitur est quispiam hoc fidei tempus illi fini esse coæquandum, quando igne judicii novissimi mundabuntur, qui offerant hostias in justitia? Ac per hoc quoniam post talem mundationem nullum peccatum justos habituros esse credendum est, profecto illud tempus, quantum attinet ad non habere peccatum, nulli tempori comparandum est, nisi quando primi homines in paradiso ante prævaricationem innocentissima felicitate vixerunt. Recte itaque intelligitur hoc significatum esse, cum dictum est, *Sicut diebus pristinis, et sicut annis prioribus*. Nam et per Isaiam posteaquam cælum novum et terra nova promissa est, inter cætera, quæ ibi de sanctorum beatitudine per allegorias et ænigmata exsequitur, quibus expositionem congruam reddere nos prohibuit vitandæ longitudinis cura, *Secundum dies, inquit, ligni vitæ erunt dies populi mei (Isai. Lxv, 22)*. Quis autem sacras Litteras attigit, et ignorat ubi Deus plantaverit lignum vitæ, a cujus cibo separatis illis hominibus, quando eos sua de paradiso ejecit iniquitas, eidem ligno circumposita est ignea terribilisque custodia?

2. Quod si quisquam illos dies ligni vitæ, quos commemoravit propheta Isaias, istos qui nunc aguntur Ecclesiæ Christi dies esse contendit, ipsumque Christum lignum vitæ propheticè dictum, quia ipse est Sapientia Dei, de qua Salomon ait, *Lignum vitæ est omnibus amplectentibus eam (Prov. iii, 18)*; nec annos egisse aliquos in paradiso illos primos homines, unde tam cito ejecti sunt, ut nullum ibi gignerent filium; et ideo non posse illud tempus intelligi in eo quod dictum est, *Sicut diebus pristinis, et sicut annis prioribus*: istam præterea quæestionem, ne cogar (quod prolixum est) cuncta discutere, ut aliquid horum veritas manifestata confirmet. Video quippe alterum sensum, ne dies pristinos et annos priores carnalium sacrificiorum nobis pro magno munere per Prophetam promissos fuisse credamus. Hostiæ namque illæ veteris Legis in quibusque pecoribus immaculatæ ac sine ullo prorsus vitio jubebantur offerri, et significabant homines sanctos, qualis solus inven-

tus est Christus, sine ullo omnino peccato. Proinde quia post judicium, cum fuerint etiam igne mundati qui ejusmodi mundatione sunt digni, in omnibus sanctis nullum invenietur omnino peccatum, atque ita se ipsos offerent in justitia, ut tales hostiæ omni modo immaculatæ ac sine ullo vitio sint futuræ, erunt profecto sicut pristinis diebus et sicut annis prioribus, quando in umbra hujus rei futuræ mundissimæ offerebantur hostiæ. Hæc erit namque munditia tunc in immortalī carne ac mente sanctorum, quæ figurabatur in illarum corporibus hostiarum.

3. Deinde propter eos qui non mundatione, sed damnatione sunt digni, *Et accedam, inquit, ad vos in judicium, et ero testis velox super maleficos et super adulteros, et cætera, quibus damnabilibus enumeratis criminibus addidit, Quoniam ego Dominus Deus vester, et non mutor: tanquam diceret, Cum vos mutaverit et in deterius culpa vestra, et in melius gratia mea, ego non mutor. Testem vero se dicit futurum, quia in judicio suo non indiget testibus: eumque velocem, sive quia repente venturus est, eritque judicium ipso inopinato ejus adventu celerrimum, quod tardissimum videbatur; sive quia ipsas convincet sine ulla sermonis prolixitate conscientias. In cogitationibus enim, sicut scriptum est, *impii interrogatio erit (Sap. 1, 9)*. Et Apostolus, *Cogitationibus, inquit, accusantibus, vel etiam excusantibus in die qua judicabit Deus occulta hominum, secundum Evangelium meum per Jesum Christum (Rom. 11, 15, 16)*. Etiam sic ergo Dominus futurus testis intelligendus est velox, cum sine mora revocaturus est in memoriam, unde convincat puniatque conscientiam.*

CAPUT XXVII. — De separatione bonorum et malorum, per quam novissimi judicii discretio declaratur.

Illud etiam, quod aliud agens in octavo decimo libro ex isto propheta posui (*capite 35, fine*), ad judicium novissimum pertinet, ubi ait: *Erunt mihi, dicit Dominus omnipotens, in die qua ego facio in acquisitionem, et eligam eos sicut eligit homo filium suum qui servit ei: et convertemini¹, et videbitis quid sit inter justum et iniquum, et inter servientem Deo et eum qui non servit ei. Quia ecce dies venit ardens sicut clibanus, et comburet eos, et erunt omnes alienigenæ, et universi qui faciunt iniquitatem, stipula: et succendet eos dies veniens, dicit Dominus omnipotens: et non relinquetur in eis radix, neque ramus. Et orietur vobis, qui timetis nomen meum, sol justitiæ, et sanitas in pennis ejus; et egrediemini, et salietis sicut vituli de vinculis relaxati: et conculcabitis iniquos, et erunt cinis sub pedibus vestris, dicit Dominus omnipotens (Malach. iii, 17, 18; iv, 1-3)*. Hæc distantia præmiorum atque pœnarum justos dirimens ab injustis, quæ sub isto sole in hujus vitæ vanitate non cernitur, quando sub illo sole justitiæ in illius vitæ manifestatione clarebit, tunc

¹ Sic Mss. Editi autem, *offerunt*.

² Vind. Am. Er. et plures Mss., *manifesta*.

³ Sic Mss. At editi, *inmaculatis absque ullo*, etc.

¹ Editi ac plerique Mss., et *convertar*. Emendantur ad veterem librum Corhetensem: nam et apud Septuaginta legitur, *qui epistraphésēsthai*: et in vulgata, et *convertemini*.

perfecto erit iudicium quale unquam fuit.

CAPUT XXVIII. — *De lege Moysi spiritualiter intelligenda, ne in damnabilia murmura carnalis sensus incurrat.*

Quod vero subjungit idem propheta, *Memento legis Moysi servi mei, quam mandavi ei in Choreb ad omnem Israel (Malach. iv, 4)*; præcepta et iudicia opportune commemorat, post declaratum tam magnum futurum inter observatores legis contemptoresque discrimen; simul etiam ut discant legem spiritualiter intelligere, et inveniant in ea Christum, per quem iudicem facienda est inter bonos et malos ipsa discretio. Non enim frustra idem Dominus ait Judæis, *Si crederetis Moysi, crederetis et mihi; de me enim ille scripsit (Joan. v, 46)*. Carnaliter quippe accipiendo legem, et ejus promissa terrena rerum cœlestium figuras esse nescientes, in illa murmura corruerunt, ut dicere auderent, *Vanus est qui servit Deo; et quid amplius, quia custodivimus mandata ejus, et quia ambulavimus supplices¹ ante faciem Domini omnipotentis? Et nunc nos beatos dicimus alienos, et ædificantur omnes qui faciunt iniquitatem (Malach. iii, 14 et 15)*. Quibus eorum verbis quodammodo propheta compulsus est novissimum prænuntiare² iudicium, ubi mali nec saltem falso sint beati, sed apertissime appareant miserissimi; et boni nulla temporali saltem miseria laborent, sed clara ac sempiterna beatitudine perfruantur. Dixerat quippe istorum talia quædam verba etiam superius dicentium, *Omnis qui facit malum, bonus est in conspectu Domini, et tales ei placent (Id. ii, 17)*. Ad hæc, inquam, contra Deum murmura pervenerunt, legem Moysi accipiendo carnaliter. Unde et ille in Psalmo septuagesimo secundo, pene commotos dicit fuisse pedes suos, et effusus gressus suos, utique in lapsum, quia zelavit in peccatoribus, pacem peccatorum intuens; ita ut inter cætera diceret, *Quomodo scivit Deus, et si est scientia in Altissimo? diceret etiam, Numquid vane justificavi cor meum, et lavi in innocentibus³ manus meas? Ut autem solveret hæc difficillimam quæstionem, quæ sit, cum videntur boni esse miseri, et felices mali: Hoc, inquit, labor est ante me, donec introeam in sanctuarium Dei, et intelligam in novissima (Psal. lxxii, 11, 13, 16, 17)*. Iudicio quippe novissimo non sic erit: sed in aperta iniquorum miseria, et aperta felicitate justorum, longe quam nunc est aliud apparebit.

CAPUT XXIX. — *De adventu Eliæ ante iudicium, cujus prædicatione Scripturarum secreta reserante, Judæi convertentur ad Christum.*

Cum autem admonisset, ut meminisse legis Moysi: quoniam prævidebat eos multo adhuc tempore non eam spiritualiter, sicut oportuerat, accepturos, continuo subiecit: *Et ecce ego mittam vobis Eliam*

¹ Lov., *simplices*. Cæteri libri editi et manuscripti, *supplices*: juxta LXX, *iketati*.

² Sic Am. Er. et plures Mss. At Vind. et Lov., *pronuntiare*.

³ Lov., *inter innocentes*: et paulo post, *intelligam in novissimo*. sed Augustinus legere solet, *in novissimo*; et, *in innocentibus*: habentque ita Mss.

Thcobiten, antequam veniat dies Domini magnus et illustris, qui convertet cor patris ad filium, et cor hominis ad proximum suum, ne forte veniens percussam terram penitus (Malach. iv, 5, 6, sec. LXX). Per huic Eliam magnum mirabilemque prophetam exposita sibi lege, ultimo tempore ante iudicium, Judæos in Christum verum, id est, in Christum nostrum esse credituros, celeberrimum est in sermonibus cordibusque fidelium. Ipse quippe ante adventum iudicis Salvatoris non immerito speratur esse venturus: quia¹ etiam nunc vivere non immerito creditur. Curra namque igneo raptus est de rebus humanis, quod evidentissime sancta Scriptura testatur (IV Reg. ii, 11). Cum venerit ergo, exponendo legem spiritualiter, quam nunc Judæi carnaliter sapiunt, *convertet cor patris ad filium*, id est, cor patrum ad filios: singularem quippe pro numero plurali interpretes Septuaginta posuerunt. Et est sensus, ut etiam filii sic intelligant legem, id est Judæi, quemadmodum patres eam intellexerunt, id est Prophetæ, in quibus erat et ipse Moyses. Sic enim cor patrum convertetur ad filios, cum intelligentia patrum perducetur ad intelligentiam filiorum; et *cor filiorum ad patres eorum (o)*, dum in id quod senserunt illi, consentient et isti: ubi Septuaginta dixerunt, *et cor hominis ad proximum suum*. Sunt enim inter se valde proximi patres et filii. Quanquam in verbis Septuaginta interpretum, qui prophetice interpretati sunt, potest sensus alius idemque electior inveniri: ut intelligatur Elias cor Dei Patris conversurus ad Filium: non utique agendo ut Pater diligat Filium, sed docendo quod Pater diligat Filium; ut et Judæi, quem prius oderant, diligant eundem, qui noster est Christus². Judæis enim nunc aversum cor habet Deus a Christo nostro, quia hoc putant. Eis ergo tunc *cor ejus convertetur ad Filium*, eum ipsi converso corde didicerint dilectionem Patris in Filium. Quod vero sequitur, *et cor hominis ad proximum suum*, id est, convertet Elias et cor hominis ad proximum suum; quid melius intelligitur, quam cor hominis ad hominem Christum? Cum enim sit in forma Dei Deus noster, formam servi accipiens esse dignatus est etiam proximus noster. Hoc ergo faciet Elias. *Ne forte, inquit, veniam, et percussam terram penitus*. Terra sunt enim, qui terrena sapiunt; sicut Judæi carnales usque nunc: ex quo vitio contra Deum murmura illa venerunt, *Quia mali ei placent*; et, *Vanus est qui servit Deo (Malach. ii, 17; iii, 14)*.

CAPUT XXX. — *Quod in libris Veteris Testamenti cum Deus legitur iudicaturus, non evidenter Christi persona monstretur: sed ex quibusdam testimoniis, ubi Dominus Deus loquitur, appareat non dubie quod ipse sit Christus.*

1. Multa alia sunt Scripturarum testimonia divina: de novissimo iudicio Dei; quæ si omnia colligam, nimis longum erit. Satis ergo sit, quod et novis et

¹ Editi, *qui*. Plures Mss., *quia*.

² Editi, scriptis dissentientes, habent, *Christus*: et infra post, *Christo nostro*, sic prosequuntur, *quia non putent esse Deum esse, neque Dei Filium. Eis ergo, etc.*

(a) Juxta Vulgatam.

veteribus Litteris sacris hoc prænuntiatum esse probavimus. Sed veteribus per Christum futuram esse judicium, id est, judicem Christum de cælo esse venturum, non tam, quam novis, evidenter expressum est: propterea quia cum ibi dicit Dominus Deus se esse venturum, vel Dominum Deum dicitur esse venturum, non consequenter intelligitur Christus. Dominus enim Deus et Pater est, et Filius, et Spiritus sanctus: neque hoc tamen intestatum relinquere nos oportet. Primo itaque demonstrandum est, quemadmodum Jesus Christus tanquam Dominus Deus loquatur in prophetis libris, et tamen Jesus Christus evidenter appareat: ut et quando sic non apparet, et tamen ad illud ultimum judicium Dominus Deus dicitur esse venturus, possit Jesus Christus intelligi. Est locus apud Isaiam prophetam, qui hoc quod dico evidenter ostendit. Deus enim per prophetam, *Audi me, inquit, Jacob et Israel quem ego voco. Ego sum primus, et ego in sempiternum: et manus mea fundavit terram, et dextera mea firmavit cælum. Vocabo eos, et stabunt simul, et congregabuntur omnes, et audient. Quis eis nuntiavit hæc? Diligens te, feci voluntatem tuam super Babylonem, ut auferrem semen Chaldæorum Et locutus sum, et ego vocavi: adduxi eum, et prosperum feci viam ejus. Accedite ad me, et audite hæc. Non a principio in abscondito locutus sum: quando fiebant, ibi eram. Et nunc Dominus Deus misit me, et Spiritus ejus (Isai. xlviii, 12-16). Nempe ipse est, qui loquebatur sicut Dominus Deus: nec tamen intelligeretur Jesus Christus, nisi addidisset, *Et nunc Dominus Deus misit me, et Spiritus ejus*. Hoc enim dixit secundum formam servi, de re futura utens præteriti temporis verbo: quemadmodum apud eundem prophetam legitur, *Sicut ovis ad immolandum ductus est (Id. LIII, 7, sec. LXX)*. Non enim ait, *Ducetur*: sed pro eo quod futurum erat, præteriti temporis verbum posuit. Et assidue prophetia^a sic loquitur.*

2. Est et alius locus apud Zachariam, qui hoc evidenter ostendit, quod omnipotentem misit omnipotens: quis quem, nisi Deus Pater Deum Filium? Nam ita scriptum est: *Hæc dicit Dominus omnipotens, Post gloriam misit me super gentes, quæ spoliaverunt vos; quia qui tetigerit vos, quasi qui tangit pupillam oculi ejus. Ecce ego inferam manum meam super eos, et erunt spolia his qui servierant eis; et cognoscetis quia Dominus omnipotens misit me (Zach. II, 8 et 9)*. Ecce dicit Dominus omnipotens, a Domino omnipotente se missum. Quis hic audeat intelligere nisi Christum loquentem, scilicet ovibus quæ perierant domus Israel? Ait namque in Evangelio, *Non sum missus, nisi ad oves quæ perierunt domus Israel (Matth. xv, 24)*: quas hic comparavit pupillæ oculi Dei, propter excellentissimum dilectionis affectum; ex quo genere etiam ipsi Apostoli fuerunt. Sed post gloriam resurrectionis utique suæ, quæ antequam

fieret, ait evangelista, *Jesus nondum erat glorificatus (Joan. vii, 39)*; etiam super gentes missus est in Apostolis suis: ac sic impletum est quod in Psalmo legitur, *Erues me de contradictionibus populi, constitues me in caput gentium (Psal. xvii, 44)*: ut qui spoliaverant Israelitas, quibusque Israelitæ servierant, quando sunt gentibus subditi, non vicissim eodem modo spoliarentur, sed ipsi spolia fierent Israelitarum. Hoc enim Apostolis promiserat, dicens, *Faciam vos piscatores hominum (Matth. iv, 19)*. Et uni eorum, *Ex hoc jam, inquit, homines eris captiens (Luc. v, 10)*. Spolia ergo fierent^a sed in bonum, tanquam erepta vasa illi forti, sed fortius alligato (Matth. xii, 29).

3. Item per eundem prophetam Dominus loquens, *Et erit, inquit, in die illa, quæram auferre omnes gentes quæ veniunt contra Jerusalem, et effundam super domum David, et super habitatores Jerusalem Spiritum gratiæ et misericordiæ; et aspicient ad me, pro eo quod insultaverunt; et plangent super eum planctum quasi super charissimum, et dolebunt dolore quasi super unigenitum (Zach. xii, 9, 10)*. Numquid nisi Dei est auferre omnes gentes inimicas sanctæ civitatis Jerusalem, quæ veniunt contra eam, id est, contrariæ sunt ei, vel, sicut alii sunt interpretati, *veniunt super eam*, id est, ut eam sibi subjiciant: aut super domum David effundere, et super habitatores ejusdem civitatis Spiritum gratiæ et misericordiæ? Hoc utique Dei est, et ex persona Dei dicitur per Prophetam: et tamen hunc Deum hæc tam magna et tam divina facientem sese Christus ostendit, adjungendo atque dicendo, *Et aspicient ad me, pro eo quod insultaverunt; et plangent super eum planctum quasi super charissimum (sive, dilectum), et dolebunt dolore quasi super unigenitum*. Pœnitentibus quippe in die illa Judæos, etiam eos qui accepturi sunt Spiritum gratiæ et misericordiæ, quod in ejus passione insultaverint Christo, cum ad eum adspexerint in sua majestate venientem, eumque esse cognoverint, quem prius humilem in suis parentibus illuserunt: quamvis et ipsi parentes eorum tantæ illius impietatis auctores resurgentes videbunt eum, sed puniendi jam, non adhuc corrigendi. Non itaque hoc loco ipsi intelligendi sunt, ubi dictum est, *Et effundam super domum David et super habitatores Jerusalem Spiritum gratiæ et misericordiæ; et aspicient ad me, pro eo quod insultaverunt*: sed tamen de illorum stirpe venientes^b, qui per Eliam illo tempore sunt credituri. Sed sicut dicimus Judæis, Vos occidistis Christum, quamvis hoc parentes eorum fecerint: sic et isti se dolebunt fecisse quodammodo, quod fecerunt illi, ex quorum stirpe descendunt. Quamvis ergo accepto Spiritu gratiæ et misericordiæ jam fideles non damnabuntur cum impiis parentibus suis; dolebunt tamen tanquam ipsi fecerint, quod ab illis factum est. Non igitur dolebunt reatu criminis, sed pietatis affectu. Sane ubi dixerunt Septuaginta interpretes, *Et aspicient ad me,*

^a Sic Vind. Am. Er. juxta græcum Septuaginta. At Lov., *Quis annuntiavit hæc*; omisso, *eis*: cujus loco manuscripti plures habent *ei*.

^b Er. et Lov., *propheta*. Editi vero alii et manuscripti, *propheta*.

^a Ita Mss. Editi vero, *ait Evangelista Joannes, Nondum erat Spiritus datus, quia Jesus nondum erat glorificatus*.

^b Sic Vind. et Mss. At Am. Er. et Lov., *venit*.

^c Sola editio Lov., *venit*.

πρὸς εὐὸν quod insultaverunt; sic interpretatum est ex Hebræo, *Et aspiciant ad me, quem confixerunt* (a). Quo quidem verbo evidentius Christus apparet crucifixus. Sed illa insultatio, quam Septuaginta ponere maluerunt, ejus universæ non defuit passioni. Nam et detento, et alligato, et adjudicato, et opprobrio ignominiosæ vestis induto, et spinis coronato, et calamo in capite percusso, et irridenter fixis genibus adorato¹, et crucem suam portanti, et in ligno jam pendenti utique insultaverunt. Proinde interpretationem non sequentes unam, sed utramque jungentes, cum et *insultaverunt, et confixerunt* legimus, plenius veritatem Dominicæ passionis agnoscimus.

4. Cum ergo in prophetiis litteris ad novissimum judicium faciendum Deus legitur esse venturus, etsi ejus alia distinctio non ponatur; tantummodo propter ipsum judicium Christus debet intelligi: quia etsi Pater, judicabit, per adventum Filii hominis judicabit. Nam ipse per suæ præsentis manifestationem non *judicat quemquam, sed omne judicium dedit Filio* (Joan. v, 22): qui manifestabitur homo judicaturus, sicut homo est judicatus. Quis est enim alius, de quo item Deus loquitur per Isaiam sub nomine Jacob et Israel, de cujus semine corpus accepit? quod ita scriptum est: *Jacob puer meus, suscipiam illum: Israel electus meus, assumpsit eum anima mea. Dedi Spiritum meum in illum, judicium gentibus proferet. Non clamabit, neque cessabit, neque audietur foris vox ejus. Calamum quassatum non conteret, et linum fumans non extinguet; sed in veritate proferet judicium. Refulgebit, et non confringetur, donec ponat in terra judicium; et in nomine ejus gentes sperabunt* (Isai. xlii, 1-4, sec. LXX). In hebræo non legitur *Jacob* et *Israel*: sed quod ibi legitur *servus meus*, nimirum Septuaginta interpretes volentes admonere quatenus id accipiendum sit, quia scilicet propter formam servidictum est, in qua se Altissimus humillimum præbuit, ipsius hominis nomen ad eum significandum posuerunt, de cujus genere eadem servi forma suscepta est. Datus est in eum Spiritus sanctus, quod et columbæ specie, Evangelio teste, monstratum est (Matth. iii, 16). Judicium gentibus protulit, quia prænuntiavit futurum, quod gentibus erat occultum. Mansuetudine non clamavit, nec tamen in prædicanda veritate cessavit. Sed non est audita foris vox ejus, nec auditur; quandoquidem ab eis qui foris ab ejus corpore præcisi sunt, non illi obeditur: ipsosque suos persecutores Judæos, qui calamo quassato perdita integritate, et lino fumanti amisso lumine comparati sunt, non contrivit, nec extinxit; quia pepercit eis, qui nondum venerat eos judicare, sed ab eis judicari (b). In veritate sane judicium protulit, præ-

¹ Fr. et Lov., *et irridenter flexis genibus adorato*. At Vind. An. et Mss., *et irridenter fixis genibus adorato*.

(a) Sic vulgata.

(b) De his omnibus egregie agit, eundem Isaiæ locum interpretans, Hieronymus in Epistola 151, ad Algasiam, questione 2. Coqzæus.

dicens eis quando puniendi essent, si in sua malignantate persistereat. Refulsit in monte facies ejus: nec contractus, sive contritus est, quia neque in se, neque in Ecclesia sua, ut esse desisteret, persecutoribus cessit. Et ideo non est factum, nec fiet, quod inimici ejus dixerunt, vel dicunt, *Quando morietur et peribit nomen ejus* (Psal. xi, 6)? *Donec ponat in terra judicium*. Ecce manifestatum est quod absconditum quærebamus. Hoc enim est novissimum judicium, quod ponet in terra, cum venerit ipse de cælo. De quo jam videmus impletum, quod hic ultimum positum est: *Et in nomine ejus gentes sperabunt*. Per hoc certe quod negari non potest, etiam illud credatur quod impudenter negatur. Quis enim speraret, quod etiam hi qui nolunt adhuc credere in Christum, jam nobiscum vident, et quoniam negare non possunt, deatibus suis freudent, et tabescunt? Quis, inquam, speraret gentes in Christi nomine speraturas, quando tenebatur, ligabatur, cædebatur, illudebatur, crucifigebatur; quando et ipsi discipuli spem perdiderant, quam in illo habere jam cœperant? Quod tunc vix unus latro aperavit in cruce, nunc sperant gentes longe lateque diffuse; et ne in æternum moriantur, ipsa in qua ille mortuus est, cruce signantur.

5. Nullus igitur vel negat vel dubitat, per Jesum Christum tale quale istis sacris Litteris prænuntiatur, futurum esse novissimum judicium, nisi qui eisdem Litteris, nescio qua incredibili animositate seu cecitate, non credit, quæ jam veritatem suam orbi demonstraverit terrarum. In illo itaque judicio vel circa illud judicium has res didicimus esse venturas, Eliam Thebiten, fidem Judæorum, Antichristum persecuturum, Christum judicaturum, mortuorum resurrectionem, bonorum malorumque diremptionem, mundi conflagrationem, ejusdemque renovationem. Quæ omnia quidem ventura esse credendum est: sed quibus modis, et quo ordine veniant, magis tunc docebit rerum experientia, quam nunc ad perfectum hominum intelligentia valet consequi. Existimo tamen eo quo a me commemorata sunt ordine esse ventura.

6. Duo nobis ad hoc opus pertinentes reliqui sunt libri, ut adjuvante Domino promissa compleamus: quorum unus erit de malorum supplicio, alius de felicitate justorum: in quibus maxime, sicut Deus donaverit, argumenta refellentur humana, quæ contra prædicta ac promissa divina sapienter sibi miseriterodere² videntur, et salubris fidei nutrimenta velut falsa et ridenda contemnunt. Qui vero secundum Deum sapiunt, omnium quæ incredibilia videntur hominibus, et tamen Scripturis sanctis, quarum jam veritas multis modis asserta est, continentur, maximum argumentum tenent veracem Dei omnipotentiam, quem certum habent nullo modo in eis potuisse mentiri, et posse facere quod impossibile est infideli.

¹ Ita Mss. Editi vero, *incredula*.

² Editi, veteribus libris *dissentientes, reddere*.

LIBER VIGESIMUS PRIMUS.

De fine debito civitatis diaboli, supplicio scilicet damnatorum sempiterno, deque humanis contra illud incredulorum argumentis.



CAPUT PRIMUM. — *De ordine disputationis, qua prius disserendum est de perpetuo supplicio damnatorum cum diabolo, quam de æterna felicitate sanctorum.*

Cum per Jesum Christum Dominum nostrum, judicem vivorum atque mortuorum, ad debitos fines ambæ pervenerint civitates, quarum una est Dei, altera diaboli, cujusmodi supplicium sit futurum diaboli et omnium ad eum pertinentium, in hoc libro nobis, quantum ope divina valebimus, diligentius disputandum est. Ideo autem hunc tenere ordinem malui, ut postea disseram de felicitate sanctorum, quoniam utrumque cum corporibus erit; et incredibilius videtur esse in æternis corpora durare cruciatibus, quam sine dolore ullo in æterna beatitudine permanere. Ac per hoc cum illam pœnam non debere esse incredibilem demonstravero, adjuvabit me plurimum, ut multo facilius omni carens molestia immortalitas corporum in sanctis futura credatur. Nec a divinis ordo iste abhorret eloquiis, ubi aliquando quidem honorum beatitudo prius ponitur, ut est illud, *Qui bona fecerunt, in resurrectionem vitæ; qui autem mala egerunt, in resurrectionem judicii* (Joan. v, 29): sed aliquando et posterius, ut est, *Mittet Filius hominis Angelos suos, et colligent de regno ejus omnia scandala, et mittent in caminum ignis ardentis¹, illic erit fletus et stridor dentium; tunc justi fulgebunt sicut sol in regno Patris sui* (Matth. xiii, 41-43); et illud, *Sic ibunt isti² in supplicium æternum; justi autem, in vitam æternam* (Id. xxv, 46). Et in Prophetis, quod commemorare longum est, rone ille, nunc iste ordo, si quis inspiciat, invenitur. Sed ego istum qua causa elegerim, dixi.

CAPUT II. — *An possint corpora in ustione ignis esse perpetua.*

Quid igitur ostendam, unde convincantur increduli, posse humana corpora animata atque viventia, non solum nunquam morte dissolvi, sed in æternorum quoque ignium durare tormentis? Nolunt enim hoc ad Omnipotentis nos referre potentiam, sed aliquo exemplo persuasione sibi flagitant. Quibus si respondebimus, esse animalia profecto corruptibilia, quia mortalia, quæ tamen in mediis ignibus vivant: nonnullum etiam genus vermium in aquarum calidarum scaturigine reperiri, quarum fervorem nemo impune contractat; illos autem non solum sine ulla sui læsione ibi esse, sed extra esse non posse: aut nolunt credere, si ostendere non valeamus; aut si valuerimus sive oculis demonstrare res ipsas, sive per testes idoneos edocere, non satis hoc esse ad exemplum rei, de qua quæstio est, eadem infidelitate contendunt: quia

hæc animalia nec semper vivunt, et in illis fervoribus sine doloribus vivunt, sæ quippe naturæ convenientibus vegetantur illis, non cruciantur elementis; quasi non incredibilius sit vegetari, quam cruciari talibus rebus. Mirabile est enim, dolere in ignibus, et tamen vivere: sed mirabilius, vivere in ignibus, nec dolere. Si autem hoc creditur, cur non et illud?

CAPUT III. — *An consequens sit ut corporeum dolorem sequatur carnis interitus.*

1. Sed nullum est, inquit, corpus quod dolere possit, nec possit mori. Et hoc unde scimus? Nam de corporibus quis certus est dæmonum, utrum in eis doleant, quando se affligi magnis cruciatibus consententur (a)? Quod si respondetur, terrenum corpus solidum scilicet atque conspicuum nullum esse, atque ut uno potius nomine id explicem, nullam esse carnem quæ dolere possit, morique non possit: quid aliud dicitur, nisi quod sensu corporis homines et experientia collegerunt? Nullam namque carnem nisi mortalem sciunt: et hæc est eorum tota ratio, ut quod experti non sunt, nequaquam esse posse arbitrentur. Nam cujus rationis est dolorem facere mortis argumentum, cum vitæ potius sit indicium? Etsi enim quærimus, utrum semper possit vivere: certum tamen est vivere omne quod dolet, doloremque omnem nisi in re vivente esse non posse. Necesse est ergo ut vivat dolens, non est necesse ut occidat dolor: quia nec corpora ista mortalia, et utique moritura, omnis dolor occidit; et ut dolor aliquis possit occidere, illa causa est, quoniam sic est anima connexa huic corpori, ut summis doloribus cedat, etque discedat: quoniam et ipsa compago membrorum atque vitalium sic infirma est, ut eam vim quæ magnum vel summum dolorem facit, non valeat sustinere. Tunc autem tali corpori anima et eo connectitur modo, ut illud vinculum sicut nulla temporis longitudine solvitur, ita nullo dolore rumpatur. Proinde etiamsi caro nunc talis nulla est, quæ sensum doloris perpetui possit, mortemque non possit: erit tamen tunc talis caro, qualis nunc non est; sicut talis erit et mors, qualis nunc non est. Non enim nulla, sed sempiterna mors erit, quando nec vivere anima poterit Deum non habendo, nec doloribus corporis carere moriendo. Prima mors animam nolentem pellit e corpore, secunda mors animam nolentem tenet in corpore: ab utra-

(a) Hoc constat ex Hieronymo, contra Vigilantium, et in Epitaphio Paulæ; ex Joanne Chrysostomo, Homilia 68, ad populum Antiochenum; Cypriano, Epistola 2, ad Donatum; Epistola 76, ad Magnum; libris ad Demetrianum, et de idolorum venitate. Lactantius, Institutionem libro 2, cap. 16: «Maximis saepeululibus editis verberari se et ardere, et jam jamque exire proclamant (dæmones).»

Orgeæc.

¹ Mss., ardentem.

² Ita Mss. At editi, Sic ibunt injusti.

que morte communiter id habetur, ut quod non vult anima, de suo corpore patiatur.

2. Attendant autem isti contradictores nullam esse nunc carnem, quæ dolorem pati possit, mortemque non possit; et non attendunt esse tamen aliquid tale quod corpore majus sit. Ipse quippe animus, cujus præsentia corpus vivit et regitur, et dolorem pati potest, et mori non potest. Ecce inventa res est, quæ cum sensum doloris habeat, immortalis est. Hoc igitur crit tunc etiam in corporibus damnatorum, quod nunc esse scimus in animis omnium. Si autem consideremus diligentius, dolor qui dicitur corporis, magis ad animam pertinet. Animæ enim est dolere, non corporis, etiam quando ei dolendi causa existit a corpore, cum in eo loco dolet, ubi læditur corpus. Sicut ergo dicimus corpora sentientia, et corpora viventia, cum ab anima sit corpori² sensus et vita; ita et corpora dicimus dolentia, cum dolor corpori nisi ab anima esse non possit. Dolet itaque anima cum corpore in eo loco ejus, ubi aliquid contingit ut doleat. Dolet et sola, quamvis sit in corpore, cum aliqua causa etiam invisibili tristis est ipsa corpore incolumi. Dolet etiam non in corpore constituta: nam utique dolebat dives ille apud inferos, quando dicebat, *Crucior in hac flamma* (*Luc. xv, 24*). Corpus autem nec exanime dolet, nec animatum sine anima dolet. Si ergo a dolore argumentum recte sumeretur ad mortem, ut ideo mors possit accidere, quia potuit accidere et dolor, magis ad animam pertineret mori, ad quam magis pertinet et dolere. Cum vero illa quæ magis dolere potest, non possit mori, quid momenti affert cur illa corpora, quoniam futura sunt in doloribus, ideo etiam moritura esse credamus? Dixerunt quidem³ Platonici, ex terrenis corporibus moribundisque membris esse animæ et metuere, et capere, et dolere, atque gaudere (a). Unde Virgilius, *Hinc*, inquit, (id est, ex moribundis terreni corporis membris) *metuunt cupiuntque, dolent gaudentque* (*Æneid. lib. 6, vers. 733*). Sed convicimus eos in quarto decimo (b) hujus operis libro, habere animas secundum ipsos ab omni etiam corporis labe purgatas, diram cupiditatem, qua rursus incipiunt in corpora velle reverti (*Ibid. vers. 720, 721*). Ubi autem potest esse cupiditas, profecto etiam dolor potest. Frustrata quippe cupiditas sive non perveniendo quo tendebat, sive amittendo quo pervenerat, vertitur in dolorem. Quapropter si anima, quæ vel sola vel maxime dolet, habet tamen quamdam pro suo modo immortalita-

¹ Hic apud Lov. addendum est, *tamen*.

² Sic Mss. Editi autem huc et proximo loco, pro *corpore*, habent, *corpore*.

³ Editi manuscriptis dissentientes, habent, *quidam*.

(a) Sic Aristoteles in libro de Anima primo negat animam trisci, gaudere, timere, non secus quam texere vel edificare: quoniam, ut hæc agit per corpus, ita et illa. Quod si hoc de ira et gaudio admittamus, profecto et dolor ab anima eadem ratione excludetur, quem et excludunt Aristotelis interpretes, Alexander Aphrodisiensis et The-mistius, ab anima sine corpore. *Loc. VIVAS.*

(b) *Vind. Am. et omnes Mss., in duodecimo.* Lapsus est vel auctoris vel amanuensis: nam id in Platonicos egit Augustinus, lib. 14, capp. 3, 5.

tem suam (a), non ideo mori poterunt illa corpora, quia dolebunt. Postremo si corpora faciunt, ut animæ doleant, cur eis dolorem possunt, mortem vero inferre non possunt, nisi quia consequens non est, ut mortem faciat, quod dolorem facit? Cur ergo incredibile est, ita ignes illis corporibus dolorem posse inferre, non mortem, sicut ipsa corpora dolere animas faciunt, quas tamen non ideo mori cogunt? Non est ergo necessarium futuræ mortis argumentum dolor.

CAPUT IV. — *De naturalibus exemplis, quorum consideratio doceat posse inter cruciatus viventia corpora permanere.*

1. Quapropter si, at¹ scripserunt qui naturas animalium curiosius indagarunt, salamandra in ignibus vivit; et quidam notissimi Siciliæ montes, qui tanta diuturnitate temporis atque vetustate usque nunc ac deinceps flammis aestuant, atque integri perseverant, satis idonei testes sunt, non omne quod ardet absumi; et anima indicat, non omne quod dolere potest, posse etiam mori: quid adhuc a nobis rerum poscantur exempla, quibus deceamus, non esse incredibile, ut hominum corpora sempiterno supplicio punitorum, et in igne animam non amittant, et sine detrimento ardeant, et sine interitu doleant? Habebit enim tunc istam² carnis substantia qualitatem ab illo iudicam, qui tam miras et varias tot rebus indidit, quas videmus, ut eas, quia multæ sunt, non miremur. Quis enim nisi Deus creator omnium dedit carni pavonis mortui ne putresceret? Quod cum auditum incredibile videretur, evenit ut apud Carthaginem nobis cocta apponeretur hæc avis: de cujus pectore pulparum, quantum visum est, decerptum servari jussimus: quod post dierum tantum spatium, quanto alia caro quæcumque cocta putresceret, prolatum atque oblatum, nihil nostrum offendit olfactum. Itemque repositum post dies amplius quam triginta, idem quod erat inventum est: idemque post annum, nisi quod aliquantum corpulentia sicciore et contractioris fuit. Quis paleæ dedit vel tam frigidam vim, ut obrutas nives servet; vel tam fervidam, ut poma immatura maturet?

2. De ipso igne mira quis explicet, quo quæque adusta nigrescunt, cum ipse sit lucidus; et pene omnia quæ ambit et lambit, colore pulcherrimus³ decolorat, atque ex pruna fulgida carbonem teterrimum reddit? Neque id quasi regulariter definitum est: nam e contrario lapides igne candente percocti, et ipsi fiunt candidi, et quanvis ille magis rubeat, illi albicent⁴, congruit tamen luci quod album est, sicut nigrum tenebris. Cum itaque ignis in lignis ardeat, ut lapi-

¹ *Vind. Am. Er. et Mss., sicut.*

² Sic. Mss. Editi vero, *ista*.

³ Sola editio Lov., *pulcherrimo*.

⁴ Ita Mss. At editi, *illi albedo colore nitescunt*

(a) Non enim ita immortalis est, ut æternum antea vixerit, nec ut exstingui nulla vi queat: sed quod condita a Deo nunquam ita peribit, ut in nihilum abeat, tametsi mortem pati possit, quam secundarè dicimus supplicii in perpetuum duraturi. *Loc. VIVAS.*

des coquat, contrarios habet non in contrariis rebus effectus. Etsi enim lapides et ligna diversa sunt; contraria tamen non sunt, sicut album et nigrum, quorum in lapidibus unum facit, alterum in lignis, clarus illos clarificans, hæc obfuscans; cum in illis deficeret, nisi in istis viveret. Quid in carbonibus, nonne miranda est¹ et tanta infirmitas, ut ictu levissimo frangantur, pressu facillimo conterantur; et tanta firmitas, ut nullo humore corrumpantur, nulla ætate vincantur, usque adeo ut eos subternere soleant, qui limites figunt, ad convincendum litigatorem, quisquis post quantalibet tempora exstiterit, fixumque lapidem limitem non esse contenderit? Quis eos in terra humida infossos, ubi ligna putrescerent, tam diu durare incorruptibiles posse, nisi rerum ille corruptor ignis effecit (a)?

3. Lutueamur etiam miraculum calcis, excepto eo, de quo jam reddidimus, quod igne candicat², quo alia tetra redduntur, etiam occultissime ab igne ignem concipit, eumque jam gleba tangentibus frigida tam latenter servat, ut nulli nostro sensui prorsus appareat, sed compertus experimento, etiam dum non apparet, sciatur inesse sopitus. Propter quod eam vivam calcem loquimur, velut ipse ignis latens anima sit invisibilis visibilis corporis. Jam vero quam mirum est quod cum exstinguitur, tunc accenditur? Ut enim occulto igne careat, aqua³ infunditur, aqua ve perfunditur; et cum ante sit frigida, inde fervescit, unde ferventia cuncta frigescent. Velut expirante ergo illa gleba discedens ignis, qui latebat, apparet, ac deinde tanquam morte⁴ sic frigida est, ut adjecta unda non sit arsura, et quam calcem vocabamus vivam, vocemus exstinctam. Quid est quod huic miraculo addi posse videatur? et tamen additur. Nam si non adhibeas aquam, sed oleum, quod magis sones est ignis, nulla ejus perfusione vel infusione fervescit (b). Hoc miraculum si de aliquo Indico lapide legeremus, sive audiremus, et in nostrum experimentum venire non posset, profecto aut mendacium putaremus, aut certe granditer miraremur. Quarum vero rerum ante oculos nostros quotidiana documenta versantur, non genere minus mirabili, sed ipsa assiduitate vilescent, ita ut ex ipsa India, quæ remota est pars orbis a nobis, desiderimus nonnulla mirari, quæ ad nos potuerunt miranda perducere.

4. Adamantem lapidem multi apud nos habent, et maxime aurifices insignitioresque geminarum, qui lapis nec ferro, nec igni (c), nec alia vi ulla, perhibetur præter⁵ hircino sanguine vinci (d). Sed qui

¹ Editi, *nonne miranda res est*. Abest, *res*, a natura scripturæ.

² Sic Mss. At Editi, *candescat*.

³ Apud Lov., *aqua*.

⁴ Er. Lugd. et Ven., *tanquam mortua*. M.

⁵ Sic Mss. Editi vero, *præterquam*.

(a) Samius, Rhœci filius, primus consuluit carbones fundamentis templi Ephesie Dianæ subijci. Vide Diogenem Laertium, lib. 2, § 103. LARCHER.

(b) Conf. Plin., lib. 33, cap. 50.

(c) Adamas positus in vasculo liquandis metallis idoneo, in fumum evanescit. LARCHER.

(d) Conf. Plin., lib. 37, cap. 13.

SANCT. AUGUST. VII.

eum habent atque reverunt, numquid ita mirantur, ut hi quibus primum potentia ejus ostenditur? Quibus autem non ostenditur, fortasse nec credunt; aut si credunt, inexperta mirantur; et si contigerit exporiri, adhuc quidem mirantur insolita, sed assiduitas experiendi paulatim subtrahit admirationis incitamentum. Magnetem lapidem novimus mirabilem ferri esse raptorem: quod cum primum vidi, vehementer inhorui. Quippe cernebam a lapide ferreum anulum raptum atque suspensum; deinde tanquam ferro quod rapuerat, vim dedisset stam, communemque fecisset, idem annulus admotus est alteri, eamque suspendit, atque ut ille prior lapidi, sic alter annulus priori annulo cohærebat: accessit eodem modo tertius, accessit et quartus, jamque sibi per mutua circulis nexis, non implicatorum intrinsecus, sed extrinsecus adhærentium, quasi catena pependit annulorum. Quis istam vim lapidis non stupeat, quæ illi non solum inerat, verum etiam per tot suspensa transibat, et invisibilibus ea vinculis subligabat? Sed multo est mirabilius, quod a fratre et coepiscopo meo Severo Milevitano de isto lapide comperi. Se ipsum namque vidisse narravit, quemadmodum Bathanarius quondam Comes Africae, cum apud eum convivarent Episcopus, eundem protulerit lapidem, et tenuerit sub argento, ferrumque super argentum posuerit; deinde sicut subter movebat manum, qua lapidem tenebat, ita ferrum desuper movebatur, atque argento medio nihilque patiente, concitatissimo cursu ad recursu infra lapis ab homine, supra ferrum rapiebatur a lapide. Dixi quod ipse consexi, dixi quod ab illo audivi, cui tanquam ipse viderim credidi. Quid etiam de isto magnete legerim dicam. Quando juxta eum ponitur adamas, non rapit ferrum; et si jam rapuerat, ut ei appropinquaverit; mox remittit (a) India mittit hos lapides: sed si eos nos cognitos jam desistimus admirari, quanto magis illi a quibus veniunt, si eos facillimos habent, sic forsitan habent ut nos calcem, quam miro modo aqua fervescentem, qua solet ignis exstingui, et oleo non fervescentem, quo solet ignis accendi, quia in promptu nobis est, non miramur?

CAPUT V. -- *Quanta sint quorum ratio nequeat agnoscere*¹, et tamen eadem vera esse non sit ambiguum.

1. Veruntamen homines infideles, qui² cum divina vel præterita vel futura miracula prædicamus, quæ illis experienda non valemus ostendere, rationem a nobis earum flagitant rerum; quam quoniam non possumus reddere (excedunt enim vires mentis humanæ), existimant falsa esse quæ dicimus; ipsi de tot mirabilibus rebus, quas vel videre possumus, vel videmus, debent reddere rationem. Quod si fieri ab homine non posse perviderint, fatendum est eis, non ideo aliquid non fuisse, vel futurum non esse, quia ratio

¹ Titulus capituli quinti vitulatus in ante editis sic habebat *Quanta sint quæ non recte queant agnoscere*. Castigatur ex manuscriptis.

² Ita Mss. At editi, *quibus*.

(a) Plinius, lib. 37, cap. 13.

(Vingt-trois.)

inde non potest reddi; quandoquidem sunt ista de quibus similiter non potest. Non itaque pergo per plurima quæ mandata sunt litteris, non gesta atque transacta, sed in locis quibusque manentia; quo si quisquam ire voluerit et potuerit, utrum vera sint, explorabit, sed pauca commemoro. Agrigentinum Siciliae salem perhibent: cum fuerit admotus igni, velut in aqua fluescere; cum vero ipsi aquæ, velut in igne crepitare (a). Apud Garamantas quemdam fontem tam frigidum diebus, ut non bibatur; tam fervidum noctibus, ut non tangatur (b). In Epiro alium fontem, in quo faces, ut in cæteris, extinguuntur accensæ; sed, non ut in cæteris, accenduntur extinctæ (c). Asbeston Arcadiæ lapidem propterea sic vocari, quod accensus semel jam non possit extinguere (d). Lignum cujusdam ficus Ægyptiæ, non ut ligna cætera in aquis natæ, sed mergi; et quod est mirabilius, cum in imo aliquandiu fuerit, inde ad aquæ superficiem rursus emergere, quando madefactum debuit humoris pondere prægravari (e). Poma in terra Sodomorum gigni quidem, et ad maturitatis faciem pervenire; sed morsu pressuve tentata, in fumum ac favillam corio fatiscente vanescere (f). Pyritem lapidem Persicum tenentis manum, si vehementius prematur, adurere, propter quod ab igne nomen accepit (g). In eadem Perside gigni etiam lapidem Selenitem, cujus interiorem candorem cum luna crescere atque deficere (h). In Cappadocia etiam vento equas concipere, eosdemque fetus non amplius triennio vivere (i). Tylon¹ Indiæ insulam eo præferri cæteris terris, quod omnis arbor quæ in ea gignitur, nunquam nudatur tegmine foliorum (k).

2. De his atque aliis innumerabilibus mirabilibus, quæ historia non factorum et transactorum, sed manentium locorum tenet, mihi autem aliud agenti ea persequi nimis longum est, reddant rationem, si possunt, infideles isti, qui nolunt divinis Litteris credere; quid aliud quam non putantes eas esse divinas, eo quod res habeant incredibiles, sicuti hoc est unde nunc agimus. Non enim admittit, inquit, ulla ratio, ut caro ardeat, nec absumatur; doleat, neque moriatur: ratiocinatores videlicet magni, qui de omnibus rebus quas esse mirabiles constat, possint reddere rationem. Reddant ergo de his (l), quæ pauca posuimus, quæ procul dubio si esse nescirent, et ea futura esse diceremus, multo minus crederent, quam quod nunc dicentibus nobis nolunt credere aliquando venturum. Quis enim eorum nobis crederet, si, quemadmodum dicimus futura hominum viva corpora, quæ semper arsu-

ra atque dolitura, nec tamen aliquando moritura sint, ita diceremus in futuro sæculo futurum salem, quem faceret ignis velut in aqua fluescere, eundemque faceret aqua velut in igne crepitare; aut futurum fontem, cujus aqua in refrigerio noctis sic ardeat, ut non possit tangi; in aestibus vero diei sic algeat, ut tibi non possit; aut futurum lapidem, vel eum qui suo calore manum constringentis adureret, vel eum qui undecumque accensus extinguere omniino non posset, et cætera quæ prætermisissis aliis innumeris commemoranda interim duxi? Hæc ergo in illo sæculo, quod futurum est, si diceremus futura, nobisque increduli responderent, Si vultis ut ea credamus, de singulis reddite rationem: nos non posse confitemur, eo quod istis et similibus Dei miris operibus infirma mortalium ratiocinatio vinceretur; fixam tamen apud nos esse rationem, non sine ratione Omnipotentem facere, unde animus humanus infirmus rationem non potest reddere: et in multis quidem rebus incertum nobis esse quid velit; illud tamen esse certissimum, nihil eorum illi esse impossibile, quæcumque voluerit: eaque nos credere prædicenti, quem neque impotentem, neque mentientem possumus credere. Hi tamen fidei reprehensores, exactoresque rationis, quid ab ista respondent, de quibus ratio reddi ab homine non potest, et tamen sunt, et ipsi rationi naturæ videntur esse contraria? Quæ si futura esse diceremus, similiter a nobis, sicut eorum quæ futura esse dicimus, ab infidelibus ratio posceretur. Ac per hoc, cum in talibus operibus Dei deficiat ratio cordis et sermonis humani, sicut ista non ideo non sunt, sic non ideo etiam illa non erunt, quoniam ratio de utrisque ab homine non potest reddi.

CAPUT VI. — *Quod non omnia miracula naturalia sint, sed pleraque humano ingenio modificata, pleraque autem dæmonum arte composita.*

1. Hic forte respondeant, Prorsus nec ista sunt, nec ista credimus, falsa de his dicta, falsa conscripta sunt; et adjiciant ratiocinantes, atque dicentes, Si talia credenda sunt, credite et vos quod in eadem litteras est relatum, fuisse vel esse quoddam Veneris sanum, atque ibi candelabrum, et in eo lucernam sub divo sic ardentem, ut eam nulla tempestas, nullus imber extingueret, unde sicut ille lapis, ita ista *λύχνος ἀσβεστος*, id est, lucerna inextinguibilis, nominata est. Quod propterea poterunt dicere, ut respondendi nobis angustias ingerant: quia si dixerimus non esse credendum, scripta illa miraculorum infirmabimus; si autem credendum esse concesserimus, confirmabimus numina paganorum. Sed nos, sicut jam in libro duodevigesimo hujus operis dixi (cap. 18), non habemus necesse omnia credere quæ continet historia gentiam, cum et ipsi inter se historici, sicut ait Varro, quasi data opera et quasi ex industria per multa dissentiant; sed ea, si volumus, credimus quæ non adversantur libris, quibus non dubitamus oportere nos credere. De his autem miraculorum locis, nobis ad ea quæ futura persuadere incredulis volumus, satis

¹ In aliquot Mss., *Thylen*.

(a) Plinius, lib. 31, cap. 7.

(b) Id. lib. 5, cap. 5.

(c) Id. lib. 2, cap. 105, ex Pomponio Mela, lib. 2, cap. 3.

(d) Id. lib. 37, cap. 10.

(e) Id. lib. 13, cap. 7.

(f) Josephus, lib. 4, de Bello Jud., cap. 8; Solinus, cap. 5.

(g) Tacitus, lib. 5 Hist., cap. 7.

(h) Plinius, lib. 36, cap. 19, et lib. 37, cap. 11.

(i) Id. lib. 37, cap. 10.

(j) Solinus, cap. 45. Vide etiam Plinium, lib. 8, cap. 42.

(k) Plinius, lib. 12, cap. 11. Tylus insula est situs Persici.

(l) Subaudi, *rationem*.

illa sufficiunt, quæ nos quosque possumus experiri, et eorum testes idoneos non difficile est invenire. De isto autem fano Veneris et lucerna inextinguibili, non solum in nullas coarctamur angustias, verum etiam latitudinis nobis campus aperitur. Addimus enim ad istam lucernam inextinguibilem, et humanarum et magicarum, id est per homines dæmoniarum¹ artium, et ipsorum per se ipsos dæmonum multa miracula: quæ si negare voluerimus, eidem ipsi cui credimus sacrarum Litterarum adversabimur veritati. Aut ergo in lucerna illa mechanicum aliquid de lapide asbesto ars humana molita est, aut arte magica factum est, quod homines illo mirarentur in templo, aut dæmon quispiam sub nomine Veneris tanta se efficacia præsentavit, ut hoc ibi prodigium et appareret hominibus, et diutius permaneret (a). Illi-
ciantur autem dæmones ad inhabitandum per creaturas, quas non ipsi, sed Deus condidit, delectabilibus pro sua diversitate diversis, non ut animalia cibus, sed ut spiritus signis, quæ cujusque delectationi congruunt, per varia genera lapidum, herbarum, lignorum, animalium, carminum, rituum (b). Ut autem illiciantur ab hominibus, prius eos ipsi astutissima calliditate seducunt, vel inspirando eorum cordibus virus occultum, vel etiam fallacibus amicitis apparendo, eorumque paucos discipulos suos faciunt, plurimorumque doctores. Neque enim potuit, nisi primum ipsis docentibus, disci quid quisque illorum appetat, quid exhorreat, quo invitetur nomine, quo cogatur: unde magicæ artes earumque artifices exsiterunt. Maxime autem possident corda mortalium, qua potissimum possessione gloriantur, cum se transfigurant in Angelos lucis (II Cor. xi, 14). Sunt ergo facta eorum plurima, quæ quanto magis mirabilia constemur, tanto cautius vitare debemus. Sed ad hoc unde nunc agimus, nobis etiam ipsa proficiunt. Si enim hæc immundi dæmones possunt, quanto potentiores sunt sancti Angeli, quanto potentior est his omnibus Deus, qui tantorum miraculorum effectores etiam ipsos Angelos fecit?

2. Quamobrem si tot et tanta mirifica², quæ *μυχη-
vi, πατρα* appellatur, Dei creatura utentibus humanis artibus fiunt, ut ea qui nesciunt opinentur esse divina; unde factum est, ut in quodam templo lapidibus magnetibus in solo et camera proportionem magnitudinis positus, simulacrum ferreum aeris illius medio inter utrumque lapidem, ignorantibus quid sursum esset ac deorsum, quasi numinis potestate penderet (c); quæ

¹ Sic Viud. Am. et Mss. At Er. et Lov. *dæmoniacarum*.

² Editi, *tamque mirifica*. Abest, *tamque*, à manu-
scriptis.

(a) Erutum est sepulcrum memoria patrum, in quo ardebat lucerna, condita ibi, ut ex inscriptione apparebat, supra millesimum et quingentesimum annum; eaque tota extemplo, ut contractari cœpta est, inter admotas manus friata in tenuissimum abiit pulverem. Liv. Vives.

(b) Pselus, de Dæmonibus, cap. ult., hoc ipsum ait se didicisse a quodam Ephesio qui dæmonibus familiariter utebatur, nullum nempe esse genus rerum, quo certi aliqui dæmones allici non possint. Cocceus.

(c) Id refert Rufinus, lib. 2 Hist. eccles., cap. 23, inter fraudes quæ repertæ sunt in templo Serapidis apud Alexandriam: «Erat,» inquit, «aliud fraudis genus hujus-
«modi: natura lapidia magnetis hujus virtutis esse perhibetur, ut ad se rapiat et attrahat ferrum: signum solis ad

aliquid etiam in illa lucerna Veneris de lapide asbesto ab artifice fieri potuisse jam diximus: si magorum opera, quos nostra Scriptura veneticos et incantatores vocat, in tantum dæmones extollere potuerunt, ut congruere hominum sensibus sibi nobilis poeta videretur, de quadam femina, quæ tali arte polleat, dicens:

Hæc se carminibus promittit solvere mentes,
Quas velit, ast aliis duras immittere curas;
Sistere aquam fluvis, et vertere sidera retro;
Nocturnosque ciet manes: magire videtis.
Sub pedibus terram, et descendere montibus ornos:
(Virgil. *Æneid.* lib. 4, vers. 487-491.)

quanto magis Deus potens est facere quæ infidelibus sunt incredibilia, sed illius facilia potestati; quandoquidem ipse lapidum aliarumque vim rerum et hominum ingenia, qui ea miris utuntur modis, angelicasque naturas omnibus terrenis potentiores animantibus condidit, universa mirabilia mirabili vincente virtute, et operandi, jubendi, sinendique sapientia, utens omnibus tam mirabiliter, quam creavit?

CAPUT VII. — *Quod in rebus miris summa credendi ratio sit omnipotentia Creatoris.*

1. Cur itaque facere non possit Deus, ut et resurgant corpora mortuorum, et igne æterno crucientur corpora damnatorum, qui fecit mundum in cælo, in terra, in aere, in aquis, innumerabilibus miraculis plenum; cum sit omnibus quibus plenus est procul dubio majus et excellentius etiam ipse mundus miraculum? Sed isti cum quibus vel contra quos agimus, qui et Deum esse credunt a quo factus est mundus, et deos ab illo factos per quos ab illo administratur mundus, et miraculorum effectrices, sive spontaneorum, sive cultu et ritu quolibet imperatorum¹, sive etiam magicorum mundanas vel non negant, vel insuper et prædicant potestates, quando eis rerum vim mirabilem proponimus aliarum, quæ nec animalia sunt rationalia, nec ulla ratione præditi spiritus, sicut sunt ea, quorum pauca commemoravimus, respondere assolent: Vis est ista nature, natura eorum sic se habet, propriarum istæ sunt efficaciæ naturarum. Tota itaque ratio est, cur Agrigentinum salem flamma fluere faciat, aqua crepitare, quia hæc est natura ejus. At hoc esse potius contra naturam videtur, quæ non igni, sed aquæ dedit salem solvere; torrere autem igni, non aquæ. Sed ista, inquit, salis hujus naturalis est vis, ut his contraria patiatur. Hæc igitur ratio redditur et de illo fonte Garamantico, ubi una vena friget diebus, noctibus fervet, vi utraque molesta tangentibus. Hæc et de illo alio, qui cum sit contractantibus frigidus, et facem sicut alii fontes exstinguat accensam, dissimiliter tamen atque mirabiliter idem ipse accendit exstinctam. Hæc et de lapide

¹ Sic Er. et Mss. At Viud. Am. et Lov., *impetratorum*.

« hoc ipsum ex ferro subtilissima manu artificis fuerat fabricatum, ut lapis, cujus naturam ferrum ad se trahere
« diximus, desuper in laquearibus fixus, cum temperate
« sub ipso radio ad libram fuisset positum simulacrum et
« vi naturali ad se raperet ferrum, adsurrexisset populo simulacrum, et in aere pendere videretur. » Idem refert et Prosper, parte 3 de Prædictionibus, cap. 58. Cocceus

asbesto, qui cum ignem nullum habeat proprium, accepto tamen sic ardet alieno, ut non possit extinguī. Hæc de cæteris quæ piget retexere, quibus licet vis insolita contra naturam hesse videatur, alia tamen de illis non redditur ratio, nisi ut dicatur, hanc eorum esse naturam. Brevis sane ista est ratio, fateor, sufficiensque responsio. Sed cum Deus auctor sit naturarum omnium, cur nolunt¹ fortiosem nos reddere rationem, quando aliquid velut impossibile nolunt credere, eisque redditionem rationis poscentibus respondemus, hanc esse voluntatem omnipotentis Dei; qui certe non ob aliud vocatur omnipotens, nisi quoniam quidquid vult potest; qui potuit creare tam multa, quæ nisi ostenderentur, aut a credendis hodieque testibus dicerentur, profecto impossibilia putarentur, non solum quæ ignotissima apud nos, verum etiam quæ notissima posui. Illa enim quæ apud nos præter eos, quorum de his libros legimus, non habent testem, et ab eis conscripta sunt qui non sunt divinitus docti atque humanitas falli forte potuerunt, licet cuique sine recta reprehensione non credere.

2. Nam nec ego volo temere credi cuncta quæ posui, quia nec a me ipso ita creduntur tanquam nulla de illis sit in mea cogitatione dubitatio, exceptis his quæ vel ipse sum expertus, et cuius facile est experiri; sicut de calce, quod fervet in aqua, in oleo frigida est; de magnete lapide, quod nescio qua sorbitione insensibili stipulam non moveat, et ferrum rapiat; de carne non putrescente pavonis, cum putruerit et Platonis; de palea sic frigente ut fluere nivem non sinat, sic calente ut murescere poma compellat; de igne fulgido, quod secundum suum fulgorem lapides coquendo candificet, et contra eundem suum fulgorem urendo plurima obfuscat. Tale est quod et nigra maculae offunduntur ex oleo splendido, similiter nigrae lineæ de candido imprimuntur argento. De carbonibus etiam, quod accedente² igne sic vertantur in contrarium, ut de lignis pulcherrimis tetri, fragiles de duris, imputribiles de putribilibus fiant. Hæc ipse quædam cum multis, quædam eum omnibus novi, et alia plurima, quæ huic libro inserere longum fuit. De his autem quæ posui non experta, sed lecta præter de fonte illo, ubi faces extinguuntur ardeutes et accenduntur extinctæ, et de pomis terræ Sodomorum forinsecus quasi maturis, intrinsecus fumeis, nec testes aliquos idoneos a quibus utrum vera essent audirem, potui reperire. Et illum quidem fontem non inveni, qui in Epiro vidisse se dicerent, sed qui in Gallia similem nossent non longe a Gratianopoli civitate (a). De fructibus autem Sodomitarum arborum, non tantum litteræ fide dignæ indicant, verum etiam tam multi se loquuntur expertos, ut hinc dubitare non possim. Cætera vero sic habeo, ut neque affirmanda, neque neganda decreverim: sed ideo etiam

ipsa posui, quoniam apud eorum, contra quos agimus, historicos legi: ut ostenderem qualia multa, multique illorum, nulla reddita ratione, in suorum litteratorum scripta litteris credant, qui nobis credere, quando id quod eorum experientiam sensumque transgreditur, omnipotentem Deum dicimus esse facturum, nec reddita ratione dignantur. Nam quæ melior et validior ratio de rebus talibus redditur, quam cum Omnipotens ea posse facere perhibetur, et facturus dicitur, quæ prænuntiasset ibi legitur, ubi alia multa prænuntiavit, quæ fecisse monstratur? Ipse quippe faciet, quia se facturum esse prædixit, quæ impossibilia putantur, qui promisit et fecit ut ab incredulis gentibus incredibilia crederentur.

CAPUT VIII. — *Non esse contra naturam, cum in aliqua re, cujus natura innotuit, aliquid ab eo quod erat notum, incipit esse diversum.*

1. Si autem propterea respondent, se non credere quæ de humanis semper arsuris nec unquam morituris corporibus dicimus, quia humanorum corporum naturam novimus longe aliter institutam; unde nec illa ratio hinc reddi potest, quæ de illis naturis mirabilibus reddebatur, ut dici possit, Vis ista naturalis est, rei hujus ista natura est; quoniam scimus humanæ carnis istam non esse naturam: habemus quidem quod respondeamus de Litteris sacris, hanc ipsam scilicet humanam carnem aliter institutam fuisse ante peccatum, id est, ut posset nunquam perpeti mortem; aliter autem post peccatum, qualis in ærumna hujus mortalitatis innotuit, ut perpetem vitam tenere non possit. Sic ergo aliter quam nobis nota est, instituetur in resurrectione mortuorum. Sed quoniam istis non credunt litteris, ubi legitur qualis in paradiso vixerit homo, quantumque fuerit a necessitate mortis alienus, quibus utique si crederent, non cum illis poena damnatorum, quæ futura est, operosius ageremus; de litteris eorum, qui doctissimi apud illos fuerunt, aliquid proferendum est, quo appareat posse fieri, ut aliter se habeat quæque res, quam prius in rebus innotuerat suæ determinatione naturæ.

2. Est in Marci Varronis libris, quorum inscriptio est, De gente populi Romani, quod eisdem verbis, quibus ibi legitur, et hic ponam: « In cælo, inquit, mirabile exstitit portentum: nam in stella Veneris nobilissima, quam Plautus Vesperugiæm (*Amphitr. actu 1, scena 1, vers. 419*), Homerus Hesperon appellat, pulcherrimam dicens (*Iliadis x, vers. 348*), Castor scribit tantum portentum exstitisse, ut mutaret colorem, magnitudinem, figuram, cursum: quod factum ita neque antea, nec postea sit. Hoc factum Ogyge¹ rege dicebant Adrastus Cyzicenus² et Dion Neapolites, mathematici nobiles » (a). Hoc certe

¹ Editi, *volunt*. Plures vero manuscripti, *nolunt*: melius sane; nam de incredulis queritur Augustinus, quod eam, quam fortiosem appellat, nolint sibi reddi rationem, hanc videlicet esse voluntatem omnipotentis Dei.

² Sic Mss. At editi, *accedente*.

(a) Neuve Grenoble.

¹ Mss., *Ogygo*. Vind. Am. et Er., *Ogygio*. Vide supra, lib. 18, cap. 8, et ibi adnotata.

² In plerisque Mss., *Adrastus Cyzicenus*, vel, *Cyzicenus*.

(a) Confer quæ de hoc portento scripsit eruditissimus Freret, in *Mémoires de l'Académie des Belles-Lettres*, tomus pécuno, pag. 357-376. Latæna.

Varro tantus auctor portentum non appellaret, nisi esse contra naturam videretur. Omnia quippe portenta contra naturam dicimus esse: sed non sunt. Quomodo est enim contra naturam, quod Dei sit voluntate, cum voluntas tanti utique Conditoris conditæ rei cujusque natura sit? Portentum ergo sit, non contra naturam, sed contra quam est nota natura. Quis autem portentorum numerat multitudinem, quæ historia gentium continetur? Sed nunc in hoc uno attendamus, quod ad rem de qua agimus pertinet. Quid ita dispositum est ab auctore naturæ cæli et terræ, quemadmodum cursus ordinatissimus siderum? quid tam raris legibus fixisque firmatum? Et tamen quando ille voluit, qui summo regit imperio ac potestate quod condidit, stella præ cæteris magnitudine atque splendore notissima, colorem magnitudinem, figuram, et (quod est mirabilius) sui cursus ordinem legemque mutavit. Turbavit profecto tunc, si ulli jam fuerunt canones astrologorum, quos velut inerrabili¹ computatione de præteritis ac futuris astrorum motibus conscriptos habent, quos canones sequendo ausi sunt dicere hoc quod de Lucifero contigit, nec antea, nec postea contigisse. Nos autem in divinis libris legimus, etiam solem ipsum et stellas; cum hoc a Domino Deo petivisset vir sanctus Jesus Nave, donec ceptum prælium victoria terminaret (*Josue x, 13*); et retrorsum redisse, ut regi Ezechiæ quindecim anni ad vivendum additi, hoc etiam prodigio promissioni Dei significarentur adjuncto (*Isai. xxxviii, 8*). Sed ista quoque miracula, quæ meritis sunt concessa sanctorum, quando credunt isti facta, magicis artibus tribuunt. Unde illud est quod superius commemoravi dixisse Virgilium,

Sistere aquam fluvius, et vertere sidera retro.
(*Æneid. lib. 4, v. 489.*)

Nam et fluvium stetisse superius, inferiusque fluxisse, cum populus Dei, ductore supra memorato Jesu Nave, viam carperet (*Josue iv, 18*), et Elia propheta transeunte, ac postea discipulo ejus Elisæo id esse factum in sacris Litteris legimus (*IV Reg. ii, 8, 14*); et retro versum fuisse maximum sidus regnante Ezechia, modo commemoravimus. Quod vero de Lucifero Varro scripsit, non est illic dictum alicui homini petenti id fuisse concessum.

3. Non ergo de notitia naturarum caliginem sibi faciant infideles, quasi non possit in aliqua re divinitus fieri aliud, quam in ejus natura per humanam suam experientiam cognoverunt: quamvis et ipsa quæ in rerum natura omnibus nota sunt, non minus mira sint; essentque stupenda considerantibus cunctis, si solerent homines mirari mira nisi rara. Quis enim, consulta ratione, non videat in hominum innumerabili numerositate, et tanta naturæ similitudine, valde mirabiliter sic habere singulos singulas facies, ut nisi inter se similes essent, non discerneretur species eorum ab animalibus cæteris; et rursus nisi inter se dissimiles essent, non discernerentur

singuli ab hominibus cæteris? Quos ergo similes conflentur, eosdem dissimiles invenimus. Sed mirabilior est consideratio dissimilitudinis; quoniam similitudinem Justius videtur exposcere natura communis. Et tamen quoniam quæ sunt rara, ipsa sunt mira, multo amplius admiramur quando duos ita similes reperimus, ut in eis discernendis aut semper, aut frequenter erremus.

4. Sed quod dixi scriptum a Varrone, licet eorum sit historicus idemque doctissimus, fortasse vere factum esse non credunt; aut quia non diu mansit talis¹ ejusdem sideris cursus, sed reditum est ad solitum, minus isto moventur exemplo. Habent ergo aliud, quod etiam nunc possit ostendi, eisque puto debere sufficere, quo commoneantur², cum aliquid adverterint in aliqua institutione naturæ, eamque sibi notissimam fecerint, non se inde Deo debere præscribere, quasi eam non possit in longe aliud, quam eis cognita est, vertere atque mutare. Terra Sodomorum non fuit utique ut nunc est: sed jacebat simili cæteris facie, eademque vel etiam uberiore fecunditate pollebat; nam Dei paradiso in divinis eloquiis comparata est (*Gen. xiii, 10*). Hæc posteaquam facta de cælo est, sicut illorum quoque attestatur historia, et nunc ab eis qui veniunt ad loca illa conspicitur, prodigiosa fuligine horrori est, et poma ejus interiorem favillam mendaci superficie maturitatis includunt. Ecce non erat talis, et talis est. Ecce a Conditore naturarum natura ejus in hanc fœdissimam diversitatem mirabili mutatione conversa est: et quod post tam longum accidit tempus, tam longo tempore perseverat.

5. Sicut ergo non fuit impossibile Deo, quæ voluit, instituire; sic ei non est impossibile, in quidquid voluerit, quæ instituit, mutare naturas. Unde illorum quoque miraculorum multitudo silvescit, quæ monstra, ostenta, portenta, prodigia nuncupantur: quæ recolere et commemorare si velim, hujus operis quis erit finis? Monstra sane dicta perhibent a monstrando, quod aliquid significando demonstrent; et ostenta ab ostendendo; et portenta a portendendo, id est, præostendendo; et prodigia, quod porro dicant, id est, futura prædicant. Sed viderint eorum conjectores, quomodo ex eis sive fallantur, sive instinctu spirituum, quibus cura est tali pœna dignos animos hominum noxiæ curiositatis retibus implicare, etiam vera prædicant, sive multa dicendo aliquando in aliquid veritatis incurrant. Nobis tamen ista quæ velut contra naturam sunt, et contra naturam fieri dicuntur (quo more hominum locutus est et Apostolus, dicendo, contra naturam in olea insitum oleastrum factum esse participem pinguedinis oleæ [*Rom. xi, 17, 24*]), et monstra, ostenta, portenta, prodigia nuncupantur, hoc monstrare debent, hoc ostendere, vel præostendere, hoc prædicere, quod facturum sit Deus, quæ de corporibus hominum se prænuuntiat

¹ Er. et plerique Mss., *inenarrabilis*. Vetus liber Corbeicensis, *inerrabilis*.

² Vind. Am. Er et Mss., *alius*.

³ Sic Mss. Editi autem, *commoneantur*.

esse facturum, nulla impediēte difficultate, nulla præscribente lege naturæ. Quomodo autem prænuntiaverit, satis in libro superiore docuisse me existimo, decerpēdo de Scripturis sanctis et novis et veteribus, non quidem omnia ad hoc pertinentia, sed quæ sufficere huic operi iudicavi.

CAPUT IX. — *De gehenna, et æternarum qualitate pœnarum.*

1. Quod igitur de sempiterno supplicio damnatorum per suum prophetam Deus dixit fiet, omnino fiet: *Vermis eorum non morietur, et ignis eorum non exstinguetur (Isai, LXVI, 24)*. Ad hoc enim vehementius commendandum, etiam Dominus Jesus, cum membra quæ hominem scandalizant pro his hominibus¹ poneret, quos ut sua membra dextra quis diligit, eaque præciperet amputari: *Bonum est, inquit, tibi debilem introire in vitam, quam duas manus habentem ire in gehennam, in ignem inexstinguibilem, ubi vermis eorum non moritur, et ignis eorum non exstinguitur*. Similiter de pede: *Bonum est tibi, inquit, claudum introire in vitam æternam, quam duos pedes habentem mitti in gehennam ignis inexstinguibilis, ubi vermis eorum non moritur, et ignis non exstinguitur*. Non aliter ait et de oculo: *Bonum est tibi luscum introire in regnum Dei, quam duos oculos habentem mitti in gehennam ignis, ubi vermis eorum non moritur, et ignis non exstinguitur (Marc. ix, 42-47)*. Non eum² piguit uno loco eadem verba ter dicere: quem non terreat ista repetitio, et illius pœnæ comminatio tam vehementis ore divino?

2. Utrumque autem horum, ignem scilicet atque vermem, qui volunt ad animi pœnas, non ad corporis pertinere, dicunt etiam uri dolore animi sero atque infructuose pœnitentis eos qui fuerint a regno Dei separati: et ideo ignem pro isto dolore urente non incongruus poni potuisse contendunt. unde illud Apostoli est, *Quis scandalizatur, et ego non uror (II Cor. xi, 29)*? Eundem (a) etiam vermem putant intelligendum esse. Nam scriptum est, inquit, *Sicut tinea vestimentum et vermis lignum, sic mœror excruciat cor viri (Prov. xxv, 20)*. Qui vero pœnas et animi et corporis in illo supplicio futuras esse non dubitant, igne uri corpus, animum autem rodi quodammodo verme mœroris affirmant. Quod etsi credibilis dicitur; quia utique absurdum est, ibi dolorem aut corporis, aut animi defuturum: ego tamen facilius est³ ut ad corpus dicam utrumque pertinere, quam neutrum; et ideo tacitum in illis divinæ Scripturæ verbis animi dolorem, quoniam consequens esse intelligitur, etiamsi non dicatur, ut corpore sic dolente animus quoque sterili pœnitentia crucietur. Legitur quippe et in veteribus Scripturis, *Vindicta carnis, impii, ignis et vermis (Eccli. vii, 19)*. Potuit brevius dici, *Vindicta impii*. Cur ergo dictum est, *carnis impii*, nisi quia utrumque, id est, et ignis et vermis, pœna erit carnis? Aut si vindictam carnis propterea dicere voluit, quia hoc in homine vindica-

bitur, quod secundum carnem vixerit (propter hoc enim veniet in mortem⁴ secundam, quam significavit Apostolus dicens, *Si enim secundum carnem vixeritis moriemini [Rom. viii, 13]*); eligat quisque quod placet, aut ignem tribuere corpori, animo vermem: hoc proprie, illud tropice; aut utrumque proprie corpori. Jam enim satis superius disputavi, posse animalia etiam in ignibus vivere, in ustione sine consumptione, in dolore sine morte, per miraculum omnipotentissimi Creatoris: cui hoc possibile esse qui negat, a quo sit quidquid in naturis omnibus minatur ignorat. Ipse enim est Deus, qui omnia in hoc mundo magna et parva miracula quæ commemoravimus, et incomparabiliter plura quæ non commemoravimus, fecit, eademque ipso mundo uno atque omniam maximo miraculo inclusit. Eligat ergo unum de duobus quisque quod placet, utrum et vermem ad corpus proprie, an ad animum translato a corporalibus ad incorporalia vocabulo existimet pertinere. Quid autem horum verum sit, res ipsa expeditius indicabit, quando erit scientia tanta sanctorum, ut eis cognoscendarum illarum pœnarum necessaria non sit experientia, sed ea quæ tunc erit plena atque perfecta, ad hoc quoque sciendum sapientia sola sufficiat. Nunc enim ex parte scimus, donec veniat quod perfectum est (I Cor. xiii, 9). Dum tamen nullo modo illa corporalia futura esse credamus, ut nullis ab igne afficiantur doloribus.

CAPUT X. — *An ignis gehennæ, si corporalis est, possit malignos spiritus, id est dæmones incorporeos, tactu suo adurere.*

1. Illic occurrit quærere, si non erit ignis incorporealis⁵, sicut est animi dolor, sed corporalis, tactu noxius, ut eo possint corpora cruciari; quomodo in eo erit etiam pœna spirituum malignorum? Idem quippe ignis, erit supplicio scilicet hominum attributus et dæmonum, dicente Christo, *Discedite a me, maledicti, in ignem æternum, qui paratus est diabolo et angelis ejus (Matth. xxv, 41)*. Nisi quia sunt quædam sua etiam dæmonibus corpora, sicut doctis hominibus visum est, ex isto aere crasso atque humido, cuius impulsus vento flante sentitur (a). Quod genus elementi si nihil igne perpeti posset, non ureret ferefactus in balneis. Ut enim urat, prior uritur, facitque quod patitur. Si autem quisquam nulla habere corpora dæmones asseverat, non est de hac re aut laborandum operosa inquisitione, aut contentiosa disputatione certandum. Cur enim non dicamus, quamvis miris, tamen veris modis etiam spiritus incorporeos posse pœna corporalis ignis affligi, si spiritus homi-

¹ Lov, et in mortem. Abest et, a cæteris libris.

² Er. et Lov., incorporealis noxius. Redundat, noxius, nec est in manuscriptis.

(a) Ita sentit Origenes, lib. 2 *Periarch.*, ubi solum Deum ait esse incorporeum; et Tertullianus, libro de Carne Christi. Basilium, libro de Spiritu sancto, cap. 16, Angelos non tantum vult esse corporeos, sed etiam in propriis corporibus videri posse, et visos aliquando fuisse. In septima Synodo generali, actione 4, in eandem sententiam afferuntur varia testimonia Græcorum auctorum. Coquzus.

¹ sic Vind. Am. et Mss. At Er. et Lov., pro his omnibus.

² Mss., enim.

³ sic Mss. Editti vero, facilius æstimo ut, etc.

(a) Supple, dolorem.

num, etiam ipsi profecto incorporei, et nunc poterunt includi corporalibus membris, et tunc poterunt corporum suorum vinculis insolubiliter alligari? Adhærebunt ergo, si eis nulla sunt corpora, spiritus dæmonum, imo spiritus dæmones, licet incorporei, corporeis ignibus cruciandi: non ut ignes ipsi, quibus adhærebunt, eorum junctura inspirentur, et animalia fiant, quæ constant spiritu et corpore; sed, ut dixi, miris et ineffabilibus modis adhærendo, accipientes ex ignibus pœnam, non dantes ignibus vitam. Quia et iste alius modus, quo corporibus adhærent spiritus, et animalia fiunt, omnino mirus est, nec comprehendi ab homine potest, et hoc ipse homo est.

2. Dicerem quidem sic arsuros sine ullo suo corpore spiritus, sicut ardebat apud inferos ille dives, quando dicebat, *Crucior in hac flamma* (*Luc. xvi, 24*); nisi convenienter responderi cernerem, talem fuisse illam flammam, quales oculi quos levavit, et Lazarum vidit, qualis lingua cui humorem exiguum desideravit infundi, qualis digitus Lazari de quo id sibi fieri postulavit: ubi tamen erant sine corporibus animæ. Sic ergo incorporealis et illa flamma qua exarsit, et illa guttula quam poposcit; qualia etiam sunt visa dormientium sive in ecstasi cernentium res incorporeales, habentes tamen similitudinem corporum. Nam et ipse homo cum spiritu, non corpore, sit in talibus visis, ita se tamen tunc similem suo corpori videt, ut discernere omnino non possit. At vero gehenna illa, quod etiam stagnum ignis et sulphuris dictum est (*Apoc. xx, 9*), corporeus ignis erit, et cruciabit corpora damnatorum, aut et hominum et dæmonum, solida hominum, aëria dæmonum; aut tantum hominum corpora cum spiritibus, dæmones autem spiritus sine corporibus, hærentes sumendo pœnam, non impertiendo vitam corporalibus ignibus. Unus quippe utrisque ignis erit, sicut Veritas dixit (*Matth. xxv, 41*).

CAPUT XI. — *An hoc ratio justitiæ habeat, ut non sint extensiora pœnarum tempora, quam fuerint peccatorum.*

Sic autem quidam eorum, contra quos defendimus civitatem Dei, injustum putant, ut pro peccatis quamlibet magnis, parvo scilicet tempore perpetratis, pœna quisque damnatur æterna; quasi ullius id unquam justitia legis attendat, ut tanta mora temporis quisque puniatur, quanta mora temporis unde puniretur admisit. Octo genera pœnarum in legibus esse scribit Tullius, damnium, vincula, verbera, talionem, ignominiam, exsilium, mortem, servitatem. Quid horum est quod in breve tempus pro cuiusque peccati celeritate coarctetur, ut tanta vindicetur morula, quanta deprehenditur perpetratum, nisi forte talio (a)? id enim agit, ut hoc patiat quisque quod fecit. Unde illud est Legis, *Oculum pro oculo, dentem pro dente*

(a) In legibus Duodecim Tabularum sic habebatur: « Si membrum rupit, ni cum eo pacit, talio esto. » Talionem autem vocabant, quando quis quale fecerat, tale etiam patiebatur: ut si eruisset oculum alienum, amitteret suum; si amputasset alterius nares, perderet suas: de cuius æquitate legis disputatur apud Aulum Gellium, Noctium Atticarum libro 20, cap. 1. *Lus. Vivæ.*

(*Exod. xxi, 24*). Fieri enim potest, ut tam brevi tempore quisque amittat oculum severitate vindictæ, quam tulit ipse alteri improbitate peccati. Porro autem si alienæ feminæ osculum infixum, rationis sit verbere vindicare, nonne qui illud puncto temporis fecerit, incomparabili horarum spatio verberatur, et suavitas voluptatis exiguæ diuturno dolore punitur? Quid, in vinculis numquid tam diu quisque iudicandus est esse debere, quam diu fecit unde meruit alligari; cum iustissime annosas pœnas servus in compedibus pendat, qui verbo aut ictu celerrime transeunte vel lacessivit dominum, vel plagavit? Jam vero damnium, ignominia, exsilium, servitus, cum plerumque sic infliguntur, ut nulla venia relaxentur, nonne pro hujus vitæ modo similia pœnis videntur æternis? Ideo quippe æterna esse non possunt, quia nec ipsa vita, quæ his plectitur, porrigitur in æternum: et tamen peccata, quæ vindicantur longissimi temporis pœnis, brevissimo tempore perpetrantur; nec quisquam existit qui censeret tam cito nocentium finienda esse tormenta, quam cito factum est vel homicidium, vel adulterium, vel sacrilegium, vel quodlibet aliud scelus, non temporis longitudine, sed iniquitatis et impietatis magnitudine metiendum. Qui vero pro aliquo grandi crimine morte mulctatur, numquid mora qua occiditur, quæ perbrevis est, ejus supplicium leges æstimant, et non quod eum in sempiternum auferunt de societate viventium? Quod est autem de ista civitate mortali homines supplicio primæ mortis, hoc est de civitate illa immortalis homines supplicio secundæ mortis auferre. Sicut enim non efficiunt leges hujus civitatis, ut in eam quisque revocetur occisus; sic nec illius, ut in vitam revocetur æternam, secunda morte damnatus. Quomodo ergo verum est, inquirunt, quod ait Christus vester, *In qua mensura mensi fueritis, in ea remetietur vobis* (*Luc. vi, 38*), si temporale peccatum supplicio punitur æterno (a)? Nec attendunt, non propter æquale temporis spatium, sed propter vicissitudinem mali, id est, ut qui mala fecerit, mala patiat, eandem dictam fuisse mensuram. Quamvis hoc in ea re proprie posuit accipi, de qua Dominus cum hoc diceret, loquebatur, id est, de judiciis et condemnationibus. Proinde qui judicat et condemnat injuste, si judicatur et condemnatur juste, in eadem mensura recipit, quamvis non hoc quod dedit. Iudicio enim fecit, iudicio patitur: quamvis fecerit damnatione quod iniquum est, patiat damnatione quod iustum est.

CAPUT XII. — *De magnitudine prævaricationis primæ, ob quam æterna pœna omnibus debeat, qui extra gratiam fuerint Salvatoris.*

Sed pœna æterna ideo dura et injusta sensibus videtur humanis, quia in hac infirmitate moribundorum sensuum deest ille sensus altissimæ purissimæque

^a Editi, *Quid in vinculis? Numquid ibi.* Abest, *ibi*, a manuscriptoris.

(a) Vide Epist. 102, ad Deogratias, quæst. 4, n. 22 et seqq.

sapientiae, quo sentiri possit quantum nefas in illa prima praevaricatione commissum sit. Quanto enim magis homo fruebatur Deo, tanto maiore impietate dereliquit Deum, et factus est malo dignus aeterno, qui hoc in se peremit bonum, quod esse posset aeternum. Hinc est universa generis humani massa damnata: quoniam qui hoc primitus¹ admisit, cum ea quae in illo fuerat radicata sua stirpe punitus est, ut nullus ab hoc justo debitoque supplicio, nisi misericordia et indebita gratia liberetur; atque ita dispergiatur genus humanum, ut in quibusdam demonstretur quid valeat misericors gratia, in ceteris quid justa vindicta. Neque enim utrumque demonstraretur in omnibus: quia, si omnes remanerent in poenis justae damnationis, in nulla appareret misericors gratia redemptis²: rursus, si omnes a tenebris transferrentur in lucem, in nullo appareret severitas³ ultionis. In qua propterea multo plures quam in illa sunt, ut sic ostendatur quid omnibus deberetur. Quod si omnibus redderetur, justitiam vindicantis juste nemo reprehenderet: quia vero tam multi exinde liberantur, est unde agantur maximae gratiae gratuito mueri liberantis.

CAPUT XIII. — Contra opinionem eorum qui putant criminosis supplicia post mortem causa purgationis adhiberi.

Platonici quidem, quamvis impunita nulla velint esse peccata, tamen omnes poenas emendationi adhiberi putant, vel humanis inflictas legibus, vel divinis, sive in hac vita, sive post mortem, si aut parcat hic cuique, aut ita plectatur ut hic non corrigatur. Hinc est Maronis illa sententia, ubi cum dixisset de terrenis corporibus moribundisque membris, quod animae

hinc metunt cupiuntque, dolent gaudentque, nec auras suscipiunt, clausae tenebris et carcere caeco;

secutus adjunxit, atque ait:

Quin et supremo cum lumine vita reliquit;

id est, cum die novissimo reliquit eas ista vita.

Non tamen (inquit) omne malum miseris, nec funditus omnes

Corporeae excedunt pestes, penitusque necesse est
Multa diu concreta modis fulescere miris.
Ergo exercentur poenis, veterumque malorum
Supplicia expendunt: atque panduntur inanes
Suspensae ad ventos, aliis sub gurgite vasto
Infectum cluitur scelus, aut exuritur igni.

(*Aeneid.*, lib. 6, v. 753-742.)

Qui hoc opinantur, nullas poenas nisi purgatorias volunt esse post mortem, ut quoniam terris superiora sunt elementa, aqua, aer, ignis, ex aliquo istorum mundetur per expiatorias poenas, quod terrenam contagione contractum est. Aer quippe accipitur in eo quod ait, *Suspensae ad ventos*: aqua in eo quod ait, *Sub gurgite vasto*: ignis autem suo nomine expressus est, cum dixit, *Aut exuritur igni*. Nos vero etiam in hac quidem mortali vita esse quasdam poenas purgatorias confitemur, non quibus affliguntur quorum vita

vel non inde sit melior, vel potius inde sit peior; sed illis sunt purgatoriae, qui eis coerciti corriguntur. Ceteras omnes poenas, sive temporariae, sive sempiternae, sicut uniusquisque divina providentia tractandus est, inferuntur, vel pro peccatis sive praeteritis, sive in quibus adhuc vivit ille qui plectitur, vel pro exercendis declarandisque virtutibus, per homines et angelos, seu bonos seu malos. Nam etsi quisquam⁴ mali aliquid alterius improbitate vel errore patiat, peccat quidem homo, qui vel ignorantia, vel iniustitia cuiquam mali aliquid facit: sed non peccat Deus, qui justo, quamvis occulto, iudicio fieri sinit. Sed temporarias poenas alii in hac vita tantum, alii post mortem, alii et nunc et tunc, verumtamen ante iudicium illud severissimum novissimumque patiuntur. Non autem omnes veniunt in sempiternas poenas, quae post illud iudicium sunt futurae⁵, qui post mortem sustinent temporales. Nam quibusdam, quod in isto non remittitur, remitti in futuro saeculo (*Math.* xii, 32), id est, ne futuri saeculi aeterno supplicio puniantur, iam supra diximus.

CAPUT XIV. — De poenis temporalibus istius vitae, quibus subjecta est humana conditio.

Rarissimi sunt autem qui nullas in hac vita, sed tantum post eam poenas luunt. Fuisse tamen aliquos, qui usque ad decrepitam senectutem ne levissimam quidem febriculam senserint, quietamque duxerint vitam, ipsi et novimus et audivimus: quanquam vita ipsa mortalium tota poena sit, quia tota tentatio est, sicut sacrae Litterae personant, ubi scriptum est, *Numquid non tentatio est vita humana super terram* (*Job* vii, 1, sec. LXX)? Non enim parva poena est ipsa insipientia, vel imperitia, quae usque adeo fugienda merito iudicatur, ut per poenas doloribus plenas perire cogantur quaeque artificia vel litteras discere: ipsumque discere, ad quod poenis adiguntur, tam poenale est eis, ut nonnunquam ipsas poenas per quas compelluntur discere, malint ferre, quam discere. Quis autem non exhorreat, et mori eligat, si ei proponatur, aut mors perpetuanda, aut rursus infantia? Quae quidem quod non a risu, sed a fletu orditur hanc lucem, quid malorum ingressa sit, nesciens prophetat quodammodo. Solum, quando natus est, ferunt risisse Zoroastrem (a), nec ei boni aliquid monstruosus risus ille portendit. Nam magicarum artium fuisse perhibetur inventor: quae quidem illi nec ad praesentis vitae vanam felicitatem contra suos inimicos prodesse poterunt. A Nino quippe rege Assyriorum, cum esset ipse Bactrianorum, bello superatus est. Prorsus quod scriptum est, *Grave jugum super filios Adam, a diu exitus de ventre matris eorum, usque in diem sepulturae in matrem omnium* (*Eccli.* xl, 4), usque adeo impleri necesse est, ut ipsi parvuli per lavacrum regenerationis ab originalis peccati, quo solo tenebantur, vinculo jam soluti, mala multa patientes, nonnulli et in-

¹ vind. Am. et Mss., *quisque*.

² Editi, *his sunt futurae*: Alcest, *his*, ab omnibus mancipatis.

(a) Plinius, lib. 7 Hist. nat., cap. 15, in fin.

³ Plerique Mss., *primus*.

⁴ Verbum, *rediments*, abest a Mss.

⁵ In Mss. plerisque, *veritas*.

cursum spirituum malignorum aliquando patiuntur. Quæ quidem passio absit ut eis obsit, si hanc vitam in illa ætate, etiam ipsa passione ingravescente et animam de corpore excludente, finierint (a).

CAPUT XV. — *Quod omne opus gratiæ Dei eruentis nos de profunditate veteris mali, ad futuri sæculi pertineat novitatem,*

Veruntamen in gravi jugo quod positum est super filios Adam, a die exitus de ventre matris eorum, usque in diem sepulturæ in matrem omnium, etiam hoc malum mirabile¹ reperitur, ut sobrii simus, atque intelligamus hanc vitam de peccato illo nimis pefario, quod in paradiso perpetratum est, factam nobis esse pœnalem, totumque quod nobiscum agitur per Testamentum novum, non pertinere nisi ad novi sæculi hæreditatem novam, ut hic pignore accepto, illud cuius hoc pignus est suo tempore consequamur; nunc autem ambulemus in spe, et proficientes de die in diem, spiritu facta carnis mortificemus (Rom. vii, 43). *Novit enim Dominus qui sunt ejus* (II Tim. ii, 19); et, *Quotquot Spiritu Dei aguntur, hi filii sunt Dei* (Rom. viii, 14). Sed gratia, non natura. Unicus enim natura Dei Filius, propter nos misericordia factus est filius hominis, ut nos natura filii hominis, filii Dei per illum gratia fieremus². Manens quippe ille immutabilis, naturam nostram, in qua nos susciperet, suscepit a nobis; et tenax divinitatis suæ, nostræ infirmitatis particeps factus est; ut nos in melius commutati, quod peccatores mortalesque sumus, ejus immortalis et justus³ participatione amittamus, et quod in natura nostra bonum fecit, impletum summo bono in ejus naturæ bonitate servemus. Sicut enim per unum hominem peccantem (Id. v, 12) in hoc tam grave malum devenimus: ita per unum hominem eundemque Deum justificantem ad illud bonum tam sublimem venimus. Nec quisquam se debet ab isto ad illum transisse confidere, nisi cum ibi fuerit, ubi tentatio nulla erit; nisi pacem tenuerit, quam belli hujus, in quo caro concupiscit adversus spiritum et spiritus adversus carnem (Galat. v, 17), multis et variis certaminibus quærit. Hoc autem bellum nunquam ullum esset, si natura humana per liberum arbitrium in rectitudine, in qua facta erat, perstitisset. Nunc vero quæ pacem felix cum Deo habere noluisset, secum pugnat infelix, et cum sit hoc malum miserabile⁴, melius est tamen quam priora vitæ hujus. Melius configitur quippe cum vitiis, quam cum⁵ sine ulla confictione dominantur. Melius est, inquam, bellum cum spe æternæ pacis, quam sine ulla liberationis cogitatione captivitas. Cupimus quidem etiam hoc bello carere,

¹ Editi, *hoc medium miserabile*. Plerique Mss., *hoc malum mirabile*: scilicet in parvulis ipsis regeneratis, de quibus superiore capite.

² Sola editio Lov., *filii Dei per illius gratiam fierent*.

³ Ita omnes Mss. At editi, *ejus immortalitatis et justitiæ*: pauloque post loco, *impletum*, *idea* habebant, *impletum*.

⁴ Sic Mss. Editi vero, *et hoc quoque cum malum sit miserabile*.

⁵ Absit, *cum*, a pluribus Mss.

(a) Conf. Enchirid. n. 17.

et ad capeendam ordinatissimam pacem, ubi firmissima stabilitate potioribus inferiora subdantur, igne divini amoris accendimur. Sed si, quod absit, illius tanti boni spes nulla esset, malle debuimus in hujus conflotationis molestia remanere, quam vitiis in nos dominationem non eis resistendo permittere (a).

CAPUT XVI. — *Sub quibus gratiæ legibus omnes re-generatorum habeantur ætates.*

Vernm tanta est Dei misericordia in vasa misericordiæ quæ præparavit in gloriam, ut etiam prima hominis ætas, id est, infantia quæ sine ullo renisu subjacet carni, et secunda quæ pueritia nuncupatur, ubi nondum ratio suscipit hanc pugnam, et fere sub omnibus vitiosis delectationibus jacet, quia licet jam fari valeat, et ideo infantiam transisse videatur, nondum in ea est præcepti capax infirmitas mentis; si sacramenta Mediatoris acceperit, etiam si hanc in eis annis vitam finiat, translata scilicet a potestate tenebrarum in regnum Christi, non solum pœnis non præparetur æternis, sed ne ulla quidem post mortem purgatoria tormenta patiatur. Sufficit enim sola spiritualis regeneratio, ne post mortem obsit quod carnalis generatio cum morte contraxit (b). Cum autem ventum fuerit ad ætatem, quæ præceptum jam capit, et subdi potest legis imperio, suscipiendum est bellum contra vitia, et gerendum acriter, ne ad damnabilia peccata perducat. Et si quidem nondum victoriarum consuetudine roborata sunt, facilius vincuntur et cedunt: si autem vincere atque imperare consueverunt¹, laboriosa difficultate superantur. Neque id fit veraciter atque sinceriter, nisi verè² delectatione justitiæ: hæc est autem in fide Christi. Nam si lex jubens adsit, et spiritus juvenis desit per ipsam prohibitionem desiderio crescente atque vincente peccati, etiam reatus prævaricationis accedit. Nonnunquam sane apertissima vitia aliis vitiis vincuntur occultis, quæ putantur esse virtutes, in quibus regnat superbia et quædam sibi placendi altitudo ruinosa. Tunc itaque victa vitia deputanda sunt, cum Dei amore vincuntur, quem nisi Deus ipse non donat, nec aliter nisi per Mediatorem Dei et hominum hominem Jesum Christum, qui factus est particeps mortalitatis nostræ, ut nos participes faceret divinitatis suæ. Paucissimi autem sunt tantæ felicitatis, ut ab ipsa ineunte adolescentia nulla damnabilia peccata committant, vel in flagitiis, vel in facino-

¹ Lov., *infirmitas*. Editi alii et plerique manuscripti, *inferiora*.

² Mss., *conserunt*: et sic alibi passim.

³ Vind. Am. Er. et alii. Mss., *vera*.

(a) Hoc etiam dixerunt philosophi, qui animas mortales aut diurnas tantum posuerunt. Nam, vel omni pretio seposito, bene vivere plus juvat, quam male; et ipsa virtus est sibi amplissimum præmium; felicioresque sunt boni etiam dum hic vivunt, quam mali quantumlibet fortunati: atque hoc est quod Christus sectatoribus suis amplam mercedem non modo in futura promittit vita, sed etiam in presentibus. *LUCA VIVENS.*

(b) Infantibus et pueris prodesse Baptismum docet: quomodo autem iisdem prosit in ea ætate decedentibus, non hic aperit. Sed vide Epistolam 98, ad Bonifacium. *HAROLDUS.*

ribus, vel in nefariæ cujusquam impietatis errore, sed magna spiritus largitate opprimant, quidquid eis posset carnali delectatione dominari¹. Plurimi vero præcepto legis accepto, cum prius victi fuerint prævalentibus vitiis et prævaricatores ejus effecti, tunc ad gratiam confugiunt adjuvantem, qua fiant et amarius poenitendo, et vehementius pugnando, prius Deo subditi, atque ita carni præposita mente victores. Quisquis igitur cupit poenas evadere sempiternas, non solum baptizetur, verum etiam justificetur in Christo, ac sic vere transeat a diabolo ad Christum. Purgatorias autem poenas nullas futuras opinetur, nisi ante illud ultimum tremendumque judicium. Nequaquam tamen negandum est, etiam ipsum æternum ignem pro diversitate meritorum quamvis malorum aliis leviozem, aliis futurum esse graviorem, sive ipsius vis atque ardor pro poena digna cuiusque varietur, sive ipse æqualiter ardeat, sed non æquali molestia sentiatur.

CAPUT XVII. — *De his qui putant nullorum hominum poenas in æternum esse mansuras.*

Nunc jam cum misericordibus nostris agendum esse video, et pacifice disputandum, qui vel omnibus illis hominibus, quos justissimus Judex dignos gehennæ supplicio judicabit, vel quibusdam eorum nolunt credere poenam sempiternam futuram, sed post certi temporis metas pro cujusque peccati quantitate longioris sive brevioris² eos inde existimant liberandos. Quia in re misericordior profecto fuit Origenes, qui et ipsum diabolum atque angelos ejus post graviora pro meritis et diuturniora supplicia ex illis cruciatibus cruendos atque sociandos sanctis Angelis credidit (a). Sed illum et propter hoc, et propter alia nonnulla, et maxime propter alternantes sine cessatione beatitudines et miserias, et statutis sæculorum intervallis ab istis ad illas, atque ab illis ad istas itus ac reditus interminabiles, non immerito reprobavit Ecclesia (b): quin³ et hoc quod misericors videbatur amisit, faciendo sanctis veras miserias quibus poenas luerent, et falsas beatitudines in quibus verum ac securum, hoc est, sine timore certum sempiterni boni gaudium non haberent. Longe autem aliter istorum misericordia

¹ Er. et nonnulli Mss., *quidquid in eis posset carnali delectatione damnari.*

² Lov., *longiores sive breviores.* Editi vero alii et Mss., *longioris sive brevioris*; ut referatur ad, *temporis.*

³ Sic juxta Morel, *Element. Critic.*, pag. 154, in B., *quiu.* M.

(a) Ita imple docuisse Origenem, testes sunt etiam Epiphanius, in Epistola de illius erroribus ad Joannem Hierosolymitanum; Hieronymus, Epistola 61, ad Pamphacium, et in Apologia adversus Rufinum, et Epistola 75, ad Vigilantium; et ipse Augustinus, in libro de Hæresibus, hæc. 45. Genebrardus, in Collectaneis de vita et scriptis Origenis, cap. 6, illum ab eo errore vindicare conatur. Nam in libro de Principiis, unde hæc sumpta, id se magis dixisse disputando et pertractando, quam statuendo et definiendo affirmat. Coq̄uzus.

(b) Origenis errores ab Anastasio papa fuisse damnatos testatur Hieronymus, Apologia adversus Rufinum, et Epistola 78, ad Pamphacium; item a Theophilo in Synodo Alexandrina. Post Augustinum etiam Vigilio papa et Justiniano imperatore, Synodus quinta œcumenica multis anathematismis impia et absurda damnavit Origenis dogmata, quæ exstant apud Nicephorum Callistum, lib. 17, capp. 27, 28, et in ejus Concilii actione 4, cap. 11. Coq̄uzus.

humano errat affectu, qui hominum illo judicio damnatorum miserias temporales, omnium vero qui vel citius vel tardius liberantur, æternam felicitatem putant. Quæ sententia si propterea bona et vera quia misericors est, tanto erit melior et vorior quanto misericordior fuerit. Extendatur ergo ac profundatur fons hujus misericordiæ usque ad damnatos angelos, saltem post multa atque proluxa quantumlibet sæcula liberandos (a). Cur usque ad universam naturam manat humanam, et cum ad angelicam naturam fuerit, mox arescit? Non adent tamen se ulterius miserando porrigere, et ad liberationem ipsius quoque diaboli pervenire. Verum si aliquis audet, vincit nempe istos, et tamen tanto invenitur errare deformius, et contra recta Dei verba perversius, quanto sibi videtur sentire clementius.

CAPUT XVIII. — *De his qui novissimo judicio, propter intercessionem sanctorum, neminem hominum putant esse damnandum.*

1. Sunt etiam, quales in colloctionibus nostris ipse sum expertus, qui cum venerari videntur Scripturas sanctas, moribus improbandi sunt; et agendo causam suam, multo majorem quam isti misericordiam Deo tribuunt erga humanum genus. Dicunt enim de malis et infidelibus hominibus divinitus quidem verum prædictum esse, quod digni sunt poena¹: sed cum ad judicium ventum fuerit, misericordiam esse superaturam. Donabit enim eos, inquit, misericors Deus precibus et intercessionibus sanctorum suorum. Si enim orabant pro illis, quando eos patiebantur inimicos, quanto magis quando videbunt humiles supplicesque prostratos? Neque enim credendum est, aiunt, tunc amissuros sanctos viscera misericordiæ, cum fuerint plenissimæ ac perfectissimæ sanctitatis, ut qui tunc orabant pro inimicis suis, quando et ipsi sine peccato non erant, tunc non orent pro supplicibus suis, quando nullum cœperint habere peccatum. Aut vero Deus tunc eos non exaudiet tot et tales filios suos, quando in tanta eorum sanctitate nullum inveniet orationis impedimentum? Testimonium vero Psalmi, et illi quidem qui permittunt infideles atque impios homines saltem longo tempore cruciari, et postea de malis omnibus erui, sed magis isti pro se dicunt esse, ubi legitur: *Numquid obliviscetur misereri Deus, aut continebit in ira sua miserationes suas (Psal. LXXVI, 10)?* Ira ejus est, inquit, ut omnes indigni beatitudine sempiterna, ipso judicante puniantur supplicio sempiterno. Sed si vel longum, vel prorsus ullum esse permiserit, profecto ut possit hoc fieri, continebit in ira sua miserationes suas, quod eum Psalmus dicit non esse facturum. Non enim ait, Numquid diu continebit in ira sua miserationes suas? sed quod prorsus non continebit, ostendit (b).

¹ Vox, *poena*, abest ab editis Vind. Am. Er. et omnibus Mss.

(a) Et istos quoque supplicibus liberabat Origenes, sicut ex sanctis Angelis procedente tempore diabolos faciebat, quæ illius erant vicissitudines. LUD. VIVAS.

(b) Vide infra, cap. 21, et Eucherid. n. 20, cap. 112.

2. Sic ergo isti volunt iudicii Dei comminationem non esse mendacem, quamvis sit neminem damnaturus, quemadmodum ejus comminationem, qua dixit eversurum se esse Niniven civitatem (*Jonæ* iii, 4), mendacem non possumus dicere; et tamen non factum est, inquit, quod sine ulla conditione prædixit. Non enim ait, Ninive evertetur, si non egerint pœnitentiam, seque correxerint: sed hoc non addito prænuntiavit futuram eversionem illius civitatis. Quam comminationem propterea veracem putant, quia hoc prædixit Deus quod vere digni erant pati, quamvis hoc non esset ipse facturus. Nam etsi pœnitentibus pepercit, inquit, utique illos pœnitentiam non ignorabat acturos, et tamen absolute ac definite eorum eversionem futuram esse prædixit. Hoc ergo erat, inquit, in veritate severitatis, quia id erant digni; sed in ratione miserationis non erat, quam non continuit in ira sua, ut ab ea pœna supplicibus parceret, quam fuerat contumacibus comminatus. Si ergo tunc pepercit, aiunt, quando sanctum suum Prophetam fuerat parcendo contristaturus, quanto magis tunc miserabilibus parceret, quando ut parcat omnes sancti ejus orabunt? Sed hoc quod ipsi suis cordibus suspicantur, ideo putant Scripturas tacuisse divinas, ut multi se corrigant, vel prolixarum vel æternarum timore pœnarum, et sint qui possint orare pro eis, qui se non correxerint: nec tamen opinantur omni modo id eloquia divina tacuisse. Nam quo pertinet, inquit, quod scriptum est, *Quam multa multitudo dulcedinis tuæ, Domine, quam abscondisti metuentibus te* (*Psal.* xxx, 20)! nisi ut intelligamus propter timorem fuisse absconditam misericordiæ divinæ tam multam secretamque dulcedinem? Addunt etiam propterea dixisse Apostolum, *Conclussit enim Deus omnes in infidelitate, ut omnium misereatur* (*Rom.* xi, 32), quo significaret, quod ab illo nemo damnabitur. Nec isti tamen qui hoc sentiunt, hanc opinionem suam usque ad liberationem vel nullam damnationem diaboli atque angelorum ejus extendunt. Humana quippe circa solos homines moventur misericordia, et causam maxime agunt suam, per generalem in genus humanum quasi Dei miserationem impunitatem falsam suis perditis moribus pollicentes: ac per hoc superabunt eos in prædicanda Dei misericordia, qui hanc impunitatem etiam principi dæmonum et ejus satellitibus pollicentur.

CAPUT XIX. — *De his qui impunitatem omnium peccatorum promittunt etiam hæreticis, propter participationem corporis Christi.*

Item sunt alii, ab æterno supplicio liberationem, nec ipsis saltem omnibus hominibus promittentes, sed tantummodo Christi Baptismate ablutis, qui participes sunt corporis ejus, quomodolibet vixerint, in quacumque hæresi vel impietate fuerint, propter illud quod ait Jesus: *Hic est panis qui de cælo descendit, ut si quis ex ipso manducaverit, non moriatyr. Ego sum panis vivus, qui de cælo descendi: si quis*

manducaverit ex hoc pane, vivet in æternum (*Joan.* vi, 50-52). Ab æterna ergo morte, inquit, necesse est istos erui, et ad vitam æternam quancumque perduci.

CAPUT XX. — *De his qui non omnibus, sed iis tantum qui apud Catholicos sunt renati, etiamsi postea in multa crimina erroneque proruperint, indulgentiam pollicentur.*

Item sunt qui hoc nec omnibus habentibus Baptismatis Christi et ejus corporis sacramentum, sed solis Catholicis, quamvis male viventibus pollicentur; quia non solo sacramento, sed re ipsa manducaverunt corpus Christi, in ipso ejus corpore constituti, de quo dicit Apostolus, *Unus panis, unum corpus multi sumus* (*I Cor.* x, 17): ut etiamsi postea in aliquam hæresim vel etiam in gentilium idololatriam lapsi fuerint, tantum quia in corpore Christi, id est in Ecclesia catholica, sumpserunt Baptismum Christi et manducaverunt corpus Christi, non moriantur in æternum, sed vitam quandoque consequantur æternam; atque illa omnis impietas quanto major fuerit, non eis valeat ad æternitatem, sed ad diuturnitatem magnitudinemque pœnarum.

CAPUT XXI. — *De his qui eos qui permanent in catholica fide, etiamsi pessime vixerint, et ob hoc iri meruerint, tamen propter fidei fundamentum salvandos esse definiunt.*

Sunt autem qui propter id quod scriptum est, *Qui perseveraverit usque in finem, hic salvus erit* (*Matth.* xxiv, 13): non nisi in Ecclesia catholica perseverantibus, quamvis in ea male viventibus, hoc promittunt, per ignem videlicet salvandis merito fundamenti, de quo ait Apostolus, *Fundamentum enim aliud nemo potest ponere, præter id quod positum est, quod est Christus Jesus. Si quis autem ædificat super fundamentum hoc aurum, argentum, lapides pretiosos, ligna, fenum, stipulam, uniuscujusque opus manifestabitur. Dies enim declarabit; quoniam in igne revelabitur, et uniuscujusque opus quale sit, ignis probabit. Si cujus opus permanserit quod superædificavit, mercedem accipiet: si cujus opus autem arserit, damnum patietur; ipse autem salvus erit, sic tamen quasi per ignem* (*I Cor.* iii, 11-15). Dicunt ergo cujuslibet vitæ catholicum Christianum Christum habere in fundamento, quod fundamentum nulla hæresis habet a corporis ejus unitate præcisa. Et ideo propter hoc fundamentum, etiamsi malæ vitæ fuerit catholicus Christianus, velut qui superædificaverit ligna, fenum, stipulam, putant eum salvum fieri per ignem, id est, post pœnas ignis illius liberari, quo igne in ultimo iudicio punientur mali (a).

CAPUT XXII. — *De his qui putant ea crimina, quæ inter eleemosynarum opera committuntur, ad damnationis iudicium non vocari.*

Comperi etiam quosdam putare eos tantummodo

(a) Conf. Enchirid. n. 18, Intro.

arsuros illius æternitate supplicii, qui pro peccatis suis facere dignas eleemosynas negligunt, juxta illud apostoli Jacobi: *Judicium autem sine misericordia illi qui non fecit misericordiam* (Jacobi II, 13). Qui ergo fecerit, inquit, quamvis mores in melius non mutaverit, sed inter ipsas suas eleemosynas nefarie ac nequiter vixerit, judicium illi cum misericordia futurum est, ut aut nulla damnatione plectatur, aut post aliquod tempus sive parvum, sive prolixum, ab illa damnatione liberetur. Ideo Judicem ipsum vivorum atque mortuorum noluisse existimant aliud commemorare se esse dicturum, sive dextris quibus est vitam daturus æternam, sive sinistris quos æterno supplicio damnaturus (*Matth. xxv, 35 sqq.*), nisi eleemosynas sive factas, sive non factas. Ad hoc pertinere aiunt et in oratione Dominica quotidianam postulationem: *Dimitte nobis debita nostra, sicut et nos dimittimus debitoribus nostris* (*Id. vi, 12*). Quisquis enim illi qui in eum peccavit, dimittit ignoscendo peccatum, procul dubio eleemosynam facit. Quam rem Dominus sic ipse commendavit, ut diceret: *Si enim dimiseritis peccata hominibus, dimittet vobis et Pater vester peccata vestra: si autem non dimiseritis hominibus, neque Pater vester qui in cælis est, dimittet vobis* (*Ibid., 14, 15*). Ergo et ad hoc genus eleemosynarum pertinet quod ait apostolus Jacobus, judicium futurum sine misericordia ei qui non fecit misericordiam. Nec dixit Dominus, inquit, magna vel parva; sed, *Dimittet vobis Pater vester peccata vestra, si et vos dimiseritis hominibus*. Ac per hoc putant etiam eis qui perditæ vixerint, donec claudant diem vitæ hujus extremum, per hanc orationem, qualiacumque et quantacumque fuerint, omnia quotidie peccata dimitti, sicut ipsa quotidie frequentatur oratio, si hoc tantummodo custodire meminerint, ut quando ab eis veniam petunt, qui eos peccato qualicumque læserunt, ex corde dimittant. Cum ad hæc omnia, Deo donante, respondero, liber iste claudendus est (a).

CAPUT XXIII. — *Contra opinionem eorum qui dicunt, nec diaboli, nec hominum malorum perpetua futura supplicia.*

Ac primum quæri oportet atque cognosci, cur Ecclesia ferre nequiverit hominum disputationem, diabolo etiam post maximas et diuturnissimas pœnas, purgationem vel indulgentiam pollicentem. Neque enim tot sancti et sacris veteribus ac novis Litteris cruditi, mundationem et regni cœlorum beatitudinem post qualiacumque et quantacumque supplicia, qualibuscumque et quantacumque angelis inviderunt: sed potius viderunt divinam vacuari vel infirmari non posse sententiam, quam se Dominus prænuntiavit in judicio prolaturum atque dicturum, *Discedite a me, maledicti, in ignem æternum, qui paratus est diabolo et angelis ejus* (*Matth. xxv, 41*). Sic quippe ostendit æterno igne diabolum et angelos ejus arsurus. Et quod scriptum est in Apocalypsi, *Diabolus qui seducebat eos, missus est in stagnum ignis, et sulphuris, qua*

(a) Conf. Enchirid. nn. 19, 20.

et bestia et pseudopropheta; et cruciabuntur die ac nocte in sæcula sæculorum (*Apoc. xx, 9, 10*). Quod ibi dictum est, æternum; hic dictum est, *in sæcula sæculorum*; quibus verbis nihil Scriptura divina significare consuevit, nisi quod finem non habet temporis. Quamobrem prorsus nec alia causa, nec justior atque manifestior inveniri potest, cur verissima pietate teneatur fixum et immobile, nullum regressum ad justitiam vitamque sanctorum diabolum et angelos ejus habituros, nisi quia Scriptura, quæ neminem fallit, dicit eis Deum non pepercisse (*II Petr. II, 4*), et sic ab illo esse interim prædamnatos, ut carceribus caliginis inferri¹ retrusi traderentur servandi, atque ultimo judicio puniendi, quando eos æternus ignis accipiet, ubi cruciabuntur in sæcula sæculorum. Quod si ita est, quomodo ab hujus æternitate pœnæ, vel universi, vel quidam homines post quantumlibet temporis subtrahentur, ac non statim errabitur fides, qua creditur sempiternum dæmonum futurum esse supplicium? Si enim quibus dicitur, *Discedite a me, maledicti, in ignem æternum, qui paratus est diabolo et angelis ejus* (*Matth. xxv, 41*), vel universi vel aliqui eorum non semper ibi erunt; quid causæ est cur diabolum et angeli ejus semper ibi futuri esse credantur? an forte Dei sententia, quæ in malos et angelos et homines proferetur, in angelos vera erit, in homines falsa? Ita plane hoc erit, si non quod Deus dixit, sed quod suspicantur homines plus valebit. Quod fieri quia non potest, non argumentari adversus Deum, sed divino potius, dum tempus est, debent parere præcepto, qui sempiterno cupiunt carere supplicio. Deinde quale est æternum supplicium pro igne diuturni temporis existimare², et vitam æternam credere sine fine, cum Christus eodem ipso loco, in una eademque sententia dixerit utrumque complexus, *Sic ibunt isti in supplicium æternum; justi autem, in vitam æternam* (*Ibid. 46*)³. Si utrumque æternum, profecto aut utrumque cum fine diuturnum, aut utrumque sine fine perpetuum debet intelligi. Par pari enim relata sunt, hinc supplicium æternum, inde vita æterna. Dicere autem in hoc uno eodemque sensu, Vita æterna sine fine erit, supplicium æternum finem habebit, multum absurdum est. Unde, quia vita æterna sanctorum sine fine erit, supplicium quoque æternum quibus erit, finem procul dubio non habebit.

CAPUT XXIV. — *Contra eorum sensum, qui in judicio Dei omnibus reis propter sanctorum preces putant esse parcendum.*

1. Hoc autem et adversus eos valet, qui suas agentes causas contra Dei venire verba, velut misericordia majore conantur; ut ideo videlicet vera sint, quia ea quæ dixit homines esse passuros, pati digni sunt, non quia passuri sunt. Donabit enim eos, inquit, precibus sanctorum suorum, etiam tunc tanto magis orantium pro inimicis suis, quanto sunt utique sanctiores, eorumque efficacior est oratio, et exauditiono

¹ Sic MS. Editi vero, *inferni*.

² Er. et Lov., *non existimare*. Abest, non, ah editis aliis et manuscriptis.

Dei dignior, jam nullum habentium omnino peccatum. Cur ergo eadem perfectissima sanctitate, et cuncta impetrare valentibus muudissimis et misericordissimis precibus, etiam pro angelis non orabunt, quibus paratus est ignis æternus, ut Deus sententiam suam mitiget, et reflectat in melius, eosque ab illo igne faciat alienos? An erit forsitan quisquam, qui et hoc futurum esse præsumat, affirmans etiam sanctos Angelos simul cum sanctis hominibus, qui tunc æquales erunt Angelis Dei, pro damnandis et angelis et hominibus oraturos, ut misericordia non patiantur, quod veritate merentur pati? Quod nemo sanæ fidei dixit, nemo dicturus est. Alioqui nulla causa est, cur non etiam nunc pro diabolo et angelis ejus oret Ecclesia, quam Magister Deus pro inimicis suis jussit orare. Hæc igitur causa, qua fit ut nunc Ecclesia non oret pro malis angelis, quos suos esse novit inimicos, eadem ipsa causa est, qua fiet ut in illo tunc judicio etiam pro hominibus æterno igne cruciandis, quamvis perfecta sit sanctitate, non oret. Nunc enim propterea pro eis orat, quos in genere humano habet inimicos, quia tempus est pœnitentiæ fructuosæ. Nam quid maxime pro eis orat, nisi *ut det illis Deus*, sicut dicit Apostolus, *pœnitentiam, et recipiant de diaboli laqueis, a quo captivi tenentur secundum ipsius voluntatem* (II Tim. II, 25, 26)? Denique si de aliquibus ita certa esset, ut qui sint illi, etiam nosset, qui licet adhuc in hac vita sint constituti, tamen prædestinati sunt in æternam ignem ire cum diabolo; tam pro eis non oraret, quam nec pro ipso. Sed quia de nullo certa est, orat pro omnibus duntaxat hominibus inimicis suis in hoc corpore constitutis: nec tamen pro omnibus exauditur. Pro his enim solis exauditur, qui, etsi adversantur Ecclesiæ, ita sunt tamen prædestinati, ut pro eis exaudiat Ecclesia, et filii efficiantur Ecclesiæ. Si qui autem usque ad mortem habebunt cor impœnitens, nec ex inimicis convertentur in filios, numquid jam pro eis, id est, pro talium defunctorum spiritibus, orat Ecclesia? Quid ita, nisi quia jam in parte diaboli computatur qui, dum esset in corpore, non est translatus in Christum?

2. Eadem hæc causa est, cur non oretur tunc pro hominibus æterno igne puniendis, quæ causa est, ut neque nunc, neque tunc oretur pro angelis malis; quæ itidem causa est, ut quamvis pro hominibus¹, tamen jam nec nunc oretur pro infidelibus impiisque defunctis². Nam pro defunctis quibusdam, vel ipsius

¹ Editi post, *pro hominibus*, addunt, *nunc vivis oretur etiam malis*: glossema, quod a veteribus libris abest.

² Hoc loco inserta sunt in Erasmi editione quædam, quæ minime reperiuntur in aliis libris neque cum antecedentibus et subsequentibus verbis satis coherent: scilicet post, *impiisque defunctis*, sic habet illa editio: « Nam pro defunctis quibusdam, vel ipsius Ecclesiæ, vel quorundam piorum exauditur oratio ejus, licet qui in Christo renati non adeo ita male vixerint in corpore, ut tali misericordia habeantur indigni, nec idem sic bene, ut inveniantur tali misericordia non egere. Tales etiam constat ante judicii diem per pœnas temporales, quas eorum spiritus patiuntur purgatas receptis corporibus, æterni ignis supplicii non tradendos. Quod si ita est, quid dicendum est de his, qui in simili vita inveniuntur in die judicii, id est, quos hujusmodi dies ille viventes invenerit, cum quodam modo uno momento moriantur et resurgant, et non sit spatium, ut pro

Ecclesiæ, vel quorundam piorum exaudiat oratio: sed pro his quorum in Christo regeneratorum nos usque adeo vita in corpore male gesta est, ut tali misericordia judicentur digni non esse, nec usque adeo bene, ut talem misericordiam reperiantur necessariam non habere. Sicut etiam facta resurrectione mortuorum non deerunt quibus post pœnas, quas patiuntur spiritus mortuorum, impertiat misericordia, ut in ignem non mittantur æternum. Neque enim de quibusdam veraciter diceretur, quod non eis remittatur neque in hoc sæculo, neque in futuro (*Math. XII, 32*), nisi essent quibus, etsi non in isto, tamen remitteretur in futuro. Sed cum dictum fuerit a Judice vivorum atque mortuorum, *Venite, benedicti Patria mei, possidete paratum vobis regnum a constitutione mundi*: et aliis e contrario, *Discedite a me, maledicti, in ignem æternum, qui paratus est diabolo, et angelis ejus*; et, *Ibunt isti in supplicium æternum, justi autem in vitam æternam* (*Id. XXV, 34, 41, 46*): nimis præsumptionis est dicere, cuiquam eorum æternum supplicium non futurum, quos Deus ituros in supplicium dixit æternum, ut per hujus præsumptionis persuasionem facere, ut de ipsa quoque vita vel desperetur vel dubitetur æterna.

3. Nemo itaque sic intelligat Psalmum canentem, *Numquid obliviscetur misereri Deus, aut continebit in ira sua miserationes suas* (*Psal. LXXVI, 10*)? ut opinetur de hominibus bonis veram, de malis falsam, aut de bonis hominibus et malis angelis veram, de malis autem hominibus falsam Dei esse sententiam. Hoc enim quod ait Psalmus, ad vasa misericordiæ pertinet, et ad filios promissionis, quorum erat unus etiam ipse Propheta; qui cum dixisset, *Numquid obliviscetur misereri Deus, aut continebit in ira sua miserationes suas?* continuo subjecit, *Et dixi, Nunc cæpi, hæc est immutatio dexteræ Excelsi* (*Ibid. 11*). Exposuit profecto quid dixerit, *Numquid continebit in ira sua miserationes suas?* Ira enim Dei est etiam ista vita mortalis, ubi homo vanitati similis factus est, et dies ejus velut umbra prætereunt (*Psal. CXLIII, 4*). In qua tamen ira non obliviscitur misereri Deus, faciendo solem suum oriri super bonos et malos, et plucendo super justos et injustos; ac sic non continet in ira sua miserationes suas (*Math. V, 45*): maximeque in eo quod expressit hic Psalmus, dicendo, *Nunc cæpi, hæc est immutatio dexteræ Excelsi*: quoniam in hac ipsa ærumnosissima vita, quæ ira Dei est, vasa misericordiæ mutat in melius, quamvis adhuc in hujus corruptionis miseria maneat ira ejus, quia nec in ipsa ira sua continet miserationes suas. Cum ergo isto modo compleatur divini illius cantici veritas, non est eam necesse etiam illic intelligi, ubi non pertinentes ad civitatem Dei sempiterno supplicio punientur. Sed

eis aut oratio sanctorum possit audiri, aut eorum ante judicium temporali pœna purgari? Numquid dicendi sunt æterno igni nunquam absolvendi traditi posse tempore judicii, quibus vitam talem egisse concedimus, ut si ante judicium mortui essent, temporali supplicio ac sanctorum orationibus mundarentur? Ipsius quippe Ecclesiæ vel quorundam piorum exaudiat oratio, sed pro his quorum in Christo regeneratorum, » etc.

quibus placet istam sententiam usque ad illa impiorum tormenta protendere, saltem sic intelligant, ut, manente in eis ira Dei, quæ in æterno est pronuntiata supplicio, non contineat Deus in hac ira sua miserationes suas, et faciat eos non tanta quanta digni sunt pœnarum atrocitate cruciari; non ut eas pœnas vel nunquam subeant, vel aliquando finiant, sed ut eas mitiores quam merita sunt eorum levioresque patiantur. Sic enim et ira Dei manebit, et in ipsa ira sua miserationes suas non continebit. Quod quidem non ideo confirmo, quoniam non resisto.

4. Cæterum eos qui putant minaciter potius quam veraciter dictum, *Discedite a me, maledicti, in ignem æternum; et, Ibuti isti in supplicium æternum* (*Math. xxv, 41, 46*); et, *Cruciabuntur in sæcula sæculorum* (*Apoc. xx, 10*), et, *Vernis eorum non morietur, et ignis non exstinguetur* (*Isai. lxvi, 24*), et cætera hujusmodi, non tam ego, quam ipsa Scriptura divina planissime atque plenissime redarguit ac refellit. Ninivitæ quippe in hac vita egerunt pœnitentiam (*Jonæ iii, 7*); et ideo fructuosam, velut in hoc agro seminantes, in quo Deus voluit cum lacrymis seminari, quod postea cum lætitiâ meteretur (*Psal. cxxxv, 6*): et tamen quis negabit, quod Dominus prædixit, in eis fuisse completum, nisi parum advertat, quemadmodum peccatores Deus non solum iratus, verum etiam miseratus evertat? Evertuntur enim peccatores duobus modis, aut sicut Sodomitæ, ut pro peccatis suis ipsi homines puniantur, aut sicut Ninivitæ, ut ipsa hominum peccata pœnitendo destruantur. Factum est ergo quod prædixit Deus: eversa est Ninive quæ mala erat, et bona ædificata est quæ non erat. Stantibus enim mœnibus atque domibus, eversa est civitas in perditis moribus (a). Ac sic quamvis Propheta fuerit contristatus, quia non est factum quod illi homines timuerunt illo prophe-tante venturum (*Jonæ iv, 1-3*): factum est tamen quod fuerat Deo præsciente prædictum; quoniam noverat qui prædixit, quomodo in melius esset implendum.

5. Ut autem noverint isti in perversum misericordes quo pertineat quod scriptum est, *Quam multa multitudo dulcedinis tuæ, Domine, quam abscondisti timentibus te!* legant quod sequitur, *perfecisti autem sperantibus in te* (*Psal. xxx, 20*). Quid est, *Abscondisti timentibus, perfecisti sperantibus*, nisi quia illis qui timore pœnarum suam volunt justitiam constituere quæ in lege est, non est justitia Dei dulcis (*Rom. x, 3*), quia nesciunt eam? Non enim gustaverunt eam. In se namque sperant, non in ipso: et ideo eis absconditur multitudo dulcedinis Dei; quoniam timent quidem Deum, sed illo timore servili, qui non est in charitate, quia perfecta charitas foras mittit timorem (*1 Joan. iv, 18*). Ideo sperantibus in eum perficit dulcedinem suam, inspirando eis charitatem suam, ut timore casto, non quem charitas foras mittit, sed permanente in sæculum sæculi (*Psal. xviii, 10*), cum gloriantur, in Domino gloriantur. Justitia quippe Dei Christus est,

(a) Conf. Enarr. Psal. l, n. 11.

qui factus est nobis, sicut dicit Apostolus, *sapientia a Deo, et justitia; et sanctificatio, et redemptio: ut quemadmodum scriptum est, Qui gloriatur, in Domino gloriatur* (*1 Cor. i, 30 et 31*). Hanc Dei justitiam, quam donat gratia sine meritis, nesciunt illi qui suam justitiam volunt constituere, et ideo justitiæ Dei, quod Christus est, non sunt subjecti (*Rom. x, 3*). In qua justitia est multa multitudo dulcedinis Dei, propter quam dicitur in Psalmo, *Gustate, et videte quam dulcis est Dominus* (*Psal. xxxiii, 9*). Et hanc quidem in hac peregrinatione gustantes, non ad satietatem sumentes, esuri mus eam potius ac sitimus, ut ea postea saturemur, cum videbimus eum sicuti est (*1 Joan. iii, 2*), et implebitur quod scriptum est, *Saturabor, cum manifestabitur gloria tua* (*Psal. xvi, 15*). Ita perficit Christus multam multitudinem dulcedinis suæ sperantibus in eum. Porro autem si eam, quam illi putant, dulcedinem suam Deus abscondit timentibus eum quæ non est impios damnaturus, ut hoc nescientes et damnari timentes recte vivant, ac sic possint esse qui orent pro non recte viventibus; quomodo eam perficit sperantibus in eum, quandoquidem, sicut somniant, per hanc dulcedinem non damnaturus est eos, qui non sperant in eum? Illa igitur ejus dulcedo quærat quærat quam perficit sperantibus in eum, non quam perficere putatur contemptibus et blasphemantibus eum. Frustra itaque homo post hoc corpus inquit, quod in hoc corpore sibi comparare neglexit.

6. Illud quoque apostolicum, *Concluit enim Deus omnes in infidelitate, ut omnium misereatur*: non ideo dictum est; quod neminem sit damnaturus: sed superius apparet unde sit dictum. Nam cum de Judæis postea credituris Apostolus loqueretur ad Gentes, ad quas utique jam credentes conscribebat epistolas: *Sicut enim vos, inquit, aliquando non credidistis Deo, nunc autem misericordiam consecuti estis illorum in incredulitate; sic et hi nunc non crediderunt in vestra misericordia, ut et ipsi misericordiam consequantur* (*Rom. xi, 31, 32*). Deinde subjecit, unde isti sibi errando blandiuntur, atque ait, *Concluit enim Deus omnes in infidelitate, ut omnium misereatur*. Quos omnes, nisi de quibus loquebatur, tanquam dicens, et vos et illos? Deus ergo et Gentiles et Judæos, quos præscivit et prædestinavit conformes imaginis Filii sui (*Id. viii, 29*), omnes in infidelitate conclusit: ut de amaritudine infidelitatis suæ pœnitendo confusi, et ad dulcedinem misericordiæ Dei credendo conversi, clamarent illud in Psalmo, *Quam multa multitudo dulcedinis tuæ, Domine, quam abscondisti timentibus te, perfecisti autem sperantibus, non in se, sed in te!* Omnium itaque misereatur vasorum misericordiæ. Quid est, omnium? Et eorum scilicet quos ex Gentibus, et eorum quos ex Judæis prædestinavit, vocavit, justificavit, glorificavit;

¹ Sola editio Lov., quia; minus bene.

² Vind. Am. et Er., Frustra itaque homo positus in hoc corpore, occulorum judiciorum Dei sibi notitiam arrogare præsumit.

³ Editi, in illorum. Abest, in, a manuscriptis.

⁴ Hic editi soli addunt fieri: quod verbum in Epistola ad Romanos, vii, 20, præterire solet Augustinus.

non omnium hominum, sed istorum omnium neminem damnaturus.

CAPUT XXV. — *An hi qui inter hæreticos baptizati sunt, et deteriores postea male vivendo facti sunt, vel hi qui apud Catholicos renati ad hæreses aut schismata transierunt, vel hi qui a Catholicis apud quos renati sunt, non recedentes, criminose vivere persiste-runt, possint privilegio Sacramentorum remissionem æterni sperare supplicii.*

1. Sed jam respondeamus etiam illis, qui non solum diabolo et angelis ejus, sicut nec isti, sed ne ipsis quidem omnibus hominibus liberationem ab æterno igne promittunt; verum eis tantum qui Christi Baptismate abluti et corporis ejus et sanguinis participes facti sunt, quomodolibet vixerint, in quacumque hæresi vel impietate fuerint (a). Sed contradicit eis Apostolus, dicens: *Manifesta autem sunt opera carnis, quæ sunt fornicatio, immunditia, luxuria, idolorum servitus, veneficia, inimicitia, contentiones, æmulationes, animositates, dissensiones, hæreses, invidia, ebriitates, comessationes, et his similia: quæ prædico vobis, sicut prædixi, quoniam qui talia agunt, regnum Dei non possidebunt (Galat. v, 19, -21).* Hæc profecto apostolica falsa est sententia, si tales post quantalibet tempora liberati regnum Dei possidebunt. Sed quoniam falsa non est, profecto regnum Dei non possidebunt. Et si in regni Dei possessione nunquam erunt, æterno supplicio tenebuntur: quoniam non est locus medius, ubi non sit in supplicio, qui illo non fuerit constitutus in regno.

2. Quamobrem quod ait Dominus Jesus, *Hic est panis qui de cælo descendit, ut si quis ex ipso manducaverit, non moriatur. Ego sum panis vivus, qui de cælo descendi; si quis manducaverit ex hoc pane, vivet in æternum (Joan. vi, 50-52)*, quomodo sit accipiendum, merito quæritur. Et ab istis quidem quibus nunc respondemus, hunc intellectum auferunt illi quibus deinde respondendum est: hi sunt autem qui hanc liberationem, nec omnibus habentibus sacramentum Baptismatis et corporis Christi, sed solis Catholicis, quamvis male viventibus, pollicentur: quia non solo, inquit, sacramento, sed re ipsa manducaverunt corpus Christi, in ipso scilicet ejus corpore constituti: de quo corpore ait Apostolus, *Unus panis, unum corpus multi sumus (1 Cor. x, 17)*. Qui ergo est in ejus corporis unitate, id est, in Christianorum compage membrorum, cujus corporis sacramentum fideles communicantes de altari sumere consueverunt, ipse vere dicendus est manducare corpus Christi, et bibere sanguinem Christi. Ac per hoc hæretici et schismatici ab hujus unitate corporis separati possunt idem percipere sacramentum, sed non sibi utile, imo vero etiam noxium, quo judicentur gravius, quam vel tardius liberentur. Non sunt quippe in eo vinculo pacis, quod illo exprimitur sacramento.

3. Sed rursus etiam isti qui recte intelligunt, non

(a) vide lib. de Fid. et Oper.

dicendum esse eum manducare corpus Christi, qui in corpore non est Christi, non recte promittunt eis qui vel in hæresim, vel etiam in gentiliū superstitionem, ex illius corporis unitate labuntur, liberationem quandoque ab æterni igne supplicii. Primum, quia debent attendere, quam sit intolerabile atque a sana doctrina nimis devium, ut multi ac pene omnes, qui hæreses impias condiderunt exeuntes de catholica Ecclesia, et facti sunt hæresiarchæ, meliores habeant causas, quam hi qui nunquam fuerunt catholici, cum in eorum laqueos incidissent; si illos hæresiarchas hoc facit liberari a supplicio sempiterno, quod in catholica Ecclesia baptizati sunt, et sacramentum corporis Christi in vero Christi corpore primitus acceperunt: cum pejor utique sit desertor fidei et ex deserto oppugnator ejus effectus, quam ille qui non deseruit quam nunquam tenuit. Deinde quia et his occurrit Apostolus eadem verba proferens, et enumeratis illis carnis operibus eadem veritate prædicens, *Quoniam qui talia agunt, regnum Dei non possidebunt (Galat. v, 21)*.

4. Unde nec illi in perditis et damnabilibus moribus debent esse securi, qui usque in finem quidem velut in communionem Ecclesiæ catholicæ perseverant, intuentes quod dictum est, *Qui perseveraverit usque in finem, hic salvus erit (Matth. x, 22)*; et per vitæ iniquitatem, ipsam vitæ justitiam, quod eis Christus est, deserunt, sive fornicando, sive alias immunditias flagitiorum, quas nec Apostolus exprimere voluit, in suo corpore perpetrando, sive turpitudine luxuriæ diffluendo, sive aliquid aliud eorum agendo de quibus ait, *Quoniam qui talia agunt, regnum Dei non possidebunt*. Ac per hoc quicumque agunt talia, nisi in sempiterno supplicio non erunt, quia in Dei regno esse non poterunt. In his enim perseverando usque in hujus vitæ finem, non utique dicendi sunt in Christo perseverasse usque in finem: quia in Christo perseverare, est in ejus fide perseverare. Quæ fides, ut eam definit idem apostolus, *per dilectionem operatur (Galat. v, 6)*. Dilectio autem, sicut ipse alibi dicit, *malum non operatur (1 Cor. xiii, 4; Rom. xiii, 10)*. Nec isti ergo dicendi sunt manducare corpus Christi; quoniam nec in membris computandi sunt Christi. Ut enim alia taceam, non possunt simul esse et membra Christi, et membra meretricis (1 Cor. vi, 15). Denique ipse dicens, *Qui manducat carnem meam, et bibit sanguinem meum, in me manet, et ego in eo (Joan. vi, 57)*; ostendit quid sit non sacramento tenus, sed re vera corpus Christi manducare, et ejus sanguinem bibere: hoc est enim in Christo manere, ut in illo maneat et Christus. Sic enim hoc dixit, tanquam diceret, Qui non in me manet, et in quo ego non maneo, non se dicat aut existimet manducare corpus meum, aut bibere sanguinem meum. Non itaque manent in Christo, qui non sunt membra ejus. Non sunt autem membra Christi, qui se faciunt membra meretricis, nisi malum il-

¹ vind. Am. Er., non dicendum eum manducare; omisso, esse. Mss. vero, non dicendum esse manducare; omisso, eum.

Iud poenitendo esse destiterint, et ad hoc bonum reconciliatione redierint.

CAPUT XXVI.— *Quid sit in fundamento habere Christum, et quibus spondeatur salus quasi per ignis usturam.*

1. Sed habent, loquunt, Christiani catholici in fundamento Christum, a cuius unitate non recesserunt, tametsi huic fundamento superædificaverunt quamlibet pessimam vitam, velut ligna, fenum, stipulam (I Cor. III, 11, 12) : recta itaque fides ¹, per quam Christus est fundamentum, quamvis cum damno, quoniam illa quæ superædificata sunt exurentur, tamen poterit eos quandoque ab illius ignis perpetuitate salvare. Respondeat eis breviter apostolus Iacobus : *Si quis dicat se fidem habere, opera autem non habeat, numquid poterit fides salvare eum (Jacobi II, 14)?* Et quis est, inquit, de quo dicit apostolus Paulus, *Ipsæ autem salvus erit, sic tamen quasi per ignem (I Cor. III, 15)?* Simul quis iste sit, inquiramus : hunc tamen non esse, certissimum est, ne duorum Apostolorum sententias mittamus in rixam, si unus dicit, Etiam si mala opera quis habuerit, salvabit eum fides per ignem ; alius autem, Si opera non habeat, numquid poterit fides salvare eum ?

2. Inveniemus ergo quis possit salvari per ignem, si prius invenierimus quid sit habere in fundamento Christum. Quod ut de ipsa similitudine quantocius advertamus : Nilil in ædificio præponitur fundamento ; quisquis itaque sic habet in corde Christum, ut ei terrena et temporalia nec ea quæ licita sunt atque concessa præponat, fundamentum habet Christum. Si autem præponit, etsi videatur habere fidem Christi, non est tamen in eo fundamentum Christus, cui talia præponuntur : quanto magis, si salutaria præcepta et nemens committat illicita, non præposuisse Christum, sed postposuisse convincitur, quem posthabuit impertentem sive concedentem, dum contra ejus imperata sive concessa suam per flagitia delegit explere libidinem ? Si quis itaque christianus diligit meretricem, eique adhærens unum corpus efficitur (Id. VI, 16), jam in fundamento non habet Christum. Si quis autem diligit uxorem suam, si secundum Christum (Ephes. V, 25), quis ei dubitet in fundamento esse Christum ? Si vero secundum hoc sæculum, si carnaliter, si in morbo concupiscentiarum, sicut et gentes quæ ignorant Deum (I Thess. IV, 5), etiam hoc secundum ventam concedit Apostolus, imo per Apostolum Christus. Potest ergo et iste habere in fundamento Christum. Si enim ei nihil talis affectionis voluptatisque præponat, quamvis superædificet ligna, fenum, stipulam, Christus est fundamentum, propter hoc salvus erit per ignem. Delicias quippe hujusmodi ² amoresque terreneos, propter conjugalem quidem copulam non damnabiles, tribulationis ignis exuret : ad quem ignem pertinent et orbitates, et quæcumque calamitates quæ auferunt hæc. Ac per hoc

¹ Er. et Lov., *fides est*. Redundat, est, nec habetur in manuscriptis.

² Plures Mss., *hujus mundi*.

ei qui ædificavit, erit ædificatio ista damnosa ; quia non habebit quod superædificavit, et eorum amissione cruciabitur, quibus fruendo utique lætabatur. Sed per hunc ignem salvus erit merito fundamenti, quia etsi utrum id, an Christum habere mallet, a persecutore proponeretur, illud Christo non præponeretur. Vide in Apostoli verbis hominem ædificantem super fundamentum ³ aurum, argentum, lapides pretiosos : *Qui sine uxore est, inquit, cogitat quæ sunt Dei, quomodo placeat Deo.* Vide alium ædificantem ligna, fenum, stipulam : *Qui autem matrimonio junctus est, inquit, cogitat quæ sunt mundi, quomodo placeat uxori (I Cor. VII, 32, 33).* *Uniuscujusque opus ⁴ manifestabitur : dies enim declarabit ;* dies utique tribulationis ⁵ : *quoniam in igne, inquit, revelabitur (Id. III, 13).* Eandem tribulationem ignem vocat, sicut alibi legitur, *Vasa figuli probat fornax, et homines justos tentatio tribulationis (Eccli. XXVII, 6).* Et, *Uniuscujusque opus quale sit, ignis probabit. Si cujus opus permanserit (permanet enim quod quisque cogitat quæ sunt Dei, quomodo placeat Deo), quod superædificavit, mercedem accipiet : id est, unde cogitavit, hoc sumet. Si cujus autem opus arserit, damnum patietur : quoniam quod dilexerat, non habebit. Ipse autem salvus erit ; quia nulla eum tribulatio ab illius fundamenti stabilitate movit : sic tamen quasi per ignem (I Cor. III, 13-15).* Quod enim sine illicente amore non habuit, sine urente dolore non perdit. Ecce, quantum mihi videtur, inventus est ignis, qui nullum eorum damnet, sed unum ditet, alterum damnificet, ambos probet.

3. Si autem ignem illum isto loco voluerimus accipere, de quo Dominus dicit sinistris, *Discedite a me, maledicti, in ignem æternum (Matth. XXV, 41) ;* ut in eis etiam isti esse credantur, qui ædificant super fundamentum ligna, fenum, stipulam, eosque ex illo igne post tempus pro malis meritis impertitum liberet boni meritum fundamenti : quid arbitrabimur dextris quibus dicetur, *Venite, benedicti Patris mei, possidete paratum vobis regnum (Ibid., 34) ;* nisi eos qui ædificaverunt super fundamentum aurum, argentum, lapides pretiosos ? Sed in illum ignem, de quo dictum est, *sic lamina quasi per ignem, si hoc modo est intelligendus, utrique mittendi sunt, et dextri scilicet, et sinistri.* Illo quippe igne utrique probandi sunt, de quo dictum est, *Dies enim declarabit, quoniam in igne revelabitur, et uniuscujusque opus quale sit, ignis probabit (I Cor. III, 13).* Si ergo utrumque probabit ignis, ut si cujus opus permanserit, id est, non fuerit igne consumptum, quod superædificavit, mercedem accipiat ; si cujus autem opus arserit, damnum patietur : profecto non est ipse æternus ille ignis. In illum enim soli sinistri novissima et perpetua damnatione

³ Editi, *super fundamentum hoc*. Abest, hoc, a manuscriptis.

⁴ Hic editi, veteribus libris dissentientes, addunt, *quale sit*. Necnon continuo post, *manifestabitur*, habent, *dies enim Domini declarabit* : quo loco vox, *Domini*, non est in manuscriptis nec in græco textu Apostoli.

⁵ Vlad. Am. et Er., *Dies utique iræ, dies tribulationis*.

mittentur, iste autem dexteros probat. Sed alios eorum sic probat, ut ædificium quod super Christum fundamentum ab eis invenerit esse constructum, non exurat atque consumat: alios autem aliter, id est, ut quod superædificaverunt, ardeat, damnatique inde patiantur; salvi fiant autem, quoniam Christum in fundamento stabiliter positum præcedenti obaritate tenebunt. Si autem salvi fient, profecto et ad dexteros stabunt, et cum cæteris audient, *Venite, benedicti Patris mei, possidete paratum vobis regnum*: non ad sinistram, ubi illi erunt, qui salvi non erunt, et ideo audient, *Discedite a me, maledicti, in ignem æternum*. Nemo quippe ¹ ab illo igne salvabitur, quia in supplicium æternum ibunt illi omnes (*Math. xv, 46*), ubi vermis eorum non morietur, et ignis non exstinguetur (*Isai. lxvi, 24*), quo cruciabuntur die ac nocte in sæcula sæculorum (*Apoc. xx, 10*).

4. Post istius sano corporis mortem, donec ad vitam veniatur, qui post resurrectionem corporum futurus est damnationis et remunerationis ultimus dies, si hoc temporis intervallo spiritus defunctorum ejusmodi ignem dicuntur perpeti, quem non sentiant illi qui non habuérunt tales mores et amores in hujus corporis vita, ut eorum ligna, feneni, stipula consumatur; alii vero sentiant qui ejusmodi secum ædificia portaverunt, sive ibi tantum, sive et hic et ibi, sive ideo hic ut non ibi, sæcularia ², quamvis a damnatione venialia concremantem ignem transitorie tribulationis inveniant, non redarguo, quia forsitan verum est. Potest quippe ad istam tribulationem pertinere etiam ipsa mors carnis, quæ de peccati primi perpetratoe concepta est, ut secundum cujusque ædificium tempus quod eam sequitur ab unoquoque sentiatur. Persecutiones quoque quibus martyres ³ coronati sunt, et quas patiuntur quicumque Christiani, probant utraque ædificia velut ignis, et alia consumunt cum ipsis ædificatoribus, si Christum in eis non inveniunt fundamentum; alia sine ipsis, si inveniunt, quia, licet cum damno, salvi erunt ipsi: alia vero non consumunt, quia talia reperiunt quæ maneat in æternum ⁴. Erit etiam in fine sæculi tribulatio tempore Antichristi, qualis nunquam antea fuit. Quam multa erunt tunc ædificia, sive aurea, sive fenea super optimum fundamentum, quod est Christus Jesus, ut ignis ille probet utraque, et de aliis gaudium, de aliis inferat damnum; neutros tamen perdat in quibus hæc inveniet, propter stabile fundamentum. Quicumque autem, non dico uxorem, cujus etiam commixtione carnis ad carnalem utitur voluptatem, sed ipsa quæ ab hujusmodi delectationibus aliena sunt nomina pietatis, humano more carnaliter diligendo Christo anteposit, non eum habet in funda-

mento, et ideo non per ignem salvus erit, sed salvus non erit, quia esse cum Salvatore non poterit, qui de hac re apertissime loquens ait, *Qui amat patrem aut matrem plus quam me, non est me dignus: et qui amat filium aut filiam super me, non est me dignus* (*Math. x, 37*). Verum qui has necessitudines sic amat carnaliter, ut tamen eas Christo Domino non præponat, malitque ipsis carere quam Christo, si ad hunc fuerit articulum tentationis adductus, per ignem salvus erit: quia ex earum amissione tantum necesse est urat dolor, quantum hæserat amor. Porro qui patrem, matrem, filios, filias secundum Christum dilexerit, ut ad ejus regnum obtinendum ei que cohærendum illis consulat, vel hoc in eis diligit, quod membra sunt Christi, absit ut ista dilectio reperiat in lignis, feno et stipula consumenda, sed prorsus ædificio aureo, argenteo, gemmeo deputabitur. Quomodo autem potest eos plus amare quam Christum quos amat utique propter Christum (a).

CAPUT XXVII. — *Contra eorum persuasionem qui putant sibi non obsutura peccata, in quibus, cum eleemosynas facerent, peratiterunt.*

1. Restat eis respondere, qui dicunt æterno igne illos tantummodo aruros, qui pro peccatis suis facere dignas eleemosynas negligunt, propter illud quod ait apostolus Jacobus: *Judicium autem sine misericordia illi qui non fecit misericordiam* (*Jacobi ii, 13*). Qui ergo fecit, inquit, quamvis non correxerit perditos mores, sed nefarie ac nequiter inter ipsas suas eleemosynas vixerit, cum misericordia illi futurum est judicium, ut aut non damnetur omnino, aut post aliquod tempus a damnatione novissima liberetur. Nec ob aliud existimat Christum de solo dilectu atque neglectu eleemosynarum discretionem inter dexteros et sinistros esse facturum, quorum alios in regnum, alios in supplicium mittat æterna. Ut autem quotidiana sibi opinentur, quæ facere omnino non cessant, qualiacumque et quantacumque sint, per eleemosynas dimitti posse peccata, orationem quam docuit ipse Dominus, et suffragatricem sibi adhibere conantur, et testem. Sicut enim nullus est, inquit, dies, quo a Christianis hæc oratio non dicatur: ita nullum est quotidianum qualecumque peccatum, quod per illam non dimittatur, cum dicimus, *Dimitte nobis debita nostra*; si quod sequitur facere curemus, sicut et nos dimittimus debitoribus nostris (*Math. vi, 12*). Non enim ait Dominus, inquit, Si dimiseritis peccata hominibus, dimittet vobis Pater vester quotidiana parva peccata vestra ¹; sed, *dimittet vobis, inquit, peccata vestra* (*Ibid., 14*). Qualiacumque ergo vel quantacumque sint, etiamsi quotidie perpetrentur, nec ab eis vita discedant ² in melius commutata, per eleemosynam veniæ non negatæ remittit sibi posse præsumunt.

¹ Abest, vestra, in codicibus nostris. M.

² Sic melioris notæ Mss. At editi, *discedat*: et infra, *per eleemosynam veniæ non negata*, etc.

(a) Conf. lib. de Mor. Eccles. Cathol., n. 63, et lib. de ver. Relig., n. 86 et seqq.

(Vingt-quatre.)

SANCT. AUGUST. VII.

¹ Lov., *Nemo quippe eorum*. Abest, *eorum*, ab editis aliis et manuscriptis.

² Beraldus in suo codice emendat, *seclusa*.

³ Sic veteres libri. At editi, et secundum cujusque ædificium tempore suo ab unoquoque suscepta. Possunt et persecutiones Ecclesie, quibus martyres.

⁴ Vind. Am. et Er., *quia licet cum damno salvi erunt: ipsi non consumuntur, propter Christi fidelicet meritum in fundamentum reperi, qui manet in æternum*.

2. Sed bene, quod isti dignas pro peccatis commo-
nent eleemosynas esse faciendas : quoniam si di-
cerent qualescumque eleemosynas pro peccatis et
quotidianis et magnis et quantacumque scelerum
consuetudine misericordiam posse impetrare divinam,
ut ea quotidiana remissio sequeretur, viderent rem se
dicere absurdam atque ridiculam. Sic enim cogeren-
tur fateri fieri posse, ut opulentissimus homo decem
nummulis diurnis in eleemosynas impensis, homici-
dia, et adulteria, et nefaria quæque facta redimeret.
Quod si absurdissimum et insanissimum est dicere :
perfecto si quærat, quæ dignæ sint pro peccatis
eleemosynæ, de quibus etiam Christi præcursor ille
dicebat, *Facile ergo fructus dignos penitentiae* (*Matth.*
iii, 8) ; procul dubio non invenientur eas facere, qui
vitam suam usque ad mortem quotidianorum crimi-
num perpetratione confodiunt (a). Primum, quia in au-
ferendis rebus alienis longe plura diripiunt, ex qui-
bus perexigua pauperibus largiendo, Christum se ad
hoc pascere existimant, ut licentiam malefactorum ab
illo se emisse, vel quotidie potius emere credentes,
securi damnabilia tanta committant. Qui si pro uno
scelere omnia sua distribuerent indigentibus mem-
bris Christi, nisi desisterent talibus factis, habendo
charitatem, quæ non agit perperam (*I Cor. xiii, 4*),
aliquid eis prodesse non posset. Qui ergo dignas pro
suis peccatis eleemosynas facit, prius eas facere inci-
piat a se ipso. Indignum est enim, ut in se non fa-
ciat qui facit in proximum, cum audiat dicentem Do-
minum, *Diliges proximum tuum tanquam te ipsum*
(*Matth. xxii, 39*). Itemque audiat, *Miserere tuæ*
animæ placens Deo (*Eccli. xxx, 24*). Hanc eleemosy-
nam, id est, ut Deo placeat, non faciens animæ suæ,
quomodo dignas pro peccatis suis eleemosynas facere
dicendus est ? Ad hoc enim et illud scriptum est :
Qui sibi malignus est, cui bonus erit (*Id. xiv, 5*) ?
Orationes quippe adjuvant eleemosynæ. Et utique
intuendum est quod legimus : *Fili, peccasti, ne adji-
cias iterum, et de præteritis deprecare, ut tibi dimittan-
tur* (*Id. xxi, 4*). Propter hoc ergo eleemosynæ faci-
endiæ sunt, ut cum de præteritis peccatis deprecamur,
exaudiamur, non ut in eis perseverantes, licen-
tiam malefaciendi nos per eleemosynas comparare
credamus.

3. Ideo autem Dominus et dextris eleemosynas ab
eis factas, et sinistris non factas se imputaturum esse
prædixit, ut hinc ostenderet quantum valeant eleemo-
synæ ad priora delenda, non ad perpetua impune
committenda peccata. Tales autem eleemosynas non
dicendi sunt facere qui vitam nolunt a consuetudine
scelerum in melius commutare. Quia et in hoc quod
ait, *Quando uni ex minimis meis non fecistis, mihi*
non fecistis (*Matth. xxv, 45*) ; ostendit eos non
facere etiam quando se facere existimant. Si enim
Christiano esurienti panem tanquam Christiano
darent, profecto sibi panem justitiæ, quod ipse

Christus est, non negarent : quoniam Deus, non
cui detur, sed quo animo detur, attendit. Qui ergo
Christum diligit in Christiano, hoc animo ei porrigit
eleemosynam quo accedit ad Christum, non quo vult
recedere impunitus a Christo. Tanto enim magis
quisque deserit Christum, quanto magis diligit quod
improbat Christus. Nam quid cuiquam prodest, quod
baptizatur, si non justificatur ? Nonne qui dixit, *Nisi*
quis renatus fuerit ex aqua et Spiritu Sancto, non
intrabit in regnum Dei (*Joan. iii, 5*) ; ipse etiam dixit,
Nisi abundaverit justitia vestra super Scribarum et
Pharisæorum, non intrabitis in regnum caelorum (*Matth.*
v, 20) ? Cur illud timendo multi currunt baptizari,
et hoc non timendo non multi curant justificari ? Sicut
ergo non dicit fratri suo, *Fatue*, qui cum hoc dicit,
non ipsi fraternitati, sed peccato ejus insensus est ;
alioquin reus erit gehennæ ignis (*Ibid., 22*) : ita e con-
trario, qui porrigit eleemosynam Christiano, non Chri-
stiano porrigit, qui non in eo diligit Christum ; non au-
tem diligit Christum, qui justificari recusat in Christo.
Et quemadmodum si quis præoccupatus fuerit hoc deli-
cto, ut fratri suo dicat, *Fatue*, id est, non ejus pec-
catum volens auferre convicietur injuste ; parum est
illi ad hoc redimendum eleemosynas facere, nisi
etiam quod ibi sequitur remedium reconciliationis
adjungat. Ibi enim sequitur : *Si ergo offers munus*
tuum ad altare, et ibi recordatus fueris, quia frater
tuus habet aliquid adversum te, relinque ibi munus tuum
ad altare, et vade, prius reconciliare fratri tuo, et tunc
veniens offeres munus tuum (*Ibid., 23, 24*). Ita parum
est eleemosynas quantalibet facere pro quocumque
scelere, et in consuetudine scelerum permanere.

4. Oratio vero quotidiana, quam docuit ipse Domi-
nus¹, unde et Dominica nominatur, delet quidem
quotidiana peccata, cum quotidie dicitur, *Dimitte*
nobis debita nostra ; atque id quod sequitur non solum
dicitur, sed etiam fit, *sicut et nos dimittimus debito-*
ribus nostris (*Id. vi, 12*) : sed quia fiunt peccata, ideo
dicitur ; non ut ideo fiunt, quia dicitur (a). Per hanc
enim nobis voluit Salvator ostendere, quantumlibet
juste in hujus vitæ caligine atque infirmitate viva-
mus, non nobis deesse peccata pro quibus dimittendis
debeamus orare, et eis qui in nos peccant, ut et
nobis ignoscatur, ignoscere. Non itaque propterea
Dominus ait, *Si dimiseritis peccata hominibus, dimittet*
vobis et Pater vester peccata vestra (*Ibid., 14*), ut de
hac oratione confisi, securi quotidiana scelera face-
remus, vel potentia qua non timeremus hominum le-
ges, vel astutia qua ipsos homines falleremus : sed ut
per illam disceremus, non putare nos esse sine pec-
catis, etiamsi a criminibus essemus immunes : sicut
etiam Legis veteris sacerdotes hoc ipsum Deus de sa-
cificiis admonuit, quæ jussit eos primum pro suis,
deinde pro populi offerre peccatis (*Levit. xvi, 6* ;
Hebr. vii, 27). Nam et ipsa verba tanti Magistri et
Domini nostri vigilanter intuenda sunt. Non enim ait,

¹ Plures Mss., *incipit*.

Sic omnes Mss. Editi vero, *tanquam Christo*.

(b) Conf. lib. 22 cont. Faust. Manich., cap. 29.

¹ Plerique Mss., *offeret*.

² Omnes Mss., *Jesus*.

(a) Conf. Enchirid. nn. 19, 20.

Si dimiseritis peccata hominibus, et Pater vester dimittet vobis qualiacumque peccata: sed ait, *peccata vestra*. Quotidianam quippe orationem docebat, et justificatis utique discipulis loquebatur. Quid est ergo, *peccata vestra*, nisi peccata sine quibus nec vos eritis, qui justificati et sanctificati estis? Ubi ergo illi, qui per hanc orationem occasionem perpetratorum quotidie scelerum quærent, dicunt Dominum significasse etiam magna peccata, quoniam non dixit, Dimittet vobis parva, sed *peccata vestra*: ibi nos considerantes qualibus loquebatur, et audientes dictum, *peccata vestra*, nihil aliud debemus existimare quam parva, quoniam talium jam non erant magna. Verumtamen nec ipsa magna, a quibus omnino mutatis in melius moribus recedendum est, dimittuntur orantibus, nisi fiat quod ibi dicitur, *sicut et nos dimittimus debitoribus nostris*. Si enim minima peccata, sine quibus non est etiam vita justorum, aliter non remittuntur: quanto magis multis et magnis criminibus involuti, etiamsi ea perpetrare jam desinant, nullam indulgentiam consequuntur, si ad remittendum aliis quod in eos quisque peccaverit, inexorabiles fuerint, cum dicat Dominus, *Si autem non dimiseritis hominibus¹, neque Pater vester dimittet vobis* (Matth. vi, 15)? Ad hoc enim valet quod etiam Jacobus apostolus ait, iudicium futurum sine misericordia illi qui non fecit misericordiam (Jacobi ii, 13). Venire quippe debet in mentem etiam servus ille, cui debitori dominus ejus² relaxavit decem millia talentorum; quæ postea jussit ut redderet, quia ipse non misertus est conservi sui, qui ei debebat centum denarios (Matth. xviii, 23 sqq.). In his ergo qui filii sunt promissionis et vasa misericordiæ, valet quod ait idem apostolus, consequenter adjungens, *Superexultat autem misericordia iudicio³* (Jacobi ii, 13). Quoniam et illi justii qui tanta sanctitate vixerunt, ut alios quoque recipiant in tabernacula æterna, quibus amici facti sunt de mammona iniquitatis (Luc. xvi, 9), ut tales essent, misericordia liberati sunt ab eo qui justificat impium, imputans mercedem secundum gratiam, non secundum debitum. In eorum quippenumero est Apostolus, qui dicit: *Misericordiam consecutus sum, ut fidelis essem* (I Cor. vii, 25).

5. Illi autem qui recipiantur a talibus in tabernacula æterna, fatendum est quod non sint his moribus præditi, ut eis liberandis sine suffragio sanctorum sua possit vita sufficere, ac per hoc multo amplius in eis superexultat misericordia iudicio. Nec tamen ideo putandus est quisquam sceleratissimus nequaquam vita vel bona vel tolerabiliore mutatus, recipi in tabernacula æterna, quoniam obsecutus est sanctis de mammona iniquitatis, id est, de pecunia, vel divitiis, quæ male fuerant acquisitæ; aut etiamsi bene, non tamen veris, sed quas iniquitas putat esse

divitiis, quoniam nescitur sint veræ divitiæ, quibus illi abundant, qui et alios recipiunt in æterna tabernacula. Est itaque quidam vitæ modus, nec tam malæ, ut his qui eam vivunt⁴, nihil prosit ad capessendum regnum cælorum largitas eleemosynarum, quibus etiam justorum sustentatur inopia, et fiunt amici qui in tabernacula æterna suscipiant; nec tam bonæ, ut ad tantam beatitudinem adipiscendam eis ipsa sufficiat, nisi eorum meritis quos amicos fecerint, misericordiam consequantur. (Mirari autem soleo etiam apud Virgilium istam Domini reperiri sententiam, ubi ait: *Facite vobis amicos de mammona iniquitatis, ut et ipsi recipiant vos in tabernacula æterna* (Luc. xvi, 9). Cujus est et illa simillima, *Qui recipit prophetam in nomine prophetæ, mercedem prophetæ accipiet, et qui recipit justum in nomine justii, mercedem justii accipiet* (Matth. x, 41). Nam cum Elysios campos poeta ille describeret, ubi putant habitare animas beatorum, non solum ibi posuit eos, qui propriis meritis ad illas sedes pervenire potuerunt, sed adjecit, atque ait,

Quique sui memores alios fecere merendo;
(Æneid. lib. 6, vers. 664.)

id est, qui promeruerunt alios, eosque sui memores promerendo fecerunt. Prorsus tanquam eis dicerent⁵, quod frequentatur ore Christiano, cum se cuique sanctorum humilis quisque commendat, et dicit, *Memor mei esto*: atque ut id esse possit, promerendo efficit.) Sed quis iste sit modus, et quæ sint ipsa peccata, quæ ita impediunt perventionem ad regnum Dei, ut tamen sanctorum amicorum meritis impetrent indulgentiam, difficillimum est invenire, periculosissimum definire. Ego certe usque ad hoc tempus cum inde satagerem, ad eorum indaginem pervenire non potui. Et fortassis propterea latent, ne studium proficiendi ad omnia peccata cavenda pigrescat. Quoniam si scientur quæ vel qualia sint delicta, pro quibus etiam permanentibus nec profectu vitæ melioris absumptis intercessio sit inquirenda et speranda justorum, eis secunda se obvolveret humana segnitia, nec evolvi talibus implicamentis ullius virtutis expeditione curaret, sed tantummodo quæreret aliorum meritis liberari, quos amicos sibi de mammona iniquitatis eleemosynarum largitione⁶ fecisset. Nunc vero dum venialis iniquitatis, etiamsi perseveret, ignoratur modus, profecto et studium in meliora proficiendi orationi instando⁷ vigilantius adhibetur, et faciendi de mammona iniquitatis sanctos amicos cura non spernitur.

6. Verum ista liberatio quæ fit sive suis quibusque orationibus, sive intercedentibus sanctis, id agit ut in ignem quisque non mittatur æternum: non ut cum fuerit missus, post quantumcumque tempus inde eruatur. Nam et illi qui putant sic intelligendum esse, quod scriptum est, afferre terram bonam ubeream fructum, aliam tricenam, aliam sexagenam, aliam

¹ Hic in editis additur, *peccata*; quod abest a manuscriptis.

² Sic Mss. At editi, *dominus suus*.

³ Editi, *Superexultat misericordia iudicium*. Altera veterum quorundam librorum lectio consentanea est græco, *καὶ κατακαυχᾶται ἐλεος κρίσεως*.

⁴ Lov. *qui ea vivunt*. Editi alii cum manuscriptis, *qui eam vivunt*.

⁵ Ita omnes Mss. At editi, *diceret*.

⁶ In Mss, *largitate*.

⁷ Viad. Am. et plures manuscripti, *orando et instando*.

centenum (*Matth. XIII, 8*) : ut sancti pro suorum diversitate meritorum, alii tricenos homines liberent, alii sexagenos, alii centenos : hoc in die iudicii futurum suspicari solent, non post iudicium. Qua opinione quidam cum videret homines impunitatem sibi perversissime pollicentes, eo quod omnes isto modo ad liberationem pertinere posse videantur, elegantissime respondisse perhibetur, bene potius esse vivendum, ut inter eos quisque reperiatur, qui pro aliis intercessuri sunt liberandis; ne tam pauci sint, ut cito ad numerum suum vel tricenum, vel sexagenum,

vel centenum unoquoque eorum perveniente, multi remaneant qui erui jam de pœnis illorum intercessione non possint, et in eis inveniat quisque sibi spem fructus alieni temeritate vanissima pollicetur. Hæc me respondisse illis suffecerit, qui sacrarum Litterarum, quas communes habemus, auctoritatem non spernunt, sed eas male intelligendo, non quod illæ loquuntur, sed hoc potius putant futurum esse quod ipsi volunt (a). Hæc itaque responsione reddita, librum, sicut promisimus, terminamus.

(a) Conf. Epist. 120, n. 13.

LIBER VIGESIMUS SECUNDUS (a).

De fine debito civitatis Dei, hoc est de æterna felicitate sanctorum. Adstruitur fides resurrectionis corporum, et explicatur qualis futura sit. Tunc dicto quid acturi sint in corporibus immortalibus atque spiritualibus sanctis, opus terminatur.



CAPUT PRIMUM. — De conditione Angelorum et hominum.

1. Sicut in proximo libro superiore promisimus, iste hujus totius operis ultimus disputationem de civitatis Dei æterna beatitudine continebit. Quæ non propter ætatis per multa sæcula longitudinem, tamen quandocumque finiendam, æternitatis nomen accepit; sed quemadmodum scriptum est in Evangelio, *Regni ejus non erit finis* (*Luc. I, 33*). Nec ita ut aliis moriendo decedentibus, aliis succedentibus oriendo, species in ea perpetuitatis appareat, sicut in arbore quæ perenni fronde vestitur, eadem videtur virilitas permanere, dum labentibus et cadentibus foliis, subinde alia quæ nascuntur, faciem conservant opacitatis: sed omnes in ea cives immortales erunt, adipiscentibus et hominibus, quod nunquam sancti Angeli perdidit. Faciet hoc Deus omnipotentissimus ejus conditor. Promisit enim, nec mentiri potest; et quibus fidem hinc quoque faceret, multa sua, et non promissa, et promissa jam fecit.

2. Ipse est enim, qui in principio condidit mundum, plenum bonis omnibus visibilibus atque intelligibilibus rebus, in quo nihil melius instituit quam spiritus, quibus intelligentiam dedit, et sæ contemplationis habiles capacesque sui præstitit, atque una societate devinxit, quam sanctam et supernam dicimus civitatem, in qua res qua sustententur beatique sint, Deus ipse illis est, tanquam vita victusque communis. Qui liberum arbitrium eidem intellectuali naturæ tribuit tale, ut si vellet, desereret Deum, beatitudinem scilicet suam, continuo miseria secutura¹. Qui cum præsciret angelos quosdam per elationem, qua ipsi sibi ad beatam vitam sufficere vellem, tanti boni desertores futuros, non eis ademit hanc potentiam, potentius et melius esse judicans etiam de malis bene facere, quam mala esse non sinere (b). Quæ

¹ Ita plures e veteribus libris. Editi vero, ut si vellet deserere Deum, beatitudinem scilicet suam, continuo miseria esset secutura.

(a) Scripsit circiter initium anni 427.

(b) Conf. lib. 11 de Gen. ad Litt., n. 12 et seqq.

omnino nulla essent, nisi natura mutabilia, quamvis bona, et a summo Deo atque incommutabili homo, qui bona omnia condidit, instituta, peccando ea sibi ipsi fecisset. Quo etiam peccato suo teste convincitur, bonam conditam se esse naturam. Nisi enim magnum et ipsa, licet non æquale Conditori, bonum esset, profecto desertio Dei tanquam luminis sui malum ejus esse non posset (a). Nam sicut cæcitas oculi vitium est, et idem ipsum indicat ad lumen videndum oculum esse creatum, ac per hoc etiam ipso vitio suo excellentius ostenditur cæteris membris membrum capax luminis (non enim alia causa esset vitium ejus carere lumine): ita natura quæ fruebatur Deo, optimam se institutam docet etiam ipso vitio, quo ideo misera est, quia non fruitur Deo; qui casum angelorum voluntarium justissima pœna sempiternæ infelicitatis obrinxit, atque in eo summo bono permanentibus cæteris, ut de sua sine fine permansione certi essent, tanquam ipsius præmium permaansionis dedit. Qui fecit hominem ipsum etiam rectum cum eodem libero arbitrio, terrenum quidem animal, sed cælo dignum, si suo cohereret auctori: miseria similiter, si eum desereret, secutura, qualis naturæ hujusmodi conveniret. Quem similiter cum prævaricatione legis Dei per Dei desertionem peccatum esse præsciret, nec illi ademit liberi arbitrii potestatem, simul prævidens, quid boni de malo ejus esset ipse facturus, qui de mortali progenie merito justeque damnata tantum populum gratia sua colligit, ut inde suppleat, et instauret partem quæ lapsa est angelorum; ac sic illa dilecta et superna civitas non fraudetur suorum numero civium, quin etiam fortassis et uberiore latetur (b).

CAPUT II. — De æterna Dei et incommutabili voluntate.

1. Multa enim sunt quidem a malis contra voluntatem Dei: sed tantæ est ille sapientiæ tantæque virtutis, ut in eos exitus sive fines, quos bonos et

(a) Vid. Enchirid., n. 4.

(b) Ibid., n. 9.

justos ipse præcivit, tendant omnia, quæ voluntati ejus videntur adversa. Ac per hoc cum Deus mutare dicitur voluntatem, ut quibus lenis erat, verbi gratia, reddatur iratus, illi potius quam ipse mutantur, et eum quodammodo mutatum in his quæ patiuntur inveniunt: sicut mutatur sol oculis sauciatis, et asper quodammodo ex miti, et ex delectabili molestus efficitur, cum ipse apud se ipsum maneat idem qui fuit. Dicitur etiam voluntas Dei, quam facit in cordibus obedientium mandatis ejus, de qua dicit Apostolus, *Deus est enim, qui operatur in vobis et velle* (Philipp. II, 13). Sicut justitia Dei, non solum qua ipse justus est dicitur, sed illa etiam quam in homine, qui ab illo justificatur, facit: sic et lex ejus vocatur, quæ potius est hominum, sed ab ipso data¹. Nam utique homines erant, quibus ait Jesus, *In lege vestra scriptum est* (Joan. VIII, 17): cum alio loco legamus, *Lex Dei ejus in corde ipsius* (Psal. XXXVI, 51). Secundum hanc voluntatem, quam Deus operatur in hominibus, etiam velle dicitur, quod ipse non vult, sed suos id volentes facit: sicut dicitur cognovisse, quod ut cognosceretur fecit, a quibus ignorabatur. Neque enim dicente Apostolo, *Nunc autem cognoscentes Deum, imo cogniti a Deo* (Galat. IV, 9), fas est ut credamus, quod eos tunc cognoverit Deus præcognitos ante constitutionem mundi (I Petr. I, 20): sed tunc cognovisse dictus est, quod tunc ut cognosceretur effecit. De his locutionum modis jam et in superioribus libris meminisse disputatum. Secundum hanc ergo voluntatem, qua Deum velle dicimus quod alios efficit velle, a quibus futura nesciuntur, multa vult, nec facit.

2. [II.] Multa enim volunt fieri sancti ejus ab illo inspirata sancta voluntate, nec fiunt; sicut orant pro quibusdam pie sancteque, et quod orant non facit, cum ipse in eis hanc orandi voluntatem sancto Spiritu suo fecerit. Ac per hoc, quando secundum Deum volunt et orant sancti, ut quisque sit salvus, possumus illo modo locutionis dicere, Vult Deus et non facit; ut ipsum dicamus velle, qui ut velit isti facit. Secundum illam vero voluntatem suam, quæ cum ejus præscientia sempiterna est, profecto in cælo et in terra omnia quæcumque voluit, non solum præterita vel præsentia, sed etiam futura jam fecit (Psal. CXXIII, 3 bis). Verum antequam veniat tempus, quo voluit at fieret, quod ante tempora universa præcivit atque disposuit, dicimus, Fiet quando Deus voluerit. Si autem non solum tempus quo futurum est, verum etiam utrum futurum sit ignoramus, dicimus, Fiet, si Deus voluerit: non quia Deus novam voluntatem, quam non habuit, tunc habebit; sed quia id quod ex æternitate in ejus immutabili præparatum est voluntate, tunc erit.

CAPUT III. — *De promissione æternæ beatitudinis sanctorum et perpetuis suppliciiis impiorum.*

Quapropter, ut cætera tam multa præteream, sicut

¹ Sic Mss. At edlti, in nobis et velle. Sicut enim justitia, etc.

² Am. Er. et Lov., data hominibus. Abest, hominibus, a vind. et Mss.

nunc in Christo videmus impleri quod promisit Abraham, dicens, *In semine tuo benedicentur omnes gentes* (Gen. XXII, 18): ita quod eidem semini ejus promisit, implebitur, ubi ait per prophetam, *Resurgent qui erant in monumentis; et quod ait, Erit cælum novum et terra nova, et non erunt memores priorum, nec ascendent in cor ipsorum; sed lætitiæ et exultationem invenient in ea. Ecce ego faciam Jerusalem exultationem et populum meum lætitiæ; et exultabo in Jerusalem, et laborabo in populo meo; et ultra non audietur in ea vox flatus* (Isai. XXVI, 19, sec. LXX; LXV, 17-19, sec. LXX). Et per alium prophetam, quod prænuntiavit dicens eidem prophetæ, *In tempore illo salvabitur populus tuus omnis qui inventus fuerit scriptus in libro: et multi dormientium in terræ pulvere* (sive, ut quidam interpretati sunt, *aggere*) *exsurgent; hi in vitam æternam, et hi in opprobrium et confusionem æternam* (Dan. XII, 1 et 2). Et alio loco per eundem prophetam: *Accipient regnum sancti Altissimi, et obtinebunt illud usque in sæculum, et usque in sæculum sæculorum* (Id. VII, 18). Et paulo post, *Regnum, inquit, ejus regnum sempiternum* (Ibid., 27). Et alia quæ ad hoc pertinentia in libro vicesimo posui (cap. 21 seq.), sive quæ non posui, et tamen in eisdem Litteris scripta sunt: venient et hæc, sicut et ista venerunt, quæ increduli non putabant esse ventura. Idem quippe Deus utraque promisit, utraque ventura esse prædixit, quem perhorrescunt numina Paganorum, teste etiam Porphyrio, nobilissimo philosopho Paganorum.

CAPUT IV. — *Contra sapientes mundi, qui putant terrena hominum corpora ad cæleste habitaculum non posse transferri.*

Sed videlicet homines docti atque sapientes contra vim tantæ auctoritatis, quæ omnia genera hominum, sicut tanto ante prædixit, in hoc credendum sperandumque convertit, acute sibi argumentari videntur adversus corporum resurrectionem, et dicere quod in tertio de Republica libro a Cicerone commemoratum est. Nam cum Herculem et Romulum ex hominibus deos esse factos asseveraret: *Quorum non corpora, inquit, sunt in cælum elata; neque enim natura pateretur, ut id quod esset e terra, nisi in terra maneret.* Hæc est magna ratio sapientium (a), quorum Dominus novit cogitationes, quoniam vanæ sunt (Psal. XCIII, 11). Si enim animæ tantummodo essemus, id est, sine ullo corpore spiritus, et in cælo habitantes terrena animalia nesciremus, nobisque futurum esse diceretur, ut terrenis corporibus animandis quodam vinculo mirabili necteremur; monne multo fortius argumentaremur id credere recusantes, et diceremus naturam non pati, ut res incorporea ligamento corporeo vinciretur? Et tamen plena est terra vegetantibus animis hæc membra terrena, miro sibi modo connexa² et

¹ Edlti, Et ecce. Particula, Et, abest a Mss. et a LXX. V. de supra, lib. 20, cap. 21, n. 2.

² Edlti, Et tamen plena est terra vegetantibus animis, quibus hæc membra terrena miro modo sunt connexa, etc. Castigantur auctoritate veterum librorum, qui non habent, quibus, nec, sunt; sed omnes ferunt, miro sibi modo connexa.

(a) Conf. lib. de Fide et Symbolo, n. 13.

implicita. Cur ergo eodem volente Deo, qui fecit hoc animal, non poterit terrenum corpus in caeleste corpus attonsi, si animus omni, ac per hoc etiam caelesti corpore praestabilior¹, terreno corpori potuit illigari? An terrena particula tam exigua potuit aliquid caelesti corpore melius apud se tenere, ut sensum haberet et vitam, et eam sentientem atque viventem dedignabitur caelum suscipere, aut susceptam non poterit sustinere, cum de re sentiat et vivat ista meliore, quam est corpus omne caeleste? Sed ideo nunc non fit, quia nondum est tempus quo id fieri voluit, qui hoc quod videndo jam viluit, multo mirabilius quam illud quod ab istis non creditur, fecit. Cur enim non vehementius admiramur incorporeos animos caelesti corpore potiores, terrenis illigari corporibus, quam corpora, licet terrena, sedibus quamvis caelestibus tamen, corporeis sublimari, nisi quia hoc videre consuevimus, et hoc sumus, illud vero nondum sumus, nec aliquando adhuc vidimus? Nam profecto sobria ratione consulta mirabilioris esse divini operis reperitur, incorporeis corporalia quodammodo attexere, quam licet diversa, quia illa caelestia, ista terrestria, tamen corpora et corpora copulare (a).

CAPUT V. — *De resurrectione carnis, quam quidam mundo credente non credunt.*

Sed hoc incredibile fuerit aliquando: ecce jam credidit mundus sublatum terrenum Christi corpus in caelum; resurrectionem carnis et ascensionem in supernas sedes, paucissimis remanentibus atque stupentibus, vel doctis, vel indoctis, jam crediderunt et docti et indocti. Si rem credibilem crediderunt, videant quam sint stolidi, qui non credunt: si autem res incredibilem credita est, etiam hoc utique incredibile est, sic creditum esse, quod incredibile est. Haec igitur duo incredibilia, resurrectionem scilicet nostri corporis in aeternum, et rem tam incredibilem mundum esse crediturum, idem Deus, antequam vel unum horum fieret, ambo futura esse praedixit (*Matth.* xxvi, 13). Unum duorum incredibilium jam factum videmus, ut quod erat incredibile, crederet mundus: cur id quod reliquum est desperatur, ut etiam hoc veniat, quod incredibile credidit mundus, sicut jam venit, quod similiter incredibile fuit, ut rem tam incredibilem crederet mundus, quandoquidem hoc utrumque incredibile, quorum videmus unum, alterum credimus, in eisdem Litteris praedictum sit, per quas credidit mundus? Et ipse modus quo mundus credidit, si consideretur, incredibilior invenitur. Ineruditos liberalibus disciplinis, et omnino, quantum ad istorum doctrinas attinet, impolitos, non peritos grammatica, non armatos dialectica, non rhetorica inflatos, piscatores Christus cum retibus fidei ad mare

hujus saeculi paucissimos misit, atque ita et ex omni genere tam multos pisces, et tanto mirabiliores, quanto rariores etiam ipsos philosophos cepit. Duobus illis incredibilibus, si placet, imo quia placere debet, addamus hoc tertium. Jam ergo tria sunt incredibilia, quae tamen facta sunt. Incredibile est Christum resurrexisse in carne, et in caelum ascendisse cum carne: incredibile est mundum rem tam incredibilem credidisse: incredibile est homines ignobiles, infimos¹, paucissimos, imperitos rem tam incredibilem, tam efficaciter mundo, et in illo etiam doctis persuadere potuisse. Horum trium incredibilium primum nolunt isti, cum quibus agimus, credere; secundum coguntur et cernere; quod non inveniunt unde sit factum, si non credunt tertium. Resurrectio certe Christi, et in caelum cum carne in qua resurrexit ascensio, toto jam mundo praedicatur et creditur: si credibilis non est, unde toto terrarum orbe jam credita est? Si multi nobiles, sublimes, docti eam se vidisse dixerunt, et quod viderunt, diffamare curarunt, eis mundum credidisse non mirum est; sed istos adhuc credere nolle perdurum est: si autem, ut verum est, paucis, obscuris, minimis, indoctis eam se vidisse dicentibus et scribentibus credit mundus: cur pauci obstinatissimi, qui remanserunt, ipsi mundo jam credenti adhuc usque non credunt? Qui propterea numero exiguo ignobilium, infimorum, imperitorum hominum credidit, quia in tam contemptibilibus testibus multo mirabilius divinitas se ipsa persuasit. Eloquia namque persuadentium quae dicebant, mira fuerunt facta, non verba. Qui enim Christum in carne resurrexisse, et cum illa in caelum ascendisse non viderant, id se vidisse narrantibus, non loquentibus tantum, sed etiam mirifica facientibus signa credebant. Homines quippe, quos unius, vel ut multum, duarum linguarum fuisse noverant, repente linguis omnium gentium loquentes mirabiliter audiebant (*Act.* ii). Claudum ab uberibus matris ad eorum verbum in Christi nomine post quadraginta annos incolumem constitisse; sudaria de corporibus eorum ablata sanandis profuisse languentibus; in via qua fuerant transituri positos in ordine innumerabiles morbis variis laborantes, ut ambulantium super eos umbra transiret, continuo salutem solere recipere; et alia multa stupenda in Christi nomine per eos facta², postremo etiam mortuos resurrexisse cernebant (*ibid.* iii, iv). Quae si, ut leguntur, gesta esse concedant, ecce tot incredibilia tribus illis incredibilibus addimus; et ut credatur unum incredibile, quod de carnis resurrectione atque in caelum ascensione dicitur, multorum incredibilium testimonia tanta congerimus, et nondum ad credendum horrenda duritia incredulos flectimus. Si vero per Apostolos Christi, ut eis crederetur, resurrectionem atque ascensionem praedicantibus Christi, etiam ista miracula facta esse non

¹ Vind. Am. et Er., *si animus omnia haec terrena transcendens, per hoc etiam caelesti corpore praestabilior.* Et post octo versus, loco, *qui hoc quod videndo jam viluit*; idem editi ferunt, *quid hoc quod providentia Dei multo mirabilibus, quam illud quod ab istis non creditur, fecit?* minus apte et dissentientibus manuscriptis.

(a) Conf. Epist. 137, n. 11, prope fin.

¹ Nonnulli Mss. cum Vind. Am. Er., *infirmos*: et infra loco, *infimorum*, habent, *infirmorum*.

² Sic Mss. At Vind. Am. et Er., *facta sunt signa.* Lov., *facta signa*, omisso, sunt.

credunt; hoc nobis unum grande miraculum sufficit, quod eam terrarum orbis sine ullis miraculis credidit.

CAPUT VI. — *Quod Roma conditorem suum Romulum diligendo deum fecerit; Ecclesia autem Christum Deum¹ credendo dilexerit.*

1. Reclamamus etiam hoc loco illud quod de Romuli credita divinitate Tullius admiratur. Verba ejus ut scripta sunt, inseram: *Magis est, inquit, in Romulo admirandam, quod cæteri qui dii ex hominibus facti esse dicuntur, minus eruditibus hominum sæculis fuerunt, ut fingendi proclivior² esset ratio, cum imperii facile ad credendum impellerentur. Romuli autem ætatem minus his sexcentis annis (a) jam inveteratis litteris atque doctrinis, omnique³ illo antiquo ex inculta hominum vita errore sublato fuisse cernimus. Et paulo post de eodem Romulo ita loquitur, quod ad hunc pertinet sensum: Ex quo intelligi potest, inquit, permultis annis ante Homerum fuisse, quam Romulum, ut jam doctis hominibus ac temporibus ipsis eruditibus ad fingendum vix quidquam esset loci. Antiquitas enim recepit⁴ fabulas, factas etiam nonnunquam incondite: hæc ætas autem jam exculia præsertim eludens omne quod fieri non potest respuit (De Republica, libro 2, cap. 10 hinc suppleto).* Unus e numero doctissimorum hominum, idemque eloquentissimus omnium M. Tullius Cicero, propterea dicit divinitatem Romuli mirabiliter creditam, quod erudita jam tempora fuerunt, quæ falsitatem non reciperent fabularum. Quis autem Romulum deum nisi Roma credidit, atque id parva et incipiens? Tum deinde posteris servare fuerat necesse quod acceperant a majoribus, ut cum ista superstitione in lacte quodammodo matris ebibita cresceret civitas, atque ad tam magnum perveniret imperium, ut ex ejus fastigio velut ex altiore quodam loco alias quoque gentes, quibus dominaretur, hac sua opinione perfunderet; ut non quidem crederent, sed tamen dicerent deum Romulum, ne civitatem, cui serviebant, de conditore ejus offenderent, aliter eum nominando quam Roma; quæ id non amore quidem hujus erroris, sed tamen amoris errore crediderat. Christus autem quanquam sit cælestis et sempiternæ conditor civitatis, non tamen eum, quoniam ab illo condita est, Deum credidit: sed ideo potius est condenda, quia credidit. Roma conditorem suum jam constructa et dedicata tanquam deum coluit in templo: hæc autem Jerusalem conditorem suum Deum Christum, ut construi posset et dedicari, posuit in fidei fundamento. Illa illum amando

esse deum credidit, ista istum Deum esse credendo amavit. Sicut ergo præcessit unde amaret illa, et de amato jam libenter etiam falsum bonum crederet; ita præcessit unde ista crederet, ut recta fide, non temere quod falsum, sed quod verum erat amaret. Exceptis enim tot et tantis miraculis, quæ persuaserunt Deum esse Christum, prophetiæ quoque divini fide dignissimæ præcesserunt, quæ in illo, non sicut a patribus adhuc creduntur implendæ, sed jam demonstrantur impletæ. De Romulo autem quia condidit Romam, in eaque regnavit, auditor, legiturve quod factum est, non quod ante fuerat¹ prophetatum; sed quod sit receptus in deos, creditum tenent litteræ, non factum docent. Nullis quippe rerum mirabilium signis id ei vere provenisse monstratur. Lupa quippe illa nutrix², quod videtur quasi magnum exstitisse portentum, quale aut quantum est ad demonstrandum deum? Certe enim etsi non meretrix lupa fuit illa, sed bestia (a), cum commune fuerit ambobus, frater tamen ejus non habetur deus. Quis autem prohibitus est, aut Romulum, aut Herculem, aut alios tales homines deos dicere, et mori maluit, quam non dicere? Aut vero aliqua gentium coleret inter deos suos Romulum, nisi Romani nominis metus cogeret? Quis porro numeret, quam multi quantalibet sævitia crudelitatis occidi, quam Christum Deum negare maluerunt? Proinde metus quamlibet levis indignationis, quæ ab animis Romanorum, si non feret, posse putabatur existere, compellebat aliquas civitates positas sub jure Romano tanquam deum colere Romulum: a Christo autem Deo non solum colendo, verum etiam confitendo, tantam per orbem terræ martyrum multitudinem metus revocare non potuit, non levis offensionis animorum, sed immensarum variarumque poenarum³, et ipsius mortis, quæ plus cæteris formidatur. Neque tunc civitas Christi, quamvis adhuc peregrinaretur in terris, et haberet tamen magnorum agmina populorum, adversus impios persecutores suos pro temporali salute pugnavit; sed potius ut obtineret æternam, non repugnavit. Ligabantur, includebantur, cædebantur, torquebantur, urebantur, laniabantur, trucidabantur, et multiplicabantur. Non erat eis pro salute pugnare, nisi salutem pro Salvatore contemnere.

2. Scio in libro Ciceronis tertio, nisi fallor, de Republica, disputari, nullum bellum suscipi a civitate optima, nisi aut pro fide, aut pro salute. Quid autem dicat pro salute, vel intelligi quam salutem velit, alio loco demonstrans, *Sed his poenis, inquit, quas etiam stultissimi sentiunt, egestate, exsilio, vinculis, verberis-*

¹ In argumento hujus capituli sexti meliores manuscripti habent, *Ecclesia autem Christum Deum credendo dilexerit*; quod Patres Benedictini in textum recipi jusserunt. [*Ecclesia autem Christum Dominum credendo dilexerit.*]

² In Mss., *proclivis*.

³ In Mss., *omniumque*.

⁴ Nostri codices 253 et 258, *recepti*. M.

(a) Hoc non de se suisve temporibus Cicero, qui anno ab Urbe condita circiter septingentesimo scribebat; sed de Scipione Africano minore et Lælio dixit, quos disserentes in illis de Republica libris inducebat ex dictis supra, lib. 2, cap. 21. Porro Scipio floruisse fertur a sexcentesimo ad sexcentimum vigesimum annum Urbis conditæ, Lælius autem anno sexcentesimo septimo consulatum geassisse trahitur.

¹ Ex veteribus libris alii habent, *antequam fieret*; alii, *ante fieret*.

² Hic editi addunt, *fratrum duorum*. Et post tres versus, ad verba, *cum commune fuerit ambobus*, habent, *cum fratribus portentum commune fuerit ambobus*.

³ Editi Vind. Am. et Er. nulla freti veterum codicum auctoritate, *metus ullus aut error revocare non potuit, blanditiæ nullæ, promissio nulla demovet, sed nec facultatum violenta subtractio, nec acerbitas universarum variarumque poenarum*.

(a) Vide supra, lib. 18, cap. 34.

bus, elabuntur sæpe privati, oblata mortis celeritate. Civitatibus autem mors ipsa pœna est, quæ videtur a pœna singulas vindicare. Debet enim constituta sic esse civitas, ut æterna sit. Itaque nullus interitus est recipiendæ naturalis, ut hominis, in quo mors non modo necessaria est, verum etiam optanda persæpe. Civitas autem cum tollitur, deletur, exstinguitur: simile est quodammodo (ut parva magnis conferamus) ac si omnis hic mundus intereat et concidat. Hoc ideo dixit Cicero, quia mundum non interiturum cum Platonicis sentit. Constat ergo eum pro ea salute bellum voluisse suscipi a civitate, quia sit ut maneat hic civitas, sicut dicit, æterna, quamvis morientibus et nascentibus singulis; sicut perennis est opacitas oleæ vel lauri, atque huiusmodi cæterarum arborum, singulorum lapsu ortuque filiorum. Mors, quippe, ut dicit, non hominum singulorum sed universæ pœna est civitatis, quæ a pœna plerumque singulos vindicat. Unde merito quæritur, utrum recte fecerint Saguntini, quando universam suam civitatem interire maluerunt, quam fidem frangere, qua cum ipsa Romana republica tenebantur: in quo suo facta laudantur ab hominibus¹ terrenæ reipublicæ civibus (a). Sed quomodo huic disputationi possent obedire, non video, ubi dicitur nullum suscipiendum esse bellum, nisi aut pro fide, aut pro salute: nec dicitur, si in unum simul periculum ita duo ista concurrerint, ut teneri alterum sine alterius amissione non possit, quid sit potius eligendum. Profecto enim Saguntini si salutem eligerent, fides eis fuerat deserenda: si fides tenenda, amittenda utique salus, sicut et factum est. Salus autem civitatis Dei talis est, ut cum fide ac per fidem teneri, vel potius acquiri possit; fide autem perditâ, ad eam quisque venire non possit. Quæ cogitatio firmissimi ac patientissimi cordis, tot ac tantos martyres fecit, qualem ne unum quidem habuit, vel habere potuit, quando est deus creditus Romulus.

CAPUT VII. — *Quod ut mundus in Christum crederet, virtutis fuerit divinæ, non persuasionis humanæ.*

Sed valde ridiculum est, de Romuli falsa divinitate, cum de Christo loquimur, facere mentionem. Verumtamen cum sexcentis ferme annis ante Ciceronem (b) Romulus fuerit, atque illa ætas jam fuisse doctrinis dicatur exulta, ut quod fieri non potest, omne² respueret: quanto magis post sexcentos annos ipsius tempore Ciceronis, maximeque postea sub Augusto atque Tiberio, eruditioribus utique temporibus, resurrectionem carnis Christi atque in cœlum ascensionem, tanquam id quod fieri non potest, mens humana ferre non posset, eludensque ab auribus cordibusque respueret, nisi eam fieri potuisse, atque factam esse divinitas ipsius veritatis, vel divinitatis veritas, et contestantia miraculorum

¹ Vind. Am. Er. et prope omnes manuscripti, ab omnibus.

² Editi, omne eludens. Abest, eludens, a manuscriptis.

(a) Vide supra, lib. 3, cap. 20.

(b) Ludovicus Vives legendum putat, ante scipionem, nempe Æmilianum, qui inducitur disserens in libris de Republica. Lovanienses ejus conjecturam secuti locum emendare tentant, sed repugnantis editis aliis et omnibus manuscriptis.

signa monstrarent; ut terrentibus et contradicentibus tam multis tamque magnis persecutionibus, præcedens in Christo, deinde ad novum sæculum in cæteris seculura resurrectio atque immortalitas carnis et fidelissimo crederetur, et prædicaretur intrepide, et per orbem terræ pullulatura secundius cum martyrum sanguine sereretur. Legebantur enim præconia præcedentia¹ Prophetarum, concurrebant ostenta virtutum, et persuadebatur veritas nova consuetudini, non contraria rationi, donec orbis terræ qui persequebatur furore, sequeretur fide².

CAPUT VIII. — *De miraculis quæ ut mundus in Christum crederet facta sunt, et fieri mundo credente non desinunt.*

1. Cur, inquit, nunc illa miracula, quæ prædicatis facta esse, non fiunt? Possem quidem dicere, necessaria fuisse priusquam crederet mundus, ad hoc ut crederet mundus. Quisquis adhuc prodigia ut credat inquiri, magnum est ipse prodigium, qui mundo credente non credit. Verum hoc ideo dicat, ut nec tunc illa miracula facta fuisse credantur. Unde ergo tanta fide Christus usqueque cantatur in cœlum cum carne sublatus? unde temporibus eruditiss, et omne quod fieri non potest respicientibus, sine ullis miraculis nimium mirabiliter incredibilia credidit mundus? An forte credibilia fuisse, et ideo credita esse dicturi sunt? Cur ergo ipsi non credunt? Brevis est igitur nostra complexio: Aut incredibilis rei³, quæ non videbatur, alia incredibilia, quæ tamen fiebant et videbantur, fecerunt fidem; aut certe res ita credibilis, ut nullis quibus persuaderetur miraculis indigeret, istorum nimiam redarguit infidelitatem. Hoc ad refellendos vanissimos dixerim. Nam facta esse multa miracula, quæ attestarentur illi vni grandi salubrique miraculo, quo Christus in cœlum cum carne in qua resurrexit, ascendit, negare non possumus. In eisdem quippe veracissimis Libris cuncta conscripta sunt, et quæ facta sunt, et propter quod credendum facta sunt. Hæc, ut fidem facerent, innotuerunt; hæc per fidem, quam fecerunt, multo clarior innotescunt. Leguntur quippe in populis, ut credantur; nec in populis tamen nisi credita legentur. Nam etiam nunc fiunt miracula in ejus nomine, sive per sacramenta ejus, sive per orationes vel memorias sanctorum ejus; sed non eadem claritate illustrantur, ut tanta quanta illa gloria diffamantur. Canon quippe sacrarum Litterarum, quæ definitum⁴ esse oportebat, illa facit ubique recitari, et memoriæ cunctorum inherere populorum: hæc autem ubicumque fiunt, ibi sciuntur vix a tota ipsa civitate vel quocumque commanentium loco. Nam plerumque etiam ibi paucissimi sciunt, ignorantibus cæteris, maxime si magna sit civitas; et quando alibi aliisque narrantur, non tanta ea commendat auctoritas, ut sine difficultate vel dubitatione credantur,

¹ Vind. Am. Er. et plures Mss., præcedentium

² Ita veteres libri. Editi autem, prosequeretur fide.

³ Sic Mss. At editi, incredibili rei.

⁴ Editi, veteribus libris dissentientes, diffamatum.

quamvis Christianis fidelibus a fidelibus indicentur.

2. Miraculum quod Mediolani factum est, cum illic essemus, quando illuminatus est cæcus, ad multorum notitiam potuit pervenire, quia et grandis est civitas, et ibi erat tunc Imperator, et immenso populo teste res gesta est, concurrente ad corpora martyrum Protasii et Gervasii : quæ cum laterent, et penitus nescirentur, episcopo Ambrosio per somnium revelata reperta sunt ; ubi cæcus ille de pulsatis veteribus tenebris diem vidit (a).

3. Apud Carthaginem autem quis novit, præter admodum paucissimos, salutem, quæ facta est Innocentio ex advocato vicariæ præfecturæ, ubi nos interfuimus, et oculis aspeximus nostris? Venientes enim de transmarinis, me et fratrem meum Alypium (b), nondum quidem clericos, sed jam Deo servientes, ut erat cum tota domo sua religiosissimus, ipse susceperat, et apud eum tunc habitabimus. Curabatur a medicis : fistulas ¹, quas numerosas atque perplexas habuit in posteriore atque ima corporis parte, jam secuerant ei, et artis suæ cætera medicamentis agebant. Passus autem fuerat in sectione illa et diuturnos et acerbos dolores. Sed unus inter multos sinus sefellerat medicos, atque ita latuerat, ut eum non tangerent, quem ferro aperire debuerant. Denique sanatis omnibus quæ aperta curabant, iste remanserat solus, cui frustra impendebatur labor. Quas moras ille suspectas habens, multumque formidans ne iterum secaretur, quod ei prædixerat alius medicus domesticus ejus, quem non admiserant illi, ut saltem videret, cum primum sectus est, quomodo id facerent, iratusque illum domo abjecerat, vixque receperat, erupit, atque ait : Iterum me secturi estis? Ad illius, quem noluistis esse præsentem, verba venturus sum? Irridere illi medicum imperium, metumque hominis bonis verbis promissionibusque lenire. Præterierunt et alii dies plurimi, nihilque proficiebat omne quod fiebat. Medici tamen in sua pollicitatione persistebant, non se illum sinum ferro, sed medicamentis esse clausuros. Adhibuerunt et alium grandævum jam medicum, satisque in illa arte laudatum (adhuc enim vivebat) Ammonium ², qui loco inspecto, idem quod illi ex eorum diligentia peritiamque promisit. Cujus ille factus auctoritate securus, domestico suo medico, qui futuram prædixerat aliam sectionem faceta hilaritate, velut jam salvus, illusit. Quid plura? Tot dies postea inaniter consumpti transierunt, ut fessi atque confusi faterentur eum nisi ferro nullo modo posse sanari. Expavit, expalluit nimio timore turbatus : atque ubi se collegit, farique potuit, abire illos jussit, et ad se amplius non accedere, nec aliud occurrit fatigato lacrymis et illa jam

¹ Editi, *Curabatur a medicis propter fistulas* : et infra, *jam secuerant eum*. At manuscripti omnes omittunt, *propter* ; et ex his quidam habent, *jam secuerant ei* ; alii longe plures, *eum*.

² Editi, *Ammonium dico, qui*, etc. At Mss. non habent, *dico*. (a) Conf. lib. 9, Confess., cap. 7, n. 16 ; serm. 318, n. 1 ; lib. 1 Retract., cap. 13, n. 7, et alibi.

(b) Alypius, S. Augustini amicus, Tagasta oriundus, de quo in Confessionibus, lib. 6, capp. 10 et 12 ; lib. 8, cap. 12, et passim in Epistolis. LARCHEA.

necessitate constricto, nisi ut adhiberet Alexandrinum quemdam, qui tunc chirurgus mirabilis habebatur, ut ipse faceret quod ab illis fieri volebat iratus. Sed posteaquam venit ille, laboremque illorum in cicatricibus sicut artifex vidit, boni viri functus officio, persuasit homini ut illi potius qui in eo tantum laboraverant, quantum ipse inspiciens mirabatur, curationis suæ sine fruerentur, adjiciens quod revera nisi sectus esset, salvus esse non posset ; sed valde abhorrere a suis moribus, ut hominibus quorum artificiosissimam operam, industriam, diligentiam admirans in cicatricibus ejus videret, propter exiguum quod remansit, palmam tanti laboris auferret. Redditi sunt animo ejus, et placuit ut eodem Alexandrino assistente ipsi sinum illum ferro, qui jam consensu omnium aliter insanabilis putabatur, aperirent. Quæ res dilata est in consequentem diem. Sed cum abissent illi, ex mœrore nimio domini tantus est in domo illa exortus dolor, ut tanquam funeris planctus vix comprimeretur a nobis. Visitabant eum quotidie sancti viri, episcopus tunc Uzalensis (a), beatæ memoriæ Saturninus, et presbyter Gelosus ¹, ac diaconi Carthaginensis Ecclesiæ : in quibus erat, et ex quibus solus est nunc in rebus humanis, jam episcopus cum honore a nobis debito nominandus Aurelius, cum quo recordantes mirabilia opera Dei ², de hac re sæpe colloqui sumus, eumque valde meminisse, quod commemoramus, invenimus. Qui cum eum, sicut solebant, vespere visitarent, rogavit eos miserabilibus lacrymis, ut mane dignarentur esse præsentibus suo funeri potius quam dolori. Tantis enim eum metus ex prioribus invaserat pœnis, ut se inter medicorum manus non dubitaret esse moriturum. Consolati sunt eum illi, et hortati ut in Deo fideret, ejusque voluntatem viriliter ferret. Inde ad orationem ingressi sumus : ubi nobis ex more genua figentibus, atque incumbentibus terræ, ille se ita projecit, tanquam fuisset aliquo graviter impellente prostratus, et cœpit orare : quibus modis, quo affectu, quo motu animi, quo fluvio lacrymarum, quibus gemitibus atque singultibus succutientibus omnia membra ejus et pene intercludentibus spiritum, quis ullis explicet verbis? Utrum orarent alii, nec in hæc eorum averteretur intentio, nesciebam. Ego tamen prorsus orare non poteram : hoc tantummodo breviter in corde meo dixi, Domine, quas tuorum preces exaudis, si has non exaudis? Nihil enim mihi videbatur addi jam posse, nisi ut exspiraret orando. Surreximus, et accepta ab Episcopo benedictione discessimus ; rogante illo ut mane adessent, illis ut æquo animo esset hortantibus. Illuxit dies qui metuebatur, aderant servi Dei, sicut se adfuturos esse promiserant : ingressi sunt medici, parantur omnia quæ hora illa poscebat, tremenda ferramenta proferuntur, attonitis suspensisque omnibus. Eis autem quorum erat major auctoritas, defectum animi ejus consolando erigentibus, ad manus

¹ Plerique Mss., *Gulosus*.

² Plerique Mss., *mirabilia operum Dei*.

(a) Infra, n. 31.

secturi membra in lectulo componuntur, solvuntur nodi ligamentorum, nudatur locus, inspicit medicus, et secundum illum sinum armatus atque intentus inquirat. Scrutatur oculis, digitisque contrectat; tentat denique modis omnibus: invenit firmissimam cicatricem. Jam illa lætitia et laus atque gratiarum actio misericordii et omnipotenti Deo, quæ fusa est ore omnium lacrymantibus gaudiis, non est committenda meis verbis: cogitetur potius, quam dicatur.

3. In eadem Carthagine Innocentia, religiosissima femina, de primariis ipsius civitatis, in mamilla cancerum habebat: rem, sicut medici dicunt, nullis medicamentis sanabilem (a). Aut ergo præcidi solet, et a corpore separari membrum ubi nascitur; aut, ut aliquanto homo diutius vivat, tamen inde morte quamlibet tardius ad futura, secundum Hippocratis, ut ferunt, sententiam¹ (*Aphorism. sect. 6, aph. 38*) omnis est omittenda curatio. Hoc illa a perito medico et suæ domui familiarissimo acceperat, et ad solum Deum se orando converterat. Admonetur in somnis appropinquante Pascha, ut in parte feminarum observanti ad baptisterium (b), quæcumque illi baptizata primitus occurrisset, signaret ei locum signo Christi²: fecit, et confestim sanitas consecuta est. Medicus sane qui ei dixerat, ut nihil curationis adhiberet, si paulo diutius vellet vivere, cum inspexisset eam postea, et sanissimam comperisset, quam prius habere illud malum tali inspectione cognoverat, quæsit ab ea vehementer quid adhibuisset³; cupiens, quantum intelligi datur, nosse medicamentum, quo Hippocratis definitio vinceretur. Cumque ab ea quid factum esset audisset, voce velut contemnentis et vultu, ita ut illa metuere ne aliquid contumeliosum verbum proferret in Christum, religiosa urbanitate respondisse fertur: Putabam, inquit, magnum aliquid te mihi fuisse dicturam. Atque illa jam exhorrescente, mox addidit: Quid grande fecit Christus sanare cancerum, qui quadriduam mortuum suscitavit (*Joan. xi*)? Hoc ego cum audissem, et vehementer stomacharer, in illa civitate atque in illa persona, non utique obscura, factum tam ingens miraculum sic latere, hinc eam et admonendam et pene objurgandam putavi. Quæ cum mihi respondisset non se inde tacuisse, quæ-

¹ Ita manuscripti. At editi Vind. Am. Er., aut, ut aliquanto homo quietius vivat, fomentis e. t. pestis mitiganda frequentibus. Nam ut inde mortem quantumlibet tardius ad futuram confidamus, secundum Hippocratis, ut fertur, sententiam. Editio Lov., aut, ut aliquanto homo diutius vivat, nam inde mortem quantumlibet tardius ad futuram, secundum Hippocratis, ut fertur, sententiam.

² Vind. Am. et Fr., signo crucis Christi.

³ Editi, quid adhibuisset curationis. Abest, curanoms, a manuscriptis.

(a) Nimirum quando cancer ille invaluerit et perfectus fuerit. Lege Galenum, Therapeuticon ad Glauconem lib. 2, cap. 10. *COCCÆUS*.

(b) Tempora antiquitus Baptismo præscripta extra necessitatem fuisse Pascha et Pentecosten, constat ex Tertulliano, libro de Baptismo, cap. 19: qui, « Diem, » inquit, « Baptismo solemniorum Pascha præstat, cum et passio « Domini, in qua tingimur, adimpleta est. Exinde Pentecostæ » (« id est, ut loquitur in h.oro de Corona militis, cap. 3, « a die Paschæ usque ad Pentecosten ») « ordinandis « lavacris latissimum spatium est: quo et Domini resurre- « ctio inter Discipulos frequentata est, et gratia Spiritus « sancti dedicata. *COCCÆUS*.

sivi ab eis, quas forte tunc matronas amicissimas secum habebat, utrum hoc antea scissent. Responderunt se omnino nescisse. Ecce, inquam, quomodo non taces, ut nec istæ audiant, quæ tibi tanta familiaritate junguntur. Et quia breviter ab ea quæsieram, feci ut illis audientibus multumque mirantibus et glorificantibus Deum, totum ex ordine, quemadmodum gestum fuerit, indicaret.

4. Medicum¹ quemdam podagram in eadem urbe, qui cum dedisset nomen ad Baptismum, et pridie quam baptizaretur, in somnis a pueris nigris cirratis², quos intelligebat dæmones, baptizari eodem anno prohibitus fuisset, eisque non obtemperans, etiam conculcantibus pedes ejus in dolorem acerrimum, qualem nunquam expertus est, isset³, magisque eos vincens lavacro regenerationis, ut voverat, ablui non distulisset, in Baptismate ipso non solum dolore, quo ultra solitum cruciabatur, verum etiam podagra caruisse, nec amplius, cum diu postea vixisset, pedes doluisse quis novit? Nos tamen novimus, et paucissimi fratres ad quos id potuit pervenire.

5. Ex mimo⁴ quidam Curubitanus, non solum a paralyti, verum etiam ab infirmi pondere genitalium, cum baptizaretur, salvus effectus est; et liberatus utraque molestia, tanquam mali nihil habuisset in corpore, de fonte regenerationis ascendit. Quis hoc præter Curubim novit, et præter rarissimos aliquos qui hoc ubicumque audire potuerunt? Nos autem cum hoc comperissemus, jubente sancto episcopo Aurelio, etiam ut veniret Carthaginem fecimus: quamvis a talibus prius audierimus, de quorum fide dubitare non possemus.

6. Vir tribunitius Hesperius apud⁵ nos est; habet in territorio Fussalensi fundum Zubedi⁶ appellatum: ubi cum afflictione animalium et servorum suorum domum suam spirituum malignorum vim noxiam perpeti comperisset, rogavit nostros, me absente, presbyteros, ut aliquis eorum illo pergeret, cujus orationibus cederent. Perrexit unus, obtulit tibi sacrificium corporis Christi, orans quantum potuit, ut cessaret illa vexatio: Deo protinus miserante cessavit. Acceperat autem ab amico suo terram sanctam de Jerusalem allatam, ubi sepultus Christus die tertio surrexit; eamque suspenderat in cubiculo suo, ne quid mali etiam ipse pateretur. At ubi domus ejus ab illa infestatione purgata est, quid de illa terra fieret, cogitabat; quam diutius in cubiculo suo reverentiæ causa habere volebat. Forte accidit, ut ego et collega tunc meus episcopus Sinitensis⁷ ecclesie

¹ Vind. Am. Er. et quinque Mss. præbent, *Medicum*.

² Vind. Am. Er., *curatis*. At Lov. et manuscripti, *cirratis*, id est, cirritis: nam cirros capitis crines interpretatur Nonnius. Martialis, lib. 9, epigr. 30:

Nec matutini cirrata caterva magistri.

³ Vind. Am. et aliquot Mss., *æstuasset*.

⁴ Editi pro, *Ex mimo*, habent, *E vicino*: idque superiori- bus ita conjunctum, *ad quos id potuit pervenire e vicino*.

⁵ Editi, *qui apud*. Abest, *qui*, a Mss.

⁶ Er., *Cubedi*. Quatuor Mss., *Zabedi*. Cæteri, *Zubedi* appellatur.

⁷ Apud Am. Er. et Lov., *Synicensis*. Vind., *Synistensis*. At Mss., *Sinitensis*. Vide Epistolam 23, cum nota quæ de hoc verbo ibidem tractat.

Maximianus, in proximo caecus : et venimus rogavit, et venimus. Cumque nobis omnia retulisset, etiam hoc petivit, ut infoderetur alicubi, atque ibi orationum locus fieret, ubi etiam possent Christiani ad celebranda quæ Dei sunt congregari. Non restitimus : factum est. Erat ibi juvenis paralyticus rusticanus : hoc audito petivit a parentibus suis, ut illum ad eum locum sanctum non cunctanter afferrent. Quo cum fuisset allatus, oravit, atque inde continuo pedibus suis salvus abscessit.

7. Victoriana dicitur villa, ab Hipponense-Regio minus triginta millibus abest. Memoria martyrum ibi est Mediolanensium Protasii et Gervasii. Portatus est eo quidam adolescens, qui cum die medio tempore ætatis equum ablueret in fluminis gurgite, dæmonem incurrit. Ibi cum jaceret vel morti proximus, vel simillimus mortuo, ad vespertinos illuc hymnos et orationes cum ancillis suis et quibusdam sanctimonialibus ex more domini possessionis intravit; atque hymnos cantare cœperunt. Qua voce ille quasi percussus, excussus est : et cum terribili fremitu altare apprehensum movere non audens sive non valens, tanquam eo fuerit alligatus, aut affixus, tenebat : et cum grandi ejulatu parci sibi rogans, confitebatur ubi adolescentem, et quando, et quomodo invaserit. Postremo se exiturum esse denuntiavit, membra ejus singula nominabat, quæ se amputaturum exiens minabatur : atque inter hæc verba discessit ab homine. Sed oculus ejus in maxillam fusus, tenui venula ab interiore quasi radice pendebat, totumque ejus medium, quod nigellum fuerat, albicaverat. Quo viso qui aderant (concurrerant autem etiam alii vocibus ejus acciti, et se omnes in orationem pro illo straverant), quamvis eum sana mente stare gauderent, rursus tamen propter oculum ejus contristati, medicum quærendum esse dicebant. Ibi maritus sororis ejus, qui eum illo detulerat, Potens est, inquit Deus, sanctorum orationibus, qui fugavit dæmonem, lumen reddere. Tunc, sicut potuit, oculum lapsum atque pendentem, loco suo revocatum ligavit orario (a) : nec nisi post septem dies putavit esse solvendum. Quod cum fecisset, sanissimum invenit (b). Sanati sunt illic et alii, de quibus dicere longum est.

8. Hipponensem quamdam virginem scio, cum se oleo perunxisset, cui pro illa orans presbyter instillaverat lacrymas suas, mox a dæmonio fuisse sanatum. Scio etiam episcopum semel pro adolescente, quem non vidit, orasse, illumque illic dæmone caruisse.

9. Erat quidam senex Florentius Hipponensis noster, homo religiosus et pauper; sartoris se arte pascebat, casulam perdiderat, et unde sibi emeret non habebat : ad Viginthi Martyres, quorum memoria apud nos est celeberrima (c), clara voce, ut vestiretur, oravit. Audierunt eum adolescentes, qui forte ad-

(a) Orarium hoc loco sudarium est, sive linteum tergendæ ori paratum. Hieronymus in Epist. ad Nepotianum : « Plenum dedecoris est refero marsupio, quod sudarium orariumque non habeas gloriari. »

(b) Simillimam historiam de Joanne Chuzibite habes apud Evagrium, Historiæ ecclesiasticæ libro 4, cap. 7, Coccoæus.

(c) Confer sermonem 323, in eorum natali habitum.

erant, fratres; eumque discedentem exagitantem prosequerentur; quasi a Martyribus quinquagenos folles (a), unde vestimentum emeret, petivisset. At ille tacitus ambulans, ejectum grandem piscem palpitantem vidit in littore, eumque illis faventibus atque adjuvantibus apprehendit, et cuidam coquo Cateso nomine, bene christiano, ad coquinam conditariam, indicans quid gestam sit, trecentis follibus vendidit, lanam comparare inde disponens, ut uxorem ejus quomodo posset, ei quo indueretur, efficeret. Sed coquus concidens piscem, anulum aureum in ventriculo ejus invenit, moxque miseratione flexus, et religione perterritus, homini eum reddidit, dicens, Ecce quomodo Viginthi Martyres te vestierunt.

10. Ad Aquas-Tibitianas (b) episcopo afferente Præjecto reliquias martyris gloriosissimi Stephani, ad ejus memoriam veniebat magnæ multitudinis concursus et occursum. Ibi cæca mulier, ut ad episcopum portantem duceretur, oravit : flores quos ferebat dedit; recepit, oculis admovit, protinus vidit. Stupentibus qui aderant, præibat exultans, viam carpens, et viæ ducem ulterius non requirens.

11. Memorati memoriam martyris, quæ posita est in castello Sinitensi, quod Hipponensi colonie vicinum est, ejusdem loci Lucillus episcopus, populo præcedente atque sequente portabat. Fistula, cujus molestia jam diu laboraverat, et familiarissimi sui medici, qui eam secaret, opperiebatur manus, illius piæ sarcinæ vectatione repente sanata est : nam deinceps eam in suo corpore non invenit.

12. Eucharius est presbyter ex Hispania, Calamæ habitat (c), veteri morbo calculi laborabat; per memoriam supradicti martyris, quam Possidius illo advexit episcopus (d), salvus factus est. Idem ipse postea morbo alio prævalente, mortuus sic jacebat, ut ei jam pollices ligarentur : opitulatione memorati martyris, cum de memoria ejus reportata fuisset et super jacentis corpus missa ipsius presbyteri tunica, suscitatus est.

13. Fuit ibi vir in ordine suo primarius, nomine Martialis, ævo jam gravis, et multum a religione abhorrens christiana. Habebat sane fidelem filiam, et

¹ Vind. Am. Er. et aliquot manuscripti, quasi qui.

² Sic Mss. At Editi Vind. Am., *Cartoso*. Er. et Lov., *Carthoso*.

³ Editi Vind. Er. et Lov., *Projecto*. Veteres libri, *Præjecto*.

⁴ Editi, *portantem pignora sacra duceretur*. Absuul, *pignora sacra*, a Mss.

⁵ Mss., *qui eum secaret*. Paulo post, ante, *repente sanata est*, addunt Vind. Am. et Er., *ubi sanctas alligavit reliquias* : quod non est in Lov. nec in manuscriptis.

⁶ Ita veteres libri. At editi omittunt, *est* : et loco, *habitat*, ferunt, *habitans*.

⁷ Vind. Am. Er. et Mss., *Chalamæ*.

(a) *Folles* dicti nummi a sacculo, quo conduntur : genus monetæ est alias æreæ, alias argentæ. Porro folles accipiendi istic, non argentæ, sed ærei, ejusdem fere valoris atque asses et solidi monetæ nostræ Gallicanæ, ut putat Sirmundus ad sermonem 389, qui alias 40 inter Sirmundianos. Suidas autem follem obolum esse dicit, ad voces græcas *Pholleis* et *Kermaia*. Nominantur præterea folles in lib. 3 contra Cresconium, n. 33, necnon lib. 1 Evodii de Miraculis S. Stephani, cap. 14, in hujus *ævi* Appendice.

(b) Tibilli urbis meminit Epist. 112.

(c) De Calama vid. not. supra ad lib. 14, cap. 24, r. 2.

(d) Infra, n. 20.

generum eodem anno baptizatum. Qui cum eum ægotantem multis et magnis lacrymis ¹ rogarent, ut christianus fieret, prorsus abnuvit, eosque a se turbida indignatione submovit. Visum est genero ejus, ut iret ad memoriam sancti Stephani, et illic pro eo quantum posset oraret, ut Deus illi daret mentem bonam, qua credere non differret in Christum. Fecit hoc ingenti gemitu et fletu, et sinceriter ardente pietatis affectu: deinde abscedens, aliquid de altari florum, quod occurrit, tulit; eique, cum jam nix esset, ad caput posuit: tam dormitum est. Et ecce ante diluculum clamat, ut ad episcopum curreretur, qui mecum forte tunc erat apud Hipponem. Cum ergo audisset eum absentem, venire presbyteros postalavit. Venerunt, credere se dixit, admirantibus atque gaudentibus omnibus, baptizatus est. Hoc ², quamdiu vixit, in ore habebat: Christe, accipe spiritum meum: cum hæc verba beatissimi Stephani, quando lapidatus est a Judæis, ultima fuisse (*Act. vii, 58*) nesciret; quæ huic quoque ultima fuerunt: nam non multo post etiam ipse defunctus est.

14. Sanati sunt illic per eundem martyrem etiam podagri duo, unus civis, peregrinus unus; sed civis ³ omni modo: peregrinus autem per revelationem quid adhiberet quando doleret, audivit; et cum hoc fecerit, dolor continuo conquiescit.

15. Audurus nomen est fondi, ubi ecclesia est, et in ea memoria Stephani martyris. Puerum quemdam parvulum, cum in area luderet, exorbitantes boves qui vehiculum traherent, rota obriverunt, et confestim palpitavit exspirans. Hunc mater arreptum ad eandem memoriam posuit; et non solum revixit, verum etiam illæsus apparuit.

16. Sanctimonialis quedam in vicina possessione, quæ Caspaliana dicitur, cum ægritudine laboraret, ac desperaretur, ad eandem memoriam tunica ejus allata est: quæ antequam revocaretur, illa defuncta est. Hac tamen tunica operuerunt cadaver ejus parentes, et recepto spiritu salva facta est.

17. Apud Hipponem Bassus quidam Syrus ad memoriam ejusdem martyris orabat pro ægotante et periclitante filia, eoque secum vestem ejus attulerat: cum ecce pueri de domo cucurrerunt, qui ei mortuam nuntiarent. Sed cum, orante illo, ab amicis ejus exciperentur, prohibuerunt eos illi dicere, ne per publicum plangeret. Qui cum domum redisset jam suorum ejulatibus personantem, et vestem filia quam ferebat, super eam projecisset, reddita est vitæ.

18. Rursus ibidem apud nos Irenæi, cujusdam collectorii filius, ægritudine extinctus est. Cumque corpus jaceret exanime, atque a lugentibus et lamentantibus exsequiæ pararentur, amicorum ejus quidam inter aliorum consolantium verba suggestit, ut ejusdem martyris oleo corpus perungeretur. Factum est, et revixit.

¹ Editi, et magnis precibus et lacrymis. At manuscripti carent, precibus et.

² Sola editio Lov., Sic.

³ Vind. Am. Er., tres podagrici, duo cives, peregrinus unus. Sed cives, etc.

19. Itemque apud nos vir tribenitius Eleusinus ⁴ super memoriam Martyris ², quæ in suburbano ejus est, ægritudine exanimatum posuit infantulum filium: et post orationem, quam cum multis lacrymis ibi fudit, viventem levavit.

20. Quid faciam? Urget hujus operis implendi ³ promissio, ut non hic possim omnia commemorare quæ scio: et procul dabo plerique nostrorum, cum hæc legent, dolerunt me tam multa prætermisisse, quæ utique mecum sciunt. Quos jam nunc, ut ignorent, rogo; et cogitent quam prolixi laboris sit facere, quod me hic non facere suscepti operis necessitas cogit. Si enim miracula sanitarum, ut alia taceam, ea tantummodo velim scribere, quæ per hanc martyrem, id est, gloriosissimum Stephanum, facta sunt in colonia Calamensi, et in nostra, plurimi conficiendi sunt libri: nec tamen omnia colligi poterunt, sed tantum de quibus libelli dati sunt, qui recitarentur in populis. Id namque fieri voluimus, cum videremus antiquis similia divinarum signa virtutum etiam nostris temporibus frequentari; et ea non dehero multorum notitiæ deperire. Nondum est autem biennium, ex quo apud Hipponem Regium cœpit esse ista memoria (a), et multis, quod nobis certissimum est, non datis libellis, de iis quæ mirabiliter facta sunt, illi ipsi qui dati sunt ad septuaginta ferme numerum pervenerant, quando ista conscripsi. Calamæ vero, ubi et ipsa memoria prius esse cœpit, et crebrius dantur, incomparabili ⁴ multitudine superant.

21. Uzali etiam, quæ colonia Uticæ vicina est, multa præclara per eundem Martyrem facta cognovimus: cujus ibi memoria longe prius quam apud nos, ab episcopo Evodio constituta est. Sed libellorum dandorum ibi consuetudo non est, vel potius non fuit: nam fortasse nunc esse jam cœpit. Cum enim nuper illic essemus, Petroniam, clarissimam feminam, quæ ibi mirabiliter ex magno atque diuturno, in quo medicorum adjutoria cuncta defecerant, languore sanata est, hortati sumus volente supradicto

¹ Nonnulli Mss., Eleusinus.

² Vind. Am. Er. et plures manuscripti, martyrum.

³ Vind. Am. Er. et Mss., implenda.

⁴ Sola editio Lov., incredibili.

(a) Hinc vero intelligimus scriptum hunc librum sub finem anni 436, aut non multo serius. Nam exstabat jam Hipponem ista Stephani martyris memoria, cum illud ibi contigit, quod mox referendum est, in Pauli et Palladiæ curatione miraculum. Ea autem curatio pertinet ad annum 425, quod quidem hac ratione deprehenditur. In libello suo, qui Sermone Augustini 322 continetur, testator Paulus se ac sororem Palladium « visione kalendarum januarium die « admonitos » divinitus fuisse, ut Hipponem irent, ibique fore ut sanitatem « intra tertium mensem » reciperent, id est, intra mensem martium. Paulus porro sanitatem ipso die dominico Paschæ, soror vero ipsius ex dominico Paschæ die tertio recuperasse hic narratur. Atqui Pascha ab anno 418, quo reliquæ Stephani martyris in Palestina detectæ sunt, usque ad 427, quo Vandali Africam occuparunt, non incidit in mensem martium nisi forte anno 425, quo festum Paschæ diei Bochartus a Latinis nonnullis die 22 martii celebratum: tamen ex litteræ Dominicalis observatione occurrere debuisset die 19 aprilis, sicut ad prædictum Sermonem 322 notavimus. De Stephani martyris revelatione et de ipsius miraculis scripta Aviti, Luciani Severi et Evodii nomine vulgata exhibentur in septimi hujus tomii Appendice.

loci episcopo, ut libellum daret, qui reciteretur in populo; et obedientissime paruit (a). In quo posuit etiam, quod hic reticere non possum, quamvis ad ea quæ hoc opus urgent, festinare compellar. A quodam Judæo dixit sibi fuisse persuasum, ut annulum capitulatio cingulo¹ insereret, quod sub omni veste ad nuda corporis cingeretur: qui annulus haberet sub gemma lapidem in renibus inventum bovis. Hoc alligata quasi remedio ad sancti Martyris limina veniebat. Sed profecta a Carthagine, cum in confinio fluminis Bagradæ in sua possessione mansisset, surgens ut iter perageret, ante pedes suos illum jacentem annulum vidit, et capitulationem zonam qua fuerat alligatus, mirata tentavit. Quam cum omnino suis nodis firmissimis, sicut fuerat, comperisset adstrictam, crepuisse atque exsiluisse anulum suspicata est: qui etiam ipse cum integerrimus fuisset inventus, futuræ salutis quodammodo pignus de tanto miraculo se accepisse præsumpsit, atque illud vinculum (b) solvens, simul cum eodem annulo, projecit in flumen. Non credunt² hoc, qui etiam Dominum Jesum per integra virginalia matris enixum, et ad discipulos ostiis clausis ingressum fuisse non credunt: sed hoc certe quærant, et, si verum invenerint, illa credant. Clarissima femina est, nobiliter nata, nobiliter nupta, Carthagini habitat: ampla civitas, ampla personam quærentes latere non sinit. Martyr certe ipse, quo impetrante illa sanata est, in Filium permanentis virginis credidit, in eum qui ostiis clausis ad discipulos ingressus est, credidit: postremo, propter quod omnia ista dicuntur a nobis, in eum qui ascendit in cælum cum carne, in qua resurrexerat, credidit; et ideo per eum tanta sunt, quia pro ista fide animam posuit. Fiant ergo etiam nunc multa miracula, eodem Deo faciente per quos vult, et quemadmodum vult, qui et illa quæ legimus fecit: sed ista nec similiter innolescunt, neque, ut non excidant³ animo, quasi glareæ memoriæ, crebra lectione tunduntur. Nam et ubi diligentia est, quæ nunc apud nos esse cœpit, ut libelli eorum qui beneficia percipiunt, recitentur in populo, semel hoc audiunt qui adsunt, pluresque non adsunt, ut nec illi qui adfuerunt, post aliquot dies, quod audierunt, mente retineant, et vix quisquam⁴ reperitur illorum, qui ei quem non adfuisse cognoverit, indicet quod audivit.

22. Unum est apud nos factum, non majus quam illa quæ dixi, sed tam clarum atque illustre miraculum, ut nullum arbitrer esse Hipponensium, qui hoc non vel viderit, vel didicerit, nullum qui oblivisci ulla ratione potuerit. Decem quidam fratres (quorum septem sunt mares, tres feminæ) de Cæsarea Cappadociæ suorum civium non ignobiles, maledicto matris recentis, patris eorum obitu destitutæ, quæ inju-

riam sibi ab eis factam acerbitate talia, tali poena sunt divinitus coerciti, ut horribiliter quaterentur omnes tremere membrorum: in qua foedissima specie oculos suorum civium non ferentes, quaquaversum omniq; ire visam est, toto pene vagabantur orbe Romano. Ex his etiam ad nos venerunt duo, frater et soror, Paulus et Palladia, multis aliis locis misera diffamante jam cogniti. Venerunt autem ante Pascha ferme dies quindecim, ecclesiam quotidie, et in ea memoriam gloriosissimi Stephani frequentabant, orantes ut jam sibi placaretur Deus, et salutem christianam redderet. Et illic, et quocumque¹ ibant, convertebant in se civitatis aspectum. Nonnulli qui eos alibi viderant, causamque tremoris eorum noverant, aliis, ut cuique poterant, indicabant. Venit et Pascha, atque ipso die dominico mane, cum jam frequens populus præsens esset, et loci sancti cancellos, ubi martyrium erat², idem juvenis orans teneret, repente prostratus est, et dormienti similis jacuit: non tamen tremens, sicut etiam per somnum³ solebat. Stupentibus qui aderant, atque aliis paventibus, aliis dolentibus, cum eum quidam vellet erigere, nonnulli prohibuerunt, et potius exitum expectandum esse dixerunt. Et ecce surrexit, et non tremebat, quoniam sanatus erat, et stabat incolumis, intuens intuentes. Quis ergo se tenuit a laudibus Dei? Clamantium gratulantiumque vocibus ecclesia usquequaque completa est. Inde ad me curritur, ubi sedebam jam processurus: irruit alter quisque post alterum, omnis posterior quasi novum, quod alius prior dixerat, nuntiantes: meque gaudente et apud me gratias Deo agente, ingreditur etiam ipse cum pluribus, inclinatur ad genua mea, erigitur ad osculum meum. Procedimus ad populum, plena erat ecclesia, personabat vocibus gaudiorum, Deo gratias! Deo laudes! nemine tacente, hinc atque inde clamantium. Salutavi populum, et rursus eadem ferventiore voce clamabant. Facto tandem silentio, Scripturarum divinarum sunt lecta solemnia. Ubi autem ventum est ad mei sermonis locum, dixi pauca pro tempore et pro illius jucunditate lætitiæ. Magis enim eos in opere divino quamdam Dei eloquentiam, non audire, sed considerare permisi. Nobiscum homo prandit, et diligenter nobis omnem suæ ac maternæ fraternæque calamitatis indicavit historiam. Sequenti itaque die, post sermonem redditum, narrationis ejus libellum in crastinum populo recitandum promisi (Serm. 321). Quod cum ex dominico Paschæ die tertio fieret in gradibus exedræ, in qua de superiore loquebar loco, feci stare ambos fratres, cum eorum legeretur libellus (Serm. 322). Intuebatur populus universus sexus utriusque, unum stantem sine deformi motu, alteram membris omnibus contrementem. Et qui ipsum non viderant, quid in eo divinæ misericordiæ⁴ factum esset, in ejus sorore cernebant. Videbant enim quid in eo

¹ Vind. Am. Er. et Mss., *vinculo*.

² Aliquot Mss., *Non credant*. Et quidam, *Non credent*.

³ Plures Mss., *excedant*.

⁴ In Mss., *quisque*.

(a) Vid. Sermones 318-324, tom. 5, necnon librum de Miraculis S. Stephani, in hujus tomi 7 Appendice.

(b) Forte, *cingulum*.

¹ Vind. Am. Er. cum nonnullis manuscriptis, *quocumque*.

² Nonnulli Mss., *ubi Martyris Memoria erat*. Interpretatio est et glossema.

³ Er. et Lov., *per somnum*. Emendantur ex aliis libris.

⁴ Aliquot Mss., *quid in eo divina misericordia*.

gratulandum, quid pro illa esset orandum. Inter hæc recitata eorum libello, de conspectu populi abire eos præcepi; et de tota ipsa causa aliquanto diligentius cœperam disputare, cum ecce, me disputante, voces aliæ de memoria Martyris novæ gratulationis audiuntur. Conversi sunt eo qui me audiebant, cœperuntque concurrere. Illa enim ubi de gradibus descendit, in quibus steterat, ad sanctum Martyrem orare perrexerat. Quæ mox ut cancellos attingit, collapsa similiter velut in somnum, sana surrexit. Dum ergo requireremus quid factum fuerit, unde iste strepitus lætus existerit, ingressi sunt cum illa in basilicam, ubi eramus, adducentes eam sanam de Martyris (a) loco. Tum vero tantus ab utroque sexu admirationis clamor exortus est, ut vox continuata cum lacrymis non videretur posse finire (Vid. Serm. 323). Perducta est ad eum locum, ubi paulo ante steterat tremens. Exsultabant eam similem fratri¹, cui doluerant remansisse dissimilem: et nondum suas preces pro illa, jam tamen præviam voluntatem tam cito exauditam esse cernebant. Exsultabant in Dei laudem voce² sine verbis, tanto sonitu, quantum aures nostræ ferre vix possent. Quid erat in cordibus exsultantium, nisi fides Christi, pro qua³ Stephani sanguis effusus est?

CAPUT IX. — *Quod universa miracula, quæ per martyres in Christi nomine fiunt, ei fidei testimonium ferant, qua in Christum martyres crediderunt.*

Cui, nisi huic fidei attestantur ista miracula, in qua prædicatur Christus resurrexisse in carne, et in cælum ascendisse cum carne? Quia et ipsi martyres hujus fidei martyres, id est, hujus fidei testes fuerunt, huic fidei testimonium perhibentes mundum inimicissimum et crudelissimum pertulerunt; eumque, non repugnando, sed moriendo vicerunt. Pro ista fide mortui sunt, qui hæc a Domino impetrare possunt, propter cuius nomen occisi sunt. Pro hac fide præcessit eorum mira patientia, ut in his miraculis tanta ista potentia sequeretur. Nam si carnis in æternam resurrectionem vel non prævenit in Christo, vel non ventura est, sicut prænuntiatur a Christo, vel sicut prænuntiata est a Prophetis, a quibus prænuntiatus est Christus; cur et mortui⁴ tanta possunt, qui pro ea fide, qua hæc resurrectio prædicatur, occisi sunt? Sive enim Deus ipse per se ipsum miro modo, quo res temporales operatur æternus, sive per suos ministros ista faciat; et eadem ipsa quæ per ministros facit, sive quædam faciat etiam per Martyrum spiritus, sicut per homines adhuc in corpore constitutos; sive omnia ista per Angelos, quibus invisibiliter, immutabiliter, et incorporaliter imperat, operetur; ut quæ per Martyres fieri dicuntur, eis orantibus tantum et impetrantibus, non etiam operantibus fiant; sive alia istis, alia illis modis, qui

nullo modo comprehendere a mortalibus possunt: ei tamen attestantur hæc fidei, in qua carnis in æternam resurrectio prædicatur.

CAPUT X. — *Quanto dignius honorentur martyres, qui ideo multa mira obtinent, ut Deus verus colatur, quam dæmones, qui ob hoc quædam faciunt, ut ipsi dii esse credantur*

Hic forte dicturi sunt, etiam deos suos aliqua mira fecisse. Bene, si jam incipiunt deos suos nostris mortuis hominibus comparare. An dicent etiam se habere deos ex hominibus mortuis, sicut Herculem, sicut Romulum, sicut alios multos, quos in deorum numerum receptos opinantur? Sed nobis martyres non sunt dii: quia unum eundemque Deum et nostrum scimus et martyrum. Nec tamen miraculis, quæ per Memorias nostrorum martyrum fiunt, ullo modo comparanda sunt miracula, quæ facta per templa perhibentur illorum. Verum si qua similia videntur, sicut a Moyse magi Pharaonis (Exod. viii), sic eorum dii victi sunt a martyribus nostris. Fecerunt autem illa dæmones eo fastu impuræ superbiæ, quo eorum dii esse voluerunt: faciunt autem ista martyres, vel potius Deus aut orantibus aut cooperantibus eis, ut fides illa proficiat, qua eos, non deos esse nostros, sed unum Deum habere nobiscum credamus. Denique illi talibus diis suis et templa ædificaverunt, et statuerunt aras, et sacerdotes instituerunt, et sacrificia fecerunt: nos autem martyribus nostris non templa sicut diis, sed Memorias sicut hominibus mortuis, quorum apud Deum vivunt spiritus, fabricamus; nec ibi erigimus altaria, in quibus sacrificemus martyribus, sed uni Deo et martyrum et nostro⁴: ad quod sacrificium, sicut homines Dei, qui mundum in ejus confessione vicerunt, suo loco et ordine nominantur; non tamen a sacerdote, qui sacrificat, invocantur. Deo quippe, non ipsis sacrificat, quamvis in Memoria sacrificet eorum: quia Dei sacerdos est, non illorum. Ipsum vero sacrificium corpus est Christi, quod non offertur ipsis, quia hoc sunt et ipsi. Quibus igitur potius credendum est miracula facientibus? eisne qui se ipsos volunt haberi deos ab his quibus ea faciunt; an eis qui, ut in Deum credatur, quod et Christus est, faciunt quidquid mirabile faciunt? eisne qui sacra sua etiam crimina sua esse voluerunt; an eis qui nec laudes suas volunt esse sacra sua, sed totum quod veraciter laudantur, ad ejus gloriam proficere in quo laudantur? In Domino quippe laudantur animæ eorum (Psal. xxxiii, 3). Credamus ergo eis et vera dicentibus, et mira facientibus. Dicendo enim vera, passi sunt, ut possent facere mira. In eis veris est præcipuum, quod Christus resurrexit a mortuis, et immortalitatem resurrectionis in sua carne primus ostendit, quam nobis adfuturam, vel in principio novi sæculi, vel in hujus fine promisit.

¹ Editi addunt, *factam*: quæ vox abest a manuscriptis.

² Sic Vind. Am. et Mss. At Er. et Lov., *voces*.

³ Plerique Mss., *quo*.

⁴ Sic Mss. At editi, *quare martyres*.

(a) Forte, *Martyris*.

⁴ Sic editi addunt, *sacrificium immolamus*: quod abest a manuscriptis.

CAPUT XI. — *Contra Platonicos, qui de naturalibus elementorum ponderibus argumentantur terrenum corpus in cœlo esse non posse.*

1. Contra quod magnum Dei donum ratiocinatores isti, quorum cogitationes novit Dominus quoniam vanæ sunt (*Psal. xciii, 11*), de ponderibus elementorum argumentantur: quoniam scilicet magistro Platone didicerunt, mundi duo corpora maxima atque postrema duobus mediis, aere scilicet et aqua, esse copulata atque conjuncta. Ac per hoc, inquit, quoniam terra abhinc sursum versus est prima, secunda aqua super terram, tertius aer super aquam, quartum super aera cœlum; non potest esse terrenum corpus in cœlo. Momentis enim propriis, ut ordinem suum teneant, singula elementa librantur. Ecce quilibet argumentis omnipotentis Dei humana contradicit infirmitas, quam possidet vanitas. Quid ergo faciunt in aere terrena tot corpora, cum a terra sit aer tertius? Nisi forte, qui per plumarum et pennarum levitatem donavit avium terrenis corporibus ut portentur in aere, immortalibus factis corporibus hominum non poterit donare virtutem, qua etiam in summo cœlo valeant habitare. Animalia quoque ipsa terrena, quæ volare non possunt, in quibus et homines sunt, sicut sub aqua pisces, quæ sunt aquarum animalia, ita sub terra vivere debuerunt. Cur ergo non saltem de secundo, id est, de aquis, sed de elemento tertio terrenum animal carpit hanc vitam? quare cum pertineat ad terram, in secundo, quod super terram est, elemento vivere si cogatur, continuo suffocatur, et ut vivat, vivit in tertio? an errat hic ordo elementorum, vel potius non in natura rerum, sed in istorum argumentationibus deficit? Omitto dicere, quod jam in tertio decimo libro dixi (*cap. 18*), quam multa gravia terrena sint corpora, sicut plumbum, et formam tamen ab artifice accipiant, qua nature valeant super aquam (a): et ut accipiat qualitatem corpus humanum, qua ferri in cœlum, et esse possit in cœlo, omnipotenti Artifici contradicitur?

2. Jam vero contra illud quod dixi superius, etiam istum considerantes atque tractantes elementorum ordinem, quo confidunt, non inveniunt omnino quod dicant. Sic est enim hinc sursum versus terra prima, aqua secunda, tertius aer, quartum cœlum, ut super omnia sit animæ natura. Nam et Aristoteles quintum corpus eam dixit esse (b), et Plato nullum. Si quintum esset, certe superius esset cæteris: cum vero nullum est, multo magis superat omnia. In terreno ergo quid facit corpore? in hac mole quid agit subtilior omnibus? in hoc pondere quid agit levior omnibus? in hac tarditate quid agit celerior omnibus? Itane per hujus tam excellentis naturæ meritum non poterit effici, ut corpus ejus levetur in cœlum, et cum valeat nunc natura corporum terrenorum deprinere animas deorsum, aliquando et animæ levare sursum terrena corpora non valebunt?

3. Jam si ad eorum miracula veniamus, quæ facta

(a) Confer Aristotelem, lib. 4 de Cœlo, cap. 6.

Coq̄us.

(b) Confer supra, lib. 10, cap. 16, n. 2.

a diis suis opponunt Martyribus nostris, nonne etiam ipsa pro nobis facere, et nobis reperientur omnino proficere? Nam inter magna miracula deorum suorum, profecto magnum illud est, quod Varro commemorat, Vestalem virginem, cum periclitaretur falsa suspitione de stupro, cribrum implese aqua de Tiberi, et ad suos judices nulla ejus parte stillante portasse. Quis aquæ pondus supra cribrum tenuit? quis tot cavernis patentibus nihil inde in terram cadere permisit? Responsuri sunt, Aliquis deus, aut aliquis dæmon. Si deus, numquid major est Deo qui fecit hunc mundum? Si dæmon, numquid potentior est Angelo, qui Deo servit, a quo factus est mundus? Si ergo deus minor, vel angelus, vel dæmon potuit pondus humidi elementi sic suspendere, ut aquarum videatur mutata fuisse natura: itane Deus omnipotens, qui omnia ipse creavit elementa, terreno corpori grave pondus auferre non poterit, ut in eodem elemento habitet vivificatum corpus, in quo voluerit vivificans spiritus?

4. Deinde cum aera medium ponant inter ignem desuper et aquam subter, quid est quod eum inter aquam et aquam, et inter aquam et terram sæpe invenimus? Quid enim volunt esse aqueas nubes, inter quas et maria aer medius reperitur? Quoniam, quæso, elementorum pondere atque ordine efficitur, ut torrentes violentissimi atque undosissimi, antequam sub aere in terris currant, super aera in nubibus pendeant? Cur denique aer est medius inter summa cœli, et nuda terrarum¹, quaquaversum orbis extenditur, si locus ejus inter cœlum et aquas, sicut aquarum inter ipsum et terras est constitutus?

5. Postremo si ita est elementorum ordo dispositus, ut secundum Platonem duobus mediis, id est aere et aqua, duo extrema, id est ignis et terra, jungantur, cœlique obtineat ille summi² locum, hæc autem imi, velut fundaminis mundi, et ideo in cœlo esse non potest terra; cur est ipse ignis in terra? Secundum hanc quippe rationem ita ista duo elementa in locis propriis, imo ac summo, terra et ignis esse debuerunt, ut quemadmodum nolunt in summo esse posse quod imi est, ita nec in imo posset esse quod summi est. Sicut ergo nullam putant vel esse vel futuram esse terræ particulam in cœlo, ita nullam particulam videre debuimus ignis in terra. Nunc vero non solum in terris, verum etiam sub terris ita est, ut eum eructent vertices montium; præter quod in usibus hominum et esse ignem in terra, et eum nasci videmus ex terra: quandoquidem et de lignis et de lapidibus nascitur, quæ sunt corpora sine dubitatione terrena. Sed ille, inquit, ignis est tranquillus, purus, innoxius, sempiternus: iste autem turbidus, fumeus, corruptibilis atque corruptor. Nec tamen corrumpit montes, in quibus jugiter æstuat, cavernasque terrarum. Verum esto, sit illi iste dissimilis, ut terrenis habitationibus congruat: cur ergo nolunt ut credamus naturam corporum ter-

¹ Ita Mss. At Editi, et *ima terrarum*.

² Editi, *summum*; dissentientibus Mss.

reorum aliquando incorruptibilem factam cœlo convenientem futuram, sicut nunc ignis corruptibilis his convenit terris? Nihil igitur afferunt ex ponderibus atque ordinae elementorum, unde omnipotenti Deo, quominus faciat corpora nostra talia, ut etiam in cœlo possint habitare, præscribant.

CAPUT XII. — *Contra calumnias infidelium, quibus Christianos de credita carnis resurrectione irrident.*

1. Sed scrupulosissime quærere, et fidem qua credimus resurrecturam carnem, ita quærendo, assolent irridere, Utrum fetus abortivi resurgant? Et quoniam Dominus ait, *Amen dico vobis, capillus capitis vestri non peribit* (Luc. xxi, 18): utrum statura et robor æqualia futura sint omnibus, an diversæ corporum quantitates? Si enim æqualitas corporum erit, unde habebunt quod hic non habuerunt in mole corporis illi abortivi, si resurgent et ipsi? Aut si non resurgent, quia nec nati sunt, sed effusi, eandem quæstionem de parvulis versant, unde illis mensura corporis, quam nunc defuisse videmus, accedat, cum in hac ætate moriuntur. Neque enim dicturi sumus, eos non resurrecturos, qui non solum generationis, verum etiam regenerationis capaces sunt. Deinde interrogant, quem modum ipsa æqualitas habitura sit. Si enim tam magni et tam longi crunt omnes, quam fuerunt quicumque hic fuerunt maximi atque longissimi, non solum de parvulis, sed de plurimis quærunt¹, unde illis accessurum sit, quod hic defuit, si hoc quisque recipiet, quod hic habuit. Si autem, quod ait Apostolus, occursuros nos omnes in mensuram ætatis plenitudinis Christi (Ephes. iv, 13); et illud alterum, *Quos prædestinavit conformes² imaginis Filii sui* (Rom. viii, 29), sic intelligendum est, ut statura et modus Christi corporis omnium qui in regno ejus erunt, humanorum corporum sit futurus: Multis erit, inquit, de magnitudine et longitudine corporis detrahendum: et ubi jam erit, *Capillus capitis vestri non peribit*, si de ipsa corporis quantitate tam multum peribit? Quamvis et de ipsis capillis possit inquiri, utrum redeat quidquid tondentibus decidit. Quod si rediturum est, quis non exhorreat illam deformitatem? Nam hoc et de unguibus videtur necessario occuturum, ut redeat tam multum quod corporis curatura³ desecuit. Et ubi erit decus? quod certe majus, quam in ista esse corruptione potuit, in illa jam immortalitate esse debet. Si autem non redibit, ergo peribit: quomodo ergo, inquit, capillus capitis non peribit? De macie quoque vel pinguedine similiter disputant. Nam si æquales omnes erunt; non utique alii macri, alii pingues erunt. Accedet ergo aliis aliquid, aliis minuetur. Ac per hoc, non quod erat recipiendum, sed alicubi addendum est, quod non fuit; et alicubi perdendum, quod fuit.

2. De ipsis etiam corruptionibus et dilapsionibus corporum mortuorum, cum aliud vertatur in pulve-

rem, in auras aliud exhaletur; sint quos bestie, sint quos ignis absumat; naufragio vel quibuscumque aquis ita quidam pereant, ut eorum carnes in humorem putredo dissolvat; non mediocriter permoventur, atque omnia ista recolligi in carnem et redintegrari posse non credunt. Consectantur etiam quasque seditates et vitia, sive accedant⁴, sive nascantur: ubi et monstrosos partus cum horrore atque irrisione commemorant, et requirunt quænam cujusque deformitatis resurrectio sit futura. Si enim nihil tale redire in corpus hominis dixerimus, responcionem nostram de locis vulnerum, cum quibus Dominum Christum resurrexisse prædicamus, se confuturos esse præsumunt. Sed inter hæc omnia quæstio difficillima illa proponitur, in cujus carnem reditura sit caro, qua corpus alterius, vescentis humana viscera fame compellente, nutritur. In carnem quippe conversa est ejus, qui talibus vixit alimentis; et ea quæ macies ostenderat detrimenta, supplevit. Utrum ergo illi redeat homini cujus caro prius fuit, an illi potius cujus postea facta est, ad hoc percontantur, ut fidem resurrectionis illudant: ac sic animæ humanæ, aut alternantes, sicut Plato, veras infelicitates falsasque promittant beatitudines; aut post multas iidem per diversa corpora revolutiones, aliquando tamen eam, sicut Porphyrius, finire miserias, et ad eas nunquam redire fateantur; non tamen corpus habendo immortale, sed corpus omne fugiendo.

CAPUT XIII. — *An abortivi non pertineant ad resurrectionem, si pertinent ad numerum mortuorum.*

Ad hæc ergo quæ ab eorum parte contraria, me dirigente, mihi videntur opposita, misericordia Dei meis nisibus opem ferente, respondeam. Abortivos fetus, qui, cum jam vixissent in utero, ibi sunt mortui, resurrecturos ut affirmare, ita negare non audeo: quamvis non videam quomodo ad eos non pertineat resurrectio mortuorum, si non eximuntur de numero mortuorum. Aut enim non omnes mortui resurgent, et erunt aliqua humanæ animæ sine corporibus in æternum, quæ corpora humana, quamvis intra viscera materna, gestarunt: aut si omnes animæ humanæ recipient resurgentia sua corpora, quæ habuerunt ubicumque viventia, et morientia reliquerunt, non invenio quemadmodum dicam ad resurrectionem non pertinere mortuorum, quoscumque mortuos etiam in uteris matrum. Sed utrumlibet de his quisque sentiat, quod de jam natis infantibus dixerimus, hoc etiam de illis intelligendum est, si resurgent (a).

CAPUT XIV. — *An infantes in ea sint resurrecturi habitudine corporis, quam habituri erant ætatis accessu.*

Quid ergo de infantibus dicturi sumus, nisi quia non in ea resurrecturi sunt corporis exiguitate, qua mortui; sed quod eis tardius accessurum erat tempore, hoc sunt illo Dei opere miro atque celerrimo

¹ Sic Mss. Editi vero, *sed et de plurimis magnis quærunt*.
² Editi addunt, *feri*: quod verbum hoc Apostoli loco non reperiri in manuscriptis jam aliquoties est observatum.
³ Editi, *cura*. Melius Mss., *curatura*.

⁴ vind. Am. Er. et Mss., *sive accidunt*.
 (a) Conf. Enchirid. n. 23, initio.

recepturi? In sententia quippe Domini, ubi ait, *Capillus capitis vestri non peribit* (Luc. XXI, 18), dictum est non defuturum esse quod fuit, non autem negatum est adfuturum esse quod defuit. Defuit autem infanti mortuo perfecta quantitas sui corporis : perfectio quippe infanti deest utique perfectio magnitudinis corporalis ; quæ cum accesserit, jam statura longior esse non possit. Hunc perfectionis modum sic habent omnes, ut cum illo concipiuntur atque nascantur ; sed habent in ratione, non in mole : sicut ipsa jam membra omnia sunt latenter in semine, cum etiam natis nonnulla adhuc desint, sicut dentes, ac si quid ejusmodi. In qua ratione uniuscujusque materiæ indita corporali, jam quodammodo, ut ita dicam, liciatum¹ esse videtur (a), quod nondum est, imo quod latet, sed accessu temporis erit, vel potius apparebit. In hac ergo infans jam brevis aut longus est, qui brevis longusve futurus est. Secundum hanc rationem profecto in resurrectione corporis detrimenta corporis non timemus : quia, etsi æqualitas futura esset omnium, ita ut omnes usque ad giganteas magnitudines pervenirent, ne illi qui² maximi fuerunt, minus haberent aliquid in statura, quod eis contra sententiam Christi periret, qui dixit, nec capillum capitis esse periturum ; Creatori utique qui creavit cuncta de nihilo, quomodo desse posset, unde adderet quod addendum esse mirus artifex nosset ?

CAPUT XV. — *An ad Dominici corporis modum omnium martuorum resurrectura sint corpora.*

Sed utique Christus in ea mensura corporis, in qua est mortuus, reurrexit, nec fas³ est dicere, cum resurrectionis omnium tempus venerit, accessuram corpori ejus eam magnitudinem, quam non habuit, quando in ea discipulis, in qua illis erat notus, apparuit, ut longissimis fieri possit æqualis. Si autem dixerimus ad Dominici corporis modum etiam quorumque majora corpora redigenda, peribit de multorum corporibus plurimum, cum ipse nec capillum periturum esse promiserit. Restat ergo, ut suam recipiat quisque mensuram, quam vel habuit in juventute, etiamsi senex est mortuus ; vel fuerat habiturus, si est ante defunctus. Atque illud quod commemoravit Apostolus de mensura ætatis plenitudinis Christi (Ephes. IV, 13), aut propter aliud intelligamus dictum esse, id est, ut illi capiti in populis Christianis accedente omnium perfectione membrorum ætatis ejus mensura compleatur ; aut, si hoc de resurrectione corporum dictum est, sic accipiamus dictum, ut nec ultra, nec infra juvenilem⁴ formam resurgant corpora mortuorum ; sed in ejus ætate⁵ et robore, usque ad quam Christum hic pervenisse cognovimus. Circa triginta quippe annos definierunt esse etiam

sæculi hujus doctissimi homines juventutem : quæ cum fuerit spatio proprio terminata, inde jam hominem in detrimenta vergere gravioris ac senilis ætatis. Et ideo non esse dictum, In mensuram corporis ; vel, In mensuram staturæ : sed, in mensuram ætatis plenitudinis Christi.

CAPUT XVI. — *Qualis intelligenda sit sanctorum conformatio ad imaginem Filii Dei.*

Illud etiam quod ait, *predestinatos conformes imaginis Filii Dei* (Rom. VIII, 29), potest et secundum interiorem hominem intelligi. Unde nobis alio loco dicit, *Nolite conformari huic sæculo, sed reformamini in novitate mentis vestræ* (Ibid. XII, 2). Ubi ergo reformamur, ne conformemur huic sæculo, ibi conformamur Dei Filio. Potest et sic accipi, ut, quem admodum ille nobis mortalitate, ita nos illi efficiamur immortalitate conformes : quod quidem et ad ipsam resurrectionem corporum pertinet. Si autem etiam in his verbis, qua forma resurrectura sunt corpora sumus admoniti ; sicut illa mensura, ita et ista conformatio, non quantitatis intelligenda est, sed ætatis. Resurgent itaque omnes tam magni corpore, quam vel erant, vel futuri erant in juvenili ætate, quamvis nihil oberit, etiamsi erit infantilis vel senilis corporis forma, ubi nec mentis, nec ipsius corporis ulla remanebit infirmitas. Unde etiam si quis in eo corporis modo, in quo defunctus est, resurrectorum unumquemque contendit, non est cum illo laboriosa contradictione pugnandum.

CAPUT XVII. — *An in suo sexu resuscitanda atque mansura sint corpora feminarum.*

Nonnulli propter hoc quod dictum est, *Donec occurramus omnes¹ in virum perfectum, in mensuram ætatis plenitudinis Christi* (Ephes. IV, 13) ; et, *conformes imaginis Filii Dei* ; nec in sexu femineo resurrectorum feminas credunt, sed in virili omnes aiunt (a). quoniam Deus solum virum fecit ex limo, feminam ex viro. Sed mihi melius sapere videntur, qui utrumque sexum resurrectorum esse non dubitant. Non enim libido ibi erit, quæ confusionis est causa. Nam priusquam peccassent, nudi erant, et non confundebantur vir et femina. Corporibus ergo illis vitia detrahentur, natura servabitur. Non est autem vitium sexus femineus : sed natura : quæ tunc quidem et a concubitu et a partu immunis erit : erunt tamen membra feminea, non accommodata usui veteri, sed decori novo, quo non alliciatur aspicientis concupiscentia, quæ nulla erit, sed Dei laudetur sapientia atque clementia, qui et quod non erat fecit, et liberavit a corruptione quod fecit. Ut enim in exordio generis humani de latere viri dormientis costa detracta femina fieret, Christum et Ecclesiam tali facto jam tunc prophetari oportebat. Sopor quippe ille viri (Gen. II, 21), mors erat Christi (b), cujus exanimis in cruce pendentis latus lancea perforatum

¹ Hic in sola editione Lov. additur, *in unitatem fidei.*

(a) Auctor est Hieronymus, Epistola ad Pamachium, in eo errore fuisse Origenem. Armenis eundem errorem tribuit Guido Carmelita, et vicesimo loco inter eorum errores recenset. Coqzrus.

(b) Conf. lib. 2 de Gen. cont. Manich. n. 37.

(Vingt-cinq.)

¹ Vind. Am. et Fr., *innatum.*

² Lov., *ne illi quidem qui.* Abest, *quidem*, ab editis aliis et manuscriptis.

³ Vind. Am. et Fr., *nefas.* Castigantur ex editis aliis et manuscriptis.

⁴ Veteres libri, *juvenalem* ; et infra, cap. 16, *juvenati* : atque ita constanter.

⁵ Sic Mss. At editi, *sed in ea ætate.*

(a) Dictum translatione textentium ; quasi jam illa oeu tela tecta est in puero, sed non explicata. Lov. vivvs.

SANCT. AUGUST. VII.

est, atque inde sanguis et aqua profluxit (*Joan. xix, 34*): quæ sacramenta esse novimus, quibus ædificatur Ecclesia. Nam hoc etiam verbo Scriptura usa est, ubi non legitur, Formavit, aut Flixit; sed, *Ædificavit eam in mulierem (Gen. ii, 22)*: unde et Apostolus ædificationem dicit corporis Christi (*Ephes. iv, 12*), quod est Ecclesia. Creatura est ergo Dei femina, sicut vir: sed ut de viro fieret, unitas commendata; ut autem illo modo fieret, Christus, ut dictum est, et Ecclesia figurata est. Qui ergo utrumque sexum instituit, utrumque restituet. Denique et ipse Jesus interrogatus a Sadducæis, qui negabant resurrectionem, cujus septem fratrum erit uxor, quam singuli habuerunt, dum quisque eorum vellet defuncti semen, sicut Lex præceperat, excitare: *Erratis, inquit, nescientes Scripturas, neque virtutem Dei (Math. xxii, 29)*. Et cum locus esset¹, ut diceret, De qua enim me interrogatis, vir erit etiam ipsa, non mulier; non hoc dixit: sed dixit, *In resurrectione enim neque nubent, neque uxores ducent, sed sunt sicut Angeli Dei in cælo (Ibid. 30)*. Æquales utique Angelis immortalitate ac felicitate, non carne: sicut nec resurrectione, qua non indiguerunt Angeli; quoniam nec mori potuerunt. Nuptias ergo Dominus futuras negavit esse in resurrectione, non feminas: et ibi negavit, ubi talis quæstio vertebatur, ut eam negato sexu muliebri celeriore facilitate dissolveret, si eum ibi prænosceret non futurum: imo etiam futurum esse firmavit dicendo, *Non nubent*, quod ad feminas pertinet; *neque uxores ducent*, quod ad viros, Erunt ergo, quæ vel nubere hic solent, vel ducere uxores: sed ibi hoc non facient.

CAPUT XVIII. — *De viro perfecto, id est Christo, et corpore ejus, id est Ecclesia, quæ est ipsius plenitudo.*

Proinde quod ait Apostolus, occursuros nos omnes in virum perfectum, totius ipsius circumstantiam lectionis considerare debemus, quæ ita se habet: *Qui descendit, inquit, ipse est et qui ascendit super omnes cælos, ut adimpleret omnia. Et ipse dedit quosdam quidem Apostolos, quosdam autem Prophetas, quosdam vero Evangelistas, quosdam autem pastores et doctores, ad consummationem sanctorum, in opus ministerii, in ædificationem corporis Christi, donec occurramus omnes in unitatem fidei, et agnitionem Filii Dei, in virum perfectum, in mensuram ætatis plenitudinis Christi: ut ultra non simus parvuli, jactati et circumlati omni vento doctrinæ, in illusionem hominum, in astutiam² ad machinationem erroris: veritatem autem facientes in charitateaugeamur in illo per omnia, qui est caput Christus; ex quo totum corpus connexam, et compactum per omnem tactum subministrationis, secundum operationem in mensuram uniuscujusque partis, incrementum corporis facit in ædificationem sui, in charitate (Ephes. iv, 10-16)*. Ecce qui est vir perfectus, caput et corpus, quod constat omnibus membris, quæ suo tem-

pore complebuntur. Quotidie tamen eidem corpori accedunt, dum ædificatur Ecclesia, cui dicitur, *Vos autem estis corpus Christi, et membra (I Cor. xii, 27)*. Et alibi, *Pro corpore*, inquit, *ejus, quod est Ecclesia (Coloss. i, 24)*. Itemque alibi, *Unus panis, unum corpus multi sumus (I Cor. x, 17)*. De cujus corporis ædificatione et hic dictum est, *Ad consummationem sanctorum, in opus ministerii, in ædificationem corporis Christi*. ac deinde subjectum unde nunc agimus, *Donec occurramus omnes in unitatem fidei, et agnitionem Filii Dei, in virum perfectum, in mensuram ætatis plenitudinis Christi*, et cætera; donec eadem mensura in corpore intelligenda esset, ostenderet, dicens: *Augeamur in illo per omnia, qui est caput Christus; ex quo totum corpus connexam, et compactum per omnem tactum subministrationis, secundum operationem in mensuram uniuscujusque partis*. Sicut est ergo mensura uniuscujusque partis; ita totius corporis, quod omnibus suis partibus constat, est utique mensura plenitudinis, de qua dictum est: *In mensuram ætatis plenitudinis Christi*. Quam plenitudinem etiam illo commemoravit loco, ubi ait de Christo: *Et ipsum dedit caput super omnia Ecclesie¹, quæ est corpus ejus, plenitudo ejus, qui omnia in omnibus impletur² (Ephes. i, 22 et 23)*. Verum si hoc ad resurrectionis formam, in qua erit unusquisque, referendum esset; quid nos impediret nominato viro intelligere et feminam, ut virum pro homine positum acciperemus? Sicut in eo quod dictum est, *Beatus vir qui timet Dominum (Psal. cxi, 1)*: utique ibi sunt et feminae, quæ timent Dominum.

CAPUT XIX. — *Quod omnia corporis vitia, quæ in hac vita humano contraria sunt decori, in resurrectione non sint futura, ubi manente naturali substantia, in unam pulchritudinem et qualitas concurret et quantitas.*

1. Quid jam respondeam de capillis atque unguibus? Semel quippe intellecto ita nihil periturum esse de corpore, ut deforme nihil sit in corpore, simul intelligitur ea quæ deformem factura fuerant enormitatem, massæ ipsi accessura esse, non locis in quibus membrorum forma turpetur. Velut si de limo vas fieret, quod rursus in eundem limum redactum totum de toto iterum fieret, non esset necesse ut illa pars limi, quæ in ansa fuerat, ad ansam rediret, aut quæ fundum fecerat, ipsa rursus faceret fundum; dum tamen totum reverteretur in totum, id est, totus ille limus in totum vas nulla sui perdita parte remearet. Quapropter si capilli toties tonsi unguesve desecti ad loca sua deformiter redeunt, non redibunt: nec tamen cuique resurgenti peribunt, quia in eadem carnem, ut quemcumque ibi locum corporis teneant, servata partium congruentia, materiæ mutabilitate vertentur. Quamvis quod ait Dominus, *Capillus capitis vestri non peribit (Luc. xxi, 18)*, non de

¹ Vind. Am. et Er., *Et cum aptus locus esset*. Aliquot Mss., *Et cum opus esset*.

² Sic Mss. Editi vero, *in astutiam*.

¹ Editi, *super omnem Ecclesiam*. At melioris notæ Mss., *super omnia Ecclesie*. Sic etiam in veteribus Bibliis Corbeiensibus, juxta græcum: ut, *Ecclesie*, sit dativi casus, non genitivi. Hæc ipsa lectio est Hieronymi in Commentariis Apostoli.

² Sic Mss. At editi, *adimplet*.

longitudine, sed de numero capillorum dictum multa aptius possit intelligi. Unde et alibi dicit, *Capilli capitis vestri numerati sunt omnes*¹ (*Luc. xii, 7*). Neque hoc ideo dixerim, quod aliquid existimem corpori cuiquam² periturum, quod naturaliter inerat; sed quod deforme natum fuerat (non utique ob aliud, nisi ut hinc quoque ostenderetur, quam sit pœualis conditio ista mortalium), sic esse rediturum, ut servata integritate substantiæ, deformitas pereat. Si enim staturam potest artifex homo, quam propter aliquam causam deformem fecerat, conflare, et pulcherrimam reddere, ita ut nihil inde substantiæ, sed sola deformitas pereat, ac si quid in illa figura priore indecœter exstabat, nec parilitate³ partium congruebat, non de toto, unde fecerat, amputare atque separare, sed ita conspergere uniuerso⁴ atque miscere, ut nec fœditatem faciat, nec minuatur quantitatem; quid de omnipotente Artifice sentiendum est? Ergone non poterit quasque deformitates humanorum corporum, non modo usitatas, verum etiam raras atque monstrosas, quæ huic miseræ vitæ congruunt, abhorrent autem ab illa futura felicitate sanctorum, sic auferre ac perdere, ut quascumque earum faciunt, etsi naturalia, tamen indecora excrementa substantiæ corporalis, nulla ejus diminutione tollantur?

2. Ac per hoc non est macris pinguisve metuendam, ne ibi etiam tales sint, quales, si possent, nec hic esse voluissent. Omnis enim corporis pulchritudo est partium congruentia cum quadam coloris suavitate. Ubi autem non est partium congruentia, aut ideo quid offendit, quia pravum est⁵, aut ideo quia parum, aut ideo quia nimium. Proinde nulla erit deformitas, quam facit incongruentia partium, ubi et quæ prava sunt corrigentur; et quod minus est quam decet, unde Creator novit, inde supplebitur; et quod plus est quam decet, materiæ servata integritate, detrahetur. Coloris porro suavitas quanta erit, ubi iusti fulgebant sicut sol in regno Patrissui (*Math. xiii, 43*)? Quæ claritas in Christi corpore, cum resurrexit, ab oculis discipulorum potius abscondita fuisse, quam defuisse credenda est. Non enim eam ferret humanus atque infirmus aspectus, quando ille a suis ita deberet attendi, ut posset agnosci. Quo pertinuit etiam, ut contrectantibus ostenderet suorum vulnerum cicatrices; ut etiam cibum potumque sumeret, non alimentorum indigentia, sed ea qua et hoc poterat potestate. Cum autem aliquid non videtur, quamvis adsit, a quibus alia, quæ pariter adsunt, videntur, sicut illam claritatem dicimus adfuisse non visam, a quibus alia videbantur, ἀόρατα græce dicitur: quod nostri interpretes latine dicere non valentes, in libro Geneseos cæcitatem interpretati sunt. Hanc enim passi sunt Sodomitæ, quando quærebant ostium

justi viri, nec poterant invenire (*Gen. xix, 11*). Quæ si cæcitas fuisset, qua sit ut nihil possit videri, non ostium quod ingrederentur, sed duces itineris a quibus inde abducerentur, inquirerent (*a*).

3. [XX.] Nescio quo autem modo sic afflicimur amore martyrum beatorum, ut velimus in illo regno in eorum corporibus videre vulnerum cicatrices, quæ pro Christi nomine pertulerunt: et fortasse videbimus. Non enim deformitas in eis, sed dignitas erit, et quedam, quamvis in corpore, non corporis, sed virtutis pulchritudo fulgebit. Nec ideo tamen si aliqua martyribus amputata et ablata sunt membra, sine ipsis membris erunt in resurrectione mortuorum, quibus dictum est, *Capillus capitis vestri non peribit*. Sed si hoc decebit in illo novo sæculo, ut indicia gloriosorum vulnerum in illa immortali carne cernantur, ubi membra, ut præciderentur, percussa vel secta sunt, ibi cicatrices, sed tamen eisdem membris redditæ, non perditæ, apparebunt. Quamvis itaque omnia quæ acciderunt corpori vitia, tunc non erunt; non sunt tamen deputanda vel appellanda vitia virtutis indicia.

CAPUT XX. — *Quod in resurrectione mortuorum natura corporum quibuscumque modis dissipatorum in integrum undecumque revocanda sit.*

1. Absit autem ut ad resuscitanda corpora vitæque reddenda non possit omnipotentia Creatoris omnia revocare, quæ vel bestię, vel ignis absumpsit, vel in pulverem cineremve collapsum, vel in humorem solutum, vel in auras est exhalatum. Absit ut sinus ullus secretumque naturæ ita recipiat aliquid subtractum sensibus nostris, ut omnium Creatoris aut lateat cognitionem, aut effugiat potestatem. Deum certe volens, sicut poterat, definire Cicero tantus auctor ipsorum, *Mens quædam*, inquit, *est soluta et libera, secreta ab omni concretione mortali, omnia sentiens et movens, ipsaque prædita motu sempiterno* (*Tuscul. lib. 1, cap. 27*). Hoc autem reperit in doctrinis magnorum philosophorum. Ut igitur secundum ipsos loquar, quomodo aliquid vel latet omnia sentientem, vel irrevocabiliter fugit omnia moventem?

2. Unde jam etiam quæstio illa solvenda est, quæ difficilior videtur cæteris: ubi quæritur, cum caro mortui hominis etiam alterius sit viventis caro, cui potius eorum in resurrectione reddatur. Si enim quispiam confectus fame atque compulsus vescatur cadaveribus hominum, quod in alium aliquoties accidisse, et vetus testatur historia, et nostrorum temporum infelicia experientia docuerunt (*b*); nam quisquam veridica ratione contendet, totum digestum

(a) Conf. Quæst. in Gen. quæst. 43.

(b) Indicat fortasse diram illam famem, quæ Romanos oppressit, dum obsiderentur ab Alarico (anno Christi 409), de qua Sozomenus in historia ecclesiastica, lib. 9, cap. 8; et Hieronymus, Epistola 16, ad Principiam virginem: « Ad nefandos cibos erupit esurientium rabies, et sua invicem membra laniarunt, dum mater non parit lactanti infanti, et suo recipit utero, quem paulo ante effuderat » COQUATUS.

¹ vox, omnes, abest a manuscriptis et ab editis vind. Am.

² Omnes Mss., cuique.

³ Sic Mss. At editi, parilitati.

⁴ Sola editio Lov., uniuersa.

⁵ Sic aliquot Mss. At editi, loco, pravum, habent, prævum: præterquam quod ex illis duo, Er. et Lov. omittunt, aut ideo quia parum.

fuisse per imos meatus, nihil inde in ejus carnem mutatum atque conversum, cum ipsa macies quæ fait et non est, satis indicet quæ illis escis detrimenta suppleta sint? Jam itaque aliqua paulo ante præmisi, quæ ad istum quoque nodum solvendum valere debent. Quidquid enim carniū exhaustis fames, utique in auras est exhalatum: unde diximus omnipotentem Deum posse revocare quod fugit. Reddetur ergo caro illa homini, in quo esse caro humana primitus cœpit. Ab illo quippe altero tanquam mutuo sumpta deputanda est: quæ sicut æs alienum, ei redhibenda est, unde sumpta est. Sua vero illi, quem fames exinanierat, ab eo qui potest etiam exhalata revocare, reddetur. Quamvis etsi omnibus perisset modis, nec ulla ejus materies in ullis naturæ latebris remansisset, unde vellet, eam repararet Omnipotens. Sed propter sententiam Veritatis, qua dictum est, *Capillus capitis vestri non peribit*; absurdum est ut putemus, cum capillus hominis perire non possit, tantas carnes fame depastas atque consumptas perire potuisse.

3. Quibus omnibus pro nostro modulo consideratis atque tractatis, hæc summa conficitur, ut in resurrectione carnis in æternum eas mensuras habeat corporum magnitudo, quas habebat perfluctantes sive perfecte cujusque indita corpori ratio juventutis, in membrorum quoque omnium modulis congruo decore servato. Quod decus ut servetur, si aliquid demptum fuerit indecenti alicui granditati in parte aliqua constitutæ, quod per totum spargatur, ut neque id pereat, et congruentia partium ubique teneatur, non est absurdum, ut aliquid inde etiam staturæ corporis addi posse credamus; cum omnibus partibus, ut decorem custodiant, id distribuitur, quod si enormiter in una esset, utique non deceret. Aut si contenditur in ea quemque statura corporis resurrectionem esse, in qua defunctus est, non pugnaciter resistendum est; tantum absit omnis deformitas, omnis infirmitas, omnis tarditas, omnisque corruptio, et si quid aliud illud non decet regnum, in quo resurrectionis et promissionis filii æquales erunt Angelis Dei, si non corpore, non ætate, certe felicitate.

CAPUT XXI. — De novitate corporis spiritualis, in quam sanctorum caro mutabitur.

Restituetur ergo et quidquid de corporibus vivis, vel post mortem de cadaveribus periiit, et simul cura eo quod in sepulcris remansit, in spiritualis corporis novitatem ex animalis corporis vetustate mutatum resurget, incorruptione atque immortalitate vestitum. Sed etsi vel casu aliquo gravi vel inimicorum immanitate totum penitus conteratur in pulverem, atque in auras vel in aquas dispersum quantum fieri potest, nusquam esse sinatur omnino, nullo modo subtrahi poterit omnipotentis Creatoris, sed capillus in eo capitis non peribit. Erit ergo spiritui subdita caro spiritualis, sed tamen caro, non spiritus: sicut carni subditus fuit spiritus ipse carnalis, sed tamen spiritus, non caro. Cujus rei habemus experimentum in nostræ vitæ deformitate. Non enim secundum carnem, sed

utique secundum spiritum carnales erant, quibus ait Apostolus: *Non potui vobis loqui quasi spiritualibus, sed quasi carnalibus* (I Cor. iii, 1). Et homo spiritualis sic in hac vita dicitur, ut tamen corpore adhuc carnalis sit, et videat aliam legem in membris suis repugnantem legi mentis suæ (Rom. vii, 23): erit autem etiam corpore spiritualis, cum eadem cæro sic resurrexerit, ut fiat quod scriptum est, *Seminatur corpus animale, resurget corpus spirituale* (I Cor. xv, 42). Quæ sit autem, et quam magna spiritualis corporis gratia, quoniam nondum venit in experimentum, vereor ne temerarium sit omne quod de illa profertur eloquium. Verumtamen quia spei nostræ gaudium propter Dei laudem non est tacendum, et de intimis ardentis sancti amoris medullis dictum est, *Domine, dilexi decorem domus tuæ* (Psal. xxv, 8): de donis ejus quæ in hac ærumnosissima vita bonis malisque largitur, ipso adjuvante, conjiciamus, ut possumus, quantum sit illud, quod nondum experti, utique digne eloqui non valeremus. Omitto enim quando fecit hominem rectum; omitto vitam illam duorum conjugum in paradisi fecunditate felicem, quoniam tam brevis fuit, et ad ascentium sensum nec ipsa pervenerit: in hac quam novimus, in qua adhuc sumus, cænis tentationibus, imo quam totam tentationem, quamdiu in ea sumus, quantumlibet proficiamus, perpeti non desinimus, quæ sint indicia circa genus humanum bonitatis Dei, quis poterit explicare?

CAPUT XXII. — De miseris ac malis, quibus humanum genus merito primæ prævaricationis obnoxium est, et a quibus nemo nisi per Christi gratiam liberatur.

1. Nam quod ad primam originem pertinet, omnem mortalium progeniem fuisse damnatam, hæc ipsa vita, si vita dicenda est, tot et tantis malis plena testatur. Quid enim aliud indicat horrenda quædam profunditas ignorantis, ex qua omnis error existit, qui omnes filios Adam tenebroso quodam sinu suscipit, ut homo ab illo liberari sine labore, dolore, timore non possit? Quid amor ipse tot rerum variarum atque noxiarum, et ex hoc mordaces curæ, perturbationes, mærores, formidines, insana gaudia, discordiæ, lites, bella, insidiæ, iracundiæ, inimicitis, fallacia, adulatio, fraus, furtum, rapina, perfidia, superbia, ambitio, invidentia, homicidia, parricidia, crudelitas, sævitia, nequitia, luxuria, petulantia, impudentia, impudicitia, fornicationes, adulteria, incesta, et contra naturam utriusque sexus tot supra atque immunditiæ, quæ turpe est etiam dicere, sacrilegia, hæreses, blasphemis, perjuria, oppressiones innocentium, calumnia, circumventiones, prævaricationes, falsa testimonia, iniqua judicia, violentiæ, latrocinia, et quidquid talium malorum in mentem non venit, et tamen de vita ista hominum non recedit? Verum hæc hominum sunt malorum, ab illa tamen erroris et perversi amoris radice venientia, cum qua omnis filius Adam nascitur. Nam quis ignorat cum quanta ignorantia veritatis,

¹ sic *non. At editi, quando.*

quæ jam in infantibus manifesta est; et cum quanta abundantia vanæ cupiditatis, quæ in pueris incipit apparere, homo veniat in hanc vitam, ita ut si dimittatur vivere ut velit, et facere quidquid velit, in hæc facinorosa et flagitia quæ commemoravi, et quæ commemorare non potui, vel cuncta vel multa perveniat?

2. Sed divina gubernatione non omni modo deserente damnatos, et Deo non continente in ira sua miserationes suas (*Psal. lxxvi, 10*), in ipsis sensibus generis humani prohibitio et eruditio contra istas, cum quibus nascimur, tenebras vigilant, et contra hos impetus opponuntur¹, plenæ tamen etiam ipsæ laborum et dolorum. Quid enim sibi volunt multimodæ formidines, quæ cohibendis parvulorum vanitatis adhibentur? quid pædagogi, quid magistri, quid ferulæ, quid lora, quid virgæ, quid disciplina illa qua Scriptura sancta dicit dilecti filii latera esse tundenda, ne crescat indomitus, domarique jam durus aut vix possit, aut fortasse nec possit (*Eccli. xxx, 12*)? Quid agitur his pœnis omnibus, nisi ut debelletur imperitia, et prava cupiditas infrenetur², cum quibus malis in hoc sæculum venimus? Quid est enim, quod cum labore meminimus, sine labore obliviscimur; cum labore discimus, sine labore nescimus; cum labore strenui, sine labore inertes sumus? Nonne hinc apparet in quid velut pondere suo proclivis et prona sit vitiosa natura, et quanta ope, ut hinc liberetur, indigeat? Desidia, segnitias, pigritia, negligentia, vitia sunt utique quibus labor fugitur, cum labor ipse, etiam qui est utilis, pœna sit.

3. Sed præter pueriles pœnas, sine quibus disci non potest quod majores volunt, qui vix aliquid utiliter volunt, quot et quantis pœnis genus agletur humanum, quæ non ad malitiam nequitiamque iniquorum, sed ad conditionem pertinent miseriamque communem, quis ullo sermone digerit, quis ulla cogitatione comprehendit? Quantus est metus, quanta calamitas ab orbitatibus atque luctu, a damnis et damnationibus, a deceptionibus et mendaciis hominum, a suspicionibus falsis, ab omnibus violentis facinoribus et sceleribus alienis? quandoquidem ab eis et deprædatio, et captivitas, et vincula, et carceres, et exsilia, et cruciatus, et amputatio membrorum, et privatio sensuum, et oppressio corporis ad obscenam libidinem opprimentis explendam, et alia multa horrenda sæpe contingunt. Quid ab innumeris casibus qui³ forinsecus corpori formidantur, æstibus et frigoribus, tempestatibus, imbribus, alluvionibus, coruscatione, tonitru, grandine, fulmine, motibus hiatibusque terrarum, oppressionibus ruinarum, ab offensione⁴ et pavore vel etiam malitia jumentorum, a tot venenis fructum, aquarum, aurarum, bestiarum, a ferarum vel tantummodo molestis vel etiam mortiferis morsibus, a rabie quæ contingit ex rabido cane, ut etiam blanda et amica suo domino bestia nonnunquam vehementius et amarius quam leones draconesque metuatur,

faciatque hominem, quem forte ataminaverit, contagione pestifera ita rabiosum, ut a parentibus, conjugibus, filiis, pejus omni bestia formidetur? Quæ mala patiuntur navigantes? quæ, terrena itinera gradientes? Quis ambulat ubicumque non inopinatis subjacentibus casibus? De foro quidam rediens domum sanis pedibus suis, cecidit, pedem fregit, et ex illo vulnere finivit hanc vitam. Quid videtur sedente securius? Desella in qua sedebat cecidit Heli sacerdos, et mortuus est (*I Reg. iv, 18*). Agricola, imo vero omnes homines quot et quantos a cælo et terra, vel a perniciosis animalibus casus metuunt agrorum fructibus? Solent tamen de frumentis tandem collectis et reconditis esse securi. Sed quibusdam, quod novimus, proventum optimum frumentorum fluvius improvisus, fugientibus hominibus, de horreis ejecit atque abstulit. Contra milleformes demonum incursus, quis innocentia sua fidit? quandoquidem ne quis fideret, etiam parvulos baptizatos, quibus certe nihil est innocentius, aliquando sic vexant, ut in eis maxime Deo sinente, ista monstretur hujus vitæ flenda calamitas, et alterius desideranda felicitas. Jam vero de ipso corpore tot existunt morborum mala, ut nec libris medicorum cuncta comprehensa sint. In quorum pluribus ac pene omnibus etiam ipsa adjumenta et medicamenta tormenta sunt, ut homines a pœnarum exitio pœnali eriantur auxilio. Nonne ad hoc perduxit sitiennes homines ardor immanis, ut urinam quoque humanam vel etiam suam biberent? nonne ad hoc fames, ut a carnibus hominum abstinere se non possent, nec inventos homines mortuos, sed propter hoc a se occisos, nec quoslibet alienos, verum etiam filios matres incredibili crudelitate, quam rabida esuries faciebat, absumerent? Ipse postremo somnus, qui proprio quietis nomen accepit, quis verbis explicet sæpe somniorum visis quam sit inquietus; et quam magnis, licet falsarum rerum, terroribus, quas ita exhibet, et quodammodo exprimit, ut a veris eas discernere nequeamus, animam miseram sensusque perturbet? Qua falsitate visorum etiam vigilantes in quibusdam morbis et venenis miserabilibus agitantur⁵: quamvis multimoda varietate fallaciæ homines etiam sanos maligni demones nonnunquam decipiant talibus visis, ut, etiamsi eos per hæc ad sua traducere non potuerint, sensus tamen eorum solo appetitu qualitercumque persuadendæ falsitatis illudant.

4. Ab hujus tam miseræ quasi quibusdam inferis vitæ, non liberat nisi gratia Salvatoris Christi, Dei ac Domini nostri. Hoc enim nomen est ipse Jesus; interpretatur quippe Salvator: maxime ne post hanc miserior ac sempiterna suscipiat, non vita, sed mors. Nam in ista quamvis sint per sancta ac sanctos curationum magna solatia; tamen ideo non semper etiam ipsa beneficia tribuuntur petentibus, ne propter hoc religio quæretur, quæ propter aliam magis vitam, ubi mala non erunt omnino ulla, quærenda est: et ad hoc meliores quosque in his malis adjuvat gratia, ut quanto fidelior, tanto fortiore corde tolerentur. Ad

¹ Nonnulli Mss., *apponuntur*.

² Sic Mss. At editi, *refrenetur*.

³ Probæ notæ Mss., *que*.

⁴ Mss., *ab offensionibus*.

⁵ sola editio Lov., *morbus et venenis mirabilibus agitentur*.

quam rem etiam philosophiam prodesse dicunt docti hujus sæculi, quam dii quibusdam paucis, ait Tullius, veram dederunt (a). Nec hominibus, inquit, ab his aut datum est donum majus, aut potuit ullum dari: usque adeo et ipsi, contra quos agimus, quoquo modo compulsi sunt in habenda, non quacumque, sed vera philosophia divinam gratiam constiteri. Porro si paucis divinitus datum est veræ philosophiæ contra miseras vitæ unicum auxilium, satis et hinc apparet humanum genus ad luendas miseriarum pœnas esse damnatum. Sicut autem hoc, ut fatentur, nullum divinum majus est donum, sic a nullo deo dari credendum est, nisi ab illo, quo et ipsi qui multos deos colunt, nullum dicunt esse majorem.

CAPUT XXIII. — *De his quæ, præter illa mala quæ bonis malisque communia sunt, ad justorum laborem specialiter pertinent.*

Præter hæc autem mala hujus vitæ bonis malisque communia, habent in ea justii etiam proprios quosdam labores suos, quibus adversus vitia militant, et in talium præliorum tentationibus periculisque versantur. Aliquando enim concitatius, aliquando remissius, non tamen desinit caro concupiscere adversus spiritum, et spiritus adversus carnem, ut non ea quæ volumus faciamus (Galat. v, 17), omnem malam concupiscentiam consumendo; sed eam nobis, quantum divinitus adjuti possumus, non ei consentiendo subdamus, vigiliis continuis excubantes, ne opinio veri similis fallat, ne decipiat sermo versutus, ne se tenebræ alicujus erroris offundant, ne quod bonum est malum, aut quod malum est bonum esse credatur, ne ab his quæ agenda sunt metus revocet, ne in ea quæ agenda non sunt cupido præcipitet, ne super iracundiam sol occidat (Ephes. iv, 26), ne inimicitia provocent ad retributionem mali pro malo, ne absorbeat in honesta vel immoderata tristitia, ne impertidorum beneficiorum ingerat mens ingrata torporem, ne maledicis rumoribus bona conscientia fatigetur, ne temeraria de alio suspicio nos nostra decipiat, ne aliena de nobis falsa nos frangat, ne regnet peccatum in nostro mortali corpore ad obediendum desideris ejus, ne membra nostra exhibeantur iniquitatis arma peccato (Rom. vi, 12, 13), ne oculus sequatur concupiscentiam, ne vindicandi cupiditas vincat, ne in eo quod male delectat, vel visio vel cogitatio remoretur, ne improbum aut indecens verbum libenter audiat, ne fiat quod non licet, etiamsi fibet, ne in hoc bello laborum periculorumque plenissimo vel de viribus nostris speretur facienda victoria, vel viribus nostris facta tribuatur, sed ejus gratiæ, de quo ait Apostolus: *Gratias autem Deo, qui dat nobis victoriam per Dominum nostrum Jesum Christum* (1 Cor. xv, 57). Qui et alio loco, *In his, inquit, omnibus supervincimus per eum qui dilexit nos* (Rom. viii, 37). Sciamus tamen quantalibet virtute præliandi vitis re-

pugnemus, vel etiam vitia superemus et subjugemus, quamdiu sumus in hoc corpore, nobis deesse non posse unde dicamus Deo, *Dimittite nobis debita nostra* (Math. vi, 12). In illo autem regno ubi semper cum corporibus immortalibus erimus, nec prælia nobis erunt ulla, nec debita; quæ nusquam et nunquam essent, si natura nostra, sicut recta creata est, permaneret. Ac per hoc etiam noster iste conflictus, in quo periclitamur, et de quo nos victoria novissima cupimus liberari, ad vitæ hujus mala pertinet, quam tot tantorumque testimonio malorum probamus esse damnatam.

CAPUT XXIV. — *De bonis quibus etiam hanc vitam damnationi obnoxiam Creator implevit.*

1. Jam nunc considerandum est, hanc ipsam miseriam generis humani, in qua laudatur justitia punientis, qualibus et quam multis impleverit bonis ejusdem bonitas, cuncta quæ creavit administrantis. Primum benedictionem illam quam protulerat ante peccatum, dicens, *Crecite, et multiplicamini, et replete terram* (Gen. i, 28), nec post peccatum voluit inhibere, mansique in stirpe damnata donata secunditas; nec illam vim mirabilem seminum, imo etiam mirabiliorum qua efficiuntur et semina, inditam corporibus humanis et quodammodo intexam, peccati vitium potuit auferre, quo nobis impacta est etiam necessitas mortis: sed utrumque simul currit isto quasi fluvio atque torrente generis humani; malum quod a parente trahitur, et bonum quod a create tribuitur. In originali malo duo sunt, peccatum atque supplicium: in originali bono alia duo, propagatio et conformatio. Sed quantum ad præsentem pertinet intentionem nostram, de malis, quorum unum de nostra venit audacia, id est peccatum, alterum de judicio Dei, id est supplicium, jam satis diximus. Nunc de bonis Dei, quæ ipsi quoque vitiatæ damnatæque naturæ contulit, sive usque nunc confert, dicere institui. Neque enim damnando aut totum abstulit quod dederat, alioquin nec esset omnino; aut eam removit a sua potestate, etiam cum diabolo pœnaliter subdidit, cum nec ipsum diabolum a suo alienaverit imperio; quandoquidem ut ipsius quoque diaboli natura subsistat, ille facit qui summe est, et facit esse quidquid aliquo modo est.

2. Duorum igitur illorum, quæ diximus bona etiam in naturam peccato vitiatam supplicioque damnatam de bonitatis ejus quodam veluti fonte manare, propagationem in primis mundi operibus benedictione largitus est, a quibus operibus die septimo requievit. Conformatio vero in illo ejus est opere, quo usque nunc operatur (Joan. vi, 17). Efficacem quippe potentiam suam si rebus subtrahat, nec progredi poterant et suis dimensis motibus peragere tempora, nec prorsus in eo quod create sumi aliquatenus permanebunt. Sic ergo creavit hominem Deus, ut illi adderet fertilitatem quamdam, qua homines alios propagaret, congenerans eis ipsam etiam propagandi possibilitatem, non necessitatem, quibus tamen voluit hominibus

(a) Ubi hoc ad verbum dicat Cicero, non sat memini. Sententia similis est in libro quinto de Finibus honorum et malorum, cap. 21: Præclare enim Plato: Beatum cui etiam in senectute contigerit, ut sapientiam verasque omnines assequi possit. » LUD. VIVAS.

¹ Sic Mss. Editi autem, *probavimus*.

² Lov., *si jam*. Abest, *jam*, ab editis aliis et Mss.

abstulit eam Deus, et steriles fuerunt: non tamen generi humano abstulit semel datam primis duobus conjugibus benedictionem generandi¹. Hæc ergo propagatio quamvis peccato ablata non fuerit, non tamen etiam ipsa talis est, qualis fuisset, si nemo peccasset. Ex quo enim homo in honore positus, posteaquam deliquit, comparatus est pecoribus (*Psal. XLVIII, 13.*), similiter generat: non in eo tamen penitus extincta est quedam velut scintilla rationis, in qua factus est ad imaginem Dei. Huic autem propagationi si conformatio non adhiberetur, nec ipsa in sui generis formas modosque procederet. Si enim non concubuissent homines, et nihilo minus Deus vellet implere terras hominibus; quomodo creavit unum sine commixtione maris et feminae, sic posset omnes: concumbentes vero nisi illo creante generantes esse non possunt. Sicut ergo ait Apostolus de institutione spirituali, qua homo ad pietatem justitiamque formatur, *Neque qui plantat est aliquid, neque qui rigat; sed qui incrementum dat Deus* (1 Cor. III, 7), ita etiam hic dici potest, *Nec qui concumbit, nec qui seminat, est aliquid; sed qui format² Deus. Nec mater quæ conceptum portat, et partum nutrit, est aliquid; sed qui incrementum dat Deus. Ipse³ namque operatione, qua nunc usque operatur, facit ut numeros suos explicent semina, et a quibusdam latentibus atque invisibilibus involucris in formas visibiles hujus quod aspiciamus decoris evolvant. Ipse incorpoream corporeamque naturam, illam præpositam, istam subjectam, miris modis copulans et connectens, animantem facit. Quod opus ejus tam magnum et mirabile est, ut non solum in homine, quod est animal rationale, et ex hoc cunctis terrenis animantibus excellentius atque præstantius, sed in qualibet minutissima muscula bene consideranti stuporem mentis ingerat, laudemque pariat Creatoris.*

3. Ipse itaque animæ humanæ mentem dedit, ubi ratio et intelligentiæ in infante sopita est quodammodo, quasi nulla sit, excitanda scilicet atque exserenda⁴ ætatis accessu, qua sit scientiæ capax atque doctrinæ, et habilis perceptioni veritatis et amoris boni: qua capacitate hauriat sapientiam virtutibusque sit prædita, quibus prudenter, fortiter, temperanter, et juste, adversus errores et cætera ingenerata vitia dimicet, eaque nullius rei desiderio nisi boni illius summi atque immutabilis vincat. Quod etsi non faciat, ipsa talium bonorum capacitas in natura rationali divinitus instituta quantum sit boni, quam mirabile opus Omnipotentis, quis competenter effatur, aut cogitat? Præter enim artes bene vivendi et ad immortalem perveniendi felicitatem, quæ virtutes vocantur, et sola Dei gratia, quæ in Christo est, filii promissionis regniæ donantur, nonne humano ingenio tot tantæque artes sunt inventæ et exercitæ, partim necessariae, partim voluptariæ⁵, ut tam excellens vis mentis atque rationis in his

etiam rebus quas superfluas, imo et periculosas perniciosasque appetit, quantum bonum¹ habeat in natura, unde ista potuit vel invenire, vel discere, vel exercere, testetur? Vestimentorum et ædificiorum ad opera quam mirabilia, quam stupenda, industria humana pervenerit; quo in agricultura, quo in navigatione profecerit; quæ in fabricatione quorumque vasorum, vel etiam statuarum et picturarum varietate excogitaverit et impleverit; quæ in theatris mirabilia spectantibus², audientibus incredibilia facienda et exhibenda molita sit; in capiendis, occidendis, domandis irrationalibus animantibus quæ et quanta repererit: adversus ipsos homines tot genera venenorum, tot armorum, tot machinamentorum, et pro salute mortali tuenda atque reparanda quot medicamenta atque adjuncta comprehenderit: pro voluptate faucium quot condimenta et gulæ irritamenta³ repererit: ad indicandas et suadendas cogitationes, quam multitudinem varietatunque signorum, ubi præcipuum locum verba et litteræ tenent; ad delectandos animos, quos elocutionis ornatus, quam diversorum carminum copiam; ad mulcendas aures, quot organa musica, quos cantilenæ modos excogitaverit: quantam peritiam dimensionum atque numerorum, meatusque et ordines siderum quanta sagacitate comprehenderit: quam multa rerum mundanarum cognitione se impleverit, quis possit eloqui, maxime si velimus non acervatim cuncta congerere, sed in singulis immorari? In ipsis postremo erroribus et falsitatibus defendendis, quam magna claruerint ingenia philosophorum atque hæreticorum, quis æstimare sufficiat? Loquimur enim nunc de natura mentis humanæ, qua ista vita mortalis ornatur, non de fide atque itinere veritatis, qua illa immortalis acquiritur. Hujus tantæ naturæ conditor cum sit utique Deus verus et summus, ipso cuncta quæ fecit administrante et summam potestatem summamque habente justitiam, nunquam profecto in has miseras decidisset, atque ex his, præter eos solos qui liberabuntur, in æternas esset itura⁴, nisi nimis grande peccatum in homine primo, de quo cæteri exorti sunt, præcessisset.

4. Jam vero in ipso corpore, quamvis nobis sit cum belluis mortalitate commune, multisque earum reperiatur infirmius, quanta Dei bonitas, quanta providentia tanti Creatoris apparet? Nonne ita sunt in eo loca sensuum et cætera membra disposita, speciesque ipsa ac figura et statura totius corporis ita modificata, ut ad ministerium animæ rationalis se indicet factum? Non enim ut animalia rationis expertia prona esse videmus in terram, ita creatus est homo: sed erecta in cælum corporis forma admonet eum quæ sursum sunt sapere (a). Porro mira mobili-

¹ In sola editione Lov., *quantum bonorum habet in natura.*

² Aliquot Mss., *expectantibus.*

³ Sic Mss. Editi vero, *incitamenta.*

⁴ Er. et Lov. hic addunt, *pænas*; pro quo subaudiendum, *miseras.*

(a) Conf. lib. I de Gen. cont. Manich., n. 28.

¹ Nonnulli probæ notæ Mss., *benedictione generalis.*

² Sola editio Lov., *informat.*

³ Aliquot Mss., *ipsa.*

⁴ Sic plures Mss. Editi vero, *exercenda.*

⁵ Nonnulli Mss., *voluptariæ.* — Sic etiam codd. 2051 et 2053. M.

tas, quæ linguae ac manibus attributa est, ad loquentium et scribendum apta atque conveniens, et ad opera artium plurimarum officiorumque complenda, nonne satis ostendit, quali animæ ut serviret tale sit corpus adjunctum? Quanquam et detractis necessitatibus operandi, ita omnium partium congruentia numerosa sit, et pulchra sibi parilitate respondeat, ut nescias utrum in eo condendo major sit utilitatis habita ratio, quam decoris. Certe enim nihil creatum videmus in corpore utilitatis causa, quod non habeat etiam decoris locum. Plus autem nobis id appareret, si numerosos mensurarum, quibus inter se cuncta connexa sunt et coaptata, nossemus: quos forsitan data opera in his quæ foris eminent, humana posset vestigare¹ solertia; quæ vero tecta sunt, atque a nostris remota conspectibus, sicuti est tanta perplexitas venarum atque nervorum et viscerum, secreta vitalium, invenire nullus potest. Quia etsi medicorum diligentia nonnulla crudelis, quos anatomicos appellant, laniavit corpora mortuorum, sive etiam inter manus secantis perscrutantisque morientium, atque in carnibus humanis satis inhumane abdita cuncta rimata est, ut quid, et quomodo, quibus locis curandum esset addiceret; numeros tamen de quibus loquor, quibus coaptatio, quæ *ἀρμονία* græce dicitur, tanquam cujusdam organi, extrinsecus atque intrinsecus totius corporis constat, quid dicam, nemo valuit invenire, quos nemo ausus est querere? Qui si noti esse potuissent, in interioribus quoque visceribus, quæ nullum ostendant decus, ita delectaret pulchritudo rationis, ut omni formæ apparenti quæ oculis placet, ipsius mentis, quæ oculis utitur, præferretur arbitrio. Sunt vero quædam ita posita in corpore, ut tantummodo decorem habeant, non et usum: sicut habet pectus virile mamillas, sicut facies barbam, quam non esse munimento, sed virili ornamento, indicant puræ facies feminarum, quas utique infirmiores muniri tutius conveniret. Si ergo nullum membrum est, in his quidem conspicuis (unde ambigit nemo), quod ita sit alicui operi accommodatum, ut non etiam sit decorum; sunt autem nonnulla, quorum solum decus, et nullus est usus: puto facile intelligi in conditione corporis dignitatem necessitati fuisse prælatam. Transitura est quippe necessitas, tempusque venturum quando sola invicem pulchritudine sine ulla libidine perfruamur: quod maxime ad laudem referendum est Conditoris, cui dicitur in Psalmo, *Confessionem et decorem induisti* (Psal. ciii, 1).

5. Jam cætera pulchritudo et utilitas creaturæ, quæ homini, licet in istos labores miseriasque projecto atque damnato, spectanda atque sumenda divina largitate concessa est, quo sermone terminari potest? in coeli et terræ et maris multimoda et varia pulchritudine, in ipsius lucis tanta copia tamque mirabili specie, in sole ac luna et sideribus, in opacitatibus nemorum, in coloribus et odoribus florum, in diversitate ac multitudine volucrum garrularum atque pictarum, in multiformi specie tot tantorumque

¹ Editi, *investigare*. Melius Mss., *testigare*.

animantium, quorum illa plus habent admirationis, quæ molis minimum (plus enim fornicularum et apicularum opera stupemus, quam immensa corpora balænarum¹); in ipsius quoque maris tam grandis spectaculo, cum sese diversis coloribus induit velut vestibus, et aliquando viride, atque hoc malis mediis, aliquando purpureum, aliquando cæruleum est. Quam porro delectabiliter spectatur etiam quando cumque turbatur, et sit inde major suavitas, quia sic demulcet intuentem, ut non jactet et quatit navigantem? Quid ciborum usquequaque copia contra famem? quid saporum diversitas contra fastidium, naturæ diffusa divitiis², non cœquorum arte ac labore quæsitæ? Quanta in tam multis rebus tuendæ ac recuperandæ³ salutis auxilia? Quam grata vicissitudo diei alternantis et noctis? Aurarum quam blanda temperies? In fruticibus et pecoribus indumentorum conficiendorum quanta materies? Omnia commemorare quis possit? Hæc autem sola, quæ a me velut in quemdam aggerem sunt coarctata, si vellem velut colligata involucra solvere atque discutere, quanta mihi mora esset in singulis, quibus plurima continentur? Et hæc omnia miserorum sunt damnatorumque solatia, non præmia beatorum. Quæ igitur illa sunt, si tot ac talia et tanta sunt ista? Quid dabit eis quos prædestinavit ad vitam, qui hæc dedit etiam eis quos prædestinavit ad mortem? quæ bona in illa beata vita faciet eos sumere, pro quibus in hac misera⁴ unigenitum Filium suum voluit usque ad mortem mala tanta perferre? Unde apostolus de ipsis in illud regnum prædestinatis loquens, *Qui proprio*, inquit, *Filio non pepercit, sed pro nobis omnibus tradidit eum, quomodo non et cum illo omnia nobis donabit* (Rom. viii, 32). Cum hæc promissio complebitur, quid erimus? quales erimus? Quæ bona in illo regno accepturi sumus, quandoquidem Christo moriente pro nobis tale jam pignus accepimus? Qualis erit spiritus hominis, nullum omnino habens vitium, nec sub quo jaceat, nec cui cedat, nec contra quod saltem laudabiliter dimicet, pacatissima virtute perfectus? Rerum ibi omnium quanta, quam speciosa, quam certa scientia, sine errore aliquo vel labore, ubi Dei sapientia de ipso suo fonte potabitur, cum summa felicitate, sine ulla difficultate? Quale erit corpus, quod omni modo spiritui subditum, et eo sufficienter vivificatum, nullis alimoniis indigebit? Non enim animale, sed spirituale erit, habens quidem carnis, sed sine ulla carnali corruptione substantiam.

CAPUT XXV. — *De pervicacia quorundam, qui resurrectionem carnis, quam, sicut prædictum est, totus mundus credit, impugnant.*

Verum de animi bonis, quibus post hanc vitam

¹ Editi, *balænarum*. At manuscripti, duplicata littera *l*, *ballenarum*. Dicitur a græco, *ballein*, juxta Isid., l. 12, c. 6.

² Sic Mss. At editi, *contra fastidium natura, diffusam dirimitus*.

³ Mss., *ac recipiendæ*.

⁴ Editi, *in hac miseria*. At Mss., *in hac misera*: supple, *vita*.

⁵ In editis, *donavit*. At in Mss., *donabit*, futuri temporis, juxta græcum *Karissetai*.

beatissimus perfruetur, non a nobis dissentiant philosophi nobiles : ¹ de carnis resurrectione contentundum ; hanc quantum possunt negant. Sed credentes multi, negantes paucissimos reliquerunt, et ad Christum, qui hoc quod istis videtur absurdum, in sua resurrectione monstravit, fidei corde conversi sunt, docti et indocti, sapientes mundi et insipientes. Hoc enim credidit mundus, quod prædixit Deus ; qui etiam hoc prædixit, quod hanc rem mundus fuerat crediturus. Neque enim Petri maleficiis eam ² cum laude credentium tanto ante prænuntiare compulsus est (a). Ille est enim Deus, quem (sicut jam dixi aliquoties, nec commemorare ³ me piget), consistente Porphyrio, atque id oraculis deorum suorum probare cupiente, ipsa numina perhorrescunt : quem sic laudavit, ut eum et Deum patrem et regem vocaret. Absit enim, ut sic intelligenda sint quæ prædixit, quomodo voluit hi qui hoc cum mundo non crediderunt, quod mundum crediturum esse prædixit. Cur enim non potius ita, sicut crediturus tanto ante prædictus est mundus, non sicut paucissimi garrunt, qui hoc cum mundo, quod crediturus prædictus est, credere noluerunt? Si enim propterea dicunt alio modo esse credenda, ne, si dixerint vana esse conscripta, injuriam faciant illi Deo, cui tam magnum perhibent testimonium ; tantam prorsus ei vel etiam graviolem faciunt injuriam, si aliter dicunt esse intelligenda, non sicut mundus ea credidit, quem crediturum ipse laudavit, ipse promisit, ipse complevit. Utrum ⁴ enim non potest facere ut resurgat caro, et vivat in æternum ; an propterea credendum non est id eum esse facturum, quia malum est atque indignum Deo (b)? Sed de omnipotentia ejus, qua tot et tanta facit incredibilia, jam multa diximus. Si voluit invenire quod omnipotens non potest, habent prorsus : ego dicam, Mentiri non potest. Credamus ergo quod potest, non credendo quod non potest. Non itaque credentes quod mentiri possit, credant esse facturum quod se facturum esse promisit : et sic credant, sicut credidit mundus, quem crediturum esse prædixit, quem crediturum esse laudavit, quem crediturum esse promisit, quem credidisse jam ostendit. Hoc autem malum esse, unde demonstrant? Non erit illic ulla corruptio, quod est corporis malum. De ordine elementorum jam disputavimus, de aliis hominum conjecturis satis diximus : quanta sit futura in corpore incorruptibili facilitas motus, de presentis bonæ valetudinis temperamento, quæ utique nullo modo illi comparanda est immortalitati, in libro tertio decimo satis, ut opinor, ostendimus. Legant superiora operis hujus, qui vel non legerunt, vel volunt ⁵ recollere quod legerunt.

¹ Hic Vind. Am. et Er. addunt, qui ; Lov., sed. Neutrū habent Mss.

² Sola editio Lov., ea.

³ In Mss., *commovere*.

⁴ Sic Mss. At editi, *Cur*.

⁵ Editi, veteribus libris *dissentientes, vel nolunt*.

(a) Supra, lib. 18, cap. 33.

(b) In hanc sententiam disputant Gentiles apud Tertullianum, in libro de Resurrectione carnis, cap. 4 sqq. Coquzus.

CAPUT XXVI. — *Quomodo Porphyrii definitio, qua beatissimis patat corpus omne fugiendum, ipsius Platonis sententia destruat, qui dicit summum Deum diis promississe, ut nunquam corporibus exarentur.*

Sed Porphyrius ait, inquit, ut beata sit anima, corpus omne esse fugiendum. Nihil ergo prodest quia incorruptibile diximus futurum corpus, si anima beata non erit, nisi corpus omne effugerit. Sed jam et hinc in libro memorato quantum oportuit disputavi (cap. 16, 17) : verum hic unum inde tantum commemorabo. Emendet libros suos istorum omnium magister Plato, et dicat eorum deos, ut beati sint, sua corpora fugituros, id est, esse morituros, quos in cœlestibus corporibus dixit inclusos ; quibus tamen Deus, a quo facti sunt, quo possent esse securi, immortalitatem, id est, in eisdem corporibus æternam permausionem, non eorum natura id habente, sed suo consilio prævalente, promisit. Ubi etiam evertit illud quod dicunt, quoniam est impossibilis, ideo resurrectionem carnis non esse credendam. Apertissime quippe juxta eundem philosophum, ubi diis a se factis promisit Deus non factus immortalitatem, quod impossibile est, se dixit esse facturum. Sic enim eum locutum narrat Plato ; *Quoniam estis orti, inquit, immortales esse et indissolubiles non potestis : non tamen dissolvemini, neque vos ulla mortis fata periment, nec erunt valentiora, quam consilium meum, quod majus est vinculum ad perpetuitatem vestram, quam illa quibus estis colligati (a)*. Si, non solum absurdi, sed surdi non sunt qui hæc audiunt, non utique dubitant diis factis, ab illo deo qui eos fecit, secundum Platonem, quod est impossibile fuisse promissum. Qui enim dicit, *Vos quidem immortales esse non potestis, sed mea voluntate immortales eritis* : quid aliud dicit, quam id quod fieri non potest, me faciente tamen eritis? Ille igitur carnem incorruptibilem, immortalem, spiritualem resuscitabit, qui juxta Platonem, id quod impossibile est, se facturum esse promisit. Quid adhuc, quod promisit Deus, quod Deo promittenti credidit mundus, qui etiam ipse promissus est crediturus, esse impossibile clamant? Quandoquidem nos Deum, qui etiam secundum Platonem facit impossibilia, id facturum esse clamamus. Non ergo, ut beatæ sint animæ, corpus est omne fugiendum, sed corpus incorruptibile recipiendum. Et in quo convenientius incorruptibili corpore lætabuntur, quam in quo corruptibili gemuerunt? Sic enim non in eis erit illa dira cupiditas, quam posuit ex Platone Virgilius, ubi ait :

Rursum et incipiant in corpora velle reverti.

(Æneid. lib. 6, vers. 731.)

Sic, inquam, cupiditatem revertendi ad corpora non habebant, cum corpora, in quæ reverti cupiunt, secum habebunt ; et sic habebunt, ut nunquam non habeant, nunquam ea prorsus vel ad exiguum quamlibet tempus ulla morte deponant.

(a) Conf. supra, lib. 13, cap. 16.

CAPUT XXVII. — *De contrariis definitionibus Platonis atque Porphyrii, in quibus si uterque alteri cederet, a veritate neuter devieret.*

Singula quædam dixerunt Plato atque Porphyrius, quæ si inter se communicare potuissent, facti essent fortasse Christiani. Plato dixit, sine corporibus animas in æternum esse non posse. Ideo enim dixit, etiam sapientium animas post quamlibet longum tempus, tamen ad corpora redituras. Porphyrius autem dixit, animam purgatissimam, cum redierit ad Patrem, ad hæc mala mundi nunquam esse redituram. Ac per hoc, quod verum vidit Plato, si dedisset Porphyrio, etiam justorum atque sapientium purgatissimas animas ad humana corpora redituras; rursus quod verum vidit Porphyrius, si dedisset Platoni, nunquam redituras ad miserias corruptibilis corporis animas sanctas: ut non singuli hæc singula, sed ambo et singuli utrumque dicerent, putò quod viderent esse jam consequens, ut et redirent animæ ad corpora, et talia reciperent corpora, in quibus beate atque immortaliter viverent. Quoniam secundum Platonem, etiam sanctæ animæ ad humana corpora redibunt; secundum Porphyrium, ad mala mundi hujus sanctæ animæ non redibunt. Dicat itaque cum Platone Porphyrius, Redibunt ad corpora: dicat Plato cum Porphyrio, Non redibunt ad mala: et ad ea corpora redire consentient, in quibus nulla patiantur mala. Hæc itaque non erunt nisi illa quæ promittit Deus, beatas animas in æternum cum sua æterna carne facturus¹. Hoc enim, quantum existimo, jam facile nobis concederent ambo, ut qui faterentur ad immortalia corpora redituras animas esse sanctorum, ad sua illas redire permetterent, in quibus mala hujus sæculi pertulerunt, in quibus Deum, ut his malis carerent, pie fideliterque coluerunt.

CAPUT XXVIII. — *Quid ad veram resurrectionis fidem vel Plato, vel Labeo, vel etiam Varro conferre sibi potuerint, si opiniones eorum in unam sententiam convenissent.*

Nonnulli nostri, propter quoddam præclarissimum loquendi genus (a), et propter nonnulla quæ veraciter sensit, amantes Platonem, dicunt eum aliquid simile nobis etiam de mortuorum resurrectione sensisse (b). Quod quidem sic tangit in libris de Republica Tullius, ut eum lusis^c potius, quam quod id verum esset, affirmet dicere voluisse. Inducit enim hominem revivisse, et narrasse quædam quæ Platonicis disputationibus congruebant (c). Labeo etiam duos dicit uno

¹ Ita Vird. Arn. Er. et Mss. Al. Lov., *victuras*.

(a) « Cygnus de sinu Socratis demulcens homines, discipulus Plato est, » Tertullianus, de Anima, cap. 46.

(b) Vid. Euseb. lib. 11 de Præpar. Evang., cap. 33, in nostris *Démonstrations évangéliques*, tom. 1. M.

(c) Herum Pamphylium, qui in acie occubuit, Plato in fine libri de Republica, decimo post mortem die redditum vitæ scribit. « Hanc Cicero fabulam, » inquit Macrobius in libro primo Somnii, « licet ab indoctis quasi ipse vere conscius doleat irrisam, ex eorum tamen stolidæ representationis vitæ, excitari narraturum, quam reviviscere maluit. »

die fuisse defunctos, et occurrisset invicem in quodam cœpito, deinde ad corpora sua jussos fuisse remeare, et constituisset inter se amicos se esse victuros, atque ita esse factum, donec postea morerentur (a). Sed isti auctores talem resurrectionem corporis factam fuisse narrarunt, quales fuerunt eorum quos resurrexisset novimus, et huic quidem redditos vitæ, sed non eo modo ut non morerentur ulterius. Mirabilis autem quiddam Marcus Varro ponit in libris, quod conscripsit de Gente populi Romani: cujus putavi verba ipsa esse ponenda. *Genethliaci quidam scripserunt, inquit, esse in renascendis hominibus quam appellant παλιγγενεσιαν Græci: hæc scripserunt confici in annis numero quadringentis quadraginta, ut idem corpus et eadem anima, quæ fuerint conjuncta in homine aliquando, eadem rursus redeant in conjunctionem.* Iste Varro quidem, sive illi Genethliaci nescio qui (non enim nomina eorum prodidit, quorum commemoravit sententiam), aliquid dixerunt, quod licet falsum sit (cum enim semel ad eadem corpora quæ gesserunt, animæ redierint, nunquam ea postea sunt relicta); tamen multa illius impossibilitatis, quæ contra nos isti garriunt, argumenta convellit, et destruit. Qui enim hoc sentiunt, sive senserunt, non eis visum est fieri non posse, ut dilapsa cadavera in auras, in pulverem, in cinerem, in humores, in corpora vescentium bestiarum, vel ipsorum quoque hominum, ad id rursus redeant, quod fuerunt. Quapropter Plato et Porphyrius, vel potius quicumque illos diligunt et adhuc vivunt, si nobis consentiant etiam sanctas animas ad corpora redituras, sicut ait Porphyrius; ut ex his fiat consequens quod fides prædicat christiana, talia corpora recepturas in quibus sine ullo malo in æternum feliciter vivant; assumant etiam hoc de Varrone, ut ad eadem corpora redeant, in quibus antea fuerunt; et apud eos tota quæstio de carnis in æternum resurrectione solvetur.

CAPUT XXIX. — *De utilitate visionis, quæ in futuro sæculo sancti Deum videbunt.*

1. Nunc jam quid acturi sint in corporibus immortalibus atque spiritualibus sancti, non adhuc eorum carne carnaliter, sed spiritualiter jam vivente, quantum Dominus dignatur adjuvare, videamus. Et illa quidem actio, vel potius quies atque otium quale futurum sit, si verum velim dicere, nescio. Non enim hoc unquam per sensus corporis vidi. Si autem mente, id est intelligentia, vidisse me dicam, quantum est, aut quid est nostra intelligentia ad illam excellentiam? Ibi est enim *pax Dei, quæ*, sicut ait Apostolus, *superat omnem intellectum* (Philipp. iv, 7): quem nisi nostrum, aut fortasse etiam¹ sanctorum Angelorum? non enim et Dei. Si ergo sancti in Dei pace victuri sunt, profecto in ea pace victuri sunt, quæ superat omnem intellectum. Quoniam nostrum quidem supe-

¹ Arn. Er. et Lov. addunt hic, *omnium*: quod abest a manuscriptis et a Vind.

(a) Vide Plinium, lib. 7, ca. 85.

rat, non est dubium : si autem superat et Angelorum, ut nec ipsos excepisse videatur, qui sit, *omnem intellectum*; secundum hoc dictum esse debemus accipere, quia pacem Dei, qua ipse Deus peccatus est, sicut novit Deus, non eam nos sic possumus nosse, nec ulli Angeli. Superat itaque *omnem intellectum*, non dubium quod præter suum. Sed quia et nos pro modo nostro pacis ejus participes facti summam in nobis atque inter nos et cum ipso pacem, quantum nostrum summum est, obtinebimus : isto modo pro suo modo sciunt eam sancti Angeli, homines autem nunc longe infra, quantumlibet propectu mentis excellent. Considerandum est enim quantus vir dicebat, *Ex parte scimus, et ex parte prophetamus, donec veniat quod perfectum est (I Cor. xiii, 9, 10)*; et, *Videmus nunc per speculum in ænigmate, tunc autem facie ad faciem (Ibid. 12)*. Sic jam vident sancti Angeli, qui etiam nostri Angeli dicti sunt, quia eruti de potestate tenebrarum, et accepto Spiritus pignore translati ad regnum Christi, ad eos Angelos jam cœpimus pertinere, cum quibus nobis erit sancta atque dulcissima, de qua jam tot libros scripsimus, Dei civitas ipsa communis. Sic sunt ergo Angeli nostri, qui sunt Angeli Dei, quemadmodum Christus Dei, Christus est noster. Dei sunt, quia Deum non reliquerunt : nostri sunt, quia suos cives nos habere cœperunt. Dixit autem Dominus Jesus, *Videte ne contemnatis unum de pusillis istis. Dico enim vobis, quia Angeli eorum in caelis semper vident faciem Patris mei, qui in caelis est (Math. xviii, 10)*. Sicut ergo illi vident, ita et nos visuri sumus : sed nondum ita videmus. Propter quod ait Apostolus, quod paulo ante dixi, *Videmus nunc per speculum in ænigmate, tunc autem facie ad faciem*. Præmium itaque fidei nobis visio ista servatur, de qua et Joannes apostolus loquens, *Cum apparuerit, inquit, similes ei erimus, quoniam videbimus eum sicuti est (I Joan. iii, 2)*. Facies autem Dei manifestatio ejus intelligenda est, non aliquod tale membrum, quale nos habemus in corpore, atque isto nomine nuncupamus (a).

2. Quapropter cum ex me queritur, quid actari sint sancti in illo corpore spirituali, non dico quod jam video, sed dico quod credo : secundum illud quod in Psalmo lego, *Credidi, propter quod locutus sum (Psal. cxv, 10)*. Dico itaque, Visuri sunt Deum in ipso corpore : sed utrum per ipsum, sicut per corpus nunc videmus solem, lunam, stellas, mare, ac terram, et quæ sunt in ea, non parva quæstio est. Durum est enim dicere quod sancti talia corpora tunc habebunt, et non possint oculos claudere atque aperire cum volent. Durius autem, quod ibi Deum, quisquis oculos clausit, non videbit. Si enim propheta Elisæus puerum suum Giezi absens corpore vidit accipientem munera, quæ dedit ei Naaman Syrus, quem propheta memoratus a lepræ deformitate mundaverat, quod servus nequam domino suo non vidente, latenter se fecisse putaverat (IV Reg. v, 8-27); quanto magis in

illo corpore spirituali videbunt sancti omnia, non solum si oculos claudant, verum etiam unde sunt corpore absentes? Tunc enim erit perfectum illud, de quo loquens Apostolus, *Ex parte, inquit, scimus, et ex parte prophetamus; cum autem venerit quod perfectum est, quod ex parte est evacuabitur*. Deinde ut, quemodo posset, aliqua similitudine ostenderet, quantum ab illa quæ futura est distet hæc vita, non qualiumcumque hominum, verum etiam qui præcipua hic sanctitate sunt præditi : *Cum essem, inquit, parvulus, quasi parvulus sapiebam, quasi parvulus loquebar, quasi parvulus cogitabam; cum autem factus sum vir, evacuavi ea quæ parvuli erant. Videmus nunc per speculum in ænigmate, tunc autem facie ad faciem. Nunc scio ex parte, tunc autem cognoscam sicut et cognitus sum (I Cor. xiii, 11, 12)*. Si ergo in hac vita, ubi hominum mirabilium prophetia ita comparanda est illi vitæ quasi parvuli ad juvenem, vidit tamen Elisæus accipientem munera servum suum, ubi ipse non erat; itane cum venerit quod perfectum est, nec jam corpus corruptibile aggravabit animam, sed incorruptibile nihil impediet, illi sancti ad ea quæ videnda sunt oculis corporeis, quibus Elisæus absens ad servum suum videndum non indiguit, indigebunt? Nam secundum interpretes Septuaginta, ista sunt ad Giezi verba Prophetæ : *Nonne cor meum iit tecum, quando conversus est vir de curru suo in obvium tibi, et accepisti pecuniam (IV Reg. v, 26)*? et cætera. Sicut autem ex Hebræo interpretatus est presbyter Hieronymus, *Nonne cor meum, inquit, in præsentem erat, quando reversus est homo de curru suo in occursum tui*? Corde suo se dixit hoc vidisse Propheta, adjuto quidem mirabiliter, nullo dubitante, divinitus. Sed quanto amplius tunc omnes munere isto abundabunt, cum Deus erit omnia in omnibus (I Cor. xv, 28)? Habebunt tamen etiam illi oculi corporei officium suum, et in loco suo erunt, uteturque illis spiritus per spirituale corpus. Neque enim et ille Propheta, quia non eis indiguit ut videret absentem, non eis usus est ad videnda præsentia; quæ tamen spiritu videre posset, etiamsi illos clauderet, sicut vidit absentia, ubi cum eis ipse non erat. Absit ergo, ut dicamus illos sanctos in illa vita Deum clausis oculis non visuros, quem spiritu semper videbunt.

3. Sed utrum videbunt et per oculos corporis, cum eos apertos habebunt, inde quæstio est. Si enim tantum poterunt in corpore spirituali eo modo utique etiam ipsi oculi spirituales, quantum possunt isti quales nunc habemus; procul dubio per eos Deus videri non poterit. Longe itaque alterius erunt potentia, si per eos videbitur incorporea illa natura, quæ non continetur loco, sed ubique tota est. Non enim quia dicimus Deum et in cœlo esse, et in terra (ipse quippe ait per Prophetam, *Cælum et terram ego impleo [Jerem. xxiii, 24]*), aliam partem dicturi sumus eum in cœlo habere, et in terra aliam : sed totus in cœlo est,

¹ Sic Mss. At Vind. Am. Er., *Nonne cor meum tecum erat, quando conversus est, etc.* Lov., *Nonne cor meum lacum erat, et novi quod conversus est, etc.*

¹ Sola editio Lov., *modulo.*
(a) Conf. Epist. 147.

totus in terra : non alternis temporibus , sed utrumque simul , quod nulla natura corporalis potest. Vis itaque præpollentior ocalorum erit illorum , non ut acrius videant , quam quidam perhibentur videre serpentes vel aquas (quantalibet enim acrimonia cernendi eadem quoque animalia nihil aliud possunt videre quam corpora) : sed ut videant et incorporalia. Et fortasse ista virtus magna cernendi data fuerit ad horam etiam in isto mortali corpore oculis sancti viri Job , quando ait ad Deum , *In obauditu auris audiveram¹ te prius , nunc autem oculus meus videt te ; propterea desepxi memetipsum , et distabui , et existinavi me terram et cinerem (Job XLII, 5 et 6, sec. LXX)*. Quamvis hic nihil prohibeat oculum cordis intelligi , de quibus oculis ait Apostolus : *Illuminatos oculos habere cordis vestri (Ephes. 1, 18)*. Ipsi autem videri Deum , cum videbitur , Christianus ambigit nemo , qui fideliter accipit , quod ait Deus ille magister : *Beati mundi corde , quoniam ipsi Deum videbunt (Math. v, 8)*. Sed utrum etiam corporalibus oculis ibi videatur , hoc in ista questione versamus.

4. Illud enim quod scriptum est , *Et videbit omnis caro salutare Dei (Luc. III, 6)* , sine ullius nodo difficultatis sic intelligi potest , ac si dictum fuerit , *Et videbit omnis homo Christum Dei* : qui utique in corpore visus est , et in corpore videbitur , quando vivos et mortuos iudicabit. Quod autem ipse sit salutare Dei , multa sunt et alia testimonia Scripturarum : sed evidentius venerandi illius senis Simeonis verba declarant , qui cum infantem Christum accepisset in manus suas , *Nunc , inquit , dimittis servum tuum , Domine , secundum verbum tuum , in pace ; quoniam viderant oculi mei salutare tuum. (Id. II, 29, 30)*. Illud etiam quod ait supra memoratus Job , sicut in exemplaribus quæ ex Hebræo sunt invenitur , *Et in carne mea videbo Deum (Job XIX, 26, sec. Vulgatam)* : resurrectionem quidem carnis sine dubio prophetavit (a) ; non tamen dixit , *Per carnem meam*. Quod quidem si dixisset , posset Deus Christus intelligi , qui per carnem in carne videbitur : nunc vero potest et sic accipi. *In carne mea videbo Deum²* ; ac si dixisset , *In carne mea ero , cum videbo Deum*. Et illud quod ait Apostolus , *Facie ad faciem (I Cor. XIII, 12)* , non cogit ut Deum per hanc faciem corporalem , ubi sunt oculi corporales , nos visuros esse credamus , quem spiritu sine intermissione videbimus. Nisi enim esset etiam interioris hominis facies , non diceret idem apostolus , *Nos autem revelata facie gloriam Domini speculantes , in eandem imaginem transformamur de gloria in gloriam , tanquam a Domini spiritu³* (II Cor. III, 18). Nec aliter intelligimus quod in Psalmo canitur , *Accedite ad eum , et illuminamini , et facies vestras*

¹ Ita in Mss., At in editis, *obaudiebam*.

² Apud Vind. Am. et Er. additur hoc tantum loco, *Salvatorem meum*.

³ Editi, *tanquam ad Domini spiritum*. Castigantur ex manuscriptis.

(a) Ita Hieronymus, Epistola 61, ad Pammachium, citato hoc loco Job : « Quid hæc. » inquit, « prophetia manifestus? » Nullus tam aperte post Christum, quam iste ante Christum, de resurrectione loquitur. » COGROS.

non erubeant (Paul. XXXII, 6). Fide quippe acceditur ad Deum , quam cordis constat esse , non corporis. Sed quia spirituale corpus nescimus quomodo habebit accessus (de re quippe inexperta loquimur) ; ubi aliqua , quæ aliter intelligi nequeat , divinarum Scripturarum non occurrit et succurrit auctoritas , necesse est ut contingat in nobis quod legitur in libro Sapientiarum : *Cogitationes mortalium timidæ , et incertæ providentiæ nostræ (Sap. IX, 14)*.

5. Ratiocinatio quippe illa philosophorum , qua disputant ita mentis aspectu intelligibilia videri , et sensu corporis sensibilia , id est , corporalia , ut nec intelligibilia per corpus , nec corporalia per se ipsam⁴ mens valeat intueri , si posset nobis esse certissima , profecto certum esset per oculos corporis etiam spiritualis nullo modo posse videri Deum. Sed istam ratiocinationem et vera ratio et prophetica irridet auctoritas. Quis enim ita sit aversus a vero , ut dicere audeat Deum corporalia ista nescire? Numquid ergo corpus habet , per cuius oculos ea possit addiscere? Deinde quod de propheta Elisæo paulo ante diximus , nonne satis indicat etiam spiritu , non per corpus , corporalia posse cerni? Quando enim servus ille munera accepit , utique corporaliter gestum est ; quod tamen Propheta non per corpus , sed per spiritum vidit. Sicut ergo constat videri corpora spiritu ; quid si tanta erit potentia spiritualis corporis , ut corpore videatur et spiritus? Spiritus enim est Deus. Deinde vitam quidem suam , qua nunc vivit in corpore , et hæc terrena membra vegetat facitque vivantia , interiore sensu quisque , non per corporeos oculos , novit : aliorum vero vitas , cum sint invisibiles , per corpus videt. Nam unde viventia discernimus a non viventibus corpora , nisi corpora simul vitasque videamus , quas nisi per corpus videre non possumus? Vitas autem sine corporibus corporeis oculis non videmus.

6. Quamobrem fieri potest , valdeque credibile est , sic nos esse visuros mundana tunc corpora cæli novi et terræ novæ , ut Deum ubique præsentem et universa etiam corporalia gubernantem , per corpora quæ gestabimus , et quæ conspiciemus quaquaversum oculos duxerimus , clarissima perspicuitate videamus : non sicut nunc invisibilia Dei , per ea quæ facta sunt , intellecta conspiciuntur (Rom. I, 20) per speculum in ænigmate , et ex parte (I Cor. XIII, 12) , ubi plerumque in nobis valet fides qua credimus , quam rerum corporalium species quam per oculos cernimus corporales. Sed sicut homines , inter quos viventes motusque vitales exserentes⁵ vivimus , mox ut aspiciamus , non credimus vivere , sed videmus ; cum eorum vitam sine corporibus videre nequeamus , quam tamen in eis per corpora remota omni ambiguitate conspiciamus : ita quæcumque spiritualia illa lumina corporum nostrorum circumferemus , incorporalem Deum omnia regentem , etiam per corpora contuebitur. Aut ergo

⁴ Sic Mss. Editi autem Am. Er. Lov., *nequeant* : et infra habebant cum Vind., *non occurrit , sed succurrit auctoritas*.

⁵ Ita Vind. Am. et manuscripti. At Er. et Lov., *per se ipsa*.

⁶ Am. et Er., *exercentes*.

per illos oculos sic videbitur Deus, ut aliquid habeant in tanta excellentia menti simile, quo et incorporea natura cernatur, quod illis exemplis sive Scripturarum testimoniis divinarum vel difficile vel impossibile est ostendere: aut quod est ad intelligendum facilius, ita Deus nobis erit notus atque conspicuus, ut videatur spiritu a singulis nobis in singulis nobis, videatur ab altero in altero, videatur in se ipso, videatur in cælo novo et in terra nova, atque in omni quæ tunc fuerit creatura; videatur et per corpora in omni corpore quocumque fuerint spiritualis corporis oculi acie perveniente directi. Patebunt etiam cogitationes nostræ invicem nobis. Tunc enim implebitur quod Apostolus cum dixisset, *Nolite ante tempus judicare quidquam; mox addidit, donec veniat Dominus, et illuminet abscondita tenebrarum, et manifestabit cogitationes cordis, et tunc laus erit unicuique a Deo* (I Cor. iv, 5).

CAPUT XXX. — *De æterna felicitate civitatis Dei, sabbatoque perpetuo.*

1. Quanta erit illa felicitas, ubi nullum erit malum, nullum latebit bonum, vacabitur Dei laudibus, qui erit omnia in omnibus! Nam quid aliud agatur, ubi neque ulla desidia cessabitur, neque ulla indigentia laborabitur, nescio. Admoneor etiam sancto Cantico, ubi lego, vel audio, *Beati qui habitant in domo tua, Domine, in sæcula sæculorum laudabunt te* (Psal. lxxxiii, 5). Omnia membra et viscera incorruptibilis corporis, quæ nunc videmus per usus necessitatis varios distributa, quoniam tunc non erit ipsa necessitas, sed plena, certa, secunda, sempiterna felicitas, proficient in laudibus Dei. Omnes quippe illi, de quibus jam sum locutus, qui nunc latent, harmoniæ corporalis numeri non latebunt, intrinsecus et extrinsecus per corporis cuncta dispositi; et cum cæteris rebus, quæ ibi magnæ atque mirabiles videbuntur, rationales mentes in tanti artificis laudem rationabilis pulchritudinis delectatione succendent. Qui motus illic talium corporum sint futuri temere definire non audeo, quod excogitare non valeo. Tamen et motus et status, sicut ipsa species, decens erit, quicumque erit, ubi quod non decebit, non erit. Certe ubi volet spiritus, ibi protinus erit corpus: nec volet aliquid spiritus, quod nec spiritus possit decere, nec corpus. Vera ibi gloria erit, ubi laudantis nec errore quisquam, nec adulatione laudabitur. Verus honor, qui nulli negabitur digno, nulli deferetur indigno: sed nec ad eum ambiet ullus indignus, ubi nullus permittetur esse nisi dignus. Vera pax, ubi nihil adversi, nec a se ipso, nec ab alio quisquam patietur. Præmium virtutis erit ipse qui virtutem dedit, eique se ipsum, quo melius et majus nihil possit esse, promisit. Quid est enim aliud quod per Prophetam dixit, *Ero illorum Deus, et ipsi erunt mihi plebs* (Levit. xxvi, 12); nisi, Ego ero unde satientur, ego ero quæcumque ab hominibus honeste desiderantur, et vita, et salus, et victus, et copia, et gloria, et honor, et pax, et omnia bona? Sic enim et illud recte

intelligitur, quod ait Apostolus, *ut sit Deus omnis in omnibus* (I Cor. xv, 28). Ipse finis erit desideriorum nostrorum, qui sine fine videbitur, sine fastidio amabitur, sine fatigatione laudabitur. Hoc munus, hic affectus, hic ætus profecto erit omnibus, sicut ipsa vita æterna, communis.

2. Cæterum qui futuri sint pro meritis præmiorum etiam gradus honorum atque gloriarum, quis est idoneus cogitare, quanto magis dicere? Quod tamen futuri sint, non est ambigendum. Atque id etiam beata civitas illa magnum in se bonum videbit, quod nulli superiori ullus inferior invidet, sicut nunc non invident Archangelis Angeli cæteri: tamque nolet¹ esse unusquisque quod non accepit, quamvis sit peccatissimo concordia vinculo ei qui accepit obstrictus, quam nec in corpore vult oculus esse qui est digitus, cum membrum utrumque contineat totius carnis peccata compago. Sic itaque habebit donum alius alio minus, ut hoc quoque donum habeat, ne velit amplius

3. Nec ideo liberum arbitrium non habebunt, quia peccata eos delectare non poterunt. Magis quippe erit liberum, a delectatione peccandi usque ad delectationem non peccandi indeclinabile² liberatum. Nam primum liberum arbitrium, quod homini datum est, quando primum creatus est rectus, potuit non peccare, sed potuit et peccare: hoc autem novissimum eo potentius erit, quo peccare non poterit. Verum hoc quoque Dei munere, non suæ possibilitate naturæ. Aliud est enim, esse Deum; aliud, participem Dei. Deus natura peccare non potest; particeps vero Dei ab illo accipit, ut peccare non possit. Servandi autem gradus erant divini muneris, ut primum daretur liberum arbitrium, quo non peccare posset homo; novissimum, quo peccare non posset: atque illud ad comparandum meritum, hoc ad recipiendum præmium pertineret. Sed quia peccavit ista natura cum peccare potuit, largiore gratia liberatur, ut ad eam perducatur libertatem, in qua peccare non possit (a). Sicut enim prima immortalitas fuit, quam peccando Adam perdidit, posse non mori, novissima erit non posse mori: ita primum liberum arbitrium posse non peccare, novissimum non posse peccare. Sic enim erit inamissibilis voluntas pietatis et æquitatis, quomodo est felicitatis. Nam utique peccando nec pietatem nec felicitatem tenuimus, voluntatem vero felicitatis nec perditam felicitatem perdidimus. Certe Deus ipse numquid, quoniam peccare non potest, ideo liberum arbitrium habere negandus est? Erit ergo illius civitatis et una in omnibus, et inseparabilis in singulis voluntas libera, ab omni malo liberata, et impleta omni bono, fruens indeficienter æternorum jucunditate gaudiorum, oblita culparum, oblita poenarum; nec tamen ideo suæ liberationis oblita, ut liberatori suo non sit grata³.

¹ Er., *tam nolit*. Lov., *tanquam nollet*. Emendantur auxilio manuscriptorum.

² Cod. 238, *indeclinabile*. M.

³ Lov., *non sit ingrata*. Exponendum, *non*; quod merito (a) Conf. Enchirid., n. 28.

¹ Sic Mss. Editi vero, *manifestet*.

² In sola editione Lov., *rationalis*.

³ Editi addunt, *ibi est*; quod hic non habent Mss.

4. Quantum ergo attinet ad scientiam rationalem, memor præteritorum etiam malorum suorum; quantum autem ad experientis sensum, prorsus immemor. Nam et peritissimus medicus, sicut arte sciuntur, omnes fere morbos corporis novit: sicut autem corpore sentiuntur, plurimos nescit, quos ipse non passus est. Ut ergo scientiæ malorum duæ sunt; una, qua potentiam mentis non latent; altera, qua experientis sensibus inhærent (aliter quippe sciuntur omnia vitia per scientiæ doctrinam, aliter per insipientis pessimam vitam): ita et obliviones malorum duæ sunt. Aliter ea namque obliviscitur eruditus et doctus, aliter expertus et passus: ille, si peritiam negligat; iste, si miseria careat. Secundum hanc oblivionem quam posteriore loco posui, non erunt memores sancti præteritorum malorum: carebunt enim omnibus, ita ut penitus deleantur de sensibus eorum. Ea tamen potentia scientiæ, quæ magna in eis erit, non solum sua præterita, sed etiam damnatorum eos sempiterna miseria non latebit. Alioquin si se fuisse miseros nescituri sunt, quomodo, sicut ait Psalmus, misericordias Domini in æternum cantabunt (*Psal. lxxxviii, 2*)? Quo cantico in gloriam gratiæ Christi, cujus sanguine liberati sumus, nihil erit profecto illi jucundius civitati. Ibi perficietur, *Vacate, et videte quoniam ego sum Deus* (*Psal. xlv, 11*). Quod erit¹ vere maximum sabbatum non habens vesperam, quod commendavit Dominus in primis operibus mundi, ubi legitur: *Et requievit Deus die septimo ab omnibus operibus suis, quæ fecit: et benedixit Deus diem septimum, et sanctificavit eum, quia in eo requievit ab omnibus operibus suis, quæ inchoavit Deus facere* (*Gen. ii, 2, 3*). Dies enim septimus etiam nos ipsi erimus, quando ejus fuerimus benedictione et sanctificatione pleni atque refecti². Ibi vacantes videbimus quoniam ipse est Deus: quod nobis ipsi esse volumus, quando ab illo cecidimus, audientes a seductore, *Eritis sicut dii* (*Id. iii, 5*); et recedentes a vero Deo, quo faciente dii essemus ejus participatione, non desertione. Quid enim sine illo fecimus, nisi quod in ira ejus defecimus (*Psal. lxxxix, 9*)? A quo refecti, et gratia majore perfecti, vacabimus in æternum, videntes quia ipse est Deus, quo pleni erimus, quando ipse erit omnia in omnibus. Nam et ipsa

bona opera nostra, quando ipsius potius intelliguntur esse quam nostra, tunc nobis ad hoc sabbatum adipiscendum imputantur. Quia si nobis ea tribuerimus, servilia erunt; cum de sabbato dicatur, *Omne opus servile in eo³ non facietis* (*Deut. v, 14*). Propter quod et per Ezechielem prophetam dicitur, *Et sabbata mea dedi eis in signum inter me et inter eos, ut scirent quia ego Dominus qui sanctifico eos* (*Ezech. xx, 12*). Hoc perfecte tunc sciemus, quando perfecte vacabimus, et perfecte videbimus quia ipse est Deus.

5. Ipse etiam numerus ætatum, veluti dierum, si secundum eos articulos temporis computetur, qui in Scripturis videntur expressi, iste sabbatismus evidentiùs apparebit, quoniam septimus invenitur: ut prima ætas tanquam dies primus sit ab Adam usque ad diluvium, secunda inde usque ad Abraham, non æqualitate temporum, sed numero generationum: denas quippe habere reperiuntur. Hinc jam, sicut Mattheus evangelista determinat, tres ætates usque ad Christi subsequuntur adventum, quæ singulæ denis et quaternis generationibus explicantur: ab Abraham usque ad David una, altera inde usque ad transmigrationem in Babyloniam, tertia inde usque ad Christi carnalem nativitatem. Fiunt itaque omnes quinque. Sexta nunc agitur, nullo generationum numero metienda, propter id quod dictum est, *Non est vestrum scire tempora, quæ Pater posuit in sua potestate* (*Act. i, 7*). Post hanc tanquam in die septimo requiescet Deus, cum eundem septimum diem, quod nos erimus, in se ipso Deo³ faciet requiescere. De istis porro ætatibus singulis nunc diligenter longum est disputare. Hæc tamen septima erit sabbatum nostrum, cujus finis non erit vespera, sed dominicus dies velut octavus æternus, qui Christi resurrectione sacratus est, æternam non solum spiritus, verum etiam corporis requiem præfigurans. Ibi vacabimus, et videbimus; videbimus, et amabimus; amabimus, et laudabimus. Ecco quod erit in fine sine fine. Nam quis alius noster est finis, nisi pervenire ad regnum, cujus nullus est finis?

6. Videor mihi debitum ingentis hujus operis, adjuvante Domino, reddidisse. Quibus parum, vel quibus nimium est, mihi ignoscant: quibus autem satis est, non mihi, sed Deo mecum gratias congratulantes agant. Amen.

omissum est in editis Vind. Am. et Er. vel pro, *ingrata*, legendum ut in melioris notæ manuscriptis, *grata*.

¹ Er. et Lov., *Quod erit ibi*. Abest, *ibi*, ab aliis libris.

² In plerisque mss., *perfecti*.

¹ Abest, *in eo*, a veteribus libris.

² Er. et Lov., *in se ipso Deo*. Melius editi alii et unumscripti, *in se ipso Deo*.

